


Compromisu xi majo xi casahmi nina cojo xuta (El
Nuevo Testamento en el mazateco de Chiquihuitlán
de Juárez ... y en español)



New Testament in Mazatec, Chiquihuitlán (MX:maq:Mazatec,
Chiquihuitlán)

**Compromisu xi majo xi casahmi nina chojo xuta (El
Nuevo Testamento en el mazateco de Chiquihuitlán de
Juárez ... y en español)
New Testament in Mazatec, Chiquihuitlán (MX:maq:Mazatec,
Chiquihuitlán)**

copyright © 1991 Wycliffe Bible Translators, Inc.

Language: Mazatec, Chiquihuitlán

Translation by: Wycliffe Bible Translators, Inc.

Mazateco, Chiquihuitlán [maq], Mexico

Copyright Information

© 1991, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mazatec, Chiquihuitlán

© 1991, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022
3ee7eab4-2659-54e8-8e90-b0a016392daf

Contents

San Mateo	1
San Marcos	51
San Lucas	83
San Juan	142
Hacutjin Casahmi Apóstol	185
Romanos	236
1 Corintios	258
2 Corintios	278
Gálatas	292
Efesios	299
Filipenses	306
Colosenses	311
1 Tesalonicenses	316
2 Tesalonicenses	320
1 Timoteo	323
2 Timoteo	329
Tito	333
Filemón	336
Hebreos	338
Santiago	355
1 Pedru	361
2 Pedru	367
1 Juan	371
2 Juan	377
3 Juan	378
San Judas	379
Apocalipsis	381

Cjuandajyihi xi catsihindu San Mateo Tsëhë Jesucristu

Xutachanga rë Jesucristu

¹ Xujun vihi ne, setaha xujun ñihi rë xutachanga rë Jesucristu, me xi tjë rë David, hacuaha tjë rë Abraham.

² Abraham ne, me vëhë xi xutachanga xi má nahmi rë Isaac. Isaac ne, me vëhë xi xutachanga xi má nahmi rë Jacob. Jacob ne, me vëhë xi xutachanga xi má nahmi rë Judá cojo hntsë cha.

³ Judá ne, nahmi má me tsëhë Fares cojo Zara; naa rë me ne, Tamar hmí rë. Fares ne, me vëhë xi xutachanga xi má nahmi rë Esrom. Esrom ne, me vëhë xi xutachanga xi má nahmi rë Aram.

⁴ Aram ne, me vëhë xi xutachanga xi má nahmi rë Aminadab me xi xutachanga xi má nahmi rë Naasón, me vëhë xi xutachanga xi má nahmi rë Salmón.

⁵ Salmón ne, nahmi rë Booz me; hane Rahab ne, naa rë me. Booz ne, nahmi má me tsëhë Obed. Naa rë me vë; má Rut. Obed ne, me vëhë xi xutachanga xi má nahmi rë Isaí.

⁶ Isaí ne, me vëhë xi xutachanga xi má nahmi rë David. David jan ne, me vëhë xi cavitexa nangui rë Israel. Hane David ne, me vëhë xi xutachanga xi má nahmi rë Salomón. Naa rë Salomón ne, titjun chjuun rë Urias camá me.

⁷ Salomón ne, me vëhë xi xutachanga xi má nahmi rë Roboam. Roboam ne, me vëhë xi xutachanga xi má nahmi rë Abías. Abías ne, me vëhë xi xutachanga xi má nahmi rë Asa.

⁸ Asa ne, me vëhë xi xutachanga xi má nahmi rë Josafat. Josafat ne, me vëhë xi xutachanga xi má nahmi rë Joram. Hane Joram ne, me vëhë xi xutachanga xi má nahmi rë Uzías.

⁹ Uzías ne, me vëhë xi xutachanga xi má nahmi rë Jotam. Jotam ne, me vëhë xi xutachanga xi má nahmi rë Acaz. Acaz ne, me vëhë xi xutachanga xi má nahmi rë Ezequías.

¹⁰ Ezequías ne, me vëhë xi xutachanga xi má nahmi rë Manasés. Manasés ne, me vëhë xi xutachanga xi má nahmi rë Amón. Amón ne, me vëhë xi xutachanga xi má nahmi rë Josias.

¹¹ Josias ne, me vëhë xi xutachanga xi má nahmi rë Jeconías cojo hntsë cha. Nixtin hya ne, xutaxín ne, cafahaxín me xuta nangui rë Israel, quijicojo me xuta jan nangui Babilonia.

¹² Hane xi cama quiji me Babilonia, Jeconías vë ne, camá me vëhë xutachanga xi má nahmi rë Salatiel. Salatiel ne, me vëhë xi xutachanga xi má nahmi rë Zorobabel.

¹³ Zorobabel ne, me vëhë xi xutachanga xi má nahmi rë Abiud. Abiud ne, me vëhë xi xutachanga xi má nahmi rë Eliaquim. Eliaquim ne, me vëhë xi xutachanga xi má nahmi rë Azor.

¹⁴ Azor ne, me vëhë xi xutachanga xi má nahmi rë Sadoc. Sadoc ne, me vëhë xi xutachanga xi má nahmi rë Aquim. Aquim ne, me vëhë xi xutachanga xi má nahmi rë Eliud.

¹⁵ Eliud ne, me vëhë xi xutachanga xi má nahmi rë Eleazar. Eleazar ne, me vëhë xi xutachanga xi má nahmi rë Matán. Matán ne, me vëhë xi xutachanga xi má nahmi rë Jacob.

¹⁶ Jacob ne, má me nahmi rë José, xihin rë María naa rë Jesús me xi hacuaha yaha ñihi rë Mesías.

¹⁷ Cuatjín camá xi cavatju teñuju ndiya xi cavatju xi cjin xuta tisetin me nixtin rë Abraham hisca nixtin rë David. Hacuaha cama teñuju ndiya xi cjin xuta tisetin me nixtin rë David hisca hya xi xutaxín jan ne, cafahaxín me xuta nangui rë Israel, quijicojo me xuta nangui Babilonia. Hane hacuaha camá teñuju ndiya tsëhë nixtin hya hisca nixtin xi catsin Mesías.

Hya xi catsin Jesucristu

¹⁸ Cuitjín camá nixtin xi catsin Jesucristu: María, naa rë Jesús ne, tacun vasen cjuavixan rë na cojo José. Peru chaja sa xi cjuaha xicjin na cojo me ne, casacu rë na quihndi ngatsë rë Hasen rë Nina.

¹⁹ José, me xi cuixan cojo na jan ne, tyjahi me cojo cjuatacun rë me xcun Nina. Hane xi mijí scandi me cjuasava rë na, catsingatahacacun me xi taha hma ni ne tsismicacun me na.

²⁰ Cuatjín catsingatahacacun me xi sahmi me peru hora hya ne, cafehetsejen ngu ángel rë Nina ngajñi chini rë me, hane cuitjín cachja ángel:

—José, ngaye quihndi tjë rë David, ximacjintacuín xi chjehentse María cuma chjuun riji na ta, sacuaha quihndi xi yaha na ne, ngatsë rë Hasen rë Nina, camá xi casacu rë na.

²¹ Tsin rë na ngu quihndi xihin. Quihndi vë ne, tehe ñihi rë Jesús. Cuatjín cjuaha ñihi ta, tsëhë xi cuaxëtje rë xuta rë tsëhë jyë rë me.

²² Yějē xcusun vihi ne cuatjin cama, cojo sa xi cuetjucaa jain cjua xi cachja profeta nixtin hatsëë cuitjin:

²³ Ngayujun ni nutsujun ta ngu chjuun xungun ne, sacu rë na ngu quihndi xihin.

Quihndi jan ne, suañihi me Emanuel.

Emanuel ne, vëhë cjua xi vijne: Nina ne, jiya me ngajñi naja.

²⁴ Ngajan xi hya xi cavasca rë José ne, casahmi me tutjin cachja ángel cojo me. Cafahatsja me María ne xi camá chjuun rë me na.

²⁵ Peru hisca xi cavatju catsin quihndi ne, sehe caviyuju cojo xicjin me. Hane casuañihi rë me quihndi jan, Jesús.

2

Ngujo cha xi vechu cjuatacun rë ne, cavëë cha niñú tsëhë Jesucristu

¹ Nixtin xi catsin Jesús nangui Belén, distritu Judea, nixtin hya ne, Herodes vitexa me xuta nangui vë. Hacuaha nixtin hya ne, ngu jo cha xi vechutaha cjuatacun rë ne, cavetjun cha ladu vetjucaa tsuhi cafehe cha nandya Jerusalén.

² Hane cuitjin cachja cha:

—¿Jani sacu niji quihndi xi cuitexa nangui Israel? ta cahyin xi cavetjucaa niñú rë me ngajan ladu vetjucaa tsuhi. Hane nduvintjenguin me xi chjihincuin me.

³ Hya xi cama ne, jemu cama xti rë Herodes xi tu cahndë me cjua jan; cojo xuta nangui Jerusalén ne, cama xti rë me.

⁴ Hya xi cama ne, Herodes ne, cajindayahava me yějē ni nahmi xi matitjun cojo yějē cha vicuya cjuachacun rë xuta nangui Israel. Sehe cavinenguise me ¿jani xi tsin xu me xi má Cristu?

⁵ Hane cuitjin cafayangui me:

—Ngajan nandya Belén, distritu Judea tsin ta cuatjin catsihindu profeta tsëhë nandya jan xi ngajan tsin quihndi:

⁶ Ngaye, nandya Belén, ngaye nandya tsëhë xuta tjë rë Judá, hacuaha vengui chji ri xcun xuta matitjun nangui Judá.

Ta ngajñi rë xuta riji ne cuetjutsejen ngu me xi cuitexa rë xuta naha, xuta nangui Israel.

⁷ Hya xi camá ne, Herodes ne, cajindayahama me cha xi vechu cjuatacun rë jan. Cafahataha rë me cha. ¿Mé hora cjuaquixi tsëhë mé nixtin camatsejen niñú jan?

⁸ Ngaxtun vëhë ne, sehe cavitexa me cha xi cjue cha Belén. Hacuaha cuitjin cachja me cojo cha:

—Tangun ngajan Belén. Chjinengunsunndujun yějē tsëhë quihndi. Hane xi sacu nuju cjuaquixi ne, ningatjun ná cjua sehe cojo ngahan ne hacuaha cjuë cjuahárcun quihndi.

⁹ Xi cavihndë cha xi cuicun vi cjua jan, cavetju cha quiji cha. Hane niñú xi cavetjucaa ngajan ladu vetjucaa tsuhi jan ne, hacuaha quiji titjun hisca xi cavechu cahndë hiscan xi jiña quihndi, hane ngajan cavasén.

¹⁰ Hane xi cavëë cha niñú xi ngajan cavasen ne, jercu tu ndama camaha ni rë cha.

¹¹ Hane xi cavisehen cha ndihya hiscan siu me ne, cavëë cha quihndi jan. Hacuaha cavëë cha naa rë me, xi hmí rë María. Sehe quiji cavixcuhnchi cha cafaharcun cha quihndi jan. Hane sehe cavuxaha cha hiscan hinchá rë cha cuatjo, hane casua cha oro cojo tyjungunsa cojo tyjungunjne xi hmí rë mira.

¹² Hya xi cavatju vëhë ne, tsëhë xi cachja chini cojo rë cha xi cuyaaín cha taha ladu hiscan tacun Herodes ne, tahaxin cavuya cha nangui rë cha.

Quiji me hiscan nangui Egipto

¹³ Hya xi quiji cha xi vechu cjuatacun rë jan ne, cafehetsejen ngu ángel rë Nina ngajñi chini rë José, hane cachja cuitjin:

—Tisatjinhngue, tihincueje quihndi cojo naa rë. Tiyun hiscan nangui Egipto. Hane ngajan cuinechun hisca xi tsingátju cjua xi cuyun. Cuatjin nihñu ta tsëhë xi Herodes ne, cuanguise me quihndi xi tsiquehen me.

¹⁴ Hane cavisatjenhnga me nixten quijicojo me quihndi jan cojo naa rë, cafe me Egipto.

¹⁵ Hane xi cafehe me ngajan Egipto ne, ngajan caviyujutaha me hisca nixtin xi cahme Herodes. Cuatjin cama sehe hatuxa camachihin cjua xi catsingatju Nina cojo profeta rë me hatsëë nixtin. Cuitjin chja cjua jan: “Cajindáya rë quihndi naha xi nduvaniji tsëhë nangui Egipto.”

¹⁶ Hya xi camachaya rë Herodes xi camá cavindacha cha xi vechu cjuatacun rë jan ne, jercu cama cjan rë me. Hane cavitexa me yo xi tsiquehen rë yějē ni quihndi xihin xi cjëë cjuë jyan nu, yějē ni quihndi nandya Belén cojo distritu rë.

¹⁷ Vëhë cjua xi cachja Nina xi catsihindu profeta Jeremías:

¹⁸ Vinuhya rë cjuava ngajan nandya Ramá.

Jemu tjin cjuandusin.

Na Raquel ne, jihndava na ngatsë rë quihndi rë na.

Hane tsajin cjuetacun xi cuma rë na ta tsëhë xi ha café quihndi.

¹⁹ Hane xi cavatju cahme Herodes ne, cavuya cafehetsejen nga ángel rë Nina ngajñi chini rë José ngajan Egipto ne,

²⁰ cuitjin cachja:

—Tisatjinhgue tihincueje quihndi cojo naa rë. Tihinniji nandya Israel. Tihin ta tsëhë xi ha cahme cha xi meje tsiquehen rë quihndi. Cuatjin cachja.

²¹ Hya xi camá ne, cavisatjenhnga José ne, sehe cavetju me quijicojo me quihndi cojo naa rë, hane sehe cavisehen nga me nangui Israel.

²² Peru xi cahndë José xi Archelaus vitexa me distritu Judea ta me vëhë vitexa me ngojo rë nahmi rë me, Herodes, vëhë xi camacjincacun José mijí cjue me ngajan. Hane xi cachja chini cojo rë me ne, sehe cavisehen me distritu Galilea.

²³ Caviyujutaha me ngajan ngu nandya xi hmí rë Nasaret. Cuatjin cama sehe cuetjucaa cjua xi catsihindu profeta tsëhë me xi xuta ne, cuichja me xi Jesús ne, xuta Nasaret me.

3

Cachja Juan Vitenda rë Xuta ngajan ngu xín tsëhë nandya

¹ Nixtin hya ne, cavetjucaa tsejen Juan Vitenda rë Xuta ngajan nguñña tsëhë distritu Judea.

² Cuitjin catsiquihndë me xuta:

—Nindeyun cjuatacun nuju ta, camatiña nixtin xi Nina ne, cuitexa me ngasunhdë.

³ Cuatjin tsëhë cha Juan vihi, cha vihi xi camahindu tsëhë cha xcun xujun xi chja cjua rë profeta Isaias xi chja cuitjin:

Cuitjin jercu hñu tsiquihndë ngu xuta ngajan hiscan jemu xín tsëhë nandya:

“Tuhun chjину ndiya xi cuinduva Nina;

hacuaha ninguixun cjuatacun nuju tsëhë me.” Cuatjin cachja me.

⁴ Tsjan rë Juan jan ne, tsja rë chu camellu camá hacuaha cojo ngu cinturón chuxin tsihñu me cahntsua me. Hane xi jinë me ne, chu nchahva cojo tsjen rë chu tusen.

⁵ Hane jemu cjín xuta quijitjengui me Juan, xuta nandya Jerusalén, xuta distritu Judea cojo xuta xi siutahandee rë ndajyë Jordán.

⁶ Xuta jan, xi cavijacun me jyë rë me cojo Nina camá cavitenda Juan me ngajan ndajyë Jordán.

⁷ Peru xi cavutsejen Juan xi cjín xuta tifehe tixtenda me; cha tsëhë partidu fariseo cojo cha tsëhë partidu saduceo ne cachja me cojo cha cuitjin:

—jNgayujun ni ngayun quihndi rë chu tsehen matsejen ne!, ¿yo cavinchangui nuju xi nihñu ngahñu xi cjuetjuntjun tsëhë castigu xi hatuxa tsingatju Nina?

⁸ Sá xi meje jain cjuetjuntjun matsejen ne, nihñu suvá cjuandaja sacuatjin sahmi xuta xi catsindeya jain me cjuatacun rë me.

⁹ Xicanujuun cahntsua xahasen nuju cjua vihi: “Ngayaan ne, tsajin mé cuma naja ta, tsëhë xi tjë rë Abraham ngayaan.” Xicanujuun cuatjin matsejen ta, nguehe cuichjá cojo nuju ta Nina ne, hisca cojo ndyojo xi cuicun vi ne, cuma sahmi me xi cumá tjë rë Abraham.

¹⁰ Chutsujun ta ngayun matsejen ne, tangun ngayun cojo yatjë xi ha quitahachjine quicharcu tyjama rë xi cuetsihin xti rë. Yëjë ni yatjë xi suaain tu xi ndaja matsejen ne, xti rë, sehe cueti.

¹¹ Ngahan matsejen ne, cojo nandá ni tiviténda nuju, peru sehe cuinduva me xi hitsë sa jyë ngahñu tjin rë cjuatacun rë xi cuma ná ngahan, me xi hitsë sa jyë nga cojo cjuatacun rë xi cuma ná ngahan. Hane me vëhë cueya me Hasen rë Nina cahntsua xahasen nuju, hacuaha tangun me sacuaha ngu ndihi xi tsityjahi rë cjuatacun nuju.

¹² Me vëhë matsejen ne, sacuaha xi ha yahatsja me quicha xi tsicaha rë xtë rë trigo cojo sa xi cuma tyjahi ndaja trigo xi casechun rë tsëhë me, hacuaha cjuaya me trigo tyjahi xi cuinchandaja me, hane xtë rë jan matsejen ne, cuaca me xcun ndihi xi tsajin nixtin coho. —Cuatjin cachja Juan.

Caxtenda Jesús

¹³ Nixtin hya ne, hacuaha cavetju Jesús tsëhë distritu Galilea hane cafehe me ndajyë Jordán xi xtenda me.

¹⁴ Peru mijí sua Juan cahndë ta cachja me:

—Hitsë sa ndaja xi ngayun cuitendun ná. Hacuiin xi ngahan cuitenda nuju.

¹⁵ Ngajan xi cafayangui Jesús cuitjin:

—Jéya, cuatjin ndatjin xi cuma quihndë ta mameje rë xi cumachihin yëjë xcusun xi cavitexa Nina.

Hane catsingatihin Juan ne, cavitenda me Jesús.

¹⁶ Xi cama caxtenda Jesús ne, xi tu tivetju me tséhë nandá jan ne, ngajan cavëë me xi ngahnga ne, catuxaha. Hane Hasen rë Nina ne, canduvajnetsejen casesun rcu me. Hane sacuaajiyihi xcusun rë ngu paloma jiyihi.

¹⁷ Hacuaha canuhya rë ngu cjua ngajan ngahnga xi cachja cuitjin:

—Cha vihi xi quihndi naha xi hmú cáacun. Jemu ndama ná ngatsë rë cha.

4

Cafahachuva Satanás Jesús xi choho sahmi me

¹ Hya xi camá ne, Hasen rë Nina ne, quijinihi xu cojo Jesús ngajan ngu xín tséhë nandya ta ngajan cjuahachuva xitsehen me.

² Hya xi cama ne, Jesús ne, yachan nixtin cojo yachan nixten cajinii me niñu. Hya xi cavatju vëhë ne, jercu camavojo rë me.

³ Sehe camatiñataha xu xitsehen xi cjuahachuva rë me. Cachja cojo rë me cuitjin:

—Sá xi ngaye jain xi Quihndi rë Nina ngaye ne, tinoje cojo ndoyo vihi ne, catama niñu. —Cuatjin xu cachja xitsehen cojo rë me.

⁴ Peru cuitjin cafayangui me tséhë xitsehen jan:

—Xcun xujun rë Nina ne, cuitjin camahindu: “Hacuini suvá ngatsë rë niñu xi siu xuta cjuahñu ta hacuaha mameje rë me tséhë yëjë ni cjua xi catsingatju Nina.”

⁵ Sehe xitsehen jan quijicojo xu rë me nandya Jerusalén, nandya ximinchacun, quijisun xu me rcu cjin yungun xi matitjun

⁶ sehe ngajan xi cachja xu xitsehen:

—Sá xi ngaye jain xi Quihndi rë Nina ngaye ne, ningatjin yojo riji tséhë ndya ne hisca nangui. Ndaja hye ta tsajin mé cuma ri ta xcun xujun rë Nina ne, cuitjin chja: Nina ne cuitexa me ángel rë me xi sahmi ri cuidadu.

Cjuahántsari,

cojo sa xi ntsacui ne, sacuinhmuaain rë cojo hisca ngu ndoyo.

⁷ Ngajan xi cafayangui xu Jesús tséhë xitsehen cuitjin:

—Hacuaha cuitjin chja xcun xujun rë Nina: “Míj rë xi chjuhunchuvun Nina nuju.” —Cuatjin xu cachja Jesús.

⁸ Hane ngu ndiya nga quijicojo xitsehen Jesús, quijicojo rë me ngu ndetjún hnga ne, sehe catsingacun xitsehen jan me jingujyë ni nandya tséhë ngasunhndë cojo yëjë ni cjuanchina xi tjin rë.

⁹ Ngajan xi cachja xitsehen cojo rë me cuitjin:

—Suá ri yëjë nandya xi cuacún vë cojo cjuanchina rë. Hatuxa suá ri sa xi cuindove cuiticjexcuin nguehe xi chjehercuin ná.

¹⁰ Sehe cafayangui Jesús tséhë xitsehen cuitjin:

—Tihinxin Satanás, ta tséhë xi xcun xujun rë Nina ne, cuitjin camahindu: “Meje rë xi chjuhunrcun Nina naja, hacuaha ngu ni me vëhë xi meje rë xi nihñuchuhun hacutjin xi meje rë me.”

¹¹ Xi cuatjin xu cachja Jesús cojo xitsehen jan ne, cavetjuxin tséhë me. Hane cafehe tjengui ángel me xi cjuahacuenda rë me.

Jesús ne, vetsihin sahmi me xa ngajan distritu Galilea

¹² Xi camachaya rë Jesús xi jiya Juan Vitenda rë Xuta ndavaya ne, quiji me distritu Galilea.

¹³ Hane cavetjuxin me tséhë nandya Nasaret, quiji cavejña me nandya Capernaum. Nandya jan ne, tacun tjeheh rë ndajyë. Hane nandya jan ne tséhë xuta tjë rë Zabulón cojo Neftalí.

¹⁴ Cuatjin cama sehe camachihin cjua xi camahindu xcun xujun xi chja cjua rë profeta Isaías xi chja cuitjin:

¹⁵ Xuta xi viyuju me nangui rë Zabulón cojo Neftalí, nangui ngajan ngunda ndajyë Jordán, ngajan tjeheh rë ndachacun, tséhë distritu Galilea, nangui rë xutaxín.

¹⁶ Xuta jan xi jñu cjuatacun rë me, cavëë me ngu me xi sacuaha ngu ndihi seti xi sua rë me cjuahasen.

Xuta xi jemu tsavi siu me tséhë cjuaveya, ndihi jan ne casua rë me hasen rë.

¹⁷ Nixtin hya ne, Jesús ne, cavetsihin catsujiyihiya me cachja me cojo xuta cjua rë Nina. Cuitjin cachja me:

—Nindeyun cjuatacun nuju ta tséhë xi camatiña nixtin xi Nina ne cuitexa me nga-sunhndë.

Jesús ne, jindaya me cha xi tjun cumá xuta ladu rë me

¹⁸ Cama ngu nixtin xi tsujyihya me ngajan tjeheh laguna tsëhë Galilea ne, cavëë me jo me xi hntsë, ngu me xi hmí rë Simón cojo ngu me xi hmí rë Andrés. Titsingatjenya me changa ngajñi ndachacun, tsëhë xi hatuxa xá rë me xi faha me chu ti.

¹⁹ Hane Jesús ne, cachja me cojo me cuitjin:

—Nduvun cuanguen cojo ná. Hane cuicuyá nuju xi cuangun nuvun xuta xi cuisehen me ladu naha ngojo rë xi nuvun chu ti. —Cuatjin cachja me.

²⁰ Hane hora vëhë ni caviyuju me changa jan, hane cavetju me quiji me cojo Jesús.

²¹ Hitsë sa nguvan ne, cavëë Jesús jo cha xi hacuaha hntsë: Jacobo cojo Juan, cha quihndi rë Zebedeo. Híncha cha cahntsua barcu cojo nahmi rë cha, ngajan tifuyataha cha changa rë cha. Hacuaha cajindaya Jesús cha xi cjucojo me cha.

²² Sehe caviyuju cha barcu jan, hane cavejña cha nahmi rë cha quiji cha cojo Jesús.

²³ Hane Jesús ne, catsujyihya me yëjë ni ladu tsëhë distritu Galilea. Xi cavisehen me yungun ne, cavicyua me xuta, cachja me cojo xuta cjuandajyihí tsëhë gobiernu xi sahmi Nina. Hacuaha catsirqui me xuta hmu rë; camandaja xuta tsëhë yëjë ni chíhin cojo tsëhë yëjë ni cjuahmu rë me.

²⁴ Hane cavitsojo cju tsëhë cjuarcun xi casahmi Jesús. Cavitsojo cju jan hisca yëjë nangui xi hmí rë Siria. Hane xuta ne, cafehetjengui me Jesús yaha me xuta hmu rë tsëhë yëjë xcusun chíhin hane catsirqui me. Hacuaha catsirqui me xuta xi híncha xitsehen cahntsua xahasen rë me cojo xuta xi má rë me chajan cojo xuta xi cahme yojo rë.

²⁵ Hane quijitjengui xutacjin jan Jesús ne, xuta tsëhë cahndë xi cuicun vi: tsëhë tē nandya xi tsëhë Decápolis, cojo nandya Jerusalén, cojo yahnga sa xuta tsëhë distritu Judea, cojo xuta tsëhë nangui ngunda tsëhë ndajyë Jordán.

5

Xuta xi ndaja tsëhë cojo xuta xi hmu tsëhë

¹ Hya xi cavutsejen Jesús xi camatangun xutacjin jan ne, quijiniji me ngu ndetjun, hane xi cavëjña Jesús ne, casahmitiña xuta tsëhë Jesús.

² Sehe cavetsihin cavicyua me xuta jan cuitjin:

³ —Jemu ndaja tsëhë me xi machaya rë me xi tsichaja sa rë cjuatacun rë me xcun Nina matsejen ta satë rë me gobiernu xi sahmi Nina.

⁴ 'Jemu ndaja tsëhë me xi jihndava me tsëhë cjuachoho matsejen ta Nina sua rë me cjuetacun.

⁵ 'Jemu ndaja tsëhë xuta jeya, xuta xi hacuiin xta me matsejen ta, cjuahatsja me nangui xi sua Nina.

⁶ 'Jemu ndaja tsëhë me xi sacuaha sahmi yahnga xuta xi vojo rë xi fi tjengui rë comida, cuanitjin tjengui me xcusun xi cuma tyjahí cjuatacun rë me xcun Nina matsejen ta, cuechu nixtin xi cuiyujuchihin cjuatacun rë me.

⁷ 'Jemu ndaja tsëhë me xi tjin rë cjuayumatacun cojo xuta, ta hacuaha cjuahatsja me cjuayumatacun tsëhë Nina.

⁸ 'Jemu ndaja tsëhë me xi tjin ngu cjuatacun tyjahí cahntsua xahasen rë me matsejen ta, scuëë me Nina.

⁹ 'Jemu ndaja tsëhë me xi tsinguejyu rë xuta xi chohovëë xicjin me matsejen ta, me vëhë jan ne, cuichja Nina xi quihndi rë me.

¹⁰ 'Jemu ndaja tsëhë me hya xi tsujyihya tjengui xuta me cojo cjuahngatacun ngatsë rë xi tjin rë me ngu cjuatacun cojo Nina matsejen, ta satë rë me gobiernu xi sahmi Nina.

¹¹ 'Jemu ndaja tsujun ngayun ne sá xi ngatsë naha choho cuichja xuta tsujun o sá xi tsujyihya tjengui nuju xuta cojo cjuahngatacun o sá xi cojo cjuandesu tsicanijiyë me ngayun.

¹² Nixtin hya ne, jemu catama sua rë xahasen nuju ngatsë rë cjuañihi vë ta jemu jyë ngu cjuandaja xi tacunya nuju ngajan ngahnga. Cuanitjin ni choho casahmi xutachanga naja cojo profeta rë Nina xi caviyuju hatsëë nixtin.

Xuta ne, meje rë xi sahmi me sacuaha naxa

¹³ 'Ngayun, tjin hacutjin machji rëhë ngayun ngajñi rë xuta sacuaha sahmi naxa xi sahmi xtya rë ngu xichine. Ta sá xi naxa cjuë xtya rë ne, tsajin sa ngu xcusun xi cuma sahmi xtya rë. Hane sá xi cjuë xtya rë ne, tsajin me machji rëhë ta, scandi ni xuta, ngajan ni sune me.

Má naja ndihi rë ngasunhndë

¹⁴ 'Cuanitjin ne, tjin hacutjin machji rëhë ngayun ngajñi rë xuta sacuaha machji rëhë ngu ndihi xi sua hasen rë. Ta sá xi ndetjun tacun nandya matsejen ne, hatuxa tsejen; tsajin me xi cuatsa rë.

¹⁵ Cuanitjin ne, hacuaha tsajin ngu xuta xi ha cavetaha rë me ngu ndihi ne, sehe cjuaha me cueyahma me ngahma rë ngu caxa. Hatuxa cjuaha me cuejñatsejen me cahndë rë cojo sa xi xuta xi siu me hiscan xi seti ndihi jan ne, cuechu hasen rë.

¹⁶ Hacuanitjin chuva vëhë, meje rë xi nihñu cjuandaja xi scuëë xuta xcusun xi nihñu hane ngatsë rë xcusun jan ne, sahmi jyë me sahmi hnga me Nahmi nuju xi tacun me ngahnga.

Cjua xi cacha Jesús tsëhë ley rë xuta tjë rë Israel

¹⁷ Xi caningatuuntacun matsejen xi nduvá tsinguétsun ngahñu rë ley xi catsihindu xutachanga naja Moisés o cjua xi cacha profeta. Cahndë rë xi tsinguétsun ne, sahmechihin cjua jan.

¹⁸ Hatuxa cuichjá cojo nuju cjuaquixi ta hya xi tacun cuaha ngahnga ne tacun cuaha ngasunhdë ne, cumaji chjahanxin rë cjua rë ley jan cojo yëjë ni letra rë ta, cuejña cuaha hiscan cumachihin cjua rë.

¹⁹ Vëhë xi tu yo ni xi sahmicuendaain tsëhë hisca ngu rquí cjua rë, hane sá cuinchangui me yahnga xuta xi cuanitjin sahmi me, chuva cuengui chji rë me hya xi sahmi Nina gobiernu. Peru tu yo ni me xi cjuahacuenda me hacuaha tsingacun me xuta xi cjuahacuenda me ley jan, me vëhë cuma titjun me hya xi sahmi Nina gobiernu.

²⁰ Nguehe cuichjá cojo nuju ngayun ta meje rë xi hitsë sa tyjahi cjuatacun nuju xi cumá rë cjuatacun rë xuta xi vicuya me ley o sá xi xuta partidu fariseo, ta sá tsajin ne, satiin nuju gobiernu xi sahmi Nina.

Cjua xi cavicuya Jesús tsëhë xuta xi hngacacun

²¹ Ha hyun cjua xi cafaha xuta hatsëë nixtin xi chja xi canicuun xingun hacuaha chja xi yo xi tsiquehen xicjin matsejen ne, cjue me xcun juez xi tsichuva me jyë rë me.

²² Peru cuichjá cojo nuju xi hisca yo xi macjan rë cojo xicjin ne, satë rë xi tsichuva me. Hane yo xi chjataha xicjin ne, cjue xcun juez xi matitjun. Cuanitjin yo me xi cuichja tsëhë xuta: “Ngarca ngayun”, cuechji me tsëhë jyë rë me ngajan xcun ndihi xi tsajin nixtin coho.

²³ Ngatsë rë vihi, sá xi hora xi vejñu chjë nuju ngasunscun ne, sá xi tu ñahñu ni vitsjen nuju xi choho canihñu cojo xingun

²⁴ ngajan catejñavasen chjë nuju, titjun cuangun tjengun xingun, hane chjayun rë me cjuaninchataha hane xi camandaja yun cojo me, sehe cuyun cuejñu chjë nuju jan.

²⁵ Sá ndiya tivangun cojo xuta xi meje cuinchajyë nuju xcun xutaxa rë ne, meje rë xi cuisiajmuchuhun cojo me, cojo sa xi ngajñi nuju cuma chihin ta sá tsajin ne, cjucojo nuju me xcun juez. Hane juez matsejen ne, squindaya me mayu sehe sahmi nuju me entregadu, hane cjue cueya nuju me ndavaya.

²⁶ Ta cuichjá cojo nuju cjuaquixi ta hatuxa tsajin nixtin xi cuetjun tsëhë ngajan jinguyëjë rë xi cjëë cuechjun yëjë ni tujún xi quitjun.

Cjua xi cavicuya Jesús tsëhë xuta xi sahmi cjuatsehen cojo rë ngu xi hacuiin tsëhë me

²⁷ Ha hyun cjua xi cafaha xuta hatsëë nixtin xi chja cuitjin: “Xicanihñuu cjuatsehen cojo rë ngu chjuun o cojo rë ngu xihin xi hacuiin tsujun.”

²⁸ Peru cuichjá cojo nuju xi hisca xi ngu xihin xi vutsejen me ngu chjuun xi macacun me cojo na, ngajñi cjuatacun rë me ne, ha casahmi me cjuatsehen cojo ran.

²⁹ Hindë sá xi cjuatacun nuju meje rë xi nihñu ngu jyë tsëhë xcusun xi chutsujun cojo tuxcuun ladu quixi, hitsë sa ndaja tsujun sá xi chjuhunxun tuxcuun jan chandunxun cojo sa xi hacuiin tsitsehen nuju, ta hitsë sa vengui chji rëhë xi ma chaja nuju ngu rquí yojo nuju hane hacuiin xi cuangun jingu hiscan xi má hasen rë nima castigu.

³⁰ Cuanitjin ne, sá xi cjuatacun nuju meje rë xi nihñu ngu jyë cojo ntsun quixi ne, hitsë sa venguichji rëhë xi chandunxun ntsun jan ta hitsë sa ndaja tsujun xi machaja ngu rquí yojo nuju tsëhë xi cuangun jingu hiscan xi má hasen rë nima castigu.

Jyë rë xuta xi tsismi xicjin me sehe cuixan cojo jingu sa

³¹ Hacuaha cafaha xuta hatsëë nixtin cjua xi chja cuitjin: “Ngu cha xi tsismi chjuun rë ne catejña cha ngu xujun tsja chjuun jan xi ha quihndë mijí rë cha na.”

³² Peru nguehe cuichjá cojo nuju ta yo xi tsismi chjuun rë handasa ndastu mé cjuatsehen casahmi chjuun jan cojo ngu xihin xi hacjahi, hacuaha tjin rë me jyë ta sehe ngatsë rë xi catsismi me na ne sahmi chjuun jan cjuatsehen. Hacuaha yo xi cuixan cojo chjuun jan ne, tangun jyë rë cojo ngu xi sahmi cjuatsehen cojo ngu chjuun xi hacuiin chjuun rë.

Hacutjin meje rë xi sua cjuaquixi naja

³³ Hacuaha hyun cjua xi cafaha xuta hatsëë nixtin xi chja cuitjin: Hya xi cuinújun: “Vëë Nina”, hatuxa sahmi ngu jyë xi nihñuchuhun cjua xi canújun.

³⁴ Peru nguehe cuichjá cojo nuju ta hora xi cuisiajmu cojo xingun ne, hacuiin cuinújun xi vëë Nina, hacuiin cuinújun xi vëë sa jingu sa quihndi ngasunhdë. Cuinujuun xi vëë ngahnga ta ngahnga ne, tacun Nina xi vitexa me.

³⁵ Hacuaha cuinujuun xi vëë ngasunhdë ta ngasunhdë ne, tangun sacuaha ngu yatë hiscan xi tine ntsacu Nina. Cuiujuun xi vëë Jerusalén ta Jerusalén ne, nandya xi tsëhë Nina, Me xi Matitjun.

³⁶ Cuiujuun cuitjin: “Sá xi quixiin jain cjuá naha ne, catinduva ngu cjuacjintacun xi cuatjun”, ta tsëhë xi ngayun ne, hisca hitsë cumaji cuitexun sá xi cuma jma tsjarcun o sá xi cuma tyjava.

³⁷ Hya xi cuisiajmu, sá xi “joho” nújun ne, cuanitjin ni cuitejña; o sá xi “jéya” nújun, hacuaha cuanitjin ni ndatjin ta, sá xi vetjutë visiajmu cjuá cjín jan ne, cjuá cjín jan ne, nduva tsëhë cjuatsehen.

Meje rë xi nihmutacun xuta xi chohovëë naja

³⁸ Hyun cjuá xi cafaha xuta hatsëë xi chja cuitjin: Cha xi cuahaxin tuxcun xicjin ne, hacuaha chjahaxin rë tsëhë cha. Cuanitjin cha xi cuahaxin nehñu xicjin ne, hacuaha cuanitjin ni chjahaxin rë nehñu cha.

³⁹ Peru nguehe cuichjá cojo nuju ta, canicuyun cjuatsehen. Sá xi tjin yo xi vanguihmu nuju, yo xi vajaya ngu ladu tsa nuju matsejen ne, nicuyun sa ngu ladu catajaya.

⁴⁰ Cuanitjin ne, sá xi tjin yo xi cjucojo nuju xcun juez xi fahataha chingá nuju matsejen ne, hacuaha tuhun rë me cojo yëjë ni tsjan hasu nuju.

⁴¹ Cuanitjin ne sá xi ngu xuta ne, sahmi nuju me nguýë xi chanuju chaha rë me ngu kilómetro, cahndë rë ngu ni, tanguncujun jo kilómetro.

⁴² Yëjë ni xuta xi fehya nuju me mé xi machaja rë me matsejen ne, tuhun rë me. Hane sá xi scuxetaha nuju me, tuhun rë me.

⁴³ Hyun cjuá xi cafaha xuta hatsëë nixtin xi chja cuitjin: “Nihmutacún xuta xi siutahndee nuju; choho hyun xuta xi má condra nuju.”

⁴⁴ Peru cuichjá cojo nuju ta, hacuaha nihmutacún xuta xi má condra nuju; ndaja nihñu cojo xuta xi choho vëë nuju me. Nújunyumuntuhun rë xuta xi tsujyihya tjengui nuju me cojo cjuahngatacun.

⁴⁵ Sá xi cuatjin nihñu ne, cumatsejen xi chjayunngun sacuaha sahmi Nahmi nuju xi tacun ngahnga ta, Nina ne, sahmi me xi ngu chihin ni vetjucaa tsuhi xi casahmi me hane vechu hasen rë hiscan siu xuta tsehen hacuaha hiscan siu xuta ndaja. Hacuaha sahmi me xi vaha tsi xcun jnu rë xuta xi tjin xi cun rë me, hane hacuaha xcun jnu rë xuta xi tsajin xi cun rë me xcun Nina.

⁴⁶ Tsajin yo xi sua chjí nuju tsëhë xi hmutacún xuta xi hmucacun nuju me matsejen, tsëhë xi hacuaha hisca cha faha tujúnsa (xi jemu vaxë cha tujún) matsejen ne, hmucacun cha xuta xi hmucacun rë cha.

⁴⁷ Hacuanitjin ne, sá xi suvun cuinújun nina cojo xuta nuju ne, ¿há hitsë sa ndaja yun xi cuma rë yahnga xuta? ¡jéya! Hisca xuta xi macjaain rë me Nina ne, tjin rë me xcusun ndaja vë.

⁴⁸ Vëhë xi mameje rë xi tangun cojo ngasunhdë nuju cojo ngu xcusun xi tyjahi chichihin ni, cumatangun xcusun nuju cojo xcusun rë Nina xi tyjahi chichihin cjuatacun rë me.

6

Jesús ne, vicuya me tsëhë cjuandaja xi meje rë sahmi xuta

¹ Hya xi nihñu ngu cjuandaja ne, nihñu nguñajatacun, hacuiin nihñu tsëhë xi scuëë nuju xuta; ta sá tsajin ne, ndastu me chji sacu tsëhë Nahmi nuju xi tacun ngahnga.

² Cuanitjin ni sacuaha cjuá vë, hya xi tuhun ngu caridad matsejen ne, xi canijanuu ngu tyjo xi tuhun cumachaya rë xuta cjuandaja jan. Hacuaha cuatjin sahmi xuta xi jo xcun jo hntsua me hya xi sua me caridad ngajan yungun o ndiya ngatsë rë xi vaxëndaja xuta me. Tichjá cojo nuju ta ha vëhë ni chji sacu rë me.

³ Vëhë xi ngayun ne, hya xi tuhun caridad ne, catuun cumachaya rë ntsun ladu xcun mé xi tuhun cojo ntsun ladu quixi.

⁴ Cuatjin hya xi tuhun caridad ne, tuhunhmu matsejen ne, hane xi cuatjin nihñu ne, Nahmi nuju xi tacun ngahnga ne xi cavëë me cjuandaja xi canihñu ne, sua me chji nuju.

Jesús ne, vicuya me hacutjin nihña oración

⁵ Hacuaha hya xi nihñu oración, xi canihñuu sacuaha xuta xi jo xcun jo hntsua me ta me vëhë ne, jemu meje sahmi me oración cahntsua yungun cojo sa hiscan sahmi cru ndiya të hiscan xi scuëë xuta me. Nguehe cuichjá cojo nuju ta ha vëhë ni chji sacu rë me.

⁶ Vëhë xi ngayun ne, hya xi nihñu oración ne, techjun tingotjo ndya nuju hane tangun cahnhun, ngajan hma nihñu oración cojo Nahmi nuju xi tacun ngahnga ta ngu ni me vëhë xi tacun me cojo nuju. Hane Nahmi nuju jan xi vëë me yëjë xcusun xi híncha hma ne, sua me chji nuju.

⁷ 'Hacuaha hya xi nihñu oración, caveyunnanguun ngu cja x hisca suvun vijniircun sacua ha xcusun xi sahmi xuta xi hvín me cja rē Nina, ta xi má rē me vē ne, xi hitsē cjin cja cuichja me ne, hacua ha hitsē sa cuahacuenda Nina tsēhē me.

⁸ Mijí rē xi nihñu xcusun vēhē, ta hisca chaja sa xi chjahyun rē Nahmi nuju xi tacun ngahnga ne, ha vēē me mé xcusun xi mameje nuju.

⁹ Cuanitjin nújun hya xi nihñu oración:

Ngayun Nahmi niji xi nechun ngahnga ne, meje rē xi ngayijin ni xuta ngasunhndē chjihinrcuin nuju.

¹⁰ Nduvun nihñu niji gobiernu.

Catamachihin cjuatacun nuju nguehe ngasunhndē sacua ha ngahnga xi ha camachihin.

¹¹ Nchunchujun ni ne, tuhun niñu xi xini.

¹² Ninchatuhun niji tsēhē yējē ni jyē niji ta hacua ha ngayin suvin ni tininchatihin rē xuta xi choho sahmi me cojo niji.

¹³ Caningatjuun xi chjaháchuva niji cojo cjuatacun niji ta, tuhun niji ngahñu xi cuma cuetjinxin tsēhē cjuatsehen.

Tsujun suvun gobiernu cojo ngahñu, hacua ha tsujun ni hasen rē ngahñu cja nuju. Tsujun yējē vē, yējē nu, yējē nixtin.

¹⁴ 'Hya xi cajnetaha oración jan, cachja sa Jesús cuitjin: sá xi ninchatuhun xuta xi choho casahmi me cojo nuju ne, hacua ha Nahmi nuju xi tacun ngahnga ne, tsinchataha me jyē nuju.

¹⁵ peru sá xi ninchatuun xuta xi choho casahmi me cojo nuju ne, hacua ha Nahmi nuju jan ne, tsinchataain me jyē nuju.

Jesús vicuya me tsēhē hya xi nechun xun rē Nina

¹⁶ 'Ngayun ne, nixtin xi nechun xun rē Nina ne, nihñu va xcusun nuju sacua ha sahmi xuta xi jo xcun jo hntsua me ta sahmi va me xcusun rē me, ta me vēhē ne, hisca catsindeya me xcusun rē me sehe cumatsejen xi tacun me xun rē Nina. Cuichjá quixi cojo nuju ta ha vēhē chji xi sacu rē me.

¹⁷ Vēhē xi ngayun ne, hya xi nechun xun rē Nina ne, tinchacun, nihñu tyjahi yojo nuju.

¹⁸ Cuatjin nihñu cojo sa xi tsajin yo vēē rē xi nechun xun rē Nina, ta suva Nina, Nahmi nuju vēē me. Hane me vēhē ne cuechji me yun.

Cjuanchina xi tacunya ngahnga

¹⁹ 'Cavetjuun cjuanchina nuju nguehe ngasunhndē, ta nguehe ne, sahmi dañu chu xavi cojo xutsē. Nguehe ne cuma scuxahaya cha chējē, hane sehe tsichējē cha.

²⁰ Hitsē sa ndaja ne, tetjún cjuanchina ngajan ngahnga ta ngajan ne tsajin dañu xi sahmi chu xavi cojo sa xutsē. Ngajan ne scuxaaín cha sehe xi tsichējē cha.

²¹ Cuatjin meje rē xi ngajan cuetjun tsujun ta, tsēhē xi hiscan tetjo cjuanchina nuju ne, hacua ha ngajan quitaha cjuatacun nuju cojo.

Ndihi rēyojo naja

²² 'Tuxcuun matsejen ne, vēhē xi sacua ha ndihi rē yojo naja. Vēhē xi hya xi tuxcuun ndacun ne, hatuxa seya cjuahasen cahntsua yojo naja.

²³ Peru sá xi tuxcuun hmu matsejen ne, hacua ha ma jñu cahntsua yojo naja. Sacua ha hasen xi jiya cahntsua yojo naja ne, sá xi hacuín hasen xi cjuaquixi jain ta, suva jñú ne, ijercu tu jñú camahani cuma sa!

Tsajin yo xi ma fahacuenda xa tsēhē Nina cojo tsēhē cjuanchina

²⁴ 'Tsajin yo xi ma fahacuenda xa tsēhē jo patrón ta, tsēhē xi choho cuēē rē patrón xi tjun hane tsihmu cacun rē patrón xi majo jan. O sá tsajin ne, jemu cuetaha yojo rē cojo patrón xi tjun hane patrón xi majo jan ne, hisca sahmicuendaain rē. Vēhē xi xi ngu tangun ni ne, cumaji nihñu hacutjin xi meje rē Nina cojo hacutjin meje rē cjuanchina tsehen xi tsēhē ngasunhndē.

Sahmi cuidadu Nina xuta ladu rē me

²⁵ Vēhē xi cuichjá cojo nuju ta hacuín cuityjanguentacun sá sacu o sá sacuín mé xcusun xi xinu xi sua nuju ngahñu. Hacua ha hacuín cuityjanguentacun sá sacu o sá sacuín tsjian xi chujun. Hitsē sa vengui chji rē cjuahñu nuju xi cumá rē xi chinu, hacua ha hitsē sa vengui chji rē yojo nuju xi cumá rē tsjian xi chujun.

²⁶ Chutsujun chu nisē xi vitjen chu ngahnga ta hacuín tsitjē chu, hacuín fanchi chu, hacua ha tsajin rē chu ndyahnga hiscan cuinchandaja chu xi sinē chu, peru Nahmi nuju xi tacun me ngahnga ne, tsicjen me chu. Ngayun ne, hitsē sa vengui chji nuju xi cumá rē chu nisē vē.

²⁷ Hacua ha tsajin hisca xi ngu xuta xi cuma cuesuntaha me cjuahñu rē me hisca ngu hora ta hacuín cavatsē chji me cjuahñu rē me. Tu mahya ne xi tjercu vityanguicacun me.

²⁸ Cuanitjin ne, ¿mé má chji rēhē xi cuitjanguntacun tsēhē tsjian xi chujun? Chutsujun naxu liriú xi vetju nguuiña ta tsihyaain nachjun hacuaha fahyaain tsjian rē.

²⁹ Peru ngahan cuichjá cojo nuju ta tsjian rē xutachanga naja Salomón ne, handasa jercu ndacun camahani, peru hitsē sa ndajyih tsejen ngu naxu vēhē xi cuma rē tsjian jan.

³⁰ Sá xi cuatjin tsicaja Nina xca nguuiña xi ngu nixtin ne siutaha nguuiña, hane xi tu cuma nchujun nga ne, cueti ne, hitsē guan sa ngayun xi hatuxa tsicaja nuju me. Peru ngayun ne, cjēē cumangutacunndujun cojo me.

³¹ Vēhē xi hacuiin cumacjintacún hane cuinengunsuun cuitjin: “¿Mé comida xini? o sá ¿jani sacú niji xi sihin? o sá ¿mé tsjian chijin?”

³² Hacuiin ta, tsēhē xi xcusun vēhē ne, xuta xi hvín me cjua rē Nina ne, me vēhē xi vityanguicacun me xcusun vēhē. Peru ngayun ne, Nina Nahmi naja ne, ha vēē me xi machaja nuju xcusun vēhē.

³³ Tityjanguntacun hacuaha nechunyun rē gobiernu xi sahmi Nina, hacuaha catama tangun cjuatacun nuju cojo cjuatacun rē me ne, hane yējē ni xcusun vēhē ne, quitahacoo sa sacú nuju.

³⁴ Cuanitjin ne, hacuiin cumacjintacún tsēhē mé xi cuma cuatju nchujuni, ta xi cumá rē nchujuni matsejen ne, hya yaha cjuacjintacun rē. Ngu nixtin ngu nixtin ne, chjuhun cuendun cjuacjintacun rē ta jima ngu nixtin cojo tsēhē.

7

Mijí rē xi nichuvan jingu sa xuta cojo cjuatacun rē me

¹ Hacuiin nichuvun jingu sa xuta cojo cjuatacun rē me, sehe hacuiin tsichuva Nina ngayun.

² Canichuvuun ta sá tsajin ne, chuya xi quixi yun cojo xuta ne, hacuaha cuanitjin quixi Nina cojo nuju; hacuaha chuya xi nichuvunyun matsejen ne, vēhē ni tsichuva Nina yun.

³ ¿Hacutjin má xi matsejen nuju xtē xi jiya tuxcun xingun? ta ngayun ne hitsē sa jyē xi jiya túxcun.

⁴ ¿Hacutjin má xi cuma cuinújun cojo xingun xi meje naxun xtē xi jiya tuxcun me jinguyējē rē xi suvun matsejen ne, machayiin nuju xi hitsē sa jyē xta xi jiya túxcun vē ní?

⁵ Ngayun xuta xi jo xcun jo hntsua ne, naxun titjun xtē jyē xi jiya túxcun vē, sehe cumatsejenndaja nuju xtē xi jiya tuxcun xingun cojo sa xi cuma naxun.

⁶ Sá xi tjin nuju mé xi venguichji rēhē sacuaha tjin rē cjuandaja xi casua Nina yun, tetjuhunndujun hacuiin tu yo ni tuhun rē ta sá tsajin ne, xuta jan ne, tsitjungui me xi ngayun jemu ximinchacun xi cuma nuju. Hacuaha cuichjataha nuju me.

Chjahyun rē Nina mé xi machaja nuju

⁷ Chjahyun rē Nina, hane sua nuju me. Tinchunsun, hane sacú nuju. Tinújun hacuaha chjahyun cahndē, hane Nina sua me cahndē xi cuisuhun cuinújun cjuacjintacun nuju.

⁸ Cuatjin nihñu ta, yējē ni xuta xi fehya rē me ne, cuahatsja me, hane yo xi vanguise ne, sacú rē me, hane yo xi chja hacuaha fehya cahndē me ne, sacú cahndē cuisehen me.

⁹ ¿Há tjin ngu nahmi xi, hya xi quihndi rē me cjuehya ngu niñu ne, cahndē rē xi vēhē ne, sua me ngu ndyojo,

¹⁰ o sá xi cjuehya quihndi yojo rē chu ti ne, cahndē rē vēhē ne, sua me ngu yē?

¹¹ Sá xi ngayun xi xuta jyē yun ma tuhun rē quihndi nuju xcusun xi ndaja. Hitsē guan sa Nina Nahmi naja xi tacun me ngahnga xi jyē hnga me cojo cjuandaja rē me ne, me vēhē vēē me mé cuatjo ndaja xi cuma sua me xuta xi cjuehya rē me.

¹² Sacuatjin xi meje nuju xi sahmi xuta cojo nuju matsejen ne, hacuaha cuanitjin ni nihñu cojo rē me: cuatjin nihñu ta cojo ngu xcusun ni xi tiniñu vēhē ne, ngayun tiniñuchuhun yējē ni cjua rē ley cojo yējē ni cjua xi catsihindu profeta.

Ejemplu tsēhē tingotjo xcu

¹³ Cuisuhun hiscan sahmi Nina gobiernu sá xi cuisuhun tingotjo xcu ta, tsēhē xi sá xi cuisuhun táha tingotjo tē o ndiya xi cjin me vatjun me ne; vēhē ni cjuecojo nuju cjuaveya hiscan xi jemu cjin xuta cjue me.

¹⁴ Ta tingotjo xcu o ndiya hndē ne, vēhē xi cjue cojo nuju hisca xi sacú nuju cjuahñu. Jemu chuya xuta xi sacú rē me tingotjo xcu jan.

Tsejen mé xcusun xuta me ngatsē rē mé xi sahmi me

¹⁵ Cuidadu tsēhē profeta ndacha ta xi tjenguí nuju me, jeya tsejen xcusun rē me sacuaha xcusun rē chu tsánga, peru quixiin vēhē ta suva cjuandacha ta xahasen rē me ne, quitsē rē cjuatsehen sacuaha cahntsua xahasen rē chu lobo.

¹⁶ Tsejen mé xcusun xuta me ngatsë rë xcusun xi sahmi me. Sacuaha ngu ya ne, tsejen mé xcusun rë ngatsë rë tu xi sua. Sacuiin rë xuta uva tséhë ya nahyálatu, hacuaha sacuiin rë xuta tuhaxi xi hmí higo tséhë nahyándeheya.

¹⁷ Quixi jain ta ngu yatjê xi ndaja ne, sua tú xi ndaja, hacuaha ngu ya xi machjiriin ne, hacuaha machjiriin tu rë.

¹⁸ Vêhë xi ngu yatjê ndaja ne, cumaji sua tú xi machjiriin, hacuaha ngu ya xi machjiriin ne, cumaji sua tú xi ndaja.

¹⁹ Hane yatjê xi machjiriin tú rë ne, xtíjñi rë tséhë xi ndaja sehe cueti.

²⁰ Cuanitjin xuta ne, tutjin rë yatê vë ne, cuatjin rë me ta, tsejen xcusun rë xahasen rë me ngatsë rë xcusun xi sahmi me.

Cachja Jesús xi hacuiin yějê ni xuta cuisehen me gobiernu xi sahmi Nina

²¹ "Tjin yo me xi cuichjacojo ná ta nai rë me ngahan, peru cuiisiin me gobiernu xi sahmi Nina nahmi naha; ta ngajan cuisehen suva xuta xi sahmichihin me cjuatacun xi vitexa Nahmi naha xi tacun me ngahnga.

²² Vêhë xi handasa xi jemu cjín me cuichja me nixtin hya jan cuitjin ta: "Nai naha, ngatsë rë xi hñu ngayun, vêhë xi caveyinnangui ñihi nuju ne canújin cjua rë Nina, hacuaha xi canújin ñihi nuju ne, canaxinxin xitsehen, hane cojo ngahñu rë ñihi nuju cama canihñi cjuarcun." Cuatjin cuichja me nixtin hya.

²³ Ngajan xi ngahan ne, cuitjin cjuayanguê tséhë me nixtin hya: "Tángxunxun tsahan ta hveen yo ngayun, ngayun xi nihñu cjuatsehen."

Ejemplu tséhë jo ndihya

²⁴ Yahnga xuta xi visiñuju me cjua naha hacuaha sahmi me sacuatjin chjá cojo rë me matsejen ne, tangun me cojo ngu cha quicun xi hya xi casahmi cha ngu ndihya matsejen ne, hiscan xcun nanguihñu casahmi cha.

²⁵ Hane hya xi cavaha tsi, camajyê ndajyê hacuaha casesuntê nandá, hacuaha cavanga tjo hñu ne, jercu hñu catsivaha rë ndihya jan, peru caticjaainjni tséhë xi xcun nanguihñu secun.

²⁶ Peru yahnga nga xuta xi visiñujuu me cjua naha hacuaha sahmi me sacuatjin chjá cojo rë me matsejen ne, tangun me cojo ngu cha ngarca xi hya xi casahmi cha ngu ndihya matsejen ne, hiscan xcun nangui tsumi casahmi cha.

²⁷ Hane hya xi cavaha tsi, camajyê ndajyê hacuaha casesuntê nandá, hacuaha cavanga tjo hñu ne, jercu hñu catsivaha rë ndihya jan, hane tu ngu ñahñu ne caticja ndihya jan, ngu café cavetsunya.

²⁸ Xi cajnetaha cachja Jesús ne, xutacjín ne jercu quijircun rë me tséhë cjua xi cavicuya Jesús ta,

²⁹ tséhë xi cjua xi vicuya me ne, jercu tjin rë ngahñu, hacuiin sacuatjin cjua xi vicuya maestru xi vicuya ley.

8

Casahmi Jesús xi camandaja ngu cha xi yaha chuxin rë cha chíhin vitaha

¹ Hya ha cavijne me tséhë ndetjun jan, jemu cjín xuta tjengui rë me.

² Hya xi camá ne, cafehe ngu cha xi jingujyê ni chuxin rë yaha rë ngu chíhin xi vitaha, caticjaxcun cha cafaharcun cha Jesús hane cachja cha cuitjin cojo rë me:

—Tatá. Sá xi meje nuju ne, cuma chjuhunxun chíhin xi yaha ná vi. —Cuatjin cachja cha.

³ Hane xi catsixinga Jesús tsja me ne cavetahatsja me cha ne, sehe cachja me cuitjin:

—Meje ná. Catamandaja ngaye. —Cuatjin cachja me.

Hane chíhin jan ne, ngutjen ni caféya.

⁴ Sehe cavitexa me cha cuitjin:

—Hisca xi ngu ni canujiin cojo. Tihin ningacuin yojo riji xcun nahmi sehe catutsejen me xi camandaja ye. Sehe tihinchjehe cjuatjo riji xi tehe rë Nina ngatsë rë xi camandaja ngaye tséhë chíhin jan, sacuaha cavitexa Moisés xutachanga naja. Cuatjin nihñi cojo sa xi cumatsejen xi camandaja jain ngaye.

Casahmi Jesucristu xi camandaja cha mosu xi cavatsë capitán

⁵ Xi cavatju vihi ne, sehe rë cavisehen me nandya Capernaum, hane ngajan cafehe tjengui rë me ngu capitán cafehya cha me favor

⁶ cuitjin cachja cha:

—Tatá. Tjin ná ngu cha mosu xi jiñahmu ndya naha. Cahme yojo rë cha hane jemu jiñañihi cha.

⁷ Ngajan cafayangui Jesús:

—Cjuê ngahan, tsírqúê rë cha.

⁸Ngajan xi cafayangui capitán jan cuitjin:

—Hisca hacuiin sahmi ngujyê xi ngayun cuinduvun ndya naha ta tsêhê xi hitsê sa hñu cjua yun xi cuma ná ngahan. Quihndê ne, ndastu tinújun xi cumandaja mosu naha hane cuma ndaja cha.

⁹Hacuaha ngahan ne, tjin ná xuta xi matitjun tsahan, hane hacuaha tjin ná ngu cientu sindadu xi siu ngahma gobiernu naha xi sahmi hacutjin xi meje ná. Hya xi chjá cojo ngu xi cjue ne, fi; hacuaha xi chjá cojo ngu nga xi cuinduva ne, nduva, hane mosu naha ne, xi chjá cojo xi sahmi mé xi meje ná ne, sahmi. —Cuatjin cafayangui capitán.

¹⁰Hane xi cahndê Jesús cjua vêhê ne, jemu quijircun rê me tsêhê capitán jan, hane cachja me cojo xuta xi tjengui rê me cuitjin:

—Cuichjá cojo nuju ngu cjua ta, ngajñi naja ngayejen ni ngayaan xuta tjê rê Israel ne, cjêê scuêê ngu xuta xi cuatjin ndaja mangucacun me cojo ná sacuaha capitán vihi xi hacuiin xuta tjê naja me.

¹¹Hacuaha cuichjá cojo nuju ta cuinduva xutaxín tsêhê táha ladu vetjucaa tsuhi cojo táha ladu vetje tsuhi cuiyuju me sinêsuhi me cojo Abraham cojo Isaac cojo Jacob ngajan hiscan sahmi Nina gobiernu,

¹²Peru xuta tjê rê Abraham xi quihndi cjuaquixi ne, cuma tsingatju me hiscan jñu ngajan candatsen. Ngajan ne, jemu squihnda me hacuaha tsijanerii me nehñu me.

¹³Hya xi camá cachja Jesús cuatjin cojo xuta ne, sehe cachja Jesús cojo capitán jan cuitjin:

—Cuma cuangun ta tsêhê xi xcusun xi vetjutacun xi má sahme, camachihin.

Hane hora xi cachja me cuatjin ne, camandaja cha.

Jesucristu casahmi me xi camandaja nahya rê Simón Pedru

¹⁴Hya xi cama ne, cavisehen Jesús ndava Pedru ne, hane cavêê me xi jiñahmu nahya rê Pedru cojo chíhin suê.

¹⁵Ngajan xi cavetahatsja Jesús tsja na, hane ngutjen cavetjuxin chíhin jan tsêhê na. Hane hora vêhê ni ne, cavisatjenhnga na hisca cama cafahacuenda na me.

¹⁶Hane hora xi tivetje tsuhi ne, xuta ne, quijicojo me cjin xuta xi hinchá rê xitsehen hane quiji me hiscan tacun Jesús. Hane Jesús ne, cavaxêxin me xitsehen jan cojo cjua ni, hacuaha catsirqui me yêjê xuta hmu rê.

¹⁷Cuatjin casahmi me sehe cumachihin cjua xi cachja profeta Isaiás xi cachja me cuitjin: “Cafaha suva me yêjê chíhin hinda xi tjin rê yojo naja, hane suva me cavaha me chíhin naja.”

Xuta xi meje cjue cojo Jesucristu

¹⁸Xi cavêê Jesús xi jemu tsê xuta hiscan tacun me ne, casua me cjua cojo xicjin me xi cjuexin cojo rê me ngunda laguna.

¹⁹Ngajan cafehe tjengui rê me ngu cha maestru rê ley sehe cachja cha cuitjin:

—Maestro. Tu yani ni xi cuangun ne, cjué cojo nuju. —Cuatjin cachja cha.

²⁰Sehe Jesús ne, cafayangui me cuitjin:

—Chu ninda ne, tjin nguigo hiscan viyuju chu, hane nisê xi vitjen chu ngahnga ne, tjin ndava chu, peru ngahan xi hatuxa Quihndi rê Xuta ngahan ne, hisca ndya naha tsajin. —Cuatjin cachja me.

²¹Ngu nga xuta xi tjengui rê me cachja cojo rê me cuitjin:

—Tatá. Cuanguen cojo nuju peru hya xi cuatju seyaniji nahmi naha.

²²Peru cafayangui Jesús cuitjin:

—Hanguen. Tehe vêhê catisahmi xuta xi cahme cjuatacun rê me, me vêhê catinchaniji me nima.

Jesucristu casahmi me xi cuasen tjo cojo tsindyu rê nandan

²³Hya xi camá ne, cavisehen Jesús cahntsua ngu barcu hane ngajan quiji tjengui rê me xuta ladu rê me.

²⁴Hora xi cjui barcu jan ne, canduva ngu tjohñu xi cavanga xcun laguna jan, hane hisca meje tsa rê barcu jan cojo tsindyu rê nandan xi satê rê jan. Peru hora vêhê Jesús ne, jiñafê me.

²⁵Sehe xuta ladu rê me ne, catsingasca rê me, hane cuitjin cachja me:

—¡Tatá, tatá! ¡Naxuntjun naja! ¡Nguehe cjuéyan! —Cuatjin cachja me cojo Jesús.

²⁶Hane cachja Jesús cuitjin:

—¿Mé má cuatjin jemu rcun ngayun, ngayun xi cjêê cumangutacún cojo ná?

Hya xi cachja me cuatjin ne, cavisatjenhnga me cavatêcja me ngahñu rê tjo jan cojo tsindyu rê nandan jan, hane jinguyê ni jan ne, cavejñajyuu.

²⁷Hya xi camá ne, xuta jan ne, jercu quijircun rê me hane cachja me cuitjin:

—¿Yo xuta me vihi xi hisca tjo hisca tsindyu rê nandan vihndê tsêhê me?

Cha Gadara xi hinchá xitsehen xahasen rê

²⁸ Hya xi camá ne, cafehe Jesús cojo cha ladu rë me ngunda vëhë, hisca ladu rë xuta nandya Gadara ne, ngajan jo me xi hinchá xitsehen xahasen rë quiji tiña me tsëhë Jesús. Catsijo me xi cuacun jan ne, siu cahndë me ngojo naxi hisca xi sacuaaha tsjun. Hacuaha jemu cjan rë me hisca tsajin yo xi tsujyihya taha vë jan.

²⁹ Hya xi cavechu me hiscan tacun Jesús, cojo ngahñu rë xitsehen jan, cavetsihin cachja me cuitjin:

—Mé má cuatjin ninguisuhunñu cojo niji ngayun Jesús, Quihndi rë Nina. ¿Há tuhun niji cjuañihi handasa chaja sa nixtin rë?

³⁰ Nixtin hya ne, ngajan tiñataha ne, tacun ngu cahndë hiscan jemu cjin chu chinga hinchataha chu tijine chu.

³¹ Hane xitsehen jan ne, ña yuma chja cojo Jesús cachja cuitjin:

—Sá xi hatuxa naxunxun niji tsëhë xahasen rë cha xi cuicun vi, ningatjun niji hiscan siutaha chinga, hacuaha ningatuhun niji xi cuisihin cahntsua xahasen rë chu.

³² Hane cachja Jesús ta:

—Joho, tangun.

Hya xi camá ne, cavetjuxin xitsehen tsëhë cahntsua xahasen rë cha jan, hane cavisehen cahntsua xahasen rë chu chinga jan. Hya xi camá ne, yëjë ni chu chinga jan ne, cavanga chu quiijine chu taha rcu ndetjún, hane ngajan cavixuya chu ngajñi nandá tsëhë laguna, hane ngajan cafë chu, cahme chu.

³³ Hane ngatsë rë chiracun jan ne, cha xi sahmi cuidadu rë chu chinga jan, cavanga cha quiji cha nandya. Hane xi cavisehen cha nandya, casua cha camachaya rë xuta tsëhë xcusun xi camá rë chu chinga jan cojo xcusun xi cavatju jo cha xi hinchá rë xitsehen jan.

³⁴ Hya xi camá ne, yëjë xuta tsëhë ladu tsëhë nandya Gadara ne, quijitjengui me Jesús hiscan tacun me, hane xi cavechutaha xuta me ne, cafehya me Jesús xi catje me tsëhë ladu rë me jan.

9

Casahmi Jesús xi camandaja ngu xuta xi cahme yojo rë

¹ Hya xi camá ne, cavisehen nga Jesús barcu, café me nangui rë me ta tacun ngunda laguna.

² Hya xi camá ne, ngutjen ni quiijitjengui xuta me hane xuta jan ne, yahahnga me ngu cha xi cahme yojo rë cha, jiña cha xcun nijña rë cha. Hane xi cavëë Jesús xi cuatjin mangu cacun xuta xi cuacun jan cojo rë me ne, sehe cachja xu me cojo cha hmu rë jan cuitjin:

—Tuhun cjuasua xahasen nuju ta jyë nuju, tsan ne, ha camanchataha. —Cuatjin cachja me.

³ Ngajan xi ngu jo maestru xi vicuya cjuachacun ne, cavetsihin catsingataha cacun me cuitjin: “Nina tsixcuehyu cha.”

⁴ Hane tsëhë xi vëë Jesús cjuá xi tsingatahacacun maestru jan ne, cuitjin cavinenguise me cha:

—¿Mé má cuatjin chojyihí ningatuhuntacun?

⁵ Xi má nuju, ¿jarë cjuá xi hitsë sa tsaviin fi xi cuichjá: há xi “Jyë nuju ne, ha camanchataha” o há tsajin ne; há “Tisatjunhngun ne, tujyuhunyun?”

⁶ Peru ngeue suá cumachaya nuju ta ngahan xi Quihndi rë Xuta Jain ngahan ne, yahá xá xi tsinchátaha jyë rë xuta ngeue ngasunhndë.

Sehe ngajan cachja xu Jesús cojo cha hmu rë jan:

—Quihndë ne, ngayun tsan ne, tisatjunhngun chjuhun nijña nuju vë, sehe tjangun ndya nuju.

⁷ Hya xi camá ne, cavisatjenhnga cha quiji cha ndava cha.

⁸ Xi cavëë xuta xcusun xi camá ne, quijircun rë me, sehe casahmi hnga me Nina ta Nina ne, casua me cahndë Jesús xi cuatjin casahmi me.

Cavaxijin Jesucristu Mateo

⁹ Xi quiji sa xu Jesús ne, cavechu me hiscan cavëë me ngu xihin xi tacun cahndë hiscan xi faha tujúnsa. Mateo hmí rë me. Ngajan xi cachja Jesús cojo me cuitjin:

—Nduvun, cuanguen cona.

Hane Mateo jan ne, cavetju me quiji me cojo Jesús.

¹⁰ Ha nixtin vëhë ne, tijine Jesús niñu ndava Mateo. Hane jemu cjin sa cha xi faha tujúnsa cojo yahnga cha xi tsitjungui xuta nangui vë ne, hacuaha tijine cha niñu ngajan.

¹¹ Peru xi cavëë cha partido fariseo xcusun jan, sehe cavinenguise cha cojo cha ladu rë Jesús cuitjin:

—¿Mé má jinë hvi maestru nuju cojo cha xi faha tujúnsa cojo ngujo sa cha xi hacuaha cha tsehen cha? —Cuatjin cachja cha.

¹² Peru cavihndé Jesús cjuá xi cachja cha, hane cafayangui me cuitjin:

—Xuta xi hacuini hmu rë me ne, mamjí rë me xi cjuahacuenda rë me doctor ta súv ní xuta xi hmu rë me ne, me vëhé meje rë xi cjuahacuenda rë me doctor.

¹³ ¿Há vijni rcun mé vijne cjuá rë Nina vihi?: “Hitsë sa ndama ná xi mayuma nuju xingun xi cuma rë xi nicuhun chu sacuaaha cjuatjo xi tuhun ná.” Hacuanitjin ná ngahan ta ngahan ne, hacuini canduvá xi squindáyavaha rë xuta xi tsajin xi cun rë me xcun Nina, ta xa xi canduvá ne, xi squindáyavaha rë xuta tsehen, hane cuichjá cojo me xi tsindeya me cjuatacun rë me. —Cuitjin cachja Jesús.

Mé tsëhé xi casahmii Jesucristu cojo xuta rë me xun rë Nina.

¹⁴ Ngajan xi xuta ladu rë Juan ne, cafehe me cavinenguise me Jesús cuitjin:

—Ngayijin ni, vinechin xun rë Nina hacuaaha cha partidu fariseo hacuaaha viyuju cha xun rë Nina. ¿Mé tsëhé xi xuta ladu nuju ne, sahmi me cuatjin ne?

¹⁵ Ngajan xi Jesús ne, cuitjin cachja me cojo cha:

—Cumaji xi xuta rë cha xi tivixan ne, sahmi me xun rë Nina jinguyë rë xi cha xi tivixan ne, tacun cha cojo rë me. Peru cuechú nixtin xi cha xi tivixan jan ne, chjaháxin rë cha tsëhé xuta rë cha, hane hya cuma sahmi me xun rë Nina. —Cuatjin cachja Jesús.

¹⁶ Hacuaaha cachja sa me ta: —Tsajin yo xi cueyacoó ngu tsjian changa cojo ngu rquí tsjian xi cjëé cjuéyu ta sá xi cuatjin sahmi me, xi cjuéyu tsjian xatsë jan ne, cuicheya rë tsjian changá jan hane sahmi jyë sa rë hiscan xi ntsun.

¹⁷ Cuanitjin ne, tsajin yo xi vincha xan xatsë cahntsua chuxin changá ta, sá xi cuatjin sahmi me ne, tsitsingá rë chuxin jan. Hane cjuë cuixu xan jan, hacuaaha cuetsun chuxin jan. Xi meje rë ne, xan xatsë ne, xincha cahntsua chuxin xatsë ta cuatjin ne, catsijo ni ne tsajin mé cuma rë.

Catsicuya Jesucristu cjuahñu rë quihndi rë Jairo; hacuaaha camandaja ngu na xi casatëtsja tsjian rë Jesucristu

¹⁸ Hora xi tivisiajmi me cuatjin ne, canduva ngu me xi xutaxa rë yungun. Hane quiji caticjaxcun me xcun Jesús cachja me cuitjin:

—Ndicumaha ni cahme na lihndi naha. Peru sa xi cuanguen ne, cuisanu ntsun na ne, cuya nga na cjuahñu.

¹⁹ Hya xi camá ne, cavetju Jesús quiji me cojo nahmi rë na lihndi jan hacuaaha quiji xuta ladu rë Jesús.

²⁰ Hane ngajñi cjuí me ne, ngu na xi tjin rë tejó nu xi yaha rë na chíhin xahmajni quiji tiña na táha ngaxtun Jesús ne, quiji cavetahatsja na ntsacu tsjian rë me ta,

²¹ catsingatahacacun na cuitjin: “Sá xi cuetahantsa ndastu tsjian rë me ne, cumandaja ngahan.”

²² Peru cavuya Jesús taha ngaxtun me ne, sehe cavutsejen me na hane cachja me cojo na cuitjin:

—Tuhun cjuasua xahasen nuju, tsan, camandaja ngayun ta camacjain nuju.

Hane ngutjen ni ne, camandaja na.

²³ Hya xi camá ne, cafehe Jesús ndava xutaxa rë jan. Ngajan cavëë me xi ha siu cha chjinetjo cojo xutacjin xi jihnda me ngatsë rë cjuandusin.

²⁴ Sehe cachja me cojo xuta cuitjin:

—Tjangunxun. Na lihndi vë ne, hacuini cahme na ta jiñafë ni na. —Cuatjin cachja me.

Ngajan xi xuta jan ne, tu cavejnucëë me Jesús.

²⁵ Peru xi casahmi me xi cavetju xin xuta jan, sehe cavisehen Jesús hiscan jiña nima lihndi jan ne, cafaha me tsja na hane catsisatjenhnga me na.

²⁶ Hya xi camá ne, cavitsojo cjuá rë xcusun jan jinguyë nangui vë.

Casahmi Jesús xi camatsejen rë jo cha rcá

²⁷ Xi cavetju Jesús quiji me tsëhé ngajan ne, canduva tjengui rë me jo cha rcá hane cajindaya cha cachja cha cuitjin:

—¡Ngayun Jesús, tjë rë David! Catamayuma nuju ngayin. —Cuitjin cachja cha.

²⁸ Xi cavisehen Jesús ndihya ne, sehe cavechutaha cha rcá me, hane cavinenguise Jesús cha cjuá vi:

—Xi má nuju, ¿há cuma sahme xcusun xi chjayun?

Cafayangui cha cuitjin:

—Macjain niji, Tatá, cuma nihñu.

²⁹ Hya xi camá ne, cavetahatsja me tuxcun cha hane cachja me cojo cha cuitjin:

—Cuatjin catama cojo nuju xcusun sacuaaha xi macjain nuju.

³⁰ Hane ha hora vëhé ni ne, catuxaha tuxcun cha hane camatsejen rë cha. Ngajan xi Jesús ne, cavitexa me cha cuitjin:

—Tsajin yo cuinúnjun cojo tsêhê xcusun vihi.

³¹ Peru cavatju xi quiji cha jan ne, cavitsojo cjua tsêhê me jingujyê nandya jan.

Cavaxêxin Jesús ngu xitsehen xi casahmi lihmi rê ngu cha

³² Hora xi ha quiji jo cha jan ne, cafehe xuta xi canduva me cojo ngu cha xi hinchâ rê xitsehen; hane xitsehen jan ne, casahmi lihmi rê cha.

³³ Hane hya xi cavetju xitsehen tsêhê cha lihmi jan, cavetsihin cachja cha. Hane xutacjín xi cavutsejen me ne, jemu quijircun rê me ne cachja me cuitjin:

—Nguehe nangui naja Israel ne, tsajin ngu nixtin xi tsejen cjuarcun sacuaaha tijimá quihndê.

³⁴ Peru cha partidu fariseo ne, cachja cha cuitjin:

—Xitsehen xi matitjun ne, vêhê casua rê cha xa xi vaxêxin cha xitsehen.

Jemu cjín xuta xi meje rê xi cuisitjuu me cjua rê Nina

³⁵ Jesús ne, catsujiyihiya me jemu cjín nandya cojo ranchun ne, ngajan cavicuya me xuta cahntsua yungun rê me. Casua me camachaya rê me cjuandajiyihi xi chja tsêhê gobiernu xi sahmi Nina. Hacuaaha catsirqui me xuta tsêhê yêjê ni chíhin cojo yêjê ni xcusun xi cjuahmu.

³⁶ Peru xi cavêê Jesús xutacjín ne, camayuma rê me xuta jan ta tsêhê xi jemu va tjin rê xahasen rê me, jemu camachohocacun me sacuaaha chu tsánga xi tsajin yo xi cjuahacuenda rê chu.

³⁷ Vêhê xi cuitjin cachja me cojo cha ladu rê me:

—Xutacjín vi ne siu me sacuaaha siu niji ngajan nguiña xi jemu ndaja camá peru tsajin cha mosu xi cuanga rê.

³⁸ Vêhê xi meje rê xi chjahyun rê Nai naja xi tsingatju me xuta xi cuanga me.

10

Cavaxijín Jesús tejó xuta ladu rê me

¹ Cavechú ngu nixtin xi casahmitangun Jesús xuta ladu rê me xi tejó jan ne, sehe casua rê me ngahñu hacuaaha casua rê me xá xi me xi cuacún vê, cuitexa me yêjê xitsehen hane cuaxêxin me xitsehen tsêhê xuta; hacuaaha sahmi me xi xuta xi hmu rê me ne cuma ndaja me tsêhê tu me ni chíhin xi yaha rê me.

² Cha xi tejó jan ne, cuitjin hmí rê cha: titjun ne, Simón, me xi hacuaaha yaha ñihi rê Pedru, cojo Andrés hntsé Simón, Jacobo quihndi rê Zebedeo cojo Juan hntsé Jacobo,

³ Felipe cojo Bartolomé, Tomás cojo Mateo, cha xi faha tujún, Jacobo quihndi rê Alfeo cojo Tadeo,

⁴ Simón xi tsêhê partidu cananayu cojo Judas Iscariote, me xi sahmi entregadu rê Jesús.

Catsingatju Jesucristu tejó xuta ladu rê me xi cuichja cjuandajiyihi rê Nina

⁵ Tejó xuta jan ne, catsingatju Jesús me ne, cavitexa me cuitjin:

—Tanguun ngajan ndiya xi fi xuta xi hvíin me cjua rê Nina, hacuaaha cuisuun nandya rê distritu Samaria ta;

⁶ tángun hiscan siu xuta nandya rê Israel, xuta jan ne tangun me cojo ngu chu tsánga rê Nina xi cachaja chu.

⁷ Tuhun cumachaya rê xuta cjuandajiyihi rê Nina xi jima tiña gobiernu xi sahmi me.

⁸ Nihñu xi cuma ndaja xuta hmu rê, nicuyun cjuahñu rê nima, nihñu xi cuma ndaja xuta xi yaha chuxin rê me chíhin vitaha, hacuaaha naxunxun xitsehen. Ngahñu xi meje nuju xi cuatjin nihñu ne, tu cuatjo ni sacu nuju, vêhê xi hacuaaha tu cuatjo ni tuhun ngahñu jan.

⁹ Xicachjuun oro o sá quicha tyava o tu mé ni tujún xi cuinchunndujun cahntsua tsá tujún nuju xi tsêhê gastu nuju.

¹⁰ Xicachjuun changa, xicachjuun ngu xúta tsjian, hacuaaha xicachjuun ngu xúta chuxinxê o sá ngu bastón ta, xuta xi sahmi me xá ne, tsêhê xá jan sacu rê me gastu rê me.

¹¹ Cuanitjin ne, tu mé ni nandya o sá tu mé ni ranchun xi cuisuhun ne, ngajan cuinchunxun ngu xuta xi ndaja xahasen rê me, ngajan ndava me ne, nechunchandun hisca xi cuetjunchun tsêhê nangu jan.

¹² Hane hya xi cuisuhun ngu ndihya ne, tinújun ngu nina cuitjin: “Nina sua nuju me cjuandaja cjuajeya.”

¹³ Hane sá xi nai rê ndihya jan ndaja vêê me yun ne, catísatê rê ndava me jan cjuajeya; peru sá xi hacuín ndaja vêê me yun ne, satiín rê me cjuajeya jan.

¹⁴ Hane hiscan xi tjin xuta xi cjuahatsjaain nuju me, xi chjuhun ndiya xi cuetjunchun tsêhê nandya vêhê ne, titsunu chojo rê ntsacu.

¹⁵ Cuichjá cojo nuju ngu cjuaquixi ta hya xi cuechú nixtin xi tsichuva Nina xuta tsêhê jyê rê me ne, hitsê sa jyê castigu cuatju xuta tsêhê nandya xi cafahatsjaain nuju jan, xi cumá rê xuta tsêhê nandya Sodoma cojo xuta nandya Gomorra.

Cjuañihi xi cuatjun cuma

¹⁶ Ngahan titsingátju nuju ngayun xuta jeya xi cuangun ngajñi rë xuta hnga cacun sacuaaha cjue ngu chu tsánga ngajñi rë chu cjan rë. Vêhë xi meje rë xi ndaja quicuntacun sacuaaha quicuncacun chu yë, peru hacuiin tsavi yun sacuaaha tsajin tsavi chu paloma.

¹⁷ Peru nechun cuidadu ta, cjuaha nuju xuta cjuecojo nuju me xcun xutaxa rë ndi-hyavasen, hacuaaha cuaja nuju me ngajan yungun rë me,

¹⁸ hisca cjuecojo nuju me xcun gobernador, hacuaaha cjuecojo nuju me xcun me xi vitexa me jinguyë ni nandya. Cuatjin cuangun ngatsë rë xi ladu naha má ngayun. Ngatsë rë vêhë sacu nuju cahndë xi ninguixun cjua xi cavicuyá nuju xcun xuta jan cojo xuta xi hvín me cjua rë Nina.

¹⁹ Hya xi cuatjin cjuecojo nuju me ne, hacuiin cuityjanguntacun tsêhë hacutjin xi ninguixun ta, tsêhë xi hora vêhë ne, Nina sua me ngayun cjua xi nicuyun.

²⁰ Ta tsêhë xi hacuiin cjua nuju xi cuinújun ta tsêhë Hasen rë Nina cuinduva cjua xi cuinújun.

²¹ Hacuaaha xuta ladu naha ne, hntsë me, cuinchajyë rë me, xutacha rë me, cuinchajyë rë me, quihndi rë me cuinchajyë rë me cojo sa xi xutaxa rë ne, cjuaha rë me me ne, tsiquehen rë me.

²² Yëjë ni xuta ne, choho scuëë nuju me, tsêhë xi ladu naha ngayun. Peru jarë ngayun xi scaa nuju cojo cjuacjintacun vêhë hisca xi cueyun ne, cuechun xcun Nina.

²³ Hya xi tsuyihiyatjengui nuju me ngu nandya ne, tangun ngu nandya tiñataha ta, cuichjá quixë cojo nuju ta xi chaja sa cuatjun jinguyë ni nandya tsêhë nangui rë Israel ne, cýa ngahan Quihndi rë Xuta.

²⁴ Ngu cha xi sehe tivutaya matsejen ne, hacuiin hitsë sa matitjun cha xi cumá rë maestru rë cha, cuanitjin ne, ngu cha hndixahan ne, chuva venguichji rë cha xi cumá rë nai rë cha.

²⁵ Catamangucacun cha tsêhë xi cuechú nixtin xi tangun cuenguichji rë cha cojo maestru rë cha o tangun cuenguichji rë hndixahan cojo nai rë. Ha chuva vêhë ni cuatjun ta sá xi choho cuichja xuta nai rë ndihya ne, ngu xitsehen me, hitsë sa choho cuichja me tsêhë xuta rë nai rë ndihya jan.

Xicarcuun xuta

²⁶ Xicarcuun xuta condra nuju. Yëjë ni xcusun xi casetsangui ne, cuechú nixtin xi chjaháxin rë xi titsangui rë. Vêhë xi yëjë ni xcusun xi hma ne, handasa sahmangui ne, peru cuechú nixtin xi cuetjuuca tsejen.

²⁷ Yëjë ni cjua xi cuichjá cojo nuju hiscan jñu ne, cuinújunsun hiscan hasen. Yëjë ni cjua xi cuichjáhma ne, cuechú nixtin xi cuinuhya rë jinguyëjë ni nandya.

²⁸ Xicarcuun xuta xi cuma tsiquehen yojo nuju, peru ngaxtun vêhë ne, tsajin me dañu ma sahmi me cojo hasen nuju. Hitsë sa ndaja ne, rcun Nina, me xi tjín rë chuva rë xi tsiquehen me yojo nuju hane hacuaaha tsingatjenya nuju me hiscan xi má hasen nuju castígu.

²⁹ Chutsujun ta jo chu nisë langa ne, ngu ni tujún chji rë chu, peru handasa cuatjin ne, hiscan ngu chu cumaji cueya chu sá xi suaain Nina cahndë.

³⁰ Hane ngayun ne, hisca jimangu tsjarcun ne xqui tjín rë Nina.

³¹ Vêhë xi xicarcuun ta, tsêhë xi jimangu ngayun ne, hitsë sa jercu vengui chji nuju xi cumá rë chu nisë vë, handasa jemu cjín chu.

³² Yëjë xuta xi tsinguixi me xcun yahnga xuta xi xuta ladu naha má me ne, hacuaaha ngahan tsinguixë xcun Nahmi naha xi tacun ngahnga xi xuta ladu naha má me.

³³ Peru yëjë xuta xi tsinguixiin me xcun yahnga xuta xi hacuiin xuta ladu naha má me ne, hacuaaha hacuanitjin ni tsinguixë ngahan xcun Nahmi naha xi tacun ngahnga.

Ngatsë rë cjua rë Jesucristu xi sahmi condra xutacjin xicjin me

³⁴ Xi má nuju ngayun ne, ¿há cjuajeya canduvácojo xi cumá rë xuta ngasunhndë? Hacuiin cuatjin. Ngahan ne, si canduvá cojo.

³⁵ Canduvá tsinguetsuntaha xicjin xuta. Cha quihndi ne, sahmi condra cha nahmi rë cha, hane na quihndi ne, sahmi condra na naa rë na, hane jahnda ne, sahmi condra na nahya rë na.

³⁶ Cuatjin xuta condra rë me ne, cuma ni xuta rë me.

³⁷ Sá xi ngu me ne hitsë sa tsihmu cacun me nahmi rë o sá xi naa rë me xi cumá ná ngahan ne, vehiín chuva rë xi tsahan cuma me. Hacuaaha sá xi ngu me ne hitsë sa tsihmu cacun me quihndi rë me sá xihin sá chjuun xi cuma rë xi tsihmu cacun me ngahan ne, vehiín chuva rë xi tsahan cumá me.

³⁸ Ha cuanitjin ne, sá xi ngu me ne mijí cjuejñahñu xahasen rë me xi cjuecojo me ndiya naha handasa cueya me xcun cru ne, cumaji cuechu me chuva rë xi tsahan cumá me.

³⁹ Xuta xi nguehe ni ngasunhndë meje cjuenduju me cojo cjuahñu rë me ne, titsichajá me cjuahñu xatsë xi sua Nina me. Peru xuta xi titsichajá me cjuahñu rë me nguehe ngasunhndë ne ngatsë naha ne, hatuxa sacú rë me cjuahñu xatsë xi sua Nina me.

Cuatjo xi sua Nina

⁴⁰ Xuta xi cjuahatsja me yun, tangun sacuaaha xi cjuahatsja ná me ngahan suva, hane xuta xi cjuahatsja ná me ne, tangun sacuaaha xi cjuahatsja me Nahmi naha, me xi catsingatju ná.

⁴¹ Xuta xi cjuahatsja me ngu me xi chja me cju rë Nina ne ngatsë xi chja me jan cju rë Nina ne, tangun chji sacú rë me cojo me jan. Hacuaha xuta xi cjuahatsja me ngu xihin xi tyjahi cjuatacun rë me xcun Nina ngatsë rë ndaja xihin jan ne, tangun chji sacú rë me cojo xihin jan.

⁴² Cuanitjin ne, xuta xi sua me ndastu ngu vasu nandá cjuahatsja tu yo ni xi xuta ladu naha ne handasa jemu yuma jyihi me ne, sacú chji rë me ngatsë rë xi cuatjin sahmi me cojo xuta xi tjengui ná.

11

Cha xi catsingatju Juan Vitenda rë Xuta

¹ Hya xi camá ne, xi cajnetaha cju a xi cavitexa Jesús cha xi tejó má jan, sehe cavetjuxin me quiji me nandya xi siutahndee, ngajan cavicuya me xuta cachja me cojo tséhë cjuandajiyi rë Nina.

² Nixtin hya ne, ha jiya Juan Vitenda rë Xuta ndavaya, hane ngajan camachaya rë me tséhë xcusun xi sahmi Jesús. Véhë xi catsingatju me ngujo cha ladu rë me xi quiji cha

³ cavinenguise cha Jesús cuitjin:

—¿Há ngayun xi tsingatju nuju Nina, o há tsajin ne, há cuinechinyin xi cuinduva nga ngu? —Cuatjin cavinenguise xuta xi catsingatju Juan jan.

⁴ Hya xi camá ne, catsicuya Jesús cju a xi cuacun jan hane cuitjin cachja me:

—Tjangun ne, sehe tinújun cojo Juan yëjë cju a xi canuhyun cojo yëjë xcusun xi cahyun.

⁵ Tinújun ta xuta rcá ne, camá camatsejen rë me; xuta rengun ne, camá quijindaja me; xuta xi yaha rë chíhin vitaha xi setaha yojo naja ne, camandaja me; nima ne, cavuya nga cjuahñu; xuta yuma ne, casacu camachaya rë me cjuandajiyi rë Nina.

⁶ Hacuaha jemu ndaja tséhë tu yo ni xuta xi hacuün tsismicacun me xi mangu cacun me cojo ná. —Cuatjin cachja Jesús.

⁷ Hane hya xi cavetju quiji xuta ladu rë Juan jan ne, sehe cavetsihin cachja Jesús cojo xutacjin jan cuitjin tséhë Juan:

—Hya xi cavetjun catsangun ngajan ngu xín tséhë nandya catsangun tjengun Juan matsejen ne, ¿há caningatuhuntacún xi cuechuntuhun ngu xihin xi hacuün ngu ni cjuatacun rë me, sacuatjin rë ngu ndeje xi fi nguehe fi ngajan rcu sacuatjin cjui tjo?

⁸ O há tsajin ne, ¿há caningatuhuntacún xi cuechuntuhun ngu xihin xi yaja ngu tsjian xi jemu tu ndajiyi camahani? Hacuün cuatjin. Ha hyaan matsejen ta xuta xi jercu tu ndacun camahani tsjian vaja me ne, sacuün naja ngajan xin jan, ta sacú naja ndava ngu xuta nchina.

⁹ Peru ngayun matsejen ne, catsangun cachutsujun ngu profeta. Hacuaha cjuaquixi xi véhë cachutsujun. Peru profeta Juan vë matsejen ne, hitsë sa vengui chji rë me xi cumá rë yëjë sa profeta xi yahnga.

¹⁰ Hacuaha me véhë xi cachja Nina tséhë me xcun xujun rë me cuitjin:

Ngahan ne, tsingátju titjun ngu cha

xi scuxaha cjuatacun rë xuta tséhë xi cjehe ngaye.

¹¹ Cuichjá cojo nuju matsejen ta ngajñi rë yëjë xuta xi catsin me tséhë naa rë me matsejen ne, tsajin ngu xi hitsë sa vengui chji rë xi cumá rë Juan. Peru hya xi cuetsihin Nina sahmi me gobiernu nguehe ngasunhndë matsejen ne, xuta xi chuva cuengui chji rë me nixtin hya matsejen ne, hitsë sa cuengui chji rë me nixtin hya, xi cuma rë xi vengui chji rë Juan quihndë.

¹² Hisca nixtin xi caxtenda Juan hisca nixtin quihndë ne, má cjuasuë xi satë rë gobiernu xi sahmi Nina; xuta ne, meje cuisehen me ngajan, handasa cojo cjuachan.

¹³ Xi chaja sa nduva Juan ne, yëjë ni xujun xi catsihindu profeta cojo xujun rë ley ne, suva casua camachaya rë xuta tséhë gobiernu xi sahmi Nina.

¹⁴ Sá xi meje nuhyun cjuaquixi ne: Juan ne, hacu Elias, xi sehe nduva xu.

¹⁵ Yo ngayun xi tjin nuju cjuasua xi cuinhyun cju a vihi matsejen ne, ndaja tetuhunrcun.

¹⁶ Ngayun xuta tséhë nixtin vihi matsejen ne, ¿mé xi tangun ngayun cojo? Tangun ngayun cojo langa xi siu ngajan ndetsin, xi jindaya xicjin

¹⁷ cojo cjuua vihi: “Canijani tsujun ne, mijí xtun; casin va ne, mijí chjihndun.” Cuatjin jindaya langa.

¹⁸ Cuatjin chjá cojo nuju matsejen ta, Juan xi vitenda nuju ne jinii me niñu hacuaha hviin me xan, hane nújun ta jiya xitsehen xahasen rë me.

¹⁹ Hane ngahan xi Quihndi rë Xuta Jain matsejen ne, jinë hacuaha hvë, hane nújun ta ngu cha cahntsuaññu ngahan, ngu cha cahntsuaññu ngahan, hacuaha ngu cha amigu rë cha xi faha tujúnsa cojo jingu sa xuta tsehen ngahan. Tsejen xi ndaja ngu cjuatacun xi casacu rë ngatsë rë xi ndaja tivetjucaa tsujun xi tiniññuchuhun.

Choyiyi tsëhé xuta nandya xi vindeyaain cjuatacun rë me

²⁰ Hya xi cama ne, cavetsihin Jesús chjataha me xuta nandya jani hitsë sa jemu casahmi me cjuarcun camá, ta catsindeyaain me cjuatacun rë me. Cuitjin cachja me:

²¹ —Jemu chojyihí tsujun xuta nandya Corazín! ¡Hacuaha jemu chojyihí tsujun xuta nandya Betsaida! Jemu chojyihí tsujun ta, tsëhé xi sá xi xutaxín tsëhé Tiro cojo xutaxín tsëhé Sidón cavëë me cjuarcun xi cahyun ne, ha catsindeya me cjuatacun rë me, hacuaha ha cavajá me tsjian xi sacuaha tsánaxá hacuaha caviyuju me ngajñi ndesu, sacuaha xcusun naja hya xi choho má naja.

²² Vëhé xi hya xi tsichuva Nina yëjë xuta tsëhé jyë rë me ne, xuta nandya Tiro cojo xuta nandya Sidón ne, hitsë sa chuva castigu cuatju me cumá xi cumá nuju ngayun xuta nandya Corazín cojo ngayun xuta nandya Betsaida.

²³ Hane ngayun xuta nandya Capernaum ne, ¿há cuangun hisca ngahnga hiscan tacun Nina? ¡Hacuiin! Hatuxa cuangun nduchin, cahndé hiscan fi hasen rë nima ta, tsëhé xi sá xi xuta tsehen tsëhé Sodoma cavëë me cjuarcun xi cahyun ne, ha catsindeya me cjuatacun rë me, hane tacun cuaha nandya jan hisca quihndë.

²⁴ Vëhé xi hya xi tsichuva Nina xuta ne, hitsë sa chuva castigu cuatju xuta Sodoma xi cumá nuju ngayun xuta nandya Capernaum.

Casahmi jyë casahmi hnga Jesucristu Nina

²⁵ Nixtin hya ne, cachja Jesús cojo Nina cuitjin:

—Ngayun nahmi naha ne, sahme jyë sahme hnga nuju, ngayun xi Nai rë ngahnga cojo nangui, ngayun, tsëhé xi ngayun caveyúññu cjuatacun vëhé xi cuma rë xuta xi jemu vechú cjuatacun rë, hane catuhun camachaya rë xuta xi jñu tsëhé me.

²⁶ Ngayun nahmi naha, cuatjin canihñu ta, tsëhé xi cuatjin xi cachuya nuju. —Cuatjin cachja Jesús cojo Nina.

²⁷ Cachja me cojo xuta:

—Yëjë ngarca matsejen ne, Nina Nahmi naha casua ná me. Tsajin hisca ngu xi vëë yo xi Quihndi rë Nina matsejen ta suvá ni Nina Nahmi naha xi vëë me. Hacuaha tsajin yo xi vëë Nahmi naha matsejen ne ta, suva ni ngahan xi Quihndi rë me ngahan xi hvë, cojo tu yo ni xi ngahan meje suá cumachaya rë.

²⁸ Ngayun xi fenda rë xahasen nuju, ngayun xi hai tjin tacun tsëhé jyë nuju ne, nduvun tjengun ná, hane cjuaháxen vëhé xi sahmi hai nuju.

²⁹ Ningatuhun xi chjuhun yugu naha sacuaha má cojo ndyaja hya xi cjuaha chu xa sahmi chu, hacuaha chjayunngun tsahan. Ta ngahan ne, tjin ná cjuandaja cjuajeya, hane sacu hñu rë xahasen nuju.

³⁰ Ta yugu xi suá nuju vihi ne, hacuiin hai, tanguaain cojo tsëhé chu ndyaja, hane xa xi suá nuju ne, hacuaha hacuiin hai.

12

Cavotohosun xuta ladu rë Jesucristu trigu nixtin xi chjahájenda rë

¹ Nixtin hya ne, cuatjin camá ngu nixtin xi chjahájenda rë. Hora xi tivatju Jesús cojo xuta ladu rë me hiscan tjin tjë trigu ne, cama vojo rë xuta ladu rë me, cavetsihin cavotohosun xuta jan tsë tsë trigu jan ne, catsufëtsja me cajine me.

² Hane cha tsëhé partidu fariseo xi cavëë cha xi cuatjin casahmi me, cachja cha cojo Jesús cuitjin:

—Chutsujun ni, xuta ladu nuju ne, tisahmi me xa quihndë nixtin xi chjahájenda rë, handasa chja ley naja xi cumaji xi cuatjin nihña.

³ Hane cafayangui Jesús cuitjin:

—Ngayun, ha cachutayun xcusun xi casahmi xutachanga naja David hatsëë nixtin hya xi jercu camá vojo rë me cojo xuta xi siu cojo me.

⁴ Cavisehen me ndava Nina, hane cafaha me pan xi viyuju xcun Nina xi tsajin cahndë xi tu yo ni sinë ta suvá ni nahmi xi cuma sinë me. Peru David ne, cajinë me hacuaha casua me cajinë xuta xi siu cojo me.

⁵ Cuanitjin ne, ha cachutayun xi chja cjuá rē ley naja xi nahmi xi sahmi xa ndava Nina ne, ngajan tjin xa xi satē rē me nixtin xi chjahájenda rē peru tsajin jyē xi cuma rē me handasa tisahmi me xa nixtin hya.

⁶ Cuichjá quixē cojo nuju ta nguehe tacun ngu xi hitsē sa meje rē xi chjahanrcun rē xi cumá rē yungun xi matitjun.

⁷ Cjēē cuijnercun cjuá xi chja: “Hitsē sa ndama ná xi cumayuma nuju xingun tsēhē xi cumá rē xi nicuhun chu sacuaa cjuatjo xi tuhun ná.”

⁸ Hacuaha cachja sa Jesús cuitjin: Ngahan xi Quihndi rē Xuta Jain ngahan ne, ngahan xi vitéxa mé xi cuma nixtin xi chjahájenda rē.

Casahmi Jesucristu xi camandaja cha xi quixhñu ngu tsja

⁹ Hya xi camá ne, xi quiji sa Jesús ne, cavisehen me yungun ngajan.

¹⁰ Hane tacun ngu cha cahntsua yungun jan xi quixhñu tsja quixi cha. Hane cha xi vicuya cjuachacun cojo cha fariseo ne, cavinenguise cha Jesús cuitjin:

—¿Mé xi tsingatíhi ley xi nihña nixtin xi chjahájenda rē? ¿Há sua cahndē xi nirquen rē xuta hmu rē? —Cuatjin cafinenguise cha me xi sehe cuma cuinchajyē cha me.

¹¹ Hane cuitjin cafayangui Jesús tsēhē cha:

—¿Há cuma xi ngu ngayun handasa hya xi nixtin xi chjahájenda rē ne, cuanguun naxun chu tsánga nuju sá xi cjuinenguia chu ngu ngojo xi jemu nungun?

¹² Sá cuatjin vengui chji rē ngu chu tsánga ne, hitsē sa cjín vengui chji rē ngu xihin. Vēhē xi tsingatíhi ley xi nixtin xi chjahájenda rē ne nihña cjuandaja.

¹³ Sehe cachja Jesús cojo cha hmu rē cuitjin:

—Nixingun ntsun. —Cuatjin cachja me.

Hane cuatjin casahmi cha. Hane tsja cha xi quixi ne, ha camandaja sacuatjin jyíhi tsja cha xingu.

¹⁴ Hya xi camá ne, cha partidu fariseo jan ne, cavetju cha quiji cha, cachja cha ngajñi rē cha cojo xicjin cha xi meje rē xi sacuya ra xcusun hacutjin cuma tsiquehen cha Jesús.

Cjuá xi catsihindu profeta tsēhē Jesús

¹⁵ Peru Jesús ne, machaya rē me cjuatacun jan, hane cavetju me quiji me tsēhē ngajan. Hacuaha cjín xuta quiji tjengui cojo rē me, hane catsindaja me yējē ni xuta tsēhē chíhin xi má rē me,

¹⁶ sehe cachja me cojo me xi cuichjaain tē me yo me jan.

¹⁷ Cuatjin casahmi Jesús xi cuetjucaa cjuá xi catsihindu profeta Isaías xi chja cuitjin:

¹⁸ Cha vihi ne, cha mosu naha, cha xi cavitéxa ngahan, cha xi tsihmúcacun, cha xi ndama ná tsēhē.

Suá cha Hasen naha, cuichja cha cojo xutaxín tsēhē hacutjin quixi Nina hya xi tsichuva me xuta.

¹⁹ Cha vihi ne, hacuiin cjín cuisiajmi cha cojo xuta; hacuiin jindaya tē cha xi chja cha.

Cuichjaain hñu cha cojo sa xi jemu catjaha cuenda rē cha xuta xi tsuyihiya me ndiya tē.

²⁰ Xcotaain cha cjuatacun rē hisca ngu xuta yuma xi tangun me cojo ngu ndeje xi caxtane, hacuaha sahmi chuvaain cha cjuatacun rē xuta yuma xi tangun me cojo ngu candil xi ha ndiya coho.

Yējē xcusun vihi ne, sahmi cha hisca xi cumatsejen cjuaquixi rē gobiernu rē cha.

²¹ Hane xuta ngasunhndē ne, cuetahacacun me cha.

Cachja xuta xi Satanás casuaxa rē Jesús

²² Cavechú ngu nixtin xi cafehe tjengui xuta Jesús hane yaha me ngu cha xi jiya xitsehen xahasen rē cha. Rcá cha jan hacuaha lihmi cha. Hya xi camá ne, Jesús ne casahmi me xi camandaja cha jan hisca cama cachja cha hisca cavutsejen ndaja cha.

²³ Hane xutacjín ne, jemu quijircun rē me cachja me cuitjin:

—¿Há cumacacun xi cha vihi hacui quihndi tjē rē David xi tsingatju Nina?

²⁴ Peru cha partidu fariseo xi camachaya rē cha cjuá jan ne, cachja cha cuitjin:

—Hacuiin suvá cha vaxéxin cha xitsehen ta Beelzebú, xitsehen xi matitjun ne, vēhē casuaxá rē cha xi vaxéxin cha xitsehen.

²⁵ Peru Jesús ne, tsēhē xi ha vēē me mé xi tsingataha cacun xuta xi cuacún jan ne, cuitjin cachja me cojo cha:

—Hya xi xuta tsēhē ngu nandya ticjan me ngajñi rē me cojo xicjin me, cjuē ngahñu cjuá rē, hane cjuincanii rē me. Hacuaha sá xi xuta tsēhē ngu ndihya ne, scaan me ngajñi rē me ne, ngajan chajá ngahñu cjuá rē ndihya jan.

²⁶ Ha cuanitjin rē Satanás ta, sá xi Satanás ne vaxéxin xitsehen xi yahnga ne, cavatēcja ngahñu cjuá rē, hane cumaji cuitexa xicjin.

²⁷ Vêhë xi sá xi Beelzebú casua ná xa xi vaxëxen xitsehen ne, hacuaha ha Beelzebú vêhë casua rê ngu xuta ladu nuju xa xi hacuaha vaxëxin me xitsehen. Vêhë xi me vêhë ni cuma cuichja me xi cuaaintjin cjua xi nújun xi Beelzebú casua ná xa.

²⁸ Peru sá xi hacuiin Beelzebú casua ná xa ta Nina casua me ne, ngajan matsejen xi gubernu xi sahmi Nina ne, ha tivetsihin.

²⁹ 'Hisca ngu cha chëjê cumaji tu cuisehen ni cha ndava ngu xuta xi hñu cjua rê sá xi tacun me. Titjun tsihñu cha xuta xi ndava ta cuatjin xi cuma tsichëjê cha tsêhë me.

³⁰ 'Xuta xi fiin me favor naha ne, condra naha má me. Hane xuta xi visecuaain ná me xi nihñi tangun cjuatacun rê xuta cojo Nina ne, tsinguetsun me cjuatacun rê xuta.

³¹ 'Hacuaha cuichjá cojo nuju cjuaquixi ta tu mé ni jyé xi sahmi xuta hacuaha tu mé ni cjua xi choho cuichja me tsêhë xuta ne, sacú rê me cjuaninchataha sa xi cuijacun me jyé jan. Peru tu yo ni xi choho cuichja tsêhë Hasen rê Nina ne, tsajin cjuaninchataha xi cuma rê.

³² Cuanitjin ne, tu mé ni cjua xi choho cuichja xuta tsêhë Quihndi rê Xuta Jain ne, cuma sacú rê me cjuaninchataha. Peru tu yo ni xi choho cuichja tsêhë Hasen rê Nina ne, tsajin cjuaninchataha nguehe nixtin vi, hacuaha tsajin cjuaninchataha nixtin xi nduva.

Ngatsë ni rê xcusun xi sahmi me ne, tsejen mé xcusun xuta me

³³ '¿Jarë xi meje nuju?, ¿há xi ndaja ya hacuaha ndaja tu rê? o há tsajin ne, ¿há xi ndajin ya hane ndajin tu rê? Jima ngu ya ne, cuma tsejen sá xi ndaja o sá xi ndajin ngatsë rê tu xi sua.

³⁴ Ngayun quihndi rê chu tsehen, maji nújun cjua xi ndaja. Maji ta tsêhë xi cjua xi quitsë rê xahasen nuju ne, vêhë cjua xi vetju nújun.

³⁵ Vêhë xi xuta ndaja ne, tsêhë cjuandaja xi tetjo rê me cahntsua xahasen rê me cojo cahntsua cjuatacun rê me ne, tsêhë ngajan vetju cjuandaja. Cuanitjin ne xuta tsehen ne, tsêhë cjuatsehen xi tetjo rê me ne, ngajan vetju cjuatsehen.

³⁶ Cuichjá cojo nuju ta tu mé ni cjua xi cuinújun, handasa tu visiajmu ni ne, tuhuncuenda rê Nina cjua jan nixtin xi tsichuva me yaan.

³⁷ Cuatjin ta cojo cjua xi canújun ne, cjua jan cuma testigu xi cuetjunxun tsêhë castigu, o sá tsajin ne, cjua xi canújun vêhë cuma testigu tsêhë castigu xi cueyun.

Cafehya xuta tsehen ngu seña xi sua Nina

³⁸ Ngajan xi ngujo cha xi vicuya cjuachacun cojo ngujo cha partido fariseo catsicuya cha tsêhë me, cuitjin cachja cha:

—Maestro, ningacun nijí ngu cjuarcun xi sua seña yo ngayun.

³⁹ Ngajan cafayangui Jesús cuitjin:

—Ngayun xuta tjê rê Israel xi nechun nixtin vihi matsejen ne, tsehen cjuatacun nuju, hacuaha majotacun xcun Nina. Vêhë xi chjahyun ná ngu seña xi sua Nina. Peru seña vêhë ne, sacuiin nuju ta ngu ni seña xi sacú nuju matsejen ne, vêhë seña xi casua profeta Jonás hatsëë nixtin.

⁴⁰ Sacuatjin rê profeta Jonás ne, jyan nixtin cojo jyan nixten caseya me cahntsua chu ti jyé, hane ha cuanitjin ni ne cumá rê Quihndi rê Xuta Jain, ta jyan nixtin cojo jyan nixten seya me ngahma nangui.

⁴¹ Hya xi cuechá nixtin xi tsichuva Nina jyé nuju, ngayun xi nechun nixtin vihi ne, yëjê ni xuta nandya Nínive matsejen ne, cjue cuinchajyê nuju me; ta me vêhë ne catsindeya me cjuatacun rê me hya xi casua profeta Jonás camachaya rê me cjua rê Nina. Peru nguehe ne ha tejña ngahan sacuaaha ngu seña xi hitsë sa vengui chji rê xi cuma rê profeta Jonás.

⁴² Hacuaha nixtin hya ne, na xi cavitexa ngajan nangui Sabá ne, cjue cuinchajyê nuju ta, tsêhë xi jemu cjuañihí cavatju na tsêhë xi jercu cjin hiscan canduva na xi cuihndé na cjuatacun ndacun rê Salomón, me xi cavitexa xuta naja nixtin hatsëë. Peru nguehe tejña ngahan xi hitsë sa vengui chji rê cjuatacun naha xi cumá rê cjuatacun rê Salomón.

Xitsehen xi vuya

⁴³ 'Hya xi vetjuxin xitsehen tsêhë xahasen rê ngu xuta hiscan xi camá sacuaaha ndava xitsehen jan ne, fi táha hiscan jemu nangui quixí camahani, vanguise cahndé hiscan xi cuejñajenda.

⁴⁴ Hane xi sacuiin rê cahndé hiscan cuejñajenda ne, cuitjin tsingatahacacun: "Cúya rê cjué ndya naha hiscan xi cavétjuxen." Cuatjin tsingataha cacun xitsehen jan. Hane hya xi vuya fehe xitsehen jan cahntsua xahasen jan ne, vutsejen xitsehen jan cahntsua xahasen jan sacuaaha ngu ndihya tiya, ngu xi caxtecha tyjahi tyjahi, hacuaha siundaja chichihin ngu tsé ngu xtí.

⁴⁵ Xi vutsejen xitsehen xi cuatjin jyihí jan ne, sehe fi jaha sa rê yatu sa xitsehen xi hitsë sa tsehen xi cumá rê vêhë ne, sehe visehen nga viyujuahndé jan. Peru xi má ngascan ne,

hitsë sa chojyihî tsêhê xuta vêhê xi cumá rê titjun. Cuitjin cumá tsêhê xuta xi siu nixtin vihi. —Cuatjin cachja Jesús.

Naa rê Jesucristu cojo xicjin me

⁴⁶ Hya xi tichja me cojo xutacjin ne, naa rê me cojo xicjin me ne, cafehetjengui me Jesús, hane maji vechútahacjin me xi cuichja me cojo ta tsêhê xi jemu quitsë xuta.

⁴⁷ Ngajan xi cachja ngu xi cachja cuitjin:

—Nutsujun ni. Ná nuju cojo nixti xingun ne, hinchacun me ngajan candatsen, xi meje nduvatjengui nuju me cuichja me cojo nuju. —Cuatjin casacu camachaya rê me.

⁴⁸ Hya xi camá ne, cavuya me catsicuya me cjua cuitjin:

—¿Yo xi má nuju xi ná naha cojo xingueen?

⁴⁹ Hya xi cuatjin cachja me ne, catsingacun tsja me xuta ladu rê me sehe cachja me cuitjin: —Ngayun xi nechun nguehe ne, ngayun xi sacuaaha ná naha cojo sacuaaha xingueen ngayun ta,

⁵⁰ tu yo ni me xi sahmi me sacuaaha meje rê Nahmi naha xi tacun me ngahnga ne, me vêhê tangun ni cojo xingueen, cojo ná naha.

13

Ejemplu tsêhê cha xi catsitjê trigu

¹ Nixtin hya ne, cavetjuxin Jesús tsêhê ndihya ne, quiji me tjeheh laguna ngajan cavejña me.

² Hane ngajan camatangun xutacjin. Vêhê xi cavisehen me ngu barcu ngajan cavéjña me. Hane xutacjin jan ne, caviyuju me nangui quixí tjeheh nandan jan.

³ Sehe cavicuya Jesús me jemu cjin cjua sacuaaha xcusun rê ejemplu. Cuitjin cachja me:

—Cuejña ne xi ngu cha xi tsitjê cha trigu matsejen ne, cavetju cha quiji cha xi tsitjê cha trigu.

⁴ Hane jinguyêjê rê xi titsitjê cha matsejen ne, ngujo matsejen ne, cavixu ndiya. Hane canduva chu nisê, catsicjê chu cajine chu.

⁵ Hane ngujo nga matsejen ne, cavixu hiscan xi jemu naxindya, hacuaaha jemu chuva nihndê quisun. Ngajan jemu xati cavetju ta tsêhê xi hacuini tjain nihndê quisun.

⁶ Hane xi cavetjucaa tsuhi ne, cavaca rê cojo ndavá jan. Hane tsêhê xi tsajin tyjama rê xi nungun matsejen ne, caxintsen.

⁷ Ngujo nga ne, cavixu ngajñi nahyá. Hane xi camacha tangun matsejen ne, nahyá jan ne, vêhê casahmi hndê rê catsixi rê.

⁸ Hane xi yahnga matsejen ne, cavixu hiscan nihndê ndaja. Hane camayehe ne, ngujo ne casua tutjê rê ngu cientu sa cuatjin sacuatjin xi camatjê, ngujo nga ne, yachantê sa, hane ngujo nga ne, cantê sa sacuatjin xi camatjê.

⁹ Yo ngayun xi tjîn nuju cjuasua xi cuinuhyun cjua naha ne, ndaja tetuhunrcun. —Cuatjin cachja me.

Mé má ejemplu cachja Jesucristu cojo xuta

¹⁰ Hya xi camá ne, cafehetiña xuta ladu rê me cavinenguise me Jesús tsêhê ejemplu xi chja me ta, ¿mé tsêhê xi ejemplu ni vicuya me cojo?

¹¹ Hane cafayangui me tsêhê xuta jan cuitjin:

—Nina ne casua me cahndê xi ngayun ne, cuijne rcu cjuatacun tsêhê gobiernu xi sahmi Nina, cjuatahahma xi titjun ne tsajin yo machaya rê. Peru yêjê sa me xi yahnga ne, casuaain me cahndê xi cuijnercu me.

¹² Me xi ha tjîn rê cjuatacun jan ne, sua sa Nina me, ndaja cuijne rcu me. Hane me xi tsajin cjin rê cjuatacun jan ne, cjuahataha Nina hitsë xi tjîn rê me.

¹³ Vêhê xi suvá ejemplu tichjá cojo rê me ta, handasa vutsejen me, peru sahmicuendaain me; visiñuju me ne, peru sahmi me sacuaaha xi vihndiin me hacuaaha vijni rcu me.

¹⁴ Xi cuatjin sahmi me ne, sahmichihin me cjua xi catsihindu profeta Isaías xi catsihindu cjua vihi:

Handasa cuisñuju ngayun ne, peru ha tuxa cuijni rcun;

Handasa chutsujun ne, peru cumatsijiin nuju.

¹⁵ Xuta xi cuacun vè ne, tichjá cjuatacun rê me,

tyjavañuju me cojo tuxcun me ne, cavechja me,

ta sá tu scuêê me cojo tuxcun me,

hane sá cuihndê me cojo tyjavañuju me,

hacuaaha cuijne rcu me cojo cjuatacun rê me, sehe cuya me ladu naha xi cuaxêjtê me.

¹⁶ Peru ngayun ne, jemu ndaja tsujun ngayujun ni tsêhê xi hatuxa tichutsujun cojo tuxcun; hacuaaha visiñuju cojo tyjavañuju.

¹⁷ Nguehe cuichjá quixë cojo nuju ta jemu ndaja tsujun ta, tsëhë xi hacuaha jemu cjin profeta hacuaha jemu cjin xuta xi matitjun xi caviyuju titjun ne, jemu meje scuëë me xcusun xi ngayun tichutsujun, peru casacuiin cavëë me. Hacuaha jemu meje cuisifñuju me cjuja xi tivisiñuju ngayun, peru casacuiin cavisifñuju me ta, tsëhë xi cjëë cuechu nixtin.

Cachja Jesús mé vijne ejemplu tsëhë cha xi catsitjê trigu

¹⁸ Cuatjin hindë ne, nuhyun mé meje cuichja ejemplu tsëhë cha xi catsitjê trigu.

¹⁹ Hya xi visifñuju ngu xuta cjuja tsëhë gobiernu xi sahmi Nina ne, peru vijniircu me cjuja jan, sehe vinduva Satanás ne, fahataha cjuja jan tsëhë xahasen rë me. Cjuja vi ne, hacui sacuaha trigu xi cavixu ndiya.

²⁰ Hane tsëhë trigu xi cavixu hiscan jemu naxindya ne, hacui sacuaha hya xi vihndë xuta cjuja rë Nina, hane fahatsja me cojo cjuasua.

²¹ Peru trigu xi cuacun vë ne, jemu chúva tyjama rë vetju. Hacuaniitjin ni vatju ngujo xuta má. Macjain rë me ngujo nixtin peru hya xi vechú ngu nixtin xi satë rë me cjuañihí o cjuandya xi sua xuta me ngatsë rë cjuja rë Nina ne, fëcacun me cojo cjuja jan.

²² Hane tsëhë trigu xi cavixu ngajñi nahyá ne, hacui sacuaha hya xi vihndë xuta cjuja rë Nina, peru ha xcun xi cjuinduju me cojo nixtin rë me ne, tsingataha cacun me tsëhë cjuatacun xi satë naja nguehe ngasunhndë, hacuaha meje rë me cjuanchina xi cjuicanií rë, hane vëhë suaain cahndë xi cumajyë cjuja rë Nina cahntsua xahasen rë me, hacuaha sahmi me ngu cjuandaja xi tsingacun xi xuta rë Nina má me.

²³ Hane hya xi vixu yahnga trigu hiscan nihndë ndaja ne, hacuaha hacui sacuaha hya xi vihndë xuta cjuja rë Nina hane vijne rcu me mé vitexa Nina, hane sahmi me cjuandaja. Tjin me xi jercu quisun cjuandaja sahmi, hane tjin nga me ne, chuva cjuandaja sahmi me, hane yahnga me, hitsë sa chuva cjuandaja sahmi me.

Ejemplu tsëhë xi jiyahma cojo tutjê rë trigu

²⁴ Sehe cachja nga me ngu ejemplu cojo me, hane cuitjin cachja me:

—Gobiernu xi sahmi Nina ne, cumá sacuaha camá hya xi catsitjê ngu xuta tutjê rë trigu ndaja xcun nangui rë.

²⁵ Peru nixten ne, hya xi jiñafë xuta ne, cafehe ngu xi condra rë me catsitjê cha ngu ndiji xi meje tanguncun cojo trigu. Ngajan ngajñi rë trigu jan catsitjê hma cha sehe quiji cha.

²⁶ Hya xi camá ne, hisca xi cavetju xca rë, cavetju tú rë, sehe camachaya rë me tsëhë ndiji jan.

²⁷ Hya xi camachaya rë me ne, cafehe mosu rë me xi tsëhë nangui jan, cavinenguise mosu me: “Nai, tutjê ndaja xi camá canitjun, ¿há cutjin cavetjun xi casecjan cojo ndiji ne?”

²⁸ Ngajan cafayangui me tsëhë mosu jan: “Ngu me xi condra naha casahmi me.” Hane cafayangui mosu jan cuitjin: “¿Há hanguin chjanijñi ndiji jan?”

²⁹ Peru cafayangui me cuitjin: “¡yéya! Caveni chjanujñu ndiji jan ta sá tsajin ne, hacuaha chjanu trigu xi ndaja.

³⁰ Catamacha catsijo, sehe cuichja hya xi tjune rë xi tjun ni cjuanejñi cha ndiji, sahmi cha xtë rë xi cuaca cha. Sehe cjuaya cha trigu, cuinchandaja cha cahndë rë.” Cuatjin fi ejemplu xi cachja Jesús.

Ejemplu tsëhë tutjê lihndi

³¹ Jesús ne, cachja nga me ngu ejemplu cuitjin:

—Gobiernu xi sahmi Nina ne, hacuaha cumajyë tangun cojo ngu tutjê ya mostasa ta jemu lihndi camahani ne. Tutjê jan ne, cafaha ngu cha catsitjê cha xcun nangui rë cha;

³² Tutjê rë ya mostasa ne, handasa hitsë sa lihndi má xi cumá rë yëjë ni tutjê xi yahnga ne, hya xi camá cha ni, hitsë sa jyë camá xi cumá rë yëjë ni ya xi yahnga. Cuma ngu ya xi hiscan nisë xi vitjen chu ngahnga ne, cuma sahmi chu ndava chu rcu ya jan.

Ejemplu tsëhë san rë pan

³³ Cavuya cachja nga Jesús cuitjin:

—Gobiernu xi sahmi Nina ne, hacuaha tangun sahmi sacuaha san rë pan xi visecjan ngu chjuun ngajñi rë jyan chuva rë nahyu rë pan cojo sa xi sahmi xahngajñi rë yëjë ni nahyu cjin jan.

Me tsëhë xi Jesús ne, sahmi me cojo ejemplu

³⁴ Cuatjin cachja Jesús cojo xutacjin, ta ejemplu ni cachja me cojo xuta ne, cachjaain me chichihin ta, suvá cojo ejemplu.

³⁵ Cuatjin cavicuya me sehe cuetjucaa cjuja xi catsihindu profeta ta:

Cjuja xi vetju ntsuva ne, suva ejemplu ni;

Cuichjá cjuja xi hinchahma hisca ntsacu cavetsihin ngasunhndë.

Cachja Jesús mé vijne ejemplu tsëhë ndiji jan

³⁶ Hya xi cavatju cachja me, sehe catsicjê Jesús cjuo cojo xutacjín jan, cavisehen me cahntsua ndihya hane ngajan cafehe tjengui rê me cha ladu rê me, cavinenguisse cha me çmé vijne ejemplu tsêhê ndiji nguijña jan?

³⁷ Sehe cafayangui Jesús cuitjin:

—Cha xi catsitjê trigu ne, hacui Quihndi rê Xuta Jain.

³⁸ Hane nguijña ne, hacui ngasunhdê. Tutjê ndaja ne, vêhê xuta xi vihndê me tsêhê Nina, hane ndiji jan ne, hacui xuta xi vihndê tsêhê xitsehen.

³⁹ Cha condra xi catsitjê cha ndiji jan ne, hacui xitsehen xi matitjun cha. Hacuaha nixtin xi cjuanga ne, hya xi cjuê ngasunhdê. Hane cha xi cjuanga ne, hacui ángel.

⁴⁰ Cuanitjin sacua ha ndiji xi casahmi cha xtê rê xi cueti, cuatjin cumá cojo xuta xi hndiin tsêhê Nina hya xi cjuê ngasunhdê.

⁴¹ Hya ne Quihndi rê Xuta Jain ne, tsingatju me ángel rê me xi cuahaxin me yêjê ni xuta xi candiya xicjin me ngajñi rê cjuatsehen cojo xuta xi sahmi me cjuatsehen, cuaxëxin me tsêhê gobiernu xi sahmi Nina.

⁴² Hya xi camá cavaxëxin me ne, scandiya me xuta hiscan cuaca me ngu ndihi jyê, ngajan jemu squihnda me hacua ha jemu cuanerii nehñu me.

⁴³ Peru xuta xi tyjahi cjuatacun rê me xcun Nina ne, cumá me sacua ha tsuhi xi seti xi sua hasen rê camá ngajan gobiernu xi sahmi Nina nahmi rê me. Yo ngayun xi tjin nuju cjuasua xi cuinuhyun cjuo naha ne, ndaja tetuhunrcun. —Cuatjin cachja me.

Ejemplu tsêhê tujún xi caseyanijihma

⁴⁴ Xuta xi meje cuisehen gobiernu xi sahmi Nina ne, hacua ha tangun me sacua ha ngu cha xi casacu rê cha ngu cahndê hiscan xi caseyanijihma tujún cjín. Hane hya xi camá ne, cavetsa nga cha tujún jan, sehe quiji cha cojo cjuasua ne, caviteña cha yêjê xi tjin rê cha sehe cavechutaha cha chji rê xáhva jan.

Ejemplu tsêhê tuseti xi hnga chji rê

⁴⁵ Hacua ha xuta xi meje cuisehen me gobiernu xi sahmi Nina ne, tangun me sacua ha ngu cha viteña xi vanguisse cha ngu tuseti xi hitsê sa ndaja seti.

⁴⁶ Hane xi sacu rê cha ngu xi jercu tu vengui chji rê ne, quiji cha caviteña cha yêjê xi tjin rê cha sehe cavechutaha cha chji rê tuseti jan.

Ejemplu tsêhê changa rê chu ti

⁴⁷ Hacua ha gobiernu xi sahmi Nina ne, cumá sacua ha ngu changa jyê xi catsingatjeya xuta ndachacun. Hane hya xi camá ne, ngajan cahntsua changa jan camá tangun yêjê xcusun chu ti.

⁴⁸ Vêhê xi hora xi catsê rê ne, cajuvé nga xuta changa jan ne cavejña me tjehen rê ndachacun ngajan cavaxijin me chu. Chu xi chine ne, cavinchandaja me, peru cacandi me chu xi yahnga.

⁴⁹ Cuanitjin ne cumá hya xi cjuê ngasunhdê, ta cuinduva ángel ne, cuatêcja me xuta xi tsehen cjuatacun rê me tsêhê xuta xi tyjahi cjuatacun rê me,

⁵⁰ sehe scandi me xuta tsehen hiscan cuaca me ngu ndihi jyê. Hane ngajan ne, jemu squihnda me hacua ha jemu cuanerii nehñu me.

Cjuanchina xatsê cojo cjuanchina changa

⁵¹ Hya xi camá ne, Jesús ne, cavinenguisse me xicjin me:

—¿Há cavijne rcu cjuo vi?

Ngajan cafayangui me:

—Juun, cavijnircuin.

⁵² Sehe ngajan cachja Jesús cuitjin:

—Hya xi ngu maestru xi vicuya me ley ne, sá xi scutaya me xi meje cuisehen me ladu tsêhê gobiernu xi sahmi Nina ne, sahmi me sacua ha nai rê ngu ndihya jyê. Xuta jan ne, vaxê me xcusun xatsê ne, hacua ha vaxê me xcusun changá tsêhê cahndê xi cavinchandaja me.

Jesús ne, cavuya me nangui rê me

⁵³ Hya xi camá cajnetaha cachja Jesús ejemplu vihi ne, sehe cavatju quijixin me.

⁵⁴ Hane xi quiji me ne, cafehe me nangui rê me, ngajan cavicuya me xuta cahntsua yungun rê. Hya xi camá ne, jercu cavêhërcun me Jesús, hane cachja me cuitjin:

—¿Jani cavutaya cha vihi ta jemu tjin rê cha cjuatacun? ¿Jani casacu rê cha cahndê xi sahmi cha cjuarcun?

⁵⁵ Cha vihi ne, quihndi rê cha chjineya jan. Naa ra ne, María hmí na. Hacua ha xicjin cha ne, hacui Jacobo, José, Simón cojo Judas.

⁵⁶ Hacua ha tichjá cha ne, xuta nandya naja. Ha hyun ta cuatjin peru, ¿jani casacu rê cha cjuo xi tichja cha?

⁵⁷ Cuatjin ne mijj cjuaha cuenda me cjuare Jesús tsêhê xi tangun nangui rê me. Sehe cachja Jesús cuitjin:

—Ngu profeta ne, macjain rê xuta me, peru hatuxa xuta nangui rê me macjaain rê me tsêhê me. Hacuaha xuta ndava me ne, macjaain rê me tsêhê me.

⁵⁸ Cuatjin camá ta tsêhê xi ngatsê rê xi macjaain rê xuta me ne, ndastu cjin cjuarcun casahmi me ngajan.

14

Xi má rê Herodes ne, Jesús ne, hacui Juan Vitenda Xuta

¹ Nixtin hya ne, camachaya rê me xi matitjun xi hmí rê Herodes cjuare xi tichja xuta tsêhê Jesús.

² Ngajan xi cachja me cojo xuta xi faha cuenda rê me ta:

—Cha vêhê ne, hacui nima Juan Vitenda Xuta. Handasa cahme nima, peru ha cavascaya rê, vêhê xi tjin rê cha ngahñu xi má sahmi cha cjuarcun.

³ Ta Herodes jan ne, ha catsingatju me cachjaha rê Juan ne, catsihñu me cha xi quiji cha ndavaya. Cuatjin casahmi Herodes ta tsêhê xi cuatjin cachuya rê na Herodía, chjuun rê hntse Herodes.

⁴ Tsêhê na vê cachja Juan cojo Herodes cuitjin:

—Chja ley ta ndajintjin camahani xi chjahan chjuun rê xingueen.

⁵ Herodes ne, meje tsiquehen me Juan jan, peru camaji ta tsêhê xi xi má rê xuta ne, cha Juan ne, hacui profeta má cha. Hane Herodes ne, tsacjun me xuta.

⁶ Cuatjin camá xi hya xi cavechu nixtin rê suhi tsêhê Herodes, na quihndi rê na Herodía ne, catê na ngajñi xuta xi siu suhi jan. Hane jemu cachuya rê Herodes xi cuatjin catê na.

⁷ Sehe ngajan xi Herodes casua na me cjuare quixi rê me xi sua me na tu mé ni xi meje cjuéhya na.

⁸ Ngajan xi na vê ne, hya xi ha cavinchangui na naa rê na ne, cachja na cuitjin:

—Meje ná xi cahntsua ngu tyuva ne, tuhun ná rcu Juan Vitenda Xuta.

⁹ Hya xi camá ne, jercu choho cama rê Herodes. Peru tsêhê xi hisca Nina caveyanangui me hane tsêhê xi xcun cjin xuta jan casua me cjuare ne, catsingatju me cjuare xi cuatjin cumá.

¹⁰ Hane cavitexa me sindadu cavatêsun cha rcu Juan ngajan ndavaya.

¹¹ Hya xi camá ne, cafehe cha cojo rcu jan xcun ngu tyuva hane casua me na. Sehe quijitjengui na naa rê na, casua na naa rê na.

¹² Hya xi camá ne, xuta ladu rê Juan jan, cafehya me nima caveyaniji me. Sehe quiji me casua me camachaya rê Jesús.

Catsicjen Jesucristu hñu mil xihin

¹³ Hane xi camachaya rê Jesús ne, cavetju me ngajan cavisehen me ngu barcu quiji me ngu cahndê xin. Peru xi camachaya rê xuta ne, cavetju me tsêhê nandya ne, quiji ntsacu me tjehen laguna quiji tjengui me Jesús.

¹⁴ Xi tu cavetju Jesús tsêhê barcu ngunda ne, cavutsejen me xutacjin jan, hane camayuma rê me xuta jan. Hane catsindaja me xuta hmu rê.

¹⁵ Hane hya xi jimá nguixun ne, cafehe xuta ladu rê me cachja cojo me cuitjin:

—Jemu xin camahani cahndê vi, hane ha quiji hora. Ninguijnutuhun cjuare cojo xutacjin vê ne, sehe catji me nandya xi siu tiñataha catatsê me comida xi sinê me.

¹⁶ Peru Jesús ne, cuitjin cachja me cojo cha xi tejó jan:

—Sahmi ngujoyê xi cjuexin me ne, ngayun tuhun xi sinê me.

¹⁷ Sehe ngajan xi cachja cha ladu rê me cuitjin:

—Hñu pan ne cojo jo ti tjin naja. —Cuatjin cachja cha.

¹⁸ Sehe cachja Jesús cuitjin:

—Nduvuncjun.

¹⁹ Hya xi camá ne, casahmi Jesús xi catiyuju xutacjin jan xcun ndiji; sehe caphatsja me hñu rquí pan jan cojo jo ti jan. Hane tivutsejenniji me ngahnga ne, casua me nacuehji rê Nina, sehe cavotoho langa me pan casua me pan jan cha ladu rê me xi cjuare sua cha sinê xuta.

²⁰ Hane xuta ne, yêjê ni me cajinê me hacutjin cachuya rê xahasen rê me. Hane xi cachjaya rê xi cavangui cajinê xuta jan ne, catsê tejó chajne.

²¹ Me xi cajinê pan jan ne, hñu mil má me xi xihin. Ha xin yachjin cojo langa xi hacuiin cojo camaxqui.

Quiji ntsacu Jesucristu xcun nandá

²² Hya xi camá ne, Jesús ne, casahmi rê me ngujoyê xuta ladu rê me xi cuisehen me barcu hane cjuare titjun ni me ngunda vêhê, jinguyêjê rê xi tsinguijnetaha me cjuare cojo xutacjin jan.

²³ Hane hya xi camá quiji xutacjín ne, sehe camijixin Jesús rcu ndetjún xi cuisiajmi me cojo Nina. Hane hora xi camá nguixun ne, tacun súv me.

²⁴ Peru barcu jan ne, vasantjin laguna cjui, hane jemu chja cjui ngatsë rë tsindyu rë nandá xi tsivaha rë barcu ta, tséhë xi tjo ne, taha hiscan cjui ne, ngajan nduva.

²⁵ Hane hya xi tiña sahasen ne, quiji ntsacu Jesús xcun nandan ne quiji tjengui me me tséhë me.

²⁶ Hya xi cavëë xuta ladu rë me xi nduva ntsacu me xcun nandan ne, jemu camá xti rë me cachja me ta nima xi meje cuincharcun rë me, hane cajindayatë me.

²⁷ Ngajan xi cachja Jesús cojo me ta:

—¡Xi carcuun! ¡Tuhun cjuetacun xahasen nuju ta ngahan vi!

²⁸ Hya xi camá ne, cafayangui Pedru tséhë Jesús cuitjin:

—Nai, sá xi quixi xi ngayun ne, tuhun ná cahndé nduvá tjenguë nuju.

²⁹ Sehe cachja Jesús cuitjin:

—Nduvun.

Hane cavitujne Pedru tséhë barcu jan, quiji ntsacu me quiji tjengui me Jesús.

³⁰ Peru xi camachaya rë me tjoxtin ne, catsacju me camá, sehe cavetsihin cavisehen ngahma me ngajñi nandan. Hya xi camá ne cajindayatë me Jesús cachja me cuitjin:

—¡Nai, naxuntjun ná!

³¹ Hya xi camá ne, ngutjen cafahatsja Jesús me, cavaniji me me ne, cachja me cojo me cuitjin:

—Ngayun ne, cjëë cumangutacunndujun cojo ná, ¿mé má macjaain nuju?

³² Hya xi camá ne, cavisehen catsijo me cahntsua barcu jan, hane hora vëhë ne casejyu tjo jan.

³³ Ngajan xi xuta xi hinchá barcu jan ne, cavixcuhnchi me cafaharcun me Jesús cachja me cuitjin:

—Ngayun ne, quixi jain xi Quihndi rë Nina yun.

Casahmi Jesús xi camandaja xuta nandya Genesaret

³⁴ Xi quiji sa me cojo barcu ne, cafehe me tjehe laguna hiscan nandya xi hmí Genesaret.

³⁵ Hane xi camachaya rë xuta xi Jesús xi cafehe me, catsingatju me cja rë yëjë ni nandya xi siutahndee, hane xuta ne quijicojo me xuta hmu rë me hiscan tacun Jesús.

³⁶ Sehe cafehya me cojo Jesús xi ndastu satëtaha xuta hmu rë jan ntsacu tsjian rë Jesús. Hane yëjë ni xuta hmu rë xi casatëtaha ntsacu tsjian rë Jesús ne, camandaja me.

15

Cha partidu fariseo ne, fahataha cha Jesús

¹ Ngu ndiya ne, ngujo cha tséhë partidu fariseo cojo ngujo cha maestru rë ley ne, canduva cha tséhë nandya Jerusalén, quiji cha hiscan tacun Jesús, cachja cha cojo me cuitjin:

² —¿Hacutjin cumá xi cha ladu nuju ne, sahmii cha sacuaaha yaha xcusun rë xutachanga naja? Ta cuatjin vanii cha tsja cha hora xi jiné cha niñu.

³ Ngajan xi Jesús cafayangui me tséhë cha cuitjin:

—Hane ngayun ne, ¿hacutjin cumá xi vejñuxun cja xi cavitexa Nina ngatsë rë xi nihñu xu xcusun rë xutachanga naja?

⁴ Cachja Nina ta: “Chjuhuncun na nuju, chjuhuncun nahmi nuju”, hacuaaha chja ta: “Yo xi choho chja tséhë xutacha rë ne, xuta ne tsiquehen rë.”

⁵ Peru ngayun tuhun cahndé xi cuichja xuta cojo xutacha rë ta: “Ha quihndé cumaji cuisécoo nuju ta yëjë ni xcusun xi tjin ná ne, ha cavejñá tsja Nina.”

⁶ ¿Mé má cuatjin tuhun cahndé xi faharcuün cha nahmi rë cha? Cuitjin ne, ngatsë rë xcusun nuju sacuaaha xi venguichjiin rë cja rë Nina xi cuma rë xuta.

⁷ Ngayun ne, xuta jo xcun jo hntsua ngayun. Cachja quixi profeta Isaías xi cuitjin catsihindu me tsujun:

⁸ Xuta xi cuacun vi ne, ndaja chja me tsahan peru xi cojo xahasen rë me ne, hisca tsinguitsjiin me ngahan.

⁹ Tu mahya xi faharcun ná me ta,

Xi vicuya xicjin me ne, hacuün cja naha ta tu cja rë xuta.

¹⁰ Hya xi camá cachja me cuatjin ne, cajindaya Jesús xutacjín cachja me cojo cuitjin:

—Ngayujun ngarca ni ne, nuhyun ndaja cja vi:

¹¹ Xcusun xi tsitsehen rë xuta ne, hacuün xcusun xi chine xi visehen hntsua me, ta xcusun xi tsitsehen rë xuta ne, xcusun xi vetjun tséhë hntsua me.

¹² Sehe cafehe xuta ladu rë Jesús ne, cavinenguise me cuitjin:

—¿Há hyun xi canicjun rë cha partidu fariseo ne xi cuatjin canújun?

¹³ Peru cafayangui Jesús cuitjin:

—Tu mé ni tutjê xi catsitjiin nahmi naha xi tacun ngahnga ne, tjune rê hisca cojo tyjama rê.

¹⁴ ¡Caveni! ¡Nihñuu cuendun me! Me vêhê tangun me cojo xuta rcá xi cjuecani xicjin me. Hane sá xi cuatjin ne, cuixuya catsijo me xanga.

¹⁵ Sehe cachja Pedru cuitjin:

—Ningacun nihi mé vijne ejemplu jan.

¹⁶ Ngajan xi Jesús cachja cojo me ta:

—¿Há hiscan ngayun cajni rcun cjua xi cachjá ni?

¹⁷ ¿Há hyuun xi xcusun xi jinê xuta ne visehen cahntsua me? Fê ne, vetjutaha ndatsen.

¹⁸ Peru xcusun xi vetju chja me ne, nduva tsêhê xahasen rê me, hane vêhê tsitsehen rê me,

¹⁹ ta tsêhê xi tsêhê xahasen rê xuta ne, nduva cjuatacun tsehen sacuaaha jyê xi tsiquehen xicjin xuta, sacuaaha jyê xi sahmi chjuunnahñu rê me jingu sa chjuun, sacuaaha yachjin xi viteña yojo rê, sacuaaha cjuachêjê, sacuaaha testigu xi vindacha me, sacuaaha cjuachjataha.

²⁰ Yêjê cjuatsehen xi cuacun vêhê ne, nduva tsêhê xahasen rê xuta, hane vêhê tsitsehen rê me; peru sá jinê me niñu cojo tsja me xi cjêê cuane me ne, tsitsiin rê me.

Jesús ne, visecoo me ngu chjuun xutaxín, na xi hacuín na ladu tsêhê Israel

²¹ Hane Jesús ne, cavetju me ngajan, quiji me ngu nanguixin táha distritu nandya Tiro cojo nandya Sidón.

²² Hya xi camá ne, cafehetjengui rê me ngu chjuun cananea xi tsêhê ngajan. Cajindaya na cachja na cojo Jesús cuitjin:

—¡Nai! Ngayun, quihndindaicjin rê David, ¡catamayuma nuju ngahan! ta na quihndi naha ne, jiya xitsehen xi jemu suandya rê na cahntsua xahasen rê na.

²³ Peru Jesús ne, ndastu me cjua catsicuya me. Hane xuta ladu rê me ne, cafehya me Jesús cuitjin:

—Ningatjunixun na, ta jemu si nduvatjengui na yaan fehyataha na yun. —Cuatjin cachja me.

²⁴ Ngajan xi cafayangui Jesús cuitjin:

—Nina ne, catsingatju me ngahan ngatsê rê xuta rê nangui Israel, ta me vêhê sacuaaha tsánga xi cachaja má me.

²⁵ Hya xi camá ne, cafehetiña na tsêhê Jesús cavixcuhnchi na xcun Jesús xi cafaharcun na me. Cachja nga na cuitjin:

—Tatá, nihñu favor tisecon ná.

²⁶ Ngajan xi cachja Jesús ejemplu vi:

—Sechiye ne catjinetaha catjine nixti ta, hacuín ndatjin xi chjahantahan niñu tsêhê nixti hane sehe tahan rê naña.

²⁷ Hane cafayangui na cuitjin:

—Quixi jain xi nújun, peru naña xi siu ngahma maxê ne, sacu xi rê pan xi vixuhndu ngahma maxê rê nai rê chu hane jinê chu.

²⁸ Sehe cafayangui Jesús cachja me cojo na cuitjin:

—Ngaye chjuun, jemu ndaja mangutacuín cojo ná. Catamandaja quihndi riji sacuaaha xi meje ri.

Hya xi camá ne, hora hya ne, camandaja quihndi rê na.

Casahmi Jesús xi camandaja xuta tjeheñ rê laguna Galilea

²⁹ Hya xi camá ne, cavetju Jesús taha vêhê quiji me tahndee rê laguna Galilea sehe ngajan camiji me ngu ndetjún, ngajan cavejña me.

³⁰ Hane jemu quijitjengui rê me xutacjín, yaha me xuta rengun, xuta rcá, xuta lihmi, xuta yoho cojo xuta xi má rê hacjahi chílin ne caviyujutê me xuta jan xcun Jesús hane Jesús ne, casahmi me xi camandaja me.

³¹ Xi cavêê xutacjín xi cuatjin camá ta, cama cachja xuta lihmi, camajingu xuta yoho, findaja xuta rengun hacuaaha tsejen rê xuta rcá ne, sehe jercu quijircun rê me, hane casahmi hnga me, casahmi jyê me Nina, Nina jan xi faharcun xuta nangui Israel.

Cjuarcun xi catsicjen Jesús ñuju mil xihin

³² Ngajan cajindaya Jesús xuta ladu rê me, cafehe me cachja Jesús cojo rê me cuitjin:

—Jemu yuma má ná xutacjín vi ta ha quihndê jyê nixtin hinchataha me cojo naja, hane ha quihndê tsajin camahani mé xi sinê me. Tsajin manguacacun xi tsingátju me cjue me xi cjêê sinê me niñu ta, sá tsajin ne, cjuaha rê me hinda ndiya.

³³ Sehe ngajan xi xuta ladu rê me ne cafayangui me tsêhê me cuitjin:

—Peru nguehe nangui xín ne ¿jani cuma sacú nihi pan xi sinê xutacjín vi?

³⁴ Ngajan xi cavinenguise Jesús cojo xuta cuitjin:

—¿Há cjin pan tjin nuju?

Ngajan xi cachja me ta:

—Yatu má pan hacuaha siu ngujo ti langa.

³⁵ Ngajan xi Jesús ne cavitexa me xutacjin xi cuiyujutë me nangui.

³⁶ Hya xi camá casahmi xuta ne, sehe cafaha Jesús yatu pan cojo ti jan ne sehe casua me nacuechji rë Nina. Hane cavotoho langa me pan cojo ti jan, casua me xuta ladu rë me xi cavatëcja me ne cafaha xutacjin.

³⁷ Cuatjin camá cajine xuta jan, hane jemu ndaja cama rë xahasen rë me. Hane xi cafaya xuta xi cavangui cajinë xuta jan ne catsë yatu nisinya.

³⁸ Xuta xi cajinë ne, sacuaha ñuju mil má me xi xihin me, hacjahi má xuta chjuun cojo quihndi.

³⁹ Hya xi cajnetaha vëhë ne, catsingatju Jesús xuta cafe me, hane suvá ni me, cavisehen me ngu barcu quiji me taha nandya Magadán.

16

Cha partidu fariseo cojo cha partidu saduceo ne fehya cha xi tsingacun Jesús ngu seña

¹ Xi cafehe me ngajan ne, hacuaha cafehe cha tsëhë partidu fariseo cojo cha partidu saduceo hane ta tsëhë xi meje cjuahachuva cha me, cafehya cha me ngu cjuarcun xi nduva ngahnga, cojo sa xi scuëë cha xi Nina catsingatju rë Jesús.

² Peru Jesús ne, cafayangui me cojo ejemplu vi cuitjin:
—Nguehe ne, hya xi chutsujun xi má haní ngahnga ne, nújun jain, ta: “Tyjahi nchujun ni, ndajyihni nixtin.”

³ Cuanitjin hya xi sahasen ne, sá xi má haní ngahnga hane hincha yuffi jma ne, nújun ta: “Va cumá nixtin.” Jo má tacun. ¿Hacutjin cuma xi jemu hyun mé vijne xcusun xi cún ngahnga, peru vijniircun mé vijne xcusun xi tijima nguehe nixtin vihi ni?

⁴ Xuta tsëhë nixtin vihi ne, xuta xi tsehen cjuatacun rë me, xi tjenguiin me Nina cojo ngu ni cjuatacun, xuta vë xi fehya me ngu seña. Peru sacuiin rë me seña ta seña xi sacú rë me ne, sacuaha seña xi ha catsingacun profeta Jonás hatsëë nixtin.

Sehe xi cajnetaha cachja Jesús cja vëhë ne, caviyuju me xuta jan ne, quiji me.

Ejemplu tsëhë san rë pan

⁵ Hya xi cafehe xuta ladu rë me ngunda laguna ne, hacuaha cachaya rë me cjuaha me pan.

⁶ Sehe Jesús cachja cojo me:

—Nechun cuidadu tsëhë san rë pan tsëhë cha partidu fariseo cojo xi tsëhë cha partidu saduceo.

⁷ Sehe cha ladu rë me ne, cavisiajmi cha cojo xicjin cha cuitjin:

—Tsëhë xi cachaya naja pan ne, vëhë xi cuatjin chja me.

⁸ Peru xi camachaya rë Jesús xi veyanangui cha xi tsajin rë cha pan ne, cachja me cojo cha cuitjin:

—Ngayun ne, cjëë cumangutacun nduju cojo ná. ¿Mé má cuatjin nújun xi chjá ta tsëhë xi tsajin nuju pan?

⁹ ¿Há nuhyuun? ¿Há vitsjiin nuju? Hya xi cajinë hñu mil xuta hñu pan ne, ¿há cjin chajne cachjayun tsëhë pan xi cavangui jan?

¹⁰ Hacuaha hya xi cajinë ñuju mil xuta yatu pan ne, hya ne ¿há cjin chajne cachjayun?

¹¹ ¿Hacutjin cuma xi nuhyuun xi hacuiin tsëhë pan xi cachjá cja jan? Xi chjá ne, nechun cuidadu tsëhë san rë pan tsëhë cha partidu fariseo cojo xi tsëhë cha partidu saduceo.

¹² Hya xi camá ne, camachaya rë me xi cachjaain me xi meje cuidadu cojo san xi sahmixa pan ta cachjá me tsëhë xi meje cuidadu cojo cjuachacun xi sahmixa cha partidu fariseo cojo cha partidu saduceo.

Catsinguxi Pedru yo Jesucristu

¹³ Ngu ndiya xi ha cavisehen Jesús distritu tsëhë nandya Cesarea tsëhë Filipino ne, cavinenguise me xuta ladu rë me cuitjin:

—Mé chja xuta tsahan, ¿yo ngahan, Quihndi rë Nina Jain? —Cuatjin cavinenguise me cha.

¹⁴ Sehe ngajan xi cachja cha cojo Jesús cuitjin:

—Yahnga me ne, chja me ta nima Juan Vitenda rë Xuta ngayun, hane yahnga nga me ne, chja me ta Elías, hane yahnga nga me ne, chja me ta nima Jeremías, hane me xi yahnga nga ne, chja me ta ngayun ne, ngu profeta xi hacjahi.

¹⁵ —Hane ngayun ne, ¿mé nújun ni, yo ngahan? —Cuatjin cavinenguise Jesús.

¹⁶ Ngajan xi cafayangui Símon Pedru cuitjin:

—Ngayun ne, Mesías xi catsingatju nuju Nina; ngayun, Quihndi rë Nina, Nina quicun jain.

¹⁷ Sehe cachja Jesús cuitjin:

—Ndatjin tsujun, Símon, quihndi rë Jonás. Tsajin ngu xuta xi casua camachaya nuju cjuan, ta Nahmi naha xi tacun me ngahnga ne, me vëhé xi casua me xi camachaya nuju tséhë.

¹⁸ Hane ngahan ne, suá cumachaya nuju xi ngayun ne, ngayun xi hmí nuju Pedru. Hane ñihi nuju ne, vijne ndyojo. Hane xcun ndyojo vihi sahme yungun naha; yungun jan ne, hisca cjuaveya ne tsajin ngahñu xi tsicjéya rë.

¹⁹ Suá nuju quicha tséhë gobiernu xi sahmi Nina, ngajan xi xcusun xi nihñucjun nguehe ngasunhndë ne, hacuaha cumahñucjan ngajan ngahnga, hacuaha xcusun xi chundecjun nguehe ngasunhndë ne, hacuaha tundecjan ngajan ngahnga.

²⁰ Sehe Jesús ne, cavitexa me xuta jan xi tsajin camahani yo xi cuichja me cojo tséhë xi Mesías má me.

Cachja Jesús xi tsiquehen xuta me

²¹ Hya xi camá ne, sehe cavetsihin vicuya Jesús xuta ladu rë me tséhë xi sahmi nguyjé xi cjue me nandya Jerusalén, hane ngajan ne, jemu cjin cjuañihi cuátju me cuma xi sahmi xuta changá cojo nahmi xi matitjun tséhë nahmi cojo cha xi vicuya cjuachacun ne. Tsitjungui cha me, tsiquehen cha me; peru xi cumá jyan nixtin ne, tsicuya Nina me cjuahñu.

²² Ngajan xi Pedru ne, quijixin me cojo Jesús. Sehe cavetsihin cachjataha me Jesús cuitjin:

—Tatá, ¡catamamiji rë Nina! ¡Hatuxa cumaji cuatjun cuatjin!

²³ Hane xi cavuya Jesús cavutsejen me Pedru, ngajan cachja cojo me cuitjin:

—Tihinxin ngaye Satanás, ngaye ne, sacuaha ngu ndyojo xi meje xtenguuya ná ngajni cjuatsehen tséhë xi ningatiintacuín ngaye sacuaha tsingatahacacun Nina ta ningatehetacuín sacuaha ngu xuta ngasunhndë ni.

²⁴ Sehe cachja Jesús cojo cha ladu rë me cuitjin:

—Sá xi tjin yo xi meje rë xi cuma cuisehen me ladu naha ne, ha quihndë mijí rë xi sahmi me hacutjin xi meje rë suvá me ta nchunchujun ni meje rë xi cateñahñu xahasen rë me xi cjuenduju me cojo ndiya naha, handasa hisca cueya me xcun cru.

²⁵ Yo xi mijí cuisehen ladu naha tséhë xi tsacjun me xi cueya me ne, cahndë xi vetjo me cjuahñu rë me ne, tsichaja me cjuahñu xatsë xi sacú rë me. Peru yo xi ngatsë rë xi cavisehen ladu naha cueya ne, sacú rë cjuahñu jan.

²⁶ ¿Mé machji rëhé rë yo xi sacú rë yjë cjuanchina rë ngasunhndë peru sehe cueya ne cumá castigu? Tsajin mé xi cuma tsindeya xicjin me cojo cjuahñu xatsë.

²⁷ Ta ngahan, quihndi rë Xuta Jain, cuinduvá cojo hasen ndajyihí tséhë Nahmi naha hacuaha cojo ángel naha cuinduvá; hane hya ne, cuechji me jimangu me, ¿há ndaja há ndajin casahmi me?

²⁸ Cuichjá quixë cojo nuju ta tjin yahnga ngayun xi sechun nguehe xi cueyuun jinguyjé rë xi cjë chun xi cuitexa Quihndi rë Xuta Jain gobiernu xi sahmi Nina.

17

Cavindeya xcusun rë Jesucristu

¹ Hya xi camá cavatju jyun nixtin ne, quijixin Jesús quijicojo me Pedru cojo Jacobo cojo Juan, hntsé Jacobo, quijiniji me ngu naxi hnga.

² Ngajan camá xi cavëë me xi cavindeya xcusun rë Jesús: Xcun me ne, camaseti sacuaha seti tsuhi, hacuaha tsjian rë me ne, jemu tu tyava camahani camá sacuaha hasen rë ndihi.

³ Hacuaha ngajan cavëë me xi cafehetsejen nima profeta Moisés cojo profeta Elías, me xi caviyuju hatsëë nixtin ne, tivisiajmi me cojo Jesús.

⁴ Sehe cachja Pedru cojo Jesús cuitjin:

—Nai, tu ma rë xi nguehe nechin ne, sá xi meje nuju ne, sahme jyan puestu; ngu cuma tsujun ne, ngu cuma tséhë Moisés, hane cojo ngu cuma tséhë Elías. —Cuatjin cachja me.

⁵ Hane hora xi tichja Pedru ne, canduva ngu yufi xi seti tsejen casahmi tjahnguen rë tséhë me, hane canuhya rë ngujo cjuan xi cavetju ngajñi yufi jan xi cachja cuitjin:

—Cha vihi xi Quihndi naha cha xi jemu hmu cacún. Jemu ndama ná ngatsë rë cha. Tinuhyun cjuan xi chja cha.

⁶ Hya xi cahndë xuta rë me cjuan jan ne, caticaxcun me. Hane jemu catsacjun camahani me camá.

⁷ Ngajan xi cafehe Jesús cavetahatsja me me, hane cuitjin cachja me:

—Tisatjunhngun. Xicarcuun. —Cuatjin cachja me.

⁸ Hane xi cavutsejenniji me ngajan ne, ndastu yo siu ta suva ni Jesús tacun me.

⁹ Xi tu tivijne me tsêhê rcu naxi jan cojo xuta ladu rê me xi quijicojo me jan ne, ngajan xi cachja me cojo me ta tsajin yo xi cuichja me cojo xcusun xi cavêê me. Xi cuatju cueya Quihndi rê Xuta Jain, sehe cuya nga me cjuahñu ne, hya cuichja me.

¹⁰ Ngajan xi cavinenguise me cojo Jesús cuitjin:

—¿Mé má cuatjin chja maestru tsêhê ley xi titjun Elías cuinduva me, sehe cuinduva Mesías?

¹¹ Ngajan cafayangui Jesús cuitjin:

—Quixi xi Elías cuinduva me titjun ta me vêhê cuiyujuchihin me yêjê ni xcusun.

¹² Peru cuichjá cojo nuju ta ha canduva me, peru xuta ne, hvín me xi hacui me, hane choho casahmi xuta cojo me hacutjin meje rê xahasen rê me. Hane hacuanitjin sahmi me xi cuátju cjuañihi Quihndi rê Xuta Jain.

¹³ Ngajan xi camachaya rê xuta rê me ta tichja me tsêhê Juan Vitenda xuta hya xi chja me Elías.

Jesucristu ne, casahmi me xi camandaja cha xi faha rê chajan

¹⁴ Hane xi quiji me ne cavechutaha me xutacjín ne, ngajan cafehetjengui rê me ngu xihin, cavixcuhnchitaha cha Jesús cachja cha cuitjin:

¹⁵ —Nai. ¡Catamayuma nuju cha lihndi naha ta, jemu faha rê cha chajan hane jemu choho sahmi cojo cha. Jiya hora ne, finenguia cha ngajñi ndacahi, hane jiya hora nga ne, viticjaya cha ngajñi nandan.

¹⁶ Cêjêcojo cha xcun xuta ladu nuju xi tsirqui me cha peru camaji casahmi me.

¹⁷ Sehe ngajan xi Jesús ne, cuitjin cafayangui me:

—Ngayujun ni ne, xuta xi macjaain rê ngayun hacuaha xuta xi cavetjuxin tsêhê ndiya ndajihí ngayun. ¿Há jyê sa xi cuitejña cojo nuju? ¿Há jyê sa nixtin xi scaa ná cojo nuju? Nduvuncjun cha ngeuhe. —Cuatjin cachja me.

¹⁸ Hya xi camá ne, cachjataha Jesús xitsehen xi hinchja xahasen rê cha, hane cavetjuxin xitsehen jan, hane hora hya ne, camandaja cha.

¹⁹ Hya xi camá ne, xi cafehe xuta ladu rê Jesús cavinenguise me me cuitjin:

—¿Mé má ngayin ne xi camaji canaxinxin xitsehen jan tsêhê xahasen rê cha vê?

²⁰ Ngajan xi cachja Jesús cojo me ta:

—Camaji ta hacuiin ndaja macjain nuju. Ta cuichjá quixê cojo nuju ta sá xi mangutacún cojo ná ndastu hitsê ne, hacuaha cuma cuinúnjun cojo naxi vihi: “Catjixin, catjin catisecon ngajan tavêhê.” Hane cuihndê tsujun. Hisca sá xi mangutacún cojo ná ndastu hitsê ne, tsajin me xi cumaji nihñu.

²¹ Peru sacuaha xitsehen xi cuacun vê ne, meje rê xi titjun chjahyan rê Nina hacuaha cuinechan xun rê me, cojo sa xi cuma naxexeen.

Cachja nga Jesús xi tsiquehen xuta me

²² Nixtin xi caviyuju Jesús cojo xuta ladu rê me ngajan distritu Galilea ne, cachja Jesús cojo me ngu nixtin cuitjin:

—Ngahan xi Quihndi rê Xuta Jain ngahan ne, hatuxa tjin xi cuma ngahan entregadu tsja xuta

²³ xi tsiquehen ná me. Peru xi cjuê xi jyan nixtin ne, cuya nga cjuahñu.

Hane xi cahndê me cjuajjan ne, jemu cafaha me cjuachoho.

Jesucristu ne, cavechjitje me tujúnsa tsêhê yungun

²⁴ Hya xi cafehe me nandya Capernaum, cafehe xuta xi faha me tujúnsa rê yungun, camatiña me tsêhê Pedru cachja me cojo me cuitjin:

—Maestru nuju ne, ¿há vechjitje me tujúnsa rê yungun?

²⁵ Ngajan cafayangui Pedru cuitjin:

—Juun, vechjitje me.

Hya xi camá ne, xi cavisehen Pedru ndihya ne, peru chajasa xi cuichja me ne, ngajan xi cachja Jesús cojo me cuitjin:

—Simón, ¿mé nújun? Sacuaha me xi matitjun tsêhê nandya ngasunhndê ne, ¿yo vitexa me xi satê rê xi cuechjitje tujúnsa? ¿Há quihndi rê me? ¿Há xutaxín?

²⁶ Ngajan xi cachja Pedru cuitjin:

—Xutaxín cuechji me.

Cachja nga Jesús cuitjin:

—Sá xi cuatjin ne, quihndi rê me xi matitjun jan ne, ha cavatjuhnga tsêhê.

²⁷ Quixi vê, peru cojo sa hacuiin ngatsê rê vêhê cumacjan rê me o maxti rê me cojo naja ne, tangun laguna ne, chandunyun tsitin ngajñi nandan ne, hane hya xi faha tsitin ngu ti ne, chu xi tjun faha rê ne, chjuhun chu nuxuhun hntsua chu hane ngajan cahntsua hntsua chu jan ne, sacú tujún xi stetaha cuechjun tujúnsa xi satê ná cojo xi satê nuju.

18

Yo xi matitjun

¹ Hya ne, xuta ladu rë Jesús cafehe tjengui me me, cavinenguise me cuitjin:

—¿Yo xi hitsë sa cumatitjun hya xi sahmi Nina gobiernu?

² Hya xi camá ne, cajindaya Jesús ngu lihndi, cavejña me cavasencia.

³ Sehe cachja me cuitjin:

—Hisca ngu ngayun cumaji cuisuhun gobiernu xi sahmi Nina ne, sá xi hacuiin nindeyun cjuatacun nuju hisca cuma yun sacuaaha ngu quihndi.

⁴ Vêhë xi yo xi tsinguijne suvá me yojo rë me xi cuihndë me sacuaaha vihndë ngu quihndi ne, me vêhë xi hitsë sa cumatitjun me hya xi sahmi Nina gobiernu.

⁵ Hane tu yo ni xi cjuahatsja rë ngu quihndi xi cuacun vë ngatsë rë xi ladu naha má ne; vêhë cuma sacuaaha xi cafahatsja me ngahan.

Xuta xi nduvacojo me xcusun xi tsitsehen rë xicjin

⁶ Peru yo xi nduvacojo xcusun xi sahmi xi tsismicacun ngu quihndi ndiya naha ne, hitsë sa ndaja tsêhë xuta vêhë xi xtyangui ngu ndyojo natsi nguisin me sehe ningatjeya rë me ngajñi ndachacun.

⁷ Jemu choho vatju xuta ngasunhndë ngatsë rë xcusun xi tsitsehen rë me xi sahmi me cjuatsehen. Hatuxa cuinduva xcusun xi meje sahmi xi tsismicacun xuta ndiya rë Nina, peru jemu chojyihl tsêhë xuta xi nduvacojo me xcusun vêhë.

⁸ Hane sá xi cjuatacun nuju meje rë xi nihñu ngu jyë cojo ntsun o sá xi cojo ntsacu ne, vengui sa chji rë xi chandunxun, ta hitsë sa ndaja tsujun xi cuma yoho yun xi cuma rë xi cuechun jingu cojo catsijo ntsun o catsijo ntsacu xcun ndihi xi tsajin nixtün tsajin nixten xi coho.

⁹ Hacuaha sá xi cjuatacun nuju meje rë xi nihñu ngu jyë cojo xcusun xi chutsujun cojo tuxcun ne, chjuhunxun tuxcun jan chandunxun, ta tsêhë xi hitsë sa ndaja tsujun xi sacun nuju cjuahñu xatsë handasa cojo ngu ni tuxcun xi cuma xi cojo catsijo tuxcun cuechun xcun ndihi xi sahmi castigu rë nima.

¹⁰ Cojo yêjë ni ne, nihñu cuidadu xi nitjunguun ngu quihndi sacuaaha quihndi vihi, ta tsêhë xi ángel xi sahmi cuenda me ne, yêjë nixtin yêjë hora ne, siu tangun me cojo Nahmi naha hane sahmi ngujyë xi cjuehya me cahndë xi cuichja me cojo.

Ejemplu tsêhë chu tsánga xi cachajá

¹¹ Quihndi rë Xuta Jain ne, canduvá me xi cuaxëtje me xuta xi cachajá.

¹² ¿Mé xi nñjun? Cuejña ne xi ngu xihin tjin rë me ngu cientu chu tsánga. Hane sá xi chajá ngu chu rë me, ¿há hyuun xi cuiyujutaha me chu xi ñujuchan tyjuhun ñuju jan nguijña ne, sehe cjue me cuanguise me ngu chu xi cachajá jan?

¹³ Hane hya xi sacú rë me chu ne, hitsë sa jyë cjuasua tjin rë xahasen rë me ngatsë rë xi casacu rë me chu xi cachaja xi cuma rë cjuasua tsêhë ñujuchan tyjuhun ñuju chu xi tetjo.

¹⁴ Cuanitjin xi cuma rë Nahmi nuju xi tacun ngahnga, ta mijí rë me xi chajá hisca ngu quihndi rë me cuatjin.

Hacutjin meje rë xi cuinújantahan xingueen

¹⁵ Hane sá xi ngu xingun choho sahmi cojo nuju ne, tangun suvun tinújuntuhun rë, hane sá xi tsindeya cjuatacun rë ne, ndatjin, ta hacuiin cuetsuntaha cjuandaja xi tjin nuju cojo me.

¹⁶ Peru sá xi vihndiin me tsujun ne, tangun chjuhun ngujo xuta tanguncujun xi tinújuntuhun rë tsêhë xi hya xi cuma me testigu nuju tsêhë, sehe cumatsejen cjuaquixi.

¹⁷ Sá xi hisca cojo me vë vihndiin me tsêhë me ne, tangun tinújun tsêhë xcun xuta yungun, hane sá xi hacuaaha vihndiin me cjuatacun rë xuta yungun jan, cumá me xi cuma nuju sacuaaha ngu xutaxín o sacuaaha ngu xuta ndacha xi faha rë tujúnsa.

¹⁸ Cuichjá quixë cojo nuju ta xcusun xi nihñucjun nguehe ngasunhndë ne, hacuaaha mahñucjan ngajan ngahnga, hacuaaha xcusun xi nihñu ndaya nguehe, hacuaaha mandaya ngajan ngahnga.

¹⁹ Hacuaha cuichjá cojo nuju ta sá nguehe ngasunhndë ne matangun cjuatacun rë jo ngayun tsêhë ngu xcusun xi chjahyun rë Nina ne, cuetjuaca jain tsujun ta sahmi chihin Nahmi naha xi tacun me ngahnga.

²⁰ Ta tu mé ni cahndë xi cuiyujuntangun ngu jo jyan xuta xi ngajan veyanangui ñihi naha, hacuaaha ngajan ngajñi rë me tejña ngahan.

²¹ Sehe cafehe Pedru cachja cojo me cuitjin:

—Nai, ¿há cjín ndiya sahmi ngujyë xi tsinchátaha xingueen sá xi choho sahmi me cojo ná? ¿há ndatjin xi yatu ndiya?

²² Ngajan cafayangui Jesús cuitjin:

—Hacuiin yatu ndiya ni, ta cuichjá cojo nuju ta mameje rê xi jyanchan tē cuatjin xi yatu ndiya ninchatuhun rê me.

Ejemplu tsêhê cha xi mijí tsinchataha xicjin cha

²³Ngajan tsejen xi hya xi Nina sahmi me gobiernu ne, cumá sacuaaha ngu me xi matitjun xi meje cuaxêchihin me cuenta xi tjin rê me cojo xuta rê me.

²⁴Hane hora xi tijima ne, cajindaya rê ngu cha xi cafehe cha hane cha jan ne, tē mil tujún quitjen cha.

²⁵Hane ngatsê rê xi tsajin camahani cha rê tujún xi sahmingojo cha, cachja me xi matitjun jan xi xteña cha xi cuma cha ngu mosu, xteña suva cha, hacuaaha cojo chjuun rê cha cojo quihndi rê cha cojo yêjê ni xi tjin rê cha, hane sehe cuatjin cuma cuechji cha tsêhê xi quitjen cha.

²⁶Hya xi camá ne, cavixcuhnchi cha xcun me cafarharcun cha me cafehya cha me cuitjin: “Nai, catijnehnchan cjuacjan nuju, tuhun ná hitsê cahndê hane cuechjê tsujun.”

²⁷Ngajan xi me xi matitjun jan ne, camayuma rê me cha, catsijyêcacun me tsêhê cha tsêhê cjuacjintacun jan, catsinchataha me cha.

²⁸Peru xi cavetju quiji cha jan, cavechutaha cha jan ngu cha xicjin cha xi quitjen tsêhê cha hitsê tujún, hane cafaha cha nguixin xicjin cha jan, cachja cha cuitjin: “Nihñi ngojo yêjê xi quitjin tsahan.”

²⁹Hane xi cavixcuhnchi xicjin cha xcun cha ne, cachja xicjin cha jan cuitjin: “Catijnehnchan cjuacjan nuju, tuhun ná hitsê cahndê ta cuechjê tsujun.”

³⁰Peru mijí sua cha cahndê, hane quiji caveya cha xicjin cha ndavaya, ngajan seya xicjin hisca xi cuma sahmingojo tujún.

³¹Hya xi cavêê yahnga mosu xcusun xi camá cavatjun jan, jemu camá xti rê me quiji casuacuenda me tsêhê cojo me xi matitjun tsêhê me.

³²Ngajan xi cajindayavaha me xi matitjun cha jan, cachja me cuitjin: “Ngaye, jemu choho xcusun riji. Catsinchataha yêjê ni xi quitjin tsahan, tsêhê xi jemu cachjahye.

³³Hane ngaye, ¿hacutjin cumá xi tsajin ri cjuayuma cojo xinguin? ta ngahan ne, cama yuma ná ngaye.”

³⁴Cuatjin camá xi jemu camacjan rê me xi matitjun cojo cha jan, catsingatju me cha cjuañihî ngajan ndavaya jñu hisca nixtin xi cjuê cuechji cha xi quitjen cha.

³⁵Hane cuatjin sahmi Nahmi naha xi tacun ngahnga cojo nuju, sá xi ninchatuun xingun cojo yêjê xahasen nuju.

19

Cjuachacun tsêhê xuta xi tsismi xicjin

¹Hya xi cajnetaha cachja Jesús cjuá vi, sehe cavetju me distritu Galilea ne, cavisehen me distritu Judea ngajan tahndee ndajyê Jordán ladu vetjucaa tsohi.

²Hacuaha quiji tjengui rê me xutacjin hane casahmi me xi camandaja xuta hmu rê.

³Hya xi camá ne, ngajan cafehe cha tsêhê partidu fariseo ne, quiji cha hiscan tacun Jesús hane tsêhê xi meje cjuahachuva cha me cojo cjuá rê me ne, cachja cha cuitjin:

—¿Há tsingatihî ley xi ngu xihin ne, tsismi chjuun rê ngatsê rê tu mé ni xcusun xi chuyiin rê me tsêhê?

⁴Ngajan xi cafayangui me cuitjin:

—Ngayun ne, ¿há cachutayuun ta tsêhê xi hisca ntsacu cavetsihin casahmi Nina ngasunhdê ne, casahmi me xi chjuun xi xihin xuta?

⁵Cachja Nina ta ngatsê rê xi cuatjin casahmi me xuta ne: “Vêhê xi ngu xihin ne, cuejña cha nahmi rê cha, hacuaaha cuejña cha naa rê cha, hane cumatangun cha cojo chjuun rê cha sacuaaha ngu ni xahasen.”

⁶Ha quihndê hacuiin jo ta sacuaaha xi ngu ni xahasen. Hane tsêhê xi ha Nina cachja me xi cuatjin cuma ngu xahasen me ne, ndajintjin xi xuta ne, tsinguetsuntaha me tsêhê xicjin me. —Cuatjin cachja Jesús.

⁷Ngajan cavinenguisse cha cuitjin:

—Sá xi cuatjin ne, ¿mé má casua Moisés cahndê xi ngu xihin cuma cuejña cha ngu xujun tsja chjuun rê cha xi ha quihndê mijí rê cha na? Hane xi cuatjin ne, cuma tsismi cha na.

⁸Sehe ngajan xi Jesús ne, cachja me cojo cha ta:

—Ngatsê rê cjuataja rê xahasen nuju ne, vêhê xi Moisés ne casua me cahndê xi nismu chjuun nuju, peru hacuiin cuatjin cavitexa Nina ntsacu cavetsihin.

⁹Cuichjá cojo nuju ta yo xi tsismi chjuun rê handasa ndastu mé cjuatsehen casahmi chjuun jan cojo ngu xihin hacjahi, hane cuixan cojo ngu nga chjuun ne, tjin jyê rê me ta tsêhê xi ngatsê rê cjuá rê me sahmi chjuun jan cjuatsehen.

¹⁰Ngajan xi cachja xuta ladu rê Jesús cuitjin:

—Sá xi cuatjin sacuaaha xi nújun, ndajintjin tsajan xi cuixan.

¹¹ Cachja nga Jesús cuitjin:

—Hacuiin yějé ni xuta ma vijnercu me cjua vi, suva xuta xi Nina casua cahndé xi vijnercu me ne, me vèhé vihndé me.

¹² Tjin xuta xi cumaji cuixan me, sacuaaha xihin xi hisca chaja sa catsin me ne, maji matangun me cojo ngu chjuun. Hacuaha tjin yahnga me xi catsixindé xuta me, hacuaaha tjin yahnga me xi faain me ngu chjuun ngatsé rë xi sahmixa rë gobiernu xi sahmi Nina. Catjahatsja cjua vi tu yo ni xi cuma cjuahatsja rë.

Catsinchacun Jesucristu nixti

¹³ Hacuaha quijicojo xuta nixti rë me hiscan tacun Jesús xi cuisanetsja me nixti jan hacuaaha cjuehya me cjuandaja rë Nina ngatsé rë me. Peru hya xi cavèé xuta ladu rë Jesús xi cuatjin tijima ne, cavatécja me cjuatacun rë xuta jan.

¹⁴ Peru Jesús ne, cachja me cojo xuta ladu rë me cuitjin:

—Tuhun rë nixti cahndé catinduva tjengui ná. Xicanichuun rë cahndé ta, tsèhé xi gobiernu xi sahmi Nina ne, má tsèhé nixti xi cuacun vë.

¹⁵ Hane ngajan cavisanetsja me nixti jan sehe cavetju me tsèhé cahndé jan.

Jemu chja cuisehen xuta nchina ladu rë Nina

¹⁶ Hya xi camá ne, cafehe ngu cha nixti xi cavinenguisse cha Jesús cuitjin:

—Ngayun Maestro, ¿mé cjuandaja meje rë xi sahme cojo sa xi sacú ná cjuahñu xatsé xcun Nina? —Cuatjin cachja cha.

Ngajan xi cachja Jesús cuitjin:

¹⁷ —¿Mé má noje tsahan xi ndaja ngahan? Ngu ni Nina xi ndaja me. Peru sá xi meje sacú ri cjuahñu xatsé jan, nohye cjua rë ley xi cavitexa Nina.

¹⁸ Ngajan cafayangui cha cuitjin:

—¿Jaré cjua jan?

Hane cachja Jesús ta:

—Xicanicuun xuta, xicanihñuu cjuatsehen cojo rë ngu chjuun o cojo rë ngu xihin xi hacuiin tsujun, xicanihñuu cjuachějé, xicanujuun cjuandesu tsèhé xuta,

¹⁹ chjuhuncun nahmi nuju hacuaaha chjuhuncun na nuju. Hacuaha nihñu hmutacun xingun sacuaaha hmutacun suva yojo nuju.

²⁰ Ngajan cachja cha nixti jan ta:

—Yějé ni cjua vèhé ne, ha cáhndé tsèhé hisca cjualihndi naha. ¿Mé sa meje rë xi sahme? —Cuatjin cachja cha.

²¹ Ngajan cafayangui Jesús cuitjin:

—Tjin sa ngu cjua sehe cuma chíhin yějé ni: yějé ni xcusun xi tjin ri ne, titeñi, hane sehe tichecje tujún rë ngajni rë xuta yuma. Hane xi cuatjin nihñi ne, jemu jyé cjuanchina sacú ri ngajan ngahnga. Hane xi cjué cuichecje tujún vèhé ne, sehe ndove tisecue ná.

²² Peru xi cahndé cha nixti cjua xi cachja Jesús ne, jemu va camá cacun cha hane quiji cha, tsèhé xi jemu nchina camahani cha.

²³ Hya xi camá quiji cha ne, cachja Jesús cojo xuta ladu rë me cuitjin:

—Cuichjá quixé cojo nuju ta jemu chja xi ngu xuta xi tjin rë me cjuanchina cuisehen me hiscan sahmi Nina gobiernu.

²⁴ Hisca cuichjá nga xi hitsé sa chjaain cuatju ngu chu camellu ngojo rë ngu níndu xi cuma rë xi cuisehen ngu xuta nchina hiscan sahmi Nina gobiernu.

²⁵ Ngajan xi xuta ladu rë me ne jemu quijircun rë me cjua rë me tsèhé xi cachja me tsèhé xuta nchina hane cavinenguisse me Jesús cuitjin:

—Sá cuatjin ne, ¿yo xi cuma cuetjutje ni?

²⁶ Ngajan xi Jesús ne, cavutsejen me hiscan siu xuta jan ne, cachja me cojo me cuitjin:

—Xuta ne, maji sahmi me; peru yějé ni xi maji sahmi xuta ne, Nina ne, hatuxa ma sahmi me.

²⁷ Sehe cachja Pedru cojo me cuitjin:

—Chutsujun ni. Ngayin ne, ha canismitacuín yějé ni xcusun xi tjin ni, hane tiviseucin nuju. Hindé ne, ¿mé sacu ni?

²⁸ Sehe cachja Jesús cuitjin:

—Cuichjá cojo nuju cjuaquixi ta hya xi cuechu nixtin xi cumá xatsé yějé ni ne, nixtin xi cueña Quihndi rë Xuta Jain xcun silla xi sahmi me gobiernu ne, ngayun xi tejó ne, ngayun xi cavisuhun ladu naha hacuaaha cuinechun xcun silla nichuvun cjuatacun rë yějé tejó tjé naja, ngayaan xi tjé rë xutachanga naja Israel ngayaan.

²⁹ Hacuaha yějé xuta xi tsismicacun me ndava me, tsismicacun me xicjin me, tsismicacun me xutacha rë me, tsismicacun me quihndi rë me, tsismicacun me nangui rë xitjé rë me, ngatsé naha; sacú rë me ngu cientu sa quisun tsèhé hane hacuaaha sacú rë me cjuahñu xatsé.

³⁰ Peru xuta xi matitjun quihndë ne, jemu cjin me xi cumachjiriin me hya, hane xuta xi hacuiin matitjun quihndë ne, hya ne cumachji rëhë me xi cumatitjun me.

20

Ejemplu tsëhë chji rë mosu

¹ Sua Nina cahndë xi cuisehen xuta gobiernu xi sahmi me ne, sacuaaha casahmi ngu me xi nai rë ngu ranchun. Xati nguitajñu quiji me cavanguise me mosu xi sahmi xá hiscan catsitjë me uva.

² Hya xi casacu rë me ngujo cha, casahmi me compromisu hane cavejña chji rë cha xi ngu tujún xi hmí rë denario xi ngu nixtin. Hane hora hya casua me cha xá quiji cha nguifña xitjë.

³ Hya xi camá ne, sacuaaha fane ñaja ne, cavuya nai jan ndetsin hane ngajan cavëë me cha xi hacjahi hane mahya rë cha.

⁴ Sehe cachja me cojo cha cuitjin: “Hacuaha tangun xitjë naha, sehe sua nuju hacutjin satë nuju.” Hane quiji cha jan.

⁵ Hane jo ndiya nga ne, sacuaaha nchisen hane sacuaaha fane jyan ne, quiji nai jan ndetsin, tangun casahmi me tangun cachja me.

⁶ Hane xi cavechu sacuaaha fane hñu nguixun ne, quiji nga me ndetsin, ngajan casacu rë me yahnga cha xi mahya rë, sehe cachja me cojo cha cuitjin: “¿Mé má tu nechun ni nguehe cuahanixtin?”

⁷ Hane cafayangui cha cuitjin: “Tsëhë xi tsajin yo xi casua niji xa.” Sehe cachja me cuitjin: “Hacuaha tangun nihñu xa xitjë naha.”

⁸ Hane hya xi ha camá nguixun, nai rë xitjë ne, cachja me cojo cha xi fahacuenda rë xitjë jan cuitjin: “Chjindayun rë mosu ne, tuhun rë me chji rë yëjë ni me, titjun ne tuhun chji rë cha xi cafehe ngascan hane cuatjin ne hisca xi cuijnetaha ne, sehe tuhun rë cha xi tjun cafehe.”

⁹ Hane xi cafehe cha xi casacu rë xa sacuaaha fane hñu nguixun ne, cafahatsja cha chji ra xi ngu denario.

¹⁰ Hane xi camachaya rë cha xi tjun casacu rë xá ne, xi má rë cha ne, hitsë sa hnga cumá chji rë cha, peru hacuaaha cafahatsja cha ngu denario ni.

¹¹ Hane xi cafahatsja cha chji rë cha ne, cachjataha cha nai jan cuitjin:

¹² “Cha vë ne, ngascan cafehe cha, ngu ni hora casahmi cha xa, hane tangun catuhun chji rë cha cojo niji. Ngayin ne, canihñi xa cuaha nixtin hacuaaha cacaa niji ndavá.”

¹³ Peru nai rë xitjë jan ne, cafayangui me tsëhë cha jan cuitjin: “Taí, tsajin me cjuachan, ¿há quixi, há quixiin xi cavisajme xi chji nuju ne, ngu denario?”

¹⁴ Chjuhun tujún xi satë nuju hane cuangun; ta ngahan ne, cachuya ná ngahan xi ngu chichihin suá rë cha hacuaaha suá nuju.

¹⁵ Ngahan xi tsahan ne, ngahan cuitexa. ¿O há tsajin ne, há machinitacun tsëhë xi casahme cuatjin?”

¹⁶ Hacuaha chuva vëhë ni, xuta xi matitjun quihndë ne, cumachjiriin hya, hane xuta xi hacuiin matitjun me quihndë ne, cumachji rëhë me xi cumatitjun me. Jemu cjin má me xi cachjindaya rë xi canduva me, peru tsëhë yëjë me jan ne, chuva má me xi catuxijin rë.

Camá jyan ndiya cachja Jesucristu xi cueya me

¹⁷ Hya xi camá ne, hora xi jiya ndiya Jesús xi cjuí me nandya Jerusalén, quijixin me cojo xuta ladu rë me xi tejó ni cachja me cojo me cuitjin:

¹⁸ —Chutsujun ni, tivanguen Jerusalén, hane ngajan ne, ngahan xi Quihndi rë Xuta jain ne, cuma ngahan entregadu tsja nahmi xi matitjun cojo maestru tsëhë ley; hane cuichja me jyë naha ne, vechu chuva rë xi cueya ngahan.

¹⁹ Sehe sahmi entregar me ngahan xutaxín, cuejnucëë ná xuta, cuëhënatya ná me, cuaja ná me ne, sehe cuetaha ná me xcun cru. Peru xi má jyan nixtin ne, cúa nga cjuahñu.

Meje scaaya xuta ladu rë Jesús tsëhë yo me xi cumatitjun

²⁰ Hya xi camá ne, naa rë quihndi rë Zebedeo quijitjengui na Jesús cojo cha quihndi rë na. Cavixcuhnchi na xcun Jesús tsëhë xi fehya na ngu favor.

²¹ Sehe cavinenguise Jesús na cuitjin:

—¿Mé xi meje rë xahasen nuju?

Hane cuitjin cafayangui na:

—Tuhun cahndë xi cuiyujutaha cha quihndi naha ngu ngu ladu tjehen nuju, hya xi nihñu gobiernu nuju.

²² Ngajan cachja Jesús cojo cha cuitjin:

—Ngayun ne, hyuun mé xi chjayun. ¿Há scaa nuju cuatjun cjuañihi xi cuátju ngahan ni? Sehe cafayangui catsitju cha:

—Juun, scaa niji.

²³ Ngajan xi cachja nga Jesús cojo cha cuitjin:

—Cjuañihi xi cuátju ngahan cuma ne, hatuxa hacuaha cojo ngayun cuatjun cuma. Peru xi cuinechuntuhun ngu ngu ladu tjeheh naha ne, hacuiin ngahan cuichjá ta Nina cuichja me yo xuta xi sua rë me cahndë xi cuiyujutaha me.

²⁴ Xi cahndë yahnga xuta xi të jan cjua xi cachja Jesús ne, cavetsihin camacjan rë me cojo jo me xicjin me jan.

²⁵ Ngajan xi cajindaya Jesús yëjë ni me, cachja cojo me cuitjin:

—Ngayun ne ha hyun ta yëjë ni xuta xi matitjun nguehe ngasunhndë ne, jemu sahmi yehe me yojo rë me sacuaha xi me vëhë xi nai rë xuta, hacuaha jercu meje cuitexa me.

²⁶ Peru hacuiin cojo ngayun cuatjin nihñu ta xi meje rë ne, ngu ngayun xi meje nihñi yehe yojo nuju ne; ninguijnu yojo nuju tisecon xingun.

²⁷ Hane ngu ngayun xi meje cumatitjun ngayun, nihñu xi cuma yun sacuaha ngu mosu rë xingun.

²⁸ Ta cuanitjin ne, casahme ngahan Quihndi rë Xuta Jain, ta canduvá ne, peru hacuiin canduvá xi xuta cuisecoo ná me ta ngahan cuisécoo rë xuta, hacuaha tsingatehen xi tsiquehen ná xuta, cojo sa xi ngatsë rë vëhë cjín xuta cuaxëtje Nina me. —Cuatjin cachja Jesús.

Casahmi Jesucristu xi camatsejen nga rë jo cha rcá ngajan Jericó

²⁹ Hya xi cavetju me nandya Jericó ne, jemu xutacjín quijitjengui rë me.

³⁰ Hane ngajan hiscan cavatju me siu jo cha rcá xi viyuju cha tjeheh ndiya, hane xi canuhya rë xi Jesús tivatju me, cajindaya cha cachja cha cuitjin:

—¡Nai, ngayun tjë rë David! Catamayuma nuju ngayin. —Cuatjin cachja cha.

³¹ Hane xuta xi siu ne, cavisajmicjan me cojo cha xi sejyu cha, peru cha vëhë ne, hitsë sa jercu cajindaya cha chja cha ta:

—¡Nai, ngayun tjë rë David! Catamayuma nuju ngayin.

³² Hya xi camá ne, ngajan casecunhñu Jesús, cajindaya me cha xi nduva cha. Sehe cavinenguisse me cha cuitjin:

—¿Mé xi meje nuju xi sahme cojo nuju ni?

³³ Ngajan xi cachja cha rcá jan ta:

—Tatá, xi meje niji ne, xi cuma tsejen niji.

³⁴ Hane Jesús ne, camayuma rë me cha; cavisanetsja me tuxcun cha. Hane ngutjen ni, camatsejen nga rë cha, sehe quiji cha cojo Jesús.

21

Cafehe Jesús nandya Jerusalén

¹ Hane hya xi ha jima tiña Jesús xi cjuehe me Jerusalén, cavechu me nandya Betfajé, ngajan ndetjún xi hmí rë Ndetjún Olivu ne, sehe catsingatju me jo xuta ladu rë me xi cjue tixa rë me,

² hane cuitjin cachja me cojo me:

—Táangun nandya xi tsejen tacun vë. Hane ngutjen xi cjuhun tjeheh rë ne, sacú nuju ngu burru xi tjihñu chu cojo quihndi rë chu. Hane chundecjun chu, nduvuncunjun chu.

³ Hane sá xi tjin yo xi cuichja cojo nuju tsëhë chu, sehe tinújun ta: “Maestru niji ne, meje rë me chu.” Hane sehe sua me cahndë.

⁴ Cuatjin camá cojo sa xi cuetjucaa jain cjua xi cachja profeta cuitjin:

⁵ Tinújun cojo xuta nangui Sion:

“Chutsujun ne, nduva me xi matitjun tsujun hiscan nechun. Hacuiin xta me ne, nduva me quisun me chu burru, quisun me quihndi rë chu xi vaniji chaha.”

⁶ Sehe xuta ladu rë me jan, cavetju quiji me hane casahmi me hacutjin cachja Jesús,

⁷ canduvacojo me chu burru cojo quihndi rë chu hiscan tacun Jesús. Hane caviyujusun me tsjian rë me ngaxtun chu, sehe camiji Jesús burru jan.

⁸ Hane xi quiji Jesús ne, quisun me burru jan, hane xutacjín ne, táha cacandi me tsjian rë me ndiya hiscan cjui Jesús. Hane yahnga me ne, quiji cavotohosun me xca xcuen hane hacuaha cacandi me ndiya hacutjin cjui Jesús.

⁹ Hane yëjë ni me xi cjui tjun cojo yëjë me xi tjengui jan ne, cavetsihin jercu cajindaya me cachja me:

—¡Hosana! ¡Nacuehji rë Nina xi cafehe me xi cuitexa naja sacuaha cavitexa David hatsëë! ¡Jemu catsinchacun Nina me xi nduva vi tsëhë xi Nina catsingatju rë me! ¡Hisca ngahnga ne, cuechu cjua rë cuandaja rë Nina!

¹⁰ Hya xi camá ne, xi cavisehen me nandya Jerusalén jercu jyë cjuandya camá hane cavinenguise xuta nandya cuitjin:

—¿Yo me vihi?

¹¹ Ngajan cafayangui xutacjin jan cuitjin:

—Me vihi, hacui profeta Jesús, xuta Nasaret tsêhê distritu Galilea.

Cavaxê Jesucristu xuta xi sahmi ndetsin ndatsen yungun

¹² Hya xi camá ne, quiji me yungun xi matitjun. Hane hya xi cavisehen me ndatsen yungun jan; cavaxê me xuta xi sahmi me ndetsin. Hacuaha catsindefa me maxê xi xinchasun tujún xi tsindeya cha cojo tujún rê xuta ngu nangui cojo puestu rê cha xi viteña nisêtyava.

¹³ Sehe cachja me cojo cha jan cuitjin:

—Chja cjuar rê Nina ta: “Ndya naha ne, tacunxa xi cjue xuta sahmi me oración rê me. Peru ngayun ne, tinihñuxun cojo sacuaaha ngu cahndê xi matangun xuta xi sahmi cjuamaña.”

¹⁴ Hya xi ha cavatju vêhê ne, ngajan yungun xi matitjun ne, cavechutaha me xuta rcá cojo xuta rengun; hane casahmi me xi camandaja me.

¹⁵ Ngajan xi cavêê nahmi xi matitjun cojo cha xi vicuya cjuachacun ne cjuarcun xi casahmi Jesús, hacuaaha cahndê me xi jindaya nixti ta: “¡Hosana! ¡Nacuechji rê Nina xi cafehe me xi cuitexa naja sacuaaha cavitexa David hatsêê!”; hane jemu cama xti rê me.

¹⁶ Cachja me cojo Jesús cuitjin:

—¿Há nuhyun cjuar xi tichja me?

Ngajan xi cafayangui Jesús cuitjin:

—Juun, vihndê. Hane ngayun ne, ¿há cjêê chutahanyun cjuar rê Nina xi chja tsêhê? Chja cjuar ta:

Hisca cjuar rê nixti hisca cjuar rê quihndinda ne canihñu xi cuetju xi sahmi hnga nuju.

¹⁷ Hya xi camá cachja me ne, cavetju Jesús tsêhê Jerusalén quiji me nandya Betania cavejña me nguixun.

Jesús ne, cachja xi quihndê cuaquiin tu rê ngu yaxujun xi cavangui me tú rê hya xi vojo rê me

¹⁸ Xi camanchujun jan ne, xi cavuya nga Jesús Jerusalén ne, cama vojo rê me.

¹⁹ Hya xi camá ne, tjeheh ndiya ne, cavêê me ngu yaxujun xi chine tú rê, peru xi cavechu me ngajan ne, ndastu me tú yaja rê, ta suva xca ni yaja rê. Ngajan xi cachja Jesús tsêhê:

—Quihndê tsajin nixtin xi cuaquí tú riji.

Hane ngutjen ne, caxintsen ya jan.

²⁰ Hya xi cavêê xuta ladu rê me xi cuatjin camá ne, cafaharcun me Jesús cachja me cuitjin:

—¿Hacutjin cumá xi jemu xati caxintsen yaxujun jan?

²¹ Ngajan cafayangui Jesús tsêhê me cuitjin:

—Cuichjá quixê jain cojo nuju ta sá xi macjain nuju Nina hane hacuiin jo cjuatacun nuju ne, cumá nihñu sacuaaha casahme cojo yaxujun vi. Hacuaaha hisca sá xi cuinújan cojo ndetjún vihi ta: “Tihinxin tsêhê nguehe. Tihin tisihin ngajñi ndachacun.” Hane cuatjin cumá.

²² Yêjê ni xcusun ne, tu mé ni xi chjahyun cojo Nina hane sá xi macjain nuju xi sacú nuju ne, cuetjuca quixi.

Cavinenguise xuta cojo Jesús yo cavitexa rê me

²³ Hane xi vicuya Jesús ngajan ndatsen yungun xi matitjun ne, camatangun nahmi xi matitjun cojo xuta changá, hane cuitjin cavinenguise me Jesús:

—¿Yo cavitexa nuju xi nihñu xa vi? ¿Yo casuaxa nuju?

²⁴ Hane xi cafayangui Jesús ne, cuitjin cachja me:

—Hacuaha cuinenguêsê nuju ngu cjuar, hane sá xi chjayunngun tsahan ne, sehe cuichjá cojo nuju yo cavitexa ná xi sahme xcusun vihi.

²⁵ ¿Yo cavitexa rê Juan xi cuitenda me xuta? ¿Há Nina ne, o há tsajin ne, há xuta? —Cuatjin cachja me.

Sehe ngajan xi xuta xi cuacun jan ne, cavisiajmicjín me ngajñi rê me, cachja me cuitjin:

—Sá xi cuinújan xi Nina cavitexa me cha Juan vê ne, cjuinenguise naja me: “Sá cuatjin ne, ¿mé má camacjaain nuju cha?”

²⁶ Hane sá xi cuinújan xi xuta cavitexa rê cha ne, tsajin yo hvê mé sahmi xuta cojo naja ta, tsêhê xi yêjê ni xuta ne, ha macjain rê me xi cha vêhê ne, profeta cha.

²⁷ Hane xi cafayangui xuta jan tsêhê Jesús ne chja me ta:

—Hyiin.

Ngajan xi hacuaaha Jesús ne, cachja me ta:

—Hacuaha cuichjaan cojo nuju yo cavitexa ná xi sahme xá vihi.

Ejemplu tsêhê jo cha quihndi

²⁸ Peru çmé nújun tsêhê cuento vi? Ngu xihin ne, jo má cha quihndi rê me. Hya xi camá ne, cafehe cachja me cojo ngu cha cuitjin: “Tsan, tihin nihñi xá ngajan hiscan camatjê xca rê uva.”

²⁹ Peru cha quihndi jan ne, cafayangui cha cuitjin: “¡Jéya! ¡Mijí cjué!” Peru hya xi camá ne, cavindeya cjuatacun rê cha hane quiji cha xcun xá jan.

³⁰ Sehe hacuanitjin cachja nahmi jan cojo quihndi xi má jo, hane cuitjin cafayangui cha jan cachja cha: “Tatá, ngahan ne, cjué.” Peru quijiin cha.

³¹ Hindê ne, çjarê cha xi casahmi chihin cha xcusun xi meje rê nahmi rê cha?

Ngajan cafayangui me ta:

—Cha xi tjun cachja.

Sehe cachja Jesús cojo me cuitjin:

—Cuichjá quixê cojo nuju ta xuta xi cojo cjuamaña faha tujúnsa cojo chjuun xi viteña na yojo ran hitsê sa tjun cuisehen me gobiernu xi sahmi Nina xi cuma nuju ngayun,

³² ta cafehe Juan cavicuya me ngayun hacutjin nihñu xcun Nina hane camacjain nuju cja rê me. Peru xuta xi faha tujúnsa cojo chjuun xi viteña yojo rê na, me vêhê camacjain rê me. Ngayun ne, handasa cahyun yêjê xcusun vêhê ne, canindeyuun cjuatacun nuju; camacjain nuju.

Ejemplu tsêhê cha xi sahmixa xi jemu tsehen cha

³³ Nuhyun sa ngu ejemplu xi cuitjin fi: Ngu nai rê ngu ranchun matsejen ne, catsitjê me xcun nangui rê me xca rê uva. Hacuaha casahmi me hñchua xondyojo tahndee rê xitjê jan, hane ngajan ni ne, cafahnguiya me ngu ndyojotê hiscan cuaxê nandá rê uva jan. Hacuaha casahmi me ngu cahndê hiscan xi cavesun me ngu nachan ngahnga xi sesun xuta xi sahmi cuidadu xitjê rê me. Sehe casua me ngujo cha sahmixa xi cjuahacuenda cha. Sehe cjuaha tsê tsê me cojo cha. Hane hya xi camá ne, cavetju me quiji me ngu nangui xin.

³⁴ Xi cavechú nixtin rê tûtjê jan matsejen ne, sehe catsingatju me mosu rê me xi quiji cachja cha cojo cha xi fahacuenda xitjê jan xi sua cha hitsê tûtjê xi satê rê me.

³⁵ Peru cha xi sahmixa jan ne, cafaha cha mosu jan tu cavaja cha ngu mosu, catsiquehen cha ngu nga, hane cavetaha cha ndyojo xcun ngu nga.

³⁶ Sehe catsingatju nga me mosu hacjahi xi hitsê sa çjín má cha tsêhê mosu xi tjun catsingatju me, peru cha xi sahmixa jan ne, ha chuya vêhê ni casahmi cha cojo yêjê ni.

³⁷ Hya xi camá ne, hisca catsingatju me suva quihndi rê me ta catsingatahacacun me cuitjin: “Tuxa cjuaharcun rê cha, xi quihndi naha.”

³⁸ Peru xi cavêê cha xi hatuxa quihndi rê me xi nduva ne, cavisiajmicjin cha cojo xicjin cha cuitjin: “Cha vihi ne, quihndi xi cjuahatsja xitjê vi cha. Niqen cha, cojo sa xi tsajan cuma nangui vi.” Cuatjin cavisiajmicjin cha.

³⁹ Hya xi camá ne, cafaha cha cha quihndi jan quijicojo cha ndatsen cahndê jan, sehe catsiquehen cha cha.

⁴⁰ Hindê ne, xi má nuju ne, çmé sahmi nai rê xitjê jan cojo cha xi cuacun fahacuenda jan?

⁴¹ Ngajan cafayangui me tsêhê Jesús cuitjin:

—Cjue tsiquehen me cha xi tsehen cjuatacun rê jan, sehe sua me xitjê jan cjuahacuenda jingu sa cha sahmixa, cha xi sua cha xitjê xi satê rê me hya xi cuechú nixtin rê. —Cuatjin cafayangui me.

⁴² Sehe cachja Jesús cojo me cuitjin:

—¿Há cachutayuun xujun rê Nina xi chja cuitjin?:

Ndyojo xi catsitjungui chjinevexo ne, vêhê ndyojo xi cavéjña tjun tjun yuju rê xihndênaña. Cuatjin casahmi Nina xi cuma. Hane xi chutsejen ngayaan ne, jemu chjahanrcun xahasen naja.

⁴³ Vêhê xi cuichjá cojo nuju ta, chjahataha nuju cahndê xi cuisuhun gobiernu xi sahmi Nina, hane sua Nina xuta nanguixin cahndê jan, xuta xi sua me xi satê rê me.

⁴⁴ Hane ndyojo jan ne, hya xi ngu xuta cjuinenguisun me xcun ndyojo vêhê matsejen ne, cuatêlanga rê me. Hane hya xi ndyojo vêhê cuinenguisun rê ngu xuta matsejen ne, ña cumá tê me.

⁴⁵ Hane xi cahndê nahmi xi matitjun cojo cha partidu fariseo ejemplu xi cachja Jesús tsêhê xuta vê ne, camachaya rê me xi condra rê me tichja Jesús.

⁴⁶ Vêhê xi cavangui me chuya rê hacutjin cuma xi cjuaha me Jesús peru camaji ta tsacun me xuta, ta xi má rê xuta ne, ngu profeta má Jesús.

22*Ejemplu tsêhê ngu suhi cjuavixan*

¹ Sehe quijinduju sa cachja Jesús ejemplu cojo rê me cuitjin:

²—Nina ne sahmi me cojo xuta xi cuisehen me gobiernu xi sahmi me sacuaaha casahmi ngu xihin xi matitjun tséhë ngu nangui hya xi casahmi me suhi xi cuixan quihndi rë me.

³Hya xi casune hora rë, catsingatju me mosu hndixahan rë me quiji cha ndava xuta xi ha casua me camachaya rë xi nduva me cjuavixan, peru canduvaain me suhi.

⁴Sehe catsingatju me hndixahan xi hacjahi ne, cuitjin cavitexa me: “Tinoje cojo xuta xi nduva cuitjin: Chutsujun ni tai, ha tjin chihin comida, ha cahme chu xi tetjo ná tséhë suhi vi, hane cachjan yojo. Tjin chihin yëjë ni: nduvun ne, xinëësuhü.”

⁵Peru casahmi cuendaain me cjuajan, hane quijixin me cafahacuenda me cjuacjintacun rë me. Ngu me quiji me xcun xitjë rë me, ngu nga me hiscan sahmi me negocio.

⁶Hane yahnga nga me ne, cafaha me mosu hndixahan jan, choho casahmi me cojo cha hisca catsiquehen me cha.

⁷Hya xi camá ne, me xi matitjun jan ne, cama cjan rë me. Catsingatju me sindadu rë me. Catsiquehen sindadu cha tsiquehen jan hane cavaca me nandya rë cha.

⁸Hya xi camá ne, me tjin hane me cojo hndixahan rë me cuitjin: “Ha tjin ndaja xcusun rë cjuavixan. Peru xuta xi cuinduva ne, hacuiin ndaja cjuatacun rë me ndajintjin xi nduva me.

⁹Vëhë xi tihin hisca cruci ndiyatë ne, hane tu hacutjin cjin má xuta xi sacu ri, noje cojo yëjë ni me xi catinduva me catjinesuhi me.”

¹⁰Ngajan xi quiji hndixahan jan hiscan ndiyatë rë nandya ne, hane yëjë ni xuta xi cavechutaha cha, sá xuta tsehen, o sá xuta ndaja ne, casahmi cha xi camatangun me quiji me suhi. Hane ña catsëxtin xuta ndava suhi.

¹¹Hya xi tijima suhi ne, xi cavisehen me xi matitjun jan xi scutsejen me xuta xi cafehe me, cavutsejen me ngu cha xi yuma jyihi cojo tsjian rë.

¹²Ngajan xi cachja me cojo cha cuitjin: “Tai, ¿hacutjin cama xi cavisuhun nguehe handasa jemu yuma jyihi tsjian nuju?” Peru cavejñajyuu cha vë cachjaain cha.

¹³Sehe cachja me xi matitjun jan cojo hndixahan rë me cuitjin: “Tetuhunhñu tsja cha cojo ntsacu cha sehe naxun cha ndatsen hiscan jñu. Ngajan hiscan hinchá xuta xi tijihnda me, hacuaaha titsijanerii me nehñu me.”

¹⁴Cjin má me xi cachjinda rë xi nduva me, peru chuva má me xi tuxijijñi rë.

Cjuacjintacun tséhë tujúnsa

¹⁵Hya xi camá ne, cha partidu fariseo ne, cavisiajmichihin cha casacuse rë cha ngu cjuacjintacun xi tsavi fi xi cjuayangui Jesús tséhë.

¹⁶Hya xi camá ne, catsingatju cha ngujo cha ladu jan, cojo cha ladu rë Herodes ne, cachja cha cojo Jesús cuitjin:

—Maestro, ngayin ne, hyin ta ngayun ne xuta ndaja ngayun. Vicuyun ndiya rë Nina cojo cjuaquixi. Ha tuxa cjuaquixindaja xi nújun, ha ndasa cojo xuta nchina visiajmu o sá cojo xuta yuma.

¹⁷Xi má nuju ne, mé xi ndaja cuinújan. Sacuaaha ley rë Moisés ne, ¿há tsingatihi xi cuechjen tujúnsa naja cojo César, me xi matitjun, o há tsingatiin?

¹⁸Peru Jesús ne, tséhë xi ha vacun rë me xi jemu choho xcusun rë cha ne, cachja me cojo cha cuitjin:

—¿Mé má cuatjin meje chjuhunchuvun ná? Xuta ndacha ngayun.

¹⁹Ngacun ná ngu tujún jan scutsejen.

Hane canduvacojo cha ngu tujún tyava.

²⁰Sehe cavinenguise me cha cuitjin:

—¿Yo xcusun rë hacuaaha yo ñihi rë xi quitaha xcun tujún vë? —Cuatjin cavinenguise Jesús.

²¹Hane cha xi cuacun vë ne, cuitjin cafayangui cha:

—Tséhë César.

Sehen ngajan xi Jesús ne, cuitjin cachja me cojo cha:

—Cuatjin ne, tuhun rë César xi tséhë me, hane tuhun rë Nina xi tséhë me.

²²Hya xi cahndë cha cjuaxi cachja Jesús ne, quijircun rë cha, sehe cavetju cha quiji cha tséhë cahndë xi tacun me.

Cjuachjinenguise tséhë xi cuya nima cjuahñu

²³Sehe nixtin hya ne, cafehe tjengui Jesús cha partidu saduceo, cha xi vicuya cjuachacun xi chja xi xuta xi cahme ne, cuyaaain nga me cjuahñu. Sehe cavinenguise cha Jesús cuitjin:

²⁴—Maestro, Moisés ne cachja me ta: “Sá xi ngu xihin cueya, hane tsajin rë chjuun rë hisca ngu quihndi ne, hntsë nima vëhë ne, meje rë xi cjuaha rë chjuun cahan vëhë, cojo sa xi sacú rë na quihndi xi cuma sacuaaha quihndi rë nima vëhë.”

²⁵Quihndë ne, siu yatu cha cojo hntsë cha. Hane cha tjun ne, cafaha cha chjuun. Peru cahme cha, hane tséhë xi tsajin quihndi rë cha, hntsë nima vë ne, cafaha cha chjuun jan.

²⁶ Hane cuanitjin cavatju cha xi majo cojo cha xi majyan hisca chuva ngu chuva ngu cha hisca cojo cha xi má yatu.

²⁷ Hane xi cajnetaha ne, sehe cahme chjuun jan.

²⁸ Quihndé ne, hya xi cuya yějé nima cjuahñu ne, ¿jaré cha xi cuacún vë xi chjuun rë cha na xi cjuaquixi ta, tséhë xi yějé ni xi yatu cha ne, camá chjuun rë cha na? —Cuatjin cachja cha.

²⁹ Ngajan xi cachja Jesús cojo cha ta:

—Ngayun ne, cuaaintjin xi nújun, tséhë xi vijni rrun cjuua xi chja xujun tséhë Nina, hacuaha hyuun xi Nina ne, jemu hñu cjuatacun rë me.

³⁰ Ta hya ne, cumaji cjuavixan hacuaha tsinguixaain xicjin me hya ta, sacuaha ángel xi siu ngahnga ne, cuatjin cuiyuju me.

³¹ Quihndé xi tinújun tséhë nima xi cuya cjuahñu ne, cuinenguësë nuju ne, ¿há cjëë chutayun cjuua xi cachja Nina cojo nuju xcun xujun rë me tséhë nima xutachanga nuju xi cuicun vi?

³² “Ngahan xi Nina rë Abraham ngahan, Nina rë Isaac hacuaha cojo Nina rë Jacob.” Cuatjin cachja Nina. Peru ndaja hyun ta Nina ne, hacuain Nina rë nima ta Nina rë xuta xi quicun me.

³³ Hya xi cahndé xutacjín cjuua jan, jercu tu quijircun rë me cjuua xi catsicuya Jesús.

Cjuachjinenguise tséhë jaré artículo tséhë ley xi hitsë sa matitjun

³⁴ Peru cha partidu fariseo xi camachaya rë cha xi catsinguejyu Jesús cjuua rë cha partidu saduceo ne, camatangun cha cojo xicjin cha,

³⁵ hane sehe cavitexa cha ngu maestru rë ley xi cavinenguise cha me cjuua vi cojo sa xi cuma cjuahachuva cha me. Cuitjin cachja maestru jan:

³⁶ —Maestro, tséhë yějé ni cjuua xi cavitexa Nina naja xcun xujun ley ne, ¿jaré artículo xi hitsë sa matitjun?

³⁷ Ngajan xi cafayangui Jesús cuitjin:

—“Meje rë xi nihmutacún Nina naja cojo nguñajatacún, cojo yějé ni xahasen nuju, cojo yějé ni ngahñu nuju, cojo yějé ni cjuatacun nuju.”

³⁸ Cjuua vë xi hitsë sa venguichji rë ne, hitsë sa matitjun xi cumá rë yějé ni cjuua rë ley.

³⁹ Hane xi má jo ni: “Meje rë xi nihmutacún xingun sacuatjin hmutacún suvun yojo nuju.”

⁴⁰ Tséhë jo artículo vi ne vetjun sa yějé cjuua rë ley xi catsihindu Moisés cojo yějé cjuua xi catsihindu profeta. —Cuatjin cachja Jesús cojo cha.

¿Yo tjë rë má me xi catsingatju Nina?

⁴¹ Hya xi ha camá tangun cha partidu fariseo ne, sehe cavinenguise Jesús cha cuitjin:

⁴² —¿Mé nújun? Mesías o sa Cristu ne, ¿yo tjë rë má me?

Cafayangui me ta:

—Tjë rë David má me.

⁴³ Sehe cachja Jesús cuitjin:

—Sá xi quixi xi cuatjin ne, ¿hacutjin cavátju xi suva David ne, hya xi catsihindu me cjuua xi cachja Hasen tséhë Nina cojo rë me, “Nai” cachja me tséhë Mesías? ta cuitjin catsihindu me:

⁴⁴ Nina ne, cachja me cojo Nai naha cuitjin:

“Tinechin nguehe ladu quixi naha, hisca hya xi yějé ni xi sahmi ri condra ne, cuiyúju ngahan ngahma gobiernu riji.”

⁴⁵ Quihndé ne, sá xi suvá David chja me xi Nai rë me má me xi tsingatju Nina ne, ¿hacutjin má ne xi hacuaha tjë rë me má me vëhë?

⁴⁶ Ngajan camá xi ndastu mé cafayangui cha, hacuaha hisca hya ne, tsacjun cha cjuinenguise sa cha me.

23

Cachjajyë Jesucristu cojo xutacjín tséhë cha xi vicuya cjuachacun

¹ Hya xi camá ne, cachja Jesús cojo xutacjín hacuaha cojo xuta ladu rë me cuitjin:

² —Cha xi vicuya cjuachacun cojo cha partidu fariseo ne, casatë rë cha xá rë ley xi casatë rë Moisés hatsëë.

³ Vëhë xi meje rë xi nuhyun cjuua rë cha hacuaha nihñuchuhun yějé ni xi vicuya cha; peru nihñuu sacuaha sahmi cha ta, ndaja chja cha jan peru hacjahi sahmi cha.

⁴ Cjuua xi vicuya cha jemu chja sahmi chihin xuta ta tangun sacuaha ngu chaha xi hai vaniji tyja rë me, peru suva ni cha ne, visecuaain cha me hisca hitsë.

⁵ Yějé ni xi sahmi cha ne, sahmi cha ngatsë rë xi scuëë xuta cha, sahmi nga xuta cha. Vatjutaha cha chuva rë xujun xi chja ley xi setaha xten xuta, cojo tsjahya xi tsingaqui cha ntsacu tsjian rë cha.

⁶ Hacuaha jemu chuya rë cha hya xi satë rë cha cahndë xi matitjun tsëhë ngu ndava suhi o tsëhë yungun.

⁷ Hacuaha hora xi fi tsuyihiya cha, jemu chuya rë cha xi cuatjin fi xuta chja me nina cojo cha ngajan ngajñi ndetsin, maestro chja xuta tsëhë cha.

⁸ Peru ngayun ne, xi cuichjaain xuta tsujun Maestro ta ngu ni me xi Maestru nuju, hane ngajñi nuju ngayun ne, xingun má yun.

⁹ Hacuaha xuta ngasunhdë ne, canujuun tsëhë me xi Nahmi ta ngu ni me xi tacun me ngahnga ne, hacui Nahmi nuju.

¹⁰ Cuanitjin ne, xi cuichjaain xuta tsujun Nai ta ngu ni me xi Nai nuju, me vëhë ne, Cristu.

¹¹ Hane ngu ngayun xi meje cumatitjun ngayun ne, sahmi me sacuaaha ngu mosu rë xicjin.

¹² Tsëhë xi yëjë xuta xi sahmi yehe suvá me yojo rë me ne, cuechu nixtin xi Nina ne, tsinguijne me cjuatacun rë. Hane xuta xi tsinguijne suvá me cjuatacun rë me, hya ne, Nina ne, sahmi yehe rë me.

¹³ Jemu chojyihî tsujun, ngayun cha xi vicuya cjuachacun cojo ngayun cha partidu fariseo. ¡Xuta ndacha yun!, ta vechjun tingotjo hisca visehen gobiernu xi sahmi Nina cojo sa xi cumaji cuisehen xuta. Tivisuun suvun, hacuaha tituun cahndë xi cuisehen xuta xi meje cuisehen me.

¹⁴ Jemu chojyihî tsujun, ngayun cha xi vicuya cjuachacun cojo ngayun cha partidu fariseo. Jemu cjín tujún naxun yachjin cahan xi hisca ndava na tsajin. Hane hya xi nújunyumun ne jemu nduju hora nihñu, peru hacuiin nguñaja tacun nújun ta, vindachun ni. Vëhë xi hitsë sa jyë cuma castigu xi cumá nuju.

¹⁵ Jemu chojyihî tsujun, ngayun cha xi vicuya cjuachacun cojo ngayun cha partidu fariseo. ¡Xuta ndacha yun! ta cuangun jinguyë ni ngasunhdë xi sacu ngu ni me xi cuisehen ladu nuju. Peru hya xi cavicuyun rë me, hitsë sa jyë castigu satë rë me xi cuma nuju.

¹⁶ Jemu chojyihî tsujun, ¡xuta rcá yun xi meje ningacun ndiya! Nújun ta: “Sá xi tuhun cju nuju hane cuinújun ta: Quixi, vëë yungun xi matitjun ne, sahmi nguyë xi nihñu chihin cju nuju, peru sá xi tuhun cju nuju cojo oro xi jiya yungun xi matitjun ne, vëhë sahmi nguyë xi tuhun xi canújun.”

¹⁷ ¡Ngarca ni ngayun! ¡Rcá yun! ¿Jarë xi meje rë xi chjaanrcun? ¿Há oro jan? o sá tsajin ne, ¿há yungun xi matitjun? ta, ngatsë rë yungun ne, vëhë xi camanchacun oro xi hincha cahntsua.

¹⁸ Hacuaha nújun ta: “Sá xi tuhun cju nuju hane cuinújun xi ngasunscun yungun cuma testigu ne, sahmi nguyë xi nihñu chihin cju nuju, peru sá xi nújun ta cuatjo xcun ngasunscun jan cuma testigu ne, sehe sahmi nguyë xi tuhun xi canújun.”

¹⁹ ¡Rcá yun! ¿Jarë xi meje rë xi chjaanrcun? ¿Há cuatjo jan? o sá tsajin ne, ¿há ngasunscun ta, tsëhë xi xcun vëhë ngajan camachacun cuatjo?

²⁰ Vëhë xi yo xi cuisiajmi hane cuichja me xi vëë ngasunscun ne, hacuaha tichja me xi vëë yëjë xi hinchasun xcun;

²¹ hacuaha yo xi cuisiajmi hane cuichja me xi vëë yungun xi matitjun ne, hacuaha tichja me xi vëë Nina xi tacun me ngajan.

²² Hane yo xi cuisiajmi hane cuichja me xi vëë ngahnga ne, hacuaha tichja me xi vëë cahndë hiscan sahmi Nina gobiernu hane hacuaha xi vëë Nina xi sahmi me.

²³ Jemu chojyihî tsujun, ngayun cha xi vicuya cjuachacun cojo ngayun cha partidu fariseo. ¡Xuta ndacha yun! Ngayun ne, handasa tuhun diezmu nuju hisca cojo nchurca cojo ruda cojo yëjë sa xcusun ndeya ne, peru nihñucuenduun xi nihñuchihin artículo rë ley xi hitsë sa meje rë Nina xi nihñuchuhun sacuaaha xi chja cuitjin: nihñu hacutjin xi cjuaguixi cojo xingun, sacuaaha xi mayuma nuju xingun, hane sacuaaha xi ngu ni má cju nuju; hitsë sa ndaja sa canihñu yëjë xcusun vihi, hane canihñucuendun tsëhë xcusun xi canihñu.

²⁴ ¡Ngayun ne xuta rcá yun xi meje ningacun ndiya! Nihñu sacuaaha sahmi ngu xuta xi tsicaha me vinu rë me, sehe cuetjuxin ngu chu xihî xi jiya ngajñi rë. Peru cuma tsinguijne jingu me ngu chu camellu.

²⁵ Jemu chojyihî tsujun, ngayun cha xi vicuya cjuachacun cojo ngayun cha partidu fariseo. ¡Jo xcun jo ntsuvun yun! Nihñu tyjahî táha ngaxtun ngu vasu cojo ngu tyuva, peru cahntsua ne, quitsë camahani rë cjuachëjë cojo cjuatacun xi nimuju yëjë ni xcusun.

²⁶ Fariseo rcá, titjun nihñu tyjahî cahntsua vasu cojo tyuva jan ta tsëhë xi cuatjin ne, hacuaha cuma tyjahî táha ngaxtun.

²⁷ Jemu chojyihî tsujun, ngayun cha xi vicuya cjuachacun cojo ngayun cha partidu fariseo. ¡Jemu ndacha yun! Ngayun ne, tangun cun cojo ngu tsjun xi cahvi rë xujñu, ta ndaja tsejen tsjun jan, peru cahntsua ne, quitsë rë cojo ninda rë nima cojo yëjë ni xi jehndu.

²⁸ Cuanitjin cun ngayun ta xi vutsejen xuta yun, tsejen sacuaaha xuta ndaja tyjahi yun, peru cahntsua xahasen nuju ne, quitsè rë cojo cjuandacha cojo cjuatsehen.

²⁹ 'Jemu chojyihni tsujun, ngayun cha xi vicuya cjuachacun cojo ngayun cha partidu fariseo. Ngayun ne, nindujun tsjun ndacun tsèhë yëjë ni nima profeta, hacuaaha nihñu ndacun tsjun tsèhë nima xi tsajin xi cun rë me xcun Nina.

³⁰ Hacuaaha ngayun nujun ta: "Sá xi ngayin cavinechin nixtin hatsëë xi quicun xutachanga niji ne, cavisecuiin rë me xi tsiquehen me profeta xi cuacun vë ta cumacjain niji."

³¹ Quihndë ne, cahyun ta cojo cju nuju vë, tuhun testigu condra nuju ta tsèhë xi ngayun ne hatuxa quihndi rë xutachanga nuju ngayun, hane me vëhë ne xi catsiquehen me profeta jan.

³² Quihndë ngayun ne, jtangun cuéchun chuva rë cjuatsehen xi casahmi xutachanga nuju!

³³ 'Sacuaaha cun yë chacun cuatjin cun ngayun, iquihndi rë yë yun! ¿Hacutjin cumá cuetjuntjun tsèhë castigu xi má hasen rë nima?

³⁴ Vëhë xi tsingátju sa nuju profeta cojo xuta xi quicun cjuatacun rë me cojo maestru ne, hane ngujo me ne, ngayun ne nicuhun me hacuaaha cuetuhun me xcun cru. Ngujo nga me cujun rë me ngayun ngajan ndatsen yungun hacuaaha tuhun rë me cjuañihi xi cuatju me sehe cuanga me ngu nandya ngu nandya.

³⁵ Cojo chuva vëhë ne, chanujujyun cjuaveya rë yëjë ni xuta xi tyjahi cjuatacun rë me xi cahme nguehe ngasunhdë. Chanujujyun cjuaveya rë xutachanga naja Abel cojo hisca cjuaveya rë xutachanga naja Zacarías quihndi rë Berequías, me xi canicuhun tiña ngasuncun hiscan ndatsen rë ndava Nina.

³⁶ Cuichjá quixë cojo nuju ta tsèhë cjuaveya rë yëjë ni me vë chanujujyun ngayujun ni xi nechun quihndë.

Jemu choho camá rë Jesucristu ngatsë rë xuta Jerusalén

³⁷ 'Ngayun xuta Jerusalén, ngayun xi cojo ndyojo nicuhun profeta xi tsingátju Nina ngajñi nuju! ¡Jemu choho má ná tsujun! ¡Mé hitsë ndiya xi meje scávëvaha nuju sacuaaha javëvaha ngu nisë quihndi rë chu xi cuincha chu ngahma tyjunga rë chu! Peru ngayun ne, mijí nuju.

³⁸ Chutsujun ni, Nina ne, catsismicacun me ngayun.

³⁹ Cuichjá cojo nuju ta chuun camahani ná hisca hya xi cuechú nixtin xi cuinújun cuitjin: "¡Catsinchacun Nina me xi titsingátju me ngajñi naja!" —Cuatjin cachja Jesús.

24

Cachja Jesús xi cuetsun yungun

¹ Hora xi tivetju Jesús tsèhë ndatsen yungun xi matitjun jan xi cjui xin me ne, ngajan cafehe xuta ladu rë me caveyanangui me hane catsingacun tsja me xi yungun jan ne, jemu ndajyihni.

² Hya xi camá ne, cuitjin cachja Jesús tsèhë yungun jan:

—Sacuaaha yëjë ni ndihya vihi xi chutsujun tsèhë yungun ne, cuichjá cojo nuju ta cuechú nixtin xi hisca ngu ndyojo ndacun xi cuicun vi ne, tsajin xinchasuncoo xicjin ta cjuë yëjë cuixujne. —Cuitjin cachja Jesús.

Hacutjin sacú cumachaya naja xi ha meje cuijnetaha nixtin vihi

³ Xi café cachja Jesús cuitjin ne, sehe cafehe me tiña rcu Ndetjún Olivu. Hane xi tacun suvá me, ngajan cafehe xuta ladu rë me, cavinenguise rë me cuitjin:

—¿Mé nújun? ¿Janihya cuetjucaa xcusun vëhë ni? ¿Hane hacutjin cuma sacú niji cjuaquixi xi ha tivechú nixtin xi nduvun ngayun tivechú hora xi cjuë nixtin rë ngasunhdë vi?

⁴ Ngajan xi cachja Jesús cojo rë me cuitjin:

—Nechun cuidadu, cojo sa xi hacuiin cuma ndacha ngayun ta,

⁵ tsèhë xi jemu cjín xuta cuetjucaa me xi cuichja me xi hacui me xi catsingátju Nina me. "Ngahan Cristu", cuichja me. Hane cuatjin jemu cjín xuta cumacjain rë me cjuandacha rë me xi cuacun vë.

⁶ Hacuaaha hya xi cumachaya nuju cju xi jemu yehe si tijima ngu nación o sá xi tjín cjuacjintacun xi jemu yehe si nduva ne, xicarcuun ta, hatuxa tjín xi titjun xcusun vëhë cuma. Peru hacuiin ha hya cuijnetaha nixtin vihi.

⁷ Hacuiin hya cuma ta, titjun ne, scaan xuta ngu nación cojo jingu sa nación. Hacuaaha scaan xuta ngu nandya cojo ngu nga nandya. Hacuaaha jemu cjín cahndë xi cuma cuechu jindyá. Jemu cjín cahndë xi cjuani nangui.

⁸ Peru xi cuatjin cumá yëjë ni xcusun vihi ne, sehe ntsacu tivetsihin cjuañihi xi cuatju xuta.

⁹ 'Sehe cjuaha nuju xuta, cjucojo nuju me xi cuatjun cjuañihi, xi tsiquehen me ngayun. Hacuaaha jemu chohovëë xuta rë yëjë nangui yun ngatsë naha.

¹⁰ Hya xi cumá ne, cjin xuta tsismicacun me ladu naha, hane tsindeya me cjuatacun rê me. Sehe cojo cjuá ni cuiteña xicjin me.

¹¹ Hacuaha jemu cjin profeta xi vindacha me xuta cuetjucaa me. Hane cuatjin jemu cjin xuta cumacjain rê me cjuandacha rê me.

¹² Hacuaha cjuatsehen ne, jemu cumayehetaha. Vêhê xi hya ne, cumachuva cjuahmutacun xi tjin rê xuta.

¹³ Peru jarê ngayun xi scaa nuju cojo cjuacjintacun vêhê hisca xi cueyun ne, cuechun xcun Nina.

¹⁴ Hane xuta ne, cjué me jingujyê ni ngasunhndê cuichja me cjuandajyihî vihi tsêhê gubiernu xi sahmi Nina, xi cumachaya rê xuta ngasunhndê. Hane hisca xi cuma chihin yêjê xcusun vêhê cuijnetaha nixtin vihi.

¹⁵ 'Profeta Daniel ne, catsihindu me xcun xujun rê Nina tsêhê ngu xcusun tsehen xi tsinguetsun. Cuechún nixtin xi cuejña vêhê xu cahndê ximinchacun —xuta xi vutaya cjuá vi, catjahacuenda me cjuá—. Hya xi cuatjin tsejen ne,

¹⁶ hya ne, xuta xi siu yêjê nandya tsêhê distritu Judea ne, catanga me hane catangahma me hiscan ndetjún.

¹⁷ Hacuaha jarê me xi hinchasun me rcu ndava me ne, mé tsêhê me xi siu cahntsua ndihya ne, mijí rê xi cjuejaha me.

¹⁸ Hacuaha ha chuva vêhê ni ne, xuta xi siutaha me nguijña ne, mijí rê xi cuya cjuejaha me tsjanga rê me ndava me.

¹⁹ 'Jemu chojyihî tsêhê yêjê yachjin xi hinchahma quihndi rê cojo yêjê me xi tjin rê quihndi vaqui xi cojo me cuanga me nixtin hya!

²⁰ Chjahyun rê Nina xi cjuañihî vêhê ne, hacuín cuinduva nixtin chan hnchan o sá nixtin xi chjahájenda rê ta,

²¹ tsêhê xi cjuañihî jyê xi cuma ne, ngu cjuandya jyê xi cjêê camahani camá hisca ntsacu cavetsihin ngasunhndê. Hacuaha cuyaaín cuma nga.

²² Jemu jyê cjuañihî jan, sá tsajan xi ha cumachuva nixtin rê cjuañihî vêhê ne, hisca ngu xuta ne, cuetjintjiin me. Peru ngatsê rê cjuahmutacun xi tjin rê Nina cojo xuta xi cavaxijin me xi cuma ladu rê me ne, casahmichuva me nixtin vêhê.

²³ 'Hya ne, sá xi cuichja yahnga me cojo nuju ta: "Cuajyihî Cristu gnehe", o sá "Cuajyihî me ngajan." Xi camacjain nuju cjuá jan ta,

²⁴ tsêhê xi nixtin hya ne, jemu cjin xuta cuetjucaa me xi cuichja me cuindacha me ta Cristu me o sá profeta me. Hacuaha jemu sahmi me cjuarcun tsêhê xi meje cuindacha me xuta, hisca cojo xuta xi cavaxijin Nina.

²⁵ Quihndê ne cojo chaja sa xi cuechu nixtin vêhê ne, ngahan ne, ha cachjá cojo nuju.

²⁶ Vêhê xi sá xi cuichja yahnga me cojo nuju ta: "Jemu xín tsêhê nandya tacun me", hacuín cuangun cojo me. O sá xi cuichja me ta: "Ndihya cahnhun tacun me", camacjain nuju tsêhê me ta,

²⁷ sacuaha sahmi hasen ndihichuhún xi ha tu ñahñu sahmi hasen rê jingujyê ni ngahnga, hiscan ladu vetjucaa tsuhi hiscan ladu vetje tsuhi ne, cuatjin ha tu ñahñu scutsejen ná yêjê ni xuta hya xi cuinduvá nga ngahan xi Quihndi rê Xuta Jain.

²⁸ Cuatjin cuma nixtin hya sacuaha chja cjuá ta hiscan jiña chu xi cahme ne, hacuaha ngajan matangun chu lote.

Hya xi cuya nduva Quihndi rê Xuta Jain

²⁹ 'Ngutjen xi camá cavatju cjuañihî jan ne, cuinduva nixtin xi cjuê ndavá rê tsuhi. Hacuaha sá ne, ha quihndê suaaín ndavá rê. Hane niñú ne, cuixu tsêhê ngahnga. Hisca ngahñu xi tjin ngahnga ne, cjuiniyaya.

³⁰ Hya xi camá ne, ngajan cuma tsejen seña tsêhê Quihndi rê Xuta Jain. Hane yêjê xuta xi siu ngasunhndê ne, jindayaya me. Sehe hya scuêê xuta ngahan, xi Quihndi rê Xuta Jain ngahan, xi cuinduvá ngajñi rê yufí cojo jemu jyê ngahñu, hisca seti hisca vatê jyihî ngahan xi cuinduva.

³¹ Hya ne, tsingátju ángel naha, hane xi ndaja hñu cuinuhya rê xi fane ngu tyjo, sehe cjuejaha rê yêjê ni xuta naha xi cavaxejen, sahmitangun rê me tsêhê jinguyêjê ni ladu ngasunhndê.

³² 'Quihndê ne, ningatuhuntacún tsêhê ejemplu xi sua yaxujún: Hya xi cuetsihin cumá xcuen tsja rê tsêhê xi ha jemu camatiña cuetsihin cuetjusehen ne, ngayun ne, ha hyun ta ha jemu camatiña chan tsin.

³³ Hacuaha chuva vêhê ni ne, hya xi chun xi cuetsihin cumá yêjê xcusun xi cachjá cojo nuju vê ne, vêhê sua cumachaya nuju xi ha camatiña nixtin rê, hisca meje cumá.

³⁴ Cuichjá cjuaquixi cojo nuju ta xuta xi siu nixtin vihi ne siu cuaha me hya xi cuetjucaa xcusun xi cachjá cojo nuju jan.

³⁵ Ngahnga cojo ngeuhe ngasunhndë ne, hatuxa cjuë. Peru hisca ngu cjuua naha ne, tsajin xi cuetjincaain.

³⁶ Sacuaha nixtin xi cuetjucaa cjuatacun vëhë ne, tsajin yo vëë rë. Hisca vín ángel xi siu ngahnga. Hisca hveen ngahan xi Quihndi rë Xuta Jain. Suva tutu ni Nina nahmi naja ne, me vëhë xi vëë me.

³⁷ Sacuaha casahmi xuta hya xi cavéjña xutachanga naja Noé ne, hacuanitjin ni sahmi xuta hya xi cuinduva Quihndi rë Xuta Jain.

³⁸ Tsëhë xi hya ne, xi chaja sa casesuntë nandan ngasunhndë ne, jine tjihvi xuta, vixan me, tsinguixan me quihndi rë me. Cuatjin casahmi cuaha me hisca nixtin xi cavisehen Noé cahtsua barcu.

³⁹ Hacuaha camachayin rë me hisca xi casesuntë nandá quijicojo rë yëjë ni me jan. Hacuaha cuanitjin ni sahmi xuta hya xi cuinduvá ngahan xi Quihndi rë Xuta Jain ngahan.

⁴⁰ Jo cha ne, cuiyujutaha cha nguïjña. Ngu cha ne, chjaháxin rë cha, hane cha xingu jan ne, cuejña cha.

⁴¹ Hacuaha jo nga yachjin ne, cuiyujutaha na coho na. Ngu na ne, chjaháxin rë na, hane na xingu jan ne, cuejña na.

⁴² Vëhë xi nechun cuidadu. Hacuaha ningascun rë cjuatacun nuju ta ngayun ne, hyúun janilha cjeuhe Nai nuju.

⁴³ Hacuaha meje rë xi cumachaya nuju cjuatacun vihi: sá xi nai rë ngu ndihya ha machaya rë me hora xi cuinduva cha chëjë ndava me ne, suaain me cahndë xi scuxaha cha ndava me ne, sehe tsichëjë cha.

⁴⁴ Hacuanitjin ni meje rë xi ngayujun ni ngayun ne, tuhun chjinu yojo nuju ta, tsëhë xi hora xi ningatuuntacún xi cjuëhë ngahan xi Quihndi rë Xuta jain ngahan ne, hora vëhë cjuëhë.

Xuta xi vihndë cojo xi vihndiin tsëhë Nina

⁴⁵ ¿Yo ngayun xi nihñu sacuaha sahmi ngu mosu hndixahan xi jemu quicun cacun xi sah-michihin yëjë ni hacutjin xi meje rë nai rë? Ngu hndixahan xi cjuahaxa xi cjuahacuenda rë yëjë sa hndixahan xi hora tjin sua xi sinë.

⁴⁶ Jemu ndaja tsëhë ngu hndixahan jan xi tisahmi tutjin xi casuaxa rë nai rë.

⁴⁷ Cuichjá cojo nuju cjuaquixi ta, nai rë hndixahan vëhë ne, suaxa me hndixahan vëhë xi hacuaha cjuahacuenda yëjë sa xcusun xi tjin rë me.

⁴⁸ Peru cuejña ne xi hndixahan vëhë ne, jemu choho xcusun rë me, tsingataha cacun cojo cjuatacun rë cuitjin: “Nai naha ne, tijima tafi sa xi cjeuhe me.” Cuatjin tsingataha cacun.

⁴⁹ Sehe cuetsihin cuaja rë hndixahan xi yahnga jan, hacuaha cuatjutaha sinë cuihi hisca cuma chihí.

⁵⁰ Peru cuechú ngu nixtin xi tsajin tacunya hndixahan vëhë, ngu hora xi hisca hvín ne, hya cjeuhe nai rë.

⁵¹ Hane jemu jyë castigu sahmi me, sehe tsingatju me cuatju tangun cjuañihi cojo xuta xi jo xcun jo hntsua me. Ngajan ne, jemu squihnda me, hacuaha tsijanerii me nehñu me.

25

Ejemplu tsëhë të na nixti xi quiji na cjuavixan

¹ Hya xi cuechú nixtin xi sahmi Nina gobiernu ne, cumá sacuaha cavatju të na nixti xi cafaha na ndihí tsëhë aceite, sehe quiji na xi cuejñaya na cha xi cuixan hora xi nduva cha.

² Hya xi camá ne, hñu na jan ne, rcu taja na, hacuñin ndaja tsingatahacacun na. Peru hñu nga na jan ne, ndaja quicun na.

³ Cavejña xi na rcu taja ne, hora xi cafaha na ndihí ne, cafaain na aceite xi cuya cuincha na tsëhë.

⁴ Peru sacuaha na quicun jan ne, cafaha na ndihí ne, hacuaha xin cafaha na aceite.

⁵ Hane xi ma tafi xi nduva cha xi cuixan jan ne, cafaha rë na nijña ne, caviyujufë na.

⁶ Hya xi camá ne, sacuaha vasen nixten ne, canuhya rë xi jindaya xuta ta: “¡Nduva cha xi cuixan! Tangun tjengun cha xi cuanguncujun.”

⁷ Xi cuatjin canuhya rë ne, cavisatjenhnga na nixti jan ne, cavëhëchjine na ndihí jan.

⁸ Hya xi camá ne, cachja na xi taja rcu cojo na quicun cuitjin: “Tuhun niji hitsë aceite nuju ta meje cjuë xi tsijin ne, coho ndihí niji.”

⁹ Peru cafayangui na quicun cuitjin: “Cumaji tihin nuju ta sá cuatjin ne, cuechutaain tsëhë xi cuma meje nuju hacuaha tsëhë xi cuma meje niji. Hitsë sa ndaja ne, tangun hiscan xi xteña ne, hiscan ngajan chuhun.”

¹⁰ Cuatjin camá xi hora xi quiji cavatsë na jan aceite ne, cafehe cha xi cuixan. Hane na xi siuya ne, cojo na cavisehen na ndava suhi. Sehe casechjahñu tingotjo ndihya.

¹¹ Hya xi camá ne, cafehe na nixti xi quiji jan, hane cajindaya na tingotjo ndihya cuitjin: “Tatá, chuxuhun tingotjo tsijin.”

¹² Peru me vèhè jan ne, cafayangui me cuitjin: “Hveen jani nduvun ngayun.”

¹³ Vèhè xi nechun cuidadu, hacuaha ningascun rè cjuatacun nuju ta ngayun ne, hyúun mé hora, hyúun mé nixtin xi cumá.

Ejemplu tsèhè tujún xi casua nai rè hndixahan

¹⁴ Cuejña ne xi ngu xuta jan ne, quiji me ngu nangui cjin. Hane chaja sa xi cjue me ne, cajindaya me mosu hndixahan rè me casua me xi cuejñatsja cha xi tsèhè me.

¹⁵ Hora xi casua me ne, ngu cha, casua me cha hñu mil tujún, hane ngu nga cha ne jo mil, hane ngu nga cha ne ngu mil. Cuatjin casua me cha hatucutjin tsejen xi chutaha cha. Hya xi camá ne, cavetju me quiji me.

¹⁶ Ngajan camá xi cha xi cafahatsja cha hñu mil tujún ne, casahmi cha ngu negocio. Hane ngajan cavesun rè cha hñu cuatjin sa.

¹⁷ Hacuaha cha xi cafahatsja cha jo mil tujún ne, cuanitjin ne cavesun rè cha jo cuatjin sa.

¹⁸ Peru cha xi cafahatsja cha ngu mil tujún tsèhè nai rè cha ne, quiji cha cafahangui cha ngu ngojo nangui. Hane ngajan caveyanijihma cha tujún jan.

¹⁹ Hya xi jercu cavatju nixtin xi quiji nai jan, cavuya cafehe me, cajindaya me cha xi sua cuenda cha tsèhè tujún jan.

²⁰ Ngajan xi cha xi cafahatsja cha hñu mil tujún ne, yaha cha hñu mil sa. Hane cachja cha cojo me ta: “Tatá, hñu mil catuhun ná, hindè ne, cavesun ná hñu cuatjin sa.”

²¹ Ngajan xi nai rè hndixahan jan ne, cuitjin cachja me cojo: “Ndatjin ri. Ngaye ne, ngu hndixahan ndaja ngaye. Ngatsè rè xi jemu ndaja canihñi xa lihndi vèhè ne, hitsè sa quisun xa xi sua ri. Quihndè ne, tehe cjuasua xahasen riji cojo ná.”

²² Sehe cafehe cha xi cafahatsja cha jo mil tujún. Hane cachja cha cuitjin: “Tatá, jo mil catuhun ná, hindè nguhe tacun tsujun jo cuatjin sa xi cavesun ná.”

²³ Ngajan cachja nai jan cuitjin: “Ndatjin. Ngaye ne, ngu hndixahan ndaja ngaye. Ngatsè rè xi jemu ndaja canihñi xa lihndi vèhè ne, hitsè sa quisun xa xi sua ri. Quihndè ne, tehe cjuasua xahasen riji cojo ná.”

²⁴ Hacuaha cafehe cha xi cafahatsja cha ngu mil tujún. Hane cuitjin cachja cha: “Tatá, ha machaya ná xi ngayun ne, jemu hñu cjuu nuju. Nangun xitjè handasa hacuui ngayun xi canitjun. Ngayun ne, hacjahi sahmi xa ne, ngayun chjuhunntsun chji rè.

²⁵ Vèhè xi tsácjun ngahan. Hane cèjè caveyaneje hma tujún nuju. Cuajiyihi tujún nuju nguhe.”

²⁶ Ngajan xi nai rè cha ne, catsicuya me tsèhè cha cuitjin: “Ngaye ne, machjiriin ngaye. Ngaye ne, mosu hndixahan tsehen. Sá xi hye xi fanga handasa hacuui ngahan xi catsitjè, hye xi hacjahi sahmi xa ne, peru ngahan fahántsa chji rè,

²⁷ hitsè sa ndaja xi xcun bancun cahmi chani tujún xi casuá ri, cojo sa xi hya xi cjuèhè ne, cúa cjuahántsa tujún naha, peru cojo quihndi rè.”

²⁸ Sehe cachja me cojo me xi hinchacun jan cuitjin: “Chjuhuntuhun tujún xi yaha cha vè. Sehe tuhun rè cha xi tjin rè tè mil tujún ta,

²⁹ me xi ha tjin rè ne, sua sa Nina me, hisca vesun tsèhè. Hane me xi tsajin cjin jan ne, cjuahataha Nina hitsè xi tjin rè me.

³⁰ Hacuaha chandunxin hndixahan xi machjiriin hiscan jñu ngajan candatsen. Ngajan ne, jemu squihnda me hacuaha tsijanerii me nehñu me.”

Ejemplu tsèhè chu tsánga cojo chu tentsun

³¹ Hya xi cúa Quihndi rè Xuta Jain cuinduva me cojo hasen ndajiyihi tsèhè Nina hacuaha cojo ángel rè Nina cuinduva me, cuejña me cahndè hñu jingacun tsichuva me xuta.

³² Hane ngajan xcun me ne, cumatangun xuta rè jinguyèjè ni ngasunhdè ne, sehe scuxijin me xuta sacuaha sahmi ngu cha xi faha cuenda rè chu hora xi vaxijin cha chu tsanga tsèhè ngajñi rè chu tentsun.

³³ Vinchaxin cha chu tsánga taha quixi rè cha, hane vinchaxin cha chu tentsun taha xcun.

³⁴ Hya xi cumá ne, me xi matitjun jan, cuichja me cojo xuta taha quixi ta: “Nduvun nechun, ngayun xi catsinchacun Nina Nahmi naha. Ngayun xi satè nuju cuisuhun gobiernu xi Nina cavèhèchjini me tsujun hisca ntsacu cavetsihin ngasunhdè.

³⁵ Cuatjin satè nuju ta tsèhè xi hya xi vojo ná, canicjun ná. Hya xi xinda ná, catuhun ná nandá; xutaxín ngahan, peru catuhun cahndè cavitejñajenda ndya nuju.

³⁶ Tsajin ná tsjian, peru catuhun ná tsjian xi mameje; hmu ná hane cafuhun cachusuhunyun ná; tejñaya ndavaya hane cafuhun cachutsujun ná.”

³⁷ Sehe xuta tyjahi jan, tsicuya me cjuu cuitjin: “Tatá, ¿janihya camachaya niji xi vojo nuju, hane canicjin nuju? ¿o sá xi xinda nuju, hane catihin nuju nandá?”

³⁸ ¿O janihya cachutsijin nuju nujuyhunyun sacuaha xutaxín hane catihin cahndě nechunjendun ndya niji? ¿Janihya cahyin xi tsajin nuju tsjian hane catihin?

³⁹ Hacuaha ¿janihya cahyin xi hmu nuju o nechunyun ndavaya xi canduvintjenguin nuju?"

⁴⁰ Sehe cuichja me xi matitjun jan ta: "Cuichjá quixi cojo nuju ta hya xi canihñu cjuandaja vē xi cavisekun rě tuyoni xuta yuma ladu naha ne, cavisekun ná ngahan."

⁴¹ Hya xi camá ne, cachja me xi matitjun jan cojo xuta xi siu ladu scun rě me cuitjin: "Tangunxun ngayun xi cuatjun castigu rě Nina ne, tangun cuechún xcun ndihi xi catsindaja Nina xi cuisehen xitsehen xi matitjun cojo ángel rě. Ndihi jan ne, tsajin nixtin tsajin nixten xi coho.

⁴² Cuatjin satě nuju ta tsěhě xi hya xi vojo ná, ha canicjuun ná; hya xi xinda ná, catuun ná nandá; xutaxín ngahan, peru catuun cahndě cavitejñajenda ndya nuju;

⁴³ Tsajin ná tsjian, peru catuun ná tsjian na mameje; hmu ná hane cafuun cachusuun-yuun ná; tejjñaya ndavaya hane cafuun chutsuun ná."

⁴⁴ Sehe cuinenguisse me cuitjin: "Tatá, ¿janihya camachaya niji xi vojo nuju, o sá xi xinda nuju? ¿O janihya canutsijin nuju nujuyhunyun sacuaha xutaxín, o xi tsajin nuju tsjian? Hacuaha ¿janihya cahyin xi hmu nuju o nechunyun ndavaya? ¿Janihya cahyin vē xi cavisecuiin nuju?"

⁴⁵ Sehe cuichja me xi matitjun jan ta: "Cuichjá quixě cojo nuju ta tsěhě xi mijí nihñu cjuandaja vē xi cuisekun rě tuyoni xuta yuma ladu naha ne, mijí cuisekun ná ngahan."

⁴⁶ Sehe xuta jan ne, cuisehen me castigu xi nixtin nixten cumá, peru xuta xi tyjahi cjuatacun rě me ne, satě rě me cjuahñu xatsě xcun Nina.

26

Camachihin cjuahacutjin xi chjahá rě Jesucristu

¹ Hya xi camá ne, xi cajnetaha cachja Jesús yějě cjuahacutjin ne, sehe cachja me cojo xuta ladu rě me cuitjin:

² —Ha hyun xi chaja sa jo nixtin xi cuechú suhi tsěhě pascua ne hane ngahan xi Quihndi rě Xuta Jain ngahan ne, hatuxa hya cumá ngahan entregadu tsja xuta xi cuetaha ná xcun cru. —Cuatjin cachja me.

³ Nixtin hya ne, yějě nahmi xi matitjun cojo xuta changá rě xuta tjě rě Israel ne, casahmi me ngu junta ngajan ndihya jyě rě Caifás, me xi vitexa yějě nahmi xi matitjun.

⁴ Ngajan xi caviyuju me cjuatacun rě me hacutjin xi cuma cuindacha me Jesús cojo sa xi cuma cjuahahma me me xi tsiquehen me me.

⁵ Peru cachja me ta:

—Ndatjin xi cuinechanyan ne cuatju suhi, sehe chjahanhma cha, sá tu cumacjan rě xutacjin, hane cumá ngu suě jyě.

Cavitejnu ngu chjuun aceite rcu Jesucristu

⁶ Hya ne, Jesús ne, nandya Betania quitaha me. Tacun me ndava cha Simú, cha xi camandaja tsěhě chíhin vitaha xi casatě chuxin rě cha.

⁷ Hane ngajan camá xi cafehetjengui rě me ngu chjuun xi yaha na ngu frascu xi ndyojo camá, hinchha ngu aceite ndaja xi jercu hnga chji rě. Hya xi camá ne, cavitejnu na aceite jan rcu Jesús hora xi tijině me niñu.

⁸ Peru xi cavutsejen cha ladu rě me xi cuatjin casahmi na jan ne, camacjan rě cha cachja cha cuitjin:

—¿Mé má tu mahya ni catsichaja na aceite vē?

⁹ Sá xi xteña ne ndaja sacú tujún rě. Hane tujún vēhě ne cuma cuisecoo rě xuta yuma. —Cuatjin cachjataha cha na.

¹⁰ Peru xi camachaya rě Jesús xi cuatjin chja cha ne, catsicuya me cjuahacutjin:

—¿Mé má cuatjin tivichuncjun tsěhě na ta jemu vengui chji rě xcusun xi casahmi na cojo ná?

¹¹ Xuta yuma ne, yějě nu yějě nixtin ne, siu me cojo nuju. Peru ngahan ne, hacuiin yějě nu yějě nixtin tejjña cojo nuju.

¹² Tsěhě xi xi cavitejnu ná na aceite jan ne cojo tjun ni ne cuěhěchjine na yojo naha xi seyaniji ngahan.

¹³ Cuichjáquixě cojo nuju ta tuyani ni tsěhě jingujyě ni ngasunhndě xi cuichja xuta cjuahacutjin Nina ne, hacuaha cueyanangui me na vihi, cojo sa xi xuta xi yahnga ne, cumachaya rě me xcusun xi casahmi na cojo ná. —Cuatjin cachja Jesús.

Judas casahmi cha compromisu xi cuitěña cha Jesús

¹⁴ Hya xi camá ne, ngu cha tsěhě ngajñi rě me xi tejó xi má ladu rě Jesús, cha xi hmí rě Judas Iscariote ne, quiji cavisiajmi cha cojo nahmi xi matitjun

15 cavinenguisse cha me cuitjin:

—¿Há cjin tujún tuhun ná sá xi sahme entregadu nuju Jesús?

Ngajan xi cavexqui me hane casua me cha cantè tujún tyava.

16 Hane ngajan cavejñaya cha ngu hora xi ndaja xi cuma sahmi cha entregadu Jesús cojo xuta xi cuacun jan.

Hacutjin cajinè Jesús tsèhè suhi rē Pascua

17 Hya xi camá ne, nixtin xi tjun tjun tsèhè suhi xi chinè pan xi tsajin san rē, cafehe xuta ladu rē Jesús xi tejo jan, cachja cha cojo me cuitjin:

—¿Jani meje nuju xi cuihinchjini xi xine nguixun tsèhè suhi?

18 Sehe cafayangui Jesús cuitjin:

—Tangun nandya Jerusalén. Hane xi cuechú ndava ngu cha xi cuacun jan ne, tinújun cojo rē cha cuitjin: “Chja maestru naja cuitjin: Meje cuechú hora naha, hindè ne, ndya nuju ne sínè niñu tsèhè pascua cojo xuta ladu naha.”

19 Sehe quiji xuta ladu rē me ne, casahmi cha sacuaaha xi cavitexa Jesús cha, hane cavèhèndaja cha xi sinènguixun me tsèhè pascua.

20 Hya xi quiji hora jan ne, tijinè me niñu cojo xuta ladu rē me xi tejó jan,

21 hane ngajñi hora xi tijinè me ne, cachja Jesús cuitjin:

—Cuichjá cojo nuju cjuaquixi ta ngu ngayun ne, niñu ná entregadu. —Cuatjin cachja me.

22 Ngajan xi jemu choho camá rē cha, cavetsihin cha cachja chuva ngu chuva ngu cha cojo rē me cuitjin:

—Nai, ¿há cumá cacun xi ngahan sahme?

23 Hya xi camá ne, cafayangui Jesús cuitjin:

—Ngu cha xi ngu ni tyuva tsingúsehenquinnda niñu naha cojo ne, cha vèhè xi sahmi ná entregadu.

24 Ngahan xi Quihndi rē Xuta Jain ngahan ne, hatuxa tjin ná xi cueya sacuatjin ha camá camahindu xcun xujun tsahan, peru jemu chojyihí tsèhè cha xi sahmi ná entregadu. Vengui sa chji rē xi catsiin cha.

25 Sehe Judas, cha xi sahmi rē me entregadu cachja cha ta:

—Maestro, ¿há cumá cacun xi ngahan sahme?

Ngajan xi cafayangui Jesús tsèhè cha cuitjin:

—Juun, quixi.

26 Hora xi tijinè me comida ne, cafaha me ngu niñutsju hacuaaha casua me nacuechji rē Nina ne, sehe cavotohocja me niñutsju jan, casua rē me xi tejó jan ne, sehe cachja me cuitjin:

—Chjuhun xinu. Vihi ne, yojo naha vi.

27 Hya xi camá ne, cafaha me ngu vasu ne, sehe casua me nacuechji rē Nina, sehe cachja me cuitjin:

—Juhun vihi sehe siuhun ngajñi ngayujun ni,

28 ta xan rē uva vihi ne, vihi jni naha xi cuetju ngatsè rē xuta sehe cuma chihin compromisu xi cuaxètje rē xuta tsèhè jyé rē me.

29 Hacuaha cuichjá cojo nuju ta quihndè cojo nixtin xi cjuiniji sa ne, ha quihndè cuyaan cuèhè xan rē uva. Cuèhè, peru hisca hya xi cuèhè nga cojo nuju ngajan hiscan sahmi Nina gobiernu.

Casua Jesucristu camachaya rē Pedru xi cuichja me xi hvín me yo Jesucristu

30 Xi cajnetaha cajinè me ne, casè me ngu tsèhè Nina. Sehe cavetju me quiji me Naxi Olivu.

31 Hane sehe ngajan cachja Jesús cojo xuta ladu rē me cuitjin:

—Ngayujun ni ngayun ne, nismutacun ná hacuaaha cuma ndaya cjuatacun nuju quihndè nguixun vi ne, hane cuejñu ná suva ta cumá sacuaaha camahindu xcun xujun rē Nina xi chja xi: “Nina ne, tsiquehen me cha xi sahmi cuidadu rē chu tsánga, hane chu tsánga vè ne cuitsojo chu.”

32 Cuatjin cumá, peru hya xi cúa nga cjuahñu naha ne cjué titjun tsujun hisca distritu Galilea.

33 Pedru ne, cafayangui cha cuitjin:

—Ha ndasa ngayéjè cha xi cuicun vi cuejña suva cha ngayun, hatuxa tsajin nixtin xi cojo ngahan sahme cuatjin.

34 Hya xi camá ne, cuitjin cachja Jesús cojo cha:

—Cuichjáquixè cojo ri ta tajñu ni xi chaja squihnda xahnda ne, ha jyan ndiya cuinoje xi hyiin yo ngahan. —Cuatjin cachja Jesús.

35 Cachja Pedru cuitjin:

—Ha ndasa hisca cueya cojo nuju ne, peru cuichjaan xi hveen yo ngayun.

Hacuaha cuanitjin ni cachja cha xi yahnga.

Casahmi Jesucristu oración rē me ngajan Getsemani

³⁶ Sehe quiji Jesús cojo cha xi tejó jan ne, cafehe me ngu cahndé xi hmí rē Getsemaní. Ngajan cachja Jesús cuitjin:

—Nechun ni nguehe. Cjué nguvan hitsé ni cuisiajme cojo Nina. —Cuatjin cachja me.

³⁷ Hya xi camá ne, cavaxé me Pedru cojo jo cha quihndi rē Zebedeo xi quiji cojo me cha. Hane xi cjui me ne, cavetsihin jemu camá va rē me, hacuaha jemu macjincacun me.

³⁸ Sehe cachja me cojo cha cuitjin:

—Jercu choho camahani má rē xahasen naha, sacuaaha xi vèhè ni tsiquehen ná. Nguehe nechuncun ngayun cojo ná.

³⁹ Sehe ngajan xi Jesús ne, quiji me hitsé nguvan. Hane ngajan cafañatsacjan me, cafehya rē me Nina cuitjin:

—Ngayun Nahmi naha, sá tjin sa ngu chuva rē ne, catisatiin ná cjuañihi xi cuátju cuma vi. Peru catama sacuatjin xi meje nuju ngayun, hacuiin sacuatjin xi meje ná ngahan.

⁴⁰ Hya xi camá ne, cavuya cafehe me hiscan siu jyan xuta ladu rē me xi quijicojo me jan ne, casacutsja me xi siufé me. Ngajan xi cachja Jesús cojo Pedru cuitjin:

—Cahyun ni, ¿há camaji cavacun ngayun cojo ná hisca ngu hora ni?

⁴¹ Nechuncun ngayun, nihñu oración nuju, sátu chjaháchuva nuju cojo cjuatacun nuju. Xahasen nuju ne, ndaja meje rē xi nihñu, peru yojo nuju ne, chuvacacun.

⁴² Hya xi camá ne, camá jyan ndiya xi quiji me nguvan cafehya me Nina cuitjin:

—Nahmi naha, sá xi cumaji cuatju chuva rē xi satiin ná cjuañihi ne, catama sacuatjin xi meje nuju ngayun.

⁴³ Hya xi camá ne, cavuya nga cafehe me hiscan siu jyan xuta jan casacutsja me xi siufé me ta jemu hai nijña rē me.

⁴⁴ Hya xi camá ne, camá jyan ndiya xi quiji me nguvan ne hacuaha cojo vèhè nga ne, cafehya me Nina.

⁴⁵ Sehe cavuya nga me cafehe me hiscan siu xuta jan ne, cachja Jesús cuitjin:

—¿Há tsjuñufun cuhun? Chutsujun ne, ha cavechú hora xi ngahan Quihndi rē Xuta Jain ne, cjuaha ná xuta xi sahmi ná entregadu cojo xuta tsehen.

⁴⁶ Tisatjunhngun, cuanguen chutsejen ta ha nduva cha xi sahmi ná entregadu.

Cafaha xuta Jesucristu

⁴⁷ Jínguyejé rē xi tichja cuaha Jesús ne, cafehe Judas, cha xi cojo jiyajñi ngajñi rē cha xi tejó xi catsujiyihya cojo me. Hacuaha jemu cjín xuta tivisecoo rē cha, xuta xi cavitexa nahmi xi matitjun cojo xuta changá xi quijijaha me Jesús. Hane yaha me quicha, yaha me ya.

⁴⁸ Chaja sa xi cjuehe cha jan xi sahmi cha entregadu Jesús ne, cachja cha cojo xutacjin jan cuitjin:

—Cha xi cjué cuitatsuha xi suá rē nina ne, cha vèhè xi hacui cha.

⁴⁹ Xi tu cavechu cha hiscan nduva Jesús ne, ngutjen quiji casahmitiña cha tsèhè me hacuaha casua cha me nina cachja cha cuitjin:

—Cuhndanu, maestro —chja cha.

Hane quiji cavitatsuha cha me.

⁵⁰ Ngajan xi cachja Jesús cojo cha cuitjin:

—Tai, Nihñichihin xa vèhè xi candove.

Hya xi camá ne, quiji xuta jan ne, cafaha me Jesús.

⁵¹ Ngajan xi ngu cha xi secun cha cojo Jesús ne, cavaxé cha quichanduju rē cha, hane cavaja rē cha ngu cha mosu rē nahmi xi matitjun, hane cavatésun cha ngu ladu tyjavañuju.

⁵² Ngajan xi cachja Jesús cojo cha cuitjin:

—Teyendeje quicha riji vè. Xuta xi tsicojo me quicha ne, hacuaha cojo quicha cueya me.

⁵³ ¿Há hyuun ta sá xi cjuehya rē Nahmi naha ne, jemu cjín mil ángel tsingatju me cuisecoo ná?

⁵⁴ Peru sá xi cuatjin sahme ne, ¿hacutjin cumachihin cjua rē xujun rē Nina? ta cuitjin meje rē xi cumá.

⁵⁵ Hya xi cajnetaha cachja Jesús cojo xuta ladu rē me ne, sehe cachja me cojo xutacjin cuitjin:

—¿Há nduvun chjuhun ná sacuaaha ngu xuta xi chējé me, xi cuatjin nduvun cojo ya cojo quicha vè ni? Xi cavitejñaya cojo nuju nchunchujun ni ndatsen yungun jan ne, cavetuhunntsuun ná cachjuun ná.

⁵⁶ Peru cuitjin tijima cojo sa xi cuetjucaa jain hacutjin camahindu xcun xujun rē Nina xi catsihindu profeta.

Quiji me cojo Jesús ndava nahmi xi matitjun

⁵⁷ Hya xi camá ne, xi cafaha xuta jan Jesús ne, quijicojo me me ndava Caifás, nahmi xi matitjun tséhë yějë ni nahmi ta tséhë xi ngajan ha camá tangun yějë ni cha xi vicuya cjuachacun cojo yějë ni xuta changá.

⁵⁸ Pedru ne, hacuaha tjengui cha cjui cha tu cjin tu cjin ni hacutjin cjui xuta jan cojo Jesús hisca xi cavisehen cha ndatsen rë ndava nahmi xi matitjun jan. Hane ngajan cavéjña cha cojo cha nísë rë yungun cojo sa xi cumachaya rë cha mé cumá.

⁵⁹ Hane nahmi xi matitjun jan cojo yějë sa xuta xi matitjun ne, cavangui me xuta ndacha xi tsinguixi jyë rë Jesús, cojo sa xi cuma tsiquehen me me.

⁶⁰ Peru tsajin mé jyë rë Jesús xi casacu rë me handasa jemu cjín má xuta ndacha xi cachja me. Hisca xi ha tisacuiiyin rë me hacutjin cuma, sehe cafehe jo cha ndacha xi cachja cha

⁶¹ cuitjin:

—Cha vi cuitjin cachja cha ta: “Ngahan ne, cuma tsinguétsun yungun xi matitjun vi xi casahmi xuta tséhë Nina, hane cahntsua xi jyan nixtin ne, sahme nga ngu.”

⁶² Ngajan xi nahmi xi matitjun tséhë nahmi xi yahnga jan ne casecunvasen me, cavinenguise me Jesús cuitjin:

—¿Há chjayinnguini hisca ngu cjua? ¿Mé noje tséhë jyë xi vincha xuta jan?

⁶³ Hane Jesús ne, tu jyu ni casecun me. Sehe cachja nahmi xi matitjun jan cojo Jesús cuitjin:

—Cuitexa ri ngatsë rë xi macjain ri tséhë ngu ni Nina quicun xi hora xi cjuahataha ri ne cuinoje cjuaquixi. ¿Há ngaye xi Quihndi rë Nina? ¿Há ngaye xi Cristu?

⁶⁴ Ngajan cafayangui Jesús tséhë me ta:

—Sacuatjin nújun vë ne, cuatjin jain. Hacuaha cjehe nixtin xi chutsujun ná xi tejña ladu quixi tséhë ngahña rë Nina. Hacuaha chutsujun ná xi cuinduvajne ngajni rë yuffi tséhë ngahnga.

⁶⁵ Hane ngajan xi nahmi xi matitjun tséhë nahmi xi yahnga jan ne xi jemu camacjan rë me ne, hisca tsjain rë me cavicheya me. Hacuaha cuitjin cachja me:

—Tsixcuehyu cha Nina. Tsajin sa cjua testigu xi mameje. Ngayun ne, ha canuhyun hacutjin tsixcuehyu cha Nina.

⁶⁶ ¿Mé nújun quihndé?

Ngajan cafayangui me cuitjin:

—¡Meje rë xi cueya cha!

⁶⁷ Hya xi camá ne, ngu jo me cavetsihin me cavëhënatya me Jesús hacuaha cavajaya me xcun. Yahnga nga me ne, cojo cahntsua tsja me cavaja me xcun Jesús.

⁶⁸ Cachja me cuitjin:

—Tinoje, ngaye Cristu, ¿yo xi cavaja ri?

Cachja Pedru xi hvín me yo Jesucristu

⁶⁹ Jinguyëjë rë xi cuatjin tijima ne, Pedru ne, tacun me ndatsen ndihya. Hya xi camá ne canduva ngu na mosu hndixahan tséhë nahmi jan, cafehe cachja na cojo Pedru cuitjin:

—Ngaye ne, ladu rë Jesús tséhë distritu Galilea má ye.

⁷⁰ Peru xcun yějë me xi siu me ne, cafahahma me cachja me cuitjin:

—Hisca hveen mé xi noje.

⁷¹ Hya xi camá ne, sehe cavetju me quiji me casecun me hiscan tu cuiseen ni tséhë ndatsen ndihya. Hane ngajan xi ngu nga na cachja na cojo xuta xi siu ta:

—Cha vihi ne, ladu rë Jesús nandya Nasarét má cha.

⁷² Hya xi camá ne, ngu ndiya nga ne cafahahma me cuitjin:

—Vëë Nina xi hveen xuta jan.

⁷³ Hya xi cavatju ngu hora ne, sehe camatiña xuta xi hinchacun cojo Pedru jan cachja me cuitjin:

—Ha cjuaquixindaja ta ngaye ne, cojo ngaye nechin cojo cha xi cuajyihí vë, ta tséhë xi cjua riji tsingacun xi xuta distritu vë ngaye.

⁷⁴ Ngajan xi cavetsihin nga Pedru cafahahma me cjuaquixi hisca cachja me xi catinduva ngu cjuacjintacun xi cuatju me sá xi tichja me ngu ndesu. Cuitjin cachja me:

—Vëë Nina jain xi hveen yo me xi nújun vë.

Hane hora vëhë ne, cajihnda ngu xahnda.

⁷⁵ Hane Pedru ne, catsinguitsjen me cjua xi cachja Jesús cojo rë me xi cachja me cuitjin: “Chaja sa xi squihnda ngu xahnda ne, hacuaha camá jyan ndiya nújun xi hyúun yo ngahan.” Hane xi cavetju me candatsen ne, cajihnda susu me.

1 Hya xi camá nchujun ni ne, yějě ni nahmi xi matitjun cojo yějě xuta changá ne camatangun nga me xi sacuya rě me xcusun hacutjin cuma tsiquehen me Jesús.

2 Sehe catsihñu me Jesús ne, quijicani me xcun gobernador xi hmí rě Pilatu.

Cahme Judas

3 Hya xi camá ne, Judas ne, cha xi casahmi rě me entregadu, camachaya rě cha xi cueya Jesús. Ngajan xi choho camá rě cha hane catsindeya cha cjuatacun rě cha. Quiji cha catsicuya cha catě tujún tyava jan cojo nahmi xi matitjun cojo xuta changá.

4 Cuitjin cachja cha:

—Jemu tjin jyě naha ta tsěhě xi casahme entregadu ngu me xi tsajin xi cun rě.

Peru cafayangui me cuitjin:

—¡Mé tsijin vė! Cjuacjintacun vė hatuxa tsiji sove.

5 Hya xi camá ne, ngajan yungun xi matitjun ne, cacandi cha tujún tyava jan sehe cavatju cha quiji cha hiscan ngu cahndě xi cavityjangui cha yojo rě cha hisca xi camá cahme cha.

6 Nahmi xi matitjun jan cafaha me tujún tyava jan peru cachja me cuitjin:

—Cumaji cuinchan tujún vi cahntsua caxa tujún rě yungun ta tsěhě xi tujún vi ne, cavengui chji rě jni rě cha.

7 Hya xi camá ne, cachuya rě me xi cuatsě me ngu xáhva xi chja xuta Nangui rě Cha Chjinetiji. Xáhva jan ne cumachji rěhě xi xinchaniji xutaxín xi cueya me nangui vė.

8 Ngatsě rě xi cuatjin casacu xahva jan ne, hisca nixtin quihndě ne cahndě vėhě ne yaha ñihi xi Cahndě Tsěhě Jni.

9 Xi cuatjin camá ne, camachihin cjua xi catsihindu profeta Jeremías xi cuitjin chja: “Cafaha me catě tujún tyava, xi cavejña chji rě cha xi cafehya xuta nangui Israel,

10 sehe casua me tujún jan xi cjuaha me nangui rě cha chjinetiji. Cuatjin casahmi me sacuahavavitexa Nina.”

Xcusun xi cavatju Jesús xcun Pilatu

11 Hya xi camá ne, Jesús ne secun me xcun gobernador. Ngajan cavinenguise me Jesús cuitjin:

—¿Há ngaye xu matitjun ngaye tsěhě xuta tjě rě Israel? —Cuatjin cavinenguise me.

Hane Jesús ne, cuitjin cafayangui me:

—Cuatjin sacuatjin nujun vė. —Cuatjin cafayangui me.

12 Peru hora xi nahmi xi matitjun cojo xuta changá jan cavincha jyě me Jesús ne, ndastu mé cafayangui Jesús.

13 Ngajan xi cachja Pilatu cojo me cuitjin:

—¿Há nuhyiin cjua xi chja me? Jercu cjin jyě riji cavincha me.

14 Peru Jesús ne ha quihndě cafayanguiin me hisca ngu cjua. Hane Pilatu ne, jemu quijircun camahani rě me.

Camá entregadu Jesús xi cjue cueya me

15 Tjin ngu xcusun xi nu nu ni, hya xi cumá nixtin rě suhi jan ne, tsismi gobernador ngu presu xi xuta vaxijin me.

16 Nixtin hya ne, jiya ngu presu xi jemu tjin cjua tsěhě, Barrabás hmí rě cha.

17 Ngajan xi camá xi hya xi camatangun xutacjin ne, ngajan cavinenguise Pilatu xuta cuitjin:

—¿Jarě cha xi meje nuju xi tsisme? ¿Há Barrabás ne? ¿Há Jesús xi Mesías xu?

18 Cuatjin cachja me cojo xuta ta tsěhě xi ha vėhě me xi ngatsě ni rě cjuaxin sahmi nahmi xi matitjun jan cojo Jesús, vėhě xi casahmi me entregadu xi meje rě me xi cueya.

19 Hora xi tijimá vė, tacun Pilatu xcun silla hiscan vejña me hora xi vitexa me, ngajan xi chjuun rě me ne, catsingatju na cjua xi cuitjin chja: “Canguisunñuuu cjuacjintacun tsěhě cha vė xi tyajhi cjuatacun rě cha, ta nguchjin ne ngajñi nijña naha jemu cjin xcusun xi chocun camá ná chini ngatsě rě cha.” Cuatjin fi cjua xi catsingatju na.

20 Hya xi camá ne, nahmi xi matitjun cojo xuta changá jan jemu cachja me cojo sa xi cama cuinchahaxi me xuta xi cjuehya xuta Pilatu jan xi tsismi me Barrabás ne, tsiquehen me Jesús.

21 Ngajan cachja nga gobernador cuitjin:

—Tsěhě jo cha vė ne, ¿jarě cha xi meje nuju xi tsisme?

Ngajan cafayangui xutacjin jan cuitjin:

—Nismu Barrabás.

22 Sehe cachja nga Pilatu cuitjin:

—Sá cuatjin ne, ¿mé xi sahme cojo Jesús xi Cristu xu?

Ngajan xi cafayangui yějě xutacjin jan cuitjin:

—¡Tetuhun cha xcun cru!

²³ Ngajan xi cachja Pilatu cojo rë me ta:

—Peru ¿mé xi rcu jyë casahmi cha?

Peru xutacjín ne hitsë sa hñu cajindaya me cachja me cuitjin:

—¡Tetuhun cha xcun cru!

²⁴ Hya xi camachaya rë Pilatu xi sahmi cuendaain xuta xi chja me ta tu hitsë sa tijima ngu suë jyë ne, cafehya me nandá sehe cavane me tsja me xcun xutacjín jan. Sehe cachja me cuitjin:

—Quitteen jyë tsëhë cjuaveya rë cha vihi ta, tsajin jyë rë cha. Vëhë ne, ha chaha nuju vëhë.

²⁵ Hya xi camá ne, yëjë xutacjin jan ne, ngu tangun ni cafayangui me cuitjin:

—Tsëhë cjuaveya rë cha vëhë ne, chanijijyin cojo quihndi niji. —Cuatjin cachja me.

²⁶ Hya xi camá ne, catsismi me Barrabás, peru casahmi me xi Jesús ne casehen rë me sehe casua Pilatu me xi cjue cueya me xcun cru.

²⁷ Hya xi camá ne cha sindadu xi vitexa gobernador ne, quiji cojo cha Jesús taha cahntsua ndava gobernador jan. Hane sehe casahmitangun sa cha yëjë sindadu cjín.

²⁸ Hya xi camá ne, cavaxë cha tsjian rë Jesús, hane sehe catsicaja cha me ngu tsjian hani.

²⁹ Hacuaha catsihya cha ngu corona nahyá sehe cavesun cha rcu Jesús hane cavisengui cha ngu bastón tsja me. Hya xi camá ne, cavixcuhnchi cha xcun me, catsixcuehyu cha me, cuitjin cachja cha:

—¡Viva! Me xi matitjun tsëhë xuta tjë rë Israel.

³⁰ Hacuaha cavëhënatya cha me, hacuaha cafaha cha bastón jan xi yaha tsja me hane cavaja cha rcu me.

³¹ Hya xi camá xi cuatjin catsixcuehyu cha me ne, cafaxin cha tsjian hani jan, catsicaja nga cha me tsjian rë me. Hya xi camá ne, sehe quijicojo cha me xi cuetaha cha me xcun cru.

Casetaha Jesucristu xcun cru

³² Hya xi cavetjun cjuicojo sindadu Jesús ne, cavechutaha cha ngu me xi hmí rë Simón tsëhë nandya Cirene. Sehe sindadu jan ne, casahmi cha ngu jyë xi cuaniji me cru jan.

³³ Hane xi cafehe cha cojo Jesús hiscan xi hmí rë Gólgota, cjua xi meje cuichja Naxi Nínda Rcuun.

³⁴ Hya xi camá ne, casua cha me xan rë uva xi tecjan rë nandá rë tyjungunsa xi cuihi Jesús. Peru xi cavutaha me hitsë ne, cahviin me.

³⁵ Ngajan xi sindadu jan ne, xi cavatju casetaha me xcun cru ne, sehe cafaha cha tsjian rë me hane cavaxë cha suerte tsëhë ne, jarë cha xi satë rë cha jima ngu tsjian.

³⁶ Sehe ngajan ne cavejñataha cha cavutsejensun cha Jesús xcun cru.

³⁷ Hacuaha camahindu ngujo cjua xi casetaha xcun cru ngatihin rcu Jesús sacuaha xcusun rë me xi setaha xujun jyë rë xuta, hane cuitjin chja cjua jan: “Jesús, me xi Matitjun Tsëhë Xuta Israel.”

³⁸ Hacuaha cavityangui cha ngu chëjë ngu ngu ladu tjeheh rë me, jima ngu cojo cru rë.

³⁹ Hya xi camá ne, xuta xi cavatju jan ne, catsixcuehyu me Jesús ne, catsitjiya rcu me, hacuaha cuitjin cachja me:

⁴⁰ —Ngaye xi ha canoje xi cuma ninguetxin yungun xi matitjun, hane cahntsua xi jyan nixtin ne; cama nga canindeje ngu. Quihndë ne, sá cuatjin cuma nihñi ne, naxetje sove yojo riji. Sá xi Quihndi Jain rë Nina ngaye, titujni tsëhë cru vë.

⁴¹ Ha chuva vëhë ni ne, nahmi xi matitjun ne cojo cha vicuya cjuachacun rë ley cojo xuta changá ne cachja me cuitjin:

⁴² —Cavaxëtje xu cha xuta, peru quihndë ne, cumaji cuaxëtje suva cha yojo rë cha. Sá xi hacui jain cha xi Matitjun Tsëhë Xuta Israel ne, catitujne cha tsëhë cru chutsejen, cojo sa xi cumacjain naja tsëhë cha.

⁴³ Macjain xu rë cha tsëhë Nina, quihndë ne cataxëtje Nina cha sá xi Nina meje rë me cha; ta cachja cha ta: “Quihndi rë Nina, ngahan.”

⁴⁴ Hacuaha cha chëjë xi cojo caxtyangui taha cru jan ne, cojo cha choho cachja cha tsëhë Jesús.

Xcusun xi camá hya xi cahme Jesucristu

⁴⁵ Hane hora vëhë ne, camajñu jingujyë ni. Cavetsihin xi camanchisen ne, quiji cani rë hisca fane jyan.

⁴⁶ Hya xi camá ne, jercu hñu camahani cachja Jesús cuitjin:

—Elí, Elí, ¿lama sabactani? -cjua vëhë meje cuichja ta: Ngayun Nina naha, mé má canismutacun ná.

⁴⁷ Hane ngujo xuta xi hinchacun jan ne, xi cajni rcu me hne jan hane cachja me cuitjin:

—Tijindaya me profeta Elías.

⁴⁸ Hya xi camá ne, ngutjen ni, cavanga ngu me, quiji catsicahnchi me ngu tsjian hinda cojo xan rë uva xi ha sán, sehe cavetaha me rcu ngu ya nduju, sehe cavetaha me hntsua Jesús xi cuihngui me.

⁴⁹ Ngajan xi yahnga xuta ne, cachja me cuitjin:

—Caveni tuhun. Cuinechayan hitsë ne, çhá cuinduva jain Elías cuaxëtje me cha?

⁵⁰ Hane Jesús ne, hora vëhë ne, jercu cajindaya nga me hane cahme me.

⁵¹ Hacuaha hora vëhë ni ne, tsjian nduju xi tyjangu cahntsua yungun xi matitjun jan ne, hisca rcu hisca ntsacu canduva catiyavasen. Hacuaha cafani nangui. Hacuaha cavacjan ndyojo.

⁵² Hacuaha hora vëhë ni ne, catuxaha tsjun rë nima, hane jemu cjin xuta xi tyjahi cjuatacun rë me xcun Nina ne, cavuya cjuahñu rë me.

⁵³ Cavetjun xuta jan tsëhë tsjun. Hane hya xi ha cavuya cjuahñu rë Jesús ne, sehe cavisehen me nandya Jerusalén hane ngajan ne, cjin xuta ne, cavëë rë me.

⁵⁴ Hora xi cahme Jesús ne, cha capitán tsëhë cha sindadu cojo yahnga sindadu xi hinchacun me ngajan vutsejensun me Jesús ne, camachaya rë cha xi fani nangui cojo cjin xcusun sa xi cavatju camá. Hane jercu quijircun camaha ni rë cha. Hacuaha cachja cha cuitjin:

—Hacui jain me vihi xi Quihndi Jain rë Nina, me.

⁵⁵ Hacuaha ngajan ne, tsëhë cjin ne hinchacun cuaha cjin yachjin xi tivutsejen me. Yachjin jan ne quijitjengui me Jesús xi cuisecoo me Jesús, sahmi cuenda me.

⁵⁶ Ngajñi yachjin jan ne, hinchajñi na xi cuicun vi: na María na Mágdala, hacuaha na María naa rë Jacobo cojo José, hacuaha cojo naa rë cha quihndi rë Zebedeo.

Caseya nima Jesucristu cahntsua tsjun

⁵⁷ Hya xi cajne hora ne, ngu cha nchina xi hmí rë José, ngu xuta Arimatea cha xi hacuaha xuta ladu rë Jesús cha.

⁵⁸ Cha vëhë quiji cha xcun Pilatu, cafehya cha cahndë sá xi cuma cjuahaxin cha nima Jesús. Hane Pilatu ne, casua me cha cahndë.

⁵⁹ Ngajan xi cafahatsja cha nima jan ne, sehe catsitjngui rë cha tsjian tyjahi, sacuaha xcusun rë me.

⁶⁰ Sehe caveya cha nima cahntsua ngu tsjun xatsë rë suva cha xi ha casahmi cha xi camá catjuhngui rë taha naxi. Sehe catsindefajne cha ngu ndyojo jyë xi cuechja rë tingotjo rë tsjun jan. Hya xi camá casahmi cha ne, quiji cha cojo xuta ra.

⁶¹ Peru na María na Mágdala cojo na María xi hacjahi ne, caviyujutaha na xcun tsjun.

Cha sindadu siu cuidadu cha tsjun

⁶² Hya xi cumá nchujun ni ne, hya nixtin xi cjuahajenda rë me ne, hya camatangun nahmi xi matitjun cojo cha partiduo fariseo sehe cachja cha cojo Pilatu.

⁶³ Cuitjin cachja cha tsëhë Jesús:

—Nai, ngayin ne vitsjen niji xi hya xi chaja sa cueya cha cachja cha ndacha vë cuitjin: “Cahntsua jyan nixtin ne, cuya cjuahñu naha.”

⁶⁴ Ngatsë rë vëhë ne, meje rë xi nihñu cuendun xi sehñu ndaja tsjun rë cha hisca xi ha cavatju jyan nixtin jan, cojo sa xi cumaji nduva cha ladu rë nima vë ne, cjuahaxin cha nima tsëhë tsjun jan, sehe cuichja cha xi cavuya cjuahñu rë nima. Cuatjin nihñu ta tsëhë xi sá xi cuatjin sahmi cha, hisca hitsë sa choho cuatjuun cumá.

⁶⁵ Ngajan xi cachja Pilatu cojo rë me cuitjin:

—Sacu nuju sindadu jan xi sahmi cuidadu rë tsjun, sehe tanguncujun ne, hacuaha ndaja techjunhñu tsjun vë hacutjin cuma xi nihñu.

⁶⁶ Sehe quiji me cojo sindadu jan, cavechjahñu me tsjun, cojo sa xi cumatsejen sa xi cuaxë cha nima, hacuaha caviyuju cha sindadu xi sahmi cuidadu rë.

28

Cavuya Jesucristu cjuahñu

¹ Xi cavatju nixtin xi chjahájenda rë jan ne, xi tu casahasen ni tsëhë nixtin ngu tsëhë totje ne, na María na Mágdala jan cojo na María xi hacjahi ne, cavetju na quiji vutsejen na xcun tsjun rë nima Jesús.

² Hya xi camá ne, jercu cafani nangui ta tsëhë xi canduvajne ngu ángel rë Nina tsëhë ngahnga. Hane ángel jan ne, quiji catsivahaxin ndyojo xi cavechja rë tingotjo rë tsjun jan, sehe cavejña xcun.

³ Ángel jan ne, sacuaha ndihi chuhun ne, cuatjin jyihi ángel. Hacuaha tsjian rë ne, jemu tu yava camahani jyihi, sacuaha jyihi hnchan xi hmí rë nieve.

⁴ Xi camachaya rë me tsëhë ángel jan ne, jemu catsacjun sindadu xi siu cuidadu ngajan, hisca cafatsë hnchan cha hisca sacuaaha cahme yojo ra cojo chircun.

⁵ Ngajan xi cachja ángel cojo yachjin xi siutaha jan cuitjin:

—Xícarcuun. Ha hvë xi Jesús vinchunsun me, me xi cavetaha xuta xcun cru.

⁶ Me vëhë ne, tsajin me nguehe ta cavuya me cjuahñu sacuaaha cachja me. Nduvun chutsujun cahndë hiscan cafaña me.

⁷ Quihndë ne tangun sanii ne, tuhuncuendun rë xuta ladu rë me cuitjin: “Ha cavuya cjuahñu rë me; hane cjue titjun me tsujun Galilea. Hane ngajan sacu xingueen.” Hindë ne, vëhë cjua xi cuichjá cojo nuju.

⁸ Hya xi camá ne, cavetju quiji yachjin jan. Jercu quijircun rë na peru hacuaaha jercu ndama rë na. Cuatjin quiji na xi suacuenda na xuta ladu rë Jesús tsëhë cjua xi cachja ángel.

⁹ Hane hora xi tifi na ndiya ne, Jesús ne cavechutaha me na jan, casua me na nina. Sehe chjuun jan ne, cafehetiña na tsëhë Jesús, caticjaxcun na cafaha na ntsacu Jesús hane cafaharcun na me.

¹⁰ Hya xi camá ne, Jesús ne, cachja me cojo na cuitjin:

—Xícarcuun. Tangun tuhuncuendun rë hermano naja, tinújun cojo me xi cjue me distritu Galilea. Hane ngajan sacu xingueen.

Cjua xi casua sindadu

¹¹ Jinguyëjë rë xi quiji yachjin jan ne, ngujo cha sindadu jan cavisehen cha nandya Jerusalén, casuacuenda cha nahmi xi matitjun tsëhë xcusun xi camá.

¹² Sehe nahmi jan ne, hya xi ha camátangun me cojo xuta changá hane cavisiajmi cjin me tsëhë mé xi sahmi me. Hane xi cama chihín cjua ne, jemu cjin camahani tujún casua me cha sindadu jan,

¹³ hacuaaha cachja me cojo sindadu cuitjin:

—Vihí cjua xi cuinújun ni. Cuinújun ta xuta ladu rë me ne, nguixun ne, hora xi catsuñufun ne, cafehe me. Hane tahahma ne catsichëjë me nima.

¹⁴ Hane sá xi cumachaya rë gobernador tsëhë cjua jan ne, ngayin ne, cuanguin cuinújun cojo rë me cojo sa xi cuijnecacun me tsajin mé sahmi me cojo nuju.

¹⁵ Cuatjin camá xi cafahatsja cha tujún jan, hane cachja cha sacuaaha cavitexa nahmi jan. Cjua vëhë ne, cavitsojo ngajñi rë xuta nangui Israel. Hane cuatjin chja cjua hisca nixtin quihndë.

Jesús ne, casuaxa me xuta ladu rë me xi cjue cuichja me cjua rë Nina

¹⁶ Hya xi camá ne, xuta ladu rë Jesús xi má tengu me ne, quiji me distritu Galilea, hisca naxi xi cachja Jesús.

¹⁷ Hya xi camá ne, ngajan cavëë me Jesús ne, cafaharcun me me. Peru ngujo ni me macjaain rë me.

¹⁸ Ngajan xi camatiña Jesús tsëhë me, cachja me cojo me cuitjin:

—Ha cafahantsa ngahñu xi cumá sahme tu mé ni xcusun sá xi tsëhë ngahnga o sá xi tsëhë ngasunhdë.

¹⁹ Ngatsë rë ngahñu vëhë ne, tsingátju nuju ne, tangun jinguyëjë rë nandya ngasunhdë, cuinújun cojo xuta jan cojo sa xi cuisehen me ladu naha. Catiseyanangui ñihi rë Nina Nahmi, cojo ñihi naha, Quihndi rë Nina, cojo ñihi rë Hasen rë Nina hora xi xtenda me.

²⁰ Hacuaaha ticuyun rë me xi cuihndë me ne, sahmichihín me yëjë xcusun xi cavitéxa nuju ngahan. Hane xi cuatjin ne, hacuaaha cuiteñacuaha cojo nuju yëjë ni hora hisca cuijnetaha nixtin rë ngasunhdë.

Cjuandajyihî xi catsihindu San Marcos Tsêhê Jesucristu

Juan ne, vitenda rê xuta ngajan ngu xîn tsêhê nandya

¹ Cuitjin cavetsihin cjuâ tsêhê Jesucristu, me xi Quihndi rê Nina Jain.

² Isaías ne, ngu xutachanga xi cama cafaha cjuâ rê Nina hacuaha cachja me cojo xuta hatsêê nixtin. Cuitjin catsihindu me, hacutjin cachja Nina cojo me: Tsingátju titjun ngu cha xi cjuaha cjuâ naha, cojo sa xi scuxaha cha cjuatacun rê xuta, tsêhê xi cjuêhe ngaye.

³ Hane hiscan jemu xîn tsêhê nandya ne, ngajan cuejña cha. Hane cuitjin cuichja cha: “Sacuatjin matyjahi ndiya hya xi nduva ngu xuta rcun ne, cuatjin nihñu tyjahî cjuatacun nuju tsêhê xi cuinduva me xi matitjun tsajan.” Cuatjin cuichja cha.

⁴ Sacuatjin jain catsihindu Isaías ne, cuatjin jain camá ta cafehe cha xi catsingatju Nina, cha xi hmî rê Juan, ngajan hiscan jemu xîn tsêhê nandya. Casua cha camachaya rê xuta ta meje rê xi tsindeya me cjuatacun rê me hacuaha xtenda me, cojo sa xi tsinchataha Nina me tsêhê jyê rê me.

⁵ Hane jercu cjin xuta quijitjengui me cha, xuta tsêhê distritu Judea cojo nandya Jerusalén. Hane cavitenda cha me xi cavijacun jyê rê cojo Nina ngajan ndajyê Jordán.

⁶ Tsjian rê cha Juan jan ne, tsja rê chu camellu camá. Cojo ngu cinturón chuxin quitaha cahntsua cha. Xi camá niñu rê cha ne, chu nchahva. Cojo tsjen rê chu tusen cahvi cha.

⁷ Cuitjin cachja cha:

—Canduvá ngahan titjun. Peru sehe cuinduva ngu me xi hitsê sa vechu cjuatacun rê xi cumá ná ngahan, xi hisca chuxinxté rê me cumaji tsinguissehercu sahme tyjahî.

⁸ Ngahan ne, tu caviténda ni nuju. Peru me vêhê ne, cueya me Hasen rê Nina cahntsua xahasen nuju.

Jesús ne, caxtenda me

⁹ Sacuaha nixtin vêhê ne, cavetju Jesús tsêhê nandya Nasaret, distritu Galilea. Quijitjengui me cha Juan xi cuitenda cha me. Hane cavitenda cha me ngajan ndajyê Jordán.

¹⁰ Xi camá caxtenda me ne, xi tu tivetju me tsêhê nandan jan ne, cavêê me xi ngahnga ne tituxaha, hacuaha Hasen rê Nina ne, nduvajne sacuaha tsejen ngu paloma, quiji cavisehen cahntsua xahasen rê me.

¹¹ Hacuaha canuhya rê ngu cjuâ ngajan ngahnga xi chja cuitjin:

—Ngaye ne, quihndi naha ngaye. Jercu hmucacun ri. Jercu ndama ná ngatsê ri.

Jesús ne, cafaachuva xitsehen me

¹² Ngajan xi Jesús ne, ngutjen ni quiji me ngajan ngu xîn ta tsêhê xi Hasen rê Nina ne, cavaxéxin rê me.

¹³ Casetaha me ngajan xîn yachan nixtin. Hacuatjin cojo Satanás quijitjengui rê me. Hane handasa jercu cavangui Satanás chuva rê xi choho sahmi Jesús ne, peru casahmii me. Hacuaha quiji ángel caviyujutaha xi cjuahacuenda rê me.

Jesús ne, vetsihin me cojo xa rê me

¹⁴ Hacuaha camá nga ngu xcusun xi xuta xi matitjun ne, caveya me cha Juan ndavaya. Cavatju vêhê ne, sehe cavuya cafe nga Jesús distritu Galilea, cachja me cojo xuta cjuâ rê Nina.

¹⁵ Cuitjin cachja me:

—Camatiña nixtin xi Nina ne, cuitexa me ngasunhdê. Vêhê xi meje rê xi nindeyun cjuatacun nuju hacuaha catamacjain nuju cjuâ xi tichjá cojo nuju.

Jesús ne, cajindaya me ñuju cha xi tsuva rê chu ti xi cuma cha ladu rê me

¹⁶ Nixtin xi catsujyihya me hya ne, cavatju me tjehen laguna tsêhê Galilea. Hora hya ne, cavêê me cha Simón cojo cha Andrés hntsé cha. Titsingatjenya cha nahya ngajñi laguna jan, tsêhê xi ha tuxa xa vêhê sahmi cha.

¹⁷ Hane ngajan xi cachja me cojo cha ta:

—Nduvun cuanguen cojo ná. Hane cuicuyá nuju xi nuvun xuta xi cuisehen me ladu naja ngojo rê xi chu ti nuvun. —Cuatjin cachja me.

¹⁸ Hane hora vêhê ni caviyuju cha nahya jan ne, quiji cha cojo me.

¹⁹ Ha xcun xi ha cjui Jesús cojo cha xi cuacun jan hitsê ni nguvan ne, cavêê me cha Jacobo cojo cha Juan hntsé cha, quihndi rê Zebedeo. Hincha cha cahntsua barcu, tifuyataha cha nahya.

²⁰ Hane hacuaha cajindaya me cha. Sehe caviyuju cha nahmi rë cha xi hmí Zebedeo cojo mosu rë me ngajan cahntsua barcu. Sehe quiji cha cojo Jesús.

Ngu cha xi jiya rë ngu xitsehen

²¹ Hya xi camá ne, cafehe me cojo catsiñuju cha xi cuacun vëhë nandya Capernaum. Hane hya xi cavechu nixtin xi chjahájenda rë ne, quiji me yungun, cavicuya me xuta.

²² Hane xuta jan ne, quijircun rë me hacutjin vicuya Jesús ta, tsëhë xi tivicuya me sacuaha ngu xi matitjun jain, hacuain sacuatjin maestru xi vicuya ley rë xuta tsëhë nangui Israel.

²³ Hacuaha ha tu ñañu canduva ngu cha xi jiya xitsehen cahntsua xahasen rë cha ngajan cahntsua yungun jan.

²⁴ Hane cuitjin cajindaya cha:

—Ngayun ne, ¿mé cuenda nuju tsijin? ¿Há nduvun nicjun niji? Ngayun ne, Jesús tsëhë nandya Nasaret ngayun. Hacuaha hvë xi ngayun xi tsajin jyë nuju ngayun xi catsingatju nuju Nina.

²⁵ Hane Jesús ne, cachja cjan me cojo xitsehen xi jiya xahasen rë cha jan. Cuitjin cachja me:

—Jyuu nechin. Hacuaha tetjixin tsëhë cha vi.

²⁶ Xi tu cahmexcuen cha xi casahmi xitsehen ne, hisca cajindaya, hane cavetjuxin tsëhë cha.

²⁷ Yëjë ni xuta jan ne, jemu quijircun rë me, hisca cavisiajmi me cojo xicjin me cuitjin:

—¿Mé nga xcusun vihi ni? Ngu cjua xatsë xi vicuya me vihi, ta hisca xitsehen, hacuaha hndë tsëhë me.

²⁸ Hacuaha marcu macjain canuhya rë tsëhë me jinguyëjë ni ladu tsëhë distritu Galilea.

Jesús ne, sahmi me xi mandaja nahya rë Simón Pedru

²⁹ Hya xi camá ne, cavetju me yungun jan, quiji me ndava cha Simón. Quiji me cojo cha Jacobo cojo cha Juan, hacuaha cojo cha Andrés hntsë cha Simón.

³⁰ Hane nahya rë cha Simón ne, jiña na xi hmu rë na cojo chíhinsuë. Hane ngutjen cachja cha cojo Jesús xi hmu rë na.

³¹ Ngajan xi quiji tiña Jesús hiscan jiña na, cafaha me tsja na, catsisatjen me na. Hane hora vëhë ni, casejyu suë xi má rë na. Hisca cafaha cuenda na xi sinë me cojo xicjin me.

Jesús ne, sahmi me xi mandaja xutacjin xi hmu rë

³² Hane xi cavetje tsuhi ne, jemu cjín xuta quijicojo me xuta hmu rë hiscan tacun Jesús, hacuaha cojo me xi hincha xitsehen xahasen rë,

³³ camatangun me cojo xuta nandya ngajan tingotju ndihya.

³⁴ Hane jemu cjín xuta hmu rë camandaja me xi casahmi Jesús, xuta xi má rë me tu mé ni chíhin xi má rë xuta. Hacuaha jemu cjín xitsehen cavaxëxin me tsëhë xahasen rë xuta. Hane casuain me cahndë xi cachja xitsehen ta tsëhë xi ha vëë rë me. Hane ngutjen cuichja ta me vëhë xi catsingatju Nina me.

Jesús ne, sua machaya rë xuta cjua rë Nina ngajan yungun

³⁵ Xi camá nchujuni, jñu sa nguítajñu cavisatjenhnga me. Hane cavetju me ndihya quiji me ngu cahndë hiscan xin. Hane ngajan cavisiajmi me cojo Nina.

³⁶ Ngajan xi cha Simón cojo cha xi yahnga jan ne, cavanguise cha Jesús.

³⁷ Hane xi casacu rë cha me ne, sehe cachja cha cojo me ta:

—Jemu cjín xuta cafehetjengui nuju me. —Cuatjin chja cha.

³⁸ Ngajan xi cachja me cojo cha ta:

—Cuanguen sa nandya xi siu tahndee, cojo sa xi hacuaha cuichjá cojo xuta vëhë cjua rë Nina ta tsëhë xi xa vëhë canduvá. —Cuatjin cachja me.

³⁹ Hane sehe quiji sa me yungun xi siu yëjë ni nandya tsëhë Galilea. Cachja me cojo xuta cjua rë Nina, hacuaha cavaxëxin me xitsehen xi hincha xahasen rë ngujo xuta xi siu nandya jan.

Jesús ne, sahmi xi mandaja ngu cha xi ma rë chíhin xi vitaha rë yojo naja

⁴⁰ Hya xi catsuyihya me nandya xi cuacun vëhë, hya cachja ngu cha xi yaha rë ngu chíhin vitaha xi setaha chuxin naja. Hane cachjajyë cha cojo Jesús, hisca cavixcuhnchi cha xcun me, sehe cachja cha cuitjin:

—Sá xi nihñu favor ne, cuma naxunxun chíhin xi yaha ná.

⁴¹ Jesús ne, camayuma rë me cha. Hane cavetahatsja me cha. Sehe cachja me cojo cha cuitjin:

—Joho. Ha camandaja ngaye. —Cuatjin cachja me.

⁴² Hane ngutjen ni cavetjuxin chíhin jan ne, camandaja cha.

⁴³ Hane sehe casua me cha cuidadu. Hane ngutjen ni catsingatju me cha, quiji cha.

⁴⁴ Cuitjin cachja me:

—Ndaja cuidadu xi canujiin camahani xcusun vi cojo hisca ngu. Peru tihin ningacuin yojo riji cojo nahmi ngajan yungun. Hane tejñi ngu cjuatjo sacuatjin chja ley tsêhê Moisés ta camandaja ngaye, cojo sa xi xuta ne, cumacjain rë me. —Cuatjin cachja me cojo cha.

⁴⁵ Peru xi cavetju cha quiji cha ne, cavetsihin casua cha camachaya rë xuta. Jercu cachjatê cha tsêhê xcusun vëhê. Vëhê xi Jesús ne, ha quihndê cavisiin me nandya ta tsêhê xi ha ngutjen jercu tsê xuta. Hane ngajan ni nguiña casetaha me. Peru xuta ne, yêjê ni ladu cavetju me, quijitjengui me Jesús.

2

Jesús ne, sahmi me xi mandaja ngu cha xi cahme yojo rë

¹ Hane cahntsua xi ngujo nixtin ne, cavuya quiji nga Jesús cojo cha ladu rë me ngajan nandya Capernaum.

² Hane xi casacu cjua xi tacun ndihya me ne, jercu camatangun xuta, hisca tingotjo ndihya quitsê me. Hane sehe cachja Jesús cjua rë Nina.

³ Ngajan xi canduva ñuju cha hiscan tacun Jesús, yahahnga cha ngu cha xi cahme yojo rë.

⁴ Hane xi maji ficojo cha cha hisca hiscan tacun Jesús, tsêhê xi jemu quitsê xuta ne, cavuxaha cha rcu ndihya quixi rë hiscan tacun me. Sehe ngajan catsinguissehen cha cha hmu rë jan cojo ni nachan xi quisun cha.

⁵ Hya xi cavêê Jesús hacutjin xi macjain rë cha me ne, sehe cachja me cojo cha hmu rë jan ta:

—Jyê riji tsan ne, ha camanchataha. —Cuatjin cachja me.

⁶ Hora vëhê ne, hacuaha tivisiñuju ngujo cha maestru tsêhê ley, hacuaha taha tisingata-hacacun cha cuitjin:

⁷ “¿Mé má cuitjin chja cha xi cuijyihî vi?, ta Nina tsixcuehyu cha. Tsajin yo xi cuma tsinchataha jyê rë ngu xuta ta suva ni Nina má sahmi me.”

⁸ Jesús ne, ha hisca vëê me cojo cjuatacun rë me xi cuatjin tsingatahacacun cha xi cuacún vë, hane sehe cavinenguisse me cuitjin:

—¿Mé má cuatjin ningatuhuntacun cjuatacun vëhê?

⁹ ¿Jarê xi hitsê sa tsavi xi cuichjá cojo cha hmu rë vi? ¿Há xi: “Jyê riji ne, ha camanchataha?” O há tsajin ne, ¿há xi: “Tisatjinhngue ne, chjaye niña riji, hane tjihin?”

¹⁰ Hindê cojo sa xi cumachaya nuju xi Nina cavitexa me ngahan xi tsinchátaha jyê rë xuta nguehe ngasunhndê ne, nguehe chutsujun hacutjin cuichjá cojo cha hmu rë vi.

Sehe cachja me cojo cha hmu rë cuitjin:

11 —Tisatjinhngue tsan. Chjaye niña riji ne, tjihin ndya riji. —Cuatjin cachja me.

¹² Ngajan xi cha hmu rë jan ne, ngutjen ni cavisatjenhnga cha, cafaya cha niña rë cha, sehe cafe cha xcun ni ngayêjê xuta. Vëhê xi ngayêjê ni xuta jan ne, jemu quijircun rë me. Hacuaha cachja me ta:

—Jemu cjuarcun jain Nina. Vëhê xi cuatjin camá casahmi me. Cjêê camahani chaan xcusun sacuaha vëhê. —Cuatjin cachja xuta.

Jesús ne, jindaya me Leví xi má me xuta ladu rë Jesús

¹³ Ngu nixtin nga ne, cavatju Jesús tjeheh laguna. Hane jemu cjín xuta quijitjengui rë me. Hane cavicuaya me xuta jan.

¹⁴ Hane hya xi cjuí cjuí me ne, cavechu me hisca tacun cha Leví, quihndi rë cha Alfeo. Tacun cha ndihya hiscan faha cha xi machjitje tsêhê xi xteña. Sehe cachja Jesús cojo cha cuitjin:

—Cuanguen cojo ná.

Hya xi camá ne, cavetju cha, quiji cha cojo me.

¹⁵ Cuitjin camá nga ngujo nixtin jan, tijinê Jesús niñu ndava cha Leví. Hacuaha jemu cjín sa cha xi faha tujúnsa cojo jingu sa cha tsehen tijinê cha cojo Jesús cojo cha ladu rë me, ta hacuaha jemu cjín xuta xi cuacún vë xi tjengui rë me.

¹⁶ Peru cha maestru tsêhê ley cojo cha tsêhê partidu fariseo ne xi tu cavêê cha xi tijinê Jesús cojo cha xi cuacún jan ne, sehe cavinenguisse cha cojo cha ladu rë me cuitjin:

—¿Mé má cuatjin tijinê Jesús cojo cha xi choho xcusun rë vë ni?

¹⁷ Xi tu cahndê Jesús cjua rë cha ne, sehe ngajan xi cachja me cojo cha ngu ejemplu cuitjin:

—Xuta xi hacuiin hmu rë me ne, mijí rë me doctor. Me xi hmu ni rë me ne, me vëhê xi mameje rë me. Hacuaha ha chuva vëhê ni canduvá ngahan. Canduvá cuanguê xuta xi choho cjuatacun rë, cuichjá cojo rë me cjua rë Nina. Peru hacuiin cojo me xi ha tyjahi cjuatacun rë. —Cuatjin cachja me.

Vinenguisse xuta tsêhê xun rë Nina

¹⁸ Camá xi cha ladu rë cha Juan cojo cha tsêhê partidu fariseo ne, nixtin hya ne siu cha xun tsêhê Nina. Hane cafehe ngujo cha xi cavinenguisse rë Jesús cuitjin:

—¿Mé má cha ladu rē cha Juan cojo cha tsēhē partidu fariseo ne, tijinii cha quihndē ta, siu cha xun rē Nina, hane cha ladu nuju ne, faharcuiin cha cuatjin ni?

¹⁹ Sehe catsicuya Jesús cjuva cojo ngujo ejemplu cuitjin:

—Jinguyējē rē xi cha xi cuixan ne, tacun cha cojo xuta rē cha ne, cumaji cuiyuju me xun rē Nina.

²⁰ Peru cuinduva nixtin hya xi cha xi vixan ne, cojo cjuachan cjucojo condra rē cha cha. Hane hya cuiyuju xuta rē me xun rē Nina.

Ejemplu tsēhē tsjian cojo chuxin xi xinchaxan

²¹ Hacuaha cachja me cojo cha cuitjin:

—Tsajin yo xi fuyataha tsjian changá cojo ngu rquí tsjian xatsē ta tsēhē xi cjēē cjuelyu. Cuatjin ta, sá xi cuatjin sahmi me ne, xi cjuelyu tsjian xatsē jan ne, cuicheya rē tsjian xi changá jan hane sahmi jyē sa rē hiscan xi ntsun.

²² Hacuaha tsajin yo xi vincha xan xatsē cahntsua chuxin changá ta, sá xi cuatjin sahmi me ne xan jan ne, tsitsinga rē chuxin jan. Hane xan jan ne, chajan. Hacuaha cuetsun chuxin jan. Vēhē xi xan xatsē ne meje rē chuxin xi xatsē. Maji secjan jo xcusun.

Cha ladu rē Jesús ne, fane cha trigu nixtin xi chjahájenda rē

²³ Cuitjin camá nga ngu nixtin xi chjahájenda rē. Hora xi tivatju Jesús cojo cha ladu rē me hiscan tjin tjē trigu ne, cavetsihin cavotohosun cha tsē tsē trigu jan.

²⁴ Sehe cha tsēhē partidu fariseo cavinenguisse cha me cuitjin:

—¿Mé má cuatjin quihndē nixtin xi chjahájenda rē ne, sahmi cha ladu nuju xa xi chja ley xi cumaji nihña?

²⁵ Sehe Jesús ne, cafayangui me tsēhē cha cuitjin:

—¿Há cjēē camahani chutayun xujun hiscan chja tsēhē xcusun xi casahmi David hya xi tjin rē me cjuandya xi jemu vojo rē me cojo cha xi siutaha cojo me?

²⁶ Hya xi Abiatar má me nahmi xi matitjun jan ne, hya cavisehen me ndava Nina. Hane David ne, cajnē me pan xi viyuju xcun Nina. Hacuaha casua me cajnē cha xi siu cojo me. Cuatjin casahmi me handasa xi chja ley ta suva ni nahmi tjin cahndē xi cuma sinē me pan xi cuacún vē. —Cuatjin cachja Jesús.

²⁷ Ngajan xi cachja me cojo cha ta:

—Xi má nuju ngayun ne, ¿há titjun cavejña Nina nixtin xi chjahájenda rē, sehe catsindaja me xuta xi cjuaharcun rē nixtin vēhē? ¡Hacuiin cuatjin camá! Nina ne, titjun catsindaja me xuta, hane xi camá ngascan ne, cavajña me nixtin xi cjuahajenda xuta.

²⁸ Cuatjin ne, ngahan xi tsēhē Nina canduvá ne, hacuaha satē ná ngahan sacuaha nai rē xi cuichjá mé xi ndatjin xi cuma nixtin xi chjahájenda rē. —Cuatjin cachja Jesús.

3

Jesús ne, sahmi me xi cama ndaja ngu cha xi quixinhñu ngu ladu tsja cha nixtin sabadu

¹ Ngu nixtin nga xi quiji Jesús ngu yungun ne, ngajan tacun ngu xihin xi quixihñu ngu ladu tsja cha.

² Hane cha tsēhē partidu fariseo ne, cojo sa xi cuma cuinchajyē cha Jesús ne, siu cha cuidadu, ¿há tsindaja Jesús hiscan hmu rē xihin jan nixtin xi chjahájenda rē?

³ Hane ngajan xi cachja Jesús cojo cha xi quixihñu tsja jan cuitjin:

—Xcun ni yējē xuta vi ne, tisechin.

⁴ Sehe cavinenguisse me xuta xi siu me cuitjin:

—¿Mé xi sacu cahndē nixtin xi chjahájenda rē? ¿Há xi ndaju ne, o há xi ndajin, há xi naxentjen xuta o há xi niqun me?

Peru cafayinnguini me hisca hitsē.

⁵ Vēhē xi Jesús ne, cama cjan rē me. Hacuaha cama vacacun me ta, tsēhē xi sahmi yumahasen xuta. Xi tu cavutsejen Jesús yējē ni xuta ne, sehe cachja me cojo xihin hmu rē jan cuitjin:

—Nixingun ntsun.

Xi tu catsixinga cha tsja cha ne, ha camandaja.

⁶ Ngajan xi cha tsēhē partidu fariseo ne, cavetju cha yungun. Quiji casahmitangun cha cjuva cojo cha tsēhē partidu Herodes xi tsiquehen cha Jesús.

Xutacjin xi camandaja me

⁷ Ngajan xi Jesús cojo cha ladu rē me ne, quiji nga me laguna. Hacuaha jemu cjin xuta tsēhē distritu Galilea quijitjengui me Jesús.

⁸ Hane xi camachaya rē xuta xcusun xi casahmi Jesús ne, canduva camaha sa xuta tsēhē cahndē xi cuicun vi: nandya Jerusalén cojo yējē sa nandya tsēhē distritu Judea, cojo distritu

Idumea, cojo ngunda vëhë tsëhë ndajyë Jordán cojo hisca tahndee rë nandya Tiro cojo nandya Sidón.

⁹ Sehe ngajan xi cachja me cojo cha ladu rë me ta meje rë xi cuejña cha ngu barcu tiña hiscan tacun me, ta jemu cuehnchun xuta me.

¹⁰ Hane tsëhë xi jemu cjin xuta camandaja me xi casahmi Jesús ne, vëhë xi yëjë ni me xi hmu rë catsëxti me ne, cojo sa xi ndastu satë tsja me Jesús.

¹¹ Hane xi cavëë xitsehen xi hinchaxahasen rë xuta jan Jesús ne, quiji caticja xuta jan hisca tacun Jesús. Sehe ña jindayatë xuta jan, ta xitsehen casahmi xi cachja me cuitjin:

—Ngayun xi Quihndi rë Nina ngayun. —Cuatjin cajindaya me.

¹² Ngajan xi Jesús ne, cavitexa me xitsehen xi tsajin yo cuichja cojo yo me.

Jesús ne, vuxijin me tejó me xi cumá apóstol

¹³ Hya xi camá ne, camiji Jesús ngu naxi. Sehe catsingatju me cjua rë cha xi meje rë me. Hane quijitjengui cha me.

¹⁴ Hane cavaxijin me tejó cha xi cuisecoo rë me, hane hacuaha tsingatju me cha cjue cuicuya cha xuta cjua rë Nina,

¹⁵ hacuaha cuaxëxin cha xitsehen xi hinchaxahasen rë xuta.

¹⁶ Cha xi tejó tsëhë cha ladu rë me cuitjin hmí ra: cha Simón ne, hacui cha xi cachja Jesús xi hmí rë Pedru,

¹⁷ cha Jacobo cojo cha Juan httsë cha ne, xi quihndi rë Zebedeo, cha xi casuañihi me Boanergene, ngu ñihi xcuehyu xi meje cuichja Jemu Xti Naja,

¹⁸ cha Andrés, cha Felipe, cha Bartolomé, cha Mateo, cha Tomás, cha Jacobo, quihndi rë Alfeo, cha Tadeo, cha Simón xi tsëhë partidu cananayu,

¹⁹ hane cha Judas tsëhë nandya Queriete, cha xi cuitëña rë Jesús cojo condra rë me.

Jyë xi cumajin cumanchataha

²⁰ Hya xi camá ne, cavuya quiji nga Jesús ndihya hiscan vëjña me. Hacuanitjin nga camatangun xuta cjin. Hisca xi sinë Jesús niñu cojo cha ladu rë me maji.

²¹ Hya xi camachaya rë xuta rë me cjua vëhë ne, quiji me xi cuaxëxin rë me, tsëhë xi há sa má rë me, sca rë Jesús.

²² Hane cha maestru tsëhë ley ne, canduva cha tsëhë Jerusalén. Sehe cavisiajmi cha cojo xicjin cha cuitjin:

—Jiya Satanás xahasen rë me. Hane ngatsë rë xitsehen xi matitjun vë ne, vëhë xi ma vaxëxin Jesús xitsehen. —Cuatjin cachja cha.

²³ Ngajan xi casahmi tangun Jesús cha xi cuacun vëhë ne, sehe cojo ngujo ejemplu cachja me cojo cha cuitjin:

—Jemu yuma hasen rë Satanás sá xi suva ni cuaxëxin xicjin.

²⁴ Ha hyan ta sá xi xutaxa rë tsëhë ngu nandya scaan me ngajñi rë me ne, cjuicani rë me. ²⁵ Hacuaha sá xi xuta xi ngu ndava me ne, scaan me ngajñi rë me ne, ngajan chaja.

²⁶ Ha cuanitjin rë Satanás ta sá xi scaan cojo xicjin ne, ha quihndë cumachjiriin xi matitjun ta, tsëhë xi ha quihndë cuihndiin xicjin tsëhë.

²⁷ Hacuanitjin ne, hisca ngu cha chëjë cumaji tu cuisehen ni cha ndava ngu xuta xi hñu ngahñu rë me xi tsichëjë cha tsëhë me. Cumaji sa xi hacuiin titjun tsihñu cha me ta cuatjin xi cuma tsichëjë cha tsëhë me.

²⁸ Cuichjá cojo nuju cjuaquixi ta tu mé ni jyë xi sahmi xuta hacuaha tu mé ni cjua xi choho cuichja me ne, sacu rë me cjuaninchataha, sá xi cuijacun me jyë rë me cojo Nina.

²⁹ Peru tu yo ni xi choho cuichja tsëhë Hasen rë Nina ne, tsajin ngu nixtin xi sacu rë cjuaninchataha ta jemu jyë jyë rë.

³⁰ Cuatjin cachja Jesús ta tsëhë xi cachja cha jan xi jiya xitsehen xahasen rë me.

Naa rë Jesús cojo xicjin me

³¹ Hane cafehe naa rë me cojo httsë me ne, ngajan ni ndatsen hinchacun me ne, catsingatju me cjua xi meje cuisiajmi me cojo Jesús.

³² Vëhë ta jemu cjin xuta siundee me Jesús ne, sehe cachja xuta cojo rë me cuitjin:

—Nutsujun ni. Ná nuju cojo tsuhun cojo tichjun ne, jindaya nuju me ngajan candatsen.

³³ Sehe cafayangui Jesús cuitjin:

—¿Yo xi má nuju xi ná naha cojo xingueen?

³⁴ Cavutsejen me xuta xi siundee rë me, sehe cachja me cuitjin:

—Ngayun xi nechun nguehe, ngayun xi sacuaha ná naha cojo xingueen

³⁵ ta, tu yo ni xi sahmi sacuatjin chja Nina ne, vëhë xi sacuaha ná naha sacuaha xingueen.

¹ Ngu ndiya nga ne, cavetsihin cavicuya Jesús xuta tjeheh laguna. Hane ngu cuatjin nga jercu tu catsé camahani xuta hiscan tacun me. Vêhê xi cavisehen me ngu barcu cavéjña me. Hane quijicojo rê me hitsê xcun nandá, ngajan cavéjña. Hane yêjê ni xutacjín jan ne, caviyuju me nangui quixí tjeheh nandan.

² Sehe cavicuya Jesús me jemu cjín cjuá. Cuitjin cachja me ngu ejemplu:

³ —Cuejña ni xi ngu xihin ne, quiji catsitjê cha trigu.

⁴ Hane hora xi ticandi cha tjê rê ne, ngujo ne, cavixu ndiya. Hane canduva nisê ne, cajinë chu.

⁵ Ngujo nga ne, cavixu hiscan xi jemu ndyojotê, hacuaha jemu chuva nihndê quisun. Hane jemu xati cavetju ta tsêhê xi hacuain tjin nihndê quisun.

⁶ Hane xi jemu suê camá ne, caxiya tsêhê xi jemu chuva tyjama rê.

⁷ Ngujo nga ne, cavixu ngajñi rê nahyá. Xi tu camayehe nahyá ne, casahmihndê rê xitjê, hane camayiin.

⁸ Hane ngujo nga ne, cavixu hiscan ndajyihi nangui. Vêhê ne, jemu ndaja camá, hisca yehe hnga camá ya rê. Ngujo ne jemu ndaja camá. Ngujo nga jan ne, hitsê sa ndaja camá. Hane xi yahnga jan ne, jercu vatjutaha ndaja camá. Cuatjin fi ejemplu tsêhê cha xi tsitjê trigu.

⁹ Jarê ngayun xi meje nuju cuma nuju ne, ningatuhuntacun nduju mé vijne cjuá vè.

¹⁰ Hya xi cafe xutacjín jan ne, ngajan xi me xi siundee cuaha jan cojo cha xi tejó jan ne, cavinenguise me tsêhê cuentu jan.

¹¹ Sehe cafayangui Jesús cuitjin:

—Ngayun ne casua nuju Nina cahndê xi vijne rcun cjuatahahma tsêhê gubernu xi sahmi me. Peru me xi hacuain ladu naja ne, cojo suva ejemplu tichjá cojo rê me,

¹² cojo sa xi handasa cuihndê me ne, peru cuijnii rcu me ta, sá tu tsindeya me cjuatacun rê me ne, hacuaha cumanchataha me. —Cuatjin cachja Jesús.

Jesús ne, chja me mé vijne ejemplu tsêhê cha xi tsitjê

¹³ Sehe ngajan xi cachja Jesús cojo cha ladu rê me ta:

—Sá xi ha canuhyuun ejemplu vèhê ne, hacutjin cuinuhyun sa xi yahnga ni. Nguehe cuichjá cojo nuju mé vijne ejemplu xi cachjá cojo nuju vè.

¹⁴ Cha xi tsitjê trigu ne, sacuaha ngu cha xi chja cjuá rê Nina cojo xuta.

¹⁵ Ngujo me xi vihndê cjuá vèhê ne, sacuaha tjê rê trigu xi cavixu ndiya ta cjuá ndajyihi xi vihndê me ne, ngutjen ni nduva Satanás ne, fahataha cjuá xi caseya cahntsua xahasen rê me.

¹⁶ Yahnga nga me xi vihndê cjuá vèhê ne, sacuaha tjê xi cavixu hiscan jemu ndyojotê ta hya xi vihndê me cjuá ndajyihi ne, ngutjen ni jemu cojo cjuasua macjain rê me cjuá.

¹⁷ Peru tsêhê xi hacuain nguñaja cacun me macjain rê me ne, vèhê xi seyaain cahntsua xahasen rê me hya xi má cjuandya, sacuaha cumá rê tjê xi jemu chuva tyjama rê ne ta, cain rê xi jyê nixtin.

¹⁸ Hane ngujo nga me xi vihndê cjuá vèhê ne, sacuaha tjê xi cavixu ngajñi nahyá. Vihndê me cjuá.

¹⁹ Peru tsêhê xi jemu tjin rê me cjuandya hacuaha jercu meje rê me xi cuma nchina me, vèhê xi chuva cuenda sahmi me cjuá ndajyihi xi cavisíñuju me. Fê ne, tsajin mé vetjucaa.

²⁰ Ngujo nga me xi vihndê cjuá ndajyihi vèhê ne sacuaha tjê xi amatjê hiscan ndajyihi nangui ta xi tu vihndê me cjuá vèhê ne, faha nguñajacacun me. Vèhê xi ngujo me ne, ndaja cuiyujuchihin cjuatacun rê me. Ngujo nga me ne, hitsê sa ndaja cuiyujuchihin cjuatacun rê me. Hane me xi yahnga jan ne, jercu tu ndaja camahani cuiyujuchihin cjuatacun rê.

Ejemplu tsêhê lámpara

²¹ Hacuaha cachja me cojo rê me cuitjin:

—Hya xi setaha rê candil ne, ¿jani cuejña? ¿Há ngahma caxa ne? o ¿há ngahma nachan? Hacuain cuatjin nihñu ta, cuejña cahndê rê.

²² Sacuaha ndaja tsejen ndihi jan ne, hatuxa cuechu nixtin xi cuijne rcu xuta cjuá naha xi hacuain ndaja vijne rcun me quihndê.

²³ Jarê ngayun xi meje nuju cumá nuju ne, ningatuhuntacunndujun mé vijne cjuá vè.

²⁴ Hacuaha cachja sa me cojo xutacjín cuitjin:

—Ndaja tetuhunrcun xi tivisiñuju. Chuva xi tuhun ne, ha chuva vèhê sua nuju Nina. Hisca quisun sa sua nuju me.

²⁵ Me xi ha tjin rê ne, sua sa Nina me, hane me xi tsajin cjín rê ne, cjuahataha Nina xi tjin rê me.

Ejemplu tsêhê tutjê xi majyê

²⁶ Sehe cachja Jesús cojo xutacjín jan ngu ejemplu cuitjin:

—Xuta xi cuisehen me ladu rë Nina ne, ha tuxa cumá cjín me sacuaaha tjë tsëhë trigu xi tsitjê ngu xihin xcun nangui rë me.

²⁷ Fañafë cha nguixun ne, visatjenhnga cha nguitajñu. Hane tjë ne, vetju, hacuaaha mayehe xitjê. Peru xihin jan ne, hvíin hacutjin camá xi camayehe xitjê jan.

²⁸ Nangui ne, ha tuxa má xitjê. Titjun ne, cuetju xca rë. Xi cuijin sa ne, cuetju tú chihndë rë. Hiscan xi cuijnetaha ne, jemu cjín tutjê rë cuetju.

²⁹ Hane hya xi camacha tutjê rë ne, sehe tsingatju xihin jan mosu xi cjue cuatë ta tsëhë xi ha cavechu nixtin xi xti rë.

Ejemplu tsëhë tutjê rë mostasa

³⁰ Sehe cachja Jesús cuitjin:

—Nguehe cuichjá cojo nuju ngu nga ejemplu tsëhë gobiernu xi sahmi Nina.

³¹ Xuta xi cuisehen ladu rë Nina ne, cumacjin me sacuaaha majyë ngu ya mostasa. Tutjê rë ya vëhë ne, hitsë sa langa xi cumá rë yëjê ni tutjê xi tjin ngasunhndë.

³² Peru hya xi matjê ngu ne, sehe cuetju xca rë hacuaaha hitsë sa jyë má xi cuma rë yëjê ni xca xi chine. Hane tsja rë ne, hacuaaha yehe, hisca nisë ma sahmi chu ndava chu xcun tsja rë hiscan tjanguen.

Mé tsëhë xi Jesús ne, sahmixa me cojo ejemplu

³³ Jemu cjín ejemplu sacuaaha vëhë cachja Jesús hya xi tivicuya me xuta cjua rë Nina, hatucutjin hora xi cama cavetaharcu xuta. Hane cojo xuta ne, cachja me suva ejemplu.

³⁴ Peru hya xi suva siu cha ladu rë me ne, casua cuenda me cha mé vijne yëjê ejemplu jan.

Jesús ne, tsisejyu me tjo cojo tsindyu rë laguna

³⁵ Xi quiji hora tsëhë nixtin vëhë ne, Jesús ne, cachja me cojo cha ladu rë me cuitjin:

—Cuanguen ngunda vëhë. —Cuitjin cachja me.

³⁶ Ngajan xi caviyuju ni me xutacjin jan ne, sehe cha ladu rë me ne, quiji cha cojo me tu cuanitjin ni. Hacuaaha cojo sa barcu xi yahnga jan ne, quiji tangun cojo rë me.

³⁷ Hora xi cjui barcu ne, canduva ngu tjo xi jercu tu hñu camahani. Hane tsindyu rë laguna jan ne, vixuya cahntsua barcu, hisca meje tsë rë barcu cojo nandá.

³⁸ Hane Jesús ne, hisca cahncun barcu jan jiñafë me, tijiña me xcun tsjian sanercu me. Hya xi camá ne, catsingasca cha me, sehe cachja cha cojo me cuitjin:

—Maestro. Xati nihñutacun catasca nuju. ¿Há tsajin mé cuenda nuju ta, meje xtyusehen barcu cojo naja?

³⁹ Hane cavasca rë me ne, cachja me cojo tjo cojo laguna cuitjin:

—Jyuu nechun.

Xi tu cachja me cuatjin ne, casejyu yëjê ni.

⁴⁰ Ngajan xi cachja me cojo rë cha cuitjin:

—¿Mé má cuatjin jemu rcun? ¿Hacujyihí ni xi hisca cjëë cumacjain ndaja nuju ngahan?

⁴¹ Hya xi camá ne, jercu catsacjun camahani cha ladu rë me jan. Hane sehe ngajñi rë cha jan ne, cavisiajmi cha cuitjin:

—¿Yo me xi cuijyihí vi? ta, hisca tjo hisca laguna hndë tsëhë me.

5

Cha tsëhë nandya Gadara xi jiya ra xitsehen

¹ Hya xi camá ne, cafehe Jesús cojo cha ladu rë me ngunda vëhë tsëhë laguna, hiscan ladu rë xuta nandya Gadara.

² Hane xi cavetju me barcu jan, canduva tiña ngu xihin xi hinchá xitsehen xahasen rë, canduva cha tsëhë ngajñi rë tsjun ngajan tahndë.

³ Hacuaaha ha ngajan tacun cahndë cha tahndë. Hacuaaha tjihñu cha xi sejyu cha hisca cojo cadena.

⁴ Jemu cjan rë cha, cjín ndiya camahñu tsja camahñu ntsacu cha cojo cadena, peru tu cavicheya ni cha. Vëhë xi tsajin yo xi cama casahmi cojo cha.

⁵ Catsujyihíya cha nixtin nixten ngajan tahndë cojo ngajñi nguijña cha. Hane cajindayatëcjín ni cha, hacuaaha cavanguihmucjin ni cha yojo rë cha cojo ndyojo.

⁶ Hane hora xi cavëë cha Jesús ne, cjín sa nduva cha ne, vanga cha quiji cavixcuhnchi cha xcun Jesús xi cjuaharcun cha me.

⁷ Na cajindayatë cha cachja cha cuitjin:

—¿Mé cuenda nuju tsahan, Jesús, Quihndi rë Nina xi matitjun? Catamaniji rë Nina xi tuhundyun ná.

⁸ Cuatjin cachja cha ta tsëhë xi ha tichja Jesús xi cuetjuxin xitsehen jan tsëhë xahasen rë cha.

⁹ Sehe cavinenguisse me ñihi rë cha. Hane cafayangui cha tsëhë me cuitjin:

—Ñihi naha ne, Sindadu Cjín, tsëhë xi jemu cjín ngayin.

¹⁰ Sehe jercu cafehya cha cojo Jesús xi hacuini cjín camaha tsingatju me xitsehen jan tsëhë cahndë vëhë.

¹¹ Jinguyëjë rë xi cuatjin tijima ne, ngajan tiñataha ne, tacun ngu cahndë hiscan chu chinga hinchataha chu tijinë chu.

¹² Hane xitsehen jan ne, ña yuma chja cojo Jesús cachja cuitjin:

—Ningatjun niji hiscan siutaha chinga, xi cuisihin cahntsua xahasen rë chu.

¹³ Hane Jesús ne, joho cachja me. Hane hora xi cavetju xitsehen xahasen rë xihin jan ne, quiji cavisehen cahntsua xahasen rë chinga jan. Sehe yëjë ni chinga jan, xi meje jo mil jan ne, cavanga chu quiji cavetje chu ngu ndetjun tsëhë rcu naxi hane ngajan cavixuya chu ngajñi laguna. Ngajan camiji rë chu, hane cahme chu.

¹⁴ Hane cha xi ticsicjén rë chinga jan ne, cavanga cha quiji cha. Casua cha camachaya rë xuta xi siutaha nguiña, cavechu hisca nandya cachja cha. Ngajan xi xuta xi cahndë cjuja jan ne, quiji cavutsejen me mé xi camá jan.

¹⁵ Cafehe me hisca tacun Jesús, hane cavëë me cha xi jemu cjín xitsehen caxincha xahasen rë, tacun cha, yaja cha tsjian rë cha, hacuaha ha quihndë tsajin mé má rë cjuatacun rë cha. Hane xuta jan ne, jemu catsacjun me camá.

¹⁶ Hacuaha xuta xi cavëë hacutjin cavatju cha camá hacuaha hacutjin cavatju chinga camá ne, cachja me cojo xuta xi yahnga.

¹⁷ Sehe cavetsihin cachja me cojo Jesús xi catje me tsëhë ladu rë me xi cuicun vi.

¹⁸ Hya xi camá ne, hora xi tivisehen Jesús barcu ne, jercu cafehya cha xi caxincha xitsehen xahasen rë jan xi cjue cha cojo me.

¹⁹ Peru Jesús ne casuaain me cahndë xi cjue cha. Hane cuitjin cachja me cojo cha:

—Tjihin ndya rijí. Tjihin tjengui xuta rijí, hane tinoje cojo rë me xi Nina ne, camayuma rë me ngaye. Hacuaha tinoje tsëhë cjuandaja xi casahmi me cojo ri.

²⁰ Ha xcun xi café cahndë cha cjuja xi cachja Jesús ne, sehe cavetju cha quiji cha ladu hiscan xi hmí rë Të Nandya. Hane cavetsihin cha casuacuenta cha cjuandaja xi casahmi Jesús cojo cha. Sehe xuta xi siu cahndë jan ne, jemu quijircun rë me.

Jesús ne, sahmi me xi mandaja na chjuun xi ma rë xahmajni ndiya ndava Jairo

²¹ Xi tu cavuya nga Jesús cojo barcu ladu vihi tsëhë laguna ne, jercu catsë nga xuta hiscan cafehe me tjeheh laguna.

²² Hacuaha cafehe ngu xutaxa rë yungun rë ngu nandya. Cha vëhë ne, Jairo hmí rë cha. Hya xi cavëë cha Jesús ne, quiji cavixuhnchi cha xcun me.

²³ Sehe jercu cafehya cha favor cojo me. Cuatjin cachja cha:

—Quihndi naha ne, ha tu hora sa xi cueya na. Cuanguen ne, cuisanu ntsun na ne, cojo sa xi cumandaja na, hane cueña sa na cjuahñu.

²⁴ Xi tu cahndë Jesús cjuja rë cha ne, sehe quiji me cojo cha. Hacuaha jemu cjín camahani xuta quiji me hacutjin quiji Jesús. Quiji hnchun hnchun me cojo me.

²⁵ Hane ngajñi rë xuta jan ne, jiyajñi ngu chjuun xi ha nduva tejó nu xi hmu rë na tsëhë chíhin xahmajni.

²⁶ Hane jemu jyë cjuañihi cavatju na camá ta ha ndasa jemu cjín doctor catsirqui me na, tu mahya catsicjé na tujún rë na ta tsajin mé cavetjuca. Tu hitsë sa jyë camá chíhin rë na.

²⁷ Xi tu cahndë na cjuja tsëhë xcusun xi casahmi Jesús ne, quiji tiña na taha ngaxtun me, cavetahatsja na tsjian rë me.

²⁸ Cuatjin casahmi na ta catsingatahacacun na cuitjin: “Sá xi cuetaha ntsa ndastu tsjian rë me ne, cumandaja ngahan.”

²⁹ Hane ngutjen ni caxiya jni xi vixu rë na. Hane hacuaha camachaya rë na ta camandaja na tsëhë chíhin xi má rë na.

³⁰ Jesús ne, camachaya rë me xi tjin xa xi casahmi ngahñu rë me. Cavuya me taha ngaxtun me ne, cavutsejen me xuta jan ne, sehe cavinenguisse me cuitjin:

—¿Yo xi casatëtsja tsjian naha?

³¹ Sehe ngajan xi cha ladu rë me jan ne, cachja cha cojo me cuitjin:

—¿Hacutjin meje nuju xi cuinújin yo xi casahmi? ta ha chutsujun xutacjín xi ña tsatëtaha me ngayun ndya jan.

³² Sehe cavutsejen nga me xuta tahndee rë me ne, ¿yo xi cuatjin casahmi?

³³ Sehe chjuun xi casahmi jan ne ta ha vëë na hacutjin cavatju na camá ne, ña fatsë na xi catsacjun na camá. Sehe quiji cavixuhnchi na xcun Jesús, hane cachja na yëjë ni hacutjin xi cjuaquixi.

³⁴ Sehe ngajan xi Jesús ne, cachja me cojo na cuitjin:

—Ha camandaja ngayun ta camacjain nuju. Tjangun cojo cjuasua ta chûhin vë ne, ha quihndë cuyaain suaxti nuju.

³⁵ Jinguÿëjë rë xi Jesús tichja cuaha me ne, canduva ngujo me tsëhë ndava xutaxa rë yungun jan. Hane cuitjin cachja me:

—Ha cahme quihndi nuju. Tahanndayaan sa rë maestru.

³⁶ Peru Jesús ne, handasa cahndë me cjuaxi cachja me xi cafehe jan ne, sehe cachja me cojo xutaxa rë yungun jan ta:

—Xi camacjiintacun. Ningatuhuntacun ni xi cumandaja na. —Cuatjin cachja Jesús.

³⁷ Sehe casuaain me cahndë xi cjue yëjë xuta jan. Suva ni cha Pedru, cha Jacobo cojo cha Juan hntsë cha Jacobo, cha vëhë quiji cha cojo me.

³⁸ Xi cafehe me ndava xutaxa rë yungun jan ne, ngajan siu xutacjin xi jihnda me jindaya me ngatsë rë cjuandusin.

³⁹ Hane xi cavisehen Jesús ndihya ne, sehe cachja me cojo xuta jan cuitjin:

—¿Mé má cuatjin va má ngayun chjihndun? Na lihndi vë ne, hacuüin cahme na ta jiñafë na. —Cuatjin cachja me.

⁴⁰ Sehe ngajan xi xuta xi siu jan ne, tu vejnucjëë me tsëhë cjuaxi cachja Jesús. Sehe ngajan xi Jesús ne, catsitëë me xuta xi siu jan candatsen. Hane suva ni nahmi rë nima quihndi cojo naa rë cojo cha xi ticojo me cavisehen me cojo hiscan jiña.

⁴¹ Sehe cafaha me tsja nima quihndi jan ne, sehe cachja me cojo cuitjin:

—Talita cumi —cjuaxi meje cuichja: Tichjá cojo ri, tsan, tsatjinhngue.

⁴² Xi cafë cachja Jesús cuatjin ne, cavuya cjuahñu rë na lihndi jan hacuaha ngutjen ni cavisatjenhnga na catsujyihya na. Na lihndi jan ne, tejó nu tjin rë na. Hane me xi siu jan ne, jercu quijircun camahani rë me.

⁴³ Hya xi camá ne, jemu cachja camahani Jesús cojo xuta rë na xi tsajin yo cuichja me cojo xcusun jan. Hacuaha cachja me cojo xuta rë na xi sua me xi sinë na.

6

Jesús ne, fi nga me Nazaret

¹ Hya xi cavetju Jesús tsëhë Capernaum ne, cavuya cafe me cojo cha ladu rë me nandya Nasaret, hiscan xi camacha me.

² Hya xi cavechu nixtin xi chjahájenda rë ne, cavetsihin cavicuaya me xuta ngajan yungun. Hane xutacjin xi tivisiñuju cjuaxi Jesús jan ne, jemu quijircun rë me. Sehe cachja me ngajñi rë me cuitjin:

—¿Jani cavutaya cha xi cuijyih vi cjuaxi tichja cha? Jemu tjin rë cha cjuatacun. Hacuaha jemu yehe cjuarcun sahmi cha.

³ Há hyan ngayaan xi cha vihi xi chjineya jan ni, cha xi quihndi rë na María. Hntsë cha ne, hacui cha Jacobo, cha José, cha Judas cojo cha Simón. Hacuaha nandya naja tacun ndava tichja cha.

Hane jemu xti rë xuta jan, tsëhë xi ha vëë me Jesús.

⁴ Vëhë xi Jesús ne, cachja me cojo xuta jan cuitjin:

—Xuta ne, ha tuxa faharcun me ngu xihin xi suacuenda cjuaxi Nina. Suva ni xuta rë xihin jan cojo xuta xi tangun nangui rë cojo, me vëhë xi faharcuaain me xihin jan.

⁵ Ngajan ne, hacuüin cjín cjuarcun casahmi me, tsëhë xi macjaain rë xuta me. Tu cavisanetsja ni me ngujo xuta hmu rë, hane camandaja xuta hmu rë jan.

⁶ Hane Jesús ne quijircun rë me ta, tsëhë xi xuta jan ne, cuatjin camacaain rë me. Hane sehe quiji catsujyihya Jesús nandya tahndee rë jan, cavicuaya me xuta.

Jesús ne, tsingatju me cha ladu rë me xi sua cha machaya rë xuta tsëhë gobiernu rë Nina

⁷ Sehe casahmitangun me cha xi tejó jan hane cavetsihin catsingatju me jo cha jima ngu ladu. Hacuaha casua me cha ngahñu xi cuma cuaxëxin cha xitsehen.

⁸ Hacuaha cachja me cojo yëjë ni cha xi tsajin mé xi cjuaha cha xi cjue cha. Suva ni ngu ya xi cuisecoo rë cha. Hacuüin niñu ne, hacuüin morra, hacuüin xi tujún.

⁹ Chuxinxhtë ni catincha ntsacu cha. Hacuaha cuaain cha chingá.

¹⁰ Ngajan xi cachja me cojo yëjë ni cha cuitjin:

—Hya xi cjuhun ngu ndihya ne, xi cuisuhun ne, ha ngajan ni tinechun nguixun nguixun ni hisca xi cuetjun tsëhë nandya hiscan xi casatë nuju.

¹¹ Tuyani ni xi tsingatiin nuju me hacuaha hisca cuisiniñiji me tsujun ne, tetjun tsëhë ngajan ne, titsunu chojo rë ntsacu. Vëhë cuma ngu seña tsëhë jyë rë me.

¹² Xi cajnetaha cachja Jesús cuatjin ne, sehe cavetju cha quiji cha hiscan xi casatë rë cha. Cachja cha cojo xuta xi tsindeya me cjuatacun rë me.

¹³ Hacuaha jemu cjín xitsehen cavaxëxin cha. Hane xuta hmu rë ne, aceite tsëhë tuxine xi hmí olivu catsufë cha xten me hane camandaja me jan.

Cjuaveya rë Juan Vitenda rë Xuta

¹⁴ Me xi matitjun xi hmí rë Herodes ne, cahndë me cjuva tsëhë Jesús, tsëhë xi xuta ne, jercu cachja me tsëhë Jesús. Hane ngujo me ne, cuitjin cachja me:

—Nima Juan, cha xi cavitenda rë xuta ne, ha ndasa cahme cha, peru cavascaya rë cha. Vëhë xi ma sahmi cha cjuarcun.

¹⁵ Hane ngujo nga me ne, cachja me ta Jesús ne, hacui rë Elías, ngu xutachanga xi casuacuenda cjuva rë Nina hatsëë. Hane cachja sa yahnga me ta Jesús ne, hacui rë ngu profeta, sacuaaha me xi casuacuenda xutachanga xi caviyuju titjun.

¹⁶ Peru Herodes ne, hya xi cahndë me cjuva vëhë ne, sehe cachja me ta:

—Nima Juan má me. Catsingátju catusun rë rcu cha, hane cavuya rë cjuahñu rë cha. —Cuatjin cachja Herodes.

¹⁷ Herodes ne, ha catsingátju me cachjaha rë cha Juan xi cjue cha ndavaya. Cuatjin casahmi me ngatsë rë na Herodía. Na vëhë cafaha Herodes, camá chjuun rë me ha ndasa xi ha chjuun rë cha Felipe hntsjëñu me má na.

¹⁸ Hane ngatsë rë vëhë, cuitjin cachja cha Juan cojo rë me:

—Chja ley ta ndajintjin camahani xi chjahan chjuun rë xingueen. Vëhë xi ngayun ne, ndajintjin xi cuatjin canihñu. —Cuatjin cachja cha Juan.

¹⁹ Ngajan xi na Herodía ne, caveyacacun na cavutsejen na cha Juan. Hane meje rë na xi cueya cha. Peru camaji ta tsëhë xi

²⁰ Herodes ne, cafaharcun me cha, tsëhë xi vëë me ta Juan ne, ngu xihin xi tyahi cjuatacun rë cha, hane cavéñña cha tsëhë Nina. Hane vëhë xi casahmi me cha cuidadu. Hacuaha hya xi Herodes cavisiñuju me cjuva rë cha Juan ne, jercu cachuya rë me ha ndasa casecjan cjuatacun rë me.

²¹ Peru casacu rë na Herodía cahndë tsëhë xi meje rë na hya xi cavechu nixtin tsëhë suhi rë Herodes. Hya cachja Herodes cojo ngujo xutaxa rë ndihyavasen cojo me xi matitjun tsëhë sindadu, cojo sa ngujo xuta changá xi matitjun tsëhë distritu Galilea, xi cjue me ta casehenchjine ngu comida tsëhë suhi rë me.

²² Hane hora xi tijinë me ne, cavisehen na quihndi rë na Herodía, catë na. Hane jercu cachuya rë Herodes cojo me xi yahnga jan hacutjin catë na. Sehe ngajan xi Herodes, me xi matitjun jan ne, cachja me cojo na cuitjin:

—Tu mé ni xi meje ri ne, chjahye ná, hane suá ri.

²³ Vëë Nina jain ta suá ri hisca vasentjin nandya xi siu ntsa. —Cuatjin cachja me.

²⁴ Xi tu cavetju na quiji na hiscan tacun naa rë na ne, cavinenguise na cuitjin:

—¿Mé xi ndatjin cjuëhya rë me?

Sehe ngajan xi chja naa rë na ta:

—Chjaye rcu cha Juan, cha xi vitenda rë xuta. —Cuatjin cavinchangui naa rë na na.

²⁵ Xi tu cavuya cavisehen na hiscan tacun Herodes ne, ngajan xi cachja na cuitjin:

—Meje ná xi ngutjen ni ne, cahntsua ngu tyuva ne tuhun ná rcu cha Juan. —Cuatjin cachja na quihndi jan.

²⁶ Ngajan xi Herodes ne, jemu choho camá rë me peru tsëhë xi hisca Nina caveyanangui me xi casua me cjuva rë me, hacuaaha tsëhë xi yëjë ni amigu rë me cahndë me cjuva jan, vëhë sahmi xi má sava rë me tsindeya me cjuva rë me cojo na.

²⁷ Ngajan xi Herodes ne, ngutjen catsingátju me ngu sindadu hiscan jiya cha Juan. Hacuaha cavitexa me xi cuinduva cojo cha rcu cha Juan. Sehe ngajan xi cha sindadu jan ne, quiji cha ndavaya, cavatësun cha rcu cha Juan.

²⁸ Sehe caveya cha cahntsua tyuva, quijicojo cha. Xi cafehe cha cojo ne, casua cha na quihndi rë na Herodía. Hane sehe casua na naa rë na.

²⁹ Sehe hya xi cahndë cha ladu rë cha Juan tsëhë mé xi cavatju cha cama ne, sehe quiji cha cafaha cha nima caveyaniji cha.

Jesús ne, tsicjen me hñu mil xihin

³⁰ Hya xi cajnetaha catsujyihya cha apóstol xi catsingátju Jesús jan ne, cavuya camatangun nga cha cojo me. Sehe cachja cha hacutjin casahmi cha hacuaaha hacutjin cavicyua cha.

³¹ Sehe ngajan xi Jesús ne, cachja me cojo cha cuitjin:

—Nduvun suvun ni ne, cuanguen hiscan xín, chjahanjeyan hitsë.

Cuatjin meje cjue cjuahajeya me ta tsëhë xi jemu cjín xuta xi cjui nduva me hiscan tacun Jesús. Hisca maxatiin jinë me niñu.

³² Sehe quiji me cojo cha ladu rë me cojo barcu ngajan hiscan xín.

³³ Hane xuta jan ne, cavëë me xi cjui me cojo cha ladu rë me. Hacuaha vëë me xi hacui Jesús. Sehe xuta tsëhë nandya tahndee jan ne, cavanga me quiji me taha vëhë. Hisca tjun sa me cafehe me, sehe cafehe Jesús cojo cha ladu rë me.

³⁴ Xi tu cavetju Jesús tsèhë barcu jan ne, cavëë me xi jemu cjín xuta siu me. Hane camayuma rë me xuta jan ta tsèhë xi siu me sacuaaha chu tsánga xi tsajin yo xi cjuahacuenda rë chu. Sehe cavetsihin cavicuya me xuta jan, jemu cjín cjuahacuenda me.

³⁵ Hya xi ha quiji hora jan ne, ngajan xi cachja cha ladu rë me cojo me ta:

—Nguehe ne jemu xín camahani. Hacuaha jemu quiji hora.

³⁶ Ninguijnutihun cjuahacojo xutacjín vi cojo sa xi catji me nandya xi siu tiñataha, hane catatsë me xi sinë me. —Cuatjin cachja cha.

³⁷ Hane cuitjin cafayangui Jesús:

—Tuhun ngayun xi sinë me.

Sehe ngajan xi cachja cha ladu rë me cuitjin:

—¿Hacutjin sacú ni xi sinë me xi cuarcu cjín me? Xi cuatjin cjín pan chihin ne, meje miji chji rë jo cientu mosu. —Cuatjin cachja cha.

³⁸ Sehe cachja Jesús cuitjin:

—Tangun chutsujun ¿há cjín pan tjin ngajñi nuju ngayujun ni?

Xi tu cavëë cha há cjín pan tjin ra ne, sehe cachja cha cojo me cuitjin:

—Hñú pan, cojo jo ti má.

³⁹ Sehe ngajan xi cachja Jesús cojo cha ta catichja cha cojo xuta, catiyuju me xcun ndiji, ngujo ngujo me ngu ngu cahndë.

⁴⁰ Hane caviyuju me ngu cientu me ngu cahndë, o vasen cientu ngu cahndë hisca xi café yëjë me caviyujuchihin me.

⁴¹ Sehe Jesús ne, cafaha me xi hñu pan cojo jo ti jan, cavutsejenniji me ngahnga ne, casua me nacuechji rë Nina, sehe cavotoho langa me pan jan. Hane casua me cha ladu rë me xi sua cha sinë xuta. Hacuaha cojo catsijo ti jan cavatëcja Jesús xi sinë xuta.

⁴² Jercu caxuva pan cojo ti jan. Hane yëjë ni me cajinë me hacutjin xi cachuya rë xahasen rë me.

⁴³ Xi cavatju cajinë xuta jan ne, sehe cafaya cha pan cojo ti xi cafiin jan ne, hane catsinguitsë cha tejó chajne cojo.

⁴⁴ Me xi cajinë pan jan ne, hñu mil má me xi xihin. Hacuaha xin má yachjin cojo langa xi cajinë me.

Jesús ne, fi ntsacu me xcun ndachacun

⁴⁵ Ngajan xi Jesús ne, catsingatju me cha ladu rë me cojo barcu jan xi cjue titjun ni cha ngunda vëhë, hiscan nandya Betsaida, jinguyëjë rë xi tsinguijnetaha me cjuahacojo xuta.

⁴⁶ Hya xi camá catsinguijnetaha me cjuahacojo jan, sehe camiji me ngu ndetjún xi cuisiajmi me cojo Nina.

⁴⁷ Hane hora xi camá nguixun ne, barcu jan ne, vasencja laguna cju. Hane Jesús ne, tacun suva cuaha me nangui quixí.

⁴⁸ Hacuaha cavutsejen me ta jemu chja tivatju cha xi cju cha cojo barcu, tsèhë xi tjo ne, taha hiscan cju cha ne, ngajan nduva. Hane xi tiña sahasen ne, camatiña Jesús tsèhë cha, cju me xcun nandan. Hane cuatjin cju me sacuaaha xi meje cuatjutaha me cha.

⁴⁹ Xi tu cavëë cha xi cju me xcun nandan ne, catsingatahacacun cha ta nima xi meje cuincharcun rë cha. Hane jercu cajindayatë cha,

⁵⁰ tsèhë xi catsacjun cha xi cavëë cha me. Hane ngutjen ni cachja Jesús cojo cha cuitjin:

—Xi carcuun.

⁵¹ Hane sehe cavisehen Jesús barcu hiscan siu cha. Hora vëhë ne, casejyu tjo. Ngajan xi jemu quijircun camahani rë cha ta,

⁵² ha ndasa cavëë cha cjuarcun xi casahmi Jesús cojo pan jan ne, peru cajni rcu cha, tsèhë xi vechiin cjuatacun rë cha.

Jesús ne, sahmi me xi mandaja xuta xi hmu rë tsèhë nandya Genesaret

⁵³ Xi quiji sa me cojo barcu ne, cafehe me tjehen laguna, tiña nandya xi hmí Genesaret. Hane ngajan catsihñu me barcu.

⁵⁴ Hya xi cavetju Jesús tsèhë barcu ne, cavëë xuta ta hacui Jesús.

⁵⁵ Hane xuta jan ne, marcu macjain quiji me yëjë ni ladu tsèhë nandya jan, xi quiji jaha me xuta hmu rë, caviyuju me xcun Jesús.

⁵⁶ Hane tuyani ni xi quiji Jesús, há nandya langa ne, há nandya hñu, o há xi ranchun, caviyuju me xuta hmu rë hiscan ndetsin. Sehe cafehya me cojo Jesús xi ndastu satëtaha xuta hmu rë jan tsjian rë Jesús. Hane yëjë ni xuta hmu rë xi casatë tsjian rë Jesús ne, camandaja me.

¹ Ngujo cha tsêhê partidu fariseo cojo ngujo cha maestru tsêhê ley ne canduva cha tsêhê nandya Jerusalén quiji cha ngajan hiscan tacun Jesús, ngajan camatangun cha.

² Xi cafehe cha ngajan ne, cavêê cha xi ngujo cha ladu rê Jesús ne tjin sa jyê rê tsja cha ne, tjinê cha niñu ta cavanii cha tsja cha.

³ Hane cachuyiin rê cha ta tsêhê xi ngayêjê ni xuta nangui niji ne, sahmi ngujoyê xi cuane me tsja me sehe sinê me niñu. Yaha me xcusun rê xutachanga niji.

⁴ Hacuaha hisca sa xi fehe me xi fi me ndetsin ne, sá xi cjêê cuane me tsja me ne, sinii me niñu. Hacuaha jemu cjín sa xcusun rê xutachanga niji xi yaha me ta sacuaha xi ha tyahi trasti ne, cuane nga me. Hacuaha cuanitjin sahmi me cojo nachan.

⁵ Ngajan xi cha tsêhê partidu fariseo cojo cha maestru tsêhê ley ne, cachja cha cojo Jesús cuitjin:

—¿Mé má cuatjin sahmiichiin cha ladu nuju ley rê xutachanga naja? ta, tsêhê xi vanii cha tsja cha xi jinê cha niñu.

⁶ Ngajan xi cafayangui Jesús cuitjin:

—Ngayun ne, jo xcun jo ntsuvun yun. Jemu quixi cjua xi catsihindu Isaías tsujun xcun xujun rê me sacuatjin cachja Nina xi xuta ne, jemu ndacha me. Cuitjin fi cjua jan:

Xuta xi cuicun vi ne, ndaja chja me tsahan,

peru xi cojo xahasen rê me ne, hisca tsinguitsjiin me ngahan.

⁷ Tu mahya xi faharcun ná me ta

xi vicuya xicjin me ne, hacuiin cjua naha cuicuya me ta, tu cjua rê xuta.

⁸ Cuanitjin ngayun ta nismutacun cjua rê Nina, hane hitsê sa tivetuhunrcun xcusun rê xutachanga naja.

⁹ Cachja sa me cuitjin:

—Xi má nuju ne, jemu ndatjin casacuse nuju hacutjin vejñuxun cjua rê Nina cojo sa xi nihñuchuhun xcusun rê xutachanga naja.

¹⁰ Moisés ne, cuitjin catsihindu me hacutjin xi cachja Nina xi nihña ngayaan xuta rê me: “Chjuhunrcun ná nuju, chjuhunrcun nahmi nuju”, hacuaha: “Yo xi choho chja tsêhê xutacha rê ne, xuta ne tsiquehen rê.”

¹¹ Peru ngayun ne, cjuatacun rê xutachanga naja vicuyun ta, nújun ta ngu cha ne cuma cuichja cha cojo xutacha rê cha cuitjin: “Ha quihndê cumaji cuisecoo nuju ta yêjê ni xcusun xi tjin ná ne, ha caveñá tsja Nina.”

¹² Hane xi cuatjin cuichja cha ne, ha quihndê sahmi ngujoyê xu xi cuisecoo cha xutacha rê cha.

¹³ Xi cuatjin ne, ha camachjiriin nuju cjua rê Nina ta, nihñu sacuaha xcusun rê xutachanga naja, hacuaha vicuyun rê jingu sa. Hacuaha cjín sa xcusun ndacha sacuaha vêhê nihñu. —Cuatjin cachja Jesús cojo maestru jan.

¹⁴ Hacuaha cajindaya Jesús xuta xi cumatangun me. Hya xi camá ne cuitjin cachja me cojo:

—Ngayujun ngarcun ni ne, tinuhyun cjua xi cuichjá vi.

¹⁵ Xcusun xi vixuya cahntsua xuta ne, hacuiin vêhê tsitsehen rê me ta, cjuatacun xi nduva rê me ne, vêhê tsitsehen rê me.

¹⁶ Jarê ngayun xi meje nuju xi cumá nuju ne, tetuhunrcun.

¹⁷ Xi cavatju cachja me vêhê ne, caviyuju xuta ngajan ne, sehe cavisehen me cojo cha ladu rê me cahntsua ndihya. Ngajan xi cha ladu rê me ne, cavinenguise cha me tsêhê cjua vêhê.

¹⁸ Ngajan xi cachja me cuitjin:

—¿Há hisca ngayun cajniin rcun cjua xi cachjá ní? Nguehe cuichjá cojo nuju mé vijne cjua vêhê. Cuma xinêê yêjê xcusun comida ta tsajin ngu xcusun xi jinê xuta xi cuma tsitsehen rê me

¹⁹ ta xi sinê me ne, hacuiin cahntsua xahasen rê me cjui ta cahntsua me. Fi ne vetjutaha ndatsen.

²⁰ Hacuaha cachja sa Jesús cuitjin:

—Cjuatacun xi nduva tsêhê xahasen rê xuta ne, vêhê tsitsehen rê me ta,

²¹ tsêhê xi xi nduva tsêhê xahasen rê me ne, cjuatacun tsehen, sacuaha yachjin xi viteña yojo rê, sacuaha jyê tsêhê xi sahmi me chjuunnahñu rê me jingu sa chjuun, cojo cjuachêjê, cojo xi tsiquehen xicjin,

²² cojo xi jercu meje rê me cjuanchina, cojo xi sahmi me cjuatsehen, sahmi me cjuandacha, choho sahmi me, tjin rê me cjuaxin, sahmi me cjuachjataha, tjin rê me cjuaxihin, sahmi me cjuangarca.

²³ Yêjê cjuatsehen xi cuacun vêhê ne, nduva tsêhê xahasen rê xuta, hane vêhê tsitsehen rê me.

Ngu chjuun xi xutaxin má na ne, camacjain ran Jesús

²⁴ Xi cavetju me tséhë distritu Galilea, café me ladu tséhë nandya Tiro cojo nandya Sidón. Xi cafehe me ngajan ne, cavisehen me cahntsua ngu ndihya, tséhë xi mijí rë me xi scuëë xuta xi cafehe me. Peru camaji cavejñahma me.

²⁵ Xi cafehe Jesús ngajan ne, ngutjen camachaya rë naa rë ngu na xi jiya xitsehen cahntsua xahasen rë na. Hane quiji na cavixcuhnchi na xcun Jesús xi cjuaharcun na me.

²⁶ Na vëhë jan ne, xutaxin na, na ladu tséhë distritu Sirofenisia, hacuiin na xuta tjë rë Israel. Hane caféhya na cojo Jesús xi cuaxë me xitsehen xi jiya cahntsua xahasen rë na quihndi rë na.

²⁷ Hane xi cafayangui Jesús tséhë na jan ne, cuitjin cachja me ngu ejemplu cojo rë na.
—Sechiye ni, catijnetaha catjinë nixti ta hacuiin ndatjin xi chjahatahan niñu tséhë nixti hane sehe tahan rë naña.

²⁸ Ngajan xi naa rë na hmu rë jan ne, cuitjin cajnercu na xi tichja me tséhë xuta tjë rë Israel cojo xutaxin. Hane cafayangui na cuitjin:

—Nai. Quixi xi nújun, peru naña xi siu ngahma maxë ne, sacu xi vixuhya hntsua nixti, sehe jinë chu.

²⁹ Hane sehe cachja Jesús cojo rë na cuitjin:

—Ndatjin xi canoje. Quihndë ta cuatjin ne, cuma cjuihin ta xitsehen xi caseya cahntsua xahasen rë na quihndi riji ne, ha cavetjuxin.

³⁰ Xi cavuya café na ndava na ne, quihndi rë na ne, ha jyuu jiña na hacuaha xitsehen xi caseya cahntsua xahasen rë na ne, ha cavetjuxin.

Jesús ne, sahmi me xi mandaja ngu cha xi loho hacuaha lihmi cha

³¹ Sehe cavetju Jesús ladu tséhë nandya Tiro, cavatju me nandya Sidón cojo ladu xi hmí Të Nandya, vëhë cafehe me laguna tséhë Galilea.

³² Hane caféhecojo nga xuta ngu cha xi loho hacuaha lihmi cha. Hane caféhya xuta jan cojo Jesús xi cuetahatsja me cha, sehe cumandaja cha.

³³ Ngajan xi Jesús ne cavaxëxin me cha tséhë ngajñi rë xuta ne, sehe caviyujutaha me rcu tsja me ngu ngu ladu ngojo tyjavañuju cha. Hane hacuaha cavëhënatya me rcu tsja me sehe cavetaha me neje cha.

³⁴ Hya xi camá ne, cavutsejenniji me ngahnga hane cafëcacun me. Sehe cachja me cuitjin:

—¡Efata! —cjuu xi meje cuichja: ¡Nuxuhunyun!

³⁵ Hane xi tu cachja me cuatjin ne, catuxaha tyjavañuju cha xi loho. Hacuaha hora vëhë ni ne, camá ndandaja cachja cha.

³⁶ Sehe ngajan xi cachja Jesús cojo xuta xi tsajin yo cuichja cojo me xcusun vëhë. Peru xuta jan ne, hitsë sa jercu cachjatë me tséhë xcusun xi casahmi Jesús.

³⁷ Jercu quijircun camahani rë xuta. Cuitjin cachja me:

—Tu mé xcusun ni jercu ndaja sahmi Jesús. Xuta xi loho ne, vihndë sahmi me, hacuaha xuta xi lihmi ne, sahmi me xi ma chja.

8

Jesús ne, tsicjen me ñuju mil xihin

¹ Nixtin hya ne, hacuaha jercu cjín xuta siu me hisca tacun Jesús. Hane tséhë xi tsajin camahani mé xi sinë me ngajan ne, vëhë xi Jesús ne, cajindaya me cha ladu rë me, sehe cachja me cojo cha cuitjin:

² —Jemu yuma má ná xutacjín vi ta ha quihndë jyan nixtin hinchataha me cojo naja, hane ha quihndë tsajin camahani mé xi sinë me.

³ Sá xi tsingátju me cjue me xi cjëë sinë me niñu ne, cjuaha rë me hinda ndiya. Ngujo xuta xi cuicun vi ne, jemu cjín canduva me. —Cuatjin cachja me.

⁴ Sehe ngajan xi cha ladu rë me ne, cafayangui cha tséhë me cuitjin:

—¿Jani cuma sacú naja xi sinë xuta vi ta ngeuhe ne, jemu xín camahani tséhë nandya?

⁵ Ngajan xi cavinenguise Jesús cojo cha cuitjin:

—¿Há cjín pan tjín nuju?

Ngajan xi chja cha ta:

—Yatu má.

⁶ Ngajan xi Jesús ne, cavitexa me xutacjín jan xi cuiyuju me nangui. Xi café xuta caviyuju me nangui ne, sehe cafaha Jesús pan jan sehe casua me nacuechji rë Nina. Hane cavotoho langa me pan jan, casua me cha ladu rë me xi cuiyuju cha sinë xutacjín jan. Hane cuatjin casahmi cha.

⁷ Hacuaha tjín ra ngujo ti. Hane Jesús ne casua me nacuechji rë Nina tséhë ti jan, hane sehe cachja me cojo cha ladu rë me xi sua cojo ti jan sinë xuta.

⁸ Xi camá cajnë xuta jan ne, jemu ndaja camá rë xahasen rë me. Hane xi cafaya cha ladu rë Jesús xi cavangui cajnë xuta jan ne, catsë yatu nisinya.

⁹ Xuta jan ne, sacuaaha chuva rë ñuju mil má me.

¹⁰ Hane hisca xi cajnetaha cjuandaja vëhë ne, sehe catsingatju Jesús xuta, cafe xuta ndava me. Hya xi camá ne, cavisehen me barcu cojo cha ladu rë me, hane cavuya me ngunda vihi taha ladu rë hiscan xi hmí rë Dalmanuta.

Cha fariseo ne, fehya cha seña

¹¹ Xi cafehe me ngajan ne, hacuaaha cafehe cha tsëhë partidu fariseo. Hane cavetsihin cha cavisiajmi cha cojo Jesús ta meje cjuahachuva cha me. Cafehya cha cojo rë me xi tsingacun me ngu cjuarcun xi nduva ngahnga, cojo sa xi scuëë cha xi Nina catsingatju jain rë me.

¹² Ngajan xi Jesús ne, cojo cjuachohotacun ne, cachja me cojo cha cuitjin:

—¿Mé má cuatjin chjahyun xi sahme ngu cjuarcun xi nduva ngahnga? Cuichjá quixë cojo nuju ta hisca ngu xcusun vëhë ne, sahmeë xi xcun cojo xcun.

¹³ Ngajan xi caviyuyu me cha xi cuacun jan ne, cavisehen me barcu cojo cha ladu rë me. Hane sehe cavuya quiji me ngunda vëhë tsëhë laguna.

Xcusun rë cha fariseo ne, visehetë cjuatacun rë xuta sacuaaha sahmi san rë pan

¹⁴ Peru cha ladu rë me ne, cachaya rë cha xi cjuaha cha pan, hane cahntsua barcu ne, ngu tutu sa pan jiya ndaja.

¹⁵ Sehe ngajan xi chja Jesús cojo cha cuitjin:

—Nechun cuidadu cojo san rë pan tsëhë cha tsëhë partidu fariseo cojo cha ladu rë Herodes.

¹⁶ Sehe ngajan xi cavisiajmicjin cha ngajñi rë cha cuitjin:

—¿Há tsëhë xi tsajin naja pan ne, há tsëhë vëhë xi cuatjin chja me?

¹⁷ Xi camachaya rë Jesús xi veyanangui cha xi tsajin rë cha pan ne, cachja me cojo cha cuitjin:

—¿Mé má cuatjin nújun xi tsajin pan? ¿Há nuhyuun? ¿Há vijñii rcun? ¿Há jemu taja rcun?

¹⁸ Tjin nuju túxcun hacuaaha tjin tyjavañuju. ¿Mé má matsijin nuju? hacuaaha ¿mé má nuhyuun? ¿Há vitsjiin nuju?

¹⁹ Hya xi cavótoho langa hñú pan ngajñi rë xi hñú mil xuta, ¿há cjín chajne sa quitsë cachjayun tsëhë pan xi cavangui jan? —Cuatjin cavinenguise me.

Ngajan xi cafayangui cha ladu rë me ta:

—Tejó.

²⁰ —Hane hya xi cavótoho langa yatu pan jan xi cajnë ñuju mil xuta, ¿ha cjín nisinya sa cavangui?

Ngajan xi cha ladu rë me ne, cuitjin cachja nga cha:

—Yatu.

²¹ Ngajan xi cavinenguise Jesús cojo cha cuitjin:

—¿Há cjëë camahani cuijne rcun cju xi cachjá tsëhë san rë pan?

Jesús ne, sahmi xi cumatsejen rë ngu cha rcá ngajan nandya Betsaida

²² Hya xi camá ne, cavechu barcu tjeheh laguna. Hane xi cavituje me barcu ne, cafehe me nandya xi hmí Betsaida. Xi cafehe me ngajan ne, cafehe nga xuta cojo cha xi rcá. Hane jercu cachja xuta jan cojo Jesús xi cuetahatsja me cha, hane sehe cumatsejen rë cha.

²³ Hya xi camá ne, cafaha me tsja cha hane quijicojo me cha ngajan tjeheh nandya. Xi cafehe me cojo cha ngajan ne, cavëhë natya me tuxcun cha hacuaaha cavetahatsja me tuxcun cha, sehe cavinenguise me cha cuitjin:

—¿Há tsejen ri hitsë quihndë?

²⁴ Xi catsiquijin cha xcun cha cavutsejen cha ne, chja cha ta:

—Vutsejen xuta. Peru sacuaaha tsejen ya, cuatjin tsejen me xi cjui me.

²⁵ Ngajan xi Jesús ne, cavetahatsja nga me tuxcun cha. Sehe casahmi cha nguýë cavutsejen ndaja cha, hane camandaja cha, camatsejen ndaja rë cha. Hane sehe catsingatju me cha cafe cha ndava cha.

²⁶ Hacuaaha cachja me cojo cha cuitjin:

—Xi cavisiiñ ngajñi nandya xi cuinoje cojo xuta jan xcusun xi casahme cojo ri.

Pedru ne, tsinguixi me xi Jesús ne, me vëhë xi Mesías me

²⁷ Hya xi camá ne, cavetju nga Jesús tsëhë ngajan cojo cha ladu rë me ne, quiji me ngujo nandya xi siu tahndee rë nandya xi hmí Cesarea Felipe. Hane ndiya jiya me cojo cha ne, cavinenguise me cha cuitjin:

—¿Mé chja xuta, yo ngahan? —Cuatjin cachja me.

²⁸ Ngajan xi cafayangui cha ladu rë me cuitjin:

—Ngujo me ne, chja me ta ngayun xi cha Juan ngayun, cha xi cavitenda rë xuta. Ngujo nga me ne, chja me ta Elías. Hane ngujo nga me ne, chja me ta ngu profeta xi suacuenda cja rë Nina. —Cuatjin cafayangui cha.

²⁹ Ngajan xi cachja nga Jesús cojo cha ta:

—Hane ngayun ne, ¿mé núnjun? ¿Yo ngahan?

Ngajan xi cha Pedru ne, cuitjin cafayangui cha:

—Ngayun xi tjin cja xi tsingatju nuju Nina. Ngayun xi Cristu.

³⁰ Ngajan xi Jesús ne, cavitexa me cha ta tsajin yo xi cuichja cha cojo tsëhë.

Chja Jesucristu xi cueya me

³¹ Hya xi camá ne, cavetsihin cavicuya me cha tsëhë xi ha ndasa xi Cristu, Quihndi rë Xuta Jain má me ne, peru jemu cjin cjuañihi cuatju me cumá ta tsingatiin xuta changá me, hacuaha tsiquehen xuta changá jan me, peru xi cjuë jyan nixtin ne, cuya nga me cjuahñu.

³² Cja vëhë ne cachja quixi camahani me cojo cha. Ngajan xi cha Pedru ne, quijixin cha cojo Jesús. Sehe cavetsihin cachja cha cojo me xi ¿mé má cuatjin chja me?

³³ Ngajan xi cavuya Jesús cavutsejen me hiscan siu cha ladu rë me. Sehe cachja me cojo cha Pedru cuitjin:

—Tihinxin gaye Satanás, tsëhë xi ningatiintacuín gaye sacuaha tsingatahacacun Nina ta, ningatehetacuín sacuaha ngu xuta.

Hacutjin xi meje rë xi nihña xa cojo cjuahñu naja

³⁴ Ngajan xi Jesús ne, cajindaya me xutacjin jan cojo cha ladu rë me xi cuinduva me hiscan tacun Jesús, sehe cachja me cuitjin:

—Sá xi tjin yo xi meje cuisehen ladu naha ne, meje rë xi nichuvun cjuatacun nuju, hane hacuaha tejñuhñu xahasen nuju xi cuanguncujun ndiya naha handasa xi cueyun xcun cru.

³⁵ Yo ngayun xi mijí cuisuhun ladu naha tsëhë xi rcun xi cueyun ne, cahndë xi ndaja ne, nichujun xahasen nuju. Peru yo ngayun xi ngatsë naha o sá xi ngatsë rë cja rë Nina cueyun ne, hacuín nichujun xahasen nuju ta Nina ne, cuaxëtje me.

³⁶ Mé ndaja cuma nuju xi sacu nuju yëjë xi tjin ngasunhdë, sá xi cueyun hane cuma nuju castigu,

³⁷ ta sá xi cuaxintiin Nina xahasen nuju hya xi cueyun ne, ha quihndë tsajin rqui rë.

³⁸ Yo ngayun xi ma sava nuju ngatsë naha o sá xi ngatsë rë cja naha nguehe xcun xuta tsehen xi manguaaincacun cojo cja rë Nina ne, hacuaha cojo ngahan xi canduvá tsëhë Nina ne, cuma sava ná ngahan ngatsë nuju ngayun, hya xi cuinduvá cojo cjuandajiyi tsëhë nahmi naha ne, hacuaha cojo ángel xi vejña tsëhë Nina cuinduvá cojo.

9

¹ Hacuaha cachja sa Jesús cuitjin:

—Cuichjá quixé cojo nuju ta tecjan yahnga xuta nguehe xi hisca xi scuëë me xi cuitexa jain Nina ne, sehe cueya me.

Cavindeya xcusun rë Jesús

² Xi café jyun nixtin jan ne, quijixin Jesús ngu rcu naxi hnga cojo cha Pedru cojo cha Jacobo cojo cha Juan. Xi cafehe me cojo cha ngajan ne, cavëë cha xi cavindeya xcusun rë me.

³ Tsjian rë me ne, ña seti tsejen, tsëhë xi jercu tu tyava camahani, hisca xi ngu xuta cumaji cuane me xi cuatjin tyava.

⁴ Hya xi camá ne, ha tu ñahñu camatsejen hasen rë Elías cojo hasen rë nima Moisés, tivisiajmi cojo Jesús.

⁵ Ngajan xi cachja cha Pedru cojo Jesús ta:

—Maestro, tu ma rë xi nguehe nechin cojo nuju ne, nihñi jyan puestu: ngu tsujun ne, cojo ngu ngu tsëhë Moisés cojo Elías.

⁶ Cuatjin cachja cha Pedru ta, sacuniyiin rë cha mé sa cuichja cha ta tsëhë xi jercu catsacjun camahani cha camá.

⁷ Hora vëhë ne, canduva ngu yufi casahmi tjahnguen rë. Hane ngajñi rë yufi jan ne, canuhya rë ngujo cja xi cachja cuitjin:

—Cha vihi xi quihndi naha cha. Jercu hmucacun cha. Tinuhyun xi chja cha.

⁸ Xi tu cahndë cha ladu rë Jesús cja vëhë ne, vutsejen nguehe vutsejen ngajan cha, hane suva sa Jesús tacun me xi cavëë cha.

⁹ Xi tu tivitujne me tsëhë rcu naxi jan cojo cha ladu rë me xi quijicojo me jan ne, ngajan xi chja xu me cojo cha ta tsajin yo xi cuichja cha cojo xcusun xi cavëë cha. Xi cuatju cueya Quihndi rë Xuta Jain ne, cuya nga me cjuahñu, sehe hya cuichja cha.

¹⁰ Vëhë xi cavaha cha cja jan cahntsua xahasen rë cha. Ngajñi rë ni cha cojo xicjin cha cavisiajmícin cha ¿mé vijne cja xi cuya nga me cjuahñu?

¹¹ Ngajan xi cavinenguisse cha cojo Jesús cuitjin:

—¿Mé má cuatjin chja maestru tséhé ley xi titjun Elías cuinduva me, sehe cuinduva me xi cuaxétje naja?

¹²⁻¹³ Ngajan xi cafayangui Jesús cuitjin:

—Quixi xi Elías cuinduva me titjun ta, me vèhë cuiyujuchihin me yèjë ni xcusun. Peru ha canduva me, handasa hacuün cojo ñihi rë me ta cojo ñihi rë cha Juan. Hane choho casahmi xuta cojo me sacuatjin chja xujun rë Nina. Hacuaha chja xujun xi cuacun vèhë ta handasa xi Quihndi rë Xuta Jain ngahan ne, hacuanitjin ne jemu jyë cjuañihi cuátju hacuaha tsitjungui xuta ngahan.

Jesús ne, sahmi xi mandaja ngu cha nixti xi jiya ra xitsehen

¹⁴ Xi tu cavuya cafehe Jesús cojo cha xi quijicojo me hiscan siu yahnga cha ladu rë me xi tejó jan ne, cavèë me xi tjercu siu xuta jan cojo ngujo cha maestru tséhé ley siu me visiajmi me cojo cha.

¹⁵ Xi tu cavèë xuta jan xi cafehe Jesús ne, jemu quijircun rë me, vanga sanii me quiji cachja me nina cojo Jesús.

¹⁶ Ngajan xi Jesús ne, cavinenguisse me cojo cha ladu rë me cuitjin:

—¿Mé xi visiajmu cojo xuta xi cuacun vè?

¹⁷ Hane ngajan ngajñi rë xutacjin xi siu jan ne, cavetjujñi ngu me xi cachja me cuitjin:

—Maestro, canduvá cojo quihndi naha, tséhë xi jiya xitsehen cahntsua xahasen rë cha. Hane tséhë vèhë xi sahmi lihmi rë cha.

¹⁸ Hora xi faha xitsehen jan cha ne, ngutjen tsiticjahñu rë cha, hacuaha vaxë natyaxu hntsua cha, hisca tsijanerii nehñu cha jiña cha. Hane ngatsë rë vèhë ne, jemu jima ndaya cha. Hacuaha cachjá cojo cha ladu nuju xi cuaxëxin cha xitsehen tséhë quihndi naha. Peru camaji cavaxëxin cha. —Cuatjin cachja me.

¹⁹ Ngajan xi Jesús ne, cachja me cojo xuta xi siu jan cuitjin:

—¿Mé camá nuju ngayun xi macjaain camahani nuju? ¿Há jyë sa nixtin meje rë xi cuitejña cojo nuju? Nduvun cojo cha nguehe. —Cuatjin cachja me.

²⁰ Hya xi camá ne, cafehe xuta cojo cha hiscan tacun Jesús. Xi tu cavèë xitsehen jan Jesús ne, marcu macjain catsitcja rë cha nixti jan. Hane xi caticja cha ne, cavuya cavindefa cha cafaña cha. Hacuaha cavetju natyaxu hntsua cha.

²¹ Ngajan xi Jesús ne, cavinenguisse me cojo nahmi rë cha cuitjin:

—¿Há tsëë xi cuitjin má rë cha?

Ngajan xi chja nahmi rë cha ta:

—Hisca cjuaquihndi rë cha, cuatjin má rë cha.

²² Jiya hora xi faha xitsehen jan cha ne, tsingatjeya rë cha xcun ndacahi. Tjin nga ne, tsingatjenya rë cha ngajñi nandan, ta meje tsiquehen rë cha. Vèhë xi sá xi tsejen xi ha hyun mé nihñu cojo cha ne, catamayuma nuju ngahan cojo quihndi naha, hane tiseacun nihi.

²³ Ngajan xi cachja Jesús cojo nahmi rë cha ta:

—Há xa vë xi hvë. Sá xi macjain nuju ne, yèjë ni ne, cuma.

²⁴ Ngajan xi nahmi rë cha ne, ngutjen cachja me cuitjin:

—Tatá. Macjain ná. Peru tiseacun ná cojo sa xi cumacjain sa ná.

²⁵ Xi vutsejen Jesús xi jercu tijima tangun xuta ne, cacjan me cojo xitsehen jan. Cuitjin cachja me:

—Ngaye xitsehen loho lihmi, tetjixin tséhë cha vi. Hacuaha ha quihndë cuyiin cuisihin cahntsua xahasen rë cha.

²⁶ Ngajan xi xitsehen jan ne, hisca cajindaya xi catsicuya catsindefa rë cha. Sehe cavetju quiji. Hane cha vèhë ne, jiña cahme cha.

²⁷ Peru Jesús ne, cafaha me tsja cha catsisatjenhnga me cha, hane casecun cha.

²⁸ Hya xi camá ne, quiji Jesús cojo cha ladu rë me, hane cavisehen me cahntsua ndihya. Xi cavisehen me jan ne, sehe ngajan xi chja cha cojo rë me cuitjin:

—¿Mé má ngayin xi camaji canaxinxin xitsehen jan tséhë cahntsua xahasen rë cha vè?

²⁹ Ngajan xi cachja Jesús cojo cha cuitjin:

—Cuatjin camá nuju ta tséhë xi xitsehen xi cuacun vë ne, meje rë xi titjun chjahyan rë Nina hacuaha cuinechan xun rë me, cojo sa xi cuma naxenxen.

Jesús ne, cachja me ta cueya me peru cuya me cjuahñu

³⁰ Hya xi camá ne, sehe cavetju me quiji me taha distrito Galilea. Hacuaha mijí rë me xi cumachaya rë xuta jani taha tsujyihya me ta,

³¹ tséhë xi tivicuya me cha ladu rë me hacutjin cuatju me cumá. Cuitjin cavicuya me:

—Ha ndasa tséhë Nina canduva Quihndi rë Xuta Jain ne, peru cjuaha xuta me ne, tsiquehen me me. Peru xi cjuë xi jyan nixtin ne, cuya nga me cjuahñu.

³² Peru cha ladu rë me ne, vijnii rcu cha tsêhë xi cueya Jesús, hacuaha cuya me cjuahñu. Hacuaha tsacjun cha cuinenguisse cha me cjuajan.

¿Yo xi hitsë sa matitjun?

³³ Hya xi camá ne, cafehe me nandya Capernaum. Hya xi cafehe me jan ne, cavisehen me cahntsua ndihya hisca cuiyuju me. Sehe ngajan xi cavinenguisse me cojo cha ladu rë me mé xi cavisiajmi cha cojo xicjin cha ngajan ndiya.

³⁴ Hane tu jyuu ni caviyuju cha ta xi cavisiajmi cha ndiya jan ne, cuitjin cachja cha:

—¿Jarë ngayaan xi hitsë sa venguichji naja?

³⁵ Hya xi camá ne, quiji Jesús cavéjña me. Sehe ngajan xi cajindaya me yëjë tejó cha ladu rë me jan ne, sehe ngajan xi cachja me cojo cha cuitjin:

—Sá xi tjin ngu yun xi meje nuju xi cumatitjun ngayun ne, meje rë xi hacuiin jemu jyë nihñu jojo nuju hacuaha cuisecon xingun.

³⁶ Hya xi camá ne, cafaha me ngu lihndi, cavejña me cavasencia, hane sehe cavataha me. Hane ngajan xi cachja me cojo cha cuitjin:

³⁷ —Jarë ngayun xi ndaja nihñu cojo ngu lihndi sacuaha vihi xi ngatsë naha ne, sacuaha xi ngahan ndaja nihñu cojo ná. Hacuaha jarë ngayun xi ndaja nihñu cojo ná ne, hacuiin ngahan ni ta, hacuaha cojo Nahmi naha xi catsingatju ná me, cojo me vëhë ndaja nihñu cojo rë me.

Me xi hacuiin condra naja ne, ladu naja má me

³⁸ Ngajan xi cachja cha Juan cojo Jesús cuitjin:

—Maestro, cahyin ngu cha xi tijima tivaxëxin xitsehen tsêhë xahasen rë xuta, hane xi sahmi cha ne, cojo ñihi nuju veyanangui cha. Peru tsêhë xi hacuiin cha ladu naja cha ne, canújin cojo cha ta ha quihndë sahmi cha cuitjin.

³⁹ Ngajan xi Jesús ne, cachja me cuitjin:

—Xi cavichejiin tsêhë cha ta xuta xi cuma sahmi me cjuandaja vëhë, sacuaha xi ngahan jain cavitéxa rë me ne, cumaji xi ngutjen choho cuichja me tsahan.

⁴⁰ Xuta xi hacuiin choho vëë naja me ne, chuya rë me tsajan.

⁴¹ Cuichjá quixë cojo nuju ta yo me xi sua ngu vasu nandá siuhun, tsêhë xi vëë me xi xuta ladu naha ngayun, hacuaha vëë me xi ngahan xi catsingatju ná Nina ne, me vëhë ne, sacu rë me ngu cjuandaja xi sua Nina.

Cjuatsavi xi ticojo rë xi cuixuya ngayaan xcun ngu jyë

⁴² Peru yo xi nduvacojo xcusun xi sahmi xi tsismicacun ngu quihndi ndiya naha ne, hitsë sa ndaja tsêhë xuta vëhë xi xtyangu ngu ndyojo natsi nguisin me sehe ningatjeya rë me ngajñi ndachacun.

⁴³ Hane sá xi cjuatacun nuju meje rë xi nihñu ngu jyë cojo ntsun ne, vengui sa chji rë xi chandunxun ntsun ta, jemu sa ndaja tsujun xi cuma yoho yun xcun Nina, xi cumá rë xi cuechun xcun xitsehen cojo ntsun ngajñi rë ndihi jyë xi tsajin nixtin hvo.

⁴⁴ Ngajan cuinechun, hiscan xi cjuiin nuju cjuañihi ta ndihi ne, tsajin nixtin xi hvo.

⁴⁵ Sá xi cjuatacun nuju meje rë xi nihñu ngu jyë jani xi cuangun ne, vengui sa chji rë xi chandunxun ntsacun ta, jemu sa ndaja cuechun xcun Nina xi yoho yun xi cuma rë xi cuechun xcun xitsehen cojo ntsacun.

⁴⁶ Ngajan xcun xitsehen vëhë ne, cjuiin nuju cjuañihi ta ndihi ne, tsajin nixtin hvo.

⁴⁷ Hacuaha sá xi cjuatacun nuju meje rë xi chutsujun xcusun xi ndajintjin xi chutsujun ne, chuhunxun tuxcun jan chandunxun, ta tsêhë xi hitsë sa ndaja tsujun xi sacu nuju cahndë ngajan hiscan sahmi Nina gubiernu handasa cojo ngu ni tuxcun xi cuma rë xi cojo catsijo tuxcun cuechun xcun ndihi xi sahmi castigu rë nima.

⁴⁸ Ngajan xcun xitsehen ne, ngajan cjuiin nuju cjuañihi ta ndihi ne, tsajin nixtin hvo.

⁴⁹ Hya xi tsichuva Nina ngayëjë ni xuta há ndaja há ndajin casahmi me ne, me xi tsajin mé casahmi ne, Nina ne, jemu chuya rë me. Hya xi Nina cjuahatsja me ngu cjuatjo xi tahan rë me ne, sá xi cojo naxa sehen ndaja ne, jemu chuya rë me.

⁵⁰ Naxa ne, jemu ndaja. Peru sá xi cjuë xtya rë ne, machjiriin. Cjuandaja rë Nina ne, hacuaha jemu ndaja. Vëhë xi chjuhun cjuandaja rë Nina, teyun cahntsua xahasen nuju, hacuaha ndaja tinechun cojo xingun.

10

Jesús ne, fi nga me nandya Nasaret

¹ Hya xi camá ne, cavetju Jesús tsêhë nandya Capernaum quiji me distritu Judea cojo ngunda ndajyë Jordán. Hacuaha jercu cjin nga xuta quijitjengui rë me. Hane sacuaha xcusun xi ha sahmi Jesús ne, cavetsihin cavicuya nga me xuta jan.

² Hya xi camá ne, ngujo cha tsêhê partidu fariseo ne, quiji cha hiscan tacun Jesús. Vinenguisse cha me tsêhê xi ngu xihin, ¿há ndatjin xi tsismi chjuun rê? Cuatjin cachja cha ta tsêhê xi meje cjuahachuva cha me cojo cjuá rê me.

³ Ngajan xi cafayangui me tsêhê cha cuitjin:

—Moisés ne, xutachanga naja ne, ¿mé cavitexa naja me?

⁴ Ngajan xi cafayangui cha tsêhê me cuitjin:

—Moisés ne, casua me cahndê xi ngu xihin ne, cuma cuejña cha ngu xujun tsja chjuun rê cha xi ha quihndê mijí rê cha na. Hane xi cuatjin ne, cuma tsismi cha na.

⁵ Sehe ngajan xi Jesús ne, cachja me cojo cha cuitjin:

—Ngatsê rê cjuataja rê xahasen nuju ne, vêhê xi Moisés ne, casua me cahndê xi cuatjin nihñu.

⁶ Peru hya xi casahmi Nina ngasunhndê ne: “Casahmi me xi chjuun xi xihin xuta.”

⁷ “Vêhê xi ngu xihin ne, cuejña cha nahmi rê cha, hacuaha cuejña cha naa rê cha,

⁸ hane cumatangun cha cojo chjuun rê cha sacuaaha ngu ni xahasen.”

⁹ Ha quihndê hacuiin jo ta sacuaaha xi ngu ni xahasen. Hane tsêhê xi ha Nina cachja me xi cuatjin cuma ngu xahasen me ne, ndajintjin xi xuta ne, tsinguetsuntaha me tsêhê xicjin me. —Cuatjin cachja Jesús.

¹⁰ Ngajan xi hya xi Jesús tacun ndihya me cojo cha ladu rê me ne, cavinenguisse nga cha me ngu ndiya tsêhê cjuavisiajmi vêhê.

¹¹ Ngajan xi cachja me cojo cha cuitjin:

—Yo xi tsismi chjuun rê hane cuixan cojo ngu sa chjuun ne, jemu jyê jyê rê xi cuatjin sahmi.

¹² Hacuaha sá xi ngu chjuun tsismi na xihin rê na hane cuixan na cojo ngu sa xihin ne, hacuaha jemu jyê jyê rê na.

Jesús ne, tsinchacun me langa

¹³ Jinguyêjê rê xi tivisiajmi Jesús cojo cha ladu rê me ne, cavetsihin tjemu canduva xuta cojo quihndi rê me, xi cuisanetsja Jesús nixti jan cojo sa xi sacú rê cjuandaja rê me. Peru cha ladu rê Jesús jan ne, cacjan cha cojo xuta jan ta, xi má rê cha ladu rê me ne, mahyiin rê Jesús.

¹⁴ Hya xi cavêê Jesús xi cuatjin sahmi cha ladu rê me ne, camacjan rê me cojo cha. Ngajan xi cachja me cuitjin:

—Tuhun cahndê catinduva tjengui suva ná nixti. Xi canichuun cahndê xi cuma rê ta, xuta xi sahmi me yojo rê me sacuaaha ngu quihndi ne, xuta vêhê xi sahmi me sacuatjin vitexa Nina.

¹⁵ Cuichjá cojo nuju cjuaquixi ta yo xi meje cuisehen gobiernu rê Nina ne, cuma cuisehen peru sacuaaha ngu quihndi. Sá sahmi cuatjin ne, cumaji cuisehen.

¹⁶ Ngajan xi Jesús ne, cavataha me nixti jan. Hane hora xi cavisanetsja me ne, cachja me cjuandaja rê me cojo.

Ngu cha nchina ne, chja cha cojo Jesús

¹⁷ Hya xi camá ne, cavetju me quiji me jingu sa cahndê. Hane ndiya cjuí me ne, vanga ngu cha cafehe cha cavixcuhnchi cha xcun me xi faharcun cha me. Sehe chja cha cojo me cuitjin:

—Ngayun maestro. Jemu ndaja ngayun. Nújun, ¿mé xi sahme xi cuma sacú ná cjuahñu xatsê? —Cuatjin cachja cha.

¹⁸ Ngajan xi Jesús ne, cafayangui me tsêhê cha cuitjin:

—¿Mé má cuatjin noje xi ndaja ngahan? Tsajin xuta xi ndaja suva ni Nina xi ndaja me.

¹⁹ Ha hye cjuá xi cavitexa Nina: “Xi caniquiin xuta. Xi canihñi chjuun nahñu riji jingu sa chjuun. Hacuiin mé chjehelmi tsêhê xuta. Xi canujiin cjuandesu tsêhê xuta. Xi cavindachiin rê xuta. Chjehercuin nahmi riji hacuaha chjehercuin ná riji.” Vêhê cjuá xi cavitexa Nina.

²⁰ Ngajan xi cachaja cha cojo Jesús ta:

—Maestro, yêjê cjuá vêhê ne, hisca cjuanixti naha ne, ha cahndê.

²¹ Xi cahndê Jesús cjuá rê cha ne, jemu cachuya rê me tsêhê cha. Ngajan xi chja me cojo cha ta:

—Machaja sa ri ngu xcusun. Tjihin ne, titeñi yêjê xi tjín ri hane tujún xi sacú ri ne, tehe rê xuta yuma. Hane sehe ndovetjengui ná. Sá xi nihñi cuatjin ne, xi cjuehe xcun Nina ne, ngajan sacú ri cjuanchina xi ndajyihí.

²² Xi cahndê cha cjuá vêhê ne, jemu choho camá rê cha. Va va má cacun cha, cavetju cha cafe cha ta, tsêhê xi jemu nchina cha.

Jesús ne, chja me tsêhê cjuanchina

²³ Ngajan xi Jesús ne, vutsejen me yějě ni ladu hiscan siu cha ladu rě me ne, sehe cachja me cojo cha cuitjin:

—Jemu chja tsěhě ngu xuta nchina xi cuisehen me ladu rě Nina.

²⁴ Ngajan xi cha ladu rě me ne, jemu quijircun rě cha xi cuatjin cachja me. Ngajan xi cachja nga Jesús cojo cha cuitjin:

—Compañeru, jercu chja tsěhě xuta xi cuisehen me ladu rě Nina.

²⁵ Sacuatjin rě naxin xi cumaji cuatju chu ngojo rě nindu ne, cuatjin rě xuta xi jemu meje rě me cjuanchina ta, cumaji cuisehen me ladu rě Nina.

²⁶ Xi cahndě cha ladu rě me cjua vėhě ne, jemu quijircun camahani rě cha. Ngajan xi cachja cha ngajñi rě cha cojo xicjin cha:

—¿Peru yo ni xi cuma cuetjutje ni?

²⁷ Xi cavuya me vutsejen me hiscan siu cha ne, ngajan xi cachja me cuitjin:

—Yějě ni xi maji sahmi xuta ne, Nina ne, hatuxa ma sahmi me.

²⁸ Ngajan xi cavetsihin cachja cha Pedru cojo Jesús cuitjin:

—Chutsujun ni. Ngayin ne, canismitacuin yějě ni xcusun, hane cavisihin ladu nuju.

²⁹ Ngajan xi cachja Jesús ta:

—Cuichjá quixě cojo nuju ta, tu yo ni xi tsismicacun ndava, tsismicacun hntśě, tsismicacun tichja, tsismicacun naa rě o sá nahmi rě o sá quihndi rě, hacuaha tsismicacun nangui rě xitjě rě ngatsě naha cojo ngatsě rě cjua rě Nina ne, jinguyějě rě xi ngasunhndě vihi tacun me ne,

³⁰ sacú rě me ngu cientu sa quisun tsěhě ngu ngu xcusun xi catsismicacun me. Cjín ndava me sacú rě me. Cjín hntśě me sacú rě me. Cjín tichja me sacú rě me. Cjín naa rě me sacú rě me. Cjín quihndi rě me sacú rě me. Hacuaha cjín nangui rě xitjě rě me sacú rě me. Handasa cojo cjuañihi, peru sacú rě me. Hane hya xi cueya me ne, cuechú me cjuahñu xatsě xcun Nina.

³¹ Tsěhě xuta xi matitjun quihndě ne, jemu cjín me xi cumachjiriin hya xi cuinduva Nina ngasunhndě. Hane xuta xi hacuuiin matitjun quihndě ne, hya ne, cumachji rě me xi cuma titjun me. —Cuatjin cachja me.

Jesús ne, camá jyan ndiya xi chja me xi cueya me

³² Hya xi camá ne, hora xi jya ndiya Jesús cjui me cojo cha ladu rě me nandya Jerusalén ne, titjun Jesús cjui me. Hane cha ladu rě me ne, jercu fircun ra, tsěhě xi tsacjuuin Jesús xi cjui me. Hane xuta xi tjengui cjui cojo me jan ne, hacuaha jemu tsacjun me má. Ngajan xi Jesús ne, cajindaya nga me cha ladu rě me xi tejó ni jan, sehe cavetsihin cachja me cojo cha xcusun xi ha tacun xati xi cuatju me cuma.

³³ Cuitjin cachja me:

—Tinuhyun ni, tivanguen nandya Jerusalén. Hane ngajan ne, tjin yo me xi cuiteña ná ngajan cojo nahmi xi matitjun cojo cha maestru tsěhě ley. Cuatjin sahmi me ha ndasa xi ngahan xi Quihndi rě Xuta Jain. Hane xuta xi cuacun vė cuichja me xi cueya ngahan, hacuaha sua nga me ngahan cojo xuta rě jingu sa nandya.

³⁴ Sehe tsixcuehyu me ngahan. Cuěhěnatya me ngahan, cuaja me ngahan, hisca tsiquehen me ngahan. Peru xi cjuě jyan nixtin ne, cúa nga cjuahñu.

Santiago cojo Juan ne, fehya me Jesús ngu cjuandaja

³⁵ Xi cajnetaha cachja Jesús cuatjin ne, sehe quiji cha Jacobo cojo cha Juan, quihndi rě Zebedeo, quiji tjengui tiña cha Jesús. Ngajan xi chja cha cojo rě me cuitjin:

—Maestro. Nihñu favor ne, cjua xi chjahyin nuju ne, ningatuhun niiji.

³⁶ Ngajan xi cachja me cojo cha cuitjin:

—¿Mé xi meje nuju xi sahme ni?

³⁷ Ngajan xi chja cha cojo rě me cuitjin:

—Tuhun cahndě xi ngu ngu ngayin ne, cuinechintihin ngu ngu ladu tjehe nuju, hya xi nihñu gobiernu nuju.

³⁸ Ngajan xi cachja Jesús cojo cha cuitjin:

—Ngayun ne, hyuun mé xi chahyun. ¿Há scaa nuju cuatju cjuañihi xi cuátju ngahan ni?

³⁹ Ngajan xi cachja cha ta:

—Scaa niiji.

Ngajan xi cachja nga Jesús cojo cha cuitjin:

—Cjuañihi xi cuatju ngahan cumá ne, hacuaha cojo ngayun cuatjun cumá.

⁴⁰ Peru xi cuinechuntuhun ngu ngu ladu tjehe naha ne, hacuuiin ngahan cuichjá ta xcusun vėhě ne, sacú rě xuta xi cuichja Nina xi sacú rě me cahndě.

⁴¹ Xi cahndě cha xi tē jan cjua xi cachja Jesús ne, cavetsihin camacjan rě cha cojo cha Jacobo cojo cha Juan.

⁴² Hya xi camá ne, cajindaya Jesús cha xi tē jan ne, cachja me cojo cha cuitjin:

—Ngayun ne, ha hyun ta xuta matitjun nguehe ngasunhndé jemu sahmi yehe me yojo ré me, ta jercu meje cuitexa me.

⁴³ Peru hacuiin cojo ngayun cuatjin nihñu ngajñi nuju ta xi meje ré ne, jaré ngayun xi meje nuju xi cumatitjun ngayun ne, nihñu xa ré xingun sacuahha mosu.

⁴⁴ Hane jaré ngayun xi meje nuju xi xingun ne, cjuaharcun me yun ne, nihñu xa ré xingun sacuahha mosu xi caxteña.

⁴⁵ Hisca ngahan ne, Quihndi ré Xuta Jain má ngahan, peru hacuiin canduvé xi xuta cuisecoo ná me ta ngahan cuisecoo ré xuta. Hisca tsingatehen xi tsiquehen ná xuta, cojo sa xi cjín xuta cuaxêtje Nina me. —Cuatjin cachja Jesús.

Jesús ne, sahmi me xi cuma scutsejen cha rcá xi hmí ré Bartimeo

⁴⁶ Hya xi camá ne, cjui cjui me cojo cha ladu ré me ne, cavechu me nandya Jericó. Xi cavatju me tséhé nandya vèhé cojo xutacjin xi ticojo me ne, cavechutaha me cha quihndi ré Timeu, cha xi hmí ré Bartimeo, ngu cha rcá, hane tifehya cha caridad tjehe ndiya.

⁴⁷ Xi cahndé cha rcá jan xi Jesús tséhé nandya Nasaret hacui me xi nduva me, jercu cachja cha:

—Jesús, quihndindaicjin ré David, catamayuma nuju ngahan.

⁴⁸ Hane cavisiajmicjan xuta jan cojo cha ta, catisejyu cha. Peru hitsé sa hñu chja cha cuitjin:

—Quihndindaicjin ré David, catamayuma nuju ngahan.

⁴⁹ Ngajan xi casecunhñu Jesús. Sehe ngajan xi chja me cojo cha ladu ré me cuitjin:

—Chjindayun ré cha.

Hya xi camá ne, cha ladu ré me jan ne, cajindaya cha cha rcá jan, sehe cachja cha cojo cha cuitjin:

—Tehe cjuetacun xahasen riji quen. Tisatjinhgue ta, jindaya me ngaye.

⁵⁰ Cuatjin camá xi cafaha cha tsjanga ré cha catsingatjenxin cha. Sehe marcu macjain casecun cha. Sehe quijitjengui cha Jesús.

⁵¹ Hane xi cavechutaha cha me ne, ngajan xi cachja me cojo cha cuitjin:

—¿Mé xi meje ri xi sahmi cojo ri?

Ngajan xi cachja cha rcá jan ta:

—Maestro, xi meje ná ne, xi cuma tsejen ná.

⁵² Ngajan xi cachja Jesús cojo cha cuitjin:

—Ndatjin. Cuma cjuihin ta, camandaja ye, tséhé xi camacjain ri ngahan.

Hane ha hora vèhé ni ne, camatsejen ré cha. Hane quiji cha cojo ré me hacutjin cjui me.

11

Tivisehen Jesús nandya Jerusalén

¹ Hane xi camatiña me Jerusalén xi ha cjuaha me nandya Betfajé cojo Betania, quiji me ndetjun xi hmí ré Ndetjun Olivu, ngu ndetjun xi tiña tacun cojo nandya xi cuacun vèhé ne, catsingatju me jo cha ladu ré me quiji cha tixa.

² Cuatjin cachja me cojo cha:

—Tangun nandya xi tsejen vè. Hane xi tu cjuhun tjehe nandya ne, sacú nuju ngu burru xatsé xi hisca ngu cjéë cuijin ré chu, quitahahñu chu ngajan. Hane chundecjun chu, sehe nduvuncujun chu.

³ Sá xi yo xi cuichja cojo nuju ta: “¿Mé má cuatjin chundecjun chu ne?” cuitjin tinújun: “Me xi matitjun tsijin meje ré me chu. Peru sehe tsicuya nga me chu.” —Cuatjin cachja Jesús cojo cha.

⁴ Hya xi camá ne, quiji cha tixa xi cachja Jesús cojo cha. Xi tu cafehe cha ngajan ne, casacu ré cha ngu chu burru xatsé quitahahñu chu ngajan ndiya tiña tingotjo ndihya. Hane cavundecja cha chu.

⁵ Hane ngujo cha xi hinchacun jan ne, cachja cha cojo cha ladu ré Jesús cuitjin:

—¿Mé má cuatjin cachundecjun chu burru vé?

⁶ Ngajan xi cachja cha ladu ré Jesús hacutjin cachja me cojo cha. Sehe cha xi cuacun jan ne, casua cha cahndé quijicojo cha cha ladu ré Jesús chu burru jan.

⁷ Hane sehe quijicojo cha chu hiscan tacun Jesús. Hacuaha casua cha tsjian ré cha casesun ngaxtun chu sehe camiji me chu.

⁸ Hya xi camá ne, jemu cjín xuta xi cacandi me tsjian xcun ré me ndiya hacutjin cjui Jesús. Hane ngujo nga me ne quiji cavotohosun me xca xcuen ngajan nguijña, hane hacuaha cacandi me ndiya hacutjin cjui Jesús cojo sa xi tifaharcun me me.

⁹ Hane yjé me xi cjui titjun cojo yjé me xi tjengui jan ne, cavetsihin jercu cajindaya me cachja me:

—Nacuechji ré Nina ta cafehe me xi catsingatju Nina.

¹⁰ Catsinchacun me me xi cuitexa naja sacuaaha caviteza David xutachanga naja. Jemu catsinchacun Nina me xi nduva tsêhê xi Nina catsingatju rê me. —Cuatjin cajindaya xuta.

¹¹ Xi tu cavisehen me nandya Jerusalén ne, quiji me yungun xi matitjun. Xi tu cavutsejen nguehe cavutsejen ngajan me ne, mé ta quiji hora ne, cavetju nga me cojo cha ladu rê me xi tejó jan ne, cavuya cafehe nga me nandya Betania.

¹² Xi camá nchujun jan ne, cavuya cavetju nga Jesús tsêhê nandya Betania. Hane ha jemu vojo rê me hora xi cavetju me.

¹³ Hya xi camá ne, tsêhê cjin ni cavêê me ngu yaxujun xi chine tú rê xi jemu ndaja tsejen yaha xca rê. Hane quiji me hiscan secun, sá sacu sinê me. Peru xi cafehe me ngajan ne, tsajin camahani mé xi casacu rê me, tsêhê xi hacuini nixtin rê tuhaxi jan.

¹⁴ Ngajan xi cachja me cojo ya jan cuitjin:

—Quihndê tsajin nixtin xi cuaqui tú riji xi sinê xuta.

Hane cha ladu rê me ne, cahndê cha cjua rê me.

Cavaxê Jesús xuta xi sahmi ndatsin ngajan yungun xi matitjun

¹⁵ Hya xi camá ne, cafehe me nandya Jerusalén. Xi cafehe me ngajan ne, quiji me ndatsen yungun xi matitjun jan. Hane cavetsihin cavaxê me xuta xi sahmi ndatsin ngajan. Catsindefa me maxê rê xuta xi tsindeya tujún. Hacuaha cacandi me siya rê xuta xi viteña nisê tyava.

¹⁶ Hane casuaain me cahndê xi tjin mé xi cjuaha xuta xi cuatjuvasen me ndatsen yungun jan.

¹⁷ Sehe cavetsihin cavicuya me xuta jan cuitjin:

—Ngayujun ni ne, ha hyun xi cuitjin cachja Nina xcun xujun rê me: “Ndyá naha ne, ngu ndihya xi vinduva xuta tsêhê yêjê ni nandya cuisiajmi me cojo ná.” Peru ngayun ne, tiniñu ndava Nina vi sacuaaha ndava chêjê. —Cuatjin cachja Jesús.

¹⁸ Hya xi camá ne, xi cahndê nahmi xi matitjun cojo maestru tsêhê ley cjua jan ne, cavetsihin cavangui me chuva rê xi cuma tsiquehen me Jesús. Cuatjin meje rê me tsêhê cjuaxin xi tjin rê me, tsêhê xi yêjê xuta ne, jemu quijircun rê hacutjin cavicuya Jesús.

¹⁹ Xi quiji hora ne, cavetju nga Jesús tsêhê nandya jan cojo cha ladu rê me.

Caxi ya xujun xi cama cjan rê Jesús cojo

²⁰ Hane xi camá nchujun jan ne, cavuya cafe nga me nandya Jerusalén. Hane xi cavatju nga me hiscan secun ya xujun jan ne, cavêê me xi ya xujun jan ne, café caxi hisca rcu hisca ntsacu.

²¹ Ngajan xi cha Pedru ne, catsingutsjen cha cjua xi cachja Jesús cojo ya jan nguñña ne, sehe ngajan xi cachja cha cojo Jesús cuitjin:

—Maestro. Chutsujun ta ya xujun xi canújuncjun cojo jan ne, café caxi.

²² Ngajan xi cafayangui Jesús tsêhê cha cuitjin:

—Catamacjain nuju tsêhê Nina.

²³ Cuichjá cojo nuju ngu cjuaquixi ta tu yo ni xi cuichja cojo naxi vêhê cuitjin: “Tihinxin tsêhê nguehe, tihin tisihin ngajñi ndachacun”, sá xi hacuini majo cacun, sá xi macjain jain rê hacutjin xi cachja ne, cuatjin jain cuma.

²⁴ Vêhê xi chjá cojo nuju ta yêjê ni xi chjahyun cojo Nina ne, ningatuhuntacun sacuaaha xi ha casacu nuju ta xi cuatjin ne, sacu jain nuju.

²⁵ Hora xi chjahyun rê Nina ne, sá xi tjin yo xi choho cachja tsujun, o sá xi choho casahmi tsujun ne, ninchatuhun rê, cojo sa xi Nahmi naja xi tacun ngahnga ne, hacuaaha tsinchataha nuju me tsêhê jyê nuju ta,

²⁶ sá xi ninchatuun rê me ne, Nahmi naja xi tacun ngahnga ne, hacuaaha tsinchataain nuju me. —Cuatjin cachja me.

Finenguisen xuta ¿yo casuaxa rê Jesús?

²⁷ Cjui cjui me ne, cafehe me nandya Jerusalén. Hane xi cafehe me jan ne, quiji me yungun xi matitjun. Hora xi tsujyihya me ndatsen yungun jan ne, nahmi xi matitjun cojo maestru tsêhê ley cojo sa xuta changá xi yahnga jan ne, cafehe tjengui me Jesús.

²⁸ Hane cuitjin cavinenguisse me:

—¿Yo caviteza ri xi cuatjin nihñi xcusun vê? ¿Yo casuaxa ri?

²⁹ Ngajan xi Jesús ne, cachja me cojo xuta jan cuitjin:

—Cjuinenguêsê nuju ngu cjua. Hane sá xi nicuyun tsahan ne, sehe cuichjá cojo nuju yo caviteza ná xi sahme xcusun vêhê.

³⁰ Ngayun mé nújun, ¿Yo xi caviteza rê cha Juan xi cavitenda cha xuta? ¿Há Nina caviteza me cha ne, há xuta caviteza me cha? Tinújun cojo ná.

³¹ Ngajan xi vetsihin visiajmi xuta jan ngajñi rê me cojo xicjin me cuitjin:

—Sá xi cuinújan xi Nina cavitexa me ne, cuichja me vihi cojo naja cuitjin: “Sá xi cuatjin ne, ¿mé má camacjaain nuju xi cachja cha ni?”

³² Peru ¿há cuma cuinújan xi xuta cavitexa me cha?

Cuatjin casacuiniyin rē xuta xi cuacun vē mé cja xi tsicuya me tsēhē Jesús ta, tsēhē xi tsacjun me xutacjín, tsēhē xi yējē ni xuta jan ne, macjain rē me xi cha Juan ne, Nina cavitexa jain me cha xi suacuenda cha cja rē Nina.

³³ Vēhē xi hya xi cafayangui me tsēhē Jesús ne, cachja me cuitjin:

—Hyiin.

Ngajan xi hacuaha Jesús ne, cachja me ta:

—Sá xi cuatjin ne, ta mijí nicuyun cja tsahan ne, hacuaha cuichjaain cojo nuju yo cavitexa ná xi sahme xcusun vihi.

12

Ejemplu tsēhē cha mosu xi choho cjuatacun rē

¹ Sehe cavetsihin cavicuya Jesús xuta jan ngujo cja, peru cojo suva ejemplu cachja me. Cuitjin cavetsihin me cja:

—Cuejñaa xi ngu xihin ne, catsitjē me nahñu rē uva ngu rquí nangui. Hacuaha casahmi me hnhua xondyojo rē tahndee rē xitjē jan. Ha ngajan ne ne, cafahanguiya me ngu ndyojotē hiscan cuaxē nandá rē tuhaxi jan. Hacuaha casahmi me ngu cahndē hiscan xi cavesun me ngu nachan ngahnga xi sesun xuta xi sahmi cuidadu xitjē rē me.

Hya xi camá ne, casuatsja me cojo jingu sa xuta xi sahmi cha cuidadu rē, hane cjuaha me tsē tsē cojo rē cha. Sehe cavetju me quiji me ngu nanguicjin.

² Xi cavechú nixtin tsēhē tutjē jan ne, catsingatju me xi tsēhē jan ngu mosu hiscan xi quitaha xitjē rē me, xi cjuahatsja cha tsēhē xi satē rē me.

³ Hya xi camá ne, xi cavechu cha mosu jan ne, cavaja xuta xi tacun tsja xitjē jan cha mosu jan. Hane catsicuya cha cha café cha.

⁴ Ngajan xi me xi tsēhē jan ne, cavuya catsingatju nga me ngu mosu quiji. Hane xi cavechu mosu vēhē ngajan ne, me xi siutaha jan ne, cavanguihmu me rcu cha, hacuaha choho cachja me cojo cha.

⁵ Cafē ne, me xi tsēhē jan ne, cavuya catsingatju nga me ngu mosu. Peru mosu jan ne, catsiquehen me xi cuacun jan cha. Cafē vēhē ne, catsingatju camaha sa cha mosu. Hane ngujo mosu jan ne, tu cavaja ni cha. Hane ngujo nga ne, catsiquehen camahani cha.

⁶ Quihndē me xi tsēhē cahndē jan ne, ngu ni quihndi tjín rē me ne, vēhē sa tacun. Handasa jemu hmucacun me cha ne, peru catsingatju me cha, tsēhē xi cuitjin catsingata-haacun me: “Quihndi naha vi ne, cjuaharcun me cha.”

⁷ Peru xi cafehe cha quihndi rē me ngajan ne, ngajan xi chja xuta xi sahmi cuidadu xitjē jan cojo xicjin me ta: “Cha vihi quihndi xi cjuahatsja cha cahndē vihi. Quihndē ne, niqnen cha, cojo sa xi cumá tsajan nangui.”

⁸ Hya xi camá ne, cafaha me cha catsiquehen me cha, sehe catsingatjexin me cha tsēhē cahndē jan. Cuatjin casahmi me xi cuacun vē.

⁹ Hindē ne, me xi tsēhē nangui jan ne, ¿mé sahmi me cojo xuta xi siutaha cuidadu rē xitjē jan? Hatuxa cje me ne, tsiquehen me me, hane sua me cahndē jan cojo jingu sa xuta.

¹⁰ Quihndē, ngayun ne, ha chutayuun cja tsēhē xujun rē Nina xi chja cuitjin:

Ndyojo xi chja cha chjinevexo xi machjiriin ne,

ndyojo vēhē xi cachja Nina xi cuejña tjun tjun yuju rē xihndēnaña.

¹¹ Cuatjin casahmi Nina xi cumá hacuaha jemu chuya rē xahasen naja xi cuatjin camá.

¹² Hya xi camá ne, xuta changá xi cafehe tjengui rē Jesús jan ne, meje cjuaha me me, tsēhē xi camachaya rē me xi condra rē me xi cachja Jesús. Ha ndasa meje cjuaha xuta changá jan Jesús ne, peru xi tsacjun me tsēhē xutacjín jan ne, ha quihndē tsajin mé casahmi me, hane café me.

Cjuacjintacun tsēhē tujúnsa

¹³ Hya xi camá ne, xuta changá xi cuacun jan ne, catsingatju me ngujo cha tsēhē partidu fariseo cojo ngujo cha ladu rē Herodes xi cjuahangahma cha Jesús, cojo sa xi xuta changá jan ne, cuma cuinchajyē me me. Xi tu cafehe cha ne, ngajan xi cachja cha cojo rē me ta:

¹⁴ —Maestro. Ngayin ne, hyin ta ngayun ne, quixi cja tsujun. Ha tuxa cjuaquixi xi nújun ha ndasa xi cojo xuta nchina visiajmu o sá cojo xuta yuma. Tu yo ni ne tangun ni visiajmu cojo ta tsēhē xi ngayun ne, vicuyun ndiya rē Nina cojo cjuaquixi camahani. Quihndē ne, sacuaha ley rē Moisés ne, ¿há sua cahndē xi cuechjen tujúnsa naja cojo César, me xi matitjun, o há suaain cahndē? —Cuatjin cavinenguise cha.

¹⁵ Peru Jesús ne, tsēhē xi ha vacun rē me xi jemu ndacha cha ne, cuitjin xu cachja me cojo cha:

—¿Mé má cuatjin meje chuhunchuvun ná? Nduvuncujun ngu tujún scutséjen.

¹⁶ Hya xi camá ne, cha xi cuacun jan ne, canduvacojo cha ngu tujún tyava. Ngajan xi cachja me cojo cha cuitjin:

—¿Yo xcusun rê hacuaha yo ñihi rê xi quitahá xcun tujún vë? —Cuatjin cavinenguisse Jesús.

Ngajan xi chja cha cojo rê me cuitjin:

—Tsëhë César. —Chja xu cha.

¹⁷ Sehe ngajan xi Jesús ne, cuitjin xu cachja me cojo cha:

—Sá xi cuatjin ne, tuhun rê César xi tsëhë me; hane tuhun rê Nina xi tsëhë me. —Cuatjin cachja Jesús.

Hya xi camá ne, jemu quijircun rê cha xi cuatjin ndaja cachja Jesús.

Cjua chjinenguisse hacutjin cumá xi cuya cjuahñu

¹⁸ Hacuaha canduva tjengui rê me ngujo cha tsëhë partidu saduceo, cha xi vicuya ngu cjuachacun xi chja xi hya xi cueyan ne, ha quihndë cuyaaïn cjuahñu naja. Hane cuitjin cachja cha ngujo cjuaco Jesús:

¹⁹ —Maestro. Moisés ne, catsihindu me xcun xujun rê Nina xi sá xi ngu xihin cueya, hane tsajin rê chjuun rê hisca ngu quihndi ne, hntsë nima vëhë ne, meje rê xi cjuaha rê chjuun cahan vëhë, cojo sa xi sacú rê na quihndi xi cuma sacuaha quihndi rê nima vëhë.

²⁰ Quihndë ne, cuejña xi ngu ndihya ne, siu yatu cha cojo hntsë cha. Hane cha tjun ne, cafaha cha chjuun. Peru cahme cha, hane chjuun rê cha vëhë ne, casacuiïn rê na hisca ngu quihndi cojo cha.

²¹ Hya xi camá ne, hntsë nima vëhë, cha xi majo ne, cafaha cha na cahan vëhë camá chjuun rê cha na, peru hacuaha cahme cha hane casacuiïn rê na quihndi. Hacuanitjin ni cafaha cha xi majan jan na,

²² hisca xi café yëjë xi yatu cha cafaha cha na. Peru yëjë cha xi cuacun vëhë ne, café cha cahme cha chuya ngu chuya ngu cha. Hane na vëhë ne, casacuiïn rê na hisca ngu quihndi cojo cha xi cuacun vëhë. Hiscan xi cajnetaha ne, hacuaha cahme na.

²³ Quihndë ne, ¿mé núnjun? Hya xi cuya yëjë nima cjuahñu ne, ¿jarë jain cha xi chjuun rê cha na xi cjuaquixi? ta yëjë xi yatu cha ne, cavixan cha cojo rê na. —Cuatjin cavinenguisse cha.

²⁴ Ngajan xi cachja Jesús cojo cha cuitjin:

—Ngayun ne, cuaaintjin xi núnjun, tsëhë xi vijniï rcun cjuaco xi chja xujun rê Nina, hacuaha hyuun xi Nina ne, jemu hñu cjuatacun rê me.

²⁵ Hya xi cuya cjuahñu rê nima ne, ha quihndë hacuiïn cuixan me hacuaha hacuiïn tsinguxan me, ta tangun cumá sacuaha xi siu ángel ngahnga ne, cuatjin cuiyuju me.

²⁶ Hacuaha quihndë xi tinúnjan tsëhë nima xi cuya cjuahñu rê ne, ngayun ne, sacuaha xi cjëë chutayun xujun xi catsihindu Moisés hacutjin cahndë me cjuaco rê Nina xi cavetju tsëhë cahntsua ngu ya lihndi xi seti. Cuitjin cachja Nina cojo me hya: “Ngahan xi Nina rê Abraham ngahan. Nina rê Isaac, hacuaha cojo Nina rê Jacobo má ngahan.” Cuatjin cachja Nina tsëhë xuta xi ha cahme me.

²⁷ Peru Nina ne, hacuiïn nina rê nima ta nina rê xuta xi quicun me. Hane sá xi quicun nima jan, ngajan tsejen xi cjuachacun xi núnjun ne, quixiïn.

Artículo tsëhë ley xi hitsë sa venguichji rê

²⁸ Hacuaha cafehe ngu cha maestru tsëhë ley hiscan tacun Jesús. Hane xi cahndë cha cjuavisajmi rê me ne, xi ndaja cama catsicuya Jesús, ngajan xi cavinenguisse cha me cuitjin:

—Maestro, tsëhë yëjë ni cjuaco xi cavitexa Nina naja xcun xujun ley ne, ¿jarë artículo xi hitsë sa matitjun?

²⁹ Ngajan xi cafayangui Jesús cuitjin:

—Xi matitjun ne, cuitjin chja: “Ngayujun ni ngayun xuta ladu rê nangui Israel, Nina naja ne, ngu tu tu ni me.

³⁰ Meje rê xi nihña hmutacun Nina, me xi matitjun tsajan, cojo ngayëjë ni cjuatacun naja, cojo ngayëjë ni xahasen naja, hacuaha cojo ngayëjë ni ngahñu naja.”

³¹ Hane xi má jo ne hacu vihi: “Meje rê xi nihña hmutacun xingueen sacuatjin hmutacun suvaan yojo naja.” Tsëhë yëjë ni artículo xi cavitexa Nina ne, jo ni cjuatacun vëhë xi matitjun. —Cuatjin cachja Jesús.

³² Ngajan xi cachja cha maestru tsëhë ley cojo rê me cuitjin:

—Ndatjin canújun, maestro. Canújun cjuaquixi ta Nina naja ne, ngu tu tu ni me.

³³ Hacuaha ndatjin canújun xi meje rê xi nihña hmutacun Nina cojo ngayëjë ni cjuatacun naja, cojo ngayëjë ni ngahñu naja, hacuaha meje rê xi nihña hmutacun xingueen sacuaha nihña hmutacun yojo naja suvaan. Cjua vëhë ne, tjercu venguichji rê. Hisca vengui sa chji rê xi cuma rê yëjë ni cjuandaja cojo yëjë cjuatjo xi cjuaco xcun Nina.

³⁴ Xi tu cahndë Jesús ta ndatjin cafayangui cha maestru jan ne, ngajan xi cachja me cojo cha cuitjin:

—Ha jemu hitsë sa chaja xi cuisuhun ladu rë Nina.

Ha quihndë tsajin yo xi macacun sa cjuinenguise rë me ngu cjua.

¿Yo tjë rë má me xi hmi rë Mesías?

³⁵ Ngajan xi Jesús ne, hora xi tivicuya me xuta ngajan yungun xi matitjun ne, cachja me cojo xuta cuitjin:

—Maestru tséhë ley ne, chja cha ta Cristu, me xi tsingatju Nina xi cumatitjun tsajan ne, tjë rë David má me.

³⁶ Peru suva David ne, catsihindu me cjua xi cachja Hasen rë Nina cojo rë me cuitjin: Nina ne, cachja me cojo Nai naha cuitjin:

“Tinechin ladu quixi naha

hiscan hya xi yëjë xi sahmi condra ne, cuiyuju ngahan ngahma gobiernu riji.”

³⁷ Ndatjin, sá xi cuatjin cachja David tséhë me ne, ¿há cuma xi hisca tjë rë David má me ni, hacuaha matitjun nga me tséhë David ni? —Cuatjin cachja Jesús.

Hane xutacjin ne, jemu cojo cjuasua cavisihuju me cjua rë Jesús.

³⁸ Hacuaha cuatjin cachja nga me ngu ndiya xi tivicuya me xuta:

—Tjin nuju cuidadu. Hacuini cojo ngayun nihñu sacuatjin sahmi cha maestru tséhë ley. Cha xi cuacun vëhë ne, jemu meje tsuyihiya chacun cha hacuaha meje rë cha xi cuichja xuta nina cojo cha ngajñi ndetsin.

³⁹ Hacuaha hora xi fi cha yungun ne, cjue cha cuiyuju cha ngu cahndë ndatjin hiscan viyuju xuta xi matitjun. Ha cuanitjin ni hiscan xi cjue sinë cha ngu ndava suhi ne, fi cha viyuju cha cahndë ndatjin hiscan viyuju xuta xi matitjun.

⁴⁰ Hacuaha yachjin cahan ne, jemu cjin tujún vaxë cha na. Hisca ndava na tsajin. Hane hisca xi chjayuma cha ne, jemu nduju hora chja cha, peru hacuini nguñaja cacun cha chja cha. Vëhë xi cha xi cuacun vë ne, hitsë sa jyë castigu cuatjun cha, xi cuma rë jingu sa xuta.

Tujún chjë rë na cahan

⁴¹ Sehe quiji cavéjña me tiña hiscan xi tacun caxa xi xincha tujún chjë rë Nina, vutsejen me hacutjin vincha xuta tujún. Hane jemu cjin xuta nchina quiji cavincha me chjë rë, jercu cjin tujún cavincha me.

⁴² Hya xi camá ne, cojo ngu na cahan xi jemu yuma camahani quiji cavincha na jo tujún sinë xi jemu chuva chji rë cahntsua caxa jan.

⁴³ Ngajan xi Jesús ne, casahmitangun me cha ladu rë me, sehe cachja me cojo cha cuitjin: —Cuichjá cojo nuju cjuaquixi ta xuma chjuun cahan vihi ne, hitsë sa vengu chji rë tujún xi cavincha na, xi cumá rë tujún xi jemu cjin cavincha cha nchina jan ta,

⁴⁴ tséhë xi cha xi cuacun vëhë ne, xi vangui rë cha ne, vëhë xi cavincha cha. Hane ha ndaja na vëhë ne, cojo cjuayuma xi tacun na ne, tujún xi cavincha na jan ne, ha vëhë yëjë ni xi tjin rë na. —Cuatjin cachja Jesús.

13

Jesús ne, chja me ta yungun xi matitjun ne, cuetsunya

¹ Hya xi camá ne, hora xi tivetju Jesús tséhë ndatsen yungun xi matitjun jan cojo cha ladu rë me ne, ngajan xi chja nga cha ladu rë me jan cojo rë me cuitjin:

—Maestro, chutsujun ndyojo xi texo yungun vihi ta tjercu tu ndacun camahani. Hacuaha ndihya tséhë ne, jercu tu cun camahani.

² Ngajan xi chja Jesús cojo cha cuitjin:

—Sacuaha ndihya ndacun xi chutsujun ne, cuechu nixtin xi hisca xi ngu ndyojo vi ne, tsajin hinchasuncoo xicjin ta, cjuë yëjë cuixujne.

Hacutjin cumá hya xi cjuë ngasunhdë

³ Cafë cachja me cuitjin ne, sehe cavetju me quiji me cojo cha ladu rë me, cafehe me tiña rcu Naxi Olivu, quixi rë tingotjo yungun xi matitjun jan. Hane xi quijixin me cojo cha Pedru cojo cha Jacobo cojo cha Juan cojo cha Andrés, sehe cavinenguise cha me cuitjin:

⁴ —¿Janihya cuetjucaa xcusun vëhë xi canújun?

⁵ Ngajan xi cachja Jesús cojo cha cuitjin:

—Nechun cuidadu cojo sa xi hacuini cuma ndacha ngayun ta,

⁶ tséhë xi jemu cjin xuta cjuehe me xi cuichja me cueyanangui me ñihi naha cuichja me xi hacu me xi Cristu me. Hane cuatjin jemu cjin xuta cumacjain rë me cjuandacha rë me xi cuacun vë.

⁷ Hacuaha hya xi cumachaya nuju cjuaxi jemu yehe si tijima ne o sá xi tjin cjuacjintacun ta jemu yehe si nduva ne, hacuiin cumacjintacun ta ha tuxa cuatjin cuma. Peru hacuiin ha hya cjué nixtin rê ngasunhndé vihi.

⁸ Xuta nandya scaan cojo xuta xi hacjahi. Ngu nación cojo ngu nga ne, scaan. Hacuaha cjin cahndé xi cjuani nangui. Hacuaha cjin cahndé ne, cuma jindya. Cuatjin cumá xi cuetsihin cjuañihi xi cuatju xuta.

⁹ Nechun cuidadu ta, cuechu nixtin xi xuta nandya ne, cjue cani nuju me xcun xutaxa rê yungun ne, hacuaha cuaja nuju me. Hacuaha tjin nuju xi cuangun xcun xutaxa rê ndihyavasen cojo xcun gobernador ngatsé rê xi macjain nuju ngahan. Hane ngajan ninguixun yějé cjuaxi hacutjin cavicuyá nuju.

¹⁰ Peru chaja sa xi cjué ngasunhndé ne, meje rê xi cuichja xuta ladu naha cjuaxi rê Nina jingujyé ni nandya tséhé ngasunhndé.

¹¹ Hora xi cjuí chani nuju xcun xutaxa rê ne, hacuiin cumacjintacun tséhé cjuaxi cuinújun jan ta, Hasen rê Nina ne, scuxaha cjuatacun nuju hora véhé hacutjin cuinújun. Hacuaha véhé ni cuinújun ta tséhé xi hacuiin cjuatacun nuju xi cuinújun ta cjuatacun rê Nina xi sua nuju Hasen rê Nina.

¹² Xuta nandya ne, cuinchajyé me hntsé me, cuinchajyé me xutacha rê me, hacuaha cuinchajyé me quihndi rê me, cojo sa xi xutaxa rê ne, cjuaha me xuta xi cuacun vè ne, tsiquehen me.

¹³ Hane yějé xuta ne, choho scuéé nuju me ngatsé naha. Peru jaré ngayun xi scaa nuju cojo cjuacjintacun véhé hisca xi cueyun ne, cuechun xcun Nina. —Cuatjin cachja Jesús.

Cjuacjintacun jyé xi cuma

¹⁴ Yo xi scutaya cjuaxi sehe nduva vi ne, meje rê xi ndaja catetaharcun. Tjin xcusun xi tsinguetsun rê cahntsua yungun xi matitjun. Hane hya xi cjuéhe ngu xcusun xi cuacun vè hiscan xi ndajintjin xi cjuéhe ne, yějé ni xuta xi siu ladu tséhé distritu Judea nixtin hya ne, ngutjen ni catangahma me hiscan ndetjun.

¹⁵ Hacuaha jaré me xi hinchasun rcu ndava xi cuitujne me, hacuiin cuijne me xi cuisehen me cahntsua ndihya cjuaha me mé tséhé me xi cjuaha me.

¹⁶ Hacuaha yo xi hinchataha me nguijña ne, mijí rê xi cuya cjue me ndava me xi cjuējaha ndastu tsjanga rê.

¹⁷ Jemu chojyihí tséhé yějé ni yachjin xi hinchahma quihndi rê cojo yějé me xi tjin rê quihndi vaquí ne nixtin hya.

¹⁸ Chjahyun rê Nina xi cjuañihi véhé ne, hacuiin cuinduva nixtin chan hnchan ta,

¹⁹ cjuañihi xi cuma ne, ngu cjuañihi jyé xi cjéé camahani cumá hisca ntsacu cavetsihin ngasunhndé hacuaha cyaain cuatjin cuma.

²⁰ Sá xi jemu cjin nixtin cjuacjini rê cjuañihi véhé ne, hisca ngu xuta ne, cuetjintjin me. Peru ngatsé rê cjuahmutacun xi tjin rê Nina cojo xuta xi cavaxijin me xi cumá me ladu rê me ne, sahmichuva me nixtin véhé.

²¹ Nixtin véhé ne, sá xi yo xi cuichja cojo nuju xi ngajan o sá xi nguehe tacun me xi má Cristu, xi camacjaain nuju ta quixiin xi chja me.

²² Ngujo xuta vindacha ne, cuichja me ta: “Ngahan xi Cristu xi cumatitjun ngahan tsujun.” Ngujo nga me ne, cuichja me ta: “Ngahan xi chjá cjuaxi rê Nina.” Peru vindacha ni me, quixiin cjuaxi cuichja me. Hacuaha sahmi me xcusun sacuaha cjuarcun, tséhé xi hisca cojo xuta xi cavaxijin Nina meje cuindacha me.

²³ Nechun cuidadu ta cojo chaja sa xi cuechu nixtin véhé ne, ngahan ne, ha casua camachaya nuju xi cuatju vé.

Xi cuya nga Jesús ne, cumatsejen hasen rê ngahñu rê me

²⁴ Xi cuatjun nixtin tséhé cjuañihi jan ne, cuinduva nixtin xi cjué ndavá rê tsuhi. Sá ne, hacuaha ha quihndé suaain ndavá rê.

²⁵ Hane niñu ne, cuixu tséhé ngahnga. Hisca ngahñu xi yaha ngahnga ne, cjuiniyaya.

²⁶ Xcun cjuacjintacun véhé ne, scuéé xuta xi ngahan, Quihndi rê Xuta Jain, cuinduvá ngajñi rê yufí cojo jemu jyé ngahñu hisca seti tsejen ngahan xi nduvá.

²⁷ Hya ne, tsingátju ángel naha yějé ni ladu tséhé ngasunhndé, cjuējaha rê yějé xuta naha xi cavaxejen, sahmi tangun rê hiscan tejña.

²⁸ Quihndé ne, cuetaharcun ngujo cjuaxi tséhé yaxujun xi chine tú rê. Hya xi cuetsihin cumá xcun tsja rê yaxujun jan tséhé xi cuetsihin cuetjusehen ne, ngayun ne ha hyun ta ha jemu camatiña chan tsi.

²⁹ Hacuaha xi cjuéhe cjuañihi xi cachjá cojo nuju ne, véhé sua cumachaya nuju ta ha tiña tacun xi cjué ngasunhndé, hisca meje cumá.

³⁰ Cuichjá cjuaquixi cojo nuju ta xuta xi siu quihndé ne, siu cuaha me hya xi cuetjucaa xcusun xi cachjá cojo nuju.

³¹ Cuechu nixtin xi cjuë nangui, cjuë ngahnga. Peru cju naha ne, tsajin nixtin xi cjuë.

³² Sacuaha nixtin xi cuetjucaa cjuatacun vëhë ne, tsajin yo vëë rë janihya cuetjucaa. Hisca hvín ángel xi siu ngahnga. Hisca hveen ngahan xi Quihndi rë Nina. Suva ni Nina ngu tutu nahmi naja ne, me vëhë xi vëë me janihya cumá.

³³ Vëhë xi nechun cuidadu, hacuaha ningascun rë hitsë cjuatacun nuju ta, ngayun ne, hyuun janihya xi cjehe Nai nuju. Vëhë xi chjá cojo nuju ta ningascun rë hitsë cjuatacun nuju ta ngayun ne, hyuun janihya cúa, ¿há jñu ne?, ¿há ñahñu cjuëhë?

³⁴ Ngahan ne, sacuaha ngu xuta xi cuetju cje ngu nangui cjin. Chaja sa xi cuetjun me tsëhë ndava me, cuichja me cojo mosu rë me mé xa sahmi jimangu mosu. Hacuaha cuitexa ngu mosu xi cuahacuenda tingotjo ndava me. Cuatjin sahme.

³⁵ Vëhë xi chjá cojo nuju ta ningascun rë hitsë cjuatacun nuju ta ngayun ne, hyuun janihya cúa, ¿há jñu ne, há nixten ne, há tiña sahasen, o sa sahasen camahani cúa? Sa xi ñahñu cjuëhë hane tsajin tjin chjine ngayun.

³⁶ Cuidadu sá xi ngu ñahñu nduvá hane ngayun ne, tsajin tjin chine ngayun.

³⁷ Xi chjá cojo nuju ne, ha cuanitjin ni chjá cojo yëjë ni xuta: Meje rë xi catitsingasca me hitsë cjuatacun rë me. —Cuatjin cachja Jesús.

14

Me xi matitjun ne visiajmicjin me hacutjin cuma xi cjeue Jesús ndavaya

¹ Hya xi camá ne, casahmi chaja sa jo nixtin xi cuechu suhi tsëhë pascua ne, sacuaha xcusun niji ne, hya chini pan xi tsajin san rë. Ngajan xi nahmi xi matitjun jan cojo cha maestru tsëhë ley ne, jemu tivanguí me chuva rë xi cuindacha me Jesús, cojo sa xi cuma cjuaha me me tsiquehen me me.

² Peru cachja me cojo xicjin me cuitjin:

—Ndatjin xi cuinechanyan ne, cuatju suhi sehe chjahanhma cha, ta sá xi tsajin ne, tu cumacjan rë xutacjin hane cumá ngu suë jyë.

Cavitejnu ngu chjuun aceite xi jemu ndaja jne rcu Jesús

³ Hya ne, Jesús ne, nandya Betania quitaha me. Tacun me ndava cha Simón, cha xi camandaja tsëhë chihin cjan rë xi cafaha rë chuxin yojo rë. Hora xi tacun me tijinë me niñu ne, cafehe ngu na xi yaha na ngu frascu ndoyojo, hinchá aceite tsëhë nardo xi jercu hnga chjí rë. Hane xi cavotohosun na rcu frascu hiscan hinchá aceite jan ne, sehe quiji cavitejnu na aceite jan rcun Jesús.

⁴ Ngujo me xi siu jan ne, camacjan rë me xi cuatjin casahmi na. Hane sehe cachja me ngajñi rë me cojo xicjin me cuitjin:

—¿Mé má cuatjin tu catsinguetsun na aceite vë?

⁵ Sá xi xteña vë, sacú tujún sacuaha tujún xi sacú rë ngu mosu xi casahmi xa ngu nu, hane tujún vëhë ne, cuma cuisecoo rë xuta yuma. —Cuatjin cachjataha me na.

⁶ Ngajan xi cachja Jesús cuitjin:

—Xi canujuun tsëhë na. ¿Mé má cuatjin tivichuncjun tsëhë na? ta, jemu venguichji rë xcusun xi casahmi na cojo ná.

⁷ Xuta yuma ne, yëjë nu yëjë nixtin siu me ngajñi nuju. Peru ha ndaja ngahan ne, hacuiin jyë nixtin tejña cojo nuju.

⁸ Na vihi ne, casahmi na hacutjin xi chutaha na. Hane cojo chaja sa xi cueya ngahan ne, cavitejnu ná na aceite xi cuëhëchjine ni na yojo naha xi seyaniji ngahan.

⁹ Cuichjá quixë cojo nuju ta tuyani tsëhë jingujyë ngasunhdë xi cuichja xuta cjuá tsëhë Nina ne, hacuaha cueyanangui me na vihi cojo sa xi xuta xi yahnga ne, cumachaya rë me xcusun xi casahmi na cojo ná. —Cuatjin cachja Jesús.

Judas ne, viteña me Jesús

¹⁰ Hya xi camá ne, cha Judas tsëhë nandya Queriete, cha ladu rë Jesús tsëhë cha xi tejó jan ne, quiji cha xcun nahmi xi matitjun ne, cavëhë chihin cha cjuá cojo rë me xi sahmi me entregadu cha Jesús cojo rë nahmi jan.

¹¹ Hya xi cahndë nahmi xi matitjun jan cjuá rë Judas ne, jercu ndama camahani rë me. Hacuaha ngutjen ni cachja me ta, sua me cha tujún. Hane ngajan xi cha Judas jan ne, cavetsihin cavanguí cha chuva rë hacutjin xi cuma sahmi entregadu cha Jesús.

Tisehen chjinë xi sinë me tsëhë pascua

¹² Hya xi camá ne, nixtin tjun tjun tsëhë suhi xi chini pan xi tsajin san rë, nixtin xi hacuaha niqihin chu tsángá tsëhë suhi tsëhë pascua ne, hya ne, cha ladu rë Jesús ne, cavinenguise cha cojo rë me cuitjin:

—¿Jani hiscan xi meje nuju xi cuanguin cuihinchjini xi xinëë nguixun tsëhë suhi vi?

¹³ Ngajan xi catsingatju me jo cha ladu rë me quiji cha tixa. Hane cuitjin cachja me cojo cha:

—Tangun nandya Jerusalén. Hane ngajan cuechuntuhun ngu cha xi nduva ne, quisun rcu cha ngu nisa nandá. Tangun cojo cha hacutjin cjuí cha.

¹⁴ Hane ndihya xi cuisehen cha ne, tinújun cojo me xi nai rë ndihya jan cjua vihi: “Cuitjin chja maestru ta, ¿jaré cuarto hiscan xi siné nguixun me cojo niji tséhë pascua?” Cuatjin tinújun cojo me.

¹⁵ Hane me vëhë ne, cjue tsingacun nuju me ngu cuarto jyë ngajan ndihya ngahnga hiscan xi ha tjin chjine. Hane ngajan tuhunndujun xi xinëë.

¹⁶ Hane ngajan xi cavetju cha xi cuacun jan quiji cha. Xi cafehe cha nandya Jerusalén ne, cuatjin camá tu tjin cachja Jesús cojo cha. Hane cavëhë ndaja cha xi siné nguixun me cojo rë cha.

Pascua xi vijnetaha cajinë Jesús

¹⁷ Xi quiji hora jan ne, cafehe Jesús cojo yëjë tejó cha ladu rë me. Hane quiji me caviyuju me.

¹⁸ Sehe cavetsihin cajinë me. Hora xi tijinë me jan ne, ngajan xi cachja Jesús cuitjin:

—Nguehe cuichjá cojo nuju cjuaquixi ta ngu ngayun xi nechan tichine cojo nuju nguehe ne, nihñu ná entregadu. —Cuatjin cachja me.

¹⁹ Ngajan xi jemu choho camá rë cha, cavetsihin cha cachja cha chuva ngu chuva ngu cha, cuitjin cachja cha:

—Hacuiin ngahan.

²⁰ Ngajan xi cachja Jesús cuitjin:

—Ngajñi nuju xi tejó ngayun, ngajan jiyajñi ngu xi sahmi cuitjin. Ngu me xi ngu ni tyuva tsingúisehen quinda niñu naha cojo ne, me vëhë xi sahmi ná me entregadu.

²¹ Ngahan xi Quihndi rë Xuta Jain ne, hatuxa tjin xi cueyá ta, xujun rë Nina ne, cuatjin chja. Peru xuma cha xi cuiteña ná. Vengui sa chji rë sá xi catsiin camahani cha.

Jesús ne, vindeya me xcusun rë pascua, cumá cena tséhë Nai naja

²² Hora xi ha camatiña xi cuijnetaha siné me niñu ne, cafaha Jesús ngu niñutsju, hane casua me nacuechji rë Nina, sehe cavotohocja me niñutsju jan. Hane sehe casua me ngu rquí ngu rquí niñu jan cha ladu rë me, hane cuitjin cachja me cojo cha:

—Juhun vihi ta, vihi ne, yojo naha. —Cuatjin cachja me.

²³ Hacuaha cafaha nga me ngu vasu xi hinchá xan rë uva, hane casua nga me nacuechji rë Nina. Hane sehe casua me tsë tsë cahvi cha jima ngu cha ladu rë me.

²⁴ Hacuaha cachja me cojo cha cjua vihi:

—Vihi jni naha xi cuetju ná ngatsë rë xuta. Xcusun vihi ne, ngu compromisu xatsë xi sehe tivëhëchihin Nina cojo xuta cojo sa xi jni naha ne, vëhë cuaxëtje rë xuta.

²⁵ Cuichjá quixë cojo nuju ta ha quihndé cueen xan rë uva nguehe ngasunhndë. Cuëhë, peru hisca hya xi nduva Nina cuitexa me ngasunhndë, hya cuëhë, peru hacuiin tangun cumá. —Cuatjin cachja Jesús cojo cha ladu rë me.

Jesús ne, chja me ta Pedru cuichja me xi viin me yo xi Jesús

²⁶ Xi cajnetaha cajinë me ne, casë me ngu tséhë Nina. Sehe cavetju me quiji me Naxi Olivu.

²⁷ Hane sehe ngajan xi chja me cojo cha ladu rë me cuitjin:

—Ngayujun ni ngayun cumanguaintacuun cojo ná ta cuma sacuaaha camahindu xcun xujun rë Nina xi chja cuitjin: “Nina ne, tsiquehen me cha xi sahmi cuidadu rë chu tsánga. Hane chu tsánga ne, cuitsojo chu.”

²⁸ Cuatjin cumá, peru hya xi cúa nga cjuahñu naha ne, cjué titjun tsujun hiscan distritu Galilea.

²⁹ Ngajan xi cachja cha Pedru cojo Jesús cuitjin:

—Ha ndasa ngayëjë cha xi cuicun vi cuejña suva cha ngayun ne, peru ngahan ne, cuejña nuju suvun.

³⁰ Ngajan xi cachja Jesús cojo cha cuitjin:

—Cuichjá quixë cojo ri ta tajñu ni xi chaja sa squindaya xahnda ne, ha jyan ndiya cuinoje xi hyiin yo ngahan. —Cuatjin cachja me.

³¹ Peru cha Pedru ne, cavuya cachja nga cha cjua vihi:

—Ha ndasa hisca cueya cojo nuju ne, peru cuichjaain xi hveen yo ngayun. —Cuatjin cachja cha.

Hacuaha cuanitjin ni cachja cha xi yahnga.

Jemu chja vatju Jesús ngajan Getsemani

³² Hya xi camá ne, cavetju me quiji me ngu cahndé xi hmí rē Getsemaní. Ngajan xi cachja me cojo cha ladu rē me cuitjin:

—Nechun ni nguehe ne, cjué cuisiajme cojo Nina. —Cuatjin cachja me.

³³ Hya xi camá ne, cavaxé me cha Pedru cojo cha Jacobo cojo cha Juan, quiji me cojo cha. Ha xcun xi ha cjui cjui me jan ne, cavetsihin jemu casercun rē me, hacuaha macjincacun me.

³⁴ Ngajan xi cachja me cojo cha cuitjin:

—Jercu choho má camahani rē xahasen naha. Xi má ná ne, cueya tséhé. Nechun ni nguehe cuacun ngayun cojo ná. —Cuatjin cachja me.

Oración xi tjun

³⁵ Sehe ngajan xi Jesús ne, quiji me hitsé ni nguvan. Hane ngajan cafañatsacjan me, cafehya rē me Nina sá xi tjun tu mé ni xi cumá cojo sa xi cuatjiin me cjuacjintacun xi cuatju me jan.

³⁶ Hane cuitjin cafehya rē me Nina:

—Papá. Xi cumá nuju ngayun ne, yějé ni xcusun ne, hacuiin chja cuma. Véhé xi tiféhya nuju xi naxuntjun ná tséhé cjuacjintacun xi cuátju cumá. Cuatjin meje ná, peru cjua xi cuinújun ne, cuatjin catama. —Cuatjin cafehya rē me Nina.

³⁷ Hya xi camá ne, cavuya cafehe nga me hiscan siu cha ladu rē me xi quijicojo me jan. Hane xi vtsejen me ne, siufé cha. Ngajan xi chja me cojo cha Pedru cuitjin:

—Simón, ¿mé má tsjuñife? ¿Há camaji cavacun ngayun cojo ná hisca ngu hora?

³⁸ Nechun quicun, hacuaha chjahyun rē Nina cjuandaja rē me, cojo sa xi hacuiin chjaha chuya nuju cojo cjuatacun nuju. Xahasen nuju ne, ndaja meje rē xi nihñu, peru yojo nuju ne, chuya caa rē. —Cuatjin cachja me cojo cha.

Oración xi májyan

³⁹ Hya xi camá ne, quiji nga me ngu ndiya hitsé ni nguvan. Hane ha cjua véhé nga ni cavuya cafehya rē me Nina.

⁴⁰ Hya xi cavuya nga me ne, siufé nga cha ladu rē me xi jyan jan, tséhé xi ha quihndé ticaain rē cha xi jemu nijña rē cha. Xi catsingasca Jesús cha ne, sacuiyiniin rē cha mé cuichja cha cojo me.

Oración xi májyan

⁴¹ Xi cavuya me xi quiji me má jyan ndiya ne, cachja me cojo cha ladu rē me jan cuitjin:

—Ha tsjuñufun cuaha. Juun, peru ha camá. Ha cavechu hora xi ngahan, Quihndi rē Xuta Jain, cjuaha ná xuta tsehen ta, ha caxteña ngahan.

⁴² Tisatjunhgun, cuanguen chutejen ta, ha nduva cha xi sahmi ná entregadu. —Cuatjin cachja me.

Cjuicojo cha Jesús ndavaya

⁴³ Ha tu tichja cuaha Jesús cojo cha ladu rē me ne, cafehe cha Judas, cha xi cojo jiyajñi ngajñi rē cha xi tejó jan. Hacuaha jercu cjín xuta tivisecoo rē cha hora xi nduva cha. Yaha me quicha. Yaha me ya. Nahmi xi matitjun cojo cha maestro tséhé ley cojo xuta changá jan ne, me véhé cavitexa me xutacjín jan xi quiji jaha me Jesús.

⁴⁴ Chaja sa xi cjuehe cha Judas cojo xutacjín jan hiscan tacun Jesús ne, ha cachja cha cojo xuta jan cjua vihi:

—Cha xi cjué cuitátсуha xi suá rē nina ne, cha véhé xi hacui cha. Chjuhun cha, hacuaha nihñu cha, sehe tangun cojo cha. —Cuatjin cachja cha.

⁴⁵ Xi tu cavechu cha hiscan nduva Jesús cojo cha ladu rē me xi yahnga jan ne, ngutjen quiji cahsahmi tiña cha tséhé me, hacuaha casua cha me nina cuitjin:

—Cuhndanu, Maestro. —Cuatjin cachja cha.

Café cachja cha cuitjin ne, sehe cavitatsuha cha Jesús.

⁴⁶ Hya xi camá ne, quiji xuta jan ne, cafaha me Jesús.

⁴⁷ Ngajan xi ngu cha xi secun jan ne, cavaxé cha quicha nduju rē cha, hane cavaja rē cha ngu cha mosu rē nahmi xi matitjun ne, cavatésun cha ngu ladu tyjavañuju.

⁴⁸ Ngajan xi cachja Jesús cuitjin:

—¿Mé má sacuaha vangun chjuhun xuta chējé ne, cuatjin nduvun chjuhun ná? ta, quichuhun quicha quichuhun ya.

⁴⁹ Ngahan ne, nchunchujun ni caviteñaya yungun xi matitjun, cavicuyá rē xuta, hane ¿mé má cachjuun ná ngajan? Juun, peru cuatjin tijima cojo sa xi cuetjucaa jain hacutjin camahindu xcun xujun rē Nina.

⁵⁰ Hya xi camá ne, cha ladu rē Jesús ne, cavejña suva cha me, hane café yějé cha cavanga cha.

Cha nixti xi cavanga hya xi cachjahá rē Jesús

⁵¹ Ngu sa cha jan yaja cha ngu tsjian tu të ni. Hane xi tu meje cjuaha xuta cha jan ne, tsjian ni rë cha cama cafaha me.

⁵² Peru cha vëhë ne, cama cavanga cha tu quixti ni.

Ficojo cha Jesús xcun nahmi xi matitjun

⁵³ Hya xi camá ne, quijicojo xuta jan Jesús xcun nahmi xi matitjun. Hane xi cafehe cha cojo Jesús jan ne, sehe camatangun yëjë ni nahmi xi matitjun cojo xuta changá cojo cha maestru tsëhë ley.

⁵⁴ Ngajan xi cha Pedru ne, quijitjengui cha Jesús tu cjin tu cjin ni. Cafehe cha hiscan ndatsen ndava nahmi xi matitjun jan. Hane ngajan cavéjña cha cojo cha nísë tjehe ndava ndihi, tsihasu rë cha yojo rë cha cojo cha nísë jan.

⁵⁵ Hane nahmi xi matitjun jan cojo yëjë sa xuta xi matitjun ne, cavangui me xuta xi tsinguixi jyë rë Jesús, cojo sa xi cuma tsiquehen me me. Peru tsajin mé jyë rë Jesús casacu rë me.

⁵⁶ Ha ndasa jemu cjin xuta xi cavinchajyë me Jesús ne, peru suva cjuandesu yëjë ni cjuaxi cachja me ta, hacjahi chja ngu ne, hacjahi chja ngu. Hacuuiin tangun má cjuaxi rë me.

⁵⁷ Ngujo me ne, chja me ta cahndë me xi cuitjin cachja Jesús:

⁵⁸ “Ngahan ne, tsinguétsun yungun xi matitjun xi casahmi xuta vë, hane cahntsua xi jyan nixtin ne, sahme nga ngu. Peru hacuuiin cojo tsja xuta xi cuma hya.” Cuahaxutjin cahndë me xi cachja Jesús.

⁵⁹ Hisca me xi cuacun jan ne, hacuaaha hacuuiin tangun camá cjuaxi rë me.

⁶⁰ Ngajan xi nahmi xi matitjun tsëhë nahmi xi yahnga jan ne, casecunvasen me, hane sehe cavinenguise me Jesús cuitjin:

—¿Há chjayinnguuiin hisca xi ngu cjuaxi tsëhë jyë rijji xi vincha xuta xi cuicun vi? —Cuatjin cachja me.

⁶¹ Hane Jesús ne, tu jyuu ni casecun me. Hisca ngu cjuaxi cafayanguiin me. Hya xi camá ne, cavinenguise nga nahmi xi matitjun jan ngu ndiya cojo Jesús cuitjin:

—¿Há ngaye xi Quihndi rë Nina naja? ¿Há ngaye xi catsingatju me xi cumá titjun tsijin?

⁶² Ngajan xi cafayangui Jesús cuitjin:

—Juun, ngahan. Hacuaha cjeuhe nixtin xi chutsujun ná xi tejña ladu quixi tsëhë Nina. Hacuaha chutsujun ná xi cuinduva ngajñi rë yufi, xi cúa nga tsëhë Nina.

⁶³ Hane ngajan xi nahmi xi matitjun jan ne, jemu camacjan rë me ne, hisca tsjian rë me cavicheya me. Hane cuitjin cachja me:

—¿Mé sa cjuaxi mameje?

⁶⁴ Ngayun ne, ha canuhyun hacutjin xi tsixcuehyu cha Nina. ¿Mé xi nújun quihndë?

Ngajan xi yëjë xuta jan ne, cachja me ta meje rë xi cüeya Jesús.

⁶⁵ Hane cavetsihin ngujo me cavëhë natya me Jesús. Hane hacuaaha cavatsa me xcun Jesús, sehe cavetsihin cavaja me. Sehe ngajan xi cachja me cuitjin:

—Tinoje yo xi cavaja ri.

Hya xi camá ne, cavetsihin xi cha nísë jan ne, jemu cavaja cha me.

Pedru ne, fahma me Nai naja

⁶⁶ Jinguyëjë rë xi cuatjin tijima ne, cha Pedru ne, tacun cha ndatsen ndihya. Hya xi camá ne, hora vëhë canduva ngu na xi sahmi xa ndava nahmi xi matitjun jan.

⁶⁷ Hane cavëë na xi tacun cha Pedru tsihasu rë cha yojo rë cha hiscan tacun ndava ndihi. Hane casecun na cafahacuenda na cha. Sehe ngajan xi cachja na cojo cha cuitjin:

—Ngayun ne, ladu rë Jesús tsëhë nandya Nasaret ngayun.

⁶⁸ Ngajan xi cachja cha Pedru cuitjin:

—Hisca hveen mé xi noje.

Hya xi camá ne, sehe cavetju cha quiji cha casecun cha hiscan tu cuiseen ni tsëhë ndatsen ndihya.

⁶⁹ Hane ngajan xi na xi sahmi xa tsëhë nahmi jan ne, cafahacuenda nga na cha hiscan quisecun cha. Hacuaha cavetsihin nga na cachja na cojo xuta xi hinchacun jan cuitjin:

—Cha vëhë ne, ladu rë Jesús má cha.

⁷⁰ Xi tu cahndë cha Pedru xi cuatjin cachja na jan ne, ngutjen cafayangui cha xi quixiin xi chja na. Xi café ngu hora lihndi ne, hacuaaha cachja xuta xi hinchacun jan cojo cha cuitjin:

—Quixi jain xi ladu rë Jesús má ngaye ta distritu Galilea ne, ngajan nangui rijji.

⁷¹ Sehe ngajan xi hisca Nina caveyanangui cha Pedru ne, cachja cha xi hviiin cha me, cuitjin cachja cha:

—Vëë Nina jain xi hveen yo me xi nújun vë.

⁷² Hane hora vëhë ne, cajihnda xahnda. Hya xi camá ne, catsinguitsjen cha Pedru cjuaxi cachja Jesús cojo cha xi cachja me cuitjin: “Chaja sa xi squihndajo xahnda ne, ngaye ne, ha

jan ndiya cuinoje xi hyiin yo ngahan.” Hora xi catsinguitsjen cha cjua vèhè ne, cajiñhnda cha.

15

Ficojo cha Jesús xcun Pilatu

¹ Hya xi casahasen xi camá nchujun jan ne, camatangun nga nahmi xi matitjun cojo xuta changá cojo cha maestru tsèhè ley cojo yahnga sa xutaxa rè xi hinchajñi me. Sehe catsihñu me Jesús ne, sehe quijicani me xcun gobernador xi hmí rè Pilatu.

² Xi cafehe me cojo Jesús xcun Pilatu ne, sehe cavinenguise Pilatu cojo Jesús cuitjin:

—¿Há ngaye xi matitjun ngaye tsèhè xuta nangui Israel?

Ngajan xi cafayangui Jesús cuitjin:

—Cuatjin sacuaaha canújun vè.

³ Hane ngajan xi nahmi xi matitjun jan ne, jemu cjín xcusun jyé xi cavincha me tsèhè Jesús.

⁴ Ngajan xi Pilatu ne, cavuya cavinenguise nga me Jesús cuitjin:

—¿Há chjayinnguini camahani? Jercu cjín jyé riji cavincha me.

⁵ Peru Jesús ne, ha quihndé cafayinnguini camahani me. Hane Pilatu ne, jemu quijircun camahani rè me.

Hacuiin Jesús ta Barrabás mandaya

⁶ Suhi vèhè ne, Pilatu ne, ha tuxa xcusun rè me xi nu nu ni vèhèndaya me ngu presu xi meje rè xuta xi cumandaya.

⁷ Ndavaya ne, jiya ngu presu xi hmí rè Barrabás cojo ngujo sa presu xi catsiquehen rè xuta tsèhè ngu si.

⁸ Hya xi camá ne, canduva xutacjin ne, cafehya me cojo Pilatu xi sahmi me vèhè sacuatjin xi ha xcusun rè me.

⁹ Ngajan xi cachja Pilatu cojo rè xuta jan cuitjin:

—¿Há meje nuju xi cuaxè cha xi matitjun tsujun?

¹⁰ Cuatjin cachja Pilatu ta tsèhè xi ha vèè me xi ngatsè rè cjuaxin sahmi nahmi xi matitjun jan cojo Jesús, vèhè xi quijicani me Jesús ngajan.

¹¹ Peru nahmi xi matitjun jan ne, quiji cavinchangui me xutacjin jan xi meje rè me xi cuichja xuta jan xi catèhèndaya Pilatu Barrabás.

¹² Ngajan xi cavinenguise nga Pilatu cojo xutacjin jan cuitjin:

—¿Mé sahme cojo cha xi nújun xi matitjun tsujun ni?

¹³ Ngajan xi xuta jan ne, cuitjin jercu cachja me:

—Tetuhun cha xcun cru.

¹⁴ Ngajan xi cachja Pilatu cojo rè me cuitjin:

—Peru ¿mé xi choho casahmi cha?

Peru xuta jan ne, hitsè sa rcu cachja me cuitjin:

—Tetuhun cha xcun cru.

¹⁵ Hya xi camá ne, ta meje rè Pilatu xi cumangucacun xuta ne, cavèhèndaya me Barrabás. Hane xi cavatju catsingatju me Jesús casehen rè ne, sehe cavuya casua nga me cojo cha sindadu xi cjue cuetaha cha me xcun cru.

Jesús ne, quisun ngu corona tsèhè nahya rcu me

¹⁶ Hya xi camá ne, quijicojo cha Jesús taha cahntsua hnhua hiscan ndatsen ndava Pilatu. Hane sehe casahmi tangun sa cha yèjè sindadu cjín.

¹⁷ Hya xi camá ne, cavaxè cha tsjian rè Jesús, hane sehe catsicaja cha me ngu tsjian hani. Hacuaha catsihya cha ngu corona nahyá xi cavesun cha rcu me.

¹⁸ Sehe cavetsihin cavincha cha viva rè me xi tsixcuehyu cha me, sacuaaha xi macjain rè me xi vèhè matitjun me tsèhè xuta tsèhè nangui Israel.

¹⁹ Hya xi camá ne, sehe cavaja cha ngu rquí ya rcu me. Cavèhè natya cha me. Hacuaha cavixcuhnchi cha xcun me, sacuaaha xi faharcun cha me.

²⁰ Hya xi cajnetaha catsixcuehyu cha me cuatjin ne, sehe cavaxè cha tsjian hani xi catsicaja cha me, hane sehe cavuya catsicaja nga cha me tsjian rè me xi tsèhè jain me. Hya xi camá ne, sehe quijicojo cha me xi cuetaha cha me xcun cru.

Cavetaha cha Jesús xcun cru

²¹ Ndiya cjuí cha cojo me ne, cavechutaha cha ngu xuta changá xi hmí rè Simón tsèhè nandya Cirene, nahmi rè cha Alejandro cojo cha Rufu. Nduva me xi quiji me nguujña. Hane xi cavechutaha cha me, casahmi cha me nguýè xi cuesuntyja me cru rè Jesús. Hya xi camá ne, cavesuntyja me, sehe quiji me cojo.

²² Sehe cavechu yějē xuta jan hiscan xi hmí rē Gólgota, cja xi meje cuichja Naxi Nínda Rcuun.

²³ Sehe xuta jan ne, tisua me xan rē uva xi tecjan rē nandá rē tyjungunsa xi cuihi Jesús, peru cahviin me.

²⁴ Hya xi camá ne, cavetaha cha me xcun cru. Hane tsjian rē me ne, cavincha rē cha ngu suerte ne, sehe cumatsejen mé xcusun tsjian rē me xi satē rē xingu xingu cha.

²⁵ Hya ne, chuva rē fane ñaja tséhē nguitajñu.

²⁶ Hane camahindu ngu letreru cojo jyě rē me xi chja cuitjin: “Me xi Matitjun tséhē Xuta nangui Israel.” Sehe quiji casetaharcu cru.

²⁷ Hacuaha cavityangui cha ngu chějē ngu hatsē, jindaya ngu ladu rē tjehe rē me, jimangu cojo cru rē.
²⁸ Cuatjin cavetjucaa cja xi camahindu xcun xujun rē Nina xi chja cuitjin: “Cuichja xuta ta me vihi ne, ngu xuta tsehen me.”

²⁹ Hya xi camá ne, xuta xi cavatju jan ne, xi catsixcuehyu me Jesús ne, catsiniya me rcu me, hacuaha cuitjin cachja me:

—Canoje xi cuma ninguetin yungun xi matitjun, hane cahntsua xi jyan nixtin ne, cama nga canindeje sove.

³⁰ Quihndé ne, sá cuatjin cuma nihñi ne, naxetje sove yojo riji, titujni tséhē cru vē.
 —Cuatjin cachja xuta.

³¹ Ha chuva véhē ni, cavisiajmi nahmi xi matitjun cojo cha maestru tséhē ley ne, ngajñi rē me cojo xicjin me xi tsixcuehyu me Jesús. Cuitjin chja me:

—Cavaxetje cha xuta, peru quihndé ne, maji vaxetje cha yojo rē cha.

³² Sá xi hacui jain cha xi catsingatju Nina xi cumatitjun tsajan ne, catitujne cha tséhē cru chutsejen, cojo sa xi cumacjain naja tséhē cha. —Cuatjin cachja me tséhē Jesús.

Hacuaha cha chějē xi cojo xtyangui taha cru jan ne, cojo cha choho cachja cha tséhē me.

³³ Xi camanchisen tséhē nixtin véhē ne, jingujyě ni ladu véhē ne, camajñu. Jyan hora quijicani rē.

³⁴ Xi café jyan hora véhē ne, jercu cajindaya Jesús, cachja me hne rē me cuitjin:

—Eloí. Eloí, ¿lama sabactani? —cja xi meje cuichja cuitjin: Ngayun, Nina naha, ¿mé má canismutacun ná?

³⁵ Hane ngujo xuta xi hinchacun jan ne, xi cavijniinrcu me hne rē Jesús ne, xi má rē xuta jan ne, nima Elías, ngu profeta tséhē nixtin hatsē, jindaya Jesús me.

³⁶ Hane sehe cavanga ngu me quiji catsicahnchi me ngu tsjian hinda cojo xan rē uva xi ha san. Sehe cavetaha me rcu ngu ya nduju, sehe cavetaha me hntsua Jesús xi cuihingui me. Hacuaha chja me cojo xicjin me cuitjin:

—Cuinechanyan hitsé ne, ¿há cuinduva jain Elías tsitujne me Jesús tséhē cru?

³⁷ Peru Jesús ne, hora véhē jercu cajindaya me, hane cahme me.

³⁸ Hacuaha hora véhē ni ne, tsjian nduju xi tyjangui cahntsua yungun xi matitjun ne, hisca rcu hiscan ntsacu canduva catiyavasen.

³⁹ Hya xi camá ne, ngu cha capitán tséhē sindadu xi secun tiña cru hisca tyjangui Jesús jan ne, xi cavěe cha hacutjin xi cahme Jesús ne, ngajan xi chja cha cuitjin:

—Cjuaquixindaja xi me vihi xi Quihndi rē Nina me.

⁴⁰ Hacuaha hinchacun sa ngujo yachjin, vutsejen na tséhē cjin ni. Ngajñi rē na xi cuacun véhē ne, quiseacun na Salomé cojo na María tséhē nandya Mágdala cojo na María naa rē cha Jacobo lihndi cojo cha José.

⁴¹ Na yachjin xi cuacun vē ne, cojo na cavisecoo na catsindaja na xi cajnē Jesús cojo cha ladu rē me, hya xi catsuyjhiya me ngajan ladu tséhē distritu Galilea. Hacuaha jercu cjin sa yachjin hinchacun na jan xi hacuaha cojo na quiji na ngajan nandya Jerusalén cojo Jesús.

Jesús ne, caseya me tsjun rē me

⁴² Nixtin xi cahme Jesús ne, hacuaha hya vispra tséhē nixtin xi chjahájenda rē. Hane xi quiji hora jan ne,

⁴³ ngu xutaxa rē xi tjemu chjahanrcun rē, xi hmí rē José tséhē nandya Arimatea, me xi hacuaha tacunya nixtin xi cjehe Nina cuma titjun me tséhē yějē Israel, caveñahñu me cjuatacun rē me sehe quiji me ndava Pilatu. Hane cafehya me cahndé cojo Pilatu xi cjuahaxin me nima Jesús.

⁴⁴ Hya xi camá ne, Pilatu ne, quijircun rē me xi cuatjin cachja José xi ha cahme nima ta, tséhē xi cjěe jyě hora xi casetaha Jesús xcun cru. Hane véhē xi catsingatju me quiji chjaha rē cha capitán. Hane sehe cavinenguise me cha sá xi quixi xi ha cahme jain Jesús.

⁴⁵ Xi tu camachaya rē me cja tséhē cha capitán jan xi ha cahme jain Jesús ne, sehe ngajan xi cachja me cojo José ta cuma cjue tsitujne me nima.

⁴⁶ Ngajan xi José ne, véhē ta cavatsé me ngu tsjianté xatsé ne, sehe quiji catsitujne me nima Jesús tséhē cru, sehe cavaxté rē me tsjian jan. Hane sehe cavaha me nima quijicojo

me hiscan tacun rë me ngu tsjun xi cafahanguitaha me cahntsua ngu naxi. Hane ngajan caveya me nima. Sehe catsindefajne me ngu ndyojo jyë xi cavechja rë tingotjo tsjun jan.

⁴⁷ Hane na María tsëhë nandya Mágdala cojo na María naa rë cha José ne, cavëë na hiscan caseya nima.

16

Vuya nga Jesús cjuahñu

¹ Xi camá nguixun tsëhë nixtin xi chjahájenda rë jan ne, na Salomé cojo na María tsëhë nandya Mágdala cojo na María naa rë cha Jacobo ne, cavatsë na rqui xi ndaja jne xi cuitejnu na nima.

² Xi casahasen domingu ne, hora xi tivetjucaa tsuhi ne, cavatju na yachjin jan quiji na hiscan tacun tsjun rë nima.

³ Hane ngajñi cjuí na jan ne, ngajan xi chja na cojo xicjin na cuitjin:

—¿Yo cuisecoo naja xi nindefajne ndyojo xi quitaha tingotjo rë tsjun jan?

⁴ Peru xi tu cafehe na jan ne, ndyojo jyë xi quitaha tingotjo rë tsjun jan ne, ha quihndë tsajin quitaha cahndë rë ta ha xin jiña.

⁵ Xi cavisehen na cahntsua tsjun jan ne, cavëë na ngu cha xi tacun cha taha ladu quixi, yaja cha ngu tsjian tyava nduju. Hya xi camá ne, jemu catsacjun camahani na.

⁶ Ngajan xi cachja cha cojo rë na cuitjin:

—Xicarcuun. Ngahan ne, ha hvë xi Jesús tsëhë nandya Nasaret vinchunsun me, me xi cavetaha xuta xcun cru. Peru me vëhë ne, tsajin me nguehe ta cavuya cjuahñu rë me. Chutsujun cahndë hiscan xi cafaña xuta me.

⁷ Quihndë ne, tjangun sanii ne, tinúnun cojo cha ladu rë me, cha Pedru ne cojo cha xi yahnga ta, Jesús ne, hisca tjun cuechutaha me yun ngajan distritu Galilea sacuahatjin xi ha cachja me cojo nuju.

⁸ Xi tu cavetju na tsëhë tsjun jan ne, ña fatsë na xi jemu catsacjun na camá. Hane vanga sanii na cafe na. Hane hisca xi ngu cachjaain na cojo, tsëhë xi jemu catsacjun na camá.

Jesús ne, ñahñu ni camatsejen me na María Magdalena

⁹ Jesús ne, xati camaha sa tsëhë nixtin domingu ne, hya cavuya cjuahñu rë me. Hya xi camá ne, tjun sa na María tsëhë nandya Mágdala cavëë na me, na xi cavaxë me yatu xitsehen xahasen rë hatsëë.

¹⁰ Hane na vëhë quiji quicun na xuta ladu rë me xi jemu jihnda tsëhë cjuachoho.

¹¹ Hane xi cahndë me cjuata Jesús tacun nga me cjuahñu hane na vëhë ne, cavëë na me, camacjaain rë xuta jan.

Hya xi cavuya Jesús cjuahñu ne, jo cha ladu rë me cavëë cha me

¹² Hya xi cavatju vëhë ne, jo cha ladu rë Jesús ne cjuí cha nguiña. Hane cojo Jesús cjuí me cojo cha, peru ha ngu xcusun jyíhi me.

¹³ Hane cha xi cuacun jan ne, xi tu cavëë cha xi hacui me ne, cavuya cha ne, quiji cachja cha cojo cha xi yahnga xi cavëë cha me. Peru hacuaha camacjaain rë cha xi yahnga jan.

Jesús ne, casuaxa me cha apóstol

¹⁴ Ngu ndiya nga ne, cafehe nga me hiscan siu cha ladu rë me xi tengu jan, tijinë cha niñu. Hane cachjataha me yëjë ni cha ngatsë rë xi jemu taja rcu cha, tsëhë xi camacjaain rë cha tsëhë xuta xi cavëë rë me xi tacun nga me cjuahñu.

¹⁵ Cavatju cacjan me cojo cha ne, sehe ngajan cavetsihin cachja me cojo cha cuitjin:

—Tangún jingujyë ni ngasunhndë ne, tinúnun cojo yëjë ni xuta cjuata rë Nina.

¹⁶ Yo xi cumacjain rë cjuata vëhë hacuaha xtenda ne, cuechu xcun Nina. Yo xi cumacjaain rë ne, cuechu me castigu xi sahmi Nina xi cueyun.

¹⁷ Hane xuta xi cumacjain rë me ne, sahmi me xcusun vihi xi cueyanangui me ñihi naha ne: cuma cuaxë me xitsehen xi hincha xahasen rë xuta; cuma cuichja me ngu ngu xcusun hne;

¹⁸ yë ne, sá xi cjuahatsja me chu, o sá xi cuihi me ngu venenu ne, tsajin mé cumá rë me; hane tu cuetahatsja ni me xuta hmu rë ne, cumandaja xuta hmu rë jan.

Jesús ne, cjuiniji me ngahnga

¹⁹ Xi cajnetaha cachja Jesús, me xi Nai naja, cojo cha ladu rë me cjuata vëhë ne, quiji me ngahnga, cavéjña me ladu quixi tsëhë Nina.

²⁰ Hane cha ladu rë me ne, cavetju cha quiji cha, cachja cha cjuata rë Nina yëjë ni ladu. Hacuaha Nai naja ne, cavisecoo me cha. Hane ngatsë rë xcusun xi cavëë xuta xi casahmi cha jan ne, vëhë xi tsejen xi quixi cjuata xi cachja cha.

Cjuandajyihî Xi Catsihindu San Lucas Tsêhê Jesucristu

¹ Jemu cjin xuta xi ha catsihindu me cjuâ xi chja tsêhê yêjê xcusun xi sehe casahmi Nina ngajni naja ngayaan xuta ngasunhndê.

² Meje tsihindu me cjuâ vêhê sacuatjin camahani casua camachaya naja me xi cavêëndaja cojo tuxcun hisca ntsacu cavetsihin sehe cafachaxa me xi tsinguitsojo me cjuâ jan.

³ Hisca hatsêê ne, ngahan ne, hacuaha ha jemu ndaja cavinenguêsê yêjê ni hacutjin camâ. Vêhê xi xi mâ nâ ne, hacuaha ndatjin xi tsihindu chichihin nuju cjuâ tsêhê yêjê hacutjin camâ, ngayun tatâ Teófilo,

⁴ cojo sa xi sacûndaja nuju cjuaquixi tsêhê cjuâ xi ha camachaya nuju jan.

Cafehe cjuâ xi tsin Juan Vitenda rê Xuta

⁵ Nixtin hya xi Herodes cavitexa me yêjê ni xuta tjê rê Israel ne, cavêjña xu ngu nahmi xi hmî rê Zacarías, me xi mâ ladu rê Abías. Hane chjuun rê Zacarías ne, Elisabet hmî rê me, hacuaha tjê rê Aarón xu mâ me.

⁶ Hane Zacarías cojo Elisabet ne, tyjahi cjuatacun rê me xcun Nina ta, tsêhê xi tsajin xu jyê rê me xi tisahmichihin me yêjê ni sacuatjin cavitexa Nina.

⁷ Hane tsajin rê me quihndi ta, tsêhê xi Elisabet ne, hatuxa maji xu sacû rê me quihndi, hacuaha catsijo ni me ne, ha jemu changá xu me.

⁸ Hya xi camâ ne, cavechú nixtin xi casatê rê Zacarías cojo yêjê sa nahmi xi mâ ladu rê Abías xi sahmi xu me xâ xcun Nina xi mâ me nahmi.

⁹ Hane sacuaha xcusun rê nahmi ne, catsintsavê xu me ngu suerte cojo sa xi cuma tsejen ne, jarê xu me xi satê rê xi cuisehen ndava Nina, cuaca tyjungunsa. Hya xi camâ ne, casatê xu rê Zacarías.

¹⁰ Hane yêjê xutacjin jan ne, caviyuju xu me candatsen sahmi me oración rê me, hora xi tivaca xu Zacarías tyjungunsa cahntsua ndava Nina.

¹¹ Hane hora xi tivaca me tyjungunsa jan ne, camatsejen xu ngu ángel secun taha ladu quixi tsêhê ngasuncun hiscan xi tí tyjungunsa.

¹² Hane xi cavêê Zacarías ángel jan ne, jemu quijircun rê me hacuaha jemu catsacjun xu me camâ.

¹³ Ngajan xi ángel jan ne, cuitjin xu cachja cojo rê me:

—Xicarcuin ngaye Zacarías ta, cjuâ xi cachjahye ne, cahndê Nina. Vêhê xi na Elisabet chjuun riji ne, sacû rê na ngu quihndi, hane quihndi vêhê ne, Juan tehe ñihi rê.

¹⁴ Hane jemu cjuê ri cjuasua hacuaha jemu ndaja cuma ri, hacuaha jemu cjin xuta xi jercu tjin rê me cjuasua xi catsin quihndi vêhê ta,

¹⁵ tsêhê xi jemu jyê hnga cuma cojo cjuatacun rê ngajan xcun Nina. Hacuaha cuiin camahani xan hacuaha cuiin camahani nandâ machihi. Hacuaha hisca hya xi caseya quihndi vê cahntsua naa rê ne, Hasen rê Nina quitsê rê xahasen rê.

¹⁶ Hacuaha quihndi vêhê sahmi xi jemu cjin xuta tjê rê Israel cuya nga me ndiya rê Nina rê me.

¹⁷ Quihndi vê ne, vêhê cuinduva titjun, sehe cuinduva Nina. Hane sacuatjin jyê hnga profeta Elías cojo cjuatacun rê me hatsêê nixtin ne, hacuanitjin ni jyê hnga cuma quihndi vêhê cojo cjuatacun rê, cojo sa xi quihndi vêhê ne, sahmi xi cuya cuma ndaja cacun nga yêjê ni nahmi rê nixti cojo nixti rê me, hacuaha sahmi xi yêjê xuta xi vihndiin me tsêhê Nina ne, cuma tangun cjuatacun rê me cojo cjuatacun rê xuta xi tyjahi cjuatacun rê me. Hane cuatjin chuva vêhê ne, cuêhêchjine quihndi vêhê xuta xi cuihndê me tsêhê Nina. —Cuahaxutjin cachja ángel.

¹⁸ Sehe ngajan xi Zacarías ne, cuitjin xu cavinenguise me ángel:

—¿Hacutjin sacû ná cjuaquixi xi cuatjin jain cuma ni? ta ngahan ne, ha jemu changá ngahan, hacuanitjin ni chjuun naha ta jemu changá na. —Cuahaxutjin cachja me.

¹⁹ Sehe ngajan xi ángel jan ne, cuihixutjin cafayangui nga:

—Ngahan xi Gabriel ngahan, ngahan xi tejña ngajan xcun Nina. Hacuaha ngahan xi catsingatju ná Nina xi cuisiajme cojo ri hacuaha suâ cumachaya ri cjuandajyihî vêhê.

²⁰ Chutsijin ni, quihndê ta camacjain ri tsêhê cjuâ xi cachjá cojo ri ne, cumaji cuinoje, tsêhê xi cuma lihmi ngaye hisca hya xi cuetjucaa cjuâ xi cachjá cojo ri. Cjuâ vêhê ne, hatuxa cuetjucaa hya xi cuechú nixtin rê. —Cuahaxutjin cafayangui ángel.

²¹ Jinguyêjê rê ne, xutacjin jan ne, jercu siuya xu me Zacarías, hisca fircun rê me tsêhê xi cuatjin jercu vindeya rê Zacarías xi cavisehen xu me ndava Nina.

²² Hane hya xi cavetju me ne, maji xu chja me cojo xuta. Hane xuta jan ne, cavacun rë me ta Zacarías ne, tjin mé xi cavëë me. Hacuaha tu tisahmitsja ni me ta, tsêhë xi lihmi cuaha xu me.

²³ Hya xi cavatju nixtin xi satë rë me xi sahmi me xá xi má me nahmi ne, cavuya cafe xu me ndava me.

²⁴ Hya xi camá ne, xi cavatju sa nixtin ne, casacu xu rë chjuun rë me quihndi, hane cahntsua hñú sá xi jiya quihndi rë Elisabet jan ne, cuatjin caseyahma xu me ndava me. Hane cuitjin xu cachja suvá me:

²⁵ “Cuitjin casahmi Nina cojo ná ngu cjuandaja, quihndë xi camayuma rë me ngahan hane cafaxin me cjuasava xi má ná ngajñi rë xuta tsêhë xi sacuiin ná quihndi.” Cuahaxutjin cachja me.

Cafehe cjuaxi tsin Jesucristu

²⁶ Xi ma jyun sá xi jiya xu quihndi rë Elisabet ne, catsingatju Nina ángel xi hmí rë Gabriel ngu nandya xi hmí rë Nasaret, tsêhë distritu Galilea,

²⁷ ndava ngu chjuun xungun xi hmí xu rë María. Hane María jan ne, tacunvasen cjuavixan rë me cojo ngu xihin xi hmí rë José, ngu me xi tjë rë David, ngu xutachanga xi camatitjun xu tsêhë xuta tjë rë Israel.

²⁸ Hane xi cavisehen ángel ndava María jan ne, sehe cachja xu cuitjin:

—Cuhndari, tsan. Nina ne, catsinchacun me ngaye, hacuaha tacun me cojo ri. Ngajñi rë yëjë ni yachjin ne, ngaye xi jercu catsinchacun ri Nina. —Cuatjin xu cachja ángel.

²⁹ Xi cahndë xu María cjuaxi cachja ángel jan ne, catsacjun me camá, sehe catsingataha cacun xu me mé xcusun nina xi casua ángel me.

³⁰ Sehe ngajan xi ángel ne, cuitjin xu cachja cojo rë me:

—Xicarcuiin María ta Nina ne, jemu tjin rë me cjuandaja cojo ri.

³¹ Quihndë ne, sacú ri ngu quihndi, hane hacuaha cuechú nixtin xi tsin ri quihndi vëhë. Quihndi vëhë ne, tehe ñihi rë Jesús.

³² Hacuaha jemu jyë hnga cuma cojo cjuatacun rë, hacuaha Quihndi rë Nina xi Matitjun cjuahañihi. Hacuaha Nina sahmi me xi cuitexa quihndi vëhë sacuatjin cavitexa xutachanga rë, me xi hmí rë David.

³³ Hane vëhë cuitexa rë xuta tjë rë Israel, hane gubernu rë ne, tsajin nu tsajin nixtin cuijnetaha. —Cuatjin xu cachja ángel.

³⁴ Sehe ngajan xi María ne, cavinenguise xu me ángel cuitjin:

—¿Hacutjin cuma xcusun vi? ta ngahan ne, cjëë sacú xihin naha. —Cuatjin xu cachja me.

³⁵ Hane xi cafayangui ángel ne, cuitjin xu cachja:

—Hasen rë Nina xi Matitjun ne, cuinduva cuaxtë ri sacuaha ngu tjahnguen. Vëhë xi quihndi xi tsin ri ne, hatuxa tyjahi cojo cjuatacun rë, hacuaha Quihndi rë Nina Jain.

³⁶ Hacuaha na Elisabet xinguin ne, handasa ha jemu changá na ne, hacuaha casacu rë na ngu quihndi. Ha quihndë jyun sá yaha na quihndi, na xi chja cjuaxi hatuxa maji sacú rë quihndi.

³⁷ Cuatjin camá ta, xi cuma rë Nina ne, tsajin camahani mé xi cumaji cuma. —Cuatjin xu cachja ángel.

³⁸ Ngajan xi María ne, cuitjin xu cafayangui me:

—Ngahan ne, sacuaha ngu hndixahan rë Nina ngahan. Catisahmi Nina cojo ná sacuatjin cjuaxi canújun. —Cuatjin xu cachja me.

Ngaxtun vëhë ne, sehe cafe ángel.

Cavusehenya María Elisabet

³⁹ Nixtin hya ne, cavetju xu María, ngu quixi ni quiji me ngu nandya ngajan nangui ndetjún tsêhë distritu Judea.

⁴⁰ Hane xi cafehe me ngajan ne, cavisehen xu me ndava Zacarías, sehe cachja me nina cojo Elisabet.

⁴¹ Hane xi cahndë xu Elisabet xi cachja María nina ne, cafiniya xu quihndi xi jiya cahntsua Elisabet. Ngajan xi Elisabet ne, catsë rë xahasen rë me cojo Hasen rë Nina.

⁴² Hane sehe jercu hñu xu cachja me cjuaxi vihi cojo María:

—Ngajñi rë yëjë ni yachjin ne, ngaye xi jercu catsinchacun ri Nina, hacuaha catsinchacun me quihndi xi tsin ri.

⁴³ ¡Mé má ngahan xi tu ngaye xi naa rë nai naha ngaye, ndove tichusihinye ná!

⁴⁴ Xi tu cahndë xi canoje nina cojo ná ne, hora vëhë cafiniya quihndi xi jiya cahntsua xi ndama rë.

⁴⁵ Jemu ndaja tsiji xi macjain ri xi yëjë ni cjuaxi cachja Nina cojo ri ne, cuetjucaa jain. —Cuatjin xu cachja Elisabet.

⁴⁶ Sehe ngajan xi María ne, cuitjin xu cachja me:

Ngahan ne, jercu sahme jyë sahme hnga Nina;

⁴⁷ hacuaha jercu ndama ná tséhë Nina, me xi voxëtje ná.

⁴⁸ Casahmicuenda Nina ngahan, ngahan xi sacuaha ngu hndixahan rë me ngahan ta, quihndë cojo nixtin xi cjuí sa ne, cuichja yëjë xuta xi siu cojo xuta xi sehe tsin sa xi jemu ndaja tsahan;

⁴⁹ tséhë xi Nina xi jemu jyë hnga me cojo ngahñu rë me ne, jemu vengui chji rë xcusun xi casahmi me cojo ná.

jJemu tyjahi me cojo cjuatacun rë me!

⁵⁰ Nina ne, hatuxa jemu tjin rë me cjuayumatacun cojo yëjë xuta xi faharcun rë me ha tucutjin cjin xuta tsetsin me jima ngundiya jima ngundiya.

⁵¹ Nina ne, sahmi me hacutjin xi meje sahmi me cojo ngahñu jyë xi tjin rë me:

tsinguitojo me yëjë xuta xi jemu tjin rë cjuaxta cahntsua xahasen rë;

⁵² tsinguijne me xuta xi matitjun tséhë xcun xá rë,

hacuaha sahmi yehe sahmi hnga me xuta yuma.

⁵³ Xuta xi machaja rë me ne, jemu yehe cjuandaja sua Nina me,

peru xuta nchina ne, súvá tsja tiya me tsicuya Nina me cjue me.

⁵⁴ Nina ne, cuisecoo naja me ngayejen ni xuta tjë rë Israel, ngayaan xi tséhë me ngayaan,

hacuaha tsinguitsjen me xi cumayuma rë me ngayaan.

⁵⁵ Xi cuatjin ne, cuetjucaa jain sacuatjin xi ha cachja me cojo xutachanga naja Abraham, cojo yëjë sa tjë rë me.

Cuatjin xu cachja María.

⁵⁶ Hya xi camá ne, María jan ne, cavéjña xu me jyan sá ndava Elisabet, sehe cavuya cafe me nangui rë me hiscan tjin ndava me.

Hacutjin camá hya xi catsin Juan Vitenda rë Xuta

⁵⁷ Quihndë ne, cavechú nixtin xi tsin rë Elisabet quihndi, hane catsin rë me ngu quihndi xihin.

⁵⁸ Xi camachaya rë yëjë xuta xi siu tahndee ndava me cojo yëjë xicjin Elisabet xi jercu camayuma rë Nina Elisabet ne, jercu ndaja camá rë me xingu xingu me cojo Elisabet.

⁵⁹ Hya xi camá xu ne, xi cavetjucaa quihndi jan jyin nixtin ne, cafehe nga me xi siu tahndee ndava me jan cojo xicjin Elisabet xi cuma suhi tséhë xi xtí chuxin rë quihndi. Hane meje suañihi me quihndi jan Zacarías, tséhë xi cuatjin hmí rë nahmi rë.

⁶⁰ Ngajan xi cachja xu naa rë quihndi jan cuitjin:

—Hajín ta quihndi vi ne, Juan cjuahañihi. —Cuatjin xu cachja me.

⁶¹ Hane xuta jan ne, cuitjin xu cachja me:

—Peru ngayun ne, tsajin hisca ngu xingun xi cuatjin hmí rë. —Cuatjin xu cachja xuta jan.

⁶² Ngajan xi xuta xi cuacun jan ne, tu casahmi tsjá xu ni me cojo nahmi rë quihndi xi cavinenguise me hacutjin meje rë nahmi rë quihndi xi cjuahañihi quihndi jan.

⁶³ Ngajan xi Zacarías ne, cafehya xu me ngu pizarra, sehe ngajan catsihindu me cjua vihi: “Juan cjuahañihi.” Cuatjin xu catsihindu me. Hya xi camá ne, yëjë ni me ne, jemu quijircun xu rë me.

⁶⁴ Hane hora vëhë ni ne, camá xu cachja Zacarías, hane jemu ndaja cavaxëndaja me Nina.

⁶⁵ Ngajan xi xuta xi siu tahndee ndava me jan ne, jemu catsacjun xu me camá, hane jingujyë ni ladu nangui ndetjún tséhë distritu Judea hiscan xi siu xuta ne, jercu cavisajmi xu me tséhë cjuacjintacun vëhë.

⁶⁶ Hane yëjë xuta xi camachaya rë cjuacjintacun vëhë ne, jercu cjin catsingataha cacun me, hisca cachja xu me cuitjin:

—¡Cuechú nixtin xi quihndi vi ne, cuma ngu xihin xi jyë hnga cojo cjuatacun rë!

Cuatjin xu cachja xuta xi cuacun jan ta, tséhë xi quihndi vëhë ne, Nina yahangui jain me.

Cjua rë Nina xi cachja Zacarías

⁶⁷ Zacarías, nahmi rë quihndi jan ne, ña catsë rë me cojo Hasen rë Nina, hane cachja xu me cuitjin cjua xi cafahatsja me tséhë Nina:

⁶⁸ ¡Tjemu ndaja Nina naja ngayaan xuta tjë rë Israel!

tséhë xi cuinduva me cjuaha naja me xi cuma yaan xuta rë me.

⁶⁹ Nina sahmi me xi ngajñi rë tjë rë David, ngu xuta rë Nina ne, cuetjujñi ngu xihin xi cuaxëtje naja,

⁷⁰ sacuatjin xi ha cachja profeta xi cavejña me tséhë Nina,

hya xi cachja me cojo xutachanga naja cjua rë Nina hatsëe nixtin.

⁷¹ Hacuaha cachja Nina xi cuaxëtje naja me tséhë condra naja,

hacuaha cuaxëtje naja me tséhë yëjë xuta xi choho vëë naja,

⁷² hacuaha cumayuma rë me tséhë xutachanga naja

hacuaha tsinguitsjen me compromisu ximinchacun xi casahmi me cojo xutachanga naja.

⁷³ Nina ne, cachja me: “Ngahan suva hvê”, hya xi casahmi me compromisu jan cojo xutachanga naja Abraham.

⁷⁴ Hya xi casahmi me compromisu vêhê ne, cachja me xi cuêhëndaya naja me tsêhê condra naja,

cojo sa xi ngayaan ne, hacuiin cojo chircun chjahanrcun me ta

⁷⁵ chjahanrcun me cojo ngu cjuatacun tyjahi, xi tsajin jyê naja xcun me hacutjin nixtin xi nechan xcun cjuahñu naja.

⁷⁶ Ngaye tsan ne, hacuaha cuma ngaye ngu profeta tsêhê Nina xi Matitjun ta, tsêhê xi ngaye cuihintitjin, choxehe ndiya tsêhê Nina,

⁷⁷ hacuaha tehe cumachaya rê xuta rê Nina xi cuaxêtje Nina me, cuma cuinújan ne, tsinchataha me tsêhê jyê rê

⁷⁸ ngatsê rê ta tsêhê xi Nina ne, jemu tjin rê me cjuayumatacun cojo naja.

Hacuaha ngatsê rê cjuayumatacun vêhê ne, Nina tsingatju me tsêhê ngahnga ngu xi sacuaha tsuhi,

⁷⁹ cojo sa xi sua hasen rê ngajñi naja xi nechan cojo ngu cjuacjintacun jyê xi hisca sacuinyiin naja hacutjin naxentjeen yojo naja,

ngayaan xi tjemu tsavi nechantahan tsêhê cjuaveya,

hacuaha cojo sa xi cjucojo naja

ndiya tsêhê cjuajeya.

Cuatjin cachja xu Zacarias.

⁸⁰ Hya xi camá ne, quihndi jan ne, camajyê, hacuaha cavejñahñu xu cjuatacun rê. Hane xi camá ngu xihin jyê ne, quiji cavêjña xu ngajan ngu xín camahani tsêhê nandya, hisca hya xi cavechú nixtin xi cavetsihin cachja cjuatacun rê Nina cojo xuta tjê rê Israel.

2

Hacutjin camá hya xi catsin Jesucristu

¹ Cuitjin xu camá nga ngunixtin hya xi Herodes vitexa me xuta tjê rê Israel. Me xi matitjun camahani xi hmi rê César Augusto ne, cavitexa xu me xi yêjê ni xuta xi siu ngahma gobiernu rê me ne, cjue me cuiyujutahaxujun me xi cuechjitje me.

² Hacuaha hya xi cuatjin tjuntjun caviyujutaha xujun xuta ne, hya vitexa xuta Cirene ngajan distritu Siria.

³ Ngajan xi yêjê ni xuta ne, quiji xu me caviyujutaha xujun me, jima ngu me hiscan nangui rê xutachanga rê me.

⁴ Cuatjin camá xi José ne, cavetju xu me tsêhê nandya Nasaret, distritu Galilea, quiji me distritu Judea, nangui rê xutachanga rê me David, hiscan xi hmi rê Belén, tsêhê xi José ne, tjê rê David xu má me.

⁵ Quiji casetahaxujun tangun me cojo María, me xi tacunvasen cjuavixan rê me cojo. Hane María ne, jiya xu quihndi rê me hya xi quiji me.

⁶ Hya xi camá ne, jinguyêjê rê xi siutahá xu me ngajan ne, cavechú nixtin xi tsin xu quihndi rê me,

⁷ hane catsin rê me ngu quihndi xihin, xi quihndi tjun rê me. Hane xi cavatju catsin quihndi jan ne, sehe cafaha me cavaxtê me ngu tsjian, sehe cafaña xu me quihndi jan cahntsua hiscan jineyá chu ta, tsêhê xi casacuiin xu cahndê cahntsua ndihya xi cuiyuju me, tsêhê xi jemu quitsê camahani xuta.

Cachja ángel cojo cha xi sahmi cuidadu rê chu

⁸ Ha taha ladu vêhê ni ne, siutahá ngujo cha nguixun ngajan nguijña, xi sahmi cuidadu xu cha chu tsánga rê cha.

⁹ Hya xi camá ne, ha tu ñahñu camatsejen xu ngu ángel tsêhê Nina hiscan xi siutahá cha, hane hora vêhê ni ne, hasen ndajiyi rê Nina ne, jercu casahmi hasen xu rê jinguyêjê ni hiscan xi siutahá cha, hane jemu catsacjun camahani cha camá.

¹⁰ Ngajan xi cachja xu ángel cojo cha cuitjin:

—Xicarcuun ta, nguehe nduva tsha cumachaya nuju ngu cjuandajiyi xi hisca yêjê xuta tjê rê Israel jercu ndaja cuma rê me

¹¹ ta nguehe Belén, nangui rê xutachanga nuju David ne, quihndê catsin ngu quihndi xi cuaxêtje nuju, quihndi xi Nina catsingatju rê xi cumatitjun tsujun.

¹² Hane cuitjin sacú nuju cjuaquixi tsêhê cjuatacun xu cachjá cojo nuju vê: xi cjuhun jan ne, cuechun hiscan xi chun ngu quihndi tixtê rê tsjian, jiña cahntsua hiscan jineyá chu. —Cuatjin xu cachja ángel.

¹³ Hane ha tu ñahñu camatsejen sa jercu cjín camahani ángel xi nduva xu ngahnga, cafehe hiscan xi secun ángel xi cafehe titjún, tivaxêndaja rê Nina cojo cjuatacun vihi:

¹⁴ Jemu jyê hnga Nina cojo Hasen rê me ngajan ngahnga!

¡Hane nguêhe nangui ne, cuisehen cjuajeya rê Nina cahntsua xahasen rê xuta xi chuya rê Nina tsêhê!

Cuatjin xu cachja ángel cjin jan.

¹⁵ Hya xi camá ne, hya xi cavuya quiji nga ángel jan ngahnga ne, cha xi sahmi cuidadu chu tsánga rê jan ne, cuitjin cachja cha cojo xicjin cha:

—¡Cjuanguen ni! Cjuanguen hisca nandya, cuanguen chutsejen xcusun xi camá vi, sacuatjin casua Nina camachaya naja. —Cuatjin xu cachja cha cojo xicjin cha.

¹⁶ Hya xi camá ne, ngusun xu ni cafe cha, hane xi cafehe cha nandya ne, casacuse rê cha hiscan tacun María cojo José, cojo quihndi jan, jiña cahntsua hiscan jineyá chu.

¹⁷ Hya xi cavêê xu cha quihndi jan ne, sehe cavetsihin casuacuenda cha yêjê cjuá xi cachja ángel cojo rê cha tsêhê quihndi vêhê.

¹⁸ Hane xi cahndê xuta cjuá xi cachja cha xi cuacun jan cojo rê me ne, jemu quijircun xu rê me.

¹⁹ Peru María ne, cavetjo cavetjo ni me yêjê ni cjuá vêhê cahntsua xahasen rê me, hacuaha jercu cjin xu catsingataha cacun me.

²⁰ Hane xi cavuya quiji nga cha xi sahmi cuidadu chu rê jan ngajan ngujiña ne, taha tisahmi jyê tisahmi hnga xu cha Nina hacuaha taha tivaxêndaja cha me tsêhê yêjê cjuá xi cahndê cha cojo xcusun xi cavêê cha, sacuatjin cachja ángel cojo rê cha.

Quiji caningacun rê Jesucristu cojo Nina ngajan Jerusalén

²¹ Xi cavechú xu jyin nixtin quihndi ne, hacuaha hatuxa hya cavechú nixtin xi xtí chuxin rê, hane cuatjin camá cojo quihndi. Hacuaha Jesús cafahañihi xu quihndi, ñihi xi ha cachja ángel hisca chaja sa xi seyahma quihndi cahntsua naa rê.

²²⁻²⁴ Hya xi camá ne, xi cavechú xu nixtin xi cjue naa rê quihndi yungun xi matitjun cojo quihndi xi cuma tyjahi me xcun Nina tutjin chja ley rê Moisés ne, quiji José cojo María Jerusalén, quiji cani me ngu cjuatjo ta, tsêhê xi chja ley rê Nina ta meje rê xi cjue jo chu tucjin, o sá xi jo chu paloma chihndê. Hacuaha quijicojo xu me quihndi jan Jerusalén xi tsingacun me quihndi jan cojo Nina. Quitahá xujun xcun ley rê Nina xi yêjê ni quihndi tjun xi xihin ne, hatuxa tsêhê Nina cuma.

²⁵ Cavéjña xu ngu xihin xi hmí rê Simeón ngajan Jerusalén. Xihin vêhê ne, tyjahi xu me cojo cjuatacun rê me ngajan xcun Nina, hacuaha jemu faharcun me Nina. Hacuaha jemu xehe xu rê me xi cjuehe xuta xi yaha cjuetacun jan xi cuma rê xuta tjê rê Israel. Hacuaha Hasen rê Nina ne, jiya cahntsua xahasen rê Simeón.

²⁶ Hane Hasen rê Nina jan ne, casua xu camachaya rê me xi jinguyêjê rê xi cjêê scuêê me xuta xi tsingatju Nina jan ne, hatuxa cuyeain xu me.

²⁷ Hane quiji me yungun xi matitjun, tsêhê xi cuatjin cachja Hasen rê Nina cojo rê me. Hacuaha xutacha rê quihndi xi hmí rê Jesús jan ne, quijicojo xu me quihndi jan yungun vêhê, xi sahmichihin me sacuaha xcusun xi vitexa ley rê Moisés hacutjin cuatju quihndi cuma.

²⁸ Hya xi camá ne, cafaha xu Simeón quihndi jan cavataha me, sehe hacuaha cavaxêndaja me Nina cojo cjuá vihi:

²⁹ Ngayun Nina naha, ngayun ne, ha cuma tuhun cahndê xi ngahan hndixahan nuju ne, cueba cojo cjuandaja cojo cjuajeya sacuatjin xi ha canújun.

³⁰ Cuma cueya ta, tsêhê xi quihndê ne, cahvê suva xuta xi caningatjun xi cuaxêtje niji,

³¹ me xi caningatjun xcun cojo xcun yêjê ni xuta,

³² me xi cuinduva sacuaha ngu ndihi xi sua me cjuahasen xi cuma rê xutaxín,

hacuaha cuinduva me xi sahmi yehe sahmi hnga niji me, ngayin xuta nuju, xuta tjê rê Israel.

Cuatjin xu cachja Simeón.

³³ Hane xutacha rê quihndi jan ne, jemu quijircun xu rê me tsêhê xi cuatjin cachja Simeón tsêhê quihndi jan.

³⁴ Hane Simeón ne, catsinchacun me me xi cuacun jan, sehe cachja xu me cojo María naa rê quihndi jan cuitjin:

—Quihndi vihi ne, hacuaha sahmi xi jemu cjin xuta tjê rê Israel chajá me, hacuaha sahmi xi jemu cjin xuta tjê rê Israel cuetjutje me. Hacuaha quihndi vihi ne, sua cumachaya rê xuta mé xi meje rê Nina, hacuaha jemu choho cuichja xuta tsêhê quihndi.

³⁵ Cuatjin cuma cojo sa xi ngajan sesunhngatsejen yêjê hacutjin xi tsingataha cacun jemu cjin xuta cojo cjuatacun rê me. Hacuaha ngayun ne, jercu cuma rê xahasen nuju, sacuaha xi quicha casehen rê xahasen nuju. —Cuatjin xu cachja Simeón.

³⁶ Hacuaha tacun xu ngu chjuun xi hmí rē Ana ngajan yungun, quihndi rē Fanuel, tjē rē xutachanga xi hmí rē Aser. Chjuun jan ne, profeta xu má me. Hacuaha jercu changá xu me. Xi cavixan me ne, cavéjña me cojo xihin rē me yatu nu.

³⁷ Ngaxtun vèhē ne, cavéjña cahan me. Hane xi casacu xicjin xu me cojo xutacha rē Jesús ne, ñujuchan ñuju nu xu tjin rē me. Hacuaha jemu quiji camaha xu ni me yungun xi matitjun. Jemu cjin ndiya ne, cajinii xu me niñu xi faharcun me Nina. Hacuaha jercu sahmi xu me oración rē me. Nixtin nixten faharcun me Nina.

³⁸ Hacuaha ha hora xi siu xu ni xutacha rē Jesús ngajan yungun jan ne, cafehe Ana. Hane xi cavèe me quihndi Jesús jan ne, casua xu me nacuechji rē Nina. Ngaxtun vèhē ne, sehe cavetsihin cachja xu me tsèhē Jesús cojo yèjē xuta xi jemu meje rē xi cuechú nixtin xi cuaxètje Nina nandya Jerusalén.

Cavuya me cojo Jesucristu nandya Nasaret

³⁹ Xutacha rē Jesús ne, hya xi ha cafè casahmichihin xu me yèjē xcusun xi vitexa ley rē Nina ne, cavuya cafe me nangui rē me, hiscan xi hmí Nasaret, distritu Galilea.

⁴⁰ Quihndi jan ne, camajyē hacuaha casacuhñu rē, hacuaha jercu cavechútaha cjuatacun rē, hacuaha jercu cavisehen xu cjuandaja rē Nina cahntsua xahasen rē.

Casetaha suvá Jesucristu ngajan yungun xi matitjun

⁴¹ Chuva nu chuva nu ne, xutacha rē Jesús ne, fi xu me suhi tsèhē Pascua ngajan Jerusalén.

⁴² Hane hya xi Jesús cavechú me tejó nu ne, sacuaaha xcusun rē xuta cojo suhi vèhē ne, quiji xu Jesús cojo xutacha rē me ngajan Jerusalén.

⁴³ Xi cavatju suhi jan ne, xutacha rē Jesús ne, cavetju xu me tsèhē Jerusalén xi cuya cjue me nangui rē me. Peru Jesús ne, hisca camachayiin rē xutacha rē me ne, casetaha suvá xu me Jerusalén.

⁴⁴ Xi má rē xutacha rē me ne, jiyajñi me ngajñi rē xutacjín tife me. Hane xi cafè ngu nixtin tife xutacha rē me ndiya ne, cavetsihin cavanguise xu me Jesús jan ngajñi rē xuta rē me cojo ngajñi rē yèjē xuta xi vinga rē me.

⁴⁵ Hane xi casacuiin rē me Jesús jan ngajñi rē xutacjín jan ne, cavuya quiji xu me hisca Jerusalén, xi tivanguise me me.

⁴⁶ Hya xi camá ne, xi majyan nixtin jan ne, sehe casacu xu rē me Jesús ngajan yungun xi matitjun, tacun me ngajñi rē maestru xi vicuya cjuachacun, tivisiñuju me cjua rē maestru hacuaha tivinenguise xu rē me jingu sa cjuachacun.

⁴⁷ Hane yèjē ni xuta xi tivisiñuju cjua rē Jesús jan ne, jercu fircun xu rē me, tsèhē xi cuarcu quicun cacun me hacuaha tsèhē xi jercu ndaja titsicuya me cjua tsèhē maestru jan.

⁴⁸ Hane hya xi cavèe xu xutacha rē Jesús xi ngajan tacun me ne, tu quiji tsèhē me, sehe cachja naa rē me cuitjin:

—¿Mé má cuatjin canihñi cojo niji, tsan? Chutsijin ta cuajyihí ngahan cojo nahmi riji ne, cojo cjin cjuacjintacun niji ne, catujyihinyin cavinchinsin ri. —Cuatjin xu cachja me.

⁴⁹ Ngajan xi Jesús ne, cuitjin xu cachja me cojo xutacha rē me:

—¿Mé má cuatjin tu gueuehe tu ngajan cavinchunsun ná ni? ¿Há hyúun ta hatuxa meje rē xi cuitejña ndava nahmi naha? —Cuatjin xu cachja Jesús.

⁵⁰ Peru xutacha rē Jesús ne, cajñii xu rcu me cjua xi cachja Jesús cojo rē me.

⁵¹ Hya xi camá ne, cavuya cafe xu Jesús cojo xutacha rē me nangui rē me ngajan Nasaret. Hacuaha cahndē me tsèhē xutacha rē me hacutjin xi quiji sa nixtin rē me. Hane naa rē Jesús ne, cavetjo cavetjo xu ni me yèjē ni cjua vèhē cahntsua xahasen rē me.

⁵² Sacuaaha Jesús ne, jima jyē xu me cojo jojo rē me, hacuaha jima jyē jima hnga me cojo cjuatacun rē me. Hacuaha tichuya sa xu rē Nina tsèhē me, hacuaha tichuya sa rē xuta tsèhē me.

3

Cachja Juan Vitenda rē Xuta cjuandajyihí rē Nina

¹ Cuitjin xu camá hya xi cafè tyjuhun nu jiya me xi matitjun camaha ni xi hmí rē Tiberio César xcun xá rē me xi vitexa me jingu ni ladu. Poncio Pilatu ne, me vèhē vitexa xu me distritu Judea, hane Herodes ne, me vèhē xu vitexa me distritu Galilea, hane hntséjñu me xi hmí rē Felipe ne, me vèhē xu vitexa me distritu Iturea cojo distritu Traconite, hacuaha Lisanas ne, me vèhē xu vitexa me distritu Abilinia.

² Hane sacuaaha nahmi xi matitjun xu ne, Anás cojo Caifás má me. Hane sacuaaha nixtin vèhē ne, Juan quihndi rē Zacarías ne, hya xi quitahá me ngajan ngu xín tsèhē nandya ne, cafahatsja me cjua xi catsingatju xu Nina.

³ Hane quiji catsujyihiya me yèjē ni ladu tiña tsèhē ndajyē Jordán, tichja me xi meje rē xi tsindeya xu xuta cjuatacun rē me hacuaha xtenda me, cojo sa xi tsinchataha Nina xuta tsèhē jyē rē me.

⁴ Xi cuatjin xu casahmi Juan ne, casahmichihin me sacuatjin camahindu hatsëë nixtin xcun xujun xi chja cjua rë profeta Isaías xi chja cuitjin:

Cuitjin jercu hñu cuichja ngu xuta ngajan hiscan jemu xín tsëhë nandya:

“Tuhunchjinu ndiya tsëhë Nai naja;

ninguixun ndiya tsëhë me.

⁵ Yëjë ni hiscan nangui cahntsua ne, tsëya rë,

yëjë ni ndetjún cojo yëjë ni naxi ne, cuijnenangui,

yëjë ni ndiya lahñi ne, cuma quixi,

yëjë ni ndiya xi hacuiin chihin ne, cuma chihin.

⁶ Hane yëjë ni xuta ne, scuëë me hacutjin vaxëtje Nina xuta rë me.”

Cuatjin xu catsihindu Isaías cjua xi jercu hñu cuichja xuta jan.

⁷ Ngajan xi hya xi quiji xutacjin xi xtenda me ne, cuitjin xu cachja Juan cojo xuta:

—¡Ngayujun ni ngayun quihndi rë chu tsehen matsejen ne!, ¿yo cavinchangui nuju xi nihñu ngahñu xi cuetjuntjun tsëhë castigu xi hatuxa tsingatju Nina?

⁸ Sá xi meje jain cuetjuntjun matsejen ne, nihñu suvá cjuandaja sacuatjin sahmi xuta xi catsindeya jain me cjuatacun rë me. Xicanujuun cahntsua xahasen nuju cjua vihi: “Ngayaan ne, tsajin mé cuma naja ta, tsëhë xi tjë rë Abraham ngayaan.” Xicanujuun cuatjin matsejen ta, nguehe cuichjá cojo nuju ta Nina ne, hisca ndyojo xí cuicun vi ne, cuma sahmi me tjë rë Abraham.

⁹ Chutsujun ta ngayun matsejen ne, tangun ngayun cojo yatjë xi ha quitaháchjine quicharcu tyjama rë xi cuetsihin xti. Yëjë ni yatjë xi suaain tu xi ndaja matsejen ne, xti rë, sehe cjue cueti. —Cuatjin xu cachja Juan.

¹⁰ Ngajan xi xutacjin jan ne, cuitjin xu cavinenguise rë me Juan:

—¿Hacutjin ndatjin nihñi xi cuma nihñi cjuandaja xi nújun vë ni? —Cuatjin xu cavinenguise me.

¹¹ Hane xi cafayangui Juan ne, cuitjin xu cachja me:

—Jarë ngayun xi tjin nuju jo tsjian nuju ne, tuhun rë ngu yo xi tsajin rë. Jarë ngayun xi tjin xi chinu ne, ha chuva vëhë ni tuhun hitsë catjinë me xi tsajin xi sinë. —Cuatjin xu cachja me.

¹² Hacuaha canduva sa xu ngujo cha xi faha tujún sa xi meje rë cha xi xtenda cha, hane cuitjin xu cavinenguise cha:

—Tatá, ¿mé xi ndatjin nihñi ngayin? —Cuatjin xu cavinenguise cha.

¹³ Sehe ngajan xi Juan ne, cuitjin xu cachja me cojo cha:

—Hacuiin cjin sa tujún chjahyun rë xuta. Chjahyun rë me hacutjin xi casatëxa ni nuju. —Cuatjin xu cachja me.

¹⁴ Hacuaha cavinenguise nga ngujo sindadu me cuitjin:

—Hane ngayin ne, ¿mé xi ndatjin nihñi? —Cuatjin xu cavinenguise cha.

Sehe cachja xu me cojo cha cuitjin:

—Xicanaxuun rë xuta tujún cojo cjuachan, o sá xi cojo ngu cjuandacha. Catamangutacún ni cojo tujún xi ha ma chji nuju. —Cuatjin xu cachja me.

¹⁵ Xuta ne, jercu siuya camahani me mé xi cuma, hacuaha vinenguise xu me cahntsua xahasen rë me cuitjin: “Hyaan sa xi Juan rë vi Xihin xi Tsingatju Nina xi cuaxëtje naja me.” Cuatjin xu cavinenguise me.

¹⁶ Sehe ngajan xi Juan ne, cuitjin xu cachja me cojo yëjë xuta jan:

—Ngahan matsejen ne, cojo nandá ni tiviténda nuju, peru sehe cuinduva me xi cueyá me Hasen rë Nina cahntsua xahasen nuju, hacuaha cuaha me sacuaha ngu ndihi xi tsityjahi rë cjuatacun nuju. Me vëhë ne, hitsë sa jyë hnga me cojo cjuatacun rë xi cumá ná ngahan, hisca cumaji tsingusehercu sahme tyjahi chuxinxte rë me.

¹⁷ Me xi tsingatju Nina jan matsejen ne, sacuaha xi ha yahatsja me quicha xi tsinguitjen rë xtë rë trigu cojo sa xi cuma tyjahi ndaja trigu xi casechun rë tsëhë me, hacuaha cjuaya me trigu tyjahi xi cuinchandaja me, hane xtë rë jan matsejen ne, cuaca me xcun ngu ndihi xi tsajin nixtin hvo. —Cuatjin xu cachja Juan.

¹⁸ Hacuaha hacuiin suvá xu ni cjua vëhë cachja Juan cojo xuta hya xi cachja me cjuandajyih rë Nina ta cachja sa xu me jemu cjin cjua.

¹⁹ Herodes, me xi cavitexa ngajan distritu Galilea ne, hacuaha cachjataha xu Juan me ngatsë rë xi cafaha Herodes na Herodia, chjuun rë hntsëjñu me, xi cumá chjuun rë me na. Hacuaha cachjataha sa xu Juan me tsëhë jingu sa xcusun tsehen xi casahmi me.

²⁰ Peru xcun yëjë cjuatsehen vëhë ne, cavetahacoo sa Herodes xcusun vihi: caveya xu me Juan ndavaya.

²¹ Hane hya xi chaja sa xu cjue Juan ndavaya ne, ngu nixtin xi caxtenda yějē ni xuta ne, hacuaha cojo xu Jesús caxtenda me. Hane xi cavatju caxtenda me ne, hora xi tisahmi xu me oración rē me ne, ngahnga ne, catuxaha,

²² hane Hasen rē Nina ne, canduvajnetsejen casesun rcu me. Sacuajyihni ngu paloma jyihni. Hacuaha hora vėhė ni ne, canuhya xu rē ngu cjua ngajan ngahnga xi cachja xu cuitjin: “Ngaye xi quihndi naha ngaye xi jemu hmú cáacun ri. Jemu ndama ná ngatsė riji.” Cuitjin xu cachja.

Xutachanga rē Jesucristu

²³ Quihndė ne, Jesús ne, tjin xu rē me sacuaha cantė nu hya xi cavetsihin me cojo xá rē me. Hacuaha xi má xu rē xuta ne, quihndi rē José má me. Hane José ne, quihndi rē Elí.

²⁴ Elí ne, quihndi rē Matat. Matat ne, quihndi rē Leví. Leví ne, quihndi rē Melqui. Melqui ne, quihndi rē Jana. Jana ne, quihndi rē José.

²⁵ José ne, quihndi rē Matatías. Matatías ne, quihndi rē Amós. Amós ne, quihndi rē Nahum. Nahum ne, quihndi rē Esli. Esli ne, quihndi rē Nagai.

²⁶ Nagai ne, quihndi rē Maat. Maat ne, quihndi rē Matatías. Matatías ne, quihndi rē Semei. Semei ne, quihndi rē José. José ne, quihndi rē Judá.

²⁷ Judá ne, quihndi rē Joana. Joana ne, quihndi rē Resa. Resa ne, quihndi rē Zorobabel. Zorobabel ne, quihndi rē Salatiel. Salatiel ne, quihndi rē Neri.

²⁸ Neri ne, quihndi rē Melqui. Melqui ne, quihndi rē Adi. Adi ne, quihndi rē Cosam. Cosam ne, quihndi rē Elmodam. Elmodam ne, quihndi rē Er.

²⁹ Er ne, quihndi rē Jesús. Jesús ne, quihndi rē Eliezer. Eliezer ne, quihndi rē Jorim. Jorim ne, quihndi rē Matat.

³⁰ Matat ne, quihndi rē Leví. Leví ne, quihndi rē Simeón. Simeón ne, quihndi rē Judá. Judá ne, quihndi rē José. José ne, quihndi rē Jonán. Jonán ne, quihndi rē Eliaquim.

³¹ Eliaquim ne, quihndi rē Melea. Melea ne, quihndi rē Mainán. Mainán ne, quihndi rē Matata. Matata ne, quihndi rē Natán.

³² Natán ne, quihndi rē David. David ne, quihndi rē Isaí. Isaí ne, quihndi rē Obed. Obed ne, quihndi rē Booz. Booz ne, quihndi rē Salmón. Salmón ne, quihndi rē Naasón.

³³ Naasón ne, quihndi rē Aminadab. Aminadab ne, quihndi rē Aram. Aram ne, quihndi rē Esrom. Esrom ne, quihndi rē Fares. Fares ne, quihndi rē Judá.

³⁴ Judá ne, quihndi rē Jacob. Jacob ne, quihndi rē Isaac. Isaac ne, quihndi rē Abraham. Abraham ne, quihndi rē Taré. Taré ne, quihndi rē Nacor.

³⁵ Nacor ne, quihndi rē Serug. Serug ne, quihndi rē Ragau. Ragau ne, quihndi rē Peleg. Peleg ne, quihndi rē Heber. Heber ne, quihndi rē Sala.

³⁶ Sala ne, quihndi rē Cainán. Cainán ne, quihndi rē Arfaxad. Arfaxad ne, quihndi rē Sem. Sem ne, quihndi rē Noé. Noé ne, quihndi rē Lamec.

³⁷ Lamec ne, quihndi rē Matusalén. Matusalén ne, quihndi rē Enoc. Enoc ne, quihndi rē Jared. Jared ne, quihndi rē Mahalaleel. Mahalaleel ne, quihndi rē Cainán.

³⁸ Cainán ne, quihndi rē Enós. Enós ne, quihndi rē Set. Set ne, quihndi rē Adán. Adán ne, me vėhė xi Nina casahmi rē me.

4

Cafahachuva xitsehen Jesucristu

¹ Hya xi camá ne, hya xi catsė rē Jesús cojo Hasen rē Nina hya xi caxtenda me ne, cavuya xu me tsėhė ndajyė Jordán xi cjue me ndava me, peru Hasen rē Nina ne, quiji nguehe quiji ngajan xu cojo rē me ngajan ngu xín tsėhė nandya

² cahntsua yachan nixtin. Hacuaha yasen ni tifahachuva xitsehen xi matitjun me. Hacuaha Jesús ne, tsajin camaha xu ni mé xi cajnė me cahntsua nixtin xi cuacun vėhė. Hane xi cavatju nixtin xi cuacun vė ne, jercu camavojo xu rē me.

³ Sehe ngajan xi xitsehen jan ne, cuitjin xu cachja cojo Jesús:

—Sá xi Quihndi jain rē Nina ngaye ne, tinoje cojo ndoyojo vihi ne, catama niñu. —Cuitjin xu cachja xitsehen.

⁴ Hane Jesús ne, cuitjin xu cafayangui me tsėhė xitsehen jan:

—Xcun xujun rē Nina ne, cuitjin camahindu: “Hacuiin suvá ngatsė rē niñu xi siu xuta cjuahñu.” —Cuitjin xu cafayangui Jesús.

⁵ Hane xi quijicojo xitsehen me ngu ndetjún hnga ne, sehe nguhñusasa xu catsingacun ni xitsehen jan me jingujyė ni nandya tsėhė ngasunhdė.

⁶ Sehe cachja xu xitsehen cuitjin cojo rē me:

—Suá ri yějē nandya xi cuacun vė cojo yějē cjuanchina rē xi ngaye nihñi gobiernu. Cuma suá ri ta, tsėhė xi hatuxa ngahan cafahántsa, hane ha tu yo ni xi meje suá rē ne, suá rē.

⁷ Quihndé ne, sá xi cuindove cuiticjexcun nguehe xi chjehercuin ná ne, cumá tsiji yějé ni nandya vè. —Cuatjin xu cachja xitsehen.

⁸ Sehe ngajan xi cafayangui xu Jesús cuitjin:

—Xcun xujun rê Nina ne, cuitjin camahindu: “Meje rê xi chjuhuncun Nina naja, hacuaha súvá ni me vèhè meje rê xi nihñu hacutjin xi meje rê me.” —Cuatjin xu cachja Jesús cjua vèhè.

⁹ Hya xi camá ne, xitsehen jan ne, quijicojo xu rê Jesús ngajan Jerusalén, hane quijicani rê me hisca rcu cjin yungun xi matitjun. Sehe cachja xu cojo rê me cuitjin:

—Sá xi Quihndi jain rê Nina ngaye ne, ningatjin yojo riji ndyá hisca nangui.

¹⁰ Ha hye ta tsajin mé cuma ri ta xcun xujun rê Nina ne, cuitjin chja: Nina cuitexa me ángel rê me xi sahmi ri cuidadu.

¹¹ Cuahatsjá ri,

cojo sa xi hisca ntsacui ne, sacuinhmaain rê cojo ngu ndyojo.

Cuatjin xu cachja xitsehen cjua vèhè.

¹² Hane Jesús ne, cuitjin xu cafayangui me tsèhè xitsehen:

—Xujun rê Nina ne, cuitjin chja: “Miji rê xi chjuhunchuvun Nina naja.”

¹³ Hya xi camá ne, xi cajnetaha cafahachuva xitsehen jan Jesús ne, cavetjuxin xu tsèhè me hisca janihya cuya nga.

Cavetsihin cavicuya Jesucristu xuta Galilea

¹⁴ Ngajan xi Jesús ne, cojo ngahñu rê Hasen rê Nina ne, quijinduju sa xu me xi cjue me ndava me ngajan distritu Galilea. Hane xi cafehe xu me jan ne, jercu cachja xuta tsèhè me ngajan Galilea cojo jinguyjé ni nandya xi siu tahndee rê.

¹⁵ Hane quiji me yungun rê jimangu nandya tsèhè Galilea, cavicuya me xuta. Hane yějé ni xuta jan ne, casahmi jyé casahmi hnga xu me Jesús.

Tacun Jesucristu nandya Nasaret

¹⁶ Cavechú ngu nixtin xi quiji xu Jesús ngajan nandya Nasaret hiscan xi camacha me. Hane sacuaaha xcusun xi tjin rê me ne, nixtin xi chjahájenda rê ne, quiji xu me yungun. Sehe quiji casecunvasen me xi cuichjasun xu me xujun rê Nina.

¹⁷ Hya xi camá ne, casengui tsja me xujun xi híncha cjua rê Nina xi catsihindu profeta Isaías. Hane xi titsixinga xu me xujun jan ne, táha tivanguise me cahndé xi quitahá cjua xi meje rê me. Hane xi casacu rê me cahndé vèhè ne, sehe cavetsihin cachjasun xu me cjua vihi xcun xuta:

¹⁸ Hasen rê Nina ne, jiya cahntsua xahasen naha,

vèhè xi casuaxa ná Nina xi suá cumachaya rê xuta yuma cjuandajiyihi rê me:

catsingatju ná me xi suá cumachaya rê xuta xi híncha ndavaya ta hatuxa cuma ndaya me, suá cumachaya rê xuta xi rcá me ta hatuxa cuya cuma tsejen nga rê me;

cuèhèndaya xuta xi jemu choho sahmi jingu sa xuta cojo rê me.

¹⁹ Hacuaha suá cumachaya rê xuta xi cavechú nu xi jercu sahmi Nina cjuandaja cojo xuta rê me.

Cuatjin chja cjua rê xujun xi cachjasun Jesús.

²⁰ Hane xi cavuya catsijeyu nga Jesús xujun jan ne, sehe cavuya casua nga me me xi sahmi xá cahntsua yungun jan. Sehe cavéjña Jesús xi cuicuya rê me xuta. Hane yějé ni xuta xi siu cahntsua yungun jan ne, jercu cavèhèrcun me Jesús.

²¹ Sehe ngajan xi Jesús ne, cavetsihin cachja me cuitjin cojo xuta:

—Quihndé, jinguyjé rê xi cavinuhyu cjua xi camahindu xcun xujun rê Nina xi cavutaya jan ne, ngajan cavetjucaa cjua vèhè. —Cuatjin xu cachja Jesús.

²² Yějé ni xuta ne, jemu ndaja xu cachja me tsèhè Jesús, hacuaha hisca quijircun rê me tsèhè xi jemu ndaja camahani cjua xi cachja Jesús. Sehe cachja xuta jan cuitjin:

—¡Peru cha vihi xi quihndi rê cha José jan! —Cuatjin xu cachja me.

²³ Hane Jesús ne, cuitjin xu cachja me cojo xuta jan:

—Ngahan matsejen ne, ha hvé ta ngayun ne, cuinújun cojo ná cjua vihi: “Doctor, nircun suvun rê yojo nuju.” Hacuaha cuinújun nga cuitjin: “Xcusun xi camachaya niji xi canihñu ngajan Capernaum matsejen ne, hacuaha nihñu xcusun vèhè nguehe xi nangui nuju.”

²⁴ Cuichjá cojo nuju cjuaquixi ta hisca xi ngu profeta matsejen ne, hatuxa macjaain rê xuta nangui rê me tsèhè me.

²⁵ Hacuaha ha cjuaquixi ta jemu cjin chjuun cahan xi caviyuju na nguehe Israel hya xi cavéjña profeta Elías hatséé nixtin. Hacuaha nixtin vèhè matsejen ne, cavaain camahani tsi sacuaaha jyan nu vasen, hane jercu jyé camahani jindya cavéjña jinguyjé ni ladu.

²⁶ Peru catsingatjin Nina profeta Elías xi cjue cuisecoo me hisca ngu na cahan xi cuacun vé matsejen ta ngu ni na cahan xi hisca hacuain na tjé rê Israel na catsingatju Nina profeta xi cuisecoo me na ngajan nandya Sarepta, ladu tsèhè nandya Sidón.

²⁷ Hacuaha nguehe Israel matsejen ne, jemu cjin xuta xi yaha rë ngu chihin vitaha xi setaha yojo naja caviyuju me hya xi cavéjña profeta Eliseo hatsëë nixtin. Peru hisca xi ngu me xi cuacun vë camandajin me matsejen ta ngu ni Naamán xi hisca hacuiin xuta tjë rë Israel ta xuta Siria me matsejen ne, me vëhë ni xi camandaja me. —Cuatjin xu cachja Jesús.

²⁸ Hane yëjë ni xuta xi siu xu cahntsua yungun jan ne, hya xi cahndë me cjua xi cachja Jesús jan ne, jemu camacjan rë me.

²⁹ Hya xi camá ne, xi caxinchacun xuta jan ne, cavaxëxin xu me Jesús, quijicojo me me hisca ngajan ngu xín tsëhë nandya, ngu rcu ndetjún hnga hiscan xi cavéjña nandya rë me, xi meje tsingatjen me Jesús.

³⁰ Peru Jesús ne, cavatju xu me ngajñi rë xuta jan quijixin me.

Cha xi jiya xitsehen xahasen rë

³¹ Hya xi camá ne, quiji xu Jesús Capernaum, ngu nandya tsëhë distritu Galilea. Hane nixtin xi chjahájenda rë ne, quiji xu me yungun cavicuya me xuta.

³² Hane yëjë xuta xi siu jan ne, jercu quijircun xu rë me tsëhë cjua xi vicuya Jesús ta, tsëhë xi cjua xi vicuya me ne, sacuaaha cjua xi chja ngu xi matitjun jain.

³³ Hacuaha cahntsua yungun jan ne, tacun xu ngu cha xi jiya xitsehen cahntsua xahasen rë cha. Hane xitsehen jan casahmi xi jercu cajindaya cha cachja cha cuitjin:

³⁴ —¡Ja! ¿Mé má cuatjin ninguisuhunjnü cojo niji ngayun Jesús, xuta Nasaret? ¿Há canduvun xi nicjun niji? Ngahan ne, ha hvë yo ngayun. Ngayun xi hatuxa vinechun tsëhë Nina ngayun. —Cuatjin xu casahmi xitsehen xi cachja cha.

³⁵ Hya xi camá ne, cuitjin xu cachja Jesús xi cavatëcja me cjua rë xitsehen xi jiya cahntsua xahasen rë cha:

—¡Yuu nechin, hacuaha tetjixin tsëhë cha vë! —Cuatjin xu cachja Jesús.

Hya xi camá ne, catsiticia xu xitsehen jan cha ngajñi rë xuta, sehe cavetju quiji tsëhë xahasen rë cha, peru tsajin camahani mé cavanguihmu rë cha.

³⁶ Hya xi camá ne, yëjë xuta jan ne, jercu quijircun rë me, hisca cachja xu me ngajñi rë me cojo xicjin me cuitjin:

—¿Mé nga xcusun cjua vihi xi cojo yëjë ni ngahñu vitexa rë hisca xitsehen, hacuaha vetjuxin ni? —Cuatjin xu cachja xuta ngajñi rë me cojo xicjin me.

³⁷ Hya xi camá ne, jingujyë ni ladu tahndee rë cahndë jan ne, cavitsojo xu cjua xi cachja xuta tsëhë Jesús.

Camandaja nahya rë Simón Pedru xi casahmi Jesucristu

³⁸ Xi cavetju Jesús tsëhë yungun ne, quiji xu me ndava ngu me xi hmí rë Simón. Hane nahya rë Simón ne, jemu hmu xu rë me xi yaha rë me chíhinsuë. Hane yëjë xuta rë me ne, cafehya me cojo Jesús xi cuisecoo Jesús nahya rë Simón.

³⁹ Hane xi quiji cavutsejenya xu Jesús xcun nahya rë Simón ne, cavatëcja me chíhinsuë xi má rë xuta changá vëhë, hane cavetjuxin xu chíhin jan tsëhë me. Hane hora vëhë ni ne, cavisatjenhnga nahya rë Simón cavetsihin cafachacuenda me cjuandaja xi sahmi me cojo yëjë ni me xi cafehe jan.

Jemu cjin xutahmu rë camandaja me xi casahmi Jesús

⁴⁰ Hane hora xi tivetje tsuhi xu ne, yëjë ni xuta xi tjín rë me xutahmu rë tsëhë tu mé ni xcusun chíhin ne, quijicojo me xutahmu rë jan nixtin hya hiscan tacun Jesús. Hane xi cavisanetsja xu Jesús jima ngu xutahmu rë jan ne, camandaja me.

⁴¹ Hacuaha jemu cjin xu xuta xi siu jan cavetjuxin xitsehen xi hinchá rë me. Hane xi cavetju xitsehen jan quiji ne, jercu cachja camahani cuitjin:

—¡Ngayun xi Quihndi jain rë Nina ngayun! —Cuatjin xu cachja xitsehen jan.

Peru cavatëcja xu Jesús cjua xi tichja xitsehen jan, casuaain me cahndë xi cuichja xitsehen ta, tsëhë xi ha vëë xu xitsehen xi me vëhë xi catsingatju Nina me.

Catsuyihiya Jesucristu cojo cjuandajyihí rë Nina

⁴² Hane xi casahasen jan ne, cavetju xu Jesús quiji me ngajan ngu xín tsëhë nandya. Hane xutacjin jan ne, cuatjin quiji cavanguise xu me Jesús, hane xi cavechú me hiscan tacun Jesús ne, meje tsinguijnehai me Jesús cojo sa xi hacuiin cuetjuxin me tsëhë xuta jan.

⁴³ Peru Jesús ne, cuitjin xu cachja me cojo xuta jan:

—Hacuaha sahmi ná ngujyë xi cjué jingu sa cahndë, suá cumachaya rë xuta cjuandajyihí tsëhë gobiernu xi sahmi Nina ta ngatsë rë vëhë xi catsingatju ná Nina. —Cuatjin xu cachja Jesús.

⁴⁴ Hane cuatjin xu catsuyihiya casua me camachaya rë xuta cjuandajyihí vëhë yëjë ni yungun tsëhë ladu vëhë.

5

Cjuarcun xi casahmi Jesucristu tsêhê chu ti

¹ Cuitjin xu camá nga ngu nixtin jan. Jercu cjín camahani xuta quijitjengui me Jesús xi cuihndê me cjuar rê Nina. Na cavehnchun xu me Jesús xi secun me tjeheh laguna Genesaret, xi hacuaha hmí rê laguna Galilea.

² Hya xi camá ne, cavêê Jesús jo barcu ngajan tjeheh rê laguna jan, hane cha xi tsêhê barcu jan ne, ha cavitujne xu cha tsêhê barcu, hane hinchá vane cha nahya rê cha.

³ Hane Jesús ne, quiji cavisehen xu me ngu barcu xi cavêê me jan. Barcu jan ne, tsêhê Simón. Sehe cachja me cojo Simón xi cjuecojo me hitsê barcu ngajñi nandá. Hya xi camá ne, quiji cavéjña me sehe cavicuya xu me xutacjín jan tsêhê ngajan ni cahntsua barcu.

⁴ Hane xi cajnetaha cavicuya me xuta jan ne, sehe ngajan xi cachja xu me cojo Simón cuitjin:

—Tángunvuhun sa cojo barcu vi hiscan nungun nandá, sehe ngajan ningatjunyun nahya xi chjuhun ti. —Cuatjin xu cachja me.

⁵ Sehe ngajan xi cafayangui xu Simón tsêhê Jesús cuitjin:

—Tatá, cuaha nixten tinihñí xá vêhê ne, ndastu mé sacú niji. Peru sá xi cuatjin nújun ne, cuihjá cojo compañeru naha ne, ningatjinyin nahya. —Cuatjin cafayangui xu Simón.

⁶ Hane xi casahmi me cuatjin ne, jercu tu cjín camaha xu ni ti cafaha me, ña meje xtiya nahya rê me.

⁷ Hya xi camá ne, casahmitsja xu me cojo xicjin me xi hinchá barcu xingu jan xi cjue cuisecoo xicjin me. Sehe quiji me xi cuacun jan. Hya xi camá ne, catsinguitsé me catsijo barcu cojo ti xi cafaha me jan. Hane xi jercu catsê barcu ne, ña meje xtyusehen.

⁸ Hane xi cavêê Simón Pedru xcusun xi camá jan ne, sehe quiji caticjexcun me xcun Jesús, sehe cachja xu me cuitjin:

—Tatá. Tángunxun hitsê tsahan ta, ngahan ne, ngu xuta tsehen ngahan. —Cuatjin xu cachja Simón Pedru.

⁹ Cuatjin cachja me ta, tsêhê xi jercu quijircun camahani rê me cojo compañeru rê me ngatsê rê ti xi jemu cjín camahani chu cafaha me.

¹⁰ Hacuanitjin xu ni quijircun rê yahnga compañeru rê Simón, me xi hmí rê Jacobo cojo Juan, me xi quihndi rê Zebedeo. Sehe ngajan xi Jesús ne, cuitjin xu cachja me cojo Simón:

—Xicarcuun ta quihndê cojo nixtin xi cjuiniji sa vi ne, ngayun cuangun nuvun xuta xi cuisehen me ladu naha ngojo rê xi nuvun chu ti. —Cuatjin xu cachja me.

¹¹ Hya xi camá ne, Simón cojo compañeru rê me ne, cavaxéxin xu me barcu jan tsêhê xcun nandá, caviyuju me nangui quixí. Sehe caviyuju me yêjê ni tsêhê me ne, sehe quiji me cojo Jesús.

Casahmi Jesucristu xi camandaja cha xi yaha rê chíhin xi setaha yojo naja

¹² Cuitjin camá nga xu hya xi casetaha Jesús ngu nandya jan. Cafehe xu ngu cha xi jingujyê ni yojo rê yaha rê ngu xcusun chíhin vitaha. Hane xi cavêê xu cha Jesús ne, quiji cha caticjexcun cha xcun Jesús cafehya cha cjuandaja xi sahmi me cojo rê cha, cuitjin xu cachja cha:

—Tatá. Sá xi meje nuju ne, cuma chjuhunxun chíhin xi yaha ná. —Cuatjin xu cachja cha.

¹³ Hane xi catsixinga xu Jesús tsja me cavetahatsja me cha ne, cachja me cuitjin:

—Meje ná. Catamandaja ngayun. —Cuatjin xu cachja me.

Hane chíhin jan ne, ngutjen xu ni cavetjuxin.

¹⁴ Sehe cavítexa me cha cuitjin:

—Tsajin camahani yo xi cuinújun cojo xcusun vihi. Nihñu sacuatjin cavítexa Moisés xutachanga naja hatsêê nixtin. Tángun ningacun yojo nuju cojo nahmi, sehe tángun chjuhun ngu cjuatjo xi tuhun rê Nina tsêhê xi camandaja ngayun. Cuatjin nihñu cojo sa xi cumatsejen xi camandaja jain ngayun. —Cuatjin xu cachja me.

¹⁵ Peru handasa cuatjin xu cachja Jesús cojo cha ne, hitsê sa jercu cavitsojo cjuar tsêhê xcusun xi casahmi me. Hya xi camá ne, jercu tu cjín camahani xuta quijitjengui xu me Jesús xi cuihndê me cjuar rê Jesús hacuaha cumandaja me tsêhê chíhin xi ma rê me.

¹⁶ Peru Jesús ne, yasen xu ni cavaxéxin me yojo rê me fi me ngajan ngu xín camahani, sahmi me oración rê me cojo Nina.

Casahmi Jesucristu xi camandaja cha xi cahme yojo rê

¹⁷ Cuitjin camá nga xu ngu nixtin hya xi tivicuya Jesús xuta. Hacuaha siu xu ngujo cha fariseo cojo ngujo cha xi vicuya cjuachacun xi canduva cha yêjê ni nandya tsêhê distritu Galilea cojo distritu Judea, cojo nandya Jerusalén. Hacuaha jercu yaha Jesús ngahñu rê Nina xi sahmi me xi cumandaja xuta hmu rê.

¹⁸ Hya xi camá xu ne, hora vëhë cafehe ngu cha xi cahme yojo rë, quichahahnga rë cha cojo nijña rë cha. Hane cha xi yahahnga rë cha ne, casahmi cha cjuandya xi cuisehen cha cahntsua ndihya xi cuejña cha cha hmu rë jan hiscan tacun Jesús.

¹⁹ Peru xi casacuiin xu rë cha chuva rë hacutjin cuisehen cha ngatsë rë xuta xi jercu quitsë camahani me jan ne, camiji xu cha rcu ndihya, hane cafachaxin cha tyjavanitja, sehe catsitujne cha cha hmu rë jan taha rcu ndihya cojo ni nijña rë cha, xi camá cavejña cha cha ngajñi rë xuta hiscan tacun Jesús.

²⁰ Hane xi cavëë Jesús xi cuatjin mangucacun cha xi cuacun jan cojo rë me ne, sehe cachja xu me cuitjin cojo cha hmu rë jan:

—Jyë nuju tsan ne, ha camanchataha. —Cuatjin xu cachja me.

²¹ Hya xi camá xu ne, cha xi vicuya cjuachacun cojo cha fariseo xi cuacun jan ne, cavetsihin catsingataha cacun cha cachja xu cha cuitjin cojo xicjin cha:

—¿Yo cha xi cuijyihí vi xi tsixcuehyu cha Nina? ¡Hatuxa tsajin yo xi cuma tsinchataha jyë rë xuta ta suvá ni Nina xi cuma tsinchataha me! —Cuatjin xu cachja cha cojo xicjin cha.

²² Peru tsëhë xi Jesús ne, ha vëë me mé xi tisingataha cacun cha xi cuacun jan ne, cachja xu me cojo cha cuitjin:

—¿Mé xi tiningatuhuntacún cojo cjuatacun nuju?

²³ ¿Jarë cjuá xi hitsë sa tsaviin xi cuichjá? ¿Há xi: “Jyë nuju ne, ha camanchataha?”, o ¿há xi: “Tsatjunhngun ne, tujyuhyunun?”

²⁴ Peru nguehe suá cumachaya nuju xi ngahan xi Quihndi rë Xuta Jain ngahan ne, yahá xá xi tsincháataha jyë rë xuta nguehe ngasunhndë.

Sehe ngajan xi cachja xu Jesús cojo cha hmu rë jan:

—Quihndë ne, ngayun tsan ne, tsatjunhngun, chjuhun nijña nuju vë ne, sehe tjangun ndya nuju. —Cuatjin xu cachja Jesús.

²⁵ Hya xi camá ne, ngutjen ni cavisatjenhnga xu cha ngajñi rë yëjë ni xuta, sehe cafaha cha nijña rë cha, café cha, taha sahmi jyë sahmi hnga cha Nina.

²⁶ Hane yëjë ni xuta jan ne, jercu quijircun xu rë me, hacuaaha cojo me casahmi jyë casahmi hnga xu me Nina, hisca catsacjun me camá. Hacuaaha cachja xu me cuitjin:

—Quihndë cahyan xcusun xi tsajin nixtin xi hyan. —Cuatjin xu cachja me.

Cavaxijin Jesucristu Leví xi hacuaaha hmí rë me Mateo

²⁷ Hya xi camá xu ne, xi cavetju Jesús jan ne, cavechú me ngu cahndë hiscan xi tacun ngu me xi faha tujúnsa, me xi hmí rë Leví. Sehe cachja xu me cojo me cuitjin:

—Nduvun, cuanguen cona. —Cuatjin xu cachja me.

²⁸ Hya xi camá ne, Leví jan ne, caviyuju yëjë mé xcusun xi sahmixa me cojo jan ne, sehe cavetju xu me quiji me cojo Jesús.

²⁹ Hane xi cavatju vëhë ne, sehe casahmi xu me ngu suhi ngajan ndava me ngatsë rë Jesús. Hacuaaha jercu cjin camaha xu ni cha xi faha tujúnsa cojo jingu sa xuta tijinë me niñu cojo Jesús cojo Leví.

³⁰ Hane cha fariseo cojo cha xi vicuya cjuachacun cavetsihin cachjataha xu cha xuta ladu rë Jesús cuitjin:

—¿Mé má cuatjin chinu hyun tangun cojo cha xi faha tujúnsa cojo ngujo sa cha xi hacuaaha cha tsehen cha? —Cuatjin xu cachjataha cha.

³¹ Hane xi cafoyanguí Jesús tsëhë cha ne, cuitjin xu cachja me:

—Xuta xi hacuiin hmu rë me ne, miji rë xi cjuahacuenda rë me doctor ta suvá ni xuta xi hmu rë me ne, me vëhë xi meje rë xi cjuahacuenda rë me doctor.

³² Hacuanitjin ná ngahan ta ngahan ne, hacuiin canduvá nguehe xi squindáyavaha rë xuta xi tsajin jyë rë me ta xi canduvá ne, xi squindáyavaha rë xuta tsehen. Cuichjá cojo rë me xi tsindeya me cjuatacun rë me. —Cuatjin xu cachja me.

Mé tsëhë xi casahmii Jesucristu cojo xuta rë me xun rë me

³³ Ngajan xi cha fariseo cojo cha xi vicuya cjuachacun ne, cachja xu cha cuitjin cojo Jesús:

—Yëjë xuta ladu rë Juan ne, yasen ni sahmi me xun rë me hacuaaha sahmi me oración rë me cojo Nina. Hacuanitjin ni yëjë xuta ladu rë cha fariseo. Peru xuta ladu nuju ne, jinë jihvi me. —Cuatjin xu cachja cha.

³⁴ Ngajan xi Jesús ne, cuitjin xu cachja me cojo cha:

—Cumaji xi xuta rë cha xi tivixan ne, sahmi me xun rë me jinguyëjë rë xi cha xi tivixan ne, tacun cha cojo rë me.

³⁵ Peru cuechú nixtin xi cha xi tivixan chjaháxin rë cha tsëhë xuta rë cha ne, hya sahmi me xun rë me. —Cuatjin xu cachja Jesús.

³⁶ Hacuaaha cachja nga xu me ngu ejemplu vihi cojo cha xi cuacun jan:

—Tsajin yo xi cuicheya ngu rquí tsjian xatsë sehe cueyaco cojo ngu tsjian changá ta sá xi cuatjin sahmi me ne, tsjian xatsë jan ne, tsinguetsun me. Hacuaha cumatanguaain ngu rquí tsjian xatsë cojo tsjian changá jan.

³⁷ Hacuaha tsajin yo xi cuincha xan xatsë cahntsua chuxin changá ta sá xi cuatjin sahmi ne, xan xatsë jan ne, tsitsinga rë chuxin jan. Hane cjuë cuixu xan, hacuaha chuxin jan ne, cuetsun.

³⁸ Xi meje rë ne, xan xatsë ne, xinchahantsua chuxin xatsë.

³⁹ Hacuaha ngu xuta xi ha cahvi me xan changá ne, ha quihndë mijí cuihi me xan xatsë, tsëhë xi chja me ta xan changá ne, vëhë xi ndaja hyun. —Cuatjin xu cachja Jesús.

6

Cavotoho xuta ladu rë Jesucristu trigu nixtin xi chjahájenda rë

¹ Hacuaha cuitjin camá nga xu ngu nixtin xi chjahájenda rë. Hya xi tivatju xu Jesús cojo xuta ladu rë me hiscan tjin tjë trigu ne, cavotohosun xuta ladu rë me tsë tsë trigu jan, sehe casufëtsja me, sehe cajinë me.

² Sehe ngajan xi ngu cho fariseo xi cojo cjuí jan ne, cachjataha xu cha me cuitjin:

—¿Mé má cuatjin tisahmi xuta ladu nuju xá, handasa chja ley naja xi tsajin cahndë xi nihña xá nixtin xi chjahájenda rë? —Cuatjin xu cachja cha.

³ Ngajan xi Jesús ne, cuitjin xu cafayangui me tsëhë cha:

—Ngayun ne, ha cachutayun xcusun xi casahmi xutachanga naja David hatsëë nixtin. Hya xi jercu camavojo rë me cojo xuta xi siu cojo me ne,

⁴ cavisehen me ndava Nina, hane cafaha me pan xi viyuju xcun Nina xi tsajin cahndë xi tu yo ni sinë ta suvá ni nahmi xi cuma sinë me. Peru me vëhë ne, cajinë me hacuaha casua me cajinë xuta xi siu cojo rë me.

⁵ Hacuaha cachja sa Jesús cuitjin:

—Ngahan xi Quihndi rë Xuta Jain ngahan ne, ngahan xi vitëxa mé xi cuma nixtin xi chjahájenda rë. —Cuatjin xu cachja Jesús.

Casahmi Jesucristu xi camandaja cha xi quixihñu ngu tsja

⁶ Cuitjin camá nga xu ngu nixtin xi chjahájenda rë. Quiji Jesús yungun ne, cavicuya me. Hane tacun xu ngu cha cahntsua yungun jan xi quixihñu tsja quixi cha.

⁷ Hane cha xi vicuya cjuachacun cojo cha fariseo xu ne, siu tifahachuva xu ni cha Jesús, ¿há sahmi me xi cumandaja xuta nixtin xi chjahájenda rë?, cojo sa xi cuma cuinchajyë cha me tsëhë xi sahmi me xá nixtin xi chjahájenda rë.

⁸ Peru Jesús ne, ha vëë me mé xi tsingataha cacun cha xi cuacun jan. Sehe cachja xu me cojo cha xi quixihñu tsja jan cuitjin:

—Tisatjunhngun, hane tisechun nguehe cavasencja. —Cuatjin xu cachja Jesús.

Hane sehe cavisatjenhnga xu cha caviseacun cha.

⁹ Sehe ngajan xi cachja xu Jesús cojo cha xi cuacun jan cuitjin:

—Sahme nuju ngu cjuachjinenguise vihi: Nixtin xi chjahájenda rë ne, ¿mé xi sua cahndë ley xi nihña?, ¿há xi cjuandaja ne?, o ¿há xi cjuatsehen? ¿Há xi naxentjeen cjuahñu rë xingueen ne?, o ¿há xi nicjeen? —Cuatjin xu cachja Jesús.

¹⁰ Xi cavutsejen Jesús xuta jingujyë ni tahndee rë me ne, sehe cachja xu me cojo cha xi hmu tsja jan cuitjin:

—Nixingun ntsun. —Cuatjin xu cachja me.

Hane cuatjin casahmi cha. Hane tsja cha ne, ha camandaja xu sacuatjin xi jyihi titjún.

¹¹ Hya xi camá ne, cha xi cuacun jan ne, jemu camacjan camaha xu ni rë cha, hisca cachja cha ngajñi rë cha cojo xicjin cha mé xi ndatjin sahmi xu cha cojo Jesús.

Cavaxijin Jesucristu tejó me xi cuma apóstol

¹² Hacuaha cuitjin camá nga xu ngu nixtin nixtin xi cuacun vë. Cavetju Jesús quiji xu me ngu ndetjún xi sahmi me oración, hane ngajan cavéjña me cuaha nixten sahmi me oración rë me cojo Nina.

¹³ Hane xi casahasen ne, cajindayavaha xu me xuta ladu rë me, hane ngajñi rë xuta xi cuacun vë ne, cavaxijinñi xu me tejó xihin. Hane me xi tejó vëhë ne, me vëhë xu xi cachja Jesús tsëhë me apóstol.

¹⁴ Me xi cuicun vi xi tejó me xi cavaxijin Jesús: Simón, me xi hacuaha casuañihi me me Pedru, cojo Andrés hntse Simón, Jacobo cojo Juan, Felipe cojo Bartolomé,

¹⁵ Mateo cojo Tomás, Jacobo quihndi rë Alfeo cojo Simón, me xi tsëhë partidu zelota,

¹⁶ Judas xuta rë Jacobo cojo Judas Iscariote, me xi sahmi entregadu rë Jesús.

Cafahacuenda Jesucristu jemu cjin xuta

¹⁷ Hane xi cavuya canduvajne xu Jesús tséhë naxi jan cojo xuta ladu rë me jan ne, xi cafehe xu me ngu ngasun ne, ngajan caxinchacunhñu xu me cojo xuta jan. Hacuaha jercu cjin sa xuta ladu rë me xi siuya jan, siuya tangun cojo jemu cjin camaha xu ni xuta tséhë nandya Jerusalén cojo tséhë yëjë sa naciön Israel, hisca cojo xu xuta xi nduva tséhë nandya Tiro cojo Sidón, xi siu ladu tséhë tjehen ndachacun.

¹⁸ Yahnga xu xuta xi cuacun vë ne, canduva me xi meje cuisñuju me cjuarë Jesús, hacuaha yahnga nga me ne, canduva me xi meje rë me xi cumandaja me tséhë chíhin xi yaha rë me. Hacuaha me xi jemu tivatju cjuañihi xi hinchaxitsehen cahntsua xahasen rë me ne, hacuaha camandaja xu me.

¹⁹ Yëjë ni xutacjin jan ne, cavanguise me chuva rë xi satëtsja me Jesús ta, tséhë xi Jesús ne, jemu tjin rë me ngahñu rë Nina, hane ngahñu vëhë tisahmi xi mandaja xu yëjë xuta hmu rë.

Xuta xi ndaja tséhë cojo xuta xi chojyih tséhë

²⁰ Ngajan xi ngaxtun vëhë xu ne, cavutsejen Jesús xuta ladu rë me, sehe cachja xu me cojo cuitjin:

—Jemu ndaja tsujun ngayun xi yumu matsejen ta, tséhë xi ngayun matsejen ne, satë nuju gubiernu xi sahmi Nina.

²¹ Jemu ndaja tsujun ngayun xi vojo nuju quihndë matsejen ta, tséhë xi cuechú nixtin xi jemu chuya rë xahasen nuju.

‘Jemu ndaja tsujun ngayun xi tichjihndun quihndë matsejen ta, tséhë xi cuechú nixtin xi cuejnu.

²² ‘Hacuaha jemu ndaja tsujun ngayun hya xi choho scuëë nuju xuta, o hya xi cuaxëxin nuju me tséhë ngajñi rë me, o hya xi choho cuichja me cojo nuju, o hya xi tsitjungui nuju me, ngatsë rë xi tjin tangun cjuatacun nuju cojo ná ngahan xi Quihndi rë Xuta Jain ngahan.

²³ Hisca chjihngun xi ndama nuju xi cuatjin tivatjun tijima nixtin hya matsejen ta, tséhë xi jemu jyë ngu cjuandaja xi tacunya nuju ngajan ngahnga. Jemu ndaja tsujun matsejen ta, tséhë xi cuanitjin ni choho casahmi xutachanga naja cojo profeta hatsëë nixtin, hane jemu cachuya rë Nina tséhë profeta xi cuacun vë.

²⁴ ‘Peru jemu chojyih tsujun ngayun xi nchina ngayun matsejen ta, tséhë xi ha casacu nuju cjuetacun xi cuma nuju.

²⁵ ‘Jemu chojyih tsujun ngayun xi ha jemu chuya rë xahasen nuju quihndë matsejen ta, tséhë xi cuechú nixtin xi cuma vojo nuju.

‘Jemu chojyih tsujun ngayun xi tivëjnu quihndë matsejen ta, tséhë xi cuechú nixtin xi jercu chjihndun xi cuma va rë xahasen nuju.

²⁶ ‘Hacuaha jemu chojyih tsujun ngayun hya xi ndaja cuichja yëjë xuta tsujun matsejen ta, tséhë xi cuanitjin ni ndaja casahmi xutachanga naja cojo profeta ndacha hatsëë nixtin, hane profeta ndacha xi cuacun vë ne, cachuyiin rë Nina tséhë me.

Meje rë xi nihmu tacun condra naja

²⁷ ‘Peru ngayun xi tinuhyun xi chjá matsejen ne, cuichjá cojo nuju cuitjin: Nihmutacún xuta xi má condra nuju, ndaja nihñu cojo xuta xi choho vëë nuju me,

²⁸ chjahyun rë Nina cjuandaja xi cuma rë xuta xi fehya rë me Nina cjuahngatacun xi cuatjun cuma. Ngajñi rë oraciön nuju matsejen ne, chjahyun rë Nina cjuandaja xi cuma rë xuta xi vangi nuju me si.

²⁹ Yo xi vajaya ngu ladu tsa nuju matsejen ne, nicuyun sa ngu ladu catajaya. Yo xi fahatahá chingá nuju matsejen ne, xicanichuun rë hisca chingá ngahma nuju.

³⁰ Yëjë ni xuta xi fehya nuju me mé xi fehya nuju me matsejen ne, tuhun rë me. Yo xi fahatahá mé xi fahatahá tsuhun matsejen ne, xicanujuun xi tsicuya nga me.

³¹ Sacuatjin xi meje nuju xi sahmi xuta cojo nuju matsejen ne, hacuaha cuanitjin ni nihñu cojo rë me.

³² ‘Tsajin yo sua nacuechji nuju tséhë xi hmutacún xuta xi hmucacun nuju me matsejen ta, tséhë xi hacuaha hisca xuta tsehen matsejen ne, hmucacun me xuta xi hmucacun rë me.

³³ ‘Hacuaha tsajin yo sua nacuechji nuju tséhë xi ndaja nihñu cojo xuta xi ndaja sahmi me cojo nuju matsejen ta, tséhë xi hacuaha hisca xuta tsehen matsejen ne, hacuanitjin ni sahmi me.

³⁴ ‘Hacuaha tsajin yo sua nacuechji nuju tséhë xi tuhun vuxetaha xuta xi vetuhun tacún xi ngascan matsejen ne, sua me nuxetuhun matsejen ta, tséhë xi hacuaha hisca xuta tsehen matsejen ne, sua me vuxetaha xicjin me, cojo sa xi cuya cjuahatsja nga me chuva vëhë ni.

³⁵ Cúya cuichjá nga cojo nuju, nihmutacún xuta xi má condra nuju. Ndaja nihñu, hacuaha tuhun tuxetaha rë, peru xicavetuun tacún xi cuya chjuhunntsun nga. Sá xi cuatjin nihñu matsejen ne, jemu jyë cjuandaja xi sua nuju Nina ngascan, hane cjuandaja xi nihñu ngayun

matsejen ne, tangun cojo cjuandaja xi sahmi Nina matsejen ta, tsêhê xi me vêhê matsejen ne, hatuxa jemu ndaja me cojo xuta tsehen xi hisca nacuechji rê Nina suaain me.

³⁶ Meje rê xi tjin nuju cjuayumatacun sacuatjin tjin rê Nina Nahmi naja cjuayumatacun.

Mijî rê xi nichuvan jingu sa xuta cojo cjuatacun rê me

³⁷ 'Hacuiin nichuvun jingu sa xuta cojo cjuatacun rê me, sehe hacuiin tsichuva Nina ngayun. Hacuiin ninguixun jyê rê jingu sa xuta, sehe hacuiin tsinguixi Nina jyê nuju. Ninchatuhun rê jingu sa xuta matsejen ne, sehe hacuaha tsinchataha nuju Nina.

³⁸ Tuhun rê jingu sa xuta matsejen ne, sehe hacuaha sua nuju Nina. Sua nuju me chuva xi cjuaquixi, hisca tsuquihine me, hisca tsiniyaya me chuva rê, hacuaha hisca xotje rê chuva xi sua nuju me. Cuatjin nihñu matsejen ta, tsêhê xi chuva xi nichuvun matsejen ne, hacuaha chuva vêhê tsichuva Nina xi sua nuju me. —Cuatjin xu cachja Jesús cojo xuta ladu rê me.

³⁹ Hya xi camá ne, cachja sa xu me ngu ejemplu cuitjin:

—Ngu cha rcá matsejen ne, cumaji cjuecani cha ngu nga cha rcá matsejen ta, sá xi cuatjin matsejen ne, catsijo ni cha cuixuya cha xanga.

⁴⁰ Ngu cha xi sehe tivutaya matsejen ne, hacuiin hitsê sa vengui chjí rê cha xi cuma rê maestru rê cha matsejen ta hya xi ha ndaja cavutaya cha yêjê ni matsejen ne, sehe ngajan xi cuehútáha cjuatacun rê cha sacuaaha cjuatacun rê maestru rê cha.

⁴¹ ¿Hacutjin má xi matsejen nuju xtê xi jiya tuxcun xingun, hane machayiin nuju tsêhê yasin xi jiya túxcun suvun ni?

⁴² ¿Hacutjin má xi cuma cuinúnun cojo xingun xi meje naxun xtê xi jiya tuxcun me jinguyêjê rê xi suvun matsejen ne, matsijin nuju yasin xi jiya túxcun vê ni? Ngayun xuta ndacha, naxun titjun yasin xi jiya túxcun vê, sehe cumatsejenndaja nuju xtê xi jiya tuxcun xingun cojo sa xi cuma naxun.

Tsejen mé xcusun xuta me ngatsê ni rê cjuaxi chja me

⁴³ 'Ha hyan matsejen ta tsajin hisca xi ngu yatjê xi ya ndaja xi sua tú xi ndajin, hacuaha tsajin hisca xi ngu ya xi ya machjiriin xi sua tú xi ndaja matsejen ta,

⁴⁴ jima ngu ya ne, cuma tsejen sá xi ndaja o sá xi ndajin ngatsê rê tú xi sua. Hatuxa sacuiin naja tú xi hmí higo rcu ngu yanahyálatu, hacuaha sacuiin naja uva rcu ngu yanahyátindu.

⁴⁵ Cuanitjin ni rê xuta matsejen ta sacuaaha xuta ndaja matsejen ne, tsêhê cjuandaja xi tetjo rê me cahntsua xahasen rê me cojo cahntsua cjuatacun rê me matsejen ne, tsêhê ngajan vetju cjuandaja. Peru xuta tsehen matsejen ne, tsêhê cjuatsehen xi tetjo rê me matsejen ne, tsêhê ngajan vetju cjuatsehen. Cuatjin matsejen ta, tsêhê xi yêjê ni xuta ne, cjuaxi quítsê rê xahasen rê me cojo cjuatacun rê me matsejen ne, vêhê cjuaxi vetju hntsua me.

Ejemplu tsêhê jo ndihya

⁴⁶ 'Yasen ni nújun xi nai nuju ngahan, peru ¿mé má nihñuu sacuatjin xi chjá cojo nuju ni?

⁴⁷ Yahnga ngayun xi nduvuntjengun ná hacuaha visiñuju cjuaxi naha hacuaha nihñuu sacuatjin chjá cojo nuju matsejen ne, ngeuhe cuichjá cojo nuju yo xi tangun ngayun cojo:

⁴⁸ tangun ngayun cojo ngu cha xi hya xi casahmi cha ngu ndihya matsejen ne, ndaja nungun cafahngui cha, sehe ngajan cavejña cha xihndêñaña rê hisca xcun ndyojohñu. Hane hya xi camajyê ndajyê hacuaha casesuntê nandá matsejen ne, jercu hñu catsivaha rê ndihya jan, peru hisca catsiniyaain rê, tsêhê xi jemu ndatjin casecun.

⁴⁹ Peru yahnga nga ngayun xi visiñuju cjuaxi naha peru nihñuu sacuatjin xi chjá matsejen ne, tangun ngayun cojo ngu cha xi casahmi ngu ndihya suvá xcun nangui ni, xi tsajin xihndêñaña rê. Hane hya xi camá ne, xi camajyê ndajyê matsejen ne, catsivaha rê ndihya jan, hane ngutjen ni caticja. Hane cavetsun camahani ndihya vêhê. Cuatjin xu cajnetaha cavicya Jesús.

7

Casahmi Jesucristu xi camandaja hndixahan rê capitán xi vitexa me ngu cientu sindadu

¹ Xi cajnetaha xu cachja Jesús yêjê ni cjuaxi meje cuichja me cojo xuta ne, sehe cavuya quiji nga me nandya Capernaum.

² Hane nandya jan ne, ngajan xu tacun ngu capitán xi tjin rê me ngu hndixahan xi cavatsê me xi jiñahmú, ha ña meje cueya camaha xu ni. Capitán jan ne, jemu hmucacun xu me hndixahan jan.

³ Hane xi camachaya xu rê capitán jan xi tacun Jesús ne, catsingatju xu me ngujo xuta changá rê xuta tjê rê Israel xi quiji cachja me cojo Jesús xi cjue sahmi me xi cumandaja hndixahan rê capitán jan.

⁴ Hane xi cafehe xuta changá jan hiscan tacun Jesús ne, nguñaja camahani cacun me cafehya me xi cjue xu Jesús. Cachja me cuitjin:

—Nihñu favor ne, tisecon rë capitán hitsë ta, tsëhë xi jemu ndaja me.

⁵ Handasa hisca hacuuin tjë rë xutachanga naja me ne, peru jemu hmucacun me ngayaan xuta tjë rë Israel, hacuaha casahmi me yungun niji cojo ngahñu rë suva me. —Cuatjin xu cachja xuta changá jan.

⁶ Hya xi camá ne, quiji xu Jesús cojo rë me. Hane xi ha jima tiñataha me ne, sehe catsingatju xu capitán ngujo xuta ndaja rë me xi quijitjengui me Jesús. Hane xi cavechútaha xu me Jesús ngajan ndiya ne, cuitjin cachja me sacuatjin cachja capitán cojo rë me xi cuichja me cojo Jesús:

—Tatá. Xicatuhundyuun yojo nuju. Ngahan ne, vechiin chuva rë xi ngayun cuinduvun ndya naha ta, tsëhë xi ngayun xi jemu jyë hnga ngayun cojo cjuatacun nuju.

⁷ Vëhë xi hacuaha tsingátaha cáacun xi jemu chüva ngahan cojo cjuatacun naha xi cjuë cuichjá cojo nuju. Quihndë ne, ndastu nihñu favor ne, tinújun xi cumandaja hndixahan naha.

⁸ Ngahan ne, hvë xi cuma nihñu xcusun vëhë ta, ngahan ne, hacuaha tjin xuta xi matitjun tsahan, hane hacuaha tjin ná sindadu xi siu ngahma gobiernu naha xi sahmi hacutjin xi meje ná. Hya xi chjá cojo ngu xi cjue ne, fi. Hacuaha hya xi chjá cojo ngu nga xi cuinduva ne, nduva. Hane hndixahan naha ne, xi chjá cojo xi sahmi mé xi meje ná ne, sahmi. —Cuatjin xu cachja xuta ndaja rë capitán jan cjua rë capitán cojo Jesús.

⁹ Hane xi cahndë xu Jesús cjua vëhë ne, jemu quijircun rë me tsëhë capitán jan. Hane xi cavuya me cavutsejen me xutacjín xi tjengui rë me jan ne, cachja xu me cuitjin:

—Cuichjá cojo nuju ta, ngajñi naja ngayejen ni ngayaan xuta tjë rë Israel ne, cjëë scuëë ngu xuta xi cuatjin ndaja mangucacun me cojo ná. —Cuatjin xu cachja Jesús.

¹⁰ Hane xi cavuya xu me xi quiji tixa jan ne, cavëë me xi ha camandaja cha hndixahan jan.

Casahmi Jesucristu xi cavuya ngu nima cjuahñu

¹¹ Xi cavatju vëhë ne, quiji nga xu Jesús ngu nandya xi hmí rë Naín. Cavisecoo xuta ladu rë me me quiji me, cojo jingu sa xutacjín xi cojo me quiji me.

¹² Hane xi tijima tiña xu me tsëhë tingotjo hinchua tsëhë nandya jan ne, cjui seyaniji xu ngu nima, ngu nima xi quihndi ngu tsëhë naa rë. Hacuaha naa rë nima jan ne, cahan xu me. Jercu cjín camahani xuta nandya visecoo me chjuun jan cjui me.

¹³ Hane xi cavëë xu Nai naja chjuun jan ne, camayuma rë me me. Sehe cachja me cojo chjuun jan cuitjin:

—Ha quihndë xicachjihnduun. —Cuatjin xu cachja me.

¹⁴ Hane xi quiji tiña xu Jesús hiscan xi cjui me cojo nima jan ne, sehe quiji cavetahatsja xu me nachan xi quisun nima jan. Hane xuta xi yahahnga rë nima jan ne, caxinchacunhñu me. Sehe ngajan xi Jesús ne, cachja xu me cuitjin:

—Quihndë ne, ngayun tsan ne, tizatjunhngun. —Cuatjin xu cachja me.

¹⁵ Hane nima jan ne, cavisatjenhnga xu cha cavéjña cha. Sehe cavetsihin cachja cha. Sehe cachja Jesús cojo naa rë cha jan xi cjuahatsja nga me quihndi rë me.

¹⁶ Hya xi camá xu ne, yëjë ni xuta jan ne, jemu catsacjun me camá. Hacuaha casahmi jyë casahmi hnga me Nina, cuitjin xu cachja me:

—Cavetjuiñi ngajñi naja ngu profeta xi jercu vengui chji rë me, hacuaha casahmi Nina cjuandaja ré me cojo naja ngayaan xuta rë me. —Cuatjin xu casahmi jyë casahmi hnga me Nina.

¹⁷ Hya xi camá ne, cavitsojo xu cjua vëhë tsëhë Jesús jinguijyë ni ladu vëhë cojo jinguijyë ni naciún Israel.

Cavinenguise Juan Jesucristu, ¿há me vëhë xi catsingatju Nina me?

¹⁸ Cuitjin xu camá nixtin xi cuacun vë. Xuta ladu rë Juan ne, casua me camachaya rë me yëjë xcusun xi casahmi Jesús. Sehe ngajan xi Juan ne, cajindaya xu me jo xuta ladu rë me jan ne,

¹⁹ sehe catsingatju me me xi cjue cjuinenguise xu me Nai naja sá xi me vëhë xi chja xujun rë Nina xi tsingatju Nina me, o sá xi meje rë xi cuiyujuya rë xi cuinduva nga ngu.

²⁰ Hane xi cafehe xuta xi catsingatju Juan jan hiscan quitahá Jesús ne, cachja xu me cuitjin:

—Juan Vitenda rë Xuta ne, catsingatju niji me xi nduvin vinenguisin nuju ¿há ngayun xi tsingatju nuju Nina, o há tsajin ne, há cuinechinyin xi cuinduva nga ngu? —Cuatjin xu cavinenguise xuta xi catsingatju Juan jan.

²¹ Hane ha hora vëhë ni ne, Jesús ne, casahmi me xi jemu cjín xu xuta camandaja me tsëhë tu mé ni xcusun chíhin xi má rë me. Hacuaha jemu cjín sa xuta xi cavaxëxin Jesús xitsehen

xi híncha cahntsua xahasen rë. Hacuaha jemu cjin sa xu xuta rcá xi casahmi Jesús xi camá camatsejen rë me.

²² Hya xi camá ne, xi catsicuya me cjua cojo xuta ladu rë Juan ne, cuitjin xu cachja me:

—Tjangun ne, sehe tinújun cojo Juan yëjë xcusun xi cahyun cojo yëjë cjua xi canuhyun. Tinújun ta xuta rcá ne, camá camatsejen rë me; xuta rengun ne, camá quijindaja me; xuta xi yaha rë chíhin vitaha xi setaha yojo naja ne, camandaja me; xuta xi loho me ne, camá cahndé me; nima ne, cavuya nga cjuahñu; xuta yuma ne, casacu camachaya rë me cjuandajyihí rë Nina.

²³ Hacuaha jemu ndaja tséhé tu yo ni xuta xi hacuiin tsismicacun me xi mangu cacun me cojo ná. —Cuatjin xu cachja Jesús.

²⁴ Hane hya xi cavuya cafe xu xuta ladu rë Juan jan ne, sehe cachja Jesús cojo xutacjin jan cuitjin tséhé Juan:

—Hya xi cavetjun catsangun ngajan ngu xín tséhé nandya catsanguntjengun Juan matsejen ne, ¿há caningatuhuntacún xi cuechuntuhun ngu xihin xi hacuiin ngu ni cjuatacun rë me?, sacuatjin rë ngu ndeje xi fi nguehe fi ngajan rcu sacuatjin cjuí to.

²⁵ O há tsajin ne, ¿há caningatuhuntacún xi cuechuntuhun ngu xihin xi yaja ngu tsjian xi jemu tu ndajyihí camahani? Hacuuiin cuatjin. Ha hyan matsejen ta xuta xi jercu tu ndacun camahani tsjian vaja me hacuaha hatuxa jemu cjuasua siu me matsejen ne, sacuiin naja me ngajan ngu xín camaha ni tséhé nandya matsejen ta hiscan xi sacu naja me ne, ndava ngu xuta nchina.

²⁶ Peru ngayun matsejen ne, catsangun cachutsujun ngu profeta. Hacuaha cjuaquixi xi vëhé cachutsujun. Peru profeta Juan vë matsejen ne, hitsé sa vengui chji rë me xi cuma rë yëjë sa profeta xi yahnga.

²⁷ Hacuaha me vëhé xi cachja Nina tséhé me xcun xujun rë me cuitjin:

Ngahan ne, tsingátju titjun ngu cha

xi scuxaha cjuatacun rë xuta tséhé xi cjuehé ngaye.

Cuatjin cachja Nina cojo Quihndi rë me.

²⁸ Cuichjá cojo nuju matsejen ta ngajñi rë yëjë xuta xi catsin me tséhé naa rë me matsejen ne, tsajin ngu xi hitsé sa vengui chji rë xi cuma rë Juan. Peru hya xi cuetsihin Nina sahmi me gobiernu nguehe ngasunhndé matsejen ne, xuta xi chuva cuengui chji rë me quihndé matsejen ne, hitsé sa cuengui chji rë me nixtin hya, xi cuma rë xi ha vengui chji rë Juan quihndé.

²⁹ Hane hya xi yëjë ni xuta hisca cojo cha xi faha tujúnsa cahndé me cjua xi cachja Juan matsejen ne, catsingatihin me xi cuitenda Juan me. Hane chuva vëhé matsejen ne, catsingacun me xi macjain rë me xi Nina matsejen ne, yëjë xcusun xi sahmi me matsejen ne, hatuxa cjuaquixindaja jain.

³⁰ Peru jemu cjin cha fariseo cojo cha vicuya cjuachacun matsejen ne, catsingatiin cha xi cuitenda Juan cha. Hane chuva vëhé matsejen ne, catsitjungui cha xcusun xi meje sahmi Nina xi cuma tséhé cha.

³¹ Ngayun xuta tjé rë Israel tséhé nixtin vihi matsejen ne, ¿mé xi tangun ngayun cojo?

³² Tangun ngayun cojo langa xi siu ngajan ndetsin, xi jindaya xicjin cojo cjua vihi: “Canijani tsujun ne, mijí xtun; casin va ne, mijí chjihndun.” Cuatjin jindaya langa.

³³ Cuatjin chjá cojo nuju matsejen ta, Juan xi vitenda nuju ngayun matsejen ne, jinii me niñu hacuaha hviin me xan, hane ngayun nújun ta jiya xitsehen xahasen rë me.

³⁴ Hane ngahan xi Quihndi rë Xuta Jain matsejen ne, jíné hacuaha hvé, hane nújun xi ngahan matsejen ne, ngu cha cahntsuaniniñu ngahan, ngu cha cahntsuxan ngahan, hacuaha ngu cha amigu rë cha xi faha tujúnsa cojo jingu sa xuta tsehen ngahan.

³⁵ Peru xuta xi fitjengui me cjuatacun rë Nina matsejen ne, xuta xi cuacun vëhé xi tsingacun naja me xi cjuatacun vëhé matsejen ne, ndaja jain. —Cuatjin xu catsinguijnetaha Jesús cjua rë me cojo xuta.

Catsinchataha Jesucristu ngu chjuun tsehen

³⁶ Ngu nixtin nga jan ne, cuitjin xu camá. Ngu cha fariseo ne, cachja xu cha cojo Jesús xi cjue siné me cojo cha niñu ndava cha. Hane xi cavisehen me ndava cha fariseo jan ne, sehe quiji cafaha xu me cahndé rë me xcun maxé xi siné me niñu.

³⁷ Ngajan xi ngu chjuun tsehen tséhé nandya vëhé ne, camachaya xu rë na xi Jesús ne, tacun me ndava ngu cha fariseo tijiné me niñu cojo cha ne, yaha xu na ngu frascu xi ndyojo camá, híncha ngu xcusun aceite ndaja xi jercu hnga chji rë.

³⁸ Quiji xu na secun na táha ntsacu me, jihnda na. Hane cojo ndatuxcun na ne, cavetsihin catsicahnchi xu na ntsacu me. Hane cojo tsjarcu na ne, cavujnu na, sehe cavitatsuha na. Hya xi camá xu ne, sehe cavitejnu na aceite.

³⁹ Peru xi cavëë xu cha fariseo xi quijicojo rë me jan xi cuatjin casahmi na ne, catsingataha cacun cha cuitjin: “Cha xi cuijyih vihi ne, sá xi profeta jain cha ne, ha vëë cha mé xcusun chjuun na xi cuatjin satëtsja rë cha ta, tsëhë xi na vëhë ne, ngu chjuun tsehen na.” Cuatjin catsingataha cacun xu cha.

⁴⁰ Sehe ngajan xi Jesús ne, catsicuya xu me cjua tsëhë cjuatacun xi catsingataha cacun cha fariseo jan, cuitjin xu cachja me:

—Simón, tjin ná ngujo cjua xi cuichjá cojo nuju. —Cuatjin xu cachja me.

Ngajan xi cha Simón jan ne, cuitjin xu cafayangui cha tsëhë me:

—Maestro, tinújun. —Cuatjin xu cachja cha.

⁴¹ Hya xi camá xu ne, cachja Jesús cuitjin cojo cha ngu ejemplu:

—Cuejña ne xi jo cha jan ne, quitjen cha tujún tsëhë ngu cha nchina. Ngu cha ne, quitjen cha tujún tsëhë hñu cientu nixtin xi sahmi ngu mosu xá. Hane ngu nga cha ne, quitjen cha tujún tsëhë yachan të nixtin.

⁴² Hane xi tsajin rë cha xi cuacun vë tujún xi sahmingojo cha ne, cha nchina jan ne, catsinchataha cha catsijo cha. ¿Jarë cha xi cuicun vi xi hitsë sa tsihmu cacun cha cha nchina jan, xi má nuju? —Cuatjin xu cachja me.

⁴³ Sehe ngajan xi cafayangui xu cha Simón cuitjin:

—Xi má ná ne, cha xi hitsë sa cjin quitjen. —Cuatjin xu cachja cha Simón.

Sehe ngajan xi cachja xu Jesús cojo cha cuitjin:

—Jemu ndaja canichuvun cjua xi canújun. —Cuatjin xu cachja Jesús.

⁴⁴ Hane xi cavuya xu me cavutsejen me chjuun jan ne, sehe cachja nga me cojo cha Simón cuitjin:

—Chutsujun hacutjin casahmi chjuun vihi cojo ná. Ngayun ne, hora xi cavisehen ndya nuju ne, catuun nandá xi cjuenguí ntsacú. Peru chjuun vihi ne, cojo ndatuxcun na catsicahnchi na ntsacú, hane cojo tsjarcu na ne, cavujnu na.

⁴⁵ Hacuaha ngayun ne, cavitatsuun ná. Peru na vihi ne, hisca hora xi cavisehen ne, cjëë cuejñaxin na xi vitatsuha na ntsacú.

⁴⁶ Ngayun ne, cavitejnuu aceite rcú. Peru chjuun vihi ne, cavitejnu na aceite ntsacú, aceite xi jemu ndaja jne camahani.

⁴⁷ Vëhë xi cuichjá cojo nuju ta tsejen xi ha camanchataha na tsëhë jyë cjin xi tjin rë na ta, tsëhë xi jemu tjin rë na cjuahmutacun. Peru yo xi manchataha tsëhë hitsë jyë xi tjin rë ne, hacuaha chúva cjuahmutacun tjin rë. —Cuatjin xu cachja Jesús.

⁴⁸ Ngajan xi cachja xu Jesús cojo chjuun jan cuitjin:

—Jyë nuju ne, ha camanchataha. —Cuatjin xu cachja me.

⁴⁹ Hane xuta xi tijinë xu cojo rë me jan ne, cavetsihin cavinenguise me ngajñi rë me cojo xicjin me cuitjin:

—¿Yo rë cha xi cuijyih vi xi hisca jyë rë xuta tsinchataha cha? —Cuatjin xu cachja me.

⁵⁰ Peru Jesús ne, cachja nga xu me cojo rë chjuun jan cuitjin:

—Ngayun ne, ha cavetjuntjun ta, tsëhë xi camangutacún cojo ná. Cuma cuangun cojo cjuasua. —Cuatjin xu cachja me.

8

Yachjin xi cafahuenda rë Jesucristu

¹ Cuitjin camá nga xu ngu nixtin. Jesús ne, titsujyihya xu me jemu cjin nandya cojo ranchun tisua me tijimachaya rë xuta cjuandajyih xi chja tsëhë gobiernu xi sahmi Nina. Hacuaha cojo tejó xuta ladu rë me jan cavisecoo xu rë me.

² Hacuaha cojo sa ngujo yachjin xi cavetju xitsehen xi híncha xahasen rë me hacuaha camandaja me tsëhë chíhin xi má rë me ne, cojo xu me quiji me. María, na xi hacuaha hmí rë na Mágdala, ngu chjuun xi cavetju yatu xitsehen xahasen rë,

³ cojo Juana, chjuun rë Chuza, ngu cha xi sahmixa ndava Herodes, me xi cavitexa ngajan distritu Galilea, cojo Susana cojo jemu cjin sa yachjin xi hacjahi. Yëjë ni yachjin xi cuacun vë ne, cojo xcusun xi tjin rë súvá me ne, cafahuenda xu me Jesús cojo yëjë ni xuta xi ticojo me.

Ejemplu tsëhë cha xi catsitjë trigu

⁴ Cuitjin camá xu ngu ndiya nga. Hya xi jemu cjin xuta camatangun me xi canduva nguehe canduva ngajan me jingu sa nandya xi nduva tjenguí xu me Jesús ne, cachja Jesús cojo xuta jan ngu ejemplu vihi:

⁵ —Cuejña ne xi ngu cha xi tsitjë trigu matsejen ne, cavetju cha quiji cha xi tsitjë cha trigu. Hane jinguyëjë rë xi titsitjë cha matsejen ne, ngujo matsejen ne, cavixu ndiya, hane canune rë. Hane xi canduva chu nisë matsejen ne, catsicjë chu cajinë chu.

⁶ Hane ngujo nga matsejen ne, cavixu hiscan xi jemu naxindya. Hane xi cavetsihin tijima yehe ne, caxintsen matsejen ta, tsêhê xi tsajin mé xcuen rê.

⁷ Hane ngujo nga matsejen ne, cavixu ngajñi nahyá. Hane xi camachatangun matsejen ne, nahyá jan matsejen ne, vêhê casahmi hndê rê catsixi rê.

⁸ Hane xi yahnga nga matsejen ne, cavixu hiscan nihndê ndaja. Hane xi camayehe matsejen ne, casua tutjê rê, ngu cientu sa cuatjin sacuatjin xi camatjê.

Xi cafê cachja me cjua vêhê ne, sehe jercu hñu xu cachja me cuitjin:

—Yo ngayun xi tjin nuju cjuasua xi cuinuhyun cjua naha ne, ndaja tinuhyun. —Cuatjin xu cachja me.

Mé má ejemplu cachja Jesucristu cojo xuta

⁹ Ngajan xi xuta ladu rê me jan ne, cavinenguise xu me mé meje cuichja ejemplu xi cachja Jesús jan.

¹⁰ Hane Jesús ne, cachja xu me cuitjin:

—Nina ne, casua me cahndê xi ngayun ne, cuijne rcun cjuatacun tsêhê gobiernu xi sahmi Nina, cjuatacun xi tijin ne, tsajin yo machaya rê. Peru yêjê sa me xi yahnga ne, tichjá cojo rê me cojo suvá ejemplu, cojo sa xi handasa cuihndê me cjua naha ne, peru cuijnii rcu me.

Cachja Jesús mé vijne ejemplu tsêhê cha xi catsitjê trigu

¹¹ Quihndê ne, ngeuhe cuichjá cojo nuju mé meje cuichja ejemplu vêhê. Trigu xi tsitjê ngu cha jan ne, vêhê xi sacuaaha cjua rê Nina.

¹² Hane hya xi vixu ngujo trigu ndiya ne, hacui sacuaaha hya xi visiñuju xuta cjua rê Nina. Sehe vinduva Satanás ne, fahatahá cjua rê Nina tsêhê xahasen rê me, cojo sa xi cuetjintjin me ngatsê rê xi cumacjain rê me.

¹³ Hane hya xi vixu ngujo trigu hiscan xi jemu naxindya ne, hacui sacuaaha hya xi vihndê xuta cjua rê Nina, hane fahatsja me cojo cjuasua. Peru trigu xi cuacun vê ne, jemu chúva tyjama rê vetju. Hacuanitjin ni vatju ngujo xuta má. Macjain rê me ngujo nixtin ni, peru hya xi vechú ngunixtin xi chjaháchuva rê me ne, fi ngaxtun me.

¹⁴ Hane hya xi vixu ngujo trigu ngajñi nahyá ne, hacui sacuaaha hya xi vihndê xuta cjua rê Nina, peru ha xcun xi ha cjuinduju me cojo nixtin rê me ne, tsingataha cacun me tsêhê cjuacjintacun tsêhê cahntsua ndava me, tsingataha cacun me tsêhê cjuanchina, hacuaaha tsingataha cacun me tsêhê cjuasua xi tjin ngasunhndê, hane vêhê suaain cahndê xi cumajyê cjua rê Nina cahntsua xahasen rê me, hacuaaha sahmi me ngu cjuandaja xi tsingacun xi xuta rê Nina me.

¹⁵ Hane hya xi vixu yahnga trigu hiscan nihndê ndaja ne, hacuaaha hacui sacuaaha hya xi vihndê xuta cjua rê Nina cojo ngu xahasen ndaja, ngu xahasen tyjahi, hacuaaha tsismicacuaain me. Hane cuatjin cojo jeya ne, caa rê me sahmi me cjuandaja.

Ejemplu tsêhê ngu ndihi

¹⁶ Hacuaaha tsajin hisca xi ngu xuta xi ha xcun xi ha cavetaha rê me ngu ndihi ne, sehe faha me veyahma me ngahma rê ngu tyucu o sá xi faha me vejña me ngahma nachan ta, hatuxa faha me vejña me cahndê rê, cojo sa xi yêjê xuta xi visehen me hiscan setí ndihi jan ne, scuêê me hasen rê.

¹⁷ Hacuanitjin ni chava vêhê, yêjê cjua rê Nina xi tivicuyá nuju suvun ni ngayun xuta ladu naha ne, handasa hinchahma yêjê cjua vêhê quihndê ne, peru cuechú nixtin xi cuetjucaa tsejen, hacuaaha cuicuyun rê yêjê xuta.

¹⁸ Vêhê xi meje rê xi nihñu ngahñu xi ndaja cuisñuju cjua rê Nina ta, tsêhê xi tu yo ni xi tjin rê cjua vêhê ne, Nina ne, sua sa rê me. Hane tu yo ni xi tsajin rê cjua vêhê ne, hitsê cjua vêhê xi má rê xi tjin rê ne, chjahátahá rê. —Cuatjin xu cavicuya Jesús xuta ladu rê me.

Naa rê Jesucristu cojo xicjin me

¹⁹ Ngajan xi naa rê Jesús cojo xicjin me ne, cafehetjengui xu me Jesús. Hane maji vechútahaçjin rê me ta, tsêhê xi jercu quitsê camaha xu ni xuta.

²⁰ Hane tjin xu yo casua camachaya rê Jesús cuitjin:

—Naa nuju cojo nixti xingun ne, hinchacun me ngajan candatsen, xi nduvatjengui nuju me. —Cuatjin xu casacu camachaya rê me.

²¹ Peru Jesús ne, cuitjin xu cafayangui me:

—Xuta xi vihndê me cjua rê Nina hacuaaha sahmi me sacuatjin chja cjua vêhê ne, hacuaaha tangun ni hmú cácnun me sacuatjin hmú cácnun naa naha cojo xingueen. —Cuatjin xu cafayangui me.

Cavatêcja Jesucristu ngahñu rê tjo cojo cjuasca rê nandá

²² Cuitjin camá nga xu ngu nixtin jan. Cavisehen Jesús cahntsua ngu barcu cojo xuta ladu rê me, sehe cachja xu me cojo xuta jan cuitjin:

—Cuanguen ngunda vêhê. —Cuatjin xu cachja me.

Sehe quiji me.

²³ Hane ngajñi cjuí xu barcu cojo rë me ne, Jesús ne, cafañafë xu me. Hya xi camá ne, canduva ngu tjo hñu xi jercu tu cjuachan camahani vanga xcun laguna jan. Hane barcu jan ne, jercu tivisehen xu nandá cahntsua, hane me xi cuacun jan ne, jemu tsavi camahani xi cuma rë me.

²⁴ Hane xi quiji tiña xu me hiscan jiñafë Jesús ne, sehe catsingasca me me, cuitjin xu cachja me:

—¡Tatá, tatá! ¡Nguehe tifë ngayaan! —Cuatjin xu cachja xuta ladu rë Jesús jan.

Hane xi cavaasca xu rë Jesús ne, cavatëcja me ngahñu rë tjo jan cojo cjuasca rë nandá jan. Sehe casejyu tjo casejyu nandá, jemu ndaja cavéñajyuu jingujyë ní.

²⁵ Sehe ngajan xi Jesús ne, cuitjin xu cachja me cojo xuta ladu rë me jan:

—¿Há manguaaintacún cojo ná ni? —Cuatjin xu cachja me.

Hane xi catsacjun xuta jan camá ne, jemu quijircun rë me. Sehe cachja xu me ngajñi rë me cojo xicjin me cuitjin:

—¡Mé xcusun xuta me vi xi hisca tjo hisca nandá vitexa me, hacuaha vihdë tséhë me ni!

—Cuatjin xu cachja xuta ladu rë me jan.

Cha Gadarena xi hincha xitsehen xahasen rë

²⁶ Hya xi camá xu ne, cafehe me nandya Gadara, ngu nandya xi tacun ngunda vëhë tséhë laguna Galilea.

²⁷ Hane xi cafehe xu Jesús nangui quixí cojo xuta ladu rë me ne, cavechútaha me ngu cha tséhë nandya vëhë xi hincha xitsehen xahasen rë cha. Cha vëhë ne, ha jemu tsëë xu xi vajin cha tsjian, hacuaha hacuün cahntsua ndihya véjña cha ta ngajan tahndë véjña cha.

²⁸ Xi cavëë xu cha Jesús ne, jercu cajindaya cha quiji caticjxcun cha xcun me, hacuaha jercu hñu cachja cha cuitjin:

—¿Mé má cuatjin ninguisuhunjñu cojo ná ngayun Jesús, Quihndi rë Nina xi hatuxa jyë hnga cojo Hasen rë? Nihñu favor ne, xicatuun ná cjuañihi. —Cuatjin xu cachja cha.

²⁹ Cuatjin cachja cha ta, tséhë xi Jesús ne, ha cavitexa me xitsehen xi cuetjuxin tséhë cha. Ha jemu tsëë xu nduva nixtin xi visehen xitsehen xahasen rë cha. Hane xuta ne, tsihñu tsja tsihñu ntsacu me cha cojo cadena cojo sa xi ha quihndë cuetjiin cha cjue cha. Peru xi vicheya cha cadena ne, xitsehen ne, ficojo cjuachan rë cha ngajan ngu xín camahani tséhë nandya. Jemu cjín ndiya xu xi cavatju cha camá cuatjin.

³⁰ Ngajan xi Jesús ne, cuitjin xu cavinenguise me cha:

—¿Hacutjin hmí nuju? —Cuatjin xu cachja me.

Hane cha vëhë ne, cuitjin cafayangui cha:

—Sindadu Cjín. —Cuatjin xu cachja cha.

Cuatjin cachja cha ta, tséhë xi jemu cjín xitsehen cavisehen xahasen rë cha.

³¹ Hane ngajan xi xitsehen xi cuacun jan ne, jemu cafehya xu favor cojo Jesús xi hacuün cuitexa me xi cjue ngajan nduchin.

³² Hane tiña ngajan ne, jemu cjín xu chinga hinchataha chu tijinë chu ngajan ngu ndetjún. Hane xitsehen jan ne, cafehya cojo Jesús xi sua me cahndë xi cuisehen xitsehen jan xahasen rë chinga. Hane casua xu me cahndë.

³³ Hane xi cavetju xu xitsehen jan tséhë xahasen rë cha vëhë ne, quiji cavisehen xahasen rë chinga. Hya xi camá xu ne, chinga jan ne, cavanga chu quiijjne chu tséhë rcu ndetjún, hane ngajan cavixuya xu chu ngajñi nandá tséhë laguna, hane ngajan camiji rë chu nandá ne, ngajan café xu chu.

³⁴ Ngajan xi xi cavëë xu cha xi sahmi cuidadu rë chu chinga jan xcusun xi camá ne, cavanga cha quiji casua cha camachaya rë nandya cojo ranchun xcusun vëhë.

³⁵ Hya xi camá ne, xuta jan ne, cavetju xu me quiji cavutsejen me xcusun xi camá jan. Hane xi cavechútaha me Jesús ne, hacuaha cavëë me cha xi cavetju xitsehen xahasen rë jan, yaja xu cha ngu tsjian, hacuaha ha cavéjña chihin cjuatacun rë cha, tacun cha tiña ntsacu Jesús. Hane xuta jan ne, jemu catsacjun me camá.

³⁶ Hane xuta xi cavëë xu xcusun xi camá jan ne, casuacuenda me cojo xuta xi yahnga jan hacutjin camá xi camandaja cha xi caxincha xitsehen xahasen rë jan.

³⁷ Hya xi camá ne, yëjë xuta tséhë ladu tséhë nandya Gadara ne, cafehya xu me cojo Jesús xi cuetjuxin Jesús tséhë xuta xi cuacun jan ta, tséhë xi jemu catsacjun camaha ni yëjë me camá. Hane ngajan xi Jesús cojo xuta ladu rë me ne, cavisehen xu me barcu sehe cavuya nga me ngunda vihi.

³⁸ Hane chaja sa xi cjue Jesús ne, cha xi cavetju xitsehen xahasen rë jan ne, cafehya cha cojo rë me xi cjue cha cojo rë me. Peru Jesús ne, catsinguijnetaha xu me cjua cojo rë cha, cachja me cuitjin:

³⁹ —Tuyun tjangun ndya nuju ne, hacuaha tinújun cojo xuta tséhë cjuandaja xi cuacun casahmi Nina cojo nuju. —Cuatjin xu cachja Jesús.

Ngajan xi xi cavuya cafehe xu cha nandya ne, sehe cavetsihin catsujyihya casuacuenda cha xuta jingujyë ni ngajñi nandya yëjë ni cjuandaja xi cuacun casahmi Jesús cojo cha.

Catsicuya Jesucristu cjuahñu rë quihndi rë Jairo hacuaha camandaja na xi casatëtsja tsjian rë Jesucristu

⁴⁰ Hya xi cavuya Jesús ngunda vihi ne, yëjë ni xutacjín jan ne, jemu ndaja cafahatsja xu me Jesús ta, tséhë xi hatuxa siuya me me.

⁴¹ Hane hora vëhé ne, canduva xu ngu me xi hmí rë Jairo, me xi má xutaxa rë yungun. Hane quiji caticjaxcun xu me xcun Jesús. Hane cafehya me favor cojo Jesús xi cjue Jesús ndava me ta,

⁴² tséhë xi me vëhé ne, tjin xu rë me ngu na lihndi xi quihndi ngu tséhë me. Hane na lihndi vë ne, sacuaha tejó na nu. Hane meje cueya xu na.

Ngajan xi Jesús ne, quiji xu me. Hane ngajñi cjuí me ne, jemu tivehncun xu xuta me.

⁴³ Hane ngu na jan ne, tjin rë tejó nu xi yaha rë na chíhin xahmajni. Hane café tujún rë na cavechji na xcun doctor. Peru tsajin xu yo camá cafahaxin chíhin xi má rë na.

⁴⁴ Hane xi quiji tiña na táha ngaxtun Jesús ne, quiji na casatëtsja na ntsacu tsjian rë me. Hya xi camá xu ne, ha tu ñahñu cavasen xi vanga rë na jni.

⁴⁵ Ngajan xi Jesús ne, cachja xu me cuitjin:

—¿Yo xi casatëtsja ná? —Cuatjin xu cachja me.

Hane xi cachja yëjë xuta xi hacuiin me casatëtsja me ne, sehe cachja xu Pedru cuitjin:

—Tatá, xutacjín ne, tivehncun nuju me, hacuaha hisca titsivaha nuju me. —Cuatjin xu cachja Pedru.

⁴⁶ Peru Jesús ne, cachja nga xu me cuitjin:

—Peru tjin yo xi casatëtsja ná ta ngahan ne, camachaya ná xi cavetju ná hitsë ngahñu.

—Cuatjin xu cachja Jesús.

⁴⁷ Hane xi vutsejen na xi cumaji seyahma na ngajñi rë xuta ne, ña fatsë xu na quiji caticjaxcun na xcun Jesús. Sehe catsinguixi na xcun yëjë ni xuta mé má cuatjin quiji na casatëtsja na Jesús, cojo tséhë xi ngutjen ni camandaja na.

⁴⁸ Sehe ngajan xi Jesús ne, cuitjin cachja xu me cojo rë na:

—Ngayun tsan ne, camandaja ngayun ta, tséhë xi camangutacún cojo ná. Cuma cuangun cojo cjuasua. —Cuatjin xu cachja Jesús.

⁴⁹ Tu tichja cuaha xu Jesús cojo na xi camandaja jan ne, cafehe nga ngu me xi canduva me tséhë ndava xutaxa rë yungun jan, hane cuitjin xu cachja me cojo xutaxa rë jan:

—Quihndi nuju ne, ha cahme na. Ha quihndë xicatuहुनुनुनु rë maestru. —Cuatjin xu cachja me.

⁵⁰ Hane hya xi cahndë Jesús cjuá vëhé ne, sehe cachja xu me cojo xutaxa rë jan cuitjin:

—Xicarcuun. Catamangutacún ni cojo ná ne, quihndi nuju ne, cumandaja na. —Cuatjin xu cachja me.

⁵¹ Hya xi camá xu ne, xi cafehe Jesús ndava xutaxa rë yungun jan ne, casuain me cahndë xi cojo jingu sa xuta cuisehen me. Suvá ni Jesús cojo Pedru cojo Juan cojo Jacobo cojo naa cojo nahmi rë nima lihndi jan cuisehen me cahntsua ndihya.

⁵² Hane yëjë ni xuta ne, hisca chja hisca jihnda xu me tséhë nima jan. Ngajan xi Jesús ne, cuitjin xu cachja me cojo xuta jan:

—Ha quihndë xicachjihnduun. Na lihndi vë ne, hacuiin cahme na ta jiñafë na. —Cuatjin xu cachja me.

⁵³ Peru xuta jan ne, tu cavejnucëë xu me Jesús ta, tséhë xi vëëndaja me xi cahme jain nima.

⁵⁴ Hane xi cavisehen Jesús hiscan jiña nima lihndi jan ne, sehe quiji me cafaha me tsja, sehe ndaja hñu cachja xu me cuitjin:

—¡Tisatjinhngue, tsan! —Cuatjin xu cachja me.

⁵⁵ Hya xi camá xu ne, cavuya hasen rë nima, sehe ngutjen ni cavisatjenhnga na. Hane sehe cavitexa xu Jesús xi sua xuta rë na lihndi jan niñu sinë na.

⁵⁶ Hya xi camá xu ne, xutacha rë na lihndi jan ne, jemu quijircun rë me. Ngajan xi Jesús ne, cachja xu me cojo xutacha rë na lihndi jan xi tsajin camahani yo cuichja me cojo xcusun xi camá.

9

Catsingatju Jesucristu tejó xuta ladu rë me xi cuichja cjuandajyihí rë Nina

¹ Cavechú ngu nixtin xi casahmitangun xu Jesús xuta ladu rë me xi tejó jan ne, sehe casua rë me ngahñu hacuaha casua rë me xá xi me xi cuacun vëhé cuitexa xu me yëjë xitsehen hacuaha sahmi me xi xuta hmu rë ne, cuma ndaja xu me.

² Hya xi camá xu ne, sehe catsingatju Jesús me xi sua me cumachaya rë xuta tsëhë gubiernu xi sahmi Nina hacuaha sahmi xuta xi cuacun vë xi xuta hmu rë ne, cuma ndaja xu me.

³ Hane cuitjin xu cachja Jesús cojo rë me:

—Xi cuetjun cuangun ne, tsajin camahani mé xi chuhun, hacuiin bastón ne, hacuiin changa, hacuiin niñu, hacuiin tujún, hacuaha hacuiin jo tsjian ngahma chuhun jima ngu ngayun.

⁴ Hacuaha xi cjuhun ngu ndihya ne, ha ngajan ni tinechun nguixun nguixun ni, hisca xi cuetjunxun tsëhë nandya vëhë.

⁵ Hya xi xuta tsëhë ngu nandya cjuahatsjaain nuju me ne, xi cuetjun tsëhë nandya vëhë ne, titsunu chojo rë ntsacun cojo sa xi cuma tsejen xi xuta jan cún rë me. —Cuatjin xu cachja Jesús.

⁶ Sehe ngajan xi cavetju xu xuta ladu rë Jesús jan, quiji catsujyihya me yëjë ni nandya tsëhë distritu Galilea, casua me camachaya rë xuta tsëhë cjuandajyihí xi chja tsëhë gubiernu xi sahmi Nina hacuaha casahmi me xi xuta hmu rë ne, camandaja xu me jingujyë ni ladu vëhë.

Hvín xuta yo xi Jesucristu

⁷ Hane Herodes, me xi cavitexa ngajan distritu Galilea ne, camachaya xu rë me yëjë xá xi tisahmi Jesús cojo xuta ladu rë me. Hane ngu cachajá xu cjuatacun rë me ta, tsëhë xi ngujo xuta ne, chja me ta Jesús ne, hacui nima Juan Vitenda rë Xuta, hacuaha handasa cahme xu nima Juan vë ne, peru cavuya cjuahñu.

⁸ Ngujo nga me ne, chja me ta profeta Elías xi cavuya, hane yahnga nga me ne, chja xu me ta ngu nima profeta xi hacjahi, xi cavëjña hatsëë nixtin ne, handasa cahme ne, peru cavuya cjuahñu.

⁹ Peru Herodes ne, catsingataha cacun xu me cuitjin: “Nima Juan ne, ha cavitëxa xi catisun rcu. Peru quihndë ¿yo rë cha xi cuajyihí vë xi jemu cjin cju nuhya rë tsëhë cha?” Cuatjin xu catsingataha cacun me. Jemu casahmi xu me ngujyë xi scuëë me Jesús.

Catsicjen Jesucristu hñú mil xihin

¹⁰ Hane xi cavuya xu apóstol tsëhë hiscan xi quiji me jan ne, sehe casuacuenta xu me Jesús xcusun xi casahmi me. Ngajan xi Jesús ne, quijicojo xu me súvá ni apóstol jan ngu cahndë xín, tiña tsëhë ngu nandya xi hmi Betsaida.

¹¹ Peru xi camachaya rë xutacjin jan ne, quijitjengui xu me Jesús. Hane Jesús ne, jemu ndaja cafahatsja me xuta jan, hane sehe cachja me cojo xuta jan tsëhë gubiernu xi sahmi Nina. Hane xuta xi meje rë xi cuma ndaja me ne, casahmi xu Jesús xi camandaja me.

¹² Hane xi quiji hora jan ne, xuta ladu rë Jesús xi tejó jan ne, quijivaha me xcun Jesús sehe cachja xu me cojo cuitjin:

—Tinújun cojo xutacjin vë ne, catji me nandya xi siu tiñataha o sá xi ranchun xi siu tiñataha, cojo sa xi cuanguise me cahndë xi cuiyuju me hacuaha cuanguise me xi sinë me ta, tsëhë xi jemu xín tsëhë nandya hiscan xi nechantahan vi. —Cuatjin xu cachja apóstol.

¹³ Ngajan xi Jesús ne, cuitjin xu cachja me cojo apóstol jan:

—Ngayun tuhun xi sinë me. —Cuatjin xu cachja me.

Ngajan xi apóstol ne, cafayangui xu me cuitjin:

—Hñú tutu pan cojo jo ti tjin naja. ¿Há cuanguin chíhin niñu xi sinë yëjë xuta xi cuicun vi ní? —Cuatjin xu cachja me.

¹⁴ Cuatjin cachja me ta, tsëhë xi ngajñi rë yëjë xuta xi siutahá jan ne, sacuaha hñú mil má xuta xi xihin. Sehe ngajan xi cachja xu Jesús cojo xuta ladu rë me jan cuitjin:

—Tinújun cojo rë xuta vë ne, catiyuju me sacuaha yachantë me ngu ngu cahndë. —Cuatjin xu cachja me.

¹⁵ Ngajan xi xuta ladu rë Jesús jan ne, cuatjin casahmi me, hane caviyuju xu yëjë xuta.

¹⁶ Hya xi camá ne, cafaha xu Jesús hñú pan cojo jo ti jan ne, hane xi cavutsejenniji me ngahnga ne, casua me nacuechji rë Nina, sehe cavotoho langa me pan hacuaha cavatëlanga me ti jan, sehe casua xu me cojo xuta ladu rë me xi cjue sua rë me xutacjin jan.

¹⁷ Hane xuta ne, yëjë ni me cajinë me hacutjin xi cachuya rë xahasen rë me. Hane xi cachjaya rë xi cavangui cajinë xuta jan ne, catsë xu tejó chajne.

Catsinguixi Pedru yo Jesucristu

¹⁸ Cuitjin camá nga ngundiya. Hya xi tisahmi xu Jesús oración rë me ne, xuta ladu rë me ne, hacuaha cojo me siu me cojo rë me. Sehe ngajan xi cavinenguise xu Jesús me cuitjin:

—¿Mé chja xutacjin jan ne, yo ngahan? —Cuatjin xu cachja me.

¹⁹ Sehe ngajan xi cachja xu me cojo Jesús cuitjin:

—Yahnga me ne, chja me ta Juan Vitenda rë Xuta ngayun. Hane yahnga nga me ne, chja me ta profeta Elías ngayun. Hane me xi yahnga nga ne, chja me ta ngayun ne, ngu profeta xi hacjahi, xi cavéjña hatsëë nixtin, xi handasa cahme ne, peru cavuya cjuahñu. —Cuatjin xu cachja xuta ladu rë Jesús.

²⁰ Sehe Jesús ne, cuitjin xu cavinenguise nga me:

—Hane ngayun ne, ¿mé nújun ni, yo ngahan? —Cuatjin xu cavinenguise Jesús.

Ngajan xi Pedru ne, cuitjin xu cafayangui me:

—Ngayun xi catsingatju nuju Nina xi cumatitjun ngayun tsijin. —Cuatjin xu cafayangui Pedru.

Cachja Jesucristu xi tsiquehen xuta me

²¹ Peru Jesús ne, cavitexa xu me xuta jan xi tsajin camahani yo xi cuichja cojo me cjuatacun jan.

²² Cuitjin xu cachja me:

—Ngahan xi Quihndi rë Xuta Jain ngahan ne, hachu meje rë xi jemu cjin cjuañihi cuátju cuma; xuta changá cojo nahmi xi matitjun tséhë nahmi cojo cha xi vicuya cjuachacun ne, tsitjungui me ngahan, tsiquehen me ngahan. Peru xi ma jyan nixtin ne, tsicuya Nina ngahan cjuahñu. —Cuatjin xu cachja Jesús cojo xuta ladu rë me.

²³ Hane sehe cavuya cachja nga me cojo yëjë ni xuta jan cuitjin:

—Sá xi tjin yo xi meje rë xi cuma xuta ladu naha matsejen ne, ha quihndë mijí rë xi sahmi hacutjin xi meje rë suvá matsejen ta nchunchujun ni matsejen ne, catejñahñu xahasen rë xi cjuecojo ndiya naha, handasa hisca cueya xcun cru.

²⁴ Cuatjin matsejen ta, tséhë xi yo xi meje cjuendujú cojo ngasunhdë rë cojo cjuatacun rë suvá matsejen ne, cuechintaain cjuahñu xatsë. Peru yo xi cuatju cjuañihi o hisca cueya ngatsë naha matsejen ne, vëhë xi cuechútáha cjuahñu xatsë.

²⁵ ¿Mé machjiréhë rë yo xi sacú rë yëjë cjuanchina rë ngasunhdë sá xi cueya hacuaha cuma castigu?

²⁶ Machjiriin matsejen ta, tséhë xi yo xi ma sava rë ngatsë naha cojo ngatsë rë cju naha matsejen ne, ngahan xi Quihndi rë Xuta Jain ngahan matsejen ne, hacuaha cuma sava ná tséhë hya xi cuinduva cojo hasen ndajyihí naha hacuaha tséhë Nahmi naha hacuaha tséhë ángel xi vejña tséhë me.

²⁷ Nguehe cuichjá cojo nuju cjuaquixi matsejen ta tjin yahnga ngayun xi sechun nguehe xi cueyuun jinguyëjë rë xi cjëë chun gobiernu xi sahmi Nina. —Cuatjin xu cachja Jesús.

Nahñu camatsejen nima Moisés cojo xutachanga xi hmí rë Elías visiajmi cojo Jesucristu

²⁸ Cuitjin camá nga xu ngundiya hya xi cavatju sacuaha jyin nixtin xi cavicuya Jesús cju vëhë. Quijicojo me Pedru cojo Juan cojo Jacobo quijiniji xu me ngu ndetjún xi sahmi me oración rë me.

²⁹ Hora xi tisahmi xu Jesús oración rë me ne, xcun me ne, cavindeya xcusun rë. Hane tsjian rë me ne, jercu tu tyava camahani camá, ña setí jyihí.

³⁰ Hacuaha camatsejen xu jo xihin hinchacun visiajmi cojo rë me. Xihin jan ne, hacui xu nima profeta Moisés cojo profeta Elías.

³¹ Me xi cuacun vëhë ne, camatsejen me cojo ngu hasen ndajyihí, tivisiajmi xu me tséhë cjuaveya xi hatuxa tjin rë xi cuechútáha Jesús ngajan Jerusalén.

³² Peru Pedru cojo jo sa me xi yahnga jan ne, ha siufé me, tséhë xi jercu nijñá rë me. Peru xi cavascandaja xu rë me ne, cavëë me hacutjin jercu setí camahani tsejen hiscan secun Jesús, hacuaha cavëë xu me jo me jan hinchacuntangun me cojo Jesús.

³³ Hya xi camá ne, hora xi tivetjuxin me xi cuacun vë tséhë Jesús ne, sehe cachja xu Pedru cojo Jesús cuitjin:

—Tatá. Tu ma rë xi guehe nechin ne, nihñi jyan puestu; ngu cuma tsujun ne, ngu cuma tséhë Moisés, hane cojo ngu cuma tséhë Elías. —Cuatjin xu cachja Pedru, peru hisca hvín me mé xi chja me.

³⁴ Hane hora xi tichja xu Pedru cuatjin ne, canduva ngu yufí casahmi tjanguen rë tséhë me. Hane jemu catsacjun me camá xi caxinchavasen me tséhë yufí jan.

³⁵ Hya xi camá ne, canuhya xu rë ngujo cju xi cavetju ngajñi yufí jan xi cachja cuitjin:

—Cha vihi xi Quihndi naha cha, cha xi ngahan cavejñá cáacun xi tsingátju. Tinuhyun cju a xi chja cha. —Cuatjin xu cachja cju a jan.

³⁶ Hane xi cavatju cachja cju a jan ne, Jesús ne, camasuvá sa me secun me. Hya xi camá xu ne, jyan xuta ladu rë Jesús jan ne, tu caviyujuyuu ni me. Hane nixtin hya ne, cachjaain camaha xu ni me cojo hisca ngu tséhë xcusun xi cavëë me.

Casahmi Jesucristu xi camandaja cha lihndi xi jiya xitsehen xahasen rë

³⁷ Cuitjin camá nga xu camá nchujun hya xi canduvajne Jesús tsèhè ndetjún cojo jyan xuta ladu rè me jan. Tjercu cjin camahani xuta canduvatjengui xu rè me ndiya.

³⁸ Hane ngajñi rè xutacjin jan ne, cavetjujni ngu xihin xi jercu cajindaya xu cachja cojo Jesús cuitjin:

—Maestro, nihñu favor ne, nduvun chutsujun cha lihndi naha ta ngu tutu má cha vi xi tacun ná cha.

³⁹ Hane cuitjin sahmi ngu xitsehen cojo rè cha: faha rè cha, hane tu ñahñu jindaya, sehe vitsuneya rè cha, ña vetju natyaxu hntsua cha, hane hisca hya xi ndiya cjuè cha ne, sehe vetjuxin tsèhè cha.

⁴⁰ Xuta ladu nuju, caféhya rè me favor xi cuaxëxin me, peru camaji cavaxëxin me. —Cuatjin xu cachja xihin jan cojo Jesús.

⁴¹ Sehe ngajan xi Jesús ne, cuitjin xu cafayangui me:

—Ngayujun ni ne, xuta xi macjaain rè ngayun hacuaha xuta xi cavetjuxin tsèhè ndiya ndajyihí ngayun. ¿Jani hisca hya xi tjin ná xi cuitejña cojo nuju? ¿Jani hisca hya xi tjin ná xi scaa ná cojo nuju? Nduvuncujun quihndi nuju nguehe. —Cuatjin xu cafayangui me.

⁴² Hane hora xi tijima tiña xu cha lihndi jan tsèhè Jesús ne, xitsehen ne, catsiticia rè cha, hacuaha vitsuneya rè cha. Hya xi camá ne, cavatëcja Jesús tsèhè xitsehen, hane casahmi me xi camandaja xu cha lihndi jan. Sehe casua me cha cojo nahmi rè cha.

⁴³ Hane yëjë ni xuta jan ne, jemu quijircun camaha xu ni rè me xi cuatjin jyë hnga Nina cojo Hasen rè me.

Cachja nga Jesucristu xi tsiquehen xuta me

Hane jinguyëjë rè xi cuatjin tificrun rè xutacjin jan tsèhè yëjë ni xcusun xi sahmi Jesús ne, cachja xu me cojo xuta ladu rè me cuitjin:

⁴⁴ —Ndaja tetuhuncun cjuaxi tichjá cojo nuju vi: Ngahan xi Quihndi rè Xuta Jain ngahan ne, hatuxa tjin xi cuma ngahan entregadu tsja xuta. —Cuatjin xu cachja me.

⁴⁵ Peru xuta ladu rè Jesús jan ne, cavijnii rcu me mé vijne cjuaxi jan ta, tsèhè xi casetsa xu rè cjuatacun rè me, cojo sa xi cuijnii rcu me. Hacuaha tsacjun xu me xi cjuinenguise me Jesús mé vijne cjuaxi vèhè.

Yo xi matitjun

⁴⁶ Ngu nixtin jan ne, cavetsihin sacuaha xi meje scaanya xu xuta ladu rè Jesús ngajñi rè me yo xi hitsè sa matitjun.

⁴⁷ Peru Jesús ne, xi ha vëë me hacutjin tsingataha cacun xuta ladu rè me jan ne, sehe cafaha me ngu lihndi caviseacun me ndaya rè me,

⁴⁸ sehe cachja xu me cojo xuta ladu rè me jan cuitjin:

—Tu yo ni xi cjuahatsja rè lihndi vihi tsèhè xi ladu naha má ne, hacuaha hora vèhè cjuahatsja ná ngahan. Hacuaha xi cuatjin cjuahatsja ná ngahan ne, hacuaha cjuahatsja rè Nina xi catsingatju ná. Hane tu yo ni xi má nuju xi ma tjengui tsèhè ngajñi nuju ngayujun ni ne, vèhè xi matitjun xi má rè Nina. —Cuatjin xu cachja Jesús.

Xuta xi hacuini condra nuju má me ne, hatuxa favor nuju fi me

⁴⁹ Ngajan xi Juan ne, cachja xu me cojo Jesús cuitjin:

—Tatá, cahyin ngu me xi tivaxëxin xitsehen sacuaha xi suvun catuhun rè me xá. Hane canújin cojo rè me xi ha quihndé sahmi me cuatjin ta, tsèhè xi me vèhè ne, tsujyihintjengui me ngayun sacuatjin niji ngayin. —Cuatjin xu cachja me.

⁵⁰ Hane Jesús ne, cuitjin xu cafayangui me:

—Xicanujuun cojo rè me cuatjin ta, tsèhè xi xuta xi hacuini condra naja má me ne, hatuxa favor naja fi me. —Cuatjin xu cachja Jesús.

Catsingatiin xuta distritu Samaria Jesucristu

⁵¹ Hya xi camá ne, xi tijima tiña xu nixtin xi cjueniji Jesús ngajan ngahnga ne, cavejñahñu me cjuatacun rè me xi cjué me ngajan Jerusalén.

⁵² Vèhè xi catsingatju titjun xu me jo xuta ladu rè me. Xi quiji me ne, cafehe me ngu nandya tsèhè xuta Samaria, xi cuanguise me cahndé xi cuejña Jesús cojo xuta ladu rè me.

⁵³ Peru xuta jan ne, cafahatsjaain xu me Jesús ta, tsèhè xi Jesús ne, hatuxa tjin cacun me xi cjué me hisca Jerusalén.

⁵⁴ Peru hya xi camachaya xu rè Jacobo cojo Juan, xuta ladu rè Jesús, cjuaxi vèhè ne, cachja xu me cojo Jesús cuitjin:

—Tatá. ¿Há nihña sacuatjin casahmi profeta Elías hatsëë nixtin? ¿Há cuitexan xi cuinduva ndihi tsèhè ngahnga, tsicjè rè xuta xi cuicun vi? —Cuatjin xu cachja me.

⁵⁵ Ngajan xi Jesús ne, cavuya vutsejen me xuta ladu rè me jan ne, sehe cavatëcja xu me cjuatacun xi tsingataha cacun me xi cuacun jan, cuitjin cachja me:

—Ngayun ne, hyúun mé xcusun Hasen xi tsèhè nuju.

⁵⁶Ngahan xi Quihndi rë Xuta Jain ngahan ne, hacuiin canduvá xi tsicjé xuta ta xi canduvá ne, xi cuáxëtjé me. —Cuatjin xu cachja Jesús.
Sehe quiji xu me ngu nga nandya.

Xuta xi camameje cjue cojo Jesucristu

⁵⁷Hane ndiya cjuí Jesús cojo xuta ladu rë me ne, cachja xu ngu me jan cojo rë me cuitjin: —Tatá. Tu yani ni xi cuangun ne, cjué cojo nuju. —Cuatjin xu cachja me.

⁵⁸Sehe ngajan xi Jesús ne, cuitjin xu cachja me cojo xuta jan:

—Chu ninda ne, tjin nguijo hiscan viyuju chu, hane nisé xi vitjen chu ngahnga ne, tjin ndava chu, peru ngahan xi Quihndi rë Xuta Jain ngahan ne, hisca ndya naha tsajin. —Cuatjin xu cachja me.

⁵⁹Cachja sa xu me cuitjin cojo ngu nga xuta jan:

—Nduvun, cuanguen cojo ná. —Cuatjin xu cachja me.

Peru xuta jan ne, cuitjin xu cachja me:

—Tatá. Tuhun ná cahndé, titjun cjué xi seyaniji nahmi naha. —Cuatjin xu cachja ngu nga xuta jan.

⁶⁰Ngajan xi Jesús ne, cuitjin xu cachja me:

—Xuta xi sacuaaha xi cahme cjuatacun rë me xi sahmicuendaain me Nina ne, me vëhé catinchaniji me nima rë me. Peru ngayun ne, tángun tuhun cumachaya rë xuta tsëhé gobiernu xi sahmi Nina. —Cuatjin xu cachja me.

⁶¹Ngu nga xuta ne, cachja xu me cojo Jesús cuitjin:

—Tatá. Ngahan ne, hacuaaha cjué cojo nuju. Peru tuhun ná cahndé, cjué tsinguíjnetaha cjuá cojo xuta naha. —Cuatjin xu cachja xuta jan.

⁶²Peru Jesús ne, cuitjin xu cachja me cojo xuta jan:

—Ngu xuta xi ha cavejña cacun me xi cjuetjengui me ndiya rë Nina sehe cumangu cumajo cacun me zhá cjue, há cjuin me ne?, tangun me cojo ngu cha xi ha cafaha cha ndetsihin latu xi cuetsihin cuacjan cha nangui peru tivutsejen sa cha taha ngaxtun cha. Sacuatjin machjiriin cha vihi xi cuacjan cha nangui ne, hacuanitjin ni machjiriin me vëhé xi cuisecoo me Nina hiscan xi sahmi Nina gobiernu. —Cuatjin xu cachja Jesús.

10

Catsingatju Jesucristu jyanchan tejó xuta ladu rë me xi cuichja cjuandajyihí rë Nina

¹Xi cavatju xu vëhé ne, sehe casuaxa Nai naja jyanchan tejó sa xuta ladu rë me, sehe catsingatju titjun me chuva jo chuva jo xuta jan yëjé ni nandya cojo yëjé ni cahndé xi catsingataha cacun Jesús xi sehe cjue me.

²Hane cuitjin xu cachja me cojo:

—Jemu tjin camahani xuta xi meje cuisinuju me cjuá rë Nina, peru me xi sua cumachaya rë xuta ne, jemu chuva má me. Vëhé xi meje rë xi chjahyun rë Nina favor xi tsingatju me me xi cjue sua cumachaya rë xuta cjuá rë Nina.

³Táangun ni. Ngahan títtingatju nuju ngayun xuta jeya ngajñi rë xuta hnga cacun, sacuaaha cjue ngu chu hndítsanga ngajñi rë chu cjan rë.

⁴Xicachjuun tujún, xicachjuun changa, hacuaaha xicachjuun chuxinxté. Xicavisiajmuu cojo xuta hora xi sacu xingun cojo rë me ndiya.

⁵Hane tu jaré ni ndihya xi cuisuhun ne, titjun tinújun ngu nina cuitjin: “Nina sua nuju me cjuandaja cjuajeya.” Cuatjin tinújun.

⁶Hane sá xi ndihya vëhé tjin quihndi tsëhé cjuajeya ne, hacuaaha sacú rë me cjuajeya. Peru sá xi hacuiin quihndi tsëhé cjuajeya xi siu jan ne, sacuiin rë me.

⁷Hane xi cuisuhun ngu ndihya ne, ha ngajan ni tinechun, xinu siuhun cojo rë me mé xi sua me. Cuatjin nihñu ta, tsëhé xi ngu xuta xi sahmi me xá ne, vechú chuva rë xi sacú chji rë me. Vëhé xi mijí rë xi cuangun nguehe cuangun ngajan cuinechun.

⁸Hane tu jaré ni nandya xi cuisuhun hiscan xi cjuahatsja nuju xuta ne, xinu xcusun xi sua me xinu,

⁹hacuaaha nihñu xi xutahmu rë tsëhé nandya jan ne, cumandaja me, hacuaaha cuitjin tinújun cojo yëjé xuta: “Ha camatiña nixtin xi cuma nuju xi sahmi Nina gobiernu.” Cuatjin tinújun.

¹⁰Hane tu jaré ni nandya xi cuisuhun hiscan xi cjuahatsjaain nuju xuta ne, xi chjuhun ndiya xi cuetjuxun tsëhé nandya vëhé ne, cuitjin tinújun cojo xuta:

¹¹“Hisca chojo rë ngajñi nandya nuju xi cavaqui rë ntsacuín ne, cuitsuni cojo sa xi cuma tsejen xi ngayun cún nuju. Peru meje rë xi cuijne rcun xi ha camatiña nixtin xi sahmi Nina gobiernu.” Cuatjin tinújun.

¹² Cuichjá cojo nuju ta hya xi cuechú nixtin xi tsichuva Nina xuta tsêhê jyê rê me ne, hitsê sa jyê castigu cuatju xuta tsêhê nandya xi fahatsjaain nuju, xi cuma rê xuta tsêhê nandya Sodoma xi jercu tu casahmi camahani me cjuatsehen.

Cjuachoho xi cuma rê ciudad xi camacjaain rê cjuar rê Jesús

¹³ ¡Jemu chojyihî tsêhê xuta nandya Corazín! ¡Hacuaha jemu chojyihî tsêhê xuta nandya Betsaida! Jemu chojyihî tsêhê me ta, tsêhê xi miji tsindeya me cjuatacun rê me, handasa cavêe me cjuarcun xi casahme ngajñî rê me. Xuta nandya Tiro cojo xuta nandya Sidón ne, hisca hacuîin xuta ladu rê Nina má me sacuatjîn rê xuta Corazín cojo Betsaida. Peru sá xi xuta Tiro cojo Sidón cavêe me cjuarcun xi cuacun vê ne, ha catsindeya me cjuatacun rê me, hacuaha ha cavajá me tsjian xi sacuahá tsánaxá hacuaha caviyuju me ngajñî ndesu, sacuahá xcusun naja, cojo sa xi cuma tsejen xi jemu choho má jain rê me tsêhê jyê rê me.

¹⁴ Vêhê xi hya xi tsichuva Nina yêjê xuta tsêhê jyê rê me ne, xuta nandya Tiro cojo xuta nandya Sidón ne, hitsê sa chúva castigu cuatju me cuma xi cuma rê xuta Corazín cojo xuta Betsaida.

¹⁵ Hane xuta nandya Capernaum ne, ¿há cjuê me hisca ngahnga hiscan tacun Nina? ¡Hacuîin! Hatuxa cjuê me nduchin, cahndê hiscan ma hasen rê nima castigu.

¹⁶ Xuta xi cuihndê me tsujun ne, hacuaha tivihndê me tsahan. Hane xuta xi tsitjungui nuju me ne, hacuaha titsitjungui me ngahan. Hane xuta xi tsitjungui ná me ne, hacuaha titsitjungui me Nina xi catsingatju ná. Cuatjîn xu cachja Jesús cojo xuta ladu rê me, sehe cavejtu xuta ladu rê me jan quiji me.

Cavuya xuta ladu rê Jesucristu xi jyanchan tejó

¹⁷ Hya xi camá ne, xi cavuya xu xuta ladu rê Jesús xi jyanchan tejó jan ne, jercu sua rê xahasen rê me. Hane cuitjîn xu cachja me cojo Jesús:

—¡Tatá! ¡Xi veyinnanguin ñihî nuju hora xi tihñî á xi cavítexun nihi ne, hisca xitsehen vihndê tsjin! —Cuatjîn xu cachja xuta xi cuacun jan.

¹⁸ Sehe ngajan xi Jesús ne, cuitjîn xu cachja me cojo xuta jan:

—Jinguyêjê rê xi tivutsején ngahnga hiscan tacun Nina ne, cjanengui Satanás sacuahá camá ni ngu ndihichuhún. Hane cuatjîn cahvê xi tichjahátáha rê gobiernu xi sahmi Satanás.

¹⁹ Chutsujun ni, ngahan casuá nuju chuva rê xi tsajin mé cuatjun cuma, handasa nunú chu yê o sá nunú chu naya o sá xi suvá camahani Satanás choho meje sahmi cojo nuju.

²⁰ Hacuîin ndaja cuma nuju tsêhê xi vihndê xitsehen tsujun ta xi meje rê ne, ndaja catama nuju tsêhê xi ha quitaháxujun ñihî nuju ngajan ngahnga. —Cuatjîn xu cachja Jesús cojo xuta ladu rê me jan.

Casahmi jyê casahmi hnga Jesucristu Nina

²¹ Hane ha hora vêhê ni ne, Hasen rê Nina casahmi xi jemu sua camahani camá rê xahasen rê Jesús, sehe cachja xu me cuitjîn cojo Nina:

—Ngayun nahmi naha ne, sahmejyê sahme hnga nuju cojo Hasen nuju, ngayun xi Nai rê ngahnga cojo nangui ngayun, tsêhê xi ngayun caveyín hmu cjuatacun vêhê xi cuma rê xuta xi jemu vechú cjuatacun rê, hane catuhun camachaya rê xuta xi hvín camahani. Ngayun nahmi naha, cuatjîn canihñu ta, tsêhê xi cuatjîn xi cachuya nuju. —Cuatjîn xu cachja Jesús cojo Nina.

²² Hane xi cojo yêjê ni xuta ne, cuitjîn xu cachja me:

—Yêjê ngarca ni matsejen ne, Nina Nahmi naha casua ná me. Tsajin hisca ngu xi vêe yo xi Quihndî rê Nina matsejen ta suvá ni Nina Nahmi naha xi vêe me. Hacuaha tsajin hisca xi ngu xi vêe yo xi Nahmi naha matsejen ta suva ni ngahan xi Quihndî rê me ngahan xi hvê, cojo tu yo ni xi ngahan meje suá cumachaya rê. —Cuatjîn xu cachja me cojo yêjê xuta.

²³ Cavuya vutsejen nga me hiscan siu xuta ladu rê me ne, sehe cachja xu me cojo suvá ni me xi cuacun vêhê cuitjîn:

—Jemu ndaja tsujun ngayujun ni xi tichutsujun xcusun xi tijima nixtin vihî.

²⁴ Nguehe cuichjá cojo nuju ta jemu ndaja tsujun ta, tsêhê xi hacuaha jemu cjín profeta hacuaha jemu cjín xuta xi matitjun xi caviyuju titjún ne, jemu meje scuêe me xcusun xi ngayun tichutsujun, peru casacuîin cavêe me. Hacuaha jemu meje cuiññuju me cjuar xi tivisiñuju ngayun, peru casacuîin caviññuju me ta, tsêhê xi cjêe cuma xcusun vêhê nixtin hya. —Cuatjîn xu cachja Jesús cojo xuta ladu rê me.

Ejemplu tsêhê cha Samaria xi casahmi cjuandaja

²⁵ Ngundiya nga hya xi tacun xu Jesús cojo xuta ne, casecun ngu cha xi vicuya cjuachacun cavinenguise xu cha cuitjîn xi cjuahachuva cha me:

—Maestro. ¿Mé ndatjîn xi sahme cojo sa xi cuécutáha cjuahñu xatsê xcun Nina? —Cuatjîn xu cavinenguise cha me.

²⁶ Ngajan xi Jesús ne, cuitjin xu cachja me cojo cha:

—¿Hacutjin camahindu xcun ley rè Moisés? ¿Mé xi chutayun jan? —Cuatjin xu cachja me.

²⁷ Hane xi cafayangui cha ne, cuitjin xu cachja cha:

—“Meje rè xi nihmutacún Nina naja cojo nguñajatacún, cojo yějé xahasen nuju, cojo yějé ngahñu nuju, cojo yějé cjuatacun nuju, hacuaha cuatjin nihmutacún xingun sacuatjin hmatacún suvun yojo nuju.” —Cuatjin xu cachjasun cha cjuarè ley.

²⁸ Hane cuitjin xu cachja Jesús cojo cha:

—Cjuaquixi cjuarè canújun. Cuatjin nihñu, sehe cuechuntuhun cjuahñu xatsé. —Cuatjin xu cachja Jesús.

²⁹ Ngajan xi cha xi vicuya cjuachacun jan ne, xi meje tsingacun cha xi jemu quixi cha cojo cjuatacun rè cha ne, cuitjin xu cavinenguise cha cojo Jesús:

—¿Yo xi xingueen ni? —Cuatjin xu cachja cha.

³⁰ Hane ngajan xi Jesús ne, cojo ngu ejemplu cafayangui xu me tséhé cha cuitjin:

—Cuejña ne xi ngu xuta jan ne, cavetju me tséhé nandya Jerusalén ne, cjuí me nandya Jericó. Hane ndiya cjuí me ne, cavechútáha ngujo cha chějé me. Hane cafahatahá cha yějé tséhé me xi yaha me, sehe cavaja cha me. Ña catsiquehenñaja cha me, hane sehe cavanga cha.

³¹ Hya xi camá ne, hora vèhé canduva ngu nahmi cavatju me ndiya vèhé, hane xi cavèé me xuma xuta xi casacuhmu rè jan ne, tjehe ndiya ladu xingu cavatju me quiji me.

³² Ha chuva vèhé ni ne, cafehe ngu sangrista cahndé vèhé. Hane xi cavèé cha xi jiña me xi casacuhmu rè jan ne, cavetahaxin cha hitsé ndiya rè cha sehe cavatju cha quiji cha.

³³ Peru ngu cha tséhé distritu Samaria xi quiji cha ndiya vèhé ne, cafehe cha hiscan jiña xutahmu rè jan. Hane xi cavèé cha me ne, jemu camayuma rè cha me.

³⁴ Hane xi quijivaha cha xcun me ne, catsirqui cha me, cavitejnu cha aceite cojo xan hiscan casacuhmu rè me sehe catsitjinguia cha me tsjian. Hya xi camá ne, sehe catsiquijin cha me naxin rè cha, sehe quijicojo cha me ngu ndihya hiscan xi hatuxa ndihya viyuju xuta, hane ngajan casahmi cha me cuidadu.

³⁵ Hane xi camá nchujun jan ne, cavaxé cha jo denario, tujún xi faha ngu mosu xi sahmixa jo nixtin, sehe casua cha me xi nai rè ndihya jan, sehe cachja cha cojo rè me cuitjin: “Nihñu cjuandaja ne, chjuhuncuendun xuma xutahmu rè vi. Hane xi quisun sa nicujun tséhé xcun tujún xi suá nuju vi ne, xi cúya ne, sehe cuechjé tsujun.” Cuatjin cachja cha Samaria.

³⁶ Ngajan xi Jesús ne, xi cuatjin cajnetaha ejemplu xi cachja me ne, sehe cachja xu me cojo cha xi vicuya cjuachacun jan cuitjin:

—¿Jaré tséhé catsijyan xuta xi cuacun vè xi má nuju xi cjuaquixi xi camá xicjin me xi cavanguihmu chějé jan? —Cuatjin xu cachja Jesús.

³⁷ Ngajan xi cha xi vicuya cjuachacun jan ne, cuitjin xu cafayangui cha tséhé Jesús:

—Cha xi ngatsé rè cjuayuma ne, casahmi cjuandaja cojo me xi casacuhmu rè jan. —Cuatjin xu cachja cha.

Hane Jesús ne, cuitjin cachja nga xu me cojo cha:

—Quihndé xi cuangun ne, hacuaha cuatjin nihñu. —Cuatjin xu cachja Jesús.

Quiji Jesucristu ndava na Marta

³⁸ Hane xi cjuí sa xu Jesús cojo xuta ladu rè me ne, xi cavisehen me ngu nandya jan ne, ngu na xi hmí rè Marta ne, cafahatsja na Jesús ndava na.

³⁹ Na Marta jan ne, tjin ngu tichja na xi hmí rè María. Hane na María jan ne, quiji xu na cavéjña na táha ntsacu Jesús, tivisiñuju na cjuarè xi tivicuya me.

⁴⁰ Peru na Marta ne, jemu cjin xcunya xá xi tisahmi na. Hane xi cavatju na hiscan tacun Jesús ne, cuitjin xu cachja na:

—Tatá. ¿Há marcuain nuju xi na tichja ne, cavejñasuva ná na cojo xá xi tacunvasen tisahme? Tinújun cojo rè na, catisecoo na ngahan. —Cuatjin xu cachja na.

⁴¹ Ngajan xi Jesús ne, cuitjin xu cafayangui me tséhé na:

—Marta, jercu marcun nuju tséhé jemu cjin xcusun.

⁴² Peru ngu xcusun ni xi sahmí ngujyé. Na María ne, cavaxijin na xcusun xi ndaja vè, hane hacuain chjahatahá rè tséhé na. —Cuatjin xu cachja me.

11

Cavicuya Jesucristu hacutjin meje rè xi nihña oración

¹ Cuitjin camá xu ngundiya hya xi tisahmi Jesús oración rè me ngu cahndé jan. Hane xi cajnetaha casahmi me oración rè me ne, ngu xuta ladu rè me jan ne, cuitjin xu cachja me cojo Jesús:

—Tatá. Ticuyun niji hacutjin nihñi oración niji, sacuatjin cavicuya Juan xuta ladu rè me. —Cuatjin xu cachja me.

² Ngajan xi Jesús ne, cuitjin xu cafayanguí me:

—Hya xi nihñu oración ne, cuitjin tinújun:

Ngayun Nahmi niji, meje niji xi ngayijin ni xuta ngasunhndé chjihinrcuin nuju.

Meje niji xi cuinduvun nihñu niji gobiernu.

³ Nchunchujun ni tuhun niñu xi xiní.

⁴ Ninchatuhun niji tséhé jyé xi jemu quitjin ta

ngayin suvin ne, hacuaha tininchatihin ré

yéjé ni xuta xi quitjen me jyé tsijin.

Xicatuun cahndé xi chjaháchuva niji cojo cjuatacun niji.

Cuatjin tinújun. —Cuatjin xu cachja Jesús cojo xuta ladu ré me.

⁵ Hya xi camá ne, cachja nga xu Jesús ngu ejemplu cojo xuta ladu ré me. Cuitjin xu cachja me:

—Cuejña ne xi ngayun tjin nuju ngu xuta xi vinga nuju, hane vasen nixten cuangun ndava me, cuinújun cojo ré me cuitjin: “Amigu, nihñu favor tuhun jyan niñu scuxétaha ta,

⁶ tséhé xi ngu amigu naha cafehe ndya naha xi cjuí me ngu nangui, hane tsajin ná mé xi suá siné me.” Cuatjin cuinújun cojo ré me.

⁷ ¿Há cjuayangui me tsujun cuitjin tséhé hisca cahntsua ndihya?: “Xicatuunndyuu ná ta tingotjo ndihya ne, ha tichjá, hacuaha quihndi naha ne, nuehe siufé cojo ná. Cumaji cuisátjenhnga suá nuju.” ¿Há cuatjin cjuayangui me tsujun? Hacuiin cuatjin.

⁸ Cuichjá cojo nuju ta handasa amigu nuju me, peru hacuiin ngatsé ré vèhé xi cuisatjenhnga me sua nuju me ta ngatsé ré xi ngajan cjuí ngajan nduva cuinújun ne, cuisatjenhnga me sua nuju me ha tucutjin xi chjahyun.

⁹ Hacuaha cuichjá cojo nuju cuitjin: Chjahyun ré Nina, hane sua nuju me. Tinchunsun, hane sacú nuju. Tinújun, hane Nina ne, sua me cahndé cuisuhun.

¹⁰ Cuatjin nihñu ta, yéjé ni xuta xi fehya me ne, fahatsja me, hane yo xi vanguise ne, sacú ré, hane yo xi chja ne, sacú cahndé visehen.

¹¹ Tsajin ngu nahmi xi, hya xi quihndi ré me cjuéhya ngu niñu ne, cahndé ré xi sua me ngu niñu ne, sua me ngu ndyojo, o sá xi hya xi quihndi cjuéhya ngu chu ti ne, cahndé ré xi sua me ngu chu ti ne, sua me ngu chu yé,

¹² o sá xi hya xi quihndi cjuéhya ngu chjoo ne, sua me ngu chu naya.

¹³ Ngayun xi tsehen cjuatacun nuju ne, ma tuhun ré quihndi nuju xcusun xi ndaja. Hitsé guan Nahmi naja xi tacun me ngahnga ta hitsé sa jercu meje sua me Hasen ré me cojo xuta xi cjuéhya ré me. —Cuatjin xu cachja Jesús.

Cachja xuta xi Satanás casuaxa ré Jesucristu

¹⁴ Cavechú xu ngu nixtin xi cavaxéxin Jesús ngu xitsehen xi casahmi lihmi ré ngu cha jan. Hane hya xi cavetju xitsehen jan ne, cha lihmi jan ne, cavetsihin cachja cha. Hane xutacjin jan ne, jemu quijircun ré me.

¹⁵ Hya xi camá ne, ngujo xuta jan ne, cuitjin xu cachja me:

—Beelzebú, xitsehen xi matitjun ne, vèhé casua ré cha xá xi vaxéxin cha xitsehen. —Cuatjin xu cachja xuta jan.

¹⁶ Hane ngujo nga xuta ne, xi meje cjuahachuva me Jesús ne, cafehya me me xi sahmi me ngu cjuarcun xi cuinduva ngajan ngahnga.

¹⁷ Peru Jesús ne, tséhé xi ha vèé me mé xi tsingataha cacun xuta xi cuacun jan ne, cuitjin xu cachja me:

—Hya xi xuta tséhé ngu nandya ticjan me ngajñi ré me, nandya vèhé ne, ha tivéjña xahva, hisca ndihya ne, tivixusun xcun xicjin.

¹⁸ Hacuanitjin ni sá xi Satanás scaan cojo xitsehen xi yahnga xi hacuaha Satanás má nai ré ne, tsichajá ngahñu ré xi vèhé matitjun. Cuatjin chjá ta, tséhé xi nújun xi Beelzebú casua ná xá xi vaxéxin xitsehen.

¹⁹ Peru sá xi Beelzebú casua ná xá xi vaxéxin xitsehen ne, hacuaha ha Beelzebú vèhé casua ré ngu ngu xuta ladu nuju xá xi hacuaha vaxéxin me xitsehen. Vèhé xi ha me vèhé ni cuichja me xi cuaaintjin xi nújun xi Beelzebú casua ná xá.

²⁰ Peru sá xi Nina casua ná me xá xi vaxéxin xitsehen ne, ngajan matsejen xi gobiernu xi sahmi Nina ne, ha tivetsihin.

²¹ Satanás ne, tangun cojo ngu cha xi jemu hñu ngahñu ré. Hya xi ha ndaja tjin chjine cha cojo quicha ré cha xi sahmi cuidadu cha ndava cha ne, yéjé xcusun xi tjin ré cha ne, hacuaha ha ndaja cuidadu tjin.

²² Peru ngahan ne, tangun ngahan cojo ngu me xi hitsé sa jemu hñu camahani ngahñu ré. Hya xi me xi hitsé sa hñu ngahñu ré scaan me cojo cha xi hñu ngahñu ré jan hacuaha tsinguijne me cha ne, cjuahatahá me quicha xi vetaha cacun cha xi cuaxétje ré cha, hane sehe cuatécja me yéjé xcusun xi tjin ré cha jan ngajñi ré me cojo xicjin me.

²³ Xuta xi fiin me favor naha ne, condra naha má me. Hane xuta xi visecuaain ná me xi nihñi tangun cjuatacun rê xuta cojo Nina ne, tsingquetsun me cjuatacun rê xuta. —Cuatjin xu cachja Jesús.

Xitsehen xi vuya

²⁴ Hya xi camá ne, Jesús ne, quijinduju sa xu cachja me cuitjin:

—Hya xi vetjuxin xitsehen tsêhê xahasen rê ngu xuta hiscan xi camá sacuaaha ndava xitsehen jan ne, fi tâha hiscan jemu nangui quixi camahani, vanguise cahndê hiscan xi cuejñajenda. Hane xi sacuiin rê cahndê hiscan cuejñajenda ne, cuitjin tsingataha cacun: “Cuya rê cjuê ndya naha hiscan xi cavêtjuxen.” Cuatjin tsingataha cacun xitsehen jan.

²⁵ Hane xi vuya fehe xitsehen jan cahntsua xahasen rê xuta jan ne, vutsejen xitsehen jan cahntsua xahasen jan sacuaaha ngu ndihya xi caxtecha tyjahi tyjahi, hacuaaha siundaja chichihin ngu tsê ngu xti.

²⁶ Xi vutsejen xitsehen jan xi cuatjin jiyhi jan ne, sehe fi jaha sa rê yatu sa xitsehen xi hitsê sa tsehen xi cuma rê vêhê ne, sehe visehen nga viyujucahndê jan. Peru xi ma ngascan ne, hitsê sa chojyhi tsêhê xuta vêhê xi cuma rê titjún. —Cuatjin xu cachja Jesús.

Xuta xi ndaja jain tsêhê me

²⁷ Peru jinguyêjê rê xi tichja xu Jesús cjuá vêhê ne, ngu na xi jiyajñi ngajñi rê xutacjin jan ne, cajindaya na cachja xu na cuitjin:

—Jemu ndaja tsêhê chjuun xi catsin rê ngayun, hacuaaha jemu ndaja tsêhê ndanisin xi cavacuntuhun. —Cuatjin xu cachja na.

²⁸ Peru Jesús ne, cuitjin xu cafayangui me tsêhê na:

—Quixi, peru hitsê sa ndaja tsêhê xuta xi visiñuju me cjuá rê Nina hacuaaha vihndê me tsêhê. —Cuatjin xu cafayangui Jesús.

Cafehya xuta tsehen ngu seña xi sahmi Nina

²⁹ Vêhê ta jima tangun camaha sa xutacjin jan ne, cavetsihin cachja xu Jesús cuitjin:

—Ngayujun ni ngayun xuta tjê rê Israel tsêhê nixtin vihi matsejen ne, hatuxa tsehen cjuatacun nuju. Tichjahyun ngu seña xi sahmi Nina, peru sacuiin nuju matsejen ta ngu ni seña xi sacú nuju matsejen ne, sacuaaha seña xi catsingacun profeta Jonás hatsêê nixtin.

³⁰ Sacuatjin rê profeta Jonás xi me vêhê camá me ngu seña xi cuma rê xuta nandya Nínive hatsêê nixtin matsejen ne, ha cuanitjin ni ná ngahan xi Quihndi rê Xuta Jain ngahan matsejen ta ngahan cuma ngahan seña xi cuma nuju ngayujun ni xi nechun nixtin vihi.

³¹ Hya xi cuechú nixtin xi tsichuva Nina xuta tsêhê jyê rê me matsejen ne, na xi cavitexa ngajan nangui Sabá hatsêê nixtin matsejen ne, cjue cuinchajyê nuju na ngayujun ni ngayun xuta tjê rê Israel xi nechun nixtin vihi. Cuatjin sahmi me matsejen ta, tsêhê xi jercu tu cjin camahani xi canduva na xi cuihndê na cjuatacun ndacun xi jercu tu ma camahani rê Salomón, me xi cavitexa rê xutachanga naja hatsêê nixtin. Peru ha tejña ngahan nguehe sacuaaha ngu seña xi hitsê sa vengui chji rê xi cuma rê Salomón.

³² Hacuaaha hya xi cuechú nixtin xi tsichuva Nina xuta tsêhê jyê rê me matsejen ne, yêjê xuta nandya Nínive matsejen ne, cjue cuinchajyê nuju me ngayujun ni ngayun xuta tjê rê Israel xi nechun nixtin vihi. Cuatjin sahmi me matsejen ta, tsêhê xi me xi cuacun vêhê matsejen ne, catsindeya me cjuatacun rê me hya xi casua profeta Jonás camachaya rê me cjuá rê Nina. Peru ha tejña ngahan nguehe sacuaaha ngu seña xi hitsê sa vengui chji rê xi cuma rê profeta Jonás. —Cuatjin xu cachja Jesús.

Ndihî rê yojo naja

³³ Hane xi quijinduju sa cachja me ne, cuitjin xu cachja me:

—Tsajin hisca xi ngu xuta xi ha xcun xi ha cavatju cavetaha rê me ngu ndihî matsejen ne, faha me veyahma me o sá xi faha me veyá me ngahma ngu caxa matsejen ta faha me vejña me cahndê rê, cojo sa xi yêjê xuta xi visehen me hiscan setú ndihî jan matsejen ne, scuêê me hasen rê.

³⁴ Tuxcuun matsejen ne, vêhê xi sacuaaha ndihî rê yojo naja. Vêhê xi hya xi tuxcuun ndacun matsejen ne, hatuxa ma hasen cahntsua yojo naja. Peru sá xi tuxcuun chocun matsejen ne, hacuaaha ma jñu cahntsua yojo naja.

³⁵ Ndandaja ningatuhuntacún matsejen ne, sacuaaha hasen xi jiya cahntsua yojo nuju matsejen ne, ¿há hasen xi cjuaquixi jain?, o há tsajin ne, ¿há jñú?

³⁶ Quihndê matsejen ne, sá xi jinguyê ni yojo nuju jiya hasen, hisca xi hitsê jñú tsajin rê matsejen ne, jinguyê ni yojo nuju matsejen ne, jiya hasen sacuaaha hya xi sahmi hasen tsajin hasen rê ngu ndihî. —Cuatjin xu cachja Jesús.

Cacjan Jesucristu cojo cha fariseo cojo cha xi vicuya cjuachacun

³⁷ Hane xi cajnetaha xu cachja Jesús ne, ngu cha fariseo ne, cachja cha cojo Jesús xi cjue sinê me cojo cha niñu. Xi cavisehen Jesús ndihya ne, quiji xu me cafaha me cahndê rê me xcun maxê.

³⁸ Peru xi cavêê xu cha fariseo xcusun rê Jesús ne, jemu quijircun rê cha tsêhê xi hacuiin titjun cavane xu me tsja me sehe sinê me niñu sacuaa vitexa xcusun rê xutachanga rê me.

³⁹ Ngajan xi Nai naja ne, cachja xu me cojo cha cuitjin:

—Ngayujun ni ngayun xuta fariseo ne, xcusun nuju xi nihñu tyjahi táha ngaxtun ni ngu vasu o sá xi ngu tyuva, peru cahntsua xahasen nuju ne, quitsê camahani rê cjuatsehen cojo cjuatacun xi nimuju yêjê ni xcusun.

⁴⁰ Sca nuju ngayun. Catijne rcun ta ha me xi casahmi ni táha ngaxtun ne, hacuaa ha me vêhê ni casahmi me táha cahntsua.

⁴¹ Peru xi hincha cahntsua ne, vêhê tuhun sacuaa caridad. Sá xi cuatjin nihñu ne, yêjê ni xcusun ne, tyjahi xi cuma nuju.

⁴² Peru jemu chojyihî tsujun ngayun xuta fariseo, tsêhê xi ngayun ne, handasa nihñu cuidadu xi tuhun diezmu nuju hisca cojo nchurca cojo ruda cojo yêjê sa xcusun ndeya ne, peru nihñucunduun xi nihñu hacutjin xi cjuaquixi cojo xingun, hacuaa nihñucunduun xi nihmutacún Nina. Ngayun ne, meje rê xi ha canihñucunduun Nina, peru hacuaa hacuiin nichayun diezmu nuju vê.

⁴³ Hacuaa jemu chojyihî tsujun ngayun xuta fariseo, tsêhê xi ngayun ne, jemu ndama nuju xi cuatjin satê nuju cahndê xi matitjun tsêhê cahntsua yungun. Hacuaa jemu ndama nuju xi cuatjin fi chja xuta nina cojo nuju ngajan ngajñi ndetsin.

⁴⁴ Hacuaa jemu chojyihî tsujun ta, handasa matsijin ne, peru jemu chocun xahasen nuju. Vêhê xi tangun ngayun cojo tsjun xi hisca matsijin, hane xuta ne, hisca machayin rê me cjuî nduva me sune me xcun. —Cuatjin xu cachja Jesús.

⁴⁵ Ngajan xi ngu cha xi vicuya cjuachacun ne, cachja xu cha cuitjin cojo Jesús:

—Maestro, hya xi nújun cjuava vêhê ne, hacuaa cojo ngayin choho nújun tsijin. —Cuatjin xu cachja cha.

⁴⁶ Hane Jesús ne, cuitjin xu cachja me:

—Hacuaha cojo ngayun cha xi vicuya cjuachacun, jemu chojyihî tsujun, tsêhê xi vicuyun rê xuta jemu cjin xcusun xi jemu chja camahani cuma sahmichihin me, hane suvun ne, visecuún rê me hisca hitsê.

⁴⁷ Jemu chojyihî tsujun ngayun ta, tsêhê xi ngayun ne, nindujun tsjun ndacun tsêhê yêjê ni nima profeta xi xutachanga nuju catsiquehen me hatsêê nixtin.

⁴⁸ Ngayun suvun ningacun xi chuya nuju xcusun xi casahmi xutachanga nuju ta, tsêhê xi ngu ladu ne, me vêhê catsiquehen me profeta xi cuacun vê, hane ngu ladu nga ne, ngayun nindujun tsjun rê.

⁴⁹ Vêhê xi Nina, me xi jemu vechútaha cjuatacun rê me ne, cachja me cuitjin: “Tsingátju profeta cojo apóstol ngajñi rê xuta xi siu nixtin vihi, hane yahnga me xi cuacun vê ne, tsiquehen xuta me, hane yahnga me ne, sua xuta cjuañihî xi cuatju me xi cuacun vê.” Cuatjin cachja Nina.

⁵⁰ Hane cojo chuva vêhê ne, xuta xi siu nixtin vihi ne, me vêhê cháha rê me tsêhê cjuaveya rê yêjê profeta xi cahme hisca ntsacu cavetsihin ngasunhndê,

⁵¹ vetsihin cojo hisca cjuaveya rê xutachanga naja Abel vijnetaha cojo hisca cjuaveya rê xutachanga naja Zacarías, me xi catsiquehen rê xuta tiña ngasuncun hiscan ndatsen rê ndava Nina. Cuichjá nga cojo nuju ta yêjê cjuaveya xi cuacun vê ne, cháha rê xuta xi siu nixtin vihi.

⁵² Jemu chojyihî tsujun, ngayun cha vicuya cjuachacun ta, tsêhê xi cavejñuxun cjuatacun rê Nina. Canitjungun cjuatacun rê me, hacuaa hisca catuun cahndê xi sacú rê xuta xi meje rê me cjuatacun rê Nina jan. —Cuatjin xu cachja Jesús.

⁵³ Hane hya xi tivetju xu Jesús tsêhê cahndê hiscan cajinê me niñu jan ne, cha xi vicuya cjuachacun cojo cha fariseo jan ne, jemu cjan rê cha, jemu cjin cjuava cafahataha xu cha me,

⁵⁴ hacuaa jemu cavangui xu cha chuva rê hacutjin xi sacú rê cha ngu cjuava rê me xi cuaaintjin cuichja me.

12

Cjuandacha xi sahmi cha fariseo

¹ Jinguyêjê rê xi tichja sa xu Jesús cojo cha xi cuacun jan ne, jercu jima tangun camahani xuta, ña vehnchun xicjin me. Sehe ngajan xi Jesús ne, cavetsihin cachja xu me tjutjun cojo xuta ladu rê me cuitjin:

—Xicaninguisuhññu cojo cha fariseo xi cuacun vê ta, tsêhê xi cjuandacha xi sahmi cha ne, tangun cojo san rê pan xi hatuxa vitsojo ngajñi rê yêjê ni nahyu.

² Yějē ni xcusun xi casetsangui ne, cuechú nixtin xi chjaháxin rē xi titsangui rē. Věhē xi yějē ni xcusun xi hma ne, handasa sehmagui ne, peru cuechú nixtin xi cuetjucaa tsejen.

³ Yějē ni cjua xi má hiscan jñu ne, cuechú nixtin xi cuinuhya rē hiscan hasen. Věhē xi yějē ni cjua xi má táha hma ne, cuechú nixtin xi cuinuhya rē táha tsejen.

Yo xi meje rē xi rcún

⁴ 'Nguehe cuichjá cojo nuju, ngayujun ni. Xicarcuun xuta xi tsiqehen nuju me, hane ngaxtun věhē ne, ha quihndē tsajin mé sa xi cuma sahmi me cojo nuju.

⁵ Peru nguehe cuichjá cojo nuju yo xi meje rē xi rcún. Meje rē xi Nina xi rcún me. Me xi ngaxtun xi ha catsiquehen nuju ne, tjin rē me cahndē xi tsingatjenya nuju me hiscan xi má hasen rē nima castigu. Cuichjá nga cojo nuju ta hatuxa me věhē xi meje rē xi rcún me.

⁶ 'Chutsujun ta hñu chu nisē langa ne, jemu xtengui chji rē chu. Peru Nina ne, tsichayain me hisca xi ngu chu.

⁷ Hacuaha ngayun ne, hisca tsjarcun xqui tjin rē Nina. Věhē xi xicarcuun ta, tsěhē xi jima ngu ngayun ne, hitsē sa jercu vengui chji nuju xi cuma rē xi jemu cjín chu nisē vē.

Xuta xi tsinguixi me xi xuta ladu rē Jesucristu má me

⁸ 'Nguehe cuichjá cojo nuju ta yějē xuta xi tsinguixi me xcun xuta xi yahnga xi xuta ladu naha má me ne, hacuaha ngahan xi Quihndi rē Xuta jain ngahan ne, tsinguixē xcun yějē ni ángel rē Nina xi xuta ladu naha má xuta xi cuacun vē.

⁹ Peru yějē xuta xi tsinguixi me xcun xuta xi yahnga xi hacuiin xuta ladu naha má me ne, hacuaha hacuanitjin ni tsinguixē ngahan xcun ángel rē Nina.

¹⁰ 'Hacuaha yějē xuta xi choho chja me tsahan, ngahan xi Quihndi rē Xuta Jain ngahan ne, tsinchataha Nina me, sá xi cjuehya me cjuaninchataha. Peru yějē xuta xi choho chja me tsěhē Hasen rē Nina ne, tsajin cjuaninchataha xi cuma rē me.

¹¹ 'Hya xi xuta nandya cjuaha nuju me cjuecojo nuju me xcun xutaxa rē yungun o sá xi xcun xutaxa rē ndihyavasen ne, hacuiin cumacjintacún tsěhē chuva rē hacutjin xi chjayunngun o tsěhē xi cuinújun ta,

¹² tsěhē xi ha hora věhē ni ne, Hasen rē Nina cuichja cojo nuju mé cjua xi meje rē xi cuinújun. —Cuatjin xu cachja Jesús.

Mijí rē xi jercu nimeje cjuanchina

¹³ Hya xi camá ne, ngu xuta tsěhē ngajñi rē xutacjín jan ne, cachja xu me cojo Jesús cuitjin: —Maestro, tinújun cojo cha věhē xingueen, catisua cha ngahan xcusun xi satē ná xi cavejña nahmi niji hya xi sahme me. —Cuatjin xu cachja me.

¹⁴ Sehe ngajan xi Jesús ne, cuitjin xu cachja me: —Peru ngahan ne, hacuiin xá naha xi ngahan cuátécja xcusun xi satē nuju xingu xingu ngayun. —Cuatjin xu cachja Jesús cojo xuta jan.

¹⁵ Sehe cachja nga xu me cojo xutacjín jan cuitjin: —Nechun cuidadu, hacuiin jercu nimuju cjuanchina matsejen ta, tsěhē xi hacuiin ngatsē rē cjuanchina xi tjin naja matsejen ne, věhē xi ndacun cjuahñu naja. —Cuatjin xu cachja me.

¹⁶ Ngaxtun věhē ne, sehe cachja xu Jesús ngu ejemplu cojo xuta cuitjin: —Cuejña ne xi ngu cha nchina jan matsejen ne, jercu ndaja camá xitjē xcun nangui rē cha.

¹⁷ Hya xi camá ne, cuitjin catsingataha cacun cha: “¿Mé xi ndatjin sahme quihndē? Ha quihndē tsajin ná cahndē hiscan xinchandaja tutjē naha.

¹⁸ Ndatjin rē xi cuitjin sahme. Tsinguétsun ndihya hiscan hinchandaja tutjē naha, hane tsindaja xi hitsē sa yehe. Hane ngajan cuínchandaja yějē tutjē naha cojo ngu tsé ngu xtí sa xi tjin ná.

¹⁹ Hane sehe cuichjá cojo xahasen naha cuitjin: Jercu cjín camahani xcusun hinchandaja ná quihndē, hacuaha jemu cjín nu cjuecani rē. Cuitejñajenda quihndē. Sínē cuehē tsahan. Suá cjuasua xahasen naha.” Cuatjin catsingataha cacun cha nchina jan.

²⁰ Ngajan xi Nina matsejen ne, cuitjin cachja me cojo cha: “Sca ri ngaye. Nguixun quihndē ne, cueye. Hane yějē xcusun xi cavetje ne, tsajin mé sacú ri tsěhē.” Cuatjin cachja Nina.

²¹ Cuatjin rē xuta xi jercu vetjo cjuanchina xi cuma rē suvá me, peru xcun Nina matsejen ne, tsajin mé xi tjin rē me. —Cuatjin xu cachja Jesús ejemplu věhē.

Sahmi cuidadu Nina xuta ladu rē me

²² Ngajan xi Jesús ne, cuitjin cachja xu me cojo xuta ladu rē me: —Věhē xi cuichjá cojo nuju ta: Hacuiin cumacjintacún tsěhē xcusun xi xinu xi sua nuju ngahñu. Hacuaha hacuiin cumacjintacún tsěhē tsjian xi chujun.

²³ Hacuini cumacjintacún ta, tsêhê xi hitsê sa vengui chji rê cjuahñu nuju xi cuma rê xi chinu. Hacuaha hitsê sa vengui chji rê yojo nuju xi cuma rê tsjian xi chujun.

²⁴ Chutsujun chu chenda ta hacuini tsitjê chu, hacuini fanga chu, hacuaha tsajin rê chu ndyahnga hiscan cuinchandaja chu xi sinê chu. Peru Nina tsicjen me chu. Ngayun ne, hitsê sa jercu vengui chji nuju xi cuma rê chu nisê.

²⁵ Hacuaha tsajin hisca xi ngu xuta xi cuma cuesuntaha me cjuahñu rê me hisca ngu hora ngatsê rê xi ma cjin cacun me.

²⁶ Sá xi hitsê lihndi xcusun vêhê maji nihñu ne, ¿mé má jercu macjintacún tsêhê xcusun xi yahnga jan ni?

²⁷ Chutsujun naxu liru ta tsihyaain nachjun hacuaha fahyaain tsjian. Peru ngahan cuichjá cojo nuju ta tsjian rê xutachanga naja Salomón ne, handasa jercu ndacun camahani, peru hitsê sa ndajyihî ngu naxu vêhê.

²⁸ Sá xi cuatjin tsicaja Nina xca nguñña xi ngu nixtin ne siutahá nguñña, hane xitu ngu nixtin ne cueti ne, hitsê sa ngayun ta hatuxa tsicaja nuju me, ngayun xi cjêê cumangutacúnndujun cojo me.

²⁹ Hacuini jercu nijendun rê xahasen nuju xi vinchunsun xi xinu xi siuhun ta,

³⁰ tsêhê xi xcusun vêhê ne, yêjê xutaxin tsêhê jingujyê ni ngasunhndê ne, me vêhê xi vangui me xcusun vêhê. Peru ngayun ne, Nina Nahmi naja ne, ha vêê me xi hatuxa sahmi nguujyê xi sacú nuju xcusun vêhê.

³¹ Catamarcun nuju tsêhê gobiernu xi sahmi Nina, hane xcusun vêhê ne, quitahácoo sa sacú nuju.

Cjuanchina xi tacun ngahnga

³² Xicamacjiintacún ngayun xuta ladu naha xi jemu chúva má ngayun ta, tsêhê xi Nina Nahmi naja ne, ha cavejña cacun me xi cojo cjuandajê rê me ne, sua nuju me xá xi nihñu gobiernu hiscan xi sahmi me gobiernu.

³³ Titeñu xcusun xi tjin nuju, hane tujún xi sacú nuju ne, tuhun rê xuta xi tsajin rê me, sacuaha tuhun ngu caridad. Nihñu nguujyê xi sacú nuju cjuanchina xi jercu cjuecani rê. Cuma cuinújan ne, ngu cjuanchina xi tsajin nixtin cjuê xi cuetjún ngajan ngahnga hiscan xi cha chêjê ne, maji ma tiña cha, hisca chu quixún ne, tsinguetsin chu.

³⁴ Cuatjin meje rê xi nihñu ta, tsêhê xi hiscan tetjo cjuanchina nuju ne, hacuaha ngajan quitahá cjuatacun nuju.

Meje rê xi tjinchjine ngayaan tsêhê xi cjuehe Nai naja

³⁵ Tuhunchjino yojo nuju, hacuaha catisetí ni ndihi nuju, tsêhê xi cjuehe Nai nuju.

³⁶ Nihñu sacuatjin sahmi hndixahan xi viyuyuja me nai rê me, hya xi nai rê me quiji ngu ndava suhi. Siuchjine ni me cojo sa xi hora xi cjuehe nai rê me ne, xi tu cuichja ne, ngutjen cje scuxaha me tingotjo xi cuisehen nai rê me.

³⁷ Jemu ndaja tsêhê yêjê hndixahan xi, hora xi cjuehe nai rê ne, sacútsja rê xi siu quicun. Nguehe cuichjá cojo nuju cjuaquixi ta, xi scuêê nai rê hndixahan jan xi cuatjin quicun hndixahan ne, cuêhêchjine me yojo rê me, sehe cjuecojo me hndixahan xcun maxê, sehe cuiyuju me xi sinê me.

³⁸ Jemu ndaja tsêhê hndixahan xi sacútsja rê nai rê xi siu quicun, handasa nixten cjuehe me o sá hisca tiña sahasen cjuehe me.

³⁹ Hacuaha meje rê xi cumachaya nuju cjuatacun vihi: sá xi nai rê ngu ndihya ha machaya rê me hora xi cuinduva cha chêjê ndava me ne, suaain me cahndê xi scuxaha cha ndava me, sehe tsichêjê cha.

⁴⁰ Hacuanitjin ni meje rê xi ngayujun ni ngayun ne, tuhunchjino yojo nuju ta, tsêhê xi hora xi ningatuuntacún xi cjuêhê ngahan xi Quihndi rê Xuta Jain ngahan ne, hora vêhê rê cjuêhê. —Cuatjin xu cachja Jesús.

Xuta xi vihndê cojo xi vihndiin tsêhê Nina

⁴¹ Hya xi camá ne, Pedru ne, cuiťjin xu cachja me cojo Nai naja:

—Tatá. Ejemplu xi canújun vê ne, ¿há suvin ni ngayin xuta ladu nuju meje rê xi cuetihinrcuin?, o há tsajin ne, ¿há cojo yêjê sa xuta xi yahnga cuetaharcu me? —Cuatjin xu cachja Pedru.

⁴² Ngajan xi Nai naja ne, cuiťjin xu cafayangui me:

—Ngayujun ni ne, meje rê xi nihñu sacuaha sahmi ngu hndixahan xi jemu quicun cacun xi sahmichihin yêjê ni hacutjin xi meje rê nai rê, ngu hndixahan xi cjuahaxa xi cjuahacuenda rê yêjê sa hndixahan xi hora tjin sua xi sinê.

⁴³ Jemu ndaja tsêhê ngu hndixahan xi, hora xi cjuehe nai rê ne, sacútsja me hndixahan jan xi tsahmi tutjin xi casuaxa rê nai rê.

⁴⁴ Cuichjá cojo nuju cjuaquixi ta, nai rë hndixahan vëhë ne, suaxa me hndixahan vëhë xi hacuaha cjuahacuenda yëjë sa xcusun xi tjin rë me.

⁴⁵ Peru cuejña ne xi hndixahan vëhë ne, tsingataha cacun cojo cjuatacun rë cuitjin: “Nai naha ne, tijima tafi sa xi cjeuhe me.” Cuatjin tsingataha cacun. Sehe cuetsihin cuaja rë hndixahan xi yahnga jan, hacuaha cuetsihin cuatjutaha sinë cuihi hisca cuma chihi.

⁴⁶ Peru cuechú ngu nixtin xi tsajin tacunya hndixahan vëhë, ngu hora xi hisca hvín ne, hya cjeuhe nai rë, hane jemu jyë castigu sahmi me. Sehe tsingatju me cuatjutangun cjuañihi cojo hndixahan xi yahnga xi casahmichiin tutjin xi casatëxa rë.

⁴⁷ Hndixahan xi ha ndaja vëë hacutjin xi meje rë nai rë hane cavihinchjinii, hacuaha casahmii tutjin meje rë nai rë ne, jemu sehen camahani rë.

⁴⁸ Peru hndixahan xi hvín hacutjin xi meje rë nai rë hane casahmi xcusun xi vechú chuva rë xi cuma castigu ne, chúva sehen rë. Hane yëjë ni hndixahan xi jemu cjin xcusun xá casua nai rë xi sahmi ne, hacuaha cuatjin jercu cjin cjuah chjahya rë hya xi sahmi entregadu cuenta rë.

Sahmi Jesucristu xi sahmi condra xuta xicjin me

⁴⁹ Ngahan ne, canduvá ne xi cuëtaha rë sacuaha ngu ndihi ngasunhndë, ngu ndihi xi tsingacun mé cún cjuatacun rë xuta. Hacuaha jemu meje ná xi ha hisca ha casetaha rë.

⁵⁰ Ngahan ne, tjin ná xi cuátju ngu cjuañihi sacuatjin rë ngu xuta xi tjin rë me xi satë rë me nandá hya xi xtenda me. Hacuaha jercu choho má ná hisca xi cuma chihin cjuacjintacun vëhë.

⁵¹ Xi má nuju ngayun ne, ¿há cjuajeya canduvácojo xi cuma rë xuta ngasunhndë? Hacuuiin cuatjin. Ngahan ne, canduvá ne xi sahme xi sahmi condra xuta xicjin me. Cuatjin sahmi condra xicjin me ta, tsëhë xi ngujo me ne, cumangu cacun me cojo ná, hane ngujo nga me ne, cumanguaain cacun me cojo ná.

⁵² Xi cuetsihin nixtin vihi ne, hisca cojo xi cjuiniji sa ne, cuejña ne xi ngu ndihya ne, siu hñu xuta cojo xicjin me. Hane jyan me ne, sahmi condra me me xi jo jan. Hane me xi jo jan ne, sahmi condra me me xi jyan jan.

⁵³ Nahmi ne, sahmi condra me cha quihndi rë me, hane cha quihndi rë me jan ne, sahmi condra cha nahmi rë cha. Naa ne, sahmi condra me na quihndi rë me, hane na quihndi rë me ne, sahmi condra na naa rë na. Nahya ne, sahmi condra me jahnda rë me, hane jahnda rë me ne, sahmi condra na nahya rë na. —Cuatjin xu cachja Jesús cojo xuta ladu rë me.

Camamiji cuijne rcu xuta xcusun xi casahmi Jesucristu

⁵⁴ Hya xi camá ne, cachja nga xu Jesús cojo xutacjin jan cuitjin:

—Nguehe nangui naja matsejen ne, hya xi chutsujun xi tivisecún ngu yufí ngajan táha ladu vetje tsuhi matsejen ne, ngutjen nújun ta cuaha ngu tsi hñu, hane cuatjin jain má.

⁵⁵ Hane hya xi vanga ngu tjo xi cjui táha ladu ngatihin matsejen ne, ngayun matsejen ne, nújun ta cuma suë, hane cuatjin jain má.

⁵⁶ Jemu hyun mé vijne xcusun xi cún nangui cojo xcusun xi cún ngahnga. ¿Mé má nújun xi hyúun mé vijne xcusun xi tijima nixtin vihi ni? ¡Jemu ndacha ngayun!

Meje xati rë xi cuichancjan si xi tacun ngajñi naja cojo Nina

⁵⁷ Hane ngayun matsejen ne, ¿mé má nichuvuun suvun cojo cjuatacun nuju xcusun xi cjuaquixi ni?

⁵⁸ Ndiya tivangun cojo xuta xi meje cuinchajyë nuju ngajan xcun xutaxa rë matsejen ne, nihñu ngahñu xi cuisuhun cjuandaja cojo me, cojo sa xi xticja si xi tacun ngajñi nuju cojo rë me matsejen ta, sá tsajin ne, cjuecojo nuju me xcun juez. Hane juez matsejen ne, squindaya me mayu sehe sahmi nuju me entregadu, hane mayu jan matsejen ne, cjuë cueyá nuju me ndavaya.

⁵⁹ Hane cuichjá cojo nuju cjuaquixi matsejen ta hatuxa cuetjuun tsëhë ngajan jinguyëjë rë xi cjëë cuechjun yëjë ni tujún xi quitjun. —Cuatjin xu cachja Jesús.

13

Sahmi ngujyë xi nindeyan cjuatacun naja

¹ Ha hora vëhë ni ne, cafehe xu ngujo xuta hiscan tacun Jesús. Hane cachja xu me cojo Jesús tsëhë ngujo xuta tsëhë distritu Galilea xi cavitexa Pilatu xi cueya hya xi titsiquehen xuta xi cuacun vë chu rë me xi sua me cjuatjo cojo Nina.

² Ngajan xi Jesús ne, cuitjin xu cachja me cojo xuta xi cachja cojo rë me jan:

—Hane tsëhë xi cuatjin cahme ngujo xuta Galilea xi cuacun vë ne, ¿há vëhë xi má nuju xi hitsë sa tsehen me xi cuma rë yëjë sa me xi yahnga?

³ Jéya, hacuuiin cuatjin. Peru sá xi ngayun nindeyuun cjuatacun nuju ne, ngayujun ni ne, hacuaha cuatjin cueyun.

⁴ O há tsajin ne, xuta xi tyjuhunjyan xi cahme hya xi caticjane rë torre tsëhë Siloé jan ne, ¿há má nuju xi hitsë sa tsehen me xi cuma rë yëjë sa xuta xi caviyuju ngajan Jerusalén?

⁵ Jéya, hacuiin cuatjin. Peru sá xi ngayun nindeyuun cjuatacun nuju ne, ngayujun ni ne, hacuaha cuatjin cueyun. —Cuatjin xu cachja Jesús.

Ejemplu tsëhë ya xi cavaquiin tú rë

⁶ Sehe ngajan xi Jesús ne, cachja sa xu me ngu ejemplu cojo xuta jan, cojo sa xi sua me cumachaya rë xuta xi jemu chúva camá nixtin xi cuma tsindeya xuta cjuatacun rë me. Cuitjin cachja me:

—Cuejña ne xi ngu ya túhaxi jan ne, secun xcun nangui rë ngu cha jan. Hane xi canduva cha xi tsëhë jan, vanguise cha tú rë ne, casacuiin rë cha.

⁷ Sehe ngajan xi cachja cha cojo cha mosu rë cha cuitjin: “Ha tjin rë jyan nu xi vinduva vanguësë tú rë ya vi ne, sacuiin ná. Tiche. ¿Mé má tu cuenda cuisekun tsinguetsun rë nangui?” Cuatjin cachja cha xi tsëhë jan.

⁸ Ngajan xi cha mosu jan ne, cuitjin cafayangui cha: “Tatá. Tuhun rë cahndë catisekun ndastu ngu nu sa, hane cuacján nangui rë, hacuaha cuíncha rë abono.

⁹ Xi cuatjin ne, ¿há suaain tú rë nduva nga ngu nu? Hane sá xi hacuaha ni suaain tú rë ne, sehe cuichan.” Cuatjin cafayangui mosu jan. Cuatjin xu fi ejemplu xi cachja Jesús.

Casahmi Jesucristu xi camandaja ngu chjuun nixtin xi chjahájenda rë

¹⁰ Ngu nixtin xi chjahájenda rë, hya xi tivicuya xu Jesús cahntsua ngu yungun jan ne,

¹¹ ngajan tacun ngu chjuun xi ha cjui tyjuhunjyan nu xi camaticua na hane ha quihndë maji xu ma quixi ninda ngaxtun na.

¹² Xi cavëë Jesús na ne, cajindaya xu me na, sehe cachja me cojo na cuitjin:

—Ngayun tsan ne, ha camandaya ngayun tsëhë xi cuatjin jyih ngayun vë. —Cuatjin xu cachja Jesús.

¹³ Hane ha hora vëhë ni cavisanetsja xu me na, hane ngutjen ni camaquixi ninda ngaxtun na. Hya xi camá ne, cahami jyë cahami hnga xu na Nina.

¹⁴ Peru presidente rë yungun jan ne, jemu camacjan xu rë me tsëhë xi cahami Jesús xi camandaja ngu chjuun nixtin xi chjahájenda rë. Vëhë xi cachja xu me cojo xutacjín jan cuitjin:

—Tjin naja jyun nixtin xi nihña xá. Vëhë xi meje rë xi ngajñi rë jyun nixtin vëhë matsejen ne, hya nduvun xi cumandaja ngayun, hacuiin xi tu nixtin xi chjahájenda rë matsejen ne, hya cuinduvun. —Cuatjin xu cachja presidente rë yungun jan.

¹⁵ Peru Nai naja ne, cuitjin xu cachja me:

—Jercu choho ningatuhuntacún! Jima ngu ngayun matsejen ne, hatuxa vuhunndayun ndyaja vuhunndayun burru nuju tsëhë cahndë rë chu xi cuangun nicuhun chu nandá, handasa nixtin xi chjahájenda rë.

¹⁶ Hane na vihi xi xuta ladu rë Nina na hacuaha tjinñu rë Satanás na cahntsua tyjuhunjyan nu matsejen ne, ¿há ndaintjin xi sehenndaya na nixtin xi chjahájenda rë ni? —Cuatjin xu cachja Nai naja.

¹⁷ Hane xi café xu cachja Jesús cjua vëhë ne, yëjë ni xuta xi má condra rë me ne, jemu camasava xu rë me. Peru yëjë sa xuta xi yahnga ne, jercu ndaja camá xu rë me tsëhë yëjë ni xcusun ndaja xi cahami Jesús.

Ejemplu tsëhë tutjë lihndi

¹⁸ Hacuaha cachja sa xu Jesús ejemplu vihi:

—Gubiernu xi sahmi Nina ne, ¿mé xi tangun cojo?

¹⁹ Tangun cojo ngu tutjë xi jemu lihndi camahani. Hya xi ngu xuta tsitjë me tutjë vëhë xcun nangui rë me ne, cuetju, cuma ngu ya, hisca nisë xi vitjen chu ngahnga ne, sahmi chu ndava chu rcu. —Cuatjin xu cachja Jesús.

Ejemplu tsëhë san rë pan

²⁰ Cavuya cachja nga xu Jesús cuitjin:

—Gubiernu xi sahmi Nina ne, ¿mé xi tangun cojo?

²¹ Tangun cojo san rë pan xi visecjan ngu chjuun ngajñi rë nahyu rë pan cojo sa xi sahmi ngajñi rë yëjë ni nahyucjín jan. —Cuatjin xu cachja Jesús.

Ejemplu tsëhë tingotjo xcu

²² Ndiya cjui xu Jesús ngajan Jerusalén ne, cavatju xu me nandya cojo ranchun xi siu ndiya cjui me jan, hane cachja me cojo xuta cjua rë Nina.

²³ Hya xi camá ne, cavinenguise xu ngu me xi cavinenguise rë Jesús cuitjin:

—Tatá. ¿Há jemu chúva xuta xi tivetjutje me? —Cuatjin xu cavinenguise xuta jan.

Sehe ngajan xi Jesús ne, cachja xu me cojo xuta xi siu jan cuitjin:

²⁴—Nihñu ngahñu xi cuma cuisuhun hiscan sahmi Nina gobiernu táha tingotjo xi xcu ta, tsêhê xi nguehe cuichjá cojo nuju ta cuechú nixtin xi jemu cjin xuta xi cuma meje cuisehen me jan, peru cumaji.

²⁵Ta hya xi ngahan xi nai rê cahndê vêhê ngahan, cuinduva cuéchja tingotjo ne, ngayun ne, cuinechun candatsen, sehe cjunntsun tingotjo jan hacuaha cuitjin cuinújun: “Tatá. Chuxuhun tingotjo tsijin.” Cuatjin cuinújun. Hane xi cjuayangüê tsujun ne, cuitjin cuichjá: “Hveen jani canduvun ngayun.” Cuatjin cuichjá cojo nuju.

²⁶Hane ngayun ne, cuitjin cuinújun nga: “Cachini cahyin tangun cojo nuju, hacuaha nangui niji canujyuhunyun cavicyun cjuá rê Nina.” Cuatjin cuinújun.

²⁷Hane cuitjin cuichjá nga cojo nuju: “Hveen jani nandya nuju. Tángunxun tsahan, ngayujun ni ngayun xuta sahmi cjuatsehen.” Cuatjin cuichjá.

²⁸Ngajan ni ne, jemu chjihndun hacuaha nijanurii nehñu, hya xi chutsujun Abraham cojo Isaac cojo Jacob, cojo yêjê profeta xi siu me ngajan hiscan xi sahmi Nina gobiernu, peru ngayun ne, caviyujú nuju candatsen.

²⁹Hane cuinduva xuta tsêhê táha ladu vetjucaá tsuhi cojo táha ladu vetje tsuhi cojo yêjê sa ladu, cuinduva me sinê tangun me hiscan xi sahmi Nina gobiernu.

³⁰Nguehe cuichjá cojo nuju ta yahnga xuta xi tjengui me quihndê ne, me vêhê cuma titjun me, hane yahnga me xi titjun quihndê ne, me vêhê cuma tjengui me hya xi cuejña Nina gobiernu rê me jan. —Cuatjin xu cachja Jesús.

Jemu choho camá rê Jesucristu ngatsê rê xuta Jerusalén

³¹Ha hora vêhê ni ne, cafehe xu ngujo cha fariseo, hane cuitjin xu cachja cha cojo Jesús: —Ndatjin xi tetjunxun tsêhê nguehe ta, tsêhê xi Herodes ne, meje tsiquehen nuju me. —Cuatjin xu cachja cha xi cuacun jan.

³²Hane ngajan xi Jesús ne, cuitjin cafayangui xu me: —Tágun ne tinújun cojo rê chu ninda vê cuitjin: “Chutsujun ni, quihndê cojo nchujun ni ne, cuáxêxen xitsehen hacuaha sahme xi cuma ndaja xuta hmu rê, hane nguini ne, tsingujnetaha xá xi tisahme.” Cuatjin tinújun.

³³Peru hacuaha sahmi ná nguýjê xi cjué sa quihndê nchujun ni cojo nguini hisca xi cjuêhê hiscan xi tifê ta, tsêhê xi profeta ngahan, hane ngu profeta ne, cumaji xi cueya jingusa nandya xi hacuini nandya Jerusalén.

³⁴¡Ngayun xuta Jerusalén, ngayun xi cojo ndyojo nicuhun profeta xi tsingatju Nina ngajñi nuju! ¡Jemu choho má ná! ¡Mé hitsê ndiya xi meje scávêvaha nuju sacuaha javêvaha ngu nisê quihndi rê chu xi cuincha chu ngahma tyjunga rê chu, peru ngayun ne, mijí nuju!

³⁵Chutsujun ni, Nina ne, catsismicacun me ngayun. Cuichjá cojo nuju ta chuun camahani ná hisca xi cuechú nixtin xi cuinújun cuitjin: “¡Catsinchacun Nina me xi titsingatju me ngajñi naja!” —Cuatjin xu cachja Jesús.

14

Casahmi Jesucristu xi camandaja cha xi yaha rê chíhinsquee

¹Cuitjin camá xu ngu nixtin xi chjahájenda rê hya xi quiji cajnê Jesús niñu ndava ngu cha xi matitjun ngajñi rê cha fariseo. Xi cafehe Jesús jan ne, cha xi siu jan ne, siu tifahachuva xu ni cha Jesús.

²Hacuaha hiscan tacun Jesús ne, ngajan xu tacun ngu cha xi yaha rê chíhinsquee.

³Ngajan xi Jesús ne, cavinenguise xu rê me cha xi vicuya cjuachacun cojo cha fariseo cuitjin:

—¿Há tjin cahndê nixtin xi chjahájenda rê xi nihña xi cumandaja xuta, o há tsajin cahndê? —Cuatjin xu cavinenguise Jesús.

⁴Hane cha xi cuacun jan ne, tu caviyujuyuu xu ni cha. Hya xi camá ne, cafaha xu Jesús cha hmu rê jan, hane cahmi me xi camandaja cha, sehe catsingatju me cha cafe cha.

⁵Sehe cavinenguise xu me cha xi siu jan cuitjin:

—¿Há tjin ngu ngayun xi nixtin xi chjahájenda rê ne, cuanguun marcu macjain naxun quihndi nuju o sá ndyaja nuju sá xi cjuinenguia ngu ndava nandá xi jemu nungun? —Cuatjin xu cavinenguise me.

⁶Hane cha xi cuacun jan ne, camaji cafayangui xu cha hisca xi ngu cjuá xi meje rê Jesús.

Meje rê xi ninguine yojo naja

⁷Hya xi camá ne, tsêhê xi vutsejen xu Jesús xi xuta xi cachjindaya rê tsêhê suhi jan ne, tivaxijin me cahndê xi matitjun ngajan xcun maxê ne, vêhê xi cachja xu me cojo xuta jan cuitjin:

⁸—Hya xi chjindaya nuju cuangun xinu ngu comida ne, xicachjuun cahndê xi matitjun ngajan xcun maxê ta sá tu hacuaha cachjindaya rê ngu me xi hitsê sa meje rê xi chjahárcun rê xi cuma nuju ngayun.

⁹ Hane cuinduva me xi cajindaya nuju catsijotjun ni ne, cuichja me cojo nuju cuitjin: “Tuhun rë me vihi cahndë nuju vë.” Cuatjin cuichja me cojo nuju. Ngajan xi ngayun ne, cojo jyë cjuasava ne, cuangun chjuhun cahndë xi ma tjengui.

¹⁰ Xi meje rë ne, hya xi cuatjin chjindaya nuju ne, tângun chjuhun cahndë xi ma tjengui, cojo sa xi hya xi cuinduva me xi cajindaya nuju ne, cuichja me cojo nuju cuitjin: “Ngayun ne, nduvun chjuhun ngu cahndë xi hitsë sa matitjun.” Cuatjin cuichja me. Ngajan xi ngayun ne, jercu sahmi jyë sahmi hnga nuju me ngajñi rë yëjë xuta xi siu jan.

¹¹ Cuatjin cuma ta, tsëhë xi yëjë xuta xi sahmi yehe suvá me yojo rë me ne, cuechú nixtin xi Nina ne, tsinguijne me cjuatacun rë. Hane xuta xi tsinguijne suvá me yojo rë me ne, Nina ne, sahmi yehe rë me.

¹² Hacuaha cachja nga xu Jesús cuitjin cojo me xi cajindaya rë me:

—Hya xi nihñu ngu suhi ne, xicachjindayuun rë amigu nuju, xicachjindayuun rë xingun, hacuaha xicachjindayuun rë xuta nchina xi siu tahndee ndya nuju, sá tu hacuaha squindaya nuju me xi cuangun ndava suhi rë me, hane cojo vëhë ni ne, ha camangojo cjuandaja nuju.

¹³ Cahndë rë vëhë ne, hya xi nihñu ngu suhi ne, chjindayun rë xuta yuma, chjindayun rë xuta xi yoho me, chjindayun rë xuta rengun, hacuaha chjindayun rë xuta rcá.

¹⁴ Sá xi cuatjin nihñu ne, jemu ndaja tsujun ta, tsëhë xi xuta xi cuacun vë ne, tsajin rë me mé cojo sahmingojo me cjuandaja nuju. Peru Nina sahmingojo me tsujun hya xi tsicuya me cjuahñu xuta xi tsajin jyë rë. —Cuatjin xu cachja Jesús.

Ejemplu tsëhë ngu suhi jyë

¹⁵ Hane xi cahndë xu ngu cha xi cojo tjinë jan cjuá xi cachja Jesús ne, cuitjin xu cachja cha cojo rë me:

—Jemu ndaja tsëhë xuta xi sinë me niñu hiscan xi sahmi Nina gubernu! —Cuatjin xu cachja cha.

¹⁶ Ngajan xi Jesús ne, casuacuenda xu me cha ngu ejemplu vihi:

—Cuejña ne xi ngu cha jan ne, casahmi cha ngu suhi jyë, hacuaha jemu cjin xuta cajindaya rë cha me.

¹⁷ Xi casune hora xi sinë cha cojo xuta ne, sehe catsingatju cha hndixahan rë cha ndava xuta xi ha cachja cha cojo xi cuichja hndixahan jan cojo rë xuta cjuá vihi: “¿Há cuangun xu ta, ha tjin chjine yëjë ni?” Cuatjin cachja hndixahan jan.

¹⁸ Hya xi camá ne, cavetsihin jima ngu me cachja me mé tsëhë xi cumaji cjue me. Hane me xi tjutjun ne, cuitjin cachja me cojo hndixahan jan: “Ngu rquí nangui cavátsë ne, sahmi ná nguyjé xi cjué scutséjen. Vëhë xi cumaji cjué ndava suhi.” Cuatjin cachja me.

¹⁹ Hane ngu nga me ne, cuitjin cachja me: “Cavátsë hñu ninchin ndyaja, hane cjué cjuaháchuva chu. Vëhë xi cumaji cjué ndava suhi.” Cuatjin cachja me.

²⁰ Hane ngu nga me ne, cuitjin cachja me: “Cumaji cjué ta, tsëhë xi ngahan ne, ha cavixan.” Cuatjin cachja me.

²¹ Hya xi camá ne, hndixahan jan ne, quiji cachja cojo nai rë cjuá xi cachja xuta xi cuacun jan. Hane xi camacjan rë nai rë ndihya jan ne, cuitjin cachja cha cojo hndixahan rë cha: “Tetji ne, tihin sanií ngajan ndiyatë cojo ndiyahndë tsëhë ngajñi nandya ne, chjindaye rë xuta yuma cojo xuta yoho cojo xuta rcá cojo xuta rengun ne, ndovecueje me.” Cuatjin cachja cha.

²² Hane xi cavuya hndixahan jan ne, cuitjin cachja: “Tatá. Camá tutjin xi cavitexun ná, peru tjin sa cahndë.” Cuatjin cachja hndixahan jan.

²³ Ngajan xi cachja nga nai rë hndixahan jan cojo rë cuitjin: “Tihin nga hisca ndiya nguyjña, hane nihñi rë xuta nguyjé ndovecueje me, cojo sa xi catitsë rë ndya naha.

²⁴ Nguehe cuichjá cojo ri ta hisca xi ngu me xi cajindaya rë tjun tjun ne, satiín rë me sinë me tsëhë suhi xi tisahme.” Cuatjin cachja nai rë hndixahan jan. —Vëhë cajnetaha xu ejemplu xi casuacuenda Jesús.

Meje rë xi nihña cuenta há scaa naja cuiseen ladu rë Jesucristu

²⁵ Ngajan xi hya xi quiji sa xu Jesús ndiya rë me xi cjui me Jerusalén ne, jemu cjin camahani xuta cjui me cojo rë me. Hane xi cavuya me cavutsejen me xutacjin jan ne, cuitjin xu cachja me:

²⁶ —Sá xi tjin ngu ngayun xi meje cuinduvuntjengun ná matsejen ne, meje rë xi hitsë sa nihmutacún ná ngahan xi cuma rë xi nihmutacún nahmi nuju, naa nuju, chjuun nuju, quihndi nuju, xingun, hisca cojo yojo nuju suvun. Sá tsajin ne, cumaji cuma ngayun ngu xuta ladu naha.

²⁷ Jarë ngayun xi nduvuntjengun ná matsejen ne, sá xi cuejñuhñuun xahasen nuju xi cuanguncujun ndiya naha handasa hisca cueyun xcun cru matsejen ne, cumaji cuma ngayun ngu xuta ladu naha.

²⁸ Ha hyan matsejen ta hya xi ngu xuta meje sahmi me ngu ndihya jyë ne, titjun sahmi me cuenta rë me, há chutaha tujún rë me hisca xi tsinguijnetaha me sahmi me ndihya.

²⁹ Cuatjin sahmi me cuenta rë me matsejen ta sá tsajin ne, sá xi ngutjen sahmi me xihndënaña rë hane cumaji tsinguijnetaha me sahmi me ndihya matsejen ne, yëjë ni xuta xi scuëë me matsejen ne, jemu cuejñucëë me me.

³⁰ Cuitjin cuichja me: “Cha xi cavetsihin casahmi ngu ndihya jyë vi ne, camaji catsinguijnetaha cha casahmi cha.” Cuatjin cuichja xuta.

³¹ Hacuaha ha hyan matsejen ta hya xi ngu me xi matitjun cjue sahmi me ngu si jyë cojo jingu sa me xi matitjun xi condra rë me matsejen ne, titjun tsingataha cacun ndaja me, ¿há scaa rë me cojo të mil xuta rë me xi sahmi me si cojo condra rë me xi ticojo can mil xuta rë?

³² Sá xi vutsejen me ta scaain rë me matsejen ne, jinguyëjë rë xi cjin sa nduva condra rë me matsejen ne, tsingatju me ngujo xuta xi tsinguijnehnchan cjua.

³³ Vëhë xi ngayujun ni matsejen ne, meje rë xi cuatjin titjun ndaja ningatuhuntacún ¿há scaa nuju, há scaain nuju? matsejen ta, tsëhë xi yëjë ni ngayun xi nismutacuun yëjë ni xcusun xi tjin nuju matsejen ne, cumaji cuma ngayun xuta ladu naha. Cuatjin xu cachja Jesús.

Yo xi hacuün ndaja tjengui rë Jesús ne, tangun cojo naxa xi fë xtya rë

³⁴ Hacuaha cachja sa xu Jesús cojo xutacjin jan cuitjin:

—Ngayejen ni matsejen ne, ha hyan matsejen ta naxa matsejen ne, ndaja. Peru sá xi cjueë xtya rë matsejen ne, ¿hacutjin cuma xincha nga tutju rë ni?

³⁵ Ha quihndë tsajin mé cumachjirëhë. Cumaji nicojonxan sacuaa nihndë, hacuaha cumaji nicojonxan sacuaa abono. Chjahá rë cuixu candatsen. Yo ngayun xi tjin nuju cjuasua xi cuinuhyun cjua naha matsejen ne, ndaja tinuhyun. —Cuatjin xu cachja Jesús.

15

Ejemplu tsëhë chu tsánga xi cachajá

¹ Ngundiya jan ne, jemu cjin xu cha faha tujúnsa cojo xuta tsehen xi yahnga jan quiji casahmi tiña me tsëhë Jesús, xi meje cuisñuju me cjua xi cuichja Jesús.

² Hane cha fariseo cojo cha xi vicuya cjuachacun ne, cachjahma xu cha cojo xicjin cha cuitjin:

—Cha xi cuijyih vi ne, tsingatihin cha visiajmi cha cojo xuta tsehen hacuaha jinëtangun cha cojo me. —Cuatjin xu cachjahma cha.

³ Sehe ngajan xi Jesús ne, cachja xu me ngu ejemplu cojo cha xi cuacun vë cuitjin:

⁴ —Cuejña ne xi ngu ngayun tjin nuju ngu cientu chu tsánga. Hane sá xi chajá ngu chu tsujun ne, hatuxa cuiyujuntuhun chu xi ñujuchan tyjuhunñuju jan nguijña ne, sehe cuangun cuinchunsun ngu chu xi cachajá jan hisca xi sacú nuju chu.

⁵ Hane xi sacú nuju chu ne, chjuhun chu cuesuntuhun chu xi jercu ndama nuju.

⁶ Hane xi cjuhun ndya nuju ne, nihñutangun yëjë xuta xi vinga nuju cojo me xi siu tahndee ndya nuju, hane cuitjin cuinújun cojo rë me: “Cuinechan cojo ná cjuasua ta casacu ná chu tsánga naha xi cachajá.” Cuatjin cuinújun.

⁷ Nguehe cuichjá cojo nuju ta hacuaha hitsë sa jyë cjuasua cuejña ngajan ngahnga ngatsë rë ngu xuta tsehen xi tsindeya me cjuatacun rë me xi cuma rë ngatsë rë ñujuchan tyjuhunñuju xuta ndaja xi tsajin mé má tsindeya me cjuatacun rë me. Cuatjin xu cachja Jesús.

Ejemplu tsëhë tujún quicha xi cachajá

⁸ Hya xi camá ne, cuitjin cachja nga xu Jesús ngu ejemplu:

—Cuejña ne xi ngu chjuun jan ne, tjin rë me të tujún quicha xi jercu hnga chji rë. Hane sá xi tsichajá me ngu ne, hatuxa cuetaha rë me ndihi, sehe cuitecha me ndihya sehe cuanguise chichihin me hisca xi sacú rë me.

⁹ Hane xi sacú rë me ne, sahmitangun me yëjë xuta xi vinga rë me cojo me xi siu tahndee ndava me ne, hane cuitjin cuichja me cojo rë me: “Cuinechan cojo ná cjuasua ta casacu ná tujún naha xi catsichajá.” Cuatjin cuichja me.

¹⁰ Nguehe cuichjá cojo nuju ta hacuaha jemu jyë cjuasua cuiyuju ángel tsëhë Nina ngatsë rë ngu xuta tsehen xi tsindeya me cjuatacun rë me. Cuatjin xu cachja Jesús.

Ejemplu tsëhë cha xi catsismi cacun ndava nahmi rë

¹¹ Hya xi camá ne, cuitjin cachja nga xu Jesús ngu ejemplu:

—Cuejña ne xi ngu me jan ne, tjin rë me jo quihndi.

¹² Hane cavechú ngunixtin xi cha quihndi ngascan tsëhë me vihi ne, cachja cha cojo rë me cuitjin: “Papá, tsëhë yëjë ni xcusun xi satë ná hya xi cueyun ne, meje ná xi tuhun ná

quihndé.” Cuatjin cachja cha. Sehe ngajan xi nahmi rē cha jan ne, cavatēcja me hacutjin xi satē rē xingu xingu quihndi rē me.

¹³ Hane hacuñin tsēē ni jan ne, cha quihndi ngascan jan ne, xi casahmi tangun cha yējē xcusun xi casatē rē cha jan ne, sehe cavetju cha quiji cha ngu nangui cjin. Hane xi cafehe cha jan ne, sehe cavetsihin cha tujyē catsicojo cha tujún rē cha, casahmi cha yējē ni hacutjin xi ndama rē xahasen rē cha.

¹⁴ Hane xi cafē catsicojo cha tujún jan ne, hya canduva ngu jindya jyē jingujyē ni ladu vēhē. Hya cavetsihin camachaja rē cha.

¹⁵ Hya xi camá ne, cavetsihin casahmi cha xá sacuaaha mosu rē ngu me tsēhē nandya jan. Hane me vēhē catsingatju me cha xi cjue sahmi cuidadu cha chu chinga rē me ngajan ranchun.

¹⁶ Hane tsēhē xi jemu vojo camahani rē cha ne, hisca meje sinē cha xi tijinē chu chinga jan, peru tsajin yo casua rē cha.

¹⁷ Hane hya xi catsingataha cacun ndaja cha ne, cuitjin catsingataha cacun cha: “Yējē mosu rē nahmi naha ne, tsajin mé machaja rē xi sinē, hane ngahan ne, tivéya jindya nguehe xi vojo ná.

¹⁸ Jemu sa rē ndaja ne, cúa cjuē nga ndava nahmi naha, hane cuitjin cuichjá cojo rē me: Cahndeen tsēhē Nina hacuaaha cahndeen tsujun.

¹⁹ Ha quihndé vechiin chuva rē xi cuitejña cojo nuju sacuaaha quihndi nuju. Nihñucundun sacuaaha xi mosu nuju ngahan quihndé xi cavúya.” Cuatjin catsingataha cacun cha.

²⁰ Hya xi camá ne, sehe cavuya cafe cha nangui rē cha xi cjue cha ndava nahmi rē cha.

’Peru cjin sa cjuí cha tsēhē ndava nahmi rē cha ne, cavēē nahmi rē cha xi nduva cha, hane jemu camayuma rē me cha. Sehe vanga me quijitjengui me cha, catsuvacja me cha hisca cavitatsuha me cha.

²¹ Sehe ngajan xi cavetsihin cachja cha cojo nahmi rē cha cuitjin: “Papá, cahndeen tsēhē Nina hacuaaha cahndeen tsujun. Ha quihndé vechiin chuva rē xi cuitejña cojo nuju sacuaaha quihndi nuju.” Cuatjin cavetsihin cachja cha.

²² Peru nahmi rē cha ne, cachja me cuitjin cojo ngujo hndixahan rē me: “Tángunsanii, tángun chjuhun ngu tsjian xi tsjian ndaja jan ne, sehe nduvun nicujún cha quihndi naha vi. Hacuaaha nduvuncujun ngu xtungun sehe teyun rcutsja cha, hacuaaha nduvuncujun chuxinxté xi cuinchun ntsacu cha.

²³ Xi camá vēhē ne, sehe tángun chjuhun ngu ndyaja xi ndaja hñu cacun chu cueya chu xinēē chu. Nihña ngu suhi, tahan cjuasua xahasen naja ta,

²⁴ tsēhē xi cha quihndi naha vi ne, sacuaaha xi cahme cha hane sehe cavuya cha cjuahñu, sacuaaha xi cachajá cha hane sehe casacu nga cha.” Cuatjin cachja nahmi rē cha. Hya xi camá ne, sehe cavetsihin casahmi me suhi.

²⁵ ’Peru cha quihndi tjun rē me vihi ne, tsajin cha ta nguñña quiji cha. Hane xi camatiña cha tsēhē ndava cha xi cavuya cha xi quiji cha nguñña ne, cahndé cha xi fane tyjó ndava cha hacuaaha tité xuta.

²⁶ Hya xi camá ne, sehe cajindaya cha ngu cha hndixahan rē nahmi rē cha, sehe cavinenguise cha mé jima jan.

²⁷ Hane cha hndixahan jan ne, cuitjin cafayangui cha: “Cha tsuhun cavuya cha. Hane hacuaaha cavitexa nahmi nuju xi cahme ngu ndyaja xi ndaja hñu cacun xi cuma suhi, tsēhē xi cavuya cafahatsja nga me xingun cojo ngu cjuahñu ndajiyihi.” Cuatjin cafayangui hndixahan jan.

²⁸ Peru cha quihndi tjun jan ne, jemu camacjan rē cha, hisca ndihya mijí cuisehen cha. Hane xi cavetju nahmi rē cha ne, jercu cjin cachja me cojo cha xi cuisehen cha ndihya.

²⁹ Ngajan xi cha vēhē ne, cuitjin cafayangui cha tsēhē nahmi rē cha: “Chutsujun ni, ngahan ne, ha jemu tsēē nduva nixtin xi tivisécoo nuju, hacuaaha tsajin ngu cjua xi cahndeen tsujun xi canújun. Peru ngahan ne, hisca ngu tentsun catuun chu xi cueya chu xi sahme ngu suhi cojo amigu naha.

³⁰ Peru quihndé xi cafehe cha quihndi nuju vē xi tu ngajan quiji catsicjē cha cjuanchina nuju cojo yachjin tsehen jan ne, canicuhun ngu ndyaja hñu cacun xi xinu cojo cha.” Cuatjin cafayangui cha.

³¹ Hya xi camá ne, cuitjin cachja nga nahmi rē cha: “Ngaye tsan xi nchunchujun ni nechin cojo ná ne, yējē ni xi tsahan ne, hacuaaha tsiji.

³² Ndatjin xi nihña ngu suhi cuitjin, cuinechan cjuasua ta, cha tsajan vi ne, sacuaaha xi cahme cha peru cavuya cha cjuahñu, sacuaaha xi cachajá cha peru casacu nga cha.” Cuatjin cachja nahmi rē cha. Vēhē xu ejemplu xi cachja Jesús cojo cha fariseo cojo cha xi vicuya cjuachacun.

16

Ejemplu tséhë cha xi matitjun tséhë xa xi cuaaintjin casahmi

¹ Hacuaha cachja nga xu Jesús cojo xuta ladu rê me ngu ejemplu cuitjin:

—Cuejña ne xi cavejña ngu xuta nchina xi hacuaha tjin rê me ngu cha xi matitjun tséhë yějë ni xa rê me. Hane cha xi matitjun tséhë xa jan ne, cavinchajyë ngu xi cavinchajyë rê cha cojo me xi tséhë xa tséhë xi jemu catsicojo cha tujún rê me xi matsijin mé casahmi cha cojo.

² Hane xi cajindaya me xi tséhë xa jan cha ne, sehe cachja me cojo cha cuitjin: “Ngaye ne, cafahántsa ngu jyë riji. Quihndë ne, nihñi ná entregadu cuenta tséhë xa xi tacun ntse ta, ngaye ne, ha quihndë cumaji cuihinnduju cojo xa xi nechintehe.” Cuatjin cachja me.

³ Sehe ngajan xi cha xi matitjun tséhë xa jan ne, cuitjin catsingataha cacun cha: “¿Mé xi ndatjin sahme quihndë xi tivaxëxin ná nai naha tséhë xa xi tejñataha? Ngahan ne, maji sahme xa xi hai. Hacuaha sava ná cjuë cjuéhya caridad.

⁴ Haan, ha hvë mé xi sahme cojo sa xi cjuahatsja ná xuta ndava me hya xi cuéjtuxen tséhë xa xi tejñataha.” Cuatjin catsingataha cacun cha.

⁵ Hya xi camá ne, cajindaya cha chuva ngu chuva ngu xuta xi quitjen tséhë nai rê cha. Hane cuitjin cachja cha cojo ngu me: “Ngayun ne, ¿hacutjin quitjun tséhë nai naha?” Cuatjin cachja cha.

⁶ Sehe ngajan xi me xi quitjen jan ne, cuitjin cafayangui me: “Ngu cientu tonel tséhë aceite.” Cuatjin cafayangui me. Hane cha xi matitjun tséhë xa jan ne, cuitjin cachja cha cojo rê me: “Juhun xujun tséhë cuenta nuju vi ne, tinechun sanii, nihñu sa ngu, hane tetuhun yachantë ni.” Cuatjin cachja cha.

⁷ Hya xi camá ne, cachja nga cha cojo ngu nga me cuitjin: “Ngayun ne, ¿há cjin quitjun tséhë nai naha?” Cuatjin cachja cha. Hane cuitjin cafayangui me xi quitjen jan: “Ngu cientu xutsu trigu.” Cuatjin cafayangui me. Hane cha xi matitjun tséhë xa jan ne, cuitjin cachja cha: “Juhun xujun tséhë cuenta nuju vi ne, nihñu sa ngu, hane tetuhun ñujuchan ni.” Cuatjin cachja cha.

⁸ Ngajan xi xuta nchina xi nai rê xa jan ne, cavaxëndaja me cha tsehen xi matitjun tséhë xa ngatsë rê xi jemu quicun cacun cha xi cuatjin casahmi cha. Hitsë sa quicun cacun xuta tsehen cojo ngasunhndë rê me, xi cuma rê xuta xi fitjengui me ndiya rê Nina.

⁹ Nguehe cuichjá cojo nuju ngayun xuta ladu naha ta hacuaha meje rê xi chjuhun tujún nuju, handasa hatuxa tsehen ta tséhë xi tséhë ngasunhndë, hane nicujunxun, cojo sa xi cuinga rê xuta ngayun. Cuatjin nihñu cojo sa xi hya xi cuechú nixtin xi cueyun hacuaha ha quihndë cumachjirin nuju tujún ne, cjuahatsja nuju Nina ngajan hiscan xi cuinechan cojo rê me yějë nu yějë nixtin.

¹⁰ “Yo xi tjin rê cjuaquixi xi ndaja sahmi ngu xa xi chúva ne, hacuaha hatuxa tjin rê cjuaquixi xi ndaja sahmi ngu xa xi jyë. Hacuaha yo xi vindacha hya xi sahmi ngu xa xi chúva ne, hacuaha hatuxa vindacha hya xi sahmi ngu xa xi jyë.

¹¹ Véhë xi ngayun ne, sá xi vindachun hya xi nicujunxun tujún tsehen xi tséhë ngasunhndë ne, hatuxa cuejñaai Nina ntsun cjuanchina xi cjuaquixi, xi tséhë me.

¹² Hacuaha sa xi vindachun hya xi nicujunxun cjuanchina tséhë jingu sa ne, Nina ne, hatuxa suaain nuju me cjuanchina xi cuma tsujun suvun.

¹³ Tsajin ngu hndixahan xi ma fhacuenda xa tséhë jo nai rê xa ta, tséhë xi choho scuëë rê ngu nai rê hane tsihmu cacun nai rê xi majo jan. O sá tsajin ne, jemu cuetaha yojo rê cojo ngu nai rê, hane nai rê xi majo jan ne, hisca sahmicuendaain rê. Véhë xi xi ngu ñahñu ni ne, maji nihñu hacutjin xi meje rê Nina cojo hacutjin meje rê cjuanchina tsehen xi tséhë ngasunhndë. Cuatjin xu cachja Jesús cojo xuta ladu rê me.

¹⁴ Cha fariseo, xi hacuaha jemu chuya rê cha tséhë tujún ne, cahndë xu cha yějë cjuaxi cachja Jesús cojo xuta ladu rê me jan. Hane cavejñucëë cha Jesús.

¹⁵ Ngajan xi Jesús ne, cachja xu me cojo cha cuitjin:

—Ngayun xi nújun cojo xuta xi jemu ndaja xuta ngayun, peru Nina ne, vëë me cjuatacun xi jiya cahntsua xahasen nuju. Hane cjuatacun xi sahmi yehe sahmi hnga xuta ne, Nina ne, chuyiin camahani rê me tséhë.

Cumaji chjaháxin rê hisca ngu cjuaxi tséhë ley rê Nina

¹⁶ “Hya xi chaja sa tsujyihya Juan Vitenda Xuta ne, yějë xuta ne, casacu camachaya rê me cjuaxi rê Nina ngatsë rê ley xi cavejña Nina tsja Moisés, cojo ngatsë rê profeta xi hacuaha cachja me cjuaxi rê Nina. Hisca nixtin rê Juan ne, hisca quihndë ne, tisuá ngahan tijimachaya rê xuta cjuandajyihí xi chja xi Nina ne, sahmi me gobiernu. Hane yějë ni xuta ne, meje cuisehen me hiscan sahmi Nina gobiernu, handasa cojo cjuachan.

¹⁷ Ngahnga cojo nangui ne, hitsë sa chjaain cjuë xi cuma rê xi chjaháxin rê ngu cjuaxi tséhë ley rê Nina.

Jyë rë xuta xi tsismi chjuun rë sehe cuixan cojo jingu sa chjuun

¹⁸ Ngu xuta xi tsismi me chjuun rë me sehe cuixan me cojo jingu sa chjuun ne, tangun me cojo ngu xi sahmi cjuatsehen cojo ngu chjuun xi hacuiin chjuun rë. Hacuaha yo xi cuixan cojo ngu chjuun xi xihin rë na ne, catsismi cha na ne, tangun cojo ngu xi sahmi cjuatsehen cojo ngu chjuun xi hacuiin chjuun rë.

Ejemplu tsëhë cha nchina cojo cha yuma xi hmí rë Lázaro

¹⁹ Cuejña ne xi cavéjña ngu cha xi jemu nchina, xi jercu ndaja camahani tsjian vajá. Nchunchujun ni ne, jemu ndajyihí suhi sahmi cha.

²⁰ Hacuaha cavéjña ngu xuma cha yuma xi hmí rë Lázaro, xi jinguyjé ni yojo rë cha camatsé. Hane jiña cha ngajan tingotjo ndava cha nchina jan.

²¹ Hane hacuaha cojo cha yuma jan jemu meje siné cha hitsé xi vangui jiné cha nchina jan. Hatuxa jemu choho vatju cha má, hisca vinduva naña chímajnu chu tsé xi yaja rë cha.

²² Hya xi camá ne, xi cahme xuma cha yuma jan ne, quijicojo ángel hasen rë cha ngajan cahndé ndajyihí, cavéjña tangun cojo hasen rë nima Abraham. Hane cha nchina jan ne, hacuaha cahme cha, hane caseyanijí cha.

²³ Hane hya xi jiya hasen rë cha nchina jan cahndé hiscan xi fi hasen rë nima ne, jercu tivatju cjuañihí. Hane xi cavuya cavutsejennijí hasen rë cha ne, cavéë rë hasen rë nima Abraham tsëhë cjin ní, hacuaha cavéë rë hasen rë nima Lázaro, tacun tangun cojo hasen rë nima Abraham.

²⁴ Hya xi camá ne, cajindaya hasen rë cha nchina jan tsëhë hasen rë nima Abraham, cuitjin cachja: “Tatá Abraham, catamayuma nuju ngahan ne, tinújun cojo cha Lázaro vë ne, catitscahnchi cha rcutsja cha cojo nandá, sehe ningatjun cha catinduva catitsinguijnehnchan cha hitsé neje ta, tsëhë xi jercu má camahani ná cojo ndihí vi.” Cuatjin cachja hasen rë cha nchina jan.

²⁵ Peru hasen rë nima Abraham ne, cuitjin cafayangui: “Ninguitsjin tsan ta xcun cjuahñu rijí ne, jemu ndaja cavatjí camá, hane xuma cha Lázaro vi ne, jemu choho cavatju cha camá. Peru quihndé ne, tisacu rë cha cjuetacun nguehe, hane ngaye ne, tivatjí cjuañihí.

²⁶ Hacuaha tjin sa ngu cjuá xi cuichjá cojo ri: Nina ne, cavejña me ngu xanga jyë xi jiyavasen tsëhë hiscan xi nechintihin ngayin cojo tsëhë hiscan xi nechintehe ngaye, cojo sa xi yo ngayin xi meje cuátjin xi cuinduvín ndyá ne, cumají, hacuaha yo ngayun xi meje cuatjun cuinduvun nguehe ne, hacuaha cumají.” Cuatjin cafayangui hasen rë nima Abraham.

²⁷ Sehe ngajan xi hasen rë cha nchina jan ne, cuitjin cachja: “Tatá, nihñu favor ne, ningatjun cha Lázaro ngajan ndava nahmí naha,

²⁸ cojo sa xi sua cha cumachaya rë catsihñú xingueen xi siu jan, cojo sa xi hacuiin cojo cha cuechú cha cahndé vihi hiscan xi tacun cjuañihí xi tivatjin tijima.” Cuatjin cachja hasen rë cha nchina.

²⁹ Hane hasen rë nima Abraham ne, cuitjin cachja: “Peru cha xi cuacun vë ne, cuma cuisñíju cha cjuá xi ha catsihindu Moisés cojo cjuá xi ha catsihindu profeta hatséë nixtin. Vëhë catetaharcu cha.” Cuatjin cachja hasen rë nima Abraham.

³⁰ Ngajan xi hasen rë cha nchina jan ne, cuitjin cafayangui: “Tatá Abraham, cumají xi cojo cjuá vëhë ní. Peru sá xi yo cuetju tsëhë ngajñí rë nima xi cjue cuichja cojo cha ne, ngajan xi tsindeya cha cjuatacun rë cha.” Cuatjin cafayangui hasen rë cha nchina jan.

³¹ Peru hasen rë nima Abraham ne, cuitjin cachja: “Sá xi mijí cuihndé cha tsëhë cjuá xi catsihindu Moisés cojo cjuá xi catsihindu profeta ne, hacuanitjin ni cumacjain rë cha, handasa ngu nima cuya cjuahñu, cjue cuichja cojo rë cha.” Cuatjin cachja hasen rë nima Abraham. Cuatjin xu fi cjuá xi cachja Jesús cojo cha fariseo cojo xuta ladu rë me.

17*Mijí rë xi nihña xi tsismicacun ngu xuta ndiya rë Nina*

¹ Ngu nixtin jan ne, hacuaha cachja xu Jesús cojo xuta ladu rë me cuitjin:

—Hatuxa cuinduva xcusun xi meje sahmi xi nismetacun ndiya rë Nina, peru jemu chojyihí tsëhë xuta xi nduvacojo xcusun vëhë.

² Hitsé sa ndaja tsëhë xuta vëhë xi xtyangui ngu ndyojo natsi nguisin me sehe ningatjenya rë me ngajñí ndachacun, xi cuma rë xi sahmi me xi ngu xuta ladu naha tsismicacun me ndiya rë Nina.

³ Nechun cuidadu tsëhë xcusun xi nihñu. Sá xi ngu xingun choho sahmi cojo nuju ne, tinújuntuhun rë. Hane sá xi tsindeya cjuatacun rë ne, ninchatuhun rë.

⁴ Hane sá xi hisca yatu ndiya choho sahmi cojo nuju ngu nixtin, hane hacuaha jima ngu ndiya vëhë cjue cuichja cojo nuju xi tsindeya cjuatacun rë ne, ninchatuhun rë. —Cuatjin xu cachja Jesús.

Cuma cuinuhyan tsëhë Nai naja sá xi mangutacuun ndastu hitsë cojo rë me

⁵Ngajan xi apóstol ne, cuitjin xu cachja me cojo Nai naja:

—Nihñu xi hitsë sa ndaja cumangu tacuín cojo nuju. —Cuatjin xu cachja me.

⁶Sehe ngajan xi Nai naja ne, cuitjin xu cafayangui me:

—Sá xi mangutacún cojo ná ndastu hitsë ne, hacuaha cuma cuinújun cojo ya vihi catjixin tsëhë cahndë hiscan secun, hane catji catisecun ngajan ngajñi ndachacun, hane hacuaha cuinhdë tsujun.

Hacutjin meje rë xi sahmi hndixahan cojo nai rë

⁷'Cuejña ne xi ngu ngayun ne, tjin nuju ngu hndixahan xi vacjan nangui tsujun o sá xi sahmi cuidadu rë chu nuju. Hane xi cjehe hndixahan vëhë xi quiji nguijña ne, ¿há cuinújun cojo cuitjin: “Ndove sanii ne, xini niñu?”

⁸Jéya, hacuini ta cuitjin cuinújun cojo: “Tehe chjini xi sínë, hacuaha tehe chjini yojo riji xi cuindove chani xi sínë xi cuëhë, hane xi cuijnetaha sínë ne, sehe xini sihi ngaye.” Cuatjin cuinújun.

⁹Hacuaha tuun nacuechji rë hndixahan vëhë tsëhë xi casahmi yëjë ni hacutjin xi cavitexun rë.

¹⁰Hacuaniitjin nuju ngayun ta hya xi ha café canihñu yëjë ni hacutjin cavitexa nuju Nina ne, cuitjin meje rë xi ningatuhuntacún: “Ngahan ne, ngu hndixahan tuyë ni ngahan ta xi casahme ne, hacutjin xi casatëxa ná ne, vëhë ni xi casahme. Cuatjin meje rë xi ningatuhuntacún.” Vëhë xu cjuá xi cachja Jesús cojo xuta ladu rë me.

Casahmi Jesucristu xi camandaja tē cha hmu rē

¹¹Hane hya xi tivatju xu Jesús vasencja tsëhë distritu Samaria cojo distritu Galilea xi cjui me ngajan Jerusalén ne, cuitjin camá.

¹²Hora xi ha cuisehen me ngu nandya jan ne, nduvatjengui xu tē cha me, cha xi yaha rë ngu xusun chíhin vitaha xi setaha yojo naja. Hane caxinchacunhñu xu cha hitsë jan,

¹³hane tsëhë cjin ni cajindaya xu cha cachja cha cuitjin:

—¡Tatá Jesús! ¡Catamayuma nuju ngayin! ¡Nihñu xi cumandaja ngayin! —Cuatjin xu cajindaya cha cachja cha.

¹⁴Hane xi cavëë Jesús cha ne, cuitjin xu cachja me:

—Tãngun hiscan xi siu nahmi, ningacun rë me yojo nuju xi tsajin mé cún ngayun. —Cuatjin xu cachja me.

Hane ndiya cjui cha ne, camandaja xu cha.

¹⁵Hya xi camá ne, xi cavëë xu ngu cha xi camandaja cha ne, cavuya quijitjengui xu cha Jesús, jindaya cha chja cha xi tisahmi jyë tisahmi hnga xu cha Nina.

¹⁶Hane xi cafehe xu cha hiscan secun Jesús ne, quiji caticjacun cha xcun me, xi tisua cha nacuechji rë me. Cha xi cuajyihi jan ne, cha Samaria cha.

¹⁷Sehe ngajan xi Jesús ne, cuitjin xu cavinenguisse me xuta ladu rë me:

—¿Hacuiin yëjë tē cha xi cuicun vi xi camandaja cha ni? ¿Cha xi ñaja sa ne, jarë cha ne?

¹⁸¿Há suvá ni cha xi cuijyihi vi xi ngu xutaxín cha xi cavuya cha xi sahmi jyë sahmi hnga cha Nina ni?

¹⁹Sehe cachja xu me cojo cha xi camandaja jan cuitjin: —Tisatjunhngun, hane tjangun. Ngatsë rë xi camangutacún cojo ná ne, vëhë xi camandaja ngayun. —Cuatjin xu cachja Jesús.

Hacutjin cuma hya xi cuinduva Nina sahmi me gobiernu

²⁰Cuitjin xu camá nga ngundiya. Cha fariseo ne, cavinenguisse cha Jesús janihya cuinduva Nina sahmi me gobiernu. Sehe ngajan xi Jesús ne, cuitjin xu cafayangui me tsëhë cha:

—Nina ne, hya xi cuinduva me sahmi me gobiernu ne, hacuini titjun sua me cumachaya naja sehe cuinduva me.

²¹Tsajin yo cuichja: “Cuajyihi Nina nguehe”, o sá: “Cuajyihi Nina ngajan”; ta Nina ne, ha tisahmi me gobiernu ngajñi nuju. —Cuatjin xu cachja me cojo cha fariseo.

²²Hya xi camá ne, cuitjin xu cachja me cojo xuta ladu rë me:

—Cuechú nixtin xi jemu cuma meje chutsujun ná ndastu ngu hora, ngahan xi Quihndi rë Xuta jain ngahan, peru cumaji.

²³Yahnga me cuichja me cojo nuju: “Cuajyihi me nguehe”, o sá: “Cuajyihi me ngajan”; peru hacuini cuangun cojo me, hacuini cuanguntjengun me ta

²⁴sacuaha sahmi hasen ndihichuhún xi ha tu ñahñu sahmi hasen rë jingujyë ni ngahnga, hisca nguehe hisca ngajan ne, cuatjin ha tu ñahñu scutsejen ná xuta tsëhë yëjë ni ladu hya xi cuechú nixtin xi cuinduva nga ngahan xi Quihndi rë Xuta jain ngahan.

²⁵ Peru chaja sa xi cuechú nixtin vèhè ne, hatuxa meje rè xi jemu cjin cjuañihi cuátju cuma, hacuaha xuta xi siu nixtin vihi ne, tsitjungui ná me.

²⁶ Sacuatjin casahmi xuta nixtin hya xi cavéjña xutachanga naja Noé ne, hacuanitjin ni sahmi xuta hya xi ngahan cuinduva.

²⁷ Nixtin rè Noé vè ne, jinè jihvi xuta, vixan me, tsinguixan me quihndi rè me. Cuatjin sahmi cuaha me hisca nixtin xi cavisehen Noé cahntsua barcu, hacuaha casesuntè nandá, hane ngajan café yèjè xuta cahme me.

²⁸ Hacuanitjin ni xcusun vèhè casahmi xuta nixtin hya xi cavéjña ngu xutachanga xi hmí rè Lot: jinè hvi me, vatsè me, viteña me, vincha me tjè, hacuaha sahmi me ndihya.

²⁹ Peru nixtin xi cavetju Lot tsèhè nandya Sodoma ne, cavixu ndihi tsèhè ngahnga, hacuaha cavixu ndyojo xi yaha rè ndihi, sacuaha xi cavaha ngu tsihñu, hane ngajan café yèjè xuta cahme me.

³⁰ Hacuaha cuanitjin ni sahmi xuta hya xi cuinduva ngahan xi Quihndi rè Xuta Jain ngahan.

³¹ Nixtin hya ne, xuta xi hinchasun me rcu ndava me ne, mé tsèhè me xi siu cahntsua ndihya ne, miji rè xi cuitujne me cjue jaha me. Hacuaha ha chuva vèhè ni ne, xuta xi siutahá me nguifña ne, miji rè xi cuya cjue me ndava me.

³² Ninguitsjun sacuaha xcusun xi cavatju nima chjuun rè Lot.

³³ Yo xi meje cjuenduju cojo ngasunhdè rè cojo ngahñu rè suvá ne, cuechintaain cjuahñu xatsè; peru yo xi cuatju cjuañihi o hisca cueya ngatsè naha ne, vèhè xi cuechútaha cjuahñu xatsè.

³⁴ Nguehe cuichjá cojo nuju ta nguixun nixtin hya ne, jo xuta cuiyujufè tangun me ngu nachan. Ngu me ne, chjaháxin rè me, hane me xingu jan ne, cuejña me.

³⁵ Hacuaha jo nga yachjin ne, cuiyujutahá na coho na. Ngu na ne, chjaháxin rè na, hane na xingu jan ne, cuejña na.

³⁶ Hacuaha jo nga cha ne, cuiyujutahá cha nguifña. Ngu cha ne, chjaháxin rè cha, hane cha xingu jan ne, cuejña cha. —Cuatjin xu cachja Jesús.

³⁷ Hane xuta ladu rè me ne, cuitjin xu cavinenguisse rè me:

—¿Hane jani cuma xcusun vèhè ni, tatá? —Cuatjin xu cavinenguisse me.

Sehe ngajan xi Jesús ne, cachja xu me ngu ejemplu cuitjin:

—Hiscan jiña chu xi cahme ne, hacuaha ngajan matangun chu lote. —Cuatjin xu cachja Jesús.

18

Ejemplu tsèhè chjuun cahan cojo juez tsehen

¹ Hacuaha cachja sa xu Jesús ngu ejemplu cojo xuta ladu rè me xi sua me cumachaya rè xi meje rè xi yasen ni ne, sahmi me oración rè me, miji rè xi sahmi chúva cacun me.

² Cuitjin xu cachja me:

—Cuejña ne xi ngu nandya jan ne, tjin ngu juez xi tsacjuiin rè Nina hacuaha faharcuaain rè xuta.

³ Hacuaha nandya jan ne, tacun ngu chjuun cahan. Hane nchunchujun ni quiji na xcun juez jan ne, cachja na cuitjin: “Meje ná xi nihñucundun jyé xi vincha xuta tsahan.” Cuatjin cachja na.

⁴ Peru juez jan ne, jemu jyé nixtin xi miji sahmicuenda me tsèhè na. Peru xi camá ngascan ne, cuitjin catsingataha cacun me: “Handasa tsacjuun Nina hacuaha faharcuun xuta ne,

⁵ peru ngatsè rè xi jemu tisuaxti na cahan vi ngahan ne, vèhè xi cjuahácuenda cjuacjintacun rè na, sá tsajin ne, jemu tsijenda na ngahan xi ngajan cjui ngajan nduva na.” Cuatjin xu catsingataha cacun me.

⁶ Sehe ngajan xi Nai naja ne, cachja sa xu me cuitjin:

—Chutsujun hacutjin chja juez tsehen vè.

⁷ Nina ne, ¿hacuiin hatuxa cjuahacuenda me cjuacjintacun rè xuta xi cavaxijin me, xi nguixun nguítajñu fehya rè me xi cjuahacuenda me tsèhè? ¿Há jemu cuindeya cjuahacuenda me?

⁸ Nguehe cuichjá cojo nuju ta Nina ne, ngutjen ni cjuahacuenda me. Peru hya xi cuinduva nga ngahan xi Quihndi rè Xuta Jain ngahan ne, ¿há tjin xuta xi mangucacun cojo ná nguehe ngasunhdè? —Cuatjin xu cachja Nai naja.

Ejemplu tsèhè oración rè cha fariseo cojo oración rè cha faha tujúnsa

⁹ Hacuaha siu sa xu ngujo xuta xi tsingataha cacun suvá me xi tsajin jyé rè me xcun Nina hacuaha sahmi xta me cojo xuta xi yahnga. Hane xuta xi cuacun vè ne, cuitjin xu cachja Jesús ngu ejemplu cojo rè me:

¹⁰ —Cuejña ne xi jo cha jan ne, quiji cha yungun xi matitjun xi sahmi cha oración rë cha. Ngu cha ne, cha fariseo cha, hane cha xingu ne, cha faha tujúnsa cha.

¹¹ Cha fariseo jan ne, caviseacun cha casahmi cha oración rë cha cahntsua xahasen ni rë cha, cachja cha cuitjin: “Ngayun Nina, suá nacuechji nuju ta ngahan ne, hacuín tangun ngahan cojo jingu sa cha xi ndacha cha, tsehen cha, tsindesu cha cojo jingu sa chjuun, hacuaha hisca tanguain ngahan cojo cha faha tujúnsa vi.

¹² Sahme xun naha jo ndiya xi ngu totje, hacuaha vátécja të cahndé tséhë yějë ni xi sacu ná, hane suá nuju ngu cahndé.” Cuatjin casahmi cha fariseo oración rë cha.

¹³ Peru cha faha tujúnsa ne, hitsé ni cjin secun cha, hacuaha hisca cavuyaain cavutsejen cha ngahnga ta tu cavisanetsja ni cha rcu cha, cachja cha cuitjin: “Ngayun Nina, catamayuma nuju ngahan xi jemu tjin jyé naha.” Cuatjin cachja cha.

¹⁴ Cuichjá cojo nuju ta cha faha tujúnsa jan ne, xi tu cavuya cafe cha ndava cha ne, ha café jyé rë cha xcun Nina, peru cha fariseo jan ne, hacuín cuatjin café jyé rë cha. Cuatjin camá ta, tséhë xi yějë xuta xi sahmi yehe suvá me yojo rë me ne, cuechú nixtin xi Nina ne, tsinguijne me cjuatacun rë. Hane xuta xi tsinguijne suvá me yojo rë me ne, Nina ne, sahmi jyé rë me. —Cuatjin xu cachja Jesús.

Catsinchacun Jesucristu nixti

¹⁵ Hacuaha cjuicojo xu xuta nixti rë me hiscan tacun Jesús xi cuisanetsja me nixti jan. Peru hya xi cavéë xu xuta ladu rë Jesús xi cuatjin cjuí xuta cojo nixti rë me ne, cavatécja xu me cjuatacun rë xuta jan.

¹⁶ Peru Jesús ne, cajindaya xu me nixti jan xi cjuetjengui rë me, sehe ngajan xi cachja xu me cojo xuta ladu rë me cuitjin:

—Tuhun rë nixti cahndé catinduva tjengui ná. Xicanichuun rë cahndé ta, tséhë xi nixti xi cuacun ne, hatuxa visehen ngajan hiscan xi sahmi Nina gobiernu.

¹⁷ Cuichjá cojo nuju cjuaquixi ta suvá ni xuta xi tsingatihin me xi sahmi Nina me gobiernu sacuatjin tsingatihin nixti ne, me véhë ni xi cuisehen me hiscan xi sahmi Nina gobiernu. —Cuatjin xu cachja Jesús.

Jemu chja cuisehen xuta nchina ladu rë Nina

¹⁸ Ngu xuta xi matitjun ne, cavinenguise xu me Jesús cuitjin:

—Ngayun Maestro, jemu ndaja ngayun. ¿Mé xi meje rë xi sahme cojo sa xi sacú ná cjuahñu xatsé? —Cuatjin xu cachja me.

¹⁹ Sehe ngajan xi Jesús ne, cuitjin xu cafayangui me:

—¿Mé má cuatjin nújun xi ndaja ngahan? Tsajin yo xi ndaja. Ngu ni Nina xi ndaja me.

²⁰ Ngayun ne, ha hyun hacutjin chja ley rë Nina xi chja cuitjin: “Xicanihñuu cjuatsehen cojo rë ngu chjuun o cojo rë ngu xihin xi hacuín tsujun, xicanicuun xuta, xicanihñuu cjuachëjë, xicanujuun cjuandesu tséhë xuta, chjuhuncun nahmi nuju hacuaha chjuhuncun na nuju.” —Cuatjin xu cachja Jesús cjuá rë ley rë Nina.

²¹ Hane ngajan xi xuta xi matitjun jan ne, cuitjin xu cachja me cojo Jesús:

—Yějë cjuá véhë ne, ha cáhndé tséhë hisca cjualihndi naha. —Cuatjin xu cachja me.

²² Hane xi cahndé xu Jesús cjuá rë me ne, sehe cachja xu me cuitjin:

—Tjin sa ngu cjuá xi machaja nuju: yějë ni xcusun xi tjin nuju ne, titeñu, hane sehe tichuncjun tujún rë ngajñi rë xuta yuma. Hane xi cuatjin nihñu ne, jemu jyé cjuanchina sacú nuju ngajan ngahnga. Hane xi cjué cuichuncjun tujún véhë ne, sehe nduvun tiseacun ná. —Cuatjin xu cachja Jesús.

²³ Peru xi cahndé xu xuta xi matitjun jan cjuá xi cachja Jesús ne, jemu va camá cacun me, tséhë xi jercu nchina camahani me.

²⁴ Hane xi vutsejen xu Jesús xi jemu va camá cacun xuta xi matitjun jan ne, sehe cachja xu me cuitjin:

—Jemu chja xi ngu xuta xi tjin rë me cjuanchina cuisehen me hiscan sahmi Nina gobiernu.

²⁵ Ha hitsé sa chjaain cuatju ngu chu camellu ngojo rë ngu níndu xi cuma rë xi cuisehen ngu xuta nchina hiscan sahmi Nina gobiernu. —Cuatjin xu cachja Jesús.

²⁶ Ngajan xi xuta xi cahndé me cjuá jan ne, cuitjin xu cachja me:

—Sá cuatjin ne, ¿yo xi cuma cuetjutje ni? —Cuatjin xu cachja me.

²⁷ Hane Jesús ne, cuitjin xu cafayangui me:

—Yějë ni xi maji sahmi xuta ne, Nina ne, hatuxa ma sahmi me. —Cuatjin xu cafayangui Jesús.

²⁸ Ngajan xi Pedru ne, cuitjin xu cachja me cojo Jesús:

—Chutsujun ni. Ngayin ne, ha canismítacuín yějë ni xcusun xi tjin ni, hane tivisecun nuju. —Cuatjin xu cachja Pedru.

²⁹ Hane Jesús ne, cuitjin xu cachja me:

—Cuichjá cojo nuju cjuaquixi ta yějě xuta xi tsismicacun me ndava me, tsismicacun me chjuun rě me, tsismicacun me xicjin me, tsismicacun me xutacha rě me, tsismicacun me quihndi rě me, xi cjuetjengui me ndiya rě Nina ne,

³⁰ hatuxa cjin sa cahndě sacú rě me xi cuma sacuaha ndava me, hacuaha hatuxa cjin sa xuta sacú rě me xi cuma sacuaha xuta rě me, quihndě xi siu me ngasunhdě vihi, hane hya xi cueya me ne, sacú rě me ngu cjuahñu xatsě. —Cuatjin xu cachja Jesús.

Camá jyan ndiya cachja Jesucristu xi cueya me

³¹ Hya xi camá xu ne, quijicojoxin Jesús tejó xuta ladu rě me, sehe cachja xu me cojo cuitjin:

—Quihndě ne, tivanguen Jerusalén. Hane xi cjuen jan ne, cuetjucaa yějě sacuatjin catsihindu profeta tsahan, ngahan xi Quihndi rě Xuta Jain ngahan.

³² Ngahan ne, cuma ngahan entregadu tsja xutaxín, cuejnucěě ná xuta, choho cuichja me tsahan, cuěhénatya ná me.

³³ Hane xi cjuě cuaja ná me ne, sehe tsiquehen ná me. Peru xi ma jyan nixtin ne, cúa nga cjuahñu. —Cuatjin xu cachja Jesús.

³⁴ Peru xuta ladu rě me jan ne, hisca ngu xu cjuah vėhě cajni rcu me ta tjihma cjuatacun vėhě xi cuma rě me. Vėhě xi hvíin xu me mé vijne cjuah xi cachja Jesús jan.

Casahmi Jesucristu xi camatsejen nga rě ngu cha rcá ngajan Jericó

³⁵ Hya xi camá ne, xi camatiña xu Jesús tsěhě nandya Jericó cojo xuta ladu rě me ne, ngajan tacun xu ngu cha rcá tjeheh ndiya, fehya cha caridad.

³⁶ Hane xi cahndě cha xi jercu cjin xuta fane ntsacu me ne, sehe cavinenguise xu cha mé jima jan.

³⁷ Hane tjin xu yo cachja cojo cha xi Jesús tsěhě nandya Nasaret tivatju me cojo xuta ladu rě me.

³⁸ Hane cha rcá jan ne, cuitjin xu cajindaya cha cachja cha:

—¡Ngayun Jesús, tjě rě David! Catamayuma nuju ngahan. —Cuatjin xu cachja cha.

³⁹ Hane xuta xi cjuí titjun jan ne, cavisiajmi cjan xu me cojo cha xi sejyu cha. Peru cha vėhě ne, hitsě sa jercu cajindaya xu cha cachja cha, cuitjin cachja cha:

—¡Ngayun tjě rě David! Catamayuma nuju ngahan. —Cuatjin xu cachja cha.

⁴⁰ Ngajan xi Jesús ne, xi casecunhñu xu me ne, sehe cavitexa me xi cuinduva cojo xuta cha rcá jan hiscan xi secun me. Hane xi camatiña cha tsěhě Jesús ne, sehe cavinenguise xu me cha cuitjin:

⁴¹ —¿Mé xi meje nuju xi sahme cojo nuju ni? —Cuatjin xu cavinenguise me.

Sehe ngajan xi cha rcá jan ne, cuitjin xu cachja cha:

—Tatá. Meje ná xi cuma tsejen nga ná. —Cuatjin xu cachja cha.

⁴² Hane Jesús ne, cuitjin xu cachja me cojo cha:

—Catamatsejen nga nuju. Ngayun ne, camandaja túxcun ta, tsěhě xi camangutacún cojo ná. —Cuatjin xu cachja Jesús.

⁴³ Hane ha hora vėhě ni ne, camatsejen nga xu rě cha. Sehe quiji xu cha cojo Jesús táha sahmi jyě sahmi hnga cha Nina. Hane xi cavěě yějě xuta xcusun xi camá jan ne, jemu cavaxéndaja xu me Nina.

19

Jesucristu cojo cha Zaqueo

¹ Hya xi camá ne, cavisehen xu Jesús nandya Jericó xi cuatju me vasencja nandya.

² Hane ngajan tacun xu ngu cha xi hmí rě Zaqueo, ngu cha xi matitjun tsěhě cha faha tujúnsa, hacuaha jemu nchina cha.

³ Hane cha vėhě ne, jemu meje scuěě xu cha yo xi Jesús, peru camaji ta, tsěhě xi jercu cjin camahani xuta quitsě me, hacuaha cha vėhě ne, jemu patú xu cha.

⁴ Hane xi cavangatitjun cha ne, quiji camiji xu cha ngu ya jyě, cojo sa xi cuma scuěě cha Jesús ta, tsěhě xi hatuxa ngajan cuatju me.

⁵ Hane xi cafehe xu Jesús jan ne, sehe cavuya cavutsejenniji me rcu ya hiscan quisun cha ne, sehe cachja xu me cojo cha cuitjin:

—Zaqueo, nduvunjnu sani ta, tsěhě xi sahmi ná ngu jyě xi ndya nuju cuitjěña quihndě. —Cuatjin xu cachja me.

⁶ Ngajan xi cha Zaqueo ne, marcu macjain xu cavitujne cha, cafahatsja cha Jesús cojo yějě ni cjuasua, quijicojo cha me ndava cha.

⁷ Hane xi cavěě yějě xuta xi cuatjin casahmi Jesús ne, sehe cachjahma xu me cojo xicjin me cuitjin:

—Quiji cavějěña me cojo ngu cha tsehen. —Cuatjin xu cachjahma me.

⁸ Hya xi camá ne, xi ha tacun Jesús ndava cha Zaqueo ne, cavisatjenhnga xu cha, sehe cachja xu cha cojo Nai naja cuitjin:

—Chutsujun ni, tatá. Vasentjin tséhë yëjë ni xcusun xi tjin ná ne, suá rë xuta yuma. Hane sá xi tjin yo xi cavaxé rë tujún cojo cjuandacha ne, ñuju cuatjin sacuatjin xi cafahá ne, tsicúya tséhë me. —Cuatjin xu cachja cha.

⁹ Ngajan xi Jesús ne, cuitjin xu cachja me:

—Quihndé ta cuatjin ne, ngayujun ni tséhë ndihya vihi ne, cavetjuntjun ta, me xi cuijyihí vi ne, hacuaha cojo me má me xuta ladu rë Nina.

¹⁰ Hane ngahan xi Quihndi rë Xuta Jain ngahan ne, canduvá xi cuanguësë hacuaha cuaxëtjé xuta ladu rë Nina xi cachajá me tséhë ndiya rë Nina. —Cuatjin xu cachja Jesús.

Ejemplu tséhë tujún xi casua nai rë hndixahan

¹¹ Xi tu cajnetaha cavisíñuju xuta cjua vëhé ne, Jesús ne, cachja sa xu me ngu ejemplu cojo xuta jan ta, tséhë xi tiña siutahá me cojo nandya Jerusalén, hane má xu rë xuta ta ha hisca tacun xati xi cuinduva Nina sahmi me gobiernu.

¹² Hane cuitjin xu cachja me:

—Cuejña ne xi ngu xuta chacun jan ne, quiji me ngu nangui cjin, xi cjuahaxa me xi cumatitjun me tséhë estadu rë me, sehe cuya nga me.

¹³ Hane chaja sa xi cjue me ne, cajindaya me té hndixahan rë me, sehe casua rë me jima ngu hndixahan jan tujún. Sehe cachja me cojo cuitjin: “Nihñu xa cojo tujún vihi jinguyëjë rë xi cjué sehe cúa.” Cuatjin cachja me.

¹⁴ Peru xuta tséhë estadu rë me ne, jemu choho vëé rë me. Vëhé xi hya xi ha quiji xuta chacun ja ne, catsingatju xuta estadu rë me jan ngujo cha xi cuichja cha cuitjin cojo xuta xi suaxa rë xuta chacun jan: “Mamiji niji xi me xi cuajyihí vë cumatitjun me tsijin.” Cuatjin cuichja cha.

¹⁵ Hya xi camá ne, xi cavuya xuta chacun jan xi café cafahatsja me xa ne, cavitexa me xi chjindaya rë cha hndixahan rë me xi casua rë me tujún jan, cojo sa xi sua cha cumachaya rë me há cjin cavesun rë cha jima ngu cha xi casahmi cha xa cojo tujún xi casua me cha.

¹⁶ Hane cha hndixahan xi canduva titjun ne, cuitjin cachja cha: “Tatá. Sacuatjin tujún xi catuhun ná ne, cavesun ná té cuatjin sa.” Cuatjin cachja cha.

¹⁷ Sehe ngajan xi nai rë hndixahan jan ne, cuitjin cachja me cojo: “Ndatjin ri. Ngaye ne, ngu hndixahan ndaja ngaye. Ngatsé rë xi jemu ndaja canihñi xa xi chúva vë ne, suá ri té nandya xi cumatitjun ngaye tséhë.” Cuatjin cachja me.

¹⁸ Hane xi canduva cha xi majo ne, cuitjin cachja cha: “Tatá. Sacuatjin tujún xi catuhun ná ne, cavesun ná hñú cuatjin sa.” Cuatjin cachja cha.

¹⁹ Hane nai rë hndixahan jan ne, cuitjin cachja me: “Ngaye ne, cumatitjun ngaye tséhë hñú nandya.” Cuatjin cachja me.

²⁰ Hya xi camá ne, xi canduva nga ngu cha ne, cuitjin cachja cha: “Tatá. Cuajyihí tujún xi catuhun ná ngeuehe. Tujún vi ne, cavinchándaja cahntsua ngu pañutu ta,

²¹ tséhë xi tsácjun nuju. Ta ngayun ne, jemu hñu cjua nuju. Tangun ngayun cojo ngu xuta xi fanga me handasa hacuín me vëhé catsitjé me ta, tséhë xi ngayun ne, hacjahi sahmi xa ne, ngayun chjuhunntsun chji rë.” Cuatjin cachja cha hndixahan vëhé.

²² Ngajan xi xuta chacun jan ne, cuitjin cachja me cojo hndixahan vëhé: “Ngaye, hndixahan tsehen ne, cojo cjua riji sove ni tsichúva ri. Ngaye xi noje xi hye xi jemu hñu cjua naha, hacuaha tangun ngahan cojo ngu xuta xi fanga me handasa hacuín me catsitjé me, tséhë xi ngahan ne, hacjahi sahmi xa ne, ngahan fahántsá chji rë.

²³ Sá xi hye xi cuatjin ne, ¿mé má hacuín xcun bancun cahmi chani tujún xi casuá ri, cojo sa xi hya xi cjuéhë ne, cúa cjuahántsá tujún naha, peru cojo quihndi rë ni?” Cuatjin cachja xuta chacun jan cojo hndixahan rë me.

²⁴ Sehe cachja sa me cojo ngujo hndixahan rë me xi hinchacun jan cuitjin: “Chjuhuntuhan tujún xi yaha cha vë ne, sehe tuhun rë cha xi cavesun rë té cuatjin sa sacuatjin tujún xi casuá ré.” Cuatjin cachja xuta chacun jan.

²⁵ Hane hndixahan jan ne, cuitjin cafayangui: “Tatá. ¡Peru cha vëhé ne, ha tjin rë cha té cuatjin sa!” Cuatjin cachja cha.

²⁶ Ngajan xi xuta chacun jan ne, cuitjin cachja me: “Ngeuehe cuichjá cojo nuju ta yëjë xuta xi cavesun rë me xcun xi ha tjin rë me ne, suá sa rë me. Hane xuta xi tsajin mé cavesun rë me ne, hisca xi tjin rë me ne, cjuahátahá.

²⁷ Hane sacuaaha condra naha xi mijí rë xi ngahan cumatitjun ngahan tséhë ne, tángun chjuhun, nduvuncujun ngeuehe, sehe nicuhun ngeuehe xcún.” Cuatjin cachja xu xuta chacun xcun ejemplu xi cachja Jesús.

²⁸ Hya xi camá xu ne, xi cavatju cachja Jesús cjuá vèhè ne, sehe cavetju me quiji sa xu me xi cjuèhe me Jerusalén.

²⁹ Hane hya xi camatiña me tsèhè nandya Betfajé cojo nandya Betania, nandya xi siu tiña tsèhè ndetjún xi hmí rè Ndetjún Olivu ne, sehe catsingatju xu me jo xuta ladu rè me xi cjué tixa rè me,

³⁰ hane cuitjin xu cachja me:

—Tángun nandya xi tsejen tacun vè. Hane xi cjuhun jan ne, ngajan cuechuntuhun ngu chu burru xatsè, xi hisca ngu cjèè cuijin rè chu, tjihñu chu. Hane chundecjun chu, nduvuncujun chu.

³¹ Hane sá xi yo cjuinenguise nuju mé má cuatjin chundecjun chu ne, sehe tinújun cuitjin: “Nai niji meje rè me chu.” Cuatjin tinújun. —Cuatjin xu cachja Jesús.

³² Hane me xi casatèxa rè jan ne, quiji xu me, hane cavetjucaa jain sacuatjin cachja Jesús cojo rè me.

³³ Hane jinguyèjè rè xi tivundecja me burru jan ne, nai rè chu ne, cuitjin xu cachja me:

—¿Mé má cuatjin chundecjun burru vè? —Cuatjin xu cachja me.

³⁴ Hane xuta ladu rè Jesús jan ne, cuitjin xu cafayangui me:

—Nai niji meje rè me chu. —Cuatjin xu cachja me.

³⁵ Sehe quijicojo xu me chu hiscan tacun Jesús. Hane caviyujusun me tsjian rè me ngaxtun chu, sehe catsiquijin xu me Jesús burru jan.

³⁶ Hane xi cjui Jesús quisun me burru jan ne, táha ticandi xu xuta tsjian rè me hiscan cjui Jesús.

³⁷ Ngajan xi xi jima tiña xu Jesús cojo yèjè xutacjin jan nandya Jerusalén, hiscan xi cafaha rè xi ha cuitsingaxten ndiya tsèhè Ndetjún Olivu ne, yèjè ni xutacjin xi xuta ladu rè Jesús jan ne, jercu ndama xu rè me, hisca cavetsihin cajindaya me cachja me xi cavaxèndaja me Nina tsèhè yèjè ni cjuarcon xi cavèè me.

³⁸ Cuitjin xu cachja me:

—Jemu catsinchacun Nina me xi nduva vi xi cuma titjun tsajan, tsèhè xi Nina catsingatju rè me. Ngahnga ne, hatuxa jemu tjin cjuandaja cjuajeya, hacuaha Nina ne, hatuxa jyè hnga me cojo Hasen rè me. —Cuatjin xu cavaxèndaja xuta Nina.

³⁹ Hane ngujo cha fariseo xi hinchajñi ngajñi rè xutacjin jan ne, cachja xu cha cojo Jesús cuitjin:

—Maestro, tichuncjun cjuá xi tichja xuta ladu nuju vè. —Cuatjin xu cachja cha.

⁴⁰ Hane xi cafayangui Jesús ne, cuitjin xu cachja me:

—Nguehe cuichjá cojo nuju ta sá xi xuta xi cuicun vi seyyu me ne, ndyojo vi cuetsihin squindaya cuichja nga. —Cuatjin xu cafayangui me.

⁴¹ Hane xi camatiña sa xu Jesús tsèhè Jerusalén ne, xi cavèè me nandya jan ne, cajihnda xu me ngatsè rè.

⁴² Sehe cachja xu me sacuaha xi tichja me cojo xuta Jerusalén, cuitjin xu cachja me:

—¡Sá mé ni xi hacuaha cojo ngayun hyun cjuatacun xi yaha cjuandaja cjuajeya! Peru quihndè matsejen ne, cjuatacun vèhè matsejen ne, jiyahma xi cuma nuju. Vèhè xi hyúun.

⁴³ Peru cuechú nixtin xi yèjè ni condra nuju matsejen ne, sahmi me nguýjè xi cuma cuisehen me nandya nuju, xinchandee nuju me yèjè ni ladu xi cuinchahñu nuju me.

⁴⁴ Tsixujne me yèjè ni ndihya tsèhè nandya nuju, tsicanguini me hisca ngu ndyojo xi tinecoo, hacuaha tsiquehen nuju me ngayujun ni xi nechun nandya nuju. Cuatjin cuatjun cuma matsejen ta, tsèhè xi ngayun matsejen ne, cajni rrun hya xi cafehe Nina xi cuaxètje nuju me. Cuatjin xu cachja Jesús.

Cavaxè Jesucristu xuta tsehen tsèhè ndatsen yungun

⁴⁵ Hane xi cafehe me nandya Jerusalén ne, sehe quiji xu me yungun xi matitjun. Hane xi cavisehen me ndatsen yungun jan ne, cavetsihin cavaxè me xuta xi sahmi ndetsin jan.

⁴⁶ Cuitjin xu cachja me:

—Cuitjin camahindu xcun xujun rè Nina sacuatjin xi cachja me: “Ndyá naha ne, vejña xa xi cjué xuta sahmi me oración rè me.” Cuatjin chja Nina. Peru ngayun ne, tinihñuxun cojo sacuaha ngu cahndè hiscan xi matangun xuta chèjè. —Cuatjin xu cachja Jesús.

⁴⁷ Hya xi camá ne, nchunchujun xu ni quiji Jesús cavicuaya me xuta ngajan ndatsen yungun xi matitjun. Hane yèjè ni nahmi xi matitjun cojo yèjè cha xi vicuya cjuachacun cojo yèjè sa xuta xi matitjun ne, jemu cavangui xu me chuva rè xi tsiquehen me Jesús,

⁴⁸ peru casacuinyin xu rè me mé sahmi me ta, tsèhè xi yèjè ni xuta ne, tivisiñuju xu me cjuá rè Jesús nguñaja cacun me.

¹ Cuitjin camá xu ngu nixtin hya xi tivicuya Jesús xuta hacuaha tisua me jimachaya rë cjuandajyihí rë Nina ngajan ndatsen yungun xi matitjun. Hacuaha camatangun xu nahmi xi matitjun cojo cha xi vicuya cjuachacun cojo xuta changá,

² hane cuitjin xu cavinenguise me Jesús:

—Tinújun cojo nihi ne, ¿yo caviteza nuju xi cuatjin nihñu? ¿Yo casuaxa nuju? —Cuatjin xu cavinenguise me.

³ Hane xi cafayangui Jesús ne, cuitjin xu cachja me:

—Hacuaha cjuinenguësë nuju ngu cjuá, hane chjayungun tsahan:

⁴ ¿Yo caviteza rë Juan xi cuitenda me xuta? ¿Há Nina ne, o há tsajin ne, há xuta? —Cuatjin xu cachja me.

⁵ Sehe ngajan xi xuta xi cuacun jan ne, cavisiajmicjín me ngajñi rë me, cachja xu me cuitjin:

—Sá xi cuinújan xi Nina caviteza me cha Juan vë ne, cjuinenguise naja me: “¿Mé má camacjaaín naja cha?”

⁶ Hane sá xi cuinújan xi xuta caviteza rë cha ne, yëjë ni xuta ne, tsiquehen naja me cojo ndoyojo ta, tsëhë xi yëjë ni xuta ne, ha macjain rë me xi cha vëhë ne, profeta cha. —Cuatjin xu cavisiajmicjín me.

⁷ Ngajan xi xuta xi cuacun jan ne, cachja me xi hvíin me.

⁸ Sehe ngajan xi Jesús ne, cuitjin xu cachja me:

—Sá cuatjin ne, ngahan ne, hacuaha cuichjaan cojo nuju yo caviteza ná xi cuitjin sahme. —Cuatjin xu cachja Jesús.

Ejemplu tsëhë cha sahmixa xi jemu tsehen cha

⁹ Hya xi camá ne, cavetsihin cachja xu Jesús cojo yëjë ni xuta jan ejemplu vihi:

—Cuejña ne xi ngu me jan matsejen ne, catsitjë me xcun nangui rë me xca rë uva. Sehe casua me ngujo cha sahmixa xi cjuahacuenda cha sehe cjuaha tsë tsë me cojo cha. Hya xi camá ne, sehe cavetju me quiji me ngu nangui jemu tsëë camahani.

¹⁰ Hane xi cavechú nixtin rë tutjë jan matsejen ne, sehe catsingatju me ngu mosu hndixahan rë me xi quiji cachja cha cojo cha xi fahacuenda xitjë jan xi sua cha hitsë tutjë xi satë rë me xi casacu rë cha xcun nangui rë me jan. Peru cha xi fahacuenda xitjë jan matsejen ne, tu cavaja cha cha hndixahan jan, sehe catsingatju cha café, ndastu mé casua rë cha.

¹¹ Hya xi camá ne, cavuya catsingatju nga me ngu hndixahan rë me. Hndixahan vëhë matsejen ne, jemu cavaja rë cha, jemu choho cachja cha cojo, sehe catsingatju cha café, ndastu mé casua rë cha.

¹² Hya xi camá ne, cavuya catsingatju nga me ngu hndixahan xi majyan. Hndixahan vëhë matsejen ne, jemu cavanguihmu rë cha, sehe cavaxëxin cha tsëhë ngajan.

¹³ Ngajan xi nai rë xitjë jan matsejen ne, cuitjin catsingataha cacun me: “¿Mé xi ndatjin sahme quihndé? Ndatjin rë xi tsingátju quihndi naha xi jemu hmú cáacun. Cjuaharcun rë cha, xi quihndi naha.” Cuatjin catsingataha cacun me.

¹⁴ Peru xi cavëë cha xi fahacuenda xitjë jan cha vëhë matsejen ne, sehe cavisiajmicjín cha cojo xicjin cha cuitjin: “Cha vihi ne, quihndi rë me xi cuahatsja cha xitjë vi. Niquen cha, cojo sa xi tsajan cuma nangui vi.” Cuatjin cavisiajmicjín cha.

¹⁵ Hane xi cavaxëxin cha cha tsëhë nangui jan matsejen ne, sehe catsiquehen cha.

‘Xi má nuju matsejen ne, ¿mé sahmi nai rë xitjë jan cojo cha xi cuacun fahacuenda jan?’

¹⁶ Cjue tsiquehen me cha, sehe sua me xitjë jan cjuahacuenda jingu sa cha sahmixa. —Cuatjin xu cachja Jesús.

Hane xi cahndé yëjë xuta cjuá vëhë ne, cachja xu me cuitjin:

—¡Catamamiji cacun Nina xi cuatjin cuma! —Cuatjin xu cachja me.

¹⁷ Ngajan xi xi cavuya vutsejen Jesús xuta jan ne, cuitjin xu cachja me:

—¿Mé vijne xi cuitjin camahindu xcun xujun rë Nina?:

Ndyojo xi catsitjungui chjinevexo ne, vëhë ndoyojo xi cavëjña tjun tjun yuju rë xihndëñaña.

Cuatjin camahindu.

¹⁸ Hya xi ngu xuta cjuinenguisun me xcun ndoyojo vëhë matsejen ne, cuatëlanga rë me. Hane hya xi ndoyojo vëhë cjuinenguisun rë ngu xuta matsejen ne, ña cuma të me. —Cuatjin xu cachja Jesús.

¹⁹ Vëhë xi cha xi vicuya cjuachacun cojo nahmi xi matitjun ne, jemu cavangui xu me chuva rë hacutjin cuma xi cjuaha me Jesús hora vëhë ni, tsëhë xi vëë me xi ejemplu xi cachja Jesús ne, condra rë me chja. Peru tsëhë xi tsacjun xu me xuta ne, vëhë xi cafaain xu me Jesús ngutjen.

²⁰ Tu siu xu ni me cuidadu tsêhê cjuarê Jesús, hisca catsingatju xu me ngujo cha xi tsejen sacuaaha xuta ndaja, xi cuangui cha chuva rê xi cuaxê rê cha Jesús ngu cjuarê xi cuaintjin, cojo sa xi cuma chjahá rê me cjeuchani rê me xcun xutaxa rê ndihyavasen.

²¹ Hane cha xi cuacun jan ne, cuitjin xu cachja cha cojo Jesús.

—Maestro, ngayin ne, hyin ta ngayun ne, vicuyun rê xuta cojo cjuaquixi. Hacuaaha tangun ni nújun cojo yêjê xuta ta, tsêhê xi ngayun ne, hatuxa vicuyun ndiya rê Nina cojo cjuaquixi.

²² Quihndê ne, sacuaaha ley rê Moisés ne, ¿há sua cahndê xi cuechjen tujúnsa naja cojo César, me xi matitjun, o há suaain cahndê? —Cuatjin xu cachja cha.

²³ Peru Jesús ne, tsêhê xi ha vacun rê me xi jemu ndacha cha ne, cuitjin xu cachja me cojo cha:

²⁴ —Ningacun ná ngu tujún. Quihndê ne, ¿yo xcusun rê hacuaaha yo ñihi rê xi quitahá xcun tujún vê? —Cuatjin xu cavinenguise Jesús.

Hane cha xi cuacun vê ne, cuitjin xu cafayangui cha:

—Tsêhê César. —Chja xu cha.

²⁵ Sehe ngajan xi Jesús ne, cuitjin xu cachja me cojo cha:

—Sá xi cuatjin ne, tuhun rê César xi tsêhê me, hane tuhun rê Nina xi tsêhê me. —Cuatjin xu cachja me.

²⁶ Hane camaji cavaxê xu rê cha Jesús ngu cjuarê xi cuaintjin xi cuihndê xuta. Hane xi quijircun xu rê cha tsêhê cjuarê xi cafayangui Jesús ne, tu caviyujuyuu xu ni cha.

Cjuachjinenguise tsêhê xi cjuarê nima cjuahñu

²⁷ Hya xi camá ne, cafehe xu ngujo cha saduceo hiscan tacun Jesús. Cha xi cuacun vi ne, vicuya cha cjuachacun xi chja xi xuta xi cahme ne, cuyaain nga me cjuahñu. Ngajan xi cha xi cuacun cafehe jan ne, cachja xu cha cojo Jesús cuitjin:

²⁸ —Maestro, Moisés ne, catsihindu me xcun xujun rê Nina xi sá xi ngu xihin cueya, hane tsajin rê chjuun rê hisca ngu quihndi ne, hntsé nima vêhê ne, meje rê xi cjuarê rê chjuun cahan vêhê, cojo sa xi sacú rê na quihndi xi cuma sacuaaha quihndi rê nima vêhê.

²⁹ Quihndê ne, cuejña xi ngu ndihya ne, siu yatu cha cojo hntsé cha. Hane cha tjun ne, cafaha cha chjuun. Peru cahme cha, hane chjuun rê cha vêhê ne, casacuiin rê na hisca ngu quihndi cojo cha.

³⁰ Hya xi camá ne, hntsé nima vêhê, cha xi majo ne, cafaha cha na cahan vêhê camá chjuun rê cha na, peru hacuaaha cahme cha hane casacuiin rê na quihndi.

³¹ Hacuanitjin ni cafaha cha xi majyan jan na hisca xi café yêjê xi yatu cha cafaha cha na. Peru yêjê cha xi cuacun vê ne, café cha cahme cha chuva ngu chuva ngu cha. Hane na vêhê ne, casacuiin rê na hisca ngu quihndi cojo cha xi cuacun vê.

³² Hiscan xi cajnetaha ne, na vêhê ne, hacuaaha cahme na.

³³ Quihndê ne, hya xi cjuarê yêjê nima cjuahñu ne, ¿jarê cha xi cuacun vê xi chjuun rê cha na xi cjuaquixi ta, tsêhê xi yêjê ni xi yatu cha ne, camá chjuun rê cha na? —Cuatjin xu cachja cha saduceo cojo Jesús.

³⁴ Sehe ngajan xi Jesús ne, cuitjin xu cachja me cojo cha:

—Xuta xi siu me ngasunhndê quihndê ne, tsinguixan me hacuaaha vixan me.

³⁵ Peru xuta xi vehú chuva rê xi cjuarê yêjê me cjuahñu xi ha cuatju cueya me hacuaaha sacú rê me cjuahñu xatsê ne, cuixaain me hacuaaha tsinguixaain me hya ta,

³⁶ tsêhê xi ha quihndê cueyaain nga me, tsêhê xi tangun cuma me cojo ángel. Hacuaaha cuma me quihndi rê Nina, tsêhê xi cjuarê yêjê me cjuahñu.

³⁷ Hacuaaha hya xi chutayan cjuarê xi cachja Moisés ngajan hiscan xi catí yanahyá xcuen ne, hya sacu machaya naja tsêhê xi nima ne, cjuarê yêjê ta, tsêhê xi cachja Moisés xi Nina naja ne, Nina rê Abraham, Nina rê Isaac, cojo Nina rê Jacob má me.

³⁸ Peru Nina ne, hacuiin nina rê nima ta nina rê xuta xi quicun me ta, tsêhê xi xi cuma rê Nina ne, yêjê ni xuta ne, quicun me, handasa cahme yahnga me. —Cuatjin xu cachja Jesús.

³⁹ Ngajan xi ngujo cha vicuya cjuachacun ne, cuitjin xu cachja cha:

—Maestro, ndatjin cjuarê xi cantújun.

⁴⁰ Cuatjin xu cachja cha ta, tsêhê xi tsacjun xu cha cjuinenguise sa cha me.

¿Yo tjê rê má me xi catsingatju Nina?

⁴¹ Sehe ngajan xi Jesús ne, cachja nga xu me cuitjin:

—¿Hacutjin má xi cuatjin chja xuta xi me xi tsingatju Nina ne, tjê rê David má me?

⁴² Ta suvá David ne, cachja me cuitjin xcun xujun tsêhê Salmo:

Nina ne, cachja me cojo Nai naha cuitjin:

“Tinechin nguehe ladu quixi naha,

⁴³ hisca hya xi yêjê ni xi sahmi ri condra ne, cuiyujú ngahan ngahma gobiernu riji.”

Cuatjin cachja David cjuarê xi cachja Nina.

⁴⁴ Quihndë ne, sá xi suvá David chja me xi Nai rë me má me xi tsingatju Nina ne, ¿hacutjin má ne xi hacuaha tjë rë me ni? —Cuatjin xu cachja Jesús.

Cachjayë Jesucristu cojo xuta ladu rë me tsëhë cha vicuya cjuachacun

⁴⁵ Jinguyëjë rë xi tivisiñuju yëjë xuta jan ne, Jesús ne, cachja xu me cuitjin cojo xuta ladu rë me:

⁴⁶ —Xicaninguisuhunñuu cojo cha xi vicuya cjuachacun, xi jemu ndama rë cha xi cuatjin vajá cha tsjian nduju, hora xi fi tsujyihya cha, jemu chuya rë cha xi cuatjin fi chja xuta nina cojo cha ngajan ngajñi ndetsin, hacuaha jemu chuya rë cha xi cuatjin satë rë cha cahndë xi matitjun tsëhë cahntsua yungun, o hiscan ngu ndava suhi.

⁴⁷ Cha xi cuacun vë ne, hacuaha jemu cjin tujún vaxë cha yachjin cahan. Hisca xi chjayuma cha ne, hacuaha jemu nduju hora, peru hacuain nguñaja cacun cha chja cha. Vëhë xi cha xi cuacun vë ne, hitsë sa jyë castigu cuatju cha xi cuma rë jingusa xuta. —Cuatjin xu cachja Jesús.

21

Tujún xi cavincha chjuun cahan cahntsua alcancia

¹ Ngu nixtin jan ne, jinguyëjë rë xi tivutsejen xu Jesús xi tvincha xuta nchina tujún cahntsua alcancia tsëhë cjuandaja rë me cojo Nina ne;

² hacuaha cavëë xu me xi canduva ngu chjuun cahan xi jemu yuma, hane hacuaha cavincha na jo tujún langa cahntsua alcancia jan.

³ Sehe ngajan xi cachja xu Jesús cojo xuta ladu rë me cuitjin:

—Cuichjá cojo nuju cjuaquixi ta na cahan vë xi jemu yuma na ne, hitsë sa vengui chji rë tujún xi cavincha na xi cuma rë tujún xi jemu cjin cavincha yëjë xuta nchina xi cuacun vë ta,

⁴ tsëhë xi me xi cuacun vë ne, tsëhë cjuanchina xi tjin rë me ne, ngajan cavaxë me tujún xi cavincha me. Peru na vëhë ne, handasa jemu tjin rë na cjuachaja ne, hitsë lihndi tujún xi tjin rë na ne, cavincha na yëjë cahntsua alcancia. —Cuatjin xu cachja Jesús.

Cachja Jesucristu xi cuetsun yungun

⁵ Ngu ndiya, hya xi ngujo xuta jan cachja xu me xi yungun xi matitjun ne, jemu ndacun ndoyojo camá cojo, hacuaha jercu camaxcuen cojo tu mé ni xcusun cjuatjo xi casua xuta ne, cachja xu Jesús cuitjin:

⁶ —Sacuaha xcusun xi chutsujun vi ne, cuechú nixtin xi hisca ngu ndoyojo ndacun xi cuicun vi ne, tsajin hinchasuncoo xicjin ta cjuë yëjë cuixujne. —Cuatjin xu cachja Jesús.

Hacutjin sacú cumachaya naja xi ha meje cuijnetaha nixtin vihi

⁷ Ngajan xi xuta jan ne, cavinenguae xu me cojo Jesús cuitjin:

—Maestro, hane ¿janihya cuetjucaa xusun vëhë ni? ¿Hacutjin cuma sacú niji cjuaquixi xi xcusun vëhë ne, ha tivechú nixtin xi cuetjucaa ni? —Cuatjin xu cavinenguae me.

⁸ Ngajan xi Jesús ne, cuitjin xu cachja me:

—Nechun cuidadu, cojo sa xi hacuain cuma ndacha ngayun ta, tsëhë xi jemu cjin xuta cuetjucaa me xi cuichja me xi hacui me xi catsingatju Nina me, hacuaha cuichja me xi ha camatiña nixtin. Peru xicatsanguntjengun me.

⁹ Hacuaha hya xi cuma chaya nuju cjuaxi jemu yehe si tijima ngu nación ne, o sá xi tjin cjuatacun xi jemu yehe si nduva ne, xicarcuun ta, hatuxa tjin xi titjun xcusun vëhë cuma. Peru hacuain ngutjen hya cuijnetaha nixtin vihi.

¹⁰ Hacuaha quijinduju sa xu cachja me cuitjin:

—Scaan xuta tsëhë ngu nación cojo jingu sa nación, hacuaha scaan xuta tsëhë ngu nandya cojo ngu nga nandya.

¹¹ Hacuaha jemu cjin cahndë xi cjuani nangui, jemu cjin cahndë xi cuatju chíhin vitaha, jemu cjin cahndë xi cuma jindya, hacuaha jemu yehe chírcun cuma tsejen ngajan ngahnga xi sua cumachaya nuju mé xi cuma.

¹² Peru chaja sa xi cuma yëjë xcusun vëhë ne, xuta ne, tsujyihyatjengui nuju me cojo cjuahngatacun. Cjuaha nuju me cjuecojo nuju me xcun xutaxa rë yungun, hisca cuincha nuju me ndavaya. Cjuecojo nuju me xcun xutaxa rë ndihyavasen, hisca xcun gobernador, ngatsë rë xi ladu naha má ngayun.

¹³ Xi cuatjin cuatjun cuma ne, vëhë sua nuju cahndë xi ninguxun yëjë cjuaxi hacutjin cavicuyá nuju.

¹⁴ Tejñungutacún xi hacuain titjun jemu cjin ningatuhuntacún hacutjin chjayungun tsëhë xutaxa rë ta,

¹⁵ tsëhë xi ngahan suá nuju cjuatacun xi cuinjun ngu cjuaxi condra nuju ne, cumaji tsitjungui me hacuaha cumaji cuichja me xi quixiin.

¹⁶ Hacuaha hisca xutacha nuju, o sá xi xingun, o sá xi xuta nuju, o sá xi amigu nuju ne, cuinchajyë nuju me. Hacuaha tjin yahnga ngayun ne, hisca tsiquehen nuju me.

¹⁷ Yëjë ni xuta ne, choho scuëë nuju me, tsëhë xi ladu naha ngayun.

¹⁸ Peru xicamacjiintacún ta tsajin camahani mé xi nichujun.

¹⁹ Caticaa nuju ta, tsëhë xi cuatjin xi cuetjuntjun.

²⁰ Peru hya xi chun xi jemu cjín xuta nduvacjin cuetsihin xinchandee me nandya Jerusalén xi sahmi me ngu si jyë cojo nuju ne, vëhë sua machaya nuju xi camatiña nixtin xi nandya Jerusalén ne, cjuë tsinguetsun xuta nduvacjin vë.

²¹ Nixtin hya ne, ngayujun ni xi nechun yëjë nandya tsëhë distritu Judea ne, tiyun tángun hiscan ndetjún. Hacuaha ngayujun ni xi nechun nguehe nandya Jerusalén ne, tetjuntjun. Hacuaha ngayujun ni xi nechun ranchun rë Jerusalén ne, xicatsanguun nandya xi naxuntjun yojo nuju.

²² Cuatjin meje rë xi nihñu ta, tsëhë xi nixtin hya ne, sahmi Nina castigu nandya vihi, cojo sa xi xi cuatjin ne, cuetjucaa yëjë hacutjin camahindu xcun xujun rë Nina.

²³ Jemu chojyihí tsëhë yëjë yachjin xi hinchahma quihndi rë me cojo yëjë me xi tjin rë quihndi vaqui nixtin hya ta, tsëhë xi cuatju ngu cjuandya jyë nación vihi, hacuaha cuatju xuta nguehe ngu castigu.

²⁴ Hacuaha jemu cjín xuta nguehe cueya me cojo quicha, hacuaha jemu cjín xuta nguehe tsihñu xuta tsëhë jingu sa nación me sehe tsingatju me me yëjë ni nación. Hane xi cuatju vëhë ne, suvá xutaxín cjué nduva me sunesun me xcun nangui tsëhë nandya Jerusalén, hisca xi cjuë nixtin xi xuta xi cuacun vë cuitexa me nandya Jerusalén vi.

Xcusun xi cuma hya xi cuinduva nga Jesucristu

²⁵ Nixtin hya ne, hacuaha cuma tsejen cjuarcun xi cuma xcun tsuhi cojo sá cojo niñú. Hane nguehe ngasunhndë ne, jercu cjín tsingataha cacun xuta tsëhë yëjë ni nación, ña cuya sca me tsëhë xi jercu cjuane ndachacun, hacuaha jercu tsiquijin rë tsindyú rë.

²⁶ Yëjë xuta ne, ña cuma ndaya cacun me xi tsacun me, xi tsingataha cacun me tsëhë chircun xi cuma nguehe ngasunhndë ta, tsëhë xi hisca ngahñu xi yaja ngahnga ne, cjuiniyaya.

²⁷ Sehe hya scuëë xuta ngahan, xi Quihndi rë Xuta Jain ngahan, xi cuinduva ngajñi rë yufí cojo jemu jyë ngahñu, hisca setí hisca vatë jyihí ngahan xi cuinduva.

²⁸ Hya xi xcusun xi cuacun vë cuetsihin cuma ne, tisechun chutsujun ngahnga ta camatiña nixtin xi cuetjuntjun.

²⁹ Xi quijinduju sa cjuavisiajmi rë Jesús ne, cachja xu me ngu ejemplu vihi:

—Quihndë ne, ningatuhuntacún tsëhë yaxujún o sá yahnga sa ya xi vixu xca rë.

³⁰ Xi tu chun xi cuetjusehen ya xi cuacun vë ne, ha hyun ta ha camatiña chan tsi.

³¹ Hacuaha chuva vëhë ni ne, hya xi chun xi cuetsihin cuma yëjë xcusun xi cachjá cojo nuju vë ne, vëhë sua cumachaya nuju xi ha camatiña nixtin xi nduva Nina sahmi me gobiernu.

³² Cuichjá cojo nuju cjuaquixi ta ngayujun ni xi nechun nixtin vihi ne, hacuiin ngayujun caveyun chaja sa xi cuatju yëjë xcusun xi cachjá cojo nuju jan.

³³ Ngahnga cojo nguehe ngasunhndë ne, hatuxa cjuë. Peru hisca ngu cjuá naha ne, tsajin xi cuetjincaain.

³⁴ Nechun cuidado tsëhë xcusun xi nihñu. Xicatuun cahndë xi cjuatacun nuju ne, tsë rë cojo cjuatacun tsëhë cjuachihi, cojo cjuacjintacun tsëhë xcusun xi mameje nuju xcun ngasunhndë nuju, sá tu tsajin tjin chjine ngayun hya xi cuechú nixtin vëhë,

³⁵ sacuatjin tsajin tjin chjine ngu chu hya xi finenguusun rë chu chen. Vëhë xi nechun cuidado ta, tsëhë xi hatuxa cuechú nixtin vëhë, hya xi sahmi Nina gobiernu yëjë ni xuta jinguyjë ni ngasunhndë.

³⁶ Nechun cuidado. Yasen ni chjahyun rë Nina xi cuechú chuva rë xi cuetjuntjun tsëhë yëjë ni cjuacjintacun xi ha tu hora sa xi cuinduva. Hacuaha chjahyun rë Nina xi cuma cuetjunnudjun hora xi cuisechun xcún xi cjuaháchuva nuju cojo cjuatacun nuju, ngahan xi Quihndi rë Xuta Jain ngahan. —Cuatjin xu cachja Jesús.

³⁷ Nguinixtin ne, ndatsen yungun xi matitjun xu véjña Jesús vicuya me xuta. Hane nguixun ne, vetju xu me fi véjña me ndetjún xi hmí rë Ndetjún Olivu.

³⁸ Hane yëjë ni xuta ne, tajñu tajñu xu ni fi me yungun jan xi cuisñuju me cjuá xi vicuya Jesús.

22

Camachihin cjuá hacutjin xi chjahá rë Jesucristu

¹ Hya xi camá xu ne, camatiña suhi tsëhë pan xi hacuiin cojo san rë pan má, suhi xi hmí rë Pascua.

² Hane nahmi xi matitjun cojo cha vicuya cjuachacun ne, jemu tivangui xu me chuva rë hacutjin xi tsiquehen me Jesús. Peru táhahma xu tisahmi me xcusun vëhë ta, tsëhë xi tsacjun xu me xuta.

³ Hya xi camá xu ne, Satanás ne, cavisehen xu cahntsua xahasen rë Judas, cha xi hacuaha hmí rë Iscariote, ngu cha ngajñi rë me xi tejó xi má ladu rë Jesús.

⁴ Ngajan xi Judas jan ne, quiji cavisajmicjín xu cha cojo ngujo nahmi xi matitjun cojo ngujo cha mayu yungun hacutjin cuma xi cjuaha xuta xi cuacun vë Jesús.

⁵ Hane nahmi xi matitjun cojo mayu jan ne, jemu ndaja camá xu rë me, hisca caviyuju cacun me xi sua me cha tujún.

⁶ Hane Judas ne, cojo cjuatacun vëhë ne, camangu cacun cha, sehe ngajan xi cavangui xu cha ngu hora xi tsajin cjín xuta, xi sahmi cha entregadu Jesús cojo xuta xi cuacun jan.

Hacutjin cajinë Jesucristu tsëhë suhi rë Pascua

⁷ Cavechú xu nixtin tsëhë suhi rë pan xi hacuini cojo san rë pan má, nixtin hya xi meje rë xi cueya chu tsánga.

⁸ Sehe ngajan xi Jesús ne, catsingatju xu me Pedru cojo Juan ngu tixa, hane cuitjin xu cachja me:

—Tángun tuhunchjinu xi xinënguixuun tsëhë suhi. —Cuatjin xu cachja me.

⁹ Sehe ngajan xi me xi cuacun jan ne, cavinenguise xu me Jesús cuitjin:

—¿Hane jani meje nuju xi cuihinchjini ní? —Cuatjin xu cavinenguise me.

¹⁰ Hane Jesús ne, cuitjin xu cachja me:

—Chutsujun ní, xi cjuhun tjeheh nandya jan ne, ngajan cuechuntuhun ngu cha xi yaniji ngu nisa nandá, hane tánguntjengun cha hisca xi cjuhun ndihya hiscan cjuí cha,

¹¹ sehe tinújun cojo nai rë ndihya jan cuitjin: “Cuitjin cjuá xi catsingatju maestru tsujun: ¿Jarë cuarto xi tuhun, sehe ngajan sinë niñu tsëhë suhi cojo xuta ladu naha?” Cuatjin tinújun cojo rë me.

¹² Hane me vëhë ne, tsingacun nuju me ngu cuarto jyë xi tacun ngahnga hiscan xi ha tjin chjine ndihya. Hane ngajan tuhunchjinu xi xinë. —Cuatjin xu cachja Jesús.

¹³ Hane xi quiji me xi jo jan ne, cavetjucaa jain yëjë cjuá xi cachja Jesús cojo rë me. Hane ngajan cavëhëndaja xu me xi sinë nguixun Jesús cojo rë me tsëhë suhi.

¹⁴ Hane xi cavechú hora ne, cafaha xu Jesús cahndë rë me xcun maxë cojo xingu xingu apóstol.

¹⁵ Hane sehe cachja xu me cojo apóstol jan cuitjin:

—Jemu meje sinë cojo nuju comida tsëhë suhi vihi chaja sa xi cjehe cjuaveya naha ta,

¹⁶ tsëhë xi nguehe cuichjá cojo nuju ta ha quihndë tsajin nixtin xi cúa sinë nga comida tsëhë suhi vihi. Sinë nga, peru hisca hya xi cuinduva Nina sahmi me gobiernu ta, tsëhë xi cjuatacun xi vicuya naja suhi vihi ne, hya cuetjucaa jain. —Cuatjin xu cachja Jesús.

¹⁷ Hane xi cafahatsja xu me ngu vasu ne, sehe casua me nacuechji rë Nina, sehe cachja xu me cuitjin:

—Juhun vihi ne, sehe siuhun tsë tsë cojo xingun ta,

¹⁸ hacuaha cuichjá nga cojo nuju ta quihndë cojo nixtin xi cjuiniji sa ne, ha quihndë cuya cuéhë xan rë uva. Cuéhë, peru hisca hya xi cuinduva Nina sahmi me gobiernu. —Cuatjin xu cachja Jesús.

¹⁹ Hane xi cafaha me ngu niñutsju hacuaha casua me nacuechji rë Nina ne, sehe cavotocja xu me niñutsju jan. Hane xi casua rë me apóstol jan ne, sehe cachja xu me cuitjin:

—Vihi ne, yojo naha vi, xi tisuá xi cueya ngatsë nuju. Cuitjin nihñu xcusun vihi yasen ni, cojo sa xi nguitsjun ná. —Cuatjin xu cachja Jesús.

²⁰ Hane xi cajnetaha cajinë nguixun me ne, hacuanitjin xu ni casahmi me cojo vasu. Hora xi casua rë me apóstol ne, cuitjin xu cachja me:

—Xan vihi ne, vihi jni naha xi cuetju ngatsë nuju. Cuatjin xi cuma chihin compromisu xatsë xi tisahmi Nina cojo xuta.

²¹ Peru chutsujun ní, cha xi sahmi ná entregadu ne, nguehe tacun cha ngajñi naja.

²² Hane ngahan xi Quihndi rë Xuta Jain ngahan ne, hatuxa tjin ná xi cueya sacuatjin cavichaya Nina tsahan. Peru jemu chojyihí tsëhë cha xi sahmi ná entregadu. —Cuatjin xu cachja Jesús.

²³ Ngajan xi yëjë xu apóstol jan ne, cavetsihin cavinenguise xicjin me jarë me xi sahmi xcusun vëhë.

Yo xi hitsë sa matitjun

²⁴ Hya xi camá xu ne, cavetsihin sacuaaha xi meje scaanya me ngajñi rë me yo xi chja xuta xi hitsë sa matitjun.

²⁵ Ngajan xi Jesús ne, cuitjin xu cachja me:

—Yějě ni xuta xi matitjun ngeuhe ngasunhndě ne, jercu sahmi yehe me yojo rě me sacuaaha xi me vėhě má me nai rě xuta. Hacuaha jercu meje rě me xi yějě xuta ne, cuichja me xi jemu ndaja me xi matitjun vė.

²⁶ Peru ngayun ne, mijí rě xi cuatjin nihñu ta xi meje rě ne, ngu xi matitjun tsěhě ngajñi nuju ne, catitsinguijne yojo rě sacuaaha ngu xi chúva nu rě. Hane ngu xi vitexa tsěhě ngajñi nuju ne, hacuaaha catitsinguijne yojo rě sacuaaha ngu hndixahan.

²⁷ ¿Yo xi hitsě sa matitjun ni? ¿Há ngu xi tijině ne, o há tsajin ne, há ngu hndixahan xi cjuí caní comida? Xi tijině ne, hatuxa vėhě xi hitsě sa matitjun. Peru ngahan ne, tejña ngajñi nuju sacuaaha ngu hndixahan nuju.

²⁸ Ngayun ne, ngayun xi cacaa nuju cojo yějě cjuañihi xi cavatjuun camá.

²⁹ Vėhě xi sacuaaha casuaxa ná Nahmi naha xi ngahan sahme gobiernu ne, cuatjin suáxa nuju xi nihñu gobiernu,

³⁰ cojo sa xi ngayun ne, hacuaaha xinu siuhun cojo ná ngajan hiscan sahme gobiernu. Hacuaha suáxa nuju xi nichuvun cjuatacun rě yějě tejó tjě naja, ngayaan xi tjě rě xutachanga naja Israel gayaan. —Cuatjin xu cachja Jesús.

Casua Jesucristu camachaya rě Pedru xi cuichja me xi hvín me yo Jesucristu

³¹ Hacuaha cachja sa xu Jesús cuitjin cojo Pedru xi hacuaaha hmí rě me Simón:

—Chutsujun ni Simón. Satanás ne, casacu rě cahndě xi tsichuva cjuatacun nuju ngayujun ni.

³² Peru ngayun Simón ne, caféhya rě Nina ngatsě nuju, cojo sa xi hacuiin cumandaya tacún sacuatjin xi mangutacún cojo ná. Hane hya xi ngayun cuyun nga ndiya naha ne, tuhun ngahñu xingun. —Cuatjin xu cachja Jesús.

³³ Ngajan xi Pedru ne, cachja xu me cojo Jesús cuitjin:

—Tatá. Ngahan ne, tsingatehen cjué ndavaya cojo nuju hisca tsingatehen cueya cojo nuju. —Cuatjin xu cachja Pedru.

³⁴ Ngajan xi Jesús ne, cuitjin xu cafayangui me tsěhě Pedru:

—Ngeuhe cuichjá cojo nuju, Pedru. Chaja sa xi squihnda ngu xahnda ne, ha jyan ndiya canúun xi hyúun yo ngahan. —Cuatjin xu cachja Jesús.

Camatiña hora xi chjahá rě Jesucristu

³⁵ Hacuaha cachja me cojo xuta ladu rě me cuitjin:

—Hya xi catsingátju nuju xi cachjá cojo nuju xi chuun tujún, chuun changa hacuaaha chuun chuxinxte ne, ¿há quixi xi tsajin mé camachaja nuju? —Cuatjin xu cachja Jesús.

Hane xuta ladu rě me jan ne, cuitjin xu cachja me:

—Juun, tsajin mé. —Cuatjin xu cachja me.

³⁶ Hane Jesús ne, cachja nga xu me cuitjin:

—Peru quihndě ne, jaré ngayun xi tjin nuju tujún, tjin nuju changa ne, chuhun, tángun cojo. Hane yo xi tsajin rě ngu quichandujú ne, catiteña tsjanga rě ne, sehe catatsě ngu quichandujú.

³⁷ Cuatjin meje rě ta, tsěhě xi ngeuhe cuichjá cojo nuju ta hacutjin xi camahindu tsahan xcun xujun rě Nina ne, hatuxa tjin rě xi cuetjucaa, cjuá xi chja cuitjin: “Cuichja xuta tsěhě me xi ngu xuta tsehan me.” Cuatjin camahindu. Hatuxa cuetjucaa sacuatjin camahindu. —Cuatjin xu cachja Jesús.

³⁸ Sehe ngajan xi xuta ladu rě Jesús jan ne, cuitjin xu cachja me:

—Chutsujun ni, tatá. Ngeuhe ne, ha siu jo quichandujú. —Cuatjin xu cachja me.

Sehe ngajan xi Jesús ne, cuitjin xu cafayangui me:

—Cojo vėhě ne, ha cuma. —Cuatjin xu cachja me.

Casahmi Jesucristu oración rě me ngajan Ndetjún Olivu

³⁹ Hya xi camá ne, xi cavetju xu me tsěhě nandya Jerusalén ne, sacuatjin xi ha xcusun rě me ne, quiji xu me Ndetjún Olivu. Hacuaha cojo yějě xuta ladu rě me quiji xu me cojo rě me.

⁴⁰ Hane xi cafehe me jan ne, cachja xu me cojo xuta jan cuitjin:

—Chjahyun rě Nina xi hacuiin chjaháchuva nuju cojo cjuatacun nuju. —Cuatjin xu cachja me.

⁴¹ Hane xi quijixin me hitsě tsěhě xuta ladu rě me jan ne, sehe ngajan cavixcuhnchi xu me xi sahmi me oración rě me,

⁴² cuitjin xu cachja me:

—Ngayun Nahmi naha, sá mé ni xi meje nuju ne, chjuhunxun cjuañihi xi cuátju cuma vi. Peru catama sacuatjin xi meje nuju ngayun, hacuiin sacuatjin xi meje ná ngahan. —Cuatjin xu cachja me.

⁴³ Hya xi camá ne, cavėė xu me ngu ángel xi canduva tsěhě ngahnga, casua rě me ngahñu.

⁴⁴ Hane xi jemu jima ndaya cacun xu me ne, hitsë sa jercu cafehya rë me Nina. Hacuaha ndasueya xi cavetju rë me ne, sacuaha jni xu cún xi cavixu nangui.

⁴⁵ Hane xi cavisatjenhnga xu Jesús xi cajnetaha casahmi me oración rë me ne, xi cavuya quiji me hiscan siu xuta ladu rë me jan ne, casacutsja xu me xi siufë, ngatsë rë cjuachoho rë.

⁴⁶ Sehe ngajan xi Jesús ne, cuitjin xu cachja me cojo xuta jan:

—¿Mé má cuatjin tsjuñufun ni? Tisatjunhngun ne, nihñu oración nuju, sátu chjaháchuva nuju cojo cjuatacun nuju. —Cuatjin xu cachja Jesús.

Cafaha xuta Jesucristu

⁴⁷ Jínguyëjë rë xi tichja cuaha xu Jesús ne, ha tu ñahñu jercu cjin xuta cafehe me. Hane cha xi hmí rë Judas, ngu cha ngajñi rë me xi tejó xi má ladu rë Jesús jan ne, titjun xu cha xcun xuta cjin jan cjui cha. Hane xi cafehe cha jan ne, sehe quijitiña xu cha xi cuitatsuha cha Jesús xi sua cha me nina.

⁴⁸ Ngajan xi Jesús ne, cuitjin xu cachja me cojo cha:

—Judas, ¿há cuatjin cuitatsuhun ná xi nihñu ná entregadu, ngahan xi Quihndi rë Xuta Jain ngahan? —Cuatjin xu cachja me.

⁴⁹ Hane xi cajne rcu xuta xi siu cojo Jesús xcusun xi cuma jan ne, sehe cachja xu me cuitjin:

—Tatá. ¿Há cuijin rë me quicha? —Cuatjin xu cachja me.

⁵⁰ Hya xi camá xu ne, ngutjen cavaja ngu me jan cha hndixahan rë nahmi xi matitjun tsëhë yëjë ni nahmi, hane cavatësun xu me tyjavañuju quixi cha.

⁵¹ Hane ngajan xi Jesús ne, cuitjin xu cachja me:

—Camá ni. —Cuatjin xu cachja me.

Hane xi cavetahatsja xu me hiscan cati rë cha ne, camandaja xu cha casahmi Jesús.

⁵² Hane nahmi xi matitjun cojo cha mayu yungun xi matitjun cojo xutachanga, xi cafehe me xi cjuaha me Jesús ne, cachja xu Jesús cojo rë me cuitjin:

—¿Há nduvun chjuhun ná sacuaha ngu xuta xi chëjë me, xi cuatjin nduvun cojo ya cojo quicha vë ni?

⁵³ Xi cavitejñaya cojo nuju nchunchujun ni ndatsen yungun jan ne, cavetuhunntsuun ná. Peru quihndë cavechú hora xi casua Nina cahndë xi nihñu cojo ná tu mé ni xi meje nuju, cavechú hora xi Satanás cuitexa. —Cuatjin xu cachja Jesús.

Cachja Pedru xi hvín me yo Jesucristu

⁵⁴ Hya xi camá xu ne, xi cafaha xuta jan Jesús ne, quijicojo me me ndava nahmi xi matitjun tsëhë yëjë ni nahmi. Pedru ne, hacuaha tjengui xu me cjui me tu cjin tu cjin ni hacutjin cjui xuta jan cojo Jesús.

⁵⁵ Hane xi cafehe xu me jan ne, casahmi me ngu ndava ndihi ngajan ndatsen ndihya, sehe ngajan quiji me caviyuju tangun me. Hacuaha cojo xu Pedru quiji me cavëjña tangun me cojo xuta jan.

⁵⁶ Hane xi cavëë xu na hndixahan rë nahmi jan Pedru, tacun me xcun ndihi jan ne, xi cavutsejenndaja na me ne, sehe cachja xu na cuitjin:

—Me xi cuijyihí vi ne, cojo me tacun me cojo me xi cuajyihí vë hya. —Cuatjin xu cachja na.

⁵⁷ Hane Pedru ne, cavitijaya me cachja xu me cuitjin:

—Hveen yo vë. —Cuatjin xu cachja me.

⁵⁸ Xi cavatju nga ngu hora lihndi ne, xi cavëë nga ngu cha Pedru ne, cachja xu cha cuitjin:

—Ngayun ne, hacuaha ladu rë me xi cuacun vë má ngayun. —Cuatjin xu cachja cha.

Ngajan xi Pedru ne, cuitjin xu cachja me:

—¡yéya, hacuiin! —Cuatjin xu cachja me.

⁵⁹ Xi cavatju sacuaha ngu hora nga xu ne, cachja nga ngu cha xi tacun jan cuitjin:

—Ha cjuaquixindaja ta cha xi cuijyihí vi ne, cojo cha tacun cha cojo cha xi cuajyihí vë, tsëhë xi hacuaha cha Galilea cha. —Cuatjin xu cachja cha.

⁶⁰ Ngajan xi Pedru ne, cuitjin xu cafayangui me:

—Hveen mé xi nújun vë. —Cuatjin xu cachja me.

Hane ha tu tichja cuaha xu Pedru ne, ha tu ñahñu cajindaya ngu xahnda jan.

⁶¹ Ngajan xi Nai naja ne, cavuya vutsejen xu me Pedru. Hane Pedru ne, catsinguitsjen xu me cjuá xi cachja Nai naja cojo rë me, xi cachja me cuitjin: “Chaja sa xi squihnda ngu xahnda ne, hacuaha camá jyan ndiya nújun xi hyúun yo ngahan.” Cjuá vëhë xi catsinguitsjen xu Pedru.

⁶² Hane xi cavetju xu me candatsen ne, cajihnda susu me.

Catsixcuehyu xuta Jesucristu

⁶³ Hane cha xi siutahá sahmi cuidadu rë Jesús jan ne, titsixcuehyu xu cha me hacuaha tivaja cha me.

⁶⁴ Hane xi cavetsa xu cha tuxcun me ne, sehe cavaja sa cha me, sehe cachja xu cha cuitjin: —¡Tinoje! ¿Yo xi tivaja ri? —Cuatjin xu cachja cha.

⁶⁵ Hacuaha jemu cjin sa xu cjuacachja cha xi choho chja cha tsëhë me.

Casahmicuenda xuta xi matitjun jyë rë Jesucristu

⁶⁶ Hane xi camá nchujun jan ne, camatangun xu xuta changá tsëhë nandya jan cojo nahmi xi matitjun cojo cha xi vicuya cjuachacun. Sehe quiji chani xu rë Jesús xcun xuta xi cuacun jan xi chjahácuenda rë jyë rë me.

⁶⁷ Hane xi cafehe Jesús jan ne, sehe cavinenguise xu xuta jan cuitjin:

—Sá xi ngaye xi catsingatju Nina ngaye ne, tinoje cojo niji. —Cuatjin xu cavinenguise xuta jan.

Sehe ngajan xi Jesús ne, cuitjin xu cafayangui me:

—Sá xi cuichjá cojo nuju ne, hatuxa cumacjaain nuju xi cuichjá.

⁶⁸ Hacuaha sá xi cjuinenguësë nuju ngu cjuacachja ne, hatuxa chjayunnguun tsahan.

⁶⁹ Peru cuetsihin cojo quihndë ni ne, ngahan xi Quihndi rë Xuta Jain ngahan ne, cuitejña ladu quixi tsëhë Nina, me xi jemu hñu ngahñu rë. —Cuatjin xu cafayangui Jesús.

⁷⁰ Ngajan xi yëjë ni xuta jan ne, cavinenguise xu me Jesús cuitjin:

—¿Há ngaye xi Quihndi rë Nina ngaye ni? —Cuatjin xu cavinenguise me.

Hane Jesús jan ne, cuitjin xu cafayangui me:

—Sacuatjin nújun vë ne, cuatjin jain. —Cuatjin xu cafayangui Jesús.

⁷¹ Ngajan xi xuta xi cuacun jan ne, cuitjin xu cachja me cojo xicjin me:

—¿Mé sa nihña xuta xi tsinguixi me jyë rë cha? Ha canuhyaan suvaan xi hntsua cha cavetju xi cachja cha. —Cuatjin xu cachja xuta.

23

Cavisehen Jesucristu xcun Pilatu

¹ Hya xi camá ne, cavisatjenhnga yëjë xu xuta xi matitjun jan ne, sehe quijicojo me Jesús xcun Pilatu.

² Hane cavetsihin xu cavinchajyë me cuitjin:

—Casacuntsin cha xi cuijyihí vi tiviseccjan cha cjuatacun rë xuta. Hacuaha mijí rë cha xi cuechjin tujúnsa niji cojo César, me xi matitjun. Hacuaha chja sa cha ta hacui cha xi catsingatju Nina cha, hacuaha matitjun xu cha. —Cuatjin xu cachja me xi cavinchajyë me Jesús.

³ Sehe ngajan xi Pilatu ne, cavinenguise xu me Jesús cuitjin:

—¿Há ngaye xu matitjun ngaye tsëhë xuta tjë rë Israel? —Cuatjin xu cavinenguise Pilatu.

Hane Jesús ne, cuitjin xu cafayangui me:

—Cuatjin sacuatjin nújun vë. —Cuatjin xu cafayangui me.

⁴ Ngajan xi Pilatu ne, cuitjin xu cachja me cojo nahmi xi matitjun cojo yëjë xutacjin jan:

—Sacuiin ná hisca ngu jyë rë cha xi cuijyihí vi. —Cuatjin xu cachja Pilatu.

⁵ Peru quijinduju sa xu cachja xuta xi matitjun jan cuitjin:

—Jemu tiviseccjan cha cjuatacun rë xuta ngatsë rë cjuacachja xi tivicuya cha jingujyë ni distritu Judea vi. Cavetsihin cha hisca ngajan distritu Galilea, hisca gueuehe cafehe cha. —Cuatjin xu cachja me.

Cavisehen Jesucristu xcun Herodes

⁶ Hane xi cahndë Pilatu cjuacachja vëhë ne, sehe cavinenguise xu me xuta jan cuitjin:

—¿Há cha Galilea cha xi cuijyihí vi ni? —Cuatjin xu cavinenguise me.

⁷ Hane xi casacu xu rë Pilatu cjuacachja xi hiscan xi vitexa Herodes canduva Jesús ne, sehe catsingatju xu Pilatu me xcun Herodes, tsëhë xi Herodes ne, hacuaha quitahá xu me ngajan Jerusalén nixtin hya.

⁸ Hane hya xi cavëë Herodes Jesús ne, jemu ndaja camá xu rë me, tsëhë xi ha titjun sa ne, jemu meje scuëë me Jesús, tsëhë xi ha machaya rë me cjuacachja tsëhë Jesús, hacuaha meje scuëë xu me xi sahmi Jesús ngu cjuaracun.

⁹ Hane jercu cjin cjuachjinenguise casahmi xu me Jesús, peru Jesús ne, tsajin camahani mé xi cafayangui xu me.

¹⁰ Hane nahmi xi matitjun cojo cha xi vicuya cjuachacun ne, jemu tivincha xu me jyë rë Jesús.

¹¹ Ngajan xi Herodes cojo sindadu rë me ne, jemu casahmixta xu me cojo Jesús, hacuaha catsixcuehyu me me. Hane xi catsicaja xu me Jesús ngu tsjian xi jemu ndajyihí camahani ne, sehe cavuya catsingatju nga xu me Jesús xcun Pilatu.

¹² Hane nixtin hya ne, Herodes cojo Pilatu ne, jemu cavinga xu rē me xicjin me, handasa titjún xu ne, maji vēē xicjin me.

Camá entregadu Jesucristu xi cjue cueya me

¹³ Hya xi camá ne, xi casahmitangun xu Pilatu nahmi xi matitjun cojo xutaxa rē cojo xuta nandya ne,

¹⁴ sehe cachja xu me cojo cuitjin:

—Ngayujun ni matsejen ne, canduvuncujun cha xi cuijyih vi nguehe matsejen, tsēhē xi xi má nuju matsejen ne, tiviseccjan cha cjuatacun rē xuta. Peru quihndē matsejen ne, chutsujun ta, xcún ni matsejen ne, cafahátaha rē cha, peru casacuiin ná hisca xi ngu jyē rē cha sacuatjin jyē xi cavinchun.

¹⁵ Hacuanitjin ni Herodes matsejen ta, casacuiin rē me jyē rē cha, vēhē xi catsicuya nga me cha. Chutsujun ta tsajin camahani mé casahmi cha xi vechú chuva rē xi niquen cha.

¹⁶ Vēhē xi cuitéxa sehen ni rē cha matsejen ne, sehe tsisme cha. —Cuatjin xu cachja Pilatu.

¹⁷ Hatuxa xcusun xu rē Pilatu xi tsismi me ngu presu xi xuta vaxijin me nu nu ni nixtin rē suhi.

¹⁸ Peru yējē ni xuta xi matitjun jan ne, ngu tangun ni camá xu me cajindaya me cachja me cuitjin:

—¡Nicuhun cha vi ne, Barrabás nismu cha! —Cuatjin xu cajindaya me.

¹⁹ Cha Barrabás ne, quiji cha ndavaya ngatsē rē xi casahmi xu cha ngu si cojo xutaxa rē, hacuaha catsiquehen xu cha.

²⁰ Peru ngu ndiya nga cachja xu Pilatu cojo xuta xi matitjun jan, tsēhē xi Pilatu ne, meje tsismi me Jesús.

²¹ Peru xuta xi matitjun jan ne, cavuya cajindaya nga me cachja xu me cuitjin:

—¡Tetuhun cha, tetuhun cha xcun cru! —Cuatjin xu cajindaya me.

²² Hane xi ma jyan ndiya ne, cavinenguise xu Pilatu xuta xi matitjun jan cuitjin:

—Peru ¿mé xi jemu choho casahmi cha ni? Tsajin camahani mé jyē rē cha casacu ná xi vechú chuva rē xi niquen cha. Vēhē xi cuitéxa sehen ni rē cha matsejen ne, sehe tsisme cha. —Cuatjin xu cachja Pilatu.

²³ Peru yējē ni xuta xi matitjun jan ne, quijinduju sa xu cajindaya me cafehya me xi setaha Jesús xcun cru. Vēhē xi cajne cacun xu Pilatu,

²⁴ hacuaha cavejña cacun xu me xi sahmi me hacutjin xi fehya xuta jan.

²⁵ Hya xi camá ne, catsismi xu me cha xi cafehya xuta xi matitjun jan, ngu cha xi quiji ndavaya tsēhē xi casahmi xu si cojo xutaxa rē hacuaha catsiquehen xu cha. Peru Jesús ne, casua xu Pilatu me xi cjue cueya me, sacuatjin meje rē xuta xi matitjun jan.

Casetaha Jesucristu xcun cru

²⁶ Hane xi cjuicojo sindadu Jesús ne, ngajan ndiya jan cavechútaha xu cha ngu me xi hmí rē Simón tsēhē nandya Cirene, xi nduva xu me quiji me nguijnā. Hane cafaha xu sindadu jan me, catsicaniji xu cha me cru xi cjue me cojo hacutjin cjuí Jesús.

²⁷ Hane jercu cjin camaha xu ni xuta quiji me cojo Jesús hacuaha jercu cjin xu yachjin xi hisca chja hisca jihnda na xi jemu choho má rē na ngatsē rē Jesús quiji xu na cojo me.

²⁸ Hane xi cavuya Jesús cavutsejen me na ne, sehe cachja xu me cuitjin:

—Ngayun na quihndi nandya Jerusalén, xicachjihnduun ngatsē naha. Chjihndun ngatsē nuju suvun cojo ngatsē rē quihndi nuju ta,

²⁹ cuechú nixtin xi cuichja xuta cuitjin: “Jemu ndaja tsēhē yachjin xi hatuxa maji sacu rē na quihndi; jemu ndaja tsēhē yachjin xi hisca ngu quihndi casacuiin rē na; hacuaha jemu ndaja tsēhē yachjin xi casacuiin quihndi catsicha na.” Cuatjin cuichja xuta.

³⁰ Nixtin hya ne, hacuaha cuichja xuta cojo ndetjún cuitjin: “Tjinengunsun niji.” Hane naxi ne, cuitjin cuichja me cojo: “Tatsun niji.” Cuatjin cuichja me ta,

³¹ sá xi cuitjin choho tisahmi xuta vi cojo ná quihndē, ngahan xi tangun ngahan sacuaha ngu ya xcuen ne, hatuxa hitsē sa choho sahmi me cojo nuju nchujun ni nguini, ngayun xi tangun ngayun sacuaha ngu ya quixí. —Cuatjin xu cachja Jesús.

³² Hacuaha cojo sa xu jo cha tsehen quijicojo sindadu jan cha, xi tsiquehen tangun cha cha cojo Jesús.

³³ Hane xi cafehe cha cojo Jesús hiscan xi hmí rē Nínda Rcuun ne, ngajan cavetaha xu cha Jesús xcun cru hacuaha caviyujutaha sa cha catsijo cha tsehen jan xcun cru rē cha. Ngu cru xi quitahá ngu cha ne, casecun xu táha xcun tsēhē Jesús, hane ngu nga ne, táha quixí.

³⁴ Ngajan xi Jesús ne, cachja xu me cuitjin:

—Ngayun Nahmi naha. Ninchatuhun rē xuta vi ta, hvíin me mé xi tisahmi me. —Cuatjin xu cachja Jesús.

Hane xi cuatēcja sindadu tsjian rē Jesús jan ne, cavaxē xu cha ngu suerte.

³⁵ Hane xutacjín jan ne, caxinchacun xu me cavutsejen me xcusun xi tijima jan. Hacuaha xutaxa rë jan ne, cavejnucëë me Jesús, cuitjin xu cachja me:

—Cavaxëtje cha jingu sa xuta. Quihndë ne, cataxëtje suvá cha yojo rë cha, sá xi hacui jain cha xi cavaxijin Nina hacuaha catsingatju me. —Cuatjin xu cachja xutaxa rë.

³⁶ Hacuaha sindadu jan ne, catsixcuehyu xu cha Jesús. Quijitiña cha hiscan tyjanguí me xcun cru, hane meje sua xu cha xan yufa cuihi me,

³⁷ sehe cachja xu cha cuitjin cojo rë me:

—Sá xi ngaye jain matitjun ngaye tsëhë xuta tjë rë Israel ne, naxetje sove yojo riji. —Cuatjin xu cachja cha.

³⁸ Hacuaha camahindu xu ngujo cja rcu cru rë Jesús xi chja cuitjin: “Matitjun cha vihi tsëhë xuta tjë rë Israel.” Cuatjin xu camahindu. Jyan hne camahindu cja xi cuacun vë: hne griego cojo latin cojo hebreo.

³⁹ Hane ngu cha tsehen xi cojo casetaha xcun cru jan ne, cuitjin xu choho cachja cha tsëhë Jesús:

—¿Hacuiin ngaye xi catsingatju ri Nina ni? ¡Naxetje sove yojo riji ne, hacuaha naxetje niji! —Cuatjin xu cachja cha.

⁴⁰ Hane xi cavatëcja xu cha xingu jan cja rë cha xi choho chja tsëhë Jesús ne, cuitjin xu cachja cha:

—¿Há rcuiin Nina, quihndë xi tivatjun castigu sacuatjin tivatju me vëhë tijima?

⁴¹ Ngayaan ne, cojo cjaquixi xi tivatjun tijima ta, ngatsë rë xcusun xi canihña ne, vëhë xi vechú chufa rë xi cuitjin tivatjun castigu. Peru me vihi ne, tsajin mé xi jemu choho casahmi me. —Cuatjin xu cachja cha.

⁴² Sehe cachja xu cha cojo Jesús cuitjin:

—Jesús, ninguitsjun ná hya xi cuinduvun nihñu gobiernu. —Cuatjin xu cachja cha.

⁴³ Hane Jesús ne, cuitjin xu cafayangui me:

—Cuihjá cojo nuju cjaquixi ta ha cojo quihndë ni ne, cuinechun cojo ná ngajan cahndë ndajyihí hiscan xi hmí rë Paraíso. —Cuatjin xu cafayangui Jesús.

Xcusun xi camá hya xi cahme Jesucristu

⁴⁴ Hane hora vëhë ne, camajñu xu jingujyë ni. Cavetsihin xi camanchisen ne, quiji cani rë hisca fane jyan,

⁴⁵ tsëhë xi tshu ni, ha quihndë casuaain xu ndavá rë. Hacuaha ngajan cahntsua yungun xi matitjun, tsjian xi vitechja rë tingotjo rë Ndava Nina ne, catiyavasen xu.

⁴⁶ Hya xi camá ne, jercu hñu camaha xu ni cachja Jesús cuitjin:

—Ngayun Nahmi naha. Ntsun cuejñá hasen naha. —Cuatjin xu cachja me.

Hane xi cavatju cachja me cuatjin ne, cahme xu me.

⁴⁷ Hane ngu capitán xi secun tiña xu jan ne, xi cavëë cha xcusun xi camá jan ne, casahmi jyë casahmi hnga cha Nina, cachja xu cha cuitjin:

—Quixi jain xi cha xi cuijyihí vi ne, tsajin jyë rë cha. —Cuatjin xu cachja cha.

⁴⁸ Hane yëjë ni xutacjín xi camatangun me xi scutsejen xu me xcusun jan ne, xi cavatju cavëë me yëjë xcusun xi camá jan ne, cavuya me café xu me, ña yaha xu me rcu me ngatsë rë cjuachoho rë me.

⁴⁹ Peru yëjë ni xuta xi cavinga xu rë Jesús cojo yëjë yachjin xi cavetju me tsëhë distritu Galilea cojo Jesús ne, tsëhë cjin ni hinchacun cuaha xu me tivutsejen me xcusun xi tivatju Jesús.

Caseya nima Jesucristu cahntsua tsjun

⁵⁰ Hane tacun ngu xu me xi hmí rë José, ngu xuta nandya Arimatea, ngu nandya rë xuta tjë rë Israel. Me vëhë ngu xihin ndaja me hacuaha tsajin xu mé jyë rë me tjin.

⁵¹ Hacuaha cachuyiin xu rë me sacuatjin caviyuju xutaxa rë xi yahnga jan cjuatacun rë me cojo xcusun xi casahmi me. Hacuaha José jan ne, jemu meje xu rë me xi cuinduva Nina sahmi me gobiernu.

⁵² Ngajan xi me vëhë ne, quiji xu me xcun Pilatu, hane caféhya xu me nima Jesús.

⁵³ Hane xi casacu cahndë ne, quiji catsitujne me, sehe cavaxtë xu me ngu tsjian. Hya xi camá ne, quiji caveya xu me cahntsua ngu tsjun xi catjuhngui rë taha naxi, hacuaha hisca ngu xu nima cjëë seyaniji.

⁵⁴ Nixtin hya ne, vispra xu. Ha hisca meje cuechú xu hora xi cuisehen nixtin xi chjahájenda rë.

⁵⁵ Hane yachjin xi cojo xu me cavetjutangun me cojo Jesús ngajan Galilea ne, tjengui xu me quiji me cojo nima. Hane cavëë me tsjun hacuaha cavëë xu me hacutjin caseya nima.

⁵⁶ Hane xi cavuya me ne, cavëhëchjine xu me rqui cojo aceite xi ndaja jne tsëhë nima.

Hane xi camá nchujun jan, xi cavechú xu nixtin xi chjahájenda rë ne, caviyujuyuu xu me, sacuatjin vitexa ley rë Moisés.

24

Cavuya Jesucristu cjuahñu

¹ Peru tu casahasen ni tsêhê nixtin ngu tsêhê totje ne, yachjin jan ne, cavuya quiji nga xu me xcun tsjun jan hacuaha cavaha xu me rqúi xi ha cavêhêchjine me jan.

² Hane xi cafehe me jan ne, cavêë xu me xi ndyojo xi cavechja rê tingotjo rê tsjun jan ne, ha canivahaxin rê.

³ Hane xi cavisehen me cahntsua tsjun jan ne, cavêë xu me xi tsajin nima Nai naja Jesús.

⁴ Hane jinguyêjê rê xi sacuiyini rê me mé sahmi me ne, ha tu ñahñu camatsejen xu jo ángel jan, xi jercu tu setí camaha xu ni tsjian rê.

⁵ Hane xi jemu catsacjun me camá ne, catsiquindi xu me xcun me. Sehe ngajan xi ángel jan ne, cuitjin xu cachja cojo rê me:

—¿Mé má ngajñi rê nima vinchunsun me xi quicun?

⁶ Me vêhê ne, tsajin me nguehe ta cavuya me cjuahñu. Ninguitsjun hacutjin cachja me cojo nuju hya xi tacun cuaha me ngajan Galilea,

⁷ hya xi cachja me xi me xi Quihndi rê Xuta Jain ne, hatuxa tjin xi cuma me entregadu tsja xuta tsehen, sehe cueya me xcun cru, hane xi cuma jyan nixtin ne, cuya nga me cjuahñu. —Cuatjin xu cachja ángel jan.

⁸ Sehe ngajan xi yachjin jan ne, catsinguitsjen xu me cjuá rê Jesús.

⁹ Hane xi cavuya me xi quiji me xcun tsjun jan ne, quiji casua xu me camachaya rê xuta ladu rê Jesús xi tengu jan cojo yêjê sa me xi yahnga tsêhê yêjê ni hacutjin cavatju me camá.

¹⁰ Quihndê ne, yachjin xi casua camachaya rê apóstol jan ne, hacui xu na María na Mágdala cojo na Juana cojo na María naa rê Jacobo cojo sa yachjin xi yahnga.

¹¹ Peru apóstol jan ne, xi má xu rê me ne, suvá cjuangarca xi chja yachjin jan, vêhê xi camacjain xu rê me.

¹² Peru Pedru ne, vangasani xu me quiji me hiscan tacun tsjun jan. Hane xi cafehe me jan ne, catsiquindi xu me yojo rê me, sehe cavutsejenya xu me cahntsua tsjun jan ne, hane cavêë xu me suvá tsjian jan siu. Sehe cavuya cafe xu me. Jercu quijircun xu rê me tsêhê xcusun xi camá jan.

Ndiya Emaús

¹³ Hya xi camá ne, ha nixtin hya xu ni ne, jo cha ladu rê Jesús jan ne, cavetju xu cha quiji cha ngu nandya xi hmí rê Emaús, xi tacun sacuaaha chuva rê tengu kilómetro tsêhê Jerusalén.

¹⁴ Hane ndiya cjuí cha jan ne, cavisiajmi xu cha ngajñi rê cha tsêhê yêjê xcusun xi camá.

¹⁵ Hane jinguyêjê rê xi tivisiajmi cha jan ne, cavechútaha xu Jesús cha, hane quijitangun xu me cojo cha.

¹⁶ Peru handasa vutsejen cha me ne, casuaain xu Nina cahndê xi scuêë cha xi hacui me.

¹⁷ Sehe ngajan xi Jesús ne, cavinenguise xu me cha cuitjin:

—¿Mé cjuá xi tivisiajmu xi táha tivangun? —Cuatjin xu cavinenguise me.

Hane cha xi cuacun jan ne, caxinchacunhñu xu cha, hacuaha jemu va tjin cacun cha.

¹⁸ Hane ngu cha xi cuacun jan xi hmí rê Cleofas ne, cachja xu cha cojo Jesús cuitjin:

—¿Há ngu tu tu ngayun xi nechuntuhun nguehe Jerusalén xi cuatjin hyúun mé xi sehe cavatju camá ni? —Cuatjin xu cachja cha cojo Jesús.

¹⁹ Sehe ngajan xi Jesús ne, cuitjin xu cachja me cojo cha:

—¿Mé xcusun jan? —Cuatjin xu cachja me.

Hane cha xi cuacun jan ne, cuitjin xu cachja cha:

—Xcusun xi cavatju ngu me xi hmí rê Jesús camá, ngu me xi canduva tsêhê nandya Nasaret. Me vêhê ne, xi camá rê Nina cojo xi camá rê yêjê ni xuta ne, ngu profeta me, xi jemu tjin rê me ngahñu xi casahmi me yêjê ni xcusun xi casahmi me, hacuaha xi cavicuya me yêjê ni cjuá xi cavicuya me.

²⁰ Hacuaha nahmi xi matitjun cojo xutaxa rê yungun naja ne, casahmi me entregadu me vêhê cojo xutaxa rê Roma xi cueya me. Hane cuaha jain tjin cavetaha me xcun cru.

²¹ Ngayin ne, ha cavetihin tacuin xi me vêhê xi cuaxêtje naja me ngayejen ni ngayaan xuta tjê rê Israel. Cojo yêjê sa ne, quihndê ne, ha camá jyan nixtin cavatju xcusun xi cuacun vê.

²² Hacuaha ngujo yachjin tsêhê ladu niji ne, catsisca na cjuatacun niji, tsêhê xi xati sa nguítajñu ne, quiji xu na xcun tsjun,

²³ hane xi casacuiin rê na nima ne, cafehe cachja na cojo niji xi cavêë na sacuaaha ángel ngajan, hane cachja cojo rê na xi me vêhê ne, tacun me cjuahñu.

²⁴ Hya xi camá ne, ngujo cha xi siu cojo niji ne, quiji cha xcun tsjun jan, cavêë cha xi quixi jain cjuá xi cachja na, peru me vêhê ne, cahviin cha me. —Cuatjin xu cachja cha cojo Jesús.

²⁵ Sehe ngajan xi Jesús ne, cuitjin xu cachja me cojo cha:

—Ngayun yuma hasen, ngayun xi jemu tafi sehe macjain nuju yêjê cjuá xi cachja profeta.

²⁶ ¿Hacuiñ hatuxa casahmi ngujoyé xi me xi catsingatju Nina ne, cuatjin cavatju me cjuañihi, sehe camajyé camahnga me cojo hasen ndajiyihi rë me? —Cuatjin xu cachja Jesús.

²⁷ Hane sehe ngajan xi Jesús ne, casuacuenda xu me cha mé vijne yějé ni cjua xi camahindu tséhë me xcun yějé ni xujun rë Nina, cavetsihin me cojo cjua xi catsihindu Moisés, hane cajnetaha me cojo hisca cjua xi catsihindu yějé sa profeta.

²⁸ Hya xi camá ne, xi camatiña xu cha cojo Jesús nandya hiscan cjui cha jan ne, Jesús ne, casahmi xu me sacuaaha xi cjuenduju sa me.

²⁹ Peru cha xi cuacun jan ne, jercu cjín xu cachja cha cojo rë me cuitjin:

—Tinechun cojo niji ta quihndé ne, ha quiji hora hacuaaha hisca meje cjuë nixtin. —Cuatjin xu cachja cha.

Ngajan xi Jesús ne, quiji xu me cojo cha, hane cavisehan me ndava cha xi cuejña me cojo cha.

³⁰ Hane xi ha cafaha me cahndé rë me xcun maxé xi siné me niñu cojo cha ne, sehe cafaha xu me ngu niñu, hane casua me nacuechji rë Nina, sehe cavatélanga me, casua xu me cha.

³¹ Hane hora vëhé xu casua Nina cahndé xi camá cavëë cha xi hacui Jesús. Hya xi camá ne, ha tu ñahñu caféya xu me.

³² Hane sehe cachja xu cha ngajñi rë cha cojo xicjin cha cuitjin:

—Jercu ndaja camahani camá rë xahasen naja, hora xi tichja me cojo naja ngajan ndiya jan mé vijne cjua xi hincha xcun xujun rë Nina! —Cuatjin xu cachja cha cojo xicjin cha.

³³ Hane hora vëhé ni ne, cavisatjenhnga xu cha tséhë maxé jan, sehe cavuya quiji cha Jerusalén. Hane xi cafehe cha jan ne, casacutsja xu cha me xi tengu jan, tjintangun me cojo me xi yahnga sa.

³⁴ Hane sehe cachja xu me cojo cha cuitjin:

—Quixi jain xi cavuya Nai naja cjuahñu, hacuaaha cha Simón ne, cavëë cha me. —Cuatjin xu cachja me.

³⁵ Ngajan xi cha xi cuacun jan ne, casuacuenda xu cha hacutjin cavatju cha camá ngajan ndiya, hacuaaha hacutjin camá cavëë cha xi hacui Jesús hya xi cavatélanga me niñu.

Cafehe Jesucristu hiscan tjin tangun xuta ladu rë me

³⁶ Hane tu tichja cuaha xu cha xi cuacun jan cojo me vëhé cjua jan ne, ha tu ñahñu cavëë xu yějé me Jesús, secun me ngajñi rë me. Hane Jesús ne, cachja xu me nina cojo rë me cuitjin:

—Nina sua nuju me cjuandaja cjuajeya. —Cuatjin xu cachja me.

³⁷ Hane yějé xuta ladu rë Jesús jan ne, jemu catsacjun camaha xu ni me camá tséhë xi xi má rë me ne, tivutsejen me ngu hasen.

³⁸ Ngajan xi Jesús ne, cachja xu me cuitjin:

—¿Mé má cuatjin jemu fircun nuju? Hacuaaha ¿mé má cuatjin mangu majo tacún?

³⁹ Chutsujun ntsa cojo ntsacú ta ngahan ví. Nduvun tetuhun ntsun ná, hacuaaha chutsujun ná ta ngu hasen ne, tsajin yojo rë hacuaaha tsajin nında rë sacuatjin chutsujun ná ngahan cojo yojo cojo nında naha. —Cuatjin xu cachja Jesús.

⁴⁰ Hane xi cavatju cachja me cjua vëhé ne, sehe catsingacun xu me tsja me cojo ntsacu me.

⁴¹ Hane xuta ladu rë Jesús jan ne, hisca maji xu macjain rë me ngatsé rë xi jercu tu ndaja má camahani rë me hacuaaha hisca fircun rë me. Ngajan xi Jesús ne, cavinenguise xu me xuta jan cuitjin:

—¿Há tjin nuju hitsé xi xinëë nguehe? —Cuatjin xu cavinenguise me.

⁴² Hane ngu me jan ne, casua xu me ngu rquí ti camatsju.

⁴³ Hane xi cafaha me ne, cajiné xu me xcun yějé ni xuta.

⁴⁴ Sehe cachja xu me cuitjin:

—Yějé xcusun xi cavátju camá ne, tséhë vëhé cjua xi cachjá cojo nuju hya xi tejña cuaha ngajñi nuju. Cachjá cojo nuju ta hatuxa meje rë xi cuetjucaa yějé hacutjin camahindu tsahan xcun xujun xi catsihindu Moisés cojo xcun xujun xi catsihindu profeta, cojo xcun xujun tséhë Salmo. —Cuatjin xu cachja Jesús.

⁴⁵ Sehe ngajan xi Jesús ne, cavuxaha xu me cjuatacun rë xuta jan, cojo sa xi cuijnercu me cjua xi camahindu xcun xujun rë Nina.

⁴⁶ Hacuaaha cachja xu me cuitjin:

—Cuitjin camahindu xi me xi catsingatju Nina ne, hatuxa cuatju me cjuañihi, hane xi cjuë jyan nixtin xi cueya me ne, cuya nga me cjuahñu,

⁴⁷ hacuaaha sacú cumachaya rë yějé ni xuta tséhë ngasunhndé xi sá xi mangucacun me cojo me vëhé hacuaaha tsindeya me cjuatacun rë me ne, tsinchataha Nina me tséhë jyé rë me. Jerusalén ví ne, nguehe cuetsihin cuitsojo cjua vëhé.

⁴⁸ Ngayun cuinújun cojo xuta cjua vihi ta ngayun xi cahyun hacutjin camá.

⁴⁹ Chutsujun ni, ngahan tsingátju nuju Hasen xi ha cachja Nahmi naha xi sua nuju me. Peru ha tinechun ni nguehe nandya vihi hisca xi chjuhunntsun Hasen vèhè, xi cuinduva hisca ngahnga. —Cuatjin xu cachja Jesús.

Quiji Jesucristu ngahnga

⁵⁰ Hya xi camá ne, cavaxèxin xu Jesús xuta ladu rë me tsèhè nandya Jerusalén, quijicojo me me hisca nandya Betania. Hane xi cafehe me jan ne, catsiquijin xu Jesús tsja me hane catsinchacun me xuta jan.

⁵¹ Hane ngajñi rë xi titsinchacun me xuta jan ne, cavetjuxin xu me quiji me ngahnga.

⁵² Hane xuta ladu rë Jesús jan ne, xi cavatju cafaharcun me Jesús ne, sehe cavuya nga xu me Jerusalén cojo jemu jyë cjuasua.

⁵³ Hacuaha nchunchujun ni quiji xu me yungun xi matitjun, vaxëndaja me Nina.

Cjuandajyihî xi catsihindu San Juan Tsêhê Jesucristu

¹ Ntsacu cavetsihîn ngasunhndê ne, ha tacun ngu me xi hmî rê Cjua. Me vêhê ne, tacun me cojo Nina, hacuaha Nina me.

² Me vêhê ne, hisca ntsacu cavetsihîn ne, ha cuatjin tacun me cojo Nina.

³ Yêjê ni xi tjin ne, cojo me vêhê catsindaja Nina. Tsajin mé xi camandaja xi cuajin me vêhê camandaja.

⁴ Me vêhê xi hatuxa tjin rê me cjuahñu, hane cjuahñu vêhê ne, vêhê sua cjuahasen xi cuma rê xuta.

⁵ Hane cjuahasen vêhê ne, vitsojo ngajñi rê cjuatsehen sacuatjin sahmi hasen ngu ndihî ngajñi jñu, peru cjuatsehen ne, cacaaîn rê catsicjê rê cjuahasen jan.

⁶ Cavêjña ngu me xi hmî rê Juan, xi Nina catsingatju rê.

⁷ Me vêhê ne, cavetjujñi me xi cuichja me cojo xuta hane tsinguixi me tsêhê cjuahasen jan, cojo sa xi ngatsê rê cjua xi cuichja me ne, cumacjain rê yêjê ni xuta.

⁸ Hacuîin me vêhê xi cjuahasen jan me ta me vêhê ne, cavetjujñi me cojo sa xi cuichja me tsêhê cjuahasen jan.

⁹ Cjuahasen xi cjuaquixi jan ne, xi visehen ngajñi rê cjuatacun rê yêjê xuta ne, sehe canduva nguehe ngasunhndê.

¹⁰ Me xi hmî rê Cjua jan ne, cavêjña me ngasunhndê. Hacuaha handasa cojo me xi catsindaja Nina ngasunhndê ne, peru xuta ne, hvîin me yo.

¹¹ Canduva me ngasunhndê rê suvá me, peru xuta nangui rê suvá me ne, cafahatsjaain rê me.

¹² Peru ngu jo xuta nangui rê me xi cafahatsja rê me hacuaha camangu cacun cojo rê me ne, me xi Cjua jan ne, casua me chuva rê xi cuma xuta xi cuacun jan quihndi rê Nina.

¹³ Xuta xi cuacun jan ne, hacuîin camá me quihndi rê Nina chuva rê xi meje rê ngu xihîn ngu quihndi ta suvá Nina casahmi me xi camá xuta xi cuacun jan quihndi rê me.

¹⁴ Me xi Cjua jan ne, camá me ngu xuta, hacuaha cavêjñacahndê me ngajñi niji. Hatuxa quitsê rê xahasen rê me cjuandaja, quitsê rê xahasen rê me cjuaquixi. Ngayin ne, cahyîn hacutjin xi jemu jyê hnga me cojo hasen rê me. Jyê hnga me sacuatjin casahmi rê me Nahmi rê me.

¹⁵ Juan Vitenda rê Xuta ne, cachja me cojo xuta tsêhê me xi Cjua jan, cuitjin cachja me:

—Me vihi xi cachjá tsêhê, xi me xi sehe cuinduva ne, handasa ngahan canduvá titjun ne, peru me vêhê xi hitsê sa venguichji rê me xi cuma ná ngahan, tsêhê xi ha tacun me hya xi catsin ngahan.

¹⁶ Tsêhê xi hatuxa jemu quitsê rê xahasen rê me cjuandaja ne, vêhê xi ngayejen ni ne, hacuaha jemu cachjahanntsan cjuandaja.

¹⁷ Ley rê Nina ne, nima Moisés casua naja me, peru cjuandaja cojo cjuaquixi ne, Jesucristu casua naja me.

¹⁸ Tsajin camahani yo xi cavêê rê Nina. Suvá ni Quihndi ngu rê Nina xi hacuaha nina me hacuaha tacun tangun me cojo Nina Nahmi naja ne, me vêhê casua me camachaya naja yo xi Nina.

Cjua xi cachja Juan Vitenda rê Xuta

¹⁹ Cuitjin cachja Juan hya xi catsingatju xutaxa rê tsêhê nandya Jerusalén ngu jo nahmi cojo sacristán xi cjue cjuinenguise rê me Juan cuitjin:

—Ngayun ne, ¿yo ngayun? —Cuatjin cjuinenguise me.

²⁰ Hane hora xi cuatjin cavinenguise me ne, Juan ne, catsinguixi me, hacuîin cavetsanguî me, cuitjin catsinguixi me:

—Hacuîin ngahan Xihîn xi Tsingatju Nina. —Cuatjin cachja me.

²¹ Ngajan xi cavinenguise nga nahmi xi cuacun jan cuitjin:

—¿Mé ni ni? ¿Há xutachanga naja Elías ngayun? —Cuatjin cavinenguise me.

Ngajan xi Juan ne, cuitjin cafayangui me:

—Hacuîin ngahan. —Cuatjin cafayangui me.

Ngajan xi cavinenguise nga nahmi xi cuacun jan cuitjin:

—¿Há ngayun profeta xi jemu nechanyan rê? —Cuatjin cavinenguise me.

Hane Juan ne, cuitjin cafayangui nga me:

—Jéya. —Cuatjin cafayangui nga me.

²² Ngajan xi nahmi xi cuacun jan ne, cavinenguise nga me cuitjin:

—¿Yo ngayun ni? Tinújun cojo niji ne, cojo sa xi cuma nicuyin ngu cjua tsêhê me xi catsingatju niji. ¿Mé nûjun tsujun suvun? —Cuatjin cachja me.

²³ Ngajan xi Juan ne, cuitjin cafayangui me:

—Ngahan ne, xuta xi jercu hñu chjá nguehe hiscan jemu xín tsèhè nandya, xi catitsinguixi xuta ndiya tsèhè Nai naja, sacuatjin cachja profeta Isaiás hatsèè nixtin. —Cuatjin cafayangui me.

²⁴ Quihndé ne, xuta xi cuacun catsingatju cha partidu fariseo xi cuichja me cojo Juan ne, ²⁵ cuitjin cavinenguisse me:

—¿Mé má cuatjin vitendun xuta sa xi hacuiin ngayun xi Tsingatju Nina ngayun, hacuiin ngayun xi profeta Elías ngayun, hacuiin ngayun xi profeta xi jemu nechanyan rë ngayun ní? —Cuatjin cavinenguisse me.

²⁶ Ngajan xi Juan ne, cuitjin cafayangui me:

—Ngahan ne, cojo nandá tiviténda nuju, peru ngajñi nuju secun ngu me xi hyúun yo.

²⁷ Ngahan ne, canduvá titjun, sehe canduva me vèhè, peru hisca tsajin mé cumachjirèhè ngahan xi cuma rë me. —Cuatjin cafayangui Juan.

²⁸ Xcusun vèhè ne, camá ngajan ngu cahndé hiscan xi hmí Betania, ngunda vèhè tsèhè ndajyè Jordán, hiscan tivitenda Juan xuta.

Jesucristu sacuaa chu tsánga xi sua Nina

²⁹ Xi camá nchujun jan ne, cavèè Juan xi nduva Jesús hiscan secun me. Hane cuitjin cachja Juan cojo xuta:

—¡Chutsujun ní! Cuajyihí me xi sacuaa chu tsánga xi sua Nina xi tsicjè jyè rë xuta.

³⁰ Me vèhè xi cachjá cojo nuju xi me xi sehe cuinduva. Handasa ngahan canduvá titjun ne, peru me vèhè xi hitsè sa venguichji rë me xi cuma ná ngahan, tsèhè xi ha tacun me hya xi catsin ngahan.

³¹ Ngahan suva ne, hveen yo me. Peru cojo sa xi ngayaan xuta tjè rë Israel cumachaya naja yo me ne, vèhè xi cuitjin tiviténda xuta. —Cuatjin cachja Juan.

³² Hacuaa cachja Juan cuitjin tsèhè Jesús:

—Ngahan ne, cahvè Hasen rë Nina xi canduvajne tsèhè ngahnga sacuaa ngu paloma, quiji casesun rcu me.

³³ Ngahan suva ne, hveen yo me, peru me xi cavitexa ná xi cuiténda xuta cojo nandá ne, cuitjin cachja me cojo ná: “Me xi che xi cuinduvalne Hasen naha cjue sesun rcu ne, me vèhè xi cuiténda me xuta cojo Hasen naha.” Cuatjin cachja Nina cojo ná.

³⁴ Ngahan ne cahvè hacuaa cachjá cojo xuta xi me vèhè xi Quihndi rë Nina me. —Cuatjin cachja Juan.

Me xi tjun tjun camá xuta ladu rë Jesucristu

³⁵ Xi camá nchujun nga jan ne, secun Juan cojo jo xuta ladu rë me.

³⁶ Hane xi cavèè Juan Jesús xi tivatju me jan ne, cachja me cuitjin:

—¡Chutsujun ní! Cuajyihí me xi sacuaa chu tsánga xi sua Nina. —Cuatjin cachja me.

³⁷ Xi cahndé jo xuta ladu rë Juan cjua jan ne, quijitjengui me Jesús.

³⁸ Xi cavuya Jesús cavutsejen me xi cjuitjengui xuta jan me ne, sehe cavinenguisse Jesús me cuitjin:

—¿Mé meje nuju ngayun? —Cuatjin cavinenguisse me.

Ngajan xi xuta jan ne, cuitjin cafayangui me:

—Maestro, ¿jani nechun? —Cuatjin cavinenguisse me.

³⁹ Ngajan xi Jesús ne, cuitjin cachja me cojo jo xuta jan:

—Nduvun chutsujun. —Cuatjin cachja me.

Hane xi quiji vutsejen xuta jan ne, sehe cavèè me hiscan véña Jesús. Sacuaa chuva rë fane ñuju hora vèhè. Hane caviyuju me ngajan cojo Jesús nixtin hya.

⁴⁰ Ngu xuta ladu rë Juan xi cahndé sacuatjin cachja me hacuaa quijitjengui rë Jesús ne, hacui Andrés, me xi hntsé Simón Pedru.

⁴¹ Me vèhè titjun quiji jaha me hntsé me Simón, hane xi casacu rë me ne, cuitjin cachja me cojo:

—¡Cahyin Mesías! —Cuatjin cachja me. (Mesías ne, hacui cjua xi meje cuichja: Me xi Tsingatju Nina.)

⁴² Hya xi camá ne, Andrés ne, quijicojo me Simón xicjin me ngajan hiscan tacun Jesús. Hane xi cafehe me jan ne, cavutsejenya Jesús xcun Simón ne, sehe cachja me cuitjin cojo rë me:

—Ngayun ne, Simón hmí nuju, peru chjuhunñuhu Cefas. —Cuatjin cachja Jesús. (Ñihi xi Cefas ne, tangun vijne cojo ñihi xi Pedru ta catsijo ni ne, ndyojo, meje cuichja.)

Cavaxijin Jesucristu Felipe cojo Natanael

⁴³ Hane xi camá nchujun jan ne, caveña cacun Jesús xi cjue me ngu nandya tsèhè distritu Galilea. Chaja sa xi cjue me ne, cavechútaha me Felipe, hane cachja me cojo cuitjin:

—Nduvun, cuanguen cojo ná. —Cuatjin cachja me.

⁴⁴ Felipe ne, Betsaida nangui rë me, hiscan nangui rë Andrés cojo Pedru.

⁴⁵ Hya xi camá ne, Felipe ne, quiji jaha me Natanael, hane xi casacu rë me ne, cachja me cuitjin:

—Cahyin ngu xuta Nasaret xi hmí rë Jesús, quihndi rë José. Me vëhë xi catsihindu Moisés cojo jingu sa profeta tsëhë, ngajan xcun xujun rë Nina. —Cuatjin cachja Felipe cojo Natanael.

⁴⁶ Ngajan xi Natanael ne, cavinenguise me cojo Felipe cuitjin:

—Ja! ¿Há cuma cuetjujñi ngajan Nasaret ngu xuta xi jemu venguichji rë ni? —Cuatjin cavinenguise Natanael.

Ngajan xi cafayangui Felipe cuitjin:

—Ndove chutsijin ni. —Cuatjin cafayangui me.

⁴⁷ Hane xi cavëë Jesús xi camatiña Natanael ne, sehe cachja me cuitjin tsëhë:

—Chutsujun ni, cuajiyi ngu me xi xuta tjë rë Israel xi cjuaquixi jain, ngu me xi tsajin cjuandacha cahntsua xahasen rë. —Cuatjin cachja Jesús tsëhë Natanael.

⁴⁸ Ngajan xi Natanael ne, cuitjin cavinenguise me Jesús:

—¿Hacutjin má xi cuatjin hyun yo ngahan ni? —Cuatjin cavinenguise Natanael.

Ngajan xi Jesús ne, cuitjin cafayangui me:

—Chaja sa xi cuichja Felipe cojo nuju ne, ngahan ne, ha cahvë nuju hya xi sechun ngahma yaxujun jan. —Cuatjin cafayangui Jesús.

⁴⁹ Hane Natanael ne, cuitjin cachja me:

—Maestro, Ngayun xi Quihndi rë Nina ngayun, ngayun xi matitjun ngayun tsajan ngayaan xuta tjë rë Israel. —Cuatjin cachja Natanael.

⁵⁰ Ngajan xi Jesús ne, cachja me cuitjin:

—Ngayun ne, camangu tacún cojo ná, tsëhë xi cachjá xi cahvë nuju hya xi nechun ngahma ya higo jan. Peru sehe chutsujun sa xcusun xi cuetjucaa xi hitsë sa venguichji rë.

⁵¹ Hacuaha cachja sa Jesús cja vihi:

—Cuichjá cojo nuju cjuaquixi ta ngayujun ni ne, cuechú nixtin xi chutsujun xi ngahnga ne, sacuaaha xi tixaha, hacuaaha ángel rë Nina ne, sacuaaha xi cjuigne cjuiniji hiscan tejña ngahan xi Quihndi rë Xuta Jain ngahan. —Cuatjin cachja Jesús.

2

Cjuavixan xi camá ngajan Caná

¹ Hane xi cavatju jyan nixtin ne, camá ngu cjuavixan ngajan Caná, distritu Galilea. Naa rë Jesús ne, ngajan quitahá me ndava suhi.

² Hacuaha Jesús cojo xuta ladu rë me ne, hacuaaha camá me invitar xi cjue me ndava suhi, hane quiji me.

³ Hya xi camá ne, caffè xan xi tsëhë suhi jan. Sehe ngajan xi naa rë Jesús ne, cuitjin cachja me cojo Jesús:

—Ha quihndë tsajin rë me xan ngeuhe. —Cuatjin cachja me.

⁴ Ngajan xi Jesús ne, cuitjin cafayangui me:

—Hacuiin cuenda naha xi ngahan nújun cojo ná. Cjëë cuechú hora xi sahme mé xi sahme. —Cuatjin cafayangui Jesús.

⁵ Ngajan xi naa rë Jesús ne, cuitjin cachja me cojo cha xi vincha xan jan:

—Tu mé ni xi cuichja cha cojo nuju ne, cuatjin nihñu. —Cuatjin cachja naa rë Jesús.

⁶ Quihndë ne, siu ngajan jyun tiji xi ndoyojo camá, xi xinha nandá xi vitejnu xuta tjë rë Israel hitsë tu mé ni xcusun xi sahmixa me cojo, sacuatjin xi ha xcusun rë yungun rë me. Jima ngu tiji jan ne, xinha sacuaaha yachantë o sa jyanchantë litru nandá.

⁷ Ngajan xi cachja Jesús cojo cha xi vincha xan cuitjin:

—Ninguitsun rë tiji xi cuacun vë cojo nandá. —Cuatjin cachja me.

Ngajan xi cha xi cuacun jan ne, catsinguitsë camahani rë cha tiji jan cojo nandá.

⁸ Hya xi camá ne, sehe cachja nga Jesús cuitjin cojo cha:

—Quihndë ne, chjuhun hitsë xi cavinchun tiji vë ne, tángun chanu rë xutacha. —Cuatjin cachja me.

Hane cuatjin casahmi cha xi cuacun jan.

⁹ Hya xi camá ne, cavutaha xutacha jan nandá xi camá xan jan. Me vëhë ne, hisca hvíin me jani canduva xan jan, peru cha xi vincha xan xi cafaha quijicojo jan ne, vëë cha. Ngajan xi xutacha jan ne, cajíndaya me cha xutavixan jan ne,

¹⁰ sehe cachja me cojo cha cuitjin:

—Xcusun naja ne, titjun xan xi ndajyihí taan hvi xuta, hane ha xcun xi ha cjín cahvi me ne, sehe taan rë me xan xi ha va jyihí. Peru ngaye ne, hisca ndicumaha ni titehe xan xi ndajyihí. —Cuatjin cachja xutacha jan.

¹¹ Cjuarcun xi tjun tjun casahmi Jesús vë ne, casahmi me ngajan Caná, distritu Galilea. Cuatjin catsingacun me xi jemu jyë hnga me cojo hasen rë me. Hane xuta ladu rë me ne, camangu cacun me cojo rë me.

¹² Xi cavatju vëhë ne, cavetju me quijijne me nandya Capernaum. Quiji me cojo naa rë me cojo xicjin me cojo xuta ladu rë me. Hane ngajan caviyujutaha me ngujo nixtin.

Cavaxë Jesucristu xuta xi sahmi ndetsin ndatsen yungun

¹³ Cavechú nixtin xi camatiña suhi xi hmí rë Pascua, ngu suhi xi sahmi xuta tjë rë Israel. Ngajan xi Jesús ne, quijiniji me ngajan nandya Jerusalén.

¹⁴ Hane xi cafehe me jan ne, quiji me yungun xi matitjun. Ngajan cavëë me xuta xi tiviteña chu ndyaja cojo chu tsánga cojo chu nisëtyava, hacuaha cavëë me xuta xi siu titsindeya tujún tsëhë xuta cojo tujún rë yungun.

¹⁵ Hane xi cavëë Jesús xi cuatjin tisahmi xuta jan ne, cafaha me ngu nahñu xi jiña ne, casahmi me ngu cuarta, sehe catsicanga me yëjë ni chu xteña, sa ndyaja sa tsánga. Hacuaha cacandi me tujún rë xuta xi tsindeya tujún, hacuaha catsindefa me maxë xi xinchasun tujún jan.

¹⁶ Hane xuta xi tiviteña chu nisëtyava jan ne, cuitjin cachja Jesús cojo rë me:

—Tángunxun cojo chu xi cuicun vi. Xicanihñuu ndava Nahmi naha sacuaaha ngu ndetsin. —Cuatjin cachja Jesús.

¹⁷ Ngajan xi xuta ladu rë Jesús jan ne, catsinguitsjen me xi camahindu xcun xujun rë Nina cuitjin: “Ngayun Nina naha, xi jemu hmú cacun camahani ndya nuju ne, ña sca má rë xahasen naha.” Cuatjin camáhindu.

¹⁸ Ngajan xi xutaxa rë yungun jan ne, cuitjin cachja me:

—Quihndë ne, ijarë ngu cjuarcun xi nihñu cojo sa xi cumachaya niji xi tjín jain nuju chuva rë xi cuatjin nihñu! —Cuatjin cachja me.

¹⁹ Ngajan xi Jesús ne, cuitjin cafayangui me:

—Ninguetsun yungun vihi ne, cahntsua xi jyan nixtin ne, ngahan sahme ndaja nga. —Cuatjin cafayangui Jesús.

²⁰ Hane xutaxa rë yungun xi matitjun ne, cuitjin cachja nga me:

—Yachan jyun nu quiji caní rë xi camandaja yungun naja vi. Hane sehe ngayun nujún ne, ¡cahntsua xi jyan nixtin ne, cuyun nindujun nga ni! —Cuatjin cachja xutaxa rë yungun jan.

²¹ Peru Jesús ne, hya xi cachja me tsëhë yungun jan ne, tsëhë yojo rë suvá me xi cachja me.

²² Vëhë xi hya xi cavuya Jesús cjuahñu ne, xuta ladu rë me ne, catsinguitsjen me xi cuatjin cachja Jesús, hane camacjain rë me cjua xi chja xujun rë Nina hacuaha camacjain rë me cjua xi cachja Jesús jan.

Vëë Jesucristu xahasen rë yëjë ni xuta

²³ Jínguyëjë rë xi cuatjin quitahá Jesús ngajan Jerusalén nixtin rë suhi tsëhë Pascua ne, jemu cjín xuta camangu cacun me cojo rë me, xi cavëë me cjuarcun xi Jesús tisahmi me.

²⁴ Peru suvá Jesús ne, camanguaain cacun me cojo xuta xi cuacun jan ta, tsëhë xi ha vëë me xahasen rë yëjë me xi cuacun vë.

²⁵ Hacuaha cuatjin camanguaain cacun me cojo xuta jan ta, tsëhë xi hacuiin sahmi nguujë xi tjín yo xi cuichja cojo rë me tsëhë xuta ta, tsëhë xi ha vëë me mé cjua xi hincha cahntsua xahasen rë xuta.

3

Cjuavisiajmi rë Jesucristu cojo Nicodemo

¹ Cavéjña ngu xuta fariseo xi hmí rë Nicodemo. Me vëhë ne, ngu xuta matitjun me tsëhë ngajñi rë xuta tjë rë Israel.

² Ngundiya jan ne, nguixun quiji cavisiajmi me cojo Jesús, hane cuitjin cachja me:

—Maestro, ngayin ne, hyin ta ngayun ne, ngu maestru xi Nina catsingatju rë. Cuatjin hyin ta, tsëhë xi tsajin yo xi cuma sahmi cjuarcun xi nihñu ngayun sa xi hacuiin Nina visecoo rë. —Cuatjin cachja Nicodemo cojo Jesús.

³ Ngajan xi Jesús ne, cuitjin cafayangui me:

—Cuichjá cojo nuju cjuaquixi ta sa xi ngu xuta tsiin me ngu ndiya nga ne, cumaji cuisehen me hiscan sahmi Nina gobiernu. —Cuatjin cafayangui Jesús.

⁴ Hane Nicodemo ne, cavinenguise me Jesús cuitjin:

—¿Peru hacutjin cuma xi ngu xihin xi ha changá ne, cuya tsin nga ni? ¿Há cuma cuisehen nga cahntsua naa rē sehe tsin nga ngu ndiya? —Cuatjin cavinenguisse Nicodemo.

⁵ Ngajan xi Jesús ne, cuitjin cafayangui me:

—Cuichjá cojo nuju cjuaquixi ta hatuxa sahmi nguujyē xi cuisehen xuta ngu cjuahñu xatsē ngatsē rē nandá cojo ngatsē rē Hasen rē Nina ta, ha chuva rē vèhē ni xi cuma cuisehen me hiscan sahmi Nina gubiernu.

⁶ Hya xi ngu xuta tsin me ngatsē rē xutacha rē me ne, sacu rē me cjuahñu xi tsēhē ngasunhdē. Peru hya xi tsin me ngatsē rē Hasen rē Nina ne, sacu rē me cjuahñu xatsē xi tsēhē Nina.

⁷ Hacuiin cjuercun nuju xi cuatjin cachjá cojo nuju xi mameje rē xi tsin nga ngayun ngu ndiya.

⁸ Tjo ne, hatuxa vanga hiscan meje rē, peru suva machaya naja xi vanga ta nuhya rē xi fane vanga, ta matsijin hiscan nduva o hiscan vechú. Hane xuta xi tsin me ngatsē rē Hasen rē Nina ne, tjin rē me sacuaha tjo jan, ta tsin me ngu ndiya nga, peru matsijin hacutjin. —Cuatjin cafayangui Jesús.

⁹ Ngajan xi Nicodemo ne, cuitjin cavinenguisse me cojo Jesús:

—Peru ¿hacutjin cuma sacuatjin nújun vè ni?

¹⁰ Hane Jesús ne, cuitjin cafayangui me:

—¿Hacutjin nga ne xi ngayun ne, maestru má ngayun tsēhē xuta tjē rē Israel, hane sehe hyúun mé vijne cjuaxi cachjá cojo nuju vè ni?

¹¹ Cuichjá cojo nuju cjuaquixi ta ngayin ne, nújin cjuaxi hyin hacuaha nújin tsēhē xcusun xi cachutsjín, peru cjuaxi nújin cojo nuju ne, míj chjuhunntsun.

¹² Sa xi camacjain nuju hya xi cachjá cojo nuju cjuaxi tsēhē xcusun tsēhē ngasunhdē ne, ¿hacutjin cumacjain nuju sa xi cuichjá cojo nuju cjuaxi tsēhē xcusun tsēhē ngahnga ni?

¹³ Tsajin hisca ngu xuta xi quiji cavutsejen me hacutjin jyihi ngahnga sehe cavuya me xi sua cuenda nuju me, suvá ni me xi ha tsēhē ngajan canduva me ne, me vèhē xi cuma sua cuenda nuju me, suvá ni me xi Quihndi rē Xuta Jain.

¹⁴ Chuva rē xi casahmi Moisés hatsēē nixtin xi cavunihnga me ngu quicha xcusun rē chu yē taha rē ngu ya ngajan ngu xín camahani jan ne, ha chuva vèhē ni ne, me xi Quihndi rē Xuta Jain ne, meje rē xi tjunihnga rē me taha rē ngu ya.

¹⁵ Cuatjin meje rē, cojo sa xi yèjē ni xuta xi cumangu cacun me cojo rē me vèhē ne, sacú rē me cjuahñu xatsē. —Cuatjin cafayangui Jesús tsēhē Nicodemo.

Cjuahmutacun rē Nina cojo xuta

¹⁶ —Tsēhē xi jemu catsihmu cacun Nina xuta ne, hisca casua me Quihndi ngu rē me, cojo sa xi yèjē ni xuta xi cumangu cacun me cojo me vèhē ne, hacuiin cjue hasen rē me xcun cjuañihi ta sacú rē me cjuahñu xatsē xcun Nina.

¹⁷ Nina ne, catsingatju me Quihndi rē me nguehe ngasunhdē, peru hacuiin xi cjuahachuva rē xuta ngasunhdē ta xi cuaxétje rē xuta.

¹⁸ Xuta xi mangucacun cojo Quihndi rē Nina ne, hacuiin chjaháchuva rē me. Peru me xi hacuiin mangucacun cojo Quihndi rē Nina ne, ha cachjaháchuva rē me ta, tsēhē xi hacuiin mangucacun me cojo me xi Quihndi ngu rē Nina.

¹⁹ Hane cuitjin fahachuva Nina xuta ngasunhdē: Nina ne, ha catsingatju me Quihndi rē me ngasunhdē sacuaha ngu ndihi xi sua hasen rē. Peru xuta ne, hitsē sa cachuya rē me tsēhē jñu xi cuma rē hasen ta, tsēhē xi xcusun xi casahmi me ne, suvá cjuatsehen.

²⁰ Yèjē ni xuta xi sahmi xcusun tsehen ne, hatuxa chuyiin rē me tsēhē hasen, hisca sahmitiñaa me hiscan xi hasen, sa tu sesunhnga xcusun xi sahmi me.

²¹ Peru xuta xi ndiya rē cjuaquixi xcusun xi sahmi me ne, sahmitiña me hiscan xi hasen, cojo sa xi sesunhnga xi xcusun xi sahmi me ne, vèhē xcusun xi meje rē Nina.

Chja Juan Vitenda rē Xuta tsēhē Jesús

²² Hya xi camá ne, quiji Jesús cojo xuta ladu rē me ngajan nguijná tsēhē distritu Judea. Hane ngajan caviyujutahá cojo me xuta xi cuacun vè. Hane cavitenda me xuta.

²³ Hacuaha ha nixtin hya ni ne, Juan Vitenda rē Xuta ne, tivitenda me xuta ngajan hiscan xi hmi rē Enón. tiña tsēhē Salim. Ngajan quitahá me ta, tsēhē xi ngajan ne, jemu yehe nandá tjin. Hane hacuaha quiji xuta caxtenda me.

²⁴ Nixtin hya ne, cjéē cjue Juan jan ndavaya.

²⁵ Quihndē ne, ngujo xuta ladu rē Juan ne, cavetsihin ticjanjo cjuaxi rē me cojo ngu xutaxa rē yungun tsēhē xcusun changá rē me xi ma tyjahi me xcun Nina.

²⁶ Hya xi camá ne, quiji cachja me cojo Juan cuitjin:

—Maestro, ¿Há vitsjen nuju me xi casetaha cojo nuju ngunda vèhē tsēhē ndajyē Jordán, me xi canújun cojo níj tsēhē jan? ¡Chutsujun ta hacuaha cojo me vèhē tivitenda me, hane yèjē ni xuta cjuitjengui rē me! —Cuatjin cachja xuta xi cuacun jan.

²⁷ Ngajan xi Juan ne, cuitjin cafayangui me:

—Tsajin mé xi sacú cjuahatsja ngu xuta sa xi Nina suaain rè me.

²⁸ Ngayun suvun ne, ha canuhyun xi cachjá xi hacuüin ngahan Xihin xi Tsingatju Nina ta ngahan ne, cha xi catsingatju titjun Nina, sehe catsingatju Nina me vèhë.

²⁹ Chutsujun ta na xutavixan ne, tsèhë cha xutavixan na. Peru ngu cha amigu ndaja rè cha xutavixan xi secun tivisiñuju cjuarè cha xutavixan jan ne, jercu ndama rè cha tsèhë cjuarè cha vèhë. Vèhë xi ngahan xi sacuaha cha amigu rè cha xutavixan vè ne, jercu tu ndaja camahani má ná.

³⁰ Me vèhë ne, meje rè xi quihndë nga nchujun cuma jyë cuma hnga sa me cojo xa rè me, peru ngahan ne, hacuüin cuatjin ta xi meje rè ne, cuijnetaha xa naha. —Cuatjin cafayangui Juan.

Me xi nduva tsèhë ngahnga

³¹ Me xi nduva tsèhë ngahnga ne, me vèhë xi hitsë sa jemu vengui chji rè me xi cuma rè yèjë xuta. Ngayaan xi tsèhë ngasunhndë ngayaan ne, ha xuta ngasunhndë ni ngayaan, hacuaha súv cjuatacun rè ngasunhndë xi visiajme. Me xi nduva tsèhë ngahnga ne, me vèhë xi hitsë sa jemu vengui chji rè me xi cuma rè yèjë xuta.

³² Me vèhë ne, sua me machaya naja tsèhë xcusun xi cavèë me cojo tsèhë cjuarè cha cahnðë me, peru xuta ne, fahatsjaain me cjuarè cha chja me vèhë.

³³ Peru ngujo xuta ne, fahatsja me cjuarè cha vèhë, hane cuatjin maquixi xi Nina ne, quixi jain me cojo cjuarè me.

³⁴ Me xi Nina catsingatju rè ne, cjuarè Nina chja me ta, tsèhë xi Nina ne, hacuüin chuva hitsë sua me Hasen rè me.

³⁵ Nina Nahmi naja ne, jemu hmu cacun me Quihndi Ngu rè me, hacuaha yèjë ni xcusun ne, cavejña me tsja Quihndi rè me jan.

³⁶ Xuta xi mangacacun me cojo Quihndi rè Nina jan ne, tjin rè me cjuahñu xatsë. Peru xuta xi vihndiin me tsèhë Quihndi rè me jan ne, sacuüin rè me cjuahñu xatsë ta castigu rè Nina cuatju me cuma.

4

Cjuavisiajmi rè Jesús cojo na samaritana

¹ Quihndë ne, cha fariseo ne, camachaya rè cha xi Jesús ne, hitsë sa cjin jima xuta ladu rè me xi cuma rè xuta ladu rè Juan, hacuaha hitsë sa cjin xuta tivitenda me xi cuma rè xuta xi tivitenda Juan.

² Peru súv Jesús ne, cavitendaain me ta xuta ladu rè me ne, me vèhë xi cavitenda me xuta.

³ Hane xi camachaya rè Jesús xi cuatjin camachaya rè cha fariseo xi cuacun vè ne, cavetjuxin me tsèhë distritu Judea. Hane cavuya quiji nga me ngu nandya tsèhë distritu Galilea.

⁴ Hane ndiya xi cjuarè me jan ne, tjin xi cuatju me ngujo nandya tsèhë distritu Samaria.

⁵ Hya xi camá ne, cafehe me ngu nandya tsèhë distritu Samaria xi hmí rè Sicar, ngu nandya xi tacun tiña tsèhë nangui xi casua Jacob quihndi rè me José jemu hatsëë camahani.

⁶ Hane cahnðë vèhë ne, tacun ngu ndava nandá xi casahmi Jacob. Hane tsèhë xi jemu cafenda rè Jesús tsèhë ndiya xi nduva me ne, quiji me cavéjña me hiscan ndava nandá jan. Sacuaha chuva rè nchisen xi cafehe me jan.

⁷ Hora vèhë ne, canduva ngu na samaritana, canduva jaha na nandá. Hane cuitjin cachja Jesús cojo rè na:

—Tuhun hitsë nandá cuèhë. —Cuatjin cachja me.

⁸ Hora vèhë ne, tsajin xuta ladu rè Jesús ta nandya quiji me xi cuatsë me xi sinë me cojo Jesús.

⁹ Ngajan xi na samaritana jan ne, cuitjin cachja na cojo Jesús:

—Ngayun xi xuta tjë rè Israel ngayun ne, ¿hacutjin má xi tichjahyun ná nandá, ngahan xi na samaritana ngahan ni? —(Cuatjin cachja na ta, tsèhë xi xuta tjë rè Israel ne, hatuxa tsinguisihinjñii me cojo xuta samaritana.)

¹⁰ Ngajan xi Jesús ne, cuitjin cafayangui me tsèhë na:

—Sa xi ngayun hyun cjuatjo xi Nina sua me hacuaha hyun yo ngahan xi tifehya nuju nandá ne, ngahan cachjahyun ná nandá, hane ngahan casuá nuju nandá xi sua cjuahñu. —Cuatjin cafayangui Jesús.

¹¹ Hane na vèhë ne, cuitjin cachja na:

—Tatá, peru ndava nandá vi ne, jemu nungun, hane tsajin quichuhun mé xi naxun cojo nandá. ¿Jani naxun nandá xi sua cjuahñu vè ni?

¹² Xutachanga naja Jacob casua niji me ndava nandá vi. Hacuaha cojo me cojo quihndi rë me cojo chu rë me cahvi me nandá tsêhê ndava nandá vihi. ¡Ja! Peru ¿há hitsê sa matitjun ngayun xi cuma rë me vêhê ni? —Cuatjin cachja na.

¹³ Hane xi cafayangui Jesús ne, cuitjin cachja me cojo rë na:

—Yêjê ni xuta xi hvi me nandá vihi ne, cuma xinda nga rë me.

¹⁴ Peru xuta xi cuihi me nandá xi suá ngahan ne, hatuxa ha quihndê tsajin nu tsajin nixtin xi cuya cumaxinda nga rë me ta nandá xi suá ngahan ne, cuma sacuaaha ngu nandá xi ña vangatê xi sua rë me cjuahñu xatsê. —Cuatjin cachja me.

¹⁵ Ngajan xi na vêhê ne, cuitjin cachja na cojo Jesús:

—Tatá, tuhun ná hitsê nandá xi nújun vë, cojo sa xi cumaxindaain ná hacuaha ha quihndê cuinduvaan jaha nandá. —Cuatjin cachja na.

¹⁶ Hane Jesús ne, cuitjin cachja me cojo rë na:

—Tángun chjuhun xihin nuju, sehe nduvuncujun me nguêhe. —Cuatjin cachja me.

¹⁷ Ngajan xi na vêhê ne, cuitjin cafayangui na:

—Tsajin xihin naha. —Cuatjin cafayangui na.

Hane cuitjin cachja Jesús cojo rë na:

—Ndaja nújun xi tsajin xihin nuju ta

¹⁸ hñú cha xi cavinechuncujun, hane cha xi nechuncujun quihndê ne, hacuiin xihin nuju cha. Canújun cjuaquixi. —Cuatjin cachja Jesús cojo rë na.

¹⁹ Ngajan xi na vêhê ne, cuitjin cafayangui na:

—Tatá. Xi má ná ne, ngayun ne, ngu profeta ngayun.

²⁰ Xutachanga niji ne, nguêhe ndetjún vihi canduva cafaharcun me Nina. Hane ngayujun ni xuta nangui rë Israel ne, nújun ta Jerusalén ne, ngajan tacun cahndê xi meje rë xi cje chjahárcun rë Nina. —Cuatjin cafayangui na.

²¹ Ngajan xi cachja Jesús cojo rë na cju vihi:

—Ngayun chjuun, catamacjain nuju cju xi cuichjá vi: cuechú nixtin xi hacuiin ndetjún vihi hacuiin Jerusalén chjuhuncun Nina Nahmi naja.

²² Ngayun xuta samaritano ne, chjuhuncun Nina, peru hyúun me xi ndandaja. Ngayin ne, ha hyinndijin Nina ta, tsêhê xi me xi cuaxêtje rë xuta ne, cuetjujñi me ngajñi niji ngayin xuta nangui Israel.

²³ Cuechú nixtin o ha hisca cavechú nixtin xi xuta xi cjuaquixi xi faharcun me Nina Nahmi naja ne, Hasen rë Nina cuisecoo rë me xi cjuaharcun me Nina cojo cjuaquixi. Ha cjuaquixi ta xuta xi cuatjin sahmi me ne, me vêhê xi meje rë Nina Nahmi naja xi cjuaharcun rë me.

²⁴ Nina ne, Hasen me. Hane xuta xi faharcun rë me ne, hatuxa meje rë xi Hasen rë Nina cuisecoo rë me xi cjuaharcun me Nina cojo cjuaquixi. —Cuatjin cachja Jesús.

²⁵ Hane chjuun jan ne, cuitjin cachja na cojo Jesús:

—Ngahan ne, ha hvê xi cuinduva Me xi Tsingatju Nina, me xi hmí rë Cristu. Hane hya xi cuinduva me vêhê ne, suacuenda naja me yêjê ni cjuatacun. —Cuatjin cachja na.

²⁶ Ngajan xi Jesús ne, cuitjin cachja me cojo rë na:

—Ngahan xi tichjá cojo nuju vi ne, ha ngahan xi nújun vë. —Cuatjin cachja me.

²⁷ Hane hora vêhê cavuya xuta ladu rë Jesús xi quiji jaha me comida. Hane jemu quijircun rë me xi cavêê me xi visiajmi Jesús cojo rë ngu chjuun. Peru hisca ngu me xi cuacun vë cavinenguisiin me cuitjin: “¿Mé xi meje nuju?” o “¿mé xi visiajmu cojo rë na?” Cuatjin camá.

²⁸ Chjuun jan ne, cavejña na nisa rë na, sehe cavuya quiji na nandya, hane cuitjin cachja na cojo xuta:

²⁹ —Nduvun cuanguen chutsejen ngu me xi cachja cojo ná yêjê xcusun xi casahme. ¿Hacuiin hacui me vêhê xi Tsingatju Nina? —Cuatjin cachja na.

³⁰ Hya xi camá ne, cavetju xuta quiji me cojo rë na hiscan quitahá Jesús.

³¹ Jinguyêjê rë ne, xuta ladu rë Jesús jan ne, cuitjin cachja me:

—Maestro, xinu niñu. —Cuatjin cachja me.

³² Peru Jesús ne, cuitjin cafayangui me:

—Ngahan ne, ha tjin xi sínê xi ngayun ne, hyúun mé jan. —Cuatjin cafayangui me.

³³ Ngajan xi xuta ladu rë Jesús jan ne, cuitjin cavinenguisse xicjin me xingu xingu me:

—¿Há cuma cacun sa xi tjin yo xi cafehe cani xi cajinê me? —Cuatjin cavinenguisse xicjin me.

³⁴ Hane Jesús ne, cuitjin cachja me cojo xuta ladu rë me jan:

—Jemu chuya rë xahasen naja xi chinê niñu. Peru ngahan ne, hitsê sa chuya rë xahasen naha xi sahme sacuatjin meje rë me xi catsingatju ná, hacuaha hitsê sa chuya rë xahasen naha xi tsingujnetaha xa xi casua ná me.

³⁵ Chja ngu cjua ta: “Chaja sa ñuju sá, sehe tjunihnga rë xitjê.” Peru ngahan cuichjá cojo nuju ta chutsujun xuta ta, tsêhê xi tangun me cojo xitjê xi ha camacha, ha cuma tjunihnga rë.

³⁶ Me xi tivunihnga xitjê ne, ha tifaha me chji rë me, cuma cuinújan ne, tisahmi tangun me xuta xi sacú rë xuta xi cuacun vë cjuahñu xatsë. Cuatjin tijima cojo sa xi tangun cuiyujusua me xi vincha tjê cojo me xi vunihnga xitjê.

³⁷ Quixi cjua xi chja xi: “Hacjahi cha xi vincha tjê ne, hacjahi cha xi vunihnga xitjê.”

³⁸ Ngahan catsingátju nuju chunihngun xitjê hiscan xi hacuini ngayun canihñu xa. Jingusa me casahmi me xa, hane ngayun cavisuhunñu ngajñi rë xa rë me. —Cuatjin cachja Jesús cojo xuta ladu rë me.

³⁹ Jemu cjin xuta samaritano tsêhê nandya jan camangu cacun me cojo Jesús, ngatsë rë cjua xi cachja chjuun jan cuitjin: “Cachja me cojo ná yêjê xcusun xi casahme.”

⁴⁰ Ngajan xi hya xi cafehe xuta samaritano ngajan hiscan quitahá Jesús ne, cachja xuta jan cojo rë me xi cjue cuejña me cojo rë me. Hane Jesús ne, quiji cavéjña me jo nixtin cojo xuta xi cuacun jan.

⁴¹ Hane jemu cjin sa xuta xi camangu cacun me ngatsë rë cjua rë suvá Jesús.

⁴² Hane chjuun jan ne, cuitjin cachja xuta jan cojo rë na:

—Ha quihndê hacuini ngatsë rë cjua riji xi mangutacuín ta, tsêhê xi suvin canuhyin cjua rë me, hane ngayun ne, hyin ta cjuaquixindaja xi me vihi xi cuaxëtje me xuta. —Cuatjin cachja xuta jan.

Camandaja quihndi rë ngu xutaxa rë casahmi Jesús

⁴³ Xi cavatju jo nixtin jan ne, cavetju Jesús cojo xuta ladu rë me, quiji me ngu nandya tsêhê distritu Galilea.

⁴⁴ Ta suvá Jesús cachja me xi quixi xi xuta ne, faharcuaain me profeta xi tsêhê nangui rë me.

⁴⁵ Vêhê xi hya xi tivatju Jesús ngujo nandya tsêhê distritu Galilea ne, ndaja cafahatsja xuta me ta, tsêhê xi hacuaha cojo xuta jan quiji me suhi ngajan Jerusalén, hane ngajan cavêë me yêjê xcusun xi casahmi Jesús nixtin rë suhi jan.

⁴⁶ Hya xi camá ne, cavuya cafehe me Caná, ngu nandya tsêhê distritu Galilea, hiscan xi casahmi me xi nandá ne, cavuya camá xan rë uva. Hane ngajan nandya Capernaum ne, cavéjña ngu xutaxa rë xi hmu rë cha quihndi rë me.

⁴⁷ Hane xi camachaya rë me xi cafehe Jesús ngajan Caná ne, cavetju me quijitjengui me Jesús. Hane xi cafehe me jan ne, cafehya me favor cojo Jesús xi cjue Jesús cojo rë me nangui rë me xi sahmi Jesús xi cumandaja quihndi rë me ta ha tu hora sa xi cueya.

⁴⁸ Ngajan xi Jesús ne, cachja me cuitjin cojo xutaxa rë jan:

—¡Ngayujun ni ngayun ne, sa xi chuun cjuarcun ne, cumanguaain camahani tacún cojo ná! —Cuatjin cachja Jesús.

⁴⁹ Ngajan xi xutaxa rë jan ne, cuitjin cafayangui me:

—Tatá, cuanguen sanií, chaja sa xi cueya quihndi naha. —Cuatjin cafayangui me.

⁵⁰ Hane Jesús ne, cuitjin cachja me:

—Cuma cuangun ta, quihndi nuju ne, jimandaja cha. —Cuatjin cachja Jesús.

Hya xi camá ne, xutaxa rë jan ne, camacjain rë me cjua xi cachja Jesús, hane cavetju me quiji me.

⁵¹ Hane ndiya cjui me ne, cavechútáha me ngujo cha mosu hndixahan rë me, hane cachja cha cojo rë me xi cha quihndi rë me ne, tijimandaja cha.

⁵² Ngajan xi xutaxa rë jan ne, cavinenguise me cojo cha hndixahan rë me jan mé hora cavetsihin camandaja cha hmu rë jan. Hane cha hndixahan rë me jan ne, cuitjin cachja cha:

—Ngujña fane ngu cavetjuxin chíhinsüë xi sahmi cojo cha. —Cuatjin cachja cha.

⁵³ Hane nahmi rë quihndi jan ne, ha vëë me ta hora vêhê xi cachja Jesús cojo rë me xi quihndi rë me ne, tijimandaja cha. Cuatjin camá xi xutaxa rë jan cojo yêjê xuta rë me ne, camangu cacun me cojo Jesús.

⁵⁴ Cuatjin camá xi, hya xi cavetju Jesús tsêhê ladu rë distritu Judea hane cafehe me Caná, distritu Galilea ne, casahmi me cjuarcun xi majo xi casahmi me ngajan.

5

Ndava nandá xi hmí rë Betesda

¹ Xi cavatju nixtin xi cuacun vë ne, quiji Jesús ngajan Jerusalén xi cjue me suhi xi cuma ngajan yungun xi matitjun.

² Quihndë ne, ngajan Jerusalén ne, tiña tingotjo Chu Tsánga ne, ngajan tacun ngu ndava nandá xi tjin rë hñú cahndë ngahma ndihya. Hane ndava nandá vëhë ne, xi hne hebreo ne, Betesda hmí rë.

³ Cahndë jan ne, jemu jíjn xuta siuhmu me. Siu xuta rcá, siu xuta rengun, siu xuta xi quixihñu yojo rë xi tacunya rë me xi cuiniya nandan

⁴ ta jiya hora jiya hora ne, finiya nandan ta ngu ángel ne, vijne tsiniya nandan jan. Sehe cha xi tjun cuisehen ne, marqui rë tsëhë chíhin xi má rë.

⁵ Hane ngajñi rë xuta hmu rë xi cuacun jan ne, jiña ngu cha xi ha tjin rë can tyjuhunjyan nu xi hmu rë cha.

⁶ Hane xi cavëë Jesús xi cuatjin jiña cha hacuaha ha vëë me xi ha jemu tsëë hmu rë cha ne, cavinenguise me cha cuitjin:

—¿Há meje nuju xi cuma ndaja ngayun? —Cuatjin cavinenguise Jesús.

⁷ Hane cha hmu rë jan ne, cuitjin cafayangui cha:

—Tatá, tsajin yo xi tsingusehen ná ndava nandá hora xi finiya nandá. Jinguyëjë rë xi tifë tiña ne, hacjahi me xi ha cavisehen. —Cuatjin cafayangui cha.

⁸ Ngajan xi Jesús ne, cuitjin cachja me cojo cha:

—Tisatjunhngun, chjuhun niña nuju, sehe tujyuhunyun. —Cuatjin cachja Jesús.

⁹ Cha vëhë ne, ha tu ñahñu camandaja cha, cafaha cha niña rë cha, cavetsihin catsujihiya cha.

Nixtin vëhë ne, nixtin xi chjahájenda rë.

¹⁰ Ngajan xi xutaxa rë yungun ne, cachja me cojo cha xi camandaja jan cuitjin:

—Quihndë ne, nixtin xi chjahájenda rë. Ndajintjin xi cuatjin quichehe niña riji. —Cuatjin cachja me.

¹¹ Hane cha xi camandaja jan ne, cuitjin cafayangui cha:

—Me xi casahmi xi camandaja ngahan ne, me vëhë cachja me cojo ná xi cjuahá niña naha sehe tsujyëhëya. —Cuatjin cachja cha.

¹² Ngajan xi xutaxa rë jan ne, cavinenguise nga me cuitjin:

—¿Hane yo xi cachja cojo ri xi chjehe niña riji ne, sehe tujyihie? —Cuatjin cavinenguise me.

¹³ Peru cha xi camandaja jan ne, hvíin cha yo ta, tsëhë xi Jesús ne, cavetjuxin me tsëhë cahndë vëhë, tsëhë xi jemu xutacjin quitsë me.

¹⁴ Hane xi cavatju vëhë ne, cavechútáha Jesús cha ngajan yungun xi matitjun, hane cachja me cojo cha cuitjin:

—Chutsujun ni, camandaja ngayun. Quihndë ne, xicavinechunyuun sa ndiya rë cjuatsehen, sa tu choho sa tu ngajan cuma. —Cuatjin cachja Jesús cojo cha.

¹⁵ Sehe cavetju cha quiji cachja cha cojo xutaxa rë ta me xi casahmi xi camandaja cha ne, Jesús.

¹⁶ Vëhë xi xutaxa rë jan ne, tsujyihiyatjengui me Jesús cojo cjuahngatacun ta, tsëhë xi casahmi Jesús xcusun vëhë nixtin xi chjahájenda rë.

¹⁷ Ngajan xi Jesús ne, cuitjin cachja me cojo xutaxa rë jan:

—Nahmi naha ne, hisca quihndë tisahmi me xa, hacuaha ngahan ne, tisahme xa. —Cuatjin cachja Jesús.

¹⁸ Ngatsë rë cjuá vëhë ne, xutaxa rë jan ne, hitsë sa cavangui me chuva rë xi tsiquehen me Jesús. Cuatjin casahmi xutaxa rë ta, tsëhë xi hacuúin suvá ni cafaharcuaain Jesús nixtin xi chjahájenda rë ta hacuaha cachja me xi Nahmi rë me ne, Nina. Hane xi cuatjin cachja Jesús ne, tsingacun me xi tangun me cojo Nina.

Xa xi tjin rë Quihndi rë Nina

¹⁹ Ngajan xi Jesús ne, cuitjin cachja me cojo xutaxa rë xi cuacun jan:

—Cuichjá cojo nuju cjuaquixi ta ngahan xi Quihndi rë Nina ngahan ne, tsajin mé xi cuma sahme xi cojo cjuatacun naha suva ta xi vutsején xi sahmi Nahmi naha ne, vëhë xi sahme. Xcusun xi sahmi me vëhë ne, hacuaha xcusun vëhë sahme ngahan Quihndi rë me.

²⁰ Nahmi naha ne, hmu cacun ná me, ngahan Quihndi rë me, hacuaha tsingacun ná me yëjë xcusun xi sahmi me. Hane xcusun xi sehe tsingacun ná me ne, hisca yehe sa xi cuma rë xcusun xi casahme xi camandaja cha hmu rë jan. Cuatjin cuma cojo sa xi ngayun ne, cjuercun nuju.

²¹ Sacuatjin faha Nahmi naha nima sehe sua nga rë me cjuahñu ne, hacuanitjin ni ngahan Quihndi rë me ta suá rë cjuahñu yo xi meje suá rë.

²² Nahmi naha ne, tsajin yo tsichuva me cojo cjuatacun rë ta ntsa ngahan cavejña me yëjë xa vëhë,

²³ cojo sa xi yëjë ni xuta ne, cjuaharcun me ngahan sacuatjin faharcun me Nahmi naha. Yo xi cjuaharcuaain ná ngahan ne, faharcuaain rë Nahmi naha, me xi catsingatju ná.

²⁴ Cuichjá cojo nuju cjuaquixi ta xuta xi vihdë me cjuu xi chjá hacuaha manguacun me cojo rë Nina, me xi catsingatju ná ne, tjin rë me cjuahñu xatsë. Hacuaha cumachuvaain me cojo cjuatacun rë me ta sacuaaha xi ha cahme me hacuaha ha casacu rë me cjuahñu xatsë.

²⁵ Cuichjá cojo nuju cjuaquixi ta cuechú nixtin o ha hisca cavechú nixtin xi xuta xi hndiin tsëhë Nina sacuaaha nima ne, cuihdë me xta naha, ngahan xi Quihndi rë Nina ngahan. Hane me xi cuihdë tsahan ne, sacú rë me cjuahñu xatsë.

²⁶ Cjuahñu xi tjin rë Nina ne, tsajin yo casua rë me, ta nduva tsëhë cjuandaja rë suva me. Hane hacuanitjin ná ngahan, ta casua ná cahndë xi hacuaha tjin ná cjuahñu tsëhë cjuandaja rë suvá.

²⁷ Hacuaha casua ná me xa xi tsichúva xuta cojo jyë rë me ta, tsëhë xi ngahan ne, Quihndi rë Xuta Jain ngahan.

²⁸ Hacuain cjuercun nuju tsëhë cjuu naha. Cuechú nixtin xi yëjë ni nima xi hincha cahntsua tsjun rë ne, cuihdë xta naha,

²⁹ sehe cuetju tsëhë tsjun rë. Hane nima xi ndaja xcusun casahmi xcun cjuahñu rë ne, sacú rë cjuahñu xatsë. Hane nima xi choho xcusun casahmi ne, cuatju castigu.

³⁰ Ngahan ne, hatuxa tsajin mé xi sahme xi cojo cjuatacun naha suva ta, sacuatjin cjuu xi vihdë xi chja Nahmi naha ne, cuatjin tsichúva xuta cojo cjuatacun rë me. Hane hatuxa quixi ngahan cojo cuatacun naha ta, tsëhë xi sahme hacutjin xi meje ná suva ta sacuatjin xi meje rë Nahmi naha, me xi catsingatju ná ne, cuatjin xi sahme. —Cuatjin cachja Jesús.

Hacutjin cumachaya naja yo xi Jesucristu

³¹ Cjuinduju sa tichja Jesús cojo xutaxa rë yungun cuitjin:

—Sa xi ngahan cuichjá favor naha suva ne, cuinújun ta quixiin cjuu xi chjá.

³² Peru tjin sa ngu xi tichja favor naha, hane hvë ta cjuu xi chja me vëhë tsahan ne, cjuaquixi.

³³ Ngayun ne, caningatjun xuta quiji cavinenguise rë me Juan ngu cjuu, hane Juan ne, catsicuya me cjuu xi cjuaquixi.

³⁴ Peru ngahan ne, me xi tichja me favor naha hacuain xuta me, peru cjuu xi tichjá vi ne, tichjá cojo sa xi ngayun ne, cuetjuntjun.

³⁵ Juan vë ne, sacuaaha ngu ndihi xi seti xi sua hasen rë camá me. Hane ngayun ne, cachuya nuju tsëhë xi cavinechun sua ngujo nixtin ngajñi rë cjuahasen rë Juan.

³⁶ Peru ngahan ne, tjin xcusun xi hitsë sa ndaja tsingacun yo ngahan xi cuma rë cjuu xi cachja Juan tsahan. Xa xi casua Nahmi naha ngahan xi sahmechehen ne, cuma cuinújan ne, xa xi ha tisahme ne, suvá xa vëhë tsingacun xi Nahmi naha catsingatju ná me.

³⁷ Hacuaha Nahmi naha, me xi catsingatju ná ne, chja me favor naha. Ngayun ne, hisca xta rë me cjëë cuinuhyun, hacuaha cjëë chun hacutjin jyihi me.

³⁸ Hisca cjuu rë me ne, tsajin tetjo ngajñi rë cjuatacun nuju ta, tsëhë xi ngahan xi catsingatju ná me vëhë ne, manguaain tacún cojo ná.

³⁹ Ngayun ne, jemu chutayun xujun rë Nina ta, tsëhë xi ningatuhun tacún ta xi cuatjin chutayun ne, sacú nuju cjuahñu xatsë. Hane xujun vëhë ne, vëhë xi chja favor naha.

⁴⁰ Hane ngayun ne, mijí cuisuhun ladu naha xi sacú nuju cjuahñu xatsë.

⁴¹ Ngahan ne, hacuain sahmi nguyë xi xuta sahmi jyë sahmi hnga ná me.

⁴² Hacuaha ngahan ne, ha hvë xcusun nuju ta tsajin cjuahmutacun rë Nina jiya cahntsua xahasen nuju.

⁴³ Ngahan ne, canduvá ta, tsëhë xi Nahmi naha casuaxa ná me, peru ngayun ne, mijí chjuhunnstun ná. Hane sa xi jingu sa xuta cuinuva me cojo cjuatacun rë suvá me ne, ha hvë ta me vëhë ne, hatuxa chjuhunnstun me.

⁴⁴ Tsajin nixtin xi cumangu tacún cojo ná ngahan jinguyëjë rë xi tivinchun chuva rë xi ngajñi nuju cojo xingun ni ne, sahmi yehe sahmi hnga nuju me hane vinchunsum xi Nina xi ngu tu tu ni ne, me vëhë sahmi yehe sahmi hnga nuju me.

⁴⁵ Xicaningatuun tacún xi ngahan cuíncha jyë nuju xcun Nahmi naha ta xutachanga naja Moisés, me xi jemu vetuhun tacun ne, me vëhë xi cuíncha jyë nuju me.

⁴⁶ Sa xi camacjain nuju cjuu xi catsihindu Moisés ne, hacuaha camacjain nuju cjuu naha ta Moisés vë catsihindu me tsahan.

⁴⁷ Peru sa xi macjaain nuju cjuu xi catsihindu Moisés ne, ¿hacutjin cumacjain nuju cjuu xi chjá ngahan ni?

6

Catsicjen Jesucristu hñu mil xihin

¹ Xi cavatju yëjë xcusun vëhë ne, cavetju Jesús quiji me ngunda vëhë tsëhë laguna Galilea, xi hacuaha hmí rë laguna Tiberias.

² Hane jemu xutacjín camahani xi quijitjengui me Jesús ta, tsèhë xi cavëë me cjuarcun xi casahmi Jesús cojo xuta hmu rë.

³ Hane Jesús ne, quijiniñi me ngu ndetjún, hane ngajan cavéjña me cojo xuta ladu rë me.

⁴ Hane Pascua, suhi xi sahmi xuta tjë rë Israel ne, hacuaha ha camatiña.

⁵ Hane xi vtutsejen Jesús xi jemu xuta cjín nduvatjengui rë me ne, sehe cachja me cojo Felipe cuitjin:

—¿Jani cuanguen chaan niñu xi sinë xuta xi cuacun vë? —Cuatjin cachja Jesús.

⁶ Cuatjin cachja me xi cjuahachuva me Felipe ta, tsèhë xi Jesús ne, ha vëë me mé xi sahmi me.

⁷ Ngajan xi Felipe ne, cuitjin cafayangui me:

—Sa xi chaan niñu cojo tujún xi chji rë xuta jo cientu nixtin ne, hisca chutaain xi sacú tsë tsë sinë jima ngu xuta vë. —Cuatjin cafayangui Felipe.

⁸ Ngajan xi ngu xuta ladu rë Jesús, Andrés hntsé Simón Pedru ne, cuitjin cachja me cojo Jesús:

⁹ —Nguehe secun ngu cha lihndi xi yaha hñú niñu cojo jo chu ti. Peru ¿mé chutaha vë xi sinë xuta xi cuarcumu cjín me? —Cuatjin cachja Andrés.

¹⁰ Ngajan xi Jesús ne, cuitjin cachja me:

—Tinújun cojo xuta vë ne, catiyuju me. —Cuatjin cachja me.

Quihndë ne, ngajan cahndë vëhë ne, jemu jyë cahndë tjín ndiji. Hya xi camá ne, ngajan caviyuju sacuaha hñú mil xihin.

¹¹ Ngajan xi Jesús ne, cafaha me niñu jan, hane, xi cafë casua me nacuechji rë Nina ne, sehe cavatëcja me niñu jan ngajñi rë xuta xi siu jan. Hacuanitjin ni casahmi me cojo chu ti jan. Casua me ha tucutjin xi meje sinë xuta jan.

¹² Hane hya xi ha catsë rë xuta xi cajinë me ne, sehe cachja Jesús cojo xuta ladu rë me jan cuitjin:

—Quihndë ne, chjayun yëjë xi cavángui vë ne, cojo sa xi hacuün chajá hisca hitsë. —Cuatjin cachja Jesús.

¹³ Hane xi cafaya xuta ladu rë Jesús yëjë ni xi cavángui tsèhë hñú niñu xi cajinë yëjë xutacjín jan ne, catsinguitsë me tejó chajne.

¹⁴ Hane xi cavëë xuta cjuarcun xi casahmi Jesús jan ne, cuitjin cachja me:

—Cjuaquixi xi me vihi profeta xi cuinduva ngasunhndë. —Cuatjin cachja xuta jan.

¹⁵ Peru Jesús ne, ha vëë me xi ha tu hora sa xi cjuaha xuta me cojo ngujoyë camahani xi suaxa rë me xi cuma tijun me. Vëhë xi Jesús ne, cavetjuxin nga me, quiji suvá ni me hisca rcu ndetjún.

Quiji ntsacu Jesucristu xcun nandá

¹⁶ Quihndë ne, xi quiji hora jan ne, quijijne xuta ladu rë Jesús tjehe laguna.

¹⁷ Hane xi cavisehen me ngu barcu ne, cavuya canduva nga me ngunda vihi tsèhë laguna xi cjue me nandya Capernaum. Hya xi camá ne, camajñu, peru Jesús ne, cjëë cjuetjengui me xuta ladu rë me jan.

¹⁸ Hane hora vëhë ne, xi jercu tu hñu camahani tivanga tjo ne, sacuaha xi sexu nandá tsèhë laguna jan.

¹⁹ Ha xcun xi ha quiji me xi cuacun jan cojo barcu sacuaha hñu o sa jyun kilómetro xcun nandá jan ne, cavëë me xi nduva ntsacu Jesús xcun nandá, tisahmitiña me tsèhë barcu. Hane xuta ladu rë me jan ne, catsacjun me camá.

²⁰ Peru Jesús ne, cachja me cuitjin cojo xuta ladu rë me jan:

—Ngahan vi. Xicarcuun. —Cuatjin cachja me.

²¹ Ngajan xi xuta ladu rë Jesús jan ne, cojo yëjë ni cjuasua ne, cafahatsja me Jesús cahntsua barcu. Hane ha tu ñahñu cafehe barcu cojo rë me nangui quixí, cahndë hiscan cjuí me.

Cavanguise xuta Jesús

²² Hane xi camá nchujun jan ne, xutacjín xi caviyuju ngunda vëhë tsèhë laguna jan ne, catsinguitsjen me xi nguñña ne, ngu tu tu barcu tacun jan. Hacuaha vëë me xi Jesús ne, quijiin me cojo xuta ladu rë me barcu vëhë ta suvá ni xuta ladu rë Jesús quiji me.

²³ Peru ngujo barcu xi canduva tsèhë nandya Tiberias ne, cafehe tiña hiscan xi cajinë xutacjín jan niñu hora xi cafë casua Nai naja nacuechji rë Nina.

²⁴ Hane xi cavëë xutacjín jan xi hacuün Jesús hacuün xuta ladu rë me siu cuaha me jan ne, sehe cavisehen me barcu xi sehe cafehe jan, quiji me nandya Capernaum xi cavanguise me Jesús.

Jesucristu ne, sacuaha niñu xi sua cjuahñu me

²⁵ Hane xi casacu rē xuta xi cuacun jan Jesús ngunda vihi tsēhē laguna jan ne, cavinenguise me cuitjin:

—Maestro, ¿janihya canduvun nguēhe ni? —Cuatjin cavinenguise xuta xi cuacun jan.

²⁶ Ngajan xi Jesús ne, cuitjin cafayangui me:

—Cuichjá cojo nuju cjuaquixi ta ngayujun ni ngayun ne, nduvuntjengun ná, peru hacuiin ngatsē rē xi cahyun cjuarcun xi casahme ta ngatsē rē xi cachinu niñu jan hisca xi catsē nuju.

²⁷ Nihñu ngatsē rē xichine, peru hacuiin xichine xi vetsun ta xichine xi hacuiin vetsun hacuaha hisca sua cjuahñu xatsē. Vēhē xichine xi suá nuju ngahan xi Quihndi rē Xuta Jain ngahan, ngahan xi sahme cjuarcun cojo sa xi cumatsejen xi cjuaquixi jain xi Nina Nahmi naha catsingatju ná me. —Cuatjin cafayangui Jesús.

²⁸ Ngajan xi xuta xi cuacun jan ne, cuitjin cavinenguise me cojo Jesús:

—¿Hacutjin ndatjin nihñi, cojo sa xi nihñi hacutjin xi chuya rē Nina? —Cuatjin cavinenguise xuta jan.

²⁹ Hane Jesús ne, cuitjin cafayangui me:

—Cuitjin meje rē Nina xi nihñu: catamangu tacún cojo ná, ngahan xi catsingatju ná me.

—Cuatjin cafayangui Jesús.

³⁰ Ngajan xi xuta jan ne, cuitjin cavinenguise me Jesús:

—¿Mé cjuarcun nihñu xi sacú chutsijín, cojo sa xi cumangu tacún cojo nuju? ¿Mé xi nihñu?

³¹ Yējē ni xutachanga naja ne, cajinē me niñu xi camá cojo scuan maná ngajan ngu xín camahani tsēhē nandya, sacuatjin camahindu xcun xujun rē Nina xi chja cuitjin: “Nina ne, tsēhē ngahnga catsingatju me niñu xi cajinē xuta.” Cuatjin camahindu. —Vēhē cja xi cavinenguise xuta xi cuacun jan Jesús.

³² Ngajan xi Jesús ne, cuitjin cachja me cojo xuta jan:

—Cuichjá cojo nuju cjuaquixi ta hacuiin Moisés xi casua me niñu xi nduva tsēhē ngahnga ta Nahmi naha xi sua nuju me niñu jain xi nduva tsēhē ngahnga.

³³ Niñu xi sua Nina ne, vēhē niñu xi nduvajne tsēhē ngahnga hacuaha sua rē xuta cjuahñu. —Cuatjin cachja Jesús.

³⁴ Hane xuta xi cuacun jan ne, cuitjin cafehya me cojo Jesús:

—Tatá, tuhun niji niñu vēhē nchunchujun ni. —Cuatjin cafehya xuta jan.

³⁵ Ngajan xi Jesús ne, cuitjin cachja me:

—Ngahan xi sacuaha niñu jan xi sua cjuahñu ngahan. Xuta xi cuisehen me ladu naha xi mangucacun me cojo ná ne, ña tsē rē xahasen rē me cjuandaja, sacuaha xi ha quihndē cumavajin rē me cumaxindaaín rē me ngundiya nga.

³⁶ Ngahan ne, ha cachjá cojo nuju ta ha tichutsujun xcusun xi sahme peru manguaain tacún cojo ná.

³⁷ Yējē ni xuta xi Nahmi naha casua ná me ne, cuinduvatjengui ná me. Hane me xi cuinduvatjengui ná ne, hatuxa tsitjungueen me ta,

³⁸ tsēhē xi ngahan ne, xi canduvajne tsēhē ngahnga ne, hacuiin xi sahme sacuatjin xi meje ná ta sacuatjin xi meje rē me xi catsingatju ná.

³⁹ Hane me xi catsingatju ná vē ne, meje rē me xi hisca ngu xuta tsēhē yējē ni me xi casua ná me ne, tsichajan me ta tsicúya me cjuahñu nixtin xi chjaháchuva rē sa nima sa xuta cojo cjuatacun rē.

⁴⁰ Hacuaha Nahmi naha ne, meje rē me xi yējē ni xuta xi vijnercu me yo ngahan xi Quihndi rē Nina ngahan hacuaha cumangu cacun me cojo ná ne, sacú rē me cjuahñu xatsē. Hane ngahan tsicúya me cjuahñu nixtin xi tsichuva Nina sa nima sa xuta. —Cuatjin cachja Jesús.

⁴¹ Vēhē xi xutaxa rē yungun xi cuacun jan ne, cavetsihin cavisiajmihma me tsēhē Jesús ta, tsēhē xi cachja Jesús ta: “Ngahan sacuaha niñu xi nduvajne tsēhē ngahnga ngahan.”

⁴² Cuitjin cavisiajmihma me:

—¿Hacuiin cha Jesús vihi, xi quihndi rē José? ¿Hacuiin ha hyan nahmi rē cha hacuaha ha hyan naa rē cha? ¿Hacutjin má xi quihndē ne, chja cha xi tsēhē ngahnga canduvajne cha ni? —Cuatjin cavisiajmihma me.

⁴³ Ngajan xi Jesús ne, cuitjin cachja me cojo xutaxa rē jan:

—Camá ni cuinújunhmú cojo xingun xingu xingu ngayun.

⁴⁴ Xuta xi cuma cuisehen me ladu naha ne, suvá ni xuta xi cuisecoo Nahmi naha, me xi catsingatju ná. Me vēhē xi cuma cuisehen me, hane ngahan tsicúya me cjuahñu nixtin xi tsichuva Nina sa nima sa xuta.

⁴⁵ Cuitjin camahindu xcun xujun rē Nina xi catsihindu profeta: “Suvá Nina scuxaha me cjuatacun rē yējē ni xuta.” Cuatjin camahindu. Hane xuta xi vetaharcu cja rē Nina hacuaha Nina vuxaha me cjuatacun rē ne, visehen me ladu naha.

⁴⁶ Hacuuin xi ha tjin yo xi cavutsejen rë Nahmi naha ta suva ni ngahan xi tsëhë Nina canduva ne, ngahan xi cahvë Nahmi naha.

⁴⁷ Cuichjá cojo nuju cjuaquixi ta yo xi mangucacun cojo ná ne, tjin rë cjuahñu xatsë.

⁴⁸ Ngahan xi sacuaaha niñu xi sua cjuahñu ngahan.

⁴⁹ Yëjë ni xutachanga nuju ne, cajinë me niñu xi camá cojo scuan maná ngajan ngu xín camahani tsëhë nandya, peru cavechú nixtin xi cahme me.

⁵⁰ Peru niñu xi nduvajne tsëhë ngahnga xi chjá ngahan tsëhë ne, sa xi yo sinë niñu vëhë ne, cueyaain.

⁵¹ Ngahan xi quicun ngahan ne, ngahan xi sacuaaha niñu xi canduvajne tsëhë ngahnga jan ngahan. Sa xi ngu xuta sinë me niñu vëhë ne, handasa cueya me ne, peru hasen rë me ne, cjue xcun Nina. Niñu xi suá ngahan vë ne, hacui yojo naha xi suá cojo sa xi xuta ngasunhndë ne, sacú rë me cjuahñu xatsë. —Cuatjin cachja Jesús cojo xutaxa rë.

⁵² Hya xi camá ne, xutaxa rë jan ne, cavetsihin cavisajmicjan me tsëhë Jesús ngajñi rë me cojo xicjin me, cuitjin cachja me:

—¿Hacutjin cuma sua cha xi cuajyihí vë yojo rë cha xi xinëë ni? —Cuatjin cachja xutaxa rë jan.

⁵³ Hane Jesús ne, cuitjin cachja me cojo xuta xi cuacun jan:

—Cuichjá cojo nuju cjuaquixi ta sa xi ngayun xinuu yojo naha ngahan xi Quihndí rë Xuta Jain ngahan hacuaaha siuun jni naha ne, tsajin nuju cjuahñu xi cjuaquixi.

⁵⁴ Xuta xi jinë me yojo naha hacuaaha hvi me jni naha ne, tjin rë me cjuahñu xatsë, hacuaaha ngahan tsicúya me cjuahñu nixtin xi tsichuva Nina sa nima sa xuta.

⁵⁵ Cuatjin cuma ta, tsëhë xi yojo naha ne, vëhë comida xi cjuaquixi, hane jni naha ne, vëhë nandá xi cjuaquixi.

⁵⁶ Me xi jinë yojo naha hacuaaha hvi me jni naha ne, visehen me yojo naja, hacuaaha ngahan ne, visehen yojo rë.

⁵⁷ Nahmi naha, me xi hatuxa tjin rë cjuahñu ne, catsingatju ná me, hane ngatsë rë me vëhë xi teña cjuahñu ngahan. Ha chuva vëhë ni ne, xuta xi jinë ná ne, cueña me cjuahñu ngatsë naha.

⁵⁸ Cuatjin sahmi niñu xi canduvajne tsëhë ngahnga. Hacuuin tangun cojo niñu xi cajinë xutachanga nuju ta cavechú nixtin xi cahme me. Ha ndaja xuta xi sinë me niñu xi chjá ngahan ne, handasa cueya me ne, peru hasen rë me ne, cjue xcun Nina.

⁵⁹ —Cuatjin cachja Jesús hya xi cavicuya me xuta ngu yungun ngajan nandya Caper-naum.

Cjua xi sua machaya naja tsëhë cjuahñu xatsë

⁶⁰ Hya xi camá ne, jemu cjin xuta ladu rë Jesús xi cuitjin cachja me hya xi cahndë me cjuajan:

—¡Jemu choho visiajmi me! ¡Scaain naja cojo cjuahñu vëhë! —Cuatjin cachja me.

⁶¹ Peru Jesús ne, ha vëë me cojo cjuatacun rë me xi cuatjin visiajmihma xuta ladu rë me xi cuacun jan. Vëhë xi cachja me cuitjin:

—Sa xi meje cuetjuncun tsëhë ndiya naha ngatsë rë cjuahñu xi cachjá cojo nuju vë ne,

⁶² ¿mé ningatuhun tacún sa xi chutsujun xi cúa cjuëneje nga ngahnga hiscan xi cavitejña titjun, ngahan xi Quihndí rë Xuta Jain ngahan?

⁶³ Hasen rë Nina ne, vëhë xi sua cjuahñu. Peru ngu xuta ngasunhndë ne, hatuxa cumaji sahmi me cuatjin. Yëjë ni cjuahñu xi ngahan cachjá cojo nuju ne, vëhë sua machaya nuju tsëhë Hasen rë Nina cojo tsëhë cjuahñu xi sua.

⁶⁴ Peru tjin yahnga ngayun xi manguaain tacún cojo ná. —Cuatjin cachja Jesús ta, tsëhë xi hisca ntsacu cavetsihin ne, ha vëë me yo xuta xi cumanguaain cacun cojo rë me hacuaaha ha vëë me yo xi sahmi rë me entregadu.

⁶⁵ Hacuaaha cachja sa me cuitjin:

—Vëhë xi cuatjin cachjá cojo nuju xi xuta xi cuma cuisehen me ladu naha ne, suvá ni xuta xi cuichja Nahmi naha xi cuisehen. —Cuatjin cachja Jesús.

⁶⁶ Ngatsë rë vëhë xi jemu cjin xuta ladu rë Jesús ne, quiji ngaxtun me, hacuaaha ha quihndë catsujyín me cojo Jesús.

⁶⁷ Ngajan xi Jesús ne, cavinenguise me xuta ladu rë me xi tejó jan cuitjin:

—¿Hacuuin cojo ngayun meje cuangunxun? —Cuatjin cavinenguise me.

⁶⁸ Hane Simón Pedru ne, cuitjin cafayangui me:

—Ngayun nai naha, ¿yo cuanguintjenguin?, ta ngayun ne, tjin nuju cjuahñu xi sua machaya niji tsëhë cjuahñu xatsë.

⁶⁹ Hacuaaha ngayin ne, mangutacún cojo nuju hacuaaha hyin xi tsëhë Jain Nina ngayun. —Cuatjin cafayangui Simón Pedru.

⁷⁰ Ngajan xi Jesús ne, cuitjin cachja me:

—Handasa ngahan suva cavaxejen nuju ngayujun ni xi tejó ngayun, peru ngajñi nuju ne, jiyajñi ngu xi ha jiya xitsehen xahasen rë. —Cuatjin cachja Jesús.

⁷¹Jesús ne, tichja me tséhë ngu cha tséhë ngajñi rë xi tejó xuta ladu rë me, ngu cha xi hmí rë Judas, quihndí rë Simón Iscariote. Cuatjin cachja me ta, tséhë xi cha vëhë sahmi cha me entregadu cojo condra rë me.

7

Jesucristu cojo xicjin me

¹ Xi cavatju vëhë ne, catsujyihya Jesús ngujo nandya tséhë distritu Galilea. Miji tsujyihya me nandya xi siu ladu tséhë distritu Judea ta, tséhë xi xutaxa rë yungun ne, tivanguise me Jesús xi tsiquehen me.

² Quihndë ne, ha camatiña suhi tséhë Ndihya Tsjian, suhi xi sahmi xuta tjë rë Israel.

³ Ngajan xi me xi xicjin Jesús jan ne, cuitjin cachja me cojo Jesús:

—Tihin ngajan distritu Judea, cojo sa xi hacuaha cojo xuta ladu riji xi siu jan ne, scuëë me xcusun xi nihñi ta

⁴ tséhë xi ngu cha xi meje rë xi cumachaya rë xuta xcusun xi sahmi cha ne, hacuiin táha hma sahmi cha. Ngaye ta cuatjin jemu nihñi cjuandaja ne, ningacuín rë yëjë xuta cjuandaja vëhë. —Cuatjin cachja xicjin Jesús cojo rë me ta,

⁵ tséhë xi me xi cuacun vë ne, camanguaain cacun me cojo Jesús.

⁶ Ngajan xi Jesús ne, cuitjin cafayangui me:

—Cjëë cuechú nixtin xi sahme mé xi sahme. Peru ngayun ne, tu mé ni nixtin ne, ndatjin xi cuma nuju.

⁷ Ngayun ne, cumaji choho scuëë nuju xuta, peru ngahan ne, choho vëë ná me ta, tséhë xi ngahan ne, chjá cjuaquixi xi xcusun xi sahmi me ne, hatuxa tsehen.

⁸ Tángun ni ngayun ta ngahan ne, cjuéen suhi vëhë. Cjuéen ta cjëë cuetjuca nixtin xi sahme mé xi sahme. —Cuatjin cafayangui Jesús.

⁹ Xi cavatju cachja me cojo xicjin me cjua vëhë ne, cavéjña ni me nangui rë me.

Quiji Jesucristu suhi tséhë Ndihya Tsjian

¹⁰ Hane xi cavatju quiji xicjin Jesús suhi jan ne, hacuaha cojo Jesús quiji me. Peru hacuiin táha tsejen ta sacuaha xi táha hma quiji me.

¹¹ Hya xi camá ne, xutaxa rë yungun jan ne, cavanguise me Jesús hiscan jima suhi jan. Cuitjin cavinenguise me:

—¿Jani tacun cha vëhë? —Cuatjin cavinenguise me.

¹² Hane xutacjin jan ne, jercu visiajmihma me ngajñi rë me tséhë Jesús. Ngujo me ne, cuitjin cachja me:

—Ngu xuta ndaja me. —Cuatjin cachja me.

Peru ngujo nga xuta ne, cuitjin cachja me:

—¡Jéya, vîndacha cha xutacjin! —Cuatjin cachja me.

¹³ Peru tsajin hisca ngu xuta xi cachjatë me tséhë Jesús ta, tséhë xi tsacjun me xutaxa rë yungun.

¹⁴ Quihndë ne, hya xi camavasen tijima suhi jan ne, quiji Jesús yungun xi matitjun, sehe cavetsihin cavicuya me xuta cjua rë Nina.

¹⁵ Hane xutaxa rë yungun jan ne, quijircun rë me xi cuatjin jemu ndaja chja Jesús. Cuitjin cachja me ngajñi rë me cojo xicjin me:

—¿Hacutjin má xi cuarcu vechú cjuatacun rë cha vë xi hisca hacuiin cavutaya cha? —Cuatjin cachja me.

¹⁶ Ngajan xi Jesús ne, cuitjin cachja me cojo xutaxa rë xi cuacun jan:

—Cjua xi vicuyá rë xuta ne, hacuiin cjua naha suva ta cjua rë me xi catsingatju ná.

¹⁷ Sa xi ngu xuta meje sahmi me sacuatjin xi meje rë me xi catsingatju ná ne, ngajan sacú cumachaya rë me tséhë cjua xi vicuyá, ¿há xi tséhë Nina ne? o ¿há xi nduva tséhë cjuatacun naha suva?

¹⁸ Xuta xi chja me cjua xi nduva tséhë cjuatacun rë suvá me ne, meje sahmi jyë sahmi hnga suvá me yojo rë me. Peru xuta xi meje sahmi jyë sahmi hnga me me xi catsingatju rë me ne, me vëhë ne, quixi me cojo cjua rë me hacuaha tsajin cjuatsehen cahntsua xahasen rë me.

¹⁹ Moisés ne, casua nuju me ley rë Nina, peru hisca ngu ngayun nihñuchuan sacuatjin chja ley vëhë. ¡Tséhë vëhë rë xi meje nicuhun ná! —Cuatjin cachja Jesús.

²⁰ Ngajan xi xutacjin jan ne, cuitjin cafayangui me:

—¿Yo xitsehen xi cachja cojo nuju? ta nguehe ne, tsajin yo xi meje tsiquehen nuju. —Cuatjin cafayangui xutacjin jan.

²¹ Hane xi cafayangui Jesús ne, cuitjin cachja me:

—Ngayujun ni ngayun ne, quijircun nuju ngatsë rë ngu xcusun xi casahme nixtin xi chjahájenda rë.

²² Peru suvá Moisés hacuaha cavejña me xcusun xi xtí chuxin rë quihndi xihin. (Xi cjuaquixi ne, hacuuiin Moisés ta xutachanga nuju xi cavejña me xcusun vëhë.) Hane vëhë xi ngayun ne, vichun chuxin rë quihndi xihin handasa nixtin xi chjahájenda rë.

²³ Sa xi vichun chuxin rë quihndi xihin nixtin xi chjahájenda rë cojo sa xi nihñuchuhun sacuatjin cja xi chja ley rë Moisés ne, ¿mé má cuatjin ma cjan nuju cojo ná xi casahme xi camandaja camahani ngu xuta nixtin xi chjahájenda rë ni?

²⁴ Ha quihndë hacuuiin tujyë nichuvun ná ta nichuvun ná cojo ngu cjuatacun xi cjuaquixi. —Cuatjin cachja Jesús.

¿Jani hiscan canduva Jesucristu?

²⁵ Ngajan xi ngujo xuta nandya Jerusalén ne, cuitjin cachja me ngajñi rë me:

—¿Hacuuiin me vihi xi vinchise rë xi cueya ni?

²⁶ Peru chutsujun ta cuajyihí me secun me tichja tichja me cojo xuta, hane ndastu ngu cja chja xutaxa rë cojo rë me. ¡Hyaan sa xi vëëndaja xutaxa rë xi me vihi xi catsingatju jain Nina me!

²⁷ Me vihi ne, ha hyan jani canduva me, peru hya xi cuinduva me xi Nina tsingatju rë ne, tsajin yo vëë jani cuetju me cuinduva me. —Cuatjin cachja xuta xi cuacun jan.

²⁸ Ngajan xi Jesús ne, xi quijinduju sa cavicuaya me xuta ngajan yungun xi matitjun ne, jercu hñu cachja me cuitjin:

—¿Há quixi xi hyun ná hacuaha hyun jani canduva? Peru ngahan ne, hacuuiin cjuatacun naha suva xi canduva. Me xi catsingatju ná ne, hatuxa quixi me cojo cja rë me, peru ngayun ne, hyúun me.

²⁹ Ngahan ne, hvë me ta, tsëhë xi hiscan tacun me ne, ngajan canduvá. Hacuaha me vëhë catsingatju ná me. —Cuatjin cachja Jesús.

³⁰ Tsëhë xi cuatjin cachja Jesús cja vëhë ne, vëhë xi meje cjuaha xuta xi cuacun jan me. Peru tsajin yo xi cavetahatsja rë me ta, tsëhë xi cjëë cuetjucaa nixtin xi cuatjin cuma.

³¹ Hane jemu cjin xuta ngajñi rë xutacjin jan ne, camangu cacun me cojo Jesús. Cuitjin cachja me:

—Hya xi cuinduva me xi Nina tsingatju rë ne, ¿há hitsë sa cjin cjuarcun sahmi me xi cuma rë cjuarcun xi casahmi me vihi? —Cuatjin cachja xuta xi cuacun jan.

Catsingatju xutaxa rë yungun cha xi cjuaha rë Jesucristu

³² Hane ngujo cha fariseo ne, cahndë cha xi visiajmihma xutacjin jan ngajñi rë me cojo xicjin me cja vëhë. Ngajan xi yëjë ni nahmi xi matitjun cojo cha fariseo jan ne, catsingatju me mayu cojo nisë rë cha xi chjahá rë Jesús.

³³ Hane Jesús ne, cuitjin cachja me:

—Ngujo nixtin sa xi cuitejña cojo nuju, sehe cúa cjuë nga hiscan tacun me xi catsingatju ná.

³⁴ Ngayun ne, cuinchunsun ná, peru sacuiin nuju ngahan ta, tsëhë xi hiscan xi cuitejña ne, cumaji cuangun. —Cuatjin cachja Jesús.

³⁵ Ngajan xi xutaxa rë jan ne, cavinenguise xicjin me cuitjin:

—¿Jani cjue cha xi cuijyihí vi xi sacuiin naja cha? ¿Há cjue cha ngu nangui cjin, cjue tjengui cha xuta naja xi cavitsojo ngajñi rë xutaxin hane ngajan cuicuaya cha xutaxin jan ni?

³⁶ ¿Mé vijne cja xi chja cha xi cuinchaseen cha ne, sacuiin naja cha, tsëhë xi hiscan cuejña cha ne, cumaji cuanguen? —Cuatjin cavinenguise xicjin xutaxa rë jan.

Nandá xi sua cjuahñu

³⁷ Quihndë ne, nixtin xi cajnetaha suhi jan ne, vëhë nixtin jyë tsëhë suhi jan. Hane casecun Jesús cachjahñu me cojo xuta cuitjin:

—Sa xi tjin yo xi xinda rë ne, catinduva tjengui ná catihí.

³⁸ Xuta xi manguacacun me cojo ná ne, cuatju me sacuatjin chja xujun rë Nina xi chja cuitjin: “Cuetju tsëhë xahasen rë me sacuaha nandá xi ña vangatë xi sua rë me cjuahñu xatsë.” —Cuatjin cachjahñu Jesús.

³⁹ Xi cuatjin cachja Jesús ne, cachja me tsëhë Hasen rë Nina xi sehe sacú rë xuta xi manguacacun me cojo Jesús. Cuatjin cachja Jesús ta, tsëhë xi Nina ne, cjëë sua me Hasen rë me, tsëhë xi Jesús ne, cjëë cuma jyë cuma hnga me cojo Hasen rë me.

Hacuuiin ngu ni cjuatacun catsingataha cacun xutacjin

⁴⁰ Hane xi cahndë xutacjin jan cja vëhë ne, ngujo me ne, cuitjin cachja me:

—Me vëhë ne, cjuaquixi xi me vëhë profeta xi jemu nechanyan rë. —Cuatjin cachja ngujo me.

⁴¹ Hane ngujo nga me ne, cuitjin cachja me:

—Me vèhè xi Tsingatju Nina. —Cuatjin cachja me.

Peru ngujo nga me ne, cachja me cuitjin:

—¡Peru Me xi Tsingatju Nina ne, hacuiin ngajñi rë xuta Galilea cuetjújñi me!

⁴² ¡Ha hyan xi xujun rë Nina ne, chja ta Me xi Tsingatju Nina ne, cuinduva me tsèhè tjë rë xutachanga naja David, ngajan Belén hiscan nangui rë David! —Cuatjin cachja me xi cuacun jan.

⁴³ Cuatjin camá xi ngatsë rë Jesús ne, hacuiin ngu ni cjuatacun catsingataha cacun xutacjin jan.

⁴⁴ Vèhè xi ngujo xuta jan ne, meje cjuaha me Jesús cjuecojo me ndavaya. Peru tsajin yo xi cavetahatsja rë me.

Camanguaain cacun xutaxa rë cojo Jesucristu

⁴⁵ Hya xi camá ne, mayu cojo nisë rë cha ne, cavuya quiji nga cha xcun nahmi xi matitjun cojo xcun cha fariseo xi cuacun jan, hane xutaxa rë xi cuacun jan ne, cuitjin cachja me cojo mayu jan:

—¿Mé má canduvuun cojo cha? —Cuatjin cachja me.

⁴⁶ Ngajan xi cha mayu cojo nisë rë cha jan ne, cuitjin cafayangui cha:

—¡Cjèë camahani cuinuhyin xi chja ngu xuta sacuatjin chja me vèhè! —Cuatjin cafayangui cha.

⁴⁷ Hane cha fariseo jan ne, cuitjin cachja cha cojo cha xi cuacun jan:

—¡Tu ma rë sa xi cojo ngayun camandacha ngayun!

⁴⁸ ¡Ngayun ne, hyun ta hisca ngu xutaxa rë, hisca xi ngu xuta fariseo ne, cjèë cumangu cacun me cojo cha xi cuajiyihi vè!

⁴⁹ Peru xutacjin xi cuacun hisca hvín hacutjin chja ley rë Moisés ne, ¡miji rë Nina me! —Cuatjin cachja cha fariseo jan.

⁵⁰ Ngajan xi ngu cha fariseo xi hmí rë Nicodemo, cha xi quiji tjengui rë Jesús hatsëë ne, cuitjin cachja cha cojo cha xi cuacun vèhè:

⁵¹ —Chja ley naja ta cumaji nihña castigu ngu xuta xi cjèë cuinuhyan mé cuichja me hacuaha sacú naja cjuaquixi mé casahmi me. —Cuatjin cachja cha Nicodemo.

⁵² Ngajan xi cha fariseo xi cuacun jan ne, cuitjin cafayangui cha:

—¿Hacuaha cojo ngayun má ngayun xuta rë distritu rë Galilea ni? Chutayun xujun rë Nina ne, sehe ngajan sacú cumachaya nuju ta ngajan Galilea ne, cuetjinjñii hisca ngu profeta. —Cuatjin cafayangui cha fariseo xi cuacun jan.

Chjuun xi cachjahá rë xcun cjuatsehen xi tisahmi

⁵³ Hya xi camá ne, jima ngu xuta jan cafe me ndava me.

8

¹ Peru Jesús ne, cavetju me quiji me ndetjún Olivu.

² Hane xi casahasen camá nchujun jan ne, cavuya quiji nga Jesús ndatsen yungun xi matitjun. Hane yèjë xuta jan ne, casahmitiña me tsèhè Jesús. Hane xi quiji cavéjña Jesús ne, sehe cavetsihin cavicuya me xuta jan.

³ Ngajan xi ngujo cha vicuya cjuachacun cojo ngujo cha fariseo ne, cafehecojo cha ngu chjuun xi cachjahá rë na xcun cjuatsehen xi tisahmi na cojo ngu xihin xi hacuiin xihin rë na. Hane cha xi cuacun jan ne, quiji cavisecon cha na ngajñi rë xuta hiscan tacun Jesús,

⁴ sehe cachja cha cojo Jesús cuitjin:

—Maestro, chjuun vihi ne, cachjahá rë na xcun cjuatsehen xi tisahmi na cojo ngu xihin xi hacuiin xihin rë na.

⁵ Quihndë ne, xcun ley xi cavejña naja Moisés ne, cavitexa me xi tu yo ni xuta xi sahmi xcusun vèhè ne, cueya me cojo ndyojo. Ngayun ne, ¿mé xi cuinújun?

⁶ —Cuatjin cavinenguise cha xi cuacun vèhè, xi tifahachuva cha Jesús, cojo sa xi sacú rë cha chuva rë xi cuinchajyë cha me.

Ngajan xi Jesús ne, catsiquindi me yojo rë me, sehe cavetsihin catsihindu me nangui cojo rcutsja me.

⁷ Hane tsèhè xi cjuinduju sa tivinenguise cha xi cuacun jan Jesús ne, catsinguixi me yojo rë me, sehe cachja me cojo cha cuitjin:

—Tu jarë ni ngayun xi tsajin jyë nuju ne, ngayun tjun tjun tetuhun rë na ndyojo. —Cuatjin cachja Jesús.

⁸ Hane sehe catsiquindi nga me yojo rë me, hane catsihindu sa me nangui.

⁹ Hane xi cahndë cha xi cuacun jan xi cuatjin cachja Jesús ne, ta vèë me xi hacuiin tyjahi cjuatacun rë me, chuva ngu chuva ngu cha cavetju cha cafe cha. Cavetsihin cavetju tjun

tjun cha xi hitsë sa changá. Hane camá suvá sa Jesús, cojo chjuun xi secun ngajñi rë xutacjín jan.

¹⁰ Hane xi catsinguixi me yojo rë me ne, cavinenguise me chjuun jan cuitjin:
—Ngayun chjuun, ¿jarë me ne? ¿Há tsajin yo xi casahmi nuju castígu? —Cuatjin cavinenguise Jesús.

¹¹ Ngajan xi chjuun jan ne, cuitjin cafayangui na:
—Tsajin yo, tatá. —Cuatjin cafayangui na.

Ngajan xi Jesús ne, cuitjin cachja me:
—Ngahan ne, hacuaha sahme nuju castigu. Cuma cuangun, peru ha quihndë xi canihñuu sa cjuatsehen. —Cuatjin cachja Jesús.

Jesucristu ne, sacuaha hasen xi cuma rë xuta

¹² Hya xi camá ne, cachja nga Jesús cojo xutacjín jan cuitjin:
—Ngahan ne, sacuaha hasen xi cuma rë xuta ngasunhndë ngahan. Xuta xi cuisehen me ladu naha ne, hatuxa cuiyijin me ngajñi jñú ta ngajñi hasen xi sua cjuahñu xatsë cuiyuju me. —Cuatjin cachja Jesús.

¹³ Ngajan xi cha fariseo xi cuacun jan ne, cuitjin cachja cha cojo Jesús:
—Ngayun ne, tinújun favor nuju suvun. Vêhë xi cjuá xi nújun ne, tsajin rë cjuaquixi. —Cuatjin cachja cha.

¹⁴ Hane xi cafayangui Jesús ne, cuitjin cachja me:
—Handasa chjá favor naha suva ne, cjuá xi chjá ne, cjuaquixi ta, tsêhë xi ngahan ne, hvë jani canduva hacuaha hvë jani cýa cjuë nga. Peru ngayun ne, hyúun jani canduva hacuaha hyúun jani cýa cjuë nga.

¹⁵ Ngayun ne, xi nichuvun xuta cojo cjuatacun rë me ne, chuva xi tsingatahacacun xuta ngasunhndë ne, cuatjin ningatuhuntacún. Ngahan ne, titsichuvaan hisca ngu xuta cojo cjuatacun rë me.

¹⁶ Peru sa xi tsichúva ngu xuta ne, hatuxa cjuaquixi cjuá xi cuichjá ta, tsêhë xi hacuiin suva sahme ta ngahan cojo me xi catsingatju ná nihñi tangun.

¹⁷ Xcun ley xi vitexa nuju ne, hacuaha camahindu xi hya xi jo xuta sua me cjuaquixi rë me xcun xutaxa rë hane ngu tangun ni cjuá chja me ne, cjuaquixi cjuá xi chja me.

¹⁸ Ngahan xi chjá favor naha suva, hane Nahmi naha xi catsingatju ná me ne, hacuaha cojo me chja me favor naha. —Cuatjin cafayangui Jesús.

¹⁹ Ngajan xi cha fariseo jan ne, cuitjin cavinenguise cha Jesús:
—¿Jani tacun nahmi nuju ni? —Cuatjin cavinenguise cha.
Hane Jesús ne, cuitjin cafayangui me:

—Hacuiin ngahan hyun ná ne, hacuiin Nahmi naha hyun me. Sa xi ngahan hyun ná ne, hacuaha hyun Nahmi naha. —Cuatjin cafayangui Jesús.

²⁰ Cjuá vëhë ne, cachja Jesús hya xi tivicuya me xuta ngajan yungun xi matitjun, ngu ndihya hiscan xi siu alcancia. Peru hisca ngu xuta cafaain rë me, tsêhë xi cjëë cuetjucaa nixtín xi cuatjin cuma.

“Cumaji cuangun hiscan xi cjuë”, chja Jesucristu

²¹ Hya xi camá ne, quijinduju sa cachja Jesús cojo xuta cuitjin:
—Ngahan ne, cuëtju cjuë, hane ngayun ne, cuinchunsun ná. Peru ngatsë rë cjuatsehen xi cún ngayun ne, cuechuun xcun Nina hya xi cueyun. Hiscan xi cjuë ne, ngayun ne, cumaji cuangun. —Cuatjin cachja Jesús.

²² Ngajan xi xutaxa rë xi cuacun jan ne, cuitjin cachja me ngajñi rë me cojo xicjin me:
—Tu ma rë sa xi cjue tsiquehen suvá me yojo rë me xi cuatjin chja me xi hiscan cjue me ne, cumaji cuangun. —Cuatjin cachja xutaxa rë xi cuacun jan.

²³ Ngajan xi Jesús ne, cuitjin cachja me cojo me xi cuacun vë:
—Ngayun ne, tsêhë nguehe nangui ngayun. Ngahan ne, tsêhë ngahnga ngahan. Ngayun ne, tsêhë ngasunhndë vihi ngayun. Ngahan ne, hacuiin tsêhë ngasunhndë vihi ngahan.

²⁴ Vêhë xi cuatjin cachjá cojo nuju xi ngatsë rë cjuatsehen xi cún ngayun ne, cuechuun xcun Nina hya xi cueyun. Sa xi macjaain nuju xi Ngahan Vi, hmí ná ne, ngatsë rë cjuatsehen xi cún ngayun ne, cuechuun xcun Nina hya xi cueyun. —Cuatjin cachja Jesús.

²⁵ Ngajan xi xuta xi cuacun jan ne, cavinenguise me Jesús cuitjin:
—¿Yo ngayun ni? —Cuatjin cavinenguise me.
Hane Jesús ne, cuitjin cachja me:

—¡Sacuatjin cachjá cojo nuju hisca ntsacu cavetsihin!
²⁶ Jemu tjin ná cjuá xi cuichjá tsujun, hacuaha jemu tjin xi cjuaháchuva tsujun. Peru me xi catsingatju ná ne, quixi jain me cojo cjuá rë me, hane ngahan ne, cjuá xi cáhndë xi cachja me ne, cjuá vëhë xi chjá nguehe ngasunhndë. —Cuatjin cachja Jesús.

²⁷ Peru xutaxa rë xi cuacun jan ne, cajni rcu me xi Jesús ne, tsëhë Nina Nahmi naja xi tichja me.

²⁸ Vëhë xi Jesús ne, cuitjin cachja me:

—Hya xi ngayun chjunihngun ná ngahan xi Quihndi rë Xuta Jain ngahan ne, hya cuijne rcun xi Ngahan Vi hmí ná. Hane ngahan ne, hatuxa tsajin mé xi sahme xi cojo cjuatacun naha suva ta sacuaa cjua xi cachja Nahmi naha cojo ná ne, cjua vëhë xi chjá.

²⁹ Hacuaha me xi catsingatju ná ne, tacun me cojo ná, cavejñaai ná me xi suva ta, tsëhë xi ngahan ne, hatuxa sahme tutjin xi chuya rë me. —Cuatjin cachja Jesús.

³⁰ Hane xi cachja Jesús cjua vëhë ne, jemu cjín xuta camangu cacun me cojo rë me.

Cuëhëndaya naja cjuaquixi

³¹ Ngajan xi Jesús ne, cachja me cuitjin cojo xutaxa rë yungun xi camacjain rë tsëhë cjua rë me:

—Sa xi ngayun cuangun nduju xi quitahá rcun cjua naha ne, quixi xi ha camá ngayun xuta ladu naha.

³² Hacuaha cuijne rcun xi hmí rë cjuaquixi, hane cjuaquixi jan ne, cuëhëndaya nuju. —Cuatjin cachja Jesús.

³³ Ngajan xi xutaxa rë xi cuacun jan ne, cuitjin cafayangui me:

—Peru ngayaan ne, tjë rë xutachanga naja Abraham má ngayaan, hane cjëë camahani cuma ngayaan mosu hndixahan rë xuta. ¿Mé má nújun xi cumandaya ngayin? —Cuatjin cafayangui me.

³⁴ Hane Jesús ne, cuitjin cafayangui me:

—Cuichjá cojo nuju cjuaquixi ta yëjë ni xuta xi hinchá me ndiya rë cjuatsehen ne, hatuxa tjinñu me cojo cjuatsehen sacuatjin tjinñu ngu mosu hndixahan cojo nai rë.

³⁵ Ngu mosu hndixahan ne, hacuín hatuxa cuiyujuchandë ngajñi xuta xi ndava, peru ngu quihndi xi cjuaquixi ne, hatuxa tsëhë xuta xi ndava.

³⁶ Vëhë xi sa xi Quihndi rë Nina cuëhëndaya nuju ne, cumandaya jain ngayun cojo cjuaquixi.

³⁷ Ngahan ne, hacuaha hvë xi tjë rë Abraham má ngayun. Peru ngayun ne, tivinchun chuva rë xi nicuhun ná, tsëhë xi tuun cahndë xi cuisehen cjua naha cahntsua xahasen nuju.

³⁸ Ngahan ne, xcusun xi cahvë hiscan tacun Nahmi naha ne, tsëhë vëhë xi tichjá. Peru ngayun ne, sacuatjin canuhyun xi cachja nahmi nuju ne, cuatjin tiniñu. —Cuatjin cafayangui Jesús.

³⁹ Ngajan xi xutaxa rë xi cuacun jan ne, cuitjin cachja me:

—Nahmi nijí ne, hacuín xutachanga naja Abraham. —Cuatjin cachja me.

Ngajan xi Jesús ne, cuitjin cachja me:

—Sa xi quixi xi quihndi rë Abraham má ngayun ne, sacuatjin casahmi Abraham ne, hacuaha cuatjin nihñu.

⁴⁰ Ngahan ne, cachjá cojo nuju cjuaquixi xi cáhndë xi cachja Nina, peru quihndë ne, tivinchun chuva rë xi nicuhun ná. Xutachanga naja Abraham ne, casahmii me cuatjin.

⁴¹ Ngayun ne, sacuatjin casahmi nahmi nuju ne, hacuanitjin ni tiniñu. —Cuatjin cachja Jesús.

Ngajan xi xutaxa rë xi cuacun jan ne, cachja me cuitjin:

—Ngayin ne, hacuín quihndi xca ngayin. Nina ne, ngu ni me vëhë xi Nahmi nijí. —Cuatjin cachja xutaxa rë xi cuacun jan.

⁴² Hane Jesús ne, cuitjin cachja me:

—Sa xi quixi xi Nahmi nuju Nina ne, hacuaha canihñu hmu tacún ná ta, tsëhë xi ngahan ne, Nina catsingatju ná me, hane quihndë ne, ngeue teña. Ngahan ne, hacuín cjuatacun naha suva xi canduvá ta me vëhë catsingatju ná me.

⁴³ ¿Mé má vijni rcu cjua xi chjá? Cuatjin vijni rcu ta, tsëhë xi caain nuju visiñuju cjua naha.

⁴⁴ Ngayun ne, quihndi rë nahmi nuju Satanás ngayun, hane xcusun xi meje rë nahmi nuju ne, xcusun vëhë xi meje nihñu. Xitsehen xi matitjun vë ne, hisca ntsacu cavetsihin ne, hatuxa tsiquehen vë xuta. Hatuxa tsajin jiya vë ngajñi rë cjuaquixi ta, tsëhë xi tsajin cjuaquixi ngajñi rë cjuatacun rë. Hya xi chja xitsehen vë cjuandacha ne, chja sacuatjin xcusun rë suvá ta, tsëhë xi hatuxa ndacha, hacuaha nahmi rë yëjë ni cjuandacha.

⁴⁵ Peru ngahan ne, tsëhë xi chjá cjuaquixi ne, vëhë xi macjaain nuju ngahan.

⁴⁶ ¿Jarë ngayun xi cuma ninguxun xi ngahan ne, tjin jyë naha? Sa xi chjá xi cjuaquixi ne, ¿mé má macjaain nuju ngahan?

⁴⁷ Me xi tsëhë jain Nina ne, vetaharcu me cjua rë Nina. Ngayun ne, tsëhë xi hacuín tsëhë Nina ngayun ne, vëhë xi mijí cuetuhunrcun cjua rë me. —Cuatjin cachja Jesús.

Ngahan Vi hmí rë Jesucristu hisca chaja sa xi tsin Abraham

- ⁴⁸ Hane xutaxa rë xi cuacun jan ne, cuitjin cachja me cojo Jesús:
—¡Hatuxa cjuaquixi xi nújin hya xi nújin xi ngayun ne, ngu xuta samaritano ngayun hacuaha jiya xitsehen xahasen nuju! —Cuatjin cachja xutaxa rë jan.
- ⁴⁹ Ngajan xi Jesús ne, cuitjin cafayangui me:
—Tsajin xitsehen xahasen naha. Ngahan ne, fahárcun Nahmi naha, hane ngayun ne, choho nújun tsahan.
- ⁵⁰ Hacuaha mijí sahme jyë sahme hnga suva yojo naha. Tjin ngu me xi meje sahmi jyë sahmi hnga ná, hane me vëhë ne, tsichuva naja me cojo cjuatacun naja.
- ⁵¹ Cuichjá cojo nuju cjuaquixi ta xuta xi cuihndë me tsëhë cju naha ne, hatuxa tsajin nu tsajin nixtin xi cueya me. —Cuatjin cafayangui Jesús.
- ⁵² Hane xutaxa rë xi cuacun jan ne, cuitjin cachja me cojo Jesús:
—Quihndë matsejenndaja xi jiya jain xitsehen xahasen nuju. Xutachanga naja Abraham ne, cahme me, hacuaha yëjë profeta ne, cahme me, hane sehe ngayun nújun xi xuta xi cuihndë me tsëhë cju nuju ne, hatuxa tsajin nu tsajin nixtin xi cueya me.
- ⁵³ ¡Ja!, peru ¿há hitsë sa matitjun ngayun xi cuma rë xutachanga naja Abraham, me xi cahme ni? ¡Hacuaha cahme yëjë profeta! ¡Ngayun tinihñu yojo nuju sacuaha xi jemu matitjun ngayun! —Cuatjin cachja xutaxa rë jan.
- ⁵⁴ Hane Jesús ne, cuitjin cafayangui me:
—Sa xi sahme jyë sahme hnga suva yojo naha ne, cju xix cuichjá tsahan ne, cuenguiin camahani chji rë. Peru Nahmi naha, me xi nújun xi Nina nuju ne, me vëhë xi sahmi jyë sahmi hnga ná me.
- ⁵⁵ Ngayun ne, hyúun me, peru ngahan ne, hvë me. Sa xi ngahan cuichjá xi hveen me ne, tangun ndacha ngahan cojo nuju ngayun. Peru ngahan ne, hvë me, hacuaha vihndë tsëhë cju rë me.
- ⁵⁶ Xutachanga naja Abraham ne, jemu ndaja camá rë me xi satë rë me xi scuëë me nixtin xi cuiндуva ngahan. Hane cavëë jain me, hacuaha jemu sua camá rë me. —Cuatjin cafayangui Jesús.
- ⁵⁷ Ngajan xi xutaxa rë xi cuacun jan ne, cuitjin catsixcuehyu me Jesús:
—Hisca cjëë yachantë nu tjin nuju. ¿Há cahyun xutachanga naja Abraham ni? —Cuatjin cachja me.
- ⁵⁸ Hane Jesús ne, cuitjin cachja me:
—Cuichjá cojo nuju cjuaquixi ta hisca chaja sa xi tsin xutachanga naja Abraham ne, ngahan ne, Ngahan Vi hmí ná. —Cuatjin cachja Jesús.
- ⁵⁹ Vëhë xi xutaxa rë yungun xi cuacun jan ne, cafaha me ndyojo xi cuetaha me Jesús xi meje tsiqeehen me. Peru Jesús ne, cavetjuhmá me tsëhë yungun xi matitjun jan.

9

Camandaja ngu cha rcá casahmi Jesús

- ¹ Hya xi camá ne, xi cavatju Jesús ngu cahndë jan ne, cavëë me ngu cha rcá xi ha cuatjin rcá cha hisca hya xi catsin cha.
- ² Hane xuta ladu rë me jan ne, cuitjin cavinenguise me:
—Maestro, ¿yo casahmi cjuatsehen xi cuatjin rcá cha xi catsin cha? ¿Há súv cha vihi ne?, o há tsajin ne, ¿há xutacha rë cha? —Cuatjin cavinenguise me.
- ³ Ngajan xi Jesús ne, cuitjin cafayangui me:
—Hacuiin cha vihi ne, hacuiin xutacha rë cha casahmi me cjuatsehen ta cuatjin camá cojo sa xi ngatsë rë cjuandaja xi sahmi Nina cojo cha vihi ne, cumatsejen xa xi sahmi Nina.
- ⁴ Meje rë xi nihña xa rë me xi catsingatju ná jinguyëjë rë xi hasen sa ta cuechú hora xi cumajñu, hane tsajin yo xi cuma sahmi xa.
- ⁵ Jinguyëjë rë xi tejña nguehe ngasunhndë ne, sacuaha hasen xi cuma rë xuta nga-sunhndë ngahan. —Cuatjin cafayangui Jesús.
- ⁶ Xi cavatju cachja Jesús cju vëhë ne, sehe cacandi me natya rë me nangui, hane casahmi me hitsë ndasi, sehe catsufë me tuxcun cha rcá jan.
- ⁷ Sehe cachja me cojo cha cuitjin:
—Tángun tinchacjun ngajan nda Siloé. —Cuatjin cachja Jesús. (Siloé ne, meje cuichja Caningatjun rë.)
- Hya xi camá ne, quiji cha cavinchacjan cha. Xi tu cavuya cafe cha ndava cha ne, ha tsejen rë cha.
- ⁸ Ngajan xi xuta xi siu tahndee ndava cha cojo me xi cavëë rë cha xi casahmi cha caridad ne, cavinenguise xicjin me cuitjin:
—¿Hacuiin cha vëhë xi véjña sahmi caridad jan ni? —Cuatjin cavinenguise me xi cuacun jan.

⁹ Ngujo me jan ne, cuitjin cachja me:

—Juun, hacui cha vë. —Cuatjin cachja me.

Hane ngujo nga me ne, cuitjin cachja me:

—Cuatjin tsejen, peru hacuiin cha. —Cuatjin cachja me.

Hane suvá cha ne, cuitjin cachja cha:

—Ngahan vi. —Cuatjin cachja cha.

¹⁰ Ngajan xi xuta xi cuacun jan ne, cavinenguise me cha cuitjin:

—¿Hacutjin camá xi camandaja túxcun ngayun? —Cuatjin cachja me.

¹¹ Ngajan xi cha vëhë ne, cuitjin cafayangui cha:

—Me xi hmí rë Jesús ne, casahmi me hitsë ndasi, sehe catsufë me túxcun, sehe cachja me cojo ná xi cjué cuínchacjan nda Siloé. Hane xi cëjë cavincháçjan jan ne, camatsejen ná. —Cuatjin cafayangui cha.

¹² Cavinenguise nga me cha cuitjin:

—¿Jani tacun me ní? —Cuatjin cavinenguise me.

Hane cha vëhë ne, cuitjin cachja cha:

—Hveen. —Cuatjin cachja cha.

Fahatáha cha fariseo cha xi camandaja tuxcun

¹³ Ngajan xi xuta xi cuacun jan ne, quijicojo me cha xi sehe camatsejen rë jan hiscan xi siu cha fariseo.

¹⁴ Quihndë ne, nixtin xi casahmi Jesús ndasi hane casahmi me xi camandaja tuxcun cha rcá jan ne, nixtin xi chjahájenda rë.

¹⁵ Ngajan xi cha fariseo xi cuacun jan ne, hacuaha cavinenguise cha cha xi camandaja tuxcun jan hacutjin camá xi camatsejen rë cha. Hane cuitjin cafayangui cha:

—Ndasi catsufë me túxcun, sehe cëjë cavincháçjan, hane cama camatsejen ná. —Cuatjin cafayangui cha.

¹⁶ Hane ngujo cha fariseo xi cuacun jan ne, cuitjin cachja cha:

—Me vëhë ne, tsejen xi hacuiin Nina catsingatju rë me, tsëhë xi faharcuaain me nixtin xi chjahájenda rë. —Cuatjin cachja cha.

Peru ngujo nga cha ne, cuitjin cachja cha:

—Cumaji sahmi me cjuarcun xi cuacun vëhë sa xi ngu cha tsehen me. —Cuatjin cachja cha.

Hacuiin ngu tangun ni camá cjuá rë cha.

¹⁷ Hane ngajan xi cavuya cachja nga cha cojo cha xi camandaja tuxcun jan cuitjin:

—Quihndë ta casahmi me xi camandaja tuxcuin ne, ¿mé noje tsëhë me? —Cuatjin cachja cha.

Hane cha xi camandaja tuxcun jan ne, cuitjin cafayangui cha:

—Ngu profeta me. —Cuatjin cafayangui cha.

¹⁸ Peru xutaxa rë yungun jan ne, macjaain rë me xi titjun ne, rcá cha hane quihndë ne, tsejen rë cha. Hisca xi cajindaya me xutaxa rë cha xi camandaja tuxcun jan ne,

¹⁹ sehe cafahatáha rë me cuitjin:

—¿Há cha vihi xi quihndi nuju, cha xi nújun xi ha cuatjin rcá hisca hya xi catsin? ¿Hacutjin camá xi quihndë ne, tsejen rë cha? —Cuatjin cafahatáha me.

²⁰ Ngajan xi xutaxa rë cha ne, cuitjin cafayangui me:

—Hyin xi cha vihi xi quihndi niji cha, hacuaha ha cuatjin rcá cha hisca hya xi catsin cha.

²¹ Peru hyín hacutjin camá xi quihndë ne, tsejen rë cha. Hacuaha hyín yo xi casahmi xi camandaja tuxcun cha. Chjinengunsun rë cha ta ha jiya nu rë cha. Suvá cha sua nuju cha cjuaquixi rë cha. —Cuatjin cafayangui me.

²² Cuatjin cachja xutaxa rë cha ta, tsëhë xi tsacjun me xutaxa rë jan ta, xutaxa rë xi cuacun jan ne, ha casahmi tangun me cjuá xi yo xi cuichja xi Nina catsingatju me Jesús ne, tsichohotje rë me yungun.

²³ Vëhë xi xutaxa rë cha ne, cachja me: “Ha jiya nu rë cha ne, chjinengunsun rë cha.”

²⁴ Vëhë xi cajindaya nga xutaxa rë majo ndiya cha xi camandaja tuxcun jan, hane sehe cachja me cojo cha cuitjin:

—“Vëë Nina”, noje xi cuatjin camá. Ngayin ne, hyin xi me xi casahmi xi camandaja tuxcuin ne, ngu cha tsehen me. —Cuatjin cachja xutaxa rë jan.

²⁵ Ngajan xi cha vëhë ne, cuitjin cafayangui cha:

—Ngahan ne, hveen sa xi ngu cha tsehen me. Ngu xcusun ni xi hvë ne, titjun ne, rcá ngahan, peru quihndë ne, tsejen ná. —Cuatjin cafayangui cha.

²⁶ Hane xutaxa rë jan ne, cavinenguise me cha cuitjin:

—¿Mé casahmi me cojo ri? ¿Hacutjin casahmi me xi camandaja tuxcuin? —Cuatjin cavinenguise me.

²⁷ Hane cha vëhë ne, cuitjin cafayangui cha:

—Ha cachjá cojo nuju ne, mijí cuetuhunrcun. ¿Mé má meje cuisifñuju nga ngundiya? ¿Há cojo ngayun meje cuisuhun ladu rë me? —Cuatjin cafayangui cha.

²⁸ Hane xutaxa rë jan ne, cacjan me cojo cha, cuitjin cachja me:

—¡Ngaye xi ladu rë cha vëhë má ngaye! ¡Ngayin ne, ladu rë Moisés má ngayin!

²⁹ Ngayin ne, hyin xi Moisés ne, cachja me cjuá xi casua Nina me, peru cha vëhë ne, hisca hyíin jani cavetju cha canduva cha. —Cuatjin cachja me.

³⁰ Ngajan xi cha vëhë ne, cuitjin cafayangui cha:

—¡Jemu sihya xi ngayun ne, hyúun jani cavetju me canduva me, handasa casahmi me xi camandaja túxcun ngahan!

³¹ Ha hyan ta Nina ne, fahacuendaain me cjuá xi chja xuta tsehen. Peru sa xi ngu xuta faharcun me Nina hacuaha sahmi me hacutjin xi meje rë Nina ne, me vëhë ne, fahacuenda Nina cjuá xi chja me.

³² Cjëë camahani cuinuhya rë xi ngu xuta sahmi me xi mandaja tuxcun ngu xuta xi rcá me hisca hya xi catsin me.

³³ Sa xi hacuiin Nina catsingatju rë me vëhë ne, tsajin camahani mé xi cuma sahmi me. —Cuatjin cafayangui cha.

³⁴ Ngajan xi xutaxa rë jan ne, cuitjin cachja me:

—¡Ngaye ne, ngajñi rë cjuatsehen camahani catsin ngaye! ¡Machjiriin camahani ngaye xi cuicoye niji! —Cuatjin cachja me.

Sehe cavaxë me cha candatsen.

Xuta xi jñu tsëhë me

³⁵ Hya xi camá ne, camachaya rë Jesús xi cavaxë xutaxa rë yungun cha xi camandaja tuxcun jan candatsen. Hane xi casacu xicjin Jesús cojo cha ne, cachja me cojo cha cuitjin:

—¿Há mangutacún ngayun cojo me xi Quihndi rë Xuta Jain? —Cuatjin cachja me.

³⁶ Hane cha vëhë ne, cuitjin cafayangui cha:

—Tatá, tinújun cojo ná yo me vë ne, cojo sa xi cumangu cáacun cojo rë me. —Cuatjin cafayangui cha.

³⁷ Ngajan xi Jesús ne, cuitjin cachja me cojo cha:

—Ngayun ne, ha cahyun me ta, ngahan xi tichjá cojo nuju vi ne, ha ngahan xi Quihndi rë Xuta Jain ngahan. —Cuatjin cachja me.

³⁸ Hane cha vëhë ne, cuitjin cachja cha:

—Mangucáacun, Tatá. —Cuatjin cachja cha, sehe cafararcun cha me.

³⁹ Ngajan xi Jesús ne, cuitjin cachja me:

—Canduvá ngahan ngasunhndë vi ne, xi tsichúva xuta cojo cjuatacun rë me, sehe ngajan xi xuta xi cjëë ndaja cuijne rcu me cjuá rë Nina ne, cuijnercundaja me, hane xuta xi cuenda chja me xi jemu ndaja vijne rcu me cjuá rë Nina ne, cumajñu tsëhë me. —Cuatjin cachja Jesús.

⁴⁰ Hane ngujo cha fariseo xi hinchacun tiña hiscan secun Jesús ne, cahndë cha cjuá vëhë, hane cuitjin cachja cha:

—¿Peru hacuiin cojo ngayin jñu tsijin? —Cuatjin cachja cha.

⁴¹ Ngajan xi Jesús ne, cuitjin cachja me:

—Sa xi jñu tsujun ne, tsajin jyë nuju. Peru quihndë xi nújun xi hacuiin jñu tsujun ne, ngajan matsejen xi tjin jyë nuju. —Cuatjin cachja Jesús.

10

Ejemplu tsëhë paxtu rë chu tsánga

¹ Ngajan xi Jesús ne, cachja sa me cuitjin:

—Cuichjá cojo nuju cjuaquixi ta xuta xi visiin me táha tingotjo hnhua rë chu tsánga ta tu táha xín mijisun me hnhua ne, me vëhë ne, chëjë me hacuaha fahatahá cjuachan me.

² Peru me xi visehen táha tingotjo hnhua ne, me vëhë xi paxtu rë chu tsánga.

³ Cha xi quitahá cuidadu rë tingotjo hnhua ne, vuxaha cha tingotjo tsëhë me vëhë. Chu tsánga ne, vihndë chu xta rë me, hane jindaya me chu xi tsëhë me, jimangu chu cojo ñihi rë chu, sehe vaxë me chu.

⁴ Hane hya xi ha cavaxë me yëjë chu xi tsëhë me ne, sehe cjuí titjun me, hane chu tsánga ne, fitjengui chu me, tsëhë xi vëë chu xta rë me.

⁵ Peru jingu sa xuta ne, hatuxa cjuuin tjenguiin chu me ta tu cuanga chu tsëhë me, tsëhë xi hvíin chu xta rë jingu sa xuta jan.

⁶ Cuatjin cachja Jesús ejemplu vëhë cojo xuta xi huacun vë, peru cajnií rcu me mé vijne cjuá xi cachja Jesús.

Sacuaha paxtu rë chu xi ndaja sahmi cuidadu rë chu má Jesucristu

⁷ Jesús ne, cachja sa me cojo xutaxa rë xi cuacun jan cuitjin:

—Cuichjá cojo nuju cjuaquixi ta ngahan ne, sacuaaha tingotjo xi vatju chu tsánga ngahan.

⁸ Yějē ni cha xi cavetjujni ngajni rë xuta xi meje cumatitjun cha hya xi chaja sa cjuéhē ngahan ne, sacuaaha cha chējē cha, cha fahatahá cjuachan cha. Peru xuta ladu rë Nina ne, casahmicuendaain me cha, sacuatjin rë chu tsánga xi fitjenguiin chu jingu sa xuta.

⁹ Ngahan ne, sacuaaha tingotjo ngahan. Sa xi ngu xuta cuisehen me táha tingotjo jan ne, cuetjutje me. Hacuaha tsajin mé cumacjin cacun me cuetju cuisehen me jan, hane tsajin mé cuma chaja rë me.

¹⁰ Cha chējē ne, xi vinduva cha ne, súvá ni xi tsichējē cha, tsiquehen cha, hacuaaha tsinguetsun cha. Peru ngahan ne, canduvá cojo sa xi sacú rë xuta cjuahñu xatsé, hacuaaha jercu sacú camahani rë me cjuahñu véhē.

¹¹ Ngahan ne, sacuaaha paxtu rë chu xi jemu ndaja fahácuenda chu tsánga. Paxtu ndaja jan ne, hisca sua me yojo rë me xi cueya me ngatsé rë chu tsánga.

¹² Ngu mosu xi hacuiin paxtu rë chu má cha, hacuiin tséhē cha chu tsánga ne, xi scuéhē cha xi nduva tíña chu lobo ne, viyujutahá ni cha chu tsánga jan, hane vanga cha. Hane chu lobo jan ne, faha chu ngujo chu tsánga, sehe tsicangacojo chu chu xi yahnga jan tu nguehe tu ngajan.

¹³ Cuatjin sahmi cha ta, tséhē xi mosu ni má cha, hane marcuaain rë cha tséhē chu tsánga.

¹⁴⁻¹⁵ Ngahan ne, sacuaaha paxtu ndaja jan ngahan. Sacuatjin vëé ná Nahmi naha hane ngahan ne, hvē Nahmi naha ne, ha chuva véhē ni ne, ngahan ne, hvē chu tsahan hane chu tsahan ne, vëé chu ngahan. Hacuaha suá yojo naha xi cueya ngatsé rë chu.

¹⁶ Tjin sa ná chu tsánga xi hacuiin tséhē hnhchua vihi chu. Chu xi cuacun vë ne, hacuaaha meje rë xi sahme chu cuidadadu. Xi cuihndé chu xta naha ne, cuinduvatjengui chu ngahan, hane cuma tangun chu cojo chu xi ha tisahme cuidadadu, hacuaaha ngu ni ngahan xi paxtu rë chu.

¹⁷ Ngahan ne, hmu cacun ná Nahmi naha, tséhē xi suá yojo naha xi cueya, hane sehe sahme xi cúa nga cjuahñu.

¹⁸ Tsajin yo xi cjuahatahá cjuahñu naha ta ngahan ne, cojo cjuatacun naha suva suá yojo naha xi cueya. Tjin ná chuva rë xi suá yojo naha, hacuaaha tjin ná chuva rë xi sahme xi cúa nga cjuahñu. Cuatjin cavitexa ná Nahmi naha xi sahme. —Cuatjin cachja Jesús.

¹⁹ Hya xi camá ne, ngu ndiya nga hacuiin ngu tangun ni camá nga cjuá rë xutaxa rë jan ngatsé rë cjuá véhē.

²⁰ Hane jemu cjin me xi cuacun jan ne, cuitjin cachja me:

—Jiya xitsehen xahasen rë cha, véhē xi sca rë cha! ¡Venguin chji rë xi cuatjin visifñuju cjuá rë cha! —Cuatjin cachja me.

²¹ Peru yahnga nga me ne, cuitjin cachja me:

—Cjuá véhē ne, hacuiin cjuá rë ngu xuta xi jiya xitsehen xahasen rë me. ¿Ngu xitsehen ne, cumaji sahmi xi cumandaja tuxcun ngu xuta xi rcá me? —Cuatjin cachja yahnga me jan.

Tsitjungui xutaxa rë yungun Jesucristu

²² Quihndé ne, hya xi cavechú nixtin rë chan hnhchan ne, camá suhi rë yungun xi matitjun ngajan Jerusalén.

²³ Hane Jesús ne, tsuyihiya me ndatsen yungun xi matitjun, ngajan Nghama Ndihya tséhē Salomón.

²⁴ Hane xutaxa rë yungun jan ne, quiji caxinchacunndee me Jesús, sehe cachja me cojo me cuitjin:

—¿Jani hisca hya tuhun nihi cjuaquixi? Sa xi ngayun jain xi tsingatju Nina ngayun ne, tinújunquixun cojo nihi. —Cuatjin cachja xutaxa rë jan.

²⁵ Ngajan xi Jesús ne, cuitjin cafayangui me:

—Ha cachjá cojo nuju, peru macjaain nuju. Xcusun xi tisahme sacuatjin tivitexa ná Nahmi naha ne, xcusun véhē ni tsingacun yo ngahan. Peru ngayun ne, macjaain nuju,

²⁶ tséhē xi hacuiin xuta ladu naha má ngayun.

²⁷ Xuta xi ladu naha má me ne, tangun me sacuaaha chu tsánga. Me xi cuacun vë ne, vëé me xta naha, hacuaaha ngahan ne, hvē me, hane fitjengui ná me.

²⁸ Ngahan ne, suá rë me cjuahñu xatsé, hane hatuxa tsajin nu tsajin nixtin xi cjue hasen rë me xcun cjuafñihi, hacuaaha tsajin yo cuaxéxin rë me xi siu ntsa me.

²⁹ Xuta xi cuacun casua ná Nahmi naha ne, hitsé sa venguichji rë me xi cuma rë yějē sa xcusun. Hacuaha tsajin yo cuma cuaxéxin rë me xi siu tsja Nahmi naja me.

³⁰ Ngahan cojo Nahmi naja ne, ngu ni xahasen nihi, ngu ni cjuatacun nihi, ngu ni hasen nihi. —Cuatjin cafayangui Jesús.

³¹ Ngajan xi xutaxa rë xi cuacun jan ne, cafaha nga me ndoyojo xi cuetaha me Jesús xi tsiquehen me me.

³² Hane Jesús ne, cuitjin cachja me:

—Ngahan ne, jemu cjin xcusun ndaja casahme ngajñi nuju sacuatjin cavitexa ná Nahmi naja. Hane çjarë xcusun vëhë tsëhë xi cuetuhun ná ndoyojo ni? —Cuatjin cachja Jesús.

³³ Ngajan xi xutaxa rë jan ne, cuitjin cafayangui me:

—Hacuiin tsëhë ngu xcusun ndaja xi canihñi xi cuetihin ri ndoyojo ta ngatsë rë xi nixcuehyi Nina, ngatsë rë xi handasa ngu xuta ni ngaye ne, peru noje xi tangun ngaye cojo Nina. —Cuatjin cafayangui me.

³⁴ Ngajan xi Jesús ne, cuitjin cachja me:

—Ley rë Moisés xi vitexa nuju ne, ha ndaja hyun xi camahindu cjua vihi xi cachja Nina: “Ngayujun ni ne, nina ngayun.” Cuatjin camahindu.

³⁵ Ngajejen ni ne, ha hyan ta cjua xi chja xcun xujun rë Nina ne, hatuxa cjuaquixi jain. Hane Nina ne, cachja me nina tsëhë xuta xi cuacun cafahatsja cjua rë me.

³⁶ Quihndë ta Nina cavaxijin ná me hacuaha catsingatu ná me nguehe ngasunhndë ne, çhacutjin má xi nújun xi ngahan ne, choho chjá, tsëhë xi cachjá xi Quihndi rë Nina ngahan ni?

³⁷ Sa xi ngahan tisahmee xcusun xi cavitexa Nahmi naha xi sahme ne, xicamacjaain nuju ngahan.

³⁸ Peru sa xi tisahme ne, handasa cumacjaain nuju ngahan ne, ndastu tsëhë xcusun xi sahme ne, catamacjain nuju, cojo sa xi cuijne rcun ngundiyaxa ni xi Nahmi naja ne, jiya me xahasen naha, hane ngahan ne, tejñaya xahasen rë me. —Cuatjin cachja Jesús.

³⁹ Ngajan xi casahmi nga xutaxa rë jan cjuandya xi cjuaaha me Jesús, peru Jesús ne, cavetjutje me tsëhë xuta jan quiji me.

⁴⁰ Hya xi camá ne, cavetju Jesús quiji nga me ngunda vëhë tsëhë Ndajyë Jordán, ngajan hiscan xi casetaha Juan cavitenda me xuta ntsacu cavetsihin. Hane ngajan casetaha me.

⁴¹ Hane jemu cjin xuta quijitjengui me Jesús. Hane cuitjin cachja xingu xingu me cojo xicjin me:

—Juan ne, handasa casahmi me cjuarcun, peru yëjë ni cjua xi cachja me tsëhë me vihi ne, cjuaquixi jain.

⁴² Hane jemu cjin xuta camangu cacun me cojo Jesús ngajan cahndë vëhë.

11

Cjuaveya rë Lázaro

¹ Tacun ngu cha hmu rë xi hmí rë Lázaro, ngu cha Betania, nangui rë na María cojo na Marta tíchja na.

² Na María vëhë ne, na vëhë xi cavitejnu na ntsacu Nai naja ngu xcusun aceite xi jemu ndaja jne camahani hacuaha jercu hnga chji rë, sehe catsixiya na cojo tsjarcu na. Na vëhë xi hmu rë cha Lázaro hntsë na.

³ Ngajan xi catsijo na vëhë ne, catsingatu na cjua vihi tsëhë Jesús:

—Tatá, chutsujun ni, cha xi jemu vinga nuju jan ne, jemu hmu rë cha. —Vëhë cjua xi catsingatu na.

⁴ Hane xi cahndë Jesús cjua vëhë ne, cuitjin cachja me:

—Chíhin vëhë ne, cuetjincaain cjuaveya rë cha Lázaro cojo ta xi cuetjucaa ne, cuma jyë cuma hnga Nina cojo Hasen rë me, cojo sa xi Quihndi rë Nina ne, hacuaha cuma jyë cuma hnga me cojo Hasen rë me ngatsë rë chíhin vëhë. —Cuatjin cachja Jesús.

⁵ Quihndë ne, Jesús ne, jemu vinga rë me na Marta cojo tíchja na cojo cha Lázaro.

⁶ Peru xi camachaya rë Jesús xi hmu rë cha ne, casetaha me jo nixtin sa hiscan xi ha quitahá me jan.

⁷ Xi cavatju vëhë ne, sehe cachja me cojo xuta ladu rë me jan cuitjin:

—Cuyan cuanguen nga ngu cahndë tsëhë distritu Judea. —Cuatjin cachja me.

⁸ Ngajan xi xuta ladu rë me jan ne, cuitjin cachja me:

—Maestro, xutaxa rë yungun jan ne, ¡sehe tíña nixtin xi casahmi me cjuandya xi tsiquehen nuju me cojo ndoyojo! ¡Xi meje rë ne, cuanguun ngajan! —Cuatjin cachja me.

⁹ Hane Jesús ne, cuitjin cafayangui me:

—¿Hacuiin tejó hora tjin rë xi ngu nixtin ni? Quihndë xi cjëë cuechú hora xi cuichja Nina xi cueya ngahan ne, tsajin mé cuma ná, sacuatjin xtenguin naja xi nguinxtin tsëhë xi tsejen naja hasen rë tsuhi.

¹⁰ Peru xi cuechú hora xi cuichja Nina xi cueya ngahan ne, cueya, sacuatjin xtengui naja xi nixten tsëhë xi tsajin hasen xi cuma naja.

¹¹ Cuatjin cafayangui Jesús cjua vëhë, hane sehe cachja sa me cuitjin:

—Cha amigu naja, cha Lázaro ne, cafañafë cha. Peru cjuë ngahan tsingásca rë cha. —Cuatjin cachja Jesús.

¹² Ngajan xi xuta ladu rë me jan ne, cuitjin cachja me:

—Tatá, sa xi cafañafë jain cha ne, vëhë tsejen xi cumandaja cha. —Cuatjin cachja xuta ladu rë me jan.

¹³ Quihndë ne, cjuá xi cachja Jesús vë ne, tsëhë cjuaveya rë cha Lázaro. Peru xi má rë xuta ladu rë me jan ne, tichja me tsëhë nijñá ni rë cha.

¹⁴ Ngajan xi Jesús ne, cachja quixi me cuitjin:

—Cha Lázaro ne, cahme cha.

¹⁵ Hane ngahan ne, jemu ndama ná xi hacuini ngajan tejña hora vëhë ta, xi chutsujun hacutjin cuma ne, cumangu tacún cojo ná. Peru cuanguen tjenguen nima. —Cuatjin cachja Jesús.

¹⁶ Ngajan xi Tomás, me xi chja me tsëhë cha Lihma ne, cuitjin cachja me cojo xuta ladu rë Jesús xi yahnga jan:

—Hacuaha cuanguen ngayaan, cojo sa xi cueyan tangun cojo rë me. —Cuatjin cachja Tomás.

Sehe cavetju yëjë me quiji me cojo Jesús.

Sua Jesús cjuahñu hacuaha tsicuya me nima cjuahñu

¹⁷ Hya xi camá ne, xi cafehe me ngajan Betania ne, camachaya rë Jesús xi ha tjin rë ñuju nixtin xi jiyaniji nima Lázaro.

¹⁸ Betania jan ne, sacuaha chuva rë jyan kilómetro tacun tsëhë Jerusalén.

¹⁹ Hane jemu cjin xuta quiji tjengui me na Marta cojo na María xi sua me na cjuetacun tsëhë cjuaveya rë httsë na.

²⁰ Hane xi camachaya rë na Marta xi nduva Jesús ne, cavetju na quiji caphatsja na me. Peru na María ne, cavéjña ni na ndava na.

²¹ Hya xi camá ne, xi casacu xicjin na Marta cojo Jesús ne, cuitjin cachja na cojo rë me:

—Tatá, sa ngayun nechun nguehe ne, cahmii nima xingueen.

²² Peru hvë ta hisca quihndë ne, tu mé ni xi chjahyun rë Nina ne, sua nuju me. —Cuatjin cachja na.

²³ Ngajan xi Jesús ne, cuitjin cachja me cojo rë na:

—Nima xingun ne, cuya cjuahñu. —Cuatjin cachja Jesús.

²⁴ Hane na Marta ne, cuitjin cachja na:

—Hvë ta cuya nima xingueen cjuahñu hya xi hacuaha yëjë nima cuya cjuahñu, nixtin xi tsichuva Nina sa nima sa xuta. —Cuatjin cachja na.

²⁵ Ngajan xi Jesús ne, cuitjin cachja me cojo rë na:

—Ngahan xi suá cjuahñu hacuaha tsicuya nima cjuahñu. Xuta xi mangucacun me cojo ná ne, ha ndasa cueya me ne, peru cuya me cjuahñu.

²⁶ Hane yëjë xuta xi tjin rë me cjuahñu xatsë hacuaha mangucacun me cojo ná ne, hatuxa tsajin nu tsajin nixtin xi cjue hasen rë me xcun cjuañihi. ¿Há macjain nuju cjuá vëhë? —Cuatjin cachja Jesús.

²⁷ Ngajan xi na vëhë ne, cuitjin cafayangui na:

—Juun, macjain ná, Tatá. Macjain ná xi ngayun xi catsingatju nuju Nina, ngayun xi Quihndi rë Nina ngayun. Hacuaha ngayun xi jemu cavinechinyin nuju xi cuinduvun ngasunhndë. —Cuatjin cafayangui na Marta.

Jihnda Jesucristu xcun tsjun rë nima Lázaro

²⁸ Xi café cachja na Marta cuatjin ne, sehe cavuya na quiji jaha na na María tichja na. Hane xi cafehe na jan ne, sehe cajindayahma na na María, cuitjin cachja na:

—Cafehe maestru, hane jindaya me ngaye. —Cuatjin cachja na.

²⁹ Xi tu cahndë na María cjuá vëhë ne, marcu macjain cavisatjen na quiji tjengui na Jesús.

³⁰ Quihndë ne, cjëë sa cuisehen Jesús nandya ta secun cuaha me cahndë hiscan cavechútaha na Marta me.

³¹ Hane xuta xi siu cojo na María ndava na xi tisua me na cjuetacun ne, xi cavëë me xi marcu macjain cavisatjen na quiji na ne, quiji tjengui me na. Xi má rë me ne, xcun tsjun cjuí na, cojo sa xi ngajan squihnda na.

³² Hane xi cafehe na María hiscan secun Jesús ne, xi cavëë na me ne, quiji caticjacun na xcun me, sehe cachja na cuitjin:

—Tatá, sa xi ngayun nechun nguehe ne, cahmii nima xingueen. —Cuatjin cachja na.

³³ Hane xi cavëë Jesús xi cuatjin jihnda na hacuaha jihnda yëjë xuta xi ticojo na jan ne, camandya cacun me, jemu choho camahani camá rë xahasen rë me.

³⁴ Hane cuitjin cavinenguise me:

—¿Jani tacun tsjun xi caveyun nima? —Cuatjin cavinenguise me.

Hane xuta jan ne, cuitjin cafayangui me:

—Tatá, nduvun chutsujun. —Cuatjin cafayangui me.

³⁵ Hane cajihnda Jesús.

³⁶ Ngajan xi xuta jan ne, cuitjin cachja me ngajñi rë me:

—Chutsujun ni hacutjin catsihmu cacun me nima. —Cuatjin cachja me.

³⁷ Peru ngujo me ne, cuitjin cachja me:

—Me vihi xi casahmi me xi camandaja tuxcun cha rcá jan ne, ¿há camaji casahmi me xi cahmii nima vëhë? —Cuatjin cachja ngujo xuta jan.

Cavya nima Lázaro cjuahñu

³⁸ Ngajan xi Jesús ne, ngu ndiya nga jemu camandya cacun me. Sehe quiji me xcun tsjun. Tsjun jan ne, ngu ngujo, hane tingotjo rë ne, titsa ngu ndyojo.

³⁹ Hane Jesús ne, cuitjin cachja me:

—Chjuhunxun ndyojo vë. —Cuatjin cachja me.

Ngajan xi na Marta, tichja nima ne, cuitjin cachja na:

—Tatá, ha choho jne vë ta, ha tjin rë ñuju nixtin. —Cuatjin cachja na.

⁴⁰ Hane Jesús ne, cuitjin cachja me cojo rë na:

—Ha cachjá cojo nuju ta sa xi cumacjain nuju cjuá naha ne, ngayun ne, chutsujun hacutjin jyë hnga Nina cojo Hasen rë me. —Cuatjin cachja Jesús.

⁴¹ Hya xi camá ne, cachjaháxin rë ndyojo jan. Hane hora vëhë cavutsejenniji Jesús ngahnga, sehe cachja me cuitjin:

—Ngayun Nahmi naha, suá nacuechji nuju ta canihñucundun cjuá xi cachjá cojo nuju.

⁴² Hacuaaha ha hvë ta ngayun ne, hatuxa nihñucundun cjuá naha. Vëhë xi hacuiin nguyë xi cuichjá cojo nuju cjuá vihi, peru ngatsë rë xuta xi hinchacundee vi ne, vëhë xi cuitjin tichjá, cojo sa xi cumacjain rë me xi ngayun caningatjun ná. —Cuatjin cachja Jesús.

⁴³ Hane xi cajnetaha cachja me cuatjin ne, sehe ña cajindaya me cachja me cuitjin:

—¡Lázaro, tetjun! —Cuatjin cachja me.

⁴⁴ Hya xi camá ne, cavetju Lázaro tsëhë tsjun jan, tjinguiya tsjian ntsacu me, tjinguiya tsjian tsja me, hacuaaha tjihñu xcun me cojo ngu pañutu. Hane Jesús ne, cuitjin cachja me cojo xuta jan:

—Chundecjun tsjian vë sehe cumandaya me. —Cuatjin cachja Jesús.

Meje cjuaha xutaxa rë yungun Jesucristu

⁴⁵ Quihndë ne, jemu cjin xuta quiji cavusehenya rë na María hacuaaha cavëë me hacutjin casahmi Jesús. Hane xuta xi cuacun jan ne, camangu cacun me cojo Jesús.

⁴⁶ Peru ngujo xuta ne, quiji cachja me cojo cha fariseo hacutjin casahmi Jesús.

⁴⁷ Ngajan xi yëjë nahmi xi matitjun cojo cha fariseo xi cuacun jan ne, casahmi me ngu junta. Hane xcun junta jan ne, cuitjin cachja me:

—¿Mé ndatjin nihña? ta cha xi cuajyihí vë ne, jemu tisahmi cha cjuaracun.

⁴⁸ Sa xi tsajin mé xi nihña ne, yëjë xuta ne, camangu cacun me cojo cha. Hane vëhë xi xutaxa rë Roma ne, cuma cjan rë me, hane cjuahatahá me yungun xi matitjun naja hacuaaha cjuahatahá me gobiernu xi tinihña. —Cuatjin cachja me xi cuacun jan.

⁴⁹ Peru ngu me xi cuacun jan xi hmí rë Caifás, me xi hacuaaha má nahmi xi matitjun tsëhë yëjë nahmi nu vëhë ne, cachja me cuitjin:

—Ngayun ne, hyúun camahani.

⁵⁰ Vijnii rcun xi ndaja tsujun xi ngu xihin ni cueya ngatsë rë yëjë ni xuta, hane hacuiin yëjë xuta cueya me. —Cuatjin cachja Caifás.

⁵¹ Peru me vëhë ne, hacuiin cachja me cojo cjuatacun rë suvá me ta, ngatsë rë xi má me nahmi xi matitjun nu vëhë ne, cachja me cjuá xi casua Nina me xi Jesús cueya me ngatsë rë xuta.

⁵² Peru hacuiin ngatsë rë suvá ni xuta tjë rë Israel ta hacuaaha cueya me cojo sa xi sahmí tangun me yëjë quihndi rë Nina xi tinguitsojo, sehe cuma yëjë me sacuaaha ngu ni xcusun xuta.

⁵³ Ngajan xi hisca nixtin xi cachja Caifás cuatjin ne, nahmi xi matitjun cojo cha fariseo xi cuacun jan ne, cavyuju me cjuatacun rë me xi tsiquehen me Jesús.

⁵⁴ Vëhë xi Jesús ne, catsujyihyaaintë me nandya xi siu ladu rë distritu Judea ta cavetjuxin me tsëhë ngajan, quiji me ngu nandya xi hmí rë Efraín, tiña hiscan xi faha rë xi ha jemu xín camahani tsëhë nandya. Hane ngajan casetaha me cojo xuta ladu rë me.

⁵⁵ Quihndë ne, ha camatiña suhi tsëhë Pascua. Hane jemu cjin xuta quiji me Jerusalén chaja sa nixtin rë suhi jan xi cuma tyjahí me sacuatjin xi ha xcusun rë xutachanga.

⁵⁶ Jemu siu me cuidadu há cjehe Jesús suhi jan. Hane jinguyëjë rë xi hinchacun me yungun xi matitjun jan ne, vinenguise xicjin me xingu xingu me cuitjin:

—¿Mé xi má nuju? ¿Há cuinduvaain me suhi? —Cuatjin cavinenguise xicjin me.

⁵⁷ Quihndë ne, nahmi xi matitjun cojo cha fariseo xi cuacun jan ne, ha cavitexa me xi yo xi vëë hiscan tacun Jesús ne, sua cumachaya rë me, cojo sa xi chjahá rë Jesús.

12

Xtejnu aceite ntsacu Jesucristu

¹ Jyun nixtin chaja sa xi cuechú suhi tsëhë Pascua ne, cavuya quiji Jesús ngajan Betania, hiscan xi tacun cha Lázaro, cha xi catsicuya Jesús cjuahñu hya xi cahme cha.

² Hane ngajan casehendaja ngu comida xi sinë me. Na Marta tinvina na comida, peru cha Lázaro ne, cojo cha tijinë cha cojo Jesús cojo me xi yahnga sa.

³ Hane na María ne, cafaha na ngu frascu xi hinchá jo cuarto aceite nardo xi jemu ndaja jne hacuaha jemu hnga chji rë, quiji cavitejnu na ntsacu Jesús, sehe catsixiya na cojo tsjarcu na. Hane cahntsua ndihya jan ne, ña catsë rë cojo xta rë aceite jan.

⁴ Ngajan xi Judas Iscariote, ngu cha ladu rë Jesús, cha xi sahmi rë me entregadu ne, cuitjin cachja cha:

⁵ —¿Mé má cuatjin casahmi na? Aceite vë ne, cuma xteña hane sacú chji rë jyan cientu nixtin xa xi sahmi ngu xuta, hane tujún vëhë ne, tahan rë xuta yuma. —Cuatjin cachja cha.

⁶ Peru Judas ne, hacuiin tsëhë xi marcun rë cha tsëhë xuta yuma xi cuatjin cachja cha ta tsëhë xi chëjë cha, hacuaha cha vëhë tjin tsja cha tsá xi hinchá yëjë tujún, hane jiya hora ne, tsichëjë cha tsë tsë.

⁷ Ngajan xi Jesús ne, cuitjin cachja me:

—Xicanújjin cojo rë na. Catetjo na xi tjin rë na hisca hya xi seyaniji ngahan.

⁸ Xuta yuma ne, yëjë nu yëjë nixtin ne, siu me cojo nuju, peru ngahan ne, hacuiin yëjë nu yëjë nixtin tejña cojo nuju. —Cuatjin cachja Jesús.

Meje tsiquehen xutaxa rë yungun cha Lázaro

⁹ Hya xi camá ne, jemu xutacjin tsëhë nandya xi siu distritu Judea ne, camachaya rë me xi Jesús ne, Betania quitahá me. Ngajan xi quiji xuta ngajan, hacuiin tsëhë xi meje scuëë ni me Jesús ta hacuaha tsëhë xi meje scuëë me cha Lázaro, cha xi catsicuya Jesús cjuahñu.

¹⁰ Hane nahmi xi matitjun jan ne, caviyuju cacun me xi hacuaha cojo cha Lázaro tsiquehen me cha,

¹¹ tsëhë xi ngatsë rë cha vëhë ne, jemu cjín xuta titsitjungi me nahmi jan, hane tijimangu cacun me cojo Jesús.

Cafehe Jesucristu nandya Jerusalén

¹² Xi camá nchujun jan ne, xutacjin xi cafehe suhi jan ne, camachaya rë me xi Jesús ne, hacuaha nduva me Jerusalén.

¹³ Hane cafaha me xca jne, sehe cavetju me quiijtjengui me Jesús hiscan nduva me. Hane hisca jindaya me cachja me cuitjin:

—Jemu ndaja Nina! Jemu catsinchacun Nina me xi nduva vi tsëhë xi Nina catsingatju rë me, me xi cumatitjun tsajan ngayaan xuta tjë rë Israel! —Cuatjin cajindaya me cachja me.

¹⁴ Hane xi casacu rë Jesús ngu burru chihndë ne, sehe camiji me chu, sacuatjin camahindu tsëhë me xcun xujun rë Nina hiscan xi chja cuitjin:

¹⁵ ¡Xicarcuun ngayun xuta Jerusalén;

chutsujun ni, me xi matitjun tsujun ne, nduva me quisun me ngu burru chihndë!

¹⁶ Hya xi cuatjin camá ne, xuta ladu rë Jesús ne, cajni rcu me. Peru hya xi Jesús cama jyë cama hnga me cojo Hasen rë me ne, hya xi cavuya cjuahñu rë me hya catsinguitsjen xuta xi cuacun jan xi cuatjin camahindu tsëhë Jesús hane cuatjin jain cavatju me camá.

¹⁷ Xuta xi siu cojo Jesús hya xi cajindaya me cha Lázaro xi cuetju cha tsëhë tsjun hacuaha catsicuya me cha cjuahñu ne, casua me camachaya rë jingu sa xuta hacutjin camá.

¹⁸ Vëhë xi xutacjin jan ne, cavetju me quiijtjengui me Jesús, tsëhë xi camachaya rë me xi casahmi Jesús cjuarcun vëhë.

¹⁹ Vëhë xi cha fariseo ne, cachja cha ngajñi rë cha cojo xicjin cha cuitjin:

—Cahyun ni ne, tsajin mé xi cuma nihña. Chutsujun ta yëjë ni xuta ne, tjengui rë cha. —Cuatjin cachja cha.

Meje scutsejen ngujo xutaxín Jesucristu

²⁰ Quihndë ne, ngajñi rë xuta xi quiji me suhi xi cjuaharcun me Nina ne, hinchajñi ngujo xutaxín.

²¹ Hane me xi cuacun vëhë ne, quiijtjengui me Felipe, xuta Betsaida, ngu nandya tsëhë distritu Galilea, hane cuitjin cachja me:

—Tatá, ngayin ne, meje cuisiajmí cojo Jesús. —Cuatjin cachja me.

²² Ngajan xi Felipe ne, quiji cachja me cojo Andrés, sehe catsijo ni me quiji casua me camachaya rë Jesús.

²³ Ngajan xi Jesús ne, cuitjin cachja me cojo rë me:

—Cavechú hora xi ngahan xi Quihndi rë Xuta Jain ngahan ne, cuma jyë cuma hnga ngahan cojo hasen naha.

²⁴ Cuichjá cojo nuju cjuaquixi ta ngu tú rë trigu xi cjuinengui nangui ne, sa xi cueyaain ne, ha ngu tu tu ni má yëjë nu yëjë nixtin. Peru sa xi cueya ne, jemu cjín tjë sua.

²⁵ Xuta xi vangui me suvá ni xi ndaja cjuahñu rë me nguehe ngasunhndë ne, titsichajá me cjuandaja xi sua Nina me cjuahñu xatsë. Peru xuta xi marcuaain rë me tsëhë suvá ni xi ndaja cjuahñu rë me nguehe ngasunhndë ne, hatuxa sacú rë me cjuandaja xi sua Nina me cjuahñu xatsë.

²⁶ Xuta xi meje cuisehen me ladu naha ne, catinduva tjengui ná me. Hane hiscan xi cuitjña ngahan ne, hacuaha ngajan cuejña me xi má ladu naha. Xuta xi má me ladu naha ne, sahmi jyë sahmi hnga Nina Nahmi naja me. —Cuatjin cachja Jesús.

Chja Jesucristu tsëhë cjuaveya rë me

²⁷ Cachja sa Jesús cuitjin:

—Quihndë ne, jemu macjin cáacun. Peru ¿mé cuichjá ni? ¿Há cuichjá cuitjin: “Ngayun Nahmi naha, naxuntjun ná tsëhë xcusun xi cuátju cuma quihndë?” Peru cuichjaan cuatjin ta, tsëhë xi hatuxa canduvá xi cuatjin cuátju cuma.

²⁸ Ngayun Nahmi naha, tuhun cumachaya rë xuta hacutjin jyë hnga ngayun cojo Hasen nuju. —Cuatjin cachja Jesús.

Ngajan xi canuhya rë ngu xta xi canduva ngajan ngahnga xi cachja cuitjin:

—Ha casuá camachaya rë me, hacuaha cúa suá nga cumachaya rë me. —Cuatjin cachja xta jan.

²⁹ Hane ngujo xuta xi hinchacun jan xi cahndë me xta jan ne, cachja me ta chuhun xi catsingá. Hane ngujo nga me ne, cachja me xi ngu ángel cachja cojo Jesús.

³⁰ Ngajan xi Jesús ne, cuitjin cachja me cojo xuta jan:

—Hacuiin xi cuihndë ngahan xi cachja xta vëhë ta xi cuinuhyun ngayun.

³¹ Cavechú nixtin xi cuma chuya xuta cojo cjuatacun rë me. Cavechú nixtin xi cjuahatahá Nina gobiernu xi tisahmi Satanás.

³² Hane ngahan ne, hya xi tjunihnga ná tsëhë nangui ne, sahme xi xuta ne, cuisehen me ladu naha. —Cuatjin cachja Jesús.

³³ Xi cuatjin cachja Jesús ne, casua me camachaya rë xuta mé chuya rë cueya me.

³⁴ Ngajan xi xuta jan ne, cuitjin cafayangui me tsëhë Jesús:

—Ngayin ne, hyin xi chja ley ta me xi Nina tsingatju rë ne, tsajin nixtin xi cueya me. ¿Hacutjin má xi nujun ngayun xi me xi Quihndi rë Xuta Jain ne, tjunihnga rë me? ¿Yo me xi Quihndi rë Xuta Jain vé ni? —Cuatjin cafayangui xuta jan.

³⁵ Ngajan xi Jesús ne, cuitjin cachja me cojo xuta jan:

—Ha tu chúva sa nixtin xi ngahan xi sacuaha hasen ngahan ne, tejña ngajñi nuju. Tángun xcun sa cojo ndiya xi ha tivangun jinguyëjë rë xi tacun sa hasen ngajñi nuju, sa tu cuechútáha nuju jñú. Xuta xi cjui me ngajñi jñú ne, hvíin me janí cjui me.

³⁶ Vëhë xi jinguyëjë rë xi tejña ngajñi nuju ne, catamangu tacún cojo ná, cojo sa xi tsë rë xahsen nuju cojo cjuahasen naha. —Cuatjin cachja Jesús.

Jemu cjín xuta xi camanguaain cacun me cojo Jesucristu

Hane xi cavatju cachja Jesús cju vëhë ne, cavetju me quijhma me tsëhë xuta jan.

³⁷ Handasa cavëë xuta xi jemu cjín cjuarcun casahmi Jesús ne, peru camanguaain cacun me cojo rë me.

³⁸ Cuatjin camá xi cavetjucaa cju rë profeta Isaías xi camahindu xcun xujun rë Nina hiscan xi chja cuitjin:

Ngayun Nina niji, tsajin yo camacjain rë cju rë canújin;

Tsajin yo cajne rcu hacutjin xi hñu ngahñu rë Nina.

Cuatjin cachja profeta Isaías.

³⁹ Vëhë xi xuta jan ne, camaji camangu cacun me cojo Jesús ta, tsëhë xi hacuaha cachja nga profeta Isaías cuitjin:

⁴⁰ Sacuaha ngu xuta xi tsihñu me xcun ngu nga xuta cojo sa xi cumatsijin rë me ne,

cuatjin casahmi jñu Nina tsëhë cjuatacun rë xuta, cojo sa xi cuijnii rcu me

hacuaha cuyaain me ladu rë Nina xi sahmi Nina xi cumandaja me.

⁴¹ Cuatjin cachja Isaías cju vëhë ta, tsëhë xi cavëë me hacutjin jyë hnga Jesús cojo hasen rë me hane cuatjin cachja me tsëhë Jesús.

⁴² Handasa cuatjin casahmi Nina ne, jemu cjin xutaxa rë camangu cacun me cojo Jesús. Peru tsêhë xi tsacjun me cha fariseo ne, catsinguiiin me ngajñi rë xuta, sa tu cumachohotje rë me yungun.

⁴³ Xutaxa rë xi cuacun vë ne, hitsë sa meje rë me xi sahmi yehe sahmi hnga xuta me, xi cuma rë xi sahmi yehe sahmi hnga Nina me.

Cjua rë Jesucristu tsichuva rë xuta cojo cjuatacun rë me

⁴⁴ Ngu ndiya nga jan ne, jemu hñu cachja Jesús cuitjin:

—Xuta xi manguacacun me cojo ná ne, hacuiin suva ni manguacacun me cojo ná ta hacuaha manguacacun me cojo Nina Nahmi naja, me xi catsingatju ná.

⁴⁵ Hane xuta xi vijne rcu me yo ngahan ne, hacuaha vijne rcu me yo me xi catsingatju ná.

⁴⁶ Ngahan xi sacuaha hasen xi cuma rë xuta ngahan ne, canduvá nguehe ngasunhndë, cojo sa xi yëjë xuta xi manguacacun me cojo ná ne, cjuë xi jñu tsêhë cjuatacun rë me.

⁴⁷ Hane sa xi ngu xuta vetaha rcu me cjua xi chjá peru faharcuaain me ne, ngahan ne, tsichuvaan me cojo cjuatacun rë me ta, tsêhë xi ngahan ne, hacuiin canduvá xi tsichúva xuta cojo cjuatacun rë me ta canduvá xi cuáxëtje me.

⁴⁸ Xuta xi tsitjungui ná me hacuaha fahatsjaain me cjua naha ne, ha tjin yo xi tsichuva rë me. Cjua xi cachjá ne, cjua vëhë xi tsichuva rë me nixtin xi tsichuva Nina sa nima sa xuta.

⁴⁹ Ngahan ne, cjua xi cachjá ne, hacuiin cachjá cojo cjuatacun naha suva ta Nina Nahmi naja, me xi catsingatju ná ne, suvá me cavitexa ná me hacutjin meje rë xi cuichjá.

⁵⁰ Hane hvë ta cjua xi vitexa me vëhë ne, sua naja cjuahñu xatsë. Vëhë xi cjua xi chjá ne, suvá cjua xi cavitexa Nina Nahmi naja.

13

Vane Jesucristu ntsacu xuta ladu rë me

¹ Quihndë ne, cavechú nixtin xi chaja sa ngu nixtin xi cuma suhi tsêhë Pascua. Hane Jesús ne, ha vëë me xi cavechú hora xi cuetje me tsêhë ngasunhndë vihi, cjue tjengui me Nina Nahmi naja. Hatuxa catsihmu cacun me xuta ladu rë me xi siu ngasunhndë vihi, hacuaha hacuanitjin ni catsihmu cacun me hisca xi cahme me.

² Jesús cojo xuta ladu rë me ne, tijinë nguixun me. Hane cha Judas, quihndi rë Simón Iscariote ne, ha casahmi Satanás xi cuejña cacun cha xi sahmi entregadu cha Jesús.

³ Peru Jesús ne, ha vëë me xi ha cavejña Nina yëjë xcusun tsja me. Hacuaha ha vëë me xi hiscan tacun Nina canduva me, hane hacuaha ngajan ni cuya cjue nga me.

⁴ Hya xi camá ne, cavejña Jesús xi tijinë me jan ne, cavisatjenhnga me, sehe cavaxë me chingá rë me cavejñaxin me, hane cafaha me ngu toalla cavityanguitaha me.

⁵ Sehe cafaha me nandá cojo nisu, hane cavetsihin cavane me ntsacu xuta ladu rë me hacuaha catsixiya me cojo toalla xi tyjanguitaha rë me jan.

⁶ Hane xi cafehe me xcun Simón Pedru ne, cachja Pedru cuitjin:

—Tatá, ¿há xi ngayun cuanu ntsacú? —Cuatjin cachja Pedru.

⁷ Ngajan xi Jesús ne, cuitjin cafayangui me:

—Xcusun xi tisahme vi ne, vijñii rcun quihndë, peru ngascan ne, hya cuijne rcun. —Cuatjin cafayangui Jesús.

⁸ Hane Pedru ne, cuitjin cachja me:

—¡Hatuxa tsajin nu tsajin nixtin xi ngayun cuanu ntsacú! —Cuatjin cachja me.

Ngajan xi Jesús ne, cuitjin cafayangui me:

—Sa xi cuánee ntsacun ne, hacuiin xuta ladu naha ngayun. —Cuatjin cafayangui Jesús.

⁹ Ngajan xi Simón Pedru ne, cuitjin cachja me cojo Jesús:

—Tatá, sa cuatjin ne, ¡hacuiin suvá ni ntsacú ta hacuaha cojo ntsa cojo rcú tanu! —Cuatjin cachja me.

¹⁰ Ngajan xi Jesús ne, cuitjin cafayangui me tsêhë Pedru:

—Xuta xi ha cavinduya me ne, suvá ni ntsacu me meje rë xi cjuengui ta, tsêhë xi ha tyjahi me. Ngayujun ni ne, ha tyjahi ngayun. Peru ngu ngayun ne, hacuiin cuatjin. —Cuatjin cafayangui Jesús.

¹¹ Tsêhë xi ha vëë Jesús yo xi sahmi rë me entregadu, vëhë xi cachja me xi: “Hacuiin ngayujun xi tyjahi ngayun.”

¹² Hane xi cavatju cavane Jesús ntsacu xuta ladu rë me ne, sehe cavuya cavajá me chingá rë me, sehe quiji cafaha nga me cahndë rë me xcun maxë. Hane sehe cachja me cojo xuta ladu rë me cuitjin:

—¿Há vijne rcun xcusun xi casahme cojo nuju vë?

¹³ Ngayun ne, maestru niji hacuaha nai niji nújun tsahan. Hane ndatjin xi cuatjin nújun ta, tsêhë xi cuatjin jain.

¹⁴ Quihndé ne, quihndé ta ngahan xi nai nuju hacuaha maestru nuju ngahan cavane ntsacun ne, hacuaha meje rē xi cuatjin cuanu ntsacu xingun xingu ngayun.

¹⁵ Ngahan ne, cavejñá nuju ngu ejemplu vē, cojo sa xi sacuaha xcusun xi casahme cojo nuju vē ne, hacuaha cuatjin nihñu.

¹⁶ Cuichjá cojo nuju cjuaquixi ta ngu mosu hndixahan ne, hacuiin hitsē sa venguichji rē xi cuma rē nai rē, hacuaha ngu xi ningatjun rē ne, hacuiin hitsē sa matitjun xi cuma rē me xi catsingatju rē.

¹⁷ Quihndé ta ha vijne rcun cjuā vēhē ne, jemu ndaja tsujun sa xi nihñu cuatjin.

¹⁸ Peru ngahan ne, hacuiin tichjá tsujun ngayujun ni ta ngahan ne, ha hvē yo xi cavaxejen. Peru meje rē xi cuetjucaa cjuā xi camahindu xcun xujun rē Nina xi chja cuitjin: “Cha xi cajinē tangun cojo ná ne, camá cha condra naha.” Cuatjin camahindu.

¹⁹ Tichjá cojo nuju cjuā vēhē quihndé chaja sa xi cuetjucaa, cojo sa xi hya xi cuetjucaa ne, ngayun ne, cumacjain nuju xi Ngahan Vi hmí ná.

²⁰ Cuichjá cojo nuju cjuaquixi ta xuta xi cjuahatsja me tu yo ni xi tsingátju ne, tangun sacuaha xi cjuahatsja ná me ngahan suva. Hane xuta xi cjuahatsja ná me ne, tangun sacuaha xi cjuahatsja me Nahmi naha xi catsingatju ná me. —Cuatjin cachja Jesús cojo xuta ladu rē me.

Chja Jesucristu xi Judas sahmi rē me entregadu xcun xutaxa rē yungun

²¹ Xi cavatju cachja Jesús cuatjin ne, jemu camandya cacun me, hane cuitjin cachja me: —Cuichjá cojo nuju cjuaquixi ta ngu ngayun ne, nihñu ná entregadu. —Cuatjin cachja me.

²² Hane xuta ladu rē Jesús xi cuacun jan ne, cavutsejenya me xcun xicjin me xingu xingu me. Hvín camahani me yo tsēhē xi cuatjin cachja Jesús.

²³ Hane ngu cha ladu rē Jesús xi jemu vinga rē me ne, tjeheh rē Jesús ne, ngajan tijinē cha niñu.

²⁴ Vēhē xi Simón Pedru ne, casahmi rcu me cojo cha vēhē, sehe cachja me cuitjin:

—Chjinengunsun rē me yo tsēhē xi chja me. —Cuatjin cachja Pedru.

²⁵ Hane xi catsicuya cha vēhē xcun cha tiña xcun Jesús ne, sehe cavinenguisse cha me cuitjin:

—Tatá, ¿yo xi nújun vē? —Cuatjin cavinenguisse cha.

²⁶ Ngajan xi Jesús ne, cuitjin cafayangui me:

—Cha xi suá rē ngu rquí niñu vi hora xi cjuē tsingúsehen quinda ne, cha vēhē xi hacui cha. —Cuatjin cafayangui me.

Hane hora xi camá catingúsehen quinda me niñu jan ne, sehe casua me cha Judas, quihndi rē Simón Iscariote.

²⁷ Hane xi cavatju cafaha Judas ngu rquí niñu jan ne, hora vēhē cavisehen Satanás xahasen rē cha. Ngajan xi Jesús ne, cuitjin cachja me cojo cha:

—Xcusun xi nihñu ne, nihñu ni ngu ndiya xa. —Cuatjin cachja Jesús cojo cha.

²⁸ Peru hisca ngu me xi tijinē niñu jan hvín me mé má cuatjin cachja Jesús cojo cha.

²⁹ Yahnga me ne, catsingataha cacun me xi tsēhē xi Judas yaha cha tsá tujún ne, vēhē xi cachja Jesús cojo cha xi cjuē cuatsē cha xi mameje tsēhē suhi o sa xi sua cha tsē tsē xuta yuma.

³⁰ Hane xi cavatju cafaha cha ngu rquí niñu jan ne, ngutjen ni cavetju cha quiji cha. Hora vēhē ne, ha camajñu.

Cjuā xatsē xi cavitexa Jesucristu

³¹ Ngajan xi, xi cavetju Judas quiji cha ne, sehe cachja Jesús cuitjin:

—Ngahan xi Quihndi rē Xuta Jain Ngahan ne, quihndé cuetsihin cuma jyē cuma hnga ngahan cojo hasen naha, hacuaha ngahan tsingácun hacutjin jemu jyē hnga Nina cojo hasen rē me.

³² Hane sa xi ngahan tsingácun hacutjin jemu jyē hnga Nina cojo Hasen rē me ne, Nina ne, hacuaha tsingacun me hacutjin jemu jyē hnga ngahan cojo hasen naha. Hane ngutjen ni sahmi me cuatjin.

³³ Jemu chúva sa nixtin xi cuitejña cojo nuju, tsan. Ngayun ne, cuinchunsun ná, peru quihndé cuichjá cojo nuju sacuatjin cachjá cojo xutaxa rē yungun xi hiscan xi cjuē ne, cumaji cuangun.

³⁴ Nguehe cuitéxa nuju ngu cjuā xatsē cuitjin: “Meje rē xi nihñu hmu tacún xingun xingu ngayun. Sacuatjin casahme hmu cáacun nuju ngahan, cuatjin meje rē xi nihñu hmu tacún xingun.”

³⁵ Hane xi cuatjin tjin cjuahmutacun ngajñi nuju cojo xingun ne, ngajan cumachaya rē yējē xuta ta ngayun ne, xuta ladu naha má ngayun. —Cuatjin cachja Jesús.

Chja Jesucristu xi cuichja Pedru xi hvlin me yo Jesucristu

³⁶ Ngajan xi Simón Pedru ne, cuitjin cavinenguise me:

—Tatá, ¿jani cuangun ni? —Cuatjin cavinenguise me.

Ngajan xi Jesús ne, cuitjin cafayangui me:

—Hiscan xi cjué ne, quihndé ne, cumaji cuanguntjengun ná. Peru xi cuma ngascan ne, cuanguntjengun ná. —Cuatjin cafayangui Jesús.

³⁷ Hane Pedru ne, cuitjin cachja me cojo Jesús:

—Tatá, tsajin mé má cumaji cjué tjënguë nuju quihndë. Hisca yojo naha suá ngatsë nuju. —Cuatjin cachja Pedru.

³⁸ Ngajan xi Jesús ne, cuitjin cafayangui me:

—¿Há xi tuhun yojo nuju ngatsë naha? Cuichjá cojo nuju cjuaquixi ta chaja sa xi squihnda xahnda ne, ngayun ne, ha jyan ndiya cuinújun xi hyúun yo ngahan. —Cuatjin cafayangui Jesús.

14

Sacuaha ndiya xi cjui xcun Nina má Jesucristu

¹ Quijinduju sa cachja Jesús cojo xuta ladu ré me cuitjin:

—Xicamandyaain tacún. Catamangu tacún sa cojo Nina, hacuaha catamangu tacún sa cojo ná.

² Ngajan ngahnga hiscan tacun Nahmi naha ne, jemu cjín cahndé tjin xi cuiyuju yëjë xuta ladu ré me. Sa xi hacuiin cuatjin ne, ngahan ne, ha cachjá cojo nuju. Peru xicamacjiin tacún ta cjué cuëhëndaja cahndé xi cuma nuju.

³ Hane hya xi ha cëjë cavëhëndaja cahndé xi cuma nuju ne, sehe cúa nga, hane cjuécojo nuju, cojo sa xi hiscan xi cuiteña ne, hacuaha ngajan cuinechun.

⁴ Hacuaha hiscan xi cjué ne, ngayun ne, ha hyun ndiya. —Cuatjin cachja Jesús.

⁵ Hane Tomás ne, cuitjin cachja me cojo Jesús:

—Tatá, hyíin jani cuangun. ¿Hacutjin má xi nújun xi ha hyin ndiya ni? —Cuatjin cachja me.

⁶ Hane Jesús ne, cuitjin cafayangui me tsëhë Tomás:

—Ngahan ne, sacuaha ndiya xi cjui xcun Nina ngahan. Ngahan ne, hatuxa tjin ná cjuaquixi ré Nina, hatuxa tjin ná cjuahñu. Suvá ni xuta xi visehen me ladu naha ne, me vëhé ni xi cuma cuechú me xcun Nina Nahmi naja.

⁷ Ngatsë ré xi ha hyun ná ne, vëhé xi hatuxa chun Nahmi naha. Quihndé ne, hyun me, hacuaha ha cachutsujun me. —Cuatjin cafayangui Jesús.

⁸ Ngajan xi Felipe ne, cuitjin cachja me cojo Jesús:

—Tatá, ningacun niji Nina Nahmi naja, hane cojo vëhé cumangu tacún. —Cuatjin cachja Felipe.

⁹ Ngajan xi Jesús ne, cuitjin cachja me:

—Ngahan ne, ha jemu jyë nixtin tejña cojo nuju, hane ¿há hyúun ná ni, Felipe? Xuta xi ha cavëë ná me ne, ha cavëë me Nina Nahmi naja. ¿Hacutjin má xi nújun xi tsingácun nuju Nina Nahmi naja ni?

¹⁰ ¿Há macjaain nuju xi ngahan ne, tejñaya xahasen ré Nina Nahmi naja, hane me vëhé ne, jiya me xahasen naha? Cjua xi chjá cojo nuju ne, hacuiin chjá cojo cjuatacun naha suva. Nina Nahmi naja xi jiya me xahasen naha ne, me vëhé sahmi me xa ré me.

¹¹ Catamacjain nuju xi ngahan ne, tejñaya xahasen ré Nina Nahmi naja hacuaha me vëhé ne, jiya me xahasen naha. O sa xi macjaain nuju cjuua naha ne, catamacjain nuju ngahan ndastu ngatsë ré cjuarcun xi casahme.

¹² Cuichjá cojo nuju cjuaquixi ta xuta xi mangucacun me cojo ná ne, cjuarcun xi sahme ngahan ne, hacuaha cojo me sahmi me. Ha hisca yehe sa cjuarcun sahmi me ta, ngahan ne, cjué tjënguë Nina Nahmi naja.

¹³ Hane tu mé ni xi chjahyun ré Nina ngatsë ré xi ladu naha ngayun ne, vëhé sahme, cojo sa xi cuma jyë cuma hnga Nina Nahmi naja cojo Hasen ré me ngatsë ré xcusun xi sahme, ngahan xi Quihndi ré me ngahan.

¹⁴ Sa xi chjahyun ná ngu cjuandaja ngatsë ré xi ladu naha ngayun ne, ngahan ne, sahme. —Cuatjin cachja Jesús cojo xuta ladu ré me.

Chja Jesucristu xi cuinduva Hasen ré Nina

¹⁵ Quijinduju sa cachja Jesús cuitjin:

—Sa xi ngayun nihñu hmu tacún ná ne, hacuaha cuinuhyun sacuatjin vitéxa nuju,

¹⁶ hane ngahan cuichjá cojo Nina Nahmi naja, hane tsingatju me ngu nga xi cuisecoo nuju, xi cueña cahndé cojo nuju yëjë nu yëjë nixtin.

¹⁷ Hane vèhë ne, vèhë Hasen xi hatuxa tjin rë cjuaquixi rë Nina. Xuta xi marcuaain rë me tsèhë Nina ne, cumaji xi cuisehen Hasen vèhë xahasen rë me ta, tsèhë xi tsijin rë me Hasen vèhë hacuaha hvín me Hasen vèhë. Peru ngayun ne, hyun Hasen vèhë ta, tsèhë xi tacun cahndë cojo nuju hacuaha cuisehen xahasen nuju.

¹⁸ Ngahan ne, hacuain cuiyuju nuju suvun ta cúa nga cuitejñacahndë cojo nuju.

¹⁹ Ha tu hitsë sa ne, ha quihndë scuin ná xuta. Peru ngayun ne, chun ná. Hane tsèhë xi ngahan ne, hatuxa tjin ná cjuahñu ne, vèhë xi ngayun ne, hatuxa sacú nuju cjuahñu xatsë.

²⁰ Nixtin hya ne, cuijne rcun xi ngahan ne, tejnaya xahasen rë Nahmi naha, hane ngayun ne, nechunyun xahasen naha, hane ngahan ne, tejnaya xahasen nuju.

²¹ Xuta xi tivihndë sacuatjin vitéxa ne, me vèhë xi hmu cacun ná me. Hane xuta xi cuatjin hmu cacun ná me ne, hacuaha sahmi hmu cacun Nahmi naha me. Ngahan ne, hacuaha sahme hmú cacun me, hacuaha suá cumachaya rë me yo ngahan. —Cuatjin cachja Jesús.

²² Judas, me xi hacuain cha Judas Iscariote jan ne, cavinenguise me cuitjin:

—Tatá, çhacutjin má xi tuhun cumachaya niji yo ngayun, hane hacuain cojo yèjë sa xuta ni? —Cuatjin cavinenguise me.

²³ Ngajan xi Jesús ne, cuitjin cafayangui me:

—Xuta xi hmu cacun ná me ne, hacuaha cuihndë me tsèhë cju naha. Hane sahmi hmu cacun Nahmi naha me, hacuaha cuinduvun cuinechinyincahndin xahasen rë me.

²⁴ Xuta xi hacuain hmu cacun ná me ne, vihndiin me tsèhë cju naha. Cju xi tinuhyun vi ne, hacuain cju naha suva ta cju rë Nina Nahmi naja, me xi catsingatju ná.

²⁵ Jemu cjin cju tichjá cojo nuju jinguyèjë rë xi tejña sa cojo nuju.

²⁶ Peru Hasen rë Nina xi tsingatju Nina Nahmi naja xi cuejña cahndë naha ne, vèhë cuisecoo nuju, tsinguixi cojo nuju yèjë sa cju xi machaja, hacuaha tsinguitsjen nuju tsèhë yèjë cju xi ha cachja cojo nuju.

²⁷ Cjuandaja cjuajeya cuejña nuju. Cjuandaja cjuajeya naha suá nuju. Peru hacuain sacuatjin sua xuta ngasunhndë suá nuju. Xicamandyaain tacún, xicamacjiin tacún.

²⁸ Ha canuhyun xi cachjá cojo nuju ta cjué peru cúa nga cuinduva tjènguë nuju. Sa xi ndaja jain hmu tacún ná ne, hacuaha ndama nuju xi cjué tjènguë Nina Nahmi naja ta, Nina Nahmi naja ne, hitsë sa venguichji rë me xi cuma ná ngahan.

²⁹ Ha cachjá cojo nuju quihndë, chaja sa xi cuetjucaa cju vèhë, cojo sa xi hya xi cuetjucaa ne, ngayun ne, cumacjain nuju.

³⁰ Ha quihndë cuichjaan sa cojo nuju cjin cju ta, ha nduva Satanás, xi matitjun tsèhë ngasunhndë. Peru ngahan ne, tsajin mé xi cuma sahmi cojo ná.

³¹ Ngahan ne, sahme sacuatjin cavitexa Nina Nahmi naja, cojo sa xi yèjë xuta ne, cumachaya rë me xi hmú cacun Nina Nahmi naja.

'Nduvun ne, cuanguenxeen tsèhë nguëhe. —Cuatjin cachja Jesús.

15

Chja Jesucristu xi sacuaha nahñu naa rë xca rë uva má me

¹ Hacuaha cachja sa Jesús cuitjin:

—Ngahan ne, sacuaha nahñu naa cjuaquixi rë xca rë uva ngahan, hane Nahmi naha ne, sacuaha me xi tsicha xcatjè vèhë me.

² Jima ngu nahñu tsja rë xi vaquiin tú rë ne, vatë me. Hane jima ngu nahñu tsja rë xi vaquí tú rë ne, vatèjñi me tsja langa rë, cojo sa xi cjin sa tú rë cuaquí.

³ Hacuanitjin ni nuju ngayun xi sacuaha nahñu tsja rë jan ngayun ta, cju xi cachjá cojo nuju ne, ha catsityahi rë cjuatacun nuju.

⁴ Nihñutangun sa cjuatacun nuju cojo ná, hane ngahan ne, sahmetangun cjuatacun naha cojo nuju. Ha hyan ta nahñu tsja rë ne, cumaji sua tú rë sa xi tsajin quitahácoo cojo nahñu naa rë. Hacuanitjin ni nuju ngayun ta cumaji ninguitsujun cjuandaja rë Nina sa xi tsajin tjin tangun cjuatacun nuju cojo ná.

⁵ Ngahan ne, sacuaha nahñu naa rë xca rë uva ngahan, hane ngayun ne, sacuaha nahñu tsja rë. Xuta xi tjin tangun cjuatacun rë me cojo ná hacuaha tjin tangun cjuatacun naha cojo rë me ne, me vèhë ne, jercu tsinguitsojo me cjuandaja rë Nina. Vèhë xi sa xi tsajin tjin tangun cjuatacun nuju cojo ná ne, cumaji camahani ninguitsujun cjuandaja rë Nina.

⁶ Xuta xi tsajin tjin tangun cjuatacun rë me cojo ná ne, cuatju me cuma sacuatjin vatju nahñu tsja rë xca rë uva xi tijñi jan má: chandi rë, sehe xi; sehe chjaya rë cjuë cueti.

⁷ Sa xi nihñu tangun sa cjuatacun nuju cojo ná hacuaha cuiyujucahndë sa cju naha ngajñi rë cjuatacun nuju ne, chjahyun tu mé ni xi meje nuju, hane sacú nuju.

⁸ Nahmi naha ne, ma jyë ma hnga me cojo Hasen rë me hya xi ningacun xi xuta ladu naha jain má ngayun xi ninguitsujun cjuandaja rë me.

⁹ Sacuatjijn hmu cacun ná Nahmi naja ne, hacuaha cuanitjijn hmú cáacun nuju. Xi-canichayuun cjuahmutacun naha.

¹⁰ Sa xi vinuhyun tséhé cjuá xi vitéxa nuju ne, ngayun ne, hatuxa nichayuun cjuahmutacun naha, sacuatjijn ná ngahan xi cavíhndé tséhé cjuá xi cavitéxa ná Nahmi naha hacuaha tsichayaan cjuahmutacun rē me.

¹¹ Cuatjijn chjá cojo nuju, cojo sa xi cjuasua xi tjin ná ne, cuejña cahntsua xahasen nuju, sehe jercu tu ndaja camahani cuma nuju.

¹² Vihi cjuá xi vitéxa nuju: nihñu hmu tacún xingun xingu xingu ngayun, sacuatjijn sahme hmú cáacun nuju ngahan.

¹³ Tsajin yo xi hitsé sa jyé cjuahmutacun tjin rē xi cuma rē ngu xuta xi sua me yojo rē me ngatsé rē amigu rē me.

¹⁴ Hane ngayun ne, amigu naha má ngayun, sa xi nihñu sacuatjijn xi vitéxa nuju.

¹⁵ Ha quihndé cuichjaan xi hndixahan naha ngayun ta, tséhé xi ngu mosu hndixahan ne, hvín mé xi sahmi nai rē. Ngayun ne, amigu naha chjá tsujun ta, tséhé xi yéjé cjuá xi cáhndé xi cachja Nahmi naha ne, casuá camachaya nuju.

¹⁶ Hacuuiin ngayun canaxujun ná ta ngahan cavaxejen nuju. Hacuaha casuáxa nuju xi cuangun ninguitsujun cjuandaja rē Nina. Hane cjuandaja véhé ne, tsajin nu tsajin nixtin xi cjué. Xi cuatjijn nihñu ne, tu mé ni xi chjahyun rē Nina Nahmi naja ngatsé rē xi xuta ladu naha má ngayun ne, sua nuju me.

¹⁷ Vihi cjuá xi vitéxa nuju: nihñu hmu tacún xingun xingu xingu ngayun. —Cuatjijn cachja Jesús.

Choho vée xuta Jesucristu cojo xuta ladu rē me

¹⁸ Quijinduju sa cachja Jesús cuitjijn:

—Sa xi choho vée nuju xuta xi marcuaain rē tséhé Nina ne, suá cumachaya nuju ta chaja sa xi choho scuée nuju me ne, ngahan ne, ha choho vée ná me.

¹⁹ Sa xi hacuaha xuta xi marcuaain rē tséhé Nina má ngayun ne, xuta xi cuacun vė ne, sahmi hmu cacun nuju me ta, ngayun ne, ladu rē me ngayun. Peru tséhé xi ngayun ne, hacuuiin xuta xi marcuaain rē tséhé Nina má ngayun ta ngahan cavaxejen nuju xi cuetjunxun tséhé xuta xi cuacun vė, vėhé xi choho vée nuju me.

²⁰ Ninguitsjun cjuá xi cachjá cojo nuju hya xi cachjá cojo nuju cuitjijn: “Ngu mosu hndixahan ne, hacuuiin hitsé sa venguichji rē xi cuma rē nai rē.” Sa xi catsujyihya tjengui ná xuta cojo cjuahngatacun ne, hacuaha tsujyihyatjengui nuju me cojo cjuahngatacun. Sa xi cahndé me tséhé cjuá naha ne, hacuaha cuihndé me tséhé cjuá nuju ngayun.

²¹ Yéjé xcusun vėhé sahmi xuta xi cuacun vė cojo nuju ngatsé naha ta, tséhé xi hvín me Nina, me xi catsingatju ná.

²² Tsajin mé jyé quitjen xuta xi cuacun vė sa xi canduvaan cachjá cojo rē me. Peru quihndé ne, sacuinyiin rē me mé xi cuichja me xi cuaxétje me yojo rē me.

²³ Xuta xi choho vée ná ngahan ne, hacuaha cojo Nahmi naha choho vée me.

²⁴ Tsajin mé jyé quitjen xuta xi cuacun vė sa xi casahmee ngajñi rē me cjuarcun xi tsajin sa ngu xuta xi ha casahmi me. Peru quihndé ne, ha cavée me cjuarcun xi casahme, hane choho vée ná me cojo Nahmi naha.

²⁵ Peru cuatjijn camá cojo sa xi cuetjucaa cjuá xi camahindu xcun xujun rē Nina xi chja xuta xi cuacun vė xi jemu vihndé me tséhé, cjuá xi chja cuitjijn: “Choho cavée ná me, handasa vechiin chuva rē.” Cuatjijn chja cjuá jan.

²⁶ Cuinduva Hasen rē Nina, xi hatuxa tjin rē cjuaquixi rē Nina, hane cuisecoo nuju. Ngahan tsingátju nuju Hasen vėhé xi cuetju hiscan tacun Nina Nahmi naja, hane xi cjeuhe ne, cuichja tsahan.

²⁷ Hacuaha ngayun ne, cuinújun tsahan cojo xuta, tséhé xi ngayun ne, ha nechun cojo ná hisca ntsacu cavetsihin.

16

¹ Cuatjijn tichjá cojo nuju, cojo sa xi hacuuiin cuetjunxun tséhé ndiya naha.

² Cuechú nixtin xi cumachohotje nuju yungun. Cuechú nixtin xi xuta xi tsiquehen nuju me ne, tsingataha cacun me xi jemu ndaja faharcun me Nina xi cuatjijn sahmi me.

³ Cuatjijn sahmi me ta, tséhé xi hvín me Nina Nahmi naja, hacuaha vijinii rcu me yo ngahan.

⁴ Cachjá cojo nuju cjuá vėhé, cojo sa xi hya xi cuechú hora xi cuetjucaa ne, ninguitsjun xi cuatjijn cachjá cojo nuju. —Cuatjijn cachja Jesús.

Hacutjijn sahmi Hasen rē Nina

Quijinduju sa cachja Jesús cuitjijn:

—Cachjaan cojo nuju cjuua vëhë ntsacu cavetsihin ta, tsëhë xi ngahan ne, tejña cuaha cojo nuju.

⁵ Peru quihndë ne, cjuëjtjenguë me xi catsingatju ná, hane hisca ngu ngayun ne, chjinen-gunsuun ná jani cjuë.

⁶ Hane tsëhë xi cuatjin cachjá cojo nuju cjuua vëhë ne, ña catsë rë xahasen nuju cjuachoho.

⁷ Peru ngahan ne, cuichjá cojo nuju cjuaquixi ta tsujun ndaja xi cjuë ta, sa xi cjuéen ne, Hasen xi cuisecoo nuju jan ne, hatuxa cuinduvaain. Peru sa xi cjuë ne, tsingátju nuju Hasen rë Nina vë.

⁸ Hane hya xi Hasen vëhë cuinduva ne, vëhë tsinguixi xi hacuiin cuatjin xi tsingataha cacun xuta tsëhë cjuatsehen, hacuiin cuatjin xi tsingataha cacun me tsëhë chuva rë xi cjuahachuva Nina xuta cojo cjuatacun rë me.

⁹ Hacuiin cuatjin xi tsingataha cacun xuta tsëhë cjuatsehen ta, tsëhë xi manguaain cacun me cojo ná.

¹⁰ Hacuiin cuatjin xi tsingataha cacun xuta tsëhë cjuandaja ta, tsëhë xi ngahan ne, cjuëjtjenguë Nina Nahmi naja hane ngayun ne, ha quihndë chuun ná.

¹¹ Hacuiin cuatjin xi tsingataha cacun xuta tsëhë xi cjuahachuva Nina xuta cojo cjuatacun rë me ta, tsëhë xi Satanás, xi matitjun tsëhë ngasunhndë vihi ne, ha catsichuva Nina cojo cjuatacun rë.

¹² Jemu tjin sa ná cjuua xi cuichjá cojo nuju, peru ngayun ne, scaain nuju cuinuhyun quihndë.

¹³ Peru hya xi cuinduva Hasen xi hatuxa tjin rë cjuaquixi rë Nina ne, vëhë cuinchandiyandaja nuju ndiya rë cjuaquixi. Hacuiin cojo cjuatacun rë suvá xi cuichja ta sacuatjin cjuua xi chja Nina cojo ne, cjuua vëhë cuichja. Hacuaha vëhë cuichja cojo nuju hacutjin cuma nixtin nduva.

¹⁴ Hasen vëhë ne, vëhë sahmi jyë sahmi hnga ná cojo cjuatacun naha ta, tsëhë xi vëhë cjuaha xi tsahan sehe sua cumachaya nuju tsahan.

¹⁵ Yëjë ni xi tsëhë Nina Nahmi naja ne, hacuaha tsahan. Vëhë xi cachjá xi Hasen jan ne, cjuaha xi tsahan sehe sua cumachaya nuju tsahan. —Cuatjin cachja Jesús.

Cuya cjuasua cjuachoho rë xuta ladu rë Jesús

¹⁶ Hacuaha cachja sa Jesús cuitjin:

—Ha tu hitsë sa ne, ha quihndë chuun ná, hane ha tu hitsë nga sa ne, chun ná. —Cuatjin cachja Jesús.

¹⁷ Ngajan xi ngujo xuta ladu rë Jesús jan ne, cuitjin cachja me cojo xicjin me:

—¿Mé vijne cjuua xi cuatjin chja me cojo naja? Chja me xi: “Ha tu hitsë sa ne, chuun ná, hane ha tu hitsë nga sa ne, chun ná”, hacuaha chja sa me xi: “Tsëhë xi cjuë tjënguë Nina Nahmi naja”.

¹⁸ ¿Mé vijne cjuua xi “ha tu hitsë sa”? Vijinii rcuun mé xi chja me. —Cuatjin cachja me cojo xicjin me.

¹⁹ Jesús ne, ha vëë me xi meje cjuinenguise xuta xi cuacun jan me tsëhë cjuua vëhë, vëhë xi Jesús ne, cachja me cojo rë xuta jan cuitjin:

—¿Há tichjinengunsun xingun tsëhë xi cachjá xi ha tu hitsë sa ne, chuun ná hane ha tu hitsë nga sa ne, chun ná?

²⁰ Cuichjá cojo nuju cjuaquixi ta ngayun ne, chjihndun hacuaha chjihndunsun, peru xuta xi marcuaain rë me tsëhë Nina ne, jercu ndaja cuma rë me. Ngayun ne, jemu choho cuma nuju, peru cjuachoho nuju ne, cuya sua.

²¹ Hya xi ngu chjuun tsin rë me quihndi ne, jemu tjin rë me cjuachoho ta, tsëhë xi cavechú hora xi cuatju me cjuañihi. Peru hya xi cavatju catsin quihndi ne, ha quihndë vitsjin rë me tsëhë cjuañihi jan, ngatsë rë cjuasua rë me xi catsin ngu quihndi.

²² Cuatjin nuju ngayun ta quihndë ne, tjin nuju cjuachoho. Peru ngahan ne, cýua scuëë nga nuju, hane ngayun ne, jemu ndaja cuma rë xahasen nuju, hane cjuasua nuju jan ne, tsajin yo cuma cjuahatahá.

²³ Hane nixtin hya ne, chjinengunsuun ná hisca ngu cjuua.

‘Cuichjá cojo nuju cjuaquixi ta tu mé ni xi chjahyun rë Nina Nahmi naja ne, sua nuju me tsëhë xi ladu naha má ngayun.

²⁴ Hisca quihndë ne, cjëë chjahyun ná ngu cjuandaja tsëhë xi ladu naha má ngayun. Chjahyun ne, sehe sacú nuju, cojo sa xi xahasen nuju ne, tsë rë cjuasua. —Cuatjin cachja Jesús.

Cacaa rë Jesucristu catsinguijne me cjuatsehen rë ngasunhndë

²⁵ Quijinduju sa cachja Jesús cuitjin:

—Ngahan ne, cojo ejemplu cachjá cojo nuju. Peru cuechú nixtin xi ha quihndë hacuiin cojo ejemplu cuichjá cojo nuju ta cuichjáquixë cojo nuju tsëhë Nina Nahmi naja.

²⁶Nixtin hya ne, hatuxa chjahyun cjuandaja tsëhë xi ladu naha má ngayun. Hane chjaan cojo nuju xi cuichjá ngatsë nuju cojo Nina Nahmi naja ta,

²⁷suvá Nina Nahmi naja ne, jemu meje rë me ngayun, tsëhë xi ngayun ne, hacuaha jemu meje nuju ngahan hacuaha macjain nuju xi ngahan ne, Nina catsingatju ná me.

²⁸Ngahan ne, hiscan tacun Nina cavétju canduvá nguehe ngasunhdë. Quihndë ne, cuétju tsëhë ngasunhdë, cúa cjuétjenguë Nina Nahmi naja. —Cuatjin cachja Jesús.

²⁹Ngajan xi xuta ladu rë Jesús ne, cuitjin cachja me:

—Chutsujun ni. Quihndë ne, hacuiin cojo ejemplu tinújun ta tinújunquixun.

³⁰Quihndë ne, hyin ta ngayun ne, hyun yëjë ni cjuatacun, hacuaha hacuiin sahmi nguujyë xi cjuinenguise nuju xuta ngu cjuacojo sa xi cumachaya nuju mé xi tsingataha cacun xuta jan. Ngatsë rë vëhë xi macjain nijxi xi Nina catsingatju nuju me. —Cuatjin cachaja xuta ladu rë Jesús.

³¹Ngajan xi Jesús ne, cuitjin cafayangui me:

—¿Há macjain jain nuju quihndë?

³²Chutsujun ni. Cuechú hora o ha hisca cavechú xi cuitsojo ngayun, jima ngu ngayun cojo ndya nuju, hane cuejñu ná suva. Peru ngahan ne, hacuiin suva tejña ta Nina Nahmi naja tacun me cojo ná.

³³Cuatjin chjá cojo nuju cojo sa xi sacú nuju cjuandaja cjuajeya ngatsë rë xi tjin tangun cjuatacun nuju cojo ná. Nguehe ngasunhdë ne, vatjun cjuañihi. Peru tuhun cjuasua xahasen nuju ta, ngahan ne, hacuaha cacaa ná catsinguijne cjuatsehen rë ngasunhdë. —Cuatjin cachja Jesús cojo xuta ladu rë me jan.

17

Fehya Jesucristu cjuandaja xi cuma rë xuta ladu rë me

¹Xi cavatju cachja Jesús cuatjin ne, sehe cavutsejenniji me ngahnga, hane cachja me cuitjin:

—Ngayun Nahmi naha, ha cavechú hora. Nihñu jyë nihñu hnga ná cojo Hasen naha ngahan xi Quihndi nuju ngahan, cojo sa xi ngahan ne, hacuaha sahme jyë sahme hnga nuju cojo Hasen nuju.

²Ngayun catuhunxun ná xi matitjun ngahan tsëhë yëjë xuta, cojo sa xi yëjë me xi catuhun ná ne, suá rë me cjuahñu xatsë.

³Hane cuitjin xi sacú rë me cjuahñu xatsë, xi vëë me ngayun, ngayun xi ngu ni ngayun xi Nina xi cjuaquixi ngayun, hacuaha xi vëë ná me, ngahan xi Jesucristu ngahan, ngahan xi ngayun caningatjun ná.

⁴Ngahan ne, casahme jyë casahme hnga nuju nguehe ngasunhdë ta, catsinguijnetaha xa xi catuhun ná xi sahme.

⁵Quihndë ne, nihñu jyë nihñu hnga ná cojo Hasen naha ndyá hiscan nechun, ngayun Nahmi naha. Tuhun ná Hasen ndajiyi xi ha tjin ná hya xi nechan tangun cojo nuju hisca hya xi chaja sa cuejña ngasunhdë.

⁶Ngahan ne, casuá camachaya rë xuta xi catuhun ná nguehe ngasunhdë yo ngayun. Me xi cuacun vë ne, tsujun me, peru catuhun ná me. Hane cahndë me tsëhë cjuacojo nuju.

⁷Ha vëë me quihndë xi yëjë ni xcusun xi catuhun ná ne, ngayun caningatjun.

⁸Cuatjin vëë me ta, tsëhë xi yëjë ni cjuacojo xi catuhun ná ne, hacuaha casuá rë me. Hane me xi cuacun vë ne, nihñu me cuidadu cojo ngahñu nuju, ngahñu xi catuhun ná, cojo sa xi tjin tangun cjuatacun rë me cojo xicjin me, sacuatjin naja ngayaan.

⁹Ngahan ne, tichjá cojo nuju ngatsë rë me xi cuacun vë. Tichjaan ngatsë rë xuta xi marcuaain rë tsujun ta tichjá ngatsë rë me xi catuhun ná, tsëhë xi tsujun me.

¹⁰Yëjë ni xi tsahan ne, hacuaha tsujun, hane xi tsujun ne, hacuaha tsahan. Hane ngahan ne, cama jyë cama hnga ngahan cojo Hasen naha ngatsë rë xi tjin tangun cjuatacun rë me xi cuacun vë cojo ná.

¹¹Ha quihndë cuitejña sa nguehe ngasunhdë. Me xi cuacun vë ne, siu me ngasunhdë, peru ngahan ne, cuinduvatjenguë nuju. Ngayun Nahmi naha, ngayun xi hatuxa tyjahi cjuatacun nuju ne, nihñu me cuidadu cojo ngahñu nuju, ngahñu xi catuhun ná, cojo sa xi tjin tangun cjuatacun rë me cojo xicjin me, sacuatjin naja ngayaan.

¹²Hya xi tejña cojo rë me ne, casahme cuidadu me cojo ngahñu nuju xi catuhun ná. Casahme cuidadu me, hane hisca ngu me cachajin me. Suvá ni cha xi hatuxa chajá ne, cha vëhë xi cachajá cha, cojo sa xi cuetjucaa cjuacojo xi camahindu xcun xujun nuju.

¹³ Peru quihndë ne, cuinduvatjenguë nuju. Hane tichjá cjua vihi ngeuehe ngasunhndë, cojo sa xi xuta ladu naha ne, tsëh rë xahasen rë me cojo cjuasua xi quitsëh rë xahasen naha suva.

¹⁴ Ngahan ne, casuá camachaya rë me cjua nuju. Hane xuta ngasunhndë xi marcuaain rë tsujun ne, choho vëë rë me, tsëhë xi hacuiin tsëhë ngasunhndë má me, sacuatjin ná ngahan xi hacuiin tsëhë ngasunhndë má ngahan.

¹⁵ Cjuehyaan nuju xi naxunxun me tsëhë ngasunhndë ta tifëhya nuju xi nihñu me cuidadu tsëhë Satanás.

¹⁶ Xuta ladu naha jan ne, hacuiin tsëhë ngasunhndë má me, sacuatjin ná ngahan xi hacuiin tsëhë ngasunhndë má ngahan.

¹⁷ Nihñu tsujun jain me cojo cjua xi hatuxa cjuaquixi. Cjua nuju ne, vëhë xi hmí rë cjuaquixi.

¹⁸ Sacuatjin caningatjun ná ngahan ngajñi rë xuta xi marcuaain rë tsujun ne, hacuaaha cuatjin catsingátju xuta ladu naha ngajñi rë xuta xi cuacun vë.

¹⁹ Hane ngatsë rë xuta ladu naha ne, suá nuju yojo naha, cojo sa xi me xi cuacun vë ne, hacuaaha tsujun jain cuma me cojo cjuaquixi.

²⁰ Quihndë ne, hacuiin ngatsë rë suvá ni xuta ladu naha vi xi tichjá cojo nuju ta hacuaaha cojo ngatsë rë me xi sehe cumangu cacun cojo ná xi cuihndë me cjua xi chja xuta ladu naha tsahan.

²¹ Ngahan ne, xi meje ná ne, xi yëjë ni me xi cuacun vë ne, cuma tangun cjuatacun rë me cojo xicjin me. Sacuatjin nuju ngayun, Nahmi naha, xi nechunyun xahasen naha hane ngahan ne, tejñaya xahasen nuju ne, meje ná xi me xi cuacun vë ne, hacuaaha hincha me xahasen naja, cojo sa xi xuta ngasunhndë ne, cumacjain rë me xi ngayun caningatjun ná.

²² Ngahan ne, casahme yehe casahme hnga me cojo cjuatacun rë me sacuatjin canihñu jyë canihñu hnga ná ngahan cojo cjuatacun naha, cojo sa xi cuma tangun cjuatacun rë me cojo xicjin me, sacuatjin tjin tangun cjuatacun naja ngayaan cojo xingueen.

²³ Meje ná xi ngahan ne, cuitejñaya xahasen rë me, sacuatjin nechunyun xahasen naha. Meje ná xi cuma tangun camahani cjuatacun rë me cojo xicjin me, cojo sa xi xuta ngasunhndë ne, cuijne rcu me xi ngayun caningatjun ná, hacuaaha xi nihñu hmu tacún me sacuatjin nihñu hmu tacún ná ngahan.

²⁴ Ngayun, Nahmi naha, xuta xi catuhun me xi cuma me ladu naha ne, meje ná xi hiscan xi cuitejña ne, hacuaaha ngajan cuiyuju me cojo ná, cojo sa xi scutsejen me hacutjin jyë hnga ngahan cojo hasen ndajyihí naha xi ngayun catuhun ná, tsëhë xi canihñu hmu tacún ná hisca chaja sa xi cuejña ngasunhndë.

²⁵ Ngayun Nahmi naha, ngayun xi quixi ngayun cojo cjuatacun nuju, xuta ngasunhndë ne, hvíin nuju me, peru ngahan ne, hvë nuju, hane xuta ladu naha vi ne, vëë me xi ngayun caningatjun ná.

²⁶ Ngahan casuá camachaya rë me yo ngayun, hane suá sa cumachaya rë me, cojo sa xi cjuahmutacun xi tjin nuju cojo ná ne, cuejña cahntsua xahasen rë me hacuaaha ngahan ne, cuitejña cahntsua xahasen rë me. —Cuatjin cafehya Jesús cjuandaja cojo Nina.

18

Hacutjin camá xi cachjahá rë Jesucristu

¹ Hya xi camá ne, xi cavatju cachja Jesús cjua vëhë ne, sehe cavetju me quiji me cojo xuta ladu rë me ngunda vëhë tsëhë caniaña Cedrón. Hane ngajan cavisehen Jesús cojo xuta ladu rë me ngu ngajñi yatjë xi tjin jan.

² Quihndë ne, cha Judas, cha xi sahmi rë entregadu Jesús ne, hacuaaha vëë cha cahndë vëhë ta, jemu quiji Jesús cahndë vëhë camatangun me cojo xuta ladu rë me.

³ Ngajan xi cha Judas ne, quijicojo cha ngujo sindadu cojo cha mayu cojo cha nisë rë cha, cha xi catsingatju nahmi xi matitjun cojo cha fariseo. Quiji cha xi cuacun jan ngajan cojo ndihi cojo quicha.

⁴ Hane Jesús ne, tsëhë xi ha vëë me yëjë xcusun xi cuatju me cuma ne, quijivaha me xcun cha xi cuacun jan, sehe cavinenguise me cha cuitjin:

—¿Yo xi meje nuju? —Cuatjin cavinenguise me.

⁵ Ngajan xi cha xi cuacun jan ne, cuitjin cafayangui cha:

—Xuta Nasaret xi hmí rë Jesús. —Cuatjin cafayangui cha.

Hane Jesús ne, cuitjin cachja me:

—Ngahan xi nújun vë. —Cuatjin cachja me.

Quihndë ne, Judas, cha xi sahmi rë me entregadu ne, cojo cha secun cha cojo cha xi cuacun vë.

⁶ Hane hya xi cachja Jesús xi: “Ngahan xi nújun vë” ne, quijingaxtun yëjë cha xi cuacun jan, hane caticja cha.

⁷ Ngajan xi Jesús ne, cavinenguise nga me cha cuitjin:

—¿Yo xi meje nuju? —Cuatjin cavinenguise me.

Hane cha xi cuacun jan ne, cuitjin cachja nga cha:

—Xuta Nasaret xi hmí rë Jesús. —Cuatjin cachja cha.

⁸ Hane Jesús ne, cuitjin cafayangui me:

—Ha cachjá cojo nuju ta ngahan xi nújun vë. Sa xi ngahan meje nuju ngahan ne, tuhun cahndë catje me xi cuicun vi. —Cuatjin cafayangui me.

⁹ Cuatjin cachja Jesús cjuá vëhë cojo sa xi cuetjuca cjuá xi ha cachja me cuitjin: “Xuta xi catuhun ná me ne, hisca ngu me catsichajan me.”

¹⁰ Ngajan xi Simón Pedru ne, cavaxë me quichandujú xi yaha me, hane cavatësun me tjavajuju quixi mosu hndixahan rë nahmi xi matitjun jan, cha xi hmí rë Malco.

¹¹ Ngajan xi Jesús ne, cuitjin cachja me cojo Pedru:

—Teyunndujun quicha nuju vë. Hatuxa tsingatehen xi cuátju cjuañihi sacuatjin xi meje rë Nina Nahmí naja. —Cuatjin cachja Jesús.

Nahmi xi matitjun ne, sahmi cuenda me jyë rë Jesús

¹² Hya xi camá ne, cha sindadu cojo capitán rë cha, cojo mayu cojo cha nisë rë cha, cha xi catsingatju xutaxa rë yungun jan ne, cafaha cha Jesús, catsihñu cha me,

¹³ sehe quiji caní cha me titjun xcun Anás. Anás vë ne, nahmichahya rë Caifás má me. Hane nu vëhë ne, nahmi xi matitjun tsëhë yëjë ni nahmi má Caifás.

¹⁴ Quihndë ne, Caifás vë ne, me vëhë xi cavinchangui me xutaxa rë xi ndaja tsëhë xutaxa rë xi ngu xihin ni cueya ngatsë rë yëjë ni xuta.

Chja Pedru xi hacuiin ladu rë Jesucristu má me

¹⁵ Quihndë ne, Simón Pedru cojo ngu sa cha ladu rë Jesús jan ne, tjengui me quiji me cojo Jesús. Hane cha ladu rë Jesús xingu jan ne, tsëhë xi vëë nahmi xi matitjun jan cha ne, cojo cha cavisehen cha cojo Jesús cahntsua hnhua ndatsen ndava nahmi xi matitjun jan.

¹⁶ Peru Pedru ne, casecun ni me ngajan candatsen tingotjo hnhua jan. Ngajan xi cha ladu rë Jesús xi vëë nahmi jan ne, cavetju nga cha quiji cachja cha cojo na xi quitahá cuidadu rë tingotjo hnhua jan. Hane sehe catsinguisehen cha Pedru cahntsua hnhua.

¹⁷ Hane na xi sahmi cuidadu tingotjo hnhua jan ne, cuitjin cavinenguise rë na Pedru:

—¿Hacuiin cojo ngayun má ngayun ladu rë me xi cuajiyihí vë? —Cuatjin cavinenguise na. Hane Pedru ne, cuitjin cafayangui me:

—Jéya, hacuiin. —Cuatjin cafayangui me.

¹⁸ Hane mosu rë nahmi jan cojo cha sindadu jan ne, cavejña cha ngu ndava ndihí, tsëhë xi jemu hnhuan. Sehe hinchacun cha tijima hasu rë cha jan. Hacua ha cojo Pedru secun me jan, jima hasu rë me.

Fahatáha nahmi xi matitjun jan Jesucristu

¹⁹ Hane xi cafehe cha xi cuacun jan cojo Jesús jan ne, sehe cavetsihin cafahatáha nahmi xi matitjun jan me tsëhë xuta ladu rë me cojo tsëhë cjuachacun rë me.

²⁰ Hane Jesús ne, cuitjin cafayangui me:

—Ngahan ne, xcun cojo xcun cachjá cojo yëjë ni xuta, hacua ha cavicuyá rë me ngajan yungun langa o sa xi ngajan yungun xi matitjun, hiscan xi matangun ngayejen ni xuta tjë rë Israel. Tsajin mé xi cachjá xi táhahma.

²¹ Hane ¿mé má ngahan chjuhuntuhun ná ni? Chjuhuntuhun rë me xi cahndë cjuá naha. Chjinengunsun rë me mé xi cachjá cojo rë me. Me xi cuacun vë ne, vëë me cjuá xi cachjá. —Cuatjin cafayangui Jesús.

²² Hane xi cuatjin cachja Jesús cjuá vëhë ne, ngu cha mayu xi secun tiña jan ne, cavajaya cha ngu xcun Jesús, sehe cachja cha cuitjin cojo rë me:

—¿Há cuatjin chjayengui tsëhë nahmi xi matitjun? —Cuatjin cachja cha.

²³ Ngajan xi Jesús ne, cuitjin cafayangui me tsëhë cha:

—Sa xi choho cachjá ne, tinújun cojo yëjë xuta mé xi choho cachjá. Peru sa xi ndaja cachjá ne, ¿mé má cuatjin vujun ná ni? —Cuatjin cafayangui me.

²⁴ Ngajan xi Anás ne, hacuanitjin ni tjihñu cuaha Jesús ne, catsingatju me Jesús xcun nahmi xi matitjun tsëhë yëjë ni nahmi.

Chja nga Pedru xi hacuiin ladu rë Jesucristu má me

²⁵ Jinguyëjë rë xi tichjahátáha rë Jesús jan ne, Pedru ne, secun me xcun ndihí tijima hasu rë me. Hane cachjahátáha rë me cuitjin:

—¿Hacuiin cojo ngayun má ngayun ladu rë me vëhë? —Cuatjin cachjahátáha rë me.

Hane Pedru ne, cavetsangui me, cuitjin cachja me:

—Jéya, hacuiin. —Cuatjin cachja me.

²⁶ Ngajan xi ngu mosu rê nahmi xi matitjun jan, cha xi xicjin rê cha xi cavatêsun Pedru tyjavañuju jan ne, cuitjin cachja cha cojo Pedru:

—¿Há cahveen nuju cojo rê me ngajñi yatjê jan ni? —Cuatjin cachja cha.

²⁷ Cavetsangui nga Pedru ngu ndiya. Hane ha hora vèhê ni ne, cajihnda xahnda.

Fahatáha Pilatu Jesucristu

²⁸ Ngajan xi xuta matitjun tséhê xuta tjê rê Israel jan ne, cavaxê me Jesús tséhê ndava Caifás, hane quijicojo me ndihya jyê hiscan tacun Pilatu, xutaxa rê xi matitjun. Nguitajñu xati hora vèhê. Hane xuta xi quijicojo rê Jesús jan ne, cavisiin me cahntsua ndihya jyê jan, ngatsê rê xcusun rê me xi ma chocun yojo rê me xcun Nina hya xi visehen me ndava xutaxin. Hane sa xi cuatjin cuma chocun yojo rê me ne, cumaji sinê nguixun me comida suhi tséhê Pascua.

²⁹ Vèhê xi cavetju Pilatu quijitjengui rê me candatsen. Hane cuitjin cavinenguise me:

—¿Mé jyê vinchun tséhê cha xi cuijyihí vi? —Cuatjin cavinenguise Pilatu.

³⁰ Hane xuta xi cuacun jan ne, cuitjin cafayangui me:

—Sa xi hacuiin choho tisahmi cha ne, canduvinchaniñ nuju cha. —Cuatjin cafayangui me.

³¹ Hane Pilatu ne, cuitjin cachja me:

—Chjuhun cha ne, chjuhunchuvun suvun cha cojo jyê rê cha sacuatjin chja ley nuju. —Cuatjin cachja Pilatu.

Ngajan xi xutaxa rê yungun xi cuacun jan ne, cuitjin cachja me:

—Ley nuju ngayun ne, chja ta ngayin ne, cumaji niquihin xuta. —Cuatjin cachja xuta xi cuacun jan.

³² Cuatjin camá cojo sa xi cuetjucaa cjuaxi cachja Jesús hya xi cachja me mé chuva rê cueya me.

³³ Ngajan xi Pilatu ne, cavuya cavisehen nga me ndihya. Hane cajindaya me Jesús, sehe cavinenguise me cuitjin:

—¿Há ngaye xu matitjun ngaye tséhê xuta tjê rê Israel? —Cuatjin cavinenguise me.

³⁴ Hane Jesús ne, cuitjin cafayangui me:

—¿Há cojo cjuatacun nuju suvun chjinengunsun ná cjuaxi vèhê?, o há tsajin ne, ¿há tjin yo cachja cojo nuju tsahan? —Cuatjin cafayangui me.

³⁵ Ngajan xi Pilatu ne, cuitjin cafayangui me:

—¡Peru ngahan ne, hacuiin xuta Israel ngahan! Suvá xuta nangui riji cojo nahmi xi matitjun casahmi ri me entregadu cojo ná. ¿Mé canihñi? —Cuatjin cafayangui Pilatu.

³⁶ Ngajan xi Jesús ne, cuitjin cafayangui me:

—Xa naha xi sahme gobiernu ne, hacuiin ngasunhndê vihi cafahántsa. Sa xi ngasunhndê vihi cafahántsa xa xi sahme gobiernu ne, xuta ladu naha ne, scaan me cojo sa xi cumaji cuma ngahan entregadu tsja xutaxa rê yungun. Peru xa naha xi sahme gobiernu ne, hacuiin nguehe cafahántsa. —Cuatjin cafayangui Jesús.

³⁷ Hane Pilatu ne, cuitjin cachja me cojo Jesús:

—¿Ngajan xi ngaye xi matitjun ngaye ni? —Cuatjin cachja me.

Hane Jesús ne, cuitjin cafayangui me:

—Cuatjin sacuatjin nújun vè. Ngahan ne, canduvá nguehe ngasunhndê hacuaha catsin ngahan cojo sa xi cuichjá cojo xuta cjuaxi cjuaquixi. Yêjê xuta xi marcun rê me tséhê cjuaquixi ne, hatuxa vetaharcu me cjuaxi naha. —Cuatjin cafayangui Jesús.

³⁸ Hane Pilatu ne, cuitjin cachja me:

—¿Mé xi hmí rê cjuaquixi ni? —Cuatjin cachja Pilatu.

Chja xutaxa rê yungun xi meje rê xi cueya Jesucristu.

Hane xi café cachja Pilatu xuta vèhê ne, sehe cavetju nga me quiji cachja me cojo xutaxa rê yungun, cuitjin cachja me:

—Sacuiin ná hisca ngu jyê rê cha xi cuajyihí vè.

³⁹ Peru ngayun ne, tjin nuju ngu xcusun xi tsisme ngu presu nixtin rê suhi rê Pascua. ¿Há meje nuju xi tsisme me xi matitjun tsujun? —Cuatjin cachja me.

⁴⁰ Hane xuta xi cuacun jan ne, cajindaya me cachja me cuitjin:

—¡Hacuiin cha vèhê ta Barrabás nismu cha! —Cuatjin cajindaya me cachja me.

Quihndê ne, Barrabás jan ne, ngu cha fahataha cjuachan cha.

19

¹ Ngajan xi Pilatu ne, catsingatju me Jesús casehen rê me.

² Hane cha sindadu xi cuacun jan ne, xi camá catsihya cha ngu corona nahyá ne, sehe cavesun cha rcu Jesús, hacuaha catsicaja cha me ngu tsjian moradu.

³ Hya xi camá ne, quijivaha cha jima ngu cha xcun me, sehe cavetsihin cavincha cha viva rë me xi tsixcuehyu cha me sacuaaha xi me vëhë matitjun me tsëhë xuta tjë rë Israel. Hacuaha cavajaya cha xcun me.

⁴ Hya xi camá ne, Pilatu ne, cavetju nga me candatsen, hane cuitjin cachja me cojo xuta xi cuacun jan:

—Chutsujun ni, cuáxë cha nguehe, cojo sa xi cumachaya nuju ta sacuiin ná hisca ngu jyë rë cha. —Cuatjin cachja Pilatu.

⁵ Ngajan xi Jesús ne, cavetju me candatsen, quisun rcu me corona nahyá hacuaha yaja me tsjian moradu jan. Sehe cachja Pilatu cojo xuta cuitjin:

—Chutsujun ni, cuajyihí cha nguehe. —Cuatjin cachja me.

⁶ Hane hya xi cavëë nahmi xi cuacun matitjun jan cojo cha mayu cojo nisë rë cha Jesús ne, cajindaya cha cachja cha cuitjin:

—¡Tetuhun cha xcun cru! ¡Tetuhun cha xcun cru! —Cuatjin cajindaya cha cachja cha.

Ngajan xi Pilatu ne, cuitjin cachja me:

—¡Chjuhun suvun cha, tetuhun cha xcun cru ta, ngahan ne, sacuiin ná hisca ngu jyë rë cha! —Cuatjin cachja Pilatu.

⁷ Ngajan xi xutaxa rë xi cuacun jan ne, cuitjin cachja me:

—Ngayin ne, tjin ngu ley xi vitexa nihi, hane sacuatjin chja ley vëhë ne, vechú chuva rë xi cueya cha ta, tsëhë xi cachja suvá cha xi Quihndi rë Nina cha. —Cuatjin cachja xutaxa rë jan.

⁸ Hane xi cahndë Pilatu cjua vëhë ne, hitsë sa catsacjun me camá.

⁹ Sehe cavuya cavisehen nga me cahntsua ndihya, hane sehe cafahatáha me Jesús cuitjin:

—Ngayun ne, ¿jani canduvun? —Cuatjin cafahatáha me Jesús.

Peru Jesús ne, cafayanguiin me tsëhë Pilatu.

¹⁰ Ngajan xi Pilatu ne, cuitjin cavinenguisse me cojo Jesús:

—¿Há chayunnguun tsahan? ¿Há hyúun ta ngahan ne, cuma tsisme nuju hacuaha cuma cuitéxa xi setaha ngayun xcun cru? —Cuatjin cavinenguisse Pilatu.

¹¹ Hane Jesús ne, cuitjin cafayangui me:

—Ngayun ne, cuma nihñu cojo ná cuatjin, peru suvá ni ngatsë rë xi Nina casua nuju me cahndë. Vëhë xi me xi casahmi ná entregadu cojo nuju ne, hitsë sa jyë jyë rë me xi cuma nuju ngayun. —Cuatjin cafayangui Jesús.

¹² Xi cahndë Pilatu cjua vëhë ne, cavangui me chuva rë xi tsismi me Jesús. Peru xutacjin jan ne, cajindaya me cachja me cuitjin:

—Sa xi nismu cha xi cuajyihí vë ne, hacuiin amigu rë César, me xi matitjun camahani, má ngayun. Ngu xuta xi chja suvá me xi matitjun me ne, hatuxa condra rë César má me. —Cuatjin cajindaya me cachja me.

¹³ Hane xi cahndë Pilatu cjua vëhë ne, sehe cavaxë nga me Jesús candatsen, sehe quiji me cavéjña me hiscan sahmi cuenda me jyë rë xuta, cahndë hiscan hmí rë Texondaja rë, hane xi hne hebreo ne, Gabata hmí rë.

¹⁴ Hora vëhë ne, sacuaaha nchisen tsëhë nixtin vispra rë suhi tsëhë Pascua. Ngajan xi Pilatu ne, cuitjin cachja me cojo xuta:

—¡Chutsujun ni, cuajyihí me xi matitjun tsujun nguehe! —Cuatjin cachja me.

¹⁵ Hane xuta jan ne, cuitjin cajindaya me cachja me:

—¡Naxunxun cha, naxunxun cha tsëhë nguehe! ¡Tetuhun cha xcun cru! —Cuatjin cajindaya me cachja me.

Ngajan xi Pilatu ne, cuitjin cavinenguisse me:

—¿Há cuétaha me xi matitjun tsujun xcun cru ni? —Cuatjin cavinenguisse me.

Ngajan xi nahmi xi cuacun matitjun jan ne, cuitjin cafayangui me:

—¡Ngu ni César, me vëhë xi matitjun me tsijin! —Cuatjin cafayangui me.

¹⁶ Ngajan xi Pilatu ne, cajne cacun me. Hane casahmi me entregadu Jesús xi cjue setaha me xcun cru xi cueya me. Sehe cafahatsja xuta xi cuacun jan me.

Setaha Jesucristu xcun cru

¹⁷ Hya xi camá ne, quisuntyja suvá Jesús cru, cavetju me quiji me cojo xuta cahndë hiscan xi hmí rë Nínda Rcuun, hane xi hne hebreo ne, Gólgota hmí rë.

¹⁸ Hane ngajan casetaha me xcun cru. Hacuaha cojo sa jo cha caviyujutaha cha xcun cru rë cha, ngu ngu cha ngu ngu ladu tjehe rë me. Hane Jesús ne, cavasen caseya me.

¹⁹ Hacuaha catsihindu Pilatu ngujo cjua xi casetaha rcu cru rë Jesús, cuitjin camahindu: “Jesús, Xuta Nasaret, Xi Matitjun Tsëhë Xuta Israel.”

²⁰ Cjua vëhë ne, jemu cjin xuta cavutaya me, tsëhë xi cahndë hiscan casetaha Jesús xcun cru ne, tiña tacun nandya. Camahindu cjua vëhë cojo hne hebreo cojo latín cojo griego.

²¹ Ngajan xi nahmi xi matitjun tsëhë xuta tjë rë Israel jan ne, cuitjin cachja me cojo Pilatu:

—Ndajintjin xi cuatjin canihindun “Xi Matitjun Tsëhë Xuta Israel” ta, xi ndatjin ne, “Cachja Cha: Ngahan Matitjun Ngahan Tsëhë Xuta Israel.” —Cuatjin cachja me.

²² Hane Pilatu ne, cuitjin cafayangui me:

—Ha catsihindu cjua xi meje tsihindu. —Cuatjin cafayangui me.

²³ Ngajan xi sindadu jan ne, xi cavatju cavetaha cha Jesús xcun cru ne, sehe cafaha cha tsjian xcun rë me cojo yëjë sa xi tsë xi xtí xi sahmixa cojo me, cavatëcja cha ngajñi catsiñuju cha. Hacuaha cafaha cha tsjian ngahma rë me. Quihndë ne, tsjian vëhë ne, hacuini casehencoo ta tsjian tu të ni.

²⁴ Ngajan xi cha sindadu jan ne, cachja cha cojo xicjin cha cuitjin:

—Tsjian vëhë ne, hacuini cuichan ta naxeen suerte tsëhë ne, jarë ngayaan xi satë naja. —Cuatjin cachja cha.

Cuatjin camá cojo sa xi cuetjucaa cjua xi camahindu xcun xujun rë Nina xi chja cuitjin: Cavatëcja cha tsjian naha ngajñi rë cha,

hacuaha cavaxë cha suerte ngatsë rë tsjian naha.

Cuatjin casahmi cha sindadu jan.

²⁵ Quihndë ne, tiña cru rë Jesús jan ne, secun naa rë me, cojo tíchja naa rë me, cojo na María chjuun rë Cleofas, cojo na María na Mágdala.

²⁶ Hane xi cavëë Jesús naa rë me cojo cha ladu rë me xi jemu vinga rë me jan xi secun tangun cha cojo naa rë me ne, sehe cachja me cuitjin cojo naa rë me:

—Ngayun chjuun, cuajyihí quihndí nuju ndyá.

²⁷ Hane cha ladu rë me jan ne, cuitjin cachja me cojo rë cha: —Cuajyihí naa nuju ndyá. —Cuatjin cachja Jesús.

Ha nixtin hya ni ne, quijicojo cha ladu rë Jesús jan naa rë me ndava cha, ngajan cavëñacahndë me.

Cjuaveya rë Jesucristu

²⁸ Hane xi camá ngasan ne, Jesús ne, ha vëë me xi camachihin yëjë xa xi cachja Nina xi sahmi me. Hane cojo sa xi cuetjucaa cjua xi camahindu xcun xujun rë Nina ne, cuitjin cachja me:

—Jemu xinda ná. —Cuatjin cachja me.

²⁹ Quihndë ne, tacun jan ngu hiscan jemu hinchá xan yufa. Ngajan xi sindadu jan ne, catsicahnchi cha ngu tsjian hinda cojo xan jan ne, sehe catsitjinguuya cha rcu ngu ya nduju, sehe catsiquijin cha cavetaha cha hntsua Jesús.

³⁰ Hane xi camá cahví Jesús xan jan ne, sehe cachja me cuitjin:

—Camachihin quihndë. —Cuatjin cachja Jesús.

Hane xi catsiquindi me rcu me ne, hora vëhë cahme me.

Cavitengui cha sindadu quicha ngu ladu ntsacu ndanisin rë Jesucristu

³¹ Hya xi camá ne, xutaxa rë yungun ne, cafehya me favor cojo Pilatu xi cuitexa me ne, xtotoho ntsacu me xi caviyujutaha xcun cru rë jan, sehe chjaháxin rë nima. Cuatjin cafehya me ta, tsëhë xi nixtin hya ne, vispra tsëhë suhí, hane mijí rë me xi cuiyujutaha nima xcun cru rë hisca cuma nchujun, tsëhë xi, xi cuma nchujun jan ne, nixtin chjahájenda rë hacuaha jemu nixtin jyë.

³² Ngajan xi sindadu jan ne, quiji cavotoho cha ntsacu catsijo ni cha xi hacuaha cojo caviyujutaha xcun cru rë cojo Jesús.

³³ Peru xi cafehe cha xcun cru rë Jesús ne, xi cavëë cha xi ha cahme me ne, cavotaain cha ntsacu me.

³⁴ Peru ngu cha sindadu jan ne, quiji cavitengui cha quicha ngu ladu ntsacu ndanisin rë Jesús, hane ngutjen ni cavetju jni cojo nandá.

³⁵ Cha xi cavëë ne, chja cha tsëhë xcusun vëhë, cojo sa xi ngayujun ni ngayun ne, cumacjain nuju. Cjua xi chja cha ne, cjuaquixi, hacuaha cha vëhë ne, vëë cha ta cjuaquixi cjua xi chja cha.

³⁶ Cuatjin camá xcusun vëhë, cojo sa xi cuetjucaa cjua xi chja xujun rë Nina xi chja cuitjin: “Hisca ngu ninda rë me xtotaain.”

³⁷ Hacuaha chja nga ngu cahndë xujun rë Nina cuitjin: “Scuëë xuta me xi caxtengui rë quicha.” Cuatjin chja xujun rë Nina.

Seyaniji Jesucristu

³⁸ Xi cavatju xcusun vëhë ne, José, ngu xuta Arimatea ne, cafehya me cahndë cojo Pilatu xi cjuahaxin me nima Jesús. José jan ne, hacuaha xuta ladu rë Jesús má me, handasa catsingacuiin me xi xcun cojo xcun, tsëhë xi tsacjun me xutaxa rë yungun. Hane Pilatu ne, casua me cahndë. Hya xi camá ne, quiji cafahaxin José nima.

³⁹ Nicodemo, me xi quiji cavisajmi cojo Jesús ngu nguixun jan ne, hacuaha cojo me quiji me cojo José. Yaha me sacuaha cantê kilu aceite xi jemu ndaja jne xi cuêhêchjine me yojo rê nima jan.

⁴⁰ Ngajan xi, xi cafaha me nima jan ne, sehe cavitejnu rê me aceite hacuaha catsitjingu rê me tsjan, sacuatjin xcusun rê xuta tjê rê Israel hya xi vinchaniji me nima rê me.

⁴¹ Quihndê ne, tiña hiscan cavetaha xuta Jesús xcun cru xi catsiquehen me ne, tjin ngu ngajñi yatjê. Hane ngajñi yatjê jan ne, tacun ngu tsjun xatsê, xi hisca ngu nima cjêê seya.

⁴² Ngajan ni caveya me nima Jesús, tsêhê xi ngajan xi tiña, hacuaha ha vispra tsêhê suhi nixtin hya.

20

Tsjun tiya

¹ Quihndê ne, nixtin xi tjun tjun tsêhê tojje jan ne, na María na Mágdala jan ne, nguitajñu jñu sa ne, cavetju na quiji na xcun tsjun rê nima Jesús. Hane xi cafehe na jan ne, cavêê na xi ndoyo xi quitahá tingotjo rê tsjun jan ne, cachjaháxin rê.

² Ngajan xi vangasanii na quiji na hiscan tacun Simón Pedru cojo cha ladu rê Jesús xingu jan, cha xi jemu vinga rê Jesús. Hane xi cafehe na jan ne, cuitjin cachja na:

—Cavaxê me nima Nai naja tsêhê tsjun rê, hane hyaan jani quiji chani rê. —Cuatjin cachja na.

³ Ngajan xi Pedru cojo cha xingu jan ne, cavetjusanii me, quiji me xcun tsjun jan.

⁴ Vanga me catsijo me quiji me, peru cha xingu jan ne, hitsê sa hñu cavanga cha xi cuma rê Pedru, hane tjun cha vêhê cafehe cha xcun tsjun.

⁵ Hane xi cafehe cha jan ne, catsiquindi cha yojo rê cha, hane cavêê cha tsjian xi cavitjingu rê nima Jesús, siu jan. Peru cavisiiin cha.

⁶ Hane xi cafehe Simón Pedru xi camá ngascan ne, cavisehen me cahntsua tsjun jan. Hane cavêê me tsjian jan siu,

⁷ hane pañutu xi camahñu rcu nima jan ne, hacuiin tacun tangun cojo tsjian jan ta tjeju ne, xín tacun.

⁸ Ngajan xi cha ladu rê Jesús xi cafehe titjun xcun tsjun jan ne, hacuaha cavisehen cha. Hane cavêê cha hacuaha camacjain rê cha.

⁹ Nixtin hya ne, cjêê sa cuijne rcu cha xi chja xujun rê Nina xi nima Jesús ne, meje rê xi cuya me cjuahñu.

¹⁰ Hya xi camá ne, xuta ladu rê Jesús jan ne, cavuya cafe me.

Cavêê na María na Mágdala Jesucristu

¹¹ Hane na María ne, hacuaha cavuya quiji nga na xcun tsjun jan, hane ngajan casecun na tingotjo cajihnda na. Hane táha tijihnda na ne, catsiquindi na yojo rê na, cavutsejenya na cahntsua tsjun jan.

¹² Hane cavêê na jo ángel xi tyava tsjian rê, siu hiscan cafaña nima; ngu ne, táha hiscan cafaña rcu nima hane xingu ne, táha hiscan caviyuju ntsacu.

¹³ Ngajan xi ángel jan ne, cuitjin cavinenguisse rê na:

—Ngaye chjuun, ¿mé má chjihnde? —Cuatjin cavinenguisse ángel jan na.

Hane na vêhê ne, cuitjin cachja na:

—Cavaxê me maestru naha ne, hveen jani quiji chani rê. —Cuatjin cachja na.

¹⁴ Hane xi cavatju cachja na cjua vêhê ne, sehe cavuya na táha ngaxtun na, hane cavêê na Jesús secun me jan. Peru hvíin na xi hacui Jesús.

¹⁵ Ngajan xi Jesús ne, cuitjin cachja me:

—Ngaye chjuun, ¿mé má cuatjin chjihnde? ¿Yo xi vinchise? —Cuatjin cachja me.

Hane xi má rê na vêhê ne, cha xi sahmi cuidadu yatjê jan xi cachja. Vêhê xi cachja na cuitjin:

—Tatá, sa xi ngayun canaxun nima ne, tinújun jani catsangun chanu, sehe cjuê jaha.

—Cuatjin cachja na.

¹⁶ Ngajan xi Jesús ne, cuitjin cachja me cojo rê na:

—¡María! —Cuatjin cachja me.

Hane xi cavuya na ne, sehe cachja na hne hebreo cuitjin:

—¡Rabuni! —Cuatjin cachja na cjua xi meje cuichja Maestro.

¹⁷ Ngajan xi Jesús ne, cuitjin cachja me cojo rê na:

—Ha quihndê xicachunhñuu sa ná ta cjêê cjuêneje cjuétjenguê Nina Nahmi naja. Peru tánguntjengun xuta ladu naha xi yahnga, hane cuitjin tinújun cojo rê me: “Cjuêneje, cjuétjenguê Nahmi naha, me xi hacuaha Nahmi nuju, me xi Nina naha hacuaha Nina nuju ngayujun ni.” Cuatjin tinújun. —Cuatjin cachja Jesús.

¹⁸ Ngajan xi na María na Mágdala jan ne, quiji cachja na cojo xuta ladu rê Jesús cuitjin:

—¡Cahvë maestru naja! —Cuatjin cachja na.
Hacuaha cachja na cjuua xi cachja Jesús cojo rë na.

Cavëë xuta ladu rë Jesucristu me

¹⁹ Hane xi camajñu ndaja tsëhë nixtin tjun tjun tsëhë totje jan ne, tjin tangun xuta ladu rë Jesús jan. Hane tichjáñhu tingotjo ndihya siu me, tsëhë xi tsacjun me xutaxa rë yungun jan. Hya xi camá ne, cafehetsejen Jesús casecun me ngajñi rë xuta ladu rë me, hane cuitjin cachja me:

—Cjuandaja cjuajeya catejña cojo nuju. —Cuatjin cachja me.

²⁰ Hane xi cavatju cachja me cjuua vëhë ne, sehe catsingacun me tsja me hacuaha catsingacun me ngu ladu ntsacu ndanisin rë me. Ngajan xi xuta ladu rë me jan ne, jemu ndaja camá rë me hora xi cavëë me maestru naja.

²¹ Hane cachja nga Jesús cojo rë me xi cuacun jan cuitjin:
—Cjuandaja cjuajeya catejña cojo nuju. Sacuatjin catsingatju ná Nina Nahmi naja ne, hacuaha cuatjin tsingátju nuju ngayun. —Cuatjin cachja Jesús.

²² Hane xi cavatju cachja me cjuua vëhë ne, sehe cachimatjo me xuta jan, sehe cachja me cuitjin:

—Chjuhunntsun Hasen rë Nina cahntsua xahasen nuju.

²³ Xuta xi ninchatuhun jyë rë me ne, ha camanchataha. Hane xuta xi ninchatuun jyë rë ne, ha camanchataain. —Cuatjin cachja Jesús.

Cavëë Tomás Jesucristu

²⁴ Tomás, me xi chja me tsëhë Cha Lihma, ngu xuta ladu rë Jesús ngajñi rë me xi tejó jan ne, cuajin me tacun me hya xi cafehe Jesús hiscan xi tjin tangun xuta ladu rë me xi yahnga jan.

²⁵ Ngajan xi xuta ladu rë Jesús xi yahnga jan ne, cuitjin cachja me cojo Tomás:

—Cahyin Nai naja. —Cuatjin cachja me.

Peru Tomás ne, cuitjin cachja me:

—Sa xi scueen hiscan cavanguihmu rë xin tsja me hacuaha tsinguseen rcunsa hiscan cavisehen xin jan hacuaha cuetahanntsaan ngu ladu ntsacu ndanisin rë me ne, cumacjain camahani ná. —Cuatjin cachja Tomás.

²⁶ Xi cavatju jyin nixtin jan ne, tjin tangun nga xuta ladu rë Jesús cahntsua ndihya, hacuaha cojo Tomás tacun me cojo me xi cuacun vë. Hane cafehe nga Jesús casecun me ngajñi rë me xi cuacun vë, ha ndasa tichjá tingotjo ndihya. Hane sehe cachja Jesús cuitjin:

—Cjuandaja cjuajeya catejña cojo nuju.

²⁷ Sehe cachja me cojo Tomás cuitjin: —Jarë rcuntsun. Chutsujun ntsa ne. Hacuaha jarë ntsun. Ninguishun ngu ladu ntsacu ndanisin naha. Tejñuxun xi cuatjin macjain nuju. Catamacjain nuju. —Cuatjin cachja Jesús.

²⁸ Ngajan xi Tomás ne, cuitjin cafayangui me tsëhë Jesús:

—¡Ngayun Nai naha! ¡Ngayun Nina naha! —Cuatjin cafayangui me.

²⁹ Hane Jesús ne, cuitjin cachja me:

—¿Há macjain nuju ngatsë rë xi tichutsujun ná? Ndatjin, peru jemu ndaja tsëhë me xi macjain rë, ha ndasa vutsijin ná me. —Cuatjin cachja Jesús.

Cuitjin titsihindu Juan cojo sa xi cumacjain rë xuta

³⁰ Quihndë ne, jemu cjin sa cjuarcun casahmi Jesús xcun xuta ladu rë me xi camahindiin xcun xujun vihi.

³¹ Peru cjuarcun vihi ne, camahindu cojo sa xi ngayujun ni ngayun ne, cumacjain nuju xi Jesús ne, hacui me xi Catsingatju Nina, hacuaha hacui Quihndi rë Nina me. Hacuaha camahindu cojo sa xi, xi cuatjin cumacjain nuju ne, sacú nuju cjuahñu xatsë ngatsë rë xi ladu rë me má ngayun.

21

Cavëë yatu xuta ladu rë Jesucristu me

¹ Xi camá ngscan ne, cavetjuaatsejen nga Jesús ngajñi rë xuta ladu rë me ngajan tjehen laguna Tiberias, xi hacuaha hmí rë laguna Galilea. Hane cuitjin camá.

² Siu tangun me xi cuicun vi: Simón Pedru, cojo Tomás, me xi chja me tsëhë Cha Lihma, cojo Natanael, xuta Caná, ngu nandya tsëhë distritu Galilea, cojo quihndi rë Zebedeo, cojo jo sa xuta ladu rë Jesús jan.

³ Hane Simón Pedru ne, cuitjin cachja me cojo xicjin me:

—Ngahan ne, cjuë cúaxë chu tí. —Cuatjin cachja me.

Hane me xi yahnga jan ne, cuitjin cachja me:

—Hacuaha cuanguin ngayin cojo nuju. —Cuatjin cachja me.

Sehe cavetju me quiji me cojo xicjin me, cafaha me barcu, quiji me xcun nandá. Peru nguixun hya ne, casacuiin camahani rë me chu ti.

⁴ Hane hora xi tisahasen jan ne, cavëë me Jesús secun me tjehe laguna jan, peru hvíin me xi hacui Jesús.

⁵ Ngajan xi Jesús ne, cuitjin cajindaya me cavinenguisse rë me me xi cuacun jan:

—¿Há sacuiin nuju chu ti, tsan? —Cuatjin cavinenguisse Jesús.

Hane me xi cuacun jan ne, cuitjin cajindaya me cafayangui me:

—¡Sacuiin niji chu! —Cuatjin cafayangui me.

⁶ Ngajan xi Jesús ne, cuitjin cajindaya me cachja nga me cojo rë me:

—¡Ningatjunyun nahya vë táha ladu quixi tsëhë barcu ne, sehe sacú nuju chu! —Cuatjin cachja me.

Hane xi catsingatjenya xuta ladu rë me jan nahya táha ladu quixi ne, caain rë me cavaxë me nahya jan, ngatsë rë ti xi jemu cjin chu hinchu chu.

⁷ Ngajan xi cha ladu rë Jesús xi jemu vinga rë Jesús jan ne, cuitjin cachja cha cojo Pedru:

—¡Nai naja vë! —Cuatjin cachja cha.

Ngajan xi Simón Pedru ne, xi cahndë me cjua xi hacui Nai naja ne, cavajásanii me tsjian rë me, tsëhë xi quixti me xi sahmi me xa jan. Hane sehe catsingatjenya me yojo rë me ngajñi nandá xi cjuetjengui me Jesús tjehe laguna jan.

⁸ Peru xuta ladu rë Jesús xi yahnga jan ne, quijitjengui me Jesús cojo barcu jan, táha javë me nahya, ña quitsë rë cojo chu ti. Hacuiin cjin hinchu me tsëhë tjehe nandá ta sacuaaha ngu cientu metru ni cjin.

⁹ Hane xi cafehe me tjehe nandá jan ne, sehe cavetju me barcu, hane ngajan cavëë me ngu ndava ndihi tacun, quisun ngu ti xcun ndixuhi, hacuaaha cavëë me niñu.

¹⁰ Ngajan xi Jesús ne, cuitjin cachja me cojo me xi cuacun vë:

—Tuhun ngujo chu ti xi sehe canaxun vë. —Cuatjin cachja Jesús.

¹¹ Sehe quiji Simón Pedru cajavë me nahya jan cavaxë me nangui quixí, quitsë rë cojo suvá ti yehe, sacuaaha ngu cientu cojo yachan tejyan má chu. Hane handasa cuatjin cjin chu ti hinchu chu nahya jan ne, catiyaain.

¹² Ngajan xi Jesús ne, cuitjin cachja me cojo xuta ladu rë me jan:

—Nduvun xinu tajñu. —Cuatjin cachja me.

Peru hisca ngu xuta ladu rë me cavetjiin cacun me cavinenguisse me cuitjin: “Yo ngayun”, tsëhë xi ha vëë me xi hacui Nai naja.

¹³ Ngajan xi Jesús ne, cafaha me niñu jan, casua me xuta ladu rë me. Hacuaaha cuanitjin ni casua me chu ti jan.

¹⁴ Vihí majyan ndiya xi cavetjucaatsejen Jesús ngajñi rë xuta ladu rë me, quihndë xi cavuya nga me cjuahñu.

Visiajmi Jesucristu cojo Simón Pedru

¹⁵ Hane xi cajnetaha cajinë tajñu me ne, sehe cavinenguisse Jesús Simón Pedru cuitjin:

—Ngayun Simón, quihndi rë Jonás, ¿há hitsë sa hmu tacún ná ngayun xi cuma rë me xi cuicun vi? —Cuatjin cavinenguisse me.

Hane Pedru ne, cuitjin cafayangui me tsëhë Jesús:

—Juun. Tatá, ngayun ne, hyun ta hmú cáacun nuju. —Cuatjin cafayangui Pedru.

Hane Jesús ne, cuitjin cachja me cojo Pedru:

—Nihñu cuidadu xuta ladu naha sacuatjin ndaja cuidadu sahmi ngu paxtu rë chu hnditsánga rë me. —Cuatjin cachja Jesús.

¹⁶ Cavinenguisse nga Jesús Pedru majo ndiya cuitjin:

—Ngayun Simón, quihndi rë Jonás. ¿Há hmu tacún ná? —Cuatjin cavinenguisse Jesús.

Hane Pedru ne, cuitjin cafayangui me:

—Juun. Tatá, ngayun ne, hyun ta hmú cáacun nuju. —Cuatjin cafayangui Pedru.

Hane Jesús ne, cuitjin cachja me cojo Pedru:

—Nihñu cuidadu xuta ladu naha sacuatjin ndaja cuidadu sahmi ngu paxtu rë chu hnditsánga rë me. —Cuatjin cachja Jesús.

¹⁷ Cavinenguisse nga Jesús xi majyan ndiya Simón Pedru cuitjin:

—Ngayun Simón, quihndi rë Jonás. ¿Há hmu tacún ná? —Cuatjin cavinenguisse Jesús.

Ngajan xi Pedru ne, choho camá rë me xi cuatjin cavinenguisse Jesús me xi majyan ndiya sa xi hmu cacun me Jesús, hane cuitjin cachja me:

—Tatá, ngayun ne, yëjë ni ne, hyun. Ngayun ne, hyun ta hmú cáacun nuju. —Cuatjin cachja Pedru.

Hane Jesús ne, cuitjin cachja me cojo Pedru:

—Nihñu cuidadu xuta ladu naha sacuatjin ndaja cuidadu sahmi ngu paxtu rë chu hnditsánga rë me.

¹⁸ Hacuaha cuichjá cojo nuju cjuaquixi ta hya xi chúva sa nixtin nuju ne, cachujun suvun tsjian nuju sehe catsangun hiscan xi meje cuangun. Peru hya xi cuma changá ngayun ne, nicujun tyja nuju, hane hacjahi xuta tsihñu me cahntsua nuju, sehe cjucojo nuju me hiscan xi mijí cuangun. —Cuatjin cachja Jesús cojo Pedru.

¹⁹ Xi cuatjin cachja Jesús ne, casua me camachaya rë Pedru mé chuva rë cueya Pedru, hacuaha casua me camachaya rë me xi sahmi jyë sahmi hnga me Nina xi cuatjin cueya me. Xi cavatju cachja Jesús cjuavêhë ne, sehe cachja me cuitjin cojo Pedru:

—Nduvun cuanguen cojo ná. —Cuatjin cachja Jesús.

Xuta ladu rë Jesús xi jemu vinga rë me jan

²⁰ Xi cavuya cavutsejen Pedru táha ngaxtun me ne, cavëë me xi tjengui cha xi jemu vinga rë Jesús jan nduva cha, cha xi quijivaha tiña xcun Jesús hya xi tijinë me comida jan hacuaha cavinenguisse cha me cjuavihi: “Tatá, ¿yo xi sahmi nuju entregadu ni?”

²¹ Hane xi cavëë Pedru cha vëhë ne, cavinenguisse me cuitjin cojo Jesús:

—Tatá, hane me vëhë ne, ¿mé cuatju me cuma ni? —Cuatjin cavinenguisse Pedru.

²² Ngajan xi Jesús ne, cuitjin cachja me cojo Pedru:

—Sa xi ngahan meje ná xi cuejña me hisca hya xi cúya nga ne, ¿mé cuenda nuju ngayun ni? Ngayun ne, nduvun cuanguen cojo ná. —Cuatjin cachja Jesús.

²³ Hane cavitsojo ngajñi rë xuta ladu rë Jesús cjuaxi cha xi jemu vinga rë Jesús jan ne, cueyaain cha. Peru Jesús ne, hacuaha cachja me cojo Pedru xi cueyaain cha vëhë ta xi cachja me ne, cjuavihi: “Sa xi ngahan meje ná xi cuejña me hisca hya xi cúya nga ne, ¿mé cuenda nuju ngayun ni?” Vëhë cjuaxi cachja me.

²⁴ Cha xi cuajyihí jemu vinga rë Jesús jan ne, cha vëhë xi cachja cha cjuavêhë hacuaha cha vëhë catsihindu cha. Hacuaha ngayin xi tinihindin ngujo cjuavihi ne, hyin ta cjuaquixi cjuaxi cachja cha.

²⁵ Hacuaha jemu cjin sa xcusun xi casahmi Jesús. Peru sa xi cumahindu yëjë ni xcusun vëhë chuva ngu chuva ngu ne, xi má ná ne, chutaain cahndë setjo yëjë ni libru xi cumahindu, handasa jingujyë ni ngasunhndë.

Hacutjin Casahmi Apóstol

¹ Ngayun Teófilo, xcun xujun naha xi catsihindu nuju tjun tjun ne, cachjá cojo nuju yějē ni hacutjin cavetsihin casahmi xu Jesús cojo hacutjin cavetsihin cavicuya me. Cavétsehen hisca ntsacu cuetsihin ne,

² catsingujnetaha hisca hya xi quiji me ngahnga. Hya xi chaja sa cjue me ngahnga ne, cachja xu me cojo apóstol xi ha cavaxijin me xi camá ladu rē me jan, hacutjin sahmi. Hacuaha cojo ngahñu rē Hasen rē Nina xi cachja xu me.

³ Hya xi ha cavatju nixtin xi cahme me ne, cavuya cafehetjengui nga me apóstol jan, casua me camachaya xu rē ta quixi jain xi tacun quicun nga me. Hane ngajñi rē xi yachan nixtin ne, cavēē apóstol jan Jesús, hacuaha cachja sa Jesús cojo me ngujo cjua tséhē hacutjin cuma hya xi cuinduva Nina sahmi me gobiernu.

⁴ Hane xi tacun Jesús cojo apóstol jan ngajan Jerusalén ne, cavitexa xu me me cuitjin: —Hacuiin cuetjunxun tséhē nandya vi ta nechunyun rē cjuandaja xi sua nuju Nahmi naha, sacuatjin xi ha cachjá cojo nuju.

⁵ Cuatjin nihñu ta, xuta ne, handasa cojo nandá cavitenda Juan me, peru ngayun ne, xtenda ngayun cojo Hasen rē Nina cahntsua xi ngujo sa nixtin. —Cuatjin cavitexa me.

Quiji Jesús ngahnga

⁶ Hya xi camá ne, ngu nixtin xi siu tangun xu apóstol cojo Jesús ne, cavinenguise me Jesús cuitjin:

—Tatá, ¿há cavechú nixtin xi tuhun cahndē xi xutaxa rē nangui naja ne, cuya cuitexa nga me nguehe nangui naja cojo jingu sa nangui, sacuatjin xi cavitexa me hatsēē ni? —Cuatjin cavinenguise me.

⁷ Ngajan xi cafayangui xu Jesús cuitjin:

—Satiin nuju ngayun xi cumachaya nuju jarē nixtin xi Nina cavejña cacun me cojo cjuatacun rē suvá me xi cuma yějē ni xcusun véhē.

⁸ Peru hya xi cuinduva Hasen rē Nina cuisehen cahntsua xahasen nuju ne, hya sacú sa nuju ngahñu, sehe cuinújun cjua naha cojo xuta nguehe nandya Jerusalén, cojo yějē ni nandya distritu Judea cojo Samaria, hisca cojo yějē sa nangui xi siu ngasunhndē. —Cuatjin xu cafayangui me.

⁹ Xi cafē cachja xu Jesús cjua véhē ne, tivutsejen ni apóstol ne, cavetsihin quiji me ngahnga. Sehe cavisehen me ngajñi rē yufi, ha quihndē camatsijin sa me.

¹⁰ Ha tu tivutsejen cuaha xu apóstol ngahnga hacutjin cjui Jesús ne, xi tu camachaya rē me ne, hinchacun jo xihin xi tyava tsjian rē hiscan siu me.

¹¹ Hane cuitjin cavinenguise xu xihin jan me:

—Ngayun, cha Galilea. ¿Mé má cuatjin chutsujun ngahnga? Jesús, me xi quiji ngahnga vē ne, cuatjin tutjin xi cahyun xi quiji me ne, tjin ngu nixtin ne, ha cuanitjin ni cuya nga me. —Cuatjin cachja xu xihin jan.

Catuxijin rē me xi cuisehen ngojo rē nima Judas

¹² Hya xi camá xu ne, apóstol jan ne, cavetjuxin me tséhē ndetjún xi hmí ndetjún Ya Olivu, hane cavuya quiji nga me Jerusalén, xi tacun sacuaha ngu mil metru tséhē ndetjún véhē.

¹³ Hya xi cafehe me ngajan ne, quiji me ndihya hiscan xi viyuju me, hane quijinjini me pisu ngahnga. Me xi cuicun xu vi xi viyuju me ngajan: Pedru, Jacobo, Juan, Andrés, Felipe, Tomás, Bartolomé, Mateo, Jacobo xi quihndi rē Alfeo, Simón xi tséhē partidu zelota, cojo Judas xi xuta rē Jacobo.

¹⁴ Yějē ni me xi cuacun jan, cojo yějē ni me xi xicjin Jesús, cojo María naa rē me, cojo yachjin xi yahnga ne, nchunchujun ni camatangun me xi sahmi me oración rē me.

¹⁵ Ngu ndiya hya xi camatangun xu sacuaha chuva rē ngu cientu cojo can xuta xi cuacun ladu rē Jesús ne, casecunvasen Pedru ne, sehe cachja me cojo xuta jan cjua vihi:

¹⁶ —Ngayujun ngarcun ni ngayun xuta ladu rē Jesús. Cavetjucaa jain cjua xi catsihindu xutachanga naja David xcun xujun rē Nina hatsēē. Hatuxa cuatjin camameje rē xi cuma ta, tséhē xi chaja sa xi cuma matsejen ne, Hasen rē Nina ne, ha casua camachaya rē xutachanga naja jan hacutjin sahmi nima Judas, nima xi cavisecoo rē xuta xi cafaha rē Jesús, catsihñu rē me.

¹⁷ Nima Judas jan matsejen ne, hacuaha camá ladu rē Jesús sacuaha ngayaan matsejen ta, tséhē xi cavaxijin Jesús nima xi cuisecoo rē me xcun xa rē Nina xi sahmi me. —Cuahaxutjin cachja Pedru.

¹⁸ Nima Judas jan ne, cavatsë xu ngu rquí nangui cojo tujún xi cafaha tséhë xcusun tsehen xi casahmi xi casahmi rë entregadu Jesús. Hane ha xcun nangui xi cavatsë xu nima jan ne, caticja xcun, hane catsingá xu cahntsua nima, hisca cavetju yějë ni ntsehen rë.

¹⁹ Sacuatjin camá xu xi cahme nima ne, yějë cjuá véhë ne, cavechútáha rë yějë xuta ngajan Jerusalén. Véhë xi xuta ngajan ne, casuañihi xu rë me cahndë jan Acéldama, ñihi xi meje cuichja xi hne rë me ne, Cahndë Tséhë Jni.

²⁰ Hacuaha quijinduju sa cachja Pedru cuitjin:

—Hacuaha xcun xujun tséhë Salmo matsejen ne, cuitjin camahindu:

Catejña cuatjin ndava cha,

hacuaha hisca ngu cuiyijin jan.

Hacuaha camahindu sa cuitjin:

Xa rë cha ne, catjaha jingu sa xuta.

Cuatjin camahindu matsejen.

²¹ Véhë xi meje rë xi cuinchise rë ngu cha xi cuma tangun cojo niji matsejen, ngu cha xi ha cuatjin caviseceo niji yějë ni nixtin xi canuyihinyin cojo Nai naja Jesús,

²² hisca nixtin xi cavitenda Juan me cojo hisca nixtin xi quiji me ngahnga. Cha véhë matsejen ne, cuma tangun cha cojo niji, xi tsinguixi cha hacutjin camá xi cavuya Jesús cjuahñu. —Cuatjin cachja Pedru.

²³ Hya xi cajnetaha cachja Pedru cuatjin ne, catuxijin xu rë jo xihin: José cojo Matías. José jan ne, hacuaha hacui me xi hmí rë Barsabás cojo Justo.

²⁴ Sehe cafehya rë me Nina cuitjin:

—Ngayun Nai niji, ngayun xi hyun cjuatacun rë ngayëjë ni xuta ne, tséhë jo cha xi cuicun vihi ne, naxujun jarë cha xi chuya nuju ngayun

²⁵ xi cuisehen cha xa sacuaha apóstol cahndë rë nima Judas ta, tséhë xi nima véhë ne, cavéjña tiya cahndë rë xi quiji hiscan xi casatë rë. —Cuatjin cafehya rë me Nina.

²⁶ Xi cajnetaha cachja apóstol cuatjin ne, sehe cavaxë xu me ngu suerte, hane Matías casatë rë me. Ngajan xi Matías ne, camatangun me cojo tengu apóstol jan.

2

Hya xi canduva Hasen rë Nina

¹ Hya xi camá ne, xi cavechú nixtin tséhë suhi xi hmí Pentecostés ne, ngu cahndë ni camatangun xu yějë ni xuta ladu rë Jesús.

² Xi siu tangun me jan ne, ha tu ñahñu cahndë xu me xi jercu cafane ngajan ngahnga, sacuaha nuhya rë xi fane vanga tjo xi jemu hñu camahani. Sehe yějë ni xuta jan ne, cahndë xu me xi canduva cafane hisca cahntsua ndihya hiscan siu me.

³ Hacuaha cavëë xu me ndihi xi langa sacuaha neje xuta, hane cavitsojo quiji casatë xu rë jima ngu jima ngu me.

⁴ Hya xi camá ne, catsë xu rë Hasen rë Nina xahasen rë jima ngu me jan, hacuaha cavetsihin cachja xu me jima ngu me cjuandaja rë Nina ne, cachja xu me jingu sa hne xi maji rë me, tucutjin xi Hasen jan casahmi xi camá cachja me.

⁵ Ngajan Jerusalén ne, siu xuta tjë rë Israel xi faharcun jain me Nina, canduva me tséhë yějë ni nangui xi tjin ngasunhndë.

⁶ Hane hya xi canuhya rë xi cuatjin jercu fane ne, jercu xutacjín camatangun xu me xi quiji cavutsejen me mé xi camá. Hane xutacjín jan ne, jemu quijircun xu rë me, tséhë xi hora xi tichja xuta ladu rë Jesús ne, xuta jan ne, hne ni rë suva me cahndë me jima ngu me xi cuacun jan.

⁷ Ngajan xi cachja xu me cojo xicjin me cuitjin:

—¿Mé nga vihi ni? ¡Yějë ni me xi tichja vi ne, xuta distritu Galilea me!

⁸ ¿Hacutjin má xi jima ngu ngayaan ne, tinuhyan hne naja suvaan ta,

⁹ tséhë xi jemu cjín nangui canduvan? Ngujo ngayaan ne, xuta Partia ngayaan. Ngujo nga ngayaan ne, xuta Media ngayaan. Cojo sa xuta Elam, xuta Mesopotamia, xuta Judea, xuta Capadocia, xuta Ponto, xuta Asia,

¹⁰ xuta Frigia, xuta Panfilia, xuta Egipto, xuta ladu Libia, tiñataha nandya xi hmí Cirene, xuta Roma,

¹¹ xuta Creta, xuta Arabia. Ngayaan xuta ngu nangui xi macjain naja Nina rë xuta tjë rë Israel ne, jemu cjín ngayaan xi nechanyanjñe nguehe ngajñi rë xuta tjë rë Israel. Hacuaha ngayejen ngarca ni tinuhyan xi tichja me hne naja. Tichja me tséhë cjuandaja xi jercu casahmi Nina. —Cuatjin xu cachja xuta xi cuacun jan.

¹² Hane tséhë xi cuatjin camacjínacacun me xi jemu quijircun camahani rë me ne, cavinenguise xicjin xu me cuitjin:

—¿Mé rë meje cuichja xcusun ví? —Cuatjin cavinenguise me.

¹³ Peru yahnga me ne, catsixcuehyu me xuta ladu rë Jesús, hane cachja xu me ta chihi xuta jan.

Cjua xi cachja Pedru

¹⁴ Hya xi camá ne, caxinchacun yějë tengu apóstol jan ne, sehe cachja xu Pedru cojo xutacjín jan cuitjin:

—Ngayujun ngarcun ni ngayun xuta tjë rë Israel xi nechun nguehe Jerusalén matsejen ne, tinuhyun ngujo cjua xi cuichjá cojo nuju vi, cojo sa xi cumachaya nuju.

¹⁵ Ngayujun ni matsejen ne, nújun ta me xi cuicun vi ne, chihi me. Peru quixiin xi nújun ta ndicumaha ni ne, sehe fane ñaja tséhë nguitajñu.

¹⁶ Peru xcusun xi sehe cavatju camá nguehe matsejen ne, cavetjucaa cjua xi cachja xutachanga naja profeta Joel hatsëë nixtin, hya xi catsihindu me cjua xi casua Nina. Cuitjin catsihindu me:

¹⁷ Cjua xi cuicun vi xi chja Nina cojo naja:

Hya xi cuma tiña nixtin xi cjuë ngasunhdë ne,
hya tsingátju Hasen naha xi cuisehen xahasen rë xuta jingujyë ni ngasunhdë;
hane quihndi nuju, sa chjuun sa xihin ne, suacuenda me cjua naha,
hacuaha cha nixti nuju cojo xuta changá nuju ne,
cuichja chini cojo rë me tséhë cjuatacun naha.

¹⁸ Hacuaha nixtin hya ne, tsingátju Hasen naha xi cuisehen xahasen rë me xi sahmi cjuatacun naha, sa chjuun, sa xihin,

hane me vëhë ne, suacuenda me cjua naha.

¹⁹ Hya sahme xcusun cjuarcun vihi ngajan ngahnga, cojo nguehe nangui xi chutsujun: cuáxëcaa jni, cojo ndihi, cojo nihndi cjín.

²⁰ Tsuhi ne, cuma jma;

sá ne, cuma hani sacuaha jni.

Cuatjin cuma hya xi chaja sa xi cuechú nixtin xi ngahan xi Nina ngahan ne, tsichúva yějë ni xuta cojo cjuatacun rë me;

ngu nixtin jyë ngu nixtin ndajyihí nixtin vëhë.

²¹ Hane nixtin hya ne, yějë ni xuta xi cjuehya ná me cjuandaja naha ngahan xi Nina ngahan ne, cuetjutje me.

Cuatjin catsihindu profeta Joel cjua xi cachja Nina.

²² Cjuinduju sa tichja Pedru cjua vihi:

—Quihndë matsejen ne, tinuhyun cjua xi cuichjá cojo nuju, ngayujun ngarcun ni xuta tjë rë Israel. Jesús, me Nasaret matsejen ne, camachaya naja xi Nina catsingatju rë me matsejen ta, tséhë xi jemu cjín xcusun cjuarcun casahmi me ngajñi naja sacuatjin xi ha ndaja hyun. Camá casahmi me cjuarcun jan matsejen ta, ngatsë rë xi Nina casua rë me cahndë xi cuatjin casahmi me.

²³ Nina matsejen ne, ha vëë me yějë ni xcusun. Vëhë xi cojo tjun sa ne, ha catsingataha cacun me ta Jesús vë ne, cuma me entregadu cojo xuta tsehen. Cuatjin cavejña Nina cjuatacun rë me hisca chaja sa xi cuetjucaa xcusun vëhë. Sacuaha xi ngayun canicuhun Jesús ta, ngatsë nuju xi cavetaha xuta tsehen me xcun cru.

²⁴ Peru cavëhëndaya Nina me tséhë cjuaveya, catsicuya me me cjuahñu ta, tséhë xi hatuxa camaji xi cavéjña me ngahma gubiernu rë cjuaveya.

²⁵ Xutachanga naja David matsejen ne, catsihindu me tséhë Jesús cuitjin:

Cahvë Nina xi cjui titjun me tsahan yějë ni nixtin;

ticojo ná me, cojo sa xi tsajin mé cuma ná.

²⁶ Vëhë xi xahasen naha ne, jemu sua rë, hacuaha ntsuva ne, súv cjuandaja chjá.

Hacuaha vëhë xi ngahan ne, vetahá cáacun Nina.

²⁷ Cuatjin sahme ta, tséhë xi ngayun Nina ne, hacuiin nismutacun hasen naha xi cuejña ngajan Hades hiscan siu nima, hacuaha hatuxa tuun cahndë xi cjuehndu yojo naha, ngahan xi hatuxa tjënguë nuju cojo yějë xahasen naha.

²⁸ Ngayun ne, catuhun camachaya ná ndiya xi cuéchu hiscan sacú ná cjuahñu ndajyihí.

Hacuaha ninguitsun rë xahasen naha cjuasua xi cuécutaha nuju hiscan nechun.

Cuatjin catsihindu David.

²⁹ Hacuaha cachja sa Pedru cuitjin:

—Ngayujun ngarcun ni matsejen ne, nguehe cuichjáquixë cojo nuju matsejen ta, xutachanga naja David ne, cahme me, hacuaha caseyaniji me hatsëë nixtin. Hane tsjun rë me ne, tacun cuaha hisca quihndë hiscan xi cavéjña.

³⁰ Peru xi chaja sa xi cueya David jan matsejen ne, ngu profeta me, hacuaha ha vëë me xi ha cachja Nina cojo rë me cuitjin: Ngahan suva hvë xi ngu xuta tjë riji ne, cuitexa rë xuta, sacuatjin tivitexe ngaye. Cuatjin cachja Nina cojo David.

³¹ Vëhë xi camachaya rë David xcusun xi sahmi Nina ngascan. Ha vëë me xi cuya nga cjuahñu me xi tsingatju Nina, hane vëhë xi cachja me ta hacuaha hacuiin cuejña me vëhë ngajan Hades ngajñi rë nima, hacuaha hacuiin cjuhndu yojo rë me.

³² Hane ngayjin ni matsejen ne, cahyin suvin xi Jesús, me xi catsingatju Nina vë ne, catsicuya Nina me cjuahñu.

³³ Hane quihndë matsejen ne, ha catsiquijin Nina me xi cavechú me ngahnga hiscan véjña suvá Nina. Hacuaha cafahatsja me Hasen rë Nina sacuatjin xi cachja Nina Nahmi rë me xi sua rë me. Vëhë xi Jesús matsejen ne, tisahmi me xcusun xi tijima nguehe ngajñi niji.

³⁴ Xi tsejen ne, cachjaain David tsëhë suvá me ta, tsëhë xi hacuiin quiji me ngahnga sacuatjin quiji Jesús matsejen ta, catsihindu sa me cuitjin:

Nina ne, cachja me cojo Nai naha cuitjin:

“Tinechin nguehe, ladu quixi naha,

³⁵ hisca hya xi yëjë ni xi sahmi ri condra ne, cuiyujú ngahan ngahma gobiernu riji.”

Cuatjin catsihindu David hatsëë nixtin.

³⁶ Vëhë xi ngayujun ni xuta nangui Israel matsejen ne, ndaja catijne rcun cjuja xi chjá cojo nuju vi: Jesús vë, me xi ngayun catuhun xi cahme xcun cru matsejen ne, Nina casahmi me xi me vëhë ne, camá me Nai naja hacuaha catsingatju Nina me xi cuaxëtje naja me. —Cuahaxutjin cachja Pedru cojo xutacjin jan.

³⁷ Xi cahndë xutacjin jan cjuja vëhë ne, jemu choho camá rë me. Ngajan xi cavinenguise me Pedru cojo apóstol xi yahnga jan cuitjin:

—Xi má nuju ngayun ne, ¿mé xi ndatjin nihñi? —Cuatjin cavinenguise xuta jan.

³⁸ Ngajan xi cachja xu Pedru cojo rë me cuitjin:

—Nindeyun cjuatacun nuju. Hacuaha jima ngu ngayun ne, catixtenda ngayun, ngatsë rë xi camangu tacún cojo Jesucristu, sehe ngajan xi tsinchataha nuju Nina tsëhë jyë nuju. Xi cuatjin ne, hacuaha sahmi me cjuandaja xi sua nuju me Hasen rë me.

³⁹ Cjuandaja vëhë ne, ha cachja Nina xi sua nuju me ngayun cojo quihndi nuju, hisca cojo yëjë xuta tjë nuju. Nina naja ne, sua me cjuandaja vëhë xi cuma rë yëjë ni xuta xi cuaxijin me. —Cuahaxutjin cachja Pedru.

⁴⁰ Hacuaha jemu cjin sa cjuja cachja me cuitjin, hacutjin meje rë xi sahmi xuta jan:

—Naxunxun yojo nuju tsëhë xuta tsehen xi siu quihndë. —Cuatjin cachja xu me.

⁴¹ Ngajan xi xuta xi cachuya rë me cjuja xi cachja Pedru ne, caxtenda me. Hane cuatjin xi nixtin vëhë xu ne, sacuaha jyan mil xuta xi cavisehen me ladu rë Jesús.

⁴² Casua me yojo rë me cojo cjuja xi tivicuya apóstol jan, hacuaha nguñaja cacun xu me xi ma tangun me cojo yëjë sa xuta ladu rë Jesús. Nchunchujun ni ne, camatangun me cojo xicjin me xi sahmi me oración, cojo xi sinë tangun me niñu.

Cjuandaja xi caviyuju xuta ladu rë Jesucristu cojo xicjin me

⁴³ Jemu cjin xcusun xu cjuarcun casahmi apóstol ngatsë rë ngahñu xi casua Nina me, hane vëhë xi yëjë ni xuta xi hacuiin ladu rë Jesús ne, jemu tsacun me.

⁴⁴ Peru yëjë ni xuta ladu rë Jesús ne, camatangun xu cjuatacun rë me, hacuaha yëjë ni xcusun xi tsëhë jima ngu xu me ne, hacuaha camá tsëhë yëjë ni me xi yahnga jan.

⁴⁵ Caviteña xu me xcusun xi tjin rë me ne, sehe cavatëcja xu me tujún ngajñi rë yëjë ni me xi casahmi chaja rë.

⁴⁶ Nchunchujun xu ni ne, camatangun me nguñaja cacun me ngajan yungun xi matitjun xi cjuaharcun me Nina. Hacuaha xi cajinë xu me niñu ndava me cojo xicjin me ne, jemu cojo cjuasua, cojo cjuandaja cojo cjuajeya.

⁴⁷ Hacuaha jemu cavaxëndaja me Nina. Hane yëjë xuta xi yahnga jan ne, xi cavëë xu me xcusun rë xuta ladu rë Jesús jan ne, cachja xu me ta xuta ndaja me xi cuacun vë. Hacuaha nchunchujun ni ne, tivaxëtje Nai naja ngujo ngujo sa xuta. Vëhë xi nchunchujun ni ne, jima cjin sa xuta yungun jan.

3

Casahmi Pedru cojo Juan xi camandaja ngu cha xi maji fi

¹ Ngu nixtin jan ne, Pedru cojo Juan ne, quijiniji tangun xu me yungun xi matitjun chuva rë fane jyan, hora xi fi chjayuma xuta.

² Hane ngu cha xi maji fi, tsëhë xi tsehen ntsacu cha hisca hya xi catsin cha ne, hacuaha hora vëhë cjuicojo xuta rë cha cha yungun. Nchunchujun ni quiji chani rë cha ngajan

tingotjo hinchua xondyojo rë yungun xi hmí Tingotjo Ndajiyhi, xi sahmi cha caridad tsêhë xuta xi visehen ndatsen yungun jan.

³ Hane xi cavëë cha hmu rë jan xi camatiña Pedru cojo Juan hiscan tacun cha xi cuisehen me ndatsen yungun jan ne, cafehya xu cha me cjuandaja rë me.

⁴ Ngajan xi cavutsejenndaja me cha. Hane Pedru ne, cuitjin cachja me cojo cha: —Chutsijin niji hitsë —Chja xu me.

⁵ Hane cavutsejen cha me ta, xi má rë cha ne, tjin mé xi sua me cha.

⁶ Ngajan xi cavuya cachja nga Pedru cojo rë cha cuitjin:

—Tsajin camahani ná tujún. Peru xi tjin ná, tsan ne, suá ri. Jesucristu, me Nasaret ne, casua ná me ngahñu, hane vëhë xi chjá cojo ri ta, tisechin, hane tujiyhiye. —Cuatjin cachja xu me cojo cha.

⁷ Sehe cafaha me tsja quixi cha hmu rë jan hane catsisatjenhnga xu me cha. Hane ngutjen ni casacuhñu rë ntsacu cha cojo ndoyojo naxa rë cha.

⁸ Xi tu cafaha Pedru tsja cha ne, cacahnga cha, hacuaha casecun cha. Sehe cavetsihin catsujiyhiya cha. Hacuaha cavisehen cha yungun xi matitjun cojo me xi cuacun jan, cjui cha, hisca chijihnga cha, taha tivaxëndaja cha Nina.

⁹ Yëjë ni xuta xi siu ndatsen yungun jan ne, cavëë me xi cjui cha, hacuaha cahndë me xi tivaxëndaja cha Nina.

¹⁰ Hane jemu quijircun rë xuta jan tsêhë xcusun xi cavatju cha camá ta, tsêhë xi ha vëë me xi ha hacui cha vëhë xi véjña cha sahmi cha caridad ngajan tingotjo yungun xi hmí Tingotjo Ndajiyhi.

Cjua xi cachja Pedru cojo xuta ngajan yungun xi matitjun

¹¹ Cha xi camandaja xu jan ne, miji cjuexin cha tsêhë Pedru cojo Juan. Hane tsêhë xi jemu quijircun rë xuta ne, cavanga me quiji me hiscan siu me xi cuacun jan, camatangun me ngajan ngu ngahma ndihya tsêhë yungun, cahndë xi hmí Tsêhë Salomón.

¹² Xi cavëë xu Pedru xi cuatjin camatangun xuta ne, cuitjin cachja me:

—Ngayujun ngarcun ni xuta tjë rë Israel matsejen ne, ¿mé má cuatjin fircun nuju tsêhë cha xi cuijyihí vi? ¿Mé má cuatjin jercu chutsujun niji sacuaha xi ngatsë rë cjuatacun niji suvin o ngatsë rë xi jemu ndaja chjihinrcuin Nina ne, vëhë xi camá canihñi xi camandaja cha? ¡jéya! Hacuini cuatjin.

¹³ Nina rë Abraham cojo Isaac cojo Jacob, Nina rë xutachanga naja matsejen ne, casahmi jyë casahmi hnga me Jesús, me xi casahmi xa rë Nina. Hane ngatsë rë me cama cjuarcun vi. Peru ngayun matsejen ne, catuhun Jesús cojo xutaxa rë. Hane ngajan xcun gobernador Pilatu matsejen ne, hora xi meje tsismi me Jesús ne, catuun cahndë.

¹⁴ Jesús jan ne, hatuxa tjengui me Nina cojo yëjë xahasen rë me, hatuxa cjuaquixi xi sahmi me. Peru ngayun matsejen ne, canitjungun me. Hane cahndë rë xi chjahyun rë Pilatu xi tsismi me Jesús matsejen ne, cachjahyun rë me xi tsismi me ngu cha tsiguehen.

¹⁵ Hane Jesús, me xi sua cjuahñu naja ne, ngayun catuhun me xi cahme me. Peru Nina matsejen ne, catsicuya me Jesús jan cjuahñu. Hane ngayin ne, hisca cahyin me quihndë xi tacun nga me cjuahñu.

¹⁶ Cha xi cuijyihí tichutsujun vi ne, ha hyun yo cha. Casacu rë ntsacu cha ngahñu ta, tsêhë xi ngayin matsejen ne, mangutacuín cojo Jesús. Hacuaha ngatsë rë xi cuatjin mangutacuín cojo Jesús ne, vëhë casahmi xi camandaja cha sacuahatjin xi cahyun ngayujun ni.

¹⁷ Quihndë ne, ha hvë ta ngayujun ni cojo yëjë xutaxa rë yungun naja matsejen ne, hya xi catuhun Jesús xi cahme me ne, hyuun yo xi canihñu cojo.

¹⁸ Peru Nina matsejen ne, cuatjin casahmi me xi cavetjucaa cjua xi cachja yëjë ni profeta cojo xutachanga naja hatsëë nixtin hya xi cachja profeta jan, tsêhë cjuañihí xi cuatju ngu me xi tsingatju naja Nina nchujun ni nguini.

¹⁹ Vëhë xi meje rë xi nndeyun cjuatacun nuju, tisuhun ndiya rë Nina, cojo sa xi Nina matsejen ne, cjuahaxin me yëjë ni jyë nuju.

²⁰ Xi cuatjin nihñu ne, Nina ne, sua me cahndë xi cjuahajenda hitsë xahasen naja. Hacuaha xi cuatjin ne, tsingatju nga naja me Jesús ta, tsêhë xi ha me vëhë xi cachja Nina hisca hatsëë xi cjuaha me xa xi cuaxëtje naja me.

²¹ Peru Jesús jan ne, meje rë xi cuejña sa me ngajan ngahnga hisca xi Nina ne, cuya sahmi ndaja nga me yëjë ni xcusun, sacuatjin xi ha cachja profeta rë me, hya xi cachja me cojo xutachanga naja cjua rë Nina hatsëë nixtin.

²² Xutachanga naja Moisés matsejen ne, cuitjin cachja me ngu cjua xi catsingatju Nina tsêhë me hatsëë: “Nina ne, sahmi me xi cuetjujñi ngajñi nuju ngu xi cuma profeta sacuaha ngahan. Tetuhunrcun yëjë cjua xi cuichja me cojo nuju ta,

²³ sa xi yo xi cuetaharcuaain cjua rë profeta jan ne, hatuxa cueya, ha quihndë cuejñaai ngajñi naja ngayaan xuta rë Nina.” Cuahaxutjin cachja Pedru cjua rë Moisés.

²⁴ Sehe cachja sa Pedru cojo xuta cuitjin:

—Hacuahanitjin yějē profeta, xi cavetsihin cojo xutachanga naja Samuel cojo xi candu-vaniji sa ne, jemu cachja me tséhē xcusun xi camá nixtin xi nechan vi.

²⁵ Cjuandaja xi cachja Nina xi sua me xutachanga naja nchujun ni nguini ne, véhē cjuandaja xi tisua naja me quihndē. Hacuaha compromisu xi casahmi me cojo xutachanga naja matsejen ne, tsisahmichihin me cojo naja quihndē. Nina ne, casahmi me compromisu jan nixtin xi cachja me cojo xutachanga naja Abraham cuitjin: “Ngatsē rē ngu xuta tjē riji ne, ngahan ne, tsinchácun yějē ni xuta ngasunhdē.” Cuatjin cachja Nina cojo Abraham.

²⁶ Sehe ngajan xi Nina matsejen ne, hya xi cavaxijin me Jesús xi cjuaha xa rē me ne, tjun tjun ngayaan xuta tjē rē Israel catsingatju naja Nina me. Cuatjin xi tsinchacun naja me xi cuetjungeen jima ngu ngayaan tséhē ndiya tsehen xi tivanguen. —Cuahaxutjin cachja Pedru cojo xuta.

4

Casua Pedru cojo Juan cjuaquixi rē me

¹ Hya xi camá ne, Pedru cojo Juan ne, tichja cuaha sa me cojo xutacín jan, hora xi cafehe xu ngujo nahmi. Hacuaha cha mayu rē yungun xi matitjun cojo ngujo sa cha saduceo ne, cafehe xu cha cojo nahmi xi cuacun jan.

² Hane jemu xti má rē yějē me ta, tséhē xi tivicuya apóstol jan xuta, tichja me xi ngatsē rē xi catsicuya Nina Jesús cjuahñu ne, véhē xi machaya naja xi cuechú nixtin ne, tsicuya nga Nina yějē ni nima cjuahñu.

³ Hya xi camá ne, cachjaha rē Pedru cojo Juan. Peru tséhē xi ha quiji xu hora ne, tu caxincha ni me ndavaya.

⁴ Peru jemu cjin xuta xi cahndē cjuar rē apóstol jan ne, camacjain xu rē me. Véhē xi yějē xuta xihin xi macjain rē ne, sacuaa hñu mil xu camá me, cojo me xi hatsē camacjain rē cojo me xi sehe camacjain rē.

⁵ Xi camá nchujun jan ne, ngujo xutaxa rē yungun cojo ngujo xuta changá cojo ngujo cha xi vicuya cjuachacun ne, camatangun xu me ngajan Jerusalén.

⁶ Camatangun me cojo Anás, me xi matitjun tséhē yějē ni nahmi, cojo Caifás, cojo Juan, cojo Alejandro, cojo yějē sa me xi xuta rē me xi matitjun tséhē nahmi jan.

⁷ Hya xi camá xu ne, catsingatju me quiji chjahá rē Pedru cojo Juan, caviyuju me me cavasencia jan ne, sehe cavinenguise me me cuitjin:

—¿Hacutjin canihñu xi camá camandaja cha hmu rē jan? ¿Yo casua nuju chuva rē xi cuatjin canihñu? —Cuatjin cavinenguise me.

⁸ Ngajan xi Pedru ne, cojo ngahñu rē Hasen rē Nina xi quitsē rē xahasen rē me ne, cuitjin cafayangui xu me:

—Ngayun xi má ngayun xutaxa rē tsajan, ngayun xi má ngayun xuta changá naja matsejen ne,

⁹ quihndē xi meje cumachaya nuju hacutjin canihñi ngu cjuandaja xi camandaja ngu cha hmu rē.

¹⁰ Nguehe cuinújin cojo nuju cojo sa xi cumachaya rē yějē ni xuta tjē rē Israel ta cha hmu rē vi ne, nguehe secun cha xcun ngayujun ni matsejen ta, tséhē xi camandaja cha ngatsē rē ngahñu rē Jesucristu, me xi tséhē nandya Nasaret. Ngayun ne, catuhun me xi cahme me xcun cru, peru Nina matsejen ne, catsicuya rē me cjuahñu.

¹¹ Me véhē xi canitjungun ta, tséhē xi xi má nuju matsejen ne, machjiriin camahani Jesucristu. Canitjungun me sacuaa tsitjungui chjinevexo ngu ndoyojo xi chuyiin rē me tséhē. Peru quihndē matsejen ne, camatitjun me tsajan ngayejen ni, sacuaa ndoyojo ngahñu rē ndihya.

¹² Tsajin sa yo xi cuaxětje naja. Tsajin sa ngu xuta nguehe ngasunhdē xi catsingatju Nina xi cuma cuaxětje naja. —Cuahaxutjin cachja Pedru.

¹³ Hya xi camá xu ne, cavēē xuta xi cuacun jan xi Pedru cojo Juan ne, tsacjuuin camahani me xi sua me cjuaquixi rē me, hacuaa cavacun rē xuta jan xi Pedru cojo Juan ne, xuta yuma me, xi hisca cavutayaain me cjuachacun. Ngajan xi xuta jan ne, jemu quijircun rē me. Hacuaha ha vēē me xi Pedru cojo Juan ne, hacui me xi catsuyihiya cojo Jesús.

¹⁴ Hane tséhē xi cha xi camandaja jan ne, ngajan secun tangun xu cha cojo Pedru cojo Juan ne, véhē xi sacuinyiin rē xuta xi cuacun jan hacutjin cuma xi cuichja me condra tséhē Pedru cojo Juan.

¹⁵ Hya xi camá ne, cavaxē me Pedru cojo Juan cojo cha xi camandaja jan candatsen. Sehe cavisiajmicjin sa me cojo xicjin me.

¹⁶ Cuitjin cachja me:

—¿Mé xi ndatjin nihña cojo cha xi cuacun vë? Yëjë ni xuta nandya ne, ha camachaya rë me tsëhë cjuarcun jyë xi casahmi cha. Hane cumaji cuinújan xi quixiin.

¹⁷ Peru cojo sa xi hacuiin cuitsojo sa cjuacjintacun vihi ngajñi rë xuta nandya ne, cuinchanrcun rë cha. Cuinújan cojo rë cha ta ha quihndë cuichjaain sa cha tsëhë nima vëhë cojo xuta. —Cuahaxutjin cavisiajmicijn xuta xi cuacun jan cojo xicjin me.

¹⁸ Hya xi camá ne, cajindaya nga xuta xi cuacun jan Pedru cojo Juan, sehe cachja xu me cojo me xi ha quihndë cuyaaín cuichja me tsëhë Jesús cojo xuta.

¹⁹ Peru Pedru cojo Juan ne, cuitjin cafayangui me:

—Xi má nuju suvun ne, ¿jarë xi hitsë sa chuya rë Nina? ¿Há xi cuinuhyin tsujun ne?, o há tsajin ne, ¿há xi cuinuhyin tsëhë me?

²⁰ Peru ngayin matsejen ne, hatuxa cumajin nisejyin xi cuinújin cjuandaja xi canuhyin cojo xcusun xi cahyin. —Cuatjin xu cafayangui me.

²¹ Hya xi camá ne, xuta xi cuacun jan ne, cavincharcun sa xu me Pedru cojo Juan, sehe cavëhëndaya xu me. Casacuinyiin rë me hacutjin sahmi me castigu me ta, tsëhë xi yëjë ni xuta tichja me xi jemu jyë hnga Nina cojo Hasen rë me, ngatsë rë cjuarcun xi cuatjin camá jan.

²² Cha xi camandaja ngatsë rë cjuarcun jan ne, ha vatju yachan nu xu tjin rë cha.

Cafehya sa xuta ladu rë Jesús ngahñu cojo Nina

²³ Hya xi camá ne, xi tu camandaya Pedru cojo Juan ne, quijitjengui sa xu me xuta xi yahnga xi hacuaha ladu rë Jesús, sehe casuacuenda me yëjë cjua xi cachja xuta xi cuacun jan cojo rë me.

²⁴ Hya xi cahndë me xi yahnga jan cjua xi cachja Pedru cojo Juan ne, ngu tangun ni cachja me xi cafehya rë me Nina cuitjin:

—Ngayun Nai niji. Ngayun xi canihñu ngahnga, canihñu nangui, canihñu ndachacun, hacuaha canihñu yëjë ni xcusun xi siu jan ne,

²⁵ cojo Hasen nuju ne, cachuxuhun cjuatacun rë xutachanga niji David, me xi casahmi xa nuju. Hane me vëhë ne, cuitjin cachja me cjua xi catuhun rë me:

¿Má rcu hngacacun xuta?

¿Mé má cuatjin tsingatahacacun me ngu cjuatacun tsehen xi tsajin mé machjirëhë?

²⁶ Me xi matitjun tsëhë jingu sa nangui, cojo xutaxa rë jingu sa nandya ne, matangun me xi sahmi me condra Nina hacuaha sahmi me condra me xi tsingatju Nina xi cuaxëtje naja.

Cuatjin cachja xutachanga niji David.

²⁷ Hacuaha cavetjucaa jain cjua vëhë ta, tsëhë xi ha gneuhe nandya vihi ne, cuatjin camatangun Herodes cojo Poncio Pilatu cojo xutaxín cojo xuta tjë rë Israel. Camatangun me xi cuacun vëhë xi sahmi condra me Jesús, me xi hatuxa sahmi xa nuju cojo yëjë xahasen rë, me xi ngayun caningatjun ngasunhdë.

²⁸ Cuatjin casahmi me yëjë hacutjin xi ha cavejñu cjuatacun nuju hatsëë xi cuma ta, tsëhë xi cuatjin meje nuju ngayun.

²⁹ Quihndë ne, ngayun xi Nai niji ngayun ne, chjuhuncuendun cjua xi cachja xuta xi cuacun vë hacutjin xi choho sahmi me cojo niji. Hane ngayin xi má ngayin mosu hndixahan nuju ne, tuhun niji hitsë ngahñu xi rcuiin camahani xi cuinújin cjua nuju cojo xuta.

³⁰ Hacuaha cojo ngahñu nuju ne, nihñu xi cuma ndaja xuta hmu rë, hacuaha nihñu hitsë cjuarcun xi cueyinnanguin ñihi rë Jesús, me xi hatuxa sahmi xa nuju cojo yëjë xahasen rë. —Cuatjin xu cafehya rë me Nina.

³¹ Hane xi cajnetaha casahmi xuta ladu rë Jesús jan oración ne, cafani nangui ngajan hiscan tjin tangun xu me. Hane cojo Hasen rë Nina ne, catsë rë xahasen rë yëjë ni me, sehe cavetsihin cachja me nguñaja cacun me cjua rë Nina cojo xuta.

Casahmi tangun me yëjë xcusun xi tjin rë me

³² Quihndë ne, ngayëjë ni me xi cuatjin camangu cacun me cojo Jesús ne, ngu cjuatacun ni rë me, ngu xahasen xu ni rë me. Hacuaha hisca ngu me cachjaain me xi yëjë ni xi tjin rë me ne, tsëhë suvá me ta xi tsëhë me ne, hacuaha tsëhë xu yëjë xicjin me.

³³ Hane cojo ngahñu jyë xi casua Nina apóstol xi cuacun jan ne, cuatjin quijinduju me casua me camachaya rë xuta hacutjin catsicuya Nina Nai naja Jesús cjuahñu. Hane jercu casua Nina cjuandaja rë me cojo yëjë xuta ladu rë me.

³⁴ Hacuaha ngajñi rë me xi cuacun jan ne, tsajin xu hisca ngu me xi tjin rë cjuachaja ta, tsëhë xi yëjë me xi nai rë ngu rquí nangui o sa xi ngu ndihya ne, viteña me, sehe fi cani me chji rë jan

³⁵ tsja apóstol. Sehe ngajan xi apóstol xi cuacun jan ne, vatëcja xu me ngajñi rë yëjë xuta, ha tucutjin cjuachaja xi tjin rë xuta jan.

³⁶ Hacuaha cuatjin casahmi ngu cha xi hmí rë José, ngu cha xi casuañihi apóstol ngu ñihi xi ma jo xi hmí Bernabé, ñihi xi meje cuichja cuitjin: Ngu Cha Xi Sua Cjuetacun. Cha vëhë ne, tjë rë Leví má cha, peru catsin xu cha ngajan ngu nangui hiscan xi hmí rë Chipre.

³⁷ Hane cha vëhë ne, caviteña cha ngu rquí nangui xi tjin rë cha, sehe quiji cani cha chji rë, cafahatsja apóstol.

5

Cha Ananías cojo na Safira

¹ Peru ngu nga cha xi hmí rë Ananías cojo na Safira chjuun rë cha ne, hacuaha caviteña xu cha ngu rquí nangui.

² Peru cafahaxin suvá cha hitsë tujún jan, sehe quiji cani cha hitsë tujún xi cavangui jan tsja apóstol, sacuaa xi ha vëhë yëjë ni chji rë nangui jan. Hane na chjuun rë cha jan ne, hacuaha vëë xu na xi cuatjin casahmi cha.

³ Ngajan xi cachjataha xu Pedru cha cuitjin:

—¿Mé má cuatjin caningatihin xi catsë Satanás xahasen riji, ngaye Ananías? ¡Xitsehen vëhë casahmi xi cachjehexin sove hitsë tujún tsëhë chji rë nangui xi caviteñi! ¡Xitsehen vëhë casahmi xi meje cuindache rë Hasen rë Nina!

⁴ Xi chaja sa cuitëñi nangui jan ne, ha hye ta tsiji. Hacuaha ngu ndiya xi ha caviteñi ne, hacuaha hye ta tujún rë ne, tsiji. ¿Mé má cuatjin caningatehetacuin xi nihñi ngu cjuatacun tsehen vi ni? Hacuuiñ ngayin ni xuta xi meje cuindache niji ta hisca cojo Nina meje cuindache rë me. —Cuatjin cachja Pedru.

⁵ Xi tu cahndë cha Ananías cjuja jan ne, caticja cha, hane cahme xu cha. Hane yëjë xuta xi camachaya rë cjuacjintacun jan ne, jemu catsacjun camaha xu ni me camá.

⁶ Ngajan xi ngujo cha ne, cavaxtë cha nima ngu tsjian ne, sehe cafaha cha quiji caveyaniji cha.

⁷ Hya xi camá ne, xi cavatju sacuaa chuva rë jyan hora xi cahme nima jan ne, cafehe xu chjuun rë nima ngajan hiscan siu apóstol jan. Peru cjëë cumachaya rë na hacutjin xi cavatju nima xihin rë na camá.

⁸ Ngajan xi cavinenguise xu Pedru na cuitjin:

—Tinoje cojo ná. ¿Há caviteñu nangui sacuatjin chji vihi?

—Juum. Chji vëhë caviteñi. —Cuahaxutjin cachja na.

⁹ Sehe ngajan xi cavinenguise nga xu Pedru na cuitjin:

—¿Mé má cuatjin sacuaa catsingataha cacun nima xihin riji ne, cuatjin caningatehetacuin xi meje cuindachun Hasen rë Nina? Chutsijin ta cuacun cha xi quiji caveyaniji rë nima xihin riji nduva cha jan. Quihndë ne, hacuaha cojo ngaye cuatjin cuatji cuma. —Cuatjin cachja Pedru.

¹⁰ Ha hora vëhë ni ne, caticja xu na hiscan secun Pedru, hane cahme na. Xi tu cavisehen nga cha xi cuacun jan ne, ha cahme xu na xi tu cavëë cha. Sehe ngajan xi cafaha cha nima jan, quiji caveyaniji cha tjeheñ rë hiscan caseyaniji nima xihin rë.

¹¹ Hya xi camá ne, yëjë xuta rë yungun cojo yëjë sa xuta xi camachaya xu rë cjuacjintacun jan ne, jemu catsacjun camahani me camá.

Casahmi apóstol cjuarcun

¹² Hacuaha apóstol xi cuacun jan ne, jemu cjín cjuarcun xi casahmi xu me ngajñi rë xuta nandya. Hane ngajan ndatsen yungun xi matitjun, hiscan ngahma Ndihya Tsëhë Salomón ne, ngajan xu ma tangun yëjë xuta ladu rë Jesús.

¹³ Peru xuta xi hacuuiñ ladu rë Jesús me ne, hisca vetjiin cacun me xi cuma tiña me ngajan, handasa yëjë xuta jemu ndaja chja me tsëhë xuta ladu rë Jesús jan.

¹⁴ Peru hacuaha jemu cjín sa xuta sa chjuun sa xihin me ne, jimangu cacun xu me cojo Jesús, hacuaha jima tangun me cojo xuta ladu rë Jesús.

¹⁵ Hacuaha jemu cjín xuta ne, vaxë me xuta hmu rë, viyuju me me xcun nijña ngajan ndiyatë, cojo sa xi hora xi cuatju xu Pedru ne, ndastu tjahnguen rë me satë rë xuta hmu rë xi cuacun jan, hane cumandaja me.

¹⁶ Hacuaha jemu cjín camaha xu ni xuta nandya tahndee rë Jerusalén ne, ficojo me xuta hmu rë hacuaha cojo me xi hinchá xitsehen xahasen rë, ngajan Jerusalén. Hane camandaja ngayëjë xu ni me.

Cavatju apóstol cjuañihi

¹⁷ Hya xi camá ne, nahmi xi matitjun tsëhë yëjë ni nahmi, cojo yëjë sa xuta saduceo xi tjin tangun cojo rë me ne, jercu camaxín camaha xu ni rë me.

¹⁸ Vëhë xi cachjaha rë apóstol, caxincha me ndavaya.

¹⁹ Peru hya xi camanguixun ne, ngu ángel tséhë Nina quiji cavuxaha xu tingotjo ndavaya, sehe cavaxë rë apóstol xi cuacun jan. Hya xi cavetju me ne, cachja ángel jan cojo rë me cuitjin:

²⁰ —Tángun yungun xi matitjun ne, tuhuncuendun rë xuta yëjë ni cjua tséhë ndiya xatsë xi tisua nuju Nina. —Cuatjin cachja ángel jan.

²¹ Ngajan xi apóstol jan ne, casahmi me sacuatjin cachja ángel. Vëhë xi, xi casahasen xi camá nchujun ne, quiji xu me yungun xi matitjun. Hane xi cafehe me ndatsen yungun jan ne, cavetsihin casuacuenda me xuta cjua tséhë ndiya xatsë jan.

Hacuaha sacuaaha hora vëhë ne, nahmi xi matitjun cojo xuta xi tjin tangun cojo rë me ne, casahmi tangun xu me yëjë xuta changá tséhë xuta tjë rë Israel xi cuma ngu junta jyë. Sehe catsingatju me ngujo cha nisë xi cjue cuaxë xu cha apóstol tséhë ndavaya, cjuecojo cha me hiscan tijima junta.

²² Peru xi cafehe cha ngajan ndavaya jan ne, casacuiin xu rë cha me. Ngajan xi cavuya quiji casuacuenda cha xuta changá jan cuitjin:

²³ —Xi caphin tingotjo ndavaya jan ne, nda ndaja tichjáñhu, hacuaha cha xi sahmi cuidadu jan ne, hinchacun cha tingotjo jan. Peru xi catuxaha tingotjo ne, tsajin yo casacu niji xi híncha cahntsua. —Cuatjin casuacuenda cha.

²⁴ Ngajan xi cha mayu yungun cojo yëjë nahmi xi matitjun ne, hya xi cahndë xu me cjua vëhë ne, jemu cavinenguise xicjin me tséhë xcusun xi camá jan.

²⁵ Hane ha hora vëhë ni ne, cafehe xu ngu cha xi cachja cojo rë me cuitjin:

—Nijyun tacún. Ngu xa xi nduva ngahan ne, cha xi cuacun cavinchun ndavaya jan ne, hinchatahá cha ndatsen yungun, tichja cha cojo xuta. —Cuatjin cachja cha xi cafehe jan.

²⁶ Sehe ngajan xi cha mayu yungun jan ne, quiji cha cojo cha nisë, quijijaha xu cha apóstol xi cuacun jan. Hane xi cafaha cha me ne, quijicojo cha me hiscan tijima junta, peru hacuiin cojo cjuachan ta, tséhë xi jemu tsacjun xu cha xuta nandya, sá tu cuetaha me cha ndyojo.

²⁷ Hya xi cafehecojo cha me jan ne, sehe caviyuju cha me xcun nahmi cojo xuta changá xi cuacun jan. Ngajan xi nahmi xi matitjun ne, cachja xu me cojo rë me cuitjin:

²⁸ —Ha canújin cojo nuju ta ha quihndë cuyuun cuinújun tséhë nima vëhë cojo xuta. Peru quihndë ne, caninguitsujun sa cjuachacun nuju jingujyë nandya Jerusalén, hacuaha meje ningatjunsun jyë tséhë cjuaveya rë nima vëhë ngaxtin ngayin.

²⁹ Ngajan xi Pedru cojo apóstol xi yahnga xu jan ne, cuitjin cafayangui me:

—Meje rë xi cuinuhan tséhë Nina cahndë rë xi cuinuhan tséhë xuta.

³⁰ Ngayun matsejen ne, catuhun Jesús xi catyangui me xcun ngu cru, hane ngajan cahme me. Peru Nina rë xutachanga naja matsejen ne, catsicuya me Jesús cjuahñu.

³¹ Hane Jesús vë matsejen ne, casahmi jyë casahmi hnga Nina me, hacuaha cavejña me Jesús ladu quixi tséhë me, xi cumatitjun Jesús tsajan hacuaha cuaxëtte naja me. Cuatjin casahmi Nina, cojo sa xi ngayaan xuta tjë rë Israel matsejen ne, nindeyan cjuatacun naja hacuaha tsinchataha naja me tséhë jyë naja.

³² Ngayin matsejen ne, cahyin xcusun vëhë, vëhë xi titihín jimachaya rë xuta. Hacuaha Hasen rë Nina matsejen ne, cuatjin tisua jimachaya rë xuta tséhë xcusun xi camá jan. Hane Nina ne, casua me Hasen rë me cojo xuta xi vihndë tséhë me. —Cuatjin cafayangui apóstol jan.

³³ Ngajan xi yëjë me xi cuacun tisahmi xu junta jan ne, hya xi cahndë me cjua xi cachja apóstol jan ne, jercu camacjan camahani rë me. Hísa meje tsiquehen xu me apóstol jan.

³⁴ Peru ngajñi rë xuta xi sahmi junta jan ne, jiyajñi ngu me xi vicuya cjuachacun xi hmí rë Gamaliel, ngu xuta fariseo. Hane yëjë ni xuta ne, jemu faharcun xu me me. Gamaliel jan ne, casecunvasen me, sehe cavitexa me xi cuetjuxin apóstol ngu hora lihndi candatsen.

³⁵ Sehe cachja xu me cojo xuta xi tisahmi junta jan cuitjin:

—Ngayujun ngarcun ni xuta tjë rë Israel matsejen ne, nechun cuidadu sa xi mé meje nihñu cojo cha xi cuacun vë.

³⁶ Ninguitsjun ta hatsëë nixtin matsejen ne, cavetjujñi nima cha Teudas ngajñi rë xuta. Jercu cachja nima xi jemu cha venguichji rë cha, hane sacuaaha ñuju cientu xihin cavisehen ladu rë nima. Hya xi camá ne, catsiquehen xuta nima, hane yëjë ni xuta ladu rë nima jan ne, cavitsojo me, hane ngajan café cjuandya xi casahmi me.

³⁷ Hane xi camá ngascan ne, sacuaaha nixtin xi camá censu matsejen ne, hacuaha cavetjujñi nima Judas, cha Galilea. Cavindacha nima xuta, hane jemu cavisehen me ladu rë nima. Peru nima vëhë matsejen ne, hacuanitjin ni cahme. Hane yëjë ni xuta ladu rë nima jan ne, café me cavitsojo me.

³⁸ Vëhë xi ngeuhe cuichjá cojo nuju ta mijí rë xi nihñu cjuahngatacun cojo cha xi cuacun vë. Mijí rë xi chasen cha ta, sa xi súvá cjuatacun ni rë xuta xi tijima matsejen ne, cjuëya súvá vë.

³⁹ Peru sa xi cjuatacun rë Nina xi tijima ne, cumaji cuichancjan cjuatacun rë cha. Ndaja cuidadu, sá tu cuechú nixtin xi cumachaya naja ne, Nina tichicjaan cojo rë me. —Cuatjin cachja Gamaliel.

Hya xi cajnetaha cachja Gamaliel cuatjin ne, yëjë ni xuta xi tisahmi junta jan ne, cajne cacun me.

⁴⁰ Ngajan xi cajindaya nga me apóstol jan, sehe cavitexa me casehen rë. Hya xi camá ne, cachja xu me cojo rë apóstol xi ha quihndë cyaain cuichja me tséhë Jesús cojo xuta, sehe cavéhëndaya xuta jan me.

⁴¹ Ngajan xi apóstol jan ne, cavetjuxin xu me tséhë hiscan jima junta jan. Hane jemu ndama camahani rë me xi cavechú chuva rë xi choho cavatju me camá ngatsë rë Jesús.

⁴² Peru nchunchujun ni ne, ngajan ndatsen yungun cojo ndava xuta ne, casejyün xu xi casua me camachaya rë xuta cjuandajyihí xi chja xi Jesús ne, hacui me xi catsingatju Nina.

6

Catuxijin rë yatu cha xi cuisecoo rë apóstol

¹ Hya xi camá ne, xi quiji sa nixtin ne, camacjín sa xuta ladu rë Jesús. Hane ngajñi rë me xi cuacun vëhë ne, me xi visiajmi hne griego ne, cavetsihin cavinchajyë xu me me xi visiajmi hne rë xuta tjë rë Israel. Jyë xi cavincha xu me ne, yachjin cahan tséhë ngajñi rë me ne, ndajin xu má cuenda me nchunchujun ni hora xi ticja xcusun xi satë rë me xingu xingu me xi tjín rë cjuachaja.

² Ngajan xi apóstol xi tejó jan ne, cajindayavaha me yëjë sa xuta ladu rë Jesús, sehe cachja xu ngu apóstol jan cuitjin:

—Ndajintjin xi tu fë tu vetsihin vejñixin cjuá rë Nina ngatsë rë xi chjihincuendin cjuacjintacun xi ma cuenda nchunchujun ni.

³ Vëhë xi ngayujun ni ne, naxujun ngajñi nuju yatu xihin xi tsajin mé cún mé má hacuaha quitsë rë xahasen rë cojo Hasen rë Nina hacuaha vechútaha cjuatacun rë. Sehe tahan rë xa xi cjuahacuenda cjuacjintacun vëhë.

⁴ Xi cuatjin ne, ngayin ne, tihín yojo niji cojo xa xi nihñi oración hacuaha tihín cumachaya rë xuta cjuá rë Nina. —Cuatjin cachja apóstol jan.

⁵ Hane jemu cachuya xu rë yëjë xuta xi cuacun jan cjuá xi cachja apóstol jan. Sehe ngajan xi cavaxijin xu me yatu xihin xi cuicun vi: Esteban, ngu xihin xi jemu mangucacun cojo Jesús hacuaha quitsë rë xahasen rë cojo Hasen rë Nina; Felipe; Prócoro; Nicanor; Timón; Parmenas; cojo Nicolás, ngu xutaxín xi hacuün xuta tjë rë Israel, peru camacjain rë me Nina rë xuta tjë rë Israel. Nicolás jan ne, canduva me ngu nandya xi hmí rë Antioquia.

⁶ Hya xi camá xu ne, quijicojo xuta jan xihin xi cavaxijin me jan xcun apóstol. Sehe apóstol jan ne, casahmi me oración, sehe cavisanetsja xu me xihin xi cuacun jan xi suaxa rë me.

⁷ Xi quiji sa nixtin ne, xuta Jerusalén ne, jemu jima chaya sa xu rë me cjuá rë Nina, hacuaha jercu jima cjín sa xuta ladu rë Jesús ngajan Jerusalén. Hisca nahmi ne, jemu cjín me xi jimangu cacun xu me cojo cjuandajyihí xi chja tséhë Jesús.

Caxinchajyë rë Esteban

⁸ Nixtin hya ne, Esteban, ngu xihin xi hacuaha cojo cavaxijin xuta jan ne, quitsë rë xahasen rë cjuandaja rë Nina, hacuaha quitsë rë me ngahñu rë Nina. Vëhë xi jemu tisahmi xu me cjuarcun ngajñi rë xuta.

⁹ Peru ngujo cha tséhë yungun xi hmí rë Yungun Rë Hndixahan Xi Ha Ndaya Tjin ne, cojo xu cha ma tangun cha cojo cha nandya Cirene, cha nandya Alejandría, cha estadu Cilicia, cojo cha estadu Asia, xi cuisiajmi cha. Cavechú ngu nixtin xi camatangun xu cha xi cuacun vé cojo Esteban ne, cavetsihin cafhataha cha me.

¹⁰ Peru ngatsë rë xi Hasen rë Nina jemu casua rë me cjuatacun xi cuisiajmi me cojo cha ne, cacaain xu rë cha casahmi condra cha cjuá rë me.

¹¹ Hya xi camá ne, cavanguisehma xu cha ngujo cha xi cuichja cjuandesu cuitjin: —Canuhyin xi choho cachja cha xi cuajyihí vë tséhë Moisés hacuaha choho cachja cha tséhë Nina. —Cuatjin cuichja cha.

¹² Hane xi cachja cha cjuandesu vëhë ne, casahmi cha xi yëjë xuta cojo xuta changá cojo cha xi vicuya cjuachacun ne, jemu camaxti xu rë me. Ngajan xi cachjahá rë Esteban, quiji chani rë me xcun yëjë xuta xi matitjun. Sehe casahmi me xi matitjun jan ngu junta.

¹³ Ngajan xi cha xi cuacun jan ne, cuitjin cachja xu cha cjuandesu hora xi cavinchajyë cha Esteban:

—Cha xi cuijyihí vi ne, sejiin cha xi choho chja cha tséhë yungun rë Nina xi matitjun vi. Sejiin cha xi choho chja cha tséhë ley rë yungun naja.

¹⁴ Hacuaha canuhyin xi cachja cha xi Jesús, cha Nasaret vè ne, tsinguetsun cha yungun naja vi hacuaha tsindeya cha xcusun xi cavejña xutachanga naja Moisés hatsèè hacutjin nihña. —Cuatjin cavinchajyè cha me.

¹⁵ Ngajan xi yèjè xuta xi siu xu xcun junta jan ne, cavutsejenndaja me Esteban. Hane cavèè me xi xcun Esteban ne, tangun jyih xi cojo xcun ngu àngel.

7

Casua Esteban cjuaquixi rë me

¹ Hya xi camá ne, nahmi xi matitjun xu jan ne, cavinenguise me Esteban cuitjin:

—¿Há quixi cjuaxi chja cha xi cuacun vè? —Cuatjin xu cachja me.

² Hane Esteban ne, cuitjin xu cavetsihin casua me cjuaquixi rë me:

—Ngayujun ni quihndi nandya, ngayujun ni xuta changá matsejen ne, tisiñuju cjuaxi cuichjá cojo nuju vi. Nina naja, xi jemu jyè hnga camahani me cojo hasen rë me matsejen ne, cajnetsejen me cachja me cojo xutachanga naja Abraham, hya xi tacun cuaha Abraham táha ladu tsèhè nangui Mesopotamia, hya xi chaja sa cjue setaha cahndé me ngajan Harán.

³ Hane cachja Nina cojo rë me cuitjin: “Nismitacuín nangui riji. Nismitacuín xuta riji. Hane tihin ngajan ngu nangui cjin, tuyani ni hiscan xi ngahan tsingáacun ri.” Cuatjin cachja Nina.

⁴ Ngajan xi Abraham matsejen ne, cavetju me tsèhè nangui rë me, nangui xi hmí Mesopotamia, hiscan xi caviyuju xuta nangui rë me, xuta Caldea. Cavetju me quiji casetahacahndé me ngajan nandya Harán. Hane xi cavatju cahme nahmi rë me ne, Nina casahmi me xi cavetju nga Abraham tsèhè Harán, canduva casetahacahndé me nguehe nangui hiscan xi nechan quihndi.

⁵ Peru xi ngutjen ni ne, casuaain Nina me hisca hitsè nangui vihi xi cuma tsèhè me ta xi cachja me ne, hisca xi cuma ngascan ne, sehe sua me nangui vihi xi cuma tsèhè Abraham, cojo yèjè sa xuta tjè rë me xi cuinduva ngascan. Hya xi cachja Nina cojo rë me cuatjin ne, cjèè sacú rë chjuun rë Abraham quihndi.

⁶ Hacuaha cachja sa Nina cojo Abraham cuitjin: “Cuechú nixtin xi xuta tjè riji ne, cjue cuiyujutaha me ngu nangui cjin. Hane xuta xi nangui rë jan ne, sahmi me mosu hndixahan rë me xuta xi cuacun tjè riji vè, hacuaha jemu choho sahmi me cojo rë me. Ñuju cientu nu xi cuatjin sahmi me xcusun vèhè.

⁷ Peru cuechú nixtin xi ngahan ne, sahme castigu xuta xi nangui rë jan. Hane xi cuatju xcusun vèhè ne, sehe cuetju xuta tjè riji ne, cuya cuinduva nga me nguehe cahndé vihi, hane nguehe cjuaharcun cjuahajeya ná me.” Cuatjin cachja Nina cojo Abraham.

⁸ Hane cojo sa xi cuma tsejen xi camangu cacun Abraham cojo compromisu xi casahmi Nina cojo rë me matsejen ne, cavejña Nina ngu xcusun xi xtí chuxin naja ngayaan xi xihin ngayaan. Ngajan xi hya xi cavechú jyin nixtin xi catsin Isaac, quihndi rë Abraham ne, cavatè me chuxin rë quihndi jan sacuatjin xi cachja Nina. Hane hacuanitjin ni casahmi Isaac cojo quihndi rë me Jacob. Hacuaha Jacob ne, cuatjin casahmi me cojo yèjè tejó quihndi rë me xi xutachanga naja.

⁹ Hane xi camá ngascan matsejen ne, cavechú ngu nixtin xi xutachanga naja xi quihndi rë Jacob jan ne, jemu casahmi xin cacun me cojo hntsé me xi hmí rë José. Vèhè xi caviteña me José. Hane quijicojo xuta xi cavatsè rë José jan me hisca nangui Egipto. Peru Nina ne, cavisecoo me José jan,

¹⁰ Hacuaha cavaxètje Nina me tsèhè yèjè cjuacjintacun xi cavatju me camá. Jemu casua Nina me cjuatacun, hacuaha jemu casua me me cjuandaja. Vèhè xi me xi matitjun tsèhè yèjè ni nación Egipto ne, jemu cachuya rë me tsèhè José jan. Vèhè xi me xi matitjun jan ne, casua me José xa xi cuitexa me jingujyè ni nación jan hacuaha cjuahacuenda me yèjè cjuacjintacun xi tjin ndava me xi matitjun jan.

¹¹ Hya xi camá ne, jercu camajindya camahani jingujyè ni ladu tsèhè Egipto cojo Canaán. Jercu jyè camahani ngu cjuañihi xi cavatju xuma xutachanga naja camá. Casacuiin rë me mé xi siné me.

¹² Peru hya xi camachaya rë xutachanga naja Jacob xi jemu tjin xichiné ngajan Egipto matsejen ne, ngajan catsingatju me quihndi rë me ngu ndiya titjun xi cjue cuatsé me xichiné.

¹³ Hane hya xi ma jo ndiya quiji quihndi rë Jacob ngajan Egipto ne, cachja quixi José cojo hntsé me cuitjin: “Ngahan xi tsuhun ná.” Cuatjin cachja me. Hacuaha nixtin hya ne, me xi matitjun tsèhè Egipto matsejen ne, camachaya rë me yo tjè rë má José.

¹⁴ Sehe ngajan xi José ne, catsingatju me hntsé me jan xi cjue jaha me Jacob, nahmi rë me, cojo yèjè sa xuta rë me. Xi yèjè xuta xi cuacun vèhè ne, jyanchan tyjuhun xuta má me.

¹⁵ Ngajan xi Jacob cojo xuta rë me matsejen ne, quiji caviyujutaha cahndë me ngajan Egipto. Hane xi camachangá me ne, ngajan cahme me. Hacuaha yëjë sa xutachanga naja xi cuacun jan ne, hacuaha ngajan cahme me.

¹⁶ Xi camá ngascan ne, quiji chani rë yojo rë nima Jacob ngajan nandya Siquem. Ngajan caseyaniji nima tsjun xi cavatsë Abraham hatsëë, hya xi caviteña xuta rë ngu cha xi hmí rë Hamor, ngajan Siquem.

¹⁷ Hya xi camá ne, xi camatiña nixtin xi cuetjucaa sacuaaha cjua xi ha cachja Nina cojo Abraham matsejen ne, yëjë xutachanga naja xi siutaha cahndë ngajan nangui Egipto ne, ha jercu cjín camahani camá me.

¹⁸ Sehe cavisehen nga ngu me xi xatsë xi camatitjun me ngajan nangui Egipto jan. Hane me vëhë ne, hvíin me hacutjin casahmi nima José hatsëë.

¹⁹ Hacuaha me vëhë ne, jemu cavindacha me xutachanga naja. Jemu choho casahmi me cojo rë me ta casahmi me nguýë xi xutachanga jan ne, cuaxë me quihndinda rë me, cuiyuju me candatsen cojo sa xi cueya. Hane cuatjin xi ha quihndë hacuín cuma cjín sa me.

²⁰ Ngajñi rë cjuacjintacun vëhë matsejen ne, hya catsin Moisés, ngu quihndi xi jemu ndajyíhi camahani. Hane quihndi jan ne, ndava nahmi rë camacha sacuaaha chuva rë jyan sá.

²¹ Peru hya xi cavaxë me quihndi jan xi cueya ne, na quihndi rë me xi matitjun jan ne, cafaha na quihndi jan, hane catsicha na sacuaaha quihndi rë suvá na.

²² Hane xi quiji sa nixtin ne, cavetsihin cavutaya Moisés yëjë ni cjuahasen xi tjín rë xuta Egipto, sehe ngajan xi camá me ngu xihin xi jercu vengui chji rë xi chja me cojo xi sahmí me.

²³ Hya xi cavechú Moisés yachan nu matsejen ne, catsingataha cacun me xi cjue scusehenya me xuta tjë rë Israel, xuta xi tangun xutachanga rë me cojo.

²⁴ Hya xi camá ne, cavëë Moisés xi ngu cha Egipto ne, tisahmi cha cjuahngatacun cojo ngu cha tjë rë Israel. Ngajan xi Moisés ne, cavisecoo me cha xi choho tivatju tijima jan. Catsiquehen me cha Egipto jan, hane cuatjin casahmingojo me.

²⁵ Xi má rë Moisés matsejen ne, cuijnercu yëjë xuta tjë rë Israel xi Nina tsingatju me Moisés xi cuaxëtje me xuta jan. Peru cajñii rcu me.

²⁶ Xi camá nchujun jan ne, cavechútaha me jo cha tjë rë Israel xi ticjan cha cojo xicjin cha. Hane meje cuatëcja me si xi tisahmi cha. Vëhë xi cachja me cojo cha cuitjin: “¿Mé má cuatjin nihñu cjuahngatacun cojo xingun? ta ngayun ne, tangun xutachanga nuju.” Cuatjin xu cachja Moisés.

²⁷ Peru cha xi tisahmi cjuahngatacun cojo cha xingu jan ne, catsivaha cha Moisés, sehe cachja cha cojo me cuitjin: “¿Yo casuaxa nuju xi nduvun vitexun niji hacuaha nduvun nichuvun jyë niji?”

²⁸ ¿Há meje nicuhun ná ngahan sacuatjin canicuhun cha Egipto ngujña?” Cuatjin cachja cha.

²⁹ Hane xi cuatjin cachja cha cojo Moisés ne, catsacjun me camá. Vëhë xi quiji cavanga me hiscan ngu nangui cjín xi hmí rë Madián, ngajan casetahacahndë me. Hane xi quiji nixtin matsejen ne, camá me nahmi rë jo quihndi xihin.

³⁰ Hane hya xi café nga yachan nu xi casetaha Moisés ngajan ne, cavechú ngu nixtin xi cavëë me sacuaaha ngu ángel ngajñi rë ndihi tsëhë ngu ya lihndi xi seti ngajan ngu xín camahani tsëhë nandya, tiña Naxi Sinaí.

³¹ Hane jemu quijircun rë Moisés xi cavëë me xcusun jan. Hane xi quijitiña sa me xi scutsejenndaja me matsejen ne, cahndë me cjua rë Nina xi cachja cuitjin:

³² “Ngahan xi Nina rë xutachanga riji ngahan, Nina rë Abraham cojo Isaac cojo Jacob.” Cuatjin cachja cjua rë Nina jan. Ngajan xi Moisés ne, cavetsihin ña cafatsë me xi catsacjun me camá; ha hisca quihndë cavetjiin cacun me xi scutsejen sa me.

³³ Sehe cachja nga Nina cojo rë me cuitjin: “Naxe chuxinxhtë riji ta cahndë hiscan sechin ne, catsincháacun.

³⁴ Hacuaha nguehe cuichjá cojo ri ta ngahan ne, ha cahvë hacutjin choho tisahmi xuta Egipto cojo xuta ladu naha, hacuaha ha cahndë hacutjin tifë cacun xuta ladu naha xi choho tivatju me tijima. Vëhë xi ngahan ne, canduvajne xi cuaxëtje me. Quihndë ne, ndove ta tsingátju ri ngajan Egipto.” Cuatjin cachja Nina cojo Moisés.

³⁵ Moisés vë ne, hacui me xi catsitjungui xuta hya xi cachja xuta cuitjin: “¿Yo casuaxa nuju xi nduvun vitexun niji, hacuaha nduvun nichuvun jyë niji?”, chja me. Hacuaha hacui me xi Nina catsingatju rë xi cuma titjun hacuaha cuëhëndaya rë xuta. Hane sacuaaha ángel xi camatsejen ngajñi ndihi rë ya lihndi jan ne, cavisecoo rë Moisés xi cuatjin casahmi me.

³⁶ Hacuaha hacui me xi cavaxë rë xutachanga naja tsëhë nangui Egipto. Jemu casahmi me cjuarcun ngajan Egipto, cojo ngajan ndachacun Hani, cojo ngajan ngu xín camahani tsëhë nandya. Cahntsua yachan nu xi cuatjin casahmi me.

³⁷ Moisés vë ne, hacui me xi cachja cojo xutachanga naja cuitjin: “Nina ne, cuya tsingatju nga nuju me ngu profeta xi cuetjuiñi ngajñi nuju. Tsingatju nuju Nina profeta vëhë sacuatjin catsingatju ná me ngahan.” Cuatjin cachja Moisés.

³⁸ Hacuaha ha hacui ni me xi casetaha cojo xutachanga naja, hya xi caviyujutaha me ngajan ngu xín camahani tsëhë nandya. Hacui me xi cachja ángel cojo rë ngajan Naxi Sinaí. Hacuaha hacui me xi cakahatsja cjua rë Nina xi sacú rë xutachanga naja hacuaha hisca cojo xi sacú naja ngayaan quihndë.

³⁹ Peru xutachanga naja xi cuacun jan ne, mijí cuihndë me tsëhë Moisés. Catsitjungui me Moisés, hisca cavuya catsinguitsjen nga me nangui Egipto cahntsua xahasen rë me.

⁴⁰ Ngajan xi cachja me cjua vihi cojo xutachanga naja Aarón, hntsé Moisés: “Nindujun sa nina xi scuxaha ndiya tsajan ta, cha Moisés vë, cha xi cavaxë naja tsëhë nación Egipto ne, hyaan mé camá rë cha xi vuyaaín cha.” Cuatjin cachja xuta jan.

⁴¹ Ngajan xi nixtin hya ne, catsindaja xuta jan ngu nina rë me xi xcusun rë ngu hndindyaja. Hya xi camá ne, catsiquehen me ngujo chu, sehe quiji caviyuju me chu xcun nina jan. Hacuaha casahmi me suhi tsëhë nina xi catsindaja sává me jan.

⁴² Vëhë xi Nina naja ne, catsismi cacun me xutachanga jan, cojo sa xi cjuaharcun xuta jan niñú xi siutaha ngahnga, sacuatjin catsihindu profeta xcun xujun rë Nina cjua xi cachja Nina hya xi cachja me cuitjin:

Ngayujun ngarcun ni xuta tjë rë Israel matsejen ne,

hya xi canicuhun chu sacuaaha cjuatjo xi tuhun ná ngahan cahntsua yachan nu xi cavinechuntuhun ngajan ngu xín camahani tsëhë nandya matsejen ne,

hacuiin ngahan xi cuatjin cachjuhunrcun ná ta ngayun ne, ha canindujun suvun nina xi chjuhunrcun.

⁴³ Ndava nina nuju xi hmí Moloc

cojo niñú rë nina nuju xi hmí Refán, jo vëhë xi cachuhunhngun catsanguncujun xi má nina nuju.

Vëhë xi ngahan sahme xi cjuecojo cjuachan nuju xuta cjin sa tsëhë hiscan xi hmí Babilonia. Cuatjin catsihindu profeta cjua xi cachja Nina.

⁴⁴ Hya xi caviyujutaha xutachanga naja hatsëë ngajan ngu xín camahani tsëhë nandya matsejen ne, cavejña rë me ngu ndihya tsjan hiscan camá acuerdu cojo Nina. Hane vëhë xi vëë me xi cavejña Nina cojo rë me. Ndava Nina jan matsejen ne, camandaja tutjin xi cachja Nina cojo Moisés, camandaja sacuatjin xcusun xi catsingacun Nina Moisés.

⁴⁵ Hane hya xi cakahatsja xutachanga naja ndava Nina jan ne, hacuaha cuatjin quijicojo me ha tuyani ni xi quiji caviyujutaha nga me. Hane xi camá ngascan ne, cavechú nixtin xi cafehecojo Josué xutachanga naja nguehe nangui naja vi, nangui xi Nina cavisecoo rë xutachanga naja xi cavaxëxin me xuta xi nangui rë. Hacuaha nixtin hya xi camá cuatjin ne, hacuaha cafehecojo me ndava Nina jan. Cuatjin camá sa hisca hya xi cavechú nixtin rë xutachanga naja David.

⁴⁶ Hane David jan matsejen ne, jemu cachuya rë Nina tsëhë me. Ngajan xi cafehya David cahndë cojo Nina xi tsindaja me ngu ndihya hiscan cuejña Nina.

⁴⁷ Hane hisca xi camá ngascan ne, xutachanga naja Salomón catsindaja me ndava Nina.

⁴⁸ Peru Nina xi matitjun matsejen ne, hacuiin vejñacahndë me ngu ndihya xi tsindaja xuta ta ¿há vitsjiin nuju hacutjin cachja ngu profeta xi cachja me cjua rë Nina cuitjin?:

⁴⁹ Ngahnga ne, sacuaaha ngu silla ndajyihí hiscan xi vitejña,

hane nangui ne, sacuaaha ngu yatë hiscan xi visane ntsacu, chja Nina.

Tsajin yo cuma tsindaja ngu ndihya hiscan xi cuitejñacahndë,

Tsajin ngu cahndë xi cuacun vë xi cuma cjuahájenda.

⁵⁰ Ngahan catsindaja yëjë ni xcusun xi tjín ngasunhndë.

Cuatjin cachja profeta jan cjua rë Nina.

⁵¹ Ngayujun ni ne, jercu taja camahani rcun. Xahasen nuju cojo cjuatacun nuju ne, tangun cojo xutaxín xi hatuxa macjaain rë Nina. Hatuxa nihñu condra Hasen rë Nina. Tangun camahani ngayun cojo xutachanga naja.

⁵² Hacuaha xutachanga naja ne, jercu catsuyjihiya tjengui me yëjë profeta cojo cjuahn-gatacun. Hisca catsiquehen me profeta xi casua camachaya rë me xi sehe cuinduva ngu me xi hatuxa tyjahi jain cojo cjuatacun rë. Hane quihndë xi cafehe jain me ne, ngayun canihñu me entregadu, ngayun catuhun me xi catsiquehen xuta me.

⁵³ Ngayun xi casua ángel xutachanga nuju ley rë Nina ne, hisca nuhyuun tsëhë ley vëhë. —Cuatjin casua Esteban cjuaquixi rë me xcun yëjë xuta xi matitjun ngajan xcun junta.

⁵⁴ Ngajan xi yějě xuta xi matitjun xi cuacun tisahmi junta jan ne, hya xi cahndě me cjua xi cachja Esteban jan ne, hisca catsijanerii me nehñu me xi jercu tu camacjan camahani rě me.

⁵⁵ Peru Esteban ne, quitsě rě xahasen rě me cojo Hasen rě Nina. Hane xi cavutsejenniji me ngahnga ne, cavěě me hasen ndajyihi rě Nina xi jercu seti camahani. Hacuaha cavěě me Jesús, secun me cojo Nina.

⁵⁶ Ngajan xi cachja Esteban cuitjin:

—Chutsujun ni. Ngahan ne, xi tivutsején ngahnga vė ne, tsejen xi tixaha sacuaaha tingotjo rě, hacuaha tsejen xi me xi Quihndi rě Xuta Jain ne, secun me cojo Nina. —Cuatjin cachja Esteban.

⁵⁷ Peru me xi cuacun jan ne, cavetsihin cajindayatě me hacuaha cavahahñu me tyjavañuju me, tsěhě xi miji sa cuihndě me xi tichja Esteban. Sehe ngutjen ni ne, ngu tangun ni cavanga me quiji cavehñun me Esteban xi cafaha me me.

⁵⁸ Sehe cavaxěxin me me ngajan tjehe nandya, sehe cavitexa me ngujo cha xi cavetsihin cavetaha cha ndoyojo Esteban. Cha xi cuacun casahmi jan ne, cavaxě cha tsjian xcun rě cha, caviyuju cha hiscan xi secun ngu cha xi hmí rě Saulo, xi casahmi cha cuidadu.

⁵⁹ Jinguyějě rě xi tísatě rě Esteban ndoyojo xi tivetaha cha xi cuacun jan ne, cafehya me cjuandaja cojo Jesús cuitjin:

—Jesús, ngayun Nai naha, chjuhunnun sun hasen naha. —Cuatjin cachja me.

⁶⁰ Hya xi camá ne, cavixcuhnchi me, hane sehe jercu cajindaya me, cachja me cjua vihi: —iNgayun Nai naha, ninchatuhun rě xuta xi cuacun vi tsěhě cjuatsehen xi tisahmi me cojo ná! —Cuatjin cajindaya me cachja me.

Xi cafě cachja me cjua vėhě ne, cahme me.

8

Catsuyihiya tjengui Saulo xuta ladu rě Jesús cojo cjuahngatacun

¹ Hane Saulo ne, hacuaha cachuya rě me xi cuatjin catsiquehen cha xi cuacun jan Esteban.

Ha nixtin hya ni ne, cavetsihin catsuyihiya tjengui xuta xi matitjun jan yějě xuta ladu rě Jesús cojo cjuahngatacun ngajan Jerusalén. Hya xi camá ne, yějě xuta ladu rě Jesús jan ne, cafě cavitsojo me táha ladu tsěhě distritu Judea cojo distritu Samaria. Suvá sa apóstol xi tsajin cavitsojo xu me.

² Hane ngujo cha xi faharcun jain rě Nina ne, cavinchaniji cha nima Esteban, hacuaha jemu cajiñnda xu cha tsěhě nima.

³ Peru Saulo ne, cavetsihin catsuyihiya tjengui me xuta ladu rě Jesús cojo cjuahngatacun. Quiji cavisehen xu me ndava xuta xi cuacun jan, cajuvějne me cavaxě me sa chjuun sa xihin, quijicani me ndavaya. Vėhě xi cuatjin cavitsojo xuta jan.

Sacu machaya rě xuta Samaria cjuandajyihi xi chja tsěhě Jesucristu

⁴ Quihndě ne, xuta xi cavitsojo tsěhě Jerusalén jan ne, catsuyihiya casua xu me camachaya rě xuta cjuandajyihi xi chja tsěhě Jesucristu.

⁵ Hane Felipe ne, quiji xu me ngu nandya táha distritu Samaria, hane ngajan casua me camachaya rě xuta ta ha cafehe me xi catsingatju Nina xi cuaxětje naja.

⁶ Hane xi cavisñuju xuta cjua xi cachja Felipe cojo xi cavutsejen me cjuarcun xi casahmi me ne, jemu ndaja cavetaharcu me cjua xi cachja Felipe jan.

⁷ Jemu cjin xuta xi hinchaxitsehen xahasen rě me ne, camandaja xu me. Hisca cajindaya xitsehen jan hora xi cavetjuxin. Hacuaha jemu cjin xuta xi cahme yojo rě me cojo cjin sa xuta xi rengun me ne, camandaja xu me.

⁸ Vėhě xi xuta nandya vėhě ne, jercu ndaja camá xu rě me.

⁹ Peru ngu cha xi hmí rě Simón ne, ha quitahá cha ngajan, tisahmi xu cha cjuasurqui. Hane yějě xuta distritu Samaria ne, jemu quijircun rě me xi casahmi cha. Hacuaha cachja xu suvá cha xi jemu jyě hnga cha cojo cjuatacun rě cha.

¹⁰ Yějě xuta Samaria jan, sa quihndi sa changá me ne, jemu ndaja cavetaharcu xu me tsěhě cha Simón jan. Hisca cachja xu me tsěhě cha cuitjin:

—Cha vihi ne, hacui cha xi tjin rě ngahñu rě Nina, ngahñu xi hmí rě ngahñu jyě. —Cuatjin cachja xuta jan.

¹¹ Vėhě xi jemu ndaja cavetaharcu xu xuta tsěhě cha ta, tsěhě xi ha jemu jyě nixtin xi casahmi cha xi quijircun rě xuta tsěhě cjuasurqui xi casahmi cha.

¹² Peru hya xi camacjain rě xuta tsěhě Felipe, hya xi casua me camachaya rě xuta tsěhě cjuandajyihi xi chja xi cuinduva Nina sahmí me gobiernu hacuaha cojo cjuandajyihi xi chja tsěhě Jesucristu ne, caxtenda xu me, sa chjuun sa xihin me.

¹³ Hacuaha hisca cha Simón jan ne, camacjain xu rë cha tséhë Felipe. Hane xi cavatju caxtenda cha ne, sehe catsihñu cha yojo rë cha cojo Felipe. Hane xi cavutsejen cha yějë cjuarcun yehe xi jima ne, jemu quijircun rë cha.

¹⁴ Hya xi camachaya rë apóstol xi siu ngajan Jerusalén xi xuta Samaria ne, camacjain xu rë me cjua rë Nina ne, catsingatju me Pedru cojo Juan quijitjengui rë xuta jan.

¹⁵ Hya xi cafehe jo apóstol jan ngajan ne, casahmi xu me oración tséhë xuta jan cojo sa xi sacú rë me Hasen rë Nina.

¹⁶ Cuatjin casahmi me ta, tséhë xi hisca xi ngu xuta jan ne, cjëë cuinduva xu Hasen rë Nina cuisehen xahasen rë me. Suvá ni ñihi rë Nai naja Jesús caseyanangui hora xi caxtenda me.

¹⁷ Ngajan xi Pedru cojo Juan ne, cavisanetsja me xuta Samaria jan, sehe cavisehen xu Hasen rë Nina cahntsua xahasen rë me.

¹⁸ Xi cavëë cha Simón xi casacu rë xuta jan Hasen rë Nina ngatsë rë xi cavisanetsja apóstol jan me ne, meje sua xu cha me tujún,

¹⁹ hacuaha cuitjin cachja xu cha cojo rë me:

—Tuhun ná cjuatacun vëhë, cojo sa xi tu yo ni xi cuisanentsa ne, sacú rë Hasen rë Nina. —Cuatjin cachja cha.

²⁰ Ngajan xi Pedru ne, cuitjin cafayangui xu me:

—¡Tujún riji ne, catjë tangun cojo ri! ta, tséhë xi caningatehetacuín xi cjuandaja rë Nina ne, cuma chaha rë cojo tujún.

²¹ Ngaye ne, satiín camahani ri xa vëhë ta, tséhë xi hacuín tyjahi xahasen riji xcun Nina.

²² Nindeye cjuatacun riji. Tejñixín cjuatsehen riji vë. Hacuaha chjahye rë Nina cjuandaja rë me, há tsinchataain me ngaye tséhë cjuatacun xi jiya ngajñi rë cjuatacun riji.

²³ Ngahan ne, vacun ná xi ngaye ne, cuma ngaye ngu xuta xi ngundiyaxa ni tsihñu me yojo rë me cojo cjuatsehen. —Cuatjin cafayangui Pedru.

²⁴ Ngajan xi cha Simón ne, cuitjin cafehya xu cha:

—Ñihñu favor ne, chjahyun rë Nina ngatsë naha cojo sa xi hisca xi ngu cjua xi canújun vë ne, cuatjuun cuma. —Cuatjin cafehya cha.

²⁵ Hya xi camá ne, Pedru cojo Juan ne, xi cavatju cachja xu me cojo xuta Samaria jan cjua xi chja tséhë Nai naja ne, cavuya quiji nga me ngajan Jerusalén. Peru yějë ni nandya xi vatju me hacutjin cjui me jingunduju ni ndiya ngajan distritu Samaria ne, ha cuatjin cachja sa me cjuandajyihí jan cojo xuta.

Felipe cojo ngu xutaxa rë nación Etiópia

²⁶ Camá nga ngu nixtin xi ngu ángel tséhë Nina ne, cachja cojo Felipe ngajan Jerusalén cuitjin:

—Tihinjni ndiya Gaza. —Cuatjin cachja ángel.

Ndiya vëhë ne, vatju ngajan ngu xín camahani tséhë nandya.

²⁷ Ngajan xi cavetju xu Felipe, quiji me. Hane ndiya cjui me ne, cavechútaha xu me ngu xutaxa rë nación Etiópia, ngu xihin xindë xi fahacuenda yějë cjuanchina rë na xi matitjun tséhë yějë xuta Etiópia jan. Xihin jan ne, quiji me ngajan Jerusalén xi cjuaharcun me Nina.

²⁸ Hane xi cavuya tife me nangui rë me ne, jiya me carreta rë me cjue me, táha tivutaya me xujun rë Nina xi catsihindu profeta Isaías.

²⁹ Ngajan xi cachja xu Hasen rë Nina cojo Felipe cuitjin:

—Tihinvehe hiscan cjui carreta xi cuajyihí vë, nihñitanguin cojo. —Cuatjin cachja Hasen rë Nina.

³⁰ Ngajan xi cuatjin casahmi Felipe. Xi tu camatiña me hiscan cjui carreta jan ne, cahndë xu me xi cjua rë xujun xi catsihindu profeta Isaías ne, vëhë tivutaya me xi jiya carreta jan. Sehe cavinenguise Felipe me cuitjin:

—¿Há vijnercun cjua xi tichutayun vë? —Cuatjin cavinenguise Felipe.

³¹ Ngajan xi cuitjin cafayangui xu me:

—Ngahan ne, vijniürcü ta, tséhë xi tsajin yo cuicuya ná. —Cuatjin cafayangui me.

Sehe ngajan xi cachja xu me cojo Felipe xi cuisehen cuejñatangun xu me cojo rë me.

³² Tivutaya me xujun rë Nina hiscan xi chja cuitjin:

Sacuaha ficojo xuta ngu chu tsánga xi tsiquehen me chu ne, cuatjin cjuecojo xuta me; hacuaha sacuaha jindayaain ngu hnditsánga hora xi secun chu xcun me xi cuejnu rë chu ne,

cuatjin tsajin camahani mé xi cuichja me hora xi secun me xcun me xi cjuahataha rë me.

³³ Sahnichuva xuta me, hacuaha tsichoho xuta cjuandaja xi cuma rë me; Tsajin cuichja xuta tséhë quihndi rë me ta, casacuiín rë me tséhë xi cjuahñu xi casacu rë me ngeuhe ngasunhndë ne, quijicanií rë me.

Vëhë cjua rë Nina xi tivutaya xihin jan.

³⁴ Hya xi camá ne, sehe cavinenguise me cojo Felipe cuitjin:

—Xi má nuju ne, ¿yo tsêhê xi cuatjin chja profeta vê? ¿Há tsêhê suvá me ne?, o há tsajin ne, ¿há tsêhê jingu sa xuta? —Cuatjin cafinguisse me.

³⁵ Ngajan xi Felipe ne, cavetsihin me cojo cjua rê Nina xi tivutaya xihin jan, hane casua xu me camachaya rê xihin jan yêjê ni cjuandajiyi xi chja tsêhê Jesús.

³⁶ Xi cjuí me ndiya ne, cavechú xu me hiscan jiya ngu nandá. Ngajan xi chja xihin jan cojo Felipe cuitjin:

—Chutsujun ni. Nguehe jiya ngu nandá. ¿Há cumaji xtenda ngahan? —Cuatjin cachja xihin jan.

³⁷ Ngajan xi cachja xu Felipe cojo rê me cuitjin:

—Sa xi nguñaja xahasen nuju xi macjain nuju ne, cuma. —Cuatjin cachja Felipe.

Hane xihin xi cuajiyi jan ne, cuitjin cafayangui me:

—Macjain ná xi Jesucristu ne, hacui jain me xi Quihndi rê Nina me. —Cuatjin cafayangui me.

³⁸ Hya xi camá ne, cachja xu xihin jan cojo cha xi ficojo carreta xi secunhñu cha cojo, hane sehe cavitujne me cojo Felipe, sehe quiji catsijo me xcun nandá, hane caxtenda xu xihin jan.

³⁹ Xi cavetju me tsêhê nandá ne, Hasen rê Nina ne, ngutjen quijicojo xu rê Felipe. Hane xihin jan ne, ha quihndê cavuyaaín cavêê rê Felipe ta, cavuya cafaha me ndiya rê me cafe me cojo cjuasua.

⁴⁰ Hya xi camá ne, cavechú Felipe nandya Azoto. Hane xi cavetju me ngajan ne, jima ngu nandya xi cavatju me ne, ha cuatjin casua me camachaya rê xuta cjuandajiyi xi chja tsêhê Jesucristu hisca xi cafehe me nandya Cesarea.

9

Hacutjin camá xi cavisehen Saulo ladu rê Jesús

¹ Jingu yêjê rê xi cuatjin tijima ne, Saulo ne, hacuaha ni cjuinduju sa me vincharcun me xuta ladu rê Nai naja ta tsiquehen me. Quiji me xcun nahmi xi matitjun ne,

² cafehya me ngu carta cojo sa xi cumacjain rê tsêhê me xutaxa rê yungun ngajan nandya Damasco. Hane cojo xujun jan sa xi sacú rê me xuta Damasco xi tjengui ndiya rê Jesús, sa chjuun sa xihin ne, tsihñu me cjuccojo me ngajan Jerusalén.

³ Hya xi camá ne, cavetju me quiji me. Hane xi tijima tiña me Damasco ne, ha tu ñahñu canduva ngu ndihi tsêhê ngahnga casahmi hasen rê hiscan cjuí me.

⁴ Hane xi caticja me ne, cahndê me ngu cjua xi cachja cojo rê me cuitjin:

—Saulo, Saulo, ¿mé má cuatjin nujihiye tjengui ná cojo cjuahngatacun? —Cuatjin cachja.

⁵ Ngajan xi Saulo ne, cuitjin cafayangui me:

—¿Yo ngayun, Tatá? —Cuatjin cafayangui me.

Ngajan xi cjua jan ne, cuitjin cafayangui tsêhê me:

—Ngahan xi Jesús ngahan, xi tinujiyiye tjengui ná cojo cjuahngatacun.

⁶ Tisatjinhngue ne, tsihin nandya Damasco, hane ngajan sacú ri cjua mé xi meje rê xi nihñi. —Cuatjin cachja cjua jan.

⁷ Ngajan xi xuta xi cjuicojo Saulo jan ne, caxinchacun lihmi ni me ngajan. Cahndê me cjua jan, peru tsajin yo xi cavêê me.

⁸ Hya xi camá ne, cavisatjehnga Saulo, hane xi cavuxaha me tuxcun me ne, matsijin camahani rê me. Sehe ngajan xi cavaha xuta jan tsja me ne, quijicojo me me hisca nandya Damasco.

⁹ Jyan nixtin cavéjña me jan xi matsijin rê me, hacuaha tsajin mé cajiné me, tsajin mé cahvi me.

¹⁰ Hane ngajan Damasco ne, ngajan tacun ngu xuta ladu rê Jesús xi hmí rê Ananías. Ha tu ñahñu cavêê me Nai naja ne, cachja cojo rê me cuitjin:

—¿Há nechín, Ananías? —Cuatjin cachja Nai naja.

Ngajan xi Ananías ne, cuitjin cafayangui me:

—Juun, tejña, Nai naha. —Cuatjin cafayangui me.

¹¹ Ngajan xi Nai naja ne, cuitjin cachja me cojo Ananías:

—Tihin ndiya xi hmí rê Taha Quixi. Hane ndava cha Judas ne, ngajan chjinenguisse ngu cha Tarso xi hmí rê Saulo. Cha vêhê ne, tisahmi cha oración rê cha,

¹² hane sacuaha xi ngajñi nijña rê cha ne, cavêê cha ngu xihin xi hmí rê Ananías xi cavisehen hiscan tacun cha, hane cavisanetsja rê cha xi cuma tsejen nga rê cha. —Cuatjin cachja Nai naja.

¹³ Ngajan xi Ananías ne, cuitjin cafayangui me:

—Ngayun Nai naha, jemu cjín xuta chja me hacutjin xi jemu choho casahmi cha xi cuajiyihi vë cojo xuta ladu nuju ngajan Jerusalén.

¹⁴ Quihndë ne, hacuaha hisca nahmi xi matitjun catsingatju rë cha nguehe xi cjuaha cha xuta xi fehya nuju me cjuandaja nuju. —Cuatjin cafayanguí me.

¹⁵ Peru Nai naja ne, cuitjin cachja nga me cojo rë me:

—Tihin ta, cha xi cuajiyihi vë ne, ngahan cavaxejen cha xi cjue sua cha cumachaya rë xutaxín, cojo xuta xi vitexa, cojo xuta tjë rë Israel, cuichja cha yo ngahan.

¹⁶ Ngahan tsingácun rë cha há cjín cjuacjintacun xi meje rë xi cuatju cha cuma ngatsë naha. —Cuatjin cachja Nai naja.

¹⁷ Hya xi camá ne, cavetju Ananías quiji me ndava Judas. Hane xi cavisehen me ndava Judas ne, cavisanetsja me Saulo, cuitjin cachja me:

—Ngayun Saulo, Nai naja Jesús, me xi cahyun ndiya nduvun jan ne, catsingatju ná me, cojo sa xi ngayun ne, cuma tsejen nga nuju hacuaha tsë nuju cojo Hasen rë Nina. —Cuatjin cachja me.

¹⁸ Hane ha hora vëhë ni ne, cavixu tsëhë tuxcun Saulo ngu xcusun sacuaha tujún rë ti, hane camatsejen nga rë me. Hya xi camá ne, caxtenda me.

¹⁹ Hane xi cajinë me niñu ne, casacuhñu rë me.

Sua Saulo machaya rë xuta tsëhë Jesús

Hya xi camá ne, cavëjña Saulo ngujo nixtin ngajan Damasco cojo xuta ladu rë Jesús.

²⁰ Quiji me yëjë ni yungun, casua me camachaya rë xuta xi Jesús ne, hacui me xi Quihndi rë Nina, xi Mesías.

²¹ Hane yëjë xuta xi cavisñuju cjuaja jan ne, jemu quijircun rë me, cuitjin cachja me cojo xicjin me:

—¡Peru me vihi xi jemu casahmi cjuahngatacun cojo xuta xi veyanangui ñihi vëhë ngajan Jerusalén! ¡Hacuaha ha xa vëhë canduva me nguehe, xi cjuaha me xuta xi cuacun vë, cjucojo me xcun nahmi xi matitjun! —Cuatjin cachja xuta jan.

²² Peru Saulo ne, hitsë sa casacuhñu rë me xi tichja me cojo xuta, hisca quijircun rë xuta tjë rë Israel casahmi me ta, tsëhë xi tsejen xi cjuaquixi xi chja me xi Jesús ne, me vëhë jain xi catsingatju Nina.

Vetjutje Saulo tsëhë xuta tjë rë Israel

²³ Hane xi ha jemu cavatju nixtin jan ne, casahmichihin xuta tjë rë Israel cjuaja xi tsiquehen me Saulo.

²⁴ Peru cjuaja vëhë ne, casacu camachaya rë Saulo. Xuta xi cuacun jan ne, nixtin nixten jemu casahmi me cuidadu tingotjo hñhua rë nandya jan cojo sa xi cuma tsiquehen me Saulo.

²⁵ Peru xuta ladu rë Saulo ne, nguixun quiji catsitujne me Saulo taha ngaxtun hñhua cojo nahñu jiya me cahntsua ngu nisinya. Cuatjin camá, sehe cavetjutje me.

Hacutjin cavatju Saulo ngajan Jerusalén

²⁶ Hya xi camá ne, xi cafehe Saulo ngajan Jerusalén ne, meje cjue sahmitangun me cojo xuta ladu rë Jesús. Peru yëjë ni xuta xi cuacun jan ne, jemu tsacjun me Saulo. Macjaain rë me xi hacuaha xuta ladu rë Jesús camá me.

²⁷ Ngajan xi Bernabé ne, quijicojo me Saulo xcun apóstol, hane ngajan casuacuenda me hacutjin xi ngajan ndiya ne, cavëë Saulo Nai naja, hacuaha cachja Nai naja cojo rë me. Hacuaha casuacuenda Bernabé apóstol jan hacutjin tsacjuuin Saulo xi cachja me tsëhë Jesús.

²⁸ Cuatjin camá xi cjui nduva me catsuyiyihiya tangun me ngajan Jerusalén cojo xuta ladu rë Jesús. Hatuxa tsacjuuin me chja me tsëhë Jesús.

²⁹ Hacuaha jercu cavisiajmi me cojo xuta xi visiajmi hne griego. Peru xuta xi cuacun jan ne, casahmi me nguýjë xi tsiquehen me Saulo.

³⁰ Peru hya xi camachaya rë xuta ladu rë Jesús cjuaja vëhë ne, quijicojo me Saulo nandya Cesarea, hane ngajan catsingatju me me quiji me nandya Tarso.

³¹ Cuatjin camá xi yëjë xuta ladu rë Jesús ngajan estadu Judea, cojo Galilea cojo Samaria ne, cafë rë me cjuacjintacun hacuaha camajyë sa cjuandaja rë Nina ngajñi rë me. Hane xi cuatjin quijinduju me cafaharcun me Nai naja hacuaha xi cuatjin cavisecoo rë me Hasen rë Nina ne, camacjin sa xuta ladu rë Jesús.

Camandaja Eneas

³² Pedru ne, catsuyiyihiya me jingu ni ladu. Hya xi camá ne, quiji cavusehenya me xuta ladu rë Nina xi siu ngajan Lida.

³³ Hane ngajan cavechútaha me ngu xihin xi hmí rë Eneas, xi ha tjin rë jyin nu xi jiña xi cahme yoyo rë.

³⁴ Ngajan xi Pedru ne, cuitjin cachja me cojo xihin jan:

—Ngayun Eneas, Jesucristu tisahmi me xi cumandaja ngayun. Tisatjunhgun, chjayun nijña nuju vë. —Cuatjin cachja Pedru.

Hane ngutjen ni cavisatjenhnga xihin jan.

³⁵ Hane yějë ni xuta xi siu ngajan Lida cojo xuta xi siu ngajan Sarón cavëë me Eneas hane hacuaha cavisehen me ladu rë Nai naja.

Cavuya Dorcas cjuahñu

³⁶ Ngajan nandya Jope ne, cavéjña ngu chjuun ladu rë Jesús xi hmí rë Tabita. Hane xi hne griego ne, Dorcas hmí rë me. Chjuun vëhë ne, jemu sahmi me cjuandaja, hacuaha jemu visecoo me xuta xi tjin rë cjuachaja.

³⁷ Hya xi camá ne, nixtin xi quitahá Pedru ngajan nandya Lida ne, chjuun vëhë ne, camahmu rë me, hane cahme me. Hane xuta jan ne, catsinduya me nima. Hane xi café catsinduya me ne, sehe quiji catsijaña me cahntsua ndihya ngahnga.

³⁸ Vëhë ta nandya Lida ne, tiña tacun tséhë nandya Jope. Hane hya xi camachaya rë xuta ladu rë Jesús ngajan Jope xi Pedru ne, quitahá me ngajan Lida ne, catsingatju me jo xihin quijijaha rë Pedru, cuitjin cachja me:

—Nihñu cjuandaja ne, cuanguen cojo niji ngajan Jope marcu macjain.

³⁹ Ngajan xi Pedru ne, cavetju me quiji me cojo xihin jan. Xi tu cafehe me ngajan ndava nima ne, quijicojo me me ndihya ngahnga hiscan jiña nima. Hane jemu cjin yachjin cahan ne, quiji caxinchacun me xcun Pedru, hisca chja hisca jihnda me titsingacun me tsjian xi casahmi nima Dorcas hya xi tacun nima cjuahñu.

⁴⁰ Ngajan xi Pedru ne, cachja me cojo yějë xuta xi cuetju xuta candatsen. Hane xi café xuta cavetju me candatsen ne, sehe cavixcuhnchi Pedru, casahmi me oración rë me. Hane xi cavuya cavutsejen me nima ne, sehe cachja me cuitjin:

—Tabita, tisatjunhgun. —Cuatjin cachja me. Hane chjuun jan ne, cavuxaha tuxcun. Hane xi cavëë rë Pedru ne, cavisatjenhnga cavéjña.

⁴¹ Hane xi casua Pedru ngu tsja me chjuun jan ne, catsisatjenhnga me. Xi tu cajindaya me xuta ladu rë Jesús cojo chjuun cahan jan ne, sehe catsingacun me chjuun jan xi tacun quicun nga.

⁴² Hane cjuavëhë ne, casacu camachaya rë xuta jingujyë ni Jope. Hane jemu cjin me xi camangu cacun me cojo Nai naja.

⁴³ Ngajan xi Pedru ne, jemu cjin nixtin casetaha me ngajan Jope, cavéjña me ndava cha Simón, ngu cha vechjanchuxin.

10

Jindaya Cornelio Pedru

¹ Ngajan nandya Cesarea ne, cavéjña ngu xihin xi hmí rë Cornelio. Capitán má me tséhë sindadu tséhë nangui Italia.

² Me vëhë ne, jemu ndaja faharcun me Nina cojo yějë xuta xi siu ndava me, hacuaha jemu sua me cjuandaja cojo xuta tjë rë Israel, hacuaha yějë ni hora fehya rë me Nina cjuandaja rë me.

³ Ngu nixtin jan sacuaha chuya rë fane jyan tséhë nguinxtin ne, cavëëndaja me xi cafehe ngu ángel rë Nina cachja cojo rë me cuitjin:

—Cornelio. —Cuatjin cachja.

⁴ Hane xi cavutsejenndaja sa me ángel jan ne, jemu catsacjun me camá, sehe cachja me cuitjin:

—¿Mé jan, Tatá? —Cuatjin cachja me.

Ngajan xi ángel jan ne, cuitjin cafayangui:

—Ngatsë rë oración riji cojo ngatsë rë cjuandaja xi jemu tehe ne, Nina ne, hacuaha tsinguitsjen me ngaye.

⁵ Quihndë ne, ningatji ngujo xihin ngajan Jope, chjindaye rë cha Simón, cha xi hacuaha hmí rë Pedru.

⁶ Cha Simón vëhë ne, ngajan tacun cha ndava ngu cha vechjanchuxin, xi hacuaha hmí rë Simón, cha xi tacun ndava tiña ndachacun. —Cuatjin cafayangui ángel jan.

⁷ Hane xi cavatju cafe ángel xi cachja cojo rë me jan ne, sehe cajindaya me jo mosu hndixahan rë me cojo ngu sindadu xi sahmixa ndava me hacuaha faharcun rë Nina.

⁸ Hane xi café casuacuenda me yějë ni cjuacjintacun rë me ne, sehe catsingatju me cjue ngajan Jope.

⁹ Hane xi camá nchujun xi ha jima tiña cha xi cuacun jan nandya Jope ne, sacuaha chuya rë nchisen ne, sehe camiji Pedru ngajan xcun ndihya xi sahmi me oración.

¹⁰ Hya xi camá ne, camavojo rë me, meje sinë me hitsë tu mé ni xi sinë me. Hane jinguyëjë rë xi tisehenchjine xi sinë me ne, sacuaaha xi canduva cachja ngu chini cojo rë me.

¹¹ Tivutsejen me xi ngahnga ne, catuxaha, hane nduvajne sacuaaha ngu tsjian jyë, quichahahñu rë catsiñuju yuju rë xi nduvajne nangui.

¹² Cahntsua tsjian jan ne, ngajan híncha yëjë xcusun chu xi tsujyihya nangui cojo chu xi vitjen ngahnga xi tsavi xi sinë xuta nangui Israel.

¹³ Hya xi camá ne, Pedru ne, cahndë me ngu cjua xi cachja cojo rë me cuitjin:

—Pedru, tísatjinhngue. Niquihin ngu chu ne, sehe xini chu. —Cuatjin cachja cjua jan.

¹⁴ Hane Pedru ne, cuitjin cachja me:

—Cumaji, Tatá, ta ngahan ne, cjëë camahani sinë ngu xcusun xi tsavi vë. —Cuatjin cachja me.

¹⁵ Peru xi ma jo ndiya ne, cuitjin cachja nga cjua jan cojo rë me:

—Xi ha Nina cachja me xi hacuini tsavi ne, xi canujiin ngaye xi tsavi. —Cuatjin cachja cjua jan.

¹⁶ Jan ndiya camá xcusun vëhë. Hya xi camá ne, ngutjen ni cavuya quiji nga tsjian jan ngahnga.

¹⁷ Hane jinguyëjë rë xi tisingataha cacun Pedru mé vijne xcusun xi cavëë me jan ne, tivinenguise cha xi catsingatju Cornelio jan jani xi ndava Simón. Hane xi cafehe cha jan ne, caxinchacun ni cha tingotjo,

¹⁸ sehe cafinenguise cha há ngajan tacun Simón xi hacuaaha hmí rë Pedru.

¹⁹ Hane jinguyëjë rë xi tisingataha cacun Pedru tséhë xcusun xi cavëë me jan ne, cuitjin cachja Hasen rë Nina cojo rë me:

—Chutsijin ni. Hinchacun jo jyan cha xi tivanguise ri.

²⁰ Tihinjni ne, tihin cojo cha. Xicamacjiin tacuin ta cha xi cuacun vë ne, ngahan catsingátju cha. —Cuatjin cachja Hasen rë Nina.

²¹ Hane xi quijijne Pedru hiscan hinchacun cha xi cuacun jan ne, cuitjin cachja me:

—Ngahan xi vinchunsun ná. ¿Mé xa canduvun? —Cuatjin cachja Pedru.

²² Ngajan xi cha xi cuacun jan ne, cuitjin cachja cha:

—Ngu capitán xi hmí Cornelio catsingatju niji me xi canduvin ngeuehe. Me vëhë ne, ngu xihin ndaja me, hacuaaha jemu faharcun me Nina. Yëjë ni xuta tjë rë Israel ne, ndaja chja me tséhë Cornelio. Ngu ángel rë Nina cachja cojo rë me xi squindaya me ngayun xi cuangun ndava me cojo sa xi cuisifñuju me cjua xi cuinúnun cojo rë me. —Cuatjin cachja cha xi cuacun jan.

²³ Hya xi camá ne, cachja me cojo cha xi cuisehen cha cahntsua ndihya, hacuaaha casua me cahndë xi cuiyuju cha ngajan. Hane xi camá nchujun jan ne, cavetju me quiji me cojo cha, hacuaaha cojo sa ngujo xuta ladu rë Jesús xi siu ngajan Jope quiji me cojo rë me.

²⁴ Hane xi camá nchujun nga jan ne, cafehe me nandya Cesarea. Cornelio ne, ha casahmitangun me xuta rë me cojo amigu ndaja rë me, siuya me Pedru.

²⁵ Hane xi ha cuisehen Pedru jan ne, cavechútaha Cornelio me. Cornelio ne, quiji cafañatsacjan me xcun Pedru xi cafaharcun me.

²⁶ Peru Pedru ne, catsisatjenhnga me Cornelio, hacuaaha cachja me cojo cuitjin:

—Tísatjunhngun ta ngahan ne, hacuaaha ngu xuta ni ngahan. —Cuatjin cachja me.

²⁷ Hane taha visiajmi me cojo Cornelio ne, cavisehen me ndihya, ngajan cavëë me xi jemu cjín xuta tjin tangun me jan.

²⁸ Sehe ngajan xi cachja Pedru cojo rë xuta jan cuitjin:

—Ngayun ne, ha ndaja hyun xi ngu xuta tjë rë Israel ne, sacuiin cahndë xi tsihñu me yojo rë me cojo xutaxín, hacuaaha sacuiin cahndë xi cuisehen me ndava. Peru ngahan ne, casua Nina camachaya ná xi mijí rë xi cuichjá xi tsavi cojo ngu xcusun xuta.

²⁹ Vëhë xi xi tu quiji chjahá ná ne, ngutjen canduvá ni, hisca ngu cjua cachjaan. Quihndë ne, meje ná cumachaya ná mé nihñu ná xi cachjindayun ná. —Cuatjin cachja Pedru.

³⁰ Ngajan xi Cornelio ne, cuitjin cachja me:

—Cuyatje fane jyan, sacuaaha hora vihi ne, tisahme oración naha ngeuehe ndya naha. Hane ha tu ñahñu cahvë ngu xihin, secun xcun, yaja ngu tsjian xi jemu tu seti camahani,

³¹ hane cuitjin cachja cojo ná: “Cornelio, Nina ne, cahndë me oración riji, hacuaaha ngatsë rë cjuandaja xi jemu tehe ne, Nina ne, hacuaaha tsinguitsjen me ngaye.

³² Quihndë ne, ningatji cjua ngajan Jope, hane chjindaye rë cha Simón, cha xi hacuaaha hmí rë Pedru. Cha vëhë ne, tacun cha ndava cha Simón, ngu cha vechjanchuxin, xi tacun cha tiña ndachacun.” Cuatjin cachja xihin jan cojo ná.

³³ Vëhë xi marcu macjain catsingátju cjua nuju, hane jemu ndatjin canihñu xi canduvun. Vëhë xi quihndë ne, ha tjin tangun ngayin ngayijin ni ngeuehe xcun Nina xi cuisifñiji yëjë cjua xi casua nuju Nina xi cuinúnun cojo niji. —Cuatjin cachja Cornelio.

Cjuandajyhi xi cachja Pedru ndava Cornelio

³⁴Ngajan xi Pedru ne, cuitjin cachja me:

—Ngahan vutsején ne, Nina ne, hatuxa quixi jain me cojo cjuatacun rë me xi tsichuva me yëjë ni xuta cojo cjuatacun rë ta

³⁵yëjë ni nació n ne, tu jarë ni xuta xi faharcun me Nina hacuaha sahmi me cjuandaja ne, jemu chuya rë Nina tséhë me.

³⁶Nina ne, catsingatju me cjuandajyhi rë me tsijin, ngayin xuta tjë rë Israel; casua me camachaya niji xi ngatsë rë Jesucristu ne, sacú niji cjuandaja cjuajeya. Me vëhë xi Nai rë yëjë ni xuta.

³⁷Ngayun ne, ha machaya nuju tséhë xcusun xi camá jingujyë ni nació n Judea. Cavetsihin hisca distritu Galilea, hya xi cavatju cachja nima Juan xi meje rë xi xtenda xuta.

³⁸Hacuaha ha hyun xi Jesús, xuta Nasaret ne, Nina ne, catsinguitsë rë me cojo Hasen rë me hacuaha cojo ngahñu rë me. Jesús vë ne, catsujyihya casahmi me cjuandaja hacuaha casahmi me xi camandaja yëjë xuta xi jemu tisuaxti Satanás. Cuatjin casahmi me ta, tséhë xi Nina ne, hacuaha tacun cojo rë me.

³⁹Ngayin tihín machaya rë xuta tséhë yëjë xcusun xi cahyin xi casahmi me ngajan Jerusalén, cojo jingujyë ni nació n Judea. Xi cavetaha xuta tjë rë Israel jan me xcun ngu cru ne, catsiquehen xuta jan me.

⁴⁰Me vëhë ne, Nina catsicuya rë me cjuahñu xi ma jyan nixtin, hacuaha casua Nina cahndë xi cavuya camatsejen nga me.

⁴¹Peru hacuain ngajñi rë yëjë xuta camatsejen me ta suvá ni ngajñi rë me xi Nina cavaxijin rë cojo tjun sa, cuma cuinú jan ne, ngajñi niji ngayin, xi cachini cahyin tangun cojo rë me hya xi cavatju cavuya me cjuahñu.

⁴²Hacuaha me vëhë cavitexa niji me xi tihín cumachaya rë xuta xi me vëhë xi casuaxa Nina me xi tsichuva me xuta cojo cjuatacun rë, sa siu quicun me o sa cahme me.

⁴³Yëjë ni profeta ne, cachja me ta yëjë ni xuta xi cumangu cacun cojo Jesús ne, sacú rë me cjuaninchataha tséhë jyë rë me, xi cuatjin mangucacun me. —Cuatjin cachja Pedru.

Casacu rë xutaxín Hasen rë Nina

⁴⁴Hora xi tichja cuaha Pedru cjuah vëhë ne, canduva Hasen rë Nina cavisehen xahasen rë yëjë xuta xi tivisiñuju cjuah xi tichja Pedru jan.

⁴⁵Hane xuta ladu rë Jesús xi tjë rë Israel xi cojo me canduva me cojo Pedru ne, jemu quijircun rë me xi cojo xutaxín casua Nina Hasen rë me xi cuma rë me.

⁴⁶Cuatjin quijircun rë me ta, tséhë xi cahndë me xi xutaxín jan ne, tichja me ngujo hne xi hisca hvín xutaxín vë xi tisahmi jyë tisahmi hnga me Nina.

⁴⁷Ngajan xi Pedru ne, cuitjin cachja me:

—Cumaji nichoon ngayaan nandá xi xtenda xuta, ta me xi cuicun vi ne, hacuaha casacu rë Hasen rë Nina sacuatjin casacu naja ngayaan. —Cuatjin cachja Pedru.

⁴⁸Sehe cavitexa me xi caxtenda xuta xi cuacun vë xi cavisehen me ladu rë Jesucristu. Ngajan xi xuta jan ne, cafehya sa rë me Pedru xi cuejña sa me ngujo nixtin cojo rë me.

11*Sua Pedru machaya rë xuta rë yungun Jerusalén hacutjin camá ndava Cornelio*

¹Quihndë ne, apóstol cojo xuta ladu rë Jesús xi siu jingujyë ni Judea ne, camachaya rë me cjuah xi cojo xutaxín cafhatsja me cjuah rë Nina.

²Hane hya xi cavuya quiji Pedru ngajan Jerusalén ne, xuta ladu rë Jesús xi tjë rë Israel ne, cacjan me cojo,

³cuitjin cachja me:

—¿Mé má cuatjin catsangun ndava xuta xi hacuain tjë rë Israel hacuaha hisca cachinu niñu cojo rë me? —Cuatjin cachja me.

⁴Ngajan xi Pedru ne, cavetsihin casacuenda chichihin me cuitjin:

⁵—Ngahan ne, tisahme oració n naha hya xi tejñataha Jope. Hane sacuaha xi cachja ni chini cojo ná xi cahvë ngu xcusun sacuaha ngu tsjian jyë, quichahahñu rë catsiñuju yuju rë xi nduvajne nangui, camatiña tsahan.

⁶Hane xi cavutsejé ndaja cahntsua ne, cahvë chu xi tsujyihya nangui, chu xi cjaain rë cojo chu xi cjan rë, cojo chu xi vitjen ngahnga hincha chu cahntsua.

⁷Hacuaha cahndë ngu cjuah xi cachja cojo ná cuitjin: “Pedru, tisetjinhgue. Niquihin ngu chu ne, sehe xini chu.” Cuatjin cachja cjuah jan.

⁸Ngajan xi ngahan ne, cuitjin cachjá: “Cumaji, Tatá, ta ngahan ne, cjëë camahani cuíncha ntsuva ngu xcusun xi tsavi vë.”

⁹ Ngajan xi cjua xi nduva ngahnga jan ne, cachja nga cojo ná ma jo ndiya cuitjin: “Xi ha Nina cachja me xi hacuini tsavi ne, xi canujiin ngaye xi tsavi.” Cuatjin cachja cjua jan cojo ná.

¹⁰ Jyan ndiya camá xcusun vèhè. Hya xi camá ne, sehe cavuya cachjuvè nga rè tsjan jan, quiji yèjè hisca ngahnga.

¹¹ Hya xi camá ne, ha tu ñahñu cafehe jyan xihin ndihya hiscan xi tejña. Hisca nandya Cesarea casatèxa rè xihin jan xi canduvatjengui ná.

¹² Hane Hasen rè Nina cachja cojo ná xi cumacjiiin cáacun xi cjuè cojo xihin xi cuacun jan. Hya xi camá ne, cèjè cojo rè, hacuaha cavisecoo ná jyun xuta ladu naja xi cuicun vi xi catsanguin. Hane xi cafilhin jan ne, cavisihin ndava Cornelio.

¹³ Hane me vèhè ne, casuacuenda nijji me hacutjin xi cavèè me ngu ángel cahntsua ndava me, cuitjin cachja cojo rè me: “Ningatji cjua ngajan Jope, chjindaye rè cha Simón, cha xi hacuaha hmí rè Pedru.

¹⁴ Hane cha vèhè cuichja cha cojo ri ngujo cjua hacutjin cuma xi cuetjitje ngaye cojo yèjè ni xuta xi siu ndya rijji.” Cuatjin cachja ángel jan.

¹⁵ Hane xi cavetsehen cachjá cjua rè Nina cojo rè me ne, cavisehen Hasen rè Nina cahntsua xahasen rè me sacuatjin cavisehen cahntsua xahasen naja ntsacu cavetsihin, ngayaan xuta tjè rè Israel.

¹⁶ Ngajan xi ngahan ne, catsingúitsjen cjua rè Nai naja xi cachja me cuitjin: “Juan ne, cojo nandá cavitenda me, peru ngayun ne, cojo Hasen rè Nina xtenda ngayun.” Cuatjin cachja me.

¹⁷ Vèhè xi hya xi suvá Nina casua rè me cjuandaja xicjin xi casua naja me ngayaan hya xi camangu tacuun cojo Nai naja Jesucristu ne, hatuxa camaji cavátècja xcusun xi Nina casahmi me. —Cuatjin casuacuenda Pedru.

¹⁸ Xi cahndè me xi cuacun jan xi cuatjin cachja Pedru ne, cajnehnchan cjuatacun rè me, sehe cavetsihin casahmi jyè casahmi hnga me Nina, cuitjin cachja me:

—Xi matsejen ne, cojo xutaxín casua Nina cahndè xi tsindeya me cjuatacun rè me cuisehen me ndiya rè Nina cojo sa xi sacú rè me cjuahñu xatsè.

Xuta rè yungun Antioquia

¹⁹ Quihndè ne, xuta ladu rè Jesús xi cavitsojo me ngatsè rè cjuañihi xi camá hya xi cahme Esteban ne, cavechú me hiscan nangui xi hmí rè Fenicia. Ngujo nga me cavechú me nandya Chipre, ngu cahndè xi vetjucaa tsèhè ndachacun. Hane me xi yahnga ne, cavechú me nandya Antioquia xi cavanga me. Hane casuain me camachaya rè xutaxín cjuandajyihí xi chja tsèhè Jesucristu ta suvá ni xuta tjè rè Israel casua me camachaya rè.

²⁰ Peru tjin yahnga xuta ladu rè Jesús xi canduva me tsèhè Chipre cojo Cirene. Xi cafehe me nandya Antioquia ne, cachja me cojo xuta xi chja hne Griego, casua me camachaya rè xuta cjuandajyihí xi chja tsèhè Nai naja Jesús.

²¹ Hane Nina ne, jemu casua rè me ngahñu. Hacuaha jemu cjín xuta camacjain rè me, hane cavisehen me ladu rè Nai naja.

²² Hane xuta ladu rè Jesús xi siu ngajan Jerusalén ne, hya xi camachaya rè me xcusun vèhè ne, catsingatju me Bernabé xi cjuetjengui me xuta ngajan Antioquia.

²³ Hane xi cafehe me jan ne, xi cavèè me hacutjin tisahmi Nina cjuandaja cojo xuta xi cuacun vè ne, jemu ndaja camá rè me. Sehe ngajan xi cachja me cojo yèjè xuta jan xi catjinduju me cojo yèjè xahasen rè me ndiya rè Nai naja.

²⁴ Cuatjin casahmi me ta, tsèhè xi me vèhè ne, ngu xihin ndaja me, ña quitsè rè me Hasen rè Nina, hacuaha jercu mangucacun me cojo Nina. Nixtin hya ne, jemu camacjín sa xuta ladu rè Nai naja.

²⁵ Hya xi camá ne, cavetju Bernabé quiji me ngajan Tarso, cavanguise me Saulo.

²⁶ Hane xi casacu rè me Saulo ne, cavuya quijicojo me me ngajan Antioquia. Caviyuju catsijo me ngajan ngu nu jingu, casahmitangun me cojo xuta rè yungun jan. Jemu cjín xuta cavicyua rè me cjua rè Nina. Hacuaha ngajan Antioquia xi tjunjin cachja xuta tsèhè yèjè xuta ladu rè Jesús xi xuta rè Cristu xi meje cuichja cjua vè cristiano.

²⁷ Nixtin hya ne, cafehe ngujo profeta ngajan Antioquia xi canduva me tsèhè Jerusalén.

²⁸ Ngajan xi cavetjujñi ngu me ngajñi rè profeta xi cuacun vè, ngu me xi hmí rè Agabo, hane cachja me cjua xi Hasen rè Nina casua rè me xi ha tu hitsè sa ne, cuinduva ngu jindya jyè jingujyè ni ngasunhdè. Jindya vè ne, cavetjucaa jain hya xi Claudio matitjun camahani me.

²⁹ Ngajan xi xuta ladu rè Jesús ngajan Antioquia ne, caviyuju me cjuatacun rè me jima ngu me xi cuisecoo me ha tucutjin xi chutaha me hane tsingatju me tsèhè xuta ladu rè Jesús xi siu ngajan Judea.

³⁰ Hya xi camá ne, cuatjin casahmi me. Catsingatju me cjuandaja vèhë, cavaha Bernabé cojo Saulo xi sua me tsja xuta changá xi siu ngajan Judea.

12

Cjuañihi xi cavatju xuta rè yungun

¹ Hane ngajñi rè nixtin xi cuacun vë ne, Herodes, me xi matitjun ne, cavitexa me cachjahá rè ngujo xuta rè yungun xi sahmi me cojo cjuahngatacun.

² Hacuaha cavitexa me xi cueya Jacobo, hntsë Juan, cojo quicha.

³ Xi vutsejen me xi cachuya rè xuta tjë rè Israel xcusun vèhë ne, hacuaha cavitexa me cachjahá rè Pedru, nixtin rè suhi rè pan xi tsajin san rè.

⁴ Sehe caveya me ndavaya, hacuaha cavitexa me tyjuhunngu sindadu xi cjue sahmi rè me cuidadu nixtin nixten chuya ñuju chuya ñuju sindadu jima ngu ndiya. Xi catsingataha cacun me ne, xi cuatju suhi tséhë Pascua ne, sehe cuaxë me xcun yějë ni xuta.

⁵ Cuatjin camá xi Pedru ne, casetjo me ndavaya. Peru xuta rè yungun ne, cafehya me cojo nguñaja xahasen rè me cjuandaja rè Nina xi cuma rè Pedru.

Cavaxëtje Nina Pedru tséhë ndavaya

⁶ Ngu nguixun chaja sa xi cuitexa Herodes xi cuetju Pedru xi cumacuenda jyë rè me ne, Pedru ne, jiñafë me, tjinñu me cojo jo cadena ngajñi rè jo sindadu. Hacuaha siu sa jo sindadu tingotjo ndavaya xi sahmi cuidadu.

⁷ Hya xi camá ne, cafehe ngu ángel tséhë Nina, hane jercu camahasen cahntsua ndavaya. Hane xi quiji cavèhëtsja ángel jan ndanisin rè Pedru ne, catsisatjenhnga rè me, sehe cachja cojo rè me cuitjin:

—Tisatjinhngue sanii. —Cuatjin cachja.

Hane hora vèhë ne, cavixuhndu cadena xi tjinñu tsja me.

⁸ Sehe ngajan xi ángel ne, cachja nga cojo rè me cuitjin:

—Cheje tsjian rijji, hacuaha tinche chuxinxte rijji. —Cuatjin cachja.

Hane Pedru ne, cuatjin casahmi me. Cachja nga ángel cuitjin:

—Cheje tsjanga rijji, hane ndove hacutjin cjuë. —Cuatjin cachja ángel jan.

⁹ Hane xi cavetju me ne, quiji me hacutjin quiji ángel. Peru hvín me xi xcusun xi tisahmi ángel jan ne, cjuaquixi ta xi má rè me ne, chini tichja cojo rè me.

¹⁰ Hane xi cavatjutaha me ngu cavatjutaha me jo sindadu ne, sehe cafehe me tingotjo quicha xi cuëtjuun xi cuanguen ngajñi nandya. Tingotjo vèhë ne, catuxaha suvá. Xi cavetju me ne, sehe quiji me. Hane xi cafehe me hiscan xi faha rè ngu nga ndiya ne, ha tu ñahñu quijixin ángel tséhë me.

¹¹ Sehe ngajan xi cajnercu Pedru xi cjuaquixi xcusun xi camá, hane cachja me cuitjin ngajñi rè suvá me:

—Quihndë ne, hvë jain xi Nina ne, catsingatju me ángel rè me, hane cavaxëtje ná me tséhë Herodes, hacuaha cavaxëtje ná me tséhë yějë xcusun xi meje sahmi xuta tjë rè Israel cojo ná. —Cuatjin cachja me ngajñi rè suvá me.

¹² Hane xi tu catsingataha cacun me cuatjin ne, sehe quiji me ndava María naa rè Juan, me xi hacuaha hmí rè Marcos. Ngajan ne, jercu tjin tangun xuta xi tisahmi me oración.

¹³ Hane xi cafehe me jan ne, catsijane me tingotjo. Hane sehe canduvavaha ngu na hndixahan xi hmí rè Rode xi cjuinenguise na yo xi titsijane.

¹⁴ Hane xi camachaya rè na xi xta rè Pedru xi tichja ne, tséhë xi jercu ndaja camá rè na ne, hisca cavuxaain na tingotjo ta marcu macjain cavuya na quiji cachja na cojo me xi yahnga jan xi Pedru ne, secun me tingotjo taha candatsen.

¹⁵ Peru me xi cuacun jan ne, cuitjin cachja me cojo rè na:

—Sca ri ngaye. —Cuatjin cachja me.

Peru na vèhë ne, cachja sa na xi hatuxa cjuaquixi xi hacui me. Hane me xi cuacun vë ne, cachja me cuitjin:

—¿Hacuiin ángel xi sahmi rè me cuidadu? —Cuatjin cachja me.

¹⁶ Hane Pedru ne, quijinduju sa me titsijane me tingotjo jan. Hane xi cavuxaha me tingotjo jan ne, cavèë me xi hacui jain Pedru, hane jemu quijircun rè me.

¹⁷ Ngajan xi Pedru ne, casahmitsja me cojo rè me xi cuiyujuyuu me, sehe cavetsihin casua cuenda me hacutjin camá xi Nai naja ne, cavaxë rè me ndavaya. Sehe ngajan xi cachja me cuitjin:

—Tuhun cumachaya rè Jacobo cojo sa xuta ladu rè Jesús xi yahnga tséhë xcusun xi camá vi. —Cuatjin cachja me.

Hya xi camá ne, sehe cavetju me quiji me jingu sa cahndë.

¹⁸ Hane xi casahasen jan ne, ngu cjuandya jyë casahmi sindadu jan, tséhë xi hvín cha mé hacutjin camá rè Pedru.

¹⁹ Hane Herodes ne, cavitexa me quiji cavinchise rë Pedru, peru casacuiin me. Hane vëhë xi cafahataha rë me sindadu xi casahmi cuidadu jan, sehe cavitexa me cachjaha rë sehe cueya cha. Hya xi camá ne, cavetju Herodes cavuya quiji me ngajan Cesarea, cavejña me.

Cjuaveya rë Herodes

²⁰ Quihndë ne, Herodes me xi matitjun ne, jemu cjan rë me cojo xuta nandya Tiro cojo nandya Sidón. Ngajan xi xuta xi cuacun vë ne, camatangun me, sehe quiijtjengui me Herodes. Xi tjun tjun ne, camá casahmi me xi cavinga rë Blasto me. Blasto ne, me vëhë xi fahacuenda me ndava Herodes. Hya xi camá ne, xuta xi cuacun jan ne, cafehya rë me Herodes xi cuijnetaha si ngajñi rë me cojo me vëhë. Cuatjin cafehya me xi cuacun vë ta, tsëhë xi nangui rë Herodes ne, ngajan vinduva xichinë tsëhë nandya Tiro cojo Sidón.

²¹ Cavechú nixtin xi cavejña Herodes xi cuichja me cojo xuta xi cuacun jan ne, sehe cavaja me tsjian tsëhë xi matitjun me, sehe quiji me cavéjña me cahndë rë me xi cuichja me cojo xuta.

²² Hane xi cajnetaha cachja Herodes ne, ngajan xi xuta ne, cuitjin cajindaya me cachja me:

—¡Cjua vëhë ne, cjua rë ngu nina, hacuiin cjua rë ngu xuta! —Cuatjin cajindaya me cachja me.

²³ Ha hora vëhë ni ne, ngu ángel tsëhë Nina ne, casahmi xi cafaha rë Herodes ngu chíhin, tsëhë xi hacuiin casahmi jyë casahmi hnga me Nina. Hya xi camá ne, cajinë rë me chundu, hane cahme me.

²⁴ Peru cjua rë Nina ne, quijinduju sa cavitsojo.

²⁵ Ngajan xi Bernabé cojo Saulo ne, casahmichihin me cjuandaja rë xuta yuma sehe cavuya me tsëhë Jerusalén. Hacuaha canduvacojo me Juan, xi hacuaha hmí rë me Marcos.

13

Casuaxa Nina Bernabé cojo Saulo

¹ Quihndë ne, ngajñi rë xuta rë yungun xi tacun ngajan Antioquía ne, hinchajñi me xi má profeta hacuaha hinchajñi me xi vicuya cjuachacun. Cuitjin hmí rë xuta xi cuacun vë: Bernabé, Simeón, me xi cachja xuta tsëhë Nchava Jma, Lucio, ngu xuta Cirene, Manaén, me xi camacha tangun cojo Herodes, me xi matitjun, hacuaha cojo Saulo.

² Hane jinguyëjë rë xi tisahmi me xi cuacun vë xa rë Nina hacuaha tisahmi me xun rë me ne, Hasen rë Nina ne, cuitjin cachja cojo rë me:

—Tuhunxun rë Bernabé cojo Saulo, cojo sa xi sahmi me xa xi ha casuáxa rë me.

³ Ngajan xi casahmi me xi cuacun jan xun rë me, hacuaha casahmi me oración rë me ne, sehe cavisanetsja me Bernabé cojo Saulo hane chuva vëhë cafaha me xa rë Nina. Hya xi camá ne, sehe catsinguijnetaha me cjua cojo xicjin me.

Quiji apóstol ngajan Chipre

⁴ Ngajan xi Bernabé cojo Saulo ne, quiji me sacuatjin cachja Hasen rë Nina cojo rë me. Cavetju me quiji me nandya Seleucia. Hane xi cafehe me ngajan ne, cavisehen me ngu barcu, sehe quiji me Chipre, ngu rquí nangui xi vetjucaa xcun ndachacun.

⁵ Hane xi cafehe me Salamina, ngu nandya tsëhë Chipre ne, casua me camachaya rë xuta cjua rë Nina ngajan yungun rë xuta tjë rë Israel. Hacuaha cavisecco Juan Marcos me xi quiji me jan.

⁶ Hane xi quiji me jinguyë ni ladu vëhë ne, cavechú me hisca nandya Pafos. Hane ngajan cavechútaha me ngu cha surqui xi hmí rë Barjesús. Cha vëhë ne, ngu profeta ndacha cha, hacuaha tjë rë Israel cha.

⁷ Hane tangun tsuyjihiya cha cojo me xi matitjun xi hmí rë Sergio Paulo, ngu me xi jemu vechú cjuatacun rë. Me vëhë ne, cajindaya me Bernabé cojo Saulo tsëhë xi meje cuihndë me cjua rë Nina.

⁸ Peru cha surqui jan ne, xi hacuaha hmí rë Elimas xi hne griego ne, casahmi condra cha me xi cuacun vë, tsëhë xi mijí rë cha xi me xi matitjun jan ne, cumangucacun me cojo Jesucristu.

⁹ Peru Saulo, me xi hacuaha hmí rë Pablo ne, catsë rë me cojo Hasen rë Nina. Cavutsejennndaja me cha surqui jan ne, sehe cachja me cojo cha cuitjin:

¹⁰ —¡Ngaye xindesu, ngaye cha ndacha, ngaye quihndi rë xitsehen, ngaye condra rë yëjë ni cjuandaja ne! ¿Hatuxa cuihinnduju sa ninguetzin ndiya ndajylhi rë Nina?

¹¹ Quihndë chutsijin ta Nina ne, sahmi ri me castigu. Cuma rcá ngaye, cumatsijin ri ndavá rë tsuhi ngujo nixtin. —Cuatjin cachja me.

Hane ngutjen ni camá rë cha sacuaha xi canduva ngu yufi xi cavetsa rë tuxcun cha, hane cama rcá cha. Hane cjuí nguehe cjuí ngajan cha vanguisetsja cha yo xi cuaha tsja cha.

¹² Ngajan xi me xi matitjun jan ne, xi cavèe me xcusun xi camá ne, camacjain rè me cjuachacun xi chja tsèhè Nina ta, tsèhè xi jemu quijircun rè me tsèhè cjuachacun vèhè.

Quiji apóstol ngajan Antioquia, distritu Pisidia

¹³ Hya xi camá ne, xi cavetju Pablo cojo me xi siutaha cojo me ngajan Pafos ne, sehe cavisehen me ngu barcu, quiji me nandya Perge, ngajan distritu Panfilia. Hane ngajan cavetjuxin Juan Marcos tsèhè me, hane cavuya nga me Jerusalén.

¹⁴ Hane Pablo cojo Bernabé ne, cavetju me tsèhè Perge, hane cafehe me Antioquia, ngajan distritu Pisidia. Hane xi cavechú nixtin xi chjahájenda rè ne, quiji me cavisehen me yungun ne, quiji me caviyuju me.

¹⁵ Hane xi cavatju cachtutaya rè ngujo cjuua xi catsihindu Moisés cojo ngujo cjuua xi catsihindu profeta ne, xutaxa rè yungun jan ne, catsingatju me cjuua tsèhè Pablo cojo Bernabé, hane cuitjin cachja me:

—Ngayun ne, sa xi tjin me cjuandajyihí xi meje cuinújun cojo xuta ne, cuma cuinújun. —Cuatjin cachja me.

¹⁶ Hane xi casecun Pablo ne, casahmitsja me cojo xuta sehe cachja me cuitjin:

—Ngayujun ngarcun ni xuta tjè rè Israel cojo sa ngayujun ni xi hacuaha chjuhuncun Nina ne, tisiñuju cjuua xi cuichjá cojo nuju.

¹⁷ Nina naja ngayaan tjè rè Israel ne, cavaxijin me xutachanga naja, hane tsèhè me vèhè casahmi cjin sa Nina xuta. Sehe tsèhè me casahmi me ngu nación xi hñu vetju cjuua rè hya xi caviyujutaha me ngajan nación Egipto. Hane cojo ngahñu xi tjin rè Nina ne, cavaxè me xuta xi cuacun vè tsèhè ngajan.

¹⁸ Hane Nina ne, cacaa rè me cojo xuta xi cuacun vè, hya xi catsuyihíya me ngajan ngu xín tsèhè nandya sacuaha yachan nu.

¹⁹ Hane xi cavatju catsinguetsun Nina yatu nación ngajan nangui Canaan ne, sehe casua me xutachanga naja jan xi cuma tsèhè me

²⁰ sacuaha ñuju cientu vasen nu. Hane xi cavatju vèhè ne, sehe cavaxijin me xuta xi camá me juez, hisca nixtin xi cavéjña profeta Samuel.

²¹ Hya xi cavatju vèhè ne, cafehya xutachanga naja jan ngu me xi cumatitjun tsèhè me. Cuatjin camá xi Nina ne, casuaxa me xutachanga naja Saúl, quihndi rè Cis, ngu xihin tjè rè Benjamín, xi cumatitjun me cahntsua yachan nu.

²² Hane xi cafahaxin Nina me vèhè xi matitjun me ne, cavejña me xutachanga naja David xi cuma titjun me. Cuitjin cachja Nina tsèhè David: “Ngahan vutsején ne, cha David, quihndi rè cha Isai ne, cha vèhè ngu cha xi jemu chuya ná tsèhè, ngu cha xi sahmi yèjè hacutjin xi meje ná.” Cuatjin cachja Nina.

²³ Ngu xuta tjè rè xutachanga naja David, me vèhè ne, xi hacui Jesús, me xi catsingatju Nina xi cuaxètje naja ngayaan xuta tjè rè Israel, sacuatjin xi ha cachja me.

²⁴ Hane xi chaja sa xi cjuhehe Jesús ne, nima Juan ne, cachja me cojo yèjè xuta tjè rè Israel xi meje rè xi tsindeya me cjuatacun rè me, hacuaha xtenda me.

²⁵ Quihndè ne, hya xi ha camatiña nixtin xi cueya nima Juan ne, cuitjin cachja me: “Hacuiin ngahan xi tsingatju Nina, xi nechunyun rè ta ngaxtun ne, nduva ngu me xi hitsè sa vechu cjuatacun rè xi hisca cumajin tsinguisehercu sahme tyjahi chuxinxté rè.” Cuatjin cachja nima Juan.

²⁶ Ngayejen ngarca ni ngayaan xuta tjè rè xutachanga naja Abraham cojo sa ngayujun ni xi hacuaha chjuhuncun Nina ne, ngayaan catsingatju naja Nina cjuandajyihí vihi xi chja hacutjin cuetjuntjeen.

²⁷ Yèjè xuta xi siu ngajan Jerusalén cojo xutaxa rè jan ne, hvín me xi Jesús ne, hacui me xi catsingatju Nina, hacuaha cajni rcu me cjuua rè yèjè ni profeta xi chutaya rè yèjè ni nixtin xi nixtin chjahájenda rè. Vèhè xi hya xi catsicanijijyè xuta xi cuacun vè Jesús ne, casahmi me xi cavetjucaa cjuua xi cachja profeta vè.

²⁸ Hane handasa casacuiin rè me jyè xi vechú chuva rè xi cueya Jesús ne, peru cafehya rè me Pilatu xi cuitexa me xi cueya Jesús.

²⁹ Hane xi cajnetaha casahmi me yèjè xcusun sacuatjin camahindu tsèhè Jesús ne, sehe catsitujne me tsèhè cru, sehe caseyaniji cahntsua ngu tsjun.

³⁰ Peru Nina catsicuya rè me cjuahñu.

³¹ Hya xi camá ne, jemu cjin nixtin xi camatsejen me ngajni rè xuta xi cavetju tangun me cojo ngajan Galilea hane hacuaha quiji tangun me cojo ngajan Jerusalén. Quihndè ne, xuta xi cuacun vè ne, tisua me jimachaya rè xuta tsèhè Jesús.

³² Hane ngayin ne, hacuaha titihín jimachaya nuju ta cjuandajyihí xi ha cachja Nina cojo xutachanga naja ne,

³³ cjuua vèhè Nina casahmi me xi cavetjucaa ngajni naja ngayaan tjè rè xutachanga naja hya xi catsicuya me Jesús cjuahñu. Hacuaha cuitjin camahindu xcun Salmo xi ma jo:

“Ngage xi quihndi naha ngage; quihndë ngahan suá ri cjuahñu.” Cuatjin cachja Nina xcun Salmo vëhë.

³⁴ Hacuaha Nina ne, ha cachja me xi tsicuya me Jesús cjuahñu, hacuaha yojo rë Jesús ne, hacuini cjuehndu, cuitjin cachja me xcun xujun rë me: “Hatuxa suá ri ximinchacun naha, sacuatjin xi ha cachjá xi suá rë David.” Cuatjin cachja Nina.

³⁵ Hacuaha catsihindu sa David xcun ngu nga Salmo cuitjin: “Tuun cahndë xi cjuehndu yojo rë me, xi hatuxa tjengui nuju cojo yëjë xahasen rë me.” Cuatjin camahindu.

³⁶ Peru David ne, xcun xi ha cavatju casahmi me sacuatjin meje rë Nina ne, cahme me, caseyaniji tangun me cojo nima xutachanga rë me, hacuaha cafehndu yojo rë me.

³⁷ Peru Jesús, me xi Nina catsicuya rë cjuahñu ne, cafehndiin yojo rë me.

³⁸ Vëhë xi ngayujun ngarcun ni ne, meje rë xi cuijnercun xi ngatsë rë me vëhë ne, tisacu jimachaya nuju xi tjin cjuaninchataha tsëhë jyë nuju,

³⁹ Hacuaha ngatsë ni rë me vëhë ne, yëjë ni xuta xi mangucacun cojo rë me ne, tsicjë Nina yëjë jyë rë me ta xcun ley rë Moisés ne, sacuiin rë cjuaninchataha.

⁴⁰ Vëhë xi meje rë xi cuinechun cuidadu, sá tu cuatjun cuma sacuatjin xi catsihindu profeta xcun xujun rë Nina hatsëë nixtin, cuitjin catsihindu me:

⁴¹ Chutsujun ni, ngayun xi macjaain nuju ne,

catjircun nuju, sehe tjangun ta

jinguyëjë rë xi nechun ne, sahme ngu chircun

xi hisca cumacjaain nuju sa xi yo cuichja cojo nuju.

Cuatjin catsihindu profeta. Hacuaha cojo cjuá vëhë ne, catsinguijnetaha Pablo cachja me.

⁴² Hane hora xi tivetju Pablo cojo Bernabé tsëhë yungun jan ne, cachja xuta cojo me xi cuetjucaa totje nga ne, meje rë me xi cya cuichja nga Pablo tsëhë cjuacjintacun vëhë.

⁴³ Hane hya xi cavetju xuta tsëhë yungun ne, jemu cjin xuta tjë rë Israel hacuaha jemu cjin xutaxin xi hacuaha faharcun me Nina ne, quiji me cojo Pablo cojo Bernabé. Hane Pablo cojo Bernabé ne, cachja me cojo xuta xi cuacun jan xi catjinduju sa me cojo ndiya rë cjuandaja rë Nina.

⁴⁴ Hane xi cavetjucaa nga totje nixtin xi chjahájenda rë ne, ha ña meje yëjë ni xuta nandya camatangun me xi cuisñuju me cjuá rë Nina.

⁴⁵ Peru hya xi cavëë yahnga xuta tjë rë Israel xutacjin jan ne, catsë rë xahasen rë me cojo cjuachini, hacuaha cachja me condra tsëhë cjuá xi cachja Pablo, hisca choho cachja me tsëhë me.

⁴⁶ Ngajan xi Pablo cojo Bernabé ne, cachja me cojo xuta tjë rë Israel jan cuitjin:

—Hatuxa ngayun titjun camameje rë xi canújin cojo nuju cjuá rë Nina. Peru quihndë ta nitjungun hacuaha xi má nuju ne, machjiriin ngayun xi cojo ngayun satë nuju cjuahñu xatsë ne, cuanguin tihin cumachaya rë xutaxin cjuandajyihni vëhë.

⁴⁷ Cuatjin nihñi ta, tsëhë xi cuitjin cavitexa niji Nina:

Ngahan tsingátju ri sacuaaha ngu ndihi xi tehe cjuahasen xi cuma rë xutaxin, cojo sa xi ngatsë rë cjuandajyihni xi cuinoje ne, cuetjutje xuta jinguyë ni, hisca hiscan vijnetaha ngasunhndë.

Cuatjin cavitexa niji Nina. —Cuatjin catsacjuiin Pablo cojo Bernabé, cachja me.

⁴⁸ Hane xi cahndë xutaxin jan cjuá vëhë ne, jemu ndaja camá rë me, hacuaha casahmi jyë casahmi hnga me cjuá rë Nina. Hane yëjë ni xuta xi cavaxijin Nina xi sacú rë cjuahñu xatsë ne, camacjain rë me cjuandajyihni vëhë.

⁴⁹ Hya xi camá ne, jercu cavitsojo cjuandajyihni xi chja tsëhë Nai naja jinguyë ni ladu vëhë.

⁵⁰ Peru xuta tjë rë Israel jan ne, cavisiajmi me cojo ngujo yachjin nchina tsëhë yungun jan, cojo ngujo xuta xi matitjun tsëhë nandya jan, sehe cavetsihin casua me ngu cjuañihni xi cuma rë Pablo cojo Bernabé, sehe cavaxëxin me tsëhë nangui rë me.

⁵¹ Peru Pablo cojo Bernabé ne, cavitsune me chojo rë ntsacu me, xi sua me machaya rë xuta xi cuacun jan xi vutsejen me me sacuaaha xutaxin xi hvín cjuá rë Nina. Sehe cavetju me quiji me nandya Iconio.

⁵² Hane xuta ladu rë Jesús ne, quitsë rë me cjuasua hacuaha quitsë rë me tsëhë Hasen rë Nina.

14

Quiji apóstol ngajan Iconio

¹ Hya xi camá ne, Pablo cojo Bernabé ne, quiji tangun me yungun rë xuta tjë rë Israel ngajan nandya Iconio. Hane xi cachja me cojo xuta ne, jercu cjin camahani xuta tjë rë Israel cojo xutaxin camacjain rë me cjuá jan.

² Peru xuta tjë rë Israel xi ha mijí cumacjain rë ne, cachja me cojo xutaxin, catsinguetsun me cjuatacun rë me xi cuacun vé condra tsëhë apóstol xi cuacun jan.

³ Peru jemu jyë nixtin caviyujutaha me hacuaha hacuiin catsacjun me xi cachja me tsêhê Nai naja. Hane Nai naja ne, casua me cahndê xi casahmi apóstol cjuarcun, cojo sa xi cumatsejen xi quixi cjuaxi chja me tsêhê cjuandaja rê Nai naja.

⁴ Peru xuta nandya jan ne, hacuiin tangun camá cjuatacun rê me ta ngujo me ne, cachuya rê me tsêhê xuta tjê rê Israel, peru yahnga nga me ne, cachuya rê me tsêhê apóstol jan.

⁵ Hya xi camá ne, xutaxin cojo xuta tjê rê Israel cojo xutaxa rê jan ne, caviyujucacun me xi choho sahmi me cojo apóstol xi cuacun jan hacuaha tsiquehen me cojo ndyojo.

⁶ Peru apóstol jan ne, camachaya rê me cjuaxi jan, hane cavanga me quiji me ngajan nandya Lистра cojo nandya Derbe, ngajan distritu Licaonia, cojo ngujo sa cahndê tahndee jan.

⁷ Hane yêjê cahndê hacutjin catsujyihya me ne, cachja me cojo xuta cjuandajyihya xi chja tsêhê Jesucristu.

Meje tsiquehen xuta Pablo ngajan Lистра

⁸ Cavêjña ngu cha ngajan nandya Lистра, ngu cha xi tsajin rê ngahñu ntsacu, tsêhê xi tsehen hisca hya xi catsin cha. Maji camahani fi cha.

⁹ Tacun cha tivisiñuju cha cjuaxi tichja Pablo. Ngajan xi xi cavutsejenndaja Pablo cha ne, cavacun rê me xi manguacacun cha xi hatuxa cumandaja cha,

¹⁰ sehe ngajan xi cachja me cojo cha cuitjin:

—Tisechunquixun. —Cuatjin cachja me.

Hya xi camá ne, hisca cacaahnga cha xi casecun cha, sehe cavetsihin quiji ntsacu cha.

¹¹ Ngajan xi xutacjin jan ne, xi cavêê me xcusun xi casahmi Pablo ne, cavetsihin cajindaya me cachja me hne rê me, xi hmí rê hne Licaonia, cuitjin cachja me:

—¡Me xi cuicun vi ne, nina me vi, xi canduva me tsêhê ngahnga, canduvatjengui naja me, tu xi tsejen me sacuaa xuta! —Cuatjin cachja me.

¹² Bernabé ne, xi má rê xuta jan ne, nina Zeus me, hane Pablo ne, nina Hermes me, tsêhê xi me vêhê xi hitsê sa jercu cachja me.

¹³ Ngajan xi nahmi tsêhê nina Zeus jan, me xi tacun yungun rê tjeheh nandya ni ne, canduvacojo me chu ndyaja hacuaha canduvacojo me naxu ngajan hiscan tingotjo tsêhê nandya. Hane nahmi cojo xutacjin jan ne, meje tsiquehen me ndyaja jan hacuaha sua me naxu jan xi cjuaharcun me Pablo cojo Bernabé.

¹⁴ Hya xi apóstol Bernabé cojo Pablo camachaya rê me hacutjin tisahmi xuta jan ne, cajavê me tsjãe rê me cavicheya me, ta cuatjin xcusun rê xuta tjê rê Israel hya xi cjan rê me. Sehe cavanga me quiji me ngajñi rê xutacjin jan, cajindaya me cachja me cuitjin:

¹⁵ —Ngayujun ni ne, ¿mé má cuitjin tinihñu? Ngayin ne, hacuaha xuta ni ngayin sacuatjin nuju ngayun. Canújin cojo nuju ngu cjuandajyihya xi quichihin, cojo sa xi cueñuxun xcusun xi machjiriin vi, hacuaha cojo sa xi cuisuhun ndiya rê ngu Nina xi quicun, me xi casahmi ngahnga cojo nangui cojo ndachacun, cojo yêjê ni xi tjin jan.

¹⁶ Nina ne, casua me cahndê xi, nixtin xi cavatju ne, xuta tsêhê yêjê ni nación ne, casahmi me hacutjin xi ha xcusun rê suvã me.

¹⁷ Peru tsêhê xi casahmi me cjuandaja ne, casua me camachaya nuju xi me vêhê xi Nina me; catsingatju me tsi tsêhê ngahnga xi cuma nuju, hacuaha casua nuju me nixtin rê tutjê nuju, casua me xi chinu, hacuaha catsinguitsê me xahasen nuju cjuasua. —Cuatjin cajindaya me cachja me.

¹⁸ Handasa cachja me cuatjin ne, peru ha tu hitsê sa ne, camaji cavatêcja me xi tsiquehen xutacjin jan chu xi sua me cjuatjo cojo apóstol jan sacuaa nina rê me.

¹⁹ Hya xi camá ne, canduva ngujo xuta tjê rê Israel tsêhê nandya Antioquia cojo nandya Iconio. Hane catsinguetsun me cjuatacun rê xutacjin jan, sehe cavetaha me ndyojo Pablo hane cajavêjne me cavaxê me ngajan xín tsêhê nandya, tsêhê xi xi má rê me ne, ha cahme Pablo.

²⁰ Peru xi tu catsêxtin xuta ladu rê Jesús jan hiscan jiña Pablo ne, cavisatjenhnga me quiji me cavisehen nga me nandya. Hane xi camá nchujun jan ne, cavetju me quiji me cojo Bernabé ngajan nandya Derbe.

Cavuya Pablo cojo Bernabé ngajan Antioquia, distritu Siria

²¹ Hane xi cafehe me jan ne, casua me camachaya rê xuta cjuandajyihya xi chja tsêhê Jesucristu. Hane jemu cjín xuta xi cavisehen me ladu rê Jesús. Hya xi camá ne, cavuya nga me Lистра cojo Iconio cojo Antioquia, distritu Pisidia.

²² Caviyujuhñu me cjuatacun rê xuta ladu rê Jesús, hacuaha cachja me cojo rê me xi catjinduju me xi manguacacun me cojo Jesús. Hacuaha cachja sa me cojo rê me cuitjin:

—Meje rê xi jemu cjín cjuañihya cuatjuun cuma sehe cuiseen hiscan sahmi Nina gobiernu. —Cuatjin cachja me.

²³ Hacuaha casuaxa rë me ngujo xuta changá jima ngu yungun jan, xi cjuahacuenda me xuta rë yungun. Hane xi cavatju casahmi me oración hacuaha casahmi me xun rë me ne, sehe caviyuju me xuta rë yëjë yungun jan tsja Nai naja, me xi camangucacun xuta jan cojo.

²⁴ Hya xi camá ne, cavuya cavatju nga me distritu Pisidia, sehe cafehe me nandya Perge, distritu Panfilia.

²⁵ Hane xi cafë cachja me cojo xuta jan cjuandajyihí ne, sehe cavetju me quiji me nandya Atalia. Hane xi cavetju me ngajan ne, sehe cavisehen me barcu cavuya quiji me Antioquia,

²⁶ nandya hiscan xi caviyuju xuta me ngahma cjuandaja rë Nina xi sahmi me xa xi sehe cajnetaha casahmi me jan.

²⁷ Hane xi cafehe Pablo cojo Bernabé jan ne, sehe casahmitangun me yëjë xuta rë yungun, casuacuenda me yëjë hacutjin xi casahmi Nina, nixtin xi quiji casahmi me xa rë Nina. Hacuaha casuacuenda me xi Nina ne, cavuxaha me ndiya xi cumangucacun xutaxín cojo Jesús.

²⁸ Hane hacuín hitsë nixtin caviyujutaha me jan cojo xuta ladu rë Jesús.

15

Junta xi camá ngajan Jerusalén

¹ Hya xi camá ne, ngujo me xi xuta tjë rë Israel ne, cavetju tsëhë Judea hane cafehe me Antioquia, cachja me cojo yahnga xuta ladu rë Jesús cuitjin:

—Sa xi xtiin rë chuxin nuju sacuaha xcusun xi cavejña Moisés ne, cumaji cuetjuntjun. —Cuatjin cachja me.

² Ngajan xi Pablo cojo Bernabé ne, hacuín hitsë casecjan cjua rë me cojo xuta xi cachja cuatjin jan. Vëhë xi xuta rë yungun jan ne, casuaxa me Pablo cojo Bernabé cojo ngujo sa me xi cjue me xcun apóstol cojo xcun xuta changá rë Jerusalén, xi ha vëë me cjua rë Nina xi cuinenguise me tsëhë cjuacjintacun xi casuandya rë me ngajan.

³ Ngajan xi xuta xi cuacun cavitexa xuta rë yungun jan ne, cavatju me distritu Fenicia cojo distritu Samaria. Hane cuatjin tisuacuenda me hacutjin xi xutaxín ne, hacuaha cavisehen me ndiya rë Jesús. Hane yëjë xuta ladu rë Jesús xi cavisíñuju cjua jan ne, jemu ndaja camá rë me.

⁴ Hane xi cafehe me Jerusalén ne, jemu ndaja cafahatsja xuta rë yungun jan me. Hacuaha jemu ndaja cafahatsja apóstol cojo xuta changá jan me. Hya xi camá ne, sehe casuacuenda me yëjë hacutjin xi casahmi Nina, nixtin xi quiji casahmi me xa rë Nina.

⁵ Peru ngujo xuta fariseo xi hacuaha camá me ladu rë Jesús ne, cavetjújñi me cachja me cuitjin:

—Xutaxín xi visehen ladu rë Jesús ne, meje rë xi xti chuxin rë me hacuaha cuinújan cojo rë me xi sahmi me yëjë sacuatjin chja ley rë Moisés. —Cuatjin cachja me.

⁶ Hya xi camá ne, camatangun apóstol cojo xuta changá xi cjuahacuenda me cjuacjintacun vëhë.

⁷ Hane ha xcun xi ha jemu cavisiajmicjín me ngajñi rë me ne, sehe ngajan xi cavetjújñi Pedru, cachja me cuitjin:

—Ngayujun ngarcun ni matsejen ne, ngayun ne, ha hyun ta hisca nixtin titjun ne, ngahan cavaxijin ná Nina ngajñi nuju cojo sa xi ngatsë naha ne, cumachaya rë xutaxín cjuandajyihí xi chja tsëhë Jesucristu hane cacajain rë me.

⁸ Hane Nina, me xi vëë yëjë cjuatacun rë xuta matsejen ne, catsingacun me xi cachuya rë me tsëhë xutaxín, hya xi casua me Hasen rë me xi cuma rë xuta xi cuacun vë, sacuatjin casua naja me ngayaan.

⁹ Tangun ni casahmi Nina cojo rë me sacuatjin casahmi Nina cojo naja ngayaan, xi catsityjahi me cjuatacun rë xuta xi cuacun vë ta, tsëhë xi camangucacun me cojo Nina.

¹⁰ Quihndë ta cuatjin ne, ¿mé má cuatjin meje chjuhunchuvun rë Nina cojo chuva rë ley rë Moisés, xi cuatjin tivitexun rë xuta ladu rë Jesús xi cuacun jan xi sahmichihin me ngu xcusun xi hisca xutachanga naja cacain rë me casahmichihin me hacuaha hisca ngayaan matsejen ne, cacain naja canihñachehen?

¹¹ Peru hacuín cuatjin ta ngayaan ne, macjain naja xi cuetjuntjeen ngatsë rë cjuandaja rë Nai naja Jesús sacuatjin rë me xi cuacun vëhë. —Cuatjin cachja Pedru.

¹² Ngajan xi xutacjín jan ne, ngu caviyujuyuu me cavisíñuju me cjua xi cachja Bernabé cojo Pablo hora xi casuacuenda me hacutjin casahmi Nina cjuarcun ngajñi rë xa xi casahmi me ngajan nangui rë xutaxín.

¹³ Hane hora xi cajnetaha cachja Bernabé cojo Pablo cjua vëhë ne, sehe cachja Jacobo cuitjin:

—Ngayujun ngarcun ni matsejen ne, tinuhyun cjua xi cuichjá cojo nuju.

¹⁴ Sehe cajnetaha casuacuenda Simón hacutjin camá xi tjuntjun catsingacun Nina xi hacuaha meje rë me xutaxín, hya xi cavaxijin me ngujo xutaxín jan xi cuma xuta ladu rë me.

¹⁵ Cjua rë Nina xi catsihindu profeta hatsëë nixtin matsejen ne, tjin tangun cjuatacun rë cojo cjua xi cafë cachja Simón. Cuitjin camahindu:

¹⁶ Xi cuatju xcusun vëhë ne, cúa nga,
hane sahme xatsë ndava David xi cavetsun;
cúa sahmendaja nga xi cavixujne,
tsindaja nga ngundiya,

¹⁷ cojo sa xi xuta xi yahnga ne, sahmi me ngahñu xi cuisehen me ladu naha,
cuma cuinújan ne, yëjë xutaxín xi ngahan cavaxejen xi cuma tsahan me.

¹⁸ Cuatjin chja Nina, me xi ha casua cjua vëhë hatsëë nixtin.

Cuatjin camahindu.

¹⁹ Vëhë xi xi má ná ngahan matsejen ne, mijí rë xi tahan xti rë xutaxín xi visehen ladu rë Nina.

²⁰ Xi meje rë xi nihña ne, xi nihinduun rë me xi sinii me xichinë xi caviyuju xcun nina ndyojo, sahmi me cjuatsehen xi sahmi xuta cojo ngu xi hacuín chjuun rë hacuín xihin rë me, sinii me yojo rë chu xi caxinchahndu rë xi cahme, hacuaha sinii me jni.

²¹ Cuatjin meje rë ta, tsëhë xi hisca jemu nu tsëë jan hisca quihndë ne, jima ngu nandya ngajñi xuta tjë rë Israel ne, tjin me xi sua machaya rë xuta cjua tsëhë ley rë Moisés. Ley vëhë ne, chutaya rë yëjë ni yungun jima ngu nixtin xi nixtin chjahájenda rë. —Cuatjin cachja Jacobo.

Xujun xi catsingatju apóstol tsëhë xutaxín

²² Ngajan xi apóstol cojo xuta changá cojo yëjë sa xuta rë yungun ne, caviyujucacun me xi tuxijin rë ngujo xihin ngajñi rë me xi tsingatju me ngajan Antioquia, cjue tangun cojo Pablo cojo Bernabé. Me xi cuicun vi xi catuxijin rë: Judas, me xi hacuaha hmí rë Bárabas, cojo Silas, jo xihin xi jemu chjaharcun rë ngajñi rë xuta ladu rë Jesús.

²³ Sehe ngajan xi catsihindu me ngu xujun catsingatju me cojo me xi jo xi cuacun vë. Cuitjin chja xujun jan:

“Ngayin xuta ladu rë Jesús, apóstol cojo xuta changá ne, ningatjin ngu nina niji tsujun ngayun ni ngayun xuta ladu rë Jesús xi hacuín xuta tjë rë Israel ngayun, xi nechun nandya Antioquia cojo distritu Siria cojo distritu Cilicia.

²⁴ Ngayin ne, camachaya niji xi cavetju ngujo xihin ngajñi niji xi cafehe ndya casuaxti nuju cojo cjua rë hacuaha caviseccan cjuatacun nuju. Me xi cuacun vë ne, ngayin ne, cavitexiin rë me xi quiji me.

²⁵ Vëhë xi ngu tangun ni camá cjua niji hane cavejñi tacuín xi tuxijin rë xihin xi ningatjin xi nduvatjengui nuju, cuinduvatangun cojo Bernabé cojo Pablo, me xi jemu vinga niji.

²⁶ Me xi cuacun vë ne, casua me yojo rë me xi caviyujutaha tsavi me xi sahmi me xa rë Nai naja Jesucristu.

²⁷ Cuatjin xi Judas cojo Silas ne, ningatjin nuju me. Hane me vëhë ne, cuichja me cojo nuju cjua hntsua me, cjua xi ningatjin nuju vi.

²⁸ Ngayin ne, ngu tangun ni camá cjua niji cojo Hasen rë Nina xi cuitexin nuju xi nihñu suvá ni xcusun xi hitsë sa sahmi nguýë vi:

²⁹ xicachinuu xichinë xi caviyuju xcun nina ndyojo, xicachinuu jni, xicachinuu yojo rë chu xi caxinchahndu rë xi cahme, xicanihñuu cjuatsehen xi sahmi xuta cojo ngu xi hacuín chjuun rë hacuín xihin rë. Sa xi nihñuu yëjë xcusun vëhë ne, ndatjin nihñu. Vëhë ni cjua xi nújin cojo nuju.” Cuatjin chja xujun jan.

³⁰ Hya xi camá ne, cavetju me xi cuacun jan quiji me Antioquia. Hane xi cafehe me jan ne, casahmitangun me yëjë ni xuta rë yungun, sehe casua me xujun xi yaha me.

³¹ Hane xi cavutaya xuta ladu rë Jesús xujun jan ne, jemu ndaja camá rë me tsëhë cjua jan.

³² Hane Judas cojo Silas jan ne, tsëhë xi tjin rë me chuva xi cuichja me cjua xi cafahatsja me tsëhë Nina ne, jercu cachja me cojo xuta jan, hacuaha jemu casua rë me cjuetacun.

³³ Hane xi ha caviyujutaha me ngujo nixtin jan ne, xuta rë yungun jan ne, catsingatju me cafe nga cojo yëjë ni cjuandaja cjuajeya ngajan hiscan xi cavetju me.

³⁴ Hane Silas, xi má rë me ne, hitsë sa ndaja xi ngaja caviyujutaha me.

³⁵ Peru Pablo cojo Bernabé ne, caviyujutaha sa me ngajan Antioquia, cavicuya me cjuachacun rë cjua rë Nina, hacuaha casua me camachaya rë xuta cjuandajyihí xi chja tsëhë Nai naja. Hacuaha jemu cjín sa xuta xi cuatjin casahmi me.

Catsismi xicjin Pablo cojo Bernabé

³⁶ Hya xi camá ne, xi cavatju ngujo nixtin ne, Pablo ne, cuitjin cachja me cojo Bernabé:

—Cuyan cuanguen tjenguen nga xuta ladu rë Jesús yějë ni nandya hiscan xi ha catahan camachaya rë me cjuandajyihî xi chja tsêhë Nai naja, cuanguen chutsejen ne, hacutjin tivatju me tijima.

³⁷ Hane Bernabé ne, meje cjuecojo me Juan, me xi hacuaha hmî rë Marcos.

³⁸ Peru Pablo ne, mijî cjuecojo me, tsêhë xi Marcos ne, catsismicacun me xicjin me hane cavetjuxin me tsêhë Pablo cojo Bernabé ngajan Panfilia, quijiinndujain me cojo xa.

³⁹ Hane cojo cjuatacun vêhë ne, cavetjucaa ngu si ngajñi rë Pablo cojo Bernabé. Cuatjin camá xi cavetjuxin me tsêhë xicjin me. Hya xi camá ne, Bernabé ne, quijicojo me Marcos jan ne, cavisehen me ngu barcu, hane quiji me Chipre.

⁴⁰ Peru Pablo ne, cavaxijin me Silas xi cjuecojo me. Hane xuta ladu rë Jesús ne, caviyuju me me xi cuacun jan ngahma cjuandaja rë Nai naja. Hya xi camá ne, cavetju Pablo cojo Silas,

⁴¹ quiji me yějë ni nandya tsêhë distritu Siria cojo Cilicia, casua rë me ngahñu xuta rë yungun jan.

16

Cavetsihin catsuyiyihya Timoteo cojo Pablo

¹ Hane xi cavatju vêhë ne, cafehe me nandya Derbe cojo Listra. Ngajan ne, tacun ngu xuta ladu rë Jesús xi hmî rë Timoteo, quihndi rë ngu chjuun xuta tjë rë Israel xi hacuaha cavisehen me ndiya rë Jesucristu. Nahmi rë Timoteo jan ne, xutaxin me.

² Xuta ladu rë Jesús ngajan nandya Listra cojo Iconio ne, jemu ndaja chja me tsêhë Timoteo vë.

³ Pablo ne, meje rë me xi cjue Timoteo cojo rë me. Vêhë xi quijicojo me Timoteo hiscan xi ti chuxin rë xuta tjë rë Israel. Cuatjin casahmi me ngatsë rë xi nandya xi cuacun vêhë ne, siu xuta jan, hane yějë xuta xi cuacun jan ne, vëe me xi nahmi rë Timoteo ne, ngu xutaxin me.

⁴ Ngajan xi cavetju Pablo cojo Silas cojo Timoteo, quiji me. Hane jima ngu nandya xi tivatju me ne, casua me camachaya rë xuta tsêhë cjuaxi caviyuju apóstol cojo xuta changá ngajan Jerusalén, cojo sa xi xuta ne, cuihndé me tsêhë cjuaxi vêhë.

⁵ Cuatjin camá xi xuta tsêhë yějë yungun jan ne, casacuhñu rë me xi mangucacun me cojo Jesús. Hane nchunchujun ni ne, cuatjin jima cjin sa me.

Cachja nijñá cojo Pablo

⁶ Hya xi camá ne, cavatju me distritu Frigia cojo distritu Galacia ta, tsêhë xi Hasen rë Nina ne, casuaain cahndé xi cuichja me cojo xuta cjuaxi rë Nina ngajan distritu Asia.

⁷ Hane xi cafehe me tiña distritu Misia ne, meje cjue me distritu Bitinia, peru Hasen rë Jesús ne, casuaain cahndé.

⁸ Cuatjin camá xi cavatjutaha me Misia, hane quiji me nandya Troas.

⁹ Hane ngu nguixun xi siutaha me ngajan ne, cachja ngu nijñá cojo rë Pablo. Cavëe me ngu xihin tsêhë distritu Macedonia xi secun tichja cojo rë me cuitjin: “Nduvun nguehe Macedonia ne, cuiseacun nijî.” Cuatjin cachja nijñá jan.

¹⁰ Cuatjin camá xi xi tu cachja nijñá cojo Pablo cuatjin ne, ngutjen ni cavinchin chuva rë hacutjin cuma xi cuanguin Macedonia ta, tsêhë xi xi má nijî ne, Nina cajindaya nijî me xi cuanguin cunújin cojo xuta jan cjuandajyihî xi chja tsêhë Jesús.

Cavisehen na Lidia ladu tsêhë Jesucristu

¹¹ Hya xi camá ne, xi cavetjin nandya Troas ne, cachjihin ngu barcu sehe catsanguin ngu quixi rë nandya Samotracia. Hane xi camá nchujun jan ne, catsanguin nandya Neápolis.

¹² Hane tsêhë ngajan ne, catsanguin nandya Filipos, ngu nandya xi hitsë sa matitjun tsêhë ngu cahndé tsêhë distritu Macedonia. Jemu cjin xuta Roma siu me jan. Hane cavinechintihin nandya vêhë ngujo nixtin.

¹³ Hane xi cavechú nixtin xi nixtin chjahájenda rë ne, cavetjin tingotjo hnhua tsêhë nandya jan hiscan jiya ndajyë. Xi má nijî ne, ngajan tjin ngu cahndé xi má oración. Hane cavinechin ngajan, canújin cjuaxi rë Nina cojo yachjin xi camatangun me jan.

¹⁴ Hane ngu chjuun xi cahndé cjuaxi cachja Pablo ne, Lidia hmî rë na, ngu na tsêhë nandya Tiatira, viteña na tsjian moradu. Na vêhë ne, hacuaha faharcun na Nina, hane Nai naja ne, cavuxaha me cjuatacun rë na xi ndaja cavetaharcu na cjuaxi cachja Pablo.

¹⁵ Hane hya xi caxtenda na cojo yějë xuta rë na ne, cachja na cojo nijî cuitjin:

—Quihndé ta ha hyun é ngahan ne, camangucacun cojo Nai naja ne, nduvun ndya naha, hane ngajan cuinechun. —Cuatjin jemu cjin cachja na cojo nijî, vêhë xi catsanguî.

Quiji Pablo cojo Silas ndavaya ngajan Filipos

¹⁶ Cavechú ngu nixtin hya xi tivanguin cahndé hiscan xi má oración ne, cavechútaha niji ngu na hndixahan rë xuta, xi jiya xitsehen xahasen rë. Hane nai rë na hndixahan jan ne, jemu cjín tujún sacu rë me, tséhë xi chja na cojo xuta mé xi cuatju me cuma.

¹⁷ Na vëhë ne, catsujjihiya tjengui na ngayin cojo Pablo, jindaya na chja na cuitjin:

—Xuta xi cuicun vi ne, mosu rë Nina xi matitjun má me, hacuaaha sua me machaya nuju cja hacutjin cuetjuntjun. —Cuatjin cajindaya na cachja na.

¹⁸ Jemu cjín nixtin xi cuatjin casahmi na. Hya xi camá ne, tséhë xi jemu camaxti rë Pablo ne, cavuya me cavutsejen me na, sehe cachja me cojo xitsehen jan cuitjin:

—Tséhë xi Jesucristu casuaxa ná me ne, ¡tetjixin tséhë na! ¡Vëhë xi chjá cojo ri! —Cuatjin cachja Pablo.

Hane hora vëhë ni ne, cavetjuxin xitsehen jan.

¹⁹ Hya xi camá ne, xi vutsejen nai rë na hndixahan jan xi ha quihndé tsajin cjuetacun xi sacú sa rë me tujún ne, cafaha me Pablo cojo Silas, cajavëjne me quijicani me ngajan hiscan ma tangun xutaxa rë ngajan hiscan má ndetsin.

²⁰ Hane xi cafehe me ngajan xcun xutaxa rë ne, cuitjin cavinchajyë me:

—Cha xi cuicun tjë rë Israel vi ne, jemu tiviseccjan cha cjuetacun rë xuta nangui naja.

²¹ Meje rë cha xi nihña xcusun rë xutachanga rë cha, peru ngayaan xuta Roma ne, ndajintjin xi cuanguentjengueen xcusun xi cuacun vë.

²² Hane hacuaaha cojo xutacjin jan, cavetsihin cavinchajyë me Pablo cojo Silas. Ngajan xi xutaxa rë ne, cavaxëhndu me tsjian rë me xi cuacun jan, sehe cavitexa me xi sehen rë.

²³ Hane ha xcun xi ha jercu cavaja rë me ne, sehe cavincha me ndavaya. Hacuaaha cachja me cojo cha xi sahmi cuidadu ndavaya xi ndaja cuidadu cuma me xi cuacun jan.

²⁴ Hane hya xi cafahatsja mayu cja vëhë ne, quiji cavinchahñu cha me cahntsua ndavayajñu, hacuaaha cavinchanguihñu cha ntsacu me ngojo xi casehenchjine tséhë jo ya xi sahmi rë me castigu hacuaaha hitsë sa cjuaquixi jiya me.

²⁵ Hane sacuaaha chufa rë vasen nixten ne, Pablo cojo Silas ne, tisahmi me oración hacuaaha tsë me tséhë Nina. Hane presu xi yahnga jan ne, tu tivisiñuju ni me.

²⁶ Hane ha tu ñahñu jercu cafani nangui, hisca xihndënaña rë ndavaya jan vitsuneya rë. Hacuaaha yëjë ni tingotjo ndavaya jan ne, ngutjen ni catuxaha, hane cadena xi tjinñu xingu xingu presu ne, cavixuhndu.

²⁷ Hya xi camá ne, cavasca rë cha xi sahmi cuidadu ndavaya jan. Hane xi cavëë cha xi tixaha yëjë tingotjo tséhë ndavaya jan ne, cavaxë cha quicha rë cha hane ha tu hitsë sa ne, catsiquehen cha yojo rë cha ta, tséhë xi xi má rë cha ne, yëjë presu ne, cavanga.

²⁸ Peru Pablo ne, jercu cajindaya me cachja me cuitjin:

—Xicanihñuu cuatjin ta ngayijin ni nechinyin nguehe. —Cuatjin cachja Pablo.

²⁹ Ngajan xi cha xi sahmi cuidadu jan ne, cafehya cha ngu ndihi, sehe vangasanii cha quiji cha cahntsua ndavaya, ña fatsë cha xi tsacjun cha, quiji cafañatsacjan cha xcun Pablo cojo Silas xi faharcun cha me.

³⁰ Hane xi cavaxë cha me tséhë ndavayajñu jan ne, sehe cafinenguisse cha cuitjin:

—Tatá, ¿mé xi meje rë xi sahme, cojo sa xi cuétjutjé? —Cuatjin cafinenguisse cha.

³¹ Hane me xi cuacun jan ne, cuitjin cachja me:

—Catamangu tacún cojo Nai niji Jesús, sehe cuetjuntjun ngayun cojo yëjë xuta xi siu ndya nuju. —Cuatjin cachja me.

³² Sehe ngajan xi cha vëhë ne, cajindaya cha yëjë xuta xi siu ndava cha, hane Pablo cojo Silas ne, casua me camachaya rë cha cja rë Nina cojo yëjë xuta xi cajindaya rë cha jan.

³³ Ha hora vëhë ni tséhë nixten vëhë ne, cafaha cha me ne, cavane cha hiscan casacuhmu rë me. Hya xi camá ne, ngutjen ni caxtenda cha cojo yëjë xuta rë cha jan.

³⁴ Sehe quijinjini cha cojo Pablo cojo Silas ndava cha, hane casua cha niñu cajnë me. Hacuaaha jercu ndaja camá rë cha cojo yëjë xuta xi siu ndava cha, tséhë xi camangucacun cha cojo Nina.

³⁵ Hya xi camá ne, xi casahasen jan ne, catsingatju xutaxa rë jan nísë, quiji cachja cojo cha xi sahmi cuidadu ndavaya jan cuitjin:

—Naxun xu cha xi caxincha ndavaya nguchjin jan. —Cuatjin cachja cha.

³⁶ Ngajan xi cha xi sahmi cuidadu ndavaya jan ne, quiji cachja cha cojo Pablo cja vihi:

—Catsingatju xutaxa rë cja xi cuaxë xu nuju. Vëhë xi cuma cuetjun ne, cuangun cojo cjuandaja cjuajeya. —Cuatjin cachja cha.

³⁷ Peru Pablo ne, cuitjin cachja me cojo cha xi cuacun jan:

—Xutaxa rë ne, cavitexa me casehen niji xcun yëjë ni xuta, handasa cjëë cjuahacuenda me jyë niji, ngayin xi xuta Roma ngayin. Sehe cavinchaniji me ndavaya. ¿Há taha hma meje cuaxë niji me quihndé? ¡Cumaji xi cuatjin! Catinduva súvá me cataxë niji me. —Cuatjin cachja Pablo.

³⁸ Hane cha nísë jan ne, catsicuya cha cjua cojo xutaxa rë cuatjin. Hane xi camachaya rë xutaxa rë xi xuta Roma má me xi cuacun jan ne, catsacjun me camá.

³⁹ Ngajan xi xutaxa rë ne, quiji cachja me cojo Pablo cojo Silas xi tsijyëcacun me xi cuatjin camá. Sehe cavaxë me me, sehe cafehya rë me xi sahmi me cjuandaja ne, cuetjuxin me tsëhë nandya jan.

⁴⁰ Hane xi cavetju Pablo cojo Silas tsëhë ndavaya ne, cavuya quijitjengui me na Lidia. Hane xi cavëë me yëjë xuta ladu rë Jesús jan ne, sehe cachja me cojo xuta jan xi catjinduju me cojo ndiya rë Jesús, sehe cavetju Pablo cojo Silas quiji me.

17

Cafehe Pablo ngajan nandya Tesalónica

¹ Hya xi camá ne, Pablo cojo Silas jan ne, cavatju me nandya Anfípolis cojo nandya Apolonia, sehe cafehe me nandya Tesalónica, hiscan xi tacun ngu yungun rë xuta tjë rë Israel.

² Hane sacuatjin xi ha xcusun rë Pablo ne, ngajan quijitjengui me xuta tjë rë Israel jan nixtin xi chjahájenda rë. Hane jyan nixtin, tsëhë jyan totje ne, Pablo ne, cavicuya me xuta cjua rë Nina.

³ Casua me camachaya rë xuta xi chja cjua rë Nina xi Me xi Tsingatju Nina ne, hatuxa tjin xi cueya me sehe cuya nga me cjuahñu. Hacuaha cachja Pablo cuitjin:

—Jesús, me xi tisuá jimachaya nuju tsëhë ne, me vëhë xi catsingatju Nina. —Cuatjin cachja me.

⁴ Ngajan xi ngujo xuta xi cuacun jan ne, camacjain rë me, hane cavisehen me ladu rë Pablo cojo Silas. Hane ngajñi rë me xi cuacun camacjain rë vë ne, hacuaha jemu cjín xutaxín xi faharcun rë Nina hinchajñi me cojo hacuiin hitsë yachjin xi matitjun jan hinchajñi me.

⁵ Ngajan xi ngujo xuta tjë rë Israel xi camacjaain rë jan ne, camachini me. Hane hora xi camá casahmitangun me ne, jemu cjín xuta tsehen xi tujyë tsujyíhiya jan ne, cavetsihin casahmi me ngu suë jyë ngajñi nandya xi cjue jaha me Pablo cojo Silas. Quiji me ndava Jasón xi vanguise me me xi cuacun vë xi cuaxë me xcun xutacjín jan.

⁶ Hane xi casacuiin rë me Pablo cojo Silas ngajan ne, cajavëjne me Jasón cojo ngujo sa xuta ladu rë Jesús, quijicojo me xcun xutaxa rë, jindaya me cachja me, cavincha me jyë cuitjin: —Cha xi cuacun jemu casuaxti jingujyë ni ngasunhdë ne, hacuaha cojo nguehe cafehe cha.

⁷ Hane cha Jasón vi ne, cafahatsja cha cha xi cuacun jan ngajan ndava cha. Hane yëjë cha xi cuacun vë ne, tisahmi cha condra ley rë emperador Romano xi hmí rë César, me xi matitjun camahani, ha chja cha xi tjin sa ngu me xi matitjun xi hmí rë Jesús. —Cuatjin cavinchajyë xutacjín jan me xi cuacun jan xcun xutaxa rë.

⁸ Ngajan xi xutacjín cojo xutaxa rë jan ne, xi cahndë me cjua jan ne, jemu camacjincacun me.

⁹ Hane ha xcun xi cavechji Jasón cojo xuta xi yahnga jan tujún cojo xutaxa rë ne, sehe catsismi xutaxa rë jan me.

Cafehe Pablo cojo Silas ngajan nandya Berea

¹⁰ Ngajan xi xuta ladu rë Jesús ne, xi tu camá nguixun jan ne, catsingatju me Pablo cojo Silas ngajan nandya Berea. Hane xi cafehe me ngajan ne, quiji me yungun rë xuta tjë rë Israel.

¹¹ Hane xuta jan ne, hitsë sa tixaha cjuatacun rë me xi cuma rë xuta xi siu ngajan Tesalónica. Hane me xi cuacun jan ne, cafahatsja me cjua rë Nina cojo nguñaja xahasen rë me. Hacuaha nchunchujun ni ne, cavutaya me xujun rë Nina, cojo sa xi sacú rë me cjuaquixi tsëhë cjua xi cachja Pablo.

¹² Cuatjin camá xi jemu cjín xuta jan camacjain rë me. Ngajñi rë xuta jan ne, hacuaha hacuiin hitsë xutaxín nchina sa chjuun sa xihin me hinchajñi me jan.

¹³ Peru hya xi camachaya rë xuta tjë rë Israel ngajan Tesalónica xi cojo nandya Berea tisua Pablo jimachaya rë xuta cjua rë Nina ne, hacuaha quiji xuta xi cuacun jan casua me cjuacjintacun xutacjín xi siu jan.

¹⁴ Ngajan xi xuta ladu rë Jesús xi siu jan ne, catsingatju me Pablo hisca ndachacun. Peru Silas cojo Timoteo ne, caxinchataha ni me ngajan.

¹⁵ Hane xuta xi quijicani rë Pablo jan ne, quijicojo me me hisca nandya Atenas. Xi tu cafehe me ngajan ne, cachja Pablo cojo xuta xi quijicani rë me jan ne, catji catichja me cojo Silas cojo Timoteo ne, marcu macjain catjitjengui me Pablo. Hya xi camá ne, sehe cafe xuta xi cuacun jan.

Cafehe Pablo ngajan nandya Atenas

¹⁶ Jínguyèjè rē xi tacunya Pablo Silas cojo Timoteo ngajan Atenas ne, jemu camaxti rē xahasen rē me, tsèhè xi tivutsejen me nandya jan xi ña quítsè rē cojo nina ndyojo.

¹⁷ Vèhè xi Pablo ne, cachja me cojo xuta tjè rē Israel cojo xutaxín xi faharcun rē Nina ngajan yungun. Hane ngajan ndetsin ne, nchunchujun ni cachja sa me cojo xuta xi fehe jan.

¹⁸ Hacuaha cojo maestru xi tjengui cjuatacun xi hmí epicúreo cojo ngujo sa maestru xi tjengui cjuatacun xi hmí estóico cavisajmí me cojo Pablo. Hane ngujo me ne, cachja me cuitjin:

—Cha machjiriin xi cuajyíhi vè ne, ¡tsajin camahani mé vengui chji rē cjua xi chja cha!
—Cuatjin cachja maestru xi cuacun jan.

Ngujo nga me ne, cuitjin cachja me:

—Cha xi cuajyíhi vè ne, tisua cha jimachaya naja tsèhè nina rē jingu sa xuta.

Cuatjin cachja ngujo nga me ta, tsèhè xi Pablo ne, tisua me jimachaya rē xuta cjuandajyíhi xi chja tsèhè Jesús cojo tsèhè hacutjin cavuya me cjuahñu.

¹⁹ Ngajan xi xuta jan ne, quijicojo me Pablo ngajan Areópago, cahndè hiscan matangun me xi sahmi me junta, sehe cachja me cojo me cuitjin:

—Tinújun cojo nijí mé cjuachacun xatsè xi quichuhun ta

²⁰ jemu ha ngu xcusun cjua xi canuhyin xi canújun. Vèhè xi meje cumachaya nijí mé vijne cjua vèhè.

Cuatjin cachja xuta Atenas jan ta,

²¹ tsèhè xi yèjè xuta xi cuacun vè cojo xuta ngu nangui xi siu cahndè jan ne, hatuxa chuya rē me xi cuisñuju me ngu cjua xatsè hacuaha jemu nduju cuichja me cojo xicjin me.

²² Hya xi camá ne, sehe casecunvasen Pablo cahndè vèhè, sehe cachja me cuitjin:

—Ngayujun ngarcun ni xuta Atenas matsejen ne, vutsején jinguyjè ni ne, ngayun ne, hacuaha jemu chjuhuncun nina nuju.

²³ Ta jinguyèjè rē xi catsujyèhèya ngajñi nandya nuju hacuaha tivutsején yèjè cahndè hiscan chjuhuncun nina nuju ne, cavécutaha ngu yungun lihndi hiscan xi camahindu ngujo cjua xi chja cuitjin: “Tsèhè ngu nina xi hyaan me.” Cuatjin camahindu. Vèhè xi nina xi chjuhuncun xi hisca hyuun ne, me vèhè xi nduva tisua jimachaya nuju tsèhè me.

²⁴ Nina xi casahmi ngasunhdè cojo yèjè xi tjin xcun, me xi nai rē ngahnga cojo nangui ne, hacuiin véñacahndè me yungun xi sahmi xuta.

²⁵ Hacuaha me vèhè ne, tsajin mé xi ma chaja rē me xi ngayaan xuta cuma tahan rē me ta, me vèhè xi sua naja me cjuahñu, sua me xta naja, hacuaha sua naja me yèjè ni xi mameje naja.

²⁶ Hane tjè rē xi ngu ni xuta ne, casahmi Nina yèjè xcusun xuta, xi cuiyuju me jinguyjè ni ngasunhdè. Hacuaha Nina cachja me janihya xi cumatitjun jimangu xcusun xuta hacuaha jani hiscan xi cuiyuju me.

²⁷ Cuatjin casahmi Nina cojo sa xi ngayaan xuta ne, cuinchaseen me, hane xi cuatjin cuinchaseen me ne, hyaan sa xi sacú naja me, handasa hacuiin cjin tacun Nina xi cuma naja xingu xingu ngayaan.

²⁸ Sacuatjin chja ngu cjua xi chja cuitjin: “Nina ne, sua naja me cjuahñu, sahmi me xi ma finiya ngayaan, hacuaha sua naja me xi nechan cojo cjuahñu naja.” Cuatjin chja cjua. Hacuaha yahnga xuta tsèhè ngajñi nuju xi tsihindu me cjua xi jemu ndaja fi ne, cuitjin catsihindu me: “Ngayaan ne, tjè rē Nina ngayaan.” Cuatjin catsihindu me.

²⁹ Quihndè ta quihndi rē nina ngayaan ne, mijí rē xi cuma tacuun xi Nina ne, tangun me cojo nina oro o sa xi nina quicha tyava, o sa xi nina ndyojo, xi xuta casahmi me cojo cjuatacun rē suvá me.

³⁰ Nina ne, catsingatjuhnga me nixtin xi xuta ne, hvín me. Peru quihndè ne, Nina ne, tivitexa me xi yèjè ni xuta tsèhè jinguyjè ni ladu ne, tsindeya me cjuatacun rē me ta,

³¹ tsèhè xi Nina ne, ha cavejña me ngu nixtin xi tsihuva me xuta tsèhè ngasunhdè cojo cjuaquixi tu cutjin jyè rē ne, cuatjin sahmi me cojo. Hacuaha ha cavaxijin me ngu xuta xi sahmi xa vèhè. Hacuaha ha hyan xi cjuaquixi xi cuatjin cuma, tsèhè xi Nina catsicuya me cjuahñu xuta vèhè. —Cuatjin cachja Pablo.

³² Hane hya xi cahndè xuta jan cjua xi ngu nima ne, cavuya cjuahñu ne, ngujo me ne, catsixcuehyu me cjua jan, peru ngujo nga me ne, cuitjin cachja me:

—Cuisñiji xi cuinújun nga ngundiya cjua vèhè. —Cuatjin cachja ngujo me jan.

³³ Ngajan xi Pablo ne, cavetju me tsèhè ngajñi rē xuta jan.

³⁴ Hane ngujo xuta ne, cavisehen me ladu rē Pablo sehe camacjain rē me cjua jan. Hane ngajñi rē me xi cuacun vè ne, jiyajñi me xi hmí rē Dionisio, ngu xutaxa rē tsèhè nandya, hacuaha cojo sa ngu chjuun xi hmí rē Dámaris jiyajñi me jan, cojo ngujo sa me.

18

Cafehe Pablo ngajan nandya Corinto

¹Hya xi camá ne, hya xi cavatju xcusun vèhè ne, cavetju Pablo tsèhè nandya Atenas, hane quiji me nandya Corinto.

²Hane xi cafehe Pablo ngajan ne, cavechútaha me ngu xihin tjè rè Israel xi hmí rè Aquila. Aquila jan ne, tsèhè distritu Ponto má me, peru hacuaha sehe cafehe me Corinto cojo chjuun rè me xi hmí rè Priscila, xi quiji caviyujucahdè me ngajan nación Italia. Cavetjuxin me tsèhè Italia ta, tsèhè xi me xi matitjun jan, me xi hmí rè Claudio ne, cavitexa me xi yèjè ni xuta tjè rè Israel ne, hatuxa cuetjuxin me tsèhè nandya Roma. Hane Pablo ne, quijitjengui me Aquila.

³Hane tsèhè xi ha ngu xcusun ni xa xi sahmi catsijo ni me ne, cavejñatangun me cojo me xi cuacun vè, hacuaha tangun casahmi me xa. Xa xi sahmi me ne, xi tsindaja me ndihya tsjian.

⁴Ngajan xi Pablo ne, cachja me cjua rè Nina ngajan yungun rè xuta tjè rè Israel jima ngu nixtin xi chjahájenda rè ta, tsèhè xi meje rè me xi sa xuta tjè rè Israel o sa xi xutaxín ne, cumacjain rè me cjua vèhè.

⁵Hane xi cafehe Silas cojo Timoteo xi cavetju me tsèhè distritu Macedonia ne, Pablo ne, cavetsihin xi nchunchujun ni tichja me cojo xuta cjua rè Nina, tichja me cojo xuta tjè rè Israel xi Jesús ne, me vèhè xi catsingatju Nina.

⁶Peru hya xi casahmi xuta xi cuacun jan condra Pablo hacuaha choho cachja me tsèhè me ne, cavitsune Pablo chojo rè tsjian rè me sacuaha xi tivaxè me xuta xi mijí cuihndè cjua rè Nina, sehe cachja me cojo xuta jan cuitjin:

—Ngayun suvun cún nuju tsèhè xcusun xi cuátju cuma. Hacuiin ngahan cún ná. Quihndè cojo nixtin xi cjuí sa ne, cjué cuichjá cojo xutaxín cjua rè Nina. —Cuatjin cachja me.

⁷Hane xi cavetjuxín me tsèhè xuta xi cuacun vè ne, quiji me ndava ngu me xi hmí rè Ticio Justo, ngu xutaxín xi hacuaha faharcun me Nina. Ndava me vèhè ne, ngu ndaya ni rè yungun rè xuta tjè rè Israel jan tacun.

⁸Hane Crispo, me xi xutaxa rè yungun jan ne, camangucacun me cojo Nai naja Jesucristu, hacuaha cojo yèjè sa me xi siu ndava me camangucacun me. Hacuaha jemu cjin xuta Corinto ne, xi cahndè me cjua ndajyihí rè Nina jan ne, camacjain rè me sehe caxtenda me.

—Hane ngu ngxusun jan ne, ngajñi nijña rè Pablo ne, cachja Nai naja cojo rè me cuitjin:

—Xicarcuuin. Tinoje sa. Xicanisejyiin cjua xi noje.

¹⁰Cuatjin nihñi ta, tsèhè xi ngahan ne, tejña cojo ri, hane tsajin yo xi cuma choho sahmi cojo ri ta ngahan ne, jemu tjín ná xuta ladu naha nguehe nandya vihi. —Cuatjin cachja Nai naja.

¹¹Hane cavéjña Pablo ngajan ngu nu vasen, xi vicuya rè me xuta cjua rè Nina.

¹²Peru hya xi Galión matitjun me tsèhè distritu Acaya ne, camatangun xuta tjè rè Israel jan ne, cafaha me Pablo, quijicani me xcun xutaxa rè,

¹³cuitjin cachja me:

—Cha xi cuijyihí vi ne, tsujyihya cha tichja cha cojo xuta xi hacjahi xcusun meje rè xi nihña xi chjahanrcun Nina. Peru xcusun vèhè ne, condra tsèhè ley naja. —Cuatjin cachja xuta jan.

¹⁴Hane ha tu hora sa xi cuichja Pablo ne, cachja Galión cojo xuta xi cuacun jan cuitjin:

—Ngayun xuta tjè rè Israel, sa xi ngu cjuatsehen o sa xi ngu jyé jyé xi casahmi cha ne, tjín ná chuva rè xi scaa ná cojo nuju.

¹⁵Peru xi tsèhè ngu cjuachacun cojo tsèhè ñihi rè ngu xuta cojo tsèhè ley nuju suvun ne, ndyá chutsujun suvun hacutjin cuma chihin ta, tsèhè xi ngahan ne, hatuxa sahmeucendaan cjuacjintacun xi cuacun vè. —Cuatjin cachja Galión.

¹⁶Ngajan xi Galión ne, catsicanga cojo me xuta tjè rè Israel jan tsèhè ndihyavasen.

¹⁷Ngajan xi yèjè xuta jan ne, cafaha me Sóstenes, me xi matitjun tsèhè yungun rè xuta tjè rè Israel, cavaja rè me ngajan ndatsen ndihyavasen. Peru Galión ne, casahmicuendaan camahani me yèjè ni cjuacjintacun vèhè.

Cavuya nga Pablo nandya Antioquia

¹⁸Peru hya xi ha jemu cavatju nixtin xi quitaha Pablo ngajan Corinto ne, catsinguijnetaha me cjua cojo xuta ladu rè Jesús, sehe cafaha me ngu barcu xi cjue me ngajan distritu Siria. Priscila cojo Aquila ne, hacuaha cojo me quiji me cojo Pablo. Hane xi cafehe me nandya Cencrea ne, ngajan casejnu rè rcu Pablo ta, tsèhè xi casahmichihin me ngu cjua cojo Nina.

¹⁹Hane xi cavatju vèhè ne, sehe quiji me nandya Efeso. Hane Pablo ne, ngajan caviyujutaha me Priscila cojo Aquila. Hya xi camá ne, Pablo ne, quiji me yungun, cachja me cojo xuta tjè rè Israel jan cjua rè Nina.

²⁰ Hane xi cafehya xuta me xi setaha sa me ngujo nixtin ngajan ne, catsingatiin me.

²¹ Hya xi camá ne, catsinguijnetaha me cjua cojo xuta jan, cuitjin cachja me:
—Sa xi Nina meje rë me ne, cúya nga, nduvatjënguë nuju. —Cuatjin cachja me.
Ngajan xi cafaha me ngu barcu xi cavetju me tséhë Efeso.

Quiji nga Pablo cavusehenhya me xuta rë yungun

²² Hane xi cafehe me Cesarea ne, ngajan cavetju me quiji me Jerusalén xi sua me ngu nina xuta rë yungun ngajan. Hya xi camá ne, sehe cavuya cafehe me nandya Antioquia.

²³ Hane xi ha casetaha me ngujo nixtin jan ne, sehe cavetju nga me quiji me yëjë ni nandya tséhë distritu Galacia cojo distritu Frigia, casua rë me ngahñu yëjë ni xuta ladu rë Jesús.

Quiji Apolos nandya Efeso cojo nandya Corinto

²⁴ Ngajan nandya Efeso ne, cafehe ngu xuta tjë rë Israel xi hmí rë Apolos. Nangui rë me ne, Alejandria. Jemu ndaja tsichihin me cjua xi chja me, hacuaha jemu vëë me tséhë cjua rë xujun rë Nina.

²⁵ Me vëhë ne, tjin yo xi casuacuenda rë me tséhë ndiya rë Nai naja. Cojo nguñaja xahasen rë me ne, chichihin ni casua me camachaya rë xuta cjuandajyihí xi chja tséhë Jesús. Peru hvíin me mé vijne xi xtenda xuta sacuatjin tixtenda xuta ladu rë Jesús ta xi vëë me ne, suvá ni mé vijne xi xtenda xuta sacuatjin cavitenda Juan Vitenda rë Xuta.

²⁶ Apolos vë ne, hacuini cojo chircun rë me cuetsihin cuichja me cojo xuta cjua rë Nina ngajan yungun rë xuta tjë rë Israel. Hane xi cahndë Priscila cojo Aquila sacuatjin cachja Apolos ne, cavaxëxin me ne, sehe casuacuenda ndaja sa me tséhë ndiya rë Nina.

²⁷ Hya xi camá ne, catsingatahacacun Apolos xi cjue me ngajan distritu Acaya. Hane xuta ladu rë Jesús jan ne, cachuya rë me hacuaha catsihindu me ngu xujun tséhë xuta ladu rë Jesús ngajan, cachja me cojo xuta jan xi ndaja cjuahatsja me Apolos. Hane xi cafehe me jan ne, jemu cavisecoo me xuta xi cojo cjuandaja rë Nina ne, ha camangucacun me cojo Jesús.

²⁸ Hane xcun ni yëjë xuta ne, jercu catsitjungui me cjua rë xuta tjë rë Israel. Jemu cjin cahndë tséhë xujun rë Nina xi cachja me cojo xuta, xi tsingacun me xuta xi Jesús ne, me vëhë xi catsingatju Nina me.

19

Cafehe Pablo nandya Efeso

¹ Cuitjin camá jinguyëjë rë xi quitahá cuaha Apolos ngajan Corinto. Xi cavatju catsujyihiya Pablo taha ladu ngatihin ne, cafehe me nandya Efeso, hane ngajan cavechútaha me ngujo xuta ladu rë Jesús.

² Hane cuitjin cachja me cojo xuta jan:

—¿Há cavisehen Hasen rë Nina cahntsua xahasen nuju hya xi camangutacún cojo Jesús?
—Cuatjin cachja me.

Hane xuta jan ne, cuitjin cafayangui me:

—Hisca camachayiin niji cjua xi tjin xi hmí rë Hasen rë Nina. —Cuatjin cafayangui me.

³ Ngajan xi Pablo ne, cuitjin cachja nga me:

—¿Hacutjin caxtenda ngayun ni? —Cuatjin cachja me.

Hane xuta jan ne, cuitjin cafayangui me:

—Caxtenda ngayin sacuatjin cavitenda nima Juan. —Cuatjin cafayangui me.

⁴ Ngajan xi Pablo ne, cuitjin cachja nga me:

—Juan vë ne, cavitenda me xuta hya xi xuta jan ne, catsindeya me cjuatacun rë me, hacuaha cachja me cojo xuta jan xi catamangucacun me cojo me xi sehe cjeuhe, me xi hacui Jesús. —Cuatjin cachja nga Pablo.

⁵ Xi cahndë xuta jan cjua vëhë ne, caxtenda me xi cumatangun cjuatacun rë me cojo Nai naja Jesús.

⁶ Hane xi cavisanetsja Pablo xuta jan ne, canduva Hasen rë Nina, cavisehen cahntsua xahasen rë xuta, hane cachja me hne xi hisca hvíin me, hacuaha cachja me cjua xi casua Nina me.

⁷ Hane má sacuaha tejó xihin me xi yëjë me.

⁸ Hya xi camá ne, quiji Pablo yungun rë xuta tjë rë Israel, cachja me cojo xuta. Hane cahntsua jyan sá ne, cuatjin fi me yungun, hane hacuini cojo chircun rë me chja me cojo xuta tséhë gobiernu xi sahmi Nina.

⁹ Peru ngujo xuta jan ne, casahmitaja rcu me, hane camacjain rë me, hane choho cachja me tséhë ndiya rë Jesús xcun yëjë ni xuta. Vëhë xi Pablo ne, cavetjuxin me tséhë xuta jan, hacuaha quijicojo me xuta ladu rë Jesús. Cavetsihin me nchunchujun ni cachja me cojo xuta ngajan scuela rë ngu me xi hmí rë Tirano.

¹⁰ Cuatjin casahmi me cahntsua jo nu, vèhë xi yějë xuta xi siu ngajan Asia ne, camachaya rè me tsèhë cjaa rè Nai naja, sa xuta tjè rè Israel ne, o sa xutaxín.

Yatu quihndi rè Sceva

¹¹ Jemu jyë cjuarcun casahmi Nina ngajñi rè xa xi casahmi Pablo.

¹² Hisca tsjian xi sahmixa cojo Pablo ne, quijicojo xuta casua rè me xuta hmu rè, hane chihin rè me ne, cavetjuxin, hisca xitsehen xi híncha xahasen rè yahnga me ne, hacuaha cavetjuxin.

¹³ Peru ngujo cha tjè rè Israel xi tsujyihya vaxëxin cha xitsehen xi híncha xahasen rè xuta ne, hacuaha camameje cueyanangui cha ñihi rè Nai naja Jesús hora xi tivaxëxin cha xitsehen, hane cuitjin cachja cha:

—Tsèhë xi Jesús casuaxa ná me, me xi chja Pablo tsèhë ne, tivitéxa nuju xi cuetjuxun. —Cuatjin cachja cha.

¹⁴ Cha xi cuatjin sahmi vè ne, hacui yatu cha quihndi rè ngu nahmi xi hmí rè Sceva, ngu nahmi xi matitjun tsèhë xuta tjè rè Israel.

¹⁵ Hane ngu ndiya xi cuatjin cachja cha ne, cuitjin cafayangui xitsehen jan:

—Jesús ne, hvè me vèhë. Hacuaha hvè Pablo. Peru ngayun ne, ¿yo ngayun? —Cuatjin cafayangui xitsehen jan.

¹⁶ Hya xi camá ne, me xi híncha xitsehen xahasen rè jan ne, cacaataha me cha, hane cacaà rè me catsinguijne me yějë yatu cha, tsèhë xi jemu hñu ngahñu rè me. Cuatjin camá xi jemu casacuhmu rè cha xi cuacun jan, hane cavanga cha tu quixiti ni tsèhë ndihya hiscan siu cha jan.

¹⁷ Xcusun xi camá vè ne, camachaya rè yějë xuta nandya Efeso, sa xuta tjè rè Israel ne, o sa xutaxín. Hane ngayëjë ni me ne, jemu catsacjun me camá, hane camá jyë camá hnga Nai naja Jesús.

¹⁸ Hane jemu cjín xuta xi ha cavisehen me ladu rè Jesús ne, fitjengui me Pablo vijacun me tsèhë cjuasurqui xi sahmi me.

¹⁹ Hya xi camá ne, jemu cjín xuta xi sahmi cjuasurqui ne, quijicojo me xujun rè me jan, cavaca me ngajan xcun yějë ni xuta. Hane xi casahmi me cuenta chji rè yějë xujun rè me jan ne, jemu jyë camahani tujún cavetju chji rè.

²⁰ Cuatjin camá xi cjaa rè Nai naja ne, jercu cavitsojo sa hacuaha casacuhñu sa rè.

Suë jyë xi camá ngajan Efeso

²¹ Hane xi cavatju camá yějë xcusun vèhë ne, cavejñacacun Pablo xi cjue me Jerusalén, cuatju me yějë nandya tsèhë distritu Macedonia cojo yějë nandya tsèhë distritu Acaya. Hacuaha cachja me cuitjin:

—Xi cuatju cjuë Jerusalén ne, hacuaha tjín ná xi cjuë hisca nandya Roma. —Cuatjin cachja me.

²² Ngajan xi catsingatju me jo xuta xi visecoo rè me jan, Timoteo cojo Erasto, ngajan distritu Macedonia. Peru me vèhë ne, casetaha sa me ngajan distritu Asia.

²³ Ngu nixtin xi quitahá me jan ne, cavechú ngu cjuandya jyë tsèhë ndiya rè Jesús.

²⁴ Ngu xihin xi hmí rè Demetrio ne, sahmi me yungun langa cojo suvá quicha tyava, xcusun rè yungun rè nina Diana. Hane xuta xi sahmi xa rè Demetrio ne, jemu casacu rè me tujún tsèhë xa vèhë.

²⁵ Ngajan xi Demetrio ne, casahmi tangun me yějë xuta xi sahmi xa rè me cojo jingu sa xuta xi sahmi me xa vèhë ni ne, sehe cachja me cuitjin:

—Ngayujun ni ne, ha hyun ta tsèhë xa vihi ne, sacu naja yějë tujún xi tjín naja.

²⁶ Ngayun ne, chutsujun hacuaha machaya nuju cjaa xi hacuiin suvá ni nguehe ta cojo jingujyë ni distritu Asia ne, tsujyihya cha Pablo vè, sahmi cha xi vijñecacun xuta cjín hacuaha tsismicacun me nina naja ta, tsèhë xi chja cha xi nina xi nindajan cojo ntsan ne, hacuiin nina jain me.

²⁷ Jemu tsavi ta hacuiin suvá ni xa naja chajá ta cojo yungun rè nina naja Diana ne, cuechú hora xi cuenguin chji rè, hacuaha hisca suvá nina naja ne, chajá me xi jyë hnga me cojo cjuatacun rè me ta me vèhë ne, yějë ni xuta tsèhë jingujyë ni distritu Asia cojo xuta tsèhë jingujyë ni ngasunhndë ne, jemu faharcun rè me. —Cuatjin cachja me.

²⁸ Xi cahndë xuta cjaa jan ne, jemu camacjan camahani rè me, sehe cajindaya me cachja me cuitjin:

—Jemu jyë hnga nina Diana naja. —Cuatjin cajindaya me cachja me.

²⁹ Jingujyë ni ngajñi nandya ne, jemu jyë suë cavejña. Ngajan xi xuta jan ne, vanga me cjui cuma tangun me ngajan ndatsen ndihyavasen, taha tijuvèhya me Gayo cojo Aristarco, jo me tsèhë distritu Macedonia, me xi visecoo rè Pablo.

³⁰ Ngajan xi Pablo ne, meje cuisehenjñi me ngajñi rè xuta cjín jan, peru xuta ladu rè Jesús ne, casuaan me cahndë.

³¹ Hacuaha ngujo xutaxa rë xi vinga rë Pablo ne, catsingatju me cjuat tsêhë Pablo xi cjuini me ngajan ndatsen ndihyavasen.

³² Ngujo xutacjín jan ne, jindaya me chja me cuitjin, ngujo nga me ne, jindaya me chja me cuatjin ta, tsêhë xi yêjê ni xuta ne, jemu camasuê rë cjuatacun rë me. Jercu cjín me xi hisca hvín me mé má cuatjin quiji camatangun me jan.

³³ Peru ngujo xutacjín jan ne, casuacuenda me Alejandru mé tsêhë xi cuatjin tijima, hya xi catsivaha xuta tjê rë Israel me xi secun me xcun. Ngajan xi Alejandru ne, casahmi tsja me cojo xutacjín jan xi sejyu me cojo sa xi cuma cuichja Alejandru ngatsë rë xuta tjê rë Israel.

³⁴ Peru xi cavêê xutacjín jan xi Alejandru ne, xuta tjê rë Israel má me ne, ngu tangun ni cajindaya me, vatju sa jo hora cachja me cuitjin:

—Jemu jyê hnga nina Diana naja! —Cuatjin cajindaya me cachja me.

³⁵ Hya xi camá ne, xi camá catsinguejyu secretariu xutacjín jan ne, sehe cachja me cuitjin:

—Ngayujun ngarcun ni ngayun xuta nandya matsejen ne, ha hyun ta tsajin hisca ngu xuta xi hvín me xi nguehe Efeso tacun yungun rë nina Diana hacuaha nguehe tacun suvá nina xi cjanengui nguehe xi canduva ngahnga.

³⁶ Tsêhë xi tsajin yo xi cuma cuichja xi hacuini cuatjin ne, vêhë xi meje rë xi catisejyu ni ngayun, tsajin mé xi nihñu sa xi cjêê ningatuhuntacúnndujun.

³⁷ Cha xi cuicun canduvuncujun nguehe ne, tsajin mé xi choho casahmi cha cojo yungun naja, hacuaha tsajin mé xi choho chja cha tsêhë nina naja.

³⁸ Peru sa xi Demetrio cojo xuta xi sahmi xa rë me tjín yo xi sahmi si me cojo ne, tacun ndihyavasen, hacuaha tjín xutaxa rë. Ngajan catinchajyê xicjin me, jima ngu me.

³⁹ Hane sa xi tjín sa mé xi meje nuju ne, nixtin xi satê rë junta xi sehe cuma ne, hya cuma chihin.

⁴⁰ Sacuaha xcusun xi tijima vi ne, cuma tsingatahacacun me xi matitjun xi ngayaan ne, tiniña ngu si jyê condra tsêhë gobiernu. Ta sa xi cjuinenguisse naja me mé má cuatjin canihña ne, sacuini naja chuva rë hacutjin cuinújan mé má cuitjin tiniña ngu suê jyê vi.

⁴¹ Cuatjin cachja secretariu, sehe catsinguijnetaha me cjuat cojo xutacjín ne, sehe cafe xingu xingu me.

20

Quiji Pablo distritu Macedonia cojo distritu Acaya

¹ Hya xi camá ne, xi cavatju suê jyê jan ne, cajindaya Pablo xuta ladu rë Jesús, casua rë me cjuetacun. Sehe catsinguijnetaha me cjuat, sehe cavetju quiji me distritu Macedonia.

² Hane jima ngu nandya xi cavatju me xi cafehe me Macedonia ne, hacuaha jercu cachja me cojo xuta ladu rë Jesús hacuaha casua rë me cjuetacun. Hane xi cavatju me yêjê nandya vêhë ne, cafehe me distritu Acaya.

³ Hane ngajan casetaha me jyan sá. Hane hya xi ha cjuaha me barcu xi cjue me distritu Siria ne, casacu camachaya rë me xi xuta tjê rë Israel ne, caviyuju me xi tsiquehen rë me. Vêhë xi catsingatahacacun me xi hitsë sa ndatjin cuya cjue ntsacu me xi táha ladu tsêhë Macedonia.

⁴ Hane cojo me xi cuicun vihi quiji me cojo rë me: Sópater, ngu xuta Barea xi quihndi rë Pirro; cojo Aristarco cojo Segundo, jo xuta Tesalónica; cojo Gayo, ngu xuta Derbe; cojo Timoteo; cojo Tíquico cojo Trófimo, jo xuta tsêhë distritu Asia.

⁵ Me xi cuacun vë ne, camatitjun me quiji me, hane ngajan caviyujuya niji me nandya Troas.

⁶ Peru ngayin ne, xi cavatju suhi tsêhë pan xi tsajin san rë ne, sehe cachjihin barcu xi cavetjin tsêhë Filipos, hane xi café hñú nixtin ne, sehe cavechintihin me ngajan Troas. Hane ngajan cavinechintihin yatu nixtin.

Quitahá Pablo ngajan nandya Troas

⁷ Ngajan xi nixtin ngu tsêhë totje ne, camatangun ngayin xi xinitanguin niñu ngayijin ni. Hane Pablo ne, cachja me cojo xuta. Hane tsêhë xi cuetju me cjue me xi cuma nchujun jan ne, quijinduju cachja me hisca cavechú vasen nixten.

⁸ Jemu cjín ndihi seti ngajan ndihya ngahnga hiscan camatangun ngayin.

⁹ Hane ngu cha xi hmí rë Eútico ne, tacun cha xcun ventana. Hane xi quijinduju sa cachja Pablo ne, jemu camaniñá rë cha. Hane tsêhë xi cacaain rë cha niñá ne, cafañafé tjain camahani cha, hane cjanengui cha hisca xi má jyan pisu ndihya jan. Hane xi quiji catjunihnga rë cha ne, ha cahme cha.

¹⁰ Hane xi quijijne Pablo hiscan jiña nima ne, catsiquindi me yojo rë me sehe catsuvacja me nima. Hacuaha cachja me cuitjin:

—Xicamacjiin tacún ta, quicun cha vi. —Cuatjin cachja Pablo.

¹¹ Ngajan xi Pablo ne, cavuya quijiniji me, sehe cajinē me niñu. Sehe cavisiajmi camaha sa me hisca xi casahsen, sehe cavetju me quiji me.

¹² Hacuaha quicun cha xi cjanengui jan, cafecojo xuta cha. Hane jercu casacu rē me cjuetacun xi quicun cha.

Quiji Pablo nandya Mileto

¹³ Ngayin ne, camatitjun ngayin catsanguin cavisihin barcu, hane sehe catsanguin nandya Aso, cojo sa xi chjihinntsins Pablo cahntsua barcu ngajan ta, tsēhē xi ha cuatjin camachihin cjuata, tsēhē xi me vēhē ne, meje cjue ntsacu me.

¹⁴ Hane xi casacu xinguin cojo rē me ngajan Aso ne, cavisehen me barcu, sehe catsanguin tangun Mitilene.

¹⁵ Hane xi cavetjin ngajan ne, xi camá nchujun ne, cavatjin quixi rē Quío. Hane xi camá nchujun nga ne, caphin Samos. Hane camá nchujun nga ne, caphin nandya Mileto,

¹⁶ tsēhē xi Pablo ne, cavejñacacun me xi cuátjincjin tsēhē nandya Efeso, cojo sa xi hacuuin cuma tafi me ngajan distritu Asia, tsēhē xi me vēhē ne, jemu meje xati rē me cojo sa xi xati cuechú me ngajan Jerusalén, hane ngajan tsingatju me suhi Pentecostés.

Catsinguijnetaha Pablo cjuata xuta changá rē yungun Efeso

¹⁷ Hane jinguyējē rē xi quitahá Pablo ngajan Mileto ne, catsingatju me quiji chjahá rē xuta changá rē yungun ngajan Efeso.

¹⁸ Hane xi cafehe xuta changá jan xcun Pablo ne, cuitjin cachja Pablo cojo rē me:

—Ngayun ne, ha hyunndujun hacutjin cavitejñataha cojo nuju yējē ni nixtin hisca hya xi sehe tu cafēhē nguehe distritu Asia.

¹⁹ Ha hyun hacutjin casahme xa rē Nai naja: catsinguijne yojo naha, hisca cajihnda, hacuaha jemu cjin cjuañihi cavátju camá ta, tsēhē xi xuta tjē rē Israel ne, jemu choho meje sahmi me cojo ná.

²⁰ Ngayun ne, ha hyun hacutjin xi cachjá yējē cojo nuju yējē cjuata xi ndaja xi cuma nuju. Hacuaha ha hyun hacutjin casuá camachaya nuju cjuachacun hya xi camatangun ngayun ngayujun ni, hacuaha cējē ndya nuju jima ngu ngayun, cachjá cojo nuju.

²¹ Cachjá cojo xuta tjē rē Israel hacuaha cachjá cojo xutaxín xi meje rē xi tsindeya me cjuatacun rē me hacuaha cuisehen me ladu rē Nina hacuaha meje rē xi cumangucacun me cojo Nai naja Jesús.

²² Quihndē ne, ngahan ne, tifē Jerusalén sacuatjin cavitexa ná Hasen rē Nina. Hveen mé xi cuátju cuma jan.

²³ Peru Hasen rē Nina ne, yējē ni nandya xi vátju ne, chja cojo ná xi hatuxa cjuē ndavaya hacuaha jemu cuátju cjuañihi.

²⁴ Xi má ná ne, tangun ni xi tejña cjuañhu o sa xi cueya. Xi meje ná ne, xi tsinguijnetaha xa xi casua ná Nai naja Jesús, xa xi suá cumachaya rē xuta cjuandajyihni xi chja tsēhē cjuandaja rē Nina.

²⁵ Quihndē ne, ha hvē ta ha quihndē cuyuun chun ná, ngayujun ni xi casuá camachaya nuju tsēhē gubiernu ni sahmi Nina.

²⁶ Vēhē xi nguehe cuichjá cojo nuju ta, sa xi tjin ngu ngayun xi cuechuun xcun Nina ne, hacuuin ngahan quitjen jyē ta,

²⁷ tsēhē xi ngahan ne, casuácuenda chichihin nuju yējē hacutjin xi cavejña Nina cjuatacun rē me.

²⁸ Nechun cuidadadu, hacuaha nihñucuidadun yējē xuta ladu rē Jesús, xi suvá Hasen rē Nina casuaxa nuju xi cuma titjun ngayun tsēhē sacuaha obispos, cojo sa xi ngayun nihñu cuidadadu xuta rē yungun rē Nina. Me xi cuacun vē ne, casacu rē Nina me cojo jni rē Quihndi rē suvá me hya xi cahme me.

²⁹ Hya xi ha cavatju cavetjuxen tsujun ne, ngahan hvē ta cuinduva xuta, xi meje tsinguetsun me cjuatacun rē yējē xuta ladu rē Jesús, sacuatjin tsiquehen chu lobo cjan rē chu tsánga.

³⁰ Hacuaha ngajñi nuju suvun ne, cuetjujñi xuta xi cuichja me cjuandacha, cojo sa xi cuaxēxin me xuta ladu rē Jesús xi cuma ladu rē me.

³¹ Nechun cuidadadu. Hacuaha ninguitsjun ta, cahntsua jyan nu ne, nguixun nguitajñu cavicyá nuju jima ngu ngayun. Jiya hora ne, hisca cajihnda.

³² Quihndē ne, nguehe cuiyujú nuju tsja Nai naja, cojo sa xi sahmi nuju me cuidadadu cojo cjuandaja rē me. Me vēhē xi ma sahmi me xi cuma yehe sa cjuatacun nuju, hacuaha sua tangun nuju me cjuañhu xatsē cojo yējē sa xuta xi cavaxijin me.

³³ Ngahan ne, hacuuin catsihmucacun tujún o sa tsjan rē jingu sa xuta.

³⁴ Ngayun ne, hyun ta ngahan ne, casahmexa cojo ntsa ví xi casacu cjuachaja naha cojo me xi cavisecoo ná.

³⁵ Ngajñi rë yějë ni xcusun xi casahme ne, ngahan ne, catsingácun nuju xi, xi cuatjin hñu nihña xa ne, meje rë xi cuisecoon rë xuta xi jemu tjin rë cjuachaja. Hacuaha meje rë xi ninguitsjen cjua rë Nai naja Jesús, hya xi cachja me cuitjin: “Hitsë sa sua má naja xi tahan, xi cuma rë xi chjahanntsán.” Cuatjin cachja Nai naja.

³⁶ Hane xi café cachja Pablo cuatjin ne, sehe cavixcuhnchi me, casahmi me oración cojo yějë xuta jan.

³⁷ Yějë ni me jemu cajihnda me, quiji me catsuvacja me Pablo, hisca cavitatsuha me.

³⁸ Cjua xi hitsë sa casua rë me cjuachoho ne, cjua xi cachja Pablo xi ha quihndë cuyaain scuëë xuta jan me. Sehe quiji me cojo Pablo hiscan cavisehen Pablo barcu.

21

Quiji Pablo ngajan Jerusalén

¹ Hya xi camá ne, xi cavejñi xuta jan ne, sehe ngu quixi ni quiji barcu cojo niji ne, caphin Cos. Hane xi camá nchujun jan ne, caphin Rodas. Hane xi cavetjin ngajan ne, caphin Pátara.

² Hane xi casacu niji ngu barcu xi cjue distritu Fenicia ne, cavisihin sehe catsanguin.

³ Hane xi cachutsijin Chipre ne, cavatjin taha ladu quixi tséhë jan, catsanguin nduju xi caphin quixi rë distritu Siria, sehe caphin nandya Tiro ta, tséhë xi ngajan cuitujne chaha xi hincha cahntsua barcu.

⁴ Hane xi casacu xinguin cojo xuta ladu rë Jesús jan ne, cavinechintihin ngajan yatu nixtin. Hane ngujo profeta xi siu ngajan Tiro ne, tjin mé cachja Hasen rë Nina cojo rë me, sehe cachja profeta jan cojo Pablo xi cjuuin me Jerusalén.

⁵ Xi cavechú nixtin xi cuetjin jan ne, sehe cavetjin catsanguin. Hane yějë xuta jan, cojo chjuun rë me cojo quihndi rë me ne, quiji cani niji me hisca tjeheh ndachacun, hiscan fë nandya. Sehe ngajan cavixcuhnchin, sehe canihñi oración.

⁶ Hane xi caningujnitihin cjua cojo rë me ne, sehe cavisihin barcu, hane me vëhë ne, cavuya cafe me ndava me xingu xingu me.

⁷ Hane ngayin ne, catsanguin cojo barcu xi cavétjin tséhë Tiro, hane caphin Tolemaida. Hane xi catsanguin catihin rë xuta ladu rë Jesús nina ne, ngajan cavinechin cojo rë me ngu nixtin.

⁸ Hane xi camá nchujun jan ne, cavetjin catsanguin, hane caphin Cesarea. Sehe catsanguin ndava Felipe, me xi sua machaya rë xuta cjuandajyihí xi chja tséhë Jesús. Me vëhë ne, ngu me tséhë me xi ma yatu xi cavaxiji me xi visecoo rë apóstol. Hane ngajan cavinechin cojo rë me.

⁹ Me vëhë ne, tjin rë me ñuju na nixti quihndi rë me, xi má na profeta.

¹⁰ Hane jinguyëjë rë xi nechintihin ngajan ngujo nixtin ne, cafehe ngu profeta xi canduva tséhë Judea, ngu me xi hmí rë Agabo.

¹¹ Hane xi cafehetjengui niji me ne, quiji me cafaha me cinturón rë Pablo, sehe catsihñu me tsja me cojo ntsacu me cinturón jan, sehe cachja me cuitjin:

—Cuitjin chja Hasen rë Nina: “Xihin xi tséhë cinturón vi ne, cuitjin tsihñu xuta tjë rë Israel me ngajan Jerusalén, hacuaha sahmi me entregadu xihin vëhë tsja xutaxín.” —Cuatjin cachja profeta jan cjua rë Nina.

¹² Xi canuhyin cjua vëhë ne, ngayin cojo xuta xi siu jan ne, canújin cojo Pablo xi cjuuin me Jerusalén.

¹³ Ngajan xi Pablo ne, cuitjin cafayangui me:

—¿Mé má cuatjin chjihndun? ¿Mé má cuatjin nihñuchuvun cjuatacun naha? Ngahan ne, ha tjin chjine ngahan, hacuain suvá ni xi cjuë ndavaya ta hacuaha hisca cueya ngajan Jerusalén ngatsë rë xi ladu rë Nai naja Jesús ngahan. —Cuatjin cafayangui Pablo tsijin.

¹⁴ Hane xi catsingatiin me cjua xi canújin ne, ha quihndë canujiin sa cjua vëhë ta cuitjin canújin:

—Catama sacuatjin Nai naja meje rë me. —Cuatjin canújin.

¹⁵ Xi cavatju nixtin xi cuacun vë ne, sehe cavihinchjini tsijin, sehe catsanguin Jerusalén.

¹⁶ Hacuaha cojo ngujo xuta ladu rë Jesús ngajan Cesarea quiji me cojo niji. Me xi cuacun vë quijicojo niji me hiscan xi cuinechin, ndava ngu xuta Chipre xi siutaha me Jerusalén, xi hmí rë Mnasón. Me vëhë ne, ha jemu hatsëë camahani xi xuta ladu rë Jesús má me.

Quiji Pablo xi cuisajmi me cojo Jacobo

¹⁷ Xi caphin ngajan Jerusalén ne, xuta ladu rë Jesús jan ne, cafahatsja niji me cojo yějë ni cjuasua.

¹⁸ Hane xi camá nchujun jan ne, Pablo ne, quiji me cojo niji xi cuisajmi me cojo Jacobo. Hacuaha ha tjin tangun yějë xuta changá rë yungun jan.

¹⁹ Hane xi cavatju cachja Pablo nina cojo rë me ne, sehe casuacuenda chichihin me yějë ni xcusun xi casahmi Nina ngajñi rë xa rë Nina xi casahmi Pablo ngajñi rë xutaxín.

²⁰ Hane xi cavatju cahndê xuta jan cjua xi cachja Pablo ne, casahmi jyê casahmi hnga me Nina, sehe cachja me cojo Pablo cuitjin:

—Ngayun ne, ha hyun xi ngajñi rê xuta tjê rê Israel ne, chuva mil xuta tjin me xi cavisehen me ndiya rê Jesús. Hacuaha yêjê ni me ne, jemu ndaja faharcun me ley rê Moisés.

²¹ Hacuaha xuta xi cuacun vê ne, casacu camachaya rê me xi ngayun ne, nújun cojo yêjê xuta tjê rê Israel xi siu ngajan nangui rê xutaxín xi meje rê xi tsismicacun me ley rê Moisés, hacuaha mijí rê xi cuatê me chuxin rê quihndinda xi xihin, ha quihndê mijí rê xi cjuetjengui sa me xcusun changá naja.

²² ¿Mé xi cuma ni? Hatuxa jyihí ni ne, sacú cumachaya rê me xi cafuhun.

²³ Vêhê xi quihndê ne, nihñu tutjin xi cuinújin cojo nuju. Nguehe ngajñi niji ne, siu ñuju xihin xi casahmichihin me ngu cjua cojo Nina.

²⁴ Chjuhun cha vihi ne, tangun cojo cha yungun xi matitjun, cojo sa xi ngajan cuma tyahi cha tangun cojo ngayun tsêhê xcusun xi tsavi xi cojo Nina sacuatjin xi ha xcusun naja. Hacuaha techjun tsêhê cha, cojo sa xi cuma seju rê rcu cha. Hane xi cuatjin nihñu ne, yêjê ni xuta ne, cumachaya rê me xi yêjê cjua xi camachaya rê me tsujun ne, quixiin ta ngayun ne, hacuaha ha tuxa nihñuchuhun sacuatjin chja ley rê Moisés.

²⁵ Hane sacuaaha xutaxín xi cojo cavisehen ladu rê Jesús ne, ha caningatjin ngu xujun tsêhê me, hane xujun vêhê ne, chja xi meje rê xi sinii me xichinê xi caviyuju xcun ninandyojo, sinii me jni, sinii me yojo rê chu xi caxinchahndu rê xi cahme, sahmii me cjuatsehen xi sahmi xuta cojo ngu xi hacuiin chjuun rê hacuiin xihin rê. —Cuatjin cachja xuta changá jan cojo Pablo.

²⁶ Hane xi camá nchujun jan ne, sehe quijicojo Pablo cha xi cuacun jan, sehe catsityahi tangun me yojo rê me cojo cha, sacuatjin xi ha xcusun rê xuta tjê rê Israel. Sehe ngajan xi Pablo cojo cha xi cuacun jan ne, cavisehen me yungun xi matitjun, xi cuichja me há cjin sa nixtin xi cuijnetaha xi cuma tyahi camahani me, hane hacuaha cjue cjuatjo xcun Nina ngatsê rê jima ngu me.

Cafaha sindadu Pablo ngajan yungun xi matitjun

²⁷ Hya xi camá ne, xi ha meje cuechú xi cuma yuta nixtin jan ne, xuta tjê rê Israel xi canduva tsêhê distritu Asia jan ne, cavêê me Pablo ngajan cahntsua yungun xi matitjun tsêhê xi nchunchujun ni quiji me yungun tsêhê nixtin jan. Catsisue me cjuatacun rê xutacjin jan, sehe quiji cafaha me Pablo,

²⁸ hisca cajindaya me cachja me cuitjin:

—¡Ngayujun ni ngayun xuta tjê rê Israel, nduvun tisecuun niji! ¡Cha vihi xi tsujyihya chja cha condra naja ngayaan xuta rê Nina, cojo condra rê ley xi vitexa naja, cojo condra tsêhê cahndê vihi! Cuatjin tsujyihya chja cha cojo yêjê xuta jinguyjê ni. Hacuaha catsinguetsun cha cahndê rê Nina vi, tsêhê xi canduvacojo cha xutaxín nguehe cahntsua yungun xi matitjun vi.

Cuatjin cajindaya me cachja me ta,

²⁹ tsêhê xi titjun ne, ha cavêê me Pablo cojo ngu xutaxín xi hmí rê Tróximo ngajan ngajñi nandya, hane xi má rê me ne, quijicojo Pablo me cahntsua yungun.

³⁰ Hane yêjê xuta nandya ne, camasuê rê cjuatacun rê me. Hane vanga me quiji camatangun me yungun xi matitjun hiscan secun Pablo, sehe cafaha me cajavêjne me, cavaxê me tsêhê yungun jan. Sehe ngutjen ni casechja yêjê tingotjo jan.

³¹ Hane jinguyêjê rê xi tisahmi xutacjin jan cjuandya xi tsiquehen me Pablo ne, quiji cjua rê capitán tsêhê sindadu xi yêjê xuta Jerusalén ne, tjemu jyê suê tisahmi me.

³² Ngajan xi capitán jan ne, ngutjen ni quijijne me cojo sindadu rê me hiscan xi hinchataha xutacjin jan. Hane xi cavêê xutacjin jan sindadu cojo capitán rê cha ne, sehe casejyu me xi tivaja rê me Pablo.

³³ Hane xi quiji tiña capitán jan ne, sehe cafaha me Pablo. Sehe cavitexa me xi cumahñu Pablo cojo jo cadena. Hya xi camá ne, sehe cavinenguise capitán jan cojo xuta jan yo xuta Pablo jan, hacuaha mé casahmi me.

³⁴ Hane ngujo xuta jan ne, hisca jindaya me chja me cuitjin, ngujo nga me ne, hisca jindaya me chja me cuatjin. Peru tsêhê xi casacuiin rê capitán jan cjuaquixi ngatsê rê suê jyê xi tijima jan ne, cavitexa me xi cjuecojo sindadu Pablo ngajan hiscan hincha sindadu.

³⁵ Hane xi cafehe sindadu cojo Pablo hiscan ndê rê ne, hisca cavahahnga cha Pablo ngatsê rê cjuahngatacun xi sahmi xutacjin jan ta,

³⁶ tsêhê xi tjengui me cjuí me jindaya me chja me cuitjin:

—¡Nicuhun cha! —Cuatjin chja me.

Sua Pablo cjuaquixi rê me xcun xutacjin

³⁷ Hya xi ha tsinguissehen sindadu jan Pablo cahntsua ndihya ne, cachja Pablo cuitjin cojo capitán:

—¿Há tuun cahndé cuichjá cojo nuju ngujo cjuá? —Cuatjin cachja Pablo.

Ngajan xi capitán jan ne, cuitjin cachja me:

—¡Han, peru ma noje griego!

³⁸ Hane ngajan xi hacuini ngaye cha Egipto xi sehe tiña nixtin cavunihnga ngu si jyé hacuaha quijicojo rē nūju mil cha tsiquehen ngajan ngu xín tsēhē nandya jan ni. —Cuatjin cachja capitán jan.

³⁹ Ngajan xi Pablo ne, cuitjin cachja me:

—Ngahan ne, ngu cha tjē rē xuta Israel ngahan. Nangui naha ne, ngu nandya xi hacuaha jemu vengui chji rē xi hmí rē Tarso, tsēhē distritu Cilicia. Nihñu favor ne, tuhun cahndé cuichjá cojo xuta xi cuicun vi. —Cuatjin cachja Pablo.

⁴⁰ Hane xi casua capitán jan cahndé xi cuichja Pablo ne, hora xi secun Pablo hiscan ndē jan ne, casahmitsja me cojo xuta xi sejuu me hitsē. Hane hora xi café xuta caviyujuyuu me ne, ngajan xi Pablo ne, cachja me cojo xuta jan hne hebreo, cuitjin cachja me:

22

¹ —Ngayujun ngarcun ni xi hacuaha xingueen nuju ne, nihñu favor ne, tisiñuju hacutjin suá cjuaquixi naha quihndé xcun ngayujun ni. —Cuatjin cavetsihin cachja me.

² Hane xi cahndé xutacjin jan xi hne hebreo cachja Pablo cojo rē me ne, hitsē sa jercu caviyujuyuu me. Sehe cachja sa Pablo cuitjin:

³ —Ngahan ne, ngu cha tjē rē Israel ngahan. Hacuaha catsin ngahan ngajan nandya Tarso tsēhē distritu Cilicia. Peru xi camacha ne, ngehe Jerusalén. Hane maestru Gamaliel cavícuya ná me sacuatjin camahani chja ley rē xutachanga naja. Hatuxa jemu ndaja fahárcun Nina, sacuatjin tiniñu ngayujun ni quihndé.

⁴ Ngahan ne, cojo cjuahngatacun ne, catsujyéhēya tjēnguē xuta xi tjengui ndiya xatsē vihi. Hisca cavitéxa xi cueba me. Cafahá me cējēcojo me ndavaya, sa chjuun sa xihin me.

⁵ Hisca nahmi xi matitjun cojo yējē xuta changá rē yungun ne, cuma sua me cjuaquixi rē me tsēhē cjuá vihi ta, tsēhē xi hacuaha me xi cuacun vēhē casua ná me xujun xi suá rē xuta naja ngajan Damasco. Vēhē xi cējē ngajan xi cjuahá xuta xi tjengui ndiya xatsē vihi, hane tsihñu me cuinduva cojo me ngehe Jerusalén, cojo sa xi cuma me castigu.

Cachja Pablo hacutjin camá xi cavisehen me ladu rē Jesús

⁶ Hya xi camá ne, hora xi ha tijima tiña ngayin xi tivanguin Damasco, sacuaha chva rē nchisen ne, ha tu ñahñu canduva ngu ndihi jyé tsēhē ngahnga casahmi hasen rē hiscan tifē.

⁷ Ña catícja, hane cahndé ngu cjuá xi cachja cojo ná cuitjin: “Saulo, Saulo, ¿mé má cuatjin nujihiye tjengui ná cojo cjuahngatacun?” Cuatjin cachja cjuá jan.

⁸ Ngajan xi ngahan ne, cuitjin cafayanguē: “¿Yo ngayun, Tatá?” Cuatjin cafayanguē. Sehe cachja nga cjuá jan cojo ná cuitjin: “Ngahan xi Jesús tsēhē nandya Nasaret ngahan, xi tinujyihye tjengui ná cojo cjuahngatacun.” Cuatjin cachja nga cjuá jan cojo ná.

⁹ Yējē xuta xi cavisecoo ná xi tivanguin ne, cavēē me ndihi jyé jan, peru cahndiin me cjuá xi cachja cojo ná jan.

¹⁰ Sehe ngajan xi ngahan ne, cachjá cuitjin: “¿Mé xi meje rē xi sahme, Tatá?” Cuatjin cachjá. Hane Nai naja ne, cuitjin cachja me cojo ná: “Tisatjinhgue ne, tisihin Damasco. Hane ngajan cumachaya ri yējē xcusun xi meje rē Nina xi nihñi!” Cuatjin cachja Nai naja cojo ná.

¹¹ Peru tsēhē hasen jyé xi cavisehen túxcun jan ne, camatsijin ná. Ngajan xi xuta xi tivisecoo ná xi tivanguin ne, cavaha me ntsa, sehe camá caféhē Damasco.

¹² Hya xi camá ne, ngu xihin xi hmí rē Ananías, xi jemu faharcun rē Nina hacuaha sahmi yējē sacuatjin chja ley xi vitexa naja ne, ndaja chja yējē xuta tjē rē Israel xi siu jan tsēhē.

¹³ Hane cafehetjengui ná me hiscan tejña, hane cachja me cojo ná cuitjin: “Ngayun Saulo, catamatsejen nga nuju ngundiya.” Cuatjin cachja me. Hane ha hora vēhē ni ne, camatsejen nga ná hane cahvé me.

¹⁴ Hya xi camá ne, sehe cachja me cojo ná cuitjin: “Nina rē xutachanga naja ne, cojo tjun sa ne, casuaxa nuju me xi cumachaya nuju mé xi meje rē me, hacuaha chun me xi hatuxa tyjahi cojo cjuatacun rē, hacuaha cuinuhyun cjuá xi chja me cojo nuju.

¹⁵ Cuatjin camá ta, tsēhē xi Nina meje rē me xi ngayun tuhun cumachaya rē yējē xuta tsēhē me, cojo tsēhē xcusun xi cahyun cojo tsēhē cjuá xi canuhyun.

¹⁶ Quihndé ne, ¿mé nechunyun rē ni? Tángun ni catixtenda ngayun, chjindayun rē Jesús cahntsua xahasen nuju, cojo sa xi cjué jyé nuju.” Cuatjin cachja Ananías cojo ná.

Cachja Pablo hacutjin camá xi quiji cachja me cjuá rē Nina cojo xutaxín

¹⁷ Hane xi cavatju vēhē ne, cavúya nga Jerusalén. Hane ngu ndiya hya xi tejñaya yungun xi matitjun tisahme oración naha ne, sacuaha xi camá ná xi cachja ngu chiní cojo ná.

¹⁸ Cahvë Nina, hane cachja me cojo ná cuitjin: “Xati nihñi tacuin ne, tetjixin tsëhë Jerusalén ta, tsëhë xi xuta nguehe ne, cumacjaain rë me cjua xi noje tsahan.” Cuatjin cachja Nina.

¹⁹ Hane ngahan ne, cuitjin cachjá: “Ngayun Nina naha, xuta nguehe ne, vëë me xi ngahan ne, catsujyëhëya yungun jinguyjë ni, cakahá xuta xi tjengui me ndiya nuju, cavajá rë me, hacuaha cavinchá me ndavaya.

²⁰ Hane hora xi titsiquehen xuta Esteban, me xi cachja cjua nuju ne, hacuaha cojo ngahan sécun jan, tichuya ná, hacuaha hisca ngahan tisahme cuidadu tsjian rë cha xi titsiquehen rë Esteban jan.” Cuatjin cachjá.

²¹ Sehe ngajan xi Nina ne, cuitjin cachja me cojo ná: “Tihin ta, ngahan tsingátju ri hisca nangui cjin, cuihin cuinoje cojo xutaxín cjua naha.” Chja Nina cojo ná. —Cuatjin cachja Pablo.

Cavitexa capitán xi sehen rë Pablo

²² Hisca ngajan ni cacaa rë xutacjin cavisiñuju me cjua xi cachja Pablo, sehe cavetsihin me cajindayataha me cachja me cuitjin:

—¡Nícuahun cha xi cuajyihí vë ta ha quihndë vechiin chuya rë xi cuejña sa cha cjuahñu! —Cuatjin cajindaya me cachja me.

²³ Jinguyjëjë rë xi cuatjin jercu tijindayataha xuta, titsiniya me tsjian rë me, hacuaha titsicjin me nihndë scuan ne,

²⁴ capitán jan ne, cavitexa me xi cjue chani rë Pablo cahntsua hiscan hinchá sindadu. Hacuaha cavitexa me xi chjahátaha rë Pablo táha sehen rë me, cojo sa xi sacú cjuaquixi mé má cuatjin jindayataha xuta Pablo.

²⁵ Hane hya xi ha camahñu me xi sehen rë me ne, sehe cachja me cuitjin cojo sindadu xi secun jan:

—¿Há chja ley xi cuma sehen rë ngu xuta Roma jinguyjëjë rë xi cjëë cuma cuenda jyë rë me? —Cuatjin cachja me.

²⁶ Hane xi cahndë sindadu cjua vëhë ne, quiji cachja me cojo capitán cuitjin:

—¿Há hyun mé xi nihñu ni? Cha vëhë ne, cha Roma cha. —Cuatjin cachja sindadu jan.

²⁷ Ngajan xi capitán jan ne, quijijtengui me Pablo, sehe cachja me cuitjin:

—Tinoje cojo ná ne, ¿há xuta Roma jain ngaye? —Cuatjin cachja me.

Ngajan xi Pablo ne, cuitjin cafayangui me:

—Juun. —Cuatjin cafayangui me.

²⁸ Ngajan xi capitán jan ne, cuitjin cachja me:

—Ngahan ne, jemu jyë tujún cavechjë xi camá ngahan xuta Roma. —Cuatjin cachja me.

Ngajan xi Pablo ne, cuitjin cachja me:

—Peru ngahan ne, xuta Roma ngahan hisca xi catsin ngahan. —Cuatjin cachja me.

²⁹ Hya xi camá ne, sindadu xi cjuahataha rë Pablo jan ne, ngutjen quijixin cha tsëhë Pablo. Hacuaha capitán jan ne, jemu catsacjun me camá xi cuatjin catsihñu me Pablo tsëhë xi camachaya rë me xi Pablo ne, xuta Roma me.

Cavisehen Pablo xi cuma cuenda jyë rë me xcun me xi matitjun tsëhë xuta tjë rë Israel

³⁰ Hane xi camá nchujun jan ne, tsëhë xi meje cumachaya rë capitán jan cjuaquixi mé má cuatjin cavinchajyë xuta tjë rë Israel Pablo ne, cavitexa me quiji casehenndaya Pablo, hacuaha cavitexa me xi cumatangun yëjë nahmi xi matitjun cojo yëjë sa xuta xi matitjun. Hane xi cafehecojo sindadu Pablo jan ne, sehe quijicani capitán me xcun yëjë xuta xi matitjun jan.

23

¹ Ngajan xi Pablo ne, xi cavutsejenya me xcun yëjë xuta xi matitjun jan ne, sehe cachja me cuitjin:

—Ngayujun ni ne, nguehe cuichjá cojo nuju ta ngahan ne, hisca ntsacu cavetsihin hisca quihndë ne, hatuxa tyjahi cjuatacun naha xcun Nina. —Cuatjin cachja me.

² Hane Ananías, nahmi xi matitjun jan ne, cavitexa me xi xuta xi hinchacun hiscan secun Pablo xi cuajaya me hntsua Pablo.

³ Ngajan xi Pablo ne, cachja me cuitjin:

—¡Nina cuaja nuju me, ngayun xuta ndacha! ¡Nechun ndyá xi chjuhunchuvun ná cojo ley rë Moisés, sehe vitexun xi cuajaya xuta ntsuva, handasa chja ley xi ndajintjin xi cuatjin nihñu! —Cuatjin cachja me.

⁴ Hane xuta xi hinchacun hiscan secun Pablo jan ne, cuitjin cachja me:

—Haján, ¿há cuatjin choho noje cojo nahmi xi matitjun xi Nina casuaxa rë? —Cuatjin cachja me.

⁵ Sehe ngajan xi Pablo ne, cuitjin cafayangui me:

—Haan, peru ngahan ne, hveen xi me vèhë xi nahmi xi matitjun me ta, ngahan ne, ha hvë xi xcun xujun rë Nina ne, cuitjin camahindu: “Miji rë xi choho cuinújun cojo me xi matitjun tsujun.” —Cuatjin cachja Pablo cjuva xi camahindu xcun xujun rë Nina.

⁶ Hane ha vëë Pablo xi ngujo xuta xi matitjun jan ne, xuta saduceo me, hane ngujo nga me ne, xuta fariseo me. Vëhë xi cachjahñu me xcun junta cuitjin:

—Ngayujun ni ne, ngeue cuichjá cojo nuju ta ngahan ne, xuta fariseo ngahan, hacuaha quihndi rë xuta fariseo. Ngatsë rë xi vetahácacun xi nima ne, cuya cjuahñu ne, vëhë xi tichjahachuva ná. —Cuatjin cachjahñu Pablo.

⁷ Hane xi cachja Pablo cuatjin ne, cavetsihin cacjan xuta fariseo cojo xuta saduceo, hane hacuiin tangun camá me cojo cjuatacun rë me.

⁸ Xuta fariseo ne, chja me ta nima ne, cuya cjuahñu, hacuaha chja sa me xi tjin ángel hacuaha tjin hasen naja. Peru xuta saduceo ne, chja me ta quixiin.

⁹ Hya xi camá ne, cavisatjenhnga ngu suë jyë. Ngajan xi cavetjújñi ngujo cha xi vicuya cjuachacun xi hacuaha fariseo cha ne, cachja cha cuitjin:

—Sacuiin niji hisca ngu jyë rë cha xi cujyihí vi. ¿Há ngayaan hyan sa xi ngu ángel o sa xi ngu hasen cachja cojo rë cha? —Cuatjin cachja cha.

¹⁰ Hane hya xi suë xi tacun jan camajyë sa ne, jemu catsacjun capitán jan tsëhë xi tsiquehen xuta Pablo. Hane vëhë xi cavitexa me sindadu xi cjuejne, cuaxéxín cha Pablo tsëhë ngajñi rë xuta jan, cjuecojo cha me cahntsua hiscan híncha sindadu.

¹¹ Hane xi camá nguixun nchujun jan ne, quijitjengui Nai naja Pablo, cuitjin cachja me cojo rë me:

—Tejñi hñu xahasen riji ta, tsëhë xi sacuatjin canoje ngatsë naha ngeue Jerusalén ne, hacuaha cuatjin tjin ri xi cuinoje ngajan Roma. —Cuatjin cachja Nai naja.

Casahmichihin xuta cjuva xi tsiquehen me Pablo

¹² Hane xi camá nchujun nga jan ne, ngujo xuta tjë rë Israel jan ne, casahmitangun me cjuva xi hacuiin sinë hacuiin cuihi me jinguyëjë rë xi cjëë tsiquehen me Pablo.

¹³ Quisun sa xi yachan xuta xi cuatjin caviyujucacun me.

¹⁴ Hya xi camá ne, quiji me xcun yëjë nahmi xi matitjun cojo xuta changá jan, hane cachja me cojo me cuitjin:

—Ngayin ne, canihñitanguín cjuva xi xinii síin jinguyëjë rë xi cjëë niquihin cha Pablo.

¹⁵ Quihndë ne, ngayun cojo sa me xi yahnga xi matitjun ne, tuhun cumachaya rë capitán ne, cataxë me cha Pablo, catinduvacojo me cha xcun junta xi cuma, sacuaha xi meje sa nuju cjuaquixi tsëhë jyë rë cha. Hane ngayin ne, ha tjin chjine ngayin xi niquihin cha chaja sa xi cjuehe cha xcun junta. —Cuatjin cachja xuta jan.

¹⁶ Peru cha quihndi rë na tichja Pablo ne, xi camachaya rë cha tsëhë cjuandacha jan ne, quiji cha hiscan híncha sindadu hane casuacuenda cha Pablo tsëhë cjuva xi camachaya rë cha.

¹⁷ Sehe ngajan xi Pablo ne, cajindaya me ngu cha xi matitjun tsëhë sindadu, sehe cachja me cojo cha cuitjin:

—Tángun cojo cha vihi xingueen xcun capitán tsëhë xi tjin cjuva xi cuichja cha cojo rë me.

—Cuatjin cachja Pablo.

¹⁸ Ngajan xi sindadu jan ne, quijicojo cha cha xicjin Pablo jan xcun capitán, sehe cachja cha cuitjin:

—Cha Pablo xi jiya ndavaya jan ne, cajindaya cha ngahan, sehe cachja cha cojo ná xi cuinduva cojo cha vihi ngeue ta, tsëhë xi tjin xu cjuva xi cuichja cha cojo nuju. —Cuatjin cachja cha sindadu jan.

¹⁹ Ngajan xi capitán jan ne, cafaha me tsja cha xicjin Pablo ne, sehe quijixin me cojo cha ngu ladu sehe ngajan cafinguisse me cha cuitjin:

—¿Mé cjuva xi cuinoje cojo ná? —Cuatjin cafinguisse me.

²⁰ Hane cha xicjin Pablo jan ne, cuitjin cachja cha:

—Ngujo xuta tjë rë Israel ne, casahmitangun me cjuva xi cuichja me cojo nuju xi cuanguncujun tsini naha xcun me xi matitjun tsëhë me, sacuaha xi tjin sa cjuva xi meje cjuinguisse rë me.

²¹ Peru xicamacjaain nuju cjuva rë me ta, vatju sa yachan xuta xi hínchaya rë me ngajan ndiya, xi casahmichihin me cjuva xi sinii cuiin me jinguyëjë rë xi cjëë tsiquehen me tsini naha. Ndicumaha ni ne, siuya me xi cuinújun xi ndatjin. —Cuatjin cachja cha xicjin Pablo.

²² Ngajan xi capitán jan ne, cuitjin cachja me cojo rë cha:

—Tjihin ne, tsajin yo xi cuinoje cojo xi catehe camachaya ná cjuva vihi. —Cuatjin cachja me.

Quiji chani rë Pablo xcun Félix, me xi matitjun

²³ Hya xi camá ne, capitán jan ne, cajindaya me jo sindadu rè me, sehe cachja me cojo cha cuitjin:

—Tuhunchjino jo cientu sindadu cojo jyanchan të cha xi mihi naxin cojo jo cientu sa cha xi vaha lanza ne, cojo sa xi fane ñaja tsèhë nguixun ne, cuetju cha, cjue cha hisca nandya Cesarea.

²⁴ Hacuaha tuhunchjino ngujo naxin xi cuijin Pablo, xi cuangun chanu me xcun Félix, me xi matitjun. —Cuatjin cachja capitán.

²⁵ Sehe catsihindu me ngu xujun xi chja cuitjin:

²⁶ “Ngahan, Claudio Lisias ne, tsingátju ngu nina naha tsujun, ngayun Félix, ngayun xi matitjun ngayun tsahan.

²⁷ Cha xi cuijiyihi vi ne, cafaha xuta Israel cha. Hitsë sa ne, catsiquehen me cha. Hane xi camachaya ná xi cha Roma cha ne, cëjë cojo sindadu naha, cavaxëtjê cha.

²⁸ Hane tsèhë xi meje cumachaya ná mé má cuatjin vinchajyë xuta cha ne, cëjëcojo cha xcun xutaxa rè yungun cojo xcun xuta changá rè xuta Israel.

²⁹ Hane ngahan ne, camachaya ná ta vinchajyë me cha, tsèhë xi faharcuaain cha ley rè suvá me. Peru jyë xi vincha me tsèhë cha ne, vechiin chuva rè xi cueya cha o sa cjue cha ndavaya.

³⁰ Hane xi camachaya ná xi casahmichihin xuta cjua xi tsiquehen me cha ne, ngutjen ni catsingátju cha xcun ngayun, hacuaha cavitëxa rè xuta xi vinchajyë rè cha cuinduva me ndyá cuichja me cojo nuju mé má cuatjin vinchajyë me cha.” Cuatjin chja xujun jan.

³¹ Hya xi camá ne, cafaha sindadu jan Pablo, quijicojo cha me nguixun hya nandya Antipatris, sacuatjin cjua xi cachja capitán cojo cha.

³² Hane xi camá nchujun jan ne, cavuya sindadu xi fi ntsacu jan ngajan Jerusalén, hane cha xi hinchasun naxin jan ne, quiji sa cha cojo Pablo.

³³ Hane xi cafehe cha cojo rè me Cesarea ne, casahmi entregadu cha xujun xi yaha cha, hacuaha casahmi entregadu cha Pablo tsja me xi matitjun.

³⁴ Hya xi camá ne, xi café cavutaya me xujun jan ne, sehe cavinenguisse me jani distritu rè Pablo. Hane xi camachaya rè me xi Pablo ne, distritu Cilicia distritu rè me ne,

³⁵ cuitjin cachja me:

—Hya xi cjuehe xuta xi vincha me jyë riji ne, hya cuihndë cjua riji. —Cuatjin cachja me. Sehe cavitëxa me xi setjo Pablo ngajan ngu cahndë tsèhë ndihya jyë xi casahmi Herodes, hiscan xi má ndava me xi matitjun.

24

Cavinchajyë xuta tjë rè Israel Pablo

¹ Hane xi cavatju hñú nixtin jan ne, cafehe nahmi xi matitjun xi hmí rè Ananías ngajan Cesarea, cojo ngujo xuta changá cojo ngu me xi cuichjatje ngatsë rè xuta xi cuacun vë, ngu me xi hmí rè Tértulo. Me xi cuacun vë ne, quiji cavinchajyë me Pablo xcun me xi matitjun.

² Hane xi cächjindaya rè Pablo ne, cavetsihin cavinchajyë Tértulo me, cuitjin cachja me: —Ngatsë nuju ngayun ne, jemu tjin cjuandaja cjuajeya ngajñi ni. Hacuaha tsèhë xi jemu ndaja chjuhuncuendun yëjë ni nandya nihi ne, vëhë xi cjuí xcun nandya.

³ Jemu tihin camahani nacuechji nuju, ngayun Félix, tsèhë yëjë cjuandaja xi tinihñu vë.

⁴ Cojo sa xi ha quihndë suaan sa nuju cjuandaya ne, nihñu favor ne, nihñujun tacún cojo nihi ne, tisiñuju hitsë ngujo cjua xi cuinújin.

⁵ Cha xi cuijiyihi vi ne, jemu cjuaxti camahani cha. Jingujyë ni ngasunhndë ne, titsujyihya tivunihnga cha si ngajñi nihi ngayjin ni xuta tjë rè Israel. Hacuaha cha vihi ngu cha xi matitjun ngajñi rè xuta ladu rè cha Nasaret.

⁶ Hisca cahntsua yungun xi matitjun meje sahmi cha ngu xcusun xi ndajin tjin xi nihña, vëhë xi cächjihin cha. Ngayin ne, meje chjihinchuvin cha sacuatjin vitëxa ley nihi,

⁷ peru cafehe capitán Lisias ne, cafahatahá me cha, hacuaha cavitëxa nihi me xi ngayin xi vinchin jyë rè cha ne, cuinduvin hisca nguehe xcun ngayun.

⁸ Hora xi chjuhuntuhan rè cha ne, ngayun suvun ni sacú nuju cjuaquixi tsèhë yëjë ni jyë xi vinchin tsèhë cha. —Cuatjin cavinchajyë Tértulo.

⁹ Yëjë xuta tjë rè Israel xi cojo siu jan ne, hacuaha cachja me xi cuatjin jain.

Casua Pablo cjuaquixi rè me xcun Félix

¹⁰ Hane hora xi casahmitsja me xi matitjun cojo Pablo xi cuichja me ne, Pablo ne, cuitjin cachja me:

—Ngayun ne, ha hvë xi jemu tsëë chjuhunchuvun xuta nación naha tsèhë jyë rè me. Vëhë xi ngahan ne, cojo yëjë ni cjuasua ne, suá cjuaquixi naha cojo nuju.

¹¹ Sa xi chjinegunsun suvun ne, cuma sacú nuju cjuaquixi ta ngahan ne, sehe tjin rè tejó nixtin xi cëjë Jerusalén xi cjuahárcun Nina.

¹² Peru casacuintsjain ná me xi tivisiajmecejn o sa tisuá suê rê cjuatacun rê xuta, sa cahntsua yungun xi matitjun, sa cahntsua tu jarê ni yungun langa, o sa jinguyjê ni ngajñi nandya.

¹³ Hacuaha hisca cumaji tsinguixi me xi cjuaquixi jain tsêhê jyê xi vincha me tsahan quihndê.

¹⁴ Peru ngu nga ne, nguehe cuichjá cojo nuju cjuaquixi ta ngahan ne, hatuxa fahárcun jain Nina rê xutachanga naha, sacuatjin faharcun xuta xi hinchá ndyá xi chja me xi cuicun vihi xi ngu ndiya ndacha. Hacuaha macjain ná yêjê ni cjuá tsêhê ley rê Moisés cojo yêjê cjuá xi catsihindu profeta.

¹⁵ Hacuaha vétahacácun Nina sacuatjin vetahacacun me xi cuicun vi xi nima ne, cuya cjuahñu, sa tyjahi o sa xi hacuini tyjahi cjuatacun rê.

¹⁶ Vêhê xi ngahan ne, yêjê ni hora ne, sahme nguujê xi tyjahi cjuatacun naha xi cuma rê Nina cojo xi cuma rê xuta.

¹⁷ Hane xi ha jemu cavatju nixtin ne, cavúya canduvatjênguê xuta naha, yahá tujún xi cuisécoo rê me hacuaha suá cjuatjo xi cjue xcun Nina.

¹⁸ Hane xi cuatjin canduva ne, me xi cuicun vi ne, cavêê ná me ngajan yungun xi matitjun, tyjahi ngahan sacuatjin xi ha xcusun nihi. Hacuaha hacuini jemu cjín xuta siu me cojo ná hacuaha tsajin ngu suê jyê xi tijima.

¹⁹ Peru siu ngujo xuta tjê rê Israel xi canduva me tsêhê distritu Asia. Me xi cuacun vê xi sa tjín mé jyê meje cuincha me tsahan ne, catinduva catincha me jyê naha nguehe xcun ngayun.

²⁰ O sa tsajin ne, suvá me xi cuicun vi catichja me mé cjuatsehen naha casacu rê me, hya xi cavisécun xcun xutaxa rê yungun nihi.

²¹ Ngu tu tu ni cjuá xi cajindáya cachjá hya xi sécun ngajñi rê me ne, cuitjin cachjá: “Ngatsê rê xi macjain ná xi nima ne, cuya cjuahñu ne, vêhê xi tichjahachuva ná quihndê xcun ngayun.” Cuatjin cachjá. —Cjuá vêhê xi cachja Pablo xcun Félix, me xi matitjun.

²² Hya xi camá ne, tsêhê xi ha vêê ndaja Félix cjuá tsêhê Ndiya Xatsê ne, xi cuejñavasen me cjuacjintacun vêhê ne, cuitjin cachja me:

—Hya xi cjuehe Capitán Lisias ne, sehe sahmechehen cjuacjintacun nuju vi. —Cuatjin cachja me.

²³ Hane sehe cavítexa me sindadu rê me xi cuetjo cha Pablo, peru sahmi cha cjuandaja ne, hacuini cuitijaya rê cha xuta rê Pablo xi cjue cjuahacuenda rê me.

Cavisiajmi Pablo cojo Félix cojo Drusila

²⁴ Hane xi cavatju ngujo nixtin ne, cavuya cafehe Félix, xi quiji me ngu nangui. Cafehe me cojo Drusila, chjuun rê me, ngu chjuun xuta tjê rê Israel. Hya xi camá ne, catsingatju me quiji chjahá rê Pablo, sehe cavisíñuju me cjuá xi cachja Pablo tsêhê hacutjin xi cumangutacuun cojo Jesucristu.

²⁵ Jinguyjê rê xi tichja Pablo tsêhê ngu cjuatacun tyjahi, tsêhê ngu xahasen tyjahi, cojo tsêhê nixtin xi tsichuva Nina xuta tsêhê jyê rê me ne, Félix ne, catsacun me camá, sehe cachja me cojo Pablo cuitjin:

—Quihndê ne, cuma cjuihin. Hane hya xi cumahya ná ne, sehe squindáya nga ri. —Cuatjin cachja me.

²⁶ Peru hacuaha tsingatahacacun me sa xi sua Pablo me tujún. Vêhê xi jemu cjín ndiya cajindaya me Pablo, cavisiajmi me cojo.

²⁷ Xi cavatju jo nu ne, cavetju Félix tsêhê xcun xa rê me, hane cavisehen nga ngu cahndê rê me, ngu me xi hmí rê Porcio Festo. Peru tsêhê xi Félix ne, meje sahmi me cjuandaja cojo xuta tjê rê Israel ne, caseya cuaha Pablo ndavaya.

25

Cafehya Pablo xi cuma me consina tsja César

¹ Hya xi camá ne, cafehe Festo xi cjuahaxa me ngajan Cesarea. Hane xi cafê jyan nixtin ne, cavetju me quiji me Jerusalén.

² Hane xi cafehe Festo ngajan Jerusalén ne, nahmi xi matitjun cojo me xi matitjun tsêhê ngajñi rê xuta tjê rê Israel ne, casua me camachaya rê Festo tsêhê jyê xi vincha me tsêhê Pablo.

³ Hane cafehya me favor xi tsingatju Festo cjue chjahá rê Pablo xi cjue me ngajan Jerusalén. Cuatjin meje rê me xi cuma ta, tsêhê xi ha cavisiajmichihin me xi tsiquehen me Pablo ngajan ndiya.

⁴ Ngajan xi Festo ne, cachja me ta Pablo ne, tacunñihi me ngajan Cesarea, hacuaha suvá Festo ne, ha cjue xati me ngajan.

⁵ Hacuaha cachja sa me cuitjin:

—Catji xutaxa rë yungun nuju cojo ná, hane sa xi tjin mé jyé rë cha ne, ngajan catincha me jyé rë cha cojo ná. —Cuatjin cachja me.

⁶ Hya xi camá ne, cavejña sa Festo ngajan Jerusalén sacuaaha jyin o sa të nixtin, sehe cafe me Cesarea. Hane camá nchujun tséhë nixtin xi cafehe me jan ne, quiji me cavéjña me xcun xa rë me, sehe cavitexa me cjue chjahá rë Pablo.

⁷ Hane xi cafehe Pablo ne, quiji caxinchacunndee xuta tjë rë Israel xi canduva tséhë Jerusalén jan tjehe rë me, hane jemu cjin xcusun jyé rë Pablo xi cavincha me, peru hisca camaji catsinguixi me xi cjuaquixi jain.

⁸ Hane Pablo ne, xi casua me cjuaquixi rë me ne, cuitjin cachja me:

—Tsajin camahani mé jyé xi casahme, hacuini condra rë ley niji ngayin xuta tjë rë Israel ne, hacuini condra rë yungun xi matitjun tsijin ne, hacuini condra rë César, me xi matitjun tsajin. —Cuatjin cachja Pablo.

⁹ Hane xi meje sahmi Festo cjuandaja cojo xuta tjë rë Israel ne, cuitjin cafinenguise me Pablo:

—¿Há meje cuihin Jerusalén, cojo sa xi ngajan tsichúva ri cojo jyé riji vi? —Cuatjin cafinenguise me.

¹⁰ Ngajan xi Pablo ne, cuitjin cafayangui me:

—Ha ndihyavasen rë César, me xi matitjun camahani, sécun, hane ha nguehe xi meje rë xi chjahachuva ná cojo jyé naha. Xuta tjë rë Israel ne, tsajin camahani mé xi choho sahme cojo rë me. Ngayun ne, ha ndaja hyun.

¹¹ Sa xi tsejen ta casahme ngu xcusun xi vechú chuva rë xi cueya ne, tsingatehen xi cueya. Peru sa xi tsajin cjuaquixi tséhë hisca ngu jyé xi vincha me tsahan ne, tsajin yo xi cuma sahmi ná entregadu tsja xuta xi cuacun vë. Ngahan ne, féhya nuju xi nihñu ná consina tsja César, me xi matitjun camahani. —Cuatjin cafayangui me.

¹² Ngajan xi Festo ne, xi cavisiajmijcin me cojo yéjé me xi visecoo rë me ne, sehe cachja me cuitjin cojo Pablo:

—Cachjahye xi sahme ri consina tsja César ne, tsja César tsingátju ri. —Cuatjin cachja Festo.

Cavisehen Pablo xcun Agripa

¹³ Hane xi cavatju ngujo nixtin jan ne, ngu me xi matitjun tséhë jingu sa distritu, me xi hmí Agripa ne, cafehe me Cesarea cojo Berenice na xicjin me, xi sua me ngu nina Festo.

¹⁴ Hane tséhë xi caviyuju me ngujo nixtin jan ne, cachja Festo cojo rë me tséhë cjuacjintacun xi tacun tsja me tséhë Pablo. Cuitjin cachja me:

—Nguehe ne, tacunñihi ngu cha xi cavejñavasen Félix cjuacjintacun rë.

¹⁵ Hya xi cëjé Jerusalén ne, nahmi xi matitjun cojo xuta changá tséhë xuta tjë rë Israel ne, casua me camachaya ná tséhë cha vëhë, hacuaaha cafehya me xi cuichjá xi cuma cha castigu.

¹⁶ Peru ngahan ne, cachjá cojo rë me ta ngayin xuta Roma ne, tsajin niji xcusun xi nihñi castigu ngu xuta xi hincha jyé rë me jinguyéjé rë xi cjëë cuisehen me xcun cojo xcun cojo me xi vincha jyé rë me, hacuaaha sacú rë me cahndé xi sua me cjuaquixi rë me tséhë jyé xi hincha tséhë me.

¹⁷ Hane hya xi cafehe yéjé xuta xi cuacun vë nguehe ne, catsichajan hora ta xi tu camá nchujun jan ne, cëjé ndihyavasen ne, catsingatju quiji chjahá rë cha.

¹⁸ Hane xi caxinchacun xuta xi cuacun jan cachja me ne, hisca ngu jyé jyé sacuatjin tsingátaha cáacun ne, cavinchaain me tséhë cha ta,

¹⁹ súvá ni cjua tséhë xcusun rë yungun rë me xi casahmichiin xu cha, cojo cjua tséhë ngu nima xi hmí rë Jesús, xi chja cha ta tacun quicun.

²⁰ Peru ngahan ne, casacuiniin ná hacutjin sacú ná cjuaquixi tséhë cjuacjintacun vëhë ne, cafinenguésé rë cha sa xi meje cjue cha Jerusalén hane ngajan chjahachuva rë cha tséhë cjuacjintacun xi yaha rë cha.

²¹ Peru tséhë xi cafehya cha xi seyañihi sa cha hisca xi súvá me xi matitjun camahani tsichuva me cjuacjintacun rë cha ne, cavitéxa xi quiji caseyañihi sa cha hisca hya xi cuma tsingátju cha tsja me. —Cuatjin cachja Festo.

²² Ngajan xi Agripa ne, cuitjin cachja me cojo Festo:

—Ngahan ne, hacuaaha catsingátahacáacun xi cuisifujú cjua rë cha xi cuajyihi vë. —Cuatjin cachja me.

Hane Festo ne, cuitjin cafayangui me:

—Sa cuatjin ne, nchujun ní cuisifuju cjua rë cha. —Cuatjin cafayangui me.

²³ Hane xi camá nchujun jan ne, ngu cjuandya jyé tjin xi cafehe Agripa cojo Berenice. Hane quiji cavisehentangun me ndihyavasen cojo yéjé capitán cojo yéjé xuta xi matitjun tséhë nandya jan. Sehe cavitexa Festo quiji chjahá rë Pablo.

²⁴ Hane xi cafehe Pablo ne, sehe cachja Festo cuitjin:

—Ngayun Agripa, cojo ngayujun ni xi tjin tangun ngayaan nguehe ne, nguehe tacun cha vihi xi yějē xuta tjē rē Israel ne, cavinchajyē me cha cojo ná ngajan Jerusalén, hacuaha cavinchajyē me cha hisca nguehe. Jindaya me chja me ta ha quihndē mijí rē xi cuejña sa cha cjuahñu.

²⁵ Peru ngahan ne, casacuiin ná hisca ngu xcusun xi casahmi cha xi vechú chuva rē xi cueya cha. Hane xi cafehya suvá cha xi cuma cha consina tsja me xi matitjun camahani ne, cavejña cáacun xi tsingátju cha.

²⁶ Peru tsajin ngu cjua xi cuma tsihindu rē nai naha, ¿há vihi ne, há vĕhĕ casahmi cha? Vĕhĕ xi cavitĕxa xi cuisehen cha xcun ngayun, Agripa, cojo sa xi cjuĕ chjahantahan rĕ cha ne, sacú ná cjua xi tsihindu.

²⁷ Xi má ná ne, tsajin ná cjuatacun sa xi tsingátju ngu presu hacuaha cuichjaan mé jyĕ xi caxincha tsĕhĕ. —Cuatjin cachja Festo.

26

Casua Pablo cjuaquixi rē me xcun Agripa

¹ Hya xi camá ne, cuitjin cachja Agripa cojo Pablo:

—Quihndē ne, tjin cahndē xi cuinoje ngatsĕ riji. —Cuatjin cachja me.

Ngajan xi Pablo ne, catsiquijin me tsja me, sehe casua me cjuaquixi rē me cuitjin:

² —Agripa, ngayun xi matitjun ngayun ne, jemu ndaja tsahan xi xcun ngayun suá cjuaquixi naha quihndē tsĕhĕ yĕjĕ jyĕ xi vincha xuta tjē rē Israel tsahan.

³ Jemu ndaja tsahan ta, tsĕhĕ xi ngayun ne, ha hyun yĕjĕ xcusun naja cojo cjuacjintacun naja ngayaan xuta tjē rē Israel. Vĕhĕ xi nihñu cjuandaja ne, nihñu jyĕ tacún xi cuisinñuju ngujo cjua naha.

Xcusun changá rē Pablo

⁴ 'Quihndē ne, yĕjĕ xuta tjē rē Israel ne, vĕĕ me hacutjin xcusun naha hisca cjua lihndi naha, hya xi cavitejña nangui naha cojo hya xi cavitejña Jerusalén.

⁵ Hacuaha, sa xi meje cuichja me cojo nuju ne, cuma cuichja me ta ha vĕĕ me xi ngahan ne, hatuxa xuta fariseo ngahan, xuta xi chinchihin tjengui me ndiya rē Nina naja.

⁶ Quihndē ne, nguehe sécun tichjaháchuva ná cojo cjuatacun naha ngatsĕ rē xi vétahácacun cjua xi cachja Nina cojo xutachanga naja.

⁷ Ngajejen ni xi tjē rē tejó xutachanga naja ne, vetahantacun xi cuechuntahan cjua vĕhĕ. Vĕhĕ xi cojo yĕjĕ ni xahasen naja ne, chjahanrcun Nina nixtin nixten. Hane tsĕhĕ xi vetahácacun cjua vĕhĕ ne, vĕhĕ xi vinchajyĕ ná xuta tjē rē Israel.

⁸ Ngayujun ni ne, ¿mé má macjaain nuju xi Nina ne, tsicuya me nima cjuahñu?

Pablo ne, catsuyihiya tjengui me cojo cjuahngatacun xuta ladu rē Nina

⁹ 'Tijun ne, ngahan ne, catsingátahácacun xi jemu cjín xcusun meje rē xi sahme condra tsĕhĕ Jesús, xuta Nasaret.

¹⁰ Hane cuatjin casahme ngajan Jerusalén. Ngahan ne, jemu cjín xuta ladu rē Nina cavinchá me ndavaya ta, tsĕhĕ xi nahmi xi matitjun casuaxa ná me xi cuatjin casahme. Hane hya xi cavitexa xutaxa rē xi cueya xuta ladu rē Nina xi cuacun jan ne, cojo ngahan cachjá xi ndatjin.

¹¹ Jemu cjín ndiya cĕjĕ yĕjĕ yungun naja, cavitĕxa xi cuma xuta castigu, hacuaha jemu casahme ngahñu xi choho cuichja me tsĕhĕ Jesús. Tjemu camacjan ná cojo rē me, hacuaha catsuyĕhĕya tjĕnguĕ me cojo cjuahngatacun hisca cojo jingu sa nandya rē xutaxín.

Cachja nga Pablo hacutjin camá xi cavisehen me ladu rē Jesús

¹² 'Ngayun Agripa, ngu nixtin jan ne, tifĕ Damasco xi sahme cjuahngatacun jan, yahá xa xi ha casua ná nahmi xi matitjun.

¹³ Hane ndiya jan ne, sacuaha chuva rē nchisen ne, cahvĕ ngu ndihi xi canduva ngahnga, xi hitsĕ sa hñu ndavá rē xi cuma rē ndavá rē tsuhi, xi cavaja rē hasen rē jingundee ni hiscan tifĕ cojo me xi tifĕ cojo.

¹⁴ Hane xi ha caticjin ngayijin ni ne, ngahan ne, cahndē ngu cjua xi cachja cojo ná hne hebreo, cuitjin cachja: "Saulo, Saulo, ¿mé má cuatjin nujihiye tjengui ná cojo cjuahngatacun? Sacuahatjin tjin rē chu ndyaja tjin ri, ta chu vĕ ne, tsun chu nahñu quicha nahya ne, vanguihmu suva chu yojo ru hya xi vĕhĕ hñu chu yojo ru xi vihndiin chu. Hane cuanitjin ni tjin ri, ye." Cuatjin cachja cjua jan.

¹⁵ Ngajan xi ngahan ne, cuitjin cavinenguĕsĕ: "¿Yo ngayun, Tatá?" Cuatjin cavinenguĕsĕ. Hane Nai naja ne, cuitjin cafayangui me: "Ngahan ne, Jesús ngahan, xi nujihiye tjengui ná cojo cjuahngatacun.

¹⁶ Tisatjinhngue, tisechin ta, tsêhê xi canduvá tjênguê ri cojo sa xi suáxa ri xi cuisecuee ná hacuaha cuinoje cojo xuta xi cuitjin cahye ná, hacuaha cuinoje cojo xuta hacutjin camá hya xi ha canduvá tjênguê nga ri ngujo ndiya.

¹⁷ Ngahan cuáxêjtjê ri tsêhê xuta tjê rê Israel. Hacuaha cuáxêjtjê ri tsêhê xutaxín. Tsingátju ri ngajñi rê xuta xi cuacun vè,

¹⁸ cojo sa xi choxehe cjuatacun rê me, sehe cuetjuxin me tsêhê cjuatsehen, hane cuisehen me ndiya rê cjuandaja, cuetjuxin me tsêhê ladu rê Satanás hane cuisehen me ladu rê Nina. Choxehe cjuatacun rê me, sehe sacú rê me cjuaninchataha tsêhê jyê rê me, hacuaha cuisehen me ladu rê xuta xi ha camá tsêhê Nina me ngatsê rê xi camangucacun me cojo ná." Cuatjin cafayangui Nai naja.

Cachja Pablo tsêhê xa xi sahmi me

¹⁹ Ngayun Agripa, ngahan ne, hatuxa cahndê tsêhê cjua xi cachja Jesús hya xi canduvat-jengui ná me xi canduva me tsêhê ngahnga.

²⁰ Tjun tjun ne, cachjá cojo xuta ngajan Damasco, sehe cachjá cojo xuta ngajan Jerusalén cojo jingujyê ni nación Israel, hisca cojo xutaxín. Cachjá cojo rê me xi tsindeya me cjuatacun rê me hacuaha cuisehen me ladu rê Nina. Hacuaha cachjá cojo rê me xi catisahmi me cjuandaja xi tsingacun xi catsindeya jain me cjuatacun rê me.

²¹ Ngatsê rê vèhê xi cafaha ná xuta tjê rê Israel ngajan yungun xi matitjun hisca casahmi me cjuandya xi tsiquehen ná me.

²² Peru Nina ne, visecoo ná me, vèhê xi tifêxcun hisca quihndê, tichjá cojo xuta sa quihndi sa changá me. Tichjá suvá cjua xi cachja profeta cojo cjua xi cachja Moisés tsêhê yêjê xcusun xi sehe cuetjucaa.

²³ Cachja me xi cuacun vè xi Cristu ne, Me xi Tsingatju Nina ne, tjin rê me xi cueya me, hacuaha tjin rê me xi tjun tjun me cuya me cjuahñu, sehe sua me cumachaya rê xuta tjê rê Israel cojo xutaxín tsêhê xi cuaxêtje Nina xuta xi cuacun vè. —Cuatjin cachja Pablo.

Pablo ne, meje rê me xi cjuijnecacun Agripa ne, cumacjain rê me xi cavuya cjuahñu rê Jesús

²⁴ Hane xi cuatjin cachja Pablo xi vaxêtje me yojo rê me ne, cavisehenñi Festo cojo cjua rê me, cachjahñu me cuitjin:

—¡Sca ri, Pablo! ¡Tsêhê xi jercu chutaye ne, vèhê sahmi sca rê cjuatacun rijji! —Cuatjin cachja Festo.

²⁵ Ngajan xi Pablo ne, cuitjin cafayangui me:

—Hacuiin sca ná, ngayun Festo. Ngahan ne, tichjá cjua xi cjuaquixi.

²⁶ Agripa, me xi matitjun vè ne, hacuaha ndaja vèê me cjua vihi. Vèhê xi tsacjuun xi chjá cojo rê me. Xi má ná ne, tsajin ngu cjua xi cuicun vi xi hvín me ta, tsêhê xi xcusun vihi ne, hacuiin ngu cahncun camá.

²⁷ Ngayun Agripa, ¿há macjain nuju cjua xi catsihindu profeta? Ha hvê ta macjain nuju. —Cuatjin cafayangui Pablo.

²⁸ Ngajan xi Agripa ne, cuitjin cachja me cojo Pablo:

—Cojo hitsê cjua xi canoje vè ne, meje ri xi cuisehen ladu rê Cristu. —Cuatjin cachja me.

²⁹ Hane Pablo ne, cuitjin cafayangui me:

—Nina meje rê me xi há hitsê o há cjin cjua xi cuichjá ne, hacuiin suvun ni ta cojo yêjê me xi tivisiñuju cjua xi tichjá quihndê ne, cuma me sacuaha ngahan, peru hacuiin cojo cadena vihi. —Cuatjin cafayangui me.

³⁰ Hya xi camá ne, cavisatjenhnga Agripa, me xi matitjun, cojo Festo, hacuaha cojo sa Berenice cojo yêjê me xi caviyujutangun me cojo, cavisatjenhnga me.

³¹ Sehe quijixin me, cachja me cojo xingu xingu me cuitjin:

—Cha xi cuajyihí vè ne, tsajin mé sahmi cha xi vehú chuva rê xi cueya cha o sa xi cjue cha ndavaya. —Cuatjin cachja me.

³² Sehe ngajan xi Agripa ne, cachja me cojo Festo cuitjin:

—Cha xi cuajyihí vè ne, sá tsajin xi cafehya cha xi cuma cha consina xcun me xi matitjun camahani ne, cuma nismi rê cha. —Cuatjin cachja me.

27

Cavetju Pablo xi cjue me Roma

¹ Hane hya xi cavechú nixtin xi caveññacacun me xi matitjun jan xi cuanguin ngajan Italia ne, Pablo cojo yahnga sa presu jan ne, camá me entregadu tsja ngu capitán xi hmí rê Julio, capitán tsêhê sindadu rê me xi matitjun camahani.

² Hane xi cavisihin ngu barcu xi cavetju tsêhê nandya Andramitio xi cjue jingunduju ni ndaya tsêhê distritu Asia ne, sehe quiji barcu cojo nijí. Hacuaha quiji cha Aristarco cojo nijí, ngu cha Tesalónica tsêhê distritu Macedonia.

³ Hane xi camá nchujun jan ne, cafehe barcu cojo niji nandya Sidón. Hane Julio ne, casahmi me cjuandaja cojo Pablo, casua me cahndé xi cjue Pablo ndava amigu rê me xi cjuahacuenda amigu jan xcusun xi ma chaja rê Pablo.

⁴ Hane xi quiji barcu cojo niji tsêhê ngajan ne, cavatjin jingunduju ni taha ngaxtun Chipre, ngu rquí nangui xi vetjucaa xcun ndachacun, tsêhê xi tjo ne, casuaain cahndé xi ngu quixi ni cjue barcu cojo niji.

⁵ Hane xi cavatjin xcun ndachacun quixi rê distritu Cilicia cojo distritu Panfilia ne, cafihin nandya Mira, ngajan distritu Licia.

⁶ Hane ngajan casacu rê capitán ngu barcu tsêhê Alejandría xi cjue Italia. Sehe catsingusehen niji me barcu vêhê.

⁷ Hane xi catsanguin tafi tafi ngujo nixtin sa ne, cojo jemu jyê cjuandya ne, cafihin quixi rê nandya Gnido. Hane tsêhê xi casuaain tjo cahndé xi ngu quixi ni quiji barcu cojo niji ne, cavatjin taha ngaxtun Creta, quixi rê Salmón.

⁸ Handasa jemu chja cavatjin camá, peru quiji barcu cojo niji tafi tafi hisca xi cafihin ngu cahndé xi hmí rê Cahndé Ndajyihí, tiña nandya Lasea.

⁹ Jemu tivatju nixtin, hacuaha jemu tsavi xi cjue barcu xcun nandá, tsêhê xi camatiña chan hnchan. Vêhê xi Pablo ne, cachja me cojo xuta jan cuitjin:

¹⁰ —Ngayujun ni ne, ngeuhe cuichjá cojo nuju ta vutsején ne, xi tivanguen vi ne, jemu tsavi, jemu jyê nichajan tsêhê chaha cojo tsêhê barcu, hacuaha hisca tjin yahnga ngayaan xi chajá yaan. —Cuatjin cachja me.

¹¹ Peru capitán jan ne, hitsé sa casahmicuenda me cjua xi cachja cha xi cjuicojo barcu jan xi cuma rê cjua xi cachja Pablo.

¹² Hane tsêhê xi cahndé xi tacun barcu jan ne, machjiriin xi ngajan cuejña barcu nixtin rê chan hnchan, vêhê xi hitsé sa cjín xuta xi cachja me xi cuetjuxin ni barcu cojo rê me tsêhê ngajan tuxa ma sa xi cuma cuechú me hisca Fenice, ngu nandya ngajan Creta, xi ndatjin cahndé tacun, hane ngajan cuma cuiyuju me yêjê nixtin rê chan hnchan.

Tjo hñu xi cavanga ngajan xcun ndachacun

¹³ Hya xi camá ne, cavetsihin cavanga ngu tjo jeya jeya ni xi canduva táha ladu xi ndatjin. Sehe ngajan xi xi má rê me ne, cuma sahmi me sacuatjin xi ha catsingatahacacun me. Vêhê xi cavetju me quiji me, ndaya ndaya rê Creta.

¹⁴ Peru sehe tu hitsé cjui barcu jan ne, canduva ngu tjo hñu ladu xi choho tjin,

¹⁵ catsivaha rê barcu. Hane tsêhê xi maji fi barcu taha hiscan nduva tjo ne, catihin cahndé quiji barcu hacutjin xi cjui tjo.

¹⁶ Hane xi cavatjin taha ngaxtun ngu rquí lihndi nangui quixí xi hmí rê Clauda hiscan xi yiin cjuachan vanga tjo ne, cojo chja ne, peru camá cachjihin barcu lihndi xi tjengui jan,

¹⁷ sehe cachjuvinniji caveyín cahntsua barcu jyê. Sehe ngajan xi cha xi cjuicojo barcu jan ne, camá catsihñuhñu cha barcu jyê. Hane tsêhê xi tsacjun me xi cjuecojo tjo jan barcu ngu cahndé chojyihí hiscan xi jemu tsavi xi cjue barcu ne, catsitujne me tsjian xi faha rê tjo, casua me cahndé quiji barcu hacutjin cjui tjo.

¹⁸ Peru tsêhê xi quijinduju sa cavanga tjo hñu jan ne, xi camá nchujun jan ne, cavetsihin cacandiya me chaha xi hincha barcu jan ngajñi ndachacun.

¹⁹ Hane xi camá nguini, cojo tsja ni me, cafaha me yêjê ni xcusun xi tsêhê barcu jan, cavetsihin cacandiya me ngajñi ndachacun.

²⁰ Hane xi ha jemu cjín nixtin xi cahyiin tsuhi cahyiin niñu hacuaha tjo jan ne, cjuinduju sa tivanga jercu tu hñu camahani ne, ngajan café cjuetacun xi cuetjintjin.

²¹ Hane tsêhê xi ha jemu cjín nixtin xi cjêê siné xuta jan niñu ne, cavetjujñi Pablo ngajñi rê me, cachja me cuitjin:

—Ngayujun ni ne, ngeuhe cuichjá cojo nuju ta hitsé sa ndatjin sa xi cavetuhun rcun cjua xi cachjá cojo nuju hane cavetjuun ni tsêhê Creta. Tsajin mé cjuañihí xi cuitjin cuatjun cuma hacuaha tsajin mé xi cuitjin nichajan.

²² Quihndé ne, tuhun cjuetacun xahasen nuju ta hisca xi ngu ngayun ne, chajin ngayun. Xi chajá ne, barcu.

²³ Hvê xi cuatjin cuma ta, nguchjin ne, cafehe ngu ángel rê Nina xi Nai naha hacuaha xi fahárcun.

²⁴ Hane cachja cojo ná cuitjin: “Xi carcuin Pablo. Hatuxa tjin ri xi cuechi xcun César, me xi matitjun camahani. Hacuaha Nina ne, sahmi me cjuandaja cojo ri xi cuetjutje yêjê xuta xi cjui cojo ri.” Cuatjin cachja ángel cojo ná.

²⁵ Vêhê xi tuhun cjuetacun xahasen nuju ngayujun ni ta, tsêhê xi ngahan ne, mangucácun cojo Nina, hane hatuxa cuatjin cuma sacuatjin cachja ángel cojo ná.

²⁶ Peru tjin rê xi scandi naja tjo jan xcun ngu rquí nangui quixí. —Cuatjin cachja Pablo.

²⁷ Xi cavatju teñuju nguixun xi cuatjin cjuí ngehe cjuí ngajan tjo cojo barcu xi nechinyin xcun ndachacun xi hmí rë Adriático ne, sacuaaha chuva rë vassen nixten ne, catsingatahacacun cha xi cjuicojo barcu jan xi ha jima tiña barcu tsëhë nangui quixí.

²⁸ Hane catsichuva cha hacutjin nungun nandá hiscan quisun barcu, hane casacuse rë cha xi can tyjuhun ngu metru nungun nandá jan. Hane xi quiji sa barcu hitsë ni nguvan ne, catsichuva nga cha nandá, hane can yatu metru nungun nandá jan.

²⁹ Hane tsëhë xi tsacjun cha xi satëcoo barcu jan cojo ngu naxi ne, cacandiya cha ñuju quicha hai xi machjirëhë xi cuiyujuhñu barcu ngajñi nandá xi tsuvahñu rë, hacuaha jercu cafehya rë cha Nina xi sahasen sanii.

³⁰ Hya xi camá ne, yahnga cha xi cjuicojo barcu jan ne, meje cuetjuxin cha tsëhë barcu xi cuetjutje cha. Vëhë xi catsitujne cha barcu lihndi jan xcun ndachacun, sacuaaha xi meje scandiya sa cha quicha ngajñi nandá taha xcun barcu.

³¹ Sehe ngajan xi Pablo ne, cachja me cojo capitán cojo sindadu xi yahnga jan cuitjin:
—Sa xi cuiyijin cha xi cuacun vë cahntsua barcu jyë ne, ngayun ne, cumaji cuetjuntjun.
—Cuatjin cachja me.

³² Ngajan xi sindadu jan ne, cavatë cha nahñu xi yaha rë barcu lihndi jan, sehe catsismi cha.

³³ Hya xi ha tiña sahasen ne, cachja Pablo cojo yëjë xuta jan xi sinë me niñu, cuitjin cachja me:

—Ha quihndë teñuju nixtin xi nechunyun rë mé xi cuatjuun cuma hacuaha hisca hitsë niñu cjëë xinu.

³⁴ Vëhë xi tichjá cojo nuju ta, xinu niñu. Xi cuatjin ne, scaa nuju cuetjuntjun ta hisca ngu ngayun ne, chajin hisca ngu tsjarcun. —Cuatjin cachja Pablo.

³⁵ Hane xi cafë cachja me cuatjin ne, cafaha me niñu ne, sehe casua me nacuechji rë Nina xcun yëjë ni xuta jan. Hane xi cavatëcja me niñu jan ne, sehe cavetsihin cajinë me.

³⁶ Hya xi camá ne, yëjë ni xuta jan ne, casacu rë me cjuetacun, hane hacuaha cojo me cajinë me niñu.

³⁷ Ngayijin ni xi nechinyin barcu jan ne, jo cientu cojo jyanchan tyjuhun ngu má ngayin.

³⁸ Hane hya xi ha ndaja camá rë xahasen rë me xi cajinë me niñu jan ne, cacandiya me trigu jan ngajñi ndachacun xi cuma nguijna sa barcu.

Cavetsun barcu casahmi tjo

³⁹ Hane xi casahasen ne, cavëë me ngu cahndë hiscan xi hvíin me jani jan. Peru hacuaha cavëë me ngu cahunchun xi jemu jyë tsumi jiña tjeheh rë. Hane caviyujucacun me xi sahmi me cjuandya xi barcu ne, ngajan cuechú.

⁴⁰ Hya xi camá ne, cavatë me nahñu xi yaha rë quicha hai jan, sehe caxincha ni ngajan ngajñi nandá. Hacuaha cavëhëndaya me ya xi veyaquixi rë barcu hacutjin cjue. Hane xi catsiquijin me tsjian xi faha rë tjo jan ne, sehe cavetsihin quiji barcu jan quixi rë tsumi jan.

⁴¹ Peru xi cafehe barcu ngu cahndë hiscan tacun ngu naxi ngahma nandá ne, ngajan casatë. Hane taha xcun barcu jan ne, ngajan casetahahñu, ha quihndë camaji quiji. Peru taha ngaxtun barcu jan ne, jercu tivetsun tsëhë tsindyu rë nandá xi vaja rë.

⁴² Hane sindadu jan ne, catsingatahacacun cha xi tsiquehen cha presu, sá tu cuatë presu jan nandá ne, cuanga.

⁴³ Peru capitán jan ne, tsëhë xi meje cuaxëtje me Pablo ne, casuaain me cahndë xi sahmi sindadu jan hacutjin xi meje rë cha. Hya xi camá ne, cavitexa me yëjë ni xuta xi ma vatë nandá ne, tjun tjun me caticandiya me yojo rë me ngajñi nandá, catji me quixi rë tsumi jan.

⁴⁴ Hane me xi yahnga xi maji vatë nandá jan ne, catjaha me ngu rquí yatë o sa ngu ya tsëhë barcu jan. Cuatjin camá xi ngayijin ni ne, caphin nangui quixí, hacuaha cavetjintjin.

28

Cafehe Pablo ngajan Malta

¹ Hane xi ha cavatju cavetjintjin ne, sehe casacu camachaya niji xi ngu rquí nangui xi vetjucaa xcun ndachacun jan ne, Malta hmí rë.

² Hane xuta xi nangui rë jan ne, hacuiin hitsë cjuandaja casahmi me cojo niji. Cavejña me ngu ndava ndihi jyë ne, sehe cajindaya niji me ngayijin ni, tsëhë xi hacuaha cavetsihin cavaha tsi hane jemu hnchan.

³ Hane xi cafaha Pablo ngu tyjá chaquin quiji caviyujusun me xcun ndihi jan ne, tsëhë suë rë ndihi jan ne, vanga ngu yë cavetju chu ngajñi rë chaquin xi caviyujusun me jan, hane cafaha chu tsja me, hane catsismii chu ngutjen.

⁴ Hane xi cavëë xuta xi nangui rë jan xi tyjanguitaha cuaha yë jan tsja Pablo ne, sehe cachja me cojo xicjin me cuitjin:

—Ngu cha tsiquehen jain rë cha vi, vëhë xi handasa cavetjutje cha tsëhë ndachacun ne, peru nina ne, suaain me cahndë xi cuejña sa cha cjuahñu. —Cuatjin cachja xuta jan.

⁵ Hane xi cavitsune Pablo tsja me ne, cjanenguiya chu ngajñi ndihi jan. Peru me vëhë ne, tsajin mé camá rë me xi cafaha chu me.

⁶ Xuta jan ne, xi má rë me ne, cuijin squee Pablo o sa xi tu ñahñu ne, cueya me. Peru xi ha jemu jyë hora vutsejen xuta jan xi tsajin mé má rë Pablo ne, catsindeya me cjuá rë me, hane sehe cavetsihin cachja me xi Pablo ne, ngu nina me.

⁷ Hane tiña tsëhë cahndë jan ne, siutahá nangui rë me xi matitjun tsëhë nangui xi vetjucaa xcun ndachacun jan, me xi hmí rë Publio. Me vëhë cafahatsja niiji me, hacuaha casahmi me cjuandaja xi casua niiji me cahndë ndava me xi cavinechin jan jyan nixtin.

⁸ Hya xi camá ne, nahmi rë Publio jan ne, jiña me xi hmu rë me tsëhë chíhin suë cojo chíhin jni. Hane Pablo ne, quiji vutsejen me me, hane cafehya rë me Nina ngatsë rë xuta hmu rë jan. Hane xi cavisanetsja Pablo me ne, camandaja me.

⁹ Xi cavatju vëhë ne, hacuaha canduva tjengui yëjë sa xuta hmu rë tsëhë nangui vëhë Pablo ne, camandaja me.

¹⁰ Xuta jan ne, jemu casahmi me cjuandaja cojo niiji, hane xi cavetjin catsanguin nga cojo barcu ne, casua me hacutjin xcusun xi machaja niiji.

Cafehe Pablo ngajan Roma

¹¹ Xi cavatju jyan sá ne, cavetjin catsanguin cojo ngu barcu xi cavéjña jan yëjë nixtin tsëhë chan hnchan. Barcu jan ne, nandya Alejandria canduva, hacuaha Nina Lihma hmí rë.

¹² Hane xi catsanguin sa hitsë ne, cafihin nandya Siracusa, hane ngajan cuinechin jyan nixtin.

¹³ Hane xi cavetjin ngajan ne, quiji nduju sa barcu cojo niiji ne, cafihin nandya Regio. Hane xi café ngu nixtin xi nechintihin jan ne, cavetsihin cavanga ngu tjo xi ndatjin cjui, sehe quiji nga barcu cojo niiji, hane xi camá nchujun ne, cafihin nandya Puteoli.

¹⁴ Hane xi cafihin jan ne, cavechintihin ngujo xuta ladu rë Jesús, hane cachja me xi cuinechintihin ngu totje cojo rë me jan. Hane ha cuatjin chuva vëhë ne, cavetjin Cesarea hane cafihin hisca Roma.

¹⁵ Hane xuta ladu rë Jesús xi siu ngajan Roma ne, xi camachaya rë me xi ha jima tiña ngayin ne, canduvatjengui niiji me ndiya. Ngujo me ne, cafehe me hisca hiscan hmí rë Ndetsin Apio. Hane ngujo nga me ne, cafehe me hiscan hmí rë Jyan Cantina. Hane xi cavéë Pablo xuta jan ne, casua me nacuechji rë Nina, hacuaha casacu rë me cjuetacun.

¹⁶ Hane xi cafihin Roma ne, xutaxa rë jan ne, casua me cahndë xi cjuini Pablo ndavaya hane cjue me ndava ngu xuta cuejña me, peru cojo ngu sindadu xi sahmi cuidadu xi hacuini cuanga me.

Catsingijnetaha Pablo cjuá cojo xuta changá rë yungun

¹⁷ Hya xi camá ne, xi café jyan nixtin quitahá Pablo jan ne, casahmi tangun me xuta xi matitjun tsëhë ngajñi rë xuta tjë rë Israel. Hane xi camatangun xuta jan ne, sehe cachja Pablo cojo rë me cuitjin:

—Ngayujun ni ngayun xuta tjë rë Israel matsejen ne, nguehe cuichjá cojo nuju ta handasa tsajin mé casahme condra yëjë xuta naja o condra rë xcusun rë xutachanga naja ne, peru cafaha ná me, casahmi ná me entregadu tsja xutaxa rë Roma ngajan Jerusalén.

¹⁸ Hane xi cafahataha ná xutaxa rë jan ne, meje tsismi ná me, tsëhë xi tsajin jyë naha xi vechú chuva rë xi cueya.

¹⁹ Peru xi cachja xutaxa rë yungun naja xi ndajintjin xi cuma ndaya ngahan ne, casahmi ná nguyjé xi caféhya xi cuma ngahan consina tsja César, me xi matitjun camahani. Cuatjin casahme, handasa tsajin mé jyë meje cuíncha tsëhë xuta naja.

²⁰ Ngatsë rë cjuacjintacun vëhë ne, vëhë xi cachjá xi cuinduvun tjengun ná, cojo sa xi cuichjá cojo ngu ngujo cjuá ta, tsëhë xi ngatsë rë me xi vetahantacun ngayejen ni ngayaan xuta tjë rë Israel ne, vëhë xi cuitjin tjinhñu ngahan vi. —Cuatjin cachja Pablo.

²¹ Ngajan xi xuta xi cuacun jan ne, cuitjin cafayangui me:

—Peru ngayin ne, hisca ngu xujun xi chja condra nuju xi nduva tsëhë Jerusalén ne, cjëë chjihinntsin. Hacuaha tsajin hisca ngu xuta naja xi nduva me tsëhë ngajan xi choho chja me tsujun cojo niiji.

²² Quíhndë ne, meje cuisñiji hacutjin fi cjuatacun nuju ta, tsëhë xi sacuaha cjuatacun vihi ne, hyin ta jinguyjé ni ne, choho chja xuta tsëhë. —Cuatjin cafayangui xuta xi cuacun jan.

²³ Hya xi camá ne, cavejña xuta xi cuacun jan ngu nixtin xi cuya nga me. Hane xi cavuya me ne, hitsë sa jercu cjín me xi cafehe me hiscan tacun Pablo. Ngajan xi Pablo ne, cuaha nixtin cachja me cojo xuta jan tsëhë gobiernu xi sahmi Nina. Hacuaha casahmi Pablo ngahñu xi cumacjain rë yëjë xuta jan xi Jesús ne, me vëhë xi catsingatju Nina me, sacuatjin chja xujun rë Nina xi catsihindu Moisés cojo xi catsihindu profeta hatsëë nixtin.

²⁴ Ngujo me ne, camacjain rë me cjua xi cachja Pablo, peru ngujo nga me ne, camacjaain rë me.

²⁵ Hane tsëhë xi hacuiin tangun camá cjuatacun rë me ne, cavetju me cafe me. Peru chaja sa xi cjue me ne, Pablo ne, cachja me cuitjin:

—Jemu quixi cjua rë Hasen rë Nina xi cachja profeta Isaías cojo xutachanga naja, cjua xi cachja cuitjin:

²⁶ Tihin tjengui xuta naha hane tinoje cojo rë me xi hatuxa cuihndë me, peru cuijnii rcu me hisca hitsë. Hatuxa scuëë me, peru hvín me mé jan.

²⁷ Cuatjin cuma ta, tsëhë xi cjuatacun rë me ne, tichjá, tyjavañuju me cojo tuxcun me ne, cavechja me, sá tu scuëë me cojo tuxcun me hane cuihndë me cojo tyjavañuju me hacuaha cuijne rcu me cojo cjuatacun rë me, sehe cuya me ladu naha xi cuaxëtjë me.

Cuatjin cachja cjua jan.

²⁸ Sa xi mijí cuiñuju ngayun sacuatjin camamiji cuiñuju xutachanga naja xi cuacun jan ne, nguehe suá cumachaya nuju ta Nina ne, cjua xi cuaxëtje me xuta ne, quihndë catsingatju me cjua vëhë tsëhë xutaxín. Me xi cuacun vë ne, cuiñuju me. —Cuatjin cachja Pablo.

²⁹ Hya xi camá ne, xuta tjë rë Israel xi cahndë me cjua rë Pablo ne, quiji cavetju me, tichja cjin me cojo xicjin.

³⁰ Ngajan xi Pablo ne, jo nu jingu cavéjña me ndihya xi cafehya me cojo renta jan. Hane ngajan cafhatsja me xuta xi quiji tjengui rë me,

³¹ casua me camachaya rë xuta tsëhë gobiernu xi sahmi Nina, hacuaha cavicuya rë me xuta cjua xi chja tsëhë Nai naja Jesucristu. Hisca ngu quiijn cavatëcja tsëhë me xi cuatjin casahmi me.

Xujun xi catsingatju San Pablo xi cafhatsja xuta Roma

¹ Ngahan, Pablo ne, visécoo rē Jesucristu sacuaaha ngu mosu hndixahan rē me, hacuaaha Nina cavaxijin ná me xi cuma ngahan apóstol, casuaxa ná me xi suá cumachaya rē xuta cjuandajiyi rē me.

² Hane ha jemu hatsēē casahmi Nina xi profeta rē me ne, tsihindu me cjuandajiyi vē xcun xujun rē Nina.

³⁻⁴ Cjuandajiyi vē ne, hacui cjua xi sua machaya naja tsēhē Quihndi rē Nina, Nai naja Jesucristu. Hya xi catsin Jesucristu, sacuaaha ngu xuta tjē rē David, catsin me. Peru Hasen rē Nina ne, jemu ndaja casua cumachaya naja xi hatuxa Quihndi rē Nina me ta catsingacun naja hya xi cavuya me cjuahñu hya xi cavatju cahme me.

⁵ Hane ngatsē rē Jesucristu ne, casacu niji cjuandaja rē Nina xi camá ngayin apóstol, cojo sa xi cuisequin rē xuta yējē ni nangui, sehe cumangucacun me cojo Nina hacuaaha cuihndē me tsēhē Nina. Hane xi cuatjin ne, cuma jyē cuma hnga Jesucristu.

⁶ Hacuaaha cojo ngayujun ni xi xuta nanguixin ngayun ne, cavaxijin nuju Nina xi camá tsēhē Jesucristu ngayun.

⁷ Ngahan ne, titsihindu nuju ngayujun ni xi nechun ngajan nandya Roma, ngayujun ni xi hmucacun nuju Nina, ngayujun ni xi cavaxijin nuju me xi camá ngayun xuta rē me. Nina Nahmi naja cojo Nai naja Jesucristu ne, catisua nuju me cjuandaja cjuajeya.

Pablo ne, meje cjue me nandya Roma

⁸ Quihndē ne, hora xi sahme oración naha cojo Jesucristu ne, suá nacuechji rē Nina naha ngatsē nuju ngayujun ni ta jingu ni ladu ne, jimachaya rē xuta hacutjin xi mangutacún cojo Jesucristu.

⁹ Ngahan ne, nguñaja xahasen naha sahme xa rē Nina xi suá cumachaya rē xuta cjuandajiyi xi chja tsēhē Quihndi rē Nina. Hane vēē Nina jain xi hatuxa veyanangē nuju,

¹⁰ yējē ni hora xi sahme oración naha. Féhya rē Nina xi sua me cahndē xi cuechú hora cuechú nixtin xi cuma cjuētjēngē nuju, sa xi cuatjin meje rē me.

¹¹ Hatuxa meje cjuētjēngē nuju, cojo sa xi suá nuju ngu cjuandaja rē Nina. Sehe ngayun ne, hitsē sa ndaja cumangutacun cojo Jesucristu.

¹² Cuma cuinújan ne, meje cjuētjēngē nuju, cojo sa xi tahan cjuasua xahasen naja xingu xingu ngayaan, ngatsē rē xi ndaja mangutacun xingu xingu ngayaan cojo Jesucristu.

¹³ Ngayujun ni ne, meje ná xi cumachaya nuju ta jemu cjin ndiya cavejñá cjuatacun naha xi cjuētjēngē nuju, peru hisca quihndē ne, camaji. Meje ná xi ngujo xuta nangui nuju ne, cuisehen me ndiya rē Jesucristu ngatsē rē xi ngahan suá cumachaya rē me cjua xi yahá, sacuatjin xi ha camá jingu sa nangui.

¹⁴ Xi má na ne, hatuxa sahmi ná ngujoyē xi cuichjá cjua jan cojo yējē ni xuta; sa xuta rcun, sa xuta yuma; o sa xuta vechu cjuatacun rē, sa xuta yuma hasen.

¹⁵ Vēhē xi hacuaaha jemu meje cjuētjēngē nuju ngajan Roma, suá cumachaya rē xuta nangui nuju cjuandajiyi xi chja tsēhē Jesucristu.

Cjuandajiyi xi sua Pablo cachaya rē xuta

¹⁶ Ngahan ne, ma savaain ná tsēhē cjuandajiyi xi chja tsēhē Jesucristu ta, tsēhē xi cjua vēhē ne, sua machaya rē xuta ta vaxētje Nina yējē ni xuta xi mangucacun cojo Jesucristu. Tjun tjun xuta Israel cuaxētje me, peru hacuaaha cuaxētje me xutaxín.

¹⁷ Cjuandajiyi vēhē ne, sua machaya naja ta Nina ne, tsicjē me jyē xi quitjen, peru suvá ni hya xi mangutacun cojo Jesucristu. Hacuaaha cuatjin chja ngu cjua xi camahindu xcun xujun rē Nina: “Xuta xi tsajin jyē rē me ngatsē rē xi mangucacun me cojo Nina ne, sacú rē me cjuahñu xatsē.” Cuatjin camahindu.

Jyē xi tjin rē xuta ngasunhndē

¹⁸ Nina xi tacun me ngahnga ne, sua me machaya naja hacutjin jemu cjan rē me ngatsē rē xi faharcuain xuta me, cojo ngatsē rē yējē ni cjuatsehen xi sahmi xuta. Hacuaaha cojo cjuatsehen xi sahmi xuta jan ne, vetsa me cjua xi cjuaquixi.

¹⁹ Cjuatacun xi cuma cumachaya naja tsēhē Nina ne, hatuxa vēē xuta xi cuacun tsehen jan ta, tsēhē xi Nina ne, ha casua me camachaya rē xuta cjuatacun vēhē.

²⁰ Nina ne, matsijin me; peru hisca nixtin xi catsindaja me ngasunhndē cojo hisca nixtin quihndē ne, matsejen ta hacui jain me xi Nina me hacuaaha tjin rē me ngahñu xi tsajin nuju tsajin nixtin cjuē. Cuatjin ma vijne rcu tu yo ni xuta hya xi vutsejen me yējē ni xcusun xi

catsindaja Nina. Vêhê xi xuta xi cuacun tsehen jan ne, sacuiyiin rê me mé xi cuichja me hya xi sua me cjuaquixi rê me xcun Nina.

²¹ Handasa vêê xuta xi tacun jain Nina ne, peru casahmijiyin casahmihngaain me Nina, hacuaha hisca casuaain me nacuechji rê Nina. Vêhê xi camachjiriin cjuatacun rê me. Hacuaha cjuatacun yuma hasen rê me ne, camajñu tsêhê.

²² Chja suvá me xi jemu vechu cjuatacun rê me, peru ngajñi rê xi chja me cuatjin ne, hitsê sa ngarca cavuya me cojo cjuatacun rê me.

²³ Hacuaha catsitjungui me Nina xi hatuxa jyê hnga me cojo cjuatacun rê me, Nina xi hatuxa hmii me. Sehe cavetsihin cafaharcun xuta xi cuacun jan tu mé ni nina ndoyojo xi catsindaja suvá me. Cafaharcun me xcusun rê xuta xi hatuxa hme me, cojo xcusun rê chu nisê, cojo xcusun rê chu yê, cojo jingu sa xcusun rê chu xi yahnga.

²⁴ Vêhê xi Nina ne, catsismicacun me xuta xi cuacun tsehen jan, cojo sa xi sahmi xuta cjuatsehen xi fehya rê xahasen tsehen xi tjin rê me. Hane casahmi xuta jan cjuatsehen cojo yojo rê me ngajñi rê me cojo xicjin me.

²⁵ Catsitjungui me Nina xi cjuaquixi. Cafaharcun me nina ndoyojo xi nina ndacha ni. Hacuaha cahndê rê xi cjuaharcun me Nina, cafaharcun me hacuaha casahmi cuidadu rê xcusun xi Nina casahmi me. Peru mameje jain xi chjaharcun rê Nina yêjê ni nu yêjê ni nixtin. Cuatjin jain.

²⁶ Vêhê xi Nina ne, catsismicacun me xuta xi cuacun tsehen jan, cojo sa xi cuma tsehen sa xahasen rê me. Hisca yachjin ne, catsitjungui ne xcusun xi ndatjin xi sacú xihin rê ne, hane casahmi na xcusun xi cuaaintjin.

²⁷ Hacuaaintjin ni casahmi cha xi xihin; catsitjungui cha xcusun xi ndatjin xi sacú chjuun rê cha, hane jercu cavetju suê cha xi cuatjin meje sahmi cha cjuatsehen ngajñi rê cha cojo xicjin cha. Xihin cojo xihin cha casahmi cha cjuasava jan, hacuaha casacu rê cha jima ngu cha castigu xi cavangui xcusun tsehen xi casahmi cha jan.

²⁸ Xi má rê xuta xi cuacun tsehen jan ne, machjiriin xi tsinguitsjen me nina. Vêhê xi Nina ne, catsismicacun me xuta jan, cojo sa xi hatuxa cumachjiriin cjuatacun rê me, hacuaha sahmi me xcusun xi ndajintjin xi nihña.

²⁹ Quitsê rê xahasen rê me cojo yêjê ni cjuatsehen xi fehya xahasen rê me sacuaha xcusun vi: jemu choho tsingatahacacun me; ña quitsê rê xahasen rê me cojo cjuaxin; meje tsiquehen xicjin me; jemu meje scaanya me tu mé ni xcusun; jemu ndacha me; jemu tsehen me; jemu ndesu me;

³⁰ choho chja me tsêhê xicjin me; choho vêê me Nina; jemu hnga cacun me; jemu xta me; vaxêndaja suvá me yojo rê me; tsindajaya me cjuatsehen; vihndiin me tsêhê xutacha rê me;

³¹ machjiriin cjuatacun rê me; sahmiichiin me ngu cjuatacun rê me; tsajin rê me cjuahmutacun; tsajin rê me cjuayumatacun.

³² Nina ne, cavitexa me xi yêjê ni xuta xi cuatjin sahmi xcusun tsehen vê ne, hatuxa vechú chuva rê xi cueya me. Hane xuta xi cuacun tsehen jan ne, handasa ha vêê me xi cuatjin cavitexa Nina, peru sahmicuendaain me ta finduju me cojo cjuatsehen jan, hisca ndama rê me tsêhê xuta xi yahnga xi cuatjin sahmi.

2

Nina ne, tsichuva me xuta cojo cjuatacun rê me hacutjin xi cjuaquixi

¹ Tu yo ni ngayun xi nichuvun jingu sa xuta cojo cjuatacun rê me ne, sacuiyiin nuju mé xi cuinújun hya xi tuhun cjuaquixi nuju xcun Nina ta, tsêhê xi hora xi nichuvun xuta ne, cjuachoyjihi xi sahmi ni me ne, ha xcusun vêhê ni nihña.

² Ha hyan ta xuta xi cuatjin sahmi xcusun tsehen vêhê ne, hya xi tsichuva Nina me cojo cjuatacun rê me ne, tsichuva me hacutjin xi cjuaquixi.

³ Peru ngayun xi nichuvun xuta xi cuatjin sahmi xcusun tsehen vêhê ne, ¿há má nuju xi cuatjuhnga ngayun xi tsichuvaain nuju Nina xi cojo ngayun nihña xcusun tsehen vêhê?

⁴ O há tsajin ne, ¿há cuendaain nuju tsêhê cjuandaja xi sua nuju Nina? ¿Há cuendaain nuju xi Nina ne, jemu jyê cacun me cojo nuju? ¿Há hyuun xi cuatjin sahmi Nina cjuandaja cojo nuju, cojo sa xi nindeyun cjuatacun nuju?

⁵ Peru ngayun ne, jemu taja rcun, hatuxa mijí nindeyun cjuatacun nuju. Xi cuatjin nihña ne, tinihña xi jima cjan sa rê Nina cojo nuju, hisca xi cuechú nixtin xi Nina ne, jemu cuma cjan rê me hacuaha sua me cumachaya nuju hacutjin tsichuva nuju me cojo cjuaquixi.

⁶ Nina ne cuechji me xingu xingu xuta tu cutjin xcusun xi casahmi xuta jan.

⁷ Xuta xi scaa rê me sahmi me cjuandaja ngatsê rê xi meje rê me xi cuma yehe cuma hnga me, hacuaha meje rê me xi chuya rê Nina tsêhê me. Meje rê me xi cuechiin nixtin xi cueya me ne, me vêhê xi sua Nina me cjuahña xatsê.

⁸ Peru xuta xi meje rë me xi suvá ni me xi ndaja tsêhë me, hacuaha vihndiin me tsêhë cjuaquixi ta suvá cjuatsehen yêjê ni xi sahmi me ne, me vêhë xi jemu cuma cjan camahani rë Nina cojo rë me.

⁹ Yêjê ni xuta xi sahmi cjuatsehen ne, sacú rë me cjuañihi, hisca sacuiin rë me chuya rë hacutjin cuaxêtje me yojo rë me. Tjun tjun xuta Israel cuatju me cuma cuatjin, peru hacuaha cojo xutaxín cuatjin cuatju me cuma.

¹⁰ Peru yêjê ni xuta xi sahmi cjuandaja ne, me vêhë xi jemu cuma yehe cuma hnga me, hacuaha jemu chuya rë Nina tsêhë me, hacuaha jemu sacú rë me cjuajeya. Me vêhë xi má xuta tjê rë Israel ne, tjun tjun cuatju me cuma cuatjin, peru hacuaha cojo xutaxín cuatju me cuma.

¹¹ Ta Nina ne, hatuxa quixi jain me cojo cjuatacun rë me xi tsichuva me yêjê ni xuta cojo cjuatacun rë.

¹² Yêjê xuta xi tsajin rë me ley rë Moisés hacuaha sahmi me cjuatsehen ne, hacuiin ley vêhë vitexa mé castigu xi cuma me; peru hatuxa cuetjintjiin me. Hane yêjê xuta xi tjin rë me ley jan hacuaha sahmi me cjuatsehen ne, tsichuva Nina me tu cutjin xi vitexa ley vêhë.

¹³ Xuta xi tu visiñuju ni sacuatjin chja ley ne, hacuiin me vêhë xi tsajin jyê quitjen me xcun Nina ta xuta xi sahmi sacuatjin chja ley jan ne, me vêhë xi cuichja Nina ta tsajin jyê quitjen me.

¹⁴ Xutaxín xi tsajin rë me ley rë Moisés jan ne, hya xi sahmi me sacuatjin chja ley vêhë cojo cjuatacun rë suvá ni me ne, ngajan ma tsejen xi sacuaha xi me vêhë má me ley rë suvá ni me.

¹⁵ Xcusun xi sahmi me tsingacun naja xi cjuaxi vitexa ley ne, ha hinchahantsua cjuatacun rë me. Ha vêhë suvá me cojo cjuatacun rë me mé xi ndaja, mé xi ndajin. Vêhë xi vinchajyê cjuatacun rë me me, o sa tsajin ne, chjatje cjuatacun rë me ngatsê rë me.

¹⁶ Ngajan xi hatuxa cuechji Nina xuta nixtin hya xi Nina tsingatju nga me Jesucristu xi tsichuva me cjuaxi hinchahma rë xuta. Hacuaha cuatjin chjá hya xi suá machaya rë xuta cjuandajiyi xi chja tsêhë Jesucristu.

Xuta tjê rë Israel xi faharcun me ley ne, vêhë sua machaya rë me xi xuta jyê me

¹⁷ Quihndê ne, ngayun xi nújun xi xuta tjê rë Israel ngayun ne, jemu vetuhuntacun ley rë Moisés. Jemu naxunndujun yojo nuju ngatsê rë xi Nina xi cjuaquixi ne, me vêhë xi nina nuju me.

¹⁸ Ha hyun hacutjin xi meje rë Nina xi nihñu; hacuaha ngatsê rë xi cachutayun ley ne, chuya nuju tsêhë cjuandaja.

¹⁹ Xi má nuju ne, jemu ndaja ninguijuxun cjuatacun rë xutaxín xi hvíin me Nina; jemu ndaja chuxuhun cjuatacun rë xutaxín xi tsajin hinchahma me ndiya rë Nina.

²⁰ Xi má nuju ngayun ne, sacuaha maestru rë xutaxín xi hvíin camahani me má ngayun. Cuatjin ningatuhuntacun ta, tsêhë xi tjin nuju ley rë Moisés jan xi yaha cjuatacun xi cjuaquixi.

²¹ Ngayun xi vicuyun rë jingu sa ne, ¿há vicuyuun suvun rë yojo nuju ni? Ngayun xi chuyiin nuju tsêhë nina ndoyojo ne, ¿há nichujun cjuanchina rë yungun rë ni?

²² Ngayun xi nújun xi ndajintjin xi nindesun cojo rë ngu chjuun, o cojo ngu xihin xi hacuiin tsajan ne, ¿há cuatjin nihñu suvun ni? Ngayun xi chuyiin nuju tsêhë nina ndoyojo ne, ¿há nichujun cjuanchina rë yungun rë ni?

²³ Ngayun xi jemu naxunndujun yojo nuju xi tjin nuju ley rë Moisés ne, ¿há choho chja xuta tsêhë Nina ngatsê rë xi nihñuchuun cjuaxi vitexa ley vë ni?

²⁴ Hacuaha cuatjin camahindu xcun xujun rë Nina: "Xutaxín ne, choho chja me tsêhë Nina, ngatsê rë xcusun nuju ngayun xuta tjê rë Israel." Cuatjin chja xujun.

²⁵ Sa xi nihñuchuhun jain sacuatjin vitexa ley ne, cumachji rêhê nuju xi cati chuxin nuju ngatsê rë xi ngu xuta rë Nina ngayun; peru sa xi nihñuchuun sacuatjin vitexa ley ne, ngayun ne, tangun ngayun sacuaha xi cjêê xti chuxin nuju.

²⁶ Vêhë xi xutaxín xi vatiin me chuxin rë me ne, sa xi sahmi me cjuandaja sacuatjin vitexa ley ne, tangun chuya rë Nina tsêhë me sacuaha xi ngu xuta xi cati chuxin rë me.

²⁷ Hane xutaxín xi sahmi me sacuatjin vitexa ley ne, handasa hatuxa vatiin me chuxin rë me, peru cuatjutaha nuju me, ngayun xi nihñuchuun sacuatjin chja ley handasa tjin nuju ley jan hacuaha cati chuxin nuju.

²⁸ ¿Yo xi má ngu xuta tjê rë Israel xi cjuaquixi? Hacuiin ngu xuta xi suvá ni xi sahmi me sacuaha xcusun rë xuta jan, hacuiin ngu xuta xi suvá ni xi cati rë chuxin rë ta,

²⁹ ngu xuta xi yaha cjuatacun rë xuta tjê rë Israel, ngu xuta xi cjuê me cojo ngasunhndê rë me sacuaha xi cati chuxin rë me, me vêhë xi ngu xuta tjê rë Israel xi cjuaquixi. Hane tsajin rë ley ngahñu xi cuma sahmi cuatjin cahntsua xahasen naja ta suvá Hasen rë Nina xi

cuma sahmi cuatjin. Xi cuatjin nihña ne, hacuiin xuta xi cuaxëndaja me tsajan ta Nina ne, me vèhè xi chuya rè me tsajan.

3

¹ Sa quixi cuatjin ne, cuma cuinenguisen ta, ¿mé vengui chjí rè xi xuta tjè rè Israel má ngayaan? ¿Mé vengui chjí rè xi cuatjin cati chuxin naja?

² Peru jemu vengui camahani chjí rè. Titjun ne, vengui chjí rè ta, tsèhè xi Nina ne, casuatsja naja me cjua rè me.

³ Peru sa xi ngujo xuta tjè rè Israel catsismicacun me Nina ne, ¿mé xi cuma? ¿Hà vèhè ni sahmi xi tsismicacun Nina ngayaan xuta rè me?

⁴ ¡Jéya! Meje rè xi cuinújan xi Nina ne, hatuxa sahmichihin me yèjè ni cjua xi chja me. Sahmi me handasa yèjè ni xuta ne, jemu ndacha me. Xcun xujun rè Nina ne, cuitjin camahindu:

Ngayun, Nina naha ne, tsèhè yèjè ni cjua xi nújun ne,

tsajin camahani mé jyé quitjin, hacuaha hatuxa scaa rè cjua nuju cjue xcun tsèhè cjua rè xuta xi tsichuva nuju me cojo cjuatacun nuju.

Cuatjin camahindu.

⁵ Sa xi ngatsè rè cjuatsehen xi nihña ne, vèhè tsingacun jain xi Nina ne, tsajin camahani jyé quitjen me ne, ¿mé cumá cuinújan? ¿Hà cuinújan xi Nina ne, hacuaha jyé quitjen me ta sahmi naja me castigu? (Tichjá cojo nuju sacuaha cjuatacun rè ngu xutajyè.)

⁶ ¡Jéya! quixiin vè ta, sa xi jyé quitjen Nina ne, sehe cumaji tsichuva me xuta ngasunhndè cojo cjuatacun rè me.

⁷ Cuejña xi cuichja sa ngu xuta cuitjin: Sa xi hitsè sa cuaxëndaja Nina cojo cjuaquixi rè me hya xi sahmi jain me sacuatjin chja me hacuaha hitsè sa ndaja tsejen xi jyé hnga Nina cojo Hasen rè me ngatsè rè cjuandacha naha ne, ¿mé má sehe cuatjin tsichuva ná me sacuaha ngu xuta tsehen?

⁸ O sa tsajin ne, cuejña xi cuichja sa ngu xuta cuitjin: Cuanguen nihña cjuatsehen, cojo sa xi cuma cuetjucaa sa cjuandaja. Hisca tjin yahnga xuta xi choho chja me tsijin ta chja me xi cjuatacun vèhè vicuyin, peru quixiin vè. Xuta xi cuacun vè ne, hatuxa satè rè me castigu xi vitexa jyé rè me.

⁹ Sa cuatjin ne, ¿há hitsè sa vengui chjí naja ngayaan xuta tjè rè Israel xi cuma rè xutaxín? ¡Jéya! Ha sehe cachjá ta ngayejen ni, sa xuta tjè rè Israel o sa xutaxín ne, ha nechan ngayejen ni ngajñi rè cjuatsehen.

¹⁰ Cuatjin camahindu xcun xujun rè Nina hiscan xi chja cuitjin:

Tsajin xuta xi tsajin jyé quitjen, hisca ngu me tsajin me;

¹¹ Tsajin yo xi vijne rcu, tsajin yo xi vanguise ndiya rè Nina.

¹² Yèjè ni xuta ne, cavetjuxin me tsèhè ndiya rè Nina, yèjè ni me ne, camachjiriin me.

Tsajin yo xi ndaja sahmi me. Ndastu ngu ni me tsajin me.

¹³ Cahntsua hntsua me ne, chojyihí sacuaha ngu tsjun xi catuxaha;

neje me ne, suvá cjuandacha visiajmi,

chuxin hntsua me ne, xan rè chu yè hinchá ngahma rè;

¹⁴ hntsua me ne, suvá cjuahngatacun quitsè rè.

¹⁵ Cojo ntsacu me ne, ngu hñu sasa cjue tsiquehen xicjin me;

¹⁶ Ndiya xi hinchá me ne, suvá xi tsinguetsun ni me cjuatacun rè xuta, hacuaha sua me xuta cjuachoho.

¹⁷ Hvín camahani me ndiya tsèhè cjuajeya.

¹⁸ Tsajin ngu hora xi tsingatahacacun me xi tsacjun me Nina.

Cuatjin chja xujun rè Nina.

¹⁹ Ha hyan ta yèjè ni cjua xi chja ley rè Nina ne, chja cojo xuta xi siu ngahma rè ley vèhè. Cuatjin xi tsajin yo cuma cuichja xi tsajin mé jyé quitjen. Hacuaha cuatjin xi yèjè ni xuta ngasunhndè vi ne, tsichuva Nina me cojo cjuatacun rè me.

²⁰ Nina ne, cuichjaain me tsèhè ngu xuta xi tsajin jyé rè me ngatsè rè xi casahmichihin me sacuatjin chja ley ta, ley ne, sua machaya naja xi ngayejen ne ne, xuta tsehen ngayaan.

Nina ne, tsicjè me jyé naja sa xi mangutacun cojo rè me

²¹ Peru Nina ne, casua me camachaya naja hacutjin tsicjè me jyé naja. Hane hacuiin ngatsè rè ley xi cuatjin sahmi me. Cjuatacun rè Nina vè ne, hisca hatsèè camahindu xcun xujun rè me.

²² Cjuatacun vèhè ne, cuitjin fi: Nina ne, tsicjè me jyé rè xuta xi mangucacun cojo Jesucristu. Cuatjin sahmi Nina cojo yèjè ni xuta xi cuatjin mangucacun me cojo Jesucristu ta Nina ne, tangun ni vutsejen me xutaxín cojo xuta tjè rè Israel.

²³ Yějê ni xuta ne, sahmi me cjuatsehen, hacuaha chaja camaha sa xi cuechutaha me sacuatjin jyê hnga Nina cojo Hasen rê me.

²⁴ Peru cojo cjuandaja rê Nina ne, tu cjuatjo ni tsicjê me jyê rê xuta, ngatsê rê xi Jesucristu ne, cavechjitje me jyê xi quitjen xuta.

²⁵ Nina ne, catsingatju me Jesucristu xi cueya me xi cuechjitje me jyê rê yějê ni xuta xi cumangucacun cojo rê me. Cuatjin casahmi Nina, cojo sa xi sua me cumachaya naja xi me vêhê ne, jemu tyjahi me cojo cjuatacun rê me hya xi jemu catsijyêcacun me cojo xuta xi caviyuju titjun hacuaha catsingatjuhnga me jyê rê xuta xi cuacun vê.

²⁶ Hacuanitjin ni sua me machaya naja xi jemu tyjahi me cojo cjuatacun rê me quihndê xi ticsicjê me jyê xi quitjen xuta xi mangucacun cojo Jesús.

²⁷ Xi cuatjin ne, ¿há cuma naxenndajan yojo naja? ¡Jéya, cumaji! Nina ne, hacuiin tsicjê me jyê naja ngatsê rê xcusun xi nihña ta suvá ngatsê rê xi mangutacun cojo Jesucristu. Vêhê xi choho nuhya rê sa xi naxenndajan yojo naja.

²⁸ Vêhê xi tsejen xi meje rê xi ningatahantacun cuitjin: Nina tsicjê me jyê rê ngu xuta ngatsê rê xi mangucacun xuta jan cojo Jesucristu, hacuiin ngatsê rê ngu ley xi vihindê me.

²⁹ Nina ne, ¿há cuma xi suvá ni xuta tjê rê Israel xi Nina rê me má me? ¿O há cojo xutaxín má me Nina tsêhê? Juun, cojo me.

³⁰ Ngu ni Nina xi tacun me. Hane me vêhê tsicjê me jyê rê xuta tjê rê Israel ngatsê rê xi mangucacun xuta jan cojo Jesucristu, hacuaha tsicjê me jyê rê xutaxín xi vatiin me chuxin rê me ngatsê rê xi mangucacun xutaxín cojo Jesucristu.

³¹ Quihndê xi tinújan xi jemu vengui chjí rê xi mangutacun cojo Jesucristu ne, ¿há tinguetsun ngahñu rê ley xi cavitexa Nina? ¡Jéya! Ha hyan ta ley rê Nina ne, hatuxa vengui chjí rê.

4

Hacutjin camá xi cafê jyê rê Abraham

¹ Sa cuatjin ne, ¿mé cuiinújan tsêhê xutachanga naja Abraham? ¿Mé xi casacu rê me xi caviyuju me nguehe ngasunhndê?

² Sa xi cachja Nina ta tsajin jyê rê Abraham ngatsê rê cjuandaja xi casahmi Abraham ne, tjin rê Abraham chuva rê xi cuaxêndaja suvá me yojo rê me. Peru cumaji sahmi me cuatjin xcun Nina ta,

³ xujun rê Nina ne, chja cuitjin: “Abraham ne, camangucacun me cojo cju xi cachja Nina cojo rê me, hane ngatsê rê vêhê xi catsicjê Nina jyê rê me.” Cuatjin chja xujun rê Nina.

⁴ Ngu xuta xi casahmi me ngu xa naja ne, chjí rê me ne, hacuiin catahan rê me sacuaaha ngu cjuandaja xi nihña cojo rê me ta catahan rê me tsêhê xi quitjen tsêhê xa xi casahmi me tsajan.

⁵ Peru sacuaaha ngu xuta xi hacuiin vihi hacuiin vêhê sahmi me xi meje rê me xi chuya rê Nina tsêhê me ta tu mangucacun ni me cojo Nina, Nina tsicjê jyê rê xuta tsehen jan. Ngatsê rê xi cuatjin mangucacun xuta jan ne, hatuxa tsicjê Nina jyê rê me.

⁶ Xutachanga naja David ne, hacuaha cachja me hatsêê nixtin tsêhê cjuasua xi tjin rê ngu xuta xi Nina tsicjê jyê rê me, hane tsimii sahmi rê há ndaja há ndajin casahmi xuta jan.

⁷ Cuitjin cachja David:
Jemu ndaja tsêhê ngu xuta xi catsinchataha Nina jyê rê me, hacuaha xi cafahacuendaain Nina cjuatsehen xi casahmi ne.

⁸ Jemu ndaja tsêhê ngu xuta xi hatuxa tsicjê Nai naja jyê rê me.
Cuatjin cachja David.

⁹ Cjuandaja vêhê ne, ¿há suvá cuma tsêhê xuta xi cati chuxin rê? ¡Jéya! ta, hacuaha cojo xuta xi vatiin me chuxin rê cuma ta, tsêhê xi ha cachjá ta Nina catsicjê me jyê rê Abraham ngatsê rê xi camangucacun Abraham cojo Nina.

¹⁰ ¿Janihya catsicjê Nina jyê rê Abraham? ¿Há cachja me cju xuta hya xi cavatju cati chuxin rê me ne?, o há tsajin ne, ¿há hya xi cjêê xtí chuxin rê me? Hacuiin hya xi ha cati chuxin rê me ta cachja me hya xi chaja sa xtí.

¹¹ Hisca xi camá ngasan ne, sehe cati chuxin rê Abraham sacuaaha ngu sellu xi casetaha rê me xi tsejen xi Nina ne, catsicjê me jyê rê Abraham ngatsê rê xi ha camangucacun me cojo Nina. Cuatjin xi Abraham ne, camatitjun me sacuaaha nahmi tsêhê yějê xuta xi cjuê jyê rê me ngatsê rê xi cumangucacun me cojo Nina handasa hacuiin xtí chuxin rê me.

¹² Hacuaaha Abraham ne, camatitjun me sacuaaha nahmi tsêhê yějê ni xuta xi xtí chuxin rê me hane hacuaha cumangucacun me cojo Nina, ta xuta jan ne, vetjungui cjuatacun rê xutachanga naja Abraham hya xi chaja sa xtí chuxin rê me.

¹³ Nina ne, cachja me cojo Abraham ta yějê ngasunhndê ne, cuma tsêhê me cojo xuta xi nduva tjê rê me. Peru hacuiin ngatsê rê xi casahmi Abraham sacuatjin vitexa ley xi cuatjin

cachja Nina cojo rë me ta cachja me cuatjin ngatsë rë xi camangucacun me cojo Nina. Vêhë xi Nina ne, catsicjê me jyê rë Abraham.

¹⁴ Cuatjin chjâ ta, sa xi suvá xuta xi sahmi sacuatjin chja ley cuma satë rë me cjuandaja xi cachja Nina jan ne, venguin chjî rë xi mangutacun cojo Nina, hacuaha machjiriin cjuaxi cachja Nina jan.

¹⁵ Chjâ xi hacuîn ngatsë rë ley xi cuatjin cachja Nina cojo Abraham ta, tsêhë xi hiscan xi sahmixa ley rë Nina ne, ngajan xi cuma xuta castigu. Peru hiscan xi tsajin ley ne, hacuaha tsajin yo xi vinchajyê rë xuta ta casahmichiin me cjuaxi vitexa ley.

¹⁶ Vêhë xi cavejña ngu cacun Nina xi sahmichihin me cjuaxi rë me cojo xuta xi cumangucacun cojo rë me, cojo sa xi tsejen ta suvá ngatsë rë cjuandaja rë Nina xi cuatjin sahmichihin me cjuaxi rë me cojo xuta. Ngajan xi tjin cjuaquixi xi sahmichihin jain Nina cjuaxi rë me cojo yêjê xuta xi nduva tjê rë Abraham, hacuîn tu suvá cojo xuta xi tjin rë me ley ta hacuaha cojo xuta xi mangucacun me cojo Nina, sacuatjin casahmi Abraham. Cuatjin xi Abraham ne, camatitjun me tsajan sacuaha nahmi naja ngayejen ni ngayaan ngajan xcun Nina.

¹⁷ Nina ne, me vêhë xi camangucacun Abraham cojo me, me vêhë xi sua cjuahñu rë nima, me vêhë xi handasa chaja sa tsindaja me ngu xcusun ne, chja me tsêhë xcusun vêhë sacuaha xi ha catsindaja me. Camahindu xcun xujun rë Nina hiscan xi cachja me cojo Abraham cuitjin: "Cavejña ri ne, xi cuma titjun ngaye sacuaha nahmi tsêhë jemu cjin xuta." Cuatjin camahindu.

¹⁸ Peru Abraham ne, handasa matsijin hacutjin cuma sahmichihin Nina cjuaxi cachja me cojo rë me ne, camangucacun me cojo cjuaxi jan, cavetaha cacun me Nina. Cuatjin xi camatitjun me tsêhë jemu cjin xuta, sacuatjin xi ha cachja Nina cojo rë me hya xi cachja me ta: "Cuitjin cjin xuta xi tjê riji." Cuatjin cachja Nina.

¹⁹ Hane hacuîn quiji ngaxtun Abraham xi mangucacun me cojo Nina handasa xi ha ngu cientu nu tjin rë me, hacuaha ha vêê me xi jemu changá camahani camá me cojo chjuun rë me xi sacú rë me quihndi.

²⁰ Peru hacuîn quiji ngaxtun me xi mangucacun me cojo cjuaxi cachja Nina cojo rë me ta hitsë sa ndaja camangucacun me. Hacuaha casahmi jyê casahmi hnga me Nina

²¹ ta, xi tsingatahacacun me ne, hatuxa tjin rë Nina chuva rë xi sahmi chihin me yêjê ni cjuaxi cachja me xi sahmi me.

²² Vêhë xi Nina ne, catsicjê me jyê rë Abraham.

²³ Quihndë ne, hacuîn suvá tsêhë Abraham xi cuatjin camahindu xi catsicjê Nina jyê rë me ta

²⁴ hacuaha cojo tsajan ngayaan, xi sehe tsicjê Nina jyê naja, ngayaan xi mangutacun cojo Nina, me xi catsicuya Nai naja Jesucristu cjuahñu.

²⁵ Cahme me ngatsë rë cjuatsehen xi nihña, hacuaha cavuya me cjuahñu cojo sa xi cuma cjuê jyê naja.

5

Cavetjuntjen tsêhë jyê naja

¹ Quihndë ne, tsêhë xi catsicjê Nina jyê naja ngatsë rë xi camangutacun cojo rë me ne, vêhë xi ngayaan ne, ha hindë tsajin sa cjuachan cojo Nina ngatsë rë xi cavaxëtje naja Nai naja Jesucristu.

² Hacuaha ngatsë rë xi camangutacun cojo rë me ne, vêhë xi casacu naja cjuandaja rë me. Hacuaha jemu sua rë xahasen naja cojo ngu cjuetacun xi cuechú nixtin xi cuechuntahan hitsë sacuatjin jyê hnga Nina cojo Hasen rë me.

³ Hane hacuîn suvá ngatsë rë cjuetacun vêhë ni ta hacuaha ma sua rë xahasen naja ngatsë rë cjuañihi xi vatjun ta, tsêhë xi ha hyan ta cjuañihi ne, vêhë vicuya naja hacutjin scaa naja tu mé ni cjuajintacun.

⁴ Hane xi scaa naja ne, vêhë sahmi xi chuya rë Nina tsajan, hane xi chuya rë Nina tsajan ne, vêhë sahmi xi cuetahan tacun Nina.

⁵ Hane xi cuatjin cuetahan tacun Nina ne, tsajin nixtin cuetju sava ngayaan ta, tsêhë xi Hasen rë Nina xi casua naja me ne, jemu caveya cjuahmutacun rë Nina cahntsua xahasen naja.

⁶ Hya xi tsajin mé camá canihña suvaan xi naxentjen yojo naja ne, hya cahme Jesucristu xi cuaxëtje me ngayaan xuta tsehen. Cahme me nixtin xi cachja Nina xi cueya me.

⁷ Tsajin cjuaquixi xi ngu xuta sua me yojo rë me xi cueya me ngatsë rë ngu me xi tsajin jyê rë. Hisca ngu xuta ndaja jain ne, hyan sa xi sacu yo xi cuetjucacun xi sua yojo rë xi cueya ngatsë rë me.

⁸ Peru Nina ne, casua me camachaya naja cjuahmutacun xi tjin rë me cojo naja hya xi Jesucristu casua me yojo rë me xi cahme me ngatsë naja, handasa xuta tsehen ngayaan.

⁹ Hane quihndë xi cafë jyë naja ngatsë rë cjuaveya rë Jesucristu ne, ngajan xi hacuaha tjin cjuaquixi xi ngatsë rë me ne, cuetjuntjen tsëhë castigu.

¹⁰ Hya xi condra rë Nina má ngayaan ne, hya camá xutandaja rë me ngayaan ngatsë rë cjuaveya rë Quihndi rë me. Hane quihndë xi camá xutandaja rë me ngayaan ne, tjin cjuaquixi xi ngayaan ne, cuetjuntjen ngatsë rë xi tacun quicun nga me quihndë.

¹¹ Hacuaha jemu sua ma rë xahasen naja ngatsë rë cjuahmutacun rë Nina, cojo ngatsë rë Nai naja Jesucristu, me xi quihndë casahmi xi camá xutandaja rë Nina ngayaan.

Hacutjin casahmi Adán cojo hacutjin casahmi Jesucristu

¹² Ntsacu cavetsihin ne, cavisehen xi hmí cjuatsehen cahntsua cjuatacun rë xuta nguehe ngasunhndë vihi ngatsë rë ngu xuta xi hmí rë Adán. Hane ngatsë rë cjuatsehen ne, cavisehen xi hmí cjuaveya nguehe ngasunhndë. Cuatjin xi yëjë ni xuta ngasunhndë ne, hatuxa hme me ta, tsëhë xi yëjë ni me ne, sahmi me cjuatsehen.

¹³ Chaja sa xi sua Nina Moisés ley rë me ne, ha hinchajñi cjuatsehen ngajñi rë cjuatacun rë xuta ngasunhndë. Peru sahmicuendaaïn me cjuatsehen xi má hiscan xi tsajin ngu ley.

¹⁴ Peru yëjë ni xuta xi caviyuju me ngasunhndë hisca nixtin rë Adán hisca nixtin rë Moisés ne, cahme me. Hisca xuta xi hacuiin tangun cjuatsehen xi casahmi me cojo cjuatsehen xi casahmi Adán ne, hacuaha cojo me cahme me. Hane Adán ne, tjin ngu xcusun hacutjin matangun me cojo Cristu, me xi sehe cuinduva me ta, ngatsë rë Adán ne, cavisehen ngu xcusun nguehe ngasunhndë, hacuaha ngatsë rë Jesucristu, me xi camangascan canduva ne, cavisehen ngu nga xcusun ngasunhndë.

¹⁵ Peru cjuandaja xi sua Nina ne, hacuiin tangun cojo cjuatsehen xi casahmi Adán. Ngatsë rë cjuatsehen xi casahmi ngu ni xuta vëhë ne, jemu cjin xuta cahme me. Peru cjuandaja rë Nina cojo cjuandaja xi tisua naja ngu ni xuta xi hmí Jesucristu ne, hitsë sa vengui chji rë hacuaha jemu ndaja cama rë tsëhë jemu cjin xuta.

¹⁶ Cuichjá nga ngu ndiya ta hacuiin tangun cavetju tsëhë cjuandaja vëhë cojo tsëhë cjuatsehen xi casahmi ngu ni Adán. Hya xi Adán casahmi me cjuatsehen vëhë ne, sehe cachja Nina xi sacuaha castigu ne, cuechú nixtin xi cueya Adán. Peru quihndë ne handasa xi jemu cjin cjuatsehen sahmi xuta ne, Nina ne, hacuaha sahmi me cjuandaja xi tsicjë me jyë rë xuta.

¹⁷ Ngatsë rë cjuatsehen xi casahmi ngu ni xuta ne, hatuxa cuma rë xuta cjuaveya. Cuanitjin hitsë sa ndaja ta, ngatsë rë ngu ni Jesucristu ne, xuta xi jemu tisacú rë me cjuandaja rë Nina xi tsicjë Nina jyë rë me tu cjuatjo ni ne, hatuxa sacú rë me cjuahñu xatsë.

¹⁸ Vëhë xi sacuatjin xi cavetjucaa castigu xi cuma rë yëjë ni xuta ngatsë rë ngu cjuatsehen jan ne, hacuanitjin ni cuetjucaa xi cjuë jyë rë yëjë ni xuta, hacuaha sacú rë me cjuahñu xatsë, ngatsë rë ngu ni cjuandaja jan.

¹⁹ Hacuaha sacuatjin xi jemu cjin xuta camatsehen cjuatacun rë me ngatsë rë xi ngu ni xuta cahndiin me tsëhë Nina ne, hacuanitjin ni jemu cjin xuta cuma me xuta xi tsajin jyë rë ngatsë rë xi ngu ni me xi cahndë me tsëhë Nina.

²⁰ Cavejña Nina ley hane ngajan xi cama cjin sa cjuatsehen xi sahmi xuta. Peru hiscan xi camacjin sa cjuatsehen ne, ngajan xi cjin sa camatsejen cjuandaja rë Nina.

²¹ Sacuatjin xi hatuxa casahmi xuta cjuatsehen hane cahme me ne, hacuanitjin ni hatuxa sacú rë xuta cjuandaja rë Nina, hane cjuë jyë rë me, sehe sacú rë me cjuahñu xatsë, ngatsë rë Nai naja Jesucristu.

6

Sacuaha xi caveyan xi cuma rë cjuatsehen hane quicun ngayaan xi cuma rë Nina

¹ Xi cuatjin ne, çhá quixi sa xi cuinújan xi ndatjin xi nihña sa cjuatsehen cojo sa xi vetjutsejen sa cjuandaja rë Nina?

² Jléya, ndajintjin! Ngayaan ne, sacuaha xi caveyan xi cuma rë cjuatsehen. Hane xi ha cavetjuxen tsëhë cjuatsehen ne, ha quihndë cumaji camahani cuinechan sa ngajñi rë cjuatsehen.

³ Çhá hyuun ta ngayejen ni ne, hya xi caxtenda ngayaan xi cumatangun ngayaan cojo Jesucristu ne, hacuiin tu xi cuma tangun ni ngayaan cojo rë me ta hacuaha cojo xi cuma tangun ngayaan cojo cjuaveya rë me?

⁴ Ngajan xi sacuaha xi caxinchaniji tangun ngayaan cojo Jesucristu hya xi caxtenda ngayaan, cojo sa xi cuma tsejen xi camatangun ngayaan cojo cjuaveya rë me. Cuatjin caxinchaniji ngayaan cojo sa xi sacuatjin xi cavuya Jesucristu cjuahñu ngatsë rë Nahmi naja xi jemu jyë hnga me cojo Hasen rë me ne, hacuanitjin ni ngayaan ta sacú naja cjuahñu xatsë xi tivanguen cojo ngasunhndë naja.

⁵ Sa xi camatangun ngayaan cojo ngu cjuaveya sacuaha cjuaveya rë Jesucristu ne, hacuaha cama tangun ngayaan cojo ngu cjuahñu sacuaha cjuahñu xatsë rë me.

⁶ Hacuaha hyan ta ngayaan ne, sacuaha xi casetaha tangun ngayaan cojo Jesucristu xcun cru, cojo sa xi cjué cuetsun yojo tsehen naja, hane cuatjin xi ha quihndé hacuini cuanguen nduju sa ndiya rê cjuatsehen.

⁷ Ta yo xi ha cahme ne, ha camandaya tsêhê cjuatsehen.

⁸ Sa xi cuatjin caveyan cojo Jesucristu ne, vetahantacun xi hacuaha cuatjin cuinechan cjuahñu cojo rê me.

⁹ Hacuaha hyan ta Jesucristu ne, quihndé xi ha cavuya me cjuahñu ne, ha quihndé cuyaaïn cueya nga me ngu ndiya. Cjuaveya ne, ha quihndé vitexaaïn rê me.

¹⁰ Xi cahme me ne, ngu ndiya ni cahme me xi cuma rê cjuatsehen; peru quihndé xi tacun nga me cjuahñu ne, tacun me xi cuma rê Nina.

¹¹ Cuatjin nuju ngayun ne, nihñucundun ni xi caveyun camahani xi cuma rê cjuatsehen, nihñucundun xi nechun cjuahñu xi cuma rê Nina xi tjin tangun cjuatacun nuju cojo Jesucristu.

¹² Vêhê xi ngayun ne, xicatuun sa cahndé xi cjuatsehen cuitexa nuju; xicanihñuu sa yêjê ni hacutjin meje rê yojo jyê nuju.

¹³ Xicatuun sa yojo nuju cojo cjuatsehen ta tuhun yojo nuju cojo Nina, sacuaha nima xi cavuya cjuahñu ngayun. Yojo nuju ne, mijí rê xi sahmi xa rê cjuatsehen ta meje rê xi sahmi xa rê cjuandaja.

¹⁴ Sacuaha cjuatsehen ne, ha quihndé vitexaaïn nuju ta, tsêhê xi hacuini ley tivitexa nuju ta cjuandaja rê Nina ne, vêhê tivitexa nuju.

Yo meje rê xi tahan yojo naja cojo

¹⁵ Sa cuatjin ne, ¿mé xi ndatjin nihña? ¿Há nihña sa cjuatsehen tsêhê xi hacuini ley tivitexa naja ta cjuandaja rê Nina tivitexa naja? ¡Jéya, hacuini cuatjin!

¹⁶ Ngayun ne, ha ndaja hyun ta sa xi tuhun yojo nuju cojo cjuatsehen xi cuinuhyun tsêhê yêjê ni hacutjin vitexa nuju cjuatsehen ne, hatuxa tjihñu ngayun cojo cjuatsehen jan, hacuaha sacú nuju cjuaveya. Peru sa xi tuhun yojo nuju cojo Nina xi cuinuhyun tsêhê me ne, hatuxa tjihñu ngayun cojo Nina, hacuaha nujuhunyun ndiya rê cjuandaja.

¹⁷ Titjun ne, hatuxa tjihñu ngayun cojo cjuatsehen. Peru nacuechji rê Nina ta quihndé ne, ha canuhyun cojo ngu ñaja xahasen nuju tsêhê cjuachacun xi casahmi Nina xi camachaya nuju.

¹⁸ Hane xi ha camandaya ngayun tsêhê cjuatsehen ne, catuhun yojo nuju cojo ndiya rê cjuandaja.

¹⁹ Tichjá cojo nuju cojo cjuaxi chjaain cuijne rcun, ngatsê rê xi hvê xi jemu chja cuijne rcun cjuatacun xi tichjá cojo nuju. Titjun ne, catuhun yojo nuju cojo cjuatsehen, cojo sa xi suvá cjuatsehen yêjê ni xi nihñu. Peru quihndé ne, cuatjin meje rê xi tuhun yojo nuju cojo ndiya rê cjuandaja cojo sa xi cuma cjué jyê nuju xcun Nina.

²⁰ Hya xi tjihñu ngayun cojo cjuatsehen ne, ndaya tjin ngayun xi cuma rê ndiya rê cjuandaja.

²¹ Peru ¿mé ndajyihí casacu nuju hya? Tsajin, ta quihndé ne, tu ma sava nuju xi ninguitsjun xcusun xi canihñu ta, tsêhê xi hya xi cuatjin nihña ne, suvá cjuaveya sacú naja.

²² Peru quihndé ne, camandaya ngayun tsêhê cjuatsehen hacuaha catuhun yojo nuju cojo Nina. Vêhê xi tisacu nuju ngu cjuatacun tyjahi xi tsajin cun rê, tisacu nuju ngu xahasen tyjahi, hacuaha hya xi cuijnetaha ne, sacú nuju ngu cjuahñu xatsê.

²³ Sacuaha chji xi sacú naja tsêhê cjuatsehen ne, hacui cjuaveya. Peru cjuandaja xi Nina sua naja me, tu cjuatjo ni sacú naja hya xi tjin tangun cjuatacun naja cojo Nai naja Jesucristu. Hane sacú naja cjuahñu xatsê.

7

Xcusun xi vicuya naja ley rê cjuavixan

¹ Ngayujun ni matsejen ne, ha hyun xi hmí rê ley. Vêhê xi ha hyun xi ley ne, vitexa naja jinguyêjê rê xi nechun cjuahñu.

² Sacuaha ngu chjuun xi cavixan na cojo xihin rê na ne, chja ley rê Moisés ta sacuaha xi tjihñu na cojo cha jinguyêjê rê xi tacun cha cjuahñu. Peru sa xi xihin rê na cueya cha ne, na vêhê ne, ha ndaya tjin na tsêhê cjuavixan xi camá na cojo xihin rê na jan.

³ Vêhê xi sa xi tacun cuaha xihin rê na, hane na vêhê ne, cjuaha na jingu sa xihin ne, jemu jyê jyê rê na. Peru sa xi cueya xihin rê na jan ne, ndaya tjin na tsêhê cjuavixan xi camá na, hacuaha tsajin mé jyê rê na sa xi cuixan nga na ngu ndiya cojo jingu sa xihin.

⁴ Cuanitjin nuju ngayun, sacuaha xi caveyun xi cuma rê ley ngatsê rê Jesucristu cojo sa xi cuma ndaya ngayun tsêhê ley, hane cuma tsêhê jingu sa me ngayun. Me vêhê ne, hacui Jesucristu, me xi cavuya cjuahñu. Cuatjin cavuya me cjuahñu cojo sa xi cuma nihña cjuandaja xi meje rê Nina.

⁵ Titjun hya xi cavinechan cojo yojo jyé naja ne, ley ne, catsingasca rè cjuatsehen ngajñi rè cjuatacun naja cojo sa xi nihña cjuatsehen. Hane ngatsè rè cjuatsehen xi canihña ne, vèhè xi cuechuntahan cjuaveya.

⁶ Peru quihndè ne, sacua ha xi caveyan xi cuma rè xcusun xi catsihñu naja, sehe ndaya tjin ngayaan tsèhè ley. Cuatjin xi ha quihndè hacuiin tjihñu ngayaan cojo ley changá vèhè ta, tjihñu ngayaan cojo cjuaxatsè tsèhè Hasen rè Nina.

Cjuatsehen xi hinchá ngajñi yojo naja

⁷ Tsèhè xi quixi cuatjin ne, ¿há cuinújan xi jemu tsehen ley rè Moisés jan? ¡jéya, hacuiin cuatjin! Peru hveen mé xi hmí rè cjuatsehen hisca xi camachaya ná cjuaxatsè ley jan. Hya ne hveen xi ndajin tjin xi tsimeje xcusun xi tjin rè jingu sa xuta, hveen hisca xi camachaya ná cjuaxatsè ley xi chja cuitjin: “Xicanimiji xcusun xi tjin rè jingu sa xuta.”

⁸ Ngajan xi ngatsè rè xi camachaya ná cjuaxatsè ley jan ne, cjuatsehen ne, catsingasca rè cjuatacun naha, hane casahmi xi ngahan ne, jemu catsimeje xcusun xi tjin rè jingu sa xuta. Suva hya xi cjéè cumachaya ná cjuaxatsè ley ne, hya xi tsajin mé casahmi cjuatsehen cojo ná.

⁹ Titjun xi hveen xi hmí ley ne, sacua ha xi jemu ndajiyihi teñña. Peru hya xi camachaya ná tsèhè cjuaxatsè ley jan ne, cavascaya rè cjuatsehen ngajñi rè cjuatacun naha,

¹⁰ hane sacua ha xi cavéya ngahan. Hane cjuaxatsè ley vèhè ne, cahndè rè xi cavisecoo ná xi sacú ná ngu cjuahñu xatsè ne, sacua ha xi catsiquehen ná.

¹¹ Cuatjin camá ta, tsèhè xi ngatsè rè xi camachaya ná cjuaxatsè ley jan ne, cjuatsehen ne, cavindacha ná. Hane cojo cjuaxatsè ley jan ne, casacu ná cjuaquixi xi xin caviteñña tsèhè Nina.

¹² Ngajan xi yéjè ni cjuaxatsè ley jan ne, hatuxa cjuaxatsè ley Nina, hatuxa cjuaquixi, hatuxa cjuandaja.

¹³ Xi cuatjin ne, ley xi ndaja jan ne, ¿há cuma xi vèhè catsiquehen ná? ¿Há cuma xi vèhè cavaxéxin ná tsèhè Nina? ¡jéya, hacuiin cuatjin camá! Cjuatsehen ne, cojo sa xi cumatsejen xi tsehen jain ne, casahmi xa cojo ngu xcusun ndaja cojo sa xi tsiquehen ná. Cuma cuinújan ne, hya xi machaya naja cjuaxatsè ley jan ne, ngajan ma tsejen xi jemu tsehen camahani cjuatsehen.

¹⁴ Ha hyan ta ley rè Moisés jan ne, tsèhè Nina vè. Peru ngahan xi tsèhè ngasunhndè ngahan ne, sacua ha xi caxteña ngahan xi cuíhndè tsèhè cjuatsehen.

¹⁵ Hisca vijniircú xcusun xi sahme. Sahmee xcusun xi meje sahme ta sahme xcusun xi chuyiin camahani ná.

¹⁶ Quihndè xi sahme xcusun xi mijí sahme ne, ha ngajan ma tsejen ta ha hvé ta ley ne, jemu ndaja.

¹⁷ Peru xi cuatjin ne, hacuiin ngahan xi sahme cuatjin ta cjuatsehen xi hinchá ngajñi yojo naha ne, vèhè xi sahmi cuatjin.

¹⁸ Ha hvé ta sacua ha ngajñi yojo jyé naha vi ne, tsajin camahani hinchá rè cjuandaja. Jemu meje sahme cjuandaja, peru maji.

¹⁹ Sahmee cjuandaja xi meje sahme ta tu cjuatsehen xi mijí sahme ne, vèhè sahme.

²⁰ Peru quihndè xi sahme xcusun xi mijí sahme ne, ha ngajan ma tsejen ta hacuiin ngahan xi sahme cuatjin ta, cjuatsehen xi hinchá ngajñi yojo naha ne, vèhè xi sahmi cuatjin.

²¹ Ngajan xi ngahan ne, hatuxa cuitjin vátju má: hya xi meje sahme ngu cjuandaja ne, hya vutsején ta tjin mé xi sahmi xi ma sahme cjuatsehen.

²² Ngahan cojo cjuatacun naha ne, jemu chuya ná ley rè Nina.

²³ Peru vutsején ta ngajñi yojo jyé naha ne, jiya sa ngu ley xi hacjahi. Hane ley xi hacjahi jan ne, sacua ha xi ticjan cojo ley xi jiya ngajñi cjuatacun naha. Hacuaha ley xi hacjahi jan ne, hacui ley rè cjuatsehen xi hinchá ngajñi yojo naha. Hane vutsején ta ley jan ne, sacua ha xi titsihñu ná.

²⁴ ¡Jemu choho camahani má ná ngahan! ¿Yo xi cuaxétje ná tsèhè yojo jyé naha vi ni? ta, ngatsè rè yojo naha vi ne, sacú ná cjuaveya.

²⁵ Suá nacuechji rè Nina ngatsè rè Nai naja Jesucristu ta me vèhè cuaxétje ná me. Ngajan xi ngahan ne, ngu ladu ne, tjihñu cjuatacun naha cojo ley rè Nina, peru ngu ladu nga ne, tjihñu yojo naha cojo ley rè cjuatsehen.

8

Hacutjin meje rè xi tjenguen ndiya rè Nina

¹ Quihndè ne, tsajin camahani castigu xi cuma naja ngayaan xi tjin tangun cjuatacun naja cojo Jesucristu ta,

² tsèhè xi quihndè xi tjenguen ndiya rè Nina xi sua naja cjuahñu xatsè ngatsè rè xa xi casahmi Jesucristu ne, vèhè xi ha tjin ndaya ngayaan tsèhè ndiya rè cjuatsehen xi sua naja cjuaveya.

³ Xcusun xi camaji casahmi ley rë Moisés ngatsë rë xi caain rë xutajyë sahmi chihin me sacuatjin chja ley ne, Nina ne, camá casahmi me. Nina catsingatju me Quihndi rë me xi cuma me ngu xuta sacuatjin ngayaan xutajyë. Catsingatju Nina Quihndi rë me jan xi tsicjë me cjuatsehen. Vêhë xi quihndi jan xi hmí rë Jesucristu ne, cahme me sacuahha castigu ngatsë rë yëjë ni cjuatsehen xi sahmi xuta jyë.

⁴ Cuatjin casahmi Nina cojo sa xi cuma nihña sacuatjin vitexa ley ta ngayaan ne, hacuiin tjenguen ndiya hacutjin xi meje rë yojo jyë naja ta tjenguen ndiya hacutjin xi meje rë Hasen rë Nina.

⁵ Xuta xi tjengui me ndiya hacutjin xi meje rë yojo jyë rë me ne, sahmi tangun me cjuatacun rë me cojo xcusun xi meje rë yojo jyë rë me. Peru xuta xi tjengui me ndiya rë Hasen rë Nina ne, sahmi tangun me cjuatacun rë me cojo Hasen rë Nina.

⁶ Xuta xi tsiniya cacun me hacutjin xi meje rë yojo jyë rë me ne, hatuxa sacú rë me ngu cjuaveya ta tsajin jiyaa Hasen rë Nina cahntsua xahasen rë me, cuechiin me xcun Nina. Peru xuta xi tsiniya cacun me hacutjin meje rë Hasen rë Nina ne, hatuxa sacú rë me ngu cjuahñu xatsë cojo ngu cjuajeya ta ha jiyaa Hasen jan xahasen rë me, hacuaha cuechú me xcun Nina.

⁷ Ngajan xi xuta xi tsiniya cacun me hacutjin xi meje rë yojo jyë rë me ne, hatuxa choho vëë me Nina ta, tsêhë xi mijí cuihndë me tsêhë cjuaa xi vitexa Nina. Hisca maji vihndë me tsêhë cjuaa xi vitexa Nina.

⁸ Xuta xi tjengui me ndiya hacutjin xi meje rë yojo jyë rë me ne, maji sahmi me sacuatjin chuya rë Nina.

⁹ Peru ngayun ne, hacuiin tjengun ndiya hacutjin xi meje rë yojo jyë nuju ta tjengun ndiya rë Hasen rë Nina, sa xi jiyaa Hasen rë Nina cahntsua cjuatacun nuju. Peru sa xi ngu xuta tsajin rë me Hasen rë Jesucristu ne, xuta vëhë ne, hacuiin tsêhë Jesucristu me.

¹⁰ Peru sa xi jiyaa Hasen xi sua Jesucristu ngajñi rë cjuatacun nuju ne, yojo nuju ne, sacuahha xi cahme ngatsë rë cjuatsehen, peru hasen nuju ne, sacú rë ngu cjuahñu xatsë ngatsë rë xi Nina ne, tsicjë me jyë nuju.

¹¹ Ha hyan ta Nina ne, catsicuya me Jesús cjuahñu. Hane sa xi jiyaa Hasen rë Nina ngajñi rë cjuatacun nuju ne, vëhë sahmi xi sua sa Nina cjuahñu rë yojo jyë nuju xi hatuxa hme.

¹² Vëhë xi ngayaan ne, tjin xcusun xi hatuxa meje rë xi nihña, peru mijí rë xi nihña sacuatjin vitexa yojo jyë naja ta

¹³ ngu xuta xi tsisahmi me sacuatjin vitexa yojo jyë rë me ne, hatuxa cueya me. Peru ngu xuta xi cojo ngahñu xi sua Hasen rë Nina me ne, titsitjengui me xcusun xi meje rë yojo rë me ne, hatuxa sacú rë me ngu cjuahñu xatsë.

¹⁴ Yëjë ni xuta xi vihndë me tsêhë Hasen rë Nina ne, me vëhë xi cjuaquixi xi quihndi rë Nina me.

¹⁵ Hasen xi casaçu nuju ne, hacuiin ngu hasen xi tsihñu nuju cojo sa xi rcun nga cuma ngu ndiya ta, hasen vëhë ne, hacui ngu xi sahmi xi cjuaquixi xi cuma ngayun quihndi rë Nina. Hya xi nujan “¡Papá!” Nina Nahmi naja ne,

¹⁶ hya tichja Hasen rë Nina cojo hasen naja xi ngayaan ne, ha quihndi rë Nina ngayaan.

¹⁷ Hane tsêhë xi quihndi rë Nina ngayaan ne, vëhë xi hatuxa cuechú nixtin xi satë naja cjuandaja rë me. Hacuaha cojo ngayaan satë naja tsêhë cjuandaja xi satë rë Jesucristu ta, tsêhë xi quihndë ne, tivatjun cjuañihi sacuatjin cavatju Jesucristu. Vëhë xi hya xi cuma ngascan ne, hacuaha cojo ngayaan cuma yehe cuma hnga ngayaan cojo cjuatacun naja sacuatjin cama jyë cama hnga Jesucristu cojo Hasen rë me.

¹⁸ Xi má ná ngahan ne, tsimii sahmi rë xi tivatjun ngayaan cjuañihi quihndë ta, tsêhë xi cjuandaja rë Nina xi sacú naja xi cuma ngascan ne, jercu tu ndaja camahani.

¹⁹ Yëjë ni xcusun xi casahmi Nina ngeuhe ngasunhndë ne, jemu siuya xi meje xati scuëë hacutjin cún hacutjin má cuma ngayaan quihndi rë Nina.

²⁰ Ta ngasunhndë ne, tu mahya xi siu yëjë ni xi siu. Peru hacuiin hatuxa xcusun xi cacún vë camameje rë xi cuatjin camá ta Nina ne, cuatjin meje rë me xi cuma. Peru tjin ngu cjuatacun.

²¹ Cuechú nixtin xi yëjë ni xi casahmi Nina ngeuhe ngasunhndë ne, hisca cojo vëhë cuma ndaya ne, ha quihndë hacuiin hatuxa cjuelhndu sa ta cuma ndaya sacuatjin cuma ndaya yëjë ni quihndi rë Nina. Hacuaha sacú rë cjuandaja sacuatjin sacú rë quihndi rë Nina cjuandaja.

²² Ha hyan ta hisca quihndë nixtin vihi ne, yëjë ni xi casahmi Nina ngasunhndë vi ne, sacuahha xi tivitsine sacuahha xi vitsine ngu chjuun xi meje tsin rë na quihndi.

²³ Hane hacuiin suvá ni ngasunhndë xi cuatjin tivitsine ta hacuaha cojo ngayaan ne, tivitsine. Ha tjin naja Hasen rë Nina sacuahha hitsë tsêhë yëjë ni xi sacú naja xi cuma ngascan. Peru vitsine ta, tsêhë xi jemu meje naja xi Nina sahmi naja me quihndi rë me xi cjuaquixi hya xi cuaxëtje me yojo jyë naja.

²⁴ Ngayaan ne, cavetjuntjen cojo sa xi cuetahan tacun Nina. Peru sa xi ha tjin naja ngu xcusun ne, ha quihndé hacuuiin cuetahan tacun xi sehe sacú naja xcusun xi ha tjin naja jan.

²⁵ Peru hya xi vetahan tacun xi sacú naja ngu xcusun xi cjéë sacú naja ne, jemu jyë tacun xi nechayan rê.

²⁶ Hacuaha ha chuya vëhé ni ne, Hasen rê Nina ne, visecoo naja, ngayaan xi caain naja nihña cjuandaja. Hisca hyaan jaré cjuandaja rê Nina xi ndatjin xi chjahyan. Peru suvá Hasen rê Nina ne, chjatje ngatsé naja cojo cjuatacun xi hisca cumaji cuinújan cojo cjua naja. Vëhé xi sacuaha xi tu fêtacun ni.

²⁷ Hane Nina, me xi vëë yëjë ni xi hinchá cjuatacun naja ne, hacuaha vëë me cjuatacun rê Hasen rê me jan ta, tséhë xi Hasen rê me jan ne, hatuxa chjatje ngatsé rê xuta ladu rê Nina sacuatjin meje rê Nina xi cuma.

Nina sahmi me xi cuetjundajan ngayaan

²⁸ Ha hyan ta yëjë ni xcusun xi má nguehe ngasunhdé vi ne, sahmi Nina xi ndaja tséhë xuta xi hmucacun me Nina, xuta xi cavaxijin Nina sacuatjin xi meje rê me.

²⁹ Hisca ntsacu cavetsihin ne, ha tjin chjiné rê Nina cjuatacun rê yo xi meje rê me xi cuma xuta ladu rê me, hacuaha hisca hya cavejña ngu cacun me xi cuma xuta xi cuacun jan sacuaha Jesucristu Quihndi rê me. Cuatjin meje rê Nina cojo sa xi cuma titjun Jesucristu ngajñi rê jemu cjín xuta xi cuma sacuaha xicjin me.

³⁰ Hacuaha xuta xi cuacun cavejña ngu cacun Nina jan ne, me vëhé xi cavaxijin Nina me; hacuaha xuta xi cuacun catsicjé Nina jyë rê jan ne, me vëhé xi casahmi yehe casahmi hnga Nina me cojo cjuatacun rê me.

³¹ Quihndé ne, nguehe cuichjá sa ngu cjua cojo nuju. Tséhë xi Nina tacun me ngatsé naja ne, tsajin camahani yo xi cuma sahmi naja condra.

³² Nina ne, catsichuvaain naja me Quihndi rê suvá me ta casua me Quihndi rê me xi cahme ngatsé naja ngayejen ni. Hane vëhé xi hacuaha hatuxa sua naja me yëjë sa xcusun xi ndaja.

³³ Tsajin yo xi cuinchajyë naja, ngayaan xi Nina cavaxijin naja me ta, Nina ne, me vëhé xi tsiçjé me jyë naja.

³⁴ Vëhé xi tsajin camahani yo xi ma cjan rê xi ngayaan cún naja. Tsajin ta, Jesucristu ne, me vëhé xi ha cahme me hacuaha ha cavuya me cjuahñu, hane me vëhé xi jemu casahmi jyë casahmi hnga Nina me cojo Hasen rê me ngajan hiscan tacun me cojo rê Nina. Hacuaha me vëhé xi tichjatje me ngatsé naja.

³⁵ Ngajan xi tsajin camahani mé xcusun xi cuaxéxin naja tséhë cjuahmutacun rê Jesucristu, handasa cuatjun cjuañihi, handasa sacuyiin hacutjin naxentjen yojo naja, handasa yo tsuyihiya tjengui naja cojo cjuahngatacun, handasa cuma jindya nangui naja, handasa cumachaja naja tsjian naja, handasa cuinechantahan tsavi xi mé xi cuma naja, handasa tsiquehen naja xuta. Hatuxa tsajin mé xcusun xi cuacun vë xi cuma cuaxéxin naja tséhë cjuahmutacun rê Jesucristu.

³⁶ Hacuaha camahindu ngujo cjua xcun xujun rê Nina xi chja cuitjin: Yëjë ni hora ne, tisquehen niji xuta ngu jo ngayin ngatsé rê xi ladu nuju ngayin; xi má rê xuta ne, ngayin ne, sacuaha chu tsánga xi cjue cueya chu ngayin. Cuatjin camahindu. Sacuatjin camahindu tséhë xuma xuta xi cuacun jan ne, hacuaha cuatjin tivatjun tijima.

³⁷ Peru caa naja yëjë ni cjuacjintacun vëhé, hisca vetjun ndaja sa ta, tséhë xi Jesucristu ne, visecoo naja me, tséhë xi hmucacun naja me.

³⁸ Hane ngahan ne, camangucacun ta tsajin mé xcusun xi cuma cuaxéxin naja tséhë cjuahmutacun rê Nina: sa cjuaveya sa cjuahñu, sa ángel sa xuta xi ma titjun, sa cjuacjintacun xi tivatjun tijima, sa cjuacjintacun xi sehe nduva, sa xutacjin xi choho vëë naja sa chiracun,

³⁹ sa ngajan ngahnga nduva, sa nguehe nangui nduva, o sa tu mé ni xcusun xi yahnga xi casahmi Nina ne, cumaji cuaxéxin naja tséhë cjuahmutacun xi tjin rê Nina cojo naja ngatsé rê xi tjin tangun cjuatacun naja cojo Nai naja Jesucristu.

9

Nina cavaxijin me xuta Israel

¹ Quihndé ne, sacuaha ngahan xi tséhë Jesucristu ngahan ne, nguehe cuichjá cjuaquixi, hacuuiin vindácha nuju. Hane tséhë xi jiya Hasen rê Nina ngajñi rê cjuatacun naha ne, vëhé xi hvé cojo cjuatacun naha ta cjua xi chjá ne, cjuaquixi hya xi chjá xi

² jercu tu choho camahani má ná, jemu jyë cjuava xi jiya cahntsua xahasen naha.

³ Hisca má cáacun ne, cjuéhya rê Nina xi cuaxéxin ná me tséhë Jesucristu sa xi cojo cjuatacun vëhé ne, yëjë ni xuta xi tangun xutachanga naha cojo ne, cuma sacú rê me cjuandaja rê Nina.

⁴ Xuta xi cuacun vë ne, xuta Israel me. Me vëhë xi camá me quihndi rë Nina, camachaya rë me hacutjin jemu jyë hnga Nina cojo Hasen rë me, camachihin ngu jo compromisu rë Nina cojo rë me, casacu rë me ley rë Nina, camachaya rë me hacutjin meje rë xi chjaharcun rë Nina, casacu rë me cjuar rë Nina hacutjin sua Nina me cjuandaja.

⁵ Me vëhë xi canduva me tjë rë xutachanga niji, hacuaha tjë rë me vëhë ne, canduva Jesucristu sacuaha ngu xuta. Hane Jesucristu jan ne, me vëhë xi Nina me tsëhë jingujyë ni ngasunhdë, hacuaha chjaharcun rë me yëjë nu yëjë nixtin. Cuatjin jain.

⁶ Hacuia chjã xi cavetjincaain cjuar xi cachja Nina cojo xuta Israel. Ha hyun ta xuta xi canduva tjë rë xutachanga xi hmí rë Israel ne, hacuia yëjë me xi xuta ladu rë Israel xi cjuaquixi me.

⁷ Hacuaha xuta xi canduva tjë rë Abraham ne, hacuia yëjë me xi ladu rë Abraham me xi cjuaquixi, ta cuitjin cachja Nina cojo Abraham: "Suvã tjë rë quihndi riji Isaac ne, vëhë ni xuta xi cuma tjë riji xi cjuaquixi." Cuatjin cachja Nina.

⁸ Cuma cuinújan ne, hacuia yëjë ni xuta xi canduva tjë rë Abraham xi jni xi yojo rë me xi cuma quihndi rë Nina ta, suvã xuta xi tsin me sacuatjin cachja Nina cojo Abraham ne, me vëhë xi cuichja Nina xi tjë rë Abraham xi cjuaquixi.

⁹ Cuitjin cachja Nina cojo Abraham hatsëë: "Nixtin xi cuejñã xi cýa nga ne, hya tsin rë na Sara ngu quihndi xihin." Cuatjin cachja Nina.

¹⁰ Hacuaha hacuia vëhë ni má yëjë cjuar vë ta sacuaha catsijo quihndi rë Rebeca ne, ngu ni nahmi rë, me xi xutachanga niji xi hmí Isaac.

¹¹⁻¹² Hane hisca hya xi cjëë tsin quihndi xi cuacun jan, hacuaha cjëë sahmi xi ndaja xi ndajin ne, hya cachja Nina cojo Rebeca cuitjin: "Quihndi riji xi ngascan ne, cuma titjun tsëhë quihndi tjun." Cuatjin cachja Nina. Cuatjin camá cojo sa xi cuma tsejen xi Nina ne, tjün rë me chvara rë xi cuaxijin suvã me tu yo ni xi meje rë me, hacuaha tsimii sahmi rë tu mé ni xcusun xi casahmi xuta jan.

¹³ Hacuaha camahindu xcun xujun rë Nina cuitjin: "Cha Jacob ne, catsihmucacun cha, peru cha Esaú ne, choho cahvë cha." Cuatjin camahindu.

¹⁴ Xi cuatjin ne, çhá cuinújan xi Nina ne, cuaaintjin xi sahmi me? jýeya, hacuia! ta

¹⁵ Nina ne cuitjin cachja me cojo Moisés: "Ngahan ne, sahme cjuandaja cojo yo xi meje sahme cjuandaja cojo, hacuaha cumayuma ná yo xi meje cuma yuma ná."

¹⁶ Vëhë xi xuta xi sacu rë cjuandaja rë Nina ne, hacuia xuta xi jemu meje rë, hacuia xuta xi jemu sahmi vihi sahmi vëhë ta suvã Nina vaxijin me yo xi sua me cjuandaja rë me.

¹⁷ Xcun xujun rë Nina ne, chja Nina cojo me xi ma titjun tsëhë xuta Egipto cuitjin: "Ngahan ne, casahme xi camatitjun ngaye cojo sa xi cuatjin tsingácun rë xuta ngahñu naha, hacuaha cojo sa xi xuta tsëhë yëjë ni ladu ne, cumachaya rë me yo ngahan." Cuatjin cachja Nina.

¹⁸ Ngajan xi Nina ne, sahmi me cjuandaja cojo yo xi meje sahmi me cjuandaja cojo, hacuaha sahmi me xi mijí cuijne rcu yo xi meje rë me xi cuijni rcu.

¹⁹ Peru ngu ngayun ne, cuinújan cojo ná cuitjin: "Sa cuatjin ne, çmé má chaha rë xuta sahmi Nina? ta, tsëhë xi tsajin yo xi catsingatiin rë xcusun xi meje rë Nina xi cuma." Cuatjin cuinújan.

²⁰ Peru ngayun xi ngu xutajyë ni ngayun ne, çyo ngayun xi cuatjin meje cuinújan cojo Nina? Sacuaha ngu xcusun xi casahmi xuta ne, çhá cuichja cojo xuta xi casahmi jan cuitjin: "çMé má cuitjin jyih canihñu ná?" Cuatjin cuichja.

²¹ Sacuaha ngu cha chjinetiji ne, hatuxa tjün rë cha xa xi cjuaha cha ngu xtín ndasi ne, tsindaja cha jo tiji. Ngu tiji jan ne, jemu ndajyih ngu xa xi satë rë, hane tiji xingu jan ne, ngu xa xi chojyih satë rë.

²² Nina ne, tsëhë xi meje sua me cumachaya rë xuta hacutjin xi jemu cuma cjan rë me hacuaha jemu hñu ngahñu rë me ne, vëhë xi cojo yëjë cjuajeya xi tjün rë me ne, cacaa rë me cojo xuta xi hatuxa cuma cjan rë me cojo, xuta xi cavaxijin me xi hatuxa tsicjë me.

²³ Cuatjin casahmi jyë cacun Nina, cojo sa xi sua me cumachaya rë xuta hacutjin xi jemu tjün rë me cjuandaja cojo xuta xi hatuxa sua me cjuandaja rë me, xuta xi caviyuju chjine Nina cojo tjün sa, cojo sa xi sacú rë xuta jan cjuandaja rë me.

²⁴ Hane xuta xi cuacun vëhë ne, hacuia ngayaan xi cavaxijin naja Nina. Hacuia suvã ngajñi rë xuta Israel cavaxijin me ta hacuaha cojo ngajñi rë xutaxín cavaxijin me.

²⁵ Sacuaha cjuar rë Nina xi catsihindu profeta Oseas ne, cuitjin chja:

Xuta xi hacuia xuta ladu naha me ne, cuechú nixtin xi sahme xuta ladu naha me; hacuaha cojo na xi hacuia tsihmucacun ne, cuechú nixtin xi jemu tsihmucacun na. Cuatjin chja cjuar rë Nina.

²⁶ Hacuaha cachja nga Oseas cuitjin:

Ngu cahndë jan ne, cuitjin cachja Nina cojo xuta: "Ngayujun ni ne, hacuia xuta ladu naha ngayun." Cuatjin cachja Nina.

Hane handasa cuatjin cachja Nina, peru cuechú nixtin xi ngajan ne, cuma xuta xi cuacun jan quihndi rë Nina quicun.

Cuatjin cachja profeta Oseas.

²⁷ Hacuaha cachja profeta Isaías tsêhë xuta tjë rë Israel cuitjin: “Handasa sacuatjin cjin tsumi tsêhë ndachacun cuatjin cjin cuma xuta tjë rë Israel ne, peru jemu chuva me xi cuetjutje me ta,

²⁸ Nina ne, hatuxa sahmi me castigu nguehe ngasunhdë, hane xi cuechú nixtin vëhë ne, ngutjen ni sahmi me yëjë ni hacutjin xi cavejña me xi sahmi me.” Cuatjin cachja profeta Isaías.

²⁹ Hacuaha hatsëë ne, cachja nga Isaías cuitjin:

Nina, me xi hatuxa matitjun tsêhë yëjë ni xi tjin, sa ngahnga sa ngasunhdë ne, sa xi casuaain naja me xuta xi cuma tjë naja ne,

tangun ni cafë ngayaan sacuatjin cafë camahani xuta nandya Sodoma cojo xuta nandya Gomorra.

Cuatjin cachja Isaías.

Catsitjungui xuta tjë rë Israel ndiya rë Nina

³⁰ Xi cuatjin ne, cuma cuinújan xi Nina ne, catsicjë me jyë rë xutaxín ngatsë rë xi camangucacun xutaxín jan cojo Jesucristu, handasa hatsëë ne, hisca cuendaain rë xutaxín jan hacutjin sahmi Nina cojo jyë rë me.

³¹ Peru xuta tjë rë Israel ne, handasa jemu casahmi me ngahñu xi meje rë me xi tsicjë Nina jyë rë me ne, peru catsicjiin Nina jyë rë me.

³² ¿Mé má cuatjin catsicjiin Nina jyë rë me? Catsicjiin Nina jyë rë me ta, tsêhë xi xuta tjë rë Israel xi cuacun jan ne, meje rë me xi tsicjë Nina jyë rë me ngatsë rë xcusun xi casahmi me xcun ngasunhdë rë me. Peru tsêhë xi mijí cumangucacun me cojo Jesucristu ne, vëhë xi sacuaaha xi caxtenguia rë me “ndyojo xi xtenguia rë xuta”.

³³ Cjua vëhë ne, sacuaaha cjua xi cachja Nina xcun xujun rë me xi chja cuitjin:

“Ngahan vejñávasen ngu xihin ngajan ndetjún Sión,

hane xihin jan ne, sacuaaha ngu ndyojo xi xtenguia rë xuta;

peru xuta xi cumangucacun cojo xihin jan ne, tsajin nu tsajin nixtin xi cuetju sava me.”

10

¹ Ngayujun ni matsejen ne, cuichjá cojo nuju ta xahasen naha ne, jemu meje rë xi xuta tjë rë Israel ne, cuetjutje me tsêhë jyë rë me. Hacuaha cuatjin féhya rë Nina.

² Cuma cuichjá cojo nuju ta xuta tjë rë Israel ne, hacuaaha jercu tsiniya cacun me xi meje rë me Nina. Peru hacuiin ndaja vijnercu me hacutjin chuya rë Nina.

³ Hviin me hacutjin tsicjë Nina jyë rë xuta. Peru jemu meje tsicjë súvá me jyë rë me. Vëhë xi casuaain me yojo rë me cojo ndiya rë Nina, cojo sa xi Nina tsicjë me jyë rë me.

⁴ Jesucristu ne, me vëhë xi casahmichihin me yëjë ni cjua xi vitexa ley rë Moisés, cojo sa xi yëjë ni xuta xi cumangucacun me cojo Jesucristu ne, cjuë jyë rë me.

⁵ Moisés jan ne, hatsëë catsihindu me cjua vihi tsêhë xuta xi meje rë me xi cjuë jyë rë me ngatsë rë xi sahmi me hacutjin vitexa ley rë Moisés. Cuitjin catsihindu me: “Xuta xi sahmi me sacuatjin vitexa ley ne, sacú rë me cjuahñu xatsë ngatsë rë xi cuatjin sahmi me.” Cuatjin catsihindu Moisés.

⁶ Peru hacuaaha cuitjin cachja nga Moisés tsêhë xuta xi cjuë jyë rë me ngatsë rë xi mangucacun me cojo Nina: “Mijí rë xi ningatehetacuin cuitjin: ¿Yo xi cjueniji hisca ngahnga?” —sacuaaha xi cuinduvajne cojo Jesucristu—;

⁷ o ¿Yo xi cjuenje cahntsua nduchin? —sacuaaha xi cuinduvaniji cojo Jesucristu xi jiya me ngajñi rë nima.

⁸ ¿Hacutjin chja Moisés xcun cjua rë Nina ni? Cuitjin chja: “Cjua rë Nina ne, ha jemu tiña tacun xi cuma nuju; ha híncha ntsuvun xi cuinújun, hacuaaha ha híncha cahntsua xahasen nuju.” Cuatjin cachja Moisés. Cjua rë Nina jan ne, hacui cjua tsêhë hacutjin meje rë xi cumangutacun cojo Jesucristu, vëhë cjua xi titihín jimachaya rë xuta.

⁹ Sa xi ninguíxun cojo ntsuvun xi Jesucristu ne, Nina me, Nai nuju me, hacuaaha sa xi cojo xahasen nuju macjain nuju xi catsicuya Nina Jesucristu cjuahñu ne, cuétjuntjun tsêhë jyë nuju.

¹⁰ Cuatjin cuma ta, tsêhë xi macjain naja cojo xahasen naja, sehe tsicjë Nina jyë naja, hacuaaha ninguíxun cojo ntsuvan hacutjin macjain naja, sehe cuaxëtje naja Nina.

¹¹ Cuatjin ta, cjua rë Nina ne, cuitjin chja: “Yëjë xuta xi mangucacun cojo Nina ne, hatuxa cuetjin savaain me.” Cuatjin chja xujun rë Nina.

¹² Nina ne, tangun ni vutsejen me xuta tjë rë Israel cojo xutaxín ta me xi Nai naja ne, hacui ni me xi Nai rë yějë ni xuta. Me vëhë xi jemu sua me cjuandaja rë me xi cuma rë yějë xuta xi fehya rë me.

¹³ Hisca xujun rë Nina ne, cuitjin chja: “Yějë xuta xi fehya me Nai naja cjuandaja ne, cuetjutje me.” Cuatjin chja xujun rë Nina.

¹⁴ Tjin rë yo xi cuichja cojo ná cuitjin: “Peru ðhacutjin cuma cjuehya xuta cjuandaja rë ngu xi hisca cjëë cumangucacun me cojo ni? Hane ðhacutjin cumangucacun me cojo ngu xi hisca cjëë cumachaya rë me yo ni? Hane ðhacutjin cumachaya rë me yo jan, sa xi tsajin yo sua cumachaya rë me ni?”

¹⁵ Hane ðhacutjin cuma cjue sua me cumachaya rë xuta yo jan, sa xi cjëë tsingatju Nina me ni?” Cuatjin cuichja. Xujun rë Nina ne, cuitjin chja: “Jemu ndatjin camahani hya xi fehe ngu me xi nduvacojo ngu cjuandajyihí.”

¹⁶ Peru chjá ngahan ta hacuiin yějë xuta cavihndë me tsëhë cjuandajyihí jan. Hacuaha cuatjin chja profeta Isaías xcun xujun rë Nina: “Ngayun, Nai niji, jemu chúva me xi camangucacun cojo cjua niji.” Cuatjin chja Isaías.

¹⁷ Ngajan xi cumangutacun hya xi ha camachaya naja ngu cjua, hane cumachaya naja hya xi yo cuinduva sua cumachaya naja ngu cjua xi chja hacutjin casahmi Cristu.

¹⁸ Peru ðhá cjëë cumachaya rë xuta? chjá han. jýeya, hatuxa camachaya rë me! Chja nga xujun rë Nina cuitjin: Jingujyë ni ngasunhndë ne, quiji cjua rë me, hisca hiscan vijnetaha ngasunhndë cavechu cjua rë me.

Cuatjin chja.

¹⁹ Cúya cuichjá nga ngu ndiya: Xuta tjë rë Israel ne, ðhá hvíin me ni? jýeya! hatuxa vëë me ta, tsëhë xi catsihindu Moisés cjua xi cachja Nina cuitjin:

Ngahan ne, sahme xi jemu nihñu cjuaxín ngatsë rë xi sahme cjuandaja cojo xutaxín;

tsicján nuju ngatsë rë xi sahme cjuandaja cojo xuta xi hvíin me yo ngahan.

Cuatjin catsihindu Moisés cjua rë Nina.

²⁰ Hacuaha catsacjuin Isaías hya xi catsihindu me cuitjin:

Xuta xi hacuiin cavanguise ná me ne, me vëhë casacu rë me ngahan;

hacuaha xuta xi cuendaain rë me tsahan ne, me vëhë xi casuá camachaya rë me yo ngahan.

Cuatjin cachja Isaías.

²¹ Peru catsihindu Isaías cjua xi cachja Nina tsëhë xuta Israel cuitjin: “Yějë nixtin tsahan, xuta xi catsitjungui ná me.” Cuatjin catsihindu Isaías cjua rë Nina.

11

Nina ne, cavaxijin me ngu jo xuta Israel

¹ Quihndë ne, tsëhë xi cuatjin catsitjungui xuta Israel ndiya rë Nina ne, cuinengësë nuju ngu cjua: ðhá catsitjungui Nina xuta rë me ni? jýeya, hacuiin cuatjin! Ta ngahan ne, hacuaha ngu xuta Israel ngahan, tjë rë Abraham ngahan, hacuaha tjë rë Benjamin ngahan.

² Hisca ntsacu cavetsihin ne, ha vëë Nina yo xi meje rë me xi cuma xuta ladu rë me, hacuaha tsitjunguini me xuta xi cuacun vë quihndë. ðHá vitsijiinu nuju hacutjin chja xcun xujun rë Nina hiscan xi catsihindu profeta Elías cjua xi cachjajyë me cojo Nina tsëhë xuta Israel? Cuitjin cachja Elías:

³ “Ngayun, Nai naha, ha catsiquehen xuta profeta nuju hacuaha ha catsinguetsun me cahndë hiscan xi cjue cjuatjo xi cuma nuju. Ha tu suva sa tejña, peru hacuaha hisca cojo ngahan tivanguise ná me xi tsiquehen ná me.” Cuatjin cachja Elías.

⁴ Peru ðhacutjin catsicuya Nina cjua cojo Elías? Cachja Nina: “Ngahan ne, ha cavaxëxen yatu mil xuta, hane xuta xi cuacun jan ne, cjëë cjue cuixcuhnchi me xcun nina ndyojo xi hmí Baal.” Cuatjin cachja Nina cojo Elías.

⁵ Hacuanitjin ni quihndë ta handasa jemu camachuva me peru tjin sa me xi hinchja ndiya rë Nina ta, tsëhë xi cavaxijin Nina xuta jan ngatsë rë cjuandaja rë Nina cojo rë me.

⁶ Peru camá ngatsë rë cjuandaja ni rë Nina cojo rë xuta xi cuacun vë, hacuiin ngatsë rë xcusun xi casahmi xuta jan. Ta sa xi cavaxijin Nina me ngatsë rë xcusun xi casahmi me ne, cjuandaja rë Nina ne, sacuaha xi venguini chjí rë.

⁷ Ngajan xi cuma cuinújan xi hacuiin yějë xuta Israel xi casacu rë me xi vanguise me ta ngujo ni xuta Israel xi cavaxijin Nina ne, me vëhë ni casacu rë me. Hane me xi yahnga jan ne, Nina casahmi me xi mijí cuijnercu me.

⁸ Camá sacuatjin camahindu xcun xujun rë Nina hiscan xi chja cuitjin: “Nina ne, casua me xuta xi cuacun vë ngu cjuatacun sacuaha cjuatacun rë ngu cha chíhi. Vetaain rcu me hacuaha vijni rcu me. Hisca quihndë ne, cuatjin cún me.” Cuatjin camahindu.

⁹ Hacuaha hatsëë cachja David cuitjin cojo Nina:

Meje ná xi yějé ni cjuandaja xi tuhun rě xuta ne, catuya sacuaaha ngu chen, sacuaaha ngu changa,

sacuaaha ngu xcusun xi xtenguiya rě me, sacuaaha ngu castigu xi vangui suvá me.

¹⁰ Meje ná xi catama rcá me, cojo sa xi cumatsijin rě me;

hacuaha catindi ngaxtun me, cojo sa xi tsajin nu tsajin nixtin xi cuma quixi ngaxtun me. Cuatjin cachja David.

Tivetjutje xutaxín

¹¹ Quihndé ne, cuinengësé nuju ngu cjuá vi: Hya xi cavetjuxin xuta tjě rě Israel tséhě ndiya rě Nina ne, ¿há ngu ndiya xa ni cachaja camahani me? ¡Jéya, hacuiin cuatjin! ta ngatsé rě cjuatsehen rě xuta tjě rě Israel xi cuacun jan ne, casua Nina cahndé xi cuetjutje xutaxín, cojo sa xi xuta tjě rě Israel ne, sahmi me cjuachini.

¹² Ngajan xi ngatsé rě cjuatsehen rě xuta tjě rě Israel jan ne, jemu casacu rě xuta ngasunhndé cjuandaja rě Nina. Ngatsé rě xi cachaja xuta tjě rě Israel ndiya rě Nina ne, jemu casacu rě xutaxín cjuandaja rě Nina. Peru sa xi cuatjin camá ne, hya xi sacú nga rě xuta tjě rě Israel ndiya rě Nina ne, jercu sacú sa rě xuta ngasunhndé cjuandaja rě Nina.

¹³ Quihndé ne, ngayun xi xutaxín ngayun ne, ngehe cuichjá sa cojo nuju ngu jo cjuá matsejen. Ngahan ne, casuaxa ná Nina xi cjué suá cumachaya rě xutaxín cjuá rě Nina. Véhé xi jemu sahme nguñajacacun xa naha,

¹⁴ cojo sa xi cuma chini xuta xi tjě rě xutachanga naha cojo nuju. Hane xi cuatjin ne, cuisécoo rě xi cuetjutje ngu jo me.

¹⁵ Ngatsé rě xi catsitjungui Nina xuta tjě rě Israel ne, véhé cavuxaha ndiya xi cuma xticja si xi tacun ngajñi rě Nina cojo xutaxín. Ngajan xi hya xi cjuahatsja nga Nina xuta tjě rě Israel jan ne, jercu ndajyihí camahani ngu cjuandaja xi cuetjuaca ta, sacuaaha xi ngu nima cuya cjuahñu.

¹⁶ Sa xi chjahan ngu rquí nahyu hane cuinújan ta nahyu véhé ne, cuma tséhé Nina, hacuaaha cojo yějé ni nahyu xi vaquí jan ne, hacuaaha tséhé Nina. Hacuaaha sa xi cuinújan xi tyjama rě ngu ya ne, cuma tséhé Nina, hacuaaha hisca cojo tsja rě ya jan ne, hacuaaha tséhé Nina.

¹⁷ Hacuaaha sa xi xtisun ngujo tsja rě ngu ya olivu ndaja hane cuinduva tsja rě ngu ya olivu nguiña setahacoo cojo ya olivu ndaja jan ne, sehe xi cuatjin cuma ne, tsja rě ya olivu nguiña jan ne, hacuaaha sacú rě cjuahñu rě tyjama rě ya olivu ndaja jan. Ngayun xi xutaxín ngayun ne, sacuaaha tsja rě ya olivu nguiña má ngayun, xi casacu nuju cjuandaja rě Nina cahndé rě xuta tjě rě Israel xi sacuaaha tsja rě ya olivu ndaja má me.

¹⁸ Peru mijí rě xi nihñu yehe yojo nuju hane choho cuinújun tséhé xuta Israel ta, sa xi meje nihñu cuatjin ne, ninguitsjun ta hacuiin tsja rě ya xi tsuvangui rě tyjama rě ta tyjama ne, véhé tsuvangui rě tsja rě ya.

¹⁹ Cuma cuinújun cojo ná cuitjin: “Peru catsitjungui Nina ngu jo xuta tjě rě Israel cojo sa xi ngahan ne, cuma tséhé Nina ngahan.”

²⁰ Cuatjin cuma cuinújun hane cjuaquixi cjuá véhé. Ngatsé rě xi camanguaaincacun me cojo Jesucristu ne, véhé xi catsitjungui Nina me. Hane ngayun ne, ngatsé ni rě xi camangutacun cojo Jesucristu ne, véhé xi casacu nuju cahndé vé. Peru mijí rě xi nihñu jyé yojo nuju ta xi meje rě ne, rcun cuma hitsé.

²¹ Cuatjin meje rě ta, tséhé xi Nina ne, sa xi catsinchataain me xuta tjě rě Israel xi hatuxa xuta ladu rě me ne, hacuaaha tsinchataain nuju me.

²² Cahyun ni ne, Nina ne, jemu ndaja me peru hacuaaha jemu cjan rě me. Ngu ladu ne, jemu cjan rě me cojo xuta xi cavetjuxin me tséhé ndiya rě Nina. Hane ngu ladu nga ne, jemu ndaja Nina cojo nuju, sa xi cuangunxcun cojo cjuandaja rě me. Peru sa tsajin ne, cojo ngayun tsitjungui nuju me.

²³ Hane xuta tjě rě Israel xi cuacun jan ne, sa xi cuiyujuxín me xi manguaaincacun me cojo Nina ne, sacú nga rě me cahndé rě me ta Nina ne, hatuxa cuma sua nga me cahndé véhé.

²⁴ Ngayun xi xutaxín ngayun, hacuiin xuta ladu rě Nina ngayun titjun ne, peru Nina casahmi me ngayun xuta ladu rě me. Hane xi cuatjin sahmi me ne, hitsé sa chjaain sahmi me xi xuta tjě rě Israel ne, cuma nga me xuta ladu rě Nina ta, tséhé xi xuta tjě rě Israel ne, hatuxa xuta ladu rě Nina me titjun.

Cuetjutje xuta tjě rě Israel

²⁵ Ngayun ni ne, meje ná xi cumachaya nuju ngu cjuá xi sehe casua Nina, cjuatahahma xi cjěé cumachaya naja. Meje ná xi cumachaya nuju cojo sa xi hacuiin nihñu yehe yojo nuju. Cjuá xi cuichjá cojo nuju ne, cuitjin fi: jemu cjin xuta tjě rě Israel ne, vijinii rcu me cjuá rě Nina. Cuatjin cuijnii rcu me hisca hya xi yějé xutaxín xi cavaxijin Nina ne, cuisehen me ndiya rě Nina.

²⁶ Sehe yějě xuta tjě rě Israel ne, cuetjutje me tsěhě jyě rě me sacuatjin camahindu xcun xujun rě Nina:

Ngajñi rě xuta tjě rě Israel ne, cuetjyjñi ngu me xi cuaxětje rě xuta, hane cuaxěxín me xcusun rě xuta xi tjě rě Jacob xi faharcuaain rě Nina.

²⁷ Hatuxa sahmechehen compromisu naha cojo xuta, hya xi cjuaháxen cjuatsehen rě me. Cuatjin cachja Nina.

²⁸ Ngu ladu ne, tsěhě xi catsitjungui xuta tjě rě Israel cjuandajyihí xi chja tsěhě Jesucristu ne, vėhě xi choho vėě Nina me, cojo sa xi ngayun xi xutaxín ngayun ne, satě nuju cjuandajyihí vėhě. Peru ngu ladu nga ne, tsěhě xi ha cavaxijin Nina me ne, vėhě xi Nina ne, hmucacun me xuta Israel jan, ngatsě rě xutachanga rě me.

²⁹ Cuatjin ta tsěhě xi hya xi vaxijin Nina ngu xuta cojo hya xi sua rě me cjuandaja ne, hatuxa sehe tsindeyaain Nina cjuatacun rě me.

³⁰ Ngayun xi má yun xutaxín, titjun ne, canuhyun tsěhě Nina. Peru quihndě ne, camayuma rě Nina ngayun ngatsě rě xi xuta tjě rě Israel ne, hacuaha vihndiín me tsěhě Nina.

³¹ Hacuanitjin rě xuta tjě rě Israel jan ta quihndě ne, hacuaha vihndiín me tsěhě Nina, cojo sa xi sacú rě me cjuayumatacun rě Nina ngatsě rě xi ngayun ne, casacu nuju cjuayumatacun rě Nina.

³² Nina ne, catsismicacun me yějě ni xuta, cojo sa xi cuihndiín xuta tsěhě me, hane cojo sa xi hacuaha cumayuma rě me ngayějě ni xuta.

³³ Nina ne, jercu jyihí cjuanchina xi tjin rě me, jercu jyihí cjuatacun xi vechutaha me, jercu vėě me. Maji vijnercun hacutjin tsingatahacacun me. Maji vijnercun hacutjin sahmi Nina.

³⁴ Sacuatjin chja xujun rě Nina ne: “Tsajin yo vėě cjuatacun rě Nina. Tsajin yo camá catsinguixi rě Nina cojo cjuar rě me.

³⁵ Tsajin yo xi cojo tjun sa ne, casua rě Nina ngu cjuatjo, cojo sa xi Nina ne, hatuxa sahmi ngojo me cjuatjo rě xuta jan.” Cuatjin chja xujun rě Nina.

³⁶ Yějě ni xcusun xi tjin ne, Nina catsingatahacacun me sehe catsindaja me ta, tsěhě xi meje rě me xcusun xi cuacun vė. Meje rě xi nihña jyě nihña hnga Nina yějě ni nu yějě ni nixtin. Cuatjin jain.

12

Hacutjin meje rě xi cuiyuju xuta ladu rě Jesucristu

¹ Ngayujun ni ne, ngatsě rě yějě ni xi sehe cachjá cojo nuju ne, vėhě xi meje ná xi ngundiyaxa ni tuhun yojo nuju cojo Nina sacuaha ngu cjuatjo, peru ngu cjuatjo xi quicun, ngu cjuatjo xi hatuxa tsěhě Nina, ngu cjuatjo xi chuya rě me. Cuatjin nihñu ta, tsěhě xi Nina ne, jemu tjin rě me cjuayumatacun, hacuaha hatuxa ndatjin xi cuatjin chjahanrcun Nina.

² Mijí rě xi cuangun tjengun ndiya rě xuta ngasunhndě vi ta cahndě rě vėhě ne, yějě ni hora ne, tuhun cahndě xi Nina ne, tsindeya me ngayun xi sua nuju me ngu cjuatacun xatsě. Xi cuatjin ne, sacú nuju cjuaquixi mé xi meje rě Nina xi nihñu, mé xi ndaja, mé xi chuya rě Nina, mé xi cjuaquixi.

³ Nina ne, casuaxa ná me xi cuichjá cojo xuta. Hane vėhě xi chjá cojo nuju ngayujun ni ta, mijí rě xi jemu nihñu yehe yojo nuju ta meje rě xi ningatuhuntacun hacutjin xi cjuaquixi, tu cutjin cjuandaja xi casua nuju Nina xi camá camangutacun jima ngu ngayun cojo Jesucristu.

⁴ Ha hyun ta yojo rě ngu xuta ne, tjin tsja, tjin ntsacu, tjin nguixin, tjin jingu sa xcusun tsěhě, peru hacuixin tangun xa xi sahmi yějě xcusun xi cuacun vė.

⁵ Hacuanitjin naja ngayaan, handasa cjin má ngayaan ne, peru sacuaha ngu ni yojo má ngayaan hya xi tjin tangun cjuatacun naja cojo Jesucristu. Ngu ngu ngayaan ne, sacuaha ntsan má ngayaan ne, ngu ngu ngayaan ne, sacuaha ntsacu má ngayaan, ngu ngu ngayaan ne, sacuaha nguixin má ngayaan, peru ngu ni yojo má ngayaan.

⁶ Vėhě xi xa xi casacu naja jima ngu ngayaan ne, hacuixin tangun ta tu tjin cjuandaja xi casua naja Nina ne, hacuanitjin ni xa xi satě naja. Sa xi casua nuju Nina xa xi cuinújun cjuatacun rě me cojo xuta ne, tinújun, peru sacuatjin cojo ngahñu xi tjin nuju xi mangutacún cojo Jesucristu ne, cuatjin tinújun.

⁷ Sa xi casua nuju Nina xa xi cuisecun rě jingusa xingueen ne, tisecun rě me. O sa xi casua nuju Nina xa xi cuicuyun cjuar rě me ne, ticuyun.

⁸ Sa xi casua nuju Nina xa xi tuhun rě jingu sa xingueen ngu ndiya ndajyihí ne, cuatjin nihñu. Sa xi casua nuju Nina xa xi cuisecun rě jingu sa xingueen cojo tujún xi ma chaja rě me ne, tisecun rě me cojo ngu xahasen tyjahi, cojo ngu cjuatacun tyjahi. Sa xi casua nuju Nina xa xi chjuhunnstun ngu xa xi satě nuju ne, nihñu xa jan nguñajatacun. Sa xi casua nuju

Nina xa xi chjuhuncuendun xuma xingueen xi mé má rë me o mé cjuacjintacun xi vatvatu me tijima ne, sehe chjuhuncuendun me cojo cjuasua.

⁹ Mijí rë xi jo xcun jo ntsuvun xi nihmutacún xingu xingu xingueen. Catamachohotacun cojo ndiya rë cjuatsehen, hane tuhun vojo nuju cojo ndiya rë cjuandaja.

¹⁰ Nihmutacun xingun sacuatjin nihñu hmu tacún tsuhun jain. Hacuaha chjuhuncun xingun sacuaaha xi me vëhë xi hitsë sa ma titjun me tsujun.

¹¹ Chjuhuncuendun nguñajatacun cuidadu nuju, hacuiin nihñu tsëhë. Meje rë xi sacuaaha xi quisechun ngayun xi tiseccun nihñu xa rë Nai naja.

¹² Tuhun cjuasua xahasen nuju ngatsë rë xi Nina vetuhun tacun me. Caticaa nuju yëjë ni cjuañihí xi vatjun má. Hacuaha yëjë ni hora ne, nihñu oración nuju cojo Nina.

¹³ Tiseccun rë xuta ladu rë Nina hya xi tjin rë me cjuachaja. Hacuaha cojo cjuandaja chjuhuncun xuta ngu nangui hya xi fehe me ndya nuju.

¹⁴ Chjahyun cjuandaja rë Nina xi cuma rë xuta xi tsujyihyatjengui nuju me cojo cjuahngatacun. Hacuiin chjahyun ngu cjuaxti xi cuma rë me ta ngu cjuandaja chjahyun.

¹⁵ Tuhun cjuasua xahasen nuju cojo xuta xi sua rë me, hane xuta xi jhnda me ne, hacuaaha chjihndun cojo rë me. Xi cuatjin nihñu ne, tsejen xi hmutacún jain me.

¹⁶ Nihñu tangun cjuatacun nuju cojo xingun xingu xingu ngayun. Hacuiin nihñu yehe vojo nuju ta xi meje rë ne, nihñu tangun cojo, handasa xuta xi yuma cjuatacun rë. Hacuaha hacuiin nihñu sacuaaha xi jercu vechutaha cjuatacun nuju.

¹⁷ Mijí rë xi nicuyun ngu cjuachan xi casahmi xuta cojo nuju ta xi meje rë ne, nihñu ngujyë xi nihñu cjuandaja xcun yëjë ni xuta.

¹⁸ Sa xi cuma ne, nihñu ngujyë hisca vechu cjuatacun nuju, cojo sa xi cuma cuinechun ngu cjuandaja ngu cjuajeya cojo yëjë ni xuta.

¹⁹ Cuichjá cojo nuju sacuaaha xi quihndí naha ngayun: xicanihñundujun suvun ngu cjuahngatacun xi sahmi xuta cojo nuju ta tuhun cahndé xi Nina ne, cuma cjan rë me cojo xuta xi casahmi jan. Ta Nina ne, cachja me xcun xujun rë me cuitjin: “Ngahan satë ná xi sahme ngojo cojo xuta tsehen; hatuxa ngahan sahme ngojo.” Cuatjin chja Nai naja.

²⁰ Nihñu sacuatjin chja xujun rë Nina xi chja cuitjin: “Xuta xi choho vëë ri me ne, sa xi vojo rë me ne, tehe xi sinë me; hacuaaha sa xi xinda rë me ne, tehe xi cuihi me; sa xi cuatjin nihñi cjuandaja vëhë ne, nihñi xi cuma sava rë me.” Cuatjin chja xcun xujun rë Nina.

²¹ Xicatuun cahndé xi cjuatsehen ne, tsinguetsun rë cjuatacun nuju. Cahndé rë vëhë ne, cojo cjuandaja xi nihñu ne, ningquetsun cjuatsehen.

13

Hacutjin cuinuhyan tsëhë xutaxa rë

¹ Meje rë xi ngayeyen ni ne, cuinuhyan tsëhë xutaxa rë ta, tsëhë xi tsajin xutaxa rë xi viyuju me sa xi suaain Nina cahndé cuiyuju me. Hane xutaxa rë xi siu ne, cuatjin siu me ta, tsëhë xi casuaxa Nina me.

² Vëhë xi xuta xi sahmi condra me xutaxa rë ne, sahmi me condra cjuaxi Nina cavitexa me. Hacuaha xuta xi cuatjin sahmi condra ne, sacú rë me ngu castigu.

³ Xuta xi sahmi cjuandaja ne, hacuiin tsacjun me xutaxa rë ta xuta xi sahmi cjuatsehen ne, me vëhë xi tsacjun me. ¿Há meje nuju xi tsajin mé rcun xutaxa rë? Nihñu cjuandaja, sehe xutaxa rë ne, cuaxëndaja me ngayun.

⁴ Cuatjin sahmi xutaxa rë ta, tsëhë xi casuaxa Nina me xi cuisecco nuju me. Peru sa xi nihñu cjuatsehen ne, meje rë xi rcun xutaxa rë ta, tsëhë xi hacuiin tu mahya xi yaha me xa xi sahmi me castigu ta, tsëhë xi casuaxa Nina me xi sahmi me castigu xuta xi hatuxa sahmi cjuatsehen.

⁵ Vëhë xi meje rë xi cuinuhyan tsëhë xutaxa rë, hacuiin suvá ni ngatsë rë castigu xi cuatjun cuma ta hacuaaha cojo ngatsë rë xi cojo cjuatacun naja ne, ha hyan ta ndatjin xi cuatjin nuhan tsëhë me.

⁶ Hacuaha vëhë xi vechjun tujúnsa nuju ta, tsëhë xi hatuxa Nina caviyuju rë me xi fahacuenda me cjuacjintacun vë.

⁷ Tuhun rë jima ngu xutaxa rë xi satë rë me. Me xi faha tujúnsa ne, techjun cojo rë me; me xi faha tujún tsëhë xi xteña ne, hacuaaha techjun cojo rë me. Cuatjin tinuhyan tsëhë me xi satë rë xi cuinuhyan tsëhë, hacuanitjin chjuhuncun me xi satë rë xi chjahanrcun.

Cjuahmutacun ne, vëhë sahmicihin sacuatjin vitexa ley rë Nina

⁸ Mijí rë xi yëjë ni nixtin quitjun tsëhë xuta, ta ngu ni xcusun xi hatuxa quitjen ne, xi nihña hmu tacun xingueen. Cuatjin ta, yo xi sahmi hmu cacun rë xuta ne, ha cojo vëhë ni ne, sahmicihin sacuatjin chja ley rë Moisés.

⁹ Ley vëhë ne, cuitjin chja: “Xicanindesuun cojo rë ngu chjuun o cojo rë ngu xihin xi hacuiin tsujun, xicanicuun xuta, xicanihñuu cjuachëjë, xicanimuju ngu xcusun xi hacuiin

tsujun.” Cjua vëhë cojo yëjë sa cjua xi chja ley jan ne, cuitjin vijne: “Meje rë xi nihñu hmu tacún xuta sacuatjin nihñu hmu tacún suvun yojo nuju.”

¹⁰ Cuatjin chja ley ta, ngu xuta xi tjin rë me cjuahmutacun ne, hacuiin choho sahmi me cojo xuta. Vëhë xi hya xi nihña hmu tacun xuta ne, ha nihñachehen sacuatjin chja ley xi cavitexa Nina.

¹¹ Cuatjin meje rë xi nihñu ta, tsëhë xi ha hyun ta ha cavechú nixtin xi ningascun rë cjuatacun nuju ta, tsëhë xi nixtin xi cuetjutjen tsëhë jyë naja ne, hacuiin cjin sa tacun, sacuatjin hya xi sehe tu camangutacun cojo cjua xi chja tsëhë Jesucristu.

¹² Sacuaha xi nixten ne, ha tivatju, hane meje sahasen. Vëhë xi meje rë xi cuejñaxen xcusun xi má nixten, hane cuetseen nihña xcusun xi má nguixtin.

¹³ Meje rë xi cuetseen nihña cjuandaja, sacuatjin meje rë xi nihña hya xi tujyehenyan nguixtin. Mijí rë xi nihña cjuachihí, mijí rë xi va má ngayaan nechan sacuaha xi cheen hya xi tinihña ngu suhi, mijí rë xi nihña cjuachini, mijí rë xi nihña cjuatsehen cojo jingu sa yachjin, o sa xi hisca cojo jingu sa xihin, mijí rë xi chicjanyan tu mé ni xcusun, mijí rë xi nihña cjuaxintacun.

¹⁴ Peru nihñu tangun cjuatacun nuju cojo Nai naja Jesucristu, hane ha quihndë mijí rë xi ningatuhuntacun xi nihñu yëjë ni hacutjin fehya yojo jyë nuju.

14

Mijí rë xi cuinújantahan xingueen

¹ Sacuaha ngu xuta ladu rë Jesucristu xi cjëë ndaja cuijnercu me yëjë ni cjuachacun xi macjain naja ne, tuhun cahndë xi cuisehen me ladu nuju, peru hacuiin xi chicjün cojo me ngajñi rë cjuavisiajmi nuju cojo rë me.

² Cuichjá cojo nuju ngu cjua. Yahnga xuta xi ndaja vijne rcu me cjuachacun naja ne, jinë me tu mé ni xcusun comida. Peru yahnga me xi cjëë ndaja cuijne rcu me ne, ndeya ni jinë me.

³ Peru xuta xi jinë me yëjë ni xcusun ne, mijí rë xi sahmi xta me cojo xuta xi jinii yëjë ni xcusun. Hacuaha xuta xi jinii me yëjë ni xcusun ne, mijí rë xi cuichjataha me xuta xi jinë yëjë ni xcusun ta, tsëhë xi ha cafahatsja Nina xuta jan.

⁴ Cuma cuinújin: ¿mé cuenda nuju ngayun xi nújuntuhun rë mosu rë jingu sa xuta ni? Nai rë mosu jan ne, me vëhë cuichja me há ndaja há ndajin xa casahmi mosu rë me. Hane xuta ladu rë Nai naja jan ne, hatuxa cuetju ndaja me ta, tsëhë xi Nai naja ne, ma sahmi me xi cuetju ndaja xuta ladu rë me.

⁵ Cuichjá nga cojo nuju ngu cjua. Yahnga xuta ne, tjin ni nixtin xi jemu faharcun me. Hane yahnga me ne, tangun yëjë ni nixtin xi cuma rë me. Meje rë xi jima ngu xuta ne, catamangucacun me cojo cjuatacun rë suvá me hacutjin meje sahmi me.

⁶ Me xi faharcun nixtin jan ne, hacuiin nechan cjuahñu ngatsë rë Nai naja xi faharcun me nixtin hya. Hane me xi jinë yëjë ni xcusun comida ne, faharcun me Nai naja xi cuatjin jinë me ta, tsëhë xi sua me nacuechji rë Nina. Hane me xi jinii yëjë xcusun comida ne, hacuaha faharcun me Nai naja xi cuatjin jinii me ta hacuaha sua me nacuechji rë Nina.

⁷ Hisca ngu ngayaan ne, hacuiin nechan cjuahñu ngatsë rë cjuatacun naja suvaan, hacuaha hacuiin cueyan ngatsë rë cjuatacun naja suvaan ta,

⁸ sa xi nechan cjuahñu ne, nechan ngatsë rë Nai naja, o sa xi cueyan ne, cueyan ngatsë rë Nai naja. Vëhë xi hatuxa tsëhë Nai naja ngayaan ne, sa xi cuinechan cjuahñu o sa xi cueyan.

⁹ Jesucristu ne, cahme me sehe cavuya nga me cjuahñu cojo sa xi cuma me Nai rë nima cojo Nai rë xuta xi siu quicun me.

¹⁰ Vëhë xi tsajin mé tsëhë xi cuatjin nújantahan rë xingueen, tsajin mé tsëhë xi cuatjin nihña xta cojo xingueen ta, tsëhë xi ngayejen ni ne, hatuxa tjin xi cuechun xcun Nina ne, xi tsichuva me ngayaan cojo cjuatacun naja.

¹¹ Cuitjin camahindu xcun xujun rë Nina cjua xi cachja me:

Tu tjin xi cjuaquixi xi tejña ngahan ne,

hacuanitjin ni tjin cjuaquixi cuechú nixtin xi yëjë ni xuta ne, cuinduva cuixcuhnchi me xcun,

hacuaha yëjë ni xuta ne, cuichja me ta ngahan xi Nina ngahan.

Cuatjin cachja Nina.

¹² Ngajan xi jima ngu jima ngu ngayaan ne, taancuendan rë Nina xcusun xi canihña.

Mijí rë xi tahan cahndë xi cjuinenguíya xingueen ngajñi rë cjuatsehen

¹³ Vëhë xi ha quihndë mijí rë xi nichuvan xingueen cojo cjuatacun rë. Xi meje rë ne, xi cuejñangutacun xi tsajin nixtin xi nihña ngu xcusun xi sahmi xi cjuinenguíya xingueen ngajñi rë cjuatsehen.

¹⁴ Ngahan ne, tjin tangun cjuatacun naha cojo Nai naja Jesús. Hane ha hvê, hacuaha camanguacun ta tsajin hisca ngu xcusun comida xi hatuxa tsavi xi xinêê. Peru sa xi ngu xuta tsingatahacacun me xi tsavi vihi o tsavi vêhê xi xinêê ne, xi cuma rê suvá me vêhê xi tsavi.

¹⁵ Sa xi cuetsun cjuatacun rê xingun ngatsê rê ngu xcusun xi scuêê me xi xinu ne, ha quihndê tsajin nechunyun ndiya rê cjuahmutacun. Miji rê xi ninguetsun cjuatacun rê xingun ngatsê rê ngu xcusun xi chinu ta, Jesucristu ne, cahme me ngatsê rê me vêhê.

¹⁶ Vêhê xi xicatuun cahndê xi choho cuichja xuta tsêhê xcusun xi ndaja xi nihñu ta,

¹⁷ tsêhê xi hya xi nechan ngahma gobiernu rê Nina ne, cuendaain rê tsêhê tu mé ni xcusun xi chinê o sa xi hyun. Xi sahmi nguujyê ne, xi tjin naja ngu xahasen tyjahi, ngu cjuajeya, ngu cjuasua xi sua naja Hasen rê Nina.

¹⁸ Xuta xi cuatjin sahmi me xa rê Jesucristu chuva vêhê ne, hatuxa chuya rê Nina tsêhê me, hacuaha ndaja cuichja xuta tsêhê me.

¹⁹ Vêhê xi cuanguen tjenguen ndiya rê cjuajeya, hacuaha cuisecoon xingueen cojo sa xi cuma jyê sa cjuandaja rê Nina cahntsua xahasen naja xingu xingu ngayaan.

²⁰ Cjuandaja xi casahmi Nina cojo xingueen ne, miji rê xi ninguetsun ngayaan ngatsê rê xcusun xi chinê. Xi cjuaquixi ne, yêjê ni xcusun comida ne, ndatjin xi xinê. Peru ndajintjin xi xinêê ngu xcusun sa xi vêhê sahmi xi cuixuya ngu xingueen ngajñi rê cjuatsehen.

²¹ Xi ndatjin ne, hacuiin xinê yojo, hacuiin siuhun xan, hacuiin nihña tu mé ni xcusun xi sahmi xi cuixuya ngu xingueen ngajñi rê cjuatsehen.

²² Cjua xi ha macjain nuju ne, catamacjain sa nuju, peru tetjún cjua jan cahntsua cjuatacun nuju suvun cojo sa xi suvá ni Nina vêê me. Jemu ndaja tsêhê xuta xi cjuatacun rê me ne, vinchaainjyê rê me tsêhê cjua xi macjain rê me.

²³ Peru sacuaha ngu xuta xi mangu majo cacun me tsêhê ngu xcusun xi cajinê me ne, quitjen me jyê xi cuatjin cajinê me ta, tsêhê xi hacuiin ngatsê rê xi mangucacun me cojo Jesucristu ne, vêhê xi cajinê me ta mangu majo cacun me xi cajinê me. Hya xi hacuiin ngatsê rê xi mangutacun cojo Jesucristu xi nihña ngu xcusun xi nihña ne, hatuxa quitjen jyê.

15

Meje rê xi nihña xcusun xi chuya rê xingueen

¹ Sacuaha ngayaan xi ndaja vijne rcun cjuatacun xi macjain naja ne, meje rê xi nijyentacun, meje rê xi cuisecoon rê xingueen xi cjêê ndaja cuijne rcu me yêjê ni cjuachacun vêhê. Miji rê xi nihña sa xcusun xi chuya naja suvaan ni.

² Jima ngu ngayaan ne, meje rê xi nihña xcusun xi chuya rê xingueen, cojo sa xi hacuaha cojo me ndaja tsêhê me, cojo sa xi cuma jyê sa cjuandaja rê Nina cahntsua xahasen rê me.

³ Hisca Jesucristu ne, hacuiin casahmi me tu cutjin xi cachuya rê suvá me, sacuatjin cjua xi camahindu xcun xujun rê Nina hiscan xi cachja ngu xuta cojo Nina cuitjin: “Cjua xi cachja xuta xi choho cachja tsujun ne, ngahan choho cachja me tsahan.” Cuatjin camahindu.

⁴ Yêjê ni cjua xi camahindu xcun xujun rê Nina hatsêê nixtin ne, cuatjin camahindu cojo sa xi sacú naja cjuatacun. Hacuaha camahindu cojo sa xi scaa naja hacuaha sacú naja cjuetacun, sehe hitsê sa ndaja cuetahan tacun Nina.

⁵ Nina xi sahmi xi caa naja, Nina xi sua naja cjuetacun ne, catisua nuju me ngu cjuatacun xi cumatangun cjuatacun nuju cojo xingun xi tjengun ndiya rê Jesucristu.

⁶ Catisua nuju Nina cjuatacun vêhê, cojo sa xi ngayujun ni ne, ngu tangun cuma cjuatacun nuju xi nihñu jyê nihñu hnga Nina Nahmi rê Nai naja Jesucristu.

⁷ Vêhê xi meje rê xi hatuxa chjuhunntsun xingun xingu ngayun sacuatjin cafahatsja naja Jesucristu, cojo sa xi cuma jyê cuma hnga Nina cojo Hasen rê me.

⁸ Chjá cojo nuju ta Jesucristu ne, canduva me xi cuisecoo me ngayun xuta tjê rê Israel. Hane cuatjin sahmichihin Jesucristu cjua xi cachja Nina cojo xutachanga niji. Canduva me xi tsingacun niji me xi Nina ne, hatuxa quixi me cojo cjua xi chja me.

⁹ Hacuaha canduva me cojo sa xi xutaxín ne, sahmi jyê sahmi hnga me Nina ngatsê rê cjuandaja rê Nina. Camahindu xcun xujun rê Nina cuitjin:

Ngahan ne, sahme jyê sahme hnga nuju ngajñi rê xutaxín, hacuaha hisca sê tsujun. Cuatjin camahindu.

¹⁰ Hacuaha chja nga ngu cahndê cuitjin:

Ngayun xi xutaxín ngayun ne, hacuaha tuhun cjuasua xahasen nuju cojo xuta rê Nina. Cuatjin chja.

¹¹ Hacuaha chja nga cuitjin:

Ngayun xi xutaxín ngayun, nihñu jyê nihñu hnga Nina.

Ngayejen ni xuta ngasunhndë ne, meje rë xi nihña jyë nihña hnga Nina. Cuatjin chja.

¹² Hacuaha catsihindu Isaías xcun xujun rë Nina cuitjin:

Cuetjucun ngu xuta, tjë rë Isaí,
hane cuma titjun me tsëhë yëjë ni xutaxín.
Hane xutaxín jan ne, cuetahacacun me xuta jan.
Cuatjin catsihindu Isaías.

¹³ Nina, me xi sahmi xi ma vetahantacun Nina ne, catisua nuju me cjuasua cojo cjuajeya, ngayujun xi tjín ngu tacún cojo rë Jesucristu, cojo sa xi Hasen rë Nina ne, sua nuju ngahñu xi ndaja cuetuhun tacún Nina.

Sua Pablo machaya rë xuta hacutjin sahmi me xa

¹⁴ Ngayujun ni matsejen ne, ha hvë cojo cjuatacun naha ta ngayun ne, quitsë rë xahasen nuju cojo cjuandaja, ha jemu vechú cjuatacun nuju, hacuaha ma ninguixun cjuatacun rë xingun xingu xingu ngayun.

¹⁵ Ngahan ne, cavetjucacun catsihindu nuju ngu jo cjuava vëhë ta, tsëhë xi mijí ná xi chaya nuju cjuava jan. Cuatjin catsihindu nuju ngatsë rë cjuandaja xi casua ná Nina,

¹⁶ xi sahme xa rë Jesucristu ngajñi rë xutaxín. Tisahme xa sacuaha ngu nahmi, xi tisuá jimachaya rë xutaxín cjuandajyihí xi catsingatju Nina. Cuatjin sahme cojo sa xi cuma suá rë Nina ngu cjuatjo xi chuya rë me. Cjuatjo vëhë ne, hacui xutaxín, xi ha Hasen rë Nina cavaxëxin rë me xi cuma tyjahí cjuatacun rë me xcun Nina.

¹⁷ Vëhë xi ngahan, xi tjín tangun cjuatacun naha cojo Jesucristu ne, ma vaxëndaja hitsë yojo naha tsëhë xa rë Nina xi tisahme.

¹⁸ Vetjiíncacun xi cuichjá cojo nuju tu mé ni cjuava, suvá ni cjuava tsëhë hacutjin cjuatacun xi casua ná Jesucristu xi cachjá cojo xi casahme, cojo sa xi xutaxín ne, cavihndë me tsëhë Nina.

¹⁹ Cuatjin camá ta, tsëhë xi cojo Hasen rë Nina ne, jemu camá cjuarcun. Cuatjin xi ngahan ne, ha chíchihin casuá camachaya rë xuta cjuandajyihí xi chja tsëhë Jesucristu, cavëtsehen hisca Jerusalén ne, cavéchu hisca hiscan ladu xi hmí Iliria.

²⁰ Hatuxa casahme ngahñu xi casuá camachaya rë xuta cjuandajyihí jan hiscan xi cjëë camahani cumachaya rë xuta yo xi Jesucristu, cojo sa xi hacuini hiscan xi tacunvasen xa xi jingu sa casahmi ne, ngajan cjuë sahmejyë.

²¹ Casahme sacuatjin camahindu xcun xujun rë Nina hiscan xi chja cuitjin:
Xuta xi cjëë cumachaya rë me tsëhë me ne, cumachaya rë me;
hacuaha xuta xi cjëë cuihndë me ne, cuijnercu me.
Cuatjin camahindu.

Vejña Pablo xi cjue me Roma

²² Ngatsë rë vëhë xi casacuiin camahani ná cahndë xi cjuë tjëngë nuju.

²³ Peru quihndë xi cajnetaha xa xi sahme ladu vihi, hacuaha jemu hatsëë xi meje cjuë tjëngë nuju ne,

²⁴ meje scusehenya nuju xi cuátju nangui nuju hya xi cjuë ngajan nación xi hmí España. Hane nixtin xi cuitejñataha hitsë cojo nuju ne, meje ná xi cuiseacun ná hitsë xi cjuë hisca España.

²⁵ Peru ndicumaha ni ne, cjuë nandya Jerusalén, xi cuisëcoo rë xuta ladu rë Nina jan ta,

²⁶ tsëhë xi xuta ladu rë Nina ngajan estadu Macedonia cojo xuta ladu rë Nina nguehe estadu Acaya ne, ndaja catsingatahacacun me xi tsingatju me ngu cjuandaja xi cuma rë xuta yuma xi siu ngajñi rë xuta ladu rë Nina ngajan Jerusalén.

²⁷ Ndatjin xi cuatjin catsingatahacacun xuta xi cuacun vë ta, tsëhë xi sacuaha xi quitjen me tsëhë xuta nangui Israel. Tsëhë xi xutaxín ne, casatë rë me cjuandajyihí xi casua Nina camachaya rë xuta tjë rë Israel, vëhë xi hacuaha satë rë me xi cuisëcoo me xuta nangui Israel tsë tsë tujún xi tjín rë me.

²⁸ Ngajan xi hya xi ha casahmechehen cjuacjintacun vëhë hacuaha ha casahme entredadu tujún jan ne,

²⁹ sehe cuétju cjuë España. Hane xi cuátju nangui nuju ne, cjuë scusehenya nuju. Hacuaha hvë ta jemu sua naja Jesucristu cjuandaja rë me hya xi cjuë tjëngë nuju.

³⁰ Ngayujun ni matsejen ne, ngatsë rë xi tjín tangun cjuatacun nuju cojo Nai naja Jesucristu hacuaha ngatsë rë cjuahmutacun xi sua nuju Hasen rë Nina ne, vëhë xi féhya nuju xi nihñu tangun cjuatacun nuju cojo ná, hane chjahyun rë Nina cjuandaja rë me xi cuma ná.

³¹ Cuatjin nihñu ngatsë naha, cojo sa xi cuaxëtje ná Nina tsëhë xuta xi vihndiin me tsëhë Nina ngajan Judea. Hacuaha chjahyun rë Nina cjuandaja xi cuma ná cojo sa xi hya xi cjuëcane tujún ngajan Jerusalén ne, chuya rë xuta ladu rë Nina xi cuatjin sahme.

³² Cuatjin chjahyun rë Nina coja sa xi, sa meje rë me ne, cuma cjuëttjengë nuju cojo cjuasua hacuaha cuiteljñajenda hitsë sojo nuju xi cuëchutaha nuju.

³³ Nina, me xi sua naja cjuandaja cjuajeya ne, catsicoo nuju me ngayujun ni. Cuatjin jain.

16

Tsingatju Pablo nina rë me

¹ Nguehe cuichjá cojo nuju ta na Febe xingueen ne, jemu xuta ndaja na. Casatë rë na xa xi visecoo na xuta ladu rë Jesucristu xi ma tangun me nguehe nandya Cencrea.

² Vëhë xi chjá cojo nuju ta, chjuhunnstun na sacuatjin xi meje rë xi nihña ngayaan xi ladu rë Nina ngayaan. Chjuhunnstun na ta, tsëhë xi na vëhë ne, hacuaha tjin tangun cjuatacun rë na cojo Nai naja. Hacuaha tiseacun rë na tu mé ni xcusun xi cuma meje rë na ta, tsëhë xi na vëhë ne, jemu cjin xingueen xi cavisecoo na. Hacuaha hisca ngahan ne, jemu cavisecoo na ngahan.

³ Tuhun nina naha na Priscila cojo cha Aquila xihin rë na. Xuta xi cuacun vë ne, jemu sahmi me xa rë Jesucristu sacuatjin sahme ngahan,

⁴ hacuaha hisca caviyujutaha tsavi me yojo rë me xi cavaxëtje ná me. Vëhë xi jemu suá nacuechji rë Nina. Hacuaha hacuiin ngahan suva ni ta cojo yëjë xutaxín xi matangun me tsëhë xi camá me ladu rë Jesucristu ne, hacuaha sua me nacuechji rë Nina.

⁵ Hacuaha tuhun nina naha yëjë xuta ladu rë Jesucristu xi matangun me ndava na Priscila cojo cha Aquila. Hacuaha ngu cha xi jemu vinga ná ne, cha Epeneto ne, tuhun rë cha nina naha. Cha vëhë xi tjun tjun camangucacun cha cojo Jesucristu ngajan estadu Asia.

⁶ Hacuaha tuhun nina naha na María, na xi jemu cavisecoo nuju jan.

⁷ Hacuaha tuhun nina naha Andrónico cojo Junias xingueen, me xi cavitejñaya tangun cojo ndavaya jan. Me vëhë ne, jemu jyë hnga me cojo cjuatacun rë me ngajñi rë yëjë ni apóstol, hacuaha hitsë sa tjun me cavisehen me ladu rë Jesucristu xi cuma ná ngahan.

⁸ Tuhun nina naha cha Amplias, cha xi jemu vinga ná, tsëhë xi tjin tangun cjuatacun niji cojo Nai naja.

⁹ Tuhun nina naha cha Urbano, cha xi jemu sahmi xa rë Jesucristu sacuatjin tinihña ngayaan. Hacuaha tuhun nina naha cha Estaquis, cha xi jemu vinga ná jan.

¹⁰ Tuhun nina naha cha Apeles, cha xi suvá tsejen xi jemu ndaja tjin tangun cjuatacun rë cojo Jesucristu. Hacuaha tuhun nina naha yëjë ni xuta rë cha Aristóbulo.

¹¹ Tuhun nina naha cha Herodián xingueen. Tuhun nina naha yëjë xuta rë Narciso, me xi hacuaha tjin tangun cjuatacun rë cojo Nai naja.

¹² Tuhun nina naha na Trifena cojo na Trifosa, na xi jemu sahmi xa rë Nai naja. Tuhun nina naha na Pérsida, na xi jemu vinga naja jan. Na vëhë ne, hacuaha jemu casahmi na xa rë Nai naja.

¹³ Tuhun nina naha cha Rufo, cha xi cavaxijin Nina xi tjin tangun cjuatacun rë cojo Nai naja. Hacuaha tuhun ngu nina naha cojo naa rë cha ta, me vëhë ne, sacuaha naa naha me.

¹⁴ Tuhun nina naha cha Asíncrito, cha Flegonte, cha Hermas, cha Patrobas, cha Hermes, hacuaha cojo sa yëjë xingueen xi siu me cojo cha xi cuacun vë.

¹⁵ Tuhun nina naha cha Filólogo, na Julia, cha Nereo cojo na tichja cha, cha Olimpas, hacuaha cojo sa yëjë xuta ladu rë Nina xi siu me cojo me xi cuacun vë.

¹⁶ Tuhun rë xingun nina, cojo cjuandaja cojo cjuahmutacun cuitatsuhun xingun, sacuatjin xcusun naja. Yëjë xuta ladu rë Jesucristu ne, hacuaha tsingatju me nina nuju.

Ngu nga conseju xi sua Pablo

¹⁷ Ngayujun ni ne, cuichjá cojo nuju ta meje rë xi chuhuncuendun yo xuta xi sahmi xi chicjun cojo xingun, yo xuta xi sahmi xi cjuinenguiya ngu xingueen ngajñi rë cjuatsehen ta, tsëhë xi xcusun xi sahmi me ne, sahmi condra rë cjuachacun xi ha cachatayun. Naxunxun yojo nuju tsëhë xuta xi cuacun vë ta,

¹⁸ tsëhë xi vihndiin me tsëhë Nai naja Jesucristu ta xi meje ni rë xahasen rë suvá me ne, vëhë ni xi vihndë me tsëhë. Hane cojo cjuahaxi xi visiajmi me ne, vindacha me xuta xi hvñin ndiya rë cjuatsehen.

¹⁹ Yëjë ni xuta ne, ha machaya rë me cjuat tsëhë hacutjin xi ngayujun ni ne, jemu ndaja nuhyun tsëhë Nai naja. Vëhë xi jemu ndama ná. Jemu meje ná xi cuechutaha sa cjuatacun nuju, peru xi nihña cjuandaja. Hane cjuatsehen ne, meje ná xi sacuaha xi hyuun ndiya rë.

²⁰ Hane cuechú nixtin xi Nina, me xi sua naja cjuandaja cjuajeya ne, ngutjen cuatëcja me cjuatsehen xi sahmi Satanás ngajñi nuju. Cjuandaja rë Nai naja Jesús ne, catisehen cahntsua xahasen nuju.

Jingusa me tsingatju me nina rë me

²¹ Cha Timoteo, cha xi sahmi tangun cojo ná xa rē Jesucristu ne, tsingatju cha nina nuju. Cojo cha Lucio, cha Jasón, cojo cha Sosípater xingueen ne, hacuaha tsingatju cha nina nuju.

²² Ngahan, Tercio, xi titsihindu cjuá rē Pablo xcun xujun vihi ne, hacuaha tsingátju nina nuju ngayujun ni xi tjin tangun cjuatacun nuju cojo Nai naja.

²³ Cha Gayo, cha xi casua ndava xi tejña ngahan ne, hacuaha sua cha ndava cha xi ma tangun yějē ni xuta ladu rē Jesucristu ne, tsingatju cha nina nuju. Cha Erasto, cha xi má tesorero tséhē nandya vihi ne, tsingatju cha nina nuju. Cha Cuarto xingueen ne, hacuaha tsingatju cha nina nuju.

Pablo ne, vaxëndaja me Nina

²⁴ Cjuandaja rē Nai naja Jesucristu ne, catama tsujun ngayujun ni. Cuatjin jain.

²⁵ Tahan nacuechji rē Nina ta, Nina ne, ma sahmi me xi viyuju cahndē cjuatacun nuju cojo cjuandajyihi xi chja tséhē Jesucristu, cjuandajyihi xi ngahan cojo jingu sa apóstol ne, tihín machaya rē xuta. Cjuandajyihi véhē ne, hacui ngu cjuá xi jiyahma hisca hya xi cjēē cumandaja ngasunhndē.

²⁶ Peru hisca quihndē casua Nina camachaya naja cjuandajyihi jan, quihndē xi casahmi me xi profeta ne, camá catsihindu cjuá rē me. Hane Nina xi tsajin nu tsajin nixtin cjuē me ne, ngatsē rē xi cuatjin caviteza me ne, véhē xi camachaya rē xuta tséhē yějē ni nació n yějē ni ladu cjuandajyihi véhē, cojo sa xi yějē ni xuta ne, cumanguacacun me hacuaha cuihndē me tséhē Nina.

²⁷ Ngu ni Nina xi vée yějē ni cjuatacun ne, nihña jyē nihña hnga me yějē nu yějē nixtin ngatsē rē Jesucristu. Cuatjin jain.

Carta xi tjuntjun catsihindu San Pablo xi cafahatsja xuta nandya Corinto

¹ Ngahan Pablo ne, casuaxa ná Jesucristu xi má ngahan apóstol tséhé me, tséhé xi cuatjin xi meje ré Nina. Hane ngahan cojo cha Sóstenes xingueen ne,

² ningatjin ngu xujun vi tsujun, ngayujun ni xuta Corinto xi hacuaha xuta ladu ré Nina ngayun, ngayun xi cavaxijin Nina ngayun, tséhé xi tjin tyjahi cjuatacun nuju cojo Jesucristu. Hacuaha ningatjin xujun vihi tséhé yějé xuta xi faharcun me Nai naja Jesucristu jinguyjé ni cahndé. Jesucristu jan ne, Nai ré xuta xi cuacun véhé me, hacuaha Nai naja ngayaan me.

³ Nina Nahmi naja cojo Nai naja Jesucristu ne, catisua nuju me cjuandaja cjuajeya.

Ximinchacun xi casua Jesucristu

⁴ Yasen ni suá nacuechji ré Nina ngatsé nuju ngayujun ni cojo ngatsé ré cjuandaja ré Nina xi casua nuju me quihndé xi tjin tangun cjuatacun nuju cojo Jesucristu.

⁵ Suá nacuechji ré Nina ta, quihndé xi tjin tangun cjuatacun nuju cojo Jesucristu ne, casua nuju Nina yějé ni. Casua nuju me chuva ré hacutjin ndaja cuinújun hacuaha ndaja cujnercun cjuá ré me.

⁶ Cjuandajyihí xi chja tséhé Jesucristu ne, jemu ndaja cavisehen cahntsua xahasen nuju.

⁷ Véhé xi ngayun ne, tsajin ngu cjuandaja ré Nina xi machaja nuju, jinguyjé ré xi cuinechunyun ré nixtin xi cumatsejen nga Nai naja Jesucristu.

⁸ Cuisecoo nuju Nina xi cuejñu hñu cjuatacun nuju jinguyjé ré xi nechun cjuahñu, cojo sa xi ngayun ne, tsajin mé jyé tjin nuju nixtin hya xi cuya nga Nai naja Jesucristu.

⁹ Nina ne, hatuxa sahmichihin me yějé cjuá xi chja me, hacuaha me véhé xi cavaxijin nuju me xi nihñu tangun cjuatacun nuju cojo Quihndi ré me, Nai naja Jesucristu.

Hacuiin ngu tangun ni siu cjuatacun ré xuta ré yungun

¹⁰ Ngatsé ré xi casuaxa ná Nai naja Jesucristu ne, cuichjá cojo nuju ta meje ná xi ngu tangun ni cjuá cuinújun ngayujun ni, hacuiin xi cuisecjun cjuá nuju. Nihñu tangun cjuatacun nuju cojo xingun.

¹¹ Cuatjin chjá cojo nuju ta, tséhé xi xuta ré Cloé ne, casua me camachaya ná xi tjin si ngajñi nuju cojo xingun.

¹² Cuma cuinújan ne, ngujo ngayun ne, nújun cuitjin: “Ladu ré Pablo ngayin”; hane ngujo nga ngayun ne: “Ladu ré Apolos ngayin”; hane ngujo nga ngayun ne: “Ladu ré Pedru ngayin”; hane ngujo nga ngayun ne: “Ladu ré Cristu ngayin.” Cuatjin nújun.

¹³ Peru ¿há tjin jo jyan Cristu? ¿Há Pablo casetaha me xcun cru ngatsé nuju? ¿Há tsajin ne, há caxtenda ngayun xi ladu ré Pablo cuma ngayun? ¡Hacuiin cuatjin!

¹⁴ Hisca suá nacuechji ré Nina ta hisca ngu ngayun ne, cavitendaan nuju, suvá ni cha Crispo cojo cha Gayo xi caviténda cha.

¹⁵ Xi cuatjin camá ne, tsajin yo xi cuichja xi caxtenda ngayun xi cuma ngayun xuta ladu naha.

¹⁶ Haan, hacuaha caviténda sa xuta ré Estéfanos. Peru hveen há tjin sa xi caviténda.

¹⁷ Cuatjin casahme ta, tséhé xi hacuiin catsingatju ná Jesucristu xi cuiténda xuta ta catsingatju ná me xi suá cumachaya ré xuta cjuandajyihí xi chja tséhé me. Hacuaha hacuiin catsingatju ná me xi cuichjá sacuaha chja ngu xuta xi jemu ndaja nuhya ré, hane cuahuenda xuta cjuá naha cahndé ré xi cuahuenda me ngahñu ré cjuaveya ré Jesucristu ngajan xcun cru.

Tjin ré Jesucristu ngahñu ré Nina hacuaha tjin ré me cjuatacun ré Nina

¹⁸ Cuatjin mijí ré xi chjahátahá ré ngahñu ré cjuá ré cjuaveya ré Jesucristu xcun cru ta, tséhé xi cjuá véhé ne, handasa ngu cjuaveya cjuangarca xi má ré xuta xi tivetjintjin me, peru xi cuma naja ngayaan xi tivetjuntjeen ne, cjuá véhé ne, tjin ré ngahñu ré Nina.

¹⁹ Cuitjin camahindu xcun xujun ré Nina cjuá xi cachja Nina:

Tsinguétsun cjuatacun ré xuta xi jemu vechú cjuatacun ré, hacuaha cjuatacun ré xuta xi jemu ndaja vijnercu me ne, tsinguejñu ré. Cuatjin camahindu.

²⁰ ¿Jaré cha xi jemu vechú cjuatacun ré? ¿Jaré cha xi vicuya cjuachacun? Hacuaha ¿jaré cha xi jemu ndaja ma visiajmi nixtin vihi? ¡Nina ne, catsicuya me suvá cjuangarca cjuatacun xi jemu vée xuta ngasunhndé vi!

²¹ Nina ta vechutaha jain cjuatacun ré me ne, cavejña ngu cacun me xi xuta ngasunhndé ne, cumaji sacúse ré me cojo suva ni cjuatacun ré me yo xi Nina. Cahndé ré véhé ne, Nina

ne, camameje cuaxëtje me xuta xi mangu cacun cojo rë me ngatsë rë cjuandajiyi xi nújin, handasa xi má rë xuta ne, ngu cjuangarca cjuandajiyi vëhë.

²² Xuta tjë rë Israel ne, meje rë me xi sahmi Nina cjuarcun, hane xutaxín ne, vanguise me xi jemu cuechú cjuatacun rë me.

²³ Peru ngayin ne, tihin machaya rë xuta cjuat sëshë me xi catsingatju Nina, me xi cahme xi casetaha xcun cru. Ngu ladu ne, cjuat vëhë sahmi xi xuta tjë rë Israel ne, sahmi condra me Nina. Hane ngu ladu nga ne, cjuat vëhë ne, ngu cjuangarca xi má rë xutaxín.

²⁴ Peru xi cuma rë xuta xi Nina cavaxijin rë me, sa xuta tjë rë Israel o sa xutaxín ne, me xi Nina catsingatju rë jan ne, tjin rë me ngahñu rë Nina hacuaha tjin rë me cjuatacun rë Nina.

²⁵ Hya xi machaya rë yahnga xuta yëjë xcusun xi choho cavatju Jesucristu camá ne, tsingataha cacun me xi Nina ne, jemu ngarca me hacuaha jemu ndaya cacun me. Peru hacuiin cuatjin ta, xcusun xi cuacun vë ne, tsingacun naja xi Nina ne, hitsë sa jercu vechú cjuatacun rë me xi cuma rë xuta xi jercu vechú cjuatacun rë, hacuaha hitsë sa jercu tjin rë me ngahñu xi cuma rë xuta xi jercu tjin rë ngahñu.

²⁶ Ngayujun ni ngayun ne, ha hyun ta Nina cavaxijin nuju me handasa hacuiin cjín ngayun xi vechú cjuatacun nuju, hacuiin cjín ngayun xi jercu tjin nuju ngahñu, hacuaha hacuiin cjín ngayun xi nchina ngayun.

²⁷ Peru Nina ne, cavaxijin me xuta ngasunhndë xi ngarca, cojo sa xi tsisava me xuta xi jercu vechú cjuatacun rë. Hane cavaxijin me xuta ngasunhndë xi ndaya cacun, cojo sa xi tsisava me xuta xi jercu hñu ngahñu rë.

²⁸ Hacuaha Nina ne, cavaxijin me xuta ngasunhndë xi yuma, xuta xi maxta tsëshë, xuta xi venguin chji rë, cojo sa xi tsinguetsun Nina cjuatacun rë xuta xi jemu vengui chji rë xi má rë xuta ngasunhndë.

²⁹ Xi cuatjin ne, yëjë xuta ne, cumaji cuaxëndaja me yojo rë me xcun Nina.

³⁰ Hane ha suvá Nina casahmi tangun me cjuatacun nuju cojo Jesucristu. Hacuaha Nina vuxaha me cjuatacun naja, xi mangutacun cojo Jesucristu. Hacuaha ngatsë rë Jesucristu ne, fë jyë naja xcun Nina, tsëshë Nina má ngayaan, hacuaha vetjunjeen.

³¹ Cuatjin jain má cojo sa xi nihña sacuatjin quitaha xcun xujun rë Nina hiscan xi chja cuitjin: "Sa xi yo xi meje cuaxëndaja yojo rë ne, cataxëndaja yojo rë, peru xi tsëshë Nai naja."

2

Chuva rë xi cachja Pablo cjuat rë Nina

¹ Peru ngayujun ni ne, hya xi cjëj nangui nuju ne, cachjaan cojo nuju cjuat rë Nina sacuaha xi jemu ma chjá o sa sacuaha xi jemu vechú cjuatacun naha.

² Cuatjin casahme ta, tsëshë xi cavejñá cjuatacun naha xi ngu ni Jesucristu xi cahme me xcun cru tsingátaha cacún tsëshë me, jinguyëjë rë xi cuitejñataha cojo nuju.

³ Hacuaha hya xi cavitejñataha cojo nuju ne, jemu ndaya cacún, hisca fatsë ngahan xi tsácjun.

⁴ Hacuaha hya xi cachjá cojo nuju cjuat rë Nina ne, hacuiin jemu cjuat yehe casahmexa cojo xi meje sahme xi cuijne tacún ta cajne tacún ngatsë rë ngahñu xi tjin rë Hasen rë Nina.

⁵ Cuatjin camá cojo sa xi cumangu tacún cojo Nina, peru hacuiin ngatsë rë cjuatacun rë xuta ta ngatsë rë ngahñu xi tjin rë Nina.

Cjuatacun rë Nina xi jercu vechú

⁶ Peru cojo xuta xi vechútaha cjuatacun rë me xi mangucacun me cojo Jesucristu ne, nújin cjuatacun xi jemu vengui chji rë. Peru cjuatacun vëhë ne, hacuiin cjuatacun tsëshë xuta ngasunhndë vihi hacuaha hacuiin cjuatacun tsëshë xuta xi vitexa nguehe ngasunhndë vihi, me xi titsinguetsun Nina cjuatacun rë.

⁷ Cjuatacun vëhë ne, vëhë cjuatacun rë Nina xi jiyahma titjun. Peru Nina ne, hisca chaja sa xi cuejña ngasunhndë ne, ha tjin chjine rë me cjuatacun vëhë xi ndaja tsajan.

⁸ Hisca xi ngu xuta xi vitexa quihndë nixtin vihi ne, vijniircu me cjuatacun vëhë. Sa xi cajnercu me ne, hacuaha catsiquiin me Nai naja, me xi jemu jyë hnga camahani me cojo Hasen rë me.

⁹ Peru tivetjucaa sacuatjin camahindu xcun xujun rë Nina hiscan xi chja cuitjin:

Xcusun xi cjëë camahani scuëë xuta, hisca cjëë camahani cuihndë me cjuat tsëshë, hacuaha hisca cjëë camahani tsingatahacacun me tsëshë ne,

vëhë xcusun xi cavëhëchjine Nina xi cuma rë xuta xi hmu cacun rë me.

Cuatjin camahindu.

¹⁰ Xcusun vëhë ne, ngayin casua Hasen rë Nina camachaya niji. Hasen rë Nina jan ne, vëë yëjë ngarca ni, hisca cjuatacun rë Nina xi hitsë sa hma jiya.

¹¹ Ngajñi rë yëjë xuta ne, tsajin yo xi ma vëë cjuatacun rë ngu xuta ta suvá ni hasen rë me xi jiya ngajñi yojo rë me ne, vëhë xi vëë. Ha chuva vëhë ni ne, tsajin yo xi vëë cjuatacun rë Nina ta suvá ni Hasen rë Nina ne, vëhë xi vëë.

¹² Ngayaan ne, hacuiin cachjahanntsán ngu hasen tsëhë ngasunhndë ta cachjahanntsán Hasen xi catsingatju Nina, cojo sa xi cumachaya naja yëjë ni cjuandaja xi Nina casua naja me.

¹³ Nújan tsëhë cjuandaja vëhë, peru hacuiin cojo cjuaya yehe xi nduva tsëhë cjuatacun rë xuta ngasunhndë ta cojo cjuaya xi nduva tsëhë Hasen rë Nina. Hane cuatjin xi tahan cjuatacun rë Nina machaya rë xuta xi tjin rë me Hasen rë Nina.

¹⁴ Xuta xi tsajin rë me Hasen rë Nina ne, maji fahatsja me cjuandaja xi sua Hasen rë Nina ta xi má rë me xi cuacun vë ne, suvá cjuangarca cjuandaja xi cuacun vë, hacuaha maji vijnercu me cjuandaja xi cuacun vë, tsëhë xi suvá Hasen rë Nina sahmi xi vijnercuun.

¹⁵ Xuta xi tjin rë me Hasen rë Nina ne, ma tsichuva me yëjë ngarca ni, peru me xi cuacun vëhë ne, tsajin yo xi ma tsichuva rë me.

¹⁶ Cuitjin camahindu xcun xujun rë Nina: “¿Yo xi vëë cjuatacun rë Nina? ¿Yo xi cuicuya rë?” Cuatjin camahindu. Peru ngayaan ne, tjin naja cjuatacun rë Jesucristu.

3

Xuta sahmixa rë Nina

¹ Ngayujun ni ne, camaji cachjá cojo nuju sacuaaha chjá cojo xuta xi ha tjin rë me Hasen rë Nina ta, tjin ná xi cachjá cojo nuju sacuaaha chjá cojo xuta ngasunhndë, sacuaaha xuta xi sehe cavisehen ladu rë Jesucristu.

² Sacuaaha xi casua nuju lechi xi siuhun. Hacuiin niñu casua xi xinu ta, tsëhë xi nixtin hya ne, tangun ngayun cojo quihndi chihndë xi cjëë cuma sinë niñu. Hacuanitjin ni cjëë cuma chjuhunntsun yëjë cjuaya rë Nina hisca quihndë,

³ tsëhë xi xuta ngasunhndë sa má ngayun. Cuatjin chjá cojo nuju ta jinguyëjë rë xi tjin sa cjuachini hacuaha tjin sa si ngajñi nuju ne, xuta ngasunhndë cuaha sa má ngayun, hacuaha tivanguntjengun sa ndiya rë xuta ngasunhndë.

⁴ Hya xi ngu ngayun nújun: “Ngahan ne, ladu rë Pablo ngahan”, hane ngu nga ngayun ne, nújun: “Ngahan ne, ladu rë Apolos ngahan” ne, ngajan matsejen xi xuta ngasunhndë cuaha má ngayun.

⁵ Xi matsejen ne, ¿mé má Apolos ne, mé má Pablo ni? Ngayin ne, xuta sahmixa rë Nina ni ngayin, xi canújin cojo nuju cjuaya rë Nina xi camacjain nuju. Jima ngu ngayin ne, canihñi xa xi casua niji Nai naja.

⁶ Sacuaaha xi ngahan catsitjë, hane Apolos cavitejnu me nandá, peru Nina casahmi me xi camayehe xitjë.

⁷ Ngajan xi, xi matsejen ne, cha xi tsitjë cojo cha xi vitejnu nandá ne, hacuiin jemu vengui chji rë cha ta me xi vengui jain chji rë ne, Nina, me xi sahmi xi ma yehe xitjë.

⁸ Cha xi tsitjë cojo cha xi vitejnu nandá ne, tangun ni vengui chji rë cha. Jimangu cha ne, cjuahatsja cha chji rë cha, sacuatjin xa xi casahmi jimangu cha.

⁹ Ngayin ne, tangun tihñi xa rë Nina, hane ngayun ne, sacuaaha nangui rë Nina xi tijimaxa cojo má ngayun.

Hacuaha ngayun ne, sacuaaha ngu ndihya xi Nina tsindaja me má ngayun.

¹⁰ Ngahan ne, tsëhë cjuandaja xi casua ná Nina ne, casahme sacuaaha ngu chjine vexo ne, cavejña ngu xihndëñaña, peru xcun xihndëñaña xi casahme jan ne, jingu sa xuta canduva casahmi me ngu ndihya. Peru jima ngu xuta xi sahmi me ndihya xcun xihndëñaña vëhë ne, meje rë xi tjin rë me cuidadu hacutjin xi sahmi me ta,

¹¹ tsëhë xi tsajin sa cjín xihndëñaña xi tjin ta ngu tu tu ni má. Hane xihndëñaña xi ha tacun vë ne, hacui Jesucristu.

¹² Quihndë ne, xi nihña xa rë Nina ne, cuejña xi yahnga xuta sahmixa me cojo oro, o sa quicha tyava, o sa ndyojo xi jercu vengui chji rë. Hane yahnga nga me ne, sacuaaha sahmixa me cojo ya, o sa cojo ndiji, o sa cojo xca ni.

¹³ Peru nixtin hya xi tsichuva naja Nina ne, hya cuma cumatsejen xcusun rë xa xi casahmi jima ngu xuta xi cuacun vë. Nixtin hya ne, cuejña Nina ngu ndihi xi tsichuva xa xi casahmi jima ngu me, cojo sa xi cumatsejen mé xcusun xa vëhë.

¹⁴ Sa xi xa xi casahmi ngu xuta scaa rë cojo suë rë ndihi vëhë ne, sacú rë me ngu cjuandaja rë xi sua Nina.

¹⁵ Peru sa xi xa xi casahmi ngu xuta jan cjuéya cojo suë rë ndihi vëhë ne, tsichajá me yëjë, peru me vëhë ne, cuetjutje me sacuaaha ngu xi vetjutje tsëhë ngu ndihi.

¹⁶ Ngayujun ni ne, ha ndaja hyun xi sacuaaha yungun rë Nina má ngayun, ta Hasen rë Nina ne, hacuaha tacuncahndë cahntsua xahasen nuju.

¹⁷ Sa xi yo xi tsinguetsun yungun rë Nina, Nina ne, hacuaha jercu sahmi me castigu xuta jan, tsêhê xi yungun rë Nina ne, hatuxa tsêhê Nina. Hane ngayun ne, hacuaha yungun rë Nina má ngayun.

¹⁸ Xicavindachuun suvun rë yojo nuju. Sa xi tjin ngu ngayun xi ningatuhun tacún xi jemu vechú cjuatacun nuju sacuaaha cjuatacun rë xuta ngasunhndê vihi ne, nihñucueundun chjuhunxun cjuatacun vêhê sacuaaha xi vechiin cjuatacun nuju. Hane xi cuatjin nihñu ne, sehe cuechú tuhun cojo cjuaquixi ngu cjuatacun nuju.

¹⁹ Cuatjin meje rë ta, tsêhê xi cjuatacun rë xuta ngasunhndê vihi ne, xi cuma rë Nina ne, suvá cjuangarca. Hisca camahindu xcun xujun rë Nina cuitjin: “Nina ne, sahmi me xi xuta xi jemu vechú cjuatacun rë me vetju sava me xcun cjuandacha xi sahmi me.”

²⁰ Hacuaha camahindu nga cuitjin: “Nina ne, vêê me xi cjuatacun rë xuta xi jemu vechú cjuatacun rë ne, tu mahya.”

²¹ Vêhê xi hisca ngu ngayaan ne, mijí rë xi naxenndajan cjuatacun rë xuta ngasunhndê ta, tsêhê xi yêjê ngarca ni ne, tsujun:

²² Há xi Pablo, há xi Apolos, há xi Pedru, há ngasunhndê, há cjuahñu, há cjuaveya, há xi nixtin quihndê, há xi nixtin nduva ne, ta yêjê ngarca ni ne, tsujun vë.

²³ Hane ngayun ne, tsêhê Jesucristu ngayun, hane Jesucristu ne, tsêhê Nina me.

4

Xa rë apóstol

¹ Meje rë xi nihñucueundun xi ngayin ne, xuta sahmi xa rë Jesucristu má ngayin, hacuaha cachjihinntsín xa xi tihin cumachaya rë xuta tsêhê cjuatahama xi sehe tisua Nina jimachaya naja.

² Hacuaha jemu sahmi ngu yêjê xi ngu xuta xi tjin tsjá me xa ne, tsejen tsêhê me xi cuma cumangu tacuun cojo rë me.

³ Xi cuma ná ngahan ne, tsajin mé sahmi rë sa xi chjuhunchuvun ná cojo cjuatacun naha, o sa xi cjuahachuva ná xuta ngasunhndê. Hisca ngahan suva ne, fahachuvaan cjuatacun naha.

⁴ Xi má ná ne, tsajin jyê naha. Peru hacuiin ngatsê rë vêhê xi hatuxa tsajin jyê naha. Nai naja ne, me vêhê xi tsichuva ná me.

⁵ Vêhê xi mijí rë xi yo chjuhunchuvun, xi chaja sa cuechú nixtin xi cuinduva Nai naja ta, tsêhê xi me vêhê cuaxêcaatsejen me yêjê ni cjuaxi tsajin yo vêê. Hacuaha cuaxêcaatsejen me yêjê cjuatacun rë xuta. Nixtin hya ne, cuaxêndaja Nina jima ngu xuta sacuatjin vechú chuva rë tsêhê jima ngu me.

⁶ Ngayujun ni ne, cachjá cojo nuju yêjê cjuaxi vêhê tsahan suva cojo tsêhê Apolos, cojo sa xi ndaja tsujun, cojo sa xi cuijnercun mé meje cuichja cjuaxi chja cuitjin: “Nihñuchuhun sacuatjin chja cjuaxi camahindu.” Cuatjin chja cjuaxi. Cuatjin meje rë cojo sa xi hacuiin nihñu yehe yojo nuju ngatsê rë ngu xi tjengun cjuaxi rë, hane me xi yahnga ne, nitjungun me.

⁷ ¿Yo casahmi xi hitsê sa vengui chjí nuju ngayun xi cuma rë me xi yahnga? Hacuaha ¿mé tjin nuju xi hacuiin Nina casua nuju me? Sa xi Nina casua nuju me ne, ¿mé má naxunndujun yojo nuju sacuaaha xi tsajin yo xi casua nuju ni?

⁸ ¡Sacuaaha xi ngayun ne, má nuju xi ha tjin nuju yêjê xi meje rë xahasen nuju, ha jemu nchina camá ngayun! Ha xuta xi matitjun camá ngayun xi má nuju. Hacuaha quihndê tsajin mé xi machaja nuju xi cumatihin nuju. Jemu ndatjin sa xi matitjun jain ngayun, cojo sa xi ngayin ne, hacuaha cojo ngayin cumatitjun tangun ngayin cojo nuju.

⁹ Xi má ná ngahan ne, casahmi Nina xi venguin chji niji ngayin xi má ngayin apóstol, sacuaaha xuta xi cjuaxi cueya me ngatsê rë jyê rë me. Tivutsejen yêjê ni xuta cojo yêjê ni ángel hacutjin tivatjin tijima.

¹⁰ Ngatsê rë xi tjenguin rë Jesucristu ne, má rë xuta sacuaaha xi jemu ngarca ngayin. Peru ngayun ne, xi má nuju ne, jemu quicun tacún ngatsê rë xi tjengun rë Jesucristu. Ngayin ne, jemu ndaya tacuín, peru ngayun ne, jemu hñu ngahñu nuju. Ngayun ne, chjahárcun nuju, hane ngayin ne, chjaharcuaain niji.

¹¹ Hisca quihndê sa ne, jindya niji tsêhê xi xini xi sihin, hacuiin ndaja tsjian chjín, choho sahmi xuta cojo niji, hacuaha tu nujiyhinsin ni.

¹² Nihñi xa xi hai. Hora xi choho chja xuta cojo niji ne, ndaja nújin cojo rë me. Hora xi tsujihiya tjengui niji me cojo cjuahngatacun ne, caa niji cojo xcusun xi sahmi me. Tsajin mé nihñi cojo rë me.

¹³ Hora xi choho chja xuta tsjin ne, nindijin cjuaxi cojo rë me. Camá ngayin sacuaaha xtê xi tjin ngasunhndê. Hitsê sa chuva vengui chjí niji xi cuma rë yêjê ni xcusun xi tjin. Hisca quihndê ne, cuanitjin vatjin má.

¹⁴ Xi titsihindu nuju cuitjin ne, hacuiin xi tsisava nuju ta xi suá nuju conseju sacuaaha quihndi naha suva xi jemu hmú cacún.

¹⁵ Handasa tjin nuju të mil xuta xi vicuya nuju cjua xi chja tséhë Jesucristu ne, peru nahmi nuju ne, ngu ni ngahan, tséhë xi hya xi casuá camachaya nuju cjuandajyihí xi chja tséhë Jesucristu hacuaaha cavisuhun ladu rë me ne, hya camá ngahan sacuaaha nahmi nuju.

¹⁶ Véhë xi ngayujun ni ne, meje ná xi nihñu sacuatjin sahme ngahan.

¹⁷ Ngatsë rë véhë ne, titsingátju nuju cha Timoteo, cha véhë xi sacuaaha quihndi naha xi jemu hmú cacún hacuaaha jemu ndaja sahmi chíhin me xa tséhë Nai naja. Me véhë sahmi me xi cuitsjen nuju hacutjin tifé cojo ndiya rë Jesucristu, sacuatjin vicuyá rë xuta rë yějë ni yungun jingujyë ni.

¹⁸ Quihndë ne, yahnga ngayun ne, canihñu yehe yojo nuju xi cuatjin caningatuhun tacún xi cjuen cjué scútsejen nuju.

¹⁹ Peru ngahan ne, cuinduva xati scútsejen nuju, sa Nai naja meje rë me. Hane hya cumachaya ná hacuiin sacuatjin xi visiajmi xuta xi cuacun casahmi yehe yojo rë jan ta sacuatjin ngahñu xi tjin rë me.

²⁰ Cuatjin sahme ta sacuaaha gobiernu xi sahmi Nina ne, hacuiin cojo suvá cjua ni rë me xi sahmi me ta cojo ngahñu xi tjin rë me.

²¹ ¿Hacutjin meje nuju xi nduva scútsejen nuju, há xi cojo ngu castigu ne, o há tsajin ne, há cojo ngu cjuahmutacun, cojo cjuandaja cjuajeya?

5

Cjuatsehen xi casahmi ngu cha xuta rë yungun

¹ Tjin cjua xi ngajñi nuju ngayujun ni ne, jiyajñi ngu cjuatsehen xi hisca xutaxín sa ne, sahmi me. Chja cjua ta ngu ngayun ne, cachjuhun chjuun rë nahmi nuju, camá chjuun nuju.

² ¡Hane ngayujun ni ne, jercu naxunndujun yojo nuju! Cahndë rë véhë ne, meje rë xi choho cuma nuju. Cha xi cuatjin sahmi xcusun véhë ne, catetjuxin cha tsujun.

³ Handasa tsajin ngahan tejña cojo nuju ndyá ne, peru cjuatacun naha ne, sacuaaha xi ndyá tacun cojo nuju. Hane sacuaaha xi tejña cojo nuju ne, ngahan ne, ngatsë rë xi sahme xa rë Nai naja Jesús ne, chjá cojo nuju ta meje rë xi cuma castigu cha xi cuatjin sahmi xcusun véhë.

⁴ Hya xi cuma tangun ngayun, hacuaaha cjuatacun naha ne, sacuaaha xi tacun cojo nuju ne, cojo ngahñu xi sua naja Nai naja Jesús ne,

⁵ nihñu entregadu cha xi cuajyihí vë cojo Satanás, cojo sa xi cueya cha. Cuatjin nihñu, cojo sa xi cuetjutje hasen rë cha nixtin hya xi cuya nga Nai naja.

⁶ Ndajin tjin xi cuatjin nihñu yehe yojo nuju. Ha hyun cjua xi chja cuitjin: "Hítsë lihndi ni san rë pan ne, caa rë tsisatjen rë yějë nahyu." Cuatjin chja cjua.

⁷ Meje rë xi chjuhunxun cjuatsehen véhë, xi sahmi sacuaaha san rë pan, cojo sa xi cuma tyjahi cjuatacun nuju, sacuaaha nahyu xi tsajin san rë. Hacuaaha hvë ta hatuxa tyjahi cjuatacun nuju ta, tséhë xi Jesucristu ne, me xi sacuaaha chu tsánga tséhë suhi rë Pascua naja ne, ha cahme me.

⁸ Véhë xi meje rë xi nihña suhi, peru hacuiin cojo san rë pan xi changá, cuma cuinújan ne, hacuiin cojo cjuatsehen ta, cojo nahyu xi tsajin san rë, cuma cuinújan ne, cojo cjuandaja cojo cjuaquixi.

⁹ Catsihindu nuju xcun xujun xi ha catsingátju nuju ta mijí rë xi nihñu tangun cojo xuta xi sahmi cjuatsehen cojo ngu chjuun o sa cojo ngu xihin.

¹⁰ Xi cachjá cojo nuju cuatjin ne, hacuiin meje cuichja xi meje rë xi cuetjuxun camahani tséhë xuta ngasunhndë xi híncha ndiya rë cjuatsehen véhë, o sa tjenguitaha me xi hacuiin tséhë, o sa ndacha, o sa faharcun me nina ndyojo. Sa xi cuatjin nihñu ne, meje rë xi cuetjuxun camahani tséhë ngasunhndë.

¹¹ Xi vijne cjua xi catsihindu nuju vë ne, xi hacuiin nihñu tangun cojo ngu xuta xi chja me xi ladu rë Jesús má me hane sahmi me cjuatsehen cojo ngu chjuun o sa cojo ngu xihin, o sa tjenguitaha me xi hacuiin tséhë me, o sa faharcun me nina ndyojo, o sa ndesu me, o sa cha chíhi me, o sa xi ndacha me. Ngu xuta rë yungun xi cuatjin xcusun rë ne, hisca mijí rë xi xinu niñu cojo rë me.

¹²⁻¹³ Satiin ná ngahan xi tsichúva xuta xi hacuiin xuta rë yungun má me. Nina ne, me véhë xi tsichuva rë me. Peru ngayun ne, meje rë xi nichuvun xuta xi xuta rë yungun me. Véhë xi hacuaaha meje rë xi naxunxun cha tsehen vë tséhë ngajñi nuju.

6

Vinchajyë yahnga xuta ladu rë Jesús xicjin me ngajñi rë me

¹ Hya xi tjin ngu ngayun xi tjin ngu jyé xi meje cuinchun tséhë xingun ne, ¿mé má cuatjin vetju tacún xi xcun xuta xi hisca sahmicuendaain me Nina vangun chjahyun xi cumacuenda tsujun, cahndé xi cuangun xcun xuta xi ladu rë Nina me?

² ¿Há hyuun xi cuechú nixtin xi ngayaan xuta ladu rë Nina nichuvan xuta ngasunhndé cojo cjuatacun rë me? Hane sa xi ngayun cuatjin nichuvun xuta ngasunhndé ne, ¿há maji nichuvun ngu jyé lihndi quihndé ni?

³ ¿Há hyuun xi ngayaan nichuvan ángel cojo cjuatacun rë ni? ¡Hitsë guan cjuacjintacun rë ngasunhndé vihi!

⁴ Véhë xi sa tjin ngu jyé xicjin véhë xi meje cuinchun ne, ¿há cuangun cueñu jyé véhë xcun ngu xutaxín xi faharcuaain me xcusun rë yungun?

⁵ Nguehe cuichjá cojo nuju ngujo cjuacuitjin, cojo sa xi cuma sava nuju: ¿há tsajin ndastu ngu xuta xi vechú hitsë cjuatacun rë me xi cuma sahmi cuenda me tu mé ni si xi nihñu cojo xingun?

⁶ Peru ngu ngayun xuta ladu rë Jesús ne, vinchun jyé rë jingu sa xuta ladu rë Jesús, ¡hane hisca vanguncujun jyé véhë xcun xuta xi sahmicuendaain me Nina!

⁷ Xi cuatjin vinchun jyé rë xingun xingu xingu ngayun ne, ngajan matsejen xi ngayun canichujún. Hitsë sa ndaja xi ningatuhun xi cumandacha ngayun. Hitsë sa ndaja xi ningatuhun xi cjue chëjé tsujun.

⁸ Cahndé rë xi cuatjin ningatuhun ne, tu ngayun vindachun hacuaha nichujun tséhë xingun ngajñi nuju ngayun xuta rë yungun.

⁹ ¿Há hyuun ta xuta tsehen ne, cumaji cuisehen me hiscan sahmi Nina gobiernu? Ha quihndé xicatuun cahndé xi cuma ndacha sa ngayun ta, yëjé xcusun xuta xi cuicun vi ne, cumaji cuisehen me hiscan sahmi Nina gobiernu: xuta xi sahmi me cjuatsehen cojo chjuun o sa cojo xihin xi hacuiin tséhë me, xuta xi faharcun me nina ndyojo, cha xi chuya rë ngu xihin,

¹⁰ xuta xi chëjé me, xuta xi tjenguitaha me xi hacuiin tséhë me, xuta xi hatuxa xuta chihi me, xuta xi ndesu me, xuta xi ndacha me, yëjé xcusun xuta xi cuacun vë ne, cumaji cuisehen me hiscan sahmi Nina gobiernu.

¹¹ Yahnga ngayun ne, cuatjin cún ngayun titjun. Peru fahaxin me jyé nuju, camá tyjahi cjuatacun nuju, café jyé nuju. Cuatjin camá cojo nuju ngatsé rë Nai naja Jesucristu cojo ngatsé rë Hasen rë Nina naja.

Meje rë xi cojo yojo naja nihña jyé nihña hnga Nina

¹² Yahnga ngayun ne, nújun cuitjin: “Cuma nihña yëjé ni xcusun.” Cuatjin nújun. Cuma, peru hacuiin yëjé xcusun xi ndaja tsajan. “Cuma nihña yëjé ni xcusun”, peru ngahan ne, suaan cahndé xi scaa rë suhi rë tu mé ni xcusun cojo ná.

¹³ Yahnga nga ngayun ne, nújun cuitjin: “Casahmi Nina xi hatuxa matangun xi chiné cojo cahntsuan, hacuaha cahntsuan ne, hatuxa ma tangun cojo xi chiné.” Cuatjin nújun. Quixi jain, peru cuechú nixtin xi tsicjé Nina catsijo xcusun véhë. Peru hacuiin casahmi Nina xi hatuxa matangun yojo naja cojo cjuatsehen ta casahmi me xi hatuxa matangun cojo Nai naja, hacuaha hatuxa matangun Nai naja cojo yojo naja.

¹⁴ Nina ne, catsicuya me Nai naja cjuahñu, hacuaha cojo ngahñu rë suvá me ne, hacuanitjin ni tsicuya naja me ngayaan cjuahñu.

¹⁵ ¿Há hyuun ta yojo nuju ne, tjin tangun cojo Jesucristu? Quihndé ne, yojo naja xi tjin tangun cojo Jesucristu ne, ¿há nihña tangun cojo ngu na viteña yojo rë ni? ¡jéya! ¡Catamamiji rë Nina!

¹⁶ Hacuaha ¿há hyuun ta ngu xuta xi sahmi cjuatsehen cojo ngu na xi viteña yojo rë ne, sacuaha xi ngu yojo ni rë me cojo rë na? Cuatjin ma ta chja xujun rë Nina cuitjin: “Catsijo me ne, cuma ngu yojo ni rë me cojo xicjin me.” Cuatjin chja xujun rë Nina.

¹⁷ Peru ngu xuta xi sahmi tangun me cjuatacun rë me cojo Nai naja ne, cuma ngu cjuatacun ni rë cojo rë me.

¹⁸ Naxunxun yojo nuju tséhë cjuatsehen xi sahmi ngu xuta cojo ngu chjuun o sa cojo ngu xihin xi hacuiin tséhë me. Yëjé sa cjuatsehen xi sahmi ngu xuta ne, hacuiin cojo yojo rë me sahmi me. Peru xuta xi sahmi cjuatsehen cojo ngu chjuun o sa ngu xihin xi hacuiin tséhë ne, cojo yojo rë me sahmi me cjuatsehen véhë.

¹⁹ ¿Há hyuun ta yojo nuju ne, sacuaha ngu yungun rë Hasen rë Nina xi caveya Nina cahntsua xahasen nuju? Ngayun ne, hacuiin tsujun suvun yojo nuju ta,

²⁰ tséhë xi ngayun ne, cojo chji cachaha nuju. Véhë xi meje rë xi cojo yojo nuju nihñu jyé nihñu hnga Nina.

¹ Quihndë ne, nguehe tsicúya cjuua tsujun tsëhë cjuua xi canihindun ná.

Ndatjin xi cuixaain xuta.

² Peru ngatsë rë cjuatsehen ne, catisacu chjuun rë jima ngu xihin, hacuaha jima ngu chjuun ne, catisacu xihin rë na.

³ Sa chjuun sa xihin me ne, catisahmi chihin me sacuatjin mameje rë cjuavixan xi casahmi me.

⁴ Sacuaha chjuun ne, hacuiin na vëhë vitexa na yojo rë na ta xihin rë na vitexa cha. Hacuanitjin ni xihin ta hacuiin cha vëhë vitexa cha yojo rë cha ta chjuun rë cha vitexa na.

⁵ Mijí rë xi nichuhun rë xingun yojo nuju sa chjuun sa xihin ngayun. Cuma nihñu cuatjin, peru sa xi catsijo ni ngayun canihñu tangun cjuua xi cueññuxun ngujo nixtin, tsëhë xi meje nuju xi ngujo nixtin vëhë ne, nihñu oración nuju cojo Nina. Hane xi cuatju vëhë ne, sehe tuyun nihñuchuhun sacuatjin mameje rë cjuavixan xi canihñu, sá tu ngatsë rë xi scaain nuju ne, sahmi Satanás ngahñu xi nihñu cjuatsehen.

⁶ Cuatjin cachjá cojo nuju cojo sa xi hacuiin chja cuatjun, cachjaan sacuaha xi hatuxa vitéxa nuju.

⁷ Xi má ná ngahan ne, ndatjin sa xi yëjë ni xuta ne, scaa rë me sacuaha ngahan. Peru jima ngu xuta ne, casacu rë me jima ngu xcusun cjuandaja xi casua Nina me: ngu me ne, casacu rë me xcusun vihi, ngu nga me ne, casacu rë me xcusun vëhë.

⁸ Quihndë ne, ngu ngu ngayun xi cjëë sacú chjuun nuju, cjëë sacú xihin nuju, hacuaha cojo ngayun xi cahan ngayun ne, cuichjá cojo nuju ta ndatjin xi cuinechun suvun sacuaha ngahan.

⁹ Peru sa xi scaain nuju ne, tixun. Hitsë sa ndaja xi cuixun xi cuma rë xi nicjun suvun yojo nuju cjuandya rë xihin.

¹⁰ Hane ngu ngu ngayun xi cavixun ne, cuichjá cojo nuju ta ngu chjuun ne, mijí rë xi tsismi na xihin rë na.

¹¹ Hane sa xi tacun xín na ne, catejña suvá na, o sa tsajin ne, catisehen nga na cjuandaja cojo xihin rë na. Hacuaha ngu xihin ne, mijí rë xi tsismi cha chjuun rë cha. Hacuiin ngahan xi chjá cuatjin ta Nai naja chja me.

¹² Quihndë ne, hacuiin Nai naja cuichja me ta ngahan cuichjá cojo nuju ngayujun ni xi cjëë cuichjá cojo nuju. Sa xi cachjuhun ngu chjuun xi manguaain cacun na cojo Nai naja, hane tsingatihin na cuejña sa na cojo nuju ne, xicanismuu na.

¹³ O sa xi cachjuhun ngu xihin xi manguaain cacun cha cojo Nai naja, hane tsingatihin cha cuejña sa cha cojo nuju ne, xi canismuu xihin nuju vë.

¹⁴ Cuatjin nihñu ta, xihin nuju xi manguaain cacun cojo Nai naja jan ne, ngatsë nuju ngayun ne, hacuaha cojo cha cumá cha ladu rë Nina. Hacuanitjin ni chjuun nuju xi manguaain cacun cojo Nai naja jan ne, ngatsë nuju ngayun xi ladu rë Jesús ne, hacuaha cojo na cumá na ladu rë Nina. Sa xi hacuiin cuatjin ne, quihndi nuju ne, hacuiin ladu rë Nina má. Peru xi cjuaquixi ne, quihndi nuju ne, ladu rë Nina má.

¹⁵ Peru sa chjuun sa xihin xi manguaain cacun cojo Nai naja ne, sa xi meje tsismi nuju ne, catitsismi nuju. Sa xi cuatjin cuatjun cuma ne, ngayun xi ladu rë Jesús ngayun ne, ha ndaya tjin ngayun tsëhë cjuavixan. Cuatjin meje rë xi nihñu ta, tsëhë xi Nina cajindaya nuju me xi cuangun ndiya rë cjuandaja cjuajeya.

¹⁶ Tsajin yo vëë rë há cuma naxuntjun chjuun nuju o sa xihin nuju.

Chja Pablo hacutjin meje rë xi cjue xuta cojo ngasunhndë rë me

¹⁷ Meje rë xi ngayujun ni ne, nihñu xa xi casua Nina xi nihñu jima ngu ngayun, hacuaha ha sacuanitjin ni cún ngayun hya xi cavaxijin nuju Nina ne, hacuanitjin ni tángun nduju cojo. Cuatjin chjá cojo xuta tsëhë yëjë ni yungun.

¹⁸ Sa xi ha cati rë chuxin nuju hya xi cavaxijin nuju Nina ne, xicavinchuun chuva rë xi nindeyun xcusun vëhë. O sa xi cjëë xtí rë chuxin nuju hya xi cavaxijin nuju Nina ne, xicanihñuu.

¹⁹ Xi xti rë chuxin naja o sa xtiin rë ne, tsajin mé vengui chjí rë ta xi vengui chjí rë ne, xi cuinuhyan cjuua xi vitexa Nina.

²⁰ Ha sacuanitjin ni cún jima ngu ngayun hya xi cavaxijin nuju Nina ne, hacuanitjin ni tángun nduju cojo.

²¹ Sa xi ngu mosu hndixahan ngayun nixtin hya ne, xicamacjiin tacún. Peru sa xi cuma cuetjuntjun tsëhë xi má ngayun mosu hndixahan ne, naxuntjun yojo nuju ta,

²² tsëhë xi ngu mosu hndixahan xi Nai naja vaxijin me ne, ndaya tjin xi cuma rë Nai naja. Hacuanitjin ni ngu xuta xi hacuiin mosu hndixahan me peru Nai naja cavaxijin rë me ne, mosu hndixahan rë Jesucristu má me.

²³ Cojo chjí cavatsë nuju Nina. Vëhë xi mijí rë xi mosu hndixahan rë xuta cuma ngayun.

²⁴ Ngayujun ni ne, ha sacuanitjin ni cún jima ngu ngayun hya xi cavaxijin nuju Nina ne, hacuanitjin ni tångun nduju cojo, xi tjin tangun cjuatacun nuju cojo Nina.

Chja Pablo tsêhê xuta xi tsajin chjuun tsajin xihin rê me

²⁵ Quihndê ne, sacuaaha tsêhê xuta xi cjêê cjuaha me chjuun cjêê cjuaha me xihin ne, tsajin ngu cjua xi cavitexa ná Nai naja xi cuichjá cojo nuju. Peru cuichjá cojo nuju sacuatjin tsingátaha cacún, tsêhê xi ngatsê rê cjuandaja xi casua ná Nai naja ne, cuma cumangu tacún cojo ná.

²⁶ Xi má ná ne, ngatsê rê cjuandya xi tjin naja quihndê ne, ngu xihin ne, ndatjin xi cuejña ni cha chuva xi ha tacun cha.

²⁷ Sa xi ha tjin chjuun nuju ne, xicanismuu ná. Hane sa xi tsajin chjuun nuju ne, xicachjuun chjuun.

²⁸ Peru sa xi cuixun ne, tsajin mé jyê nuju tjin, hacuaaha sa xi ngu na nixti cuixan na ne, tsajin mé jyê rê na tjin. Peru sa xi ngayun cuixun ne, hatuxa tjin nuju cjuacjintacun nchunchujun ni cahntsua ndya nuju, hane vêhê ngu cjuacjintacun xi mijí ná xi cuatjun cuma.

²⁹ Peru meje cuichjá cojo nuju ngayujun ni ta ha jemu camachúva nixtin. Vêhê xi hacuiin jercu nicjun yojo nuju tsêhê cjuandya rê ngeuhe ngasunhndê ta xuta xi tjin chjuun rê me ne, catisahmi cuenda me sacuaaha xi tsajin chjuun rê me;

³⁰ xuta xi jihnda me ne, catisahmi cuenda me sacuaaha xi hacuiin jihnda me; xuta xi jemu tjin rê me cjuasua ne, catisahmi cuenda me sacuaaha xi hacuiin jemu tjin rê me cjuasua; xuta xi vatsê me ne, catisahmi cuenda me sacuaaha xi hacuiin tsêhê me xi cavatsê me;

³¹ hane xuta xi jemu sahmixa cojo yêjê ni xcusun xi tjin ngasunhndê ne, hacuiin cuatjutaha sahmixa me cojo. Cuatjin meje rê xi tsingataha cacun xuta ta, tsêhê xi ngasunhndê xi chutsejen vi ne, hatuxa cjuê.

³² Ngahan ne, meje ná xi ngayun ne, tsajin nuju mé cjuandya. Xuta xi tsajin chjuun rê me ne, marcun rê me tsêhê xa rê Nai naja ta, tsêhê xi meje sahmi me hacutjin xi chuya rê Nai naja.

³³ Peru xuta xi tjin chjuun rê me ne, marcun rê me tsêhê cjuandya rê ngasunhndê ta, tsêhê xi meje sahmi me hacutjin xi chuya rê chjuun rê me.

³⁴ Hane xi cuatjin sahmi me ne, ma jo cjuatacun rê me. Hane ngu chjuun xi tsajin xihin rê o sa xi ngu chjuun xungun ne, marcun rê na tsêhê xa rê Nai naja, cojo sa xi cuma tsêhê Nina na cojo yojo rê na cojo hasen rê na. Peru na xi cavixan ne, marcun rê na tsêhê xa rê ngasunhndê ta, tsêhê xi meje sahmi na hacutjin xi chuya rê xihin rê na.

³⁵ Cachjá cuatjin cojo nuju, peru hacuiin xi cuátêcja cjuatacun nuju ta xi ndaja tsujun. Meje ná xi cuanguncun ngu ndiya rê cjuandaja. Hacuaha meje ná xi tuhun yojo nuju ngundiyaxa ni xi nihñu xa rê Nai naja.

³⁶ Peru sa xi ngu xuta tsingataha cacun me xi cuaaintjin xi sahmi me xi cjêê cuixan me cojo rê na xi tacunvasen cjuavixan rê me cojo, hane na vêhê ne, ha cavechú nixtin rê na xi cuma cuixan na, hacuaaha sa xi ha tuxa meje rê xi cuixan na ne, catisahmi me mé xi meje sahmi me. Catixan me cojo rê na ta, tsajin mé jyê rê me xi cuatjin sahmi me.

³⁷ Peru ngu sa xuta xi hacuiin sahmi ngu yê xi cuixan me hacuaaha ma vêhêñu me yojo rê me ne, sa xi ha cavejña cacun me xi cuixaaïn me ne, ndaja sahmi me xi cuixaaïn me.

³⁸ Vêhê xi me xi vixan cojo rê na xi tacunvasen cjuavixan rê me cojo ne, ndaja sahmi me. Hane me xi vixaaïn ne, hitsê sa ndaja sahmi me.

³⁹ Ngu chjuun ne, tsajin ndaya tjin na tsêhê xihin rê na jinguyêjê rê xi tacun cha cjuahñu. Peru sa xi cueya xihin rê na ne, ha ndaya tjin na xi cuixan na cojo tu yo ni xi meje rê na, ndastu xi ladu rê Nai naja má cha.

⁴⁰ Peru xi má ná ne, hitsê sa ndaja cuma rê xahasen rê na sa xi cuejña cuanitjin ni na. Hane tsingátaha cacún xi ngahan ne, hacuaaha cojo ngahan jiya Hasen rê Nina cahntsua xahasen naha.

8

Xichinë xi viyuju xcun nina ndyojo

¹ Quihndê ne, ngeuhe cuichjá cojo nuju tsêhê xichinë xi viyuju xcun nina ndyojo. Ha hyan ta ngayejen ni ne, tjin cjuatacun xi hyan. Hya xi jemu cjin cjuatacun xi hyan ne, nihña yehe yojo naja suvaan, peru hya xi tjin naja cjuahmutacun ne, nihña yehe xingueen.

² Sa xi ngu xuta tsingataha cacun me xi ndaja vêê me ngu cjuatacun ne, cjêê sa cuijnercu me sacuatjin xi meje rê.

³ Peru sa xi ngu xuta hmu cacun me Nina ne, me vêhê ne, vêê Nina me.

⁴ Quihndê ne, sacuaaha cjuatacun tsêhê xichinë xi viyuju xcun nina ndyojo ne, ha hyan ta tsajin camahani mé vengui hjí rê nina ndyojo jinguyê ni ngasunhndê, hacuaaha ha hyan ta ngu tutu ni Nina xi tacun me.

⁵ Handasa xi jemu tjín xi hmí rê nina, sa ngahnga sa nangui ne, hacuaaha handasa jemu cjín nina xi cuacun vê hacuaaha jemu cjín nai vihi nai vêhê tjín ne,

⁶ peru xi cuma naja ngayaan ne, ngu tutu ni Nina xi tacun me, me xi Nahmi naja. Me vêhê xi casahmi me ngayêjê ni, hacuaaha ngayaan ne, nechan nguehe ngasunhndê xi nihña tutjin xi meje rê me. Hacuaaha ngu tutu ni Nai naja Jesucristu xi tacun me, me xi hacuaaha cojo casahmi Nina jinguyêjê ni. Hacuaaha ngayaan ne, nechan nguehe ngasunhndê ngatsê rê xi cuatjin meje rê Jesucristu.

⁷ Peru hacuiin yêjê xuta vêê me cjuatacun vêhê. Yahnga xuta ne, ngatsê rê xi cuatjin xcusun rê me hatsêê ne, vutsejen me xichinë vêhê sacuaaha ngu cjuatjo xi tsêhê cuaha nina ndyojo. Hane hya xi jinê me ne, jemu choho má cacun me, tsêhê xi, xi má rê me ne, jemu tsavi.

⁸ Peru xcusun xi chinê ne, visecuaain naja xi chuya rê Nina tsajan. Sa xi xinê ngu xcusun ne, tsajin mé nichajan, hacuaaha sa xi xinêê ne, tsajin mé ndaja sacú naja.

⁹ Nechun cuidadu, ngayun xi vijne rcun xi tsajin mé sahmi rê xi xinê ngu xcusun xi caviyuju xcun nina ndyojo. Nechun cuidadu, sá tu cuechxi nixtin xi ngu xuta ladu rê Jesús xi cjêê ndaja cuijnercu cjuachacun rê Nina ne, tsismi cacun me ndiya rê Nina ngatsê rê xcusun xi nihña.

¹⁰ Cuatjin nechun cuidadu ta, tsêhê xi ngayun xi vijnercun ne, sa xi yo scuêê nuju xi tichinu niñu yungun rê nina ndyojo ne, me vêhê ne, ngatsê rê xi cjêê ndaja cuijnercu cjuatacun rê me ne, cojo me cuetju cacun me sinê me xi chinu xi caviyuju xcun nina ndyojo.

¹¹ Xi cuatjin cuma ne, xuta ladu rê Jesús xi cjêê cuijnercu ndaja jan ne, chajá me ngatsê rê cjuatacun nuju xi cuatjin nihña, handasa Jesucristu cahme me ngatsê rê xuta vêhê.

¹² Vêhê xi, xi cuatjin ninguetsun cjuatacun rê xuta xi cuacun cjêê cuijnercu ndaja me ne, hacuiin suvá ni me xi cuacun vêhê xi choho nihña cojo rê me ta hacuaaha cojo Jesucristu.

¹³ Vêhê xi sa xi xichinë sahmi xi tsismi cacun ngu xuta ladu rê Jesús ndiya rê Nina ne, tsajin nu tsajin nixtin xi cúa sínê sa vêhê, cojo sa xi sahmee xi tsismi cacun ngu xuta ladu rê Jesús jan ndiya rê Nina.

9

Xcusun xi vechú chuva rê xi sahmi ngu apóstol

¹ Ngahan ne, ngu apóstol ngahan, hane vechú chuva rê xi sahme yêjê ni xcusun xi sahmi ngu apóstol, tsêhê xi ngahan ne, cahvê Nai naja Jesús. Ngayun ne, camá ngayun ladu rê Nai naja, ngatsê rê xi cjêê casahme xa rê me ngajñi nuju.

² Handasa mijí cumacjain rê yahnga xuta xi apóstol má ngahan ne, peru ngayun ne, macjain nuju ta, tsêhê xi tsejen xi apóstol ngahan ngatsê rê xi ngayun ne, cavisuhun ladu rê Nai naja ngatsê rê cjua xi cachjá cojo nuju.

³ Cuitjin tsicúya cjua vihi tsêhê xuta xi sahmi chuva ná me ndyá ngajñi nuju:

⁴ Tjin ná chuva rê xi tuhun xi xini xi sihin.

⁵ Tjin ná chuva rê xi chjihín chjuun xi cuma chjuun niji, sacuatjin rê apóstol xi yahnga cojo xicjin Nai naja cojo Pedru.

⁶ ¿Há Bernabé cojo ngahan tutu ni xi meje rê xi nihña xa sehe sacú xi xini xi sihin?

⁷ Ngu xuta xi má me sindadu ne, ¿há tujún rê suvá me tsicojo me xi sahmi me xa vêhê? Ngu xuta xi sahmi me xitjê ne, ¿há jinii me xitjê xi vunihnga me jan? Ngu xuta xi sahmi cuidadu chu tsánga ne, ¿há hviin me lechi rê chu?

⁸ Ngahan ne, hacuiin suvá cjuatacun rê xuta xi tichjá ta ley rê Moisés ne, hacuaaha cuatjin chja.

⁹ Xcun ley rê Moisés ne, cuitjin camahindu: “Ngu ndyaja xi visecoo nuju ne, hacuiin nichaan xi sinê chu ta, hacuaaha tjín ru chuva rê xi sinê chu tsêhê xa xi sahmi chu.” Cjua vêhê ne, hacuiin meje cuichja xi vityangui cacun Nina tsêhê chu ndyaja ta

¹⁰ xi vityangui cacun me ne, tsijin ngayin. Cjua vêhê ne, camahindu ngatsê niji ngayin. Xuta xi vacjan me nangui cojo xuta xi vechjunne me tutjê ne, hya xi sahmi me xa vêhê ne, meje rê xi cuetaha cacun me xi sacú rê me hitsê tutjê vêhê.

¹¹ Ngayin canitjin cjua rê Nina cahntsua xahasen nuju xingu xingu ngayun. Vêhê xi hacuiin choho tjín sa xi tuhun niji hitsê cjuachaja niji.

¹² Sa xi vechú chuva rê xi tuhun cjuachaja rê jingu sa apóstol ne, ¿hitsê sa guan ngayin!

Peru ngayin ne, cjêê camahani mé xi chjahyin nuju. Cahndê rê vêhê ne, caca niji cojo jemu cjín cjuacjintacun, cojo sa xi hacuiin nihña xi tjín yo xi tsitjungi cjuandajyihí xi chja tsêhê Jesucristu.

¹³Ngayun ne, ha hyun ta nahmi xi sahmi me xa cahntsua yungun xi matitjun ne, hacuaha ngajan vaxê me cjuachaja rê me. Cuma cuinújan ne, nahmi xi sahmi me cojo chu xi sua xuta cjuatjo ngajan ngasunscun ne, hacuaha ngajan faha me xi jinê me.

¹⁴Ha chuva vèhê ni ne, cavitexa Nai naja xi me xi sua machaya rê xuta tsêhê cjuandajyihî xi chja tsêhê Jesús ne, ha xcun xa vèhê ne, ngajan cuaxê me cjuachaja rê me.

¹⁵Peru ngahan ne, cjêê camahani mé xi cjuéhya rê xuta rê yungun. Hane cjuaxi titsihindu nuju vi ne, hacuini tsêhê xi féhya nuju cjuachaja naha. Xi má ná ne, hitsê sa ndaja tsahan xi cueya, xi cuma rê xi chjahátahá rê cjuasua naha xi sahme xa rê Nina tu cjuatjo.

¹⁶Xi suá machaya rê xuta cjuandajyihî xi chja tsêhê Jesucristu ne, tsajin mé má vaxêndaja suva yojo naha ta, hatuxa tjin ná xi sahme cuatjin. Jemu chojyihî tsahan sa xi suaan cumachaya rê xuta cjuandajyihî vèhê.

¹⁷Vèhê xi, sa xi ngatsê rê xi meje ná suva xi cuatjin suá machaya rê xuta cjuandajyihî vèhê ne, ha tjin chjí naha. O sa xi sahme handasa mijí ná ne, peru Nina casua ná me xa vèhê.

¹⁸Peru çjarê xi chjí naha ni? Chjí naha ne, xi tu cjuatjo ni suá machaya rê xuta cjuandajyihî xi chja tsêhê Jesucristu. Vèhê xi chjí naha, vèhê xi sua rê xahasen naha cjuasua. Cuma cuinújan xi handasa xi tjin ná chuva rê ne, cjêê camahani cjuéhya rê xuta rê yungun xi sua me cjuachaja naha xi sahme xa rê Nai naja.

¹⁹Ngahan ne, ha ndaya tjin ngahan. Hacuini mosu hndixahan rê xuta má ngahan. Peru sahme sacua ha xi mosu hndixahan rê yêjê ni xuta má ngahan, cojo sa xi cjin sa xuta cuisécoo rê me xi cuisehen me ladu rê Jesucristu.

²⁰Hya xi tejñayajñe ngajñi rê xuta tjê rê Israel ne, sahme sacua ha sahmi xuta xi cuacun vè, cojo sa xi cjin sa xuta tjê rê Israel cuisécoo rê me xi cuisehen me ladu rê Jesucristu. Hya xi tejñayajñe ngajñi rê xuta xi tjengui me ley rê Moisés ne, sahme sacua ha sahmi xuta xi cuacun vè, handasa hacuini ngahma gobiernu rê ley vèhê tejña. Cuatjin sahme, cojo sa xi cjin sa xuta xi tjengui ley vè cuisécoo rê me xi cuisehen me ladu rê Jesucristu.

²¹Hya xi tejñayajñe ngajñi rê xuta xi faharcuaain ley rê Moisés ne, sahme sacua ha sahmi xuta xi cuacun vè, handasa faharcun ngahan ley rê Nina, tsêhê xi tejña ngahma gobiernu rê ley rê Jesucristu. Cuatjin sahme, cojo sa xi cjin sa xuta xi faharcuaain ley rê Moisés vè cuisécoo rê me xi cuisehen me ladu rê Jesucristu.

²²Hya xi tejñayajñe ngajñi rê xuta xi cjêê ndaja cuijnercu me cjuachacun rê Nina ne, sahme sacua ha sahmi xuta xi cuacun vè, cojo sa xi cjin sa xuta xi cjêê ndaja cuijnercu me cjuachacun rê Nina cuisécoo rê me xi ndaja cuisehen me ladu rê Jesucristu. Cuma cuinújan ne, sahme sacua ha sahmi yêjê ni xuta, cojo sa xi sacú ná chuva rê xi cuma cuáxêtjê ngujo me.

²³Cuatjin sahme yêjê xcusun vèhê ngatsê rê cjuandajyihî xi chja tsêhê Jesucristu, cojo sa xi hacua ha cojo ngahan satê ná.

²⁴Ngayaan ne, ha hyan ta cha xi vincha carrera ne, yêjê ni cha sahmi cha ngahñu, peru ngu ni cha caa rê cha xi fehe titjun cha, hane cha vèhê xi fahatsja cha cjuatjo rê. Ha chuva vèhê ni meje rê xi ngayujun ni ne, nihñu ngahñu, cojo sa xi hacua ha suva Nina ngu premiu xi cuma ngascan.

²⁵Quihndê ne, cha xi cuatjin vincha carrera ne, hya xi vèhêchjine cha yojo rê cha ne, hatuxa jemu viyuju cha cuidadu tsêhê yêjê ni xcusun xi choho sahmi cojo cha. Cuatjin sahmi cha, cojo sa xi sacú rê cha ngu premiu xi ficanii rê. Peru ngayaan xi ladu rê Jesucristu ngayaan ne, cuatjin nihña, cojo sa xi Nina ne, sua naja me ngu premiu xi tsajin nixtin vêtsun.

²⁶Vèhê xi ngahan ne, hacuini tujyê vánga, hacuini tujyê sahme ta

²⁷Jemu tsijênda rê yojo naha, hacua ha sahme rê ngu yêjê xi sahmi hacutjin xi meje ná. Cuatjin sahme, sá tu ha xcun xi ha casuá camachaya rê xuta cjuandajyihî xi chja tsêhê Jesucristu ne, ngahan suva tsichajá.

10

Mijí rê xi chjahanrcun nina ndoyojo

¹Ngayujun ni ne, meje ná xi hacuini nichayun xcusun xi cavatju xutachanga naja xi caviyuju nixtin rê Moisés. Ngayêjê ni me xi cuacun vè ne, quiji me sacuatjin quiji yufí, hacua ha yêjê ni me cavatjuca me ndachacun Hani.

²Hane xi casahmi me cuatjin ne, cuatjin camá xi yêjê ni me cavisehen me ladu rê Moisés.

³Hacuaha yêjê ni me cajñê me niñu xi casua Nina.

⁴Hacuaha yêjê ni me cahvi me nandá xi casua Nina. Cahvi me nandá xi cavetju rê naxi xi casua Nina xi cjue cojo rê me. Hane naxi vèhê ne, hacuini Jesucristu.

⁵ Peru jemu cjin xuta xi cuacun vë xi cachuyiin rë Nina tsëhë me. Vëhë xi ngajan ngu cahndë xín camahani cahme nguëhe cahme ngajan me.

⁶ Cuatjin camá yëjë xcusun vëhë sacuaaha ngu ejemplu xi cuma naja, cojo sa xi hacuiin cumameje naja cjuatsehen, sacuatjin camameje rë me xi cuacun vëhë.

⁷ Hacuaha mijí rë xi chjuhuncun nina ndyojo sacuatjin casahmi ngujo me xi cuacun vëhë. Cuitjin camahindu xcun xujun rë Nina: “Caviyuju xuta cajiné cahvi me, sehe cavisatjenhnga me quiji casua me cjuasua xahasen rë me.” Cuatjin camahindu.

⁸ Mijí rë xi nihña cjuatsehen cojo ngu chjuun o sa cojo ngu xihin sacuatjin casahmi ngujo me xi cuacun vëhë. Hane ha nixtin vëhë ni ne, cahme can jyan mil me.

⁹ Hacuaha mijí rë xi chjahanchuvan Nai naja sacuatjin casahmi ngujo me xi cuacun vëhë, hane cahme me xi cafaha chu yë me.

¹⁰ Hacuaha mijí rë xi choho cuisiajmuhmu tsëhë Nina sacuatjin casahmi ngujo me xi cuacun vëhë, hane catsiquehen rë me ángel xi hatuxa tsiquehen naja.

¹¹ Yëjë xcusun vëhë ne, cavatju me xi cuacun vëhë camá sacuaaha ejemplu xi cuma naja. Hacuaha camahindu cjuua vëhë cojo sa xi sua naja conseju, ngayaan xi nechán quihndë xi ha meje cuijnetaha ngasunhndë.

¹² Vëhë xi xuta xi má rë me xi jemu hñu siu cjuatacun rë me xi mangucacun me cojo Nina ne, catiyuju me cuidadu, sá tu chájá me tsëhë ndiya rë Nina.

¹³ Ngayun ne, hya xi chjaháchuva nuju ne, chjaháchuva nuju sacuaaha chjaháchuva rë yëjë xuta. Peru Nina ne, hatuxa cuma cumangu tacuun cojo rë me ta, tsëhë xi me vëhë ne, suaain me cahndë xi chjaháchuva nuju cojo ngu chuva rë xi scaain nuju cojo. Hya xi chjaháchuva nuju ne, me vëhë sua me chuva rë hacutjin cuetjuntjun, cojo sa xi scaa nuju hisca xi cuetjuntjun.

¹⁴ Vëhë xi ngayujun ni ne, xicavisuhunñuu cojo xuta xi faharcun me nina ndyojo.

¹⁵ Cuitjin tichjá cojo nuju, tsëhë xi jemu xuta quicun cacun ngayun. Nichuvun suvun cjuua xi chjá cojo nuju.

¹⁶ Ngayaan ne, hya xi hyuun xi hinchá copa rë Nai naja ne, jemu ndaja tsajan. Nihña tangun cjuatacun naja cojo Jesucristu xi ninguitsjen hacutjin cavanga jni rë me hya xi cahme me. Hane hya xi chinë pan xi chotooncjan ne, nihña tangun cjuatacun naja cojo Jesucristu xi ninguitsjen hacutjin cavatju me camá xcun cru.

¹⁷ Sacuatjin rë pan xi ngu ni má handasa jemu cjin rqui xtotoho ne, hacuanitjin naja ngayaan ta tjin tangun cjuatacun naja cojo xingueen, handasa jemu cjin má ngayaan. Cuatjin ta, tsëhë ngu ni pan ne, chinë ngayejen ni hacuaaha ngu ni má ngayaan.

¹⁸ Ningatuhun tacún hitsë tsëhë xuta tjë rë Israel. Xuta xi vejña me chu xi cahme sacuaaha cjuatjo xcun Nina ne, sahmi tangun me cjuatacun rë me cojo Nina.

¹⁹ Xi chjá cuatjin ne, ¿há chjá xi nina ndyojo ne, jemu vengui chjí rë? ¿Há chjá xi yojo xi cavejña xcun nina ndyojo ne, jemu vengui chjí rë?

²⁰ Hacuiin ta, yojo xi vejña me ne, xcun xitsehen vejña me, hacuiin xcun Nina. Quihndë ne, mijí ná xi ngayun ne, nihñu tangun cjuatacun nuju cojo xitsehen.

²¹ Ngayujun ni ne, cumaji siuhun xi xinchá copa rë Nai naja hane hacuaaha siuhun xi xinchá copa rë xitsehen. Hacuaha cumaji xinu xi viyuju xcun Nina hane hacuaaha xinu xi viyuju xcun xitsehen.

²² ¿Há ndatjin xi nihña xi cuma chini Nai naja? ¿Há hitsë sa hñu ngayaan xi cuma rë me? ¡Hacuiin!

Hacuiin yëjë xcusun xi ndaja tsajan xi nihña

²³ Yahnga ngayun ne, nújun cuitjin: “Cuma nihña yëjë ni xcusun.” Cuatjin nújun. Cuma, peru hacuiin yëjë xcusun xi ndaja tsajan. “Cuma nihña yëjë ni xcusun”, peru hacuiin yëjë xcusun xi cuisecoo naja xi cuanguen nduju cojo cjuua rë Nina.

²⁴ Mijí rë xi jima ngu ngayaan nihña ngahñu xi ndaja tsajan suvaan ta xi meje rë ne, nihña ngahñu xi ndaja tsëhë xingueen.

²⁵ Xinu tu mé ni hiscan xi xteña yojo. Xicachjinengunsuun vihi vëhë tsëhë yojo jan ngatsë rë xi chuyiin rë cjuatacun nuju tsëhë yojo xi cavejña xcun nina ndyojo.

²⁶ Cuatjin nihñu ta, xcun xujun rë Nina ne, cuitjin camahindu: “Ngasunhndë cojo yëjë ni xi tjin ngasunhndë ne, tsëhë Nina.” Cuatjin camahindu.

²⁷ Sa xi ngu xuta xi manguaain cacun cojo Jesucristu cuichja me xi cuangun xinu niñu ndava me ne, tángun. Hacuaha xinu tu mé ni xcusun xi cuiyuju me xi xinu. Xicachjinengunsuun vihi vëhë tsëhë xi caviyuju me jan ngatsë rë xi chuyiin rë cjuatacun nuju tsëhë yojo xi caviyuju xcun nina ndyojo.

²⁸⁻²⁹ Peru sa xi yo sua cumachaya nuju xi yojo jan ne, cavejña xcun ngasuncun ne, xicachinuu yojo jan ngatsë rë me xi casua camachaya nuju hacuaaha ngatsë rë xi chuyiin rë

cjuatacun rē me tsēhē yojo xi viyuju xcun nina ndyojo. Hacuini ngatsē rē xi chuyiin nuju suvun.

Peru tjin yahnga xuta xi cuma cjuinenguise me cuitjin: “¿Mé má chjaháchuva rē xcusun xi ngahan cuma sahme ngatsē rē xi chuyiin rē cjuatacu rē jingu sa xuta tsēhē?

³⁰ Sa xi suá nacuechji rē Nina tsēhē xcusun xi jínē ne, ¿mé má choho chja me tsahan ngatsē rē xi cuatjin jínē ni?” Cuatjin cjuinenguise me.

³¹ Vēhē xi, sa xi xinu o sa xi siuhun o sa xi tu mé ni xcusun xi nihñu ne, meje rē xi nihñu yējē cojo sa xi nihñu jyē nihñu hnga Nina.

³² Mijí rē xi nicjun rē xuta, há xi xuta tjē rē Israel ne, o há xi xutaxín ne, o há xi xuta rē yungun rē Nina.

³³ Hya xi sahme tu mé ni xcusun ne, sahme ngahñu xi chuya rē yējē xuta tsahan. Sahmee ngahñu xi ndaja tsahan suva ta sahme ngahñu xi ndaja tsēhē jemu cjín xuta, cojo sa xi cuetjutje me.

11

¹ Vēhē xi ngayujun ni ne, meje rē xi nihñu sacuatjin sahme ngahan, sacuaaha ngahan xi sahme sacuatjin casahmi Jesucristu.

¿Há meje rē xi cuetsan rcuun hya xi chjahanrcun Nina?

² Ngayujun ni ne, ngahan ne, vaxéndaja nuju ta, tsēhē xi yējē ni hora ne, vitsjen nuju ngahan, hacuaaha tivangun nduju cojo yējē xcusun xi casuá camachaya nuju.

³ Peru meje ná xi cumachaya nuju ta me xi matitjun tsēhē jima ngu xihin ne, hacui Jesucristu, hane xi matitjun tsēhē ngu chjuun ne, hacui xihin rē na, hane xi matitjun tsēhē Jesucristu ne, hacui Nina.

⁴ Sa xi ngu xihin titsa rcu cha hora xi sahmi cha oración rē cha o sa hora xi chja cha cjuarē Nina cojo xuta ne, jemu choho sahmi cha cojo Jesucristu, me xi matitjun tsēhē cha.

⁵ Hane sa xi ngu chjuun tsajin titsa rcu na hora xi sahmi na oración rē na o sa hora xi chja na cjuarē Nina cojo xuta ne, jemu choho sahmi na cojo xihin rē na, cha xi matitjun tsēhē na. Ha tangun ni sacuaaha xi casejnu rē rcu na.

⁶ Sa xi ngu chjuun vetsaain na rcu na ne, hacuaaha catisejnu rē. Peru sa xi sava tsejen xi xtisun rē tsjarcu na o sejnu rē ne, catetsa na rcu na.

⁷ Xuta xi xihin ne, mijí rē xi titsa rcu me ta, me vēhē ne, matitjun me sacuatjin matitjun Nina hacuaaha tsingacun me hacutjin jyē hnga Nina cojo Hasen rē me. Peru yachjin ne, tsingacun na hacutjin yehe hnga xuta xi xihin cojo cjuatacun rē me.

⁸ Cuatjin ta hya xi casahmi Nina xuta ne, titjun casahmi me ngu xihin, sehe cafaha me ngu rquí ninda rē xihin jan casahmi me ngu chjuun.

⁹ Hacuaaha xuta xi xihin ne, hacuiin catsindaja Nina me ngatsē rē yachjin ta yachjin ne, catsindaja Nina ngatsē rē xuta xi xihin.

¹⁰ Vēhē xi ngatsē rē xi tivutsejen ángel ne, yachjin ne, meje rē xi cuetsa na rcu na, cojo sa xi tsingacun na xi ngahma gobiernu rē xihin ran siu na.

¹¹ Ngayejen ni ngayaan xuta ladu rē Jesucristu ne, hacuiin suvá ni chjuun o sa xi suvá ni xihin xi vengui chjí rē me ta catsijo xcusun ni ngayaan vengui chjí naja.

¹² Quixi xi cafaha Nina ngu rquí ninda rē xihin xi casahmi me chjuun xi tjun tjun casahmi me. Peru quihndē ne, ngayaan xihin ne, hacuaaha tsin ngayaan tsēhē yachjin. Peru Nina casahmi me ngayējē ngarca.

¹³ Ngayujun ni ne, ha hyun ta ngu chjuun ne, ndajin tjin xi cuetsaain na rcu na hya xi sahmi na oración rē na cojo Nina.

¹⁴ Suvá tsejen xi jemu cjuasava xi cuma rē ngu xihin sa xi nduju tsjarcu cha.

¹⁵ Peru yachjin ne, ndaja tsejen na xi nduju tsjarcu na ta, tsēhē xi Nina casua me xi cuetsa rē rcu na.

¹⁶ Peru sa xi yo meje cuichja xi ndajin tjin xcusun vēhē ne, catamachaya rē ta ngayin cojo ngayujun ni xuta rē yungun ne, ha vēhē ni xcusun naja.

Cuaain tjin xi má hya xi má suhi rē Comida tsēhē Nai naja ngajan Corinto

¹⁷ Nguehe tsihindu nuju ngujo cjuarē. Vaxeendajan nuju ta, tsēhē xi hya xi matangun ngayun xi chjuhunrcun Nina ne, cahndē rē xi ndaja cuetjucaa tsujun ne, tu chohotjin vetju.

¹⁸ Xi tjtjun ne, fehe cjuarē tsahan xi hya xi cuatjin matangun ngayun ne, hacuiin ngu tangun ni má cjuatacun nuju. Hane ngahan ne, macjain ná hitsē.

¹⁹ Xi má nuju ne, ¡hatuxa meje rē xi cuatjin cuma, cojo sa xi cuma tsejen yo xi tsēhē jain Nina!

²⁰ Hya xi matangun ngayun ne, hacuiin comida rē Nai naja xi chinu ta,

²¹ hora xi chinu niñu ne, jima ngu ngayun vangun titjun chjuhun comida nuju suvun xinu. Hane ngujo ngayun ne, hisca vojo sa nuju. Hane ngujo nga ngayun ne, hisca camachuhun.

²² ¡Sacuaha xi tsajin ndya nuju xinu siuhun! O sa tsajin ne, sacuaha xi nihñuchuvun xuta ladu rë Nina hacuaha chandunsavun xuma me xi tsajin rë. ¿Mé cuichjá cojo nuju ni? ¿Há cuaxëndaja nuju? ¡Xi cuatjin nihñu ne, cumaji!

Comida tsëhë Nai naja

²³ Cjua xi casuá camachaya nuju ne, hacui cjua xi cafahántsa tsëhë Nai naja xi chja cuitjin: Nguixun xi camá entregadu Nai naja Jesús ne, tacun me cojo tejó xuta ladu rë me xi sinë nguixun me tsëhë suhi Pascua. Hane hora vëhë ne, cafaha me ngu pan.

²⁴ Hane xi café casua me nacuechji rë Nina ne, cavotohocja me pan jan, sehe cachja me cuitjin: “Vihi ne, yojo naha xi cueya ngatsë nuju. Cuitjin nihñu xcusun vihi yasen ni, cojo sa xi ninguitsjun ná.” Cuatjin cachja Jesús.

²⁵ Hane xi cajnetaha cajinë nguixun me ne, hacuanitjin ni cafaha me copa, sehe cachja me cuitjin: “Xan vihi ne, vihi jni naha xi sahmichihin rë compromisu xatsë xi tisahmi Nina cojo xuta. Cuitjin nihñu xcusun vihi jima ngu ndiya xi siuhun cuitjin, cojo sa xi ninguitsjun ná.” Cuatjin cachja me.

²⁶ Vëhë xi jima ngu ndiya xi tichinu pan vëhë hacuaha tjihyún xi hinchá copa vëhë ne, tinguitsjun tsëhë cjuaveya rë Nai naja. Hane cuanitjin cjín ni cumá hisca hya xi cuinduva nga me.

Hacutjin meje rë xi xinëe xi hmi rë Comida tsëhë Nai naja

²⁷ Ngajan xi tu yo ni xi tujyë jinë pan vëhë o sa xi hvi xan vëhë xcun Comida tsëhë Nai naja ne, quitjen jyë xi tsixcuehyu yojo rë Nai naja, quitjen jyë xi tsixcuehyu jni rë me.

²⁸ Vëhë xi meje rë xi jima ngu ngayaan ne, nichuvan suvaan cjuatacun naja, sehe xinë pan jan hacuaha siuhun xan jan ta,

²⁹ tsëhë xi yo xi tsinguitsjin yojo rë Nai naja hora xi sinë cuihi xcusun vëhë ne, sacú rë ngu castigu xi cuatjin tujyë jinë hvi.

³⁰ Vëhë xi jemu cjín xuta tsëhë ngajñi nuju ne, ndaya tjin cacun me hacuaha hmu rë me; yahnga nga me ne, hisca cahme ne.

³¹ Peru sa xi ngayaan ndaja nichuvan suvaan cjuatacun naja ne, Nai naja ne, hacuaha sahmi naja me castigu.

³² Peru sa xi Nai naja sahmi naja me castigu ne, cuatjin sahmi me cojo sa xi cueyaquixi naja me ndiya hane hacuiin tangun cuma ngayaan castigu cojo xuta tsehen.

³³ Vëhë xi ngayujun ni ne, hya xi cumatangun ngayun xi xinu niñu ne, tinechunyun xingun xingu xingu ngayun.

³⁴ Sa xi tjin yahnga ngayun xi jemu vojo nuju ne, cojo tjun ni xinu ngajan ndya nuju, cojo sa xi hacuiin sahmi nuju Nina castigu xi cuatjin vinechunyuun xingun. Quihndë ne, sacuaha cjuacjintacun xi yahnga ne, hya xi cuinduvtjéngë nuju ne, hya sahmechehen.

12

Cjuatjo xi sua Nina ngayaan

¹ Ngayujun ni ne, meje ná xi cuijnercun sacuaha tsëhë cjuatjo xi cuacun sua naja Nina.

² Ngayun ne, ndaja hyun xi hya xi cjëë cuisuhun ladu rë Nina ne, tujyë caningatuhun cachjuhunrcun nina ndyoj ni hatuxa tsajin cjuahñu rë.

³ Vëhë xi meje ná xi cuijnercun xi ngu xuta xi tichja me ngu cjua xi casua Hasen rë Nina me ne, hatuxa cuichjaain me cjua vihi: “¡Jesús ne, catji me cojo xitsehen!” Hacuaha suvá ni xuta xi jiya Hasen rë Nina cahntsua cjuatacun rë me xi cuma cuichja me cjua vihi: “¡Jesús ne, Nai naha me!”

⁴ Quihndë ne, jemu cjín xcusun cjuatjo xi tjin, peru suvá ni Hasen rë Nina xi sua naja yëjë cjuatjo vëhë.

⁵ Hacuaha jemu cjín xcusun xa rë Nina xi tjin, peru suvá ni Nai naja xi suaxa naja me.

⁶ Hacuaha hacuiin ngu chihin xcusun xa xi Nina sahmi me xcun cjuahñu naja, peru ngu ni Nina sahmi me vëhë ngajñi jima ngu jima ngu ngayaan.

⁷ Nina sahmi me xi ma tsejen xi jiya Hasen rë me cahntsua xahasen naja xingu xingu ngayaan, cojo sa xi ndaja tsajan ngajñi naja ngayejen ni.

⁸ Ngu xuta ne, jemu vechú cjuatacun rë me hya xi chja me ngu cjua xi sua Hasen rë Nina me. Hane ngu nga xuta ne, jemu ndaja vijnercu me hya xi chja me ngu cjua xi sua Hasen rë Nina me.

⁹ Hane ngu nga xuta ne, ha Hasen vëhë ni ne, sahmi xi ndaja mangucacun me cojo Nina. Hane ngu nga xuta ne, ha Hasen vëhë ni sahmi xi ma sahmi me xi mandaja xuta hmu rë.

¹⁰ Hane ngu nga xuta ne, fahatsja me cjuatacun xi sahmi me cjuarcun, hane ngu nga xuta ne, fahatsja me cjuatacun xi cuichja me ngu cjua xi sua Nina me. Ngu nga me ne, fahatsja me cjuatacun xi cuijnercu me mé xcusun hasen catsingatju ngu cjuatacun xi cafahatsja ngu xuta, ¿há hasen ndaja?, o ¿há hasen tsehen? Ngu nga xuta ne, fahatsja me cjuatacun xi cuichja me ngujo xcusun hne xi hvíin me. Hane ngu nga me ne, fahatsja me cjuatacun xi sua me machaya naja mé vijne xi cuacun vèhè.

¹¹ Ngu tu tu ni Hasen rè Nina xi sahmi yèjè cjuandaja vèhè, hacuaha hacui ni Hasen rè Nina xi sua naja jima ngu ngayaan hacutjin xi chuya rè.

Sacuaha ngu ni yojo má ngayejen ni

¹² Ha hyan ta yojo rè ngu xuta ne, tjin tsja, tjin ntsacu, tjin nguisin, tjin jingusa cahndé tsèhè. Peru yèjè ni cahndé vèhè ne, má ngu ni yojo rè xuta. Hacuaha cuanitjin rè Jesucristu.

¹³ Hacuaha cuanitjin naja ngayaan ta ngayejen ni ne, hya xi caxtenda ngayaan, handasa xuta ladu rè Nina o sa xutaxín, handasa mosu hndixahan o sa xuta xi ndaya tjin má ngayaan ne, peru camá ngayaan sacuaha ngu ni yojo ngatsè rè ngu tu tu ni Hasen rè Nina. Hacuaha ngayejen ni ne, ngu tu tu ni Hasen rè Nina xi cavisehen cahntsua xahasen naja.

¹⁴ Cuatjin ta yojo rè ngu xuta ne, hacuiin ngu cahndé ni tjin rè ta jemu cjín cahndé tjin rè.

¹⁵ Ntsacun ne, cuma cuichja cuitjin: “Ngatsè rè xi hacuiin ntsun má ngahan ne, vèhè xi hacuiin tsèhè yojo naja má ngahan.” Cuatjin cuichja. Peru handasa cuatjin cuichja ne, hacuiin vèhè sahmi xi hacuiin tsèhè yojo naja má.

¹⁶ Hacuaha tyjavañujú nga ne, cuma cuichja cuitjin: “Ngatsè rè xi hacuiin túxcun má ngahan ne, vèhè xi hacuiin tsèhè yojo nuju má ngahan.” Cuatjin cuichja. Peru handasa cuatjin cuichja ne, hacuiin vèhè sahmi xi hacuiin tsèhè yojo naja má.

¹⁷ Sa xi suvá tuxcun má yèjè yojo naja ne, ¿hacutjin cuinuhyan? O sa xi suvá tyjavañujú má yèjè yojo naja ne, ¿hacutjin cuijné naja?

¹⁸ Peru Nina ne, caviyujutahá me jima ngu cahndé tsèhè yojo naja tucutjin ni xi cachuya rè me.

¹⁹ Sa xi yèjè ni yojo naja má ngu ni ntsan o sa xi ngu ni tuxcun ne, vèhè ne, hisca hacuiin yojo naja hmí rè.

²⁰ Cuatjin xi jemu cjín cahndé xi cuacun vèhè xi má ngu ni yojo naja.

²¹ Quihndé ne, tuxcun ne, cumaji cuichja xi mamiji rè ntsan, o sa rcuun ne, cumaji cuichja xi mamiji rè ntsacun ta,

²² xi cjuaquixi ne, cahndé tsèhè yojo naja xi má naja xi hitsè sa tsavi ne, vèhè cahndé xi hitsè sa mameje.

²³ Hane cahndé tsèhè yojo naja xi hitsè sa chjaharcuaain rè ne, vèhè cahndé xi hitsè sa ndaja nicaja rè. Hane cahndé tsèhè yojo naja xi má naja xi mijí rè xi ningacun rè ne, vèhè cahndé xi hitsè sa ndaja cuidadu má.

²⁴ Peru hacuiin sahmi ngu yèjè nihña cuatjin cojo cahndé tsèhè yojo naja xi ma ningacun rè. Nina ne, hya xi catsindaja me yojo naja ne, casahmi me xi hitsè sa chjahárcun rè cahndé xi hitsè sa tsavi.

²⁵ Cuatjin casahmi Nina yojo naja, cojo sa xi ngu chihin ni sahmixa yèjè yojo naja, hacuaha yèjè ni cahndé tsèhè yojo naja ne, ngu tangun ni marcun rè tsèhè xicjin.

²⁶ Hane sa xi ngu cahndé tsèhè yojo naja choho vatju má ne, hacuaha cojo sa yèjè cahndé tsèhè yojo naja choho má rè. O sa xi ngu cahndé tsèhè yojo naja vaxèndaja xuta ne, hacuaha cojo yèjè sa cahndé tsèhè yojo naja ndamá rè.

²⁷ Quihndé ne, ngayejen ni xuta ladu rè Nina ne, sacuaha yojo rè Jesucristu má ngayaan, hane jima ngu ngayaan ne, má ngayaan sacuaha ngu cahndé tsèhè yojo rè me.

²⁸ Hane ngajiñi naja ngayaan xuta ladu rè Nina ne, tjuntjun ne, caviyuju me apóstol; xi ma jo ne, caviyuju me profeta; xi ma jyan ne, caviyuju me xuta xi vicuya cjua rè me; hane xi cjuí sa ne, caviyuju me xuta xi ma sahmi cjuarcun, cojo xuta xi ma sahmi xi mandaja xuta hmu rè, xuta xi visecoo me jingu sa xuta, xuta xi vitexa naja, xuta xi ma chja me ngu hne xi hvíin me mé vijne.

²⁹ Tsèhè cjuatjo vihi ne, hacuiin yèjè vihi satè naja jimangu yaan ta, ¿há ngayejen ni má ngayaan apóstol ni? ¿há ngayejen ni má ngayaan profeta ni? ¿há ngayejen ni vicuyan cjua rè Nina ni? ¿há ngayejen ni ma nihña cjuarcun ni?

³⁰ ¿há ngayejen ni ma nihña xi mandaja xuta hmu rè ni? ¿há ngayejen ni ma nújan hne xi hisca núhyaan mé vijne ni? ¿há ngayejen ni ma tahan machaya rè xuta mé vijne hne vèhè ni?

³¹ Vèhè xi meje rè xi ngayun ne, catamameje nuju cjuatjo rè Nina xi hitsè sa vengui chji rè.

Quihndé ne, tsingácun nuju ngu ndiya xi hitsè sa jercu ndaja.

13

Mé vijne xi tjin naja cjuahmutacun

¹ Ngahan ne, sa xi cuichjá yějē hne rē xuta hacuaha cuichjá hne rē ángel, peru tsajin ná cjuahmutacun ne, tangun ngahan cojo ngu quicha xi choho fane o sa ngu quicha xi hmí platillu xi jercu fane camahani.

² Sa xi cuichjá ngu cjuaxi sua ná Nina, sa xi vijnercú yějē cjuaxi rē Nina xi tjihma, sa xi hvē yějē cjuatacun, hacuaha sa xi ma tsiniya ngu naxi ngatsē rē xi jercu ndaja mangucacún cojo Nina, peru tsajin ná cjuahmutacun ne, tsajin mé vengui chjí naha.

³ Sa xi suá rē xuta yuma yějē xi tjin ná, hacuaha hisca suá yojo naha xi cueti, peru tsajin ná cjuahmutacun ne, tsajin mé machjirēhē ná xi cuatjin sahme.

⁴ Hya xi tjin naja cjuahmutacun ne, hacuaha jyē tacun, ndaja ngayaan, hacuiin chini ngayaan, hacuiin xta ngayaan, hacuiin nihña yehe suvaan yojo naja,

⁵ hacuiin xcuahya ngayaan, hacuiin meje naja xi suvaan ni ndaja tsajan, hacuiin ma cjan naja, hacuiin veyantacun cjuatsehen xi sahmi xuta cojo naja.

⁶ Xi tjin naja cjuahmutacun ne, tsajin mé ndama naja tséhē cjuatsehen ta xi ndama naja ne, tséhē cjuaquixi.

⁷ Xi tjin naja cjuahmutacun ne, ngajñi rē tu mé ni cjuacjintacun ne, hatuxa jyē tacuun, hatuxa mangu tacuun, hatuxa vetahan tacun, hatuxa caa naja.

⁸ Cjuahmutacun ne, tsajin nixtin xi cjuē. Peru cuechú nixtin xi ha quihndē suaain sa Nina cjuaxi cuichja profeta, ha quihndē cuichjaain sa xuta hne xi vijniñi rcu me, hacuaha ha quihndē suaain sa Nina cjuatacun xi ndaja cuijnercu ngu xuta cjuaxi rē me.

⁹ Cuatjin cuma ta cjuaxi rē Nina ne, sehe hitsē xi vijnercuun, hacuaha sehe hitsē cjuaxi rē Nina xi chja profeta.

¹⁰ Peru hya xi cjuēhe me xi vēē chichihin yějē cjuaxi rē Nina ne, hya cjuē xi tsē tsē ni hyan.

¹¹ Hya xi lihndi ngahan ne, cavisiajme sacuaaha visiajmi langa, catsingátaha cacún sacuaaha tsingataha cacun langa, hacuaha cjuatacun naha ne, sacuaaha cjuatacun rē langa. Peru xi camachangá ngahan ne, cavejñáxen xcusun rē langa.

¹² Quihndē ne, sehe hitsē vijnercuun cjuaxi rē Nina sacuaaha tsejen naja hya xi chutsejnyan ni ngu speju xi hacuiin ndaja tsejen. Peru cuechú nixtin xi chutsejen xcun cojo xcun. Quihndē ne, sehe hitsē xi vijnercú. Peru cuechú nixtin xi chichihin ni cuijnercú, sacuatjin vēē ndaja ná Nina.

¹³ Quihndē ne, tjin jyan xcusun xi nihña xi tsajin nixtin xi cjuē. Tjun ne, xi mangu tacuun cojo Nina. Xi má jo ne, xi vetahan tacun Nina. Xi má jyan ne, xi tjin naja cjuahmutacun. Peru xi hitsē sa matitjun ngajñi rē xi catsijyan véhē ne, xi tjin naja cjuahmutacun.

14

Hne xi hyaan mé vijne

¹ Quihndē ne, nihñu ngahñu xi tjin nuju cjuahmutacun. Hacuaaha catamameje nuju xi sua nuju Nina cjuatjo rē me. Peru hitsē sa chjahyun rē me cjuatacun xi cuinújun cojo xuta ngu cjuaxi sua nuju me ta,

² xuta xi chja me ngu hne xi hvíin me mé vijne ne, hacuiin chja me cojo xuta ta suvá ni Nina chja me cojo ta, tséhē xi tsajin yo vijnercu. Hasen rē me sahmi xi chja me cjuaxi tsajin yo vēē.

³ Peru me xi chja cjuaxi casua Nina me ne, chja me cojo xuta, cojo sa xi cuisecoo me xuta hacuaha sua rē me cjuetacun.

⁴ Xuta xi chja me ngu hne xi hvíin me mé vijne ne, visecoo suvá rē me yojo rē me. Peru xuta xi chja me ngu cjuaxi casua Nina me ne, visecoo rē yějē xuta rē yungun.

⁵ Ngayujun ni ne, meje ná xi cuma cuinújun hne xi vijniircun, peru hitsē sa meje ná xi chjuhunnuntsun cjuatacun xi cuinújun cojo xuta ngu cjuaxi sua nuju Nina ta xuta xi chja me cojo xuta ngu cjuaxi sua Nina me ne, hitsē sa matitjun me xi cuma rē me xi chja hne xi vijniircuun. Peru sa xi cuma cuichja me cojo naja mé vijne hne véhē ne, ndatjin ta cuisecoo naja ngayejen ni xuta rē yungun xi cuatjin sahmi me.

⁶ Véhē xi hya xi cjuētjēngē nuju ne, venguiin chjí rē xi cuichjá cojo nuju ngu hne xi vijniircun. Xi vengui chjí rē ne, hacui xi suá cumachaya nuju ngu cjuaxi casua ná Nina, o sa xi cuichjá cojo nuju ngu cjuatacun xi sua Nina, o sa xi cuicuyá nuju ngu cjuaxi rē Nina o ngu cjuachacun.

⁷ Cuma cuinújan ne, sa xi ngu tyjo o sa ngu arpa hacuiin ndaja fane ne, hisca hyaan mé pieza fane.

⁸ Hacuaaha sa xi ngu tyjo rē sindadu hacuiin ndaja sua xta rē ne, tsajin yo cuéhēchjine rē xi cjuē xcun si.

⁹ Hacuaniitjin nuju ngayun ta sa xi cojo ntsuvun nújun ngu cjua xi nuhyaain rë ne, tsajin yo xi cuijnercu cjua vëhë ta sacuaaha xi ngajñi tjo ni nújun.

¹⁰ Nguehe ngasunhndë ne, hisca hyaan há cjin xcusun hne tjin, hane yëjë ni ne, tjin mé vijne.

¹¹ Peru sa xi vihndeen ngu hne ne, sacuaaha ngu xuta ngu nangui ngahan xi cuma rë xuta xi tichja cojo ná jan, hacuaaha mé vëhë ne, sacuaaha xuta ngu nangui me xi cuma ná ngahan.

¹² Vëhë xi quihndë ta ngayujun ni jemu meje nuju cjuatjo rë Nina ne, nihñu ngahñu xi sacú nuju ngu cjuatjo xi visecoo rë yëjë sa xuta rë yungun.

¹³ Vëhë xi xuta xi chja me ngu hne xi hvín me mé vijne ne, catjehya rë me Nina cojo sa xi cuma suacuenda me mé vijne.

¹⁴ Sa xi sahme oración naha cojo ngu hne xi vijniircú ne, hasen naha ne, sahmixa, peru cjuatacun naha ne, sahmixaain.

¹⁵ ¿Hacutjin sahme ni? Sahme oración naha cojo hasen naha, hacuaaha sahme oración naha cojo cjuatacun naha. Sé cojo hasen naha, hacuaaha sé cojo cjuatacun naha.

¹⁶ Sa xi ngayun nihñu cuatjin ne, hya xi tuhun nacuechji rë Nina cojo hasen nuju ne, cumaji cuichja xuta xi yahnga sa: “Cuatjin jain” ta, tsëhë xi cjua xi nújun ne, vijniircu me.

¹⁷ Handasa jemu ndaja tuhun nacuechji rë Nina, peru xuta xi yahnga ne, visecuaain camahani rë me.

¹⁸ Súa nacuechji rë Nina ta hitsë sa chjá ngahan hne xi vijniircú xi cuma nuju ngayujun ni.

¹⁹ Peru hya xi ma tangun ngahan cojo xuta ngajan yungun ne, hitsë sa chuya ná xi cuichjá ndastu hñú cjua cojo cjuatacun naha cojo sa xi cuicuyá rë xuta, xi cuma rë xi cuichjá të mil cjua cojo ngu hne xi vijniircu me.

²⁰ Ngayujun ni ne, ha quihndë xicaningatuun tacún sa sacuatjin tsingataha cacun quihndi. Sacuatjin rë ngu quihndi xi hisca hvín mé xi hmí rë cjuatsehen ne, cuatjin meje rë xi hacuaaha hyuun. Peru xi cojo cjuatacun nuju ne, meje rë xi ningatuhun tacún sacuaaha tsingataha cacun ngu xuta changá.

²¹ Xcun xujun rë Nina ne, camahindu cjua xi cachja me cuitjin: “Ngahan ne, tsingátju xuta ngu nangui xi chja jingu sa hne, hane hne rë me cuichja me cjua naha cojo yëjë xuta ladu naha. Peru handasa cuatjin sahme ne, cuetaharcuaain me cjua naha, chja Nina.” Cuatjin camahindu.

²² Vëhë xi cjuatjo xi casua naja Nina xi ma nújan hne xi hisca hyaan mé vijne ne, hacuün ngatsë rë xuta xi ha mangu cacun cojo Nina xi casua me ta ngatsë rë xuta xi tsitjungui cjua rë me. Hane cjuatjo xi ma nújan ngu cjua xi sua naja Nina ne, hacuün ngatsë rë xuta xi tsitjungui cjua rë me xi casua me ta ngatsë rë xuta xi ha mangu cacun me cojo rë me.

²³ Vëhë xi hya xi matangun ngayujun ni ngayun xuta rë yungun, sa xi ngayujun ni nújun ngu hne xi hisca hyuun mé vijne hane cjuehe ngujo cha xi hvín cjua rë Nina hacuaaha hisca manguaain cacun cha cojo me ne, ¿hacuiin tsingataha cacun cha xi sca nuju ni?

²⁴ Peru sa xi ngayujun ni ngayun nújun ngu cjua xi sua nuju Nina hane cjuehe ngu cha xi manguaain cacun cojo Nina hacuaaha hisca hvín cha cjua rë me ne, xi vihndë cha yëjë cjua vëhë ne, cuijnercu cha xi jemu tjin jyë rë cha, suvá ni cha tsichuva cha cjuatacun rë cha,

²⁵ hacuaaha cjua xi hinchahma ngajñi rë cjuatacun rë cha ne, cuitsjen rë cha. Ngajan xi cjue cuiticjexcun cha, cjuaharcun cha Nina. Hacuaaha tsinguixi cha xi tacun jain Nina nguehe ngajñi nuju.

Meje rë xi ndandaja nihña yëjë ni

²⁶ Ngayujun ni ne, cuitjin vijne cjua xi titsihindu nuju. Hya xi matangun ngayujun ni ne, ngu ngayun ne, sun tsëhë Nina, ngu nga ngayun ne, vicuyun ngu cjua rë Nina, ngu nga ngayun ne, nújun ngu cjua xi casua nuju Nina, ngu nga ngayun ne, nújun ngu hne xi hisca hyuun mé vijne, hane ngu nga ngayun ne, nújun mé vijne cjua rë hne jan. Xi meje rë ne, yëjë ni xcusun xi nihñu vë ne, cuatjin nihñu cojo sa xi cuisecuum xingun ngajñi nuju.

²⁷ Sa xi tjin xuta xi cuichja me hne xi vijniircun ne, catichja jo o sa xi jyan ni me, hacuaaha chuva ngu me catichja me. Hane meje rë xi cuiñújun ngu ngayun mé vijne cjua xi cachja xuta xi cuacun jan.

²⁸ Peru sa xi tsajin ngu ngayun xi cuma nihñu cuatjin ngajan yungun ne, catiyujuyuu ni xuta xi cuacun vë. Catichja suvá ni me cahntsua xahasen rë me, o sa suvá ni Nina catichja me cojo me.

²⁹ Hacuaniitjin ni sa xi tjin xuta xi cjuahahtsja me ngu cjua tsëhë Nina ne, jo jyan ni me catichja me, hane yëjë sa ngayun ne, nichuvun cjua vëhë.

³⁰ Sa xi ngu ngayun xi nechun ndyá chjuhunnstun ngu cjua tsëhë Nina ne, catisejyu me xi titjun tichja jan.

³¹ Xi cuatjin ne, ngayujun ni cuma cuinújun chuva ngu chuva ngu ngayun ngu cjua xi chjuhunnuntsun tséhë Nina, cojo sa xi hacuaha cojo yějë sa ngayun ne, cumachaya nuju hacuaha sacú nuju cjuetacun.

³² Xuta xi chja me ngu cjua xi fahatsja me tséhë Nina ne, cjua vëhë cuitexa me cjuatacun rë suvá me ta,

³³ tséhë xi Nina ne, chuyiin rë me xi tujyë nihña ta xi chuya rë me ne, ngu cjuandaja cjuajeya.

Sacuatjin xcusun xi nihña ngayejen ni xuta ladu rë Nina ne,

³⁴ yachjin ne, mijí rë xi cojo na cuichja na hya xi tjin tangun ngayaan yungun ta, tséhë xi tsajin cahndë xi cuichja na. Xi meje rë ne, catiyuju na ngahma gobiernu rë xihin rë na, sacuatjin vitexa ley rë Nina.

³⁵ Sa xi tjin ngu cjua xi meje cumachaya rë na ne, ndava na catinenguise na xihin rë suvá na ta, tséhë xi jemu cjuasava xi ngu chjuun cuichja na hya xi tjin tangun ngayaan ngajan yungun.

³⁶ ¿Há tjtutjun ngayun canújun cjua rë Nina cojo xuta? ¿Há suvun ni catsingatju nuju Nina cjua vëhë ni?

³⁷ Sa xi tjin ngu xuta xi má rë me xi profeta me o sa quitsë rë xahasen rë me cojo Hasen rë Nina ne, catijnercu me ta cjua xi titsihindu nuju vi ne, Nai naja vitexa me.

³⁸ Peru sa xi mijí sahmicuenda me cjua naha ne, hacuaha xicanihñucunduun cjua rë me.

³⁹ Vëhë xi ngayujun ni ne, catamameje nuju xi cuma ngayun profeta, hacuaha xicanichuun rë xuta cahndë xi cuichja me hne xi vijniircu me.

⁴⁰ Xi meje rë ne, yějë ni xcusun xi nihñu ne, ndandaja nihñu hacuaha chichihin ni nihñu yějë.

15

Cjuandajyihí xi chja tséhë xi cavuya Jesucristu cjuahñu

¹ Ngayujun ni ne, meje tsinguitsjen nuju tséhë cjuandajyihí xi casuá camachaya nuju, cjuandajyihí xi chja tséhë Jesucristu. Cachjuhunnuntsun cjuandajyihí vëhë, hacuaha ndaja sa tijimangu tacún cojo.

² Hane ngatsë rë cjuandajyihí vëhë ne, tivetjuntjun tséhë jyë nuju, sa xi nismutacuun cjuandajyihí vëhë. Cuatjin tivetjuntjun sa xi hacuiin tu mahya camangu tacún cojo.

³ Ngahan ne, casuá camachaya nuju cjua xi matitjun xi cafahántsá. Cachjá ta Jesucristu ne, cahme me cojo sa xi tsicjé me jyë naja, sacuatjin camahindu xcun xujun rë Nina.

⁴ Hacuaha cachjá cojo nuju ta caseyaniji me hane xi ma jyan nixtin ne, cavuya nga me cjuahñu, sacuatjin camahindu xcun xujun rë Nina.

⁵ Hacuaha cachjá cojo nuju ta cavëë Pedru Jesucristu, sehe cavëë yějë tejó apóstol jan me.

⁶ Sehe ngu tangun ni cavëë nga vatju sa hñú cientu xuta ladu rë me me. Hane handasa cahme yahnga me ne, peru jemu cjin me xi siu quicun sa hisca quihndë.

⁷ Sehe cavëë Jacobo me, sehe cavëë nga yějë apóstol me.

⁸ Hane xi camá ngascañ xi cavuya cjuahñu rë me ne, ngahan cahvë me. Ngahan xi sacuaña ngu quihndí xi cavatjutaha tséhë nixtin rë, sehe catsin.

⁹ Cuatjin chjá ta, tséhë xi ngahan ne, hitsë sa chúva vengui chji naha xi cuma rë apóstol xi yahnga. Ngahan ne, hisca vechiin chuva rë xi apóstol cuichja xuta tsahan ta, tséhë xi jemu jyë cjuañihí casuá rë xuta ladu rë Nina titjun.

¹⁰ Peru ngatsë rë cjuandaja rë Nina ne, ngahan ne, apóstol má ngahan. Hane cjuandaja xi casahmi me cojo ná ne, hacuiin tu mahya ta hitsë sa hñu casahme xa xi cuma rë yějë sa apóstol. Peru hacuiin suva casahme ta cjuandaja rë Nina cavisecoo ná.

¹¹ Quihndë ne, cuendaain rë ¿há ngahan? o ¿há me vëhë ne?, peru cjuandajyihí vëhë xi catihin camachaya nuju, hacuaha cjua vëhë xi camangu tacún cojo.

Cjuandajyihí xi chja tséhë xi cuya nima cjuahñu

¹² Quihndë ne, quihndë ta tihin machaya rë xuta xi Jesucristu ne, cahme me sehe cavuya nga me cjuahñu ne, ¿hacutjin má xi nújun yahnga ngayun xi nima ne, vuyaain nga cjuahñu ni?

¹³ Sa xi vuyaain nima cjuahñu ne, ngajan xi Jesucristu ne, hacuaha cavuyaain nga me cjuahñu.

¹⁴ Hane sa xi cavuyaain Jesucristu cjuahñu ne, ngajan xi tu mahya xi cuatjin tihin machaya rë xuta, hacuaha ngayun ne, tu mahya xi cuatjin mangu tacún.

¹⁵ Sa xi cuatjin ne, ngajan xi hacuiin cuatjin cjua xi nújin tséhë Nina ta, tséhë xi nújin xi Nina ne, catsicuya me Jesucristu cjuahñu. Peru quixiin xi catsicuya Nina Jesucristu cjuahñu sa xi hatuxa vuyaain nima cjuahñu.

¹⁶ Sa xi hatuxa tsicuyaain Nina nima cjuahñu ne, ngajan xi hacuaha catsicuyaain me Jesucristu cjuahñu.

¹⁷ Hane sa xi catsicuyaain me Jesucristu cjuahñu ne, ngajan xi tsajin mé vengui chji rë xi cuatjin mangu tacún cojo rë me, hacuaha cjëë camahani cjuë jyë nuju.

¹⁸ Hacuaha nima xi camangu cacun cojo Jesucristu ne, hacuaha cachajá me.

¹⁹ Sa xi suvá ni quihndë xi nechán cjuahñu machjirëhé xi cuitjin vetahan tacun Jesucristu ne, hitsë sa jemu chojyihí tsajan xi cuma rë yëjë sa xuta.

²⁰ Peru xi cjuaquixi ne, Jesucristu ne, Nina catsicuya rë me cjuahñu. Tsëhé yëjë nima xi cahme ne, me vëhé tjtutjun me cavuya me cjuahñu.

²¹ Sacuatjin xi ngatsë rë ngu xihin cavisehen cjuaveya ngasunhdë ne, hacuanitjin ni ngatsë rë ngu xihin ne, cavisehen cjuatacun xi nima ne, cuya cjuahñu.

²² Ngatsë rë xi tjë rë Adán má xuta ne, vëhé xi yëjë ni me ne, hme me. Hacuanitjin ni ngatsë rë xi sahmitangun xuta cjuatacun rë me cojo Jesucristu ne, vëhé xi yëjë ni me xi cuacun vé sacú rë me cjuahñu xatsë.

²³ Peru cuatjin sacú rë jima ngu me hacutjin xi satë rë me: tjtutjun ne, Jesucristu; ngaxtun vëhé ne, hya xi cuya nga Jesucristu ne, xuta xi ladu rë me ne, tsicuya me cjuahñu, sacú rë me cjuahñu xatsë.

²⁴ Ngaxtun vëhé nga ne, tsicjë Jesucristu yëjë xutaxa rë xi jemu tsehen, hacuaha tsicjë me yëjë xitsehen. Hane xi matjenguicjin ne, sahmi me entregadu cojo Nina Nahmi naja gobiernu xi sahmi me. Hane hya cuijnetaha ngasunhdë.

²⁵ Cuatjin cuma ta meje rë xi Jesucristu ne, sahmi me gobiernu hisca hya xi cuiyuju Nina ngahma gobiernu rë Jesucristu yëjë ni xi sahmi rë me condra.

²⁶ Hane xi cuatju tsicjë Nina yëjë sa xi sahmi rë Jesucristu condra ne, sehe tsicjë me cjuaveya ta, tsëhé xi hatuxa yëjë ngarca ni caviyuju Nina ngahma gobiernu rë Jesucristu.

²⁷ Chja xujun rë Nina xi caviyuju me yëjë ngarca ni ngahma gobiernu rë Jesucristu. Peru ha suvá tsejen xi hacuain cojo Nina, me xi caviyuju yëjë ngarca ni jan, cavëjña me.

²⁸ Peru hya xi ha yëjë ngarca ni cuiyuju ngahma gobiernu rë Jesucristu, me xi Quihndi rë Nina ne, hya cuejña suvá Jesucristu yojo rë me ngahma gobiernu rë Nina, me xi caviyuju yëjë ngarca ni ngahma gobiernu rë Jesucristu. Cuatjin cuma, cojo sa xi Nina ne, cuma titjun camahani me tsëhé yëjë ngarca ni.

²⁹ Quihndë ne, sacuaha xuta xi cuatjin xtenda me ngatsë rë nima ne, ¿mé machjirëhé? Sa xi hatuxa vuyaaín nima cjuahñu sacuatjin chja yahnga xuta ne, ¿mé má cuatjin xtenda xuta ngatsë rë nima?

³⁰ Hane sacuaha ngayin ne, ¿mé má yëjë ni hora nechintihin tsavi?

³¹ Nina vëë me xi hacuaha ngahan ne, ngu nixtin ngu nixtin ne, tejñataha tsavi tsëhé cjuaveya. Ngayujun ni ne, jemu vaxëndaja nuju ngatsë rë xi tjin tangun cjuatacun naja cojo Nai naja Jesucristu.

³² Sa xi ngahan cavitejñataha tsavi nguehe Efeso sacuaha ngu xuta xi hacuain ladu rë Nina má me ne, ¿mé ndaja tsahan ni? Sa xi hatuxa vuyaaín nima cjuahñu ne, sacuatjin chja cjuane: “Jemu sa ndaja xi níëë süun ta, nchujun ni nguini ne, cueyan!”

³³ Ha quihndë xicatuun cahndë xi cumandacha sa ngayun ta, tjin ngu cjuaxi chja cuitjin: “Xi nihña tangun cojo xuta tsehen ne, vëhé tsinguetsun rë xcusun ndaja xi nihña.”

³⁴ Catuya nga catejña chihin cjuatacun nuju, hacuaha ha quihndë xicanihñuu sa cjuatsehen. Tjin yahnga ngayun ne, hisca hyuun Nina. Cuatjin chjá cojo nuju cojo sa xi cuma sava nuju.

Xcusun yojo xi sacú rë nima hya xi cuya cjuahñu

³⁵ Peru tjin rë yahnga ngayun xi chjinengunsun cuitjin: “¿Hacutjin nga cuya nima cjuahñu? ¿Mé xcusun yojo rë me xi cuya?” Cuatjin chjinengunsun.

³⁶ ¡Ngarca, xan! Hya xi nitjen ngu tutjë ne, titjun cueya sehe cuetju.

³⁷ Xcusun xi nitjen ne, hacuain xcusun xi sehe cuma jyë jan, ta ngu tutjë ni xi nitjen, sacuaha ngu trigu o sa tu mé sa xcusun tutjë.

³⁸ Peru Nina sua me xcusun rë hacutjin jyihí xi cachuya rë me. Jima ngu tutjë ne, sua rë me xcusun rë xi tsëhé suvá.

³⁹ Yojo ne, hacuain ngu xcusun ni tjin ta hacjahi xcusun yojo rë xuta, hacjahi xcusun yojo rë chu, hacjahi xcusun yojo rë chu nisë, hacuaha hacjahi xcusun yojo rë chu ti.

⁴⁰ Tjin hasen xi tjin ngajan ngahnga hacuaha tjin hasen rë yëjë xi tjin nguehe nangui. Peru hacjahi tsejen xcusun xi tjin ngajan ngahnga hacuaha hacjahi tsejen yëjë xi tjin nguehe nangui.

⁴¹ Hacjahi hasen ndajyihí rë tsuhi, hacjahi hasen ndajyihí rë sá, hacuaha hacjahi hasen ndajyihí rë niñú. Hisca ngajñi rë niñú ne, hacjahi hacjahi hasen rë jima ngu.

⁴² Hacuaha cuatjin cuma hya xi nima cuya cjuahñu. Hya xi seyaniji nima jan ne, hatuxa fê fehndu yojo rë. Peru hya xi nima cuya nga cjuahñu ne, tsajin nu tsajin nixtin xi cjuehndu yojo rë.

⁴³ Hya xi seyaniji ne, tsajin camahani mé ndajyihí, peru hya xi cuya nga cjuahñu ne, jercu ndajyihí camahani. Hya xi seyaniji ne, tsajin camahani ngahñu rë, peru hya xi cuya nga cjuahñu ne, jemu hñu camahani ngahñu rë.

⁴⁴ Hya xi seyaniji ne, seyaniji ngu yojo naja xi hatuxa tsêhê cjuahñu xi tjin nguehe ngasunhndê vihi, peru hya xi cuya nga cjuahñu ne, cuya ngu yojo naja xi hatuxa tsêhê cjuahñu xi tjin ngajan ngahnga. Quihndê ta tjin yojo naja xi tsêhê cjuahñu xi tjin nguehe ngasunhndê ne, ngajan xi hatuxa tjin yojo naja xi tsêhê cjuahñu xi tjin ngajan ngahnga.

⁴⁵ Hacuaha cuatjin camahindu xcun xujun rë Nina hiscan chja cuitjin: “Adán, xihin xi tjutjun camá ne, casua Nina me cjuahñu.” Peru Jesucristu, me xi canduva camá ngascan ne, me vêhê Hasen xi sua cjuahñu.

⁴⁶ Hacuiin titjun sacu naja cjuahñu xi tsêhê ngahnga ta tsêhê ngasunhndê titjun sacu naja, sehe sacu naja cjuahñu xatsê xi tsêhê ngahnga.

⁴⁷ Xihin xi tjutjun camá jan ne, cojo nihndê camá. Vêhê xi tsêhê ngasunhndê má. Peru Jesucristu, xihin xi majo jan ne, canduva me tsêhê ngahnga.

⁴⁸ Yêjê xuta xi tsêhê ngasunhndê me ne, hatuxa tangun me cojo xihin xi nihndê camá jan. Hane yêjê xuta xi tsêhê ngahnga me ne, hatuxa tangun me cojo xihin xi canduva tsêhê ngahnga.

⁴⁹ Sacuatjin xi camá ngayaan sacuaha xihin xi nihndê camá jan ne, hacuanitjin cuma ngayaan sacuaha xihin xi canduva tsêhê ngahnga jan.

⁵⁰ Ngayujun ni ne, nguehe cuichjá cojo nuju ta yojo cojo jni camá ne, cumaji cuisehen hiscan sahmi Nina gobiernu. Hacuaha ngu xcusun xi hatuxa fehndu ne, cumaji cuisehen hiscan tsajin camahani mé xi fehndu.

⁵¹ Chutsujun ni. Nguehe cuichjá cojo nuju ngu cjuatacun xi jiyahma titjun: Hacuiin ngayejen ngayaan cueyan. Peru ngayejen ni sacú yojo xatsê naja

⁵² ngu marcu macjain ni, sacuaha xi ngu cuechjan ngu chuxahan ni tuxcun, hya xi cjuane sacuaha ngu tyjo xi meje cuijnetaha fane ta, cjuane sacuaha ngu tyjo, sehe cuya nima cjuahñu cojo yojo xatsê rë xi tsajin nu tsajin nixtin cjuehndu. Hane ngayaan ne, hacuaha sacú naja yojo xatsê naja.

⁵³ Cuatjin cuma ta, yojo naja vi xi hatuxa fehndu ne, meje rë xi cuya ngu yojo xi hatuxa fehndiin. Yojo naja vi xi hatuxa hme ne, meje rë xi cuya ngu yojo xi hatuxa hmii.

⁵⁴ Hane hya xi cuatjin cuma ne, hya cuetjuca cju xi camahindu xcun xujun rë Nina xi chja cuitjin: “Cjuaveya ne, cjuê camahani. Cjuahñu xatsê xi fehndiin ne, vêhê scaa rë cuetjundaja.

⁵⁵ ¡Cjuaveya ne, ha quihndê tsajin camahani rë ngahñu! ¡Cjuaveya ne, ha quihndê tsajin camahani mé cjuahngatacun xi cuma sahmi cojo naja!”

⁵⁶ Cjuaveya ne, sahmi cjuahngatacun cojo xuta ngatsê rë cjuatsehen, hacuaha cjuatsehen ne, tjin rë ngahñu ngatsê rë ley rë Moisés.

⁵⁷ Peru nacuechji rë Nina, me xi sahmi xi vetjunndajan ngatsê rë yêjê ni xi casahmi Nai naja Jesucristu.

⁵⁸ Vêhê xi ngayujun ni ne, ngayun xi jemu hmú cacún nuju ne, tejñuhñu xahasen nuju, xicavetjunxuun tsêhê ndiya rë Nina. Yêjê ni nixtin ne, tángun nduju camaha sa nihñu xa xi casua nuju Nai naja. Ha hyun ta yêjê xa xi nihñu ne, hacuiin tu mahya, xi cuatjin tjin tangun cjuatacun nuju cojo Nai naja.

16

Cuma tangun tujún xi cjue Jerusalén

¹ Quihndê ne, sacuaha tujún xi jima tangun xi cjue cuisecoo rë xuta ladu rë Jesucristu, me xi jemu choho tivatju tijima ngajan Jerusalén ne, sacuatjin cachjá cojo xuta rë yungun ngajan distritu Galacia ne, cuatjin nihñu.

² Jima ngu domingu ne, meje rë xi ngayujun ni ne, tejñuxun tsê tsê tujún xi nihñu ganar tsêhê xa xi nihñu. Tetjún ne, cojo sa xi hya xi cjuêhê ndyá ne, mijí rë xi chjahya nga rë tujún.

³ Hane hya xi cjuêhê ndyá ne, yo xuta xi cuinújun xi cjue ne, tsihindu ngahan xujun xi cuaha me, sehe tsingátju me cjuecani me cjuatjo nuju ngajan Jerusalén.

⁴ Hane sa xi tsejen ta ndatjin xi ngahan cjuê ne, cuma cjue me cojo ná.

Sua Pablo machaya rë xuta Corinto xi cjuetjengui me me

⁵ Cuechú nixtin xi cjuetjengê nuju, peru hya xi ha cavátju distritu Macedonia, tsêhê xi hatuxa tjin ná xi cuátju ngajan.

⁶ Cuma rë cuitejñataha cojo nuju ngujo nixtin, o sa xi yějë nixtin rë chan hnchan. Hane xi cuatjin ha cavitejñataha cojo nuju hitsë ne, cuma cuisecuun ná hitsë xi cjuë sa hiscan xi cjuë.

⁷ Cuatjin tsingátaha cacún ta, tséhë xi mijí ná xi nduva scútsejen nuju xi tu ñaja cuátju ni ta xi vetahá cacún ne, xi cuitejñataha cojo nuju jyë nixtin, sa xi sua Nai naja cahndë.

⁸ Peru cuitejñataha nguehe Efeso hisca xi cuechú suhi tséhë Pentecostés ta,

⁹ tséhë xi jemu casacu ná cahndë xi sahme xa xi ndatjin cuetjucaa, handasa hacuaha jemu tjin xuta xi sahmi ná me condra.

¹⁰ Quihndë ne, sa xi cjue scusehenya nuju Timoteo ne, nihñu xi hacuiin cumacjin cacun me xi cuejña me ngajñi nuju ta, tséhë xi sahmi me xa rë Nai naja sacuatjin sahme ngahan.

¹¹ Véhë xi hisca ngu yun ne, mijí rë xi nihñuchuvun me. Tisecuun rë me xi cjue sa me cojo cjuandaja cjuajeya, cojo sa xi cuma cuinduvatjengui ná me ta, tséhë xi nguehe tejñaya rë me cojo sa ngujo xuta ladu rë Nai naja xi nduva cojo me.

¹² Quihndë ne, sacuaaha Apolos ne, jemu cachjá cojo rë me xi cjue me cojo ngujo sa xuta ladu rë Nai naja jan, cjuetjengui nuju me, peru mijí cjue me xi ngutjen. Peru cjue me nixtin hya xi sua rë me chuya rë.

Cjua xi vijnetaha

¹³ Nechun cuidadu. Ndaja sa catamangu tacún cojo cjuachacun xi macjain naja. Tiyujunhñu cjuatacun nuju hacuaha tuhun ngahñu xahasen nuju.

¹⁴ Yějë ni xi nihñu ne, nihñu cojo cjuahmutacun.

¹⁵ Ngayujun ni ne, ha hyun ta yějë me xi siu ndava Estéfanos ne, me xi cuacun vë tjutjun cavisehen me ladu rë Jesucristu ndyá Acaya, hacuaha casua suvá me yojo rë me xi cuisecoo me xuta ladu rë Jesucristu.

¹⁶ Meje ná xi ngayujun ni ne, tinuhyun tséhë xuta xi cuatjin sahmi, hacuaha tinuhyun tséhë xuta xi visecoo me xcun xa rë me xi cuacun véhë.

¹⁷ Jemu ndama ná xi cafehe Estéfanos nguehe, cojo Fortunato cojo Acaico. Handasa tsajin ngayujun ni nguehe,

¹⁸ peru ndastu me xi jyan vi ne, casua ná me cjuetacun, sacuatjin casua nuju me ngayun cjuetacun. Xuta xi cuatjin sahmi ne, meje rë xi chjuhuncun me.

¹⁹ Xuta tséhë yějë ni yungun nguehe distritu Asia ne, tsingatju me ngu nina rë me tsujun ngayujun ni. Aquila cojo Priscila, cojo yějë sa xuta ladu rë Jesucristu xi ma tangun me ndava me véhë ne, hacuaha tsingatju me ngu nina rë me tsujun ngayujun ni xi hacuaha tjin tangun cjuatacun nuju cojo Jesucristu.

²⁰ Yějë ni xuta ladu rë Jesucristu nguehe ne, tsingatju me ngu nina rë me tsujun. Tuhun rë xingun nina, cojo cjuandaja cojo cjuahmutacun chutatsuhun xingun, sacuatjin xcusun naja.

²¹ Suva ngahan, Pablo, tsihindu nuju ngu cjua vihi, xi tisuá nuju ngu nina.

²² Sa xi ngajñi nuju tjin ngu me xi hmaai cacun me Nai naja ne, catisatiin rë me cjuandaja rë Nai naja. ¡Ngayun Nai naja, nduvun!

²³ Nai naja Jesucristu catisua nuju me cjuandaja rë me.

²⁴ Ngahan ne, hacuaha tsingátju cjuahmutacun naha xi cuma nuju ngayujun ni, ngatsë rë xi tjin tangun cjuatacun naja cojo Jesucristu.

Carta xi majo catsingatju San Pablo xi cafahtsja xuta nandya Corinto

¹ Ngahan Pablo ne, casuaxa ná Jesucristu xi má ngahan apóstol tséhé me, tséhé xi cuatjin xi meje ré Nina. Hane ngahan cojo cha Timoteo xingueen ne, ningatjin ngu xujun vi tsujun, ngayujun ni xuta Corinto xi xuta ladu ré Nina ngayun. Hacuaha ningatjin xujun vi xi scutaya yéjé sa xuta ladu ré Nina jingujyè ni estadu Acaya vé.

² Nina Nahmi naja cojo Nai naja Jesucristu ne, catisua nuju me cjuandaja cjuajeya.

Vaxëndaja Pablo Nina ngajñi ré cjuañihi

³ Nina Nahmi ré Nai naja Jesucristu ne, jemu tjin ré me cjuandaja. Me vèhé ne, hatuxa tjin ré me cjuayumatacun cojo niji hacuaha hatuxa sua niji me cjuetacun.

⁴ Sua niji me cjuetacun ngajñi ré yéjé ni cjuañihi xi vatjin má, cojo sa xi ngayin ne, hacuaha cuatjin cuma tihñ ré xuta xi yahnga cjuetacun vèhé ngajñi ré yéjé cjuañihi xi vatju me má.

⁵ Chuva ré xi vatjin cjuañihi sacuatjin xi cavatju Jesucristu camá ne, hacuaha cuatjin sua niji me cjuetacun.

⁶ Hya xi cuatjin vatjin cjuañihi ne, hatuxa cuatjin má cojo sa xi ngayun ne, sacú nuju cjuetacun hacuaha cjuetjuntjun tséhé jyé nuju. Hacuaha hya xi cuatjin sacú niji cjuetacun ne, cuatjin má cojo sa xi hacuaha cojo ngayun ne, sacú nuju cjuetacun. Hane sacú nuju cjuetacun vèhé ngatsé ré xi hacuaha caa nuju cojo cjuañihi sacuaha cjuañihi xi vatjin má.

⁷ Ngayin ne, jemu vetihin tacuin nuju ta, tséhé xi hyin ta sacuatjin xi tivatjun cjuañihi ne, hacuaha tisacu nuju cjuetacun.

⁸ Ngayujun ni ne, meje niji xi cumachaya nuju cjuacjintacun xi cavatjin camá ngajan estadu Asia. Jemu jyé camahani cjuañihi xi cavatjin camá, hisca ngahñu sa tsajin niji xi scaa niji cojo cjuañihi vèhé; quihndé tsajin niji cjuetacun xi cojo cjuahñu cuijnitihin.

⁹ Peru ngayin ne, hisca hatséé camangu tacuin cojo cjuaveya niji. Cuatjin camá cojo sa xi hacuiin cuetihin tacuin cjuatacun niji suvin ta cuetihin tacuin Nina, me xi tsicuya cjuahñu ré nima.

¹⁰ Nina ne, cavaxétje niji me tséhé cjuacjintacun jyé xi meje tsiquehen niji jan, hacuaha cuaxétje sa niji me. Cavetihin tacuin Nina xi cuatjin cuaxétje sa niji me,

¹¹ tséhé xi ngayun ne, hacuaha tivisecuun niji xi tichjahyun ré Nina ngatsé niji. Hane xi cjin xuta sahmi me cuatjin ne, hacuaha jemu cjin cuma ngayun xi tuhun nacuechji ré Nina tséhé cjuandaja xi sua niji me.

Chja Pablo mé má cjéè cjué me Corinto

¹² Ngayin ne, nihñi yehe yojo niji ngatsé ré xi ha hyin cojo cjuatacun niji ta tyjahi xahasen niji hacuaha nechin nguñaja tacuin xi tivanguin cojo ngasunhndé niji. Peru hacuiin cojo cjuatacun niji suvin xi cuatjin cun ngayin ta cojo cjuandaja ré Nina. Hacuaha hatuxa cuatjin cun ngayin hya xi nechin ngajñi nuju.

¹³⁻¹⁴ Sacuaha cjuá xi nihindin nuju ne, suvá cjuá xi ma chutayun hacuaha vijnercun. Ha vijnercun hitsé, peru meje niji xi ndaja sa cuijnercun cjuetacun vihi: Cuma nihñu yehe yojo nuju ngatsé niji sacuatjin xi cuma nihñi yehe yojo niji ngatsé nuju, hya xi cuya nga Nai naja Jesucristu.

¹⁵ Xi cuatjin catsingátaha cáacun ne, cavejñá xi cjué scusehenya nuju titjun, cojo sa xi jo ndiya sacú nuju cjuandaja.

¹⁶ Meje cuátju nangui nuju hya xi canduvá nguehe estadu Macedonia. Hane xi cuijnetaha cjuacjintacun naha nguehe Macedonia ne, hacuaha meje cúa scusehenya nga nuju ngu ndiya. Sehe ngajan xi ngayun ne, cuma cuiseacun ná cojo sa xi cuma cjué ngajan distritu Judea.

¹⁷ Xi cuatjin cavejñá cjuatacun naha sehe casahmee ne, ¿há tsajin ré cjuaquixi cjuá naha, má nuju? ¿Há má nuju ngayun ne, hya xi vejñá xi sahme ngu xcusun xi sahme ne, tangun han cojo ngu xuta ngasunhndé xi xcun cojo xcun ne, chja me ta cuma, hane xi taha ngaxtun ne, chja me ta cumají? ¡jéya, hacuiin cuatjin!

¹⁸ Nina, me xi hatuxa cjuaquixi ne, vèé me ta hacuiin jo ma tacuin xi nújin cojo nuju.

¹⁹ Sacuaha Jesucristu, Quihndi ré Nina, me xi catihin camachaya nuju cjuá ré, cojo cha Silvanu cojo cha Timoteo ne, hacuiin jo tjin cacun me ta, yéjé ni cjuá xi cachja me ne, hatuxa cjuaquixi.

²⁰ Hane Jesucristu vé ne, me vèhé xi sahmi chihin me yéjé ni cjuá xi ha cachja Nina xi cuma. Vèhé xi hora xi chjahanrcun Nina xi nújanyuman cojo Jesucristu ne, nújan “Amén” (O sa tsajin ne, nújan “Cuatjin jain.”)

²¹ Nina ne, hacui me xi sahmi xi viyujucahndé cjuatacun naja xi macjain naja Jesucristu. Hacui ni me xi cavaxijin me ngayaan.

²² Sacuaha xi cavisane me sellu rë me ngayaan; caveya me Hasen rë me cahntsua xahasen naja cojo sa xi ngutjen tsejen ta quixi jain xi, hya xi cuma ngascan ne, sua jain naja me yëjë ni xi ha cachja me.

²³ Quihndé ne, quejen cavusehenya nuju sacuatjin xi ha cachjá cojo nuju ngatsë rë xi mijí tsisava nuju xi cuichjátaha nuju. Sa xi quixiin xi chjá ne, catitsingatju Nina cjuaveya xi cuma ná.

²⁴ Hacuini xi meje cuitexin nuju jarë ngu cja xi hatuxa meje rë xi cumacjain nuju ta, tsëhé xi ngayun ne, ha siucahndé cjuatacun nuju cojo cjuachacun xi macjain naja. Ta ngayin ne, tivisecuini nuju cojo sa xi cuma sua sa rë xahasen nuju.

2

¹ Hya xi camá ne, cavejñá cjuatacun naha xi hacuini ngutjen cjuë scusehenya nuju sá tu choho cuma rë xahasen nuju ngatsë rë cja xi cuichjá cojo nuju.

² Cuatjin cavejñá cjuatacun naha ta, ngayun tinihñu xi ma sua rë xahasen naha. Vëhé xi sa xi sahme xi cuma va rë xahasen nuju ne, ndajin tjin ta, xi cuatjin sahme ne, sahme xi cuma va rë xahasen rë xuta xi tisahmi xi ma sua rë xahasen naha.

³ Vëhé xi cuatjin catsihindu nuju nixtin hya, cojo sa xi hya xi cuinduva ndyá ne, hacuini cuma va rë xahasen naha ngatsë nuju ta, xi meje rë ne, tuhun rë xahasen naha cjuasua. Hacuaha mangu cáacun cojo nuju ngayujun ni. Mangu cáacun xi tu mé ni xi sahmi xi jemu sua ma rë xahasen naha ne, hacuaha vëhé ni ne, sahmi xi jemu sua ma rë xahasen nuju.

⁴ Hya xi catsihindu nuju cja vëhé ne, jemu choho ma ná, jercu cjin catsingátaha cáacun ngatsë nuju, hisca jercu cajihnda; mijí ná xi cuma va tacún ta xi meje ná ne, xi cumachaya nuju ta cjuahmutacun xi tjin ná cojo nuju ne, jemu jyë camahani.

Ma manchataha me xi cavinchachoho

⁵ Quihndé ne, sacuaha ngu xuta xi cavinchachoho vé ne, hacuini ngahan ni choho camá ná ta, ngayujun ni ne, hacuaha choho camá nuju hitsë. "Hitsë ni" chjá ta, mijí cuátjutaha xi tichjátaha nuju.

⁶ Quihndé xi cjin ngayun canújuntuhun rë xuta jan ne, cojo vëhé ni ne, ha cuma.

⁷ Cahndé rë xi cuinújuntuhun sa rë me ne, ninchatuhun rë me, tuhun rë me cjuetacun, sá tu scaain rë me cojo cjuachoho jyë vëhé.

⁸ Vëhé xi chjá cojo nuju ta tuhun nga catamachaya rë me tsëhé cjuahmutacun xi tjin nuju cojo me.

⁹ Vëhé jain xi cuatjin catsihindu nuju ta, tsëhé xi meje cjuaháchuva nuju ne, há tjin ngu tacún xi nihñu yëjë ni hacutjin chjá cojo nuju.

¹⁰ Quihndé ne, yo xi ninchatuhun rë tsëhé ngu jyë xi sahmi ne, ngahan ne, hacuaha tsinchátaha rë ta, tu mé ni xi catsinchátaha ne, vëé Jesucristu ta ngatsë nuju ngayun ne, vëhé xi cuatjin catsinchátaha,

¹¹ cojo sa xi cumaji sahmi Satanás xi meje sahmi cojo naja. Ngayaan ne, ha ndaja hyan hacutjin meje sahmi xitsehen vé cojo naja.

Cjuacjintacun rë Pablo ngajan nandya Troas

¹² Hya xi camá ne, cëjë ngajan Troas xi cuichjá cojo xuta cjuandajyihí xi chja tsëhé Nai naja Jesucristu. Hane xi cafëhé ngajan ne, vutsején ne, jemu casacu ná cahndé xi cuichjá cojo xuta cjuandajyihí jan.

¹³ Peru hacuini ndaja má cáacun xi casacuini ná cha Titu xingueen sacuatjin xi catsingátaha cáacun. Vëhé xi catsinguñjetaha cja cojo xuta jan sehe cavétju canduva nguehe estadu Macedonia.

Tsingitsojo Pablo cja rë Nina

¹⁴ Peru nacuechji rë Nina ta hatuxa sahmi me xi caa niji vetjintjin ngatsë rë xi tjin tangun cjuatacun niji cojo Jesucristu. Chuva vëhé xi Nina ne, sahmi me xi cumachaya rë xuta cjuatacun rë me jingujyë ni.

¹⁵ Ta ngayin ne, sacuaha xta rë tyjungunsa ngayin xi tisua Jesucristu xi cuma rë Nina. Xta ndajyihí vëhé ne, vitsojo vechutaha rë yëjë ni xuta, sa xuta xi tivetjutje me tsëhé jyë rë me o sa xuta xi tivetjintjin me.

¹⁶ Xi vutsejen niji xuta xi cuacun tivetjintjin jan ne, sacu rë me cjuaquixi ta quixi jain xi cuechiin me xcun Nina. Peru xi vutsejen niji xuta xi cuacun tivetjutje jan ne, sacu rë me cjuaquixi xi quixi jain xi cuechu me xcun Nina. Ngayin ne, cumaji nihñi cojo cjuatacun niji suvin xa vé xi sacu rë xuta cjuaquixi jan.

¹⁷ Ngayin ne, hacuini tiviteñi cja rë Nina sacuatjin jemu cjin xuta tisahmi me ta ngayin ne, nechin nguñaja tacuin xi nújin cojo xuta cja vëhé. Nina casua niji me xa hacuaha

vutsejen me xa xi nihñi. Hacuaha tinihñi xa vèhè ta tsèhè xi tjin tangun cjuatacun nihi cojo Jesucristu.

3

Compromisu xatsè xi casahmi Nina

¹ ¿Hà má nuju xi tinaxinndijin suvin nga yojo nihi xi cuatjin nújin? O há tsajin ne, ¿há mameje rë xi tihín nuju o sa xi chjahyin nuju ngu carta xi chja ngatsè nihi, sacuatjin sahmi yahnga xuta?

² ¡jéya! mamiji rë ta, ngayun xi má ngayun sacuaaha carta nihi, sacuaaha ngu carta xi camahindu cahntsua xahasen nihi, ngu carta xi cuma scutsejen yèjè ni xuta ne, hacuaaha cuma scutaya me.

³ Hane suvá tsejen xi Jesucristu catsihindu me carta jan, hane ngayin ne, tu canihñi entregadu ni. Hacuuiin cojo tinta camahindu ta cojo Hasen rë Nina xi quicun me. Hacuaha hacuiin xcun ndoyojo tè camahindu ta cahntsua xahasen rë xuta.

⁴ Cuatjin nújin cojo nuju ta, tsèhè xi mangu tacuin cojo Nina ngatsè rë Jesucristu.

⁵ Hacuuiin cjuatacun nihi suvin, hacuiin ngahñu nihi suvin xi ma nihñi mé xi nihñi ta Nina casua nihi me cjuatacun, Nina casua nihi me ngahñu.

⁶ Me vèhè casahmi me xi machjirèhè rë me ngayin xi tihín cumachaya rë xuta compromisu xatsè xi sehe tivetsihin tsahmi Nina cojo xuta, hane compromisu xatsè vèhè ne, hacuiin ngu ley xi cuinuhyan tsèhè ta ngu ndiya ndajyihí xi tsingacun naja Hasen rë Nina xi cuanguencojon. Cuatjin casahmi Nina ta tsèhè xi xuta xi cumaji sahmichihin me yèjè ni cja xi vitexa ley ne, sacú rë me ngu castigu xi cuetsun cjuatacun rë me hacuaaha tsajin nu tsajin nixtin xi cuechu me xcun Nina. Peru xuta xi tjengui me Hasen rë Nina ne, sacú rë me ngu cjuahñu ndajyihí, hacuaaha cuechu me xcun Nina.

⁷ Ngayujun ni ne, ha hyun ta sacuaaha ley rë Nina xi catsihindu Moisés ne, catiya xcun ndoyojo tè hya xi camahindu, hacuaaha xuta xi maji sahmi me yèjè hacutjin vitexa ley jan ne, cumaji cuechu me xcun Nina. Hane sacuaaha xa xi casahmi Moisés hya xi casua me camachaya rë xuta cja rë ley jan ne, hacuaaha ha hyun xi jercu vengui chji rë ta, tsèhè xi camatsejen ngu hasen ndajyihí xi hisca camaji cavutsejenndaja xuta Israel xcun Moisés ta jercu tu seti camahani jyihí xcun me. Peru hasen ndajyihí vèhè ne, tafi tafi ne, caféya suvá.

⁸ Hacuaha ha hyun ta ngayin ne, titihín tijimachaya rë xuta cja tsèhè hacutjin sua naja Nina Hasen rë me. Quihndé ne, sa xi cuatjin jemu cavengui chji rë xa xi casahmi Moisés jan ne, hitsè sa jercu vengui chji rë xa xi tinihñi ngayin.

⁹ Cuma cuinújan ne, sa xi jemu cavengui chji rë xa xi casahmi Moisés, hya xi casua me ley xi chja xi sacú naja ngu castigu sa xi hacuiin nihña chehen cja rë ne, hitsè sa jemu vengui chji rë xa xi tinihñi ngayin, quihndé xi tinújin cojo xuta xi cuma sacú naja ngu xahasen tyjahi, ngu cjuatacun tyjahi.

¹⁰ Cuma cuinújan ne, sacuaaha xa rë Nina xi casahmi Moisés xi jemu ndajyihí titjun ne, quihndé ne, sacuaaha xi ha quihndé tsajin mé ndajyihí tsèhè ta, xa rë Nina xi tinihñi ne, jercu tu ndajyihí camahani.

¹¹ Sa xi jercu ndajyihí ngu xcusun xi hacuiin cuejña tsèè ne, hitsè sa ndajyihí ngu xi cuejña tsèè.

¹² Ngatsè rë xi cuatjin vetihin tacuin Nina ne, vèhè xi ngayin ne, rcuiin camahani xi nújin cojo xuta.

¹³ Hacuuiin nihñi sacuatjin casahmi Moisés, hya xi cavetsa me xcun me cojo ngu tsjian cojo sa xi xuta tjé rë Israel ne, scuiin me hacutjin tiféya suvá hasen ndajyihí xi jyihí xcun Moisés jan.

¹⁴ Peru xuta jan ne, camajñu tsèhè cjuatacun rë me. Hisca quihndé nixtin vihi ne, hya xi visiñuju me cja rë ley changa vèhè ne, maji vijnercu me cja rë, sacuaaha xi tita rë cjuatacun rë me cojo tsjian jan. Hisca hya xi cumacjain rë me Jesucristu ne, hya sacuaaha xi cuetjuxin tsjian jan, hya cuma cuijnercu me.

¹⁵ Peru hisca quihndé ne, hya xi visiñuju me cja xi catsihindu Moisés ne, sacuaaha xi tsjian jan vechja rë cjuatacun rë me, hane maji vijnercu me.

¹⁶ Peru hya xi ngu xuta cuisehen me ndiya rë Nai naja ne, sacuaaha tsjian jan ne, cjuexin tsèhè me, hane cuma cuijnercu me.

¹⁷ Nai naja ne, hacui me xi Hasen rë Nina, hane hiscan xi tacun Hasen rë Nai naja ne, tsajin mé xi vechja rë cjuatacun naja.

¹⁸ Vèhè xi ngayejen ngarcun ni ne, tsajin tita rë cjuatacun naja cojo tsjian vèhè, hacuaaha xi vutsejen xuta ngayaan ne, ma vutsejen me cjuandaja rë Nai naja sacuaaha tsejen mé xi tsejen xcun ngu speju. Hane ngayaan ne, jima tiña jima tiña sa cjuatacun naja cojo

cjuatacun rë Nai naja ta, tsêhë xi jima ngu ndiya ne, tisacu sa naja cjuandaja rë me. Nai naja ne, suvâ hasen me, hane hacui me xi cuatjin tisahmi.

4

¹ Nina casahmi me cjuandaja cojo niji, hane casua me xa vëhë xi nihñi. Vëhë xi hatuxa hacuiin machuva tacuin.

² Ngayin ne, cavejñi tacuin xi nihñi yëjë ni xi ticojo rë cjuasava xi tahahma má; hacuiin vindachin, hacuiin nindeyin cjuarë Nina ta, suvâ cjuaquixi yëjë ni xi nújin cojo xuta. Cuatjin nihñi cojo sa xi scuëë yëjë ni xuta ta cuatjin jain xi nújin. Hacuaha vëë Nina xi cuatjin nújin.

³ Hane sa xi vijniircu xuta cjuandajiyi xi chja tsêhë Jesucristu xi titihín cumachaya rë me ne, peru suvâ xuta xi tivetjintjiin me ne, me vëhë xi cuatjin vijniircu me.

⁴ Xitsehen xi matitjun xi tacun nixtin vihi ne, cavetsa cjuatacun rë xuta xi cuacun macjaain rë Nina xi cjuaquixi, cojo sa xi cuisin rë me cjuahasen rë cjuandajiyi xi chja hacutjin xi jyë hnga Jesucristu cojo cjuatacun rë me. Hya xi machaya naja tsêhë Jesucristu ne, hacuaha hyan hacutjin jemu ndaja camahani Nina.

⁵ Ngayin ne, hacuiin nújin cojo xuta xi nai nuju ngayin ta xi nújin ne, Jesucristu xi Nai naja me; hane ngayin ne, tiviseucin nuju sacuaaha ngu mosu hndíxahan nuju ta, tsêhë xi cuatjin cavitexa niji Jesucristu.

⁶ Hane ntsacu cavetsihin ne, cachja Nina ta ngajñi rë jñu ne, cuma hasen. Hane hacui ni me xi caveya me cjuahasen ngajñi rë cjuatacun niji, cojo sa xi ngayin ne, tihín cumachaya rë xuta, cuijnercu me hacutjin jemu ndaja camahani Nina. Hane hya xi machaya naja tsêhë Jesucristu ne, hacuaha hyan hacutjin jemu ndaja camahani Nina.

Cjuahñu xatsë xi sua Nina

⁷ Cjuahasen xi casua niji Nina jan ne, quichihin ngajñi rë cjuatacun niji, sacuatjin xi jiya cjuanchina cahntsua ngu tiji xi nihndë ni camá. Cuatjin casahmi Nina cojo sa xi matsejen xi jemu hñu camahani ngahñu xi sua niji Nina. Hacuiin cojo ngahñu niji suvin xi caa niji nihñi yëjë ni xi tinihñi ta Nina ne, me vëhë xi casua niji me ngahñu; hacuaha jemu ndaja camahani ngahñu xi sua niji me.

⁸ Ha tu yani ni xi vanguin ne, jemu yehe cjuacjintacun vatjin má, peru sacuya niji chuva rë hacutjin xi naxintjin yojo niji; hisca hyiin mé xi ndatjin nihñi. Peru nihñichuviin cjuatacun niji;

⁹ jemu suaxti niji xuta hacuaha choho sahmi me cojo niji, peru Nina ne, tsismicacuaain niji me; vaja niji xuta, hisca viticjin, peru hacuiin tsiquehen niji me.

¹⁰ Xi nujyihinyin cojo cjuarë Nina ne, hatuxa meje tsiquehen niji xuta, sacuatjin catsiquehen me Jesucristu. Cuatjin tijima ne, cojo sa xi xuta ne, xi scutsejen me hacutjin ticaa niji ne, cumachaya rë me ta quixi jain xi tisacu niji cjuahñu sacuaaha cjuahñu rë Jesucristu.

¹¹ Ngayin xi quicun ngayin ne, tjin xuta xi jemu meje tsiquehen niji me ngatsë rë xi quichihin cjuandajiyi xi chja tsêhë Jesús. Cuatjin tijima ne, cojo sa xi cuma tsejen xi yojo jyë niji vi xi hatuxa cueya ne, hacuaha tisacu rë cjuahñu sacuaaha cjuahñu rë Jesús.

¹² Ngajan xi ngayin ne, tisacu niji cjuaveya; peru ngayun ne, tisacu nuju cjuahñu xatsë.

¹³ Tjin hiscan xi chja xcun xujun rë Nina cuitjin: “Camacjain ná, vëhë xi cachjá”; hane ngayin ne, tangun macjain niji cojo me xi cuatjin catsihindu cjuarjan. Vëhë xi hacuanitjin ni nújin ngayin: “Macjain niji, vëhë xi nújin.”

¹⁴ Hacuaha hyin ta Nina, me xi catsicuya cjuahñu rë Nai naja Jesús hya xi cahme me ne, hacuaha cuechu nixtin xi cuatjin tsicuya me cjuahñu niji, hane sahmi tangun me ngayin ngajan hiscan tacun Jesús. Hacuaha cuatjin sahmi me cojo nuju.

¹⁵ Yëjë ni xcusun xi tivatjin tijima ne, ngayun ndaja tsujun ta, xi cuma cjín sa ngayun xi sacu nuju cjuandaja rë Nina ne, ha cuatjin cjín sa cuma ngayun xi tuhun nacuechji rë me. Hane cuatjin cuma tsejen xi Nina ne, jemu ndaja camahani me.

¹⁶ Vëhë xi hatuxa nihñichuviin cjuatacun niji. Handasa tivetsun hitsë tivetsun hitsë yojo niji xi jima changa ngayin ne, peru cjuatacun niji ne, jima xatsë ngu nixtin ngu nixtin.

¹⁷ Hane cjuacjintacun xi tivatjin tijima ngehe ngasunhndë ne, sacuaaha xi hacuiin yehe camahani ta, tsêhë xi hya xi ha cacaa niji ne, hya sacú niji cjuandaja, sacú rë xahasen niji ngu cjuasua xi jemu ndajiyi camahani, hacuaha tsajin nixtin xi cjuë.

¹⁸ Ngayin ne, hacuiin tivethin rcuin yëjë ni xi tsejen ta xi vetihin rcuin ne, xi cjëë cuma tsejen. Cuatjin nihñi ta, tsêhë xi yëjë ni xi tsejen ne, cuechu nixtin xi cjuë, peru xi cjëë cuma tsejen ne, tsajin nu tsajin nixtin cjuë.

5

¹ Hacuaha nihñichuviin cjuatacun niji ta, tsêhê xi ha hyin ta sa xi cueya yojo niji sacuatjin vetsun ngu ndihya yuma ne, sacú niji ngu xcusun yojo xatsê ngajan ngahnga xi tsajin nu tsajin nixtin cueya, sacuaaha ngu ndihya ndajiyi xi suvá Nina casahmi me xi cuma niji.

² Vêhê xi ngayin ne, hisca fê tacuin ta, tsêhê xi jercu meje chjihinntsinsin sacuaaha yojo xatsê niji xi sua Nina jan,

³ cojo sa xi chijin yojo xatsê vêhê sacuatjin chajá rê ngu tsjian. Xi cuatjin ne, cuechiin ngu nixtin xi siu suvá hasen niji xi tsajin yojo niji.

⁴ Ngayin xi nechin cojo yojo jyê niji vi ne, hisca fê tacuin ngatsê rê xi jercu meje niji yojo xatsê xi sehe sacú niji. Hacuin meje niji xi cueyin ta xi meje niji ne, yojo xatsê niji. Cuatjin meje niji cojo sa xi yojo jyê xi hatuxa cueya ne, cjuëya; hane suvá cjuahñu xatsê vêhê cuejña.

⁵ Quihndê ne, me xi cuatjin cavejña cjuatacun rê xi cuitjin cun cuma ngayin ne, hacui Nina. Hacuaha me vêhê xi caveya me Hasen rê me cahntsua xahasen niji, cojo sa xi ngutjen tsejen ta quixi jain xi, hya xi cuma ngascan ne, sua jain niji me yojo xatsê vêhê.

⁶ Vêhê xi hatuxa tihín ngahñu xahasen niji. Hyin ta jinguyêjê rê xi nechinchahndin cojo yojo jyê niji vi ne, sacuaaha xi nechintihin ngu nangui ta, tsêhê xi cjêê cuechin hiscan xi cuinechinchahndin cojo Nai naja.

⁷ Ngayin ne, mangu tacuin cojo Nai naja xi tivanguin cojo ngasunhndê niji, handasa matsijin me.

⁸ Cuyin cuinújin cojo nuju ta ngayin ne, titihín ngahñu xahasen niji. Hacuaha xi má niji ne, hitsê sa ndatjin xi cuetjinxin tsêhê yojo jyê niji, hane cjuanguin cuinechinchahndin cojo Nai naja.

⁹ Vêhê xi sa xi cuinechintihin sa guehe ngasunhndê, o sa xi cuinechinchahndin cojo Nai naja ne, jemu meje nihñi yêjê ni hacutjin chuya rê me ta,

¹⁰ tsêhê xi ngayejen ni ne, cuechu nixtin xi cuma tsejen xi cun xi má ngayaan hya xi cuechuun xcun Jesucristu, xi cjuahacuenda me xcusun xi canihña, cojo sa xi jima ngu ngayaan ne, sacú naja xi satê naja ha tucutjin xcusan xi canihña xi cavinechan ngasunhndê, há ndaja ne, há ndajin.

Cjuandajiyi xi sahmi tangun cjuatacun naja cojo Nina

¹¹ Ngayin ne, ha hyin mé vijne xi rcuin Nina. Vêhê xi meje nihñi xi cuijne cacun xuta. Nina ne, ha vêe me xi cun xi má ngayin. Hacuaha cojo ngayin ne, vetihin tacuin xi cumachaya nuju xi cun xi má ngayin.

¹² Hacuin tivétsihin tinihñi yehe suvin nga yojo niji ta tu titihín cumachaya nuju hacutjin cuma naxunndujun niji, cojo sa xi cuma nicuyun cjuatacun xata xi chuya rê me tsêhê xcusun xi jyihí ngu cha, hane sahmicuendaan me cjuatacun rê cha.

¹³ Chja yahnga xuta ta sca niji, hane yahnga me ne, jemu xta ngayin; peru há sca niji o há xta ngayin ne, peru nihñi yêjê ni ngatsê rê xi tsêhê Nina ngayin, hacuaaha ngatsê rê xi meje cuisecun nuju.

¹⁴ Cuatjin nihñi ta tsêhê xi cjuahmutacun xi tjin rê Jesucristu cojo niji ne, vêhê xi vitexa niji. Cuitjin ningatihin tacuin: ngu ni Jesucristu xi cahme me ngatsê rê jyê naja ngayejen ni, vêhê xi ngayejen ni ne, sacuaaha xi ha caveyan xi cuma rê jyê xi cuacun vê.

¹⁵ Jesucristu ne, cahme me ngatsê naja ngayejen ni ne, cojo sa xi ngayaan xi casacu naja cjuahñu xatsê ne, hacuín nihñacuendan suvá ni yojo naja ta hacuaaha nihñacuendan tsêhê me vêhê, me xi cahme hacuaaha cavuya me cjuahñu ngatsê naja.

¹⁶ Vêhê xi ha quihndê hacuín nutsijin xuta sacuatjin vutsejen ngu xuta xicjin me cojo cjuatacun rê ngasunhndê. Hatsêe ne, cuatjin canutsijin Jesucristu, peru quihndê ne, hacuín cuatjin nutsijin me.

¹⁷ Yêjê xuta xi tjin tangun cjuatacun rê me cojo cjuatacun rê Jesucristu ne, ngu xuta xatsê camá me. Xcusun changá xi tjin rê me ne, café, ha cama xatsê.

¹⁸ Nina ne, me vêhê xi tisahmi me yêjê cjuatacun xatsê vêhê. Ngayin xi condra rê Nina camá ngayin hatsêe ne, casahmi me xi camatangun cjuatacun niji cojo cjuatacun rê me ngatsê rê cjuacjintacun xi cavatju Jesucristu. Hacuaha casua niji me xa xi tihín cumachaya rê xuta hacutjin tisahmi tangun me cjuatacun rê xuta cojo cjuatacun rê me.

¹⁹ Cojo cjuacjintacun xi cavatju Jesucristu camá ne, cavetsihin casahmi Nina xi cuma tangun cjuatacun rê xuta cojo rê me, cavetsihin cakahacuendaan me tsêhê cjuatsehen xi casahmi xuta, hacuaaha cavetsihin casua niji me cjuandajiyi xi tinújin cojo xuta xi Nina ne, meje rê me xi cuma tangun cjuatacun naja cojo rê me.

²⁰ Vêhê xi ngayin ne, cuatjin nújin cojo xuta cjuatacun rê me Jesucristu ta, Jesucristu casua niji me xa xi cuatjin nújin, sacuaaha xi tichja suvá Nina cojo xuta ngajñi rê cjuatacun rê me. Vêhê xi sacuatjin xi vitexa niji Jesucristu ne, chjahyin rê xuta xi catisahmi tangun me cjuatacun rê me cojo Nina.

²¹ Jesucristu ne, tsajin mé jyé rè me xi tjin, peru ngatsé naja ngayaan ne, Nina casahmi me xi Jesucristu ne, sacuaaha xi jercu tjin camahani jyé rè me. Cuatjin casahmi Nina cojo sa xi ngayaan xi tjin tangun cjuatacun naja cojo Jesucristu ne, hacuaaha jemu tyjahi camahani cuma cjuatacun naja sacuatjin tyjahi cjuatacun rè Nina.

6

¹ Hane xi tinihñi tangun xa cojo Nina ne, hacuaaha nújin cojo nuju ta, mijí rè xi tu mahya xi casacu nuju cjuandaja rè Nina.

² Cachja Nina cuitjin xcun xujun rè me:

Ngu hora ndajyihi ne, cahndé cjuá xi canoje cojo ná;
ngu nixtin xi vetjutje xuta ne, cavisé^{coo} ri.

Quihndé ne, ha cavechu ngu hora ndajyihi vèhè, sacuatjin cachja Nina; ha cavechu ngu nixtin xi tivetjutje xuta.

³ Ngayin ne, nihñi camahani xcusun xi sahmi xi secjan cjuatacun rè xuta, sá tu choho cuichja xuta tséhè xa xi tinihñi.

⁴ Yéjé xcusun xi tivatjin tijima xcun xa xi tinihñi ne, tsingacun rè xuta ta ngayin ne, tivisecuiin jain rè Nina cojo xa xi meje rè me xi nihñi. Jemu cjin cjuacjintacun xi cacaa niji: tjin hora ne, jemu cavatjin cjuañihi, tjin hora ne, cavatjin ngu cjuandya jyé, tjin hora ne, casacuinyin niji hacutjin naxintjin yojo niji.

⁵ Tjin hora ne, cavaja niji xuta, tjin hora ne, cavincha niji me ndavaya, tjin hora ne, choho casahmi xutacjin cojo niji, tjin hora ne, jemu chja xa canihñi, tjin hora ne, camaji catsjuñifin, tjin hora ne, hisca casacuiin mé xi xiní.

⁶ Hacuaaha tsejen xi tivisecuiin jain rè Nina ngatsé rè xi tyjahi xahasen niji, vechu cjuatacun niji, jemu jyé tacuin, jemu nihñi cjuandaja, jiya Hasen rè Nina cahntsua xahasen niji, nguñaja tacuin xi hmu tacuin xinguin,

⁷ hacuaaha súvá cjuaquixi tjin rè cjuatacun niji, Nina ne, sua niji me ngahñu. Hatuxa cjuaquixi cjuá xi nújin, há xi titihñi jimachaya rè xuta cjuá rè Nina, o há xi tinaxintjin yojo niji tséhè xuta xi choho chja tsijin.

⁸ Yahnga xuta ne, faharcun me ngayin, yahnga me ne, faharcuaain me ngayin. Yahnga xuta ne, ndaja chja me tsijin, yahnga me ne, choho chja me tsijin. Xi má rè ngujo xuta ne, jemu ndacha ngayin, handasa quixi ngayin cojo ngasunhndé niji xi tivanguin cuijin.

⁹ Yahnga xuta ne, hisca hvín me yo ngayin, peru yahnga me ne, vèé me ngayin. Ngayin ne, sacuaaha xi ha tiveyin, peru cjéé cueyin ta nechincuihin cjuahñu. Sahmi xuta ngayin castigu, peru hacuiin tsiquehen niji me.

¹⁰ Sacuaaha xi jemu choho má rè xahasen niji, peru xahasen niji ne, hatuxa jemu sua rè. Sacuaaha xi jemu yumi ngayin, peru jemu nihñi nchina xuta cojo cjuá rè Nina. Sacuaaha xi tsajin camahani mé xi tjin niji, peru ha tsijin yéjé ni xi tjin ngasunhndé.

¹¹ Ngayin xuta Corinto ne, ha canújin cojo nuju yéjé ni hacutjin ningatihin tacuin, hacuaaha jemu hmu tacuin nuju.

¹² Ngayin ne, hacuiin camachuva cjuahmutacun xi tjin niji cojo nuju ta ngayun xi camachuva cjuahmutacun xi jiya cahntsua xahasen nuju.

¹³ Vèhè xi chjá cojo nuju sacuaaha xi quihndi naha ngayin, catamajyè sa cjuahmutacun xi tjin nuju sacuaaha cjuahmutacun xi tjin niji cojo nuju.

Yungun rè Nina xi quicun me ngayaan

¹⁴ Peru mijí rè xi nihñu tangun cojo xuta xi macjaain rè me cjuá rè Jesucristu sacuatjin ma hñu jo chu ndyaja xi tangun cjue chu. Sacuaaha cjuandaja ne, matanguaain camahani cojo cjuatsehen. Hacuaaha cumaji cuma jñu hiscan xi jemu hasen.

¹⁵ Cumaji camahani cumatangun cjuatacun rè Jesucristu cojo cjuatacun rè Satanás. Hacuaaha cumaji camahani cumatangun cjuatacun rè ngu xuta xi macjain rè me cjuá rè Jesucristu cojo cjuatacun rè ngu xuta xi macjaain rè me cjuá rè Jesucristu.

¹⁶ Sacuaaha yungun rè Nina xi cjuaquixi ne, cumaji cuiyuyu nina xi tsindaja xuta. Hane ngayaan ne, sacuaaha yungun rè Nina xi quicun me ngayaan ta, tséhè xi súvá Nina cachja me cuitjin:

Ngahan ne, cuiteññacahndé cahntsua xahasen rè me,

hacuaaha tsujyèhéya ngajñi rè me;

hane ngahan cuma nina rè me ngahan,

hacuaaha me xi cuacun vèhè ne, cuma me xuta naha.

¹⁷ Hacuaaha cachja sa Nina cuitjin:

Vèhè xi tetjunxun tséhè xuta xi cuacun faharcun me nina xi mandaja, hacuaaha nechunxun tséhè me;

mijí rè xi nicujun sa xcusun xi chjá cojo nuju xi tsavi.

Xi cuatjin nihñu ne, cuitejña ngatsë nuju

¹⁸ hacuaha ngahan ne, cuma ngahan nahmi nuju, hane ngayujun ni ne, hacuaha cuma ngayun quihndi naha, chja Nai naja, me xi ma sahmi yějë ni xcusun.

7

¹ Quihndë ngayujun ni tsan ne, tsëhë xi cuatjin cachja Nina xi sahmi me cojo naja ne, meje rë xi cuiyujunxen yějë ni cjuatsehen xi meje rë yojo naja o sa xi ningatahan tacun. Hane xi rcun ngayaan Nina ne, meje rë xi nihña ngahñu xi cuma tyjahi xahasen naja, cuma tyjahi cjuatacun naja.

Cavindeya cjuatacun rë xuta Corinto

² Nuxuhun xahasen nuju xi cuma niji. Hisca ngu ngayun ne, hacuiin choho canihñi cojo nuju; hisca ngu ngayun ne, hacuiin caninguetsin cjuatacun nuju; hisca ngu ngayun ne, hacuiin cavindachin nuju.

³ Hacuiin titsicaneje jyë nuju xi cuatjin chjá cojo nuju. Ha cachjá cojo nuju ta hatuxa jemu vinga niji ngayun, hisca tihín yojo niji ngatsë nuju sa xi cuatjin meje rë.

⁴ Jemu camangu cáacun cojo nuju, hacuaha hya xi visiajme cojo xuta ne, jemu vaxëndaja nuju.

Jemu casacu ná cjuetacun. Jemu sua ma rë xahasen naha ngajñi rë yějë cjuañihi xi cavatjin camá.

⁵ Hisca nixtin xi cafihin ngeuhe estadu Macedonia hisca quihndë ne, cjëë cjuahajenda xahasen niji, ta yějë ni nixtin vihi ne, jercu cjín cjuañihi tivatjin tijima. Ticjan xuta cojo niji, hacuaha jemu macjín tacuin.

⁶ Peru Nina xi sua cjuetacun xuta yuma ne, hacuaha cuatjin casua niji me cjuetacun hya xi cafehe cha Tito.

⁷ Hacuiin tsëhë xi cafehe ni cha xi casacu niji cjuetacun ta, hacuaha ngatsë rë cjuaxi cachja cha hacutjin xi casacu rë cha cjuetacun ngajñi nuju. Cachja cha cojo niji ta jemu meje nuju xi sacú xingueen. Hacuaha casuacuenda niji cha tsëhë cjuachoho xi tjín nuju. Hacuaha cachja cha ta jemu meje nihñu xcusun xi chuya ná. Vëhë xi hitsë sa camasua rë xahasen naha quihndë.

⁸ Hacuiin choho ma ná xi cuatjin catsihindu nuju xujun vëhë, handasa choho camá nuju ngatsë rë cjuaxi cachja cojo nuju. Choho camá ná hitsë ta, tsëhë xi cahvë ta cjuaxi naha jan ne, casua nuju cjuachoho ndastu ngu hora.

⁹ Peru quihndë ne, jemu ndama ná, hacuiin ngatsë rë xi choho camá nuju ta ngatsë rë xi sacuaha cjuachoho xi camá nuju ne, vëhë casahmi xi canindeyun cjuatacun nuju. Hacuaha hya xi choho camá nuju ne, canihñu hacutjin chuya rë Nina, vëhë xi tsajin mé xi choho cavatjun camá ngatsë rë cjuaxi canihndin nuju.

¹⁰ Hya xi nihñachehen hacutjin chuya rë Nina hora xi choho ma naja ne, vëhë sahmi xi nindeyan cjuatacun naja cojo sa xi cuetjuntjen tsëhë jyë naja. Hane xi cuatjin sahmi ngu xuta ne, tsajin yo xi chuyiin rë. Peru hya xi tu choho má naja hora xi vatjun ngu cjuachoho sacuatjin sahmi xuta ngasunhdë ne, vëhë sahmi xi cueyan.

¹¹ Chutsujun hacutjin canihñu hya xi canihñu hacutjin chuya rë Nina ngajñi rë cjuachoho xi cavatjun camá: jemu nguñaja tacún; jemu ndaja catuhun cjuaquixi nuju; hisca camacjan nuju; hisca carcun camá; canújun ta jemu meje chun ná ngu ndiya nga; jemu meje nihñu xcusun xi chuya ná; ngutjen canihñu castigu xuta xi choho casahmi me. Cuatjin camatsejen xi tyjahi jain cjuatacun nuju hacuaha tyjahi jain xahasen nuju.

¹² Vëhë xi hya xi cuatjin catsihindu nuju xujun vëhë ne, hacuiin ngatsë rë xuta xi cavangui jyë, hacuiin ngatsë rë xuta xi choho cavatju me camá ta xi cuatjin catsihindu nuju ne, ngatsë rë xi meje ná xi cuma tsejen hacutjin xi meje nihñu xcusun xi chuya niji ta, tsëhë xi hyun ta cuatjin xi meje rë Nina.

¹³ Hane hacuaha ngatsë rë vëhë xi ngayin ne, casacu niji cjuetacun.

Peru hacuiin svá cjuetacun vëhë ni xi casacu niji ta hacuaha jemu ndaja camá rë xahasen niji ngatsë rë cjuasua xi tjín rë cha Tito. Cuatjin tjín rë cha cjuasua ta, tsëhë xi ngayujun ni ne, catuhun rë cha cjuandaja cjuajeya.

¹⁴ Jemu cavaxëndaja nuju hya xi cachjá cojo cha Tito, hane hacuiin cavétju sava ngahan xi camá ngascan. Hatuxa cjuaquixi yějë ni cjuaxi canújin cojo nuju. Hacuanitjin ni cjuaxi canújin tsujun cojo cha Tito ta hacuaha cavetjuca cjuaquixi.

¹⁵ Hacuaha jemu hmu cacun nuju cha, xi tsinguitsjen cha hacutjin canihñu yějë hacutjin xi cachja cha cojo nuju, cojo hacutjin jemu ndaja cachjuhunrcun cha hya xi cachjuhun-ntsun cha.

¹⁶ Jemu ndama ná ta tsëhë xi hvë ta ngayun ne, mangu tacún cojo ná.

8

Cjuatjo xi cjue Jerusalén

¹ Ngayujun ni ne, nguehe tihín cumachaya nuju hacutjin casua Nina cjuandaja rë me cojo xuta xi matangun me yëjë ni yungun xi siu taha ladu tsëhë estadu Macedonia vi.

² Xuta xi cuicun vi ne, handasa jercu cavatju me cjuañihi, peru jemu sua ma rë xahasen rë me. Handasa jemu yuma camahani me ne, peru jemu jyë cjuatjo xi cavisecoo me.

³ Cahvë xi casua me tucutjin xi camá casua me, hisca quisun sa casua me. Hacuaha cjuatacun rë suvá me

⁴ xi cafehya me xi tihín cahndë xi cojo me sahmi me cjuandaja xi cuisecoo me xuta ladu rë Jesucristu ngajan Jerusalén.

⁵ Hitsë sa ndaja casahmi me xi cuma rë sacuatjin caningatihin tacuin ngayin. Titjun ne, casua me yojo rë me cojo Nai naja ne, sehe casua me yojo rë me cojo niiji ngayin, sacuatjin meje rë Nina.

⁶ Vëhë xi canújin cojo cha Tito xi, sacuatjin xi ha cavetsihin casahmi tangun cha ngu cjuatjo vëhë ngañi nuju hatsëë ne, quihndë ne, hacuanitjin ni catitsinguijnetaha cha hiscan xi cavejñnavasen.

⁷ Ngayujun ni ne, jemu tjin ngu tacún cojo Jesucristu; jemu ndaja nújun cjuarë Nina; jemu vechu cjuatacun nuju; jemu nguñaja tacún xi meje cuisecun; jemu tjin nuju cjuahmutacun cojo niiji. Sacuatjin tivangun xcun cojo yëjë ni cjuatacun vëhë ne, hacuaha meje niiji xi cuanitjin ni cuangun xcun cojo ngu cjuandaja vi xi cuisecun rë xuta yuma.

⁸ Hacuini tivitéxa nuju xi cuitjin tichjá cojo nuju ta, tu titsingácun ni nuju hacutjin sahmi nguñaja cacun xuta Macedonia, cojo sa xi cuma tsejen há nechun nguñaja tacún jain cojo cjuahmutacun xi tjin nuju.

⁹ Ha ndaja hyun hacutjin casahmi Nai naja Jesucristu cjuandaja. Handasa jemu tjin rë me cjuanchina peru catsiyuma me yojo rë me ngatsë rë xi hmu cacun nuju me, cojo sa xi ngatsë rë xi camayuma me ne, ngayun xi cuisuhun ladu rë me ne, sacú nuju cjuanchina xi sua Nina.

¹⁰ Nguehe cuichjá cojo nuju hacutjin xi tsingátaha cáacun. Ngayun xi hatuxa meje cuisecun hacuaha hisca cuyanu cavetsuhun cavisecun ne,

¹¹ quihndë ne, meje rë xi ninguijnutuhun cjuandaja vëhë. Tuhun hitsë xi tjin nuju sacuatjin canihñu titjún xi cojo cjuasua catuhun.

¹² Sa xi ngu ngayaan meje jain tahan ngu cjuatjo ngu cjuandaja ne, cuma tahan tucutjin xi tjin naja xi tahan ta, vëhë xi chuya rë Nina. Nina ne, fehyaain me hisca cojo xi tsajin naja.

¹³ Hacuini meje rë xi ngayun ne, hisca cuma chaja nuju ngatsë rë xi cuisecun rë jingu sa xuta. Xi meje rë ne, tangun ni cuatjun ngayejen ni.

¹⁴ Ngayun xi cjín tjin nuju quihndë ne, cuma cuisecun rë me xi tsajin rë, cojo sa xi hya xi ngayun tsajin nuju ne, me xi cuacun vë ne, cuma cuisecoo nuju me. Cuatjin xi tangun cuatjun ngayun cuma cojo rë me.

¹⁵ Cuitjin chja ngu cjuarë xcun xujun rë Nina: "Xuta xi cjín cafaya me ne, cavanguin rë me; hane xuta xi chuva cafaya me ne, camachajin rë me."

Cha Tito cojo xicjin cha

¹⁶ Suá nacuechji rë Nina xi cavuxaha me cjuatacun rë cha Tito cojo sa xi cuma meje cuisecoo nuju cha sacuatjin xi meje ná ngahan.

¹⁷ Hya xi cachjá cojo rë cha xi cjuetjengui nuju cha ne, jemu cachuya rë cha cjuarë jan. Hane tsëhë xi jemu tjin rë cha cjuasua xi sahmi cha tu mé ni xi satéxa rë cha ne, vëhë xi cojo cjuatacun rë suvá ni cha ne, cjuetjengui nuju cha.

¹⁸ Hacuaha ningatjin sa ngu cha ladu naja cojo cha Tito. Xuta xi matangun me yëjë ni yungun ne, jemu vaxëndaja me cha xi cuajyihí vë, xi jemu ndaja xa sahmi cha xi tsinguitsojo cha cjuandajyihí xi chja tsëhë Jesucristu.

¹⁹ Hacuaha xuta xi cuacun jan ne, casua me cha xa xi cuisecoo niiji cha xi cuanguin chani ngu cjuandaja vihi ngajan Jerusalén. Cuitjin tihñi cjuandaja vihi cojo sa xi cuma tsejen ta Nai naja ne, jemu jyë hnga me cojo cjuatacun rë me hacuaha cojo sa xi cuma tsejen ta nguñaja tacuin xi visecuin xinguin.

²⁰ Jemu nechin cuidadu, sá tu yo choho cuichja tsijin tsëhë cjuatjo rë xuta vi xi tacun ntsin.

²¹ Meje nihñi cjuandaja, hacuini suvá xcun Nina ni ta hacuaha cojo xcun xuta.

²² Hacuaha cojo cha xi cuacun jan ne, ningatjin sa ngu cha ladu naja. Jemu cjín xcusun casahmi cha xi camatsejen xi jemu nguñaja cacun cha. Quihndë ne, hitsë sa nguñaja cacun cha xi meje cjue cha ta, tsëhë xi jemu camangu cacun cha cojo nuju.

²³ Sacuaha cha Tito ne, jemu visecoo ná cha xi cuatjin visecuin nuju. Sacuaha cha ladu naja xi cuacun vè ne, xuta rè yungun catsingatju me cha hacuaha sahmi jyè sahmi hnga cha Jesucristu.

²⁴ Vèhè xi meje ná ngahan xi tuhun cumachaya rè cha xi cuacun vè cjuahmutacun xi tjin nuju, cojo sa xi yèjè ni xuta rè yungun cumachaya rè me ta quixi jain cjuaxi xi nújin xi cuatjin naxinndjijn nuju.

9

Cuatjo xi cjue Jerusalén

¹ Quihdè ne, hacuini hatuxa meje rè xi tshindu nuju hacutjin tijima tsèhè cjuatjo xi cjue cuisecoo rè xuta ladu rè Jesucristu ngajan Jerusalén ta,

² tsèhè xi ha hvè ta jemu meje cuisecun rè xuta xi cuacun vè. Vèhè xi ha cachjá cojo xuta nguehe Macedonia xi ngayun xuta Acaya ne, hisca cuyanu cavetsuhun canihñu tangun tujún. Hane tsèhè xi jemu nguñaja tacún xi cuatjin canihñu ne, vèhè casahmi xi jemu cjin xuta Macedonia xi hacuaha caviyujungu cacun me xi cuisecoo me.

³ Vèhè xi tsingátju nuju ngujo cha ladu naja xi ha cachjá cojo nuju jan, sá tu cuetjcaain yèjè ni cjuaxi xi cachjá tsujun tsèhè cjuacjintacun vèhè. Meje ná xi tjin chjine ngayun sacuatjin xi ha cachjá tsujun,

⁴ tuxa má sa xi cojo ngujo xuta Macedonia cuinduva me cojo ná ndyá, hane tsajin tjin chjine ngayun ne, jemu cuixu sava ngayin, hisca cojo ngayun cuixu sava ngayun ta, tsèhè xi cuatjin camangu tacuin cojo nuju.

⁵ Vèhè xi catsingátaha cáacun xi casahmi ná ngujoyè xi caféhya cha xi cuacun vè xi cjuetjengui cha ngayun cojo chaja sa, cuisecoo nuju cha xi ninguixunñuju tujún xi canújun jan. Xi cuatjin tjin chjine cjuandaja nuju vè ne, ngajan cuma tsejen xi hacuini ngujoyè canihñi nuju ta cojo cjuasua nuju xi canihñu.

⁶ Ha hyun ta yo xi chuva tjè cuincha ne, hacuaha chuva tutjè sacú rè; hane yo xi cjin tjè cuincha ne, hacuaha cjin tutjè sacú rè. Hacuanitjin ni ngayun cojo cjuatjo nuju.

⁷ Jima ngu ngayun ne, meje rè xi tuhun hacutjin xi cavejñu tacún xi tuhun, peru hacuini taha choho ma tacún, hacuini cojo ngujoyè. Cuatjin nihñu ta ngu xuta xi cojo cjuasua sua me ne, xuta vèhè xi jemu chuva rè Nina tsèhè me.

⁸ Nina ne, cuma sua nuju me yèjè ni cjuandaja rè me, cojo sa xi tsajin nixtin xi cuma chaja nuju; hisca cuangui sa nuju, cojo sa xi cjin xcusun cjuandaja cuma nihñu.

⁹ Xcun xujun rè Nina ne, cuitjin chja:

Xuta ndaja jan ne, chuva cjin sua me xuta yuma.

Hane cjuandaja xi sahmi me vèhè ne, tsajin nu tsajin nixtin xi chaya rè Nina.

¹⁰ Nina, me xi sua tjè xi nitjen cojo niñu xi chinè ne, hacuaha sua nuju me yèjè ni tjè xi mameje nuju, hacuaha me vèhè sahmi me xi cuma cjin sa tutjè xi sacu nuju. Hacuaha sahmi me xi cuma yehe sa yèjè ni cjuandaja xi nihñu.

¹¹ Cuatjin sahmi Nina xi jemu ndaja cuatjun cuma, cojo sa xi yehe cjuandaja cuma nihñu. Hane xi nihñi entregadu cjuandaja nuju jan cojo xuta yuma ne, sua me nacuechji rè Nina.

¹² Xi cuitjin cuanguinchani ngu cjuandaja nuju vè ne, hacuini suvá xi nicjen cjuachaja xi tjin rè xuta ladu rè Jesucristu ta, hacuaha nihña xi jemu cjin xuta ne, sua me nacuechji rè Nina.

¹³ Xi cuitjin nihñi ngu cjuandaja vè ne, ngajan cuma tsejen xi ngayun ne, tinihñu jain sacuatjin xi nújun xi macjain nuju cjuandajyili xi chja tsèhè Jesucristu. Hacuaha cuma tsejen ta jemu ndaja tivisecun rè xuta Jerusalén, hacuaha jemu ndaja visecun rè yèjè ni xuta yuma xi ladu rè Jesucristu. Vèhè xi ngahan cojo yèjè ni me xi visecoo ná ne, jemu nihñi jyè Nina.

¹⁴ Hacuaha xuta ladu rè Jesucristu ngajan Jerusalén ne, sahmi me oración rè me cojo Nina ngatsè nuju, hacuaha jemu cuinga rè me ngayun xi cumachaya rè me tsèhè cjuandaja xi jemu casua nuju Nina.

¹⁵ Nacuechji rè Nina xi casua naja me ngu cjuandaja ngu cjuatjo xi hisca hyaan hacutjin cuinújan xi venguichji rè.

10

Vaxètje Pablo xa xi casua Nina me

¹ Ngahan Pablo ne, nguehe cuichjá cojo nuju cojo cjuandaja cjuajeya rè Jesucristu. Chja yahnga xuta ta ngahan ne, hya xi tejñataha tangun cojo nuju ne, jemu jeya ngahan; peru hya xi cjin tejñataha tsujun ne, jemu hñu cjuaxi naha cojo nuju.

²Ndatjin, peru nguehe cjuéhya nuju ngu cjuandaja: xicanihñu xcusun xi sahmi xi sahme hñu cjuá naha hya xi cjuéjtjéngé nuju. Ha hvê ta cuma sahme hñu cjuá naha cojo xuta xi chja cojo nuju xi ngayin ne, suvá cjuatacun rê xuta ngasunhndé xi quichihin.

³Quixi jain xi xuta ngasunhndé ngayin, peru hacuiin sí rcuin sacuatjin sí rcu xuta ngasunhndé.

⁴Hacuiin chicjin cojo quicha ta Nina ne, sua niji me ngahñu xi caa niji ninguetsinyin cjuatacun rê xuta xi tsitjungui me Nina; xi visiajmi ngayin cojo xuta xi cuacun jan ne, ngutjen tsejen ta machjiriin cjuatacun rê me.

⁵Ninguetsinyin cjuaxin xi sahmi xi maji vijnercu me yo xi Nina, hacuaha ninguixin cjuatacun rê xuta cojo sa xi tsingataha cacun me sacuatjin meje rê Jesucristu.

⁶Hane hya xi cuechu nixtin xi ngayun ne, jemu ndaja camahani cuinuhyun tsêhé Nina ne, ha tjin ngu tacuin xi nihñi castigu yějé ni me xi vihndiin tsêhé Nina.

⁷Ngayun ne, tiningatuhun tacún sacuaha tsingataha cacun xuta ngasunhndé. Sa xi tjin yahnga xuta xi tsingataha cacun me xi ladu rê Jesucristu me ne, ndatjin; peru hacuaha catitsingataha cacun me xi, sacuatjin xi ladu rê Jesucristu me ne, ngayin ne, hacuaha cojo ngayin ladu rê Jesucristu ngayin.

⁸Handasa cuátjutaha hitsé xi cuichjá cojo nuju sacuaha tsêhé xa xi casua niji Nai naja ne, peru hacuiin cuma sava ná. Nai naja casua niji me xa vêhé, cojo sa xi cuiseucin nuju xi cuangunndujun xi mangu tacún cojo cjuá rê Nina, hacuiin xi ninguetsin cjuatacun nuju.

⁹Hacuaha mijí ná xi ningatuhun tacún xi meje cuinchárcun nuju cojo yějé cjuá xi tshindu nuju.

¹⁰Cuinújun ngu ngayun ta jemu hñu cjuá naha xi tshindu nuju, peru hya xi tejñataha cojo nuju ne, jemu yuma hasen ngahan, hacuaha hisca chuyiin nuju chuva rê xi visiajme.

¹¹Peru cuidadu xi cuatjin nújun ta, chuva rê xi nújin cojo nuju xcun xujun xi nihindin nuju quihndé xi xín nechintihin tsujun ne, ha chuva vêhé ni nihñi hya xi cuéchintihin nuju.

¹²Ngayin ne, vetjiin tacuin xi cuinújin xi tangun ngayin cojo ngujo me xi vaxëndaja suvá me yojo rê me. Xi cuatjin tsichuva me cjuatacun rê me ngajñi rê suvá me ne, jemu ngarca me.

¹³Ngayin ne, cuinujiiin xi jemu ndaja canihñi ngu xa xi hisca canihñii. Ha tucutjin xa xi canihñi ne, ha vêhé ni xi cuinújin. Nina ne, me vêhé xi vitexa niji me jani hiscan cuechin xi nihñi xa, hacuaha me vêhé cavitexa niji me xi catsanguin hisca ngajan nangui nuju.

¹⁴Vêhé xi hya xi ndaja nújin tsujun ne, hacuiin sacuaha xi vatjintihin rê xa xi casua niji Nina ta, tjun tjun ngayin cafihin nangui nuju cojo cjuandajyihí xi chja tsêhé Jesucristu.

¹⁵Hacuaha hacuiin naxinndijin yojo niji tsêhé ngu xa xi casahmi jingu sa xuta. Peru vetihin tacuin xi sacuatjin xi cuangun xcun xi hitsé sa ndaja cumacajin nuju Jesucristu ne, hacuaha hitsé sa jyé xa cuma nihñi ngajñi nuju.

¹⁶Ngajan xi cuma cuanguin tihín cumachaya rê xuta cjuandajyihí tsêhé Jesucristu hisca ngajan sa tsêhé nangui nuju. Xi cuatjin ne, tsajin yo cuichja xi ngayin ne, naxinndijin yojo niji tsêhé ngu xa xi jingu sa xuta casahmi me.

¹⁷Yo xi meje cuaxëndaja rê tu yo ni ne, cataxëndaja me Nai naja, sacuatjin chja xujun rê Nina.

¹⁸Cuatjin ta, xi naxenndajan suvaan yojo naja ne, machjiriin camahani. Xi machjirêhé ne, xi Nai naja cuaxëndaja naja me.

11

Chja Pablo tsêhé apóstol ndacha

¹Nijyun tacún. Caticaa nuju ndastu ngujo cjuasca xi cuichjá cojo nuju. Handasa hacuiin sca ná peru cuichjá cjuasca ta,

²tsêhé xi jemu chini ngahan tsujun. Nina ne, casua ná me cjuatacun xi cuatjin chini ngahan ta, tsêhé xi ngayujun ni ne, sacuaha ngu quihndi naha xi chjuun xi casuá xi cuixan cojo ngu ni xihin. Cuatjin nuju ngayun. Hane xihin jan ne, hacui Jesucristu.

³Hatséé ne, chu yé cavindacha chu na Eva cojo cjuatacun tsehen rê chu. Hane hacuaha jemu macjín cácan tsujun ta sá tu cuatjin ningatuhun cumandacha ngayun, hane ha quihndé hacuiin nguñaja tacún cuangunndujun cojo ndiya rê Jesucristu xi tivanguncujun.

⁴Hya xi fehe ngu cha xi sua cumachaya nuju ngu cjuá xi chja tsêhé Jesús xi hacuiin tangun cojo cjuá xi cachjá cojo nuju ntsacu cavetsihin ne, ¿mé má cha vêhé xi jemu ndaja caa nuju cojo cjuá rê cha? O sa xi chjuhunntsun ngu cjuatacun xi hacjahi, xi hacuiin tangun cojo cjuatacun xi cachjuhunntsun ntsacu cavetsihin ne, ¿mé má cjuatacun vêhé xi jemu ndaja caa nuju cojo? O sa xi fehe ngu cjuandajyihí xi hacjahi, xi hacuiin tangun cojo cjuandajyihí xi cachjuhunntsun ntsacu cavetsihin ne, ¿mé má cjuá vêhé xi jemu caa nuju cojo?

⁵ Quihndé ne, nguehe cuetsehen cuichjá cojo nuju cjuasca. Caticaa nuju hitsé ta, tséhé xi xi má ná ngahan ne, hacuiin tjéngé ngahan xi cuma ré cha xi cuacun nújun xi apóstol yehe cha.

⁶ Handasa cjéé scutaya hacutjin xi jemu ndaja cuma cuichjá cojo xuta, peru jemu cavutaya cjuatacun ré Nina. Hane ngajñi ré yějé ni xcusun xi canihñi, ngajñi ré yějé ni cjuaxi xi canújin ne, cahyun suvun hacutjin vechu cjuatacun nihi.

⁷ Catsinguijne suva yojo naha cojo sa xi ngayun ne, cuma yehe cuma hnga ngayun cojo cjuatacun nuju. Hane xi casuá camachaya nuju cjuandajiyi xi chja tséhé Nina ne, cafaan camahani chji tsujun. ¿Mé jyé quitjen xi cuatjin casahme?

⁸ Ngahan ne, cafahá tujún tséhé xuta xi matangun yungun xi yahnga. Me véhé cavechji ná me cojo sa xi cuma cuisécoo nuju ngayun.

⁹ Hora xi camachaja ná hya xi cavitejñataha cojo nuju ne, hisca ngu ngayun ne, casuandyaan nuju xi cuisecun ná ta, ngujo cha xingueen xi canduva cha tséhé Macedonia ne, cha véhé casua ná cha mé xi casahmi chaja ná. Hatuxa cavitejña cuidadu xi tsonia camahani mé cjuandya xi suá nuju, hacuaha ha cuanitjin ni sahme nchujunni nguini.

¹⁰ Jiya cjuaquixi ré Jesucristu cahntsua xahasen naha. Hatuxa cuichjá sa cojo xuta ngajan yějé ladu tséhé estadu Acaya hacutjin casuandyaan camahani nuju.

¹¹ ¿Mé má cuatjin cuichjá sa? ¿Há tséhé xi mijí ná ngayun? Véhé Nina ta jercu meje ná ngayun.

¹² Peru sacuatjin xcusun xi ha sahme ne, ha cuatjin cjuénduju sa sahme, cojo sa xi tsinguétsun cjuaxi ré cha xi cuacun vanguise chuva ré xi cuichja cha xi xa xi sahmi cha ne, tangun cojo xa xi nihñi.

¹³ Cha véhé ne, hacuiin apóstol xi cjuaquixi cha. Tu vindacha ni cha xi chja cha xi apóstol tséhé Jesucristu má cha.

¹⁴ Peru hacuiin fircun ná xi cuatjin ma vindacha cha ta, hisca Satanás ne, ma vindacha naja xi sahmi yojo ré sacuaaha ngu xi catsingatju Nina.

¹⁵ Véhé xi cojo cha xi cuacun sahmi xa ré xitsehen vé ne, hacuiin chja ma sahmi cha xi cuma cha sacuaaha cha xi sahmi cjuaquixi jain. Peru cha xi cuacun vé ne, ha cuatjin cjué cha sacuatjin meje ré xcusun xi sahmi cha.

Cjuañihi xi vatju apóstol Pablo

¹⁶ Cuichjá nga cojo nuju ngu ndiya ta, xicaningatun tacún xi sca ná. O sa tsajin ne, handasa sacuaaha xi sca ná má nuju ne, peru tuhun cahndé xi hacuaha cojo ngahan ne, cuaxéndaja hitsé yojo naha sacuatjin sahmi cha xi vaxéndaja yojo ré vé.

¹⁷ Xi cuitjin vaxéndaja yojo naha ne, hacuiin tichjá sacuatjin chja Nai naja ta tichjá sacuaaha xi sca ná.

¹⁸ Jemu cjín xuta xi vaxéndaja me yojo ré me ngatsé ré xcusun xi cun xi má suvá me hacuaha xi vatju suvá me má, véhé xi hacuaha cojo ngahan ne, cuatjin cuaxéndaja hitsé yojo naha.

¹⁹ Xi má nuju ngayun ne, jemu quicuntacun. Peru jemu ndaja caa nuju cojo cjuaxi ré xuta sca ré.

²⁰ Jemu caa nuju tu yo ni xi vitexa nuju hacuaha xi mosu ré ngayun, sacuaaha xi matitjun me tsujun; tu yo ni xi sahmi jyé sahmi hnga suvá yojo ré, tu yo ni xi sahmi chuva nuju.

²¹ Peru savaain camahani ná xi cuichjá cojo nuju xi ngayin ne, sacuaaha xi jemu yuma hasen ngayin xi cuatjin nihñi cojo nuju.

Peru sacuatjin vetju cacun cha xi cuacun jan xi vaxéndaja cha yojo ré cha ne, hacuaha ngahan ne, cuatjin vetju cácnun xi cuaxéndaja yojo naha. Peru sacuaaha xi sca ná xi cuitjin tichjá cojo nuju.

²² ¿Há ma chja cha hne hebreo? Ngahan ne, hacuaha ma chjá. ¿Há xuta tjé ré Israel cha? Ngahan ne, hacuaha xuta tjé ré Israel ngahan. ¿Há tjé ré Abraham cha? Ngahan ne, hacuaha tjé ré Abraham ngahan.

²³ ¿Há sahmi cha xa ré Jesucristu? Sacuaaha xi jercu sca ná xi cuitjin chjá, peru ngahan ne, hitsé sa ndaja sahme xa ré Jesucristu. Hitsé sa jercu casahme xa xi cuma ré cha xi cuacun vé. Hitsé sa cjín ndiya cějé ndavaya. Hitsé sa cjín ndiya casehen ná. Jemu cjín ndiya xi hitsé sa ne, caveya ngahan.

²⁴ Xutaxa ré xuta Judea ne, hñu ndiya casahmi ná me castigu xi cavaja ná me can tyjuhun ñuju can tyjuhun ñuju cuarta xi ngu ngundiya.

²⁵ Jyan ndiya ne, ya cavaja ná xuta; ngundiya ne, cavetaha ná me ndyojo; jyan ndiya nga ne, quijingahma barcu xi cjuicojo ná; ngundiya tséhé jyan ndiya véhé ne, cavitejñaya ngu nixtin cojo ngu nixten ngajñi ndachacun.

²⁶ Jercu fé camahani ngu nangui; hane xi cuatjin tsujyéhéya ne, hacuaha jemu tsavi xi vatju ndajyé, jemu tsavi tséhé cha chéjé, jemu tsavi cojo cjuahngatacun xi sahmi

xuta nangui naha, hacuaha tsavi cojo cjuahngatacun xi sahmi xutaxín; jemu cojo tsavi xi tejñataha ngu nandya; jemu cojo tsavi xi tejñataha ngu nguñña; jemu tsavi xi vátju ndachacun; jemu tsavi xi tsujyéhëya cojo cha ndacha xi chja cha xi cha ladu naja cha.

²⁷ Jemu chja camahani xa xi casahme hacuaha jemu chja cavátju camá; jemu cjin ndiya xi hisca camaji cafáñafë; tjin hora ne, jemu vojo ná, jemu xinda ná; jemu cjin ndiya xi cajinëë niñu; tjin hora xi jemu hnchan ná, hacuaha camachaja tsjina nahu.

²⁸ Hane tséhë yëjë ni cjuacjintacun xi cuacun vëhë ne, nchu nchujunni ne, sesuntaha sa ngu: jemu vityanguë cáacun tséhë xuta xi ma tangun me yëjë ni yungun, hacutjin tivatju me tijima.

²⁹ Sa xi choho vatju ngu xingueen má ne, ngahan ne, hacuaha choho ma ná. Sa xi yo sahmi xi cjuinenguuya ngu xingueen ngajñi rë cjuatsehen ne, hacuaha ngahan ne, jemu cuma cjan camahani ná.

³⁰ Sa xi meje rë xi cuaxëndaja yojo naha ne, cuichjá cojo nuju hacutjin yuma hasen ngahan.

³¹ Nina Nahmi rë Nai naja Jesús ne, me vëhë xi hatuxa jyë hnga me yëjë nu yëjë nixtin ne, me vëhë xi vëë jain me ta hacuiin tivindácha xi cuitjin tichjá cojo nuju.

³² Ngundiya hya xi cavitejñataha ngajan nandya Damasco hiscan vitexa Aretas ne, ngu xutaxa rë xi catsingatju Aretas ne, caviyujutaha me sindadu tingotjo rë nandya jan xi cjuaha cha ngahan cjucejo ná cha.

³³ Peru ngujo xingueen ne, quijicojo ná me xcun ngu ventana tséhë taha xihndë tséhë hnchua rë nandya jan, caveya ná me cahntsua ngu changa jyë, sehe catsitujne ná me taha candatsen. Cuatjin camá xi cavëtjutjë tséhë gobernador jan.

12

Chja niñña cojo Pablo

¹ Tjin ná xi cuaxëndaja sa yojo naha. Hacuaha handasa tsajin mé machjirëhë xi cuitjin sahme ne, peru nguehe cuichjá cojo nuju hacutjin casahmi Nai naja xi cuichja niñña cojo ná ngu jo ndiya.

²⁻³ Ngahan ne, hvë ngu xihin xi ma ladu rë Jesucristu, hane camateñuju nu jan ne, quijicojo rë cha hisca hiscan majyan ngahnga hisca hiscan tacun Nina. (Xihin xi quijicojo rë ne, hacui Pablo.) Hveen ne, ¿há xi cojo yojo rë cha quiji cha? ne, o ¿há xi hasen ni rë cha xi quiji? ta, súvá Nina ni vëë me hacutjin camá. Mé ta cha xi cuajiyihi vë ne,

⁴ quijicojo rë cha ngajan ngahnga ngu cahndë ndajiyihi xi hmí paraíso, hane ngajan cahndë cha cjua xi hisca sacuiin chuya rë hacutjin cuichja nga cha cojo xuta, hacuaha hisca sacuiin cahndë xi cuya cuichja nga cha cjua jan cojo xuta.

⁵ Cuaxëndaja xcusun xi casahmi Nina cojo rë cha vëhë, peru hacuiin cuaxëndaja yojo naha suva; sa xi cuichjá tsahan ne, cuichjá hacutjin xi yuma hasen ngahan.

⁶ Sa xi meje cuaxëndaja sa yojo naha ne, hacuiin sca ná ta, tséhë xi súvá cjuaquixi xi cuichjá. Peru ha quihndë sahme sa cuatjin ta, tséhë xi mijí ná xi ngatsë rë cjua vëhë ne, tsingataha cacun ngu xuta xi jemu ngu cha machjirëhë ngahan. Xi meje ná ne, xi catutsejen xuta jan xcusun xi sahme hacuaha catisiñuju me cjua xi chjá, sehe tsingataha cacun me ne, há machjirëhë ne, o há machjiriin ngahan.

⁷ Hacuaha cojo sa xi hacuiin cuátjutaha xi ndaja tsingátaha cáacun tsahan suva ngatsë rë cjuandaja xi casahmi Nina cojo ná xi cuatjin cachja niñña cojo ná ne, vëhë xi casua me cahndë xi Satanás ne, suandya ná sacuatjin suandya naja ngu nahyá xi maji naxenxen, cojo sa xi hacuiin cuátjutaha xi ndaja tsingátaha cáacun tsahan suva.

⁸ Jyan ndiya caféhya rë Nai naja xi cuetjuxin cjuandya jan;

⁹ peru cachja me cojo ná cuitjin: “Cjuandaja xi suá ri ne, vëhë yëjë ni xi mameje ri ta, tséhë xi hiscan xi yuma hasen xuta ne, ngajan xi ma visehen ngahñu naha.” Cuatjin cachja me. Vëhë xi hisca nguñaja cáacun xi vaxëndaja yojo naha ngatsë rë xi yuma hasen ngahan, cojo sa xi ngahñu rë Jesucristu ne, cuma cuisehen ngajñi rë cjuatacun naha.

¹⁰ Vëhë xi hisca ndama ná xi jeya ngahan, ndama ná hya xi choho chja xuta tsahan, ndama ná xi vátju ngu cjuandya jyë, ndama ná hya xi vátju cjuañihi, ndama ná hya xi sacuiyini ná hacutjin cuaxëtjë yojo naha. Jemu ndama ná xi cuatjin vátju má cjuacjintacun vëhë ngatsë rë Jesucristu ta, tséhë xi hya xi jemu yuma hasen ngahan ne, hya jemu sacu ná ngahñu rë Nina.

Cjin tsingataha cacun Pablo tséhë xuta rë yungun Corinto

¹¹ Ngahan ne, sacuaaha xi sca ná, peru ngayun quitjun jyë xi cuitjin tichjá cojo nuju. Xi meje rë ne, ngayun ndaja cuinújun tsahan ta, tséhë xi handasa chja yahnga xuta ta tsajin mé venguichji ná, peru cumaji cuatjutaha ná cha xi nújun xi apóstol yehe vë.

¹² Xcusun xi casahme ngajñi nuju ne, casua machaya nuju ta ngu apóstol xi cjuaquixi ngahan. Jemu cacaa ná cojo nuju xi cuatjin cavisécoo nuju hya. Ngayun ne, jemu quijircun nuju hisca carcun xi cahyun cjuarcun xi casahme.

¹³ Tangun casahme ngajñi nuju cojo xi casahme ngajñi rë yějé xuta rë yungun xi yahnga, cuenda xi casuandyaan nuju xi cuisecun ná tséhé gastu naha. Sa xi cuaintjin xi casahme cojo nuju xi má nuju ne, nijyun tacún cojo ná.

Chja Pablo xi cjue me má jyan ndiya nandya Corinto

¹⁴ Quihndé ne, cuma jyan ndiya xi cjuéjtjengé nuju ne, hacuaha suandyaan camahani nuju ta, hacuiin xcusun xi tjin nuju xi meje ná ta suvun xi meje ná ngayun. Mijí rë xi nixti cuetjo tujún xi cuisecoo rë xutacha rë ta xutacha rë cuetjo me tujún xi cuisecoo rë nixti rë me.

¹⁵ Ngahan ne, cojo yějé ni cjuasua tsicójo tujún naha ngatsé nuju, hisca tsicjé ngahñu naha ngatsé nuju. Xi má ná ne, tucutjin xi hitsé sa vinga ná ngayun ne, ngayun ne, hitsé sa chuva vinga nuju ngahan.

¹⁶ Cuichja yahnga xuta tsahan ne: “Jéya. Hacuiin casuandya naja cha tséhé gastu rë cha, peru tséhé xi jemu quicun cacun cha ne, jemu cavindacha naja cha.” Cuatjin cuichja yahnga xuta tsahan.

¹⁷ ¿Há cavindácha nuju xi catsingátju nuju ngujo cha xi quijitjengui nuju cojo cju naha?

¹⁸ Cachjá cojo cha Tito xi cjuetjengui nuju cha, hacuaha catsingátju sa ngu cha xingueen cojo cha Tito. ¿Há cavindacha nuju cha Tito vé? Jéya. Ha ndaja hyun ta cha vèhé ne, hya xi quitaha cha cojo nuju ne, tangun cjuatacun rë cha cojo cjuatacun naha, hacuaha tangun xcusun xi casahmi cha cojo xcusun xi ha casahme ngahan.

¹⁹ Ngu ngu ngayun ne, ningatuhun tacún xi cojo nuju ngayun titihín cjuaquixi niji. Peru hacuiin cuatjin ta, xcun Nina ne, cuitjin tinújin ngatsé rë xi tjin tangun cjuatacun niji cojo Jesucristu. Peru yějé ni cju xi tinújin ne, tinújin ngatsé nuju ngayujun ni, tsan, cojo sa xi cuma yehe sa cjuatacun rë Nina xi tjin nuju.

²⁰ Jemu macjín cáacun, sá nihñuu tutjin xi meje ná, hacuaha sá sahme tutjin xi meje nuju, hya xi cjuéhé nangui nuju. Jemu macjín cáacun, sá tacun si ngajñi nuju, sá tjin cjuachini ngajñi nuju, sá cjan nuju cojo xingun, sá hnga tacún, sá tjin cjuandesu ngajñi nuju, sá tjin cjuachjataha ngajñi nuju, sá tjin cjuaxta ngajñi nuju, sá tujyé tihñu.

²¹ Jemu macjín cáacun sá sahmi chuva Nina ngahan ngajñi nuju hya xi cjuéhé nga ngundiya nangui nuju; hacuaha jemu macjín cáacun, sa choho cuma rë xahasen naha ngatsé rë ngu ngu ngayun xi mijí nindeyun cjuatacun nuju hacuaha hacuiin caviyujunxun cjuatsehen xi nihñu, hacuaha cjuatsehen xi sahmi xuta cojo ngu xi hacuiin chjuun rë me, hacuiin xihin rë me.

13

Conseju xi sua Pablo

¹ Quihndé ne, cuma jyan ndiya xi cjuéjtjengé nuju. Sacuatjin camahindu xcun xujun rë Nina xi jo o sa xi jyan xuta sua me cjuaquixi rë me tséhé ngu cha xi caxincha jyé rë ne, sehe cuma chihin cjuajan, há cuma cha castigo o há xi cumaji cha castigo.

² Hya xi cavitejñataha cojo nuju xi ma jo ndiya ne, cachjåtaha rë xuta xi casahmi cjuatsehen; hane quihndé xi xín tejñataha ne, cúa cuichjá nga cuatjin cojo nuju ngayujun ni xi cjéé cuichjá cojo nuju ta, hya xi cuinduva nga ngundiya ne, ha quihndé tsajin yo cuetjutje tséhé castigo xi fehya jyé rë.

³ Cuatjin sahme ta, tséhé ni ngayun ne, tivinchunsun chuva rë xi meje cumachaya nuju há cjuaquixi xi Jesucristu ne, sua ná me cju xi chjá cojo nuju. Me vèhé ne, hya xi tsichuva nuju me ne, hacuiin jemu yuma hasen me ta jemu hñu ngahñu rë me, jemu hñu cjuatacun rë me ngajñi nuju.

⁴ Cjuaquixi xi jemu yuma hasen me hya xi catsiquehen xuta me xcun cru; peru tjin rë me ngahñu rë Nina quihndé xi tacun nga me cjuahñu. Hacuaha ngayin ne, xi tjin tangun cjuatacun niji cojo rë me ne, jemu yuma hasen ngayin. Peru cuinechin cjuahñu cojo rë me cojo ngahñu rë Nina cojo sa xi cuma cuisecuin nuju.

⁵ Chjuhunchuvun suvun ni yojo nuju, ¿há nechunyun jain ndiya rë Jesucristu? Nichuvun suvun ni yojo nuju. Ngayun ne, hatuxa machaya nuju suvun xi Jesucristu ne, jiya me cahntsua xahasen nuju, jiya me ngajñi rë cjuatacun nuju. Sa xi tsajin ne, cuetjun ndesu ngayun.

⁶ Hacuaha vetahá cáacun ta ngayun ne, cumachaya nuju ta ngayin ne, hacuiin ndacha ngayin.

⁷ Tichjahyin rē Nina cojo sa xi ngayun ne, hacuiin nihñu cjuatsehen. Cuatjin chjahyin, peru hacuiin ngatsē rē xi meje niji xi cuichja xuta ta jemu ndaja xa canihñi ta, xi meje niji ne, xi nihñu cjuandaja, handasa cuichja xuta xi ngayin ne, sacuaaha xuta ndacha ngayin.

⁸ Ngayin ne, tsajin mé venguichji rē xi nihñi xcusun xi hacuiin cjuaquixi ta xi venguichji rē xi nihñi ne, xcusun xi cjuaquixi.

⁹ Jemu ndama niji hya xi jemu yuma hasen ngayin hane ngayun ne, jemu hñu cjuatacun nuju. Hacuaaha chjahyin rē Nina xi xcun ngasunhdē nuju ne, cuiyujuchihin cjuatacun nuju, cuma tyjahi xahasen nuju.

¹⁰ Vēhē xi cuatjin titsihindu nuju cjuā vēhē xcun xujun vihi quihndē xi chaja sa cjuētjēngē nuju, cojo sa xi hya xi cjuēhē ngajan ne, hacuiin jemu hñu cjuā naha cojo nuju ta Nai naja ne, casua ná me xa xi cuisēcoo nuju, hacuiin xi tsinguétsun cjuatacun nuju.

Tsingujinetaha Pablo cjuā

¹¹ Quihndē ne, ngayujun ni ne, catama sua rē xahasen nuju; tiyujunchuhun cjuatacun nuju; tuhun cjuetacun xahasen nuju; nihñu tangun cjuatacun nuju cojo xingun; tinechun cojo cjuandaja cojo cjuajeya; hacuaaha xicamacjiin tacún ta Nina xi sua cjuahmutacun sua cjuajeya ne, cuisēcoo nuju me.

¹² Tuhun rē xingun nina, cojo cjuandaja cojo cjuahmutacun chutatsuhun xingun, sacuatjin xcusun naja.

¹³ Yējē xuta ladu rē Jesucristu ne, tsingatju me ngu nina tsujun.

¹⁴ Jesucristu, Nai naja ne, catisua nuju me cjuandaja rē me; Nina ne, catisua nuju me cjuahmutacun rē me; hane Hasen rē Nina ne, catisēcoo nuju ngayujun ni.

Carta xi catsingatju San Pablo xi cafhatsja xuta ladu rë Jesucristu ngajan distritu Galacia

¹ Ngahan Pablo ne, má ngahan apóstol, hacuiin ngatsë rë xi xuta catsingatju ná me o sa xi cavetahaxa ná me ta ngatsë rë xi cavetahaxa ná Jesucristu cojo Nina Nahmi naja, me xi catsicuya nga rë Jesucristu cjuahñu tsëhë ngajñi rë nima.

² Ngahan cojo yëjë sa xuta ladu naja xi siu cojo ná nguehe ne, ningatjin nuju carta vihi, ngayujun ni xuta ladu rë Nina xi tsëhë yëjë ni nandya ngajan distritu Galacia.

³ Nina Nahmi naja cojo Nai naja Jesucristu ne, catísua nuju me cjuandaja cjuajeya.

⁴ Jesucristu ne, casua me yojo rë me xi cueya me ngatsë rë yëjë ni jyë naja, cojo sa xi cuëhëndaya naja me tsëhë nixtin tsehen vihi, sacuatjin meje rë Nina Nahmi naja.

⁵ Catamajyë catamahnga Nina cojo Hasen rë me yëjë ni nu yëjë ni nixtin. Cuatjin jain.

Ngu ni má cjuandajyih xi chja tsëhë Jesucristu

⁶ Jercu fircun ná xi ngayujun ni ne, jercu xati tinihñu cjin tsëhë Nina, me xi cajindaya nuju cojo cjuandaja rë Cristu, hane tinihñu tiña tsëhë ngu nga cjuachacun.

⁷ Xi cjuaquixi ne, tsajin sa ngu cjuachacun ndajyih xi hacjahi xi cuaxëtje naja. Peru tjin yahnga me xi tisuandya nuju hacuaha meje tsindeya me cjuandajyih xi chja tsëhë Jesucristu.

⁸ Peru sa xi tjin ngu me xi sua cumachaya nuju ngu cjuandajyih xi tanguaain cojo xi ha catihín camachaya nuju ne, ¡catji me cojo nai rë me! Cuatjin catama, handasa ngahan suva o sa xi ngu ángel tsëhë ngahnga cuichja cjuajan.

⁹ Sacuatjin canújin cojo nuju titjun ne, hacuanitjin ni cúa cuichjá cojo nuju quihndë cjuavihi: Sa xi tjin ngu me xi tisua tijimachaya nuju ngu cjuandajyih xi tanguaain cojo xi ha camacjain nuju ne, ¡catji me cojo nai rë me!

¹⁰ Ngahan ne, tsajin jercu meje ná xi chuya rë xuta tsahan ta xi meje ná ne, xi Nina chuya rë me tsahan. Sa xi meje sa ná xi xuta chuya rë me tsahan sacuatjin camameje ná hatsëë ne, hacuaha hacuiin mosu hndixahan rë Cristu ngahan.

Hacutjin camá xi camá Pablo apóstol

¹¹ Nguehe cuichjá cojo nuju ngayujun ni xi cjuandajyih xi suá machaya rë xuta ne, hacuiin cjuatacun rë xuta.

¹² Hacuiin xuta casua ná me cjuandajyih vë, hacuaha hacuiin xuta cavicuya ná me ta Jesucristu ne, me vëhë xi casua me camachaya ná.

¹³ Ngayujun ni ne, ha camachaya nuju hacutjin xi casahme hatsëë, hya xi jemu cavétaha yojo naha cjuachacun rë xuta tjë rë Israel. Camachaya nuju tsëhë hacutjin jercu tisuá rë xuta ladu rë Nina cjuañih nixtin hya hacuaha jercu tisahme ngahñu xi tsicjéya me.

¹⁴ Hane ngahan ne, tsëhë yëjë xuta xi hacuaha tjë rë Israel xi tangun nu naha cojo ne, cavátjutaha rë xi casahmechehen yëjë ni xcusun rë xuta naha ta, tsëhë xi jercu tu cavétaha camahani yojo naha cojo xcusun rë xutachanga naha.

¹⁵ Peru Nina ne, cavaxijin ná me chaja sa xi tsin ngahan, hane cojo cjuandaja rë me ne, casuaxa ná me. Hya xi Nina cavejña ngu cacun me

¹⁶ xi tsingacun me ngahan Quihndi rë me, cojo sa xi suá cumachaya rë xutaxín tsëhë cjuandajyih tsëhë me ne, hya tsajin yo xuta xi cëjë cavinengësë rë,

¹⁷ hacuaha cejen ngajan Jerusalén xi cjuëtjengë me xi ha má apóstol chaja sa xi cuma ngahan apóstol. Cahndé rë vëhë ne, ngutjen cëjëxen ngajan distritu Arabia, sehe cavúya nga nandya Damasco.

¹⁸ Hya xi camá ne, xi cavatju jyan nu ne, cëjë ngajan Jerusalén, cëjëjtjengë Pedru, hane cavitejñataha cojo rë me tyjuhun nixtin.

¹⁹ Peru cahveen apóstol xi yahnga ta ngu ni Jacobo, xicjin Nai naja, xi cahvë.

²⁰ Cjua xi tichjá cojo nuju ne, vëë Nina ta hacuiin vindácha.

²¹ Hya xi camá ne, cëjë distritu Siria cojo distritu Cilicia.

²² Hane xuta ladu rë Cristu ngajan distritu Judea ne, hisca cjëë sa scuëë me ngahan.

²³ Sehe tu vihndé me cjuavihi: “Cha xi jercu casua naja cjuañih hatsëë ne, quihndé ne, tisua cha tijimachaya rë xuta tsëhë cjuachacun xi jercu casahmi cha ngahñu xi tsicjéya cha.” Cuatjin vihndé me.

²⁴ Hane casahmi jyë casahmi hnga me Nina cojo Hasen rë me ngatsë naha.

2

Quiji tjengui Pablo apóstol xi yahnga

¹ Hya xi camá ne, xi cavatju teñuju nu ne, cavúya ngahan nga ngu ndiya ngajan Jerusalén. Hacuaha Bernabé ne, quijitangun me cojo ná. Hacuaha cêjêcojo cha Tito.

² Cêjê ta cuatjin cachja Nina. Hane xcun ngu junta xi camá cojo suvá xuta matitjun ne, cachjá cojo rê me hacutjin fi cjuandajyihî xi suá machaya rê xutaxín. Cuatjin casahme, tsêhê xi mijî ná xi xa xi tisahme o xi ha casahme ne, tu mahya ni.

³ Peru hisca cha Tito xi quitahátangun cha cojo ná ne, handasa xutaxín má cha ne, camaji cha ngujoyê xi xti chuxin rê cha.

⁴ Ngujo cha ndacha xi chja cha xi ladu rê Jesucristu má cha ne, cavisehen tahahma cha ngajñi niji xi scutsejen cha hacutjin xcusun niji xi tjin ndaya ngayin ngatsê rê xi tjin tangun cjuatacun niji cojo Jesucristu. Meje rê cha xi cuetihin nga yojo niji cojo ley rê Moisés.

⁵ Peru ngayin ne, caningatiin rê cha hisca hitsê, cojo sa xi cjuandajyihî xi hatuxa cjuaquixi ne, chajin xi cuma nuju.

⁶ Peru me xi chjahárcun rê sacuaha xuta xi matitjun jan ne, (cuatjin chjá ta xa xi quitahá me jan ne, hisca cuendaain ná ta, Nina ne, texta ni vutsejen naja me ngayejen ni), me xi cuacun matitjun jan ne, cavesintaain me hisca ngu cjuata tsêhê cjuandajyihî xi chjá cojo xuta, tsêhê xi ha tjin chihin.

⁷ Hacuaha cajnercu me xi Nina casua ná me xa xi cuichjá cjuandajyihî cojo xutaxín, sacuahatjin rê Pedru xi casatê rê me xi cuichja me cojo xuta tjê rê Israel.

⁸ Nina ne, me xi catsingatju rê Pedru xi cuma me apóstol ngajñi rê xuta tjê rê Israel ne, hacuaha hacui ni me xi catsingatju ná xi cuma ngahan apóstol ngajñi rê xutaxín.

⁹ Hane Jacobo cojo Pedru cojo Juan, me xi chjahárcun rê sacuaha xuta xi matitjun ne, hya xi cuatjin cajnercu me xi Nina casua ná me cjuandaja jan ne, cafaha me ntsin, ngahan cojo Bernabé, hane cuatjin catsingacun me xi ngayin ne, tihñitangun cojo rê me xa rê Nina. Hane camangu tacuín xi ngayin ne, nihñi xa ngajñi rê xutaxín, hane me xi cuacun jan ne, sahmi me xa ngajñi rê xuta tjê rê Israel.

¹⁰ Ngu tu tu ni xi cafehya niji me ne, xi cuisecuin ngajñi rê cjuachaja rê xuta yuma xi hinchajñi ngajñi me. Sacuatjin xcusun vêhê ne, hatuxa jercu vejñá xi sahme.

Cachjataha Pablo Pedru ngajan Antioquia

¹¹ Peru hya xi quiji Pedru ngajan nandya Antioquia ne, cachjátáha rê me xcun cojo xcun ta, tsêhê xi suvá tsejen xi cuain tjin xi tisahmi me.

¹² Chaja sa xi cjehe ngujo cha xi catsingatju Jacobo ne, tijinê tangun Pedru niñu cojo xutaxín xi ladu naja. Peru tu ngu cafehe cha xi cuacun jan ne, cavetsihin cavejñaxin me xi jinê tangun me cojo xutaxín xi cuacun jan ta, tsêhê xi tsacun me yahnga xuta tjê rê Israel xi ladu naja xi meje rê xi xti chuxin rê yêjê ni xuta xi visehen ladu rê Nina.

¹³ Hacuaha yêjê sa xuta tjê rê Israel xi siu ngajan ne, cavetsihin casahmi jo xcun jo hntsua me sacuatjin rê Pedru, hane hisca cojo Bernabé camatangun me cojo me xi cuacun jan cojo xcusun xi casahmi me.

¹⁴ Peru hya xi cahvê xi xcusun xi tisahmi me ne, matanguaain cojo cjuaquixi xi vicuya naja cjuandajyihî ne, xcun yêjê ni xuta jan ne, cuiitjin cachjá cojo rê Pedru: “Ngayun xi ngu xuta tjê rê Israel má ngayun ne, sa xi nihñu sacuaha sahmi xutaxín, hacuiin sacuaha sahmi xuta tjê rê Israel ne, ¿hacutjin meje nihñu ngujoyê xi xutaxín jan ne, sahmi me sacuaha nihña ngayaan xuta tjê rê Israel?”

Xi mangu tacuun cojo Jesucristu ne, vetjuntje xuta, sa xuta tjê rê Israel o sa xutaxín

¹⁵ Ngayaan ne, hatuxa xuta tjê rê Israel má ngayaan, hacuiin xuta tsehen má ngayaan.

¹⁶ Handasa cuatjin ne, ha hyan xi ngu xuta ne, tsicjiin Nina jyê rê me ngatsê rê xi vihndê me tsêhê ley rê Moisés ta suvá ni ngatsê rê xi mangu cacun me cojo Jesucristu. Hane cojo ngayaan ne, hacuaha camangu tacun cojo Jesucristu, cojo sa xi tsicjê Nina jyê naja ngatsê rê xi mangu tacun cojo rê Cristu, hacuiin ngatsê rê xi canuhyaan tsêhê ley jan ta, tsêhê xi tsajin camahani yo xi cjuê jyê rê ngatsê rê xi vihndê tsêhê ley rê Moisés jan.

¹⁷ Hya xi canihña tangun cjuatacun naja cojo Cristu cojo sa xi cjuê jyê naja ne, sa xi hya camatsejen xi hacuaha ngayaan xuta tsehen yaan ne, ¿há vêhê vijne xi Cristu ne, casahmi me xi caxincha ngayaan ndiya rê cjuatsehen? ¡jéya, hacuiin cuatjin vijne!

¹⁸ Sa xi cúa tsindaja nga xcusun xi ha catsinguétsun ne, ngajan matsejen xi xuta tsehen má ngahan.

¹⁹ Ngahan ne, xi cuma rê ley rê Moisés ne, sacuaha xi cavéya, sacuaha xi suvá ley jan catsiquehen ná. Cuatjin camá cojo sa xi cuma ngahan tsêhê Nina. Sacuaha xi casetaha tangun ngahan xcun cru cojo Cristu.

²⁰ Ngajan xi sacuaha xi ha quihndê hacuiin cjuahñu naha xi tjin ná ta sacuaha cjuahñu rê Cristu. Peru quihndê xi tjin ná cjuahñu cojo yojo naha ne, mangu cacún cojo Quihndi rê Nina, me xi catsihmu cacun ná hacuaha casua me yojo rê me xi cueya ngatsê naha.

²¹ Hacuini tsitjungë cjuandaja rê Nina. Sa xi cuma cjuë jyë rê xuta ngatsë rê xi vihndë me tsêhë ley rê Moisés ne, ha tu mahya ni cahme Cristu.

3

¿Há cojo ley o há cojo Jesucristu mangutacuun?

¹ Ngayujun ni xuta Galacia ne, ijercu yuma hasen yun! ¿Há tjin yo cafehya cacun tsujun xi cuatjin ningatuhuntacún? Jercu tu ndaja camachaya nuju hacutjin xi cahme Jesucristu xcun cru.

² Ngu tu tu ni cjua xi meje cuinengësë nuju ne: ¿Há cachjuhunntsun Hasen rê Nina ngatsë rê xi canihñu sacuatjin vitexa ley jan, o sa tsajin ne, há ngatsë rê xi camacjain nuju cjuandajyihí xi cavisiñuju?

³ ¿Há tuxa yuma hasen ngayun? Quihndë xi cavetsuhun cojo Hasen rê Nina ne, ¿há meje nihñuchuhun cojo ngahñu nuju suvun ni?

⁴ ¿Há tu mahya ni xi cuatjin cjin xcusun cavatjun ni? ¡Hatuxa hacuini tu mahya!

⁵ Hya xi Nina sua nuju me Hasen rê me hacuaha sahmi me cjuarcun ngajñi nuju ne, ¿mé má cuatjin casahmi me? Hacuini ngatsë rê xi nihñu sacuatjin vitexa ley ta, ngatsë rê xi macjain nuju cjuandajyihí xi visiñuju.

Compromisu rê Nina cojo Abraham

⁶ Xcun xujun rê Nina ne, cuitjin camahindu: “Abraham ne, camangu cacun me cojo cjua xi cachja Nina cojo rê me, hane ngatsë rê vëhë xi catsicjë Nina jyë rê me.” Cuatjin camahindu.

⁷ Ngajan xi meje rê xi cuijnercun xi xuta xi mangu cacun me cojo Nina ne, me vëhë jain xi quihndi rê Abraham me.

⁸ Xujun rê Nina jan ne, ha tjun sa vëë xi tsicjë Nina jyë rê xutaxín ngatsë rê xi cumangu cacun xutaxín jan cojo rê me. Vëhë xi xcun xujun rê Nina ne, camahindu cjua xi cuitjin cachja Nina cojo Abraham: “Ngatsë rijí ngaye ne, cumanchacuntihin yëjë ni xuta ngasunhndë.”

⁹ Ngajan xi yëjë ni xuta xi mangu cacun me cojo Nina ne, cumanchacun tangun me cojo Abraham, me xi hacuaha camangu cacun.

¹⁰ Yëjë ni xuta xi mangu cacun me cojo ley rê Moisés ne, hatuxa cuatju me castigu, tsêhë xi xcun xujun rê Nina ne, cuitjin camahindu: “Nina ne, sahmi rê me castigu yëjë ni xuta xi vihndiin me tsêhë yëjë ni cjua xi camahindu xcun xujun rê ley rê Moisés.” Cuatjin camahindu.

¹¹ Ngajan xi súvá tsejen xi xcun Nina ne, cjuini jyë rê hisca xi ngu xuta ngatsë rê xi cahndë me tsêhë ley jan, tsêhë xi xcun xujun rê Nina ne, cuitjin camahindu: “Xuta xi tsajin jyë rê me ngatsë rê xi mangu cacun me cojo Nina ne, sacú rê me cjuahñu xatsé.” Cuatjin camahindu.

¹² Peru ley rê Moisés jan ne, cuendaain camahani rê xi mangu tacuun cojo Nina ta, xcun xujun rê Nina ne, cuitjin camahindu: “Xuta xi sahmi me sacuatjin vitexa ley ne, sacú rê me cjuahñu xatsé sa xi sahmi chíhin me ley jan.” Cuatjin camahindu.

¹³ Cristu ne, cavëhëndaya naja me tsêhë castigu xi vitexa ley jan, hya xi cavatju me castigu jan ngatsë naja. Camahindu nga cuitjin xcun xujun rê Nina: “Yëjë nima xi xtyangui tsêhë ngu ya ne, hatuxa cuatju me castigu rê Nina cuma.” Cuatjin camahindu.

¹⁴ Cristu ne, cuatjin cavëhëndaya naja me, cojo sa xi cjuaninchacuntihin xi cachja Nina xi sua me Abraham ne, hacuaha satë rê xutaxín ngatsë rê Jesucristu, hacuaha cojo sa xi ngatsë rê xi mangu tacuun cojo Jesucristu ne, sacú naja Hasen rê Nina xi cachja Nina xi sua me.

¿Há ley o cjua xi cachja Nina mangutacuun?

¹⁵ Ngayujun ni ne, cuihjá cojo nuju ngu ejemplu xi ha ndaja hyan. Hya xi ha camachihin xujun tsêhë ngu compromisu ne, tsajin yo xi tsicjëya rê o sa cuesuntaha sa rê ngu cjua.

¹⁶ Nina ne, cachja me cojo Abraham xi sua me cjuandaja rê me xi cuma rê Abraham cojo tjë rê me. Chjaain xujun rê Nina xi “yëjë tjë rê”, sacuaha xi jercu cjin xuta tichja tsêhë ta xi chja ne, “cojo tjë rijí”, sacuaha xi ngu ni xuta tichja tsêhë. Hane tjë vëhë ne, hacui Cristu.

¹⁷ Xi meje cuihjá ne, Nina ne, casahmi me ngu compromisu cojo Abraham titjun. Vëhë xi ley rê Moisés, xi cavejña Nina xi cavatju ñuju cientu cojo cantë nu ne, maji tsicjëya rê compromisu jan, maji tsinguetsun rê cjua xi cachja Nina jan.

¹⁸ Sa xi sacú naja cjuandaja xi sua Nina ngatsë rê xi vinuhyan tsêhë ley rê Moisés ne, ngajan xi hacuini ngatsë ni rê xi cuatjin cachja Nina xi sacú naja. Peru Nina ne, casua me cjuandaja jan Abraham ngatsë ni rê xi cuatjin cachja me titjun.

Mé ngatsë rê xi tjin ley rê Moisés

¹⁹ Sa xi cuatjin ne, ¿mé machjiréhë ley rè Moisés? Xi camá ngascan ni, Nina casua me ley jan, cojo sa xi cumatsejen xi xuta ne, hatuxa vihndiin me cjuaxi vitexa Nina. Ley jan ne, cavitexa hisca xi cafehe tjë rè Abraham jan, me xi cachja Nina xi sacú rè cjuandaja. Hacuaha ley jan ne, casahmi entregadu ángel tsja Moisés, me xi cavéjña vasentjin ngajñi rè Nina cojo xuta.

²⁰ Peru hindë ne, tséhë cjuaxi vitexa Nina ne, mamijí sa ngu me xi véjña vasentjin, ta ngu tu tu ni me ne, tifahacuenda me.

²¹ ¿Há vëhë vijne xi ley rè Moisés ne, sahmi rè condra cjuaxi cachja Nina jan ni? ¡yéya, hacuini cuatjin! ta, sa xi ley jan camá casua naja cjuahña xatsë ne, ha café jyé naja ngatsë rè xi canuhyan tséhë ley jan.

²² Peru xujun rè Nina ne, chja xi cjuatsejen vitexa rè yëjë ngarca ni, cojo sa xi xuta xi mangu cacun me cojo Jesucristu ne, cuma cjuahatsja me cjuandaja xi cachja Nina xi sua me.

²³ Peru chaja sa xi nduva nixtin xi camá camangu tacun cojo Jesucristu ne, ley jan ne, cavinchahña naja sacuaaha xi ndavaya cavinechanyaana, hisca nixtin xi casacu camachaya naja xi fë jyé naja ngatsë rè xi mangu tacuun cojo Jesucristu.

²⁴ Cuatjin xi ley ne, cavitexa naja hisca xi canduva Cristu cojo sa xi cjué jyé naja ngatsë rè xi mangu tacuun cojo Jesucristu.

²⁵ Peru quihndë xi ha cafehe nixtin xi mangu tacuun cojo Jesucristu ne, ha quihndë vitexaain sa naja ley rè Moisés jan.

²⁶ Cuatjin ta, tséhë xi quihndë xi tjin tangun cjuatacun nuju cojo Jesucristu ne, ngayujun ni ne, quihndi rè Nina má ngayun ngatsë rè xi mangu tacún cojo rè me.

²⁷ Ngayujun ni xi caxtenda ngayun xi nihñutangun cjuatacun nuju cojo Cristu ne, hacuaha cavisehen nuju cjuatacun rè me jan sacuaaha xi cachujun ngu tsjian xatsë.

²⁸ Ngajan xi cuendaain rè sa xi xuta tjë rè Israel o sa xi xutaxin ngayun, cuendaain rè sa xi xuta caxteña o sa xi xuta tjin ndaya ngayun, cuendaain rè sa xi xujuun o sa xi xihin ngayun ta, tséhë xi ngayujun ni ne, xi tjin tangun cjuatacun nuju cojo Jesucristu ne, ngu tangun ni cún yun xi cuma rè Nina.

²⁹ Hane sa xi tséhë Cristu má yun ne, ngajan xi hacuaha tjë rè Abraham má yun, hane satë nuju cjuandaja xi cachja Nina xi sua me.

4

¹ Cuma cuinújan ne, sacuaaha cha xi cjuahatsja cjuanchina rè xutacha rè ne, nguyëjë rè xi chúva nu rè cha ne, tangun cha cojo ngu mosu xi cachahá rè, handasa cjuaquixindaja xi cha vëhë má cha nai rè yëjë ni cjuanchina jan.

² Tjin xuta xi sahmi rè cha cuidadu hacuaha fahacuenda me cjuacjintacun rè cha, hisca nixtin xi cachja nahmi rè cha xi cuatjin cuma cojo cha.

³ Cuanitjin ni naja ngayaan ta, hya xi cjualanga naja ne, hatuxa cavinuhyan tséhë xitsehen xi vitexa rè ngasunhdë, sacuaaha xi má ngayaan hndixahan xi cachahá rè.

⁴ Peru hya xi cavechútáha rè nixtin rè ne, Nina ne, catsingatju me Quihndi rè me, xi catsin sacuaaha tsin ngayaan xuta ngasunhdë, hacuaha ley rè Moisés cavitexa rè jan.

⁵ Cuatjin catsingatju me, cojo sa xi Quihndi rè me jan ne, cuëhëndaya naja ngayejen ni xi cavitexa naja ley jan, hacuaha cojo sa xi cuma ngayaan quihndi rè Nina.

⁶ Cojo sa xi cumatsejen xi quihndi rè Nina má ngayun ne, Nina ne, caveya me Hasen rè Quihndi rè me cahntsua cjuatacun naja. Hane Hasen jan ne, cuitjin chja cojo Nina: “¡Papá, Nahmi naha!”

⁷ Vëhë xi ngayun ne, hindë hacuini má ngayun mosu hndixahan xi caxteña ta quihndi rè Nina. Hane xi cuatjin quihndi rè me ngayun ne, Nina ne, sua nuju me yëjë ni xi satë rè quihndi rè me.

Macjincacun Pablo tséhë xuta Galacia

⁸ Hatsëë nixtin ne, hya xi chaja sa cumachaya nuju yo xi Nina ne, jemu cavetuhun yoju nuju cojo jemu cjin xcusun nina xi hatuxa hacuini nina.

⁹ Peru quihndë xi ha camachaya nuju yo xi Nina ne, o cuma cuinújan ne, quihndë xi Nina ne, vutsejen nuju me cojo cjuandaja ne, ¿hacutjin nga meje cuyun cuisuhun cojo cjuahasen xi chúva ngahña rè hacuaha yuma cojo cjuatacun rè ni? ¿Hacutjin nga meje cuetuhun yoju nuju cojo cjuahasen xi cuacun jan ni?

¹⁰ Jercu nihña suhi. Tjin nixtin xi jercu chjuhunrcun, tjin suhi xi nihña chuva sá o sa xi chuva nu.

¹¹ Macjin cacún, sá tu xa xi casahme ngajñi nuju ne, tu mahya ni camá.

¹² Ngayujun ni ne, cjuéhya nuju favor ne, catama ngayun sacuaaha ngahan ta, tséhë xi ngahan ne, ha camá ngahan sacuaaha ngayun. Tsajin mé xi choho canihña cojo ná.

¹³ Hacuaha hyun xi titjun ne, casuá camachaya nuju tséhë cjuandajyihí xi chja tséhë Jesucristu ngatsë rè ngu chíhin xi yaha ná.

¹⁴ Peru handasa casuándya nuju cojo chíhin naha jan ne, ngayun ne, tsajin canitjungun ná hacuaha tsajin canihñuchuvun ná. Cahndë rè vèhë ne, cachjuhunnstun ná sacuaha xi ngu ángel xi catsingatju Nina má ngahan, o sacuaha xi suvá Jesucristu má ngahan.

¹⁵ ¿Mé camá cojo cjuandaja xi tjin nuju hatsëë ni? Ngahan ne, tsinguxë xi ngayun ne, hisca canaxun túxcun tuhun ná nixtin hya, sa xi camá canaxun.

¹⁶ ¿Há camá ngahan condra nuju ngatsë rè xi cachjá cojo nuju cjuaquixi?

¹⁷ Tjin xuta xi jercu meje cuisecoo nuju me, peru hacuín cojo cjuandaja ta xi meje rè me ne, xi cuaxëxin nuju mé tsahan, cojo sa xi ngayun ne, ninguisuhunjñurcun cojo rè me.

¹⁸ Jercu ndatjin xi meje cuisecoon rè xingueen, hya xi cojo cjuandaja. Peru meje rè xi yëjë ni nixtin cuatjin nihña, hacuín suvá ni hya xi tejñataha cojo nuju.

¹⁹ Ngayujun ni tsan, jercu jyë cjuahmu xi tivátju nga tjiima ngatsë nuju, sacuaha vatju ngu chjuun xi tsin quihndi rè me. Hacuaha cuatjin cjuëndujú cojo cjuahmu vihi hisca xi cumatsejen xi jiya té Cristu ngajñi cjuatacun nuju hacuaha cuitexa me cjuatacun nuju tséhë yëjë ni xcusun xi nihña.

²⁰ Jercu meje cuitëña cojo nuju ndicumaha ni, cojo sa xi cuma tsindéya cjuavisiajmi naha cojo nuju ta, tséhë xi jercu vityangë cacún tsujun.

Ejemplu tséhë Agar cojo Sara

²¹ Ngayujun ni xi meje nuju xi ley rè Moisés cuitexa nuju ne, tinújun cojo ná, ¿há cjëë cuinuhyun cjuá rè ley jan?

²² Camahindu xi Abraham ne, jo xu camá quihndi rè me: ngu ne, tséhë na mosu hndixahan xi sahmi xa rè chjuun rè me, hane xingu jan ne, tséhë chjuun rè suvá me, na xi hacuín hndixahan ta hatuxa xuta ndaya tjin.

²³ Quihndi rè na mosu hndixahan jan ne, catsin sacuaha tsin yëjë ni langa; peru quihndi rè na ndaya jan ne, camá tséhë cjuarcon rè Nina.

²⁴ Cjuá xi cuicun vi ne, sacuaha ngu ejemplu: jo chjuun jan ne, sacuaha jo compromisu má na. Ngu na ne, Agar hmí rè na, hane yëjë ni quihndi rè na ne, hatuxa hndixahan cachahá rè. Hane chjuun jan ne, sacuaha compromisu xi casahmi Nina cojo Moisés ngajan Naxi Sinai.

²⁵ Na Agar, na xi sacuaha Naxi Sinai ngajan Arabia ne, sacuaha ngu ejemplu tséhë nandya Jerusalén xi tacun quihndë. Hane yëjë ni xuta tséhë Jerusalén vèhë ne, sacuaha hndixahan cachahá rè má me.

²⁶ Peru yëjë ni xuta tséhë Jerusalén xi tacun ngahnga ne, hatuxa ndaya tjin me. Hane ngayaan ne, quihndi rè nandya Jerusalén vèhë má ngayaan.

²⁷ Cuitjin chja xujun rè Nina:

Catamasua ri ngaye chjuun xi maji sacu ri quihndi;
chjindaye cjuasua, ngaye xi cjëë cuatji cjuahmu xi tsin ri quihndi.

Tséhë xi ngaye xi cavixin cojo ra, hitsë sa cjín cuma ye cojo quihndi riji
xi cuma ran xi fi vejña na cojo cha.

²⁸ Ngayujun ni ne, hacuaha quihndi rè Nina má ngayun, sacuatjin rè Isaac, ngatsë rè xi cuatjin cachja Nina.

²⁹ Nixtin hya ne, cha xi catsin sacuaha tsin yëjë ni langa ne, catsujyihiya tjengui cha cojo cjuahngatacun cha xi catsin ngatsë rè Hasen rè Nina. Quihndë ne, ha cuanitjin ni tjiima.

³⁰ Peru ¿mé chja xujun rè Nina? Cuitjin chja: “Naxendihye na mosu hndixahan jan cojo quihndi rè na ta, tséhë xi quihndi rè na hndixahan jan ne, hatuxa cumaji sacu tangun rè cjuanchina rè nahmi rè cojo quihndi rè na xi ndaya tjin.” Cuatjin chja xujun rè Nina.

³¹ Vèhë xi ngayejen ni ne, hacuín quihndi rè na mosu hndixahan má ngayaan ta quihndi rè na xi ndaya tjin.

5

Meje rè xi cuanguenndujun xi tjin ndaya ngayaan

¹ Cristu ne, cavèhëndaya naja me, cojo sa xi ndaya tjin ngayaan. Vèhë xi tiyujunhñu cjuatacun nuju, xicaninguisunjñu rucun nga cojo ngu xcusun xi sahmi xi cuyun nga ngayun sacuaha hndixahan.

² Nutsujun ni. Ngahan Pablo ne, cuichjá cojo nuju ta, sa xi xtí chuxin nuju sacuatjin xcusun rè xuta tjë rè Israel ne, Cristu ne, cumachjiriin nuju me.

³ Cúya cuichjá cojo nuju ta yëjë ni xihin xi cuatjin xtí chuxin rè ne, hatuxa tjin rè xi sahmi yëjë ni hacutjin chja ley rè Moisés.

⁴Ngayun xi meje nuju xi cjué jyé nuju ngatsé rê xi vinuhyun tséhé ley rê Moisés ne, hindé tsajin tjin tangun cjuatacun nuju cojo Cristu, hacuaha jemu cjin nechun tséhé cjuandaja rê Nina.

⁵Peru ngayin ne, jercu vetihin tacuín xi tsicjé Nina jyé nihi. Hacuaha jercu nechinyin xi cuatjin sahmi Nina ta, tséhé xi Hasen rê Nina ne, visecoo nihi xi mangu tacuín cojo Jesucristu.

⁶Hya xi tjin tangun cjuatacun naja cojo Jesucristu ne, venguin chji rê sa cati rê o sa xi catiin rê chuxin naja. Xi venguí chji rê ne, xi mangu tacuun cojo Jesucristu, hane ngatsé rê véhé ne, xi hacuaha tjin naja cjuahmutacun.

⁷Ngayun ne, ha jercu ndaja titsangun titjun. ¿Yo xi casuandya nuju xi mijí cuangunndu-jun xi cuinuhyun tséhé cjuaquixi rê Nina?

⁸Nina xi tsingatju me cjuu nuju ne, hacuín me véhé xi cuatjin casuandya nuju.

⁹Ha hyan cjua xi chja cuitjin: “Hitsé lihndi ni san rê pan ne, caa rê tsisatjen rê yéjé nahyu.” Cuatjin chja cjua.

¹⁰Macjiin cacún tsujun ta, ngatsé rê xi tjin tangun cjuatacun naja cojo Nai naja ne, xi má ná ne, ningatuhun tacún sacuatjin tsingátaha cacún ngahan. Hane tu yo ni xi tisuandya nuju ne, cuatju castigu cuma.

¹¹Sacuaha ngahan ne, sa xi quixi xi tichjá sa cojo xuta xi sahmi nguýjé xi xtí chuxin naja ne, ¿mé tséhé xi yahnga me ne, tsujihiyatjenguí sa ná me cojo cjuahngatacun? Sa xi quixi xi cuatjin sahme sa ne, ngajan xi hya xi chjá cojo xuta tséhé hacutjin cahme Jesucristu xcun cru ne, tsajin cjuandya xi cuma rê yahnga xuta xi cuacun jan.

¹²Jercu ndatjin sa xi xuta jan xi cuatjin tisuandya nuju me ne, catatéxin suvá me yojo rê me ngu ndiya xa ni!

¹³Sacuaha ngayujun ni ne, catsingatju Nina cjua nuju, cojo sa xi cumandaya ngayun. Peru hacuín tu cuain rê xi cavéhéndaya nuju Nina xi ningatuhun rê cjuatacun nuju yéjé ni xcusun tsehen xi vitexa nuju. Cahndé rê véhé ne, tiseacun xingun ngatsé rê cjuahmutacun xi tjin ngajñi nuju.

¹⁴Cuatjin nihñu ta, yéjé ni cjua xi vitexa ley rê Moisés ne, cumachihin hya xi nihña ngu ni cjua vihi: “Meje rê xi nihmu tacún xingun sacuatjin nihmu tacún suvun yojo nuju.”

¹⁵Peru sa xi choho nihñu cojo xingun sacuatjin sahmi chu xi cjan rê xi jinéxcuen xicjin chu ne, nechun cuidadu, sá tu nicjuyun cjuandaja xi tjin ngajñi nuju.

Hacutjin sahmi Hasen rê Nina, hacuaha hacutjin sahmi cjuatacun tsehen naja

¹⁶Nutsujun ni. Tuhun cahndé xi Hasen rê Nina ne, cuítexa rê cjuatacun nuju. Hane xi cuatjin ne, hatuxa nihñuu yéjé ni xi fehya cjuatacun tsehen nuju.

¹⁷Cjuatacun tsehen naja ne, sahmi condra cojo Hasen rê Nina, hacuaha Hasen rê Nina ne, sahmi condra cojo cjuatacun tsehen naja. Catsijo ni vihi ne, sahmi condra cojo xicjin. Ngajan xi ngayujun ni ne, maji nihñu tu mé ni xcusun xi meje nihñu.

¹⁸Sa xi Hasen rê Nina vitexa rê cjuatacun nuju ne, ngajan xi cuítexaain nuju ley rê Moisés.

¹⁹Quihndé ne, ha ndaja ni hyan xcusun tsehen xi nihña hya xi vitexa naja cjuatacun tsehen naja. Nihña cjuatsehen xi sahmi ngu xuta cojo ngu xi hacuín chjuun rê me, hacuín xihin rê me, o sa xi ngajñi ni xihin me, o ngajñi ni chjuun me, o tu mé sa xcusun cjuatsehen jan.

²⁰Chjahanrcun nina ndyojo, hacuaha nihña cjuasurqui. Choho hyaan xingueen, nihña si ngajñi naja cojo xingueen, hacuaha tjin naja cjuachini. Jercu ma cjan naja, jercu hnga tacun, jercu chicjan cojo xingueen, ngujo yaan ne, naxenxeen yojo naja tséhé xingueen.

²¹Jercu tjin naja cjuaxin, jercu xuta chíhi má ngayaan, jercu maxti nuju ngayaan hya xi nihñu ngu suhi, cojo jercu cjin sa xcusun véhé xi nihña. Cojo tjun sa ne, cuichjá cojo nuju sacuatjin xi ha cachjá cojo nuju ta xuta xi sahmi me sacuahatjin rê xcusun véhé ne, satiin rê me xi cuisehen me hiscan xi sahmi Nina gobiernu.

²²Peru hya xi Hasen rê Nina vincha cjuandaja ngajñi rê cjuatacun naja ne, jercu tjin naja cjuahmutacun, tjin naja cjuasua, tjin naja cjuajeya, yehe tacun, tjin naja cjuandaja, cuma cumangu cacun xuta cojo naja,

²³jeya ngayaan, caa naja xi hacuín ningatehen rê cjuatacun tsehen naja cojo xcusun xi fehya xi nihña. Sacuaha yéjé ni cjuandaja véhé ne, tsajin camahani ley xi vitexa xi cumaji nihña.

²⁴Hane yéjé ni xuta ladu rê Jesucristu ne, ha caviyujuxin me cjuatacun tsehen rê me cojo yéjé ni xcusun tsehen xi fehya rê me xi sahmi me.

²⁵Sa xi Hasen rê Nina casua naja cjuahñu xatsé ne, meje rê xi hacuaha ningatehen xi Hasen jan cuítexa rê cjuatacun naja.

²⁶Mijí rê xi xta ngayaan, mijí rê xi si rcun, mijí rê xi tjin naja cjuaxin cojo xingueen.

6

Meje rë xi cuisecoon xingueen

¹ Ngayujun ni ne, sa xi yo sacutsja rë ngu xuta xi tisahmi me cjuatsehen ne, ngayun xi ningatuhun xi vitexa Hasen rë Nina cjuatacun nuju ne, meje rë xi cuisecon rë me xi cuya ndaja me, peru tisecon rë me cojo yëjë ni cjuandaja cjuajeya. Hacuaha meje rë xi tjin nuju cuidadu, sá tu cojo ngayun cuinengyunun ngajñi rë cjuatsehen.

² Tisecon xingun cojo sa xi scaa nuju cojo cjuacjintacun xi quichuhun xingu xingu ngayun. Hane xi cuatjin nihñu ne, ngajan xi machihin ley xi cavicuya naja Cristu.

³ Sa xi yo sahmi jyë yojo rë handasa tsajin mé vechú ne, vindacha suvá yojo rë.

⁴ Xingu xingu ngayaan ne, meje rë xi nichuvan suvaan yojo naja cojo xcusun naja. Xi cuatjin nihña ne, cumasua naja cojo xcusun ndaja xi canihña suvaan, hisca sahmi nguyjë xi nutsejen xcusun xi sahmi xingueen.

⁵ Xingu xingu ngayaan ne, tjin naja xi chaan cjuacjintacun naja suvaan.

⁶ Xuta xi vutaya cjuandajyihí xi chja tsëhë Jesucristu ne, hacuaha meje rë xi cuisecoo me xuta xi tivicuya rë me jan cojo yëjë ni xcusun ndaja xi tjin rë me.

⁷ Xicavindachuun suvun rë yojo nuju ta Nina ne, cumaji cumandacha me. Xcusun xi nitjen ne, ha vëhë ni sacú naja.

⁸ Xuta xi fi tjengui me ndiya rë cjuatacun tsehen xi fehya yojo rë me ne, cuechú nixtin xi sacú chjí rë me xi yojo rë me jan ne, cjuehndu. Peru xuta xi fi tjengui me ndiya rë Hasen rë Nina ne, cuechú nixtin xi sacú chjí rë me xi Hasen rë Nina ne, sua rë me cjuahñu xatsë.

⁹ Sacuaha ngayaan ne, mijí rë xi nihñachuvan ngajñi rë yëjë ni cjuandaja xi tinihña ta, tsëhë xi hya xi cuechú jain nixtin rë ne, sacú chjí naja, sa xi scaa naja.

¹⁰ Vëhë xi nguyëjë rë xi tjin sa nixtin ne, ha tuxa meje rë xi nihña cjuandaja cojo yëjë ni me xi sacuaha xingueen tsëhë xi hacuaha mangucacun me cojo Jesucristu. Hacuaha meje rë xi nihña cjuandaja cojo ngayëjë ni xuta.

Sua Pablo conseju, hacuaha sua me Nina rë me cojo xuta Galacia

¹¹ Ngayujun ni ne, jnutsujun letra yehe vihi xi titsihindu nuju cojo hntsa suva!

¹² Xuta xi meje rë me xi ndaja cuichja xuta tsëhë me ne, me vëhë xi meje sahmi nuju me nguyjë xi xtí chuxin nuju. Cuatjin sahmi me, cojo sa xi tsajin cuatju me cjuañihí ngatsë rë xi chja me tsëhë cru rë Cristu.

¹³ Hisca me xi ti chuxin rë ne, vihndiin me tsëhë ley rë Moisés. Peru meje rë me xi xtí chuxin nuju, cojo sa xi cuaxëndaja me yojo rë me xi cuatjin camá cojo nuju.

¹⁴ Peru sacuaha ngahan ne, ngatsë ni rë cru rë Nai naja Jesucristu xi cuaxëndaja yojo naha. Cuatjin sahme, tsëhë xi ngatsë rë cru rë Cristu jan ne, sacuaha xi cahme ngasunhndë xi cuma ná ngahan, hacuaha ngahan ne, sacuaha xi cavéya xi cuma rë ngasunhndë.

¹⁵ Tsajin mé vengui chjí rë xi cati o xi catiin rë chuxin naja ta xi vengui chji rë ne, xi cuma ngayaan xuta xatsë.

¹⁶ Ngayujun ni xi tsangunndujun cojo cjuatacun xi sehe cachjá cojo nuju jan ne, Nina catisua nuju me cjuajeya cojo cjuayumatacun. Hacuaha cojo yëjë sa me xi má xuta ladu rë Nina ne, cuatjin catisua Nina me.

¹⁷ Nchujun ni nguini ne, mijí ná xi yo sua sa ná cjuandya ta, tsëhë xi yëjë yanda xi yaha yojo naha ne, vëhë tsingacun xi sahme xa rë Jesús sacuaha mosu hndixahan rë me.

¹⁸ Nai naja Jesucristu ne, catisua nuju me cjuandaja ngayujun ni. Cuatjin jain.

Carta xi catsingatju San Pablo tsêhê xuta nandya Efeso

Pablo tsihindu me xuta rê yungun

¹ Ngahan Pablo ne, apóstol tsêhê Jesucristu ngahan ta, tsêhê xi cuatjin camameje rê Nina. Tsingátju nuju carta vihi ngayun xuta nandya Efeso, ngayujun ni xuta ladu rê Nina xi jercu ndaja titsangunndujun cojo ndiya rê me.

² Nina Nahmi naja cojo Nai naja Jesucristu ne, catisua nuju me cjuandaja cjuajeya rê me xi cuma nuju.

Ximinchacun xi cachjahantsan tsêhê Cristu

³ ¡Nina ne, me vêhê xi Nina rê hacuaha nahmi rê Jesucristu me xi matitjun tsajan, jemu jyê hnga camahani me cojo hasen rê me! Me vêhê ne, ngatsê rê xi tsêhê Cristu ngayaan ne, catsinchacun naja me cojo yêjê ni xcusun cjuandaja xi siu tsja me.

⁴ Nihña jyê hnga Nina cojo hasen rê me ta hisca hya xi chajasa casahasen ngasunhdê ne, hya cavaxijin naja Nina ngatsê rê xi tsêhê Cristu ngayaan, hane ngatsê rê xi casahmi tsêhê me ngayaan ne, camatyjahi cjuatacun naja hacuaha tsajin xi cún naja. Hacuaha Nina cojo cjuahmutacun xi tjin rê me cojo naja ne,

⁵ vêhê xi ha tjin chjine rê me cjuatacun xi ngatsê rê mé xi casahmi Jesucristu ne, ngayaan ne, quihndi ndaja jain rê me má ngayaan. Cuatjin tjin cacun me xi cumá, cuatjin cavejñacacun me.

⁶ Cuatjin nihña jyê hnga me cojo hasen rê me tsêhê cjuandaja rê me. Jemu cavincha naja me cjuandaja ngatsê rê xi ngayaan ne, tsêhê Cristu yaan; hane Nina ne, hmuacun me Cristu.

⁷ Cojo jni rê Cristu xi cavanga hya xi cahme me, vêhê machji rê xi camandaya yaan tsêhê castigu xi satê naja, cavaxête rê cjuatsehen xi canihña, tucu cjuahmuacun rê me xi jercu jyê camahani.

⁸ Tjercu tu ndaja casahmi me cjuandaja cojo naja xi cavuxaha ndaja me cjuatacun naja xi vijnercun cjuá rê me ta,

⁹ casua camachaya naja tsêhê cjuatahahma xi tjin cacun me xi cumá, tsêhê cjuatacun xi cavejñangucacun suva me xi cumachihin.

¹⁰ Cjuatahahma vê ne, cumachihin hya xi cuetjucaa xi cuechu nixtin rê. Hya ne, Nina sahmitangun me ngu nguyêjê ni ngahma Cristu, me xi matitjun rê. Sahmitangun me yêjê xi siu ngahnga hacuaha yêjê xi siu nangu, hane sacuaha ngu ni cjuatacun cuma.

¹¹ Hacuaha ngatsê rê xi tsêhê Cristu ngayaan ne, Nina cavaxijin niji xi satê niji hitsê tsêhê mé xi satê rê Cristu ta, Nina sahmicihin me yêjê ni mé xi sua má rê me sacuahatjin ha cavejñacacun me xi cumá.

¹² Cuatjin casahmi me cojo sa xi ngayin xuta tjê rê Israel xi tjun tjun cavinechinyin rê xi nduva Cristu ne, nihña jyê hnga Nina cojo hasen rê me ngajñi rê yêjê ni mé xi nihña.

¹³ Hacuaha ngayun ni, hya xi canuhyun rê cjuaquixi cjuandajyihî xi chja hacutjin cuma cuetjuntjun tsêhê jyê nuju ne, camatangun cjuatacun nuju cojo Cristu. Hane sacuaha xi setaha sellu ngu xujun rê nangui xi tsejen xi quixi xi tsêhê me, cuatjin caveya Nina Hasen rê me sacuaha cavejña me cjuá xi sua nuju me, cojo sa xi tsejen xi tsêhê me yun.

¹⁴ Hane tsêhê xi hinchâ naja Hasen rê Nina ne, vêhê tsinguixi rê xi chjahanntsân yêjê xi cavejñacacun Nina xi cumá tsajan, tsinguixi rê xi sahmi ndaya me yaan tsêhê jyê naja, hane ngatsê rê vêhê ne, me vêhê cuma jyê hnga sa me cojo hasen rê me.

Pablo ne, fehya me Nina xi scuxaha me cjuatacun rê xuta xi ndaja macjain rê me Jesucristu

¹⁵ Hindê ta cuatjin catsinchacun Nina yaan ne, vêhê xi ngahan, hisca xi camachaya ná xi naxunndujun Jesucristu hane xi tjin nuju cjuahmutacun cojo yêjê ni xuta xi tsêhê Nina me,

¹⁶ suá cuaha nacuechji rê Nina ngatsê nuju. Hane yêjê ni hora xi tisahme oración naha, veyanangê nuju, chjayuma ngatsê nuju.

¹⁷ Fêhya rê Nina rê Nai naja Jesucristu, Nina Nahmi naja xi jemu hnga me cojo hasen rê me. Fêhya rê me xi sua me yun cjuatacun rê Hasen rê me cojo sa xi cuijnercun mé xi tsêhê me hane xi hitsê sa ndaja chun yo me.

¹⁸ Fêhya rê Nina xi scuxaha me cjuatacun nuju cojo sa xi cumachaya nuju tsêhê xcusun vêhê xi vetahan tacun ngatsê rê xi cavaxijin naja Nina. Xi machaya nuju xi jercu vatjutaha ndajyihî cjuatjo rê me xi cuatêcja me ngajñi xuta ladu rê me.

¹⁹ Hacuaha xi machaya nuju ta ngahña rê me ne, tsajin chuva rê ne, hane tacunntsaan. Hacuaha ngahña jan catsingacun me ta jemu hña cjuá.

²⁰ Catsingacun me chuva rē ngahñu jan hya xi catsicuya me cjuahñu rē Cristu tsēhē cjuaveya hane hacuaha hya xi casahmi jyē hnga me Cristu xi cavejña me cahndē ladu quixi rē me ngajan ngahnga.

²¹ Jercu hñu camahani cjuar rē Jesucristu xi cumá rē yējē ni hasen, yējē ni ángel, yējē ni rey hasen xi hacuaha vitexa ngajan sa xi nixtin quihndē o sa xi nixtin xi nduva ngascan. Hacuaha hitsē sa jyē hnga ñihi rē xa xi tacuntsja me.

²² Hacuaha yējē xcusun xi siu, Nina ne, caviyuju me ngahma gobiernu rē Cristu. Hacuaha ha Cristu nga ni, casua me xi cumá titjun me tsēhē yējē ni xuta rē yungun hane vitexa me xuta ladu rē Nina sacuatjin rē rcuun xi vitexa rē yojo naja.

²³ Hane sacuaa vitsojo cjuatacun rē rcuun ngajñi yējē yojo naja ne, cuatjin vitsojo Cristu ngajñi rē jinguyjē ni xuta yungun, hane cojo Cristu ne, majingu jinguyjē ni xcusun.

2

Ngatsē rē xi hmucacun naja Nina ne, cavaxētje naja me

¹ Hacuaa ngayun ne, catsingasca Nina cjuatacun nuju ta, titjun ne, camá ngayun sacuaa xi caveyun xi cumá rē Nina ngatsē rē xi canuhyuun tsēhē Nina hane canihñu cjuatsehen.

² Cavanguntengun cjuatsehen sacuaa xcusun rē xuta tsehen rē ngasunhndē. Canuhyun tsēhē rey xi hacui hasen tsehen xi vitexa rē yahnga hasen tsehen ngajan ngahnga, rey jan xi vitexa rē xuta xi vihndiin me tsēhē Nina.

³ Hacuaa ngayjē ni ngayaan ni, cuatjin xcusun naja hatsē. Canihña yējē cjuatsehen xi cafehya rē yojo jyē naja, xi masua rē xahasen naja. Tsēhē xi hatuxa xuta tsehen yaan, ngatsē rē vēhē ne, tacunya castigu xi cuma naja sacuaa yējē sa yahnga xuta.

⁴ Peru Nina ne, tjercu tu tjin rē me cjuayumatacun ngatsē rē xi jemu tu jyihi camahani cjuahmutacun xi tjin rē me cojo naja.

⁵ Hane handasa xi camá sacuaa xi caveyan ngayaan xi cuma rē Nina ta canuhyaan tsēhē me, peru hindē ne, sacuaa xi casacu naja cjuahñu xatsē tangun cojo Cristu. (Cjuaniyutacun rē Nina ne, vēhē casahmi xi cavaxētje nuju me tsēhē cjuatsehen xi canihñu.)

⁶ Hacuaa sacuaa catsicuya nga naja Nina cjuahñu tangun cojo Cristu hane casahmi jyē hnga me yaan xi cavejña me yaan cojo Cristu ngajan ngahnga ngatsē rē xi tsēhē Jesucristu yaan.

⁷ Cuatjin casahmi me cojo sa xi hisca nixtin xi sehe nduva ne, cumatsejen xi jercu vatjutaha cjuaniyētacun xi tjin rē me cojo naja, cjuaniyētacun vē xi matsejen ngajñi rē cjuahmutacun xi tsingacun me yaan ngatsē rē Jesucristu.

⁸ Cuatjin jan ne, cjuaniyētacun rē Nina ne, vēhē casahmi xi cavaxētje nuju me tsēhē jyē nuju hya xi camacjain nuju ta, hacuiin suvun cavinchusun chuva rē xi cavetjuntjun ta tsēhē xi Nina ne, tu cuatjo ni casua nuju me cahndē.

⁹ Hacuuiin tsēhē xi canihñu suvun xi jemu ndaja xi cavéchuntahun xcusun vē ne, ngatsē rē vēhē ne, hisca ngu xuta cumaji sahmi jyē me yojo rē me.

¹⁰ Ta sacuaijyihí ngayaan ne, Nina casahmi naja me. Hane ngatsē rē xi tsēhē Jesucristu yaan, vēhē xi catsindaja me ngayaan cojo sa xi ndaja nihña, sacuatjin xi ha cojo tjun sa cavejñacacun me xi má xcusun naja.

Ngatsē rē jni rē Cristu ne, ma vetjutje xutaxín

¹¹ Ngajan xi ninguitsjun ta, ngayun ne, xutaxín yun ta hacuiin tsēhē xuta tjē rē Israel catsin ngayun. Hacuaa xuta tjē rē Israel jan ta casahmi suva me sacuaa vitexa ley rē Moisés, me vēhē chja me tsujun ta, xuta xi catiin rē chuxin rē; hane chja me suva me ta, xuta xi cati rē chuxin rē.

¹² Hacuaa hya ne, hisca tsajin quitahatacun xi sacuse nuju Cristu. Casatiin nuju cahndē cojo xuta tjē rē Israel hacuaa casatiin nuju compromisu xi vetaha cacun me. Jemu va cavinechun cojo ngasunhndē nuju ta hacuiin vinga nuju Nina xi cjuaquixi.

¹³ Peru quihndē xi camá tsēhē Cristu yun, handasa xi hya jemu xin nechun xi cuma rē Nina, peru hindē casacu cahndē camatüña yun ngatsē rē jni rē Cristu xi cavanga hya xi cahme me.

¹⁴ Ta Cristu ne, me vēhē casahmi me xi cavisehen naja ngayjē ni cjuandaja cjuajeya. Hane xi cuatjin casahmi me ne, sa xuta tjē rē Israel yaan o sa xutaxín yaan, sacuaa ngu ni xuta má ngayaan. Ta hya xi cahme me, cafahaxin me cjuachan xi vetsuntaha naja.

¹⁵ Catsicjē me ngahñu rē ley rē Moisés cojo yējē ni cjuar xi vitexa jan. Hane cuatjin ne, tsēhē catsijo tjē rē xuta jan ne, tsajin sa cjuachan ta casahmitangun Cristu me xi sacuaa ngu ni xuta má me xi tsēhē me suva me. Cuatjin cavisehen me cjuandaja tsēhē xcusun xi cavetsutaha rē me titjun.

¹⁶ Hacuaha cuatjin casahmitangun me catsijo tjë jan xi cumá ngu ni hane tangun catsindajacacun me me jan cojo Nina ngatsë rê xi cahme me xcun cru. Hane cuatjin cavatëcja me cjuachan xi tjin ngajñi rê me jan.

¹⁷ Cuatjin camá xi canduva Jesucristu cachja me cjuandajyihi tsëhë cjuajeya cojo nuju ngayun xutaxín xi xín nechun xi cuma rê Nina, hacuaha cojo xuta nangui Israel xi tiña siu me xi cuma rê Nina.

¹⁸ Vëhë xi ngatsë rê mé xi casahmi Cristu hane cojo ngu ni Hasen rê Nina ne, xingu xingu ngayaan ne tjin naja cahndë cojo Nina Nahmi naja.

¹⁹ Vëhë xi ngayun ne, hindë hacuiin xutaxín yun hacuiin xín tujuhunyun ni xi cumá rê xuta rê Nina ta hindë ne, sacuaha camá ngu nangui nuju ngayujun ni hacuaha cojo rê me ne xuta rê Nina má ngayun.

²⁰ Cojo rê me ne, ngayun ne tangun ngayun sacuaha xihndë rê ngu yungun xi sehe tjunihgna rê. Xihndënaña rê ne, vëhë casahmi apóstol cojo profeta hya xi cachja me cjuá rê Nina. Hane Jesucristu ne, me vëhë má me ndyojo xi matitjun xi vejña yuju rê,

²¹ ta sacuaha ndyojo jan vaniji hai rê ndihya xi ndaja hñu cuejña xihndë rê xi cuijin, hacuaha ngatsë rê Jesucristu sacuaha ndaja setahacoo ngu xihndë ne, cuatjin vetahacoo Jesucristu xuta rê yungun hya xi scunihnga me xi cuma me sacuaha ngu yungun quicun xi camanchacun tsëhë me.

²² Hacuaha cuanitjin ngayun ne, cavinchajñi me yun sehe cojo yun cumá ngayun sacuaha yungun quicun jan rê Nina hiscan cuejña me.

3

Cjuá tsëhë xa xi sahmi Pablo ngajñi rê xutaxín

¹ Cuatjin camá xi ngahan Pablo ne, tejñaya ndavaya ngatsë rê xa rê Jesucristu, xa jan xi sahme ngajñi nuju xutaxín.

² Cuejña ni xi há machaya nuju tsëhë cjuaniyëtacun xi Nina cavincha ná me xi satë ná sahme xa ngatsë nuju ta,

³ Nina casua me camachaya ná tsëhë cjuatacun hma jan sacuaha xi ha catsíhindu nuju hitsë tsëhë.

⁴ Hane xi chutahayun tsëhë ne, mangutacun xi ngahan ne vijnercu cjuatahahma jan xi sahmicihin Jesucristu.

⁵ Cjuatacun jan ne, hatsëë nixtin tsajin yo camachaya rê tsëhë. Peru hindë ne, cojo Hasen rê me catsingacun me tsëhë xi cumachaya rê apóstol cojo profeta xi cavaxijin me.

⁶ Cjuatacun hma jan ne, cuatjin fi: Camá xi cojo cjuandajyihi rê Nina ne, xutaxín ne, fahatsja tangun me cuatjo rê Nina cojo xuta tjë rê Israel, hacuaha cojo me ngu xuta má me. Hacuaha ngatsë rê xi tsëhë Jesucristu me ne, hacuaha satë rê me compromisu xi vetahacacun xuta tjë rê Israel.

⁷ Sacuaha cjuatahaha vëhë ne, casatë ná ngahan xi sahme xa xi cuichja tsëhë. Cuatjin casatë ná ngatsë rê cjuaniyëtacun xi casua Nina ngahan xi cojo ngahñu rê me cuma.

⁸ Ngahan ne, handasa tsajin chuva rê xi ngahan sahme xi cuma rê xi sahmi tu yo sa yahnga xuta tsëhë Nina, peru casua ná Nina cjuaniyëtacun xi satë ná xa xi cuichjá cojo xutaxín xi cumachaya rê me tsëhë cjuanchina ndajyihi rê Cristu xi tsajin cojo chuva rê.

⁹ Hacuaha cavetahaxa ná Nina xi scuxáha cjuatacun rê xuta cojo sa xi cumachaya rê me cjuatacun hma jan. Nina, xi casahmi me yëjë ni ne, hisca ntsacu cavetsihin cavejñacacun hma me xi cuatjin cuma.

¹⁰ Cuatjin camá cojo sa xi nixtin quihndë ne, ngajñi xuta yungun rê Nina ne, tsingacun rê cjuahasen rê Nina, cojo sa xi yëjë ni hasen, yëjë ni ángel xi hacuaha vitexa ngajan ngahnga, machaya rê xi jemu cjín xcusun rê cjuahasen jan ta,

¹¹ cjuatacun jan ne, hisca ntsacu cavetsihin cuatjin cavejñacacun me, hane casahmicihin me cojo Cristu Jesús, me xi matitjun tsajan.

¹² Hacuaha ngatsë rê xi tsëhë Cristu yaan hane ngatsë rê xi mangutacun cojo me ne, rcuun nihña tiña tsëhë Nina cuinújan cojo me ta, tjin ngutacun xi sacu naja cahndë.

¹³ Vëhë xi cojo cjuatacun vëhë ne, cuichjá cojo nuju ta hacuiin nihñuchuvuntacun ngatsë naha ngahan xi choho tivatju tjiña tsëhë xa xi sahme ngatsë nuju, ta ngajñi rê xi cuatjin tivatju ngahan ne, hitsë sa tivaxëndaja nuju.

Cjuahmutacun xi tjin rê Nina

¹⁴ Cuatjin camá xi ngatsë rê vëhë ne, vixcuhnchëtaha xcun Nina nahmi rê Jesucristu me xi matitjun tsajan.

¹⁵ Yëjë ni tjë rê xuta o sa ángel, sa ngahnga o sa ngasunhndë viyuju me ne, faha ñihi me tsëhë Nina sacuaha tsëhë Nahmi rê me.

¹⁶ Nina Nahmi naja ne, tjemu tjin rë me ngahñu xi casahmi hnga hasen me ngajan ngahnga. Chjáhya rë me xi tucu chuva rë yějë cjuandaja rë me jan ne, sua nuju me xi cuiyujuhñu xahasen nuju cojo ngahñu rë Hasen rë me.

¹⁷ Hane ngatsë rë xi cuatjin macjain nuju Cristu ne, hacuaha cuejña cahndë me cahntsua xahasen nuju. Hane cjuahmutacun xi hinchu nuju ne, cuma sacuaha ngu tyjama xi sua nuju ngahñu hane tsuvangui nuju,

¹⁸ cojo sa xi hacuaha cuijnercunndujun ngayun cojo yějë yahnga xuta xi macjain rë me, ta tsajin hisca cjuë ta jemu tu jyë hnga cjuahmutacun xi tjin rë Cristu cojo naja.

¹⁹ Hacuaha cjuéhya xi sacuse nuju cjuahmutacun xi tjin rë Cristu cojo nuju, ngu cjuahmutacun xi jercu vatjutaha rë hisca tsajin chuva rë xi hatuxa hyan, cojo sa xi ma tsë rë cjuatacun nuju suva cojo yějë ni xi tsëhë Nina.

²⁰ Quihndë ne, catama jyë catama hnga Nina. Me vëhë cojo ngahñu rë me xi sahmixa ngajñi naja ne, hitsë sa cjin cuma sahmi me tsëhë xi cuma chjahyan o sa xi matacun xi ma sahmi me.

²¹ Catama jyë catama hnga me ngajñi xuta yungun rë me hacuaha ngajñi Jesucristu; catama jyë catama hnga me yějë ni nu yějë ni nixtin. Cuatjin jain.

4

Tjin tangun yaan ngatsë rë Hasen rë Nina

¹ Ngatsë rë vëhë ne, ngahan xi tejñaya ndavaya ngatsë rë xa xi sahme tsëhë Nina, ngahan fehya nuju xi tangun nduju cojo ngasunhdë nuju sacuaha meje rë xi sahmi me xi cavaxijin Nina, sacuahatjin ngayun xi catuxijin nuju.

² Tjin nuju cjuajeya hacuaha ninguijnu yojo nuju cojo xingun. Hacuaha jyëtacun xingu xingu yun cojo xingun ngatsë rë cjuahmutacun xi tjin nuju.

³ Nihñu ngu yějë xi yějë nixtin tjin tangun yun, cojo ngahñu rë cjuajeya xi sua Hasen rë Nina xi sahmi tangun nuju ngayun ngayujun ni.

⁴ Ngayaan ne, ngu ni yojo má yaan, hacuaha ngu ni má Hasen rë Nina. Hacuaha cuanitjin ne, ngu ni cjuaxi cuetaha tacun xi sacu naja cjuahñu xatsë, ngayaan xi cajindaya naja me.

⁵ Hacuaha ngu ni Jesucristu xi Nai naja, ngu ni cjuachacun xi macjain naja, hacuaha ngu cjuatacun ni xi xtenda yaan.

⁶ Ngu ni Nina Nahmi naja ngayejen ni. Hane Nina ne, matitjun me tsëhë ngayëjë ngarca ni ne, tsinguitsojo me jinguyë ni ngajñi yojo naja, hacuaha tacun me ngajñi naja.

⁷ Peru jimangu yaan ne, ha casua naja me cjuatjo cjuatacun xi satë naja xa xi nihña jimangu yaan, sacuaha chuva rë xi casua Cristu.

⁸ Vëhë xi xujun rë Nina chja cuitjin:

Hya xi camiji me ngahnga, hacuaha quiji cojo me xuta presu xi cafaha me.

Hane casua me cjuatjo xi cafahatsja xuta rë me.

⁹ ¿Hane mé vijne cjuaxi camiji me? Cjua vëhë ne, vijne xi titjun ne cajne me hiscan xi hitsë sa nangui tsëhë ngasunhdë.

¹⁰ Hane xi cajne jan ne, hacui ni me xi hacuaha camiji hiscan xi hitsë sa hnga tsëhë ngahnga, cojo sa xi jinguyë ni cuejña cahndë me.

¹¹ Ha me vëhë ni casua me cjuatjo cjuatacun xingu xingu. Casua me xi yahnga me ne, cumá me apóstol, yahnga me ne xi sua me xi cumachaya rë xuta cjuaxi cafahatsja me tsëhë Nina, hane yahnga nga me ne, cuichja me cojo xuta tsëhë cjuaxi cuaxëtje naja, hane yahnga nga me ne, pastor xi vicuya.

¹² Cuatjin cavëhëchjine me xuta rë me jan cojo sa xi xa xi sahmi me jan ne, cuisecoo rë xuta yungun xi sacu hñu rë me.

¹³ Hisca xi ngayejen ni ne, cuma tangun yaan cojo ngu ni cjuachacun xi macjain naja hacuaha cojo yějë cjuaxi machaya naja tsëhë me xi Quihndi rë Nina. Hane xi cuatjin cuma tangun yaan, cumacha yaan hane cuiyuju cahndë cjuatacun naja sacuaha tjin chihin yějë cjuatacun rë Cristu.

¹⁴ Hane sehe hacuiin tangun yaan cojo langa xi tsindeya cjuatacun rë hane fi tjengui ndiya rë tu mé ni cjuachacun xatsë sehe vixuya ngajñi cjuandacha rë xuta xi vincha haxi me.

¹⁵ Hitsë sa ndaja xi cuiñjan cjuaquixi ngatsë rë cjuahmutacun xi tjin naja cojo rë me cojo sa xi cumacha yaan cojo sa xi yějë ni xcusun naja cuma yaan sacuaha Cristu, me xi matitjun tsajan.

¹⁶ Hane ngatsë rë ngahñu rë me vëhë ne, yějë xuta xi macjain rë me Nina ne, ndaja yahangui xicjin me, sacuaha naxahñu naja ne, tsuvangui rë yojo naja, ngatsë rë xi hinchu xicjin. Hacuaha ngatsë rë xi jima ngu xuta jan ndaja sahmi me xa ne, ngu tangun ni cuma yehe me, hacuaha sacu hñu rë me ngajñi rë cjuahmutacun jan.

Xcusun xatsë xi casacu naja ngatsë rë xi macjain naja Cristu

¹⁷ Ha cuanitjin ne, sacuaaha tichjá cojo nuju cojo cjuar rë Nai naja Jesucristu xi quihndë hacuiin cuinechun sa sacuaaha siu xuta xi hvíin me yo xi Nina, ta me vëhë ne, siu me cojo cjuatacun jñu rë me xi tsajin me vetjuncaa.

¹⁸ Vijnircu me ta tsëhë xi tsajin rë me cjuahñu xi sua Nina ta, tsëhë xi taja rcu me ngatsë rë xi taja xahasen rë me.

¹⁹ Hacuaha cachaja cjuatacun rë me, hane casuatë me yojo rë me, vëhë xi jercu macacun me xi sahmi me yëjë xcusun cjuatsehen xi tjin ngasunhdë.

²⁰ Peru ngayun ne, hacuiin cuatjin camá nuju tsëhë Cristu

²¹ ta ngayun ne, hatuxa cachatayun jain tsëhë me, hacuaaha camá nuju tsëhë me, cojo cjuaquixi xi tjin rë Cristu.

²² Sacuaaha cjuatacun changá xi canduvuncujun ne, tejñuxun ta tsëhë xi vëhë xi tsitsehen cojo cjuandacha xi jercu matacun cojo.

²³ Meje rë cuma xatsë yun cojo cjuatacun nuju hacuaaha cojo hasen nuju.

²⁴ Hane nihñu tsujun cjuatacun xatsë xi ha tjin ndaja xi fayangui xcusun xi tsëhë Nina ta xcusun vëhë ne, tsingacun ngu cjuahñu xi hatuxa cjuaquixi hacuaaha tyjahi.

²⁵ Quihndë ta cuatjin ne, canújuun cjuandacha cojo cjuandesu ta, jima ngu yun ne, tinújun cjuaquixi cojo xingun tsëhë xi ngayëjë ni ngayaan ne, camatangun yaan ta ngu ni yojo má ngayaan.

²⁶ Handasa cjan nuju ne, cavinchun ngu jyë, hane cjuacjan jan ne, hacuiin xi cjuecani rë cuaha nixtin,

²⁷ hane hisca xi hitsë ne, caningatjuun rë xitsehen xi sahmi xi nihñu ngu jyë.

²⁸ Xuta xi catsichëjë me ne, catejñaxin me xcusun vëhë, hane catisahmi me xa nguñajacacun me cojo sa xi cuechutaha me yëjë xcusun xi machaja rë me. Hane hacuaaha cuma cuisecoo me xuta xi machaja rë.

²⁹ Canújuun cjuatsehen. Nújun ngu cjuar xi ndajyihí xi cuincha ndiya rë xuta xi cuiseñuju me cojo sa xi tsëhë me ndaja.

³⁰ Xi canihñuu xi cuma va rë Hasen rë Nina ta, cojo Hasen rë me jan ne, ngayun ne, casetaha nuju chuya xi tsingacun xi sacu nuju cjuahñu xatsë nixtin xi cuaxëtje nuju me tsëhë jyë nuju.

³¹ Hacuaha tiyujunxun yëjë ni cjuachan, yëjë ni cjuasuë, yëjë ni cjuahnga, yëjë ni cjuachjataha cojo yëjë sa xcusun cjuatsehen

³² ta cahndë rë vëhë ne, nihñu cjuandaja cjuajeya xingu xingu yun cojo xingun. Tjin nuju cjuayumatacun cojo xingun. Hacuaha ninchatuhun xingun sacuaaha catsinchataha Nina yun ngatsë rë Cristu.

5

Hacutjin meje rë xi cuiyuju xuta ladu rë Nina

¹ Ngatsë rë xi jemu hmucacun nuju Nina ta, tsëhë xi quihndi rë me yun, vëhë xi chjayunngun tsëhë me.

² Hane nechun cojo cjuahmutacun xi catsihmucacun naja Cristu hane hisca casua me yojo rë me ngatsë naja sacuaaha ngu tsánga ndajyihí xi cueya chu hane cuma tsëhë Nina sacuaaha ngu cuatjo xi chuya rë me.

³ Quihndë ta ngayun ne, tsëhë Nina yun ne, hisca xi caveyunnanguun cjuatsehen xi matacun cojo yojo jyë nuju ngajñi nuju. Caveyunnanguun hisca ngu sa cjuatacun chocun cojo cjuachan ta, ngayun ne, tsajin chuya rë xi nihñu xcusun vëhë.

⁴ Cavisiajmuun xcusun xi cjuasava, cojo cjuangarca cojo cjuaxcuehyu hya xi hacuiin mameje rë ta cahndë rë vëhë ne, tuhun nacuechji rë Nina.

⁵ Ha hyun ta xuta xi sahmi me cjuatsehen xi sahmi ngu xuta cojo ngu xi hacuiin tsëhë me, o sa ngajñi ni xihin me o ngajñi ni chjuun me o tu mé sa xcusun cjuatsehen jan o sa xi choho me, tangun cún me sacuaaha me xi faharcu me nina ndyojo hane sacuiin rë me cahndë hiscan sahmi gobiernu Cristu cojo Nina.

⁶ Cuidadu cojo sa xi tsajin yo xi cuindacha nuju cojo cjuangarca ta, hatuxa ngatsë rë cjuachocun xi cuicun vihi ne, vinduva castigu jyë xi sua Nina xi cuma rë xuta xi vihndiin tsëhë me.

⁷ Vëhë xi ngayun ne, caninguisunñuu cojo rë me.

⁸ Ta handasa xi hatsëë ne, ngayun cavinechun ngajñi jñu vë, peru quihndë xi tjin tangun yaan cojo Nai naja ne, camá hasen tsujun, hane nihñu sacuaaha sahmi xuta xi cama hasen cjuatacun rë me.

⁹ Ta tsëhë hasen jan ne, vetjucun xi jemu ndaja xuta jan hacuaaha tyjahi cjuatacun rë me, hacuaaha quixi me cojo xcusun rë me.

¹⁰ Nihñu xatitacun xi cuma nuju mé xi chuya rê Nina.

¹¹ Caninguisuunññuu cojo xcusun xi venguichjiin rêhê xcun Nina xi sahmi xuta xi jñu cjuatacun rê me. Hitsê sa ndaja ne, ningacun tsejen cjuatsehen vêhê ta,

¹² tsêhê xi cjuatsehen vêhê xi sahmihma me ne, hisca mijî rê xi cueyananguen ta sava tsejen.

¹³ Ta hya xi vetjucaa tsejen xcusun xi sahmihma me jan ne, matsejen ndaja xi hatuxa cjuatsehen.

¹⁴ Cuatjin ta hya xi vetjucaatsejen ne, ma quixi yêjê xcusun, sa xi cjuatsehen o sa xi cjuandaja. Vêhê xi chja cjuat cuitjin:

Ningascun rê cjuatacun nuju, ngayun xi catuhun rê cahndê xi cjuahajenda hane nduvunxun tsêhê xuta xi cachaja cjuatacun rê me, hane sehe Cristu ne, sua hasen nuju me.

¹⁵ Vêhê xi ngatsê rê yêjê ni cjuat vêhê ne, chjuhun chuvun hacutjin cuangun cojo ngasunhndê nuju, hacuiin nechun sacuaaha xuta xi jñu cjuatacun rê me, ta nechun sacuaaha siu xuta xi jemu chutaha cjuatacun rê me.

¹⁶ Chjavunvuhun hora nuju ne, tetjún cjuandaja ta nixtin vihi ne, jemu tjin cjuatsehen.

¹⁷ Vêhê xi hacuiin ngarca yun ta, nihñu xati tacun xi cuma nuju mé xi chuya rê Nina.

¹⁸ Hacuiin nihñu cjuachihi ta, vêhê ne, tsinguetsun rê cjuatacun nuju ne, hane cahndê rê xi ningatjuntuhun xi siuhun nandâ xi cuitexa rê cjuatacun nuju jan ne, tuhun cahndê xi Hasen rê Nina ne, cuitexa rê cjuatacun nuju.

¹⁹ Vêhê xi ngajñi cjuavisajmi nuju ne, teyunnangun cjuat rê salmo, cojo himno cojo yêjê sa xcusun xi sen xi tsêhê Nina, quitaha tisun ne, cojo vêhê ne, hacuaaha nihñu jyê nihñu hnga Nina cojo nguñajatacun.

²⁰ Hacuaaha tuhun nacuechji rê Nina Nahmi naja yasen ni tsêhê yêjê ni xcusun xi vatjun má, hane nihñu cojo ñihi rê Nai naja Jesucristu.

Hacutjin cuinechan cahntsua ndya naja

²¹ Ninguijnu yojo nuju cojo sa xi cuma chjuhuncun xingu xingu ngayun, cuatjin nihñu ngatsê rê xi chjuhun rcun Nina.

²² Ngayun yachjin ne, ninguijnu yojo nuju tinuhyun tsêhê xihin nuju ta, cuatjin vitexa Nai naja.

²³ Ta xihin nuju ne, vitexa nuju me sacuaaha rcun, cuanitjin sacuaaha Cristu vitexa rê yêjê xuta xi macjain rê me sacuaaha rcu me. Hane Cristu cavaxêtje me xuta yungun jan sacuaaha xi hacui yojo rê suva me.

²⁴ Cuanitjin ne, sacuaaha xuta yungun ne, vihndê me tsêhê Cristu ne, cuanitjin ni ngayun yachjin ne, yêjê xi nihñu xcun cjuahñu nuju ne, tinuhyun tsêhê xihin nuju.

²⁵ Hacuaaha ngayun xihin ne, nihmutacun chjuun nuju, sacuatjin Cristu ne, catsihmucaun me xuta rê yungun hane casua me yojo rê me ngatsê rê xuta jan.

²⁶ Cuatjin casahmi me cojo sa xi sahmi tyjahi me cjuatacun rê xuta yungun jan cojo sa xi cuma xatsê me, hane catsityjahi me cojo cjuat rê me sacuaaha má xi matyjahi cojo nandâ.

²⁷ Cojo sa xi cuma tsingacun suva me xi xuta yungun jan ne, cun tyjahi tyjahi me, ta hisca hitsê tsajin mé camâ chojyihî cjuatacun rê me.

²⁸ Vêhê xi ngayun xihin ne, meje rê xi nihmutacun chjuun nuju sacuaaha yojo nuju suvun ta, yo xi tsihmucacun chjuun rê ne, tsihmucacun suva yojo rê.

²⁹ Tsajin yo xi tsitjunngui suva yojo rê ta, hatuxa vangui me xi xinê me sehe sacuhñu rê yojo rê me, hacuaaha sahmi me cuidadu tsêhê. Hacuaaha Cristu ne, cuanitjin ni sahmi me cojo xuta rê yungun ta,

³⁰ tsêhê xi sacuaaha yojo rê me má xuta jan. Cuatjin ngayaan ta camâ yaan tsêhê yojo tsêhê ninda rê me casahmi me yaan sacuaaha xcusun rê suva me.

³¹ Ngatsê rê vihi ne, xihin ne, cuiyujun cha nahmi ra cojo naa rê cha, sehe cumatangun cha cojo chjuun ra, hane catsijo ni jan ne, cumatangun sacuaaha xi ngu ni yojo.

³² Vihi ngu cjuatacun xi jemu chja vinuhya rê peru hacuaaha jemu ndajyihî ta, chjá cojo nuju ta cjuat vêhê ne, tichja tsêhê Cristu cojo xuta yungun.

³³ Peru handasa cuatjin vijne cjuat vêhê ne, hacuaaha sahmi ngujoyê xi jimangu yun ne, nihmutacun chjuun nuju, sacuaaha yojo nuju suvun. Hane ngayun chjuun ne, mameje rê xi chjuhuncun xihin nuju.

6

¹ Ngayun quihndi ne, xi vitexa tsujun sacuaaha xuta xi macjain rê me Nina ne, tinuhyun tsêhê xutacha nuju ta, tsêhê xi cuatjin mameje rê ta,

² cuitjin chja cjuat tsêhê ley: “Chjuhuncun chjuhunjeyun nahmi nuju cojo naa nuju.” Hane cjuat rê ley jan, vihi xi tjun cachja Nina xi hacuaaha ticojo rê ngu cjuandaja xi hacui vi:

³ “Cuatjin nihñu cojo sa xi ndatjin cuinechun hacuaha jyë nixtin cjuecani nuju nguehe xcun cjuahñu nuju.”

⁴ Hacuaha ngayun nahmi ne, hacuiin xi tuhun xti rë quihndi nuju ta, xi hitsë sa ndaja ne, nichun hacuaha tinújuntuhun rë cojo cjuandaja cojo cjuajeya hacuaha ningacun rë xi cumacjain rë Nina.

⁵ Hacuaha ngayun xi nihñu xa handasa mosu xi cavatsë me yun ne, tinuhyun tsëhë patrón nuju nguehe xcun cjuahñu vihi, tjin ngutacun xi nihñu xa, hacuaha nihñu nguñajatacun, sacuaha xi tinihñu ngatsë rë Cristu.

⁶ Nihñu nguñajatacun, hacuiin suva hya xi tivutsejen nuju me cojo sa xi cuichja ndaja me tsujun ta, nihñu sacuaha meje rë xi sahmi mosu xi cachaha rë xi sahmi xa rë Cristu.

⁷ Nihñu nguñaja ni cjuasua, sacuaha xi tinihñu tsëhë Nina, hane hacuiin tsëhë ngu xuta.

⁸ Cuatjin nihñu ta, ha hyun ta yëjë xcusun ndaja xi nihñu ne, Nina ne, sua me chjí nuju.

⁹ Hacuaha ngayun patrón ne, ha chuva vëhë ni nihñu cojo mosu xi siu ntsun hane hacuiin cojo cjuachan ta, ninguitsun ta sa ngayun sa me vëhë ne, Nina siu tsja nuju me. Hane Nina ne, texta ni vutsejen naja me ngayëjë ni.

Xcusun ndaja xi sua Nina yaan xi cuisecoo naja xi nihña si cojo xitsehen

¹⁰ Sacuaha ngu sa cjuá xi cuichjá cojo nuju ngayun xingueen, cojo ngahñu xi sua me xi tjercu hñu camahani ne, tiyujuhñu cjuatacun nuju xi tjin tangun yun cojo Nai naja.

¹¹ Chjuhun yëjë ni xcusun xi siu ntsun xi casua Nina yun cojo sa xi cuiyujunhñu cjuatacun nuju tsëhë cjuandacha xi sahmi xitsehen xi matitjun ta,

¹² si xi nihña ne, hacuiin cojo ngu xuta ngasunhndë má ta, cojo jingu sa hasen tsehen xi matitjun hacuaha cojo yëjë xi vitexa rë ngasunhndë jñu vi cojo yëjë sa xi siu ngahnga.

¹³ Vëhë xi quihndë ne, chjuhun yëjë ni xcusun xi siu ntsun xi casua Nina yun cojo sa xi scaa nuju cuangun xcun hya xi nduva cjuacjintacun vë, hane handasa cuatjun vëhë ne, cuiyujunhñu cuaha cjuatacun nuju.

¹⁴ Cuiyujuhñu cjuatacun nuju sacuaha ngu sindadu xi tjin chjine cha. Nechun cojo cjuaquixi rë Nina ta, vëhë cumachji rëhë nuju sacuaha ngu cinturón xi cuetuhun cahntsua nuju. Hacuaha quixi yun cojo cjuatacun nuju ta, vëhë sahmi chjí rëhë nuju sacuaha chingá quicha rë sindadu xi cuetjo rë ndanisin rë cha.

¹⁵ Hacuaha tjin chjine yun cojo cjuá rë Nina xi chja tsëhë cjuajeya sacuaha tjin chjine cha sindadu xi vincha ntsacu cha zapatu.

¹⁶ Hacuaha cojo yëjë sa vihi ne, ndaja catamacjain nuju cojo sa xi cuma tsicangui rë yojo nuju hane tsicjë ngahñu rë cjuañihí xi sahmi si xitsehen cojo nuju, sacuaha sahmi ngu quichaté xi yahatsja sindadu xi tsicangui rë yojo rë cha.

¹⁷ Chjuhunntsun cjuaninchataha rë Nina xi vetahatacun xi cumachji rëhë sacuaha ngu cascu xi vaxëtje rë rcuun, hacuaha chjuhunntsun cjuá rë Nina sacuaha ngu espada xi sua nuju Hasen rë Nina.

¹⁸ Hacuaha quitaha tinihñu oración nuju yëjë ni hora. Tinújun hacuaha chjahyun rë Nina ngatsë rë Hasen rë Nina. Cojo sa xi cuma nihñu vihi, quitaha nechun cuidadu, hacuaha tinihñu oración nuju ngatsë rë yëjë xuta ladu rë Nina.

¹⁹ Hacuaha tinihñu oración ngatsë naha. Chjahyun xi Nina ne, sua sa ná me cjuá hya xi cuichjá, hane cuma cuichjá nguñajacacun cojo sa xi suá cumachaya rë xuta tsëhë cjuá ndajylhi rë Nina xi cuaxëtje rë xuta ta,

²⁰ ngatsë rë cjuá vëhë ne, Nina catsingatju me ngahan, hacuaha ngatsë rë cjuá vëhë ne, tejnaya ndavaya quihndë. Vëhë xi nihñu oración cojo sa xi cuma cuichjá cjuá vihi cojo xuta cojo yëjë ngahñu xi mameje rë.

Nina rë Pablo xi titsinguijnetaha me cjuá

²¹ Tiquico, xingueen, xi vinga ná hacuaha ndaja cjuinduju me cojo xa rë Nai naja ne, sua me vëhë xi cumachaya nuju tsëhë yëjë ni xcusun xi tivatju tijima, cojo tsëhë yëjë ni xcusun xi tisahme.

²² Vëhë xi tsingátju nuju me cojo sa xi cuichja me cojo nuju hacutjin nechin hane cojo vëhë ne, cuma suatacun.

²³ Hane Nina nahmi naja ne cojo Nai naja Jesucristu ne, catisua nuju me ngayun xingueen cjuandaja cjuajeya cojo cjuahmutacun ngajñi xi cumangutacun.

²⁴ Hane Nina ne, catsinchacuntihin me yëjë xuta xi hmucacun me Nai naja Jesucristu cojo ngu cjuahmutacun xi tsajin nixtin fëya. Cuatjin jain.

Carta xi catsingatju San Pablo xi cafahatsja xuta nandya Filipos

Cristu má me cjuahñu rè xuta xi macjain rè me

¹ Ngahan Pablo cojo Timoteo ne, sacuaaha mosu hndixahan rè Jesucristu ngayin. Ningatjin nuju ngu nina niji, ngayujun ni xi tséhë Nina ngayun, hacuaaha macjain nuju Jesucristu ndyá nandya Filipos. Hacuaaha cojo me xi matitjun tsujun sacuaaha obispos hacuaaha cojo me xi visecoo rè me ne, ningatjin nina niji tséhë me.

² Nina Nahmi naja cojo Jesucristu, me xi matitjun tsajan ne, catisua nuju me cjuandaja cjuajeya rè me.

Oración xi sahmi Pablo tséhë xuta xi macjain rè me Nina

³ Hya xi tsingátahacacun ngatsë nuju ne, suá nacuechji rè Nina.

⁴ Hya xi féhya rè Nina ngatsë nuju ngayujun ni ne, hatuxa tjin ná cjuasua ta,

⁵ tséhë xi ngayun ne, cuatjin visecun ná xi cumachaya rè xuta cjua ndajyihi tséhë Jesucristu. Cuatjin visecun ná hisca hya xi caféhë tjëngë nuju ne, hisca quihndë.

⁶ Cavetsihin casahmi ndajyihi Nina cjuatacun nuju. Véhë xi ngahan ne, tjin ngucacun xi cuatjincjin ni sahmi me hisca nixtin xi cuya Jesucristu.

⁷ Hacuaaha ndatjin xi cuatjin tsingátahacacun ngatsë nuju ngayujun ni ta, tséhë xi jemu vinga ná ngayun. Vinga ná ngayun ta, tséhë xi ngayujun ngarcun ni ne, cojo ngayun tinihñu tsë tsë xa xi casua ná Nina cojo cjuandaja rè me, quihndë xi tejñaya ndavaya nguehe, hora xi tisuá cjuaquixi naha cojo xutaxa rè, xi cjua ndajyihi tséhë Jesucristu ne, jemu ndaja camahani hacuaaha hatuxa cjuaquixi.

⁸ Hisca vëë jain me ta jemu meje cuinduva tjëngë nga nuju ta, tséhë xi ngahan ne, hmú cacún nuju ngayujun ni sacuatjin hmucacun nuju Jesucristu.

⁹ Féhya rè Nina xi cuma jyë sa cjuahmutacun xi tjin nuju, hacuaaha féhya rè me xi cuechutaha sa cjuatacun nuju,

¹⁰ cojo sa xi cuijnercun jarë xcusun xi ndatjin xi nihñu. Sehe ngajan xi cuma tyjahi xahasen nuju, hacuaaha ha café jyë nuju nixtin xi cuya nga Jesucristu ta,

¹¹ tséhë xi Jesucristu ne, ha casua nuju me cjuandaja xi cuma nihñu hacutjin xi cjuaquixi. Xi cuatjin ne, xuta ne, cjuaharcun me Nina hacuaaha jemu ndaja cuichja me tséhë me.

Cjuasua ne, caa rè fi xcun handasa vatju me cjuañihi

¹² Meje ná xi cumachaya nuju tsan, ta handasa cuitjin tejñaya ndavaya ne, hacuiin ndajintjin ta xuta ne, hitsë sa tijima chaya rè me cjua ndajyihi tséhë Jesucristu.

¹³ Hisca yëjë sindadu xi jiyahñu rè ngahan cojo yëjë ni xuta xi yahnga ne, vëë me xi tséhë xi jemu xuta rè Jesucristu ngahan ne, vëhë xi caveya ná me ndavaya.

¹⁴ Hacuaaha jemu cjin xingueen ne, tséhë xi camachaya rè me hacutjin vatju quihndë xi tejñaya ndavaya ne, hitsë sa mangucacun me cojo Nina. Hane vëhë xi macjiin cacun me xi chja me cjua rè Nina.

¹⁵ Quixi ta hacuaaha tjin xuta xi sua me machaya rè xuta cjua tséhë Jesucristu. Peru tséhë xi sahmi xín cacun me cojo ná, hacuaaha mijí rè me xi cjua naha cjuexcun, vëhë xi cojo me chja me. Peru yahnga nga me ne, cuatjin chja me ta, tséhë xi jemu tjin rè me cjuandaja.

¹⁶ Cuma cuinújan ne, me xi cuacun tjin rè cjuandaja jan ne, sua me machaya rè xuta cjua tséhë Jesucristu ngatsë rè cjuahmutacun xi tjin rè me cojo ná, tséhë xi ha vëë me ta Nina ne, casua ná me xa xi cuichjátë ngatsë rè cjua ndajyihi tséhë Jesucristu.

¹⁷ Peru me xi cuacun tjin rè cjuaxintacun jan ne, sua me machaya rè xuta cjua vëhë ngatsë rè xi meje sahmi yehe súvá me yojo rè me. Tsajin rè me ngu cjuatacun xi ndajyihi xi cuatjin chja me. Xi má rè me ne, ngahan ne, xi tejñaya ndavaya nguehe ne, cumacjincacun ngatsë rè xcusun xi tisahmi me.

¹⁸ Tsimii sahmi rè xi cuatjin cjuatacun rè me xi chja me cjua rè Nina, ¿há xi nguñajacacun me ne?, o ¿há xi hacuiin nguñajacacun me ne?, ndastu cuenda xi cjua tséhë Jesucristu ne, tijimachaya rè xuta. Vëhë xi jemu ndama ná.

¹⁹ Hya xi ha cuatju cjuacjintacun naha ne, hacuaaha ndaja cuma ná ta tséhë xi ha hvë ta hya cuma tsejen xi tsajin jyë naha. Cuatjin cuma ta tséhë xi tichjahyun rè Nina ngatsë naha, hacuaaha tséhë xi Hasen xi casua naja Jesucristu ne, cuisecoo ná.

²⁰ Jemu meje ná xi ngajñi rè yëjë ni xcusun xi sahme ne, tsajin mé xi sua sava ná. Hacuaaha meje ná xi cumacjiin cacún ngajñi rè tu mé ni cjuacjintacun, cojo sa xi xuta ne, hatuxa sahmi jyë hnga me Jesucristu ngatsë naha, sa xi tsimi ná xutaxa rè ne, o sa tsajin ne, sa xi tsiquehen ná me.

²¹ Peru jinguyëjê rê xi tejña cjuahñu ne, hatuxa meje sahme nguñajacacun yëjê ni hacutjin xi Jesucristu meje rê me. Hacuaha sa xi cueya ne, jemu ndaja tsahan.

²² O sa xi cuitejña sa cjuahñu ne, xa xi sahme ngatsê rê Jesucristu ne, ndatjin cuetju. Vêhê xi hisca hveen ne, jarê xi hitsê sa chuya ná, ¿há xi cueya ne?, ¿há xi cuitejña cjuahñu?

²³ Cuma cuinújan ne, jemu chja sacuse ná jarê xcusun xi ndatjin. Jercu meje cjuê tjëngê Jesucristu ngajan hiscan tacun me ta, jemu sa ndaja tsahan xi cuatjin.

²⁴ Peru hitsê sa mameje rê xi cuitejña cjuahñu ngatsê nuju.

²⁵ Tsêhê xi cajnecacún tsêhê cjuatacun vêhê ne, vêhê xi hvê ta cuitejña sa cjuahñu. Cuitejña sa cojo nuju ngayujun ni ne, cojo sa xi cuisé^{coo} nuju xi tuxaha sa cjuatacun nuju xi chutayun cjuachacun xi macjain naja, hacuaha hitsê sa ndaja cuma rê xahasen nuju tsêhê cjuah vêhê.

²⁶ Hacuaha hya xi cuinduvá cuitejña nga cojo nuju ne, cuinújan ta jemu ndaja Jesucristu, ngatsê rê xi cavêtju ndavaya.

²⁷ Nihñu yêjê ni hacutjin xi meje rê xi sahmi xuta xi ha macjain jain rê me cjuah ndajiyihî tsêhê Jesucristu. Cuatjin nihñu, cojo sa xi ndaja cjuah sacun ná tsujun, ¿há xi cuinduvá tjëngê nuju?, o sa tsajin ne, ¿há xi tejñataha jingu sa ladu? Peru meje cumachaya ná xi ngayun ne, tjin tangun cjuatacun nuju, hacuaha visecuun xingun xi nújun tjun ngatsê rê cjuah ndajiyihî xi macjain naja.

²⁸ Hacuaha meje cumachaya ná xi ngayun ne, rcuun camahani tsêhê xuta xi sahmi nuju me condra. Xi cuatjin rcuun ne, cuma tsejen xi Nina ne, tacun jain me cojo nuju. Hacuaha cuma tsejen xi cuechu nixtin xi Nina ne, tsingatju me xuta xi cuacun jan xcun ndihî, peru ngayun ne, cuaxêtje nuju me.

²⁹ Nina ne, ndaja casahmi me cojo nuju xi hacuini súvá xi cumacjain ni nuju Jesucristu ta hacuaha cuatjun cjuahñihî ngatsê rê xi macjain nuju me.

³⁰ Titjun ne, cahyun cjuahñihî xi cavátju camá. Quihndê ne, camachaya nga nuju xi ha cuanitjin ni tivátju tijima. Hacuaha ngayun ne, hacuanitjin ni tivatjun tijima quihndê.

2

Meje rê xi chjayanguen tsêhê Cristu sacuaha catsinguijne me yojo rê me

¹ Tjin rê xahasen nuju cjuasua ta, tsêhê xi tjin tangun cjuatacun nuju cojo Jesucristu. Tjin nuju cjuatacun ta, tsêhê xi me vêhê ne, hmucacun nuju me. Tjin tangun cjuatacun nuju cojo Hasen rê Nina. Hacuaha tjin nuju cjuahmutacun cjuayumatacun cojo xingun, xingu xingu ngayun.

² Quihndê ne, cojo sa xi cuma chihin cjuasua xi tjin rê xahasen naha ne, cuitjin nihñu. Nihñu tangun cjuatacun nuju cojo xingun. Hacuaha ngajñi nuju ne, nihmutacun xingun cojo ngu ni cjuatacun nuju.

³ Sa xi meje nuju xi suvun ni xi ndajiyihî cuatjun cuma ne, ndajin tjin. Hacuaha mijí rê xi nihñu yehe yojo nuju ta, xi meje rê ne, jeya ngayun. Hacuaha meje rê xi chutsujun xingun sacuaha xi hitsê sa vengui chjí rê me xi cumá nuju ngayun.

⁴ Mijí rê xi tsujun suvun ni cuinchunsun xi ndaja ta, hacuaha meje rê xi tinchunsun xi ndaja xi cumá rê jingu sa xuta.

⁵ Meje rê xi ningatuhuntacun sacuaha catsingatahacacun Jesucristu.

⁶ Me vêhê ne, handasa ha Nina me ne, peru hacuini casahmi jyê hnga me yojo rê me xi meje cuejña me sacuaha Nina ta,

⁷ cahndê rê vêhê ne, cavejñaxin me cahndê rê me xcun Nina, hane casahmicuenda me xuta camá me ngu xuta sacuaha yaan, cojo sa xi sahmi me yêjê ni hacutjin cuitexa Nina me. Hya xi ha camá me xuta ne,

⁸ cahndê me yêjê ni hacutjin cachja Nina, hacuaha catsingatihin me xi catsisava xuta me, hisca catsingatihin me xi catsiquehen xuta me xcun cru, sacuaha xi jemu jyê jyê rê me.

⁹ Vêhê xi Nina ne, hya xi catsicuya me Jesucristu cjuahñu ne, hya casahmi jyê hnga me Jesucristu, hacuaha ngu ni me vêhê xi jemu vengui chjí rê ñihî rê me.

¹⁰ Cuatjin casahmi Nina, cojo sa xi yêjê ni ángel, yêjê ni xuta, cojo yêjê ni xitsehen ne, cuechú nixtin xi cuixcuhnchi xcun Jesucristu xi cjuaharcun rê me.

¹¹ Hacuaha cuichja ta Jesucristu ne, hatuxa matitjun jain me. Xi cuatjin ne, cumatsejen xi Nina Nahmi naja ne, hatuxa jemu jyê hnga me cojo cjuatacun rê me.

Xuta xi macjain rê me Nina ne, tsejen xcusun rê me xcun yahnga xuta

¹² Sacuatjin ndaja canuhyun tsahan hya xi cavinechan cojo nuju, tsan ne, cuatjin hitsê sa nguñajatacun tinuhyun tsahan quihndê xi xín tejñataha. Hacuaha meje rê xi nihñu yêjê ni hacutjin xi chuya rê Nina ta, tsêhê xi me vêhê xi vaxêtje nuju me. Ndaja cuidadu cojo sa xi cumachihin cjuatacun vêhê.

¹³ Hacuaha scaa nuju nihñu cuatjin ta, tsêhê xi Nina sahmi me xi meje nihñu yêjê ni hacutjin xi chuya rê me, hacuaha sua nuju me ngahñu xi scaa nuju nihñu cuatjin.

¹⁴ Ngajñi rê yêjê ni cjuacjintacun xi tjin nuju ne, xi canújunjyuun cojo xingun xi chuyiin nuju, xi canujuun cuitjin cuatjin.

¹⁵ Xi cuatjin ne, tsajin jyê nuju hacuaha tyahi xahasen nuju. Cuma cuinújan ne, ngayun xi ha quihndi rê Nina ngayun ne, tsajin jyê nuju, xi nechun ngajñi rê xuta tsehen xuta ndajin xi siu ngasunhdê. Meje rê xi cumatsejen xi jemu ndaja ngayun ngajñi rê xuta tsehen,

¹⁶ xi tuhun machaya rê xuta cjuua ndajiyi xi sua naja cjuahñu xatsê. Cuatjin nihñu ne, cojo sa xi ndaja cuma ná ngatsê nuju nixtin xi cuya nga Jesucristu ta, tsêhê xi xi cuatjin ne, hya cumatsejen xi hacuiin tu mahya casahme ngahñu xi sahme hacutjin xi chuya rê Jesucristu, hacuaha hacuiin tu mahya casahme xá.

¹⁷ Ha ndasa tsiquehen ná xutaxa rê tsêhê xi ngahan cavisécoo nuju xi cumacjain nuju Jesucristu hacuaha cavisécoo nuju xi nihñu xa rê me, peru ndaja cuma ná. Hacuaha ndama ná xi ngayujun ni ne, casua nuju Nina cjuandaja rê me.

¹⁸ Ha chuya vêhê ni ne, ndaja catama nuju ngatsê rê cjuandaja vê, hacuaha ndaja catama nuju ngatsê naha.

Ejemplu xi sua apóstol

¹⁹ Sa xi meje rê Jesucristu, me xi matitjun tsajan, sacuatjin xi meje ná ne, tsingátju nuju Timoteo. Meje tsingátju nuju me cojo xati, cojo sa xi ngahan ne, hacuaha ndaja cuma rê xahasen naha, hya xi cuya nga me cojo cjuua hacutjin tivatjun tijima.

²⁰ Me vêhê tsingátju me ta, tsêhê xi tsajin sa ná ngu xuta xi vinga nuju sacuaha me vêhê. Me vêhê ne, jemu meje rê me xi ndaja cuatjun cuma.

²¹ Peru yêjê me xi yahnga ne, sahmi cuenda me cjuandaya rê suvá ni me, sahmi cuendaain me xa xi meje rê Jesucristu xi cumá.

²² Peru ha hyun xcusun rê Timoteo. Ha hyun ta hya xi cavisécoo ná me xi catihin cumachaya rê xuta cjuua rê Nina ne, cavisécoo ná me sacuaha visécoo ngu quihndi nahmi rê.

²³ Vêhê xi, xi tu sacú cumachaya ná mé xi cuátju cuma ne, me vêhê xi meje tsingátju nuju me.

²⁴ Hacuaha xi má ná ne, me xi matitjun tsajan ne, sua me cahndê xi cojo xati ne, cuinduvá tjéngê nuju.

²⁵ Peru xi má ná ne, hacuaha sahmi ngu jyê xi tsingátju nuju Epafrodito xingueen. Me vêhê ne, casahmi me coná xa, hane cojo me vêhê cacaa niji cojo cjuahngatacun rê xuta xi chohovêê naja. Hacuaha cavisécoo ná me sacuatjin xi meje nuju ngayun xi caningatjun me.

²⁶ Hane me vêhê ne, jemu tjin cacun me xi meje scuêê nuju me ngayujun ni ta, tsêhê xi choho camá rê me xi camachaya nuju cjuua xi hmu rê me.

²⁷ Hacuaha quixi xi jemu cama hmu rê Epafrodito. Ña meje cueya me. Peru cahmii me ta, tsêhê xi camayuma rê Nina me. Hacuaha camayuma rê Nina ngahan ta, tsêhê xi mijí rê me xi cuma jyê sa cjuachoho xi tivátju tijima.

²⁸ Vêhê xi cojo xati ne, tsingátju nuju Epafrodito, sehe cuma sua rê xahasen nuju xi chun nga me ngu ndiya. Hacuaha ngahan ne, cuma chuya hitsê cjuachoho xi tivátju tijima.

²⁹ Vêhê xi chjuhuntsun me cojo cjuasua, tsêhê xi me vêhê ne, hacuaha macjain rê me me xi matitjun tsajan. Hacuaha chjuhuncun yêjê ni xuta xi tangun cjuatacun rê cojo rê me.

³⁰ Me vêhê ne, tsêhê xi jercu casahmi me xa tsêhê cjuua rê Jesucristu ne, vêhê xi hitsê sa ne, cahme me. Handasa cavetaha tsavi me yojo rê me xi cavisécoo ná me ne, peru camacjaincun me xi cavisécoo ná me cahndê nuju ngayun.

3

Xcusun xi jemu vengui chjí camahani rê

¹ Quihndê tsan ne, catamasua rê xahasen nuju ngatsê rê me xi matitjun tsajan.

Ngahan ne, hacuiin ndya ma ná xi cúa tsihindu nga nuju cjuua xi ha cachjá cojo nuju ta, tsêhê xi cjuua vêhê ne, cuisécoo nuju xi tsajin yo tsinguetsun cjuatacun nuju xi macjain nuju Jesucristu.

² Nechun cuidadu cojo xuta machjiriin xi vindacha xi chja xi hachu meje rê xi xti yojo naja, sehe tsejen xi tsêhê Nina ngayaan.

³ Quixiin cjuua rê me ta ngayaan xi tsejen xi tsêhê Nina ngayaan. Hane Hasen rê Nina ne, visécoo naja xi ma chjahanrcun Nina, hacuaha nechun cjuasua ngatsê rê Jesucristu. Ha hyan ta hatuxa cumaji cuetjuntjen ngatsê rê xcusun xi cun ngayaan cojo xcusun xi nihña.

⁴ Peru sa xi cuatjin cuma cuetjuntjen suvaan ne, ngahan ne, hitsë sa tjin ná chuva rê xi cuétjutjê xi cumá rê xuta xi yahnga.

⁵ Ngahan ne, hacuaha cati ná xi cavéchu xi jyin nixtin, sacuaha xcusun rê xutachanga naha. Ngahan ne, tjê rê xuta nangui Israel ngahan. Hacuaha quihndindai cjin rê Benjamín ngahan. Ha tuxa xuta tjê rê Israel ngahan ta xutacha naha ne, hacuaha xuta tjê rê Israel me. Ngahan ne, tsêhê partidu fariseo ngahan hacuaha casahme yêjê ni hacutjin chja ley rê yungun naha.

⁶ Ngahan ne, jercu cavétaharcu xcusun rê xutachanga naha, hane vêhê xi hisca casuá cjuañihi xi cuma rê xuta xi macjain rê Jesucristu. Ngahan ne, tsêhê xi casahme sacuatjin chja ley rê yungun naha ne, vêhê xi camaji catsicaniji ná xuta hisca ngu jyê.

⁷ Xi catsingátahacacun hatsëê ne, jemu vengui chjí rê yêjê xcusun vêhê. Peru ngatsë rê Jesucristu ne, xi má ná quihndê ne, venguiin camahani chjí rê xcusun vêhê ta, cumaji cuaxëtje ná.

⁸ Hisca venguiin chjí rê yêjê sa xcusun, má ná ta, tsêhê xi jercu vengui chjí rê xi tjin tangun cjuatacun naha cojo Jesucristu, me xi matitjun tsajan. Ngatsë rê me vêhê ne, ngahan ne, cacandëxen yêjê ni xcusun, sacuaha xi chanden xtê, cojo sa xi ngahan ne, cuma tsêhê Jesucristu ngahan.

⁹ Hacuaha cuma tangun cjuatacun naha cojo rê me. Xi cuatjin ne, cjuê jyê naha, hacuiin ngatsë rê xi sahme hacutjin chja ley rê yungun ta ngatsë rê xi macjain ná Jesucristu. Nina ne, tsicjê me jyê naja ngatsë rê xi macjain naja Jesucristu.

¹⁰ Jemu meje ná xi ndaja cuma tangun cjuatacun naha cojo Jesucristu. Hacuaha meje ná xi cojo ngahan sacu ná ngahñu xi catsingacun Nina, hya xi camá catsicuya me Jesucristu cjuahñu. Sa xi meje rê Nina ne, ngahan ne, tsingatehen xi cuátju cjuañihi hacuaha hisca tsingatehen xi tsiquehen ná xuta ta, tsêhê xi cuatjin cavatju Jesucristu camá.

¹¹ Hane hya xi cueya ne, meje rê Nina xi hacuaha tsicuya ná me cjuahñu xi tejña ngajñi rê nima.

¹² Cjêê cuma chihin yêjê ni cjuatacun xi meje ná vê, hacuaha chaja sa cuma tyahi cjuatacun naha. Peru tisahme sa ngahñu, cojo sa xi cuma sahme chehen cjuatacun vêhê. Cuatjin sahme ta, tsêhê xi Jesucristu ne, ha casahmi tsêhê me ngahan.

¹³ Cúya cuichjá cojo nuju tsan ta, cjêê sahme chehen cjuatacun vêhê. Peru cuitjin meje sahme: tsicháya xcusun xi ha cavátju camá, hacuaha sahme ngahñu xi cuma sahme xcusun xi vengui chjí rê xi sehe nduva.

¹⁴ Tisahme ngahñu xi cuma sahme chehen xcusun vêhê, cojo sa xi sacú ná cuatjo xi sua ná Nina ngatsë rê xi macjain ná Jesucristu. Nina ne, cuaxijin ná me xi cuitejña ngajan ngahnga hiscan tacun me.

Meje rê xi tjin tangun yaan xi macjain naja Nina

¹⁵ Vêhê xi ngayaan xi ha ndaja macjain naja Jesucristu ne, meje rê xi cuatjin cuiyujun cjuatacun naja. Hane sa xi tjin yahnga ngayun xi hacuiin cuatjin cuiyujun cjuatacun nuju ne, Nina tsingacun nuju me hacutjin xi cjuaquixi.

¹⁶ Ndastu sahmi ngujyê xi nihña cuenda tsêhê cjuaquixi xi ha hyan ne, cuatjin meje rê xi nihña.

¹⁷ Vêhê xi meje rê xi nihña hacutjin xi sahme, tsan. Hacuaha tetuhunrcun xcusun rê xuta xi sahmi hacutjin xi sahme.

¹⁸ Ha jemu cachjá cojo nuju ta jemu cjin xuta xi condra me tsêhê cjuanda ndajiyi xi sua machaya naja hacutjin cahme Jesucristu xcun cru. Ña tijihnda xi tichjá nga ngu ndiya cojo nuju cjuanda vêhê.

¹⁹ Peru xuta xi sahmi me condra cjuanda ndajiyi vê ne, cjue me xcun ndihi. Cahndê rê xi cjuaharcun me Nina xi cjuaquixi ne, hitsë sa faharcun me tu mé ni xcusun xi chuya rê me. Cahndê rê xi cuma sava rê me tsêhê xcusun xi sahmi me ne, tu hitsë sa sahmi yehe me yojo rê me. Cuma cuinújan ne, tjin tangun cjuatacun rê me cojo cjuatacun rê ngasunhndê.

²⁰ Peru ngayaan ne, xuta tsêhê ngahnga ngayaan. Hacuaha ha nechayan rê Jesucristu, me xi matitjun tsajan, ta cuinduva me tsêhê ngajan xi cuaxëtje naja me.

²¹ Me vêhê tsindeya me yojo jyê naja xi tsajin mé machji rêhê, hane sahmi me sacuaha yojo rê suvá me xi jercu vengui chjí rê. Cojo ngahñu rê suvá me ne, sahmi me ta, tsêhê xi me vêhê matitjun me tsêhê yêjê ni xcusun.

4

Tahan cjuasua yêjê ni nixtin ngatsë rê Nai naja

¹ Vêhê xi sacuatjin xi ha macjain nuju me xi matitjun tsajan tsan ne, cuatjin tangun cojo ngasunhndê nuju. Jercu meje cuinduvá tjêngê nuju tsan. Jemu ma sua rê xahasen naha ta, tsêhê xi ngayun ne, tivangun nduju cojo cjuatacun nuju xi macjain nuju Jesucristu.

² Quihndé ne, féhya nuju ngayun Evodia cojo ngayun Síntique nihñu favor ne, ngu tangun ni catama cjuatacun nuju cojo xingun, sacuatjin meje rë xi nihña ngayejen ni xi tséhë me xi matitjun tsajan ngayaan.

³ Hacuaha ngaye xi ndaja compañeru naha ngaye ne, nihñi favor ne, tisecuee rë na xi cuacun vë, xi cuijnetaha si xi tisahmi na cojo xicjin na. Ta na xi cuacun vë ne, jercu casahmi na cojo ná xa, hya xi catihin camachaya rë xuta cju ndajiyihi tséhë Jesucristu. Hacuaha cojo cha Clemente cojo sa yahnga compañeru naha ne, cavisecoo ná me. Xuta xi cuacun vë ne, hatuxa sacú rë me cjuahñu xatsë ta, tséhë xi ha tséhë Nina me.

⁴ Ndaja catama rë xahasen nuju ngatsë rë xi tjin tangun cjuatacun nuju cojo me xi matitjun tsajan. Cúya cuichjá nga cojo nuju, ndaja catama rë xahasen nuju.

⁵ Meje rë xi cuma tsejen xi tjin nuju cjuandaja cojo yëjë ni xuta ta, tséhë xi me xi matitjun tsajan ne, ha tacun xati xi cuinduva nga me.

⁶ Ngajñi rë yëjë ni cjuacjintacun nuju ne, xi camacjintacun. Tinújun cojo Nina hacuaha chjahyun rë me cjuandaja rë me. Hacuaha tuhun nacuechji rë me. Cuatjin meje rë xi tuhun cumachaya rë Nina tu mé ni xi meje nuju.

⁷ Ngajan xi cjuajeya xi sua nuju Nina ne, vëhë cuetjo nuju, cojo sa xi cumacjintacun, xi tjin tangun cjuatacun nuju cojo Jesucristu. Sacuaha cjuajeya xi sua nuju Nina jan ne, hisca vijniircun ndandaja ta, tséhë xi jemu tu ndaja camahani cjuajeya vëhë.

Xcusun ndaja xi meje rë xi cuinchan cjuatacun naja

⁸ Quihndé tsan ne, nihñu tangun cjuatacun nuju cojo cjuatacun xi cuicun vihi: cjuatacun xi cjuaquixi, cjuatacun xi chjaharcun rë, cjuatacun xi ndatjin, cjuatacun xi tyjahi, cjuatacun xi ndacun, cjuatacun xi chuya rë xuta ndaja. Cuma cuinújan ne, tu jarë ni cjuatacun xi jemu ndaja o sa xi hatuxa tjin chuya rë xi chjaharcun rë ne, vëhë nihñu tangun cjuatacun nuju cojo.

⁹ Hacuaha nihñu yëjë ni hacutjin xi camá nuju hya xi cavicuyá nuju hacutjin meje rë xi nihñu. Peru hacuiin suvá cjuaxi cachjá cojo nuju ta hacuaha cojo xcusun xi casahme ngajñi nuju ne, cojo vëhë meje rë xi nihñu. Hane cuatjin ne, Nina xi sua naja cjuajeya ne, tacun me cojo nuju.

Cjuatjo tséhë xuta nandya Filipino xi cuma rë Pablo

¹⁰ Ngatsë rë me xi matitjun tsajan ne, jercu ndama ná ta, handasa jemu cavatju nixtin ne, hindé cavuyun caningatuhuntacun nga ngatsë naha. Hacuiin hatuxa canichayun ná ta, cuenda xi casacuinyiin nuju hacutjin cuma xi cuiseacun ná hisca quihndé.

¹¹ Hacuiin tichjá cojo nuju cuatjin ngatsë rë xi tjin mé xi ma chaja ná ta, ngahan ne, ha casacu ná chuya rë hacutjin cumangucacún cojo tu mé ni cjuacjintacun xi nduva.

¹² Sa yuma sa nchina ngahan ne, hatuxa mangucacún. ¿Há tjin xi sínë?, o ¿há tsajin xi sínë?; ¿há xi jercu tjin ná?, o ¿xi ma chaja ná?, tsimii sahmi rë ta ngahan ne, ha catuxaha cjuatacun naha xi cumangucacún cojo tu mé ni cjuacjintacun xi nduva.

¹³ Scaa ná cojo tu mé ni cjuacjintacun ta, tséhë xi Jesucristu ne, tisua ná me ngahñu.

¹⁴ Peru, jemu ndaja canihñu xi caviseacun ná ngajñi rë cjuañihi xi tivátju tijima.

¹⁵ Ngayun xuta nandya Filipino ne, ha hyun ta hya xi tjutjun casuá camachaya nuju cjuandajiyihi tséhë Jesucristu hacuaha sehe cavétju tséhë distritu Macedonia ne, hisca nguyungun cavisecaaain ná cojo tujún hya. Suvun tutu xi caviseacun ná.

¹⁶ Hacuaha hya xi tejñataha ngajan nandya Tesalónica ne, ngu jo ndiya ne, caningatjun tujún tséhë cjuachaja xi tjin ná.

¹⁷ Hacuiin jercu meje ná cjuandaja xi ningatjun ná ta xi hitsë sa meje ná ne, xi sacu nuju cjuandaja rë Nina ngatsë rë cjuandaja xi nihñu.

¹⁸ Ha cafahántsya yëjë ni xi caningatjun ná cojo Epafrodito. Vëhë xi ha tjin ná yëjë ni xi mameje ná. Hisca vangui sa xi tjin ná. Cuatjo nuju vë ne, tangun cojo ngu cuatjo xi ndaja jne, xi vejña xcun ngasuncun. Hane Nina ne, fahatsja me cuatjo jan ta jemu chuya rë me tséhë.

¹⁹ Hacuaha Nina naja ne, tséhë cjuanchina ndajiyihi xi tjin rë me ne, hatuxa sua nuju me tu mé ni xi machaja nuju, ngayujun ni xi tjin tangun cjuatacun nuju cojo Jesucristu.

²⁰ Quihndé ne, catichja xuta ta Nina Nahmi naja ne, jercu ndaja camahani me yëjë ni nu yëjë ni nixtin. Cuatjin jain.

Cjuaxi vijnetaha

²¹ Yëjë ni xuta xi tjin tangun cjuatacun rë cojo Jesucristu ndyá ne, tuhun rë me nina naha. Hacuaha xingueen xi siu cojo ná nguehe ne, tsingatju me ngu nina nuju.

²² Hacuaha cojo sa yëjë me xi tséhë Nina, hisca cojo me xi siu ngajan ndava me xi matitjun camahani tséhë xuta Roma ne, tsingatju me nina nuju.

²³ Cjuandaja rë Jesucristu, me xi matitjun tsajan ne, catejña cojo nuju.

Carta xi catsingatju San Pablo xi cafahatsja xuta ladu rë Jesucristu ngajan nandya Colosas

¹ Ngahan Pablo ne, apóstol tséhë Jesucristu ngahan ta, tséhë xi cuatjin camameje rë Nina. Ngahan cojo Timoteo xingueen ne,

² ningátjin nuju carta vihi ngayun xuta nandya Colosas, ngayujun ni xuta ladu rë Nina xi jercu ndaja titsangunndujun cojo ndiya rë me hacuaha tjin tangun cjuatacun nuju cojo Jesucristu. Nina Nahmi naja ne, catisua nuju me cjuandaja cjuajeya.

Sua Pablo nacuechji rë Nina ngatsë rë xuta nandya Colosas

³ Jercu tihín nacuechji rë Nina Nahmi rë Nai naja Jesucristu yasen yasen ni, hya xi nihñi oración ngatsë nuju.

⁴ Tihín nacuechji rë Nina ta camachaya niji hacutjin xi ngayun ne, mangutacún cojo Jesucristu hacuaha nihmutacún yëjë ni xuta ladu rë Nina.

⁵ Cuatjin tihñu ta, jercu vetuhun tacún cjuandaja xi Nina tacunxin rë me ngajan ngahnga xi cuma nuju ngayujun ni. Cavetsuhun cavetuhun tacún cuatjin, hatsë hya xi canuhun cjuandajyih xi cjuaquixi, xi chja tséhë Jesucristu.

⁶ Cjuandajyih jan ne, casacu camachaya nuju sacuatjin sa rë yahnga xuta tséhë jercu cjín sa cahndé. Hane xi macjain rë xuta cjuandajyih jan ne, jercu tisahmi me cjuandaja, hacuaha jercu cjín sa xuta tijimacjain rë me. Cuanitjin tivatju ngajñi nuju ngayujun ni, hisca hya xi camachaya nuju cjuaja jan hacuaha ndaja cavjnercun xi Nina ne, jercu sahmi me cjuandaja.

⁷ Cuatjin cachja cojo nuju Epafras, me xi jercu vinga niji hacuaha tangun fahacuenda me cojo niji xa xi vitexa Jesucristu. Me vëhé ne, jercu ndaja cjuinduju me tifahacuenda me tséhë xa jan cojo sa xi tsujun ndaja.

⁸ Hacuaha casua me camachaya niji xi ngayujun ni ne, tjin nuju cjuahmutacun cojo yëjë ni xuta ladu rë Nina, cojo cjuahmutacun xi sua nuju Hasen rë Nina.

⁹ Ngatsë rë xi cuatjin camachaya niji tséhë cjuaja xi chja tsujun ngayujun ni ne, vëhé xi tihñi oración tsujun ngayujun ni yasen yasen ni hisca hya xi camachaya niji. Tichjahyin rë Nina xi cuijnercun yëjë hacutjin xi meje rë Nina xi nihñu. Tichjahyin rë me xi ndaja tuxaha cjuatacun nuju hacuaha cuijnercun cojo cjuatacun xi sua nuju Hasen rë Nina.

¹⁰ Cuatjin tichjahyin rë me, cojo sa xi ngayujun ni ne, cuangunndujun cojo ngasunhndë nuju sacuatjin meje rë xi sahmi xuta ladu rë Nai naja, cojo sa xi chuya rë me tséhë yëjë ni xi nihñu. Cuatjin tichjahyin rë me, cojo sa xi ngayujun ni ne, nihñu yëjë ni xcusun cjuandaja, hacuaha ndaja sa chun Nina ngu nixtin ngu nixtin.

¹¹ Nina catisua nuju me ndaja cjín ngahñu, tucu ngahñu xi tjin rë me, cojo sa xi yëjë ni nixtin scaa nuju cojo yëjë ni xcusun xi vatjun má hacuaha nijyun tacún cojo xuta, táha tijimasua nuju.

¹² Cuatjin tichjahyin rë Nina, cojo sa xi ngayujun ni ne, tuhun nacuechji rë Nahmi naja ngatsë rë xi me vëhé ne, cavëhéchjine nuju me cojo sa xi cojo ngayun satë nuju cjuandaja xi sua me xuta ladu rë me ngajan ngahnga.

¹³ Nina Nahmi naja ne, cavaxëtje naja me tséhë xitsehen xi matitjun tséhë yëjë ni cjuatsehen, hane cavejña naja me tsja Quihndi rë me xi jercu hmucacun me.

¹⁴ Cojo xcusun xi casahmi Quihndi rë me jan ne, Nina ne, cavechjitje me yëjë ni jyë xi quitjen xuta, hane catsinchataha me ngayaan.

Sahmi Nina xi cuya cumandaja ngayaan cojo rë me

¹⁵ Quihndi rë me jan ne, tsingacun naja hacutjin xcusun rë Nina cojo Hasen rë me, handasa maji matsejen Nina. Quihndi rë me jan ne, hatuxa matitjun me tséhë yëjë ni xi casahmi Nina ta,

¹⁶ tséhë xi cojo me ne, Nina ne, casahmi me yëjë ni xi tjin ngasunhndë xi tsejen, cojo yëjë ni xi tjin ngahnga xi matsijin, sacuaha yëjë ni xcusun hasen xi matitjun sa hasen ndaja sa hasen tsehen. Cojo me vëhé ne, casahmi Nina yëjë ni, cojo sa xi yëjë ni xi cuacun jan ne, sahmi jyë sahmi hnga rë me.

¹⁷ Quihndi rë me jan ne, hatuxa matitjun me tséhë yëjë ni xi casahmi Nina ta, tséhë xi me vëhé xi tjun sa tacun me xi cuma rë yëjë ni hacuaha ngatsë rë me vëhé ne, siuchihin yëjë ni.

¹⁸ Me vëhé ne, vitexa me xuta ladu rë Nina sacuatjin rë rcuun xi vitexa rë yojo naja. Hacuaha sua me cjuahñu xatsë xuta ladu rë Nina ta, tséhë xi me vëhé tjun tjun me cavuya me cjuahñu tséhë ngajñi rë yëjë nima, cojo sa xi cumatitjun camahani me.

¹⁹ Quihndi rë Nina jan ne, tsingacun naja hacutjin xcusun rë Nina cojo Hasen rë me ta, tsêhë xi cachuya rë Nina xi cuisehentë me cuejñacahndë suvá me cahntsua xahasen rë Quihndi rë me.

²⁰ Nina Nahmi naja ne, cavejña naja me tsja Quihndi rë me, tsêhë xi cavejñangucacun me xi cojo Quihndi rë me ne, tsicuya me ladu rë me ngayëjë ngarca ni, sa ngahnga sa ngasunhndë, cojo sa xi cumajë cumahnga Quihndi rë me jan. Hane ngatsë rë jni rë Quihndi rë me xi cavanga xcun cru ne, hindë tsajin mé cjuachan.

²¹ Ngayujun ni ne, handasa hatsëë ne, jemu cjin nechun tsêhë Nina hacuaha condra nuju me ngatsë rë xi jemu tsehn cjuatacun nuju hacuaha jemu tsehn xcusun xi canihñu,

²² peru quihndë ne, casahmi Nina xi cavuya nga camandaja yun cojo rë me. Cuatjin casahmi me cojo cjuaveya tsêhë yojo rë Quihndi rë me, cojo sa xi ngayujun ni ne, tsêhë me yun hacuaha tsajin camahani jyë nuju, hya xi squindaya nuju me xi cuangun xcun me.

²³ Cuatjin cuma sa xi cjuanduju xi siu cahndë cjuatacun nuju xi macjain nuju cjuandajyihni xi chja tsêhë Cristu, hacuaha cjuanduju xi vetuhun tacún cjuandajyihni xi canuhyun jan. Hane cjuandajyihni jan ne, casacu camachaya rë xuta tsêhë jercu cjin cahndë. Hane ngahan Pablo ne, casatëxa ná xi suá machaya rë xuta cjuandajyihni jan.

Casuxa Nina Pablo xi cuichjatë me cjuatahahma ndajyihni xi chja tsêhë Jesucristu

²⁴ Quihndë ne, ma sua ná xi tivátju cjuañihni cojo sa xi tsujun ndaja. Tisahmechehen tsêhë yëjë ni cjuañihni xi cachja Cristu xi cuátju cuma cojo yojo naha, cojo sa xi tsêhë xuta ladu rë me ndaja, hane ngayejen ni xi ladu rë me ne, sacuaha yojo rë me ngayaan.

²⁵ Ngahan ne, camá ngahan ngu xuta xi visécoo rë xuta ladu rë Cristu, tsêhë xi Nina casuxa ná me xi cuisécoo nuju ngayun xutaxín, cojo sa xi suá cumachaya nuju tsêhë yëjë ni cjuandajyihni xi cachja me.

²⁶ Cjuandajyihni jan xi cachja me ne, hacu cjuatahahma. Cjua vëhë ne, cavetjo Nina tsêhë yëjë ni xuta xi caviyuju me yëjë ni nixtin xi cavatju, peru quihndë ne, casua me camachaya rë yëjë ni xuta ladu rë me.

²⁷ Nina ne, cavejñangucacun me xi sua me cumachaya rë xuta xi cuacun jan xi cjuatahahma vihi ne, chja xi jercu tsinchacuntihin Nina xutaxín jan. Cuma cuinújan ne, Cristu ne, cuejñacahndë me cahntsua xahasen nuju ngayun xutaxín. Hane cuetuhun tacún xi sehe cuaxëndaja me yun.

²⁸ Ngayin ne, tihín cumachaya rë xuta tsêhë cjua xi chja tsêhë Cristu. Yëjë ni xcusun xuta ne, viyijin me cuidadu hacuaha vicuyin rë me cojo yëjë ni cjuahasen xi tjin nihi. Cuatjin nihni, cojo sa xi yëjë ni xuta xi cuacun jan ne, tyahi camahani me xi tjin tangun cjuatacun rë me cojo Cristu, hya xi ningacuin me xcun Nina.

²⁹ Ngatsë rë vëhë ne, ngahan ne, hacuaha hñu tisahme xa, hacuaha tisahme ngahñu cojo yëjë ni ngahñu xi tsua ná Cristu.

2

¹ Hacuaha meje ná xi cumachaya nuju xi jercu tisahme ngahñu ngatsë nuju cojo ngatsë rë me xi siu ngajan nandya Laodicea cojo tsêhë yëjë sa me xi cjëë scuëë ná.

² Cuatjin sahme, cojo sa xi ngayujun ni ne, sacú hñu rë xahasen nuju ngatsë rë xi tjin tangun cjuatacun nuju cojo xingun cojo yëjë ni cjuahmutacun. Hacuaha cuatjin sahme, cojo sa xi sacúndaja cumachaya nuju hacuaha jercu ndaja camahani cuijnercun cjuatahahma ndajyihni rë Nina, xi chja tsêhë Cristu.

³ Cristu ne, suvá ni me vëhë cuma sua naja me cjuatacun xi jercu ndaja cuijnercun yëjë ni cjuatahahma ndajyihni jan.

⁴ Cuitjin tichjá cojo nuju, cojo sa xi tsajin yo cuma cuindacha nuju cojo cjua xi matanguaain cojo cjua xi cjuaquixi, handasa jercu ndaja nuhya rë, xi má nuju.

⁵ Handasa tsajin tejñataha cojo nuju ne, peru jercu vityangë cacún tsujun ngayujun ni. Hacuaha ma sua ná, tsêhë xi hvë xi ngayujun ni ne, tjin tangun cjuatacun nuju cojo xingun hacuaha jercu ndaja mangu tacún cojo Cristu.

Vitexa Pablo xi nihña sacuatjin meje rë xi sahmi xuta ladu rë Jesucristu

⁶ Vëhë xi, sacuatjin xi camacjain nuju cjuandajyihni xi chja tsêhë Jesucristu, me xi Nai naja ne, cuatjin tángunndujun cojo ngasunhndë nuju xi tjin tangun cjuatacun nuju cojo rë me.

⁷ Catjinduju xi ndaja macjain nuju cjua jan, hacuaha ndaja sa catamacjain nuju ngu nixtin ngu nixtin. Catjinduju xi siu cahndë cjuatacun nuju cojo cjuachacun xi macjain naja, sacuatjin cavicuya nuju Epafras. Hacuaha catjinduju xi jercu tuhun nacuechji rë Nina Nahmi naja.

Tsavi cojo ngu cjuachacun xatsë xi vicuya xuta ndacha

⁸ Nechun cuidadu, sá tu yo sahmi xi cuisuhun ladu rë ngatsë rë xi cuindacha nuju cojo ngu cjuachacun xi venguin chji rë, tsêhë xi cjuachacun jan ne, nduva tsêhë xcusun rë

xuta ngasunhndé ni, hacuaha tséhé suvá ngasunhndé vihi yějé ni cjuá rě jan, hacuini tséhé Cristu.

⁹ Nihñu cuidadu ta, yějé xcusun rě Nina ne, tjin Cristu, ta Nina ne, vejñacahndé me yojo rě Cristu,

¹⁰ hacuaha ngayun ne, tsajin mé xi chaja rě hasen nuju, tséhé xi tjin tangun cjuatacun nuju cojo Cristu, me xi matitjun camahani tséhé yějé ni hasen xi hacuaha vitexa, sa hasen ndaja sa hasen tsehen.

¹¹ Ngatsé rě xi tjin tangun cjuatacun nuju ngayujun ni cojo rě me ne, ha sacuaha xi me vėhė cavatė me chuxin nuju. Hane vėhė ne, hacuini vijne xi cati jain chuxin nuju sacuaha sahmi xuta cojo quihndi langa ta xi vijne jan ne, yějé ni cjuatsehen xi tjin naja cojo yojo naja ne, cavaxėxin camahani Cristu.

¹² Hya xi caxtenda ngayun ne, ha sacuaha xi caveyun ne, hacuaha Nina caveyaniji nuju me tangun cojo Cristu, sehe catsicuya nuju me cjuahñu nga cojo rě me, ngatsé rě xi camangu tacun cojo ngahñu rě Nina, me xi catsicuya rě Cristu cjuahñu tséhé ngajñi rě yějé nima.

¹³ Hatsėė ne, ha sacuaha xi nima má ngayun ngatsé rě jyé nuju hacuaha ngatsé rě yějé cjuatsehen xi tjin nuju cojo yojo nuju. Peru quihndé ne, ngayujun ni xi catsicuya nga nuju Nina cjuahñu tangun cojo Cristu, Nina ne, catsinchataha naja me cojo yějé jyé naja.

¹⁴ Cuma cuinújan ne, sacuaha xi cavujnu Nina cjuá xi hincha xcun xujun xi tsicaniji jyé naja. Sacuaha xi catsicjėya me xujun jan, hya xi cahme Cristu xcun cru.

¹⁵ Nina ne, cakahaxin me xa xi siutahá yějé ni hasen ndaja cojo hasen tsehen xi cavitexa, hane catsingacunté me xi cuatjin casahmi me. Caca rě me cavinchangahma me hasen xi cuacun jan, cojo yějé ni xi casahmi Cristu.

¹⁶ Xicachasuun tséhé xuta xi tsicanijijyé me ngayun ngatsé rě xcusun xi chinu o xi hyun, o ngatsé rě suhi xi nihñu, há chuva nu, há chuva sá, o há chuva totje.

¹⁷ Xicachasuun ta yějé ni xcusun xi cuacun jan ne, sacuaha tjahnguen ni rě yějé ni cjuandaja xi casua nuju Cristu.

¹⁸ Xicachasuun tséhé xuta xi cuatjin tsicanijijyé nuju me xi chja me xi hatuxa meje rě xi ninguijnu yojo nuju hacuaha chjuhuncun ángel. Xuta xi cuacun jan ne, chja me xi chja xu niñá cojo rě me hacuaha sahmi yehe me yojo rě me suvá me ngatsé rě cjuatacun tsehen xi vitexa rě me.

¹⁹ Cuatjin sahmi me ta, vicuyaa in me cjuachacun cjuaquixi tséhé Cristu, me xi sahmi xi cumatangun cjuatacun rě yějé ni xuta ladu rě Nina cojo xicjin hacuaha sahmi xi cuijin xcun xi cjuandaju me cojo ndiá rě Nina sacuatjin xi meje rě Nina.

²⁰⁻²¹ Ngayujun ni ne, ngatsé rě xi tjin tangun cjuatacun nuju cojo Cristu, me xi cahme ne, vėhė xi camandaya ngayun tséhé xcusun rě xuta ngasunhndé, sacuaha mandaya ngu xuta tséhé yějé ni cjuandya rě me hya xi hme me. Vėhė xi mijí rě xi cuanguntjengun xcusun rě xuta xi chja xi cumaji chjahan vihi, cumaji xinėė vėhė, cumaji nicojon xingu vė, sacuaha xi tuxa sahmi ngujyé xi cuinuhyun jan.

²² Mijí rě xi cuanguntjengun xcusun xi cuacun jan ta, tséhé xi xichiné cojo xi hyun ne, hatuxa fė hya xi nicojo rě. Hacuaha xcusun xi cuacun jan ne, nduva tséhé cjuá xi vitexa xuta ngasunhndé ni, nduva tséhé cjuá xi vicuya xuta ngasunhndé ni.

²³ Hacuaha xcusun xi cuacun jan ne, sahmi xi xuta ne, sahmi me yějé ni xi meje rě cjuatacun tsehen xi vitexa rě me, handasa tsejen sacuaha xcusun ndaja, ngatsé rě xi vitexa naja xi chjahanrcun nina sacuatjin meje rě xuta ngasunhndé ni hacuaha xi ninguijne yojo naja hacuaha xi chjahanñe cojo yojo naja. Peru xcusun xi cuacun jan ne, vitexain camahani xi nihña cjuandaja.

3

Catamameje naja yějé ni xi tséhé ngahnga

¹ Ngayujun ni ne, casua nuju Nina cjuahñu xatsé, ha sacuaha xi catsicuya nuju me cjuahñu tangun cojo Cristu. Vėhė xi yějé ni hora ne, catamameje nuju yějé ni xi tséhé ngahnga, hiscan tacun Cristu, me xi Nina casahmi jyé casahmi hnga rě xi cuitexa me ngayějé ni.

² Catamameje nuju yějé ni xi tséhé ngahnga, hacuini cjuatsehen xi tséhé ngasunhndé ta,

³ tséhé xi ngayun ne, ha caviyujunxun xcusun xi canihñu hatsėė, sacuatjin rě nima xi ha quihndé tsajin mé cuma sahmi sacuaha hya xi tacun sa xcun cjuahñu. Hacuaha quihndé ne, tjin nuju cjuahñu xatsé tangun cojo Cristu, me xi tacun xcun Nina. Hane xcusun vėhė ne, hatuxa matsijin.

⁴ Hya xi Nina tsingacunté me Cristu, me xi sua nuju cjuahñu xatsé ne, hya tsingacunté nuju me hacuaha sahmi jyé sahmi hnga nuju me tangun cojo rě Cristu jan.

Xcusun changá cojo xcusun xatsé

⁵ Vêhê xi xicanihñuu cjuatsehen, sacuatjin rê nima xi maji sahmi cjuatsehen. Xicanihñuu cjuatsehen sacuaaha cjuatsehen xi sahmi xuta cojo ngu xi hacuiin chjuun rê me, hacuiin xihin rê me, o sa xi ngajñi ni xihin me, o ngajñi ni chjuun me. Hisca ndajin tjin xi meje nihñu xcusun xi cuacun vë, cojo yêjê sa xcusun cjuatsehen. Miji rê xi jercu nihmu tacún cjuanchina ta, sa xi cuatjin nihñu ne, hitsê sa nihmu tacún cjuanchina jan xi cuma rê Nina.

⁶ Nina ne, sahmi me castigu yêjê ni xuta xi vihndiin tsêhê me, xi cuatjin sahmi.

⁷ Hacuaha ngayujun ni ne, cuatjin canihñu hatsêê, hya xi tivinuhuyun tsêhê Nina.

⁸ Peru quihndê ne, miji rê xi nihñu yêjê ni xcusun xi cuichjá cojo nuju vihi: hacuiin cumacjan nuju, hacuiin nihñu cjuatsehen, hacuiin choho cuinújun tsêhê xingun,

⁹ hacuiin cuinújun cjuandacha cojo xingun. Xicanihñuu cuatjin ta, tsêhê xi ha caviyujunxun cjuatacun changá cojo yêjê ni xcusun xi canihñu xi cavítexa nuju cjuatacun jan,

¹⁰ hane ha cavisehen nuju cjuatacun xatsé xi Nina tisahmi me xi cuijin xcun xi cuma sacuaaha cjuatacun rê suvá me xi catsindaja cjuatacun jan, cojo sa xi ngayujun ni ne, cumachaya ndaja sa nuju nguñaja cjuaquixi yo me.

¹¹ Ngajan xi cuendaain rê çhá xutaxín o há xuta tjê rê Israel má ngayaan?, çhá cati chuxin naja o há catiin rê?, çhá xuta ngu nangui ngayaan?, çhá tichjá cjuatacun naja?, çhá xuta caxteña ngayaan, o há xuta ndaya tjin ngayaan? ta Cristu ni ne, me vêhê xi jercu tu vengui chji camahani rê me.

¹² Ngayujun ni ne, tsêhê xi cavaxijin nuju Nina, hacuaaha caviyujuxin nuju me, hacuaaha hmu cacun nuju me ne, vêhê xi meje rê xi tjin nuju cjuayumatacun cojo xingun, meje rê xi tjin nuju cjuandaja cojo xingun, meje rê xi tjin nuju cjuajeya cojo xingun, meje rê xi yehe tacún cojo xingun.

¹³ Hacuaha meje rê xi scaa nuju cojo xingun hacuaaha ninchatuhun xingun, sa xi tjin mé tsêhê xi cuinchunyun xingun. Sacuatjin rê Nai naja xi catsinchataha nuju me ne, cuanitjin ni nuju ngayujun ni cojo xingun.

¹⁴ Peru xi jercu vengui chji sa rê xi cuma rê yêjê ni cjua xi cachjá cojo nuju jan ne, meje rê xi tjin nuju cjuahmutacun cojo xingun ta, xi cuatjin nihñu ne, hatuxa jercu ndaja cuma tangun cjuatacun nuju cojo xingun xingu xingu ngayun.

¹⁵ Cjuajeya xi casua nuju Cristu ne, catitexa rê cjuatacun nuju ta, tsêhê xi Nina ne, cavaxijin nuju me cojo sa xi cuinechun cojo cjuajeya ngajñi nuju cojo xingun. Hane meje rê xi yasen yasen ni ne, tuhun nacuechji rê Nina.

¹⁶ Cjuandajiyi xi chja tsêhê Cristu ne, catiyujucahndê cahntsua xahasen nuju. Ticuyun xingun hacuaaha tiyujun xingun cuidadu xingu xingu ngayun cojo yêjê cjuahasen xi sua nuju Nina. Sún nguñaja tacún tsêhê Nina, sacuaaha salmo cojo himno cojo yêjê sa xcusun xi sen xi tsêhê Nina, sacuaaha ngu nacuechji rê me xi tuhun.

¹⁷ Tu mé ni xi cuinújun o xi nihñu ne, catama sacuatjin meje rê xi sahmi xuta xi tjin tangun cjuatacun rê me cojo Nai naja Jesús. Hacuaha tuhun nacuechji rê Nina Nahmi naja, xi nihñu oración cojo Jesús.

Chja Pablo hacutjin meje rê xi nihña cojo xingueen cahntsua ndya naja

¹⁸ Ngayujun ni yachjin ne, tinuhyun tsêhê xihin nuju ta, tsêhê xi cuatjin ndatjin xi cuma ta, tjin tangun cjuatacun nuju cojo Nai naja.

¹⁹ Ngayujun ni xihin ne, hacuaaha meje rê xi nihmu tacún chjuun nuju, hacuiin choho xcusun nuju cojo rê me.

²⁰ Ngayujun ni xi siucuaha xutacha nuju ne, tinuhyun tsêhê me tsêhê yêjê ni xi cuichja me cojo nuju ta, hya xi cuatjin nihñu ngayujun ni xi tjin tangun cjuatacun nuju cojo Nai naja Jesús ne, jercu chuya rê Nina.

²¹ Ngayujun ni xi má yun nahmi ne, xicaningatjuntuun xi cuinújuntuhun rê quihndi nuju, ta sá tu sahmi chúvacacun.

²² Ngayujun ni xi má yun mosu hndixahan ne, tinuhyun tsêhê xuta xi má me nai nuju tsêhê yêjê ni xi cuichja me cojo nuju, hacuiin suvá hya xi tivutsejen me ngayun, sacuatjin sahmi yahnga xuta xi meje cuaxëndaja suvá me yojo rê me xcun xuta, ta tinuhyun tsêhê me cojo ngu xahasen tyjahi ngatsê rê xi chjuhuncun Nai naja.

²³ Tu mé ni xcusun xi nihñu ne, nihñu nguñaja tacún, sacuaaha xi tinihñu tsêhê Nai naja, hacuiin tsêhê xuta ni.

²⁴ Cuatjin nihñu, tsêhê xi ha hyun ta Cristu Nai naja ne, me vêhê cuechji nuju me ta hacui me xi tivisecon rê.

²⁵ Peru sa xi tjin ngajñi nuju xi hatuxa choho tisahmi ne, Nina sahmi rê me castigu tucu xcusun tsehen xi casahmi me, hacuaaha Nina ne, hatuxa quixi jain me cojo cjuatacun rê me xi tsichuva me yêjê ni xuta cojo cjuatacun rê me.

4

¹Ngayujun ni xi má yun nai tséhë mosu hndixahan ne, ndaja nihñu cojo mosu hndixahan xi siu ntsun, sacuatjin mameje rë ta, tséhë xi ha hyun xi hacuaha cojo ngayun ne, tjin nai nuju xi tacun ngajan ngahnga.

Vitexa Pablo xi nihña oración hacuaha cuisiajme cjuandaja

²Ngayujun ni ne, nihñu oración yasen yasen ni. Mijí rë xi cuma tséhë tacún. Tuhun nacuechji rë Nina.

³Hacuaha nihñu oración ngatsë niji. Chjahyun rë Nina xi tuxaha ndiya xi cuisiajmi cojo xuta, cojo sa xi cuma tihín cumachaya rë me tséhë cjuatahahma ndajyihí xi chja tséhë Cristu. Hane ngatsë rë cjuandajyihí jan ne, tejñaya ndavaya.

⁴Nihñu oración ngatsë naha, cojo sa xi ngahan ne, cuichjátë cjuatahahma jan, sacuatjin meje rë xi cuichjá.

⁵Hacuaha yëjë ni xuta xi hacuain ladu rë Nai naja me ne, meje rë xi ndaja nihñu cojo rë me cojo yëjë ni cjuahasen xi tjin nuju, yëjë ni hora xi cuma.

⁶Hacuaha yëjë ni cjuavisiajmi nuju ne, meje rë xi cojo cjuandaja cuinújun yëjë ni hora. Xi cuatjin nihñu ne, sacú cumachaya nuju hacutjin chjayunngun cju tséhë xingu xingu xuta xi cuacun jan.

Tsingujnetaha Pablo cju rë me

⁷Yëjë ni xi tivátju tjiima ne, Tíquico ne, sua me cumachaya nuju. Me vëhë ne, ngu xuta ladu rë Jesús xi jercu vinga ná, hacuaha jercu ndaja cjuinduju me tivisecoo me ngahan xi tangun fahacuenda me cojo ná xa xi vitexa Cristu.

⁸Titsingátju nuju me, cojo sa xi ngayujun ni ne, cumachaya nuju tsijin hacuaha cojo sa xi sua nuju me cjuajyëtacun.

⁹Hane cojo me vëhë ne, titsingátju nuju cha Onésimo, cha nangui nuju. Cha vëhë ne, cha ladu rë Nina xi jercu ndaja cjuinduju cha cojo ndiya rë me, hacuaha jercu vinga ná cha. Catsijo me xi cuacun vë ne, sua me cumachaya nuju tséhë yëjë ni xi cavatju nguehe camá.

¹⁰Aristarco ne, me xi jiyatangun cojo ná nguehe ndavaya ne, tsingatju me nina nuju. Hacuanitjin ni Marcos, xicjin Bernabé. Ha cachjá cojo nuju tséhë Marcos jan. Vëhë xi sa xi cjehe me nangui nuju ne, chjuhunntsun me cojo cjuandaja.

¹¹Jesús, me xi hacuaha hmí rë Justo ne, hacuaha tsingatju me nina nuju. Ngajñi rë yëjë ni xuta tjë rë Israel ne, jyan tu tu ni me vëhë xi tisahmitangun cojo ná xa, cojo sa xi xuta ne, tsingatihin me xi Nina cuitexa rë me. Jyan me xi cuacun jan ne, casua ná me cjuajyëtacun.

¹²Hacuaha Epafras, me xi tangun nangui nuju cojo hacuaha fahacuenda tséhë xa xi vitexa Cristu ne, tsingatju me nina nuju. Me vëhë ne, jercu sahmi me oración ngatsë nuju yasen yasen ni, cojo sa xi ngayujun ni ne, cuma tyjahi camahani ngayun xcun Nina, hacuaha cojo sa xi ndaja cuijnercun yëjë ni hacutjin xi meje rë Nina.

¹³Ngahan ne, cuichjá cojo nuju ta Epafras jan ne, jercu vityanguicacun me tsujun cojo xuta Laodicea cojo xuta Hierápolis.

¹⁴Hacuaha tsingatju nina nuju Demas cojo Lucas, me xi doctor xi jercu vinga ná.

¹⁵Tuhun rë ngu nina yëjë ni xuta ladu rë Nina ngajan nandya Laodicea. Hacuaha tuhun rë Ninfa ngu nina cojo yëjë sa me xi matangun me ndava na.

¹⁶Hane xi cjuë chutahaya të rë xujun vi ngajñi nuju ne, nihñu xi hacuaha catichutahaya të rë ngajñi rë xuta ladu rë Nina ngajan nandya Laodicea. Hacuaha xujun xi catsingátju tséhë xuta Laodicea ne, hacuaha chutahayun të ngajñi nuju.

¹⁷Hane tinújun cojo Arquipo cju vihi: “Catjiniya tacún xi nihñuchuhun xa xi casatëxa nuju, xi tjin tangun cjuatacun nuju cojo Nai naja.” nina vi.

¹⁸Ngahan, Pablo ne, titsihindu nuju cojo hntsa ngahan ngu nina vi. Ninguitsjun ná nguehe ndavaya. Nina ne, catisua nuju me cjuandaja.

Cjua xi titjun catsihindu San Pablo xi camá rë xuta nandya Tesalónica

¹ Ngayin, Pablo cojo Silvanu cojo Timoteo ne, ningatjin ngu xujun vi tsujun, ngayujun ni xi matangun ngayun tséhë xi macjain nuju Nina Nahmi naja cojo Nai naja Jesucristu, ngajan nandya Tesalónica. Catisua nuju Nina cjuandaja cjuajeya.

Macjain ndaja rë xuta nandya Tesalónica

² Jercu tihin nacuechji rë Nina Nahmi naja ngatsë nuju ngayujun ni, hacuaha hatuxa veyinnanguin nuju tu ya ni hya xi nihñi oración.

³ Hya ninguitsjin hacutjin jercu nihñu xa tséhë xi ndaja macjain nuju, hacutjin jercu nihñu cjuandaja tséhë xi hmu tacún Nina cojo xuta yumacujun, hacuaha hacutjin jercu ndaja ticaa nuju xi tinechunyun rë Nai naja Jesucristu.

⁴ Ngayun ne, jemu hmucacun nuju Nina, hacuaha hyin xi cavaxijin nuju me.

⁵ Cuatjin ta xi catihin camachaya nuju cjua rë Nina ne, hacuiin suvá cjua ta hacuaha Hasen rë Nina ne, casua niji ngahñu xi cuatjin canújin cojo nuju cjua jan xi hatuxa cjuaquixi. Ngayun ne, ha hyun hacutjin xcusun niji ngajñi nuju, xi ndajiyihi xi cuma nuju.

⁶ Ngayun ne, sacuaha canihñi hacuaha sacuaha casahmi Nai naja ne, ha cuanitjin ni canihñu xi cachjuhunntsun cjua jan cojo cjuasua xi casua nuju Hasen rë Nina, handasa jemu choho cavatjun camá.

⁷ Cuatjin camá xi ngayëjë ni me xi macjain rë Nina ngajan ladu tséhë Macedonia cojo Acaya ne, hisca casahmi me sacuatjin canihñu ngayun.

⁸ Hisca hya xi titjun ngayun cachjuhunntsun cjua rë Nai naja ne, sehe jercu cjin quiji cjua jan, peru hacuiin tu ngajan ni Macedonia cojo Acaya ta hisca jingujyë ni. Hacuaha camachaya rë xuta xi jemu ndaja camacjain nuju tséhë Nina. Cuatjin ne, ha quihndë tsajin sa mé xi cuinújin ta

⁹ suvá xuta ne, chja me hacutjin cojo cjuandaja cachjuhunntsun niji hacuaha hacutjin caviyujunxun nina xi macjain nuju titjun, hane camacjain nuju ngu Nina xi cjuaquixi xi quicun.

¹⁰ Hacuaha chja me hacutjin tinechunyun rë Jesús, Quihndi rë Nina, xi cuya me tséhë ngahnga. Jesús jan ne, me vëhë xi catsicuya Nina cjuahñu rë me xi cavaxë Nina me ngajñi rë nima, hacuaha me vëhë ni xi cuaxëtje naja me tséhë castigo xi nduva.

2

Xa xi casahmi Pablo ngajan nandya Tesalónica

¹ Ngayun ne, ha hyun ta xi catsanguin tjenguin nuju ne, hacuiin tu mahya ta

² handasa jemu choho cavatjin camá ngajan nandya Filipos sacuatjin xi ha hyun, peru camacjain tacuin xi canújin cojo nuju cjua rë Nina ta, tséhë xi Nina jan ne, cavisecoo niji me, handasa jemu camacjan rë yahnga xuta.

³ Hacuaha xi nújin cojo nuju ne, hatuxa cojo cjuaquixi cojo cjuandaja. Hacuiin vindachin.

⁴ Nina ne, me vëhë xi cafachuva niji me, hane cachuya rë me tsijin, hacuaha casua me ngayin xa xi cuinújin cjua rë me cojo xuta. Vëhë xi cuatjin nújin. Hacuiin xi xuta chuya rë me ta xi Nina chuya rë me, tséhë xi Nina ne, me vëhë xi vëë me cjuatacun niji cojo xahasen niji.

⁵ Ngayun ne, ha hyun ta hacuiin cjuahaxi xi canújin cojo nuju, hacuaha vëë Nina jain ta hacuiin xi tujún meje niji.

⁶ Hacuiin jemu meje niji xi cjuaharcun niji xuta, sa ngayun sa xuta xi yahnga, handasa tjin niji chuya rë xi chjaharcun niji tséhë xi apóstol rë Cristu ngayin.

⁷ Peru jemu cojo cjuajeya cavinechin ngajñi nuju, sacuaha xi sahmi ngu naa xi sahmi cuidadu me quihndi rë me.

⁸ Jemu cavinga niji ngayun. Hacuaha meje niji xi hacuiin tu suvá cjua rë Nina xi canújin cojo nuju ta hisca mé sa cjuacjintacun ne, cavejñitacuín xi cuisecuín nuju ta, tséhë xi jemu cachuya niji tsujun.

⁹ Ngayun ne, vitsjen rë nuju tséhë xi jemu jyë xa canihñi. Canihñi nixtin nixten, tséhë xi hisca ngu ngayun mijí tihin nuju ngu cjuandya hya xi canújin cojo nuju cjua rë Nina.

¹⁰ Ngayun xi macjain nuju Nina ne, cahyun, hacuaha hisca Nina ne, vëë jain me ta jemu ndaja cavinechin cojo nuju. Hisca ngu jyë cumaji nicanuju niji.

¹¹ Hacuaha ngayun ne, ha hyun hacutjin canújin cjuandaja cojo nuju jima ngu ngayun, sacuaha chja ngu nahmi cojo quihndi rë me.

¹² Hacuaha catihin nuju cjava xi nchunchujun ni ne, nihñu cjuandaja sacuatjin meje rë ndiya rë Nina ta, Nina ne, me vëhë xi vaxijin me ngayun xi sacú nuju cahndë hiscan xi me vëhë tacun tsja me. Ngajan ne, jemu cahndë ndajyihí camahani.

¹³ Vëhë xi jercu tihin nacuechji rë Nina, tsëhë xi hya xi canuhyun cjava rë Nina xi canújin cojo nuju ne, camacjain nuju cjava jan. Hane ndatjin sacuatjin caningatuhuntacun ta cjava rë Nina jain, hacuini cjava rë ngu xuta. Hacuaha jemu ndajyihí tsujun xi cuatjin macjain nuju cjava jan.

¹⁴ Hacuaha ngayun ne, cavatjun camá sacuaaha cavatju me camá titjun, me xi camacjain rë Jesucristu ngajan nangui Judea. Sacuaaha xuta nangui rë me ne, jercu casuandya rë me, hacuanitjin ni xuta nangui nuju ne, jercu casuandya nuju me.

¹⁵ Nai naja Jesús ne, catsiquehen xuta nangui Judea me, hacuanitjin catsiquehen xuta jan xutachanga xi cachja cjava rë Nina hatsëë. Hisca cojo ngayin ne, hacuaaha casuandya niji me. Chuyin rë Nina tsëhë xuta jan xi cuatjin sahmi me. Hacuaha choho vëë me me xi yahnga sa ta,

¹⁶ tsëhë xi mijí sua me cahndë xi cuinújin cjava rë Nina cojo xuta xi hacuini tsëhë nangui Judea ne, catamacjain rë me hacuaaha cuetjutje me. Jercu tu jyë camahani jyë rë me xi cuatjin sahmi me. Peru quihndë ne, cavechu nixtin xi cuma me castigu xi cuichja Nina.

Pablo ne, meje cjue scutsejen nga me xuta Tesalónica

¹⁷ Hya xi ha catsanguinxin ngu jo nixtin tsujun ne, handasa cahyín nuju, peru hatuxa ninguitsjin nuju cojo xahasen niji. Hacuaha jercu meje cuanguin tjenguin nga nuju.

¹⁸ Cavejni xi cuanguin. Ngahan Pablo ne, ngu jo ndiya ne, cavejni xi cjuë, peru Satanás ne, casuaain cahndë.

¹⁹⁻²⁰ ¿Mé ngatsë rë xi tivinechinyin rë Jesús? ¿Mé ngatsë rë xi tjin niji cjuasua? ¿Mé ngatsë rë xi ndaja cuichja xuta tsijin? Ngatsë nuju ngayun xi camacjain nuju cjava rë Nina xi canújin cojo nuju. Ngatsë rë vëhë xi hya xi cuinduva Jesús Nai naja ne, jemu ndaja cuichja xuta tsijin hacuaaha jercu ndaja cuma niji.

3

¹ Xi camá ne, tsëhë xi ha quihndë cacain niji xi meje niji cumachaya niji hacutjin tivatjun tijima ne, vëhë xi camangutacuin xi cuinechin suvin ngajan nandya xi hmí Atenas.

² Hane caningatjin cha Timoteo xingueen xi quiji tjenguí cha ngayun. Cuatjin caningatjin cha ta, tsëhë xi mosu rë Nina cha, xi chja cha cjava ndajyihí tsëhë Cristu. Cuatjin caningatjin cha, cojo sa xi tsinguixi nuju cha hacuaaha cuichja sa cha cjava cojo nuju, cojo sa xi hitsë sa ndaja cumacjain nuju

³ hacuaaha hacuini cuma chuva tacún ngajni rë cjuacjintacun xi tivatjun tijima. Hane ngayun ne, ha hyun xi hatuxa cuatjin cuatjuun cjuacjintacun xi choho scuëë naja xuta,

⁴ tsëhë xi hisca hya xi cavinechin cojo nuju ne, hya catihin camachaya nuju xi hatuxa cuatjun cjuañihi. Xi camá ne, cuatjin camá, sacuatjin xi ha hyun.

⁵ Hane ngahan ne, xi meje xati ná cumachaya ná hacutjin tivatjun tijima, vëhë xi catsingátju cha Timoteo, quiji cjaha cha cjava sa xi ngayun ne, macjain cuaha nuju. Cuatjin casahme, tsëhë xi camacjincácun ngatsë nuju tsëhë xi sa cavindacha nuju naain xi cuinengun ngajni cjuatsehen ne, xa xi canihni ne, tu mahya.

⁶ Peru quihndë ne, cavuya cha Timoteo xi quiji tjenguí cha ngayun. Hane ndajyihí cjava yaha cha tsujun, tsëhë xi macjain cuaha nuju cjava rë Nina hacuaaha hmutacun cuaha yëjë ni xuta. Hacuaha cachja cha cojo niji ta ninguitsjun cuaha niji cojo cjuandaja, hacuaaha xi jercu meje chun niji sacuahatjin jercu meje chin nuju.

⁷ Cuatjin xi handasa jemu ndya tivatjin tijima cojo cjuañihi cojo cjuaxti, peru jemu casacu niji cjuetacun, tsëhë xi ngayun ne, macjain cuaha nuju.

⁸ Quihndë ne, jercu tu ndaja camahani cuma niji ngayin, sa xi ngayun ne, ha ndatjin siu nuju cjuatacun nuju cojo Nai naja.

⁹ Hacuaha jemu meje tihin nacuechji rë Nina naja tsëhë yëjë ni cjuasua xi casua niji me ngatsë nuju.

¹⁰ Nixtin nixten ne, jemu tichjahyin rë Nina xi sua me cahndë xi tjin ngu hora tjin ngu nixtin sacú xingueen ne, cuicuyin sa nuju cjava rë Nina xi cjëë cumachaya nuju.

¹¹ Meje niji xi Nina Nahmi naja cojo Nai naja Jesús ne, catisecoo niji me xi cuechintihin nuju.

¹² Hacuaha Nai naja meje rë me xi catamajyë sa cjuahmutacun ngajni nuju cojo xingun hacuaaha cojo xuta xi yahnga sa, sacuatjin ngajni naja cojo nuju.

¹³ Nina Nahmi naja catisahmi me cuatjin, cojo sa xi tsajin jyë nuju xcun me hya xi cuya Nai naja Jesús cojo yëjë ni ángel rë me.

4

Xcusun xi Nina chuya rë me hacutjin xi nihña

¹ Quihndë ne, ha tinihñú hacutjin xi cavicuyin nuju xi meje rë xi cumá, cojo sa xi chuya rë Nina tsujun. Vêhë xi jemu nújin cojo nuju tsan ta hitsë sa nihñu cuatjin ta, tsêhë xi hatuxa cuatjin meje rë Nai naja Jesús.

² Hane ngayun ne, ha hyun cjuar rë Nai naja Jesús xi ha cavicuyin nuju.

³ Cjuatacun xi meje rë Nina ne; xi cuma tyjahi cjuatacun nuju, xi canindesuun cojo chjuun xi xín, xi canindesuun cojo xihin xi xín.

⁴ Meje rë me xi jima ngu ngayun ne, catisacu chjuun nuju, peru cojo cjuandaja, xi tyjahi cjuatacun nuju.

⁵ Mijí rë xi cojo cjuatsehen, sacuatjin sahmi xuta xi hvín me Nina.

⁶ Sacuaha cjuacjintacun vêhë ne, xi canihñuu xi cuindachun rë xingun ta, tsêhë xi Nai naja ne, sahmi me castigu ngayëjë ni cjuatsehen vêhë, sacuatjin xi ha canújin cojo nuju.

⁷ Hacuaha hacuuiin cajindaya naja Nina xi cjuatsehen nihña ta cajindaya naja me xi fë jyë naja.

⁸ Vêhë xi me xi tsitjungui cjuatacun vêhë ne, hacuuiin xuta tsitjungui me ta Nina xi tisua nuju Hasen rë ne, vêhë tsitjungui me.

⁹ Quihndë ne, tsajin sahmi ngu jyë xi nihindin nuju xi nihñu hmutacun xingun ta, tsêhë xi suvá Nina ne, ha cavicuya nuju me hacutjin meje rë me xi nihñu hmutacun xingun.

¹⁰ Hacuaha tinihñú jain hmutacun yëjë ni xuta xi macjain rë Nina ngajan yëjë ni nandya tsêhë distritu Macedonia. Peru nújin cojo nuju ta cuatjin ndaja sa nihñu.

¹¹ Hacuaha tejñu tacún xi jyuu nechun, nihñucuendun xi tsujun. Peru nihñu xa, sacuatjin xi ha cavicuyin nuju.

¹² Sa xi cuatjin nihñu ne, hisca cojo xuta xi macjaain rë Nina ne, cjuaharcun nuju me, hacuaha sacú nuju yëjë ni xi cuma meje nuju.

Cuinduva nga Nai naja

¹³ Quihndë ne, meje niji xi cuma chaya nuju hacutjin cuatju nima xi ha cahme, cojo sa xi hacuuiin jemu choho cuma nuju sacuatjin rë xuta xi sacuuiin rë me ngu cjuetacun, tsêhë xi macjaain rë me Nina.

¹⁴ Tsêhë xi macjain naja xi cahme jain Jesús hacuaha cavascaya nga rë me ne, vêhë xi hacuaha macjain naja xi Nina ne, tsingascaya rë me nima xi xcun cjuahñu rë camacjain rë me Jesús.

¹⁵ Vêhë xi nguehe tihin cumachaya nuju ngu cjuar tsêhë Nai naja ta jarë ngayaan xi nechan quicun hisca xi cuya Nai naja ne, hacuuiin cuma titjun ngayaan tsêhë me xi ha cahme.

¹⁶ Tsêhë xi suvá Nai naja ne, cuinduvajne me tsêhë ngahnga. Cuinuhya rë sacuaha cjuar rë ngu me xi vitexa jain. Cuinuhya rë sacuaha cjuar rë ngu ángel xi ma titjun. Cuinuhya rë sacuaha xta rë tyjo xi tsêhë Nina. Xi camá ne, nima xi camacjain rë me Cristu ne, tjun tjun me cuascaya rë me,

¹⁷ sehe ngayaan xi nechan quicun ne, cjuaha Nina ngayaan ngajñi rë yuffi, hacuaha cojo nima xi cuacun jan, cumatangun ngayeyen ni cojo Nai naja ngajan ngajñi tjo. Sehe yëjë ni hora yëjë ni nixtin cuinechan cojo rë Nai naja.

¹⁸ Vêhë xi meje rë xi tinújun cojo xingun cjuar vihi ne, sacú nuju cjuetacun.

5

¹ Peru sacuaha nixtin xi cuma cjuacjintacun vêhë ne, sáhmii ngu jyë nihindin nuju ta,

² tsêhë xi ngayun ne, ha hyun ta, hya xi cuya Nai naja ne, jemu cjuercun camahani rë ngayëjë ni xuta, tsêhë xi tu ñahñu ni cuinduva me.

³ Hya xi cuichja xuta xi macjain rë Nina ta: “Jemu ndatjin ta jemu jyuu tjin”, peru hya ne, tu ñahñu ni ne cuatju me ngu cjuañihi, sacuatjin vatju ma ngu chjuun xi tu ñahñu meje tsin quihndi rë me. Hane cuatjin cuatju me ta hisca ngu me cuatjinhngaain me.

⁴ Xi nguixun cjuêhe ngu chëjë ne, jemu cjuercun naja. Peru ngayun ne, hacuuiin jñu camaha tsujun xi nihñu cjuatsehen, xi cjuercun nuju hya xi cuechutaha nixtin xi cuya Nai naja ta,

⁵ ngayujun ni ne, nechun sacuaha hasen rë nguixtin. Ngayaan ne, hacuuiin jñu camaha tsajan xi nihña cjuatsehen.

⁶ Cuatjin xi mijí rë xi nechan sacuaha xi titsjuñafen, sacuaha viyuju yahnga xuta xi macjain rë me Jesús ta, meje rë xi nechan quicun, nguñajatacun.

⁷ Hatuxa xcusun naja xi nguixun xi tsjuñafen. Hacuaha xcusun rë xuta chihi ne, nguixun ma chihi me.

⁸ Peru ngayaan ne, tsêhë xi nechan sacuaha ndavá rë nguixtin ne, vêhë xi meje rë xi nechan nguñajatacun. Meje rë xi ndaja cumacjain naja hacuaha nihña hmu tacun xingueen.

Xi cuatjin nihña ne, hacuaha vëhë ne, cuisecoo naja ta cuetjo naja Nina. Hacuanitjin ni meje rë xi cuetahan tacun ta cjuaquixi xi cuaxëtje naja Nina.

⁹ Cuatjin meje rë ta, tsëhë xi Nina ne, hacuiin cavaxijin me ngayaan xi cuatjun castigu rë me ta, cavaxijin naja me xi cuaxëtje naja me, ngayaan xi macjain naja Nai naja Jesucristu ta,

¹⁰ Jesucristu ne, cahme me ngatsë naja, cojo sa xi tangun cuinechan cojo rë me, sa xi nechanciaaan cjuahñu o sa xi nima camá ngayaan.

¹¹ Vëhë xi meje rë xi tinújun cojo xingun cjuaxëtje, hane sacu nuju cjuetacun, sacuatjin xi ha tinihñú.

Pablo ne, tisua me cjuaxëtje xi macjain rë Nina

¹² Ngayun ne, nihñu favor ne, chjuhuncun rë xuta xi cavaxijin Nai naja xi cuma titjun tsujun, xi sahmi xa ngajñi nuju, xi tsinguixi nuju.

¹³ Jemu meje rë xi chjuhuncun me hacuaha nihñu hmu tacun me tsëhë xi tsahmi me xa vëhë. Ndaja tinechan cojo xingun.

¹⁴ Hacuaha nújin cojo nuju ta xuta xi mijí sahmi xa ne, tinújun cojo rë me catisahmi me xa. Hane xuta xi jima chuvacacun ne, tinújun cojo rë me, hane sacú rë me cjuetacun. Hacuaha tisecun rë me xi cjëë ndaja cumacjain rë. Hane tjin nuju cjuajeya cojo ngayëjë ni me.

¹⁵ Hacuaha nechun cuidadu xi hacuiin choho nihñu cojo rë me xi choho sahmi cojo nuju ta, xi meje rë ne, yëjë ni hora yëjë ni nixtin ne, suvá cjuandaja nihñu cojo xingun hacuaha cojo yëjë ni xuta.

¹⁶ Ndaja catama nuju yëjë ni nixtin.

¹⁷ Meje rë xi jemu nihñu oración.

¹⁸ Hacuaha hatuxa tuhun nacuehji rë Nina, handasa choho cuatjun cuma. Cuatjin meje rë Nina xi nihñu, ngayujun ni xi macjain nuju Jesucristu.

¹⁹ Hacuiin nitjunngun xcusun xi sahmi Hasen rë Nina ngajñi nuju.

²⁰ Hacuiin nitjunngun cjuaxëtje rë me xi chja cjuaxëtje xi casua Nina.

²¹ Peru chjuhunchuvun ngayëjëjë ni cjuaxëtje. Hane jarë cjuaxëtje xi ndaja ne, vëhë tiseñuju hacuaha tinuhyun.

²² Peru tétjunxun tsëhë ngayëjëjë ni cjuatsehen.

²³ Nina xi tsicjë me cjuachan ne, catisahmi tyjahi tyjahi me hasen nuju cojo cjuatacun nuju cojo jojo nuju, cojo sa xi nixtin hya xi cuya Nai naja Jesucristu ne, tsajin camahani jyë nuju.

²⁴ Me xi tivaxijin nuju ne, cjuaquixi xi chja me. Hatuxa sahmicihin me hacutjin xi chja me.

Cjuaxëtje xi cuijnetaha

²⁵ Ngayun ne, nihñu oración ngatsë niji.

²⁶ Nuvuncjun yëjë ni me xi macjain rë Jesús xi tuhun rë me ngu nina niji, sacuaha xcusun naja.

²⁷ Tsëhë xi cavaxijin ná Nai naja ne, vëhë xi vitéxa nuju xi nújun cojo xujun vi xi cuihndë yëjë ni me xi macjain rë Jesús.

²⁸ Cjuandaja rë Nai naja Jesucristu ne, catisehen xahasen nuju.

Cjua xi ma jo catsihindu San Pablo xi cumá rë xuta nandya Tesalónica

¹ Ngayin, Pablo cojo Silvanu cojo Timoteo ne, ningatjin ngu xujun vi tsujun, ngayujun ni xi ma tangun ngayun tsêhë xi macjain nuju Nina Nahmi naja cojo Nai naja Jesucristu, ngajan nandya Tesalónica.

² Nina Nahmi naja cojo Nai naja Jesucristu ne, catisua nuju me cjuandaja cjuajeya.

Hya xi cuinduva Cristu ne, Nina ne, sahmi me castigu xuta xi tjin jyë rë

³ Hachu tjin niji xi tihin nacuechji rë Nina ngatsë nuju ngayun. Hacuaha ndatjin xi cuatjin nihñi ta, tsêhë xi jemu xcun tivangun xi macjain nuju, hacuaha hitsë sa jima tsejen cjuahmutacun xi tjin nuju jima ngu ngayun cojo xingun.

⁴ Vêhë xi ngayin ne, hya xi ma tangun me xi macjain rë Nina ne, nújin cojo rë me ta jemu sua má niji tsêhë xi ngayun ne, jemu yehe tacún hacuaha jemu macjain nuju, handasa jemu yehe cjuañihi xi tivatjun tijima.

⁵ Cuatjin ma tsejen xi Nina ne, fahachuva naja me cojo cjuaquixi. Hane xi cuijnetaha ne, cuichja Nina ta sacú nuju ngu cahndë hiscan xi me vêhë má titjun me, ta ngatsë rë vêhë xi jercu choho tivatjun tijima.

⁶ Xi tsingatahacacun Nina ne, yëjë ni xuta xi choho tisahmi cojo nuju ne, ndatjin xi hacuaha cuma ngojo cojo rë me,

⁷ hacuaha ndatjin xi ngayaan xi choho tivatjuun tijima ne, sacú naja ngu cahndë xcun Nina xi chjahanjendan, hya xi Nai naja Jesús cuya me tsêhë ngahnga ngajñi rë ngu ndihi jyë cojo ángel rë me xi jercu hñu ngahñu rë.

⁸ Hya sahmíngojo me cojo xuta xi macjaain rë Nina, xi hacuaha hndiin me tsêhë cjuandajyihí tsêhë Nai naja Jesús.

⁹ Hane castigu xi cuma xuta xi cuacun vë ne, cuaxëxin Nina me ngu ladu hiscan xín, xi tsajin nu tsajin nixtin xi cuechu me xcun Nai naja. Cuatjin ne, xi scuíin me hasen ndajyihí cojo ngahñu rë Nai naja.

¹⁰ Cuatjin cumá nixtin xi cuinduva Nai naja xi cuma jyë cuma hnga me. Hya ne, cuinduva me, cojo sa xi ngayëjë ni xuta xi camacjain rë me ne, cjuaharcun rë me hacuaha cjuercun rë me, hisca cojo ngayujun ni ta tsêhë xi camacjain nuju cjuandajyihí xi canújin cojo nuju.

¹¹ Vêhë xi ngayin ne, jercu chjahyín rë Nina naja xi ngayun xi má yun ladu rë me ne, catamachji rêhë rë me ngayun. Hacuaha chjahyín rë Nina xi cojo ngahñu rë me ne, cuetjucaa jain yëjë ni cjuandaja xi ningatuhuntacun hacuaha yëjë ni xa xi nihñu tsêhë xi macjain nuju me.

¹² Hacuaha xi cuatjin cumá ne, xuta xi vutsejen me ne, sahmi jyë sahmi hnga me Nai naja Jesús, hacuaha ngayun ne, cuma yehe cuma hnga ngayun ngatsë rë cjuandaja rë Nina naja cojo cjuandaja rë Nai naja Jesucristu.

2

Cuinduva ngu cha tsehen

¹ Quihndë ne, ha hyun xi Nai naja Jesucristu ne, cuinduva nga me xi sahmi tangun naja me. Vêhë xi nújin cojo nuju ta

² hacuín ngutjen cumacjintacun, hacuín rcun cuma, sa xi sacú nuju cjuandaja xi ha cavechu nixtin xi cafehe Nai naja. Handasa cuatjin cuichja xuta cojo nuju, o sa xi cuichja me xi cuatjin casua Nina me cjuatacun, o sa xi chjuhunnstun ngu xujun xi cuichja cuatjin sacuaha xi ngayin caningatjin, peru hacuín cumacjain nuju ta, quixiin.

³ Catuun camahani cahndë xi cumandacha ngayun, tsêhë xi chaja sa xi cuechu nixtin vêhë ne, titjun ne, jemu sahmi xuta condra Nina, hacuaha cuinduva ngu cha tsehen xi hatuxa cuechiin cha xcun Nina.

⁴ Cha tsehen jan ne, choho scuëë cha yëjë ni xi hmí nina, hacuaha choho scuëë cha yëjë ni xi vechu chuva rë xi chjaharcun rë. Hane hisca cjuandaja cha cuejña cha cahntsua yungun xi matitjun xi tsêhë Nina, hane cuichja cha ta cha vêhë nina cha.

⁵ ¿Há vitsjiin nuju ta ha cachjá cojo nuju cjuandaja vihi, hya xi cavitejña nandya nuju?

⁶ Hacuaha ha hyun ta xi ngutjen ne, tsajin cahndë cuinduva cha tsehen jan ta, cuinduva cha hisca xi cuechu nixtin xi Nina sua me cahndë.

⁷ Hacuaha cjuatsehen ne, hisca hyan, ta jemu tijima yehe. Hane hisca xi cjuexin me xi tivechja cahndë ne,

⁸ sehe hya cuinduva cha tsehen jan. Peru Nai naja Jesús ne, tsiquehen me cha cojo tjo hntsua ni me, hacuaha tsicjë me cha, hya xi cuinduva me.

⁹Hya xi cuinduva cha tsehen jan ne, tsêhê xi Satanás tsingatju rê cha ne, jemu hñu ngahñu rê cha hacuaha jemu cjin xcusun cjuarcun ndacha xi sahmi cha.

¹⁰Hacuaha sahmi cha yêjê ni xcusun cjuatsehen xi cuindacha cha xuta. Cuindacha cha xuta xi cuechiin xcun Nina ta, tsêhê xi mijí rê me chuyiin rê me cjuaquixi xi vaxêtje naja.

¹¹Ngatsê rê vêhê ne, sua Nina cahndê xi cumandacha xuta jan, cojo sa xi cumacjain rê me cjuandesu jan.

¹²Ngajan xi cuma me castigu, ngayêjê ni me xi camacjaain rê cjuaquixi jan ta, tu cjuatsehen jan cachuya rê me.

Nina cavaxijin nuju me xi cuetjuntjun

¹³Peru ngayin ne, meje rê xi jercu tihin nacuechji rê Nina ngatsê nuju ngayun xi hmucacun nuju Nai naja ta, tsêhê xi Nina ne, cavaxijin nuju me xi tjun tjun ngayun cuetjuntjun. Ngatsê rê xi Hasen rê Nina ne, titsityjahi rê xahasen nuju xi tsajin xi cún nuju xcun Nina, hacuaha ngatsê rê xi macjain nuju cjuaquixi ne, vêhê xi cuetjuntjun.

¹⁴Hya xi canújin cojo nuju cjuandajyihí rê Nina ne, hya cavaxijin nuju me xi cuetjuntjun. Cavaxijin nuju me xi sacú nuju cjuahñu ndajyihí sacuaha xi tjin rê Nai naja Jesucristu.

¹⁵Vêhê xi nújin cojo nuju ta xi camacjiintacun, hacuaha xi canichayuun cjuaxi cavicuyin nuju, cjuaxi canújin jan cojo cjuaxi canihindín jan.

¹⁶Nai naja Jesucristu cojo Nina Nahmi naja ne, casahmi hmucacun me ngayaan, hacuaha cojo cjuandaja rê me casua naja me cjuetacun xi tsajin hora tsajin nixtin xi cjuê, hacuaha casua naja me ngu cjuaxi ndajyihí xi nechayan ni rê nixtin xi cuetjucaa.

¹⁷Me vêhê ne, catisua me cjuetacun xahasen nuju, hacuaha catisua nuju me ngahñu xi cuinújun hacuaha xi nihñu yêjê ni cjuandaja.

3

Nihñu oración ngatsê niji

¹Quihndê ne, nihñu oración ngatsê niji, cojo sa xi cjuaxi rê Nai naja ne, xati cuechu jinguyjê ni, hacuaha cojo cjuasua cjuahatsja xuta cjuaxi rê me, sacuatjin camá ngajñi nuju.

²Hacuaha nihñu oración, cojo sa xi cuetjintjin tsêhê xuta tsehen ta, hacuiin ngayêjê xuta xi macjain rê me Nina.

³Peru Nai naja ne, hatuxa quixi me cojo cjuaxi rê me. Sua me yun ngahñu xi scaa nuju, hacuaha cuetjo nuju me, cojo sa xi tsajin mé cuma sahmi Satanás cojo nuju.

⁴Ngatsê rê Nai naja ne, fê mangutacuín ta ngayun ne tihinhú jain, hacuaha nihñu sa cjuaxi vitexin nuju.

⁵Nai naja ne, catincha me cjuahmutacun rê Nina xahasen nuju, hacuaha catisua nuju me ngahñu rê Cristu xi scaa nuju tsêhê yêjê ni cjuacjintacun.

Meje rê xi nihña xa

⁶Quihndê ne, sacuahatjin meje rê Nai naja Jesucristu ne, vitexin nuju xi naxunxun yoyo nuju tsêhê yêjê ni me xi jemu tsêhê me sahmi me xa, hacuaha xi sáhmii hacutjin xi cavicuyin nuju xi nihñu.

⁷Ngayun ne, ha hyun ta meje rê xi nihñu ngu xa sehe sacú xi xinu, sacuatjin xi cahyun xi canihñí. Hacuiin tu jyuun ni cavinechinyinjñi ngajñi nuju ne,

⁸hacuiin tu cjuatjo ni casacu niji niñu xi cachini ta, nixtin nixten ne, jercu canihñí xa, cojo sa xi hacuiin ngayun nihñu gastu ngatsê niji.

⁹Handasa satê niji cahndê xi chjahyin nuju xi cuisecun niji, peru cachjahyíin ta canihñixin xa, xi cuejñi ngu xcusun xi cuatjin nihñu.

¹⁰Hacuaha hya xi cavinechintihin cojo nuju ne, hya canújin cojo nuju ta: Me xi mijí sahmi xa ne, xi catuun sinê me.

¹¹Cuitjin tinújin cojo nuju ta, tsêhê xi casacu niji cjuaxi ngajñi nuju ne, hinchajñi me xi sáhmii xa. Tu tsinguisehenjñi me xcun cjuacjintacun xi ña cuendaain rê me.

¹²Ngajan xi vitexin rê me xi cuacun vê, sacuatjin meje rê Nai naja Jesucristu, xi catiyujuyuu cjuatacun rê me, hane catisahmi me xa xi sacú sinê me.

¹³Hacuaha ngayun ne, xi camacjiintacun tsêhê cjuandaja xi tihinhú.

¹⁴Sa xi tjin jarê me xi mijí cuihndê cjuaxi tinújin xcun xujun vihi ne, chjuhuncuendun jarê me jan, hacuaha xi caninguisuunñuu cojo rê me, sehe me vêhê ne, cuma sava rê me.

¹⁵Peru hacuiin choho chun me ta, tuhun rê me cjuaxi cojo cjuandaja ta, tsêhê xi xingun me.

Cjuaxi cuijnetaha

¹⁶Hane Nai naja, me xi tsêhê cjuajeya ne, catisua nuju me cjuajeya yêjê ni nixtin hacuaha xcun yêjê ni cjuacjintacun. Hacuaha Nai naja yaha nuju me ngayujun ni.

¹⁷ Suva ngahan, Pablo, tsihindu nuju ngu cjuá vi, xi tisuá nuju ngu nina. Hatuxa xcusun naha xi cuitjin tsihindu xcun yějě ni xujun xi tsingátju.

¹⁸ Cjuandaja rě Nai naja Jesucristu ne, catisehen xahasen nuju ngayujun ni.

Xujun xi titjun catsihindu San Pablo cha Timoteo

¹ Ngahan Pablo ne, apóstol tsêhê Cristu Jesús má ngahan ta, tsêhê xi cuatjin cavitexa Nina, me xi vaxêtje naja, hacuaha cuatjin cavitexa Cristu Jesús, me xi vetahan tacun.

² Tsihindu ri xujun vihi, ngaye Timoteo. Ngaye ne, sacuaha quihndi ndaja naha ngaye ta, tsêhê xi camacjain ri cjuarê Nina, hora xi cachjá cojo ri cjuarjan. Nina Nahmi naja cojo Nai naja Cristu Jesús ne, catamayuma rê me ngaye, catisua ri me cjuandaja cjuajeya.

Tjin xuta xi vicuya ngu cjuachacun xi machjiriin

³ Sacuahatjin xi ha cachjá cojo ri, hora xi cavêtju cêjê hiscan ladu tsêhê Macedonia ne, tinechintehe sa ngajan nandya Efeso. Tjin ngu jo cha ngajan xi tivicuya cha cjuachacun xi hacjahi. Hane ngaye ne, titexe rê cha xi cuacun vê ta ha quihndê cuicuyaaïn sa cha cuatjin.

⁴ Hacuaha titexe rê cha ne, hacuiin cuetaharcu cha yêjê cuentu rê xutachanga naja ta, tsêhê xi hacuiin yêjê xi cjuaquixi. Ngu jo cuentu xi cuacun vêhê ne, jemu nduju fi, hane tsajin mé machjirêhê ta suvá ni xi si vangui, hacuaha tsajin mé visecoo naja xi nihña hacutjin xi meje rê Nina. Tsêhê xi macjain naja cjuarê Nina ne, vêhê xi hyan hacutjin xi Nina meje rê me xi nihña.

⁵ Tichjá cojo ri xi cuatjin titexe rê cha xi cuacun vê, sehe cuma tyjahi xahasen rê cha, cuma ndajyihî cjuatcun rê cha, hacuaha cumacjain nguñajacacun rê cha. Xi cuatjin ne, hacuaha sacú rê cha cjuandaja xi cuma tsihmucacun xicjin cha.

⁶ Peru ngu jo cha xi cuacun vê ne, cachaja cha ndiya rê cjuaquixi, cavetjuxin cha tsêhê cjuandaja jan, hane tu cjuacun xi machjiriin, vêhê tivisiajmi cha.

⁷ Meje sahmi cha maestru tsêhê cjuarê xi cavitexa Nina xutachanga naja. Peru hvíin cha mé vijne cjuarê xi visiajmi cha, hisca suvá cha vijniircu cha cjuarê xi vicuya nguñaja nguñajacacun cha.

⁸ Quihndê ne, ha hyan ta cjuarê xi cavitexa Nina jan ne, jemu ndaja. Peru meje rê xi cuijnercun, mé ngatsê rê xi Nina ne, cavitexa me cjuarjan.

⁹ Nina ne cavitexa me cjuarjan, peru hacuiin ngatsê rê xuta xi ndaja sahmi ta, ngatsê rê xuta xi choho sahmi, xuta xi hndiin tsêhê ngu xuta xi matitjun tsêhê, xuta xi cuendaain rê tsêhê Nina, xuta xi sahmi cjuatsehen, cojo xuta xi faharcuaain rê Nina, xuta xi macjaain rê cjuarê Nina, xuta xi tsiquehen nahmi rê, tsiquehen naa rê, cojo sa tsiquehen xicjin.

¹⁰ Hacuaha cavitexa Nina cjuarjan ngatsê rê xuta xihin xuta chjuun xi tjin chjuunnahñu rê, xuta xi xanda, xuta xi vinchahma ngu xuta sehe fehya tujún xuta rê, xuta xi chja cjuandacha cojo xicjin, xuta xi chja cjuandacha hisca xcun xutaxa rê, hacuaha xuta xi sahmi vihi sahmi vêhê xi matanguaaïn cojo cjuaquixi.

¹¹ Peru cjuaquixi jan ne, matangun cojo cjuarê ndajyihî tsêhê Nina. Hacuaha Nina xi jercu ndaja me ne, me vêhê casua ná me cjuarê xi cuatjin cuichjá.

Nacuechji rê Nina tsêhê cjuandaja rê me

¹² Suá nacuechji rê Nai naja Cristu Jesús ta, tsêhê xi camangucacun me cojo ná xi casua ná me xa rê me, hacuaha tisua ná me ngahñu cjuarê xi scaa ná sahme xa jan.

¹³ Cuatjin casahmi me cjuandaja cojo ná quihndê, handasa hatsêê ne, jemu choho cachjá tsêhê me hacuaha jemu choho casahme, xi jemu yehe cjuañihî casua rê xuta ladu rê me. Peru Nai naja ne, cama yuma rê me ngahan ta, tsêhê xi cjêê xi cumacjain ná me, hane vêhê xi hveen mé xi casahme.

¹⁴ Hane jemu casahmi camahani me cjuandaja cojo ná, xi casua me cahndê xi camacjain ná me hacuaha xi caveya me cjuahmutacun cahntsua xahasen naha. Cuatjin sahmi me cojo naja xi nihña tangun cjuatcun naja cojo Cristu Jesús.

¹⁵ Cjuarê xi cuichjá nguêhe ne, jemu cjuaquixi, hacuaha ndaja tjin xi cumacjain rê ngayêjê ni xuta ta, Cristu Jesús ne, canduva me nguêhe ngasunhndê xi cuaxêtje me xuta xi sahmi cjuatsehen. Tsêhê yêjê xuta tsehen xi cuacun jan ne, ngahan hitsê sa tsehen ngahan.

¹⁶ Peru Jesucristu ne, camayuma rê me ngahan ta, tsêhê xi meje rê me xi cumachaya rê yêjê ni xuta ta jemu sahmi jyê cacun me cojo ngu xuta xi jercu sahmi cjuatsehen. Sacuatjin xi casahmi me cjuandaja cojo ná ne, hacuaha ni tjin sahmi me cjuandaja cojo yêjê ni xuta xi cumacjain rê cjuarê me. Sehe sacú rê xuta jan cjuahñu xatsê xcun Nina.

¹⁷ Vêhê xi meje rê xi hatuxa chjahanrcun rê Nina, ndaja cuiúnjan tsêhê Nina yêjê ni nixtin ta, me vêhê xi matitjun me, xi vitexa me yêjê ni nixtin ta, suvá ni me vêhê xi Nina me, hacuaha matsijin naja me. Hacuaha tsajin nixtin tsajin hora cueya me. Cuatjin jain.

¹⁸ Ngaye Timoteo ne, sacuatjin cjuatcun xi ha cachja me xi hmi profeta tsiji hatsêê nixtin tsan ne, ha chuva vêhê ni tivitéxa ri xi nihñi. Hane cjuatcun vêhê ne, cumachjirêhê riji xcun xa rê Nina xi tinihñi sacuaha tjin machjirêhê ngu quicha ngajñi rê ngu si.

¹⁹ Mijí rë xi cuihin ngaxtin xi macjain ri cja rë Nina ta, meje rë xi nihñicuende cjuatacun ndajyihí xi quichehe. Ngu jo xuta ne, casahmi cuendaain me cjuatacun ndajyihí xi cavaha me, hane cuatjin catsichaja me cjuatacun rë me, hacuaha ha quihndë macjaain rë me Jesucristu.

²⁰ Cuatjin cavatju cha Himeneo cojo cha Alejandro camá. Vëhë xi ngahan ne, casuá cahndë xi suandya hitsë Satanás cha xi cuacun vë, sehe cumachaya rë cha ta cuaaintjin camahani xi choho chja cha tsëhë Nina.

2

Meje rë xi nihña oración

¹ Vëhë xi nguehe cuichjá cojo ri ta jemu meje rë xi chjahyan rë Nina cjuandaja, meje rë xi tahan nacuechji rë me, hacuaha meje rë xi nihña oración ngatsë rë yëjë ni xuta.

² Meje rë xi nihña oración ngatsë rë xutaxa rë, hacuaha ngatsë rë ngayëjë ni xuta xi vitexa naja, sehe ngayaan ne, tsajin yo suandya naja suaxti naja, xi tsejen xi chjahanrcun rë Nina, hacuaha xi nihña cjuandaja.

³ Jercu ndaja tjin xi cuatjin nihña oración ta, Nina, me xi vaxëtje naja ne, cuatjin chuya rë me.

⁴ Meje rë me xi ngayejen ni xuta ne, cuetjuntjen hacuaha ndaja cuijnercun cja xi cjuaquixi.

⁵ Ngu ni Nina xi tacun me, hacuaha ngu ni me xi sahmi xi matangun cjuatacun naja ngayaan xuta cojo Nina. Me xi cuatjin sahmi jan ne, hacui ngu xuta xi hmí Cristu Jesús.

⁶ Me vëhë xi casua me yojo rë me xi cuechjitje me jyë naja ngayejen ni ngayaan. Hane hya xi cavetjucaa nixtin ne, cuatjin cama tsejen xi Nina ne, meje rë me xi cuetjuntjen.

⁷ Vëhë xi casatë ná xi má ngahan apóstol, xi cuicuyá rë xuta xi xin nangui rë me, cuichjá cojo rë me cja xi cjuaquixi xi macjain naja. Hatuxa cjuaquixi cja xi chjá cojo ri. Hacuuiin vindácha.

⁸ Hacuaha meje ná xi xuta xihin ne, sahmi me oración ha tu jani ni hiscan xi matangun me. Hya xi scunitjen me tsja me xi sahmi me oración ne, meje rë cojo ngu xahasen tyjahi. Mijí rë xi quitaha cjan rë me, hacuaha mijí rë xi cojo si.

⁹ Hacuaha yachjin ne, cataja me tsjian rë me hacutjin xi ndaja tjin, hacuiin ngu xcusun xi jemu nchina tsejen. Mijí rë xi cuircu cun sahmi me tsjarcu me. Mijí rë xi tsindaja me yojo rë me cojo oro, cojo tuseti xi jemu hnga chji rë, cojo tsjian hnga chji rë.

¹⁰ Meje rë xi sahmi me cjuandaja ta, cuatjin ndaja tsejen tsëhë yachjin xi macjain rë me Nina.

¹¹ Hacuaha hya xi viseñuju me ngu cja rë Nina ne, catitsinguijne me yojo rë me, jyyu ni catiyuju me.

¹² Hacuaha suaan cahndë xi yachjin ne, cuicuya me ngajñi rë xuta cjín, hacuaha suaan cahndë xi me vëhë cuitexa me xuta xihin. Xi meje rë ne, tu catiseñuju ni me.

¹³ Cuatjin meje rë ta, tsëhë xi hya xi casahmi Nina xuta ne, titjun casahmi me xutachanga naja Adán, sehe má jo ne, casahmi me Eva.

¹⁴ Hane Adán ne, hacuiin camandacha me ta, chjuun jan ne, me vëhë xi camandacha me, hane cuatjin camá xi casahmichiin chjuun jan cja xi cavitexa Nina.

¹⁵ Peru yachjin ne, meje rë xi catisacu rë me quihndi. Cuatjin xi cuetjutje me, sa xi macjain rë me Nina, sa xi tsihmu cacun xicjin me, sa xi tyjahi xahasen rë me, hacuaha sa xi vetjo me cjuatacun rë me.

3

Xuta xi vitexa ngajñi rë xuta ladu rë Nina

¹ Nguehe cuichjá cojo ri ngu cja xi cuatjin jain: yo xi meje cuitexa sacuaha obispo ngajñi rë xuta ladu rë Nina ne, jemu ndaja xa xi meje rë xuta jan.

² Ngajan xi me xi cuitexa ngajñi rë xuta ladu rë Nina ne, meje rë xi ngu xuta ndaja xi tsajin më choho sahmi. Meje rë xi ngu xuta xi ngu ni chjuun rë, hacuaha xi vetjo yojo rë, xi tacun cahndë cjuatacun rë. Mijí rë xi tujyë sahmi me. Meje rë xi ngu xuta xi cojo cjuandaja cjuahatsja me xuta xi nduva tjengui rë me ndava me. Hacuaha meje rë xi chutaha cjuatacun rë me xi cuicuya me xuta.

³ Mijí rë xi ngu xuta chihí. Mijí rë xi choyo xuta me ta, meje rë xi tjin rë me cjuandaja cjuajeya. Mijí rë xi jercu tsimeje me tujún.

⁴ Hacuaha me xi vitexa ngajñi rë xuta ladu rë Nina jan ne, meje rë xi ngu xuta xi ndaja sahmi gobiernu ndava, hacuaha quihndi rë ne, vihndë tsëhë hacuaha faharcun rë.

⁵ Ta sa xi hacuiin ndaja ma sahmi me gobiernu ndava me ne, ¿hacutjin cuma cjuahacuenda me xuta ladu rë Nina?

⁶ Hacuaha mijí rë xi ngu xuta xi sehe tiña nixtin cavisehen me ndiya rë Nina, sá tu jemu sahmi jyë xuta jan yojo rë me, cjuë ne, cuatju me castigu rë Nina, sacua ha tjin cavatju xitsehen matitjun camá.

⁷ Hane meje rë xi ngu xuta xi ha chjaharcun rë me, xi hisca cojo xuta xi hacuiin ladu rë Nina ne, ha tifaharcun rë me. Cuatjin xi xuta xi vitexa jan ne, hacuiin cuetju sava me, hacua ha hacuiin tsinguetsun xitsehan xi matitjun cjuatacun rë me.

Xuta xi visecoo ngu me xi vitexa

⁸ Hacuaha ni tjin ni xuta xi visecoo rë ngu me xi vitexa jan ne, meje rë xi ngu xuta xi ha chjaharcun rë, ngu xuta xi hacuiin jo xcun jo hntsua. Mijí rë xi ngu xuta xi jercu hvi xan. Mijí rë xi ngu xuta xi jercu tsimeje tujún.

⁹ Meje rë xi ngu xuta xi cojo ngu cjuatacun tyjahi macjain rë cju a xi cama ngascan casuacuenda naja Nina, cju a xi tsajin yo vëë rë hatsëë nixtin.

¹⁰ Tjun tjun ne, meje rë xi chjahachuva rë xuta jan. Hane sa xi tsejen ta tsajin mé jyë rë xuta jan ne, cuma cjue me xa xi cuisecoo me xuta xi vitexa.

¹¹ Hacuaha chjuun rë me ne, meje rë xi ngu chjuun xi ha chjaharcun rë, ngu chjuun xi visiajmii cjuandesu. Meje rë xi ngu chjuun xi vetjo me cjuatacun rë me, ngu chjuun xi ha sahmi chihin xa rë.

¹² Hane xuta xi visecoo rë ngu me xi vitexa jan ne, meje rë xi ngu ni chjuun rë me. Hacuaha meje rë xi ngu xuta xi ndaja sahmi me gobiernu ndava me cojo quihndi rë me.

¹³ Hane me xi jemu ndaja jain xa sahmi ne, jercu cjuaharcun xuta me, hacua ha hitsë sa tsacjuiin me xi cuichja me cju a ndajiyihi tsëhë Cristu Jesús xi macjain naja.

Ngu cju a rë Nina xi tsajin yo vëë

¹⁴ Quihndë xi titsihindu ri cju a vihi ne, vetahá cá cun ta xati cuma cjuë tjëngë ri.

¹⁵ Peru sa xi cuindeya ná ne, cju a xi titsingátju ri vi ne, sua cumachaya ri hacutjin xi mameje rë xi sahmi xuta rë Nina. Hane xuta rë Nina jan ne, hacui ngayaan xi macjain naja Nina xi quicun, hacui ngayaan xi nújantjen ngatsë rë cjuaquixi.

¹⁶ Cjuatacun rë Nina xi tsajin yo vëë, xi macjain naja vi ne, suvá tsejen ta jemu vengui chjí rë:

Cristu Jesús ne, hya xi canduva me nguehe ngasunhndë vihi ne, camá me ngu xuta sacuahatjin ngayaan xuta.

Peru tsajin camahani jyë rë me, chja Hasen xi tsëhë Nina.

Hacuaha cavëë ángel me.

Hane camachaya rë xuta tsëhë me yëjë ni nangui.

Hacuaha camacjain rë xuta me jingujyë ni ngasunhndë.

Hacuaha cafahatsja Nina me ngajan ngahnga.

4

Xuta xi vicuya cjuandacha

¹ Quihndë ne, Hasen rë Nina ne, chja quixi ta cuechu nixtin xi yahnga xuta ne, cuiyujuxin me cju a tsëhë Cristu Jesús, cju a xi macjain naja, hane tu cju a tsëhë xitsehen xi vindacha ne, vëhë scutaya me hacua ha vëhë cuetaharcu me.

² Hacuaha cuetaharcu me cju a xi cuicuya xuta xi jo xcun jo hntsua xi vindacha. Sacuahatjin má taja chuxin rë ndyaja hiscan xi faha chu quicha ne, cuatjin cuetsun cjuatacun rë xuta ndacha xi cuacun vë.

³ Cjuavixan ne, suaan me cahndë cuma, hacua ha cuichja me ta tjin yahnga xcusun xi ndajin xi xinë. Peru Nina ne, casahmi me yëjë ni xcusun ne, cuma xinë ngayejen ni xi macjain naja me, ngayejen ni xi cavijnercun cjuatacun xi cjuaquixi. Peru meje rë xi tahan nacuechji rë me ta,

⁴ yëjë ni xcusun xi Nina casahmi me ne, jemu ndaja. Vëhë xi mijí rë xi nitjunnguen tu mé ni xcusun, ta meje rë xi chjahanntsán, peru tahan nacuechji rë Nina.

⁵ Hane ngatsë rë cju a rë Nina cojo cju a xi nújan hya xi tahan nacuechji rë me ne, vëhë sahmi xi tsajin tsavi tsëhë tu mé ni xcusun.

Ngu me xi ndaja sahmi xa rë Cristu Jesús

⁶ Sa xi tehe rë xuta ladu rë Nina yëjë ni cju a xi sehe catsihindu ri vë ne, jemu ndaja nihñi, xi tiniñi xa rë Cristu Jesús. Hacuaha hitsë sa cuma jyë cjuatacun riji ngatsë rë cju a xi macjain naja, hacua ha ngatsë rë cjuandaja xi cachutaye xi nihñi.

⁷ Peru xi canihñicuendiin yëjë ni cuentu rë xutachanga naja ta, hacuiin yëjë xi machjirëhë ta, ngu jo ne, suvá ni xutachanga naja, me vëhë xi cavaxëcun me. Cahndë rë vëhë ne, ngaye ne, nihñi ngahñu yëjë ni nixtin xi tsejen xi chjehercuin rë Nina nguñajatacuin.

⁸ Xi niniyan yojo naja ne, jemu ndaja tjin. Peru hitsë sa ndaja tjin xi tsejen xi chjahanrcun rë Nina ta, tsëhë xi hya xi cuatjin nihña ne, sacu naja cjuandaja rë Nina quihndë nguehe xcun cjuahña naja, hacuaha ni tjin ngajan xcun Nina.

⁹ Cjua xi titsihindu vi ne, hatuxa vechu chuva rë xi cumacjain naja ta, tsëhë xi jemu cjuaquixi.

¹⁰ Vëhë xi jercu tinihña xa, tsëhë xi ha vetahan tacun Nina xi quicun, Nina xi vaxëtje naja ngayejen ni ngayaan xuta, hacutjin ngayejen ni ngayaan xi macjain naja me.

¹¹ Ticoye rë xuta cjuatacun xi catsihindu vë, hane hisca titexe rë me.

¹² Nihñi cjuandaja ne, sehe tsajin yo xi chuyiin rë tsiji ngatsë rë xi chuva nu riji. Nihñi cjuandaja ne, sehe xuta xi macjain rë Nina ne, xi scuëë me hacutjin nihñi ne, hacuaha ni tjin sahmi me; sacuaha tjin xi ha noje, sacuaha tjin xi nihñi, sacuaha tjin xi hmu tacuin xinguin, sacuaha tjin xi macjain ri Nina, sacuaha tjin xi ndajyihî xahasen riji.

¹³ Nguyëjë rë xi cjëë cjuëhë ne, hña tinoje cojo xujun rë Nina, hya xi ma tangun xuta ngajan yungun. Ndaja tinoje cojo rë me ne, catisahmi me cjuandaja, hacuaha ticoye rë me.

¹⁴ Nihñixe cojo cjuatjo xi Nina casua ri me, nixtin hya xi me xi vitexa xuta ladu rë Nina ne, cavetahatsja ri me. Cuatjin camá ta, tsëhë xi cuatjin cachja Nina cojo ngu xuta xi hmí profeta xi cuatjin meje rë me xi cuma.

¹⁵ Nihñi nguñajatacun ngayëjë ni hacutjin xi vitexa xujun vi. Xi cuatjin ne, ngayëjë ni xuta scuëë me hacutjin tihmi xcun cojo cjuandaja rë Nina.

¹⁶ Cuidadu ni tjin ri tsiji sove, hacuaha cojo cjuatacun xi vicoye. Tu chihin ni tihincueje cjuatacun vë. Sa xi cuatjin nihñi ne, cuma naxetje yojo riji, hacuaha cuma naxetje me xi cuiseñuju cjuatjo xi vicoye.

5

Hacutjin xi cuitexe rë xuta ladu rë Cristu

¹ Sa xi ngu me xi ha nchava ne, choho sahmi me ne, hacuain cuinojetehe rë me ta, cojo jeya tinoje cojo rë me, hacutjin xi sahmi me cjuandaja, sacuaha tjin xi nújan cojo nahmi naja. Hacuaha cojo xuta xihin, me xi vasen xuta ni ne, tinoje cojo rë me sacuaha tjin xi nújan cojo tseen.

² Hane yachjin xi ha chicuhun me ne, cojo cjuandaja tinoje cojo rë me sacuaha tjin xi nújan cojo naa naja. Hacuaha cojo yachjin xi vasen xuta ni me ne, tinoje cojo rë me sacuaha tjin xi nújan cojo na xi tichjan, cojo ngu xahasen ndajyihî.

³ Yachjin cahan xi cjuaquixi xi tsajin yo ngatsë rë me ne, meje rë xi chjahanrcun rë me, cuisecoon rë me.

⁴ Peru ngu chjuun cahan ne, sa xi tjin rë na quihndi o quihndindai ne, catisahmi nixti jan cjuandaja, catisecoo rë na, cojo sa xi cuatjin sahmingojo nixti jan cojo xutacha rë. Xi cuatjin cuma ne, hatuxa chuya rë Nina.

⁵ Tjin chjuun xi cjuaquixi xi cahan me, me xi ha siu súvâ. Me vëhë xi vetaha cacun me Nina, hane sahmi me oración, fehya me cjuandaja rë Nina nixtin nixten.

⁶ Peru hacuaha tjin chjuun cahan xi sahmi ni me hacutjin xi ma sua rë xahasen rë me. Hane chjuun cahan xi cuatjin sahmi jan ne, handasa ndaja cun cjuahña rë me ne, peru cjuatacun xi sahmi me ne, tsajin mé machjirëhë.

⁷ Cuatjin tinoje cojo xuta ladu rë Cristu, sehe tsajin mé jyë rë me cojo xutacha rë me.

⁸ Peru sa xi ngu xuta marcuaain rë me tsëhë xuta rë me, o sa xi marcuaain rë me tsëhë cahntsua ndava me ne, vëhë tsingacun naja xi catsitjungui me cjua rë Nina xi macjain naja. Hacuaha hitsë sa choho sahmi me xi cuma rë ngu xuta xi hatuxa macjaain rë Nina.

⁹ Xcun xujun xi yaja ñihî rë yëjë ni yachjin cahan ne, cumahindu ñihî rë na xi ha cafahâ rë xi jyanchan nu, na xi cavejña cojo ngu ni xihin,

¹⁰ na xi ha vëë xuta xi ndaja xcusun rë, xi ha casahmi yëjë ni cjuandaja vihi: ha catsicha na quihndi, ha cafahatsja na cojo cjuandaja xuta xi quiji tjengui me na ndava na, ha cavisecoo na yahnga me xi ladu rë Cristu, ha casua na cjuetacun me xi tjin rë ngu cjuacjintacun, hacuaha ha casahmi na jingu sa xcusun xi ndatjin.

¹¹ Peru xcun xujun jan ne, mijî rë xi cuaquí ñihî rë na cahan xi chuva nu rë, sá cuechu ngu nixtin xi ha quihndë sahmi na xa rë Cristu nguñajacuna na, hane meje nga cuixan na ngu ndiya.

¹² Xi cuatjin sahmi na ne, cuetjucaa jyë rë na, tsëhë xi tsichaja na cjuatjo xi ha catsinguisehenjñi na.

¹³ Hacuaha cuma tsëhë na xi tu tsujihya ni na ndava xuta. Hane hacuain tu súvâ ni cuma tsëhë na ta, hisca cuetsihin cuichja na cjuandesu, cuetsihin tsinguisehenjñi na jingu sa

cjuatacun xi cuendaain rë na, hacuaha cuetsihin cuisiajmi na cjua xi mamijí rë xi cuichja na.

¹⁴ Vêhë xi meje ná xi catixan nga na cahan xi chuva nixtin rë. Catisacu rë na quihndi, hacuaha catjahacuenda na cahntsua ndava na. Sehe xuta xi chuyiin rë me tsajan ne, sacuiin rë me hacutjin choho cuichja me tsêhë xcusun xi ndaja sahmi na yachjin cahan jan.

¹⁵ Cuatjin chjá ta, tsêhë xi tjin ngu jo na cahan xi ha cavetjuxin na tsêhë ndiya rë Nina, cavisehen na ndiya rë Satanás.

¹⁶ Ngu chjuun xi ladu rë Cristu me ne, sa xi tjin ngu chjuun xi xicjin me xi cahan ne, mijí rë xi xuta ladu rë Cristu sahmi me gastu ngatsë rë chjuun cahan jan ta, me xi xicjin ni na ne, catisecoo me na. Xi cuatjin ne, xuta ladu rë Cristu ne, cuma cuisecoo me yachjin cahan xi tsajin yo ngatsë rë.

¹⁷ Yêjê ni xuta changá xi ndaja vitexa me ngajñi rë xuta ladu rë Cristu ne, vechu chuva rë xi chjaharcun rë me hacuaha ndaja chjí sacú rë me. Peru me xi sahmi nguujê xi chjaharcun rë hacuaha ndaja chjí sacú rë me ne, me xi sua machaya rë xuta cjua tsêhë Jesús cojo me xi vicuya naja cjuachacun.

¹⁸ Cuatjin chjá ta, tsêhë xi xcun xujun rë Nina ne, cuitjin camahindu cjua vihi: “Mijí rë xi cueyún changa hntsua ngu ndyaja hya xi sahmi chu xa nuju xi sunesun chu naxu rë trigu xi cuetju trigu rë.” Hacuaha: “Ngu mosu ne, tjin rë cha chuva rë xi cjuaha cha chjí rë cha.”

¹⁹ Hya xi xinchajyë rë ngu xuta changá xi vitexa me xuta ladu rë Cristu ne, xi canihñicuendiin jyë jan sa xi ngu ni cha tichja cha. Hisca xi cjeueho jo jyan cha xi cavêë cha xcusun xi casahmi xuta changá jan ne, sehe nihñicuende jyë xi vincha cha.

²⁰ Peru me xi tisahmi jain cjuatsehen ne, tinoje cojo rë me xcun ni ngayêjê xuta ne, hacuaha yêjê ni xuta jan ne, tsacjun me cuma, hane sahmi me cjuatsehen.

²¹ Nihñi ngayêjê ni cjua hacutjin xi titsihindu ri. Hacuaha meje rë xi chuva xi nihñi cojo ngu ne, nihñi cojo ngayêjê ni xuta, sa xi vinga ri me o sa xi vingaaan ri me. Hisca Nina cojo Cristu Jesús cojo ángel xi cavaxijin me ne, vëë me hacutjin xi titsihindu ri vi.

²² Cuechu nixtin xi cuma meje sa xuta xi cjuahatsja me xa ngajñi rë xuta ladu rë Cristu, sacuaha ngu me xi cuitexa, o ngu me xi sahmi tu mé ni ngu xa xi cuma meje. Peru hacuiin marcu macjain cuinoje yo xuta xi satê rë xa jan. Ndaja ningatehetacuin titjun yo xuta xi ndaja me ta, tsêhë xi mijí rë xi ninguisihinjñi cojo xuta tsehen. Hisca sove ne, mijí rë xi nihñi cjuatsehen.

²³ Ha quihndé xi cahyiin suvá ni nandá ta, sihi hitsë xan rë uva ngatsë rë cahntsue, hacuaha ngatsë rë chíhin xi tu quitaha tu quitaha sacu ri.

²⁴ Tjin xuta xi suvá tsejen tsêhë me xi sahmi me cjuatsehen. Hane cjuatsehen ni rë me jan ne, vëhë sahmi xi cuma me castigu. Hacuaha tjin yahnga xuta xi matsijin tsêhë me xi sahmi me cjuatsehen. Peru xi cuma ngascan ne, cuma tsejen xi cun xi má me cojo jyë rë me.

²⁵ Hacuaha ni tjin xcusun xi ndaja ta suvá tsejen. Hane ha ndaja sa hacuiin ngutjen cuma tsejen, peru hatuxa cumaji cuiyujuhma ta, tjin xi cuma tsejen.

6

¹ Xuta ladu rë Cristu xi má mosu hndixahan rë ngu xuta ne, jemu meje rë xi cjuaharcun me xuta xi má nai rë me. Sa tsajin ne, choho cuma cuichja xuta tsêhë Nina hacuaha cojo tsêhë cjuachacun xi vicuyan.

² Hane me xi nai rë mosu hndixahan jan ne, sa xi macjain rë me Cristu ne, mijí rë xi choho scuëë hndixahan jan me, tsêhë xi tangun ni macjain rë me Cristu. Cahndé rë xi choho scuëë rë me ne, meje rë xi cuisecoo hndixahan jan me yêjê ni xa xi cuitexa me ta, tsêhë xi me xi cuma tsêhë yêjê ni cjuandaja xi sahmi hndixahan jan ne, xuta ladu rë Cristu me. Hane vëhë xi jemu hmucacun hndixahan jan me. Tinoje cojo xuta yêjê ni cjua vëhë, hya xi cuicoye rë me.

Cjuandacha cojo cjuanchina

³ Sa xi ngu xuta vicuya me ngu cjuachacun xi hacjahi fi ne, sa xi manguaaincacun me cojo cjua xi cjuaquixi xi cachja Nai naja Jesucristu ne, hacuaha manguaaincacun me cojo cjuachacun xi tsêhë Nina ne,

⁴ me vëhë ne, ngu xuta xi jemu sahmi jyë me yojo rë me. Peru hvíin camaha ni me, hacuaha machjiriin cjuatacun rë me ta, tsêhë xi jemu meje cuisiajmi me tsêhë tu mé ni cjua: “Cuitjin vijne cjua vëhë; jéya, cuatjin vijne”, chja me. Hatuxa jemu meje scaan me cojo cjua ngajñi rë cjuavisiajmi rë me. Hane xi cuatjin visiajmi me ne, vetjucaa cjuaxintacun, vetjucaa cjuahngatacun, hacuaha choho chja me tsêhë xicjin me, choho tsingatahacacun me tsêhë xicjin me,

⁵ hacuaha ngajan fë ngajan vetsihin ticjan me cojo cjuua, xi tsajin hiscan cuijnetaha. Cuatjin sahmi me ta, tsëhë xi ha cavetsun cjuatacun rë me ne, cjuua xi cjuaquixi ne, hvîn camahani me. Xi tsingatahacacun me ne, xuta xi faharcun rë Nina ne, jemu ndaja cuatju me cuma ta, jercu sacü rë me cjuanchina.

⁶ Bueno, quixi ta ndaja cuátjun cuma xi tsejen xi chjahanrcun rë Nina, sa xi cumangutacun cojo xi tjin naja.

⁷ Ta tsajin camahani mé quichahan xi catsin yaan xi cafehen ngasunhndë vi, hacuaha tsajin camahani mé xi cuma cuanguenocjon, hya xi cueyan.

⁸ Peru sa xi ha tjin naja xi xinë cojo xi chajan ne, meje rë xi cojo vëhë ne, cumangutacun.

⁹ Peru xuta xi jemu meje rë me cuma nchina me ne, ndaya ndaya ni tsingatihin me xi cumandacha me xi sahmi me cjuatsehen. Xitu tsingusehenjñi me ngajñi rë cjuatsehen jan ne, ha quihndë cumaji cuetjuxin me, sacuatjin rë ngu chu xi jiyahñu cahntsua ngu chen. Hacuaha jemu cjin xcusun yumahasen xi meje rë me. Peru machjiriin xcusun jan ta, tu tsichaja tu tsinguetsun ni rë cjuatacun rë me.

¹⁰ Sacuaha xuta xi jercu meje rë me tujún ne, jemu cjin xcusun cjuatsehen sahmi me xi sacü rë me tujún. Yahnga me xi cuacun jan ne, hisca caviyujuxin me cjuachacun xi macjain naja. Hane ngatsë rë xi cavetjuxin me ne, vëhë xi jemu choho tivatju me jima.

Pablo ne, tsinguixi me Timoteo

¹¹ Peru ngaye xi ladu rë Nina ngaye ne, tihinxin tsëhë xcusun xi cuacun vëhë. Tihin tjengui ndiya xi tsëhë cjuaquixi, hacuaha nihñi hacutjin xi Nina chuya rë me. Ndaja cata-macjain ri me, hacuaha ndaja nihmutacuin me. Caticaa ri xcun ngayëjë ni cjuacjintacun xi cuátji cuma, hacuaha nihñi jeya cjuatacun riji.

¹² Nihñi ngahñu xi yëjë ni xcusun xi nihñi ne, cumatangun cojo cjuatacun xi macjain ri, sehe sacü ri cjuahñu xatsë ngajan xcun Nina xi tsajin nixtin cjuë. Tsëhë vëhë xi Nina cavaxijin ri me. Hacuaha ha catehe cjuaquixi riji xcun jemu cjin xuta hacutjin xi macjain jain ri Nina.

¹³ Nina xi tisua me cjuahñu rë ngayëjë ni xi tjin ne, vëë me hacutjin tivitéxa ri. Hacuaha Cristu Jesús, me xi casua cjuaquixi rë xcun Poncio Pilatu ne, vëë me hacutjin tivitéxa ri.

¹⁴ Cjuua xi tivitéxa ri ne, tinohye. Hacuain nindeye cjuua vë ta nihñichihin, hisca xi cuechu nixtin xi cuinduva nga Nai naja Jesucristu.

¹⁵ Hane hya xi cuechutaha nixtin vëhë ne, Nina tsingatju nga me Jesucristu. Nina ne, me vëhë xi ndaja me, me vëhë xi tyjahi me. Ngu ni me vëhë xi matitjun me. Matitjun me tsëhë ngayëjë ni xi matitjun. Matitjun me tsëhë ngayëjë ni xi vitexa.

¹⁶ Ngu ni me vëhë xi tsajin nixtin cueya me. Tacun me xcun ngu ndavá seti ndajyihí, xi tsajin yo cuma cuechu. Hacuaha tsajin yo cavëë rë me, hacuaha hisca ngu cumaji scutsejen rë me. Me vëhë xi catjaharcun xuta me. Me vëhë xi catitexa me yëjë ni nixtin yëjë ni hora. Cuatjin jain.

¹⁷ Xuta xi jemu tjin rë me cjuanchina rë ngasunhndë vihi ne, titexa rë me xi hacuain sahmi yehe me yojo rë me. Hacuain cuetaha cacun me cjuanchina xi tjin rë me ta, vëhë ne, tsajin cjuaquixi xi cjuecani rë. Peru catetaha cacun me Nina ta, Nina ne, hacuain choho me ta, me vëhë xi sua naja me yëjë ni xcusun xi ndajyihí tsajan.

¹⁸ Hacuaha tinoje cojo rë xuta nchina xi cuacun jan ne, yehe cjuandaja catisahmi me cojo ngayëjë ni xuta. Mijí rë xi choho me.

¹⁹ Xi cuatjin sahmi me ne, tivetjo me cjuandaja xi sehe cumachjirëhë rë me, hacuaha sacü rë me cjuahñu xi cjuaquixi.

Cjuua xi vijnetaha

²⁰ Ngaye Timoteo ne, chjehecuende cjuua xi ha ntse siu. Xi cavetinrcuain cjuavisiajmi yumahasen xi chuyiin rë Nina tsëhë. Hacuaha xi cavetinrcuain yëjë ni cjuua rë xuta xi hisca ngajñi rë me matanguaain cjuua rë me, handasa chja me xi jemu vechu cjuatacun rë me xi vijnercu me cjuua.

²¹ Peru me xi cuatjin chja ne, ha cavetjuxin me tsëhë cjuachacun xi macjain naja. Nina catisua nuju me ngayujun ni cjuandaja rë me.

Xujun xi majo xi catsihindu San Pablo cojo Timoteo

¹ Ngahan Pablo ne, apóstol tséhë Cristu Jesús má ngahan ta, tséhë xi cuatjin meje rê Nina. Véhë xi catsingatju ná me, xi cuichjá cojo xuta ta sua naja me ngu cjuahñu ndajjihi, sa xi nihña tangun cjuatacun naja cojo Cristu Jesús.

² Ngaye Timoteo ne, tsihindu ri xujun vihi ta, tséhë xi sacuaa quihndi ndaja naha ngaye. Nina Nahmi naja cojo Cristu Jesús Nai naja ne, catamayuma rê me ngaye, catisua ri me cjuandaja, cjuajeya.

Tisua me cjuaquixi tséhë Nina

³ Nixtin nixten, hora xi sahme oración naha ne, jercu veyanangë ri, hacuaha suá nacuechji rê Nina. Hacuaha sahme xa rê Nina cojo ngu cjuatacun tyahi, sacuahatjin casahmi xutachanga naha.

⁴ Vitsjen ná hacutjin cachjihnde, ngatsë rê xi cavëtju cëjë tsiji. Hacuaha jemu meje ná xi ndove tjengui ná, sehe ngahan ne, jemu ndaja cuma ná.

⁵ Hacuaha vitsjen ná hacutjin xi jemu ndaja macjain ri cjuarê Nina, sacuaa tjin xi titjun camacjain rê chicuhun riji, chicuhun Loida, cojo na Eunice naa riji. Hane fëmangúcacun xi cojo ngaye ne, ha cuatjin ndaja macjain ri.

⁶ Véhë xi chjá cojo ri ta xi catiin cahndë xi cjuë cjuatacun xi casua ri Nina, hya xi cavétahantsa ri.

⁷ Ta Nina ne, hacuain casua naja me ngu cjuatacun xi ngayaan ne, cumacjintacun ta, casua naja me ngu cjuatacun xi sacú naja ngahñu, xi nihña hmu tacuun xingueen, hacuaha xi scaa naja cuetjoon yojo naja.

⁸ Véhë xi hacuain nihñi savá, hya xi cuinoje cjuandajjihi tséhë Nai naja. Hacuaha hacuain nihñi savá ngatsë naha ngahan xi tejñaya ndavaya, ngatsë rê xi chjá cjuarê me. Hacuain nihñi savá ta, nihñi ngahñu cojo yëjë ni cjuañihi xi cuatji cuma, ngatsë rê cjuandajjihi xi tinoje. Cuatjin nihñi hacutjin chutaha ngahñu xi tisua ri Nina.

⁹ Nina ne, cavaxëtje naja me hacuaha cavaxijin naja me, xi cuma tséhë me ngayaan. Hacuain ngatsë rê xi jemu ndaja canihña xi cuatjin casahmi me ta ngatsë rê xi cuatjin meje rê me, tséhë xi jemu ndaja me. Hisca xi chaja sa cueña ngasunhdë ne, ha catsingatahacacun Nina xi sua naja me cjuandaja rê me, ngayejen ni xi tséhë Cristu Jesús ngayaan.

¹⁰ Hane hya xi cafehe Cristu Jesús, me xi vaxëtje naja ne, hya camachaya jain naja cjuandaja rê Nina jan. Hane Cristu jan ne, catsicjë me ngahñu rê cjuaveya, hacuaha casuacuenta naja me ta sua naja Nina ngu cjuahñu ndajjihi, xi tsajin nu tsajin nixtin cueyan nga. Véhë cjuatacun xi vicuya naja cjuandajjihi rê me.

¹¹ Nina ne, casua ná me xa xi suá cumachaya rê xuta hacuaha cuicuyá rê xuta cjuandajjihi rê me.

¹² Ngatsë rê xa véhë ne, jemu cjin cjuañihi tivátju jima. Peru ma savaain ná, tséhë xi ha hvë Cristu, hacuaha camangucácun cojo rê me. Hacuaha tjin ná cjuaquixi xi me véhë ne, jyë me cojo cjuatacun rê me xi cuetjo ná me, hisca nixtin xi cuinduva nga me nguehe ngasunhdë.

¹³ Nihñi sacuaa tjin cjuaquixi xi ha cachjá cojo ri. Hacuaha nguñajatacun catamacjain ri Nina, hacuaha nihñi hmutacuain xinguin, tséhë xi ngaye ne, ladu rê Cristu ngaye.

¹⁴ Nihñicuende cjuaquixi xi casua ri Nina. Hane Hasen rê Nina xi tacun cahntsua xahasen naja ngayejen ni xi macjain naja me ne, Hasen véhë xi sua ri ngahñu xi cuatjin nihñi.

¹⁵ Ngaye ne ha hye xi ngayëjë ni xuta xi tséhë ladu xi hmí rê Asia ne, casmicacun ná me. Ngajñi rê xuta xi cuacun jan ne, hinchajñi cha Figelo cojo cha Hermógenes.

¹⁶ Peru cha Onesíforo ne, catamayuma rê Nina yëjë ni ndava cha ta, tséhë xi jemu cjin ndiya xi casahmi cha cjuandaja xi cavisecoo ná cha. Hane cama savaain rê cha xi tejñaya ndavaya.

¹⁷ Xi tu cafehe cha nguehe nandya Roma ne, cavetsihin cavanguise cha ngahan, hisca xi casacu rê cha ngahan.

¹⁸ Nai naja ne, catamayuma rê me cha, nixtin hya xi cuinduva nga me nguehe ngasunhdë. Ta ngaye ne, ha ndaja hye hacutjin xi jemu cavisecoo ná cha ngajan nandya Efeso.

2

Xuta xi ndaja sahmi me xa rê Cristu

¹ Peru ngaye tsan ne, catisua ri Cristu Jesús cjuandaja rê me, xi cuma cuinechin nguñajatacun.

² Jemu cjin xuta xi hacuaha caviseñuju me yějē ni cjaa xi cachjá cojo ri. Peru quihndē ne, meje rē xi ticoye rē ngujo cha cjaa jan, cha xi tsejen xi mangutacuin cojo rē hacuaha chutaha cjuatacun rē, sehe cha xi cuacun jan ne, hacuaha cuicuya cha xuta xi yahnga.

³ Ngaye ne, nihñi ngahñu xi scaa ri cojo yějē ni cjuañihi xi cuátji cuma ngatsē rē Cristu Jesús, sacuaa tjin caa rē ngu sindadu xcun ngu si.

⁴ Hane sindadu xi hinchajñi cha tséhē xa xi yaha cha ne, cumaji tsinguissehenñi cha tu mé ni xa ta, tjin rē cha xi sahmi cha hacutjin xi chuya rē me xi matitjun tséhē cha.

⁵ Hacuaha ngu cha xi cuisehen xcun ngu juegu xi ntsavē cha ne, sa xi chohotjin ntsavē cha ne, sacuiin rē cha cjuatjo, handasa tjun cha cuetju cha.

⁶ Hacuaa cha xi sahmi xa nguijnā ne, meje rē xi cha véhē xi titjun satē rē cha tséhē xitjē xi casahmi cha.

⁷ Ndaja ningatehetacuin hacutjin cjaa xi tichjá cojo ri. Sehe Nai naja ne, me véhē sahmi me xi cuijnerci cjaa vē.

⁸ Ninguitsjin xi Jesucristu ne, cavascaya rē me ngajñi rē nima, hacuaha canduva tjē rē me xutachanga naja David. Véhē cjuandajyihí xi ngahan visiajme cojo xuta.

⁹ Hane ngatsē rē xi cuatjin visiajme cjuandajyihí jan ne, véhē xi choho tivátju jima. Hisca quitahañu rē xuta ngahan nguehe ndavaya, sacuaa tjin rē ngu xuta tsehen xi yehe jyē rē. Peru cjaa rē Nina ne, hacuiin quitahañu.

¹⁰ Véhē xi ticaa ná ngayējē ni cjuañihi xi tivátju jima, cojo sa xi yějē ni xuta xi cavaxijin Nina ne, cuetjutje me ngatsē rē xi macjain rē me Cristu Jesús, hacuaha cuechu me xcun Nina ngajan cuiyuju me nu cjui nu nduva.

¹¹ Cjaa vihi ne jemu cjuaquixi:

Sa xi ha macjain naja Cristu hya xi cueyan ne, hacuaha cuinechan quicun nga cojo rē me;

¹² sa xi ha cacaa naja ne, hacuaha cuisecoon rē me cuitexan.

Sa xi ha canújan xi hyaan yo me ne, hacuaha ni tjin cuichja me ta hvín me yo ngayaan.

¹³ Handasa ngayaan ne, nihñacheen cjaa naja, peru me véhē ne, hatuxa sahmi chihin me cjaa rē me ta,

tséhē xi hatuxa vindachaa in me.

Hacutjin xi Nina chuya rē me

¹⁴ Ninguitsjin rē xuta jan cjaa xi chjá cojo ri. Hacuaha tinojetehe rē me xi ha quihndē scaain me cojo cjuavisiajmi rē me ta, tséhē xi cuatjin meje rē Nina. Venguin camahani chji rē xi cuatjin ticjan me cojo cjaa ta, xi cuatjin sahmi me ne, tu titsinguetsun me cjuatacun rē xuta xi viseñuju.

¹⁵ Nihñi nguýē xi Nina ne, chuya rē me tséhē xa xi tinihñi. Xi cuatjin ne, tsajin mé nihñi sava ta, tséhē xi ha chihin tivicoye rē xuta cjaa xi cjuaquixi.

¹⁶ Xi caninguisinñii ngajñi rē cjuavisiajmi ngarca xi tsajin mé machjiréhē xi visiajmi xuta ta, me xi cuatjin visiajmi ne, quihndē nga nchujun ne, tijima yehe sa cjuatsehen xi tjin rē me.

¹⁷ Hacuaha cjuavisiajmi rē me xi cuacun jan ne, tangun cojo hiscan xi hmu, xi quihndē nga nchujun ne, tijima tojo sa. Cuatjin tivatju cha Himeneo cojo cha Fileto ta,

¹⁸ tséhē xi ha cavetjuxin cha tséhē ndiya rē cjuaquixi. Chja cha ta quixiin xi cuascaya naja hya xi ha caveyan. Hane cojo cjaa véhē ne, titsinguetsun cha cjuatacun rē ngujo xuta xi macjain rē me Nina.

¹⁹ Peru Nina ne, cavejña me ngu cjuatacun xi hatuxa cjuaquixi, xi tsajin yo cuma tsinguetsun rē. Hacuaa jo cjaa rē Nina xi hatuxa cjuaquixi. Ngu ne, chja cuitjin: “Nai naja ne, vēē me jarē xuta xi tséhē me”; ngu nga ne, chja cuitjin: “Yějē ni xuta xi chja me xi ladu rē Nai naja me ne, meje rē xi catiyujuxin me tséhē cjuatsehen.”

²⁰ Ndava ngu xuta xi ndaja vatju me ne, jemu cjin xcusun trasti xi tjin. Tjin trasti xi tséhē oro cojo xi tséhē quicha. Hacuaa tjin xi tséhē ya cojo xi tséhē nihndē. Ngujo trasti jan ne, jemu machjiréhē. Hane ngujo nga ne, chuva machjiréhē.

²¹ Cuatjin naja ngayaan xuta ladu rē Cristu ta, jemu tecjanñi ngayaan. Peru xi cuma yaan xuta xi vengui chji rē ne, meje rē xi cuiyujuxen yějē ni cjuatsehen. Xi cuatjin ne, cuma tyjahi cjuatacun naja, cumachjiréhē rē Nai naja ngayaan, hacuaha tjin ndaja ngayaan xi nihña yějē ni cjuandaja.

²² Yějē ni cjuatacun tsehen xi meje rē xuta xi chihndē me ne, ngaye ne, tiyijixin. Tihin tjengui ndiya rē cjuaquixi. Catjē catamacjain ri. Tihin tjengui cjuahmutacun. Tihin tjengui cjuajeya, sacuaa tjin sahmi yějē ni xuta xi cojo ngu cjuatacun tyjahi fehya rē me Nai naja xi cuisecoo rē me.

²³ Hya xi tivinenguise xicjin xuta tséhē cjaa ngarca xi venguin chji rē ne, xi canihñicundiin cjaa xi chja me. Tséhē xi ha hye ta tséhē cjaa véhē ne, hatuxa cuetjucaa ngu si.

²⁴ Hane xuta xi sahmi xa rë Nai naja ne, mijí rë xi sircu me ta meje rë xi ndaja me cojo ngayëjê ni xuta. Meje rë xi quicun cacun me xi cuicuya me xuta. Meje rë xi yehe cacun me.

²⁵ Hacuaha xuta xi chuyiin rë me tsêhê cjuaquixi ne, meje rë xi cuma quixi me, peru cojo cjuandaja cojo cjuajeya. Xi cuatjin ne, cuma xi sua Nina cahndê xi cuindeya cjuatacun rë xuta xi cuacun jan, hacuaha xi cuijnercu jain me cjuaxi xi cjuaquixi.

²⁶ Sehe hacuaha sacú nga rë me cjuatacun ndajyihí, hacuaha cuetjutje me tsêhê xitsehen matitjun xi cavindacha rë me. Cavindacha xitsehen xuta jan, xi casahmi me yëjê ni hacutjin xi meje rë xitsehen jan.

3

Nixtin xi cuijnetaha

¹ Catijnercui cjuaxi vihi: hya xi cuma tiña nixtin xi cjuê ngasunhndê ne, jemu choho cuatju xuta cuma ta,

² tsêhê xi xuta ne, cuitjin sahmi me: meje rë me xi súvá ni me ndajyihí cuatju me cuma; jercu sahmi me cojo tujún; jemu haxi me ta jercu cuichja me xi ndaja vatju me. Hacuaha jercu sahmi hngacacun me; choho cuichja me tsêhê xicjin me hacuaha choho cuichja me tsêhê Nina. Cuihndiin me tsêhê xutacha rë me. Hisca ngu nacuechji naja suaain me, hisca ngu nacuechji rë Nina suaain me. Cuendaain rë me tsêhê Nina;

³ tsajin rë me cjuahmutacun; tsajin rë me cjuayumatacun; cuichja me cjuandesu. Hacuuiin cuetjo me yojo rë me; jemu sahmi xcuahya me; chuyiin rë me tsêhê yëjê ni cjuandaja.

⁴ Jo xcun jo hntsua me ta, cuitëña xicjin me; jemu tujyê sahmi me; jemu sahmi yehe me yojo rë me. Chuyiin rë me tsêhê Nina ta cjuasua xi tsêhê ngasunhndê ne, vêhê jemu chuya rë me tsêhê.

⁵ Hacuaha sahmi me xcusun rë xuta xi macjain jain rë Nina, peru tsitjungui me hacutjin xi cjuaquixi.

Xi caninguisinjñii cojo xuta xi cuacun vë ta,

⁶ tsêhê xi ngajñi rë me ne, hinchajñi cha xi vanguise chuya rë xi cuma cuisehen ndava xuta, hane cuindacha cha yachjin xi ha tsingatihin mandacha. Tsingatihin na mandacha na ta, tsêhê xi jemu va tjin cacun na tsêhê jyê rë na, xi tisahmi na yëjê ni hacutjin xi xahasen rë na meje rë.

⁷ Hacuaha yachjin jan ne, jemu vutaya na yëjê ni cjuatacun xatsê, peru hatuxa vijniircu na cjuaxi xi cjuaquixi.

⁸ Ha hye ta hatsëê nixtin ne, jo cha surqui xi hmí Janes cojo Jambres ne, casahmi cha condra xutachanga naja Moisés. Hacuaha ni tjin rë cha ndacha xi cuacun jan ne, sahmi cha condra cjuaxi xi cjuaquixi ta, cavetsun cjuatacun rë cha, hacuaha machjiriin cha xi cumacjain rë cha Nina.

⁹ Hane hacuiin jemu xcun cuma cjuex cha cojo cjuaxi ndacha rë cha ta, tsêhê xi ngayëjê ni xuta ne, cjuahacuenda me xcusun yumahasen xi cun cha, sacuatjin cama tsejen xcusun yumahasen xi cun cha surqui xi cuacun jan hatsëê nixtin.

Pablo ne, tsinguixi me Timoteo

¹⁰ Peru ngaye ne, jemu ndaja tichutaye cjuaxi xi vicuyá cojo xcusun xi sahme cojo cjuatacun xi tjëngê. Hacuaha jemu ndaja hye hacutjin xi fê macjain ná, hacutjin xi jyê cáacun, hacutjin xi hmu cáacun, cojo hacutjin xi ndaja ticaa ná.

¹¹ Hacuaha ndaja camachaya ri tsêhê yëjê ni cjuañihí xi cavátju camá. Jercu choho cavátju camá ngajan nandya Antioquia cojo Iconio cojo Listra. Peru Nai naja ne, cavaxëtje ná me tsêhê yëjê ni cjuañihí xi cavátju camá jan.

¹² Hacuaha yëjê ni xuta xi meje cjuaharcun me Nina ta tsêhê xi macjain rë me Cristu Jesús ne, hatuxa tjin xi cuatju me cjuañihí.

¹³ Peru xuta tsehen cojo xuta ndacha ne, quihndê nga nchujun ne, tichaja sa cjuatacun rë me, xi vindacha me yahnga xuta ne, hacuaha jima ndacha súvá me.

¹⁴ Ngaye ne, hacuiin cuejñixin cjuaxi cachutaye, cjuaxi café ma ngu tacuin cojo. Ha hye yo xi cavicuya ri ta,

¹⁵ tsêhê xi hisca cjuaquihndi riji ne, cachutaye xujun rë Nina. Hane xujun jan ne, vêhê sua machaya ri xi Nina ne, cuaxëtje naja me, ngayaan xi macjain naja Cristu Jesús.

¹⁶ Nina ne, casua me cjuatacun rë me ngujo xuta, sehe xuta jan ne, catsihindu me xujun rë Nina. Vêhê xi xujun jan ne, jemu machjirêhê xi cuicuya naja, xi cuichjataha naja, xi tsinguixi naja, xi cuincha naja ndiya rë cjuaquixi,

¹⁷ cojo sa xi ngayaan xuta ladu rë Nina ne, cuechutaha cjuatacun naja xi cuma nihña yëjê ni cjuandaja.

4

¹ Tivutsejen naja Nina. Hacuaha tivutsejen naja Cristu Jesús, me xi tsichuva naja ngayëjë ni ngayaan xuta, sa xi quicun cuaha ngayaan, o sa xi caveyan. Tsëhë xi cuinduva nga me, hacuaha tsëhë xi cuitexa naja me ne, vëhë xi chjá cojo ri ta

² tinoje cjua rë Nina cojo xuta. ¿Há chuya rë me? ¿há chuyiin rë me? peru tsmii sahmi rë, tinoje cojo rë me. Hacuaha tinojetehe rë me. Ninguixi me. Ticoye rë me. Peru nijyëtacuin cojo rë me.

³ Cuatjin nihñi ta, tsëhë xi cuetjucaa nixtin xi xuta ne, ha quihndë chuyiin rë me tsëhë cjua xi cjuaquixi. Sahmi me hacutjin xi meje rë me, hane cuihndë me tu mé ni cjua xi cuicuya maestru xi yahnga ta, maestru xi cuacun jan ne, suvá cjua xi chuya rë xuta ne, vëhë cuicuya me.

⁴ Cuatjin xi xuta ne, sahmi ngaxtun me cjua xi cjuaquixi ne, tu cuentu xi machjiriin ne, vëhë cuetaha rcu me.

⁵ Peru ngaye ne, meje rë xi tacun cahndë cjuatacun riji ngajñi rë tu mé ni ngu cjuacjintacun. Hacuaha tehe tacuin tsëhë yëjë ni cjuañihi. Tinoje cojo xuta cjua rë Nina, nihñichihin xá xi casua ri me.

⁶ Ngahan ne, chuva sa nixtin xi cjuë ngahan. Ha cama tiña nixtin xi cueya.

⁷ Ndaja casahme xa, casahmechehen xa xi casua ná Nina. Hacuaha ndaja macjain cuaha ná Nina.

⁸ Vëhë xi ha tjin ndaja cjuatjo xi sacú ná, tsëhë xi tyahi cjuatacun naha. Nai naja, me xi tsichuva naja cojo cjuaquixi ne, me vëhë xi sua ná me cjuatjo jan hya xi cuechutaha nixtin. Hacuaha hacuiin tu suva ni ngahan xi sua ná me ta cojo ngayëjë ni xuta xi jemu meje rë me xi cuya nga Nai naja.

Pablo ne, fehya me ngu cjuandaja

⁹ Nihñi xati tacuin ndove tjengui ná ta,

¹⁰ tsëhë xi cha Demas ne, cavetjuxin cha tsahan, quiji cha ngajan nandya Tesalónica. Cuatjin casahmi cha ta, tsëhë xi hitsë sa chuya rë cha tsëhë xcusun rë ngasunhndë. Cha Crescente ne, quiji cha ladu tsëhë Galacia. Hane cha Tito ne, quiji cha ladu tsëhë Dalmacia.

¹¹ Hane suvá ni cha Lucas quitaha cha cojo ná. Noje cojo cha Marcos ne, sehe ndove cojo cha ta, tsëhë xi jemu machjirëhë cha xi cuisecoo ná cha tsëhë xa xi sahme.

¹² Cha Tíquico ne, catsingátju cha ngajan nandya Efeso.

¹³ Hya xi cuindove ne, ndovecueje tsjian tsangá naha xi cavejñá ndava cha Carpo, ngajan nandya Troas. Hacuaha cojo xujun naha, hacuaha cojo yëjë ni sa xujun naha ne, ndovecueje.

¹⁴ Cha Alejandro chjine quicha ne, jemu choho casahmi cha cojo ná. Peru Nai naja ne, sehe sahmingojo me cojo rë cha, chuva rë jyë xi tjin rë cha.

¹⁵ Hane ngaye ne, tjin ri cuidadu tsëhë cha ta, tsëhë xi jemu casahmi cha condra cjua rë Nina xi canujin.

¹⁶ Hya xi tjun tjun casuá cjuaquixi naha xcun xutaxa rë ne, tsajin yo cavisecoo ná. Yëjë ni amigu naha ne, cavetjuxin me tsahan. Hane catitsijyëcacun Nina cojo me xi cuacun cavetjuxin tsahan jan.

¹⁷ Peru Nina ne, cavisecoo ná me, casua ná me ngahñu, xi cama cachjá cjua rë me cojo yëjë ni xuta xi hacuiin tsëhë nación tsëhë Israel. Hacuaha Nina ne, cavaxëteje ná me tsëhë xuta xi meje tsiquehen ná.

¹⁸ Hacuaha cuaxëteje ná Nai naja tsëhë ngayëjë ni cjuatsehen, sehe cjuahatsja ná me ngajan ngahnga hixcan xi vitexa me. Me vëhë xi hatuxa jyë me, hatuxa hñu me yëjë ni nixtin. Cuatjin jain.

Tsingujnetaha me cjua

¹⁹ Cha Aquila cojo chjuun rë cha, na Prisca ne, tehe rë me ngu nina naha. Hacuaha cojo xuta rë cha Onesíforo ne, tehe rë me ngu nina naha.

²⁰ Cha Erasto ne, casetaha cha nandya Corinto. Hane cha Tróximo ne, tsëhë xi hmu rë cha ne, cafaña cha ngajan nandya Mileto.

²¹ Nihñi xati tacuin, ndove tjengui ná quihndë xi chaja sa chan hnchan. Cha Eubulo ne, cha Pudente ne, cha Lino ne, na Claudia ne, cojo ngayëjë ni xuta xi macjain rë cjua rë Cristu Jesús ne, tsingatju me nina riji.

²² Nai naja yaha ri me. Nina catisua nuju me cjuandaja rë me ngayujun ni.

Carta xi catsingatju San Pablo xi cafahtsja Tito

¹ Ngahan Pablo, sacuaaha ngu mosu hndixahan tséhë Nina ngahan, hacuaaha apóstol tséhë Jesucristu ngahan.

Jesucristu casuaxa me ngahan xi cuisécoo rë xuta xi cavaxijinjñi Nina, cojo sa xi cumacjain rë me tséhë Jesucristu, hacuaaha cojo tséhë xi cumachaya rë me cjuaquixi rë Nina hane ndaja tsejen xi má me tséhë Nina.

² Jercu vetahan tacun xi sacú naja cjuahñu xatsë, tséhë xi cuatjin cachja Nina hisca hya xi chaja sa cuma ngasunhdë. Hacuaaha Nina ne, vindachaaïn me cojo cjuarë me.

³ Quihndë ne, jercu nixtin rë xi casua me camachaya naja tséhë cjuarë me. Ngahan ne, casatëxa ná xi suá cumachaya rë xuta tséhë cjuarë vëhë, tséhë xi Nina xi vaxëtje naja ne, cuatjin cavitëxa me.

⁴ Tito, tsihindu ri carta vihi, ngaye xi sacuaaha quihndi naha ngaye, tséhë xi tangun mangutacun cojo Jesucristu. Nina Nahmi naja cojo Jesucristu xi vaxëtje naja ne, catisua ri me cjuandaja cjuajeya.

Xa xi sahmi Tito ngajan distritu Creta

⁵ Cavejñá ri hiscan distritu Creta, cojo sa xi ngaye nihñichihin yëjë xi caviyuju vasen, hacuaaha cojo sa xi tehe xa ngu jo xuta xi cumatitjun me tséhë yungun tséhë jima ngu nandya sacuahatjin cavitëxa ri.

⁶ Xuta xi cuatjin tehe xa rë me ne, meje rë xi jercu tyjahi xahasen rë me, hacuaaha ngu ni chjuun rë xingu xingu me. Hacuaaha meje rë xi quihndi rë me ne, ladu rë Jesucristu me, hacuaaha xi tsajin cjuarë me xi choho sahmi me o sa xi vihndiin me.

⁷ Cuatjin meje rë, tséhë xi xuta xi matitjun me sacuaaha obispo ngajñi rë xuta rë yungun ne, me vëhë fahacuenda me tséhë ngu tsë ngu xti tséhë Nina. Vëhë xi meje rë xi jercu tyjahi xahasen rë me. Mijí rë xi xta me, mijí rë xi ngutjen ma xti rë me, mijí rë xi cha chihí me, mijí rë xi hngacacun me, mijí rë xi jercu vetahacacun me tujún xi sacú rë me ngajñi rë ngu cjuandacha cojo xicjin me.

⁸ Xi meje rë ne, xuta xi cumatitjun me jan ne, tjin rë me cjuandaja cojo xuta hinchá ndiya, hatuxa sahmi me cjuandaja, yehe caha me, tsajin jyë rë me, hacuaaha jiya me ndiya rë Nina, hacuaaha jercu yehe xahasen rë me.

⁹ Hacuaaha meje rë xi cuetaha me yojo rë me tséhë cjuarë xi cjuaquixi xi ha camá rë me, cojo sa xi cuma cueya me xahasen rë xingu xingu sa xuta cjuachacun xi cjuaquixi, hacuaaha cojo sa xi cuma sahmi me xi cuijnecacun xuta xi chjataha me tséhë cjuachacun vëhë.

¹⁰ Meje rë xi xuta xi cuacun vë ne, tséhë xi jercu tjin xuta xi vihndiin me tséhë xutaxa rë yungun ne, jercu tjin xuta xi tujyë visiajmi me, jercu tjin xuta xi vindacha. Hatuxa ngajñi rë xuta tjë rë Israel xi cavisehen ladu tséhë Jesucristu ne, jercu tjin xuta xi cuacun vë.

¹¹ Sahmi ngujyë xi nihña xi hindë cuichjaïn me, tséhë xi tsinguetsun me cjuatacun rë xuta tséhë yëjë ngu ndihya. Cuatjin sahmi me hya xi vicuya me ngu cjuarë xi hisca mijí rë xi cuatjin cuicuya me. Hane cuatjin sahmi me, cojo sa xi sacú rë me tujún ngajñi rë ngu cjuandacha.

¹² Ngu profeta tséhë distritu Creta ne, ha suvá me vëhë xi cachja me tséhë xuta rë nangui rë me cuitjin: Yëjë ni xuta Creta ne, hatuxa ndacha me, jercu chu me, jercu vatjutaha jinë me, hacuaaha jercu tséhë me. Cuatjin cachja me.

¹³ Hane jercu quixi xi cachja me. Vëhë xi hñu nojetehe rë me, cojo sa xi ndaja cumacjain rë me cjuachacun,

¹⁴ Hacuaaha cojo sa xi cuetaharcuaaïn me tséhë cuentu tséhë xuta tjë rë Israel o sa xi cjuarë xi vitëxa xuta xi tsindeya me cojo cjuandacha cjuarë xi cjuaquixi.

¹⁵ Me xi tyjahi cjuatacun rë ne, tsajin mé xi tsavi xi cuma rë me. Peru me xi macjaïn rë cjuachacun ne, tsajin mé xi tsaviïn xi cuma rë me ta hisca cjuatacun cojo xahasen rë me ne, ha camachocun.

¹⁶ Chja me xi vëë me Nina, peru yëjë ni xi sahmi me ne, tsingacun me xi quixiin. Xuta xi cuatjin cun ne, sahmi xi choho vëë Nina me. Hatuxa vihndiin me, hane machjiriïn me xi sahmi me cjuandaja.

2

Cjuachacun xi cjuaquixi

¹ Cjuarë xi noje ne, meje rë xi matangun cojo cjuachacun xi cjuaquixi.

² Tinoje cojo yëjë ni xihin changá, hacuiïn tsingatjutaha me xi cuihi me o sa xi sinë me, hacuaaha meje rë xi cuma chjahárcun rë me, meje rë xi yehe cacun me. Meje rë xi ndaja

cumangucacun me cojo Nina, hacuaha ndaja tjin rë me cjuahmutacun, hacuaha ndaja scaa rë me tu mé ni cjuacjintacun.

³ Hacuanitjin ni tinoje cojo yëjë ni yachjin changá ne, meje rë xi jeya me, hacuaha mijí rë xi ndesu me, hacuaha mijí rë xi cuetaha me yojo rë me vinu. Meje rë xi cuicuya me yëjë ni xi ndaja.

⁴ Meje rë xi cuicuya me yëjë yachjin xi hitsë ni chuva nu rë ta meje rë xi tsihmucacun me xihin rë me cojo quihndi rë me,

⁵ hacuaha xi yehe cacun me, tyjahi xahasen rë me, hacuaha xi ndaja cjuahacuenda me cahntsua ndava me, hacuaha xi ndaja me, hacuaha xi cuihndë me tsëhë xihin rë me. Cuatjin meje rë xi cuicuya na me, cojo sa xi tsajin yo choho cuichja tsëhë cju rë Nina.

⁶ Hacuaha ni tjin ni tinoje cojo yëjë ni xuta xi xihin xi hitsë ni chúva nu rë ta hacuaha meje rë xi yehe cacun me.

⁷ Hacuaha ngaye sove tejñi ntsacu tsëhë cjuandaja. Hane hya xi cuicoye ne, meje rë xi jercu tyjahi cjuatacun rijí, hacuiin xcuehyu cuinoje ta

⁸ súvá cju rë xi ndaja, xi tsajin yo cuma cuichjataha tsëhë. Cuatjin meje rë, cojo sa xi xuta condra rijí ne, cuma sava rë me, tsëhë xi tsajin mé xi choho cuichja me tsajan.

⁹ Tinoje cojo mosu hndixahan ne, meje rë xi cuihndë me tsëhë yëjë cju rë xi cuichja nai rë me. Meje rë xi ndaja me, hacuiin choho cjuayangui me tsëhë nai rë me.

¹⁰ Mijí rë xi tsichëjë me ta meje rë xi tsingacun me xi cuma cumangutacun cojo rë me. Cuatjin meje rë xi sahmi me, cojo sa xi yëjë xuta ne, cumachaya rë me xi jercu ndajiyihi cjuachacun rë Nina, me xi vaxëtje naja.

¹¹ Nina ne, catsingacun me cjuandaja rë me, hane cjuandaja vë ne, hacui xi cuaxëtje naja ngayeyen ni xuta.

¹² Hacuaha cjuandaja vëhë ne, vicuya naja xi meje rë xi cuejñaxen yëjë ni cjuatsehen cojo yëjë ni xcusun tsëhë ngasunhndë xi meje naja, hacuaha vicuya naja xi meje rë xi tyjahi cjuatacun naja, meje rë xi tsajin jyë naja, meje rë xi nechanyan ndiya rë Nina xi tivanguen cojo ngasunhndë naja.

¹³ Meje rë xi cuatjin nihña nguyëjë rë xi nechanyan rë nixtin ndajiyihi xi jercu vetahan-tacun, nixtin xi cuetjuaatsejen cjuahasen ndajiyihi rë Nina naja Jesucristu, me xi cuaxëtje naja, me xi jercu jyë nga me cojo hasen rë me.

¹⁴ Me vëhë ne, casua me yojo rë me xi cueya me ngatsë naja, cojo sa xi cuaxëtje naja me tsëhë yëjë ni cjuatsehen, hacuaha tsityjahi me ngayaan ne, sehe sahmi tsëhë me ngayaan, hane ngayaan ne, jercu meje nihña cjuandaja.

¹⁵ Tinoje yëjë cju rë vëhë. Tinche ndiya xuta hacuaha tinojetehe rë me nguñajatacuin. Catiin cahndë xi yo sahmi chúva ri cojo cjuatacun rijí.

3

Yëjë ni xcusun xi meje rë xi sahmi xuta ladu rë Jesucristu

¹ Ninguitsjin rë yëjë xuta ladu rë Jesucristu xi meje rë xi cuihndë me tsëhë xutaxa rë xi vítexa, hacuaha meje rë xi yëjë ni nixtin ne, tjin ngu cacun me xi sahmi me cjuandaja.

² Tinoje cojo rë me ta mijí rë xi choho cuichja me tsëhë hisca ngu xuta. Meje rë xi hacuiin hngacacun me ta xi meje rë ne, jeya me, hacuaha ndaja me cojo xcusun rë me cojo yëjë ni xuta.

³ Cuatjin noje cojo rë me, tsëhë xi ngayaan ne, hacuaha jemu chúva ningatahantacun hatsëë, hacuaha cavinuhyaan tsëhë Nina, hacuaha cavinechanyaan ngu ndiya xi hacuiin hacui. Caningusehen rcun cojo yëjë ni xcusun cjuasua. Cavinechanyan ngu ndiya rë cjuatsehen, ngu ndiya rë cjuaxin. Xuta ne, choho cavëë me ngayaan, hacuaha choho cahyan xingueen xingu xingu ngayaan.

⁴ Peru Nina, me xi vaxëtje naja ne, hya xi catsingacun me cjuandaja rë me cojo cjuahmutacun xi tjin rë me xi cuma rë yëjë ni xuta ngasunhndë ne,

⁵ cavaxëtje me ngayaan. Hacuiin tsëhë xi jercu ndaja canihña ta tsëhë xi yuma camá rë me ngayaan xi cavaxëtje me ngayaan. Cuatjin cavaxëtje me ngayaan hya xi casahmi me xi cavuya catsin ngayaan hya xi catsityjahi me ngayaan. Hacuaha cuatjin cavaxëtje me ngayaan hya xi casua naja me cjuahñu xatsë hya xi casua me ngayaan Hasen rë me.

⁶ Hane ngatsë rë cjuandaja xi casahmi Jesucristu, me xi vaxëtje naja ne, vëhë xi cuatjin jemu casua Nina ngayaan Hasen rë me,

⁷ cojo sa xi cjuë jyë naja ngatsë rë cjuandaja rë Jesucristu, hacuaha chjahanntsan cjuahñu xatsë xi jercu vetahan tacun.

⁸ Yëjë ni cju rë cachjá cojo ri vëhë ne, jemu cjuaquixi. Hacuaha meje ná xi cuinoje yasen yasen ni yëjë cju rë vëhë cojo xuta xi camangucacun me cojo Nina, cojo sa xi me xi cacun

jan ne, sahmi me ngahñu xi sahmi me suvá cjuandaja. Yějê ni cjuá vëhë ne, jercu ndaja hacuaha jercu machjirëhë rê xuta.

⁹ Xín tejñi yějê ni cjuavisiajmi xi hacuiin machjirëhë; xín tejñi cjuavisiajmi tsëhë ñihi rê yějê xutachanga rê xingu xingu me; xín tejñi yějê ni cjuavisiajmi tsëhë xuta xi cjan cojo xicjin; xín tejñi yějê ni cjuavixcan tsëhë ley rê Moisés. Yějê ni cjuavisiajmi vëhë ne, machjiriin hacuaha tu mahya cuisiajme.

¹⁰ Ngu xuta xi vaxë me ngu ngu xuta tsëhë ngajñi rê xuta yungun xi cjue ladu rê me ne, tinojetehe rê me ngu ndiya o hisca jo ndiya. Xi cjuë vëhë ne, hindë xicachasiin tsëhë me,

¹¹ tsëhë xi ngaye ne, ha hye xi ngu xuta xi cuatjin sahmi ne, jiya me ngu ndiya xi xín cjui, hacuaha sahmi me cjuatsehen. Hane cjuatsehen rê me jan ne, vëhë tsingacun xi cuaintjin xi sahmi me.

Cjuacjintacun tsëhë suvá Pablo cojo Tito

¹² Hya xi tsingátju Artemas o sa Tíquico xi cjuetjengui ri ne, nihñi ngujoyë xi cuindove tjengui ná ngajan Nicópolis, tsëhë xi tuxa ngajan cavejñángucácun xi tsingátju chan hnchan.

¹³ Tisecuee rê Zenas, me xi abogado me, cojo Apolos ne, catjindujú me cojo ndiya rê me, hane chjehecuende xi tsajin mé tsichaja rê me ndiya.

¹⁴ Hacuaha meje rê xi xuta naja ne, cuma rê me hacutjin sahmi me cjuandaja, cojo sa xi cuisecoo me ngajñi rê ngu cjuachaja xi jercu sahmi ngujoyë. Meje rê xi cuengui chji rê me cojo ngasunhdë rê me.

Pablo ne, tisua me ngu nina

¹⁵ Yějê ni me xi siutahá cojo ná ne, tsingátju me ngu nina riji. Hacuaha tehe rê xuta xi hmucacun me ngayaan ngatsë rê xi tjin tangun cjuatacun naja cojo Jesucristu ngu nina.

Nina ne, catisua nuju me cjuandaja ngayujun ni. Cuatjin jain.

Carta xi Catsingatju San Pablo tsèhë Filemón

¹ Ngahan Pablo, xi tejñaya ndavaya ngatsë rë xi sahme xa rë Jesucristu ne, tsihindu cojo Timoteo xingueen xujun vihi xi ningatjin nuju ngayun Filemón, ngayun xi jemu hmutacuin nuju, ngayun xi visecun niji xcun xa xi nechantahan.

² Hacuaha ningatjin nuju xujun vihi ngayun Apia, ngayun xi hacuaha xinguin nuju, cojo ngayun Arquipo, ngayun xi tangun canihña cojo nuju ngahñu ngatsë rë cjuar rë Nina, cojo ngayujun sa xuta ladu rë Nina xi ma tangun ngayun ngajan ndava me vèhë.

³ Nina Nahmi naja cojo Nai naja Jesucristu ne, catisua nuju me cjuandaja cjuajeya.

Vaxëndaja Pablo Filemón

⁴ Ngayun Filemón, hya xi veyanangë nuju ngajñi rë oración naha xi tisahme ne, nchunchujun ni ne, suá nacuechji rë Nina naha ta,

⁵ tsèhë xi tivechutaha ná cjuar xi jemu tjin nuju cjuahmutacun cojo yèjë xuta ladu rë Nina hacuaha jemu tjin ngu tacún cojo Nai naja Jesús.

⁶ Hacuaha féhya rë Nina xi ngayun xi mangutacun cojo Nai naja sacuatjin niji ngayin ne, catuxaha sa me cjuatacun nuju xi cuijnercun yèjë ni cjuandaja xi tjin naja ngatsë rë xi tjin tangun cjuatacun naja cojo Jesucristu.

⁷ Jemu ndama ná, tai, hacuaha jemu sacu ná cjuetacun ngatsë rë cjuahmutacun xi tjin nuju ta, tsèhë xi ngatsë nuju ne, casacu rë xahasen rë xuta ladu rë Nina cjuetacun.

Pablo fehya rë Filemón cjuandaja xi cuma rë Onésimo

⁸ Vèhë xi handasa tsacjun xi cuitéxa nuju mé xi ndatjin nihñu tsèhë xi tjin tangun cjuatacun naha cojo Jesucristu ne,

⁹ peru hitsë sa chuya ná xi cjuéhya nuju tsèhë xi ngajñi naja ne, jiya vasen xi hmí cjuahmutacun. Ngahan, Pablo ne, jemu changá ngahan hacuaha tejñaya ndavaya quihndë ngatsë rë xi sahme xa rë Jesucristu ne,

¹⁰ tiféhya nuju ngu cjuandaja xi cuma rë cha Onésimo, cha xi sacuaha quihndi naha tsèhë xi camá cafaha cha cjuandajiyi xi chja tsèhë Jesucristu xi casuá rë cha nguehe ndavaya.

¹¹ Handasa camachjiriin nuju cha mosu hndixahan nuju cha Onésimo hatsëé nixtin jan ne, peru quihndë ne, hisca ngayun hisca ngahan ne, jemu machjiréhë naja cha.

¹² Quihndë ne, titsingátju nga nuju cha, hane meje ná xi chjuhunnstun cha sacuaha xi ngahan suva xi chjuhunnstun ná.

¹³ Hacuaha meje ná xi cuejña cha cojo ná, cojo sa xi cjuahacuenda ná cha ngojo nuju jinguyèjë rë xi tejñaya ndavaya ngatsë rë cjuandajiyi xi chja tsèhë Jesucristu.

¹⁴ Peru mijí sahme tu mé ni hya xi chaja sa cuinújun mé xi ndatjin xi sahme. Cuatjin ta, tsèhë xi meje ná xi cjuandaja xi nihñu ne, hacuiin cojo cjuachan ta suvá cojo cjuasua nuju.

¹⁵ Cavetjuxin rë xuma quihndi tsujun ngujo nixtin cojo sa xi quihndë xi cuya cha ne, cuejñacahndë nga cha cojo nuju yèjë ni nu yèjë ni nixtin.

¹⁶ Peru ha quihndë hacuiin sacuaha ngu mosu hndixahan nuju cha xi cuejña cha cojo nuju ta sacuaha ngu xuta xi jemu vengui sa chjí rë me, sacuaha ngu xingun xi jercu hmutacún. Ngahan ne, jercu hmú cacún cha, hacuaha ngayun ne, hitsë sa ndaja hmutacún cha, hacuiin suvá sacuaha ngu xuta ni ta sacuaha ngu xuta ladu rë Nai naja.

¹⁷ Quihndë ne, ngayun Filemón ne, ngatsë rë xi ha hyun ta ngayaan ne, tangun ni mangutacun cojo Jesucristu ne, vèhë xi quihndë ne, chjuhunnstun cha sacuaha xi chjuhunnstun ná ngahan.

¹⁸ Hane sa xi mé choho casahmi cha cojo nuju, o sa xi quitjen cha tsujun ne, vèhë ne, tejñu ladu naha.

¹⁹ Ngahan Pablo ne, cojo letra naha suva titsihindu cjuar vihi; ngahan cuejñángojo vèhë. Mijí tsinguitsjén nuju xi ngayun ne, jemu quitjun camahani tsahan, tsèhë xi casuá camachaya nuju cjuandajiyi xi chja tsèhë Jesucristu.

²⁰ Quihndë tai ne, tisecun ná hitsë ta ngayaan ne, tjin tangun cjuatacun naja cojo Nai naja; tuhun hitsë cjuetacun xahasen naha ta ngayaan ne, tjin tangun cjuatacun naja cojo Jesucristu.

²¹ Cuitjin tsihindu nuju ta, tsèhë xi tjin ngu cáacun cojo nuju ta cuinuhyun tsahan, hacuaha hvë ta hisca quusun sa nihñu tsèhë cjuar xi chjá cojo nuju.

²² Hacuaha tuhunndujun ngu cahndë hiscan xi cuitèjña ta, ngahan ne, vetahácacun xi Nina ne, sua me cahndë cjuétjéngë nga nuju ngatsë rë xi cuatjin chjahyun rë me.

Tsinguijnetaha Pablo cjuar

²³ Epafra, me xi hacuaha jiya ndavaya cojo ná ngatsë rë xi sahmi me xa rë Jesucristu ne, hacuaha tsingatju me ngu nina tsujun ngayun Filemón.

²⁴ Hacuanitjin ni Marcos, Aristarco, Demas, cojo Lucas, me xi cuacun tangun sahmi xa cojo ná ne, hacuaha tsingatju me ngu nina tsujun.

²⁵ Catisehen cjuandaja rë Nai naja Jesucristu cahantsua xahasen nuju ngayujun ni. Cuatjin jain.

Xujun xi camahindu xi cjuahatsja xuta xi visiajmi Hebreo

¹ Nixtin titjun ne, jemu cjin ndiya hacuaha jemu cjin chuva rē xi casua Nina camachaya rē xutachanga naja ngu cju hya xi catsingatju me cju cojo profeta rē me.

² Peru quihndē nixtin vihi ne, casua me camachaya naja hya xi catsingatju me cju cojo Quihndi rē me. Hane me vēhē xi cachja Nina xi cuma Nai rē yējē ni xcusun xi tjin ngasunhndē, hacuaha casuaxa Nina Quihndi rē me jan xi me vēhē casahmi me ngasunhndē.

³ Hacuaha sacuatjin jemu jyē hnga Nina cojo hasen ndajyihni rē me ne, cuatjin jyē hnga Quihndi rē me cojo hasen rē. Hacuaha sacujyihni suvá Nina ne, cuajyihni camahani Quihndi rē me. Hacuaha Quihndi rē Nina jan ne, yahangui me yējē ni xcusun xi tjin ngasunhndē cojo cju rē me xi jemu hñu ngahñu rē. Hane xi café catsityjahi me xuta tsēhē jyē rē ne, sehe quiji me ngahnga, cavejña me taha ladu quixi tsēhē Nina.

Hitsē sa matitjun Quihndi rē Nina xi cumá rē yējē ni ángel

⁴ Hacuaha tu tjin xi hitsē sa jemu ndajyihni xa xi casacu rē Quihndi rē Nina xi cumá rē xa xi casacu rē ángel ne, hacuanitjin ni cavechutaha me xi hitsē sa jemu camatitjun me tsēhē ángel xi cuacun jan, hya xi quiji cavejña me cojo Nina.

⁵ Hisca xi ngu ángel ne, cachjaain Nina cojo cju vihi, sacuatjin cachja me cojo Quihndi rē me:

Ngaye xi quihndi naha ngaye;

hacuaha quihndē casuáxa ri.

Cuatjin cachja me. Hacuaha cachjaain me tsēhē ngu ángel cuitjin:

Ngahan cumá ngahan nahmi rē cha,

hane cha vēhē ne, cumá cha quihndi naha.

Cachjaain me cuatjin cojo ángel.

⁶ Hane ngu ndiya nga, hya xi tsingatju me Quihndi ngu rē me ngasunhndē ne, cuitjin chja me tsēhē Quihndi rē me:

Yējē ni ángel naha ne, catjaharcun rē me.

Cuatjin cachja me.

⁷ Hane xi tsēhē ángel rē me ne, cuitjin chja me:

Ngahan sahme xi ángel naha ne, tangun xcusun rē cojo tjo,

hane ángel xi fahacuenda xa naha ne, sahme xi tangun xcusun rē cojo ndihi.

Cuatjin cachja me.

⁸ Peru xi tsēhē Quihndi rē me ne, cuitjin chja me:

Ngayun Nina, tsajin nu tsajin nixtin cuijnetaha gobiernu nuju,

hacuaha gobiernu xi nihñu ne, hatuxa cjuaquixi.

⁹ Canihmutacun cjuaquixi hane choho cahyun cjuatsehen;

hane vēhē xi ngahan Nina nuju ne, cavaxejen nuju,

hacuaha hitsē sa jyē cjuasua casuá nuju ngayun

xi cuma rē xingun.

Cuatjin cachja me.

¹⁰ Hacuaha chja nga me cuitjin:

Ngayun, Nai naha, ntsacu cavetsihin ne, ngayun canindujun nangui;

hacuanitjin ni ngahnga, hacuaha ngayun canindujun.

¹¹ Yējē xcusun vēhē ne, cuechu nixtin xi cjuē,

peru ngayun ne, tsajin nu tsajin nixtin xi cjuē ngayun.

Hacuaha yējē xcusun vēhē ne, cuma changá sacuatjin rē ngu tsjian xi chajá rē;

¹² hacuaha cuechu nixtin xi nijeyun xcusun xi cuacun vē sacuaha ngu tsjian tsjanga,

hacuaha nindeyun sacuaha vindeya ngu tsjian xi chajá rē.

Peru ngayun ne, hatuxa vindeyaain ngayun;

hacuaha nixtin nuju ne, hatuxa cuijnitaain.

Cuatjin cachja me.

¹³ Hacuaha hisca ngu ángel ne, cachjaain Nina cojo rē cju vihi, sacuatjin cachja me cojo Quihndi rē me:

Tinechin gneuhe ladu quixi naha,

hisca hya xi yējē ni xi sahmi ri condra ne, cuiyujú ngahan ngahma gobiernu riji.

¹⁴ Sacuaha ángel ne hacui hasen xi tsujyihya tixa tsēhē Nina. Nina tsingatju me ángel xi cuacun vē xi fehe visecoo naja ngayaan xi cuetjuntjen tsēhē jyē naja.

2

Mijí rë xi chasen cjuandajiyi xi chja hacutjin cuetjuntjen

¹ Vêhë xi meje rë xi hitsë sa ndaja cuetahanrcun cjuandajiyi xi cavisifñuju, cojo sa xi hacuun tu hitsë tu hitsë ne, cuetjuxen tsêhë ndiya ndajiyi xi tivanguen.

² Ta sacuaaha ley rë Nina xi cachja ángel hatsëë nixtin ne, tjin jain rë ngahñu. Hane yêjê xuta xi casahmi cjuatsehen hacuaaha cahndiin me tsêhë ley jan ne, camá me castigu sacuatjin xi mameje rë jyê rë me.

³ Hacuaaha ngayaan ne, cumaji cuatjuhnga ngayaan tsêhë castigu xi satë naja, sa xi chasen cjuandajiyi xi jercu tu ndajiyi camahani xi chja hacutjin cuetjuntjen. Cjuandajiyi vêhë ne, titjun Nai naja cachja me, hane xuta xi cahndë me cjuar rë Nai naja ne, hacuanitjin ni cachja me cojo naja xi camá ngascan.

⁴ Hacuaaha Nina ne, cojo jemu cjin cjuarcun xi ña quijircun naja hisca carcun cachtusejen ne, casua me camachaya naja xi cjuandajiyi vêhë ne, cjuaquixi jain. Hacuaaha hya xi casua naja Nina Hasen rë me sacuatjin caveñiangucacun me ne, cuatjin xi casua me camachaya naja xi cjuandajiyi vêhë ne, cjuaquixi jain.

Hacutjin vaxêtje naja cjuaveya rë Jesús

⁵ Nina ne, cachjaain me xi ngahma gobiernu rë ángel cueña ngasunhndë, hya xi cuinduva me sahmi me gobiernu ngasunhndë xi tinújan tsêhë vi.

⁶ Tjin ngu cahndë tsêhë xujun rë Nina xi cachja ngu xuta cojo Nina cuitjin:

¿Mé vengui chji níji ngayin xuta, xi cuatjin ninguitsjun níji?

¿Mé vengui chji níji xi cuatjin chjuhuncuendun níji?

⁷ Ngayun ne, ngujo nixtin ne, hitsë sa caninguijnu níji xi cuma rë ángel,

peru canihñu yehe canihñu hnga níji cojo cjuatacun níji hacuaaha canihñu xi chjihinjendin;

⁸ yêjê ni xcusun xi tjin ngasunhndë ne, caviyujun ngahma

gobiernu níji ngayin xuta.

Cuatjin cachja ngu xuta cojo Nina. Hya xi cuatjin caviyuju Nina yêjê xcusun xi cuacun vë ngahma gobiernu rë xuta ne, yêjê ni caviyuju me, hisca ngu xcusun catsicanguuin me. Peru hisca quihndë ne, cjêë chan xi yêjê xcusun xi cuacun vë ne, cuiyuju ngahma gobiernu rë xuta.

⁹ Peru xi hyan ne, Jesús, xi ngu jo nixtin ne, hitsë sa catsinguijne Nina me xi cumá rë ángel, peru quihndë ne, casahmi jyê casahmi hnga Nina me cojo hasen rë me hacuaaha casahmi me xi Jesús ne, cjuahájenda me. Cuatjin casahmi Nina cojo rë me tsêhë xi jemu jyê cjuañihi cavatju me hya xi cahme me. Cuatjin camá cojo sa xi cojo cjuandaja rë Nina ne, Jesús cueya me ngatsë rë yêjê ni xuta.

¹⁰ Nina ne, casahmi me yêjê ni xcusun xi tjin, tsêhë xi cuatjin chuya rë me. Hacuaaha meje rë me xi jemu cjin quihndi rë me xi cuma yehe cuma hnga cojo cjuatacun rë. Vêhë xi ndatjin xi sahmi Nina xi ngajñi rë cjuañihi xi cavatju Jesús, me xi vaxêtje naja ne, cuechutaha me yêjê ni hacutjin xi meje rë Nina xi cuechutaha me.

¹¹ Me xi tiviyujuxin rë xuta xi cumá tsêhë Nina me cojo yêjê ni xuta xi tiviyujuxin ne, ngu ni nahmi rë me. Hane vêhë xi me xi Quihndi rë Nina ne, ma savaain rë me xi chja me xi xicjin me xuta xi cuacun jan,

¹² sacuatjin chja me xcun xujun rë Nina xi chja me cuitjin:

Suá cumachaya rë yêjê xingueen yo ngayun,

hacuaaha cuaxëndaja nuju sé tsujun ngajñi rë me hiscan xi matangun me.

Cuatjin cachja Quihndi rë Nina.

¹³ Hacuaaha chja nga me cuitjin:

Hacuaaha ngayun xi cumangu cácn cojo nuju.

Cuatjin cachja nga me. Chja nga me cuitjin:

Nguehe cuajiyi ngahan cojo yêjê quihndi nuju xi catuhun ná.

Cuatjin cachja me.

¹⁴ Tsêhë xi ngayaan quihndi rë Nina ne, tjin jni tjin yojo naja ne, vêhë xi Jesús ne, hacuaaha casacu rë me jni casacu rë me yojo rë me, cojo sa xi ngatsë rë cjuaveya rë me ne, cjuahataha me ngahñu rë xitsehen xi matitjun xi vitexa rë cjuaveya.

¹⁵ Hacuaaha ngatsë rë cjuaveya rë me ne, ma sahmi ndaya naja me ngayejen ni xuta xi rcun cjuaveya. Hane tsêhë xi cuatjin rcun cjuaveya ne, vêhë xi sacuaaha xi cjuaveya ne, cavitexa naja xcun cjuahñu naja.

¹⁶ Ha cjuaquixi ta hacuun canduva me xi cuisecoo me ángel ta xi canduva me ne, tsêhë xi cuisecoo naja me ngayaan xuta tjê rë Abraham.

¹⁷ Hane ngatsë rë vêhë xi casahmi ngu jyê xi camá me sacuaaha ngayaan cojo ngayêjê ni chuya rë sacuatjin cun ngayaan xicjin me, cojo sa xi hacuaaha cuma me ngu nahmi xi

matitjun xi tjin rë me cjuayumatacun, hacuaha jemu ndaja sahmichihin me xa rë Nina, hacuaha cojo sa xi cuechjitje me jyë naja.

¹⁸ Hane tsëhë xi cuatjin suvá Jesús cavatju me cjuañihi hya xi cafahachuva xitsehen me ne, vëhë xi quihndë ne, hacuaha cuma cuisecoo naja me ngayaan hya xi tifahachuva naja xitsehen.

3

Hitsë sa jyë hnga Jesús cojo hasen rë me xi cumá rë Moisés

¹ Ngayujun ni xuta ladu rë Nina xi cavaxijin nuju me xi cuma tsëhë me ngayun ne, cuisiajme hitsë tsëhë Jesús, me xi catsingatju Nina xi sua cumachaya naja tsëhë cjuachacun xi nûjan xi macjain naja, me xi hacuaha má nahmi xi matitjun tsëhë cjuachacun xi nûjan xi macjain naja.

² Jesús ne, jemu ndaja casahmichihin me yëjë hacutjin xi meje rë Nina xi casuaxa rë me, sacuatjin casahmi xutachanga naja Moisés hatsëë xi hacuaha jemu ndaja casahmichihin me xa xi cavisecoo me xuta rë Nina.

³ Jesús ne, vechú chuva rë xi hitsë sa cuma jyë cuma hnga me cojo hasen rë me xi cuma rë Moisés. Má sacuatjin rë ngu cha xi sahmi ngu ndihya, xi vechú chuva rë xi hitsë sa chjaharcun rë cha xi cuma rë ndihya xi casahmi cha jan ta,

⁴ tsëhë xi yëjë ni ndihya ne, tjin ngu xuta xi casahmi me, vëhë xi camá, peru me xi casahmi yëjë ni xcusun xi tjin ngasunhndë ne, hacui Nina.

⁵ Moisés ne, ngu xuta xi sahmi xa rë Nina ni má me, hane jemu ndaja chihin casahmi me xa xi casatëxa rë me ngajñi rë yëjë ni xuta rë Nina. Hane xa xi casahmi me jan ne, xi catsingasca rë me cjuatacun rë xuta tsëhë cjuaxi cuichja Nina cuma ngascan.

⁶ Peru Cristu ne, Quihndi rë Nina camahani má me, hane jemu ndaja chihin casahmi me cuidadu yëjë ni xuta rë Nina. Xuta xi cuacun vë ne, hacui ngayaan, sa xi hacuiin nismetacun cjuatacun xi rcun camahani hacuaha sa xi hacuiin nismetacun cjuasua xi tjin rë xahasen naja xi vetahan tacun Nina.

Cjuahajenda tangun xuta rë Nina cojo rë me

⁷ Vëhë xi meje rë xi cuetuhunrcun cjuaxi chja Hasen rë Nina xi chja cuitjin:

Sa xi cuisinûju cjuaxi chjá quihndë ne,

⁸ hacuiin nihñu taja tacún sacuatjin casahmi xuta hya xi cachjataha me Moisés hacuaha cafahachuva ná me ngajan hiscan jemu xín tsëhë nandya.

⁹ Hane ngajan cafahachuva ná xutachanga nuju, handasa ha cavëë me yëjë cjuandaja xi casahme cahntsua yachan nu xi catsujyihya me jan.

¹⁰ Vëhë xi camacjan ná cojo yëjë xuta xi caviyuju nixtin hya, cuitjin cachjá tsëhë me: "Cjuatacun rë me ne, hatuxa hacjahi ndiya fi, hviiin me ndiya naha." Cuatjin cachjá.

¹¹ Vëhë xi camacjan ná cojo rë me hane cachjá quixi xi tsajin nu tsajin nixtin xi cuisehen cjuahajenda tangun me cojo ná. Cuatjin cachja Hasen rë Nina.

¹² Nechun cuidadu, ngayujun ni, cojo sa xi tsajin hisca ngu ngayun xi cumatsehen cjuatacun nuju hacuaha cumacjain nuju tsëhë me, sa tu cjuatacun tsehen jan ne, cuaxëxin nuju tsëhë Nina xi quicun me.

¹³ Cahndë rë vëhë ne, nechunchujun ni ne, tuhun cjuetacun xingun xingu xingu ngayun jinguyëjë rë xi tjin sa hora quihndë, cojo sa xi tsajin ngu ngayun xi cuma taja cjuatacun nuju ngatsë rë cjuandacha xi sahmi cjuatsehen.

¹⁴ Ta cojo ngayaan satë naja cjuandaja xi tjin rë Cristu, sa xi scaa jain naja cumangutacun hisca xi cuijnetaha nixtin naja, sacuatjin camangutacun ntsacu cavetsihin.

¹⁵ Tetuhunrcun nga sacuatjin chja xujun rë Nina xi chja cuitjin:

Sa xi cuisinûju cjuaxi chjá quihndë ne,

hacuiin nihñu taja tacún sacuatjin casahmi xuta hya xi cachjataha me Moisés.

Cuatjin chja xujun rë Nina.

¹⁶ ¿Yo me xi cuatjin cachjataha rë Moisés hya xi cavatju cavisiñuju me cjuaxi rë Nina ni? Yëjë ni xutachanga naja xi cavaxëxin Moisés tsëhë nangui Egipto.

¹⁷ Hane ¿yo me xi camacjan rë Nina cojo rë cahntsua yachan nu ni? Ha hacui ni me changá xi cuacun vë xi casahmi cjuatsehen hane cahme me ngajan hiscan jemu xín tsëhë nandya.

¹⁸ Hane ¿yo me xi cachja quixi Nina cojo xi tsajin nu tsajin nixtin xi cuisehen cjuahajenda tangun cojo me ni? Ha hacui ni me changá xi cuacun vë xi cahndiin tsëhë Nina.

¹⁹ Hane cuatjin camá xi camaji cavisehen cafahajenda me ngajan, tsëhë xi camacjain rë me.

4

¹ Vêhê xi jinguyêjê rê xi tacun quicun cjuâ xi cachja Nina xi cuisen chjahanjendan tangun cojo rê me ne, meje rê xi cumacjîntacun sâ tu tjin ngu ngayun xi cuechuntuun xcusun ndajiyi vêhê.

² Ngayaan ne, hacuaha cojo ngayaan camachaya naja cjuandajiyi vêhê sacuatjin camachaya rê xutachanga naja xi cuacun jan; peru me xi cuacun jan ne, tsajin mé camachjîrêhê rê me cjuâ xi cavisîñuju me jan ta, tsêhê xi hya xi cavisîñuju me cjuâ jan ne, camacjain rê me.

³ Peru ngayaan xi camacjain naja ne, cuma cuisen chjahanjendan tangun cojo rê Nina. Sacuatjin xi ha cachja me tsêhê cjuandajiyi vêhê, xi cachja me cuitjin:

Vêhê xi camacjan ná cojo rê me hane cachjá xi

tsajin nu tsajin nixtin xi cuisehen cjuahajenda tangun me cojo ná.

Cuatjin cachja me. Nina ne, catsinguijnetaha me xa xi sahmi me hisca hya xi casahmi me ngasunhdê;

⁴ hacuaha tjin ngu cahndê tsêhê xcun xujun rê me ne, cachja me tsêhê nixtin xi má yatu jan cuitjin:

Ngahan ne, nixtin xi má yatu ne, cafahájenda tsêhê yêjê ni xa xi casahme.

Cuatjin cachja me.

⁵ Hacuaha ha xujun vêhê ni ne, cachja nga me cuitjin:

Tsajin nu tsajin nixtin xi cuisehen cjuahajenda tangun me cojo ná.

Cuatjin cachja me.

⁶ Hane tsêhê xi chaja sa cuisehen yahnga xuta xi cjuahajenda tangun me cojo Nina ne, hacuaha tsêhê xi xutachanga naja xi cojo tjun camachaya rê cjuandajiyi jan ne, cavisîin me cafahajenda tangun me, ngatsê rê xi cahndiin me tsêhê cjuâ xi tjun camachaya rê me jan ne,

⁷ vêhê xi Nina ne, cavejña nga me ngu nixtin, xi hacui quihndê. Jemu tsêê cavatju nixtin xi cavitexa Moisés, hya xi catsihindu xutachanga naja David cjuâ rê Nina xi ha canújan titjun xi chja cuitjin:

Sa xi cuisîñuju cjuâ xi chjá quihndê ne,

hacuiin nihñu taja tacún.

Cuatjin cachja Nina.

⁸ Sa xi xutachanga naja Josué quijicojo me xuta xi cjuahajenda tangun cojo Nina ne, Nina ne, hacuaha cachjain me xi camangasca xi tjin sa ngu nixtin xi cuisen chjahanjendan tangun cojo rê me.

⁹ Ngajan xi tjin sa ngu nixtin xi cuisehen xuta rê Nina cjuahajenda tangun me cojo Nina.

¹⁰ Ta xuta xi visehen fahajenda tangun cojo Nina ne, hacuaha fahajenda me tsêhê xa xi casahmi me sacuatjin cafahajenda Nina tsêhê xa xi casahmi me.

¹¹ Ngajan xi meje rê xi nihña ngahñu xi cuma cuisen chjahanjendan cojo rê Nina, cojo sa xi hisca ngu ngayaan ne, hacuiin nihña sacuatjin casahmi xuta xi cahndiin me tsêhê Nina.

¹² Cjuâ xi chja Nina ne, quicun jain, hacuaha jemu tjin rê ngahñu, hatuxa vetjucaa. Sacuaha xi hitsê sa yuju xi cumá rê quicha xi jo yuju rê, xi vatjuca rê hisca hasen naja, hacuaha handasa hiscan hinchacoo ninda naja ne, cuatju, cuechu hisca ngajñi rê xineninda naja. Cjuâ xi chja Nina jan ne, vêê hacutjin ningatahantacun, hacuaha vêê hacutjin má rê xahasen naja.

¹³ Hisca ngu xcusun xi Nina catsindaja me ne, cumaji chahma xi cumá rê me; yêjê ni xcusun vêhê ne, tjin tsejen xi cuma rê Nina, me xi tahancuendan rê yêjê ni xcusun xi canihña.

Jesús ne, hacui me xi má nahmi xi matitjun

¹⁴ Jesús, Quihndi rê Nina ne, hacui me xi nahmi xi matitjun xi tjin naja. Jemu ndaja camahani me, hacuaha cavatjutaha me ngahnga, sehe cavechu me xcun Nina. Vêhê xi meje rê xi hacuiin nismetacun cjuachacun xi nújan xi macjain naja. Cuatjin meje rê ta,

¹⁵ tsêhê xi nahmi xi matitjun xi tjin naja ne, ma mayuma rê me ngayaan xi jemu chuya tacun ta, tsêhê xi me vêhê ne, hacuaha cavatju me camá yêjê ni cjuacjintacun sacuatjin vatjun ngayaan má. Peru handasa cuatjin cavatju me camá ne, hisca ngu cjuatsehen ne, casahmii me.

¹⁶ Vêhê xi meje rê xi rcun camahani xi nihña tiña tsêhê Nina, me xi sahmi naja gobiernu cojo cjuandaja. Nihña tiña cojo sa xi chjahanntsan cjuayumatacun rê me, hane hacuaha sacú naja cjuandaja rê me xi cuisecoo naja hora xi mameje rê.

5

¹ Yějē ni nahmi xi matitjun xi tuxijin rē ngajñi rē xuta ne, satē xa rē me xi visecoo me xuta, cojo sa xi sahmi tiña xuta tsēhē Nina. Hacuaha nahmi xi cuacun vē ne, satēxa rē me xi sua me yějē ni xcusun cjuatjo cojo Nina ngatsē rē cjuatsehen xi sahmi xuta.

² Nahmi xi cuacun vē ne, ma tsijyēcacun me cojo xuta xi hvíin camahani hacuaha cachaja tsēhē ndiya rē Nina ta, tsēhē xi nahmi vē ne, hacuaha chuya cacun me.

³ Vēhē xi tjin rē me xi sua me cjuatjo cojo Nina ngatsē rē cjuatsehen xi casahmi suvá me, cojo ngatsē rē cjuatsehen xi casahmi jingu sa xuta.

⁴ Tsajin ngu xuta xi cojo cjuatacun rē suvá ni me ne, cjuaha me ngu xa ndajyihi vēhē ta me xi cjuaha ne, me xi suvá Nina cuichja me xi satē rē, sacuatjin cavatju xutachanga naja Aarón camá.

⁵ Hacuanitjin ni rē Cristu ta, hacuiin casahmi jyē casahmi hnga suvá me yojo rē me xi cuma me ngu nahmi xi matitjun ta me xi cachja xi cuma me nahmi ne, hacui Nina, xi cachja me cuitjin:

Ngaye xi quihndi naha ngaye;

hacuaha quihndē casuá xa ri.

Cuatjin cachja Nina.

⁶ Hacuaha chja me jingu sa cahndē tsēhē xujun rē me cuitjin:

Ngaye xi nahmi ngaye yějē nu yějē nixtin
sacuaha camá Melquisedec hatsēē nixtin.

Cuatjin cachja Nina.

⁷ Hane jinguyējē rē xi Cristu tacun sa me cjuahñu cojo yojo rē me ne, hora xi cafehya rē me Nina, Nina xi tjin rē chuya rē xi cuaxētje rē me tsēhē cjuaveya ne, jercu cajindaya me hacuaha jercu cajihnda me. Hane cafachacuenda Nina cjuá rē me ta, tsēhē xi jemu cafararcun me Nina.

⁸ Cristu ne, handasa Quihndi rē Nina me xi cjuaquixi, peru cjuañihi xi cavatju me camá nguehe ngasunhdē ne, vēhē hitsē sa cavicya rē me mé vijne xi nuhan tsēhē Nina.

⁹ Hane xi cuatjin casahmi Nina xi cavechutaha Jesús yějē ni hacutjin xi meje rē Nina xi cuechutaha me ne, vēhē xi Jesús ne, ma vaxētje me yějē ni xuta xi vihndē tsēhē me, hacuaha tsajin nu tsajin nixtin xi cuatju xuta xi cuacun vē castigu.

¹⁰ Hane hacuaha Nina casuaxa me Jesús xi má me nahmi xi matitjun sacuaha camá Melquisedec hatsēē nixtin.

Mijí rē xi nismetacun ndiya rē Nina

¹¹ Sacuaha tsēhē cjuatacun vēhē ne, jemu tjin cjuá xi cuinújin cojo nuju, peru jemu chja cuatjin xi tihincuendin nuju ta, tsēhē xi hacuiin ndaja meje cuisñuju.

¹² Ngayun xi ha jemu tsēē nduvun chutayun cjuá rē Nina ne, ha tivicyun rē xuta cjuá rē Nina. Peru cahndē rē xi ha tivicyun ne, tu ngayun meje rē ngu xi cuicuya nga nuju cjuá xi tjun tjun chutaya rē tsēhē cjuá rē Nina. Sacuaha xi mameje rē xi cuyun siuhun nga lechi, cahndē rē xi xinu niñu.

¹³ Sacuaha quihndi langa ne, vēhē xi suvá lechi hvi, hacuaha hvíin camahani mé xi ndaja o mé xi ndajin.

¹⁴ Peru sacuaha niñu xi chinē ne, xuta changá xi jinē me, xuta xi ha vēē me mé xi ndaja mé xi ndajin ta, tsēhē xi cjuatacun rē me ne, ha jemu nduva sahmixa.

6

¹ Quihndē ne, meje rē xi cuejñaxen hitsē cjuachacun xi cachutayan hya xi tjun tjun camangutacun cojo Cristu, hane chutayan jingu sa cjuá xi hitsē sa chja, cojo sa xi cuejñachihin ndaja cjuatacun naja. Mijí rē xi cuyan chutayan nga cjuá xi ha cama naja titjun, sacuaha cjuá xi chja xi meje rē xi cuejñaxen rē yějē xcusun xi machjiriin xi nihña; sacuaha cjuá xi chja xi meje rē xi cumangutacun cojo Nina;

² sacuaha cjuá xi chja xi meje rē xi cuma tyjahi vihi cuma tyjahi vēhē xi cuma rē Nina; sacuaha cjuá xi chja xi meje rē xi cuisanentsan ngu xuta; sacuaha cjuá xi chja xi cuya nima cjuahñu; sacuaha cjuá xi chja xi cuechu nixtin xi Nina ne, tsichua naja me ngayejen ni cojo cjuatacun naja.

³ Vēhē xi quihndē ne, cuejñaxen hitsē cjuá xi cuacun vē, hane chutayan jingu sa cjuá xi hitsē sa chja cuijnercuun, sa xi sua Nina cahndē.

⁴ Xuta xi ha cavisehen cjuahasen rē Nina ngajñi rē cjuatacun rē me ne, hacuaha casacu rē me hitsē cjuandaja xi Nina sua me, hacuaha cavisehen Hasen rē Nina cahntsua xahasen rē me,

⁵ hacuaha cavejña rē me hitsē cjuandajyihi rē Nina, hacuaha camachaya rē me hitsē cjuarcun xi hitsē sa rcu cjin cuma nixtin xi sehe nduva.

⁶ Sa xi xuta xi cuacun vë tsismicacun me ndiya rë Nina ne, cumaji cuisceoon rë me xi tsindeya me cjuatacun rë me ngu ndiya nga ta, xcusun xi tisahmi me ne, titsixcuehyu me Quihndi rë Nina, sacuaaha xi tivuya tivetaha súvá me me xcun cru.

⁷ Xuta xi cuacun vë ne, tangun me cojo nangui xi hvi rë tsi xi vaha xcun: sa xi nangui vëhë ma ngu xcusun xitjë xi cumachjirëhë rë xuta xi nai rë ne, tsinchacun Nina nangui vëhë;

⁸ Peru sa xi súvá nahya cuetju xcun nangui vëhë ne, venguin camahani chji rë. Hacuaha choho cuichja Nina cojo, hane hiscan xi cuijnetaha ne, cueti.

Cuanguen nduju cuetahantacun Nina

⁹ Peru handasa cuatjin nújin cojo nuju, ngayujun ni xi jemu hmutacuín nuju ne, peru ha hyin cojo cjuatacun niji xi ngayun ne, ndaja tivatjun tijima, cuma cuinújan ne, ha tivanguncujun ndiya xi cuaxëtje nuju.

¹⁰ Nina ne, quixi me cojo cjuá rë me. Vëhë xi tsichayaain me yëjë xcusun xi canihñu, hacuaaha tsichayaain me cjuahmutacun xi camatsejen xi tjin nuju cojo rë me, hya xi cavisecun rë xuta ladu rë me, sacuatjin xi tinihñu hisca quihndë.

¹¹ Xi meje niji ngayin ne, jima ngu ngayun ne, hacuanitjin ni tinechun ngunajatacún jinguyëjë rë xi nechun cjuahñu, cojo sa xi sacú nuju yëjë cjuandaja rë Nina xi vetuhun tacun.

¹² Hacuaha meje niji xi hacuín cuma tsëhë ngayun ta xi meje niji ne, nihñu sacuatjin sahmi xuta xi ngatsë rë xi jemu ndaja ticaa rë me xi mangucacun me cojo Nina ne, vëhë xi tifahatsja me cjuandaja xi ha cachja Nina xi sacú rë me.

¹³⁻¹⁴ Hya xi cachja quixi Nina cojo Abraham xi sua rë me ngu cjuandaja ne, tsëhë xi ha quihndë tsajin sa yo xi matitjun xi cuma rë Nina ne, vëhë xi cachja me cuitjin: “Ngahan suva hvë xi cjuaquixi xi tsinchácun ri, hacuaaha jemu cjin sahme ri cojo xuta rijí.” Cuatjin cachja me.

¹⁵ Hane xi cuatjin cacaa rë Abraham cavejñaya me cojo cjuajeya cjuá xi cachja Nina ne, cavechu nixtin xi casacu jain rë me cjuandaja xi ha cachja Nina xi sua rë me.

¹⁶ Hya xi ngu xuta sua me ngu cjuá rë me xi cjuaquixindaja ne, hisca veyanangui me ngu xi hitsë sa matitjun xi cumá rë me, xi hacui Nina; hane hya xi jo xuta tisua cjuá rë me ne, sa xi cuetjújñi ngu me xi cuacun vë xi cuichja me: “Vëë Nina jain xi quixi!” ne, ngajan ma chihin cjuavisiajmi rë me.

¹⁷ Vëhë xi hya xi cachja Nina xi sua rë me Abraham ngu cjuandaja ne, cuitjin cachja me: “Ngahan suva hvë.” Cuatjin cachja me cojo sa xi ngayaan xi chjahanntsán cjuandaja vëhë ne, cumachayandaja naja ta Nina ne, hya xi cuichja me ngu cjuá ne, tsindeyaain me cjuatacun rë me.

¹⁸ Cuatjin cachja Nina cojo sa xi jercu ndaja sacú naja cjuetacun ngatsë rë jo xcusun xi hatuxa cumaji cuindeya. Ngu xcusun jan ne, hacui súvá Nina, hane xi ma jo jan ne, hacui cjuá xi cachja me cojo Abraham. Hacuaha Nina ne, hatuxa maji vindacha me. Hane ngayaan xi vetahan tacun Nina ne, sacú naja cjuetacun vëhë, cojo sa xi cumangutacun cojo cjuá xi Nina cachja me xi cuechu nixtin xi cuiseen chjahanjendan tangun cojo rë me.

¹⁹ Hane xi cuatjin vetahan tacun Nina ne, tsajin camahani mé cuma rë hasen naja, hacuaaha cuma cuechun hisca hiscan tacun Nina,

²⁰ hiscan xi quiji Jesús cavuxaha me ndiya tsajan. Hane Nina casua xa me Jesús xi camá Jesús nahmi xi matitjun xi tsajin nu tsajin nixtin xi cjuë xa rë me, sacuaaha camá Melquisedec hatsëë nixtin.

7

Jesús ne, má me nahmi sacuaaha camá Melquisedec

¹ Melquisedec vë ne, matitjun me tsëhë nandya Salem, hacuaaha má me nahmi xi sahmi me xa tsëhë Nina xi hatuxa jyë hnga cojo Hasen rë. Hane hya xi cavuya Abraham xi quiji cavaxëtje me quihndi rë hntsë me tsëhë condra rë ne, cavetju Melquisedec tsëhë nandya Salem quijitjengui me Abraham hiscan nduva, hane xi casacu xicjin me ndiya ne, catsinchacun Melquisedec Abraham.

² Hya xi camá ne, të cahndë cavatëcja Abraham yëjë ni xcusun xi camá sa cafaha me tsëhë xuta xi cuacun condra jan ne, casua rë me Melquisedec ngu cahndë tsëhë të cahndë jan, tsëhë xi Abraham ne, faharcun me Nina. Ñihi xi Melquisedec ne, meje cuichja “ngu me xi matitjun xi vitexa cojo yëjë ni cjuaquixi”; hacuaaha ñihi xi chja Me xi Matitjun tsëhë Salem ne, meje cuichja “ngu me xi matitjun xi vitexa cojo yëjë ni cjuajeya.”

³ Xcun xujun rë Nina ne, tsajin camahani hiscan xi chja tsëhë naa tsëhë nahmi rë Melquisedec. Hisca tsëhë xutachanga rë me ne, tsajin hiscan xi chja. Hacuaha chjaain hacutjin catsin me ne, chjaain hacutjin cahme me. Cuatjin xi Melquisedec ne, meje tangun

me cojo Quihndi rē Nina, tsēhē xi hacuaha ngu nahmi má me xi tsajin nu tsajin nixtin fē xa rē me.

⁴ Chutsujun hacutjin jercu vengui chjí rē Melquisedec, xi hisca xutachanga naja Abraham ne, casua me me ngu cahndē tsēhē yējē xcusun xi cavatēcja me tē cahndē jan.

⁵ Ley xi casua Nina rē Moisés xi camá ngascan ne, chja ta nahmi xi nduva tǵē rē Leví ne, tǵin rē me chuva rē xi cjuhya me cojo naja ngayaan xuta tǵē rē xuta Israel xi cuichancjan tē cahndē yējē ni xcusun xi tǵin naja, cjuaha nahmi vēhē ngu cahndē tsēhē tē cahndē jan. Cuatjin chja ley rē Moisés xi cuechjen diezmu naja, handasa xicjin nahmi jan má ngayaan, hacuaha tǵē rē Abraham ngayejen ni.

⁶ Melquisedec ne, handasa hacuiin tǵē rē Leví má me, peru caphatsja me ngu cahndē tsēhē xi camá tē cahndē jan, xi casua Abraham. Hacuaha catsinchacun Melquisedec Abraham, me xi ha cachja Nina xi sacú rē cjuandaja.

⁷ Ngayejen ni ne, ha hyan ta me xi tsinchacun ne, me vēhē xi matitjun me tsēhē me xi manchacun.

⁸ Nguēhe xcun cjuahñu naja vi ne, nahmi xi fahatsja me diezmu tsēhē yējē xcusun xi ticja tē cahndē ne, hacuaha xuta ngayaan ni me xi hacuaha hme me; peru xcun xujun rē Nina ne, chja tsēhē Melquisedec sacuaaha xi tacun cuaha me.

⁹ Nahmi xi nduva tǵē rē Leví xi hacuaha cojo me tifahatsja me diezmu ne, cuma cuinújan ne, sacuaaha xi cojo me cavechji me diezmu rē me hya xi casua Abraham cojo Melquisedec jan diezmu rē me.

¹⁰ Cuatjin sacuaaha xi cavechji nahmi xi cuacun jan ta, tsēhē xi Abraham ne, ha cojo tǵē xi cuacun vē yaha me hya xi casua me diezmu rē me cojo Melquisedec.

¹¹ Xuta Israel ne, caphatsja me cja xi chja hacutjin meje rē Nina xi sahmi yējē xuta xi tǵē rē Leví xi sahmi me xa sacuaaha nahmi. Quihndē ne, sa xi nahmi xi cuacun vē camá casahmi me xi cavechutaha xuta yējē ni hacutjin xi meje rē Nina xi sahmi me ne, ha quihndē hacuiin sahmi nguǵyē xi cuetjuiñi sa ngu nahmi xi hacjahi xcusun rē, ngu nahmi xi hacuiin tangun xcusun rē cojo Aarón ta ngu nahmi xi tangun xcusun rē cojo Melquisedec.

¹² Hane hya xi vindeya xcusun rē xa xi sahmi nahmi ne, hacuaha hatuxa vindeya ley xi vitexa rē me.

¹³ Hane Nai naja, me xi cuatjin chja xujun rē Nina tsēhē ne, hacjahi tǵē me, hane sacuaaha tǵē vēhē ne, hisca ngu nahmi cjēē cuetjuiñi me.

¹⁴ Hacuaaha ha hyan ta Nai naja ne, tsēhē tǵē rē Judá canduva me, hane Moisés ne, cachjaain camahani me xi tǵē vēhē ne, ngajan cuetjuiñi ngu nahmi.

¹⁵ Yējē cja xi tinújan vi ne, tsejen xi jemu cjuaquixi, hya xi vetjuiñi sa ngu nahmi sacuaaha Melquisedec.

¹⁶ Hane nahmi xingu jan ne, hacui Nai naja, me xi cavechutaha xi camá nahmi, hacuiin ngatsē rē ngu ley xi chja yo tǵē rē xi cuma nahmi ta ngatsē rē ngahñu rē ngu cjuahñu xi tǵin rē me xi tsajin nu tsajin nixtin vetsun. Ngatsē rē vēhē xi cavechutaha me xi camá me nahmi.

¹⁷ Hacuaaha Nina ne, cuitjin chja me tsēhē Nai naja:

Ngaye xi nahmi ngaye yējē nu yējē nixtin sacuaaha camá Melquisedec hatsēē nixtin.

Cuatjin cachja Nina.

¹⁸ Sacuaaha cja rē ley xi cavitexa titjun ne, cavetsunya, tsēhē xi hatuxa tsajin rē ngahñu hacuaha machjiriin ta,

¹⁹ tsēhē xi camaji casahmi xi cavechutaha xuta yējē ni hacutjin xi meje rē Nina xi cuechutaha me. Hane cahndē rē ley vēhē ne, vetahan tacun ngu cja xi hitsē sa ndajiyihi, hane ngatsē rē xi cuatjin vetahan tacun ne, vēhē xi nihña tñña tsēhē Nina.

²⁰ Hya xi casua xa Nina Jesús xi cuma me nahmi xi matitjun ne, cachja me cja vihi: “Ngahan suva hvē.” Cuatjin cachja me. Peru hya xi cafaha xa nahmi xi yahnga jan ne, cachjaain Nina: “Ngahan suva hvē.”

²¹ Peru sacuaaha tsēhē Nai naja ne, xujun rē Nina ne, cuitjin chja:

Nai naja ne, cachja me cja vihi: “Ngahan suva hvē.” Cuatjin cachja me,

hacuaha tsajin hora tsindeya me cjuatacun rē me xi cachja me cja vihi:

“Ngaye xi nahmi ngaye yējē nu yējē nixtin

sacuaaha camá Melquisedec.”

Cuatjin cachja me.

²² Hane xi cuatjin casua xa Nina Jesús xi camá me nahmi xi matitjun tsajan ne, vēhē xi sacuaaha cjuaquixindaja xi Nina ne, sahmichihin jain me compromisu xi sehe tisahmi me. Hane compromisu vēhē ne, hitsē sa ndajiyihi xi cuma rē xi casahmi me titjun.

²³ Sacuatjin rë nahmi xi yahnga jan ne, sacuiin rë me cahndë xi cjuenduju me sahmi me xa yëjë ni nixtin ta, tsëhë xi hatuxa hme me. Vëhë xi hisca ntsacu cavetsihin hisca quihndë ne jemu cjin camá me cojo yëjë sa tjë rë me xi yahnga xi hacuaha camá nahmi.

²⁴ Peru Jesús ne, tsëhë xi tsajin nu tsajin nixtin xi cueya me ne, vëhë xi hacuaha tsajin nu tsajin nixtin xi jingu sa cjuahatsja xa rë me xi má me nahmi.

²⁵ Vëhë xi ma vaxëtje me xuta xi sahmi tiña tsëhë Nina ngatsë rë xi camangucacun xuta jan cojo Jesús. Hane hya xi vaxëtje me xuta xi cuacun vë ne, ha quihndë tsajin nu tsajin nixtin xi cumameje nga cuetjutje me ta, tsëhë xi Jesús ne, tacun me yëjë nixtin xi cjuhya rë me Nina ngatsë rë xuta xi cuacun vë.

²⁶ Jemu ndatjin xi tjin naja ngu nahmi xi matitjun xi cuatjin xcusun rë me. Jesús, nahmi xi matitjun jan ne, jemu tyahi me, tsajin rë me cjuatsehen, tsajin mé jyihí mé má me, cavetjuxin me tsëhë xuta tsehen, quiji me hisca ngajan sa tsëhë ngahnga.

²⁷ Me vëhë ne, hacuiin tangun me cojo nahmi xi matitjun xi yahnga jan ta, me vëhë ne, tsajin mé má xi cojo me nchunchujun ni sua rë me Nina ngu chu xi cahme ngatsë rë jyë rë suvá me, hane xi cuma ngascan ne, sua nga me ngu chu xi cahme ngatsë rë jyë rë xuta. Jesús ne, ngu ndiya ni casua me ngu cjuatjo cojo Nina ngatsë rë jyë rë xuta, hya xi casua me yojo rë me xi cahme me.

²⁸ Sacuaha ley rë Moisés ne, sua xa rë xuta xi cuma me nahmi xi matitjun tsëhë yëjë ni nahmi. Hane xuta ne, hatuxa caain rë cjuatacun rë me xi suvá cjuandaja sahmi me. Peru sacuaha cjuá xi cachja Nina hya xi cachja me xi “Ngahan suva hvë” ne, cjuá vëhë casua xa rë Quihndi rë Nina xi cuma me ngu nahmi xi matitjun. Hane cjuá xi cachja Nina jan ne, camá ngascan canduva xi cuma rë ley. Hacuaha Quihndi rë Nina ne, tsajin nu tsajin nixtin xi caain rë cjuatacun rë me xi suvá cjuandaja sahmi me.

8

Jesús ne, sahmi tangun me xuta cojo Nina ngatsë rë ngu compromisu xatsë

¹ Quihndë ne, cjuá xi hitsë sa matitjun tsëhë yëjë ni cjuá xi tinújan vi ne, hacui cjuá vihi: tjin naja ngu nahmi xi matitjun xi cuatjin xcusun rë me. Quiji me ngahnga, cavejña me taha ladu quixi tsëhë Nina xi jemu jyë hnga cojo hasen rë.

² Ngajan sahmi me xa xi má me nahmi ngajan ndava Nina. Peru ndava Nina jan ne, hacuiin ngu ndihya xi catsindaja ngu xuta ta cahndë vëhë ne, suvá Nai naja catsindaja me.

³ Yëjë ni nahmi xi matitjun ne, hatuxa xa rë me xi sua me cjuatjo cojo Nina sua me ngu chu xi tsiquehen xuta. Vëhë xi cojo Jesús camameje rë xi tjin mé xi sua me cjuatjo cojo Nina.

⁴ Sa xi ngeuhe ngasunhdë tacun cuaha me quihndë ne, hacuiin cojo me má me nahmi ta ngeuhe ne ha tjin nahmi xi sua cjuatjo cojo Nina sacuatjin vitexa ley rë Moisés.

⁵ Sacuaha xa xi sahmi nahmi ngeuhe ngasunhdë vi ne, hacuiin tangun cojo xa xi má ngajan ngahnga ta, sacuaha ejemplu o tjahnguen ni rë xa xi má jan ne, vëhë xi má ngeuhe. Hya xi ha cuetsihin sahmi Moisés ndava Nina jan ne, cuitjin cachja Nina cojo rë me: “Nechin cuidadu ne ndandaja nihñi yëjë ni xcusun vë sacuaha xcusun xi ha catsingácun ri ngajan hiscan naxi jan.” Cuatjin cachja Nina.

⁶ Quihndë ne, Jesús casacu rë me ngu xa xi hitsë sa ndaja, tsëhë xi hacuaha me vëhë sahmi tangun me xuta cojo Nina ngatsë rë ngu compromisu vëhë hane hitsë sa ndaja cjuá cachja me.

⁷ Sa xi ndatjin tjin chihin compromisu xi casahmi Nina titjun ne, sehe camamiji rë ngu nga compromisu xi ma jo xi hitsë sa ndaja.

⁸ Peru Nina ne, cavëë me xi xutachanga naja ne, quitjen me jyë, vëhë xi cachja me cuitjin: Ngahan Nai nuju ne, cuichjá cojo nuju ta cuechu nixtin

xi sahme nga ngu compromisu xatsë cojo nuju ngayun xuta tjë rë Israel cojo xuta tjë rë Judá.

⁹ Peru ha quihndë hacuiin sacuaha compromisu xi casahme titjun cojo xutachanga nuju, hya xi cojo cjuahmutacun naha ne, cavaxëxen me tsëhë nangui Egipto; hane tsëhë xi hacuiin quiji nduju me sacuatjin compromisu xi casahme cojo rë me ne, vëhë xi ngahan ne, casahmecuendaan me, cuatjin chjá ngahan, Nai nuju.

¹⁰ Sacuaha compromisu xatsë xi sahme cojo nuju ngayun xuta tjë rë Israel hya xi cuma ngascan tsëhë nixtin vëhë ne, hacui vihi:

Cueyá ley naha cahntsua cjuatacun nuju, sacuaha xi cuma hindu cjuá rë ley vëhë cahntsua cjuatacun nuju.

Hacuaha ngahan cuma ngahan Nina nuju hane ngayun cuma ngayun xuta naha.

¹¹ Tsajin yo xi cuicuya xicjin,

tsajin yo xi cuichja cojo xicjin cuitjin: “Meje rë xi cumachaya ri yo xi Nai naja.”

Tsajin yo xi cuichya cuatjin ta tsêhê xi yêjê ni sa quihndi sa changá ne, ha camachaya rê yo ngahan.

¹² Nixtin hya ne, jemu tjin ná cjuaninchataha cojo cjuatsehen xi cún me hacuaha ha quihndê tsajin nixtin tsinguítsjen jyê rê me.

Cuatjin cachja Nina.

¹³ Hya xi chja Nina tsêhê ngu compromisu xi tjun jan ne, casahmi changá me. Hane xcusun xi ha jima changá jan ne, ha meje cjuêya.

9

Ndava Nina nguehe nangui

¹ Quihndê ne, ngajni rê cjuá tsêhê compromisu xi casahmi Nina titjun ne, cachja me hacutjin xi chjahanrcun rê me, cojo xi cuma ndava me nguehe ngasunhndê.

² Vêhê xi camá ngu ndihya tsjian xi camá ndava Nina. Ngu cahntsua xi tjun tjun tacun, xi hmí rê Cahndê Rcun ne, ngajan tacun candeleru, tacun maxê, siu pan xi viyuju xcun Nina.

³ Ngu cahntsua xi tacun cahnchun taha cahntsua tsjian xi tyjangui má jo cahndê jan ne, ngajan tacun cahndê xi hmí Cahndê Xi Jercu Tu Rcu Camahani.

⁴ Ngajan tacun ngasuncun xi suvá oro camá hiscan xi tí tyjungunsa. Hacuaha ngajan tacun caxa tsêhê compromisu xi suvá oro casaxtê rê yêjê ni ladu rê. Hane cahntsua caxa jan ne, ngajan jiya tilu xi suvá oro cama, hane cahntsua tilu jan hinchandaja scuan cjuarcun xi hmí rê maná. Hacuaha bastón tsêhê Aarón xi cavetjusehen jan ne, cahntsua caxa jan jiyandaja. Hacuaha ngajan hinchandaja ndyojo tê xi camahindu cjuá rê ley.

⁵ Xcun caxa jan ne, hinchacun jo quicha, xi sacuaha ángel rê Nina, xi fehma rê tyjunga rê xcun caxa jan. Hane xcun tyjavaxcun caxa jan ne, ngajan tsejen hasen rê ngahñu cjuá rê Nina hiscan tsicjê me jyê rê xuta. Peru quihndê ne, tsêhê cjuá xi ha cachjá cojo nuju vê ne, ha quihndê cuichjaan chichihin sa cojo nuju.

⁶ Quihndê xi ha caviyuju chihin yêjê ni xcusun vêhê cuatjin ne, yêjê ni nahmi ne, visehen me nchunchujun ni cahntsua xi tjun tjun tacun tsêhê ndihya tsjian jan, xi sahmi me xa rê me sacuaa nahmi.

⁷ Peru cahntsua xi má jo tacun tsêhê ndihya jan ne, suvá ni nahmi xi matitjun visehen me ngu ndiya xi ngu nu, hane hatuxa vaha me jni rê chu xi sua me cjuatjo cojo Nina ngatsê rê cjuatsehen xi casahmi suvá me, cojo ngatsê rê cjuatsehen xi casahmi xuta xi hisca hvín me xi tjin rê me jyê.

⁸ Cojo cjuatacun vêhê ne, Hasen rê Nina ne, sua machaya naja xi ndiya xi cjuecani naja xcun Nina ne, cjêê tuxaha, jinguyêjê rê xi ndava Nina jan ne, tisahmi xa cuaha.

⁹ Yêjê cjuatacun xi cuatjin má vê ne, machjirêhê naja ngayaan sacuaa ngu ejemplu ni, quihndê nixtin vihi. Ta sacuaa cjuatjo xi sua me cojo Nina ngajan ndihya vêhê cojo chu xi tsiquehen xuta ne, maji tsityjahi rê cjuatacun rê xuta xi cuatjin faharcun me Nina.

¹⁰ Yêjê cjuatacun vêhê ne, vitexa suvá tsêhê xi chinê xi hyun ni cojo tsêhê xi ma tyjahi vihi ma tyjahi vêhê xi cumá rê Nina. Cjuatacun vêhê ne, vitexa suvá ni tsêhê taha xcun, hacuiin tsêhê cahntsua xahasen naja. Peru cjuatacun vêhê ne, cuitexa hisca nixtin xi Nina tsindeya me cjuatacun vêhê.

Ndava Nina ngajan ngahnga

¹¹ Peru Cristu ne, ha cavetjucun me xi má me nahmi xi matitjun xi sua naja me yêjê ni cjuandaja xi titsingatju Nina. Sacuaa cahndê hiscan xi tisahmi me xa xi má me nahmi ne, hitsê sa vengui chji rê hacuaha hitsê sa tjin rê cjuaquixi. Hacuaha hacuiin xuta casahmi me, cuma cuinújan ne, hacuiin nguehe ngasunhndê vihi tacun.

¹² Hacuaha hacuiin ngatsê rê jni rê chu tentsun cojo jni rê chu ndyaja chihndê xi cavisehen me xcun Nina ta ngatsê rê jni rê suvá me. Hane ngu ndiya cavisehen ni me, hya xi ha cavaxêtje naja me xi quihndê tsajin nu tsajin nixtin chajá ngayaan.

¹³ Hane jni rê chu tentsun cojo jni rê chu ndyaja cojo ndesu rê chu ndyaja chihndê ne, hora xi xinchutaha rê xuta xi camachocun yojo rê ne, caa rê tsityjahi rê yojo rê xuta jan cojo sa xi cuma tyjahi me xcun Nina.

¹⁴ Ha hitsê sa jni rê Cristu, me xi tsajin nu tsajin nixtin cjuê Hasen rê, hacuaha casua suvá me yojo rê me cojo Nina, ngu cjuatjo xi hatuxa jercu tu tyjahi camahani. Jni rê me jan ne, tsityjahi rê cjuatacun naja tsêhê yêjê xcusun xi machjiriin xi nihña, cojo sa xi cuma nihña xa rê Nina, me xi quicun.

Ngatsê rê jni ne, ma tyjahi yêjê ni xcusun

¹⁵ Vêhê xi Cristu ne, me vêhê xi sahmi tangun me xuta cojo Nina ngatsê rê ngu compromisu xatsê. Cahme me xi cuaxêtje me xuta tsêhê cjuatsehen xi casahmi xuta jinguyêjê rê xi sahmi xa cuaha compromisu xi tjun casahmi Nina. Hane ngatsê rê xi cuatjin

cahme Cristu ne, vèhè xi xuta xi cavaxijin Nina ne cuma cjuahatsja me cjuandaja xi ha cachja Nina xi sua rè me, cjuandaja xi tsajin nu tsajin nixtin chjahataha rè.

¹⁶ Hiscan xi tjin rè xuta ngu testamentu ne, cuma sahmi xa, peru hisca hya xi ha tjin cjuaquixi xi ha cahme me xi casahmi xujun jan.

¹⁷ Ta ngu testamentu ne, vetsihin sahmi xa ngatsè rè ngu cjuaveya ta, tsèhè xi jinguyèjè rè xi tacun quicun me xi casahmi ne, hatuxa tsajin rè ngahñu.

¹⁸ Vèhè xi hisca compromisu xi tjun casahmi Nina cojo xutachanga naja ne, hacuaha cojo jni rè chu camachihin.

¹⁹ Xi cavatju casua Moisés camachaya rè yèjè ni xuta yèjè ni cjuat tsèhè ley xi casua Nina ne, sehe cafaha me hitsè tsanga hani cojo ngu tsja rè ya xi hmi rè hisopo, sehe catsicahnchi me cojo jni rè chu hndindyaja cojo jni rè chu tentsun, caviseccjan rè me nandá ne, sehe cavinchutaha rè me libru tsèhè ley hacuaha cavinchutaha rè me yèjè ni xuta.

²⁰ Ngajan xi cachja Moisés cojo xuta cuitjin: “Vihi jni xi sahmichihin rè compromisu xi cavitexa Nina hacutjin xi meje rè me xi nihña.” Cuatjin cachja me.

²¹ Hacuanitjin ni cojo yèjè ni xcusun xi sahmi xa cahntsua ndihya jan.

²² Sacuatjin vitexa ley ne, ha ña meje yèjè ni xcusun ne, ma tyjahi ngatsè rè jni. Hane sa xi cuangaan jni ne, hacuaha sacuiin cjuaninchataha.

Casua Cristu yojo rè me xi cjuahaxin me cjuatsehen

²³ Vèhè xi camameje rè xi cuatjin camatyjahi rè yèjè xcusun xi sacuaha tjahnguen rè xcusun xi tjin ngajan hiscan tacun Nina. Peru xcusun xi tjin ngajan hiscan tacun Nina ne, camameje rè xi camatyjahi ngatsè rè cjuaveya xi hitsè sa ndacun xi cuma rè cjuaveya xi cuacun vè.

²⁴ Cristu ne, hacuiin cavisehen me ndava Nina xi xuta catsindaja me, ndihya xi tu cavetjutaha ni tsèhè hiscan xi cjuaquixi xi tacun Nina ta hisca ngahnga hiscan xi tacun Nina ne, ngajan xi cavisehen me. Cuatjin cavisehen me cojo sa xi quihndè ne, cuejña me xcun Nina, cuichjatje me ngatsè naja.

²⁵ Peru hacuiin cavisehen me xi sua me yojo rè me cojo Nina jemu cjin ndiya, sacuatjin sahmi nahmi xi matitjun xi chuva nu chuva nu visehen me ndava Nina cojo jni xi hacuiin jni rè me.

²⁶ Sa xi cuatjin cjin ndiya cavisehen Cristu ne, hacuaha cuatjin cjin ndiya camameje rè xi cueya me hisca hya xi cavetsihin ngasunhndè ne hisca quihndè. Peru quihndè xi ha tivijnetaha nixtin changá vèhè ne, Cristu ne, ngu ndiya canduva ni me xi sua me yojo rè me xi cueya me cojo sa xi cjuahaxin me cjuatsehen.

²⁷ Ngayejen ni ne, hatuxa ngu ndiya ni cueyan. Ngaxtun vèhè ne, sehe tsichuva naja Nina cojo cjuatacun naja.

²⁸ Hacuanitjin ni Cristu ta hacuaha ngu ndiya ni casua me yojo rè me xi cjuahaxin me jyè rè jemu cjin xuta. Ngaxtun vèhè ne, cuinduva nga me xi ma jo ndiya, peru ha quihndè hacuiin tsèhè jyè rè xuta ta tsèhè xi cuaxètje me xuta xi siuya rè me.

10

¹ Peru ley rè Moisés ne, sacuaha tjahnguen ni rè yèjè cjuandaja xi sehe sua naja Nina. Hacuiin ndandaja sua ley vèhè machaya naja hacutjin jain cun cjuandaja vèhè. Vèhè xi ley ne, tsajin nixtin xi cuma tsityjahi rè cjuatacun rè xuta xi tu nu tu nu fi me ndava Nina cojo chu xi tsiquehen me jan xi sua me cjuatjo cojo Nina.

² Sa xi cjuaveya rè chu vèhè caaa rè catsityjahi jain rè cjuatacun rè xuta xi cafaharcun rè me ne, hacuaha ha quihndè tsiquiin sa me chu ta, tsèhè xi xi má rè me ne, ha quihndè tsajin jyè rè me.

³ Peru xi cuatjin tsiquehen xuta chu ne, tu nu tu nu tsinguitsjen rè me tsèhè jyè rè me ta,

⁴ tsèhè xi jni rè chu ndyaja cojo jni rè chu tentsun ne, hatuxa maji fahaxin rè jyè rè xuta.

⁵ Vèhè xi hya xi cavéjña Cristu ngasunhndè ne, cachja me cojo Nina cuitjin:

Ngayun ne, hacuiin suvá cjuaveya rè chu xi meje nuju, hacuiin suvá cjuatjo xi meje nuju, vèhè xi canihña yojo naha.

⁶ Hacuiin suvá cjuatjo xi tí xi chuya nuju tsèhè, hacuaha hacuiin suvá ni jingu sa cjuatjo xi sua nuju xuta ngatsè rè jyè rè me xi chuya nuju tsèhè.

⁷ Sehe ngajan xi cachja nga Cristu: “Cuajyihí ngahan nguehe, xi sahme yèjè ni hacutjin xi meje nuju, ngayun Nina naha,

sacuatjin camahindu tsahan xcun xujun nuju.”

Cuatjin cachja Cristu cojo Nina.

⁸ Xi tjun tjun ne, cachja Cristu xi Nina ne, mijí rè me hacuaha chuyiin rè me tsèhè cjuaveya rè chu cojo jingu sa cjuatjo, cojo cjuatjo xi tí, cojo cjuatjo xi sua xuta ngatsè rè jyè rè me, handasa cuatjin vitexa ley xi cuatjin sahmi xuta.

⁹ Ngaxtun vèhè ne, cachja nga me xi tacun me xi sahmi me yèjè ni hacutjin xi meje rë Nina. Cuma cuintjan ne, tsicjè me xcusun changá xi hme chu, cojo sa xi cuejña me ngu xcusun xatsè xi sahmi xuta yèjè hacutjin xi meje rë Nina.

¹⁰ Nina ne, catsityjahi me cjuatacun naja ngatsè rë xi Jesucristu ne, casahmi me yèjè ni hacutjin xi meje rë Nina, ngatsè rë cjuatjo xi casua Jesucristu xi casua me yojo rë me ngu ndiya ni.

¹¹ Yèjè ni nahmi ne, nchunchujun ni hinchacun me fahacuenda me xa rë me xi má me nahmi, hacuaha cuatjin cjin ndiya vuya sua me cjuatjo xi tu vèhè tu vèhè ni, xi hatuxa tsajin nixtin xi ma fahaxin rë jyè rë xuta.

¹² Peru Cristu ne, xi cavatju casua me ngu ni cjuatjo cojo Nina ngatsè rë jyè rë xuta ne, sehe quiji me ngahnga cavejña me taha ladu quixi tsèhè Nina. Hane cjuatjo xi casua me jan ne, tsajin nu tsajin nixtin xi meje rë xi cuya cjue nga xcun Nina.

¹³ Hane quiji me ngajan, cojo sa xi nixtin xi cjuí sa ne, ngajan cuejñaya me hisca hya xi yèjè ni xi sahmi rë me condra ne, cuiyuju ngahma gobiernu rë me.

¹⁴ Vèhè xi ngatsè rë ngu ni cjuatjo vèhè ne, catsityjahi Cristu cjuatacun rë xuta xi ha Nina tiviyujuxin rë me xi cuma tsèhè me me, hane tsajin nu tsajin nixtin xi cuya cuetsun nga cjuatacun rë xuta xi cuacun vè.

¹⁵ Hasen rë Nina ne, ha cuanitjin ni sua machaya naja cuitjin:

¹⁶ Sacuaha compromisu xi sahme cojo xuta xi cuacun vè hya xi cuma ngascan tsèhè nixtin vèhè ne, hacui vihi:

Cueyá ley naha cahntsua cjuatacun rë me, sacuaha xi cumahindu cjua rë ley vèhè cahntsua cjuatacun rë me.

¹⁷ Hacuaha jyè rë me cojo cjuatsehen xi sahmi me ne, ha quihndè tsajin nixtin xi tsinguitsjen.

Cuatjin cachja Hasen rë Nina.

¹⁸ Hya xi ha camanchataha jyè ne, ha quihndè mamiji rë xi cjue sa cjue sa cjuatjo xcun Nina ngatsè rë jyè vèhè.

Meje rë xi nihña tiña tsèhè Nina

¹⁹ Vèhè xi ngayejen ni ne, rcuun camahani xi cuiseen xcun Nina quihndè ngatsè rë jni rë Jesús.

²⁰ Jesús ne, cavuxaha me ngu ndiya xatsè xi cuma naja, ngu ndiya xi cjuecojo naja xcun cjuahñu, ngu ndiya xi cjuecojo naja xcun Nina ngatsè rë cjuaveya rë Jesús.

²¹ Jesús ne, me vèhè má me nahmi xi jercu tu vengui camahani chji rë, hacuaha sahmi naja me cuidadu ngayejen ni xi má ngayaan ladu rë Nina.

²² Ngatsè rë yèjè cjuatacun vèhè ne, meje rë xi nihña tiña tsèhè Nina cojo nguñajatacun, meje rë xi tjin ngu tacun xi macjain naja Jesús ta, tsèhè xi cjuatacun naja ne, cachjahaxin rë cjuatsehen xi cún tsèhè xi sacuaha xi caxinchutaha rë jni, hane yojo naja ne, sacuaha xi cafengui cojo nandá tyjahi.

²³ Meje rë xi hacuini nismetacun cjuandaja xi nújan xi vetahan tacun ta, tsèhè xi me xi cachja cojo naja yèjè cjuandaja xi sahmi me ngascan ne, hatuxa sahmichihin me yèjè cjuandaja vèhè.

²⁴ Meje rë xi cuinchan chuva rë hacutjin cuisecoon xingueen xingu xingu ngayaan cojo sa xi tjin naja cjuahmutacun hacuaha nihña cjuandaja.

²⁵ Miji rë xi cuejñaxen xi ma tangun ngayaan sacuaha xcusun rë jingu sa xingueen. Xi meje rë ne, cuma tangun ngayaan cojo sa xi tahan cjuetacun xingueen xingu xingu ngayaan, hitsè guan ta nixtin xi cuinduva Jesús ne, chutsejen ta ha tijima tiña.

Handajasa cjuatjo casacu naja cjuahñu xatsè, peru suain cahndè xi tuyjè nihña cjuatsehen

²⁶ Cuatjin meje rë xi nihña ta sa xi ngu xingueen xi ha ndaja cafahatsja me cjua xi ha cjuaquixi cjuenduju me cojo ngu ndiya rë cjuatsehen ne, ha quihndè tsajin sa mé cjuatjo xi cuma cjue ngatsè rë jyè rë me.

²⁷ Cahndè rë vèhè ne, hatuxa sacú rë me castigu, cjue cuetí me xcun ndihi xi ha jima tiña nixtin xi tsicjè rë yèjè xi choho vèè rë Nina.

²⁸ Hya xi ngu xuta tsitjungui me ley rë Moisés ne, cojo jo cojo jyan ni xuta xi tsinguixi me xi cuaintjin sahmi xuta vèhè ne, chja ley ta hatuxa cueya me, hacuaha hisca ngu tsajin yo cumayama rë tsèhè me.

²⁹ Ngayun ne, ha ndaja hyun ta hitsè sa jercu jyihi camahani castigu meje rë xi cuma xuta xi sune tsufè me Quihndi rë Nina, hacuaha tsingatahacacun me xi tsajin mé vengui chji rë jni rë Quihndi rë Nina jan, hacuaha choho chja me tsèhè Hasen rë Nina xi jercu casua rë xuta jan cjuandaja. Jni xi tsitjungui xuta jan ne, jni vèhè xi casahmichihin rë compromisu xi cachja Nina, hacuaha ngatsè rë jni vèhè ne, camatyjahi cjuatacun rë xuta jan.

³⁰ Ngayaan ne, ha hyan Nai naja, hane me vëhë xi cachja me cuitjin: “Ngahan satë ná xi sahmengojo cojo xuta tsehen; hatuxa ngahan sahmengojo.” Hacuaha chja nga me ngu ndiya cuitjin: “Ngahan Nai nuju ne, cjuahá chuya xuta naha.” Cuatjin cachja Nai naja.

³¹ Jemu jyë chircun sa xi ngayaan cjuinenguenyan ngajñi rë castigu xi sahmi Nina, me xi quicun!

³² Peru ninguitsjun nixtin titjun, hya xi ha café cachjuhunntsun cjuahasen rë Nina sehe cacaa nuju cojo ngu cjuacjintacun jyë xi casua nuju cjuañihi xi cavatjun camá.

³³ Jiya hora ne, xcun cojo xcun ni choho cachja xuta tsujun hacuaha casua nuju me cjuañihi, hacuaha jiya hora nga ne, caviseucun rë xuta xi cuatjin cavatju me camá.

³⁴ Chjá cuatjin ta hacuaha hvë xi hacuaha camayuma nuju me xi híncha ndavaya. Hacuaha hisca cojo cjuasua caningatuhun xi cachjahataha cjuachan rë yëjë ni xcusun xi ngayun tsujun, tséhë xi ha hyun ta ngajan ngahnga ne, ha tjin nuju ngu xcusun xi hitsë sa ndaja, xi tsajin nu tsajin nixtin cjüë.

³⁵ Xicanismutacuun cjuatacun xi rcun camahani, ta xi cuatjin cuanguncujun cjuatacun vëhë ne, Nina ne, hatuxa jemu jyë cjuatjo xi sua nuju me.

³⁶ Ngayun ne, meje rë xi scaa nuju cojo cjuacjintacun xi vatjun má, cojo sa xi hya xi cuatjin café canihñu hacutjin xi meje rë Nina ne, sacú nuju cjuandaja xi ha cachja Nina xi sua nuju me.

³⁷ Xujun rë Nina ne, cuitjin chja:

Ha tu chúva sa nixtin ne,

me xi cuinduva ne, hatuxa cuinduva me, ha quihndë cuindeyaain rë me.

³⁸ Xuta naha xi tsajin jyë rë me ne, sacú rë me cjuahñu xatsë ngatsë rë xi mangucacun me cojo ná;

peru sa xi cuya me cjue ngaxtun me ne, chuyiin ná tséhë me.

Cuatjin chja xujun rë Nina.

³⁹ Peru ngayaan ne, hacuün tangun ngayaan cojo xuta xi vuya fi ngaxtun me sehe tsicjé Nina me ta ngayaan ne, tangun ngayaan cojo xuta xi mangucacun me cojo Nina sehe cuaxëtje Nina me.

11

Ninguitsjen xutachanga naja xi jemu camangucacun me cojo Nina

¹ Quihndë ne, hya xi ha camangutacun cojo ngu cjua ne, sacuaha xi ha tjin naja cjuaquixi xi hatuxa sacú naja ngu xcusun xi vetahan tacun, sacuaha xi ha hyan xi xcusun xi matsijin ne, hacuaha cjuaquixi.

² Tséhë xi xutachanga naja ne, camangucacun me cojo Nina, vëhë xi Nina cachja tséhë me xi tsajin xi cún rë me xcun Nina.

³ Tséhë xi mangutacun cojo Nina ne, vijnercun xi Nina cojo cjua ni rë me ne, catsindaja me ngasunhndë, hacuün cafaha me ngu xcusun xi matsejen xi catsindaja me ngasunhndë vi xi tsejen naja.

⁴ Tséhë xi camangucacun xutachanga naja Abel cojo Nina ne, hitsë sa ndaja cjuatjo xi casua rë me Nina xi cuma rë cjuatjo xi casua xutachanga naja Caín. Vëhë xi Nina ne, cachja me xi Abel ne, tyjahi me cojo cjuatacun rë me. Hacuaha súvá Nina catsingacun me xi cjuatjo xi casua Abel ne, jemu ndaja. Hane tséhë xi cuatjin ne, ngajan camatsejen xi yëjë sa xuta tséhë xi handasa cahme me, peru hisca quihndë ne, cumachjiréhë sa naja cjuatacun rë me.

⁵ Tséhë xi camangucacun xutachanga naja Enoc cojo Nina ne, cachjahataha rë me tséhë ngasunhndë vi, cojo sa xi cueyaain me. Hane ha quihndë casacuün me ta, tséhë xi Nina cafahataha rë me. Peru chaja sa xi cjuahataha Nina me ne, ha camatsejen xi Nina ne, jemu chahaya rë me tséhë Enoc.

⁶ Peru sa xi manguaintacuun cojo Nina ne, cumaji nihña xi chuya rë me tsajan. Xuta xi sahmi tiña me tséhë Nina ne, meje rë xi macjain rë me xi tjin jain Nina, hacuaha Nina vëhë xi jemu jyë cjuatjo xi sua rë me xuta xi cuacun vangui rë me.

⁷ Tséhë xi camangucacun xutachanga naja Noé cojo Nina ne, hya xi casua Nina camachaya rë me tséhë xcusun xi cjëë cuma ne, casahmi me ngu barcu cojo sa xi cuetjutje me cojo xuta rë me. Cuatjin casahmi me ta, tséhë xi faharcun me Nina. Hane xi cuatjin camangucacun me cojo Nina hacuaha casahmi me cuatjin ne, ngajan camatsejen xi yëjë sa xuta tséhë ngasunhndë ne, chajá me. Hane Noé ne, cuatjin camatyjahi me cojo cjuatacun rë me sacuatjin matyjahi ngayaan cojo cjuatacun naja xi mangutacun cojo Nina.

⁸ Tséhë xi camangucacun xutachanga naja Abraham cojo Nina ne, hya xi cachja Nina xi cuetjuxin me tséhë nangui hiscan xi tacun me xi cjue me ngu cahndë hiscan xi sua Nina xi

cuma tsêhê me ne Abraham ne, cahndê me tsêhê Nina hane cavetju me quiji me, handasa hvîn me jani cuechû me.

⁹ Tsêhê xi camangucacun Abraham cojo Nina ne, caviyujutaha me ngu nangui xîn xi cachja Nina xi sua rê me. Hane ndihya tsjian ni caviyuju me cojo quihndi rê me, Isaac cojo Jacob, quihndi xi hacuaha cojo cjuahatsja cjuandaja xi ha cachja Nina xi sua me jan.

¹⁰ Cuatjin caviyuju Abraham ta, tsêhê xi jemu meje rê me xi cuechû me ngu nandya xi ndaja hñu cun ndihya rê cojo xihndênaña rê, ngu nandya xi Nina cavejña me cjuatacun rê me hacutjin cuma, hacuaha me vêhê casahmi me.

¹¹ Tsêhê xi camangucacun Abraham cojo Nina ne, Nina casua rê me ngahñu xi cuma sacû rê chjuun rê me quihndi, handasa Sara chjuun rê me ne, hatuxa maji sacû rê me quihndi hacuaha Abraham ne, jemu changá me xi sehe sacû rê chjuun rê me quihndi. Cuatjin camá ta, tsêhê xi camangucacun Abraham xi Nina ne, hatuxa sahmichihin me cjuá xi cachja me.

¹² Vêhê xi ngatsê rê ngu ni Abraham ne, handasa hatuxa ha quihndê tsjin rê me ngahñu xi sacû rê chjuun rê me quihndi ne, peru tjê rê me ne, tangun cjin camá cojo niñû xi yaja ngahnga, tangun cojo tsumi rê tjeheh ndachacun xi maji maxqui.

¹³ Yêjê ni xutachanga naja xi cuacun vê ne, mangucacun cuaha me cojo Nina hya xi cahme me. Casacuiin rê me cjuandaja xi cachja Nina xi sua rê me, peru sacuaha xi ha cavêê me cjuandaja vêhê hane jemu ndama rê me. Cachja quixi me xi sacuaha xuta ngu nangui me xi caviyujutaha me nguehe ngasunhndê.

¹⁴ Hane xuta xi chja cuatjin ne, jemu quixi sua me machaya naja xi tivangui sa me ngu nangui xi cuma tsêhê suvá me.

¹⁵ Sa xi catsinguitsjen sa me nangui hiscan cavetju me ne, tjin sa rê me chuva rê xi camá cavuya me jan.

¹⁶ Peru me xi cuacun vê ne, xi meje rê me ne, ngu nangui xi cuma tsêhê suvá me ngajan ngahnga hiscan tacun Nina. Vêhê xi Nina ne, ma savaain rê me xi hmî rê me Nina rê xutachanga naja xi cuacun vê, tsêhê xi ha tjin ndaja rê Nina ngu nandya xi cumá rê me.

¹⁷ Tsêhê xi camangucacun xutachanga naja Abraham cojo Nina ne, hya xi catsichuva Nina me cojo cjuatacun rê me ne, casua Abraham cojo Nina quihndi rê me Isaac. Hane Abraham, me xi cachja Nina xi sua rê cjuandaja ne, cavejñangucacun me xi sua me quihndi ngu rê me,

¹⁸ handasa cuitjin cachja Nina cojo rê me: “Suvá tjê rê quihndi rijji Isaac ne, vêhê ni xuta xi cumá tjê rijji xi cjuaquixi.” Cuatjin cachja Nina.

¹⁹ Abraham ne, camacjain rê me xi Nina ne, tjin jain rê me chuva rê xi hisca nima ne, tsicuya me cjuahñu. Cuatjin camá xi sacuaha xi ngajñi rê nima jain cavuya caphatsja Abraham quihndi rê me.

²⁰ Tsêhê xi camangucacun xutachanga naja Isaac cojo Nina ne, catsinchacun me quihndi rê me Jacob cojo Esaú. Cachja me yêjê mé xi nduva ngscan xi cuma rê quihndi rê me.

²¹ Tsêhê xi camangucacun xutachanga naja Jacob cojo Nina ne, hya xi ha meje cueya me ne, catsinchacun me jima ngu quihndindai rê me xi quihndi rê xutachanga naja José, hacuaha capharcun me Nina taha yahangui me bastón rê me.

²² Tsêhê xi camangucacun José cojo Nina ne, hya xi ha meje cueya me ne, caveyanangui me xi cuechû niixin xi yêjê ni xutachanga naja ne, cuetjuxin me tsêhê nangui Egipto, hacuaha cavítexa me hacutjin cuma cojo rê ninda rê me hya xi ha cahme me.

²³ Tsêhê xi camangucacun xutacha rê xutachanga naja Moisés cojo Nina ne, hya xi catsin Moisés ne, jyan sá caveyahma me, tsêhê xi cavêê me xi quihndinda jan ne, jemu ndajiyi camahani, hane cavincharcuain rê me yojo rê me tsêhê cjuá xi cavítexa me xi matitjun xi cueya yêjê ni quihndinda xi xihin tsêhê xutachanga naja.

²⁴ Tsêhê xi camangucacun Moisés cojo Nina ne, hya xi camachangá me ne, catsitjungui me cahndê rê me xi má me quihndi rê na quihndi rê me xi matitjun tsêhê nangui Egipto.

²⁵ Hitsê sa cachuya rê me xi cjue me choho cuatju me cuma cojo xuta rê Nina, xi cuma rê xi sua me cjuasua xahasen rê me nguhñu ngu hora ni ngajñi rê cjuatsehen.

²⁶ Catsingatahacacun me xi hitsê sa vengui chji rê xi scaa rê me xi choho cuichja xuta tsêhê me ngatsê rê xi sahmi tangun me cojo xutachanga naja xi ha Nina cavaxijin me, xi cuma rê xi sacû rê me cjuanchina rê Egipto. Cuatjin catsingatahacacun me ta, tsêhê xi hatuxa quitahacacun me cjuatjo xi sua Nina me ngscan.

²⁷ Tsêhê xi mangucacun me cojo Nina ne, cavetjuxin me tsêhê nangui Egipto, hacuaha hisca cavincharcuain rê me yojo rê me tsêhê xi cjan rê me xi matitjun jan. Cacaá rê me cojo yêjê ni cjuacjintacun vêhê sacuaha xi tivutsejen me Nina xi matsijin.

²⁸ Tsêhê xi mangucacun me cojo Nina ne, casahmi me suhi tsêhê Pascua, hane cavítexa me yêjê ni xutachanga naja xi cuinchataha me jni rê chu ngajan ya ngahñu rê tingotjo ndava me xingu xingu me, cojo sa xi hora xi cjuehe hasen xi tsiquehen rê quihndi tjun rê yêjê ni xuta ne, tsiquin rê hisca xi ngu quihndi tjun rê xutachanga naja.

²⁹ Tsêhê xi mangucacun xutachanga naja cojo Nina ne, cavatjucja me Ndachacun Hani sacuaaha vatju me nangui quixí. Hya xi camá ne, xi canduva xuta Egipto tivatju me ne, hora vêhê cavuya camatangun nga nandá hane ngajan cafê xuta xi cuacun vê.

³⁰ Tsêhê xi mangucacun xutachanga naja cojo Nina ne, cavitijñundee me hnchua xondyojo tsêhê nandya Jericó, hane xi cavatju yatu nixtin ne, cavixujne hnchua vêhê.

³¹ Hacuaha tsêhê xi mangucacun ngu na Jericó xi hmí rê Rahab cojo Nina ne, hacuiin hya xi cahme yêjê sa xuta Jericó xi cahndiin tsêhê Nina, hya cahme na xi viteña yojo rê vê ta, tsêhê xi cojo cjuandaja cafahatsja na ngu jo xutachanga naja xi quiji cavutsejensun me nandya Jericó jan.

³² ¿Mé sa xi meje nuju xi cuichjá cojo nuju? ta hisca chutaain sa hora xi cuichjá cojo nuju tsêhê xutachanga naja Gedeón, cojo Barac, cojo Sansón, cojo Jefté, cojo David, cojo Samuel, cojo yêjê sa profeta.

³³ Xuta xi cuacun vê ne, tsêhê xi camangucacun me cojo Nina ne, cacaa rê me hya xi casahmi me si cojo xuta tsêhê jingu sa nandya, casahmi me xi ndiya rê cjuaquixi, cavetjucaa ngu jo cjua xi cachja Nina cojo rê me. Camaji cavuxaha chu xa hntsua chu hora xi meje sinê chu me.

³⁴ Catiin me hya xi cavincha xuta me ngajñi ndihi xi meje cuaca me me. Cavatjuhnga me tsêhê xuta xi meje tsiquehen rê me cojo quicha. Handasa jemu ndaya tjin cacun me ne, casacu rê me ngahñu. Jemu casacu rê me ngahñu hya xi casahmi me si cojo xuta tsêhê jingu sa nandya, cacaa rê me catsinguijne me xuta xi choho vêê rê me.

³⁵ Ngu jo yachjin ne, cavuya cafahatsja me xuta rê me xi cavuya cjuahñu hya xi cahme.

Peru ngu jo nga xutachanga naja ne, jercu cavaja xuta me. Peru catsingatiin me xi sehenndaya me ta, tsêhê xi mijí tsismicacun me Nina hacuaha meje rê me xi sacú rê me ngu cjuahñu xatsê xi hitsê sa ndajiyi. Vêhê xi cacaa rê me hya xi cavaja xuta me hisca xi cahme me.

³⁶ Hane ngu jo nga me ne, catsixcuehyu xuta me, hacuaha cavaja xuta me cojo cuarta rê chu, hisca quiji me ndavaya hacuaha camahñu me cojo cadena.

³⁷ Catsiquehen xuta me cojo ndyojo, cavatêcja vasen xuta me cojo quicha nehñu, catsiquehen xuta me cojo quicha, catsujiyihiya nguehe catsujiyihiya ngajan me tixtê rê me chuxin rê chu tsánga cojo chuxin rê chu tentsun. Jemu camachaja rê me, jemu jyê cjuañihi cavatju me camá, choho casahmi xuta cojo rê me.

³⁸ Xutachanga naja xi cuacun vê ne, hisca vechiin chuva rê xi sacú rê ngasunhndê me. Catsujiyihiya me ngajan ngu xín camahani hiscan naxindya, hiscan nguijo, hisca ngu ngojo naxi caviyuju me.

³⁹ Peru xuta xi cuacun vê ne, handasa ha cavetjundaja me ngatsê rê xi mangucacun me cojo Nina ne, peru hisca xi ngu me casacuiin rê me cjuandaja xi ha cachja Nina xi sua rê me,

⁴⁰ tsêhê xi Nina ne, hya xi catsingatahacacun me ngatsê naja ne, ha cavejñangucacun me xi sahmi me ngu xcusun xi hitsê sa ndaja, xi hisca nixtin quihndê ne, sahmi Nina xi cuechutaha xutachanga naja xi cuacun vê yêjê ni hacutjin xi meje rê Nina xi cuechutaha me, sacuatjin tisahmi Nina cojo naja ngayaan quihndê.

12

Meje rê xi cuejñahñu cjuatacun naja cojo Jesús

¹ Vêhê xi ngayaan ta ha jemu cjín xutachanga naja xi machaya naja xi camangucacun me cojo Nina ne, meje rê xi cuejñaxen yêjê ni xcusun xi sahmindya naja, hacuaha cuejñaxen cjuatsehen xi mijí cjuexin tsajan, hacuaha nihña ngahñu xi scaa naja cuanguen nduju cojo ndiya xi Nina cavejña me xi cuma naja.

² Hacuaha meje rê xi cuejñahñu cjuatacun naja cojo Jesús, me xi cavejña ntsacu cjuachacun xi macjain naja hacuaha catsichihin me. Ngatsê rê cjuasua xi cavejña Nina xi cuma rê Jesús ne, cacaa rê me cojo cjuañihi xi casetaha me xcun cru, hisca casahmicuendaain me xi jemu cjuasava xi cuatjin cahme me. Hya xi camá ne, sehe quiji me ngahnga, hane ngajan tacun me taha ladu quixi tsêhê Nina.

Meje rê xi ningatehen xi cueyaquixi naja Nina ndiya

³ Vêhê xi ninguitsjun Jesús, me xi cacaa rê cojo yêjê xcusun xi casahmi xuta tsehen hya xi catsitjungui me Jesús. Ninguitsjun me, cojo sa xi hacuiin cjuenda rê cjuatacun nuju, hacuiin cuma ndaya tacún.

⁴ Ta ngayun ne, hisca cjuaveya cjêê cuechuntuhun xi nihñu ngahñu xi ningatuun rê cjuatsehen.

⁵ Sacuaha xi ngayun ne, canichayun cjua xi chja Nina cojo nuju sacuaha chja ngu nahmi cojo quihndi rê me xi chja cuitjin:

Hacuiin tu xcuehyu ni cumacjain ri hya xi Nai naja tiveyaquixi me ngaye ndiya, tsan, hacuaha hacuiin cuma ndaya tacuin hya xi tichjataha me ngaye.

⁶ Ta Nai naja ne, quihndi xi hmucacun me ne, veyaquixi me ndiya,

hacuaha sahmi me castigu yějē ni xuta xi fahatsja me sacuaha quihndi rē me. Cuatjin chja cjua jan.

⁷ Ngayun ne, caticaa nuju cojo yějē ni cjuacjintacun, ta xi cuatjin vatjun má ne, Nina tiveyaquixi nuju me ndiya. Nina ne, vutsejen me ngayun sacuaha quihndi rē me ta, cjuaquixi xi tsajin ngu quihndi xi nahmi rē ne, veyaquixiin rē ndiya.

⁸ Peru sa xi Nina cueyaquixiin nuju me ndiya sacuatjin veyaquixi me ndiya tsajan ngayejen ni ne, ngajan matsejen xi hacuiin quihndindaja rē me ngayun.

⁹ Ngayaan ne, hacuaha tjin xutacha naja nguehe ngasunhndē xi cavinchaquixi naja me ndiya, hacuaha cachjahanrcun me. Peru hitsē sa meje rē xi cuinuhyan tsēhē Nina Nahmi naja xi tacun me ngahnga. Xi cuatjin ne, cuechuntahan ngu cjuahñu xatsē.

¹⁰ Me xi cuacun vē ne, cavinchaquixi naja me ndiya ngu jo nixtin ni hacutjin xi má rē me xi ndatjin. Peru xi vinchaquixi naja Nina ndiya ne, ngayaan ndaja tsajan, cojo sa xi cuma tyjahi cjuatacun naja sacuatjin tyjahi cjuatacun rē suvá me.

¹¹ Hya xi tjin yo vinchaquixi naja ndiya ne, hacuiin ndama naja ta choho má naja, hora xi tichja me cojo naja. Peru sa xi cuinuhyan ne, xi cuma ngascan ne, sacú naja cjuandaja cjuajeya xi cuma tyjahi cjuatacun naja.

Miji rē xi nitjunguen Nina

¹² Vēhē xi ngayun xi ndaya tjin tacún xi tivangun cojo ndiya rē Jesús ne, tuhun ngahñu xahasen nuju.

¹³ Ngu quixi tángun ni cojo ndiya rē Jesús, cojo sa xi yo xi ndaya tjin cacun ne, hacuiin chajá tsēhē ndiya rē Jesús ta sacú rē ndiya xi cjuaquixi.

¹⁴ Nihñu ngahñu xi cuinechun ngu cjuandaja ngu cjuajeya cojo yějē ni xuta, hacuaha nihñu ngahñu xi cuma tyjahi cjuatacun nuju, ta hisca xi ngu xuta ne, cuechiin me xcun Nai naja sa xi hacuiin tyjahi cjuatacun rē me.

¹⁵ Nechun cuidadu cojo sa xi tsajin ngu xuta xi cuechintaain me cjuandaja rē Nina, ta ngaxtun vēhē ne, choho cuma rē me hane tu hitsē tu hitsē ne, tsinguetsun me cjuatacun rē jemu cjin xuta.

¹⁶ Nechun cuidadu cojo sa xi tsajin ngu xuta xi sahmi me cjuatsehen cojo ngu xi hacuiin chjuun rē me. Hacuaha nechun cuidadu cojo sa xi tsajin ngu xuta xi hisca sahmicuendaain me Nina, sacuatjin rē xutachanga naja Esaú, xi casua me yějē cjuanchina xi satē rē me xi má me quihndi tjun, ngatsē rē ngu comida xi cajinē me.

¹⁷ Ngayun ne, ha hyun ta xi camá ngascan hya xi meje cjuahatsja me ximinchacun rē nahmi rē me ne, cavitjungui me, tsēhē xi ha quihndē tsajin chuva rē xi tsindeya me cjuatacun rē me, handasa hisca cajihnda me xi meje rē me xi cuatjin cuma.

¹⁸ Ha jemu hatsēē xi xutachanga naja ne, quiji casahmi tiña me tsēhē ngu naxi xi tacun nguehe ngasunhndē hiscan xi cati ngu ndihi jyē, hiscan xi jemu jñu camahani, hiscan xi jercu hñu camahani cavanga tjo,

¹⁹ hiscan xi canuhya rē xi fane ngu tyjo, hiscan xi canuhya rē cjua xi cachja Nina. Hane xuta xi cahndē me cjua vēhē ne, jercu cafehya rē me xutachanga naja Moisés xi ha quihndē cuichjaain sa Nina cojo xuta xi cuacun vē.

²⁰ Cuatjin cachja me ta, tsēhē xi cacaaín rē me cojo cjua xi cachja Nina hya xi cachja me cuitjin: “Yo xi cjue cuisane ntsacu hiscan naxi vē ne, meje rē xi cueya cojo ndyojo, handasa ngu chu.” Cuatjin cachja Nina.

²¹ Xcusun vēhē ne, ngu chiracun jyē, vēhē xi hisca Moisés ne, cuitjin cachja me: “Jemu tsácjun, ña fatsē ngahan.” Cuatjin cachja me.

²² Peru ngayun ne, casatiin sa nuju cjuacjintacun vēhē ta ngayun ne, canihñutangun cjuatacun nuju cojo Nina xi quicun, me xi tacun ngajan ngahnga, sacuaha nandya xi hmí rē Jerusalén, ndetjún xi hmí Sión. Canihñutangun cjuatacun nuju cojo yějē jercu tu cjin camahani ángel xi tjin tangun xi sahmi jyē sahmi hnga rē Nina.

²³ Ngayun ne, canihñutangun cjuatacun nuju cojo yějē xuta xi cahme xi quihndi rē Nina xi tjin tangun ngajan ngahnga hiscan xi siutahaxujun ñihi rē. Yějē nima vēhē ne, vēhē xi sacuaha quihndi tjun rē Nina. Canihñutangun cjuatacun nuju cojo Nina, Nina xi tsichuva rē yějē ni xuta cojo cjuatacun rē me. Ngayun ne, canihñutangun cjuatacun nuju cojo hasen rē xuta xi tsajin jyē rē, xi casahmi Nina xi cavechutaha me yějē ni hacutjin xi meje rē Nina xi cuechutaha me.

²⁴ Ngayun ne, canihñutangun cjuatacun nuju cojo Jesús, me xi sahmitangun rē xuta cojo Nina ngatsē rē ngu compromisu xatsē. Hacuaha canihñutangun cjuatacun nuju cojo jni rē

Jesús jan ne, hitsë sa ndaja sua machaya naja tsêhê cjuandaja rê Nina xi cuma rê jni rê xutachanga naja Abel.

²⁵ Nechun cuidadu, hacuiin nitjungun Nina, me xi tichja cojo naja. Ta sa xi xutachanga naja cavatjinhngaain me tsêhê castigu hya xi catsitjungui me Moisés, me xi cachja cjua rê Nina cojo xuta nguehe ngasunhdê ne, hitsë guan ngayaan, sa xi nicuyan taha ngaxtuun tsêhê Jesús, me xi tichja cojo naja hisca ngajan ngahnga.

²⁶ Sacuaha nixtin rê xutachanga naja jan ne, ña nangui cafiniya cojo cjua xi cachja Nina, peru quihndê ne, chja me cuitjin: “Ngu ndiya sa tsiniya nangui, peru hacuiin suvá nangui ni tsiniya ta cojo ngahnga tsiniya.” Cuatjin chja Nina.

²⁷ Hya xi chja me cjua xi “ngu ndiya sa” ne, sua machaya naja xi chjahaxin rê yêjê ni xcusun xi finiya, cuma cuinújan ne, yêjê ni xcusun xi Nina casahmi me, cojo sa xi cuiuju xcusun xi maji finiya.

²⁸ Vêhê xi quihndê ne, tahan nacuechji rê Nina ngatsê rê xi tiviseen ngahma gobiernu rê me; gobiernu vêhê ne, vêhê xi maji finiya. Hane xi cuatjin nihña ne, chjahanrcun Nina sacuatjin xi chuya rê me, cojo yêjê ni cjuandaja cjuajeya tsêhê xi ngayaan ne, rcun me.

²⁹ Cuatjin meje rê xi nihña ta Nina naja ne, tsicjê me yêjê ni xi cjuatsehen sacuatjin rê ngu ndihi jyê xi tsicjê cuaca rê yêjê ni xcusun xi ma tí.

13

Meje rê xi nihña hacutjin xi chuya rê Nina

¹ Tángun nduju cojo xcusun naja xi nihñahmutacun xingueen sacuaha xi ngu jni ngu yojo naja.

² Hacuiin nichayun xi cojo cjuandaja chjuhunntsun xuta ngu nangui xi cjuehe nangui nuju ta tjin ngu jo xutachanga naja ne, cuatjin cafahatsja me xuta ngu nangui xi cafehe nangui rê me ne, hisca hvín me ne, ángel xi cafahatsja me jan.

³ Ninguitsjun xuta xi hinchja me ndavaya. Nihñucuecun sacuaha xi cojo ngayun nechunyun cojo rê me ndavaya. Hacuaha ninguitsjun xuta xi choho sahmi jingu sa xuta cojo ta, tsêhê xi ngayun ne, tjin ngu nixtin ne, hacuaha cuma cuatjun cuatjin.

⁴ Ngayujun ni ne, meje rê xi chjuhuncun xi hmí rê cjuavixan. Hisca ngu ngayun ne, mijí rê xi ninguetsun ngu cjuavixan xi ha tjin ndaja ta cuechu nixtin xi Nina ne, sahmi me castigu xuta xi sahmi me cjuatsehen cojo ngu xi hacuiin chjuun hacuiin xihin rê me, há tjin chjuun tjin xihin rê me ne, o há tsajin chjuun tsajin xihin rê me.

⁵ Hacuiin jercu meje nicujun tujún xi tivangun cojo nixtin nuju. Catamangutacun ni cojo xi ha tjin nuju. Cuatjin nihña ta, tsêhê xi Nina ne, cuitjin cachja me: “Hatuxa tsajin nixtin xi tsismecácun nuju.” Cuatjin cachja me.

⁶ Vêhê xi jemu ndama naja xi cuitjin nújan:

Nai naja ne, me vêhê xi visecoo ná me; vêhê xi tsacjuun.

¡Ndastu mé sahmi xuta cojo ná ngahan!

Cuatjin nújan.

⁷ Ninguitsjun me xi matitjun ngajñi nuju, me xi cuacun cachja cojo nuju cjua rê Nina. Ningatuhuntacún tsêhê cjuandaja xi cavetjucaa tsêhê xcusun xi casahmi me, hacuaha catamangutacún cojo Nina sacuatjin camangucacun me xi cuacun vê.

⁸ Yêjê ni cjuatacun xi tjin rê Jesucristu hisca ntsacu cavetsihin ne, cjuatacun vêhê tjin rê me hisca quihndê, hacuaha cjuatacun vêhê tjin rê me yêjê nixtin xi cjui sa.

⁹ Xicatsanguun ndiya rê jingu sa cjuachacun xi hacuiin tangun cojo cjuachacun xi cjuaquixi. Hitsë sa ndaja xi ngayaan ne, cumangutacun cojo Nina ngatsê rê cjuandaja rê me, xi cuma rê ngatsê rê cjuachacun xi vicuya yahnga xuta hacutjin xi meje rê xi xinê xi sihun ta, tsêhê xi cjuachacun xi vicuya xuta xi cuacun vê ne, tsajin mé machjirêhê rê xuta xi tjengui me cjuachacun vêhê.

¹⁰ Cjuaveya rê Jesucristu ne, tangun hitsë cojo cjuatjo xi tu nu tu nu ni cjue xcun Nina ngatsê rê jyê rê yêjê ni xuta. Tangun hitsë ta, tsêhê xi sacuaha nahmi xi sahmi me xcusun rê xutachanga naja ne, hatuxa cumaji sinê me yojo rê chu xi hme xi sua me sacuaha ngu cjuatjo vêhê.

¹¹ Ngayujun ni ne, ha ndaja hyun ta nahmi xi matitjun ne, vaha me jni rê chu xi cahme, ficojo me ngajan Cahndê Rcun, xi sua rê me Nina sacuaha ngu cjuatjo ngatsê rê jyê rê xuta, peru yojo rê chu ne, cahndê rê xi sinê me ne, cjue ngajan ngu xín tsêhê nandya, hane ngajan cjuê cueti.

¹² Cuanitjin rê Jesús ta ngajan ngu xín tsêhê nandya cahme me. Cahme me cojo sa xi sityajahi me cjuatacun rê xuta ngatsê rê jni rê suvá me.

¹³ Ngajan xi ngayaan ne, cuetjunxen tsêhê nandya, cuma cuinújan ne, cuetjunxen tsêhê xcusun rê xutachanga naja, cuanguentjenguen Jesús, hacuaha meje rê xi scaa naja xi choho chja xuta tsajan sacuatjin choho cachja me tsêhê Jesús.

¹⁴ Cuma cuetjunxen tsêhê nandya vê ta, tsêhê xi nguehe ngasunhdê vi ne, tsajin naja ngu nandya xi cuejña yêjê nu yêjê nixtin ta ngayaan ne, tivinchasen sa nandya xi tsindaja Nina xi cuma ngascan, cuma cuinújan ne, ngajan ngahnga.

¹⁵ Vêhê xi ngayaan ne, xi tivanguen ndiya rê Jesús ne, meje rê xi yêjê ni hora naxenndajan Nina, sacuaaha xi titahan ngu cjuatjo xi cuma rê me, cuma cuinújan ne, meje rê xi ndaja cuinújan tsêhê me, meje rê xi cuinújanquixen xi tsêhê me ngayaan.

¹⁶ Hacuiin nichayun xi nihñu cjuandaja hacuaha cuisecon xingun xingu ngayun ta xi cuatjin nihñu ne, sacuaaha xi tituhun rê Nina ngu cjuatjo xi jemu chuya camahani rê me tsêhê.

¹⁷ Tinuhyun tsêhê me xi matitjun ngajñi nuju, hacuaha nihñu yêjê hacutjin xi meje rê me xi cuacun vê ta me vêhê xi sahmi cuidadu nuju me hacuaha vêê me xi cuechu nixtin xi sua me cuenta cojo Nina. Nihñu ngahñu xi me xi cuacun vê ne, cuma sua rê xahasen rê me, hacuiin choho cuma rê me xi tisahmi me xa cuatjin ta sa xi choho cuma rê me ne, tsajin mé machjirêhê xi cuma nuju.

¹⁸ Nihñu oración ngatsê niji ta, tsêhê xi ngayin ne, hyin cojo cjuatacun niji xi cjuatacun niji ne, tyjahi, hacuaha hatuxa meje nihñi cjuandaja ngajñi rê tu mé ni cjuacjintacun.

¹⁹ Hacuaha ngahan ne, jercu cjuéhya sa nuju xi cuatjin nihñu oración ngatsê niji, cojo sa xi sua Nina cahndê xi hitsê sa xati cuinduvatjêngê nuju.

Nguehe cuijnetaha cjua

²⁰ Quihndê ne, ngayaan ne, ha hyan ta Nina ne, sua naja me cjuandaja cjuajeya, hacuaha catsicuya me Nai naja cjuahñu, me xi cavejña ngajñi rê nima. Nai naja ne, hacuaha jemu ndaja sahmi naja me cuidadu sacuaaha sahmi cuidadu ngu xuta chu tsánga rê me. Cuatjin ma sahmi Nai naja ngatsê rê jni rê me xi cavetju hya xi cahme me, jni xi casahmichihin rê compromisu xi yêjê nu yêjê nixtin sahmi xa.

²¹ Nina catisua nuju me yêjê cjuandaja rê me, cojo sa xi ngayun ne, cuma nihñu yêjê hacutjin xi meje rê me. Hacuaha catisahmi me cojo naja hacutjin xi chuya rê me, ngatsê rê xi ngayaan ne, tjin tangun cjuatacun naja cojo Jesucristu. Hane ngayaan ne, meje rê xi nihña jyê nihña hnga Jesucristu yêjê nu yêjê nixtin. Cuatjin jain.

²² Ngayujun ni ne, nihñu favor ne, tisiñuju cojo cjuasua cjua xi catsihindu nuju vê ta hacuaha hacuiin cjin cjua vê xi catsihindu nuju.

²³ Nguehe tisuá tijimachaya nuju ta cha Timoteo xingueen ne, ha camandaya cha tsêhê cjuañihi. Sa xi cjuehe xati cha ne, cuinduvintjenguin nuju ndyá, hane ndyá sacú xingueen.

²⁴ Tuhun ngu nina naha cojo yêjê me xi matitjun ngajñi nuju cojo yêjê sa me xi má ladu rê Nina. Xuta Italia xi xuta rê Nina ne, hacuaha tsingatju me ngu nina nuju.

²⁵ Nina catisua nuju me cjuandaja rê me. Cuatjin jain.

Carta xi catsihindu Santiago

Cjua xi catsihindu Santiago me xi hacuaha yahañihi rë Jacobo

¹ Ngahan Santiago, xi mosu hndixahan tsëhë Nina cojo tsëhë Nai naja Jesucristu ne, tsingátju ngu nina tsujun, ngayujun ni xi xuta ladu rë Nina ngayun, ngayujun ni xi cavitsojo yun ngasunhndë.

Cjuatacun ndaja xi nduva tsëhë Nina

² Ngayujun ni tsan ne, ngajñi rë yëjë ni xcusun cjuacjintacun xi cuátjun cuma ne, meje rë xi ndaja catama rë xahasen nuju ta,

³ tsëhë xi ha hyun ta, hya xi cavatju xi cacaa nuju cojo ngu cjuacjintacun jan ne, sa xi hacuiin canismutacún cjuachacun xi macjain nuju ne, vëhë cuisecoo nuju xi hitsé sa scaa nuju tu mé ni cjuacjintacun xi cuátjun sa cuma.

⁴ Peru nihñu ngu yëjë xi scaa nuju cojo yëjë ni cjuacjintacun jan hisca xi cuijnetaha. Sehe ngajan xi cuma yun xuta tyjahi xi chutaha cjuatacun rë xi cuma sahmi yëjë ni cjuandaja.

⁵ Peru sa xi yo yun xi sahmi chaja nuju cjuatacun ne, chjahyun rë Nina, hane sacú nuju ta, tsëhë xi Nina ne, hisca sesuntaha sa hya xi sua naja me, hacuaha hacuiin chjahnga me cojo naja, hya xi chjahyan rë me.

⁶ Peru meje rë xi catamangutacún hora xi chjahyun rë me, hacuiin jo cuma tacún ta, tsëhë xi xuta xi jo má cacun me ne, tangun me cojo tsindyü rë ndachacun xi ficojo rë tjo, xi fi ngeuhe fi ngajan.

⁷ Xuta xi cuatjin cun me ne, catijnercu me ta tsajin mé xi sua Nina me ta,

⁸ tsëhë xi jo má cacun me, jo xcun jo hntsua me tsëhë yëjë ni xcusun xi sahmi me.

⁹ Peru xuta yuma xi ladu rë Nina me ne, ndaja catama rë xahasen rë me ta, xcun Nina ne, jercu vengui chjí rë me.

¹⁰ Hane xuta nchina xi ladu rë Nina me ne, hacuaha ndaja catama rë xahasen rë me, hya xi cuijnercu me xi yëjë ni cjuanchina rë me ne, hisca venguiin chjí rë xi cuma rë Nina. Xuta nchina ne, cjuë me sacuatjin fë naxu ndexin.

¹¹ Hya xi tjercu ma suë chan ndavá ne, xca jan ne, fë yëjë xi. Hacuaha naxu rë ne, fë vixu. Xcusun rë ne, handasa tjercu ndajyihí camahani ne, fë vetsun. Hacuanitjin ni cjuë xuta nchina ngajñi rë cjuayuma xi sahmi me.

Cjuatacun tsehen

¹² Jemu ndaja tsajan ngayaan, sa xi scaa naja cojo yëjë ni cjuacjintacun xi cuátjun cuma ta, hya xi cavatju xi cacaa naja ne, hya sacú naja ngu cjuahñu ndajyihí ngajan xcun Nina. Ta cachja Nina xi, sa xi hmutacun me ne, sua naja me ngu cjuahñu ndajyihí jan.

¹³ Hya xi xahasen naja meje rë xi nihña ngu cjuatacun tsehen ne, mijí rë xi cuiúnjan xi Nina casua naja me cjuatacun tsehen jan, ta Nina ne, hatuxa tsajin rë me cjuatacun tsehen, hacuaha hatuxa suaain naja me cjuatacun tsehen xi nihña.

¹⁴ Peru cjuatacun tsehen xi meje nihña ne, hatuxa vetju tsëhë xahasen naja suvaan.

¹⁵ Hya xi ningatahantacun xi meje nihña cjuatsehen ne, cjuatacun jan sahmi xi nihña cjuatsehen. Hane sa xi hatuxa ningatehen rë yëjë ni cjuatsehen xi nihña ne, sacuiin cahndë cuечun xcun Nina.

¹⁶ Ngayujun ni tsan ne, mijí ná xi cuma ndacha ngayun.

¹⁷ Yëjë ni cjuandaja ndajyihí xi sacú naja ne, nduva tsëhë ngahnga ta, Nina xi casahmi me yëjë ni ndihi xi siutaha ngahnga ne, me vëhë sua naja me yëjë ni cjuandaja jan. Ndihi xi siutaha ngahnga jan ne, vindeya xcusun rë ta, tjin hora sua ndavá rë ne, tjin hora suaain ndavá rë. Peru Nina ne, chuva xi tacun ni me, tsajin vindeya cjuatacun rë me.

¹⁸ Hane hora xi camacjain naja cjuaxi cjuaquixi ne, hora hya casua naja me ngu cjuahñu xatsë. Cuatjin casua naja me ta, tsëhë xi meje rë me xi ngayaan ne, tjun tjun cuma yaan xuta ladu rë me. Sehe ngaxtun vëhë ne, cjin sa xuta xi hacuaha cuma me ladu rë Nina.

Cuitjin xi chjahanrcun jain Nina

¹⁹ Ngayujun ni tsan ne, hya xi yo cuichja cojo nuju ngu cjuaxi ne, titjun tinuhyunndujun mé cjuaxi cuichja me. Hacuiin ngutjen chjayunngun, hacuiin ngutjen cuma cjan nuju.

²⁰ Ta sa xi cjan nuju ne, nihñu cjuandaja sacuahatjin xi meje rë Nina.

²¹ Peru yëjë ni cjuatsehen ne, meje rë xi tiyujunxun. Hane cjuaxi rë Nina xi camacjain nuju ne, tetjún cojo cjuandaja cojo cjuajeya cahntsua xahasen nuju ta, tsëhë xi cjuaxi vëhë ne, cuma cuaxëtje nuju.

²² Hane sa xi tu cuisifñuju ni cjuar rē Nina jan, hane nihñuu hacutjin xi chja ne, tu cuindachun suvun ni rē yojo nuju. Vēhē xi hacuiin tu cuisifñuju ni ta, meje rē xi nihñu yējē ni hacutjin xi vitexa cjuar rē Nina.

²³ Sa xi tu cuisifñuju ni hane nihñuu hacutjin xi vitexa cjuar jan ne, tangun yun cojo ngu cha xi vutsejenya cha xcun cha cojo espeju.

²⁴ Cavutsejenya cha xcun cha hacutjin jyihī cha ne, peru xi cafe cha ne, ngutjen cachaya rē cha hacutjin jyihī cha.

²⁵ Peru hya xi cuisifñuju cjuar xi vitexa Nina jan ne, sa xi chutayun sa cjuar, sa xi chayaain nuju cjuar, sa xi nihñu jain hacutjin xi vitexa cjuar jan ne, sacú nuju cjuandaja rē Nina xcun ngasunhdē nuju. Cjuar rē Nina xi cuacun jan ne, hatuxa cjuaquixi, hacuaha cjuar vēhē xi vēhēndaya naja tsēhē ngajñi rē cjuatsehen.

²⁶ Sa xi tiningatuhuntacún xi jemu ndaja tichjuhuncun jain rē Nina, ngajñi rē xi tuyjē choho vetju ntsuvun núnun ne, tu mahya xi chjuhuncun rē Nina ta, tu tivindachun suvun ni rē yojo nuju.

²⁷ Jyan xcusun vihi xi chuya rē Nina Nahmi naja xi nihña: ngu ne, xi chjahanrcun jain me cojo ngu xahasen xi tyjahi; má jo ne, xi cuisecoon rē hndixahan cojo chjuun cahan ngajñi rē cjuacjintacun rē me; xi má jyan ne, xi hacuiin nihña cjuatsehen.

2

Meje rē xi chjahanrcun yējē ni xuta

¹ Ngayujun ni tsan ne, quihndē xi macjain nuju Nai naja Jesucristu, me xi tjemu tjin rē cjuandaja ne, mijí rē xi nihñu jyē ngu xuta ne, hane nihñu chuvun nga ngu me.

² Sa xi cuisehen ngu xuta nchina cahntsua yungun nuju, xi hisca oro xtungun rē me hacuaha tjercu ndajyihī tsjian rē me ne, hacuaha cuisehen nga ngu xuta xi yuma cojo tsjian rē me xi jyihī ntsun ntsun me ne, ¿mé cuinúnun cojo rē me?

³ Me xi ndajyihī tsjian rē jan ne, ¿há jemu chjuhuncun me, xi cuitjin cuinúnun cojo rē me?: “Tinechun nguehe cahndē ndajyihī vihi.” Hane me xi yuma jan ne, ¿há cuitjin cuinúnun cojo rē me?: “Ngaye ne, ngajan nechín jan”, o sa tsajin ne: “Nguehe nechín nguehe nangui.”

⁴ Sa xi cuatjin cuinúnun ne, ngajan matsejen xi hisca ngajñi nuju ne, hacuiin tangun xcusun nuju xi nihñu cojo ngayējē ni xuta. Tinichuvun xingun ni ne, peru cojo ngu cjuatacun tsehen.

⁵ Ngayujun ni tsan ne, tinuhyun cjuar vihi. Nina ne, cavaxijin me xuta xi yuma xcun ngasunhdē, cojo sa xi tjemu ndaja cumacjain rē xuta jan me, hacuaha sacú rē xuta jan cahndē ndajyihī nixtin xi cuetsihín cuitexa jain me ngajñi rē yējē ni xuta ngasunhdē, sacuatjin xi ha cachja me xi sacú rē yējē ni xuta xi sihmucacun me Nina.

⁶ Peru ngayun ne, nisavun rē xuta yuma. Peru ¿yo xi choho sahmi cojo nuju ni? ¿Yo xi faha nuju, fi vinchajyē nuju xcun xutaxa rē? Xuta nchina xi cuatjin sahmi cojo nuju.

⁷ Hacui jain me. Hacuaha xuta xi nchina ne, me vēhē xi choho chja me tsēhē Jesucristu. Hane Jesucristu jan ne, hacui me xi casua naja ñihī xi tsēhē súvā me.

⁸ Xcun xujun rē Nina ne, camahindu ngu cjuar xi cavitexa Nina, xi chja cuitjin: “Meje rē xi nihmitacuin xingun sacuahatjin nihmitacuin yojo riji.” Sa xi cuatjin jain nihñu ne, jemu ndaja tjin.

⁹ Peru sa xi nihñu jyē ngu xuta hane nihñu chuvun nga ngu me ne, ha canichujún cjuar xi cavitexa Nina. Hacuaha súvā cjuar jan ne, vēhē cuinchajyē nuju ta canihñuu hacutjin chja cjuar jan.

¹⁰ Ta sa xi nichujún ngu cjuar xi cavitexa Nina ne, handasa nihñu yējē ni cjuar xi yahnga ne, peru tangun jyē nuju cojo jyē rē ngu xuta xi hndiin camahani tsēhē yējē ni cjuar xi cavitexa Nina jan.

¹¹ Cuatjin ta, tsēhē xi ngu ni Nina xi cavitexa me catsijo cjuar vihi. Ngu ne: “Xi canidesiin cojo rē ngu chjuun, o cojo rē ngu xihin xi xín.” Ngu nga ne: “Xi caniquiin xuta.” Vēhē xi handasa hacuiin nindesun cojo rē ngu chjuun, peru sa xi nicuhun ngu xuta ne, ha canichujún cjuar xi cavitexa Nina jan, hane tjin jyē nuju xcun cjuar vēhē.

¹² Ngajan xi meje rē xi tinúnun hacuaha nihñu cjuandaja, sacuaaha xi ha ndiya tsichuva nuju Nina, scutsejen me hacutjin canihñu xi vitexa cjuar xi vēhēndaya naja.

¹³ Hane sa xi tsajin nuju cjuayumatacun cojo jingu sa ne, hacuaha tsajin rē Nina cjuayumatacun cojo nuju nixtin hya xi tsichuva nuju me. Peru sa xi tjin nuju cjuayumatacun ne, hacuaha tjin rē Nina cjuayumatacun cojo nuju nixtin hya.

Sa xi macjain jain naja ne, nihña cjuandaja

¹⁴ Ngayujun ni tsan ne, sa xi cuinúnun xi macjain nuju Jesucristu, peru nihñuu cjuandaja ne, hisca vengui chjiin rē ta, tsēhē xi Nina ne, cuaxintjiin nuju me xi cuatjin nihñu.

¹⁵ Hya xi sacú xingun cojo ngu xuta ladu rë Jesucristu xi jemu yuma camahani, xi jercu ntsun tsjian rë me, hacuaha hisca tsajin niñu xi sinë me ne,

¹⁶ ¿há cuitjin cuinújun cojo rë me? “Tangún ni tsan. Xicamajciintacún. Ndaja tetsun yojo nuju ta jemu hnchan, hacuaha ndaja xinu niñu ta quiji hora.” Peru sa xi tsajin mé catuhun rë me xi cuaja xi sinë me ne, vengui chjiin camahani rë xi cuatjin cuinújun cojo rë me.

¹⁷ Vêhë xi vengui chjiin rë xi tu suvá cuinújan ni xi macjain naja Jesucristu nguyëjë rë xi mijí nihña cjuandaja.

¹⁸ Peru tjin ngu cha xi cuichja cuitjin: “Hacjahi xuta xi macjain rë me Jesucristu, handasa sahmi me cjuandaja. Hacjahi xuta xi sahmi me cjuandaja, handasa macjaain rë me Jesucristu.” Peru ngahan cuichjá cojo rë cha jan ta hacuiin hacjahi xuta ta ¿hacutjin cuma xi macjain jain naja, sa xi hacuiin nihña cjuandaja? Ngatsë rë cjuandaja xi nihña ne, vëhë tsejen xi macjain jain naja Jesucristu.

¹⁹ Cha vëhë ne, ¿há macjain jain rë cha xi tjin ngu ni Nina? Tjemu ndaja tjin xi cuatjin macjain rë cha. Peru hacuaha xitsehen ne, cuatjin macjain rë, hane ña fatsë xitsehen má xi tsacjun.

²⁰ Tjemu yumahasen cha xi cuatjin cuichja jan. Peru nguehe cuichjá cojo rë cha ngu jo cju, cojo sa xi cuijnercu cha ta, vengui chjiin rë xi cuinújan xi jercu macjain naja Jesucristu, sa xi mijí nihña cjuandaja.

²¹ Sacuaha xutachanga naja Abraham ne, ha hyan xi hatsëë nixtin ne, camangucacun me xi tsiquehen me quihndi rë me xi hmí Isaac ngajan xcun ngasuncun, sacuatjin xi ha cachja Nina cojo rë me. Hane ngatsë rë xi cuatjin cahndë me tsëhë Nina ne, vëhë xi cachja Nina xi ngu xuta ndaja me, ngu xuta tyjahi me.

²² Ngajan matsejen ta xcusun xi casahmi me ne, cama tangun cojo cju xi macjain rë me. Hacuaha ngatsë rë xi cuatjin casahmi me ne, vëhë xi camatsejen ta macjain jain rë me.

²³ Cuatjin camá sacuatjin chja ngu cju xi camahindu xcun xujun rë Nina, xi chja cuitjin: “Abraham ne, camacjain rë me Nina. Vëhë xi Nina cachja me xi ngu xuta ndaja me, ngu xuta tyjahi me.” Hacuaha cachja Nina tsëhë me ta amigu rë me.

²⁴ Cuatjin xi hyan xi chja Nina xi xuta tyjahi yaan sa xi nihña cjuandaja, hacuiin sa xi tu suvá ni macjain naja.

²⁵ Hacuaha ni tjin ni cavatju na xi hmí rë Rahab, na xi caviteña na yojo rë na. Cama tyjahi xahasen rë na ta, tsëhë xi casahmi na ngu cjuandaja, hya xi cojo cjuandaja casua na cahndë xi caviyuju xuta ndava na, xuta xi catsingatju xutachanga naja ngajan nangui rë na. Hacuaha hacjahi ndiya xi catsingacun na me, xi cuetju me cjue me hiscan xi tsajin condra rë me.

²⁶ Sacuatjin xi machjiriin yojo rë ngu nima ta tsajin hasen rë ne, ha cuatjin machjiriin xi macjain naja Jesucristu, sa xi tsajin cjuandaja xi nihña.

3

Hacutjin sahmi neje

¹ Mijí rë xi cjin ngayun cuma yun maestru tsëhë cjuachacun tsan ta, ha hyun ta ngayin xi vicuyin cjuachacun ne, hitsë sa tsichuva niji Nina xi cuma rë xuta xi yahnga.

² Ngajejen ni ne, hatuxa cjin cjuatsehen xi nihña. Peru sa xi suvá cjuandaja chja ngu xuta, hane hisca ngu cju chojyihin chjaain me ne, me vëhë ne, ngu xuta ndaja me, ngu xuta tyjahi me. Hacuaha ma vetjo me yojo rë me.

³ Sacuaha ngu naxin ne, sa xi cueyan frenu hntsua chu cojo sa xi cuihndë chu tsajan ne, vëhë sahmi xi cuma cuanguen cojo chu tu cutjin hiscan xi meje naja.

⁴ Hacuaha sacuaha tjin barcu ne, handasa tjercu jyih, handasa jemu hñu ngahñu rë tjo xi tsivaha rë ne, peru cha xi cjuicojo barcu jan ne, ngu sasa ni tsiniya cha ngu ya lihndi xi hmí rë timú, sehe ficojo cha tu cutjin hiscan xi meje cjue cha.

⁵ Hacuaha ni tjin ni neje ta, ngu rquí lihndi ni tsëhë yëjë ni yojo naja. Peru handasa lihndi ne, tjemu yehe cjuahaxi xi nújan cojo rë. Sacuaha ngayaan ne, xi cuetahan rë ngu ndihi ne, handasa ngu ndihi lihndi ni ne, peru cuma cuaca rë yëjë ni ngu ngujiñacha.

⁶ Hane neje ne, tangun cojo ndihi ta tjemu cjan rë. Tjercu ma chja cjuatsehen. Handasa tjin cahndë rë xi quitaha ngajñi yojo naja ne, peru caa rë tsinguetsun naja. Vëhë xi tjercu choho vatjun má xcun ngasunhndë naja ta, tsëhë xi xitsehen ne, vëhë sahmi xi choho nújan.

⁷ Ngayaan xuta ne, camá canimaxun yëjë ni xcusun chu, sacuaha chu ngujiña, chu nisë, chu yë, cojo chu ti.

⁸ Peru neje ne, tsajin yo cuma tsimaxu rë ta, hatuxa tsehen yojo vëhë. Saaain cahndë xi cuma maxu. Hacuaha sacuaha nehñu chu yë cjan rë, xi quitsë rë xan rë chu xi tsiquehen naja hya xi faha chu ne, cuatjin neje ta, quitsë rë cjuatsehen xi choho nújan.

⁹ Ha cojo neje ni ne, ndaja nújan tséhë Nina Nahmi naja, hane ha cojo vèhë ni ne, nchaten tséhë xingueen, handasa casahmi naja Nina sacuaaha jyihi suvá ni me.

¹⁰ Tséhë ntsuvan ni ne, tecjan cjuandaja cojo cjuatsehen xi vetju nújan. Cuaaintjin camahani xi nújan, tsan.

¹¹ Ngu nandan ne, hatuxa cumaji cuetju tangun nandá xi hyun cojo nandá xi sa.

¹² Hane ngu ya laxa ne, cumaji cuaqui rë tsë. Hacuaha ngu nahñu tutsëjë ne, cumaji sua laxa rë. Hacuaha ni tjin ni nandá xtya ne, suaain nandá yufa.

Cjuatacun xi vengui chji rë

¹³ Sa xi tjin ngajñi nuju ngu ngayun xi tjemu vechutaha cjuatacun nuju ne, meje rë xi nihñu cjuandaja. Meje rë xi cuma tsejen xi xuta ndaja xuta jeya ngayun, ngatsë rë xi nihñu cjuandaja xi vitexa cjuatacun nuju.

¹⁴ Peru sa xi tjin nuju cjuaxin cahntsua xahasen nuju, hane sa xi meje nuju xi suvun ni ngayun xi ndajyihi cuátjun cuma ne, meje rë xi hacuiin nihñu yehe yojo nuju, hacuiin nújun xi tjercu vechutaha cjuatacun nuju ta, quixiin vë.

¹⁵ Ta cjuatacun vèhë ne, hacuiin ngu cjuatacun xi casua Nina ta cjuatacun ni rë xutajyë ngasunhndë vihi, sacuaaha cjuatacun rë xitsehen.

¹⁶ Hiscan xi tjin cjuaxin, hiscan xi tjemu choho me, ngajan ne, tjemu tujyë sahmi xuta, tjemu sahmi me yëjë ni cjuatsehen.

¹⁷ Peru sa xi tjin naja cjuatacun xi nduva tséhë Nina ne, tjemu tyjahi xahasen naja, tjemu tjin rë cjuajeya xahasen naja, nihña yëjë ni ngu cjuandaja, tjin naja cjuayumatacun cojo xuta, tacun cahndë cjuatacun naja, hacuiin jo má tacun.

¹⁸ Hane sa xi ngatsë rë cjuandaja xi nihña cuma cuijnetaha si xi tjin ngajñi rë xingueen ne, cjuandaja cuinechan cojo xingueen, hane yahnga sa xuta ne, hacuaaha cuetsihin sahmi me cjuandaja.

4

Xuta xi tjercu macacun me cojo ngasunhndë

¹ ¿Mé má cuatjin tjercu nihñu si ngajñi nuju? ¿Mé má cuatjin chicjun cojo xingun? Nihñu ngatsë rë yëjë ni cjuatsehen xi tjercu meje rë xahasen nuju.

² Tu mé ni ne, meje nuju, peru ngatsë rë xi sacuiin nuju ne, vèhë xi nicuhun xingun. Tjin nuju ngu cjuaxin tséhë tu mé ni, peru ngatsë rë xi sacuiin nuju ne, vèhë xi vetsuhun si cojo xingun, vetsuhun chicjun cojo xingun. Sacuiin nuju xi meje nuju ta, tséhë xi chjahyuun rë Nina.

³ Hacuaha handasa chjahyun ne, peru sacuiin nuju ta, tséhë xi hacuiin tséhë cjuandaja xi chjahyun ta, xi chjahyun ne, tu nicujun ngajñi rë ngu cjuasua xi fehya xahasen nuju.

⁴ Ngayun xi jo xcun jo ntsuvun ne, ¿há hyuun ta sa xi tjenguen xcusun rë xuta ngasunhndë ne, má yaan condra tséhë Nina? Vèhë xi tu yo ni xi vejñangucacun xi tjengui xcusun rë xuta ngasunhndë ne, sahmi me condra Nina.

⁵ Hacuiin tu cuenda camahindu xcun xujun rë Nina, hiscan xi chja cuitjin: “Nina ne, casua naja me ngu hasen xi tacun cahndë cahntsua xahasen naja. Vèhë xi miji rë Nina xi cuetjunxen tséhë ladu rë me.”

⁶ Hacuaha Nina ne, visecoo naja me cojo yëjë ni cjuandaja rë me, ta tjin sa ngu cahndë ngajan xujun rë me xi chja cjuarë me cuitjin: “Nina ne, chuyiin rë me tséhë xuta xi sahmi yehe yojo rë, peru xuta xi jeya me ne, sua Nina me cjuandaja.”

⁷ Vèhë xi meje rë xi tinuhun tséhë Nina. Sa xi nihñuu hacutjin xi meje rë xitsehen ne, cuetjuxin xitsehen tsujun.

⁸ Tejñutsja Nina cjuatacun nuju, hane sehe Nina ne, cuaha nuju me. Tiyujunxun cjuatsehen xi tinihñu, hane ngayun xi jo má tacún ne, nihñu tyjahi xahasen nuju.

⁹ Catamavatacún, hacuaaha chjihndun, tséhë xi canihñu cjuatsehen. Cahndë rë xi cuéjnu ne, chjihndun, hane cahndë rë xi sua ma nuju ne, choho catama nuju.

¹⁰ Ninguinju cjuatacun nuju xi chjuhuncun Nai naja, sehe Nai naja ne, sahmi yehe nuju me.

Miji rë xi nichuvan xingueen

¹¹ Hacuiin choho nújun tséhë xingun tsan ta, sa xi choho nújun tséhë xingun ne, tangun vèhë cojo xi choho nújun tséhë cjuarë vitexa Nina. O sa xi nichuvun xingun ne, tangun vèhë cojo xi nichuvun cjuarë vitexa Nina. Hane sa xi nichuvun cjuarë vitexa Nina jan ne, hacuiin tinihñu hacutjin xi vitexa ta, tinihñu yojo nuju sacuaaha ngu xutaxa rë.

¹² Peru ngu ni me xi cavitexa hacutjin xi nihña, hane ngu ni me vèhë xi tsichuva me. Me vèhë ni xi cuma cuaxëtje naja me, me vèhë ni xi cuma tsinguetsunya naja me. Peru ngayun ne, ¿yo cavitexa nuju xi nichuvun xingun?

Tsajin yo vëë rë mé xi cuma nchujun ni

¹³ Nguehe cuichjá ngu cja. Tjin ngu jo yun xi cuitjin nújun cojo xingun: “Nchujun ni nguini ne, cuétjun cuanguen ngu nangui. Ngajan cuinechan ngu nu xi nihña cjuayuma naja. Cuatjin nihña, sehe sacú naja tujún.”

¹⁴ Peru hisca hyúun hacutjin cuátjun cuma nchujun ni nguini. Ngayaan xcun perasunhdé naja ne, tangun yaan cojo yufi nangui ta, yufi jan ne, tsejen hora xi nduva. Peru xi tu ngu hora ne, ha cavatjucjin, caffèya.

¹⁵ Vëhë xi hitsë sa ndatjin xi cuitjin cuinújun: “Sa xi Nai naja meje rë me ne, sua sa me cjuahñu naja xi nihña cuitjin cuatjin xa.”

¹⁶ Peru ngayun ne, tjercu nihñu yehe yojo nuju xi nújun cojo xingun hacutjin xi meje nihñu. Hane xi cuatjin nihñu yehe yojo nuju ne, ngu cjuatsehen vëhë.

¹⁷ Hane sa xi ha hyan hacutjin fi yëjë ni cjuandaja, peru mijí nihña ne, tjin jyë naja xcun Nina.

5

Hacutjin cuatju xuta nchina cuma

¹ Quihndë ne, ngayujun ni xi nchina yun ne, meje rë xi chjindayun chjihndun, ngatsë rë yëjë ni cjuachoho xi cuátjun cuma.

² Yëjë ni cjuanchina nuju ne, cuenguichjiin rë ta, tsëhë xi cjuë yëjë cjuéhndu. Sacuaha tsajin ndaja nuju ne, cjuë sinë chu quixún.

³ Sacuaha tujún ndaja nuju ne, cuma xutsë. Hane tsëhë xi cuatjin xutsë tujún nuju ne, vëhë tsejen xi canihñuu cjuandaja cojo tujún jan, hane ngatsë rë vëhë ne, cuátjun castigu cuma. Tjercu tivetjun camahani cjuanchina nuju quihndë, nixtin xi ha ndiya cuijnetaha cjuë ngasunhdë.

⁴ Cjëë cjuë cuechjun yëjë ni chjí rë mosu nuju xi casahmi xa nguifña nuju, hane Nai naja ne, me xi ma titjun tsëhë yëjë ni ne, vihndë me cja xi tivinchajyë yëjë ni mosu nuju xi quitjun tsëhë.

⁵ Nguehe ngasunhdë vihi ne, tjercu ndajyihí cavatjun camá, tjercu catuhun rë cjuasua yojo nuju. Peru sacuatjin xi hatuxa vechu nixtin xi cueya chu chinga xi jercu hñucacun chu ne, hacuaha ni tjin ni cuechu nixtin xi cuátjun castigu cuma.

⁶ Ngayun ne, canihñu castigu canicuhun xuta ndaja xuta tyjahi. Hane xuta ndaja xi cuacun jan ne, johó ni rë me xi canihñu cojo rë me.

Meje rë xi cuinechyanan rë Nina cojo jeya hacuaha chjahyan rë Nina

⁷ Vëhë xi tinechyunun cojo jeya tsan, hisca xi cuinduva nga Nai naja. Cha xi sahmi xa nguifña ne, xi cjuë cuincha cha tjë ne, cuejñaya cha cojo jeya hisca xi cuatju chan tsí ne, sehe cuma sacú rë cha ngu cosecha xi ndajyihí tsëhë xitjë rë cha.

⁸ Hacuaha ni tjin ni, meje rë xi tinechyunun cojo jeya, hacuaha tejñuhñu xahasen nuju ta, tsëhë xi jima tiña nixtin xi cuinduva nga Nai naja.

⁹ Sa xi cuinchunyun xingun tsan ne, hacuaha cojo ngayun cuma yun castigu. Vëhë xi mijí rë xi cuinchunyun xingun ta, tsëhë xi me xi tsichuva naja ne, chaja sa hitsë xi cuinduva nga me.

¹⁰ ¿Há vitsjiin nuju hacutjin cacaa rë yëjë ni xutachanga naja xi cachja me cja xi caveya Nina cjuatacun rë me hatsëë nixtin? Me xi cuacun vëhë ne, casahmi me cjuetacun ngajñi rë yëjë ni cjuañihí xi cavatju me camá. Hacuaha cuatjin meje rë xi nihñu tsan.

¹¹ Hatuxa nújan xi tjercu ndaja tsëhë me xi cacaa rë cojo cjuañihí. Ngayujun ni ne, ha machaya nuju cja xi chja hacutjin cacaa rë ngu xutachanga naja xi hmí rë Job, hya xi cavatju me cjuañihí camá. Hacuaha ha hyun ta, hya xi cajnetaha cjuañihí xi cavatju me camá ne, tjemu ndaja casahmi Nai naja cojo rë me ta, tsëhë xi Nai naja ne, hatuxa tjin rë me cjuandaja, tjin rë me cjuayumatacun.

¹² Nguehe cuichjá cojo nuju ngu cja xi tjemu vengui chjí rë tsan. Hora xi tivisiajmu cojo xingun ne, hacuain cuinújun xi vëë Nina, vëë tsuhi, hacuain cuinújun xi vëë tu mé sa ni xcusun. Meje rë xi yëjë ni xi cuinújun ne, cjuaquixi, hacuain cuindachun. Sehe ngajan xi Nina ne, sahmi nuju me castigu.

¹³ Sa xi choho tivatjun jima ne, chjahyun cjuandaja rë Nina. Sa xi tjemu sua nuju ne, sun ngu xi nihñu jyë nihñu hnga Nina.

¹⁴ Sa xi hmu nuju ne, chjindayun rë xuta changá xi vitexa ngajñi rë xuta ladu rë Nina, xi tsufë nuju me aceite hacuaha cjuéhya me cjuandaja rë Nai naja ngatsë nuju.

¹⁵ Sa xi nguñajatacun hora xi chjahyan cjuandaja rë Nina ne, xuta hmu rë jan ne, cumandaja me ta, Nai naja ne, sua rë me cjuahñu. Hane sa xi casahmi xuta hmu rë jan ngu cjuatsehen ne, Nina tsinchataha jyë rë me.

¹⁶ Vêhê xi tijacun jyê nuju cojo xingun, hacuaha chjahyun cjuandaja rê Nina ngatsê rê xingun, sehe cumandaja me. Ngu xuta xi tyjahi cjuatacun rê me xcun Nina ne, hya xi fehya me cjuandaja rê Nina ne, tjercu vengui chji rê cjua rê me ta, Nina ne, visecoo rê me.

¹⁷ Ngu xutachanga naja xi hmí rê Elías ne, vêhê ngu xuta sacuaha ngayaan. Peru cafehya nguñajacacun me cojo Nina xi cuaain tsi. Hane chuva rê jyan nu vasen ne, cavaain camahani tsi xcun nangui.

¹⁸ Hya xi camá ne, cafehya nga rê me Nina xi cataha tsi, hane cavuya cavaha nga tsi, hacuaha camá nga yêjê ni xitjê.

¹⁹ Ngayujun ni tsan ne, sa xi tjin ngu xuta ngajñi nuju xi cuetjuxin me tsêhê ndiya rê cjuaquixi, hane sa xi tjin ngu yun xi cuiseacun rê me xi cuya cuisehen nga me ndiya rê cjuaquixi ne,

²⁰ ninguitsjun cjua vihi: yo yun xi cuiseacun rê ngu xuta tsehen xi cuetjuxin me tsêhê cjuatsehen xi sahmi me ne, ngatsê nuju ne, cuetjutje me tsêhê castigu xi cuatju me cuma. Hacuaha ngatsê nuju ne, tjercu cjín jyê xi cumanchataha.

Carta xi tjun tjun catsingatju San Pedru

¹ Ngahan Pedru, apóstol tséhé Jesucristu ne, tsingátju carta vihi xi cuma nuju ngayujun ni xi cavitsojo ngayun ngajan distritu Ponto, distritu Galacia, distritu Capadocia, distritu Asia, cojo distritu Bitinia, cahndé xi nechuntuhun.

² Hisca hatsée ne, Nina ne, cavejñangucacun me cavaxijin me ngayun, hacuaha Hasen rē me ne, caviyujuxin nuju, cojo sa xi cuinuhyun tséhé Jesucristu hacuaha cuma tyjahi xahasen nuju ngatsē rē jni rē me. Nina ne, catitsixuva me cjuandaja cjuajeya xi cuma nuju ngayujun ni.

Cuetahantacun ngu cjuahñu xatsē

³ Nihña jyē nihña hnga me xi Nina Nahmi rē Nai naja Jesucristu cojo Hasen rē me. Jercu hmu camá rē Nina ngayaan, hane ngatsē rē xi Jesucristu cavuya me cjuahñu tséhé ngajñi rē nima. Nina ne, casahmi me xi cavuya catsin ngayaan cojo sa xi cuetahan tacun ngu cjuahñu xatsē,

⁴ hacuaha cojo sa xi satē naja ngu cjuandaja rē Nina xi tsajin nixtin xi cuetsun, hatuxa tyjahi, hacuaha tsajin nixtin cjuēya. Hane yējē ni cjuandaja véhē ne, tetjo véhē ngahnga xi cuma nuju ngayujun ni.

⁵ Hane tséhé xi ngayujun ne, mangutacun cojo Nina ne, véhé xi me véhé tisahmi me cuidadu ngayujun ni cojo ngahñu rē me, cojo sa xi cuechuntuhun cjuandaja xi cuaxētje me ngayun. Hane cjuandaja véhé ne, ha tjin ndaja rē Nina cojo sa xi tsingacun me hya xi cjuē nixtin xi nechantahan ngasunhdé.

⁶ Tséhé véhé xi ngayujun ni ndama nuju, handasa hitsē sa nixtin ne, sahmi ngu jyē xi jemu cuatjun cjuañihi cuma.

⁷ Cuatjin meje rē xi chutaha nuju, cojo sa xi cumatsejenquixi xi ndaja mangutacun cojo Nina. Sacuaha oro xi ma vetsun ne, ma chutahachuva rē cojo ndihi. Hacuaha ni tjin ni nuju ngayun ne, meje rē xi chutaha chuva rē xi mangutacun cojo Nina. Hane xi cuatjin mangutacun cojo Nina ne, jercu sa vengui chji rē xi cuma rē oro. Hane xi cuatjin ndaja mangutacun cojo Nina ne, Nina ne, sahmi jyē sahmi hnga me ngayun, jemu ndajyihí cjuandaja xi sua nuju me, hacuaha cjuaharcun nuju me nixtin hya xi cuya cumatsejen nga Jesucristu.

⁸ Ngayun ne, hmutacún Jesucristu handasa cahyuun me, hacuaha mangutacun cojo rē me handasa hacuiin tinutsujun me. Véhé xi jercu ndama rē xahasen nuju ne, xi hisca maji nújun mé xi má nuju cojo xahasen nuju.

⁹ Ngajan xi Nina ne, cuaxētje me ngayun, ngatsē rē xi jercu ndaja camangutacun cojo rē me.

¹⁰ Profeta ne, jercu cavutahahya camahani me hacutjin xi Nina cuaxētje me xuta. Hacuui me véhé xi ha tjun sa cachja me tséhé cjuandaja xi ngascan sua Nina ngayujun ni.

¹¹ Jercu cavutaya profeta xi cuacun jan janihya hacuaha hacutjin cuechú nixtin xi cachja Hasen rē Cristu xi jiya cahntsua xahasen rē me, hya xi tjun sa casua me camachaya rē xuta tséhé yējē ni cjuañihi xi ngascan cuatju Cristu cuma cojo cjuandaja ndajyihí xi satē rē me ngascan.

¹² Nina ne, casua me camachaya rē profeta xi cuacun jan ta cjuaxi cachja me ne, hacuiin tséhé me ndaja ta tsujun ndaja. Hane cjuaxi véhé ne, hacui cjuaxi cachja xuta xi casua me camachaya nuju cjuandajyihí xi chja tséhé Jesucristu ngatsē rē xi Hasen rē Nina xi caningatjun rē tséhé ngahnga ne, cuatjin casua rē me chuva rē xi cuichja me. Cjuaxi véhé ne, hisca ángel ne, jercu meje cuijnercu.

Meje rē xi naxenxen yojo naja tséhé cjuatsehen

¹³ Véhé xi meje rē xi tjin chjine ngayujun ni, hacuaha catiyuju chihin cjuatacun nuju. Ndaja tetuhun tacún tséhé cjuandaja xi sua nuju Nina nixtin hya xi cuya cumatsejen nga Jesucristu.

¹⁴ Sacuaha quihndi xi ndaja vihndé ne, xicatuun cahndé xi cuitexa nuju cjuatacun tsehen xi tjin nuju hatsée, hya xi jñu cjuatacun nuju.

¹⁵ Cahndé rē véhé ne, ngajñi rē yējē xi nihñu ne, naxunxun yojo nuju tséhé cjuatsehen cojo sa xi tséhé Nina cuma ngayun, sacuahatjin Nina, me xi cavaxijinñi nuju ne, tuxa jercu xín me tséhé yējē ni cjuatsehen.

¹⁶ Tséhé xi xcun xujun rē Nina ne, cuitjin camahindu cjuaxi cachja Nina: “Meje rē xi naxunxun yojo nuju tséhé cjuatsehen cojo sa xi tsahan cuma ngayun ta, ngahan ne, tuxa jercu xín ngahan tséhé yējē ni cjuatsehen.”

¹⁷Ngayujun ni ne, tsêhê xi “Nahmi” nûjun tsêhê me xi texta ni tsichuva cjuatacun rê xingu xingu tucu xcusun xi sahmi me ne, vêhê xi meje rê xi ndaja chjuhuncun Nina nguyêjê rê xi nechuntuhun nguehe ngasunhndê vi.

¹⁸Ha hyun xi Nina ne, cavaxêtje nuju me tsêhê ndiya xi hacuiin machjirêhê, ndiya xi caviyuju nuju xutachanga nuju. Hacuaha hyun xi hacuiin ngatsê rê ngu xcusun xi cuma cuetsun sacuaha plata cojo oro xi cuatjin casahmi Nina ta

¹⁹ngatsê rê jni rê Cristu xi cavanga xi jercu machjirêhê, sacuahatjin machjirêhê jni rê cjuaveya rê ngu chu hnditsânga xi tsajin camahani mé má rê chu.

²⁰Cristu jan ne, casuaxa Nina me hisca chaja sa xi cuejña ngasunhndê, peru quihndê xi tijima chuva nixtin xi nechantahan ngasunhndê vi ne, casua Nina xi catimachaya naja tsêhê me cojo sa xi ndaja cuatjun.

²¹Ngatsê rê me vêhê ne, ngayun ne, camangutacun cojo Nina, me xi catsicuya Cristu cjuahñu tsêhê ngajñi rê yêjê nima hacuaha casahmi jyê casahmi hnga me Cristu. Vêhê xi mangutacun cojo Nina hacuaha vetuhun tacun me.

²²Ngayujun ni ne, xi tivinuhyun cjuaquixi rê Nina ne, cuatjin canitsiuhun xahasen nuju cojo cjuatacun nuju, cojo sa xi nihmutacún cojo nguñaja ni cjuandaja yêjê sa me xi ladu rê Jesucristu. Ngajan xi meje rê xi hñu nihmutacún xingun cojo nguñaja xahasen nuju.

²³Ngayujun ni ne, hacuaha cavuya catsin nga ngayun, peru hacuiin tsêhê xuta xi hatuxa hme ta tsêhê ngu tjê xi cueyaain ta cjuar rê Nina, cjuar xi sua naja cjuahñu hacuaha tsajin nixtin cjuêya.

²⁴Xujun rê Nina ne, cuitjin chja:

Yêjê ni xuta ne, sacuaha xca nguñña me,
yêjê ni xi ndaja tsêhê me ne, sacuaha naxu rê xca jan.

Xca nguñña jan ne, xí ne, naxu ne, vixu,

²⁵peru cjuar rê Nai naja ne, tsajin nixtin xi cjuêya.

Hane cjuar vêhê ne, hacui cjuandajiyi xi casacu camachaya nuju.

2

¹Vêhê xi ngayujun ni ne, meje rê xi tiyujunxun yêjê ni cjuatsehen, yêjê ni cjuandacha, yêjê xcusun xi sahmi xuta xi jo xcun jo hntsua tjin rê me, yêjê ni cjuaxin, yêjê ni cjuachjataha.

²Sacuatjin rê ngu quihndinda xi meje rê suvá lechi ne, cuatjin catamameje nuju cjuar rê Nina, cojo sa xi nguyêjê rê xi tivisehen nuju cjuar jan ne, tuxaha sa cjuatacun nuju hisca xi cuetjuntjun.

³Cuatjin nihñu, sa xi ha camachaya nuju xi Nai naja ne, jercu ndaja me.

Sacuaha ngu ndoyojo xi jercu vengui chjî rê ne, cuitjin rê Jesucristu

⁴Nihñutiñu tsêhê me ta me vêhê ne, quicun me. Me vêhê ne, sacuaha ngu ndoyojo xi handasa catsitjungui xuta ne, peru xi cuma rê Nina ne, hatuxa catuxijin rê hacuaha jercu vengui chjî rê.

⁵Hacuaha ngayujun ni ne, sacuaha ndoyojo xi quicun ne, tuhun cahndê xi cjuaha nuju Nina, cojo sa xi cuma ngayun sacuaha ngu yungun hiscan xi nechunxun, hane satêxa nuju nihñu xa rê Nina sacuaha nahmi, xi tuhun cjuandaja nuju xcun Nina. Hane yêjê ni cjuandaja vêhê ne, chuya rê Nina ngatsê rê Jesucristu.

⁶Xcun xujun rê Nina ne, cuitjin camahindu cjuar xi cachja Nina:

Ngahan vejñâvasen ngu xihin ngajan ndetjún Sión,
hane xihin jan ne, sacuaha ngu ndoyojo xi jercu vengui chjî rê, xi hacuaha catuxijin rê xi cuma titjun tsêhê xihndênaña;

hane xuta xi cumangucacun cojo xihin jan ne, tsajin nu tsajin nixtin xi cuetju sava me.

⁷Hane xi cuma nuju ngayujun ni xi mangutacun cojo Jesucristu jan ne, jercu vengui chjî rê me. Peru xi cuma rê xuta xi manguaaincacun me ne, cuetjucaar cjuar xi camahindu xcun xujun rê Nina xi cuitjin chja:

Me xi catsitjungui xuta sacuaha tsitjungui chjinevexo ngu ndoyojo xi chuyiin rê me tsêhê ne,

me vêhê ne, camatitjun me tsajan ngayejen ni.

Cuatjin camahindu.

⁸Hacuaha cuetjucaar cjuar vihi:

Xihin jan ne, sacuaha ngu ndoyojo xi xtenguiya rê xuta, ngu ndoyojo xi sahmi xi tsichaja me ndiya rê me.

Cuatjin chja cjuar. Xuta xi manguaaincacun me ne, xtenguiya rê me, tsêhê xi vihndiin me cjuandajiyi xi chja tsêhê Jesucristu. Hatuxa cuatjin cavejña Nina xi cuatjin cuetju me cuma.

Xuta xi tsêhê Nina me

⁹ Ngayujun ni ne, ngu tjê xi cavaxijin Nina ngayun, sacuaaha nahmi xi fahacuenda yêjê ni xi tsêhê Nina ngayun, xuta xi hatuxa siuxin rê Nina ngayun, hacuaaha xuta xi hatuxa tsêhê Nina ngayun. Cuatjin cun ngayujun ni, cojo sa xi ninguitsujun cjuandajiyihi xi chja tsêhê yêjê ni cjuandaja xi casahmi Nina, me xi cajindaya nuju xi cavetjunixun tsêhê ngajñi jñu, xi cuisuhun ngajñi hasen ndajiyihi rê me.

¹⁰ Hatsêê ne, hisca hacuiin xuta rê Nina ngayun, peru quihndê ne, xuta rê Nina camá ngayun. Hatsêê ne, hisca tsajin camayuma rê Nina ngayun, peru quihndê ne, camayuma rê me ngayun.

Meje rê xi cuinechan ndiya rê Nina

¹¹ Ngayujun ni xi sacuaaha xuta ngu nangui xi nechunyun ndiya nguehe ngasunhdê vihi ne, vinchangê nuju xi nechunxun tsêhê yêjê ni cjuatsehen xi fehya rê xahasen naja, tsêhê xi sacuaaha ngayaan xi vixcaan cojo xingueen ne, cuatjin rê yêjê ni cjuatsehen vêhê cojo hasen naja.

¹² Ndaja nihñu ngajñi rê xuta xi hvíin me Nina, cojo sa xi me xi cuacun vê ne, handasa choho cuichja me tsujun quihndê sacuaaha xi ngayun xuta tsehen má yun ne, peru scuêê me yêjê ni cjuandaja xi tinihñu, sehe sahmi jyê sahmi hnga me Nina nixtin hya xi cjuahataha Nina jyê rê xingu xingu me.

¹³ Ngatsê rê Nai naja ne, tinuhyun tsêhê yêjê ni xutaxa rê ngasunhdê vihi, há xi me xi matitjun camahani,

¹⁴ Há xi xuta xi tsingatju me xi sahmi castigu rê xuta xi choho sahmi hacuaaha cuaxêndaja me xuta xi ndaja sahmi.

¹⁵ Cuatjin nihñu ta, tsêhê xi Nina ne, meje rê me xi cjuandaja xi ngayun nihñu ne, sahmi xi xuta xi hvíin ne, cumaji choho cuichja me tsujun.

¹⁶ Tángun cojo ngasunhdê nuju sacuaaha xuta xi tsajin camahani mé xi tjin tsavi xi cuma rê me, peru hacuiin ngatsê rê vêhê xi nihñu ngu xcusun cjuatsehen ta, xi meje rê ne, tángun cojo ngasunhdê nuju sacuaaha xi mosu hndixahan rê Nina má ngayujun ni.

¹⁷ Chjuhuncun ni yêjê xuta. Nihmu tacún yêjê ni xi hacuaaha ladu rê Jesucristu me, meje rê xi rcún Nina, hacuaaha chjuhuncun me xi matitjun camahani.

Cjuahmu xi cavatju Jesucristu camá

¹⁸ Ngayujun ni mosu hndixahan ne, tinuhyun tsêhê nai nuju, hacuaaha chjuhuncun me, hacuiin suvá me xi xuta ndaja cojo me xi jeya ta cojo me xi hngacacun.

¹⁹ Cuatjin nihñu ta jercu chuya rê Nina sacuatjin rê ngu me xi caa rê cojo ngu cjuañihi ngatsê rê xi vihndê me tsêhê Nina, handasa tsajin jyê rê me xi cuatjin vatju me má.

²⁰ Sa xi ngayun choho nihñu hane má yun castigu ne, ¿yo ndaja cuichja tsujun xi scaa nuju castigu jan? Peru sa xi ngayun ndaja nihñu hane má ngayun castigu ne, jercu chuya rê Nina sa xi ngayun scaa nuju.

²¹ Nina ne, cajindaya me ngayun xi cuatjin cuatjun cuma. Cristu ne, cavatju me cjuañihi camá ngatsê nuju, hane cuatjin cavejña me ntsacu, cojo sa xi ngayun nihñu sacuatjin casahmi me.

²² Me vêhê ne, hisca ngu cjuatsehen casahmi me, hacuaaha hisca ngu cjuandacha ne, cavetjiin cachja me.

²³ Hya xi xuta choho cachja cojo rê me ne, me vêhê ne, hacuiin choho catsicuya me tsêhê xuta jan. Hya xi cavatju me cjuañihi ne, hacuiin cavincharcun me xuta jan ta cavetahacacun me Nina, me xi tsichuva rê xuta cojo cjuatacun rê me cojo cjuaquixi.

²⁴ Suvá Cristu jan ne, cavaha me yêjê cjuatsehen naja ngajñi yojo rê me, ngajan xcun cru, cojo sa xi cuma cuetjunixen tsêhê cjuatsehen, hane cuma cuangentjenguen ndiya rê cjuaquixi. Ngayun ne, cavetjuntjun ngatsê rê cjuahmu xi me vêhê cavatju me camá.

²⁵ Titjun ne, sacuaaha chu tsánga xi cachaja tjin nuju ngayun, peru quihndê ne, cavuyun nga ladu rê Cristu, me xi fahacuenda nuju sacuaaha ngu xuta xi fahacuenda rê chu tsánga, cuatjin sahmi nuju me cuidado.

3*Cuitjin xi meje rê xi cuiyuju xuta cojo chjuun cojo xihin me ndava me*

¹ Quihndê ne, ngayujun ni yachjin ne, tinuhyun tsêhê xihin nuju xingu xingu ngayun, cojo sa xi yahnga me xi vihndiin me tsêhê cjuá rê Nina ne, cuijnecacun me, xi scuêê me xcusun nuju, handasa tsajin mé xi nújun,

² cuenda xi scuêê me xcusun ndaja xcusun jeya nuju.

³ Miji rê xi jercu nihñuxun cojo yêjê ni ngu xcusun xi sahmi ndacun nuju cojo yojo nuju sacuatjin hya xi vatjutaha nihñu ndacun tsjarcun, hacuaaha cojo hya xi nihñuxun cojo adorno tsêhê oro, hacuaaha cojo hya xi chujun ngu tsjian hnga chji rê.

⁴ Cahndé rē vēhē ne, meje rē xi nihñuxun cojo yējē ni ngu xcusun xi hinchā cahntsua xahasen nuju sacuatjīn hya xi ningacun cjuajeya xi cun yun ta yējē cjuandaja vēhē ne, jercu vengui chjī rē xcun Nina.

⁵ Hatsēē ne, cuatjīn casahmi yachjīn xi siuxin me xi cuma rē Nina, yachjīn xi cavetaha cacun me Nina. Me xi cuacun jan ne, cavihndē me tsēhē xihin rē me.

⁶ Nima Sara ne, cuatjīn cahndē me tsēhē xutachanga naja Abraham, xihin rē me, hane “nai naha” cachja me tsēhē me. Hane ngayujun ni ne, quihndi rē me ngayun, sa xi nihñu yējē ni cjuandaja hacuaha tsajin mé xi rcún.

⁷ Cuanitjīn ni nuju ngayujun ni xihin, xi nechun tangun cojo chjuun nuju xingu xingu yun ne, meje rē xi hyun xi hitsē ni chúva ngahñu rē yachjīn. Chjuhunrcun me ta, me xi cuacun vē ne, hacuaha chjuhunntsun tangun cojo rē me cjuahñu xatsē xi sua nuju Nina cojo cjuandaja rē me. Cuatjīn nihñu ngayun ne, cojo sa xi tsajin mé sahmíndya rē oraciún xi nihñu.

Hya xi vatjun cjuañihi ngatsē rē nihña cjuandaja

⁸ Quihndē xi tsingujñetaha cuichjá cojo nuju ne, ngayujun ni ne, meje rē xi tjin tangun cjuatacun nuju cojo xingun, meje rē xi tjin tangun xahasen nuju cojo xingun, meje rē xi nihmutacún xingun xingu xingu ngayun sacuaaha xi ngu naa ngu nahmi nuju ngayujun ni. Meje rē xi tjin nuju cjuayumatacun, hacuaha meje rē xi jeya ngayun cojo cjuatacun nuju.

⁹ Hacuaaha cuéyanangē nuju xi mijí rē xi choho nihñu cojo yo xi choho sahmi cojo nuju, hacuaaha sa xi yo choho cuichja cojo nuju ne, mijí rē xi choho chjayunngun tsēhē ta xi meje rē ne, ninchacuntuhun rē. Cuatjīn meje rē xi nihñu ta, Nina ne, cajindaya me ngayujun ni xi chjuhunntsun ngu cjuaninchacuntihin.

¹⁰ Tjin ngu cahndē xcun xujun rē Nina xi chja cuitjīn: Me xi meje rē xi ndaja cjue cojo ngasunhndē rē hacuaha meje rē xi ndaja cuatju cuma ne, mijí rē xi choho cuichja me hacuaha mijí rē xi cuichja me cjuandacha;

¹¹ catetjuxin me tsēhē ndiya rē cjuatsehen, hane catisahmi me cjuandaja, catanguise me ndiya rē cjuajeya, hane vēhē catjicojo me.

¹² Cuatjīn meje rē ta Nai naja ne, fahacuenda me xuta xi tsajin jyē rē, hacuaha vihndē me oraciún xi sahmi xuta jan, peru Nai naja ne, chuyiin camahani rē me tsēhē xuta xi sahmi cjuatsehen. Cuatjīn chja xujun rē Nina.

¹³ ¿Yo choho sahmi cojo nuju sa xi ngayun hatuxa nihñu cjuandaja?

¹⁴ Peru handasa cuatjun cjuañihi cuma ngatsē rē xi nihñu cjuandaja ne, tsimii sahmi rē ta ha tsujun ndaja. Hane xicarcuun hisca xi ngu, hacuaha hacuiin cumacjintacún.

¹⁵ Meje rē xi chjuhunrcun Cristu cojo cjuatacun nuju ta me vēhē xi Nai nuju me. Hacuaaha meje rē xi yējē ni hora ne, tjin chjine ngayujun ni, cojo sa xi tuhun cjuaquixi nuju cojo tu yo ni xi cjuinenguise nuju mé má cuatjīn vetuhun tacún Nina,

¹⁶ peru tinújun cojo nguñaja ni cjuandaja cjuajeya. Tángun cojo ngasunhndē nuju cojo ngu xcusun xi ngascan ne, hisca hitsē tsajin cuma sava nuju, cojo sa xi xuta xi choho cuichja me tsēhē cjuandaja xi nihñu ngatsē rē xi tjin tangun cjuatacun nuju cojo Cristu ne, cuetju sava me tsēhē yējē xi choho chja me tsujun.

¹⁷ Hitsē sa ndaja xi cuatjun cjuañihi ngatsē rē xi nihña ngu cjuandaja, sa xi cuatjīn meje rē Nina, xi cuma rē xi cuatjun cjuañihi ngatsē rē xi nihña ngu cjuatsehen.

¹⁸ Cristu ne, ngundiya ni cahme me ngatsē rē jyē naja. Me vēhē ne, tsajin xi cún rē me xcun Nina, peru cahme me ngatsē naja xi tjercu tjin jyē naja, cojo sa xi cuma cuiseen ladu rē Nina. Cristu ne, sacuaaha xihin xi má me ne, catsiquehen xuta me, peru sacuaaha hasen xi hacuaha má me ne, catsicuya Nina me cjuahñu.

¹⁹ Hane sacuaaha hasen me jan ne, quiji cachja me ngu cjuā cojo yējē ni hasen xi hinchahñu.

²⁰ Hane hasen xi cuacun jan ne, hacui xi cahndiin tsēhē Nina, hya xi tacunya tacunya Nina cojo jeya nguyējē rē xi Noé titsindaja me barcu rē me. Hane ngu jo me xi caxincha me cahntsua barcu jan ne, chuva rē jyin má me xi yējē me, cavetjutje me hya xi cavatju me xcun nandá.

²¹ Hane nandá jan ne, sacuaaha nandá xi xtenda yaan xi vaxētje naja quihndē. Hya xi xtenda yaan ne, hacuiin xi tinityjahin yojo naja ta tichjahyan rē Nina ngu cjuatacun tyjahi, ngu cjuatacun ndaja, hane cuatjīn vetuntjen ngatsē rē xi Jesucristu ne, cavuya nga me cjuahñu.

²² Me vēhē ne, quiji me ngahnga, hane tacun me ladu quixi rē Nina. Quihndē ne, me vēhē vitexa me ángel cojo jingu sa xcusun hasen sa hasen ndaja sa hasen tsehen xi hacuaha matitjun ngajan ngahnga.

4

Meje rë xi ningatahantacun sacuaa catingatahacacun Jesucristu

¹ Vêhê xi, sacuatjin Cristu cavatju me cjuañihi nguehe ngasunhndê vihi ne, cuanitjin ni ngayujun ni, meje rë xi taha catamangutacun cojo cjuañihi quihndê, tuxa má sa xi ngascan cuatjun cuma. Cuatjin meje rë ta, me xi ha cavatju cjuañihi camá ne, ha quihndê cuitexaain rë me cjuatsehen,

² hane cjuenduju me cojo ngasunhndê rë me sacuatjin meje rë Nina, hacuiin sacuaa meje rë cjuatacun naja ngayaan xuta ngasunhndê.

³ Ha jercu canichujun nixtin hatsêê, hya xi canihñu xcusun xi chuya rë xutaxín tsêhê. Jercu choho ndiya cavinechunyun, jercu camameje nuju cjuatsehen, jercu camachuhun, jercu catsangun suhi hisca xi jercu si rcu xuta hacuaa jercu vatjutaha hvi me, hacuaa jercu cachjuhunrcun nina ndyojo, xcusun xi hatuxa ndajintjin.

⁴ Quihndê ne, xutaxín jan ne, fircun rë me hisca choho chja me, hya xi ngayun ne, matanguaain yun cojo rë me hya xi me vêhê findujú me cojo ndiya rë cjuatsehen xi hincha me.

⁵ Peru me vêhê ne, cuechú ngu nixtin xi sua me cuenta xcun me xi ha tjin chjine xi tsichuva me xuta xi quicun cojo xuta xi cahme cojo cjuatacun rë xingu xingu.

⁶ Vêhê xi hisca yêjê nima ne, casacu camachaya rë tsêhê cjuandajyihî xi chja tsêhê Jesucristu, cojo sa xi, sacuaa hasen xi má jan ne, sacú rë cjuahñu sacuaa cjuahñu rë Nina. Cuatjin camá handasa, sacuaa xuta ngasunhndê xi má nima xi cuacun jan ne, ha cachjaháchuva rë xingu xingu cojo cjuatacun rë, sacuaa chjaháchuva rë yêjê xuta ngasunhndê.

Hacutjin meje rë xi cuisecoon xingueen cojo cjuandaja xi sua naja Nina

⁷ Quihndê ne, ha camatiña nixtin xi cjuê ngasunhndê. Vêhê xi meje rë xi ngayujun ni ne, tiyujun chihin cjuatacun nuju hacuaa tjin chjine ngayun, xi nihñu oración.

⁸ Hitsê meje sa rë xi nihmutacún xingun xingu xingu ngayun nguñajatacún ta, tsêhê xi cjuahmutacun ne, vujnu rë jercu cjin jyê naja.

⁹ Hacuaa chjuhunntsun xingun xingu xingu ngayun ndya nuju, xi hisca hitsê tsajin choho cuma tacún hya xi chjuhunntsun xingun.

¹⁰ Ngayun xi jercu cachjuhunntsun cjuandaja rë Nina hacuaa satêxa nuju xi ninguitsujun cjuandaja jan ne, meje rë xi xingu xingu ngayun ne, cuiseacun rë xuta xi yahnga, ha chuva rë xi casua nuju Nina ngu cjuandaja.

¹¹ Yo ngayun xi cuinújun ne, tinújun sacuaa ngu xi chja cjuar rë Nina. Hane yo ngayun xi cuiseacun xingun ne, tiseacun rë me cojo yêjê ni ngahñu xi sua nuju Nina. Cuatjin meje rë xi nihñu, cojo sa xi ngajñi rë tu mé ni cjuacjintacun ne, Nina ne, cuma jyê cuma hnga me cojo Hasen rë me ngatsê rë Jesucristu. Me vêhê ne, hatuxa jyê hnga me cojo Hasen rë me hacuaa jercu hñu me cojo cjuatacun rë me yêjê nu yêjê nixtin. Cuatjin jain.

Cjuañihi xi cuatjun ngayaan xuta ladu rë Jesucristu

¹² Ngayujun ni ne, mijí rë xi cjuercun nuju tsêhê cjuañihi jyê xi vatjun má xi chutahachuva nuju ta, tsêhê xi hacuiin hacui ngu xcusun xi cjuercun naja.

¹³ Cahndê xi cjuercun nuju ne, meje rë xi catamasua nuju táha hacutjin tivatjun cjuañihi tijima sacuaa cjuañihi xi cavatju Jesucristu camá. Cuatjin catamasua nuju, cojo sa xi hacuaa jercu cumasua nuju nixtin hya xi cumatsejen hacutjin jyê hnga Jesucristu cojo Hasen rë me.

¹⁴ Sa xi xuta choho chja me tsujun ngatsê rë xi tjin tangun cjuatacun nuju cojo Cristu ne, tsujun ndaja ta, vêhê meje cuichja xi Hasen rë Nina xi jercu jyê hnga ne, tivéña cojo nuju. (Xuta xi cuacun jan ne, hatuxa choho chja me tsêhê Jesucristu, peru ngayun ne, nihñu jyê nihñu hnga me.)

¹⁵ Sa xi yahnga ngayun cuatjun cjuañihi ne, mijí rë xi tsêhê xi caniquhun ngu xuta o sa tsêhê xi canihñu cjuachêjê o sa tsêhê xi tu mé sa ngu cjuatsehen o sa tsêhê xi visuhunñu ngajñi rë cjuacjintacun rë xuta xi yahnga.

¹⁶ Peru sa xi yahnga ngayun cuatjun cjuañihi ngatsê rë xi ladu rë Cristu ngayun ne, mijí rë xi cumasava nuju ta meje rë xi nihñu jyê nihñu hnga Nina ngatsê rë vêhê.

¹⁷ Ha cavechú nixtin xi cuetsihin tsichuva Nina xuta cojo cjuatacun rë xingu xingu me, hane cuetsihin me cojo naja ngayaan quihndi rë me. Hane sa xi tjun ngayaan tsichuva Nina ngayaan cojo cjuatacun naja ne, ¿hacutjin cuatju me xi vihndiin tsêhê cjuandajyihî xi cachja Nina?

¹⁸ Hacuaa tjin ngu cahndê xcun xujun rë Nina xi cuitjin chja:

Sa xi xuta xi café jyê rë sehe tu ma vetjutje me ne,

¿hacutjin cuatju me xi hisca cuendaain rë tsêhê Nina cojo me xi jercu sahmi cjuatsehen?

Cuatjin chja xujun rē Nina.

¹⁹ Vêhê xi yêjê me xi vatju cjuañihi tsêhê xi cuatjin meje rē Nina ne, meje rē xi catjindujú me cojo cjuandaja xi sahmi me hacuaha catejña me yojo rē me tsja Nina, me xi catsindaja rē me ta, Nina ne, hatuxa sahmi chihin me yêjê cjuarê me.

5

Cjuarê Pedru xi vinchangui me xuta ladu rē Jesucristu

¹ Quihndê ne, meje cuichjá cojo nuju ngayujun ni xuta changá xi vitexun ngajñi rē yêjê xuta ladu rē Jesucristu. Ngahan ne, hacuaha xuta changá ngahan xi cavêê hacutjin cavatju Jesucristu cjuañihi camá. Hacuaha satê ná ngahan sacuatjin rē me xi cuacun jan cjuandaja xi cuetjucaa ngascan.

² Cuichjá cojo nuju xi hacuaha meje rē xi chjuhuncuendun xuta ladu rē Nina xi siuntsun, sacuaha ngu cha xi fahacuenda rē chu tsánga. Cuatjin nihñu nguñaja cjuasua sacuatjin meje rē Nina, hacuiin cjuachan hacuaha hacuiin ngatsê rē xi jercu meje nuju tujún. Chjuhuncuendun me nguñajatacún,

³ hacuiin sacuaha xi ngayun má yun nai tsêhê me ta meje rē xi teñju ntsacu, cojo sa xi xuta ne, tjengui me ngayun cojo xcusun nuju.

⁴ Ngajan xi hya xi cuinduva nga me xi matitjun ne, ngayun ne, chjuhunntsun cjuandaja xi sua nuju Nina, cjuandaja xi tsajin nu tsajin nixtin cjuêya.

⁵ Cuatjin ngayujun ni xihin xi hitsê ni chúva nu nuju ne, tinuhyun tsêhê xuta changá. Hane ngayujun ni ne, meje rē xi jeya ngayun cojo cjuatacun nuju hacuiin xta yun ngajñi nuju cojo xingun ta tjin ngu cahndê xcun xujun rē Nina xi cuitjin chja: Nina ne, tsitjungui me xuta xi jercu tjin rē cjuaxta cahntsua xahasen rē, peru xuta xi jercu tjin rē cjuajeya cahntsua xahasen rē me ne, Nina ne, jercu sua rē me cjuandaja.

Cuatjin chja xcun xujun rē Nina.

⁶ Vêhê xi ngayujun ni ne, meje rē xi ninguijnu yojo nuju xi cuinuhyun tsêhê Nina, me xi jercu hñu cojo cjuatacun rē. Cuatjin nihñu cojo sa xi me vêhê ne, sahmi jyê sahmi hnga me yun, hya xi cuechú nixtin rē.

⁷ Tiyujunxun yêjê ni cjuacjintacun nuju, tiyujun tsja Nina, tsêhê xi me vêhê ne, vutsejen me ngatsê nuju.

⁸ Ngayujun ni ne, meje rē xi tjin chjine yun hacuaha nechun quicun ta, tsêhê xi Satanás ne, xitsehen xi maji vêê nuju ne, tsujyihí sacuaha ngu chu xa xi jercu titsichan chu, xi vangui chu yo xi sacú ru xi sinê chu.

⁹ Xicaningatuun rē, hane tiyujunhñu cjuatacun nuju xi mangutacún cojo Nina. Cuatjin nihñu ta ha hyun xi yêjê sa me xi hacuaha cojo ladu rē Cristu híncha jingujyê ni ngasunhndê ne, hatuxa tjin rē me xi cuatju me yêjê ni cjuañihi vêhê cuma.

¹⁰ Peru xi ha cavatjun cjuañihi hitsê nixtin ne, Nina ne, tsityjahi me cjuatacun nuju, cuiyujuchihin me cjuatacun nuju, cuiyujuhñu me xahasen nuju, hacuaha cuiyuju cahndê me cjuatacun nuju. Nina xi sahmi cuatjin jan ne, hacui me xi tjin rē yêjê ni cjuandaja, hacui me xi cajindaya nuju me xi satê nuju cjuahasen ndajyihí rē me xi tsajin nu tsajin nixtin xi cjuêya, ngayujun ni xi tjin tangun cjuatacun nuju cojo Cristu.

¹¹ Nina ne, hatuxa jemu hñu me cojo cjuatacun rē me yêjê nu yêjê nixtin. Cuatjin jain.

Cjuarê vijnetaha

¹² Ngahan ne, catsihindu nuju ngu jo cjuarê vêhê, cojo sa xi cuinchangê nuju hacuaha tsinguxê nuju xi cjuarê vêhê ne, hacui cjuandaja jain rē Nina. Tiyujunhñu cjuatacun nuju xi cuangunndujun cojo cjuandaja vêhê. Silvanu ne, me xi ndaja fitjengui rē ndiya rē Cristu ne, caviseco ná me xi catsihindu nuju.

¹³ Xuta rē yungun nguehe Babilonia, xi hacuaha cavaxijin rē me Nina ne, tsingatju me nina nuju. Hacuaha Marcos xi sacuaha quihndi naha ne, tsingatju cha nina nuju.

¹⁴ Tuhun rē xingun ngu nina, cojo cjuandaja cojo cjuahmutacun tindatsuhun xingun, sacuahatjin xcusun naja. Catisua nuju Nina cjuandaja cjuajeya ngayujun ni xi tjin tangun cjuatacun nuju cojo Cristu.

Carta xi majo xi catsingatju San Pedru

Pedru ne, tsingatju me cjuva tséhě xuta xi macjain rě me Nina

¹ Ngahan xi hmí ná Simón Pedru, mosu rě Jesucristu, hacuaha apóstol tséhě me ne, tsingatju carta vihi tsujun ngayujun ngayun xi Nina naja Jesucristu cavaxětje nuju me xi casua nuju ngu cjuatacun xi macjain nuju cuanitjin sacuahatjin ngayin. Cuatjin casahmi me ta Nina hatuxa jyihí tyjahi tyjahi cjuatacun rě me.

² Nina ne, catitsixuva me cjuandaja cjuajeya xi cuma nuju ngayujun ni ngatsě rě xi ndaja hyun Nina cojo Jesús, Nai naja.

Hacutjin cun xuta xi macjain rě me Nina

³ Jesucristu xi cojo ngahñu ndajyihí rě me, jyě hnga me ne, cajindaya me yaan xi chan yo me. Hane cuatjin casua naja me yějě ni xi mameje rě tséhě cjuahñu xatsě hacuaha tséhě ngu cjuatacun tyjahi.

⁴ Cojo ngahñu vėhě casua naja Nina cjuva rě me xi tjercu tu ndaja vengui chjí rě. Cojo sa xi ngatsě rě cjuva vė ne, ngayun ne cuechuntuhun ngu cjuatacun sacuaaha Nina, hacuaha cojo sa xi cuetjuntjun tséhě xi cuetsun cjuatacun nuju cojo cjuatsehen xi fehya rě xuta.

⁵ Hindě ngatsě rě vihi ne, ndaja nihñu ngahñu cojo sa xi ha macjain nuju Nina ne, má tyjahi cjuatacun nuju.

⁶ Hane hacuiin cuanitjin ni, ta hacuaha ningascunyun cjuatacun nuju. Sehe tuhun hñu yojo nuju tséhě cjuatsehen. Hacuaha cuanitjin ne cojo xi nihñu jyě tacún.

⁷ Hacuaha cojo xi chjuhuncun Nina, hacuaha cojo xi chjuhuncun xingun, hane hacuiin tu cuanitjin chjuhuncun xingun ta cojo ngu cjuahmutacun.

⁸ Sa xi cuatjin ndaja xcusun nuju, hane sa xi nihñu jain sacuatjin vitexa ne, xcun cjuahñu nuju ne, tjercu cuengui chjí nuju hacuaha hacuiin tu mahya ni camachaya nuju tséhě Nai naja Jesucristu.

⁹ Peru xuta xi cuaintjin jyihí xcusun rě me ne, cumá jñu cjuatacun rě me sacuaaha ngu rcá me o sacuaaha ngu cha xi vutsejen hiscan xi cjin peru hvíin cha mé xi tivutsejen cha. Ngatsě rě xi cachaya rě me xi camanchataha jyě rě me xi ha casahmi me.

¹⁰ Vėhě xi ngayujun ni xingueen ne, sa xi nihñu jain sacuatjin vitexa xcusun ndaja jan ne, ngajan machihín cjuva ta Nina ne, cajindaya nuju me hacuaha cavaxijin nuju me ne, hane cuatjin ha tuxa tsajin ngu nixtin xi cuetjuncun tséhě ndiya rě Nina.

¹¹ Cuahatjin jemu ndaja sacu nuju cahndě xi cuisuhun hiscan xi sahmi gobiernu Nai naja Jesucristu, me xi vaxětje naja, hane tsajin nu tsajin nixtin cuetjuncun.

¹² Vėhě xi vejñacacun xi cúa tsinguitsjen nuju cjuandaja vihi ha ndasa ha hyun hane hacuaha quitahatacún cjuatacun nuju yějě ni cjuaquixi xi camachaya nuju.

¹³ Peru jinguyějě rě xi tjin ná cjuahñu ne, xi má ná ne, sahmi ngujyě xi cuascaya rě cjuatacun nuju xi tsinguitsjen nuju vi ta,

¹⁴ tséhě xi tacun xati nixtin xi cuejñá ngasunhdě vi, sacuaaha ha casua Nai naja Jesucristu camachaya ndaja ná.

¹⁵ Hisca hacuaha xati tisahmecácun ne sehe ngajan xi handasa cavéya ne tu mé ni hora cuma cuitsjen nuju tséhě yějě ni cjuva vihi.

Cavindeya xcusun rě Jesucristu, hacuaha cavaxëndaja Nina me

¹⁶ Catihín camachaya nuju cjuva sacuaaha tséhě ngahñu xi tjin rě Nai naja Jesucristu cojo tséhě hya xi cuinduva me. Cjuva vėhě hacuiin ngu cuentu ndacha xi ndaja nuhya rě peru cjuaquixi jain. Quixi ta cahyin cojo tuxcuin ta Jesucristu ne, jemu rcun me ta jemu jyě hnga hasen rě me.

¹⁷ Hya ne, Nina nahmi naja ne cafarhuncun rě me hacuaha cavaxëndaja me Jesús ta cjuva rě Nina ne canduva tséhě ngahnga xi cachja cojo rě me cuitjin: “Vihi quihndi naha xi hmucácun ne, xi ngatsě rě me ne tjercu ndaja má ná.”

¹⁸ Hindě ngayin suvin canuhyin cjuva vė ta canduva tséhě ngahnga hya xi cavinechintihin ngajan cojo Nai naja rcu naxi hiscan cavatju camá.

¹⁹ Cojo xcusun xi cahyin ne, vėhě catsinguixi rě cjuva changá xi catsihindu profeta. Ngayujun ni ne jemu ndaja nihñu xi tivetuhun rcun yějě ni cjuva changá jan. Cjuva jan ne, tangun sahmi sacuaaha ngu ndihí xi sua hasen rě hiscan xi jñu, hane cjuecani rě hisca xi sahasen ne. Hane sacuaaha sua hasen rě tiña sahasen xi cuetju niñu seti ne hacuaha Jesucristu sua hasen rě xahasen nuju.

²⁰ Cjuva xi hitsě sa sahmi ngujyě xi meje rě xi machaya nuju ne, cjuva vihi má: sacuaaha yějě cjuva xi catsihindu profeta xcun xujun rě Nina ne, cumajin sesuntaha sa ngu cjuatacun rě xuta ta,

²¹ hisca ngu cjuua jan tsajin xi catsihindu profeta cojo cjuatacun rë suva ni me, ta Hasen rë Nina casua rë me cjuatacun xi cuichja me cjuua jan xi tsëhë Nina.

2

Cuinduva maestru ndacha

¹ Peru nixtin hatsëë ne ngajan nangui rë Israel ne, hacuaha cavetjujñi xuta xi tsejen sacuaha profeta peru tu vindacha me. Hacuaha cuanitjin hindë ne cuetjucun maestru xindacha xi xinchajñi me ngajñi nuju. Me xi cuacun vë ne, tsinguisehenma me cjuanchacun ndacha. Hisca tsitjungui me Nai naja xi cavaxëtje rë me. Vëhë xi nguñusasa cuechutaha rë me castigu xi satë rë me.

² Ngajan xi tjemu cjin xuta cuisehen cojo me ndiya tsehen vëhë, hacuaha ngatsë rë me ne, choho cuichja yahnga xuta tsëhë ndiya rë cjuaquixi xi cjucojo naja xcun Nina.

³ Maestru xi cuacun ne, jercu sahmi me cojo tujún. Vëhë xi cuaxë me tsujun cojo cjuandacha xi ndaja nuhya rë. Peru me xi cuacun ne, hisca hatsëë ne tacunvasen castigu xi cuechutaha rë me, tacun cuaha hatuxa maji cuetjutje me tsëhë.

⁴ Cahyun ni ta Nina ne catsinchataain me ángel hya xi casahmi ángel cjuatsehen, ta cacandiya me catsihñu me cojo cadena hiscan jñu cojo sa xi siucuaha hisca cuechutaha nixtin xi sahmi cuenda me tsëhë.

⁵ Hacuaniitjin ne, catsinchataain Nina xuta ngasunhndë hatsëë nixtin ta hisca catsingatju me ngu tsi cjuarcun xi catsicjë rë ngayëjë ni xuta tsehen jan. Cavetjutje me ngu tu tu xihin xi hmi rë Noé, ngu xihin xi casua camachaya rë xuta tsëhë ndiya rë cjuaquixi. Hacuaha yatu sa xuta cavetjutje me hya.

⁶ Hacuaniitjin ne, casahmi Nina xi cavetsunya nandya Sodoma cojo nandya Gomorra, cavaca me ne hisca xi camá suva ndesu sa rë. Vëhë camá sacuaha ngu ejemplu xi chja xi cuatjin cuatju yëjë ni xuta xi sahmi me cjuatsehen.

⁷ Peru hya ne, cavaxëtjeñi Nina ngu cha xi tyahi cjuatacun rë xi hmi rë Lot, cha vëhë ne jemu choho má rë xahasen rë cha tsëhë yëjë ni cjuatsehen xi casahmi xuta nandya jan.

⁸ Jemu camá rë cha jan cjuaxti ta, tyahi cjuatacun rë cha hane nchunchujun ni cavutsejen cha cavihndë cha xcusun tsehen xi casahmi xuta ta tsëhë xi cha vëhë jan ne, jiyajñi cha ngajñi rë me.

⁹ Cuatjin tsejen ta Nina ne, ma vaxëtjeñi me xuta tyahi tsëhë cjuañihi hacuaha ma viyujivasen me xuta tsehen nguñhma castigu rë me xi cuejñaya me hisca xi cuechutaha nixtin xi cumacuenda tsëhë me.

¹⁰ Quixi jain ta xuta xi sahmi me cjuatsehen xi fehya yojo jyë rë me hacuaha xuta xi tsitjungui me xi tjin rë Nai naja derechu xi vitexa me ne, xuta vëhë ne, viyujivasen me nguñhma castigu. Me xi cuacun jan ne, jemu hñu jni rë me, sehñu me cojo cjuatacun rë me hane tsacujin me xi choho cuichja me tsëhë ángel xi siu cojo Nina.

¹¹ Peru ha ndasa sa xi ángel ne hitsë sa hñu cjuua me xi cumá rë me xi cuacun jan, hacjahi xcusun sahmi ángel ta vetjincacun cuinchajyë xcun Nai naja.

¹² Xuta tsehen xi cuacun vë ne, jemu chu me, ta ngu chu ne, cjuatacun rë chu xi vitexa ru, hacuñin tsingatahatacun chu. Hacuaha siu chu cojo sa xi chjaha ru sehe cueya chu, hane cuatjin cumachjirëhë chu. Cuanitjin ne xuta jan choho chja me tsëhë yëjë ni xcusun xi vijniircu me ta, tsingataaíncacun me hacuaha sacuatjin catsijehnduya me cjuatacun hacuaha cjuë cjuehndu me suva me tangun me cojo ngu chu.

¹³ Cuatjin cuatju me ngu cjuañihi sacuaha casahmi me xi cavatju ñihi xuta. Xi má rë me ne, tjemu tjin rë me cjuasua xi tisahmi me ha tu cutjin ni xi masua rë xahasen rë me hora hya. Ngujëjë rë xi tichinu tangun tsëhë suhi xi tjin nuju ne, me xi cuacun vëhë ne, ngu cjuasava me, ngu cuehyu hinchajñi me cojo nuju xi tisua me cjuasua yojo rë me cojo ngu cjuandacha.

¹⁴ Xi tu scutsejen ni me jan ngu chjuun ne, hachu cuehya ran xahasen rë me. Fendaain rë me xi sahmi me cjuatsehen. Tsitsejen me xuta xi ndaya cacun. Yëjë fehya rë xahasen rë me ta cuatjin camanga rë. Ha tjinchihin xujun jyë rë me xcun Nina.

¹⁵ Cachaja me ndiya ta, tsëhë xi cavetjuxin me tsëhë ndiya quixi rë Nina. Cafayangui me xcusun xi casahmi Balaam quihndi rë cha Beor. Cha vë ne, jercu casahmi cha cojo tujún, hisca meje rë cha chji rë cjuatsehen.

¹⁶ Hacuaha Nina casahmi me xi ngu chu burra xi majin tsingatahacacun chu cojo cjuatacun ru, peru cojo xta rë xuta cachjataha chu cha jan hane casuaain chu cahndë xi cjuua sa cha cojo cjuasca rë cha.

¹⁷ Maestru jan ne, machjiriin cjuua rë me. Tangun me cojo ngu ndava nandá xi quixíya, hacuaha tangun me cojo yuffi xi ficojo rë tjojne. Nina tjin ndaja rë me ngu cahndë xi cuisehen me hiscan xi jñu cjin ni.

¹⁸Maestru jan ne, jindayatë me cjuaxi sahmî yehe me xi ndastu venguichji rë. Hacuaha tsingascaya rë me cjuatacun rë jingu sa xuta xi cuma meje rë me cjuatsehen xi fehya yojo rë me. Xuta jan ne, sehe tisahmî me ngahñu xi tivetjutje me tsêhë ngajñi rë xuta xi hincha ndiya rë cjuandacha.

¹⁹Chja ndacha maestru xi cuacun ta cuma ndaya xuta jan tsêhë cjuaxi vitexa ley, cuatjin chja me. Peru suva ni me ne, cjêë cuma ndaya me tsêhë cjuatsehen. Hane jima ngu ngayaan ne, ha tu jarë ni xi scaa rë tsinguijne naja ne, vêhë scaa rë cuitexa naja tsihñu cjuatacun naja.

²⁰Cuatjin ne, xuta xi ha vëë me yo xi Nai naja Jesucristu xi vaxëtje naja hane yo xi cavetjuxin me tsêhë yêjê ni ngu cjuatsehen tsêhë ngasunhdë ne, sa xi tsingatihin me xi cuixuya nga me ngajñi cjuatsehen jan ngu ndiya nga ne, hane cjuatsehen jan scaa rë cuitexa rë me ne, hitsë sa sahmî yehe me jyë rë me xi cuma rë titjun.

²¹Hya hitsë sa ndatjin tsêhë me sa xi camachayiin rë me ndiya quixi jan tsêhë xi cuma rë xi titjun quiji ndaja me ne, peru sehe catsismicacun me tsêhë cjuaxi ndajyihî rë Nina xi cafahatsja me.

²²Hya xi cuatjin sahmî xuta ne, ngajan tsejen xi quixi jain cjuaxi chja cuitjin: “Naña xi cavesu rë chu ne, vuya jinë chu tsêhë chu hane chu chinga xi sehe tu cafë catsinduya me chu ne, vuya vinduyachoyo chu ngajñi ndasi.”

3

Handajasa vindeya rë Nai naja, peru cuiduva me

¹Vihî má jo carta xi tsihindú nuju, ngayujun ni xingueen. Catsijo carta vi ne, yaha conseju xi ha hyun peru xi meje ná xi tsingascaya rë cjuatacun nuju cojo.

²Ninguitsjun tsêhë cjuaxi hatsëë cachja profeta rë Nina, hacuaha ninguitsjun tsêhë cjuaxi cachja Nai naja xi vaxëtje naja, cjuaxi jan xi apóstol cavicuya nuju.

³Hacuaha hatuxa nihñucundun tsêhë cjuaxi vihi: nixtin ngascan rë ngasunhdë ne, hya cumatsejen xuta xi sahmî me cjuatsehen tu cutjin cuehya rë yojo rë me. Me vêhë ne, cuejnuccë me

⁴cuinenguise me cuitjin: “¿Jani tsejen Cristu? ta, tacunvasen cuaha cjuaxi cuinduva nga me. Peru cafë cahme xuta changá naja ne, hane ha nduva ni chva xi nduva, cuanitjin sacuahatjin camá hisca xi casahasen ngasunhdë.” Cuatjin chja me.

⁵Peru quixiin cjuaxi chja me ta, hatuxa mijî cjuahacuenda me tsêhë xcusun xi cama vi: cojo cjuaxi cachja Nina ne, ngasunhdë ne, ha tacun cuaha hisca hatsëë nixtin. Nangui ne, camatangun ngajñi nandá, hacuaha nandá ni ne, casua ngahñu rë ngasunhdë.

⁶Sehe hacuaha nandá vêhë ni ne, catsinguetsun rë hya xi casesuntë nandá ngasunhdë nixtin vë.

⁷Hindë ne hacuaha cojo cjuaxi rë Nina jan ne, ngahnga cojo nangui xi tsejen quihndë ne, ha tetjo cuaha rë Nina peru cojo cjuaxi vêhë ni ne, sehe cueti cojo ndihî. Ndihi vêhë ne cuaca rë hya xi cjuaháchuva Nina yêjê ni xuta tsehen nixtin xi cjuëya me xi cuma rë Nina.

⁸Peru ngayun xingueen, chjuhuncundun tsêhë cjuaxi quixi vi: xi má rë Nai naja ne, ngu nixtin ne, tangun ni nduju sacuahaha ngu mil nu, hane xi ngu mil nu ne, tangun chva sacuahaha ngu nixtin.

⁹Handasa xi ma tsingatahacacun xuta xi jemu tivindeya rë Nina xi cuma chihin cjuaxi cachja me ne, peru quixiin vë. Nina ne, ta tsijyëcacun me cojo nuju, tisua sa nuju cahndë cojo sa xi tsajin hisca ngu xuta xi chaja me ta, meje rë me xi yêjê ni xuta ne, tsindeya me cjuatacun rë me hane cuisehen me ndiya ndajyihî.

¹⁰Peru xi cuechun nixtin xi cuinduva Nai naja ne, ha sacutsja rë cjuëhe me sacuahaha xi cjuëhe ngu chëjê xi má nguixun. Sehe ngajan cumá xi ngahnga ne, cuetsunya cojo ngu chircun xi tjercu cjuaneyaha camahani, hane yêjê xcusun xi camá cojo ne, cjuëya tundecjaya cojo ndihî. Hacuaha nangui ne, cjuë cueti cojo yêjê xcusun xi tjîn rë.

¹¹Tsêhë xi quixi jain xi hatuxa cuatjin cjuë cuetsunya yêjê xcusun vë ni, ngajan xi sahmî ngu yêjê xi ngayun ne, ndandaja nihñu ngayun hacuaha tyjahi cjuatacun nuju.

¹²Nechunyun rë nixtin xi cuinduva Nina hane nihñu xati tacun xi xati cumá cjuëhe. Nixtin vêhë ne, ngahnga ne cuetsunya cojo ndihî, hane yêjê xcusun xi camá cojo ne, tundecjaya rë ne, cjuëya.

¹³Peru ngayaan ne, nechayan rë cahndë xi cachja Nina xi cuiseen, ngu ngahnga xatsë, ngu nangui xatsë hiscan cuinechanchandun cojo suva mé xi tsajin jyë rë.

¹⁴Vêhë xi ngayujun ni xingueen ne, jinguyêjê rë xi nechunyun rë yêjê ni xcusun vihi ne, nihñu nguñajatacun xi ndandaja nihñu cojo sa xi hya xi cuechutaha me yun ne, tyjahi cjuatacun nuju, tsajin xi cún nuju, hane hacuain mé cjuachan tjîn.

¹⁵ Ningatuhuntacun ngayun ta hindë xi titsijyëcacun Nai naja cojo naja ne xi jemu tafi me ne, vaxëcun rë xi xuta ne, cuetjutje me. Tangun ni chja Pablo xingueen ne, hane hacuanitjin catsihindu nuju tsëhë, sacuahatjin cjuatacun ndajylhi xi casua Nina me.

¹⁶ Ngajan xi xcun yëjë ni carta xi catsihindu me ne, hacuaha chja me cojo nuju tsëhë yëjë ni xcusun vihi, handasa hinchajñi yahnga cjuaxi tjemu chja vijnercu. Xuta ngarca ne, xuta xi hacuiin nguñajacacun me ne, titsindeya me cjuatacun rë cjuaxi jan xi chja vijnercu hane hacuaha tsindeya me cjuatacun rë yahnga xujun rë Nina. Xi cuatjin sahmi me ne, tivangui me suva me jyë rë me.

¹⁷ Ngajan xi ngayun, xingueen, hangu ta hya xi chaja sa cumá ne ha camachaya nuju tsëhë cjuacjintacun vihi, nechun cuidadu tsëhë. Sehe ngajan hacuiin mahinda tacun cojo cjuandacha tsëhë xuta tsehen ta sehñu cuaha cojo cjuatacun quixi.

¹⁸ Peru catamajyë sa tsujun cjuandaja rë Nina hacuaha catuxaha sa cjuatacun xi tjin nuju tsëhë Nai naja Jesucristu, me xi vaxëtje naja. Catama jyë catama hnga me yëjë nu yëjë nixtin. Cuatjin jain.

Xujun titjun, xi catsihindu San Juan

Cumangutacun ta Jesús camá me Quihndi rë Xuta

¹ Tihín cumachaya nuju ngujo cjuua tsêhê Jesucristu, me xi sua cjuahñu xatsê. Me vêhê xi ha tacun me hisca xi casahasen ngasunhndê. Canuhyin cjuua xi cachja me. Cahyin yêjê ni hacutjin xi casahmi me. Hisca casatê ntsin me.

² Me xi sua cjuahñu jan ne, camatsejen me. Hane ngayin ne, cahyin me. Vêhê xi titihín cjuaquixi niji, xi titihín tijimachaya nuju ta me vêhê ne, tsajin nu tsajin nixtin xi cavetsihin cjuahñu rê me, hacuaha tsajin nu tsajin nixtin xi cuijnetaha cjuahñu rê me. Ha tacun me ngajan cojo Nahmi rê me ne, peru canduva me ngeuehe, cama tsejen me ngajñi niji.

³ Vêhê xi titihín tijimachaya nuju cjuua xi canuhyin cojo xcusun xi cahyin, sehe ngajan xi cuma tangun cjuatacun nuju cojo Nina sacuatjin tjin tangun cjuatacun niji cojo Nina Nahmi naja cojo Jesucristu, Quihndi rê me.

⁴ Vêhê xi cuitjin tinihindin nuju, cojo sa xi jemu ndaja cuma rê xahasen niji.

Xi cuanguen nduju cojo Nina ne, má sacuaaha casua hasen rê cjuatacun naja

⁵ Cjuua xi cachja Jesucristu cojo niji ne, cuitjin fi: Nina ne, hatuxa tjemu ndaja me. Tsajin camahani cjuatsehen hiscan tacun me. Hane ha cjuua vêhê ni xi tinújin cojo nuju.

⁶ Sa xi cuinújan xi tjin tangun cjuatacun naja cojo Nina hya xi tinihña cjuatsehen ne, tu vindachan ni ta, cjuatsehen xi tinihña ne, chuyiin rê Nina tsêhê.

⁷ Peru sa xi nechan ngajñi rê cjuandaja, sacuatjin rê Nina xi hatuxa tacun me ngajñi rê cjuandaja ne, cuatjin xi cuma tangun cjuatacun naja. Hacuaha cuatjin xi cjuengui xahasen naja tsêhê yêjê ni jyê naja, ngatsê rê xi cahme Jesús, Quihndi rê Nina.

Sa xi cuijacun cojo Nina ne, cumanchataha jyê naja

⁸ Sa xi cuinújan xi tsajin jyê naja ne, tu cuindachan suvaan ni rê yojo naja ta, quixiin xi nújan.

⁹ Peru sa xi cuijacun jyê naja cojo Nina ne, tsinchataha naja me, hacuaha cuaxêxin me yêjê ni cjuatsehen xi hincha xahasen naja. Cuatjin sahmi me ta tjercu ndaja me. Yêjê ni cjuua xi chja me ne, hatuxa sahmi chihin me.

¹⁰ Sa xi cuinújan xi hisca ngu cjuatsehen cjêê camahani nihña ne, tangun vêhê cojo xi cuinújan xi Nina ne, jemu ndacha me xi chja me xi tjin jyê naja, hacuaha cuatjin cumatsejen xi cjuua rê Nina ne, cavisiin camahani ngajñi rê cjuatacun naja.

2

Cristu, me xi chjatje ngatsê naja

¹ Titsihindu nuju yêjê ni cjuua vihi tsan ta, tsêhê xi cjuua vihi ne, cuicuya nuju xi hacuiin nihñu cjuatsehen. Peru sa xi tjin yo yaan xi nihña ngu cjuatsehen ne, hacuaha tjin naja ngu me xi cuichjatje ngatsê naja xcun Nahmi naja. Me vêhê ne, hacui Jesucristu, me xi hatuxa tjahi.

² Hacuaha me vêhê ne, cavechjitje me tsêhê yêjê ni jyê naja. Peru hacuiin tu súvá ni jyê naja ta hacuaha cojo jyê rê yêjê sa xuta.

³ Sa xi nihña jain hacutjin xi vitexa Nina ne, ngajan matsejen xi cjuaquixi xi xuta rê me ngayaan.

⁴ Peru sa xi cuinújan xi hatuxa xuta rê Nina ngayaan hya xi mijí nihña hacutjin vitexa me ne, tjercu ndacha yaan ta quixiin xi nújan.

⁵ Peru hya xi nihña jain hacutjin xi vitexa me ne, hya matsejen xi nihmutacun jain me. Sa cuatjin ne, hyan ta tjin tangun cjuatacun naja cojo me.

⁶ Sa xi cuinújan xi tjin tangun cjuatacun naja cojo me ne, meje rê xi nechan ngajñi rê cjuandaja sacuatjin cavejña Jesucristu.

Cjuatacun xatsê

⁷ Cjuua xi titsihindu nuju vihi tsan ne, hacuiin ngu cjuatacun xatsê xi sehe tivitéxa nuju xi nihmutacun xingueen ta, ha hacui ni cjuatacun xi cavitéxa nuju hya xi tjun tjun camacjain nuju.

⁸ Peru cjuatacun xi titsihindu nuju vihi ne, cuma cuinújan xi sacuaaha ngu cjuatacun xatsê ta, hiscan xi ha cavechu cjuatacun jan ne, tivetsihin tisahmi xuta cjuandaja. Hane vêhê sahmi xi tivetsihin tifê cjuatsehen xi tjercu tjin ngasunhndê. Jesucristu ne, casahmi jain me yêjê ni hacutjin xi vitexa cjuatacun xatsê vihi, hacuaha ngayujun ni ne, tinihñu hacutjin vitexa cjuatacun xatsê jan.

⁹ Sa xi cuinújan xi nechan ngajñi rë cjuandaja, hya xi choho hyan xingueen ne, quixiin xi nújan ta nechancuaan ngajñi rë cjuatsehen.

¹⁰ Peru sa xi hmutacun xingueen ne, cuatjin matsejen xi nechan ngajñi rë cjuandaja. Hane tsajin mé nihña xi sahmi xi cuixuya xingueen ngajñi rë cjuatsehen jan.

¹¹ Peru sa xi choho hyan xingueen ne, nechan ngajñi rë cjuatsehen, hacuaha sacuiyiin naja hacutjin ndatjin nihña ta tséhë xi cjuatsehen xi tinihña ne, sahmi jñu tsajan.

¹² Ngayujun ni tsan ne, tsihindu nuju ta, jyë nuju ne, ha camanchataha ngatsë rë Jesucristu.

¹³ Ngayujun ni xi xuta changá yun ne, tsihindu nuju ta, tséhë xi ha hyun me xi ha tacun hisca xi casahasen ngasunhndë. Hane ngayujun ni xi cjëë cuma changá yun ne, hacuaha tsihindu nuju ta ha cacaa nuju cojo xitsehen má titjun.

¹⁴ Ngayujun ni tsan ne, tsihindu nuju ta ha hyun Nina Nahmi naja. Ngayujun ni xi xuta changá yun ne, tsihindu nuju ta ha hyun me xi ha tacun hisca xi casahasen ngasunhndë. Hane ngayujun ni xi hacuiin changá yun ne, hacuaha tsihindu nuju ta nechun nguñajatacún xi macjain nuju cjua rë Nina, cjua xi quichuhun cahntsua xahasen nuju, hacuaha cacaa nuju cojo xitsehen ma titjun.

¹⁵ Mijí rë xi chuya naja cjuatacun xi tjin ngasunhndë ta, sa xi chuya naja ne, cumaji nihmutacun Nina Nahmi naja.

¹⁶ Cuatjin ta, tséhë xi yëjë ni cjuatacun xi tjin ngasunhndë vihi, sacuaaha cjuatacun tsehen xi ningatahantacun, sacuaaha cjuatacun xi tjercu meje naja yëjë ni xcusun xi chutsejen, sacuaaha cjuatacun xi tjercu nihña yehe yojo naja ne, yëjë ni cjuatacun xi cuacun vëhë ne, hacuiin nduva tséhë Nina Nahmi naja ta nduva tséhë súvá ngasunhndë vihi.

¹⁷ Hane xcusun rë ngasunhndë vihi ne, cojo yëjë ni cjuatacun xi tjercu chuya rë xuta ne, cjuëya. Peru xuta xi sahmi jain me hacutjin meje rë Nina ne, me vëhë ne, tsajin nu tsajin nixtin cjuëya me.

Cjuaquixi cojo cjuandesu

¹⁸ Ngayujun ni tsan ne, ha tijima tiña nixtin xi cjuë ngasunhndë. Ha canuhyun ta cuinduva xu ngu cha xi sahmi condra tséhë Cristu. Peru quihndë ne, tjemu cjín xuta xi ha tijimatsejen xi condra tséhë Cristu me. Hane vëhë xi ha hyin ta cama tiña nixtin xi cjuë ngasunhndë.

¹⁹ Xuta xi cuacun jan ne, cavetjuxin me tsajan. Peru hatuxa hacuiin ladu naja me ta, sa xi quixi xi ladu naja me ne, caviyuju me ngajñi naja. Peru cavetjuxin me tsajan, cojo sa xi cuma tsejen ta hacuiin ladu naja me.

²⁰ Ngayujun ni ne, casua nuju Jesucristu Hasen xi tséhë Nina. Vëhë xi vijnercun cjua xi cjuaquixi.

²¹ Hacuiin tsingátahacacun xi vijniircun cjua xi cjuaquixi ta ha hvë xi vijnercun. Hacuaaha hyun ta cjuandacha ne, hatuxa sacuiin naja ngajñi rë cjua xi cjuaquixi. Vëhë xi cuitjin tsihindu nuju cjua vihi.

²² Tjin xuta xi chja xi Jesús ne, hacuiin Cristu me, hacuiin me xi cavaxijin Nina xi cuaxëtje naja. Hane xuta xi cuatjin chja me ne, hatuxa tjemu ndacha me. Hacuaaha xuta xi tsitjungui me Nahmi naja xi tacun ngahnga cojo Quihndi rë ne, me vëhë xi sahmi condra tséhë Cristu.

²³ Yëjë ni xuta xi tsitjungui Quihndi rë Nina jan ne, tsajin tjin tangun cjuatacun rë me cojo Nahmi rë Quihndi jan. Peru xuta xi macjain rë Quihndi jan ne, hacuaaha tjin tangun cjuatacun rë me cojo Nahmi jan.

²⁴ Ninguitsjun yëjë ni cjua xi canuhyun hisca nixtin hya xi tjun tjun camacjain nuju. Sa xi quichuhun cjua jan cahntsua xahasen nuju ne, hacuatjin tjin tangun cjuatacun nuju cojo Quihndi cojo Nahmi rë.

²⁵ Hacuaaha cachja Cristu xi sua naja me ngu cjuahñu xatsë.

²⁶ Cuitjin tsihindu nuju ta, tséhë xi tjin xuta xi meje cuindacha nuju me.

²⁷ Peru ngayun ne, Hasen xi tséhë Nina xi casua Cristu ngayun ne, quichuhun cahntsua xahasen nuju. Vëhë xi hacuiin sahmi ngu jyë xi cuinduva xuta cuicuya nuju me ta, tséhë xi Hasen xi casua me jan ne, tivicyua nuju yëjë ni cjua. Hane cjua xi tivicyua nuju ne, hatuxa cjuaquixi, hacuiin cjuandacha. Quihndë ne, cuatjin tangunndujun cojo xi ha macjain nuju Jesucristu, sacuatjin xi ha cavicyua nuju Hasen xi tséhë Nina jan.

²⁸ Quihndë tsan ne, cúa cuichjá cojo nuju ta tangun nduju cojo xi ha macjain nuju Jesucristu, sehe ngajan xi nixtin xi cuinduva nga me ne, ngayaan ne, hacuiin rcun cuma, hacuaaha hacuiin tsisava naja me.

²⁹ Ha hyan ta Cristu ne, hatuxa tyjahi me. Vëhë xi cumangutacun ta yëjë ni xuta ndaja xuta tyjahi ne, me vëhë xi ha camá me quihndi rë Nina.

3

Me xi tsin ngatsë rë Hasen rë Nina ne, sacu rë me cjuahñu xatsë

¹ Tjercu tsihmucacun naja Nina Nahmi naja. Hisca chja me xi quihndi rë me ngayaan. Peru hacuiin tu suvá chja ni me ta cjuaquixi jain xi quihndi rë me ngayaan. Peru xuta tsehen ne, hvíin me xi quihndi rë Nina ngayaan ta, tséhë xi hacuiin xuta rë Nina me.

² Ngayaan tsan ne, quihndë ne, quihndi rë Nina ngayaan. Peru cjéë cumachaya naja mé xcusun xuta cuma ngayaan xi cuma ngascan. Peru ha hyan ta, hya xi cuinduva Cristu ne, cuma ngayaan sacua ha me vëhë ta, tséhë xi hya ne, chan jain me hacutjin xi jyíhi me.

³ Yëjë ni xuta xi tivetahacacun me Cristu ne, sahmi tyjahi suvá me xahasen rë me, sacuatjin tyjahi xahasen rë Cristu.

⁴ Peru yëjë ni xuta xi hinchajñi ngajñi rë cjuatsehen ne, hatuxa hndiin me tséhë cjuaxi cavitexa Nina. Ta xi hacuiin nuhyaan tséhë cjuaxi cavitexa Nina ne, vëhë xi hmi cjuatsehen.

⁵ Peru ha hyun ta Cristu ne, canduva me ngeueh ngasunhdë, xi cjuahaxin me yëjë ni jyë naja. Hane me vëhë ne, hatuxa tsajin camahani jyë rë me.

⁶ Vëhë xi yëjë ni xuta xi cjui nduju me cojo xi mcjain rë me Jesucristu ne, ha quihndë tsajin hinchajñi me ngajñi rë cjuatsehen. Peru yëjë ni xuta xi hinchajñi cuaha me ngajñi rë cjuatsehen ne, me vëhë xi hatuxa cavijnürco me hacutjin cjuatacun rë Jesucristu, hacuaha hacuiin xuta rë Jesucristu me.

⁷ Ngayujun ni tsan ne, nechun cuidadu xi tsajin yo cuindacha nuju. Xuta xi hatuxa hinchajñi me ngajñi rë cjuandaja ne, me vëhë xi tyjahi xahasen rë me, sacuatjin tyjahi xahasen rë Cristu.

⁸ Peru xuta xi hatuxa hinchajñi me ngajñi rë cjuatsehen ne, tséhë xitsehen matitjun me ta, tséhë xi xitsehen matitjun jan ne, hatuxa hisca ntsacu cavetsihin ne, sahmi cjuatsehen. Vëhë xi canduva Quihndi rë Nina ta, tséhë xi meje tsicjëya me yëjë ni cjuatsehen xi sahmi xitsehen matitjun jan.

⁹ Xuta xi camá me quihndi rë Nina ne, tsajin hinchajñi me ngajñi rë cjuatsehen ta, tséhë xi yaha me cjuatacun rë Nina. Hatuxa cumaji xinchajñi me ngajñi rë cjuatsehen ta, tséhë xi quihndi rë Nina me.

¹⁰ Suvá tsejen yo xi quihndi rë Nina, hacuaha suvá tsejen yo xi quihndi rë xitsehen. Ta tu yo ni xi tsajin hinchajñi ngajñi rë cjuandaja, tu yo ni xi tsihmaaicacun xicjin ne, hacuiin quihndi rë Nina.

Nihmu tacun xinguen xingu xingu yaan

¹¹ Cjuaxi rë Nina xi canuhyun hisca ntsacu cavetsihin ne, cuitjin chja: meje rë xi nihmutacun xinguen.

¹² Miji rë xi nihña sacuatjin casahmi cha Caín ta cha vëhë ne, quihndi rë xitsehen cha, hacuaha catsiquehen cha hntsë cha. Peru ¿há hyun mé ngatsë rë xi cuatjin catsiquehen cha hntsë cha ni? Catsiquehen cha hntsë cha ngatsë rë cjuaxin ta, tséhë xi yëjë ni xi casahmi cha ne, hatuxa suvá cjuatsehen, hane xi casahmi hntsë cha ne, hatuxa suvá cjuandaja.

¹³ Vëhë xi hacuiin cjuercun nuju tsan, hya xi choho scuëë nuju xuta tsehen.

¹⁴ Ngayaan ne, nihmutacun xinguen. Hane cuatjin matsejen xi ha cavetjunxen tséhë ngajñi rë cjuatsehen, caviseen ndiya rë cjuandaja. Peru yo xi tsihmaaicacun xicjin ne, hinch cuaha ngajñi rë cjuatsehen.

¹⁵ Yëjë ni xuta xi choho vëë xicjin ne, tangun me cojo xuta xi tsiquehen xicjin. Hane ha hyun ta, yëjë ni xuta xi tsiquehen xicjin ne, tsajin rë me cjuahñu xatsë.

¹⁶ Cristu ne, ngatsë rë xi tsihmucacun naja me ne, johu ni rë me xi catsiquehen xuta me. Cuatjin camatsejen xi hmi cjuahmutacun. Hane hacuatjin ngayaan ne, meje rë xi ningatehen xi tsiquehen naja xuta, sa xi cuatjin mameje rë, ngatsë rë xi nihmutacun xinguen.

¹⁷ Ngayaan xi tjin chinë tjin hyun ne, sa xi tsajin naja cjuayumatacun hya xi ma chaya naja xi tjin ngu xinguen xi tsajin mé sinë me tsajin mé cuihi me ne, cuatjin matsejen ta tsajin camahani cjuahmutacun rë Nina cahntsua xahasen naja.

¹⁸ Miji rë xi tu cuinñan ni xi nihmutacun xinguen tsan ta meje rë xi nihña cjuandaja, cojo sa xi cumatsejen xi tjin jain naja cjuahmutacun cojo xinguen.

¹⁹ Sa xi cuatjin nihña ne, vëhë matsejen xi tséhë Nina xi cjuaquixi jain ngayaan, hacuaha vëhë xi cumangutacun tu ya ni ni hya xi chjahyan rë me cjuandaja rë me.

²⁰ Hane ha ndasa xahasen naja cuinchajyë naja xcun Nina xi choho nihña ne, peru miji rë xi cumacjintacun ta, tséhë xi Nina ne, hitsë sa jyë me cojo cjuatacun rë me xi cumá rë xahasen naja ta, tséhë xi me vëhë ne, vëë me yëjë ni cjuatacun.

²¹ Ngajan xi sa xi tsajin mé cuinchajyë naja xahasen naja ne, hacuiin cumacjintacun hya xi chjahyan rë me cjuandaja rë me.

²² Hane me vehe ne, sua naja me yějê ni xi chjahyan rë me ta, tsêhê xi tinihña yějê ni hacutjin xi cavitexa me, hacuaha tsêhê xi yějê ni xi chuya rë me ne, cuatjin tinihña.

²³ Cjua xi cavitexa naja Nina ne, cuitjin chja: meje rë me xi catamacjain naja Jesucristu, Quihndi rë me, hacuaha meje rë me xi nihmutacun xingueen. Cuatjin cavitexa me.

²⁴ Hane yějê ni xuta xi vihndê cjua xi cavitexa Nina ne, tjin tangun cjuatacun rë me cojo Nina, hacuaha Nina ne, jiya cahntsua xahasen rë me. Ngayaan ne, hyan xi jiya Nina cahntsua xahasen naja ta, tsêhê xi casua naja me Hasen rë me.

4

Chuva rë profeta ndacha

¹ Ngayujun ni tsan ne, mijí rë xi ngutjen cumacjain nuju tsêhê yějê ni cjuatacun xi cuichja xuta cojo nuju ta titjun chjuhunchuvun cjuatacun jan, zhá ma tangun cojo cjuatacun rë Nina? Cuatjin meje rë ta, tsêhê xi ngasunhndê ne, tjemu cjin xuta xi tivindacha me. Chja súvá me ta cjuatacun xi vicuya me ne, cjuatacun rë Nina, peru quixiin vë.

² Peru sa xi ngu xuta cuichja quixi me ta Jesucristu ne, camá me ngu xuta ngasunhndê vihi ne, cumangutacún ta, ngajan matsejen xi me vêhê ne, chja jain me cjuatacun rë Nina.

³ Peru xuta xi hacuiin cuatjin chja quixi tsêhê Jesús ne, hatuxa tsajin camahani rë me cjuatacun rë Nina ta tjin rë me cjuatacun tsêhê xuta xi sahmi contra tsêhê Cristu. Ha canuhyun ta hatuxa cuechu nixtin xi cjeuhe ngu cjuatacun xi sahmi contra tsêhê Cristu, peru cuichjá cojo nuju ta cjuatacun vêhê ne, ha hisca hinchajñi ngajñi naja nguehe ngasunhndê.

⁴ Ngayujun ni tsan ne, tjin tangun cjuatacun nuju cojo Nina. Vêhê xi cacaa nuju xi camacjain nuju tsêhê xuta ndacha xi cuacun jan. Camá cacaa nuju cuatjin ta, tsêhê xi Nina xi jiya xahasen nuju ne, hitsê sa jyê me xi cuma rë xitsehen matitjun xi jiya xahasen rë xuta xi macjaain rë Jesucristu.

⁵ Xuta ndacha xi cuacun jan ne, hatuxa tjin rë me cjuatacun rë xuta xi macjaain rë Jesucristu. Vêhê xi cjuatacun xi vicuya me ne, cjuatacun rë xuta xi macjaain rë Jesucristu, hacuaha yějê ni xuta xi macjaain rë Jesucristu ne, vetaharcu me cjua jan.

⁶ Peru ngayaan ne, tjin tangun cjuatacun naja cojo Nina. Yějê ni xuta xi hacuaha tjin tangun cjuatacun rë me cojo Nina ne, vetaharcu me cjua xi vicuyan. Peru yějê ni xuta xi tsajin tjin tangun cjuatacun rë me cojo Nina ne, vetaharcuaain me cjua xi vicuyan. Cuatjin xi ma sacuse naja yo xi chja cjuaquixi ne, o yo xi vindacha.

Xuta xi tsêhê Nina ne, hacuaha tjin rë me cjuahmutacun xi nduva tsêhê Nina

⁷ Meje rë xi nihmutacun xingueen tsan ta, yějê ni cjuahmutacun ne, hatuxa nduva tsêhê Nina. Yějê ni xuta xi tjin rë me cjuahmutacun ne, quihndi rë Nina me, hacuaha amigu rë Nina me.

⁸ Peru me xi hacuiin tsihmucacun xicjin ne, hacuiin amigu rë Nina me ta, Nina ne, hatuxa tjin rë me cjuahmutacun.

⁹ Nina ne, ngu tutu ni Quihndi xi tjin rë me. Hane ngayaan ne, hyan ta Nina ne, tjin rë me cjuahmutacun cojo naja, tsêhê xi catsingatju me Quihndi rë me nguehe ngasunhndê. Cuatjin catsingatju me Quihndi rë me, cojo sa xi sacú naja cjuahñu xatsê ngatsê rë Quihndi jan.

¹⁰ Ngayaan ne, nihmutacun Nina. Peru Nina ne, hitsê sa tsihmucacun naja me. Vêhê xi hisca catsingatju me Quihndi rë me xi cuechjitje ngatsê rë yějê ni jyê naja.

¹¹ Hane tsêhê xi cuatjin catsihmucacun naja Nina tsan ne, vêhê xi hacuaha meje rë xi nihmutacun xingueen.

¹² Nina ne, hatuxa tsajin yo xi cavêê rë me. Peru sa xi nihmutacun xingueen ne, Nina ne, jiya me cahntsua xahasen naja, hane cuatjin matsejen xi tjin jain naja sacuaaha cjuahmutacun xi tjin rë Nina.

¹³ Ngayaan ne, hyan ta tjin tangun cjuatacun naja cojo Nina hacuaha hyan ta jiya me cahntsua xahasen naja, tsêhê xi casua naja me Hasen rë me.

¹⁴ Hane ngayin ne, cahyin jain cojo tuxcuin Quihndi rë Nina. Vêhê xi tinújin cojo cjuaquixi ta Nina Nahmi naja ne, catsingatju me Quihndi rë me, xi cuaxêtje rë xuta ngasunhndê.

¹⁵ Tu yo ni xi chja cjuaquixi xi Jesús ne, Quihndi rë Nina jain me ne, me vêhê ne, jiya Nina cahntsua xahasen rë, hacuaha tjin tangun cjuatacun rë cojo Nina.

¹⁶ Ngayaan ne, macjain naja hacuaha ha hyan ta Nina ne, hmucacun jain me ngayaan. Nina ne, hatuxa tjin rë me cjuahmutacun. Hane xuta xi tjin rë cjuahmutacun ne, tjin tangun cjuatacun rë me cojo Nina, hacuaha Nina ne, jiya cahntsua xahasen rë me.

¹⁷ Hane hya xi cumachihin cjuahmutacun xi tjin naja ne, ngajan xi hacuiin rcun cuma, hya xi cuechutaha nixtin xi tsichuva naja Nina. Cuatjin ta, tsêhê xi nguehe ngasunhdê ne, hacuaha quihndi rê Nina ngayaan sacuatjin rê Jesucristu, xi Quihndi rê Nina me.

¹⁸ Hiscan xi tjin cjuahmutacun ne, tsajin mé chircun hinchajñi ta hya xi ha tjin chihin cjuahmutacun xi tjin naja ne, hisca hitsê ne, tsajin rcun cuma. Sa xi ningatahantacun xi Nina sahmi naja me castigu ne, vêhê xi rcun cuma. Peru sa xi cuatjin rcun cuma ne, ngajan matsejen xi tsajin tjin chihin cjuahmutacun xi tjin naja.

¹⁹ Ngayaan ne, tjin naja cjuahmutacun ta, tsêhê xi Nina ne, tjun me catsihmutacun naja me.

²⁰ Peru sa xi nújan xi nihmutacun Nina, hane choho hyan xingueen ne, tu vindachan ni xi nújan. Cuatjin ta, tsêhê xi sa xi hacuiin nihmutacun xingueen xi tsejen naja cojo tuxcun ne, hacuaha cumaji nihmutacun Nina xi cjêê camahani chaan me.

²¹ Nina ne, cavitexa naja me cjuavihi: yo xi tjin rê cjuahmutacun cojo Nina ne, hacuaha meje rê xi tjin rê cjuahmutacun cojo xicjin.

5

Me xi má hya xi macjain naja Jesucristu

¹ Jesús ne, hacui me xi Cristu, me xi cavaxijin Nina xi cuaxêtje naja. Hane ngayejen ni xi cuatjin macjain naja tsêhê cjuavêhê ne, quihndi rê Nina ngayaan. Yêjê ni xuta xi tsihmutacun me xi má xutacha rê ngu quihndi ne, hacuaha cojo quihndi jan tsihmutacun me.

² Sa xi nihmutacun jain Nina hacuaha nihña sacuatjin xi cavitexa me ne, ngajan matsejen xi tjin naja cjuahmutacun cojo yêjê ni xuta xi quihndi rê Nina me.

³ Hacuaha sa xi chjahanrcun jain yêjê ni cjuavihi xi cavitexa Nina ne, ngajan matsejen xi nihmutacun jain me. Hane yêjê ni cjuavihi xi cavitexa me ne, hacuiin jercu chja xi nihña ta,

⁴ tsêhê xi yêjê ni xuta xi quihndi rê Nina ne, scaa rê me cojo yêjê ni cjuatsehen xi tjin nguehe ngasunhdê. Cuatjin caa naja cojo cjuatsehen jan ta, tsêhê xi macjain naja Jesucristu.

⁵ Hane suvá ni xuta xi macjain rê tsêhê Jesús xi Quihndi rê Nina jain me ne, me vêhê xi caa rê me cojo yêjê ni cjuatsehen xi tjin ngasunhdê.

Hasen rê Nina ne, tsinguixi xi Jesús ne, hacui Quihndi rê Nina me

⁶ Hya xi canduva Jesucristu ne, camatsejen xi Quihndi rê Nina me nixtin xi cojo nandá caxtenda me cojo nixtin xi cavixu jni rê me hya xi cahme me. Peru hacuiin suvá ni nixtin xi caxtenda ni me ta cojo nixtin xi cahme me ne, hya camatsejen xi Quihndi rê Nina me. Hasen xi tsêhê Nina ne, cuatjin tisua naja cjuaquixi ta, tsêhê xi Hasen jan ne, hatuxa cjuaquixi xi chja.

⁷ Siu jyan xcusun xi tisua machaya naja ta Jesús ne, Quihndi rê Nina jain me.

⁸ Ngu ne, cuatjin chja quixi Hasen xi tsêhê Nina. Ma jo ne, cuatjin camatsejen hya xi caxtenda Jesús. Ma jyan ne, hacuaha cuatjin cama tsejen hya xi cahme me. Hane catsijyan xcusun xi cuacun jan ne, tjin rê ngu ni cjuatacun.

⁹ Ngayaan ne, macjain naja tsêhê cjuavihi xi chja xuta cojo naja. Peru hitsê sa vengui chjí rê cjuavihi xi chja Nina. Hane Nina ne, casua me camachaya naja yo xi Quihndi rê me.

¹⁰ Xuta xi macjain rê me tsêhê Quihndi rê Nina ne, hatuxa vêê me cojo cjuatacun rê me ta quixi jain cjuavihi xi cachja Nina. Xuta xi macjaain rê me tsêhê cjuavihi xi cachja Nina ne, sacuaha xi cuichja me xi Nina ne, jemu ndacha me. Cuatjin chja me tsêhê Nina ta, tsêhê xi macjaain rê me tsêhê cjuavihi xi cachja quixi Nina, yo xi Quihndi rê me.

¹¹ Hane Nina ne, cachja cjuahña xatsê jan ngatsê rê Quihndi rê me.

¹² Xuta xi tjin tangun cjuatacun rê me cojo Quihndi jan ne, tjin rê me cjuahña xatsê vêhê. Peru xuta xi tsajin tjin tangun cjuatacun rê me cojo Quihndi rê Nina jan ne, hacuaha tsajin rê me cjuahña xatsê jan.

Conseju xi sua Juan xi cajnetaha

¹³ Vêhê xi cuitjin titsihindu nuju ngayujun ni xi macjain nuju tsêhê Quihndi rê Nina. Titsihindu nuju yêjê ni cjuavihi, cojo sa xi cumangutacun ta quixi xi tjin jain nuju ngu cjuahña xatsê xi tsajin nu tsajin nixtin xi cjuê.

¹⁴ Ngayaan ne, mangutacun jain cojo Nina ta, tsêhê xi ha hyan ta sa xi tjin tangun cjuatacun naja cojo rê me hora xi tichjahyan rê me ne, cuihdê me xi cuinújan.

¹⁵ Hane tsêhê xi hyan ta vihndê me yêjê ni cjuavihi xi nújan cojo rê me ne, vêhê xi hacuaha hyan ta sacú naja xi cachjahyan rê me.

¹⁶ Yo ngayaan xi chutsejen xi tivixuya ngu xingueen ngajñi rê ngu cjuatsehen xi cuma cumanchataha ne, meje rê xi cuinújan yumatahan tsêhê me, hane cuatjin sacú rê me cjuahña

xatsë. Peru tjin cjuatsehen xi cumaji cumanchataha. Hane hacuiin tichjá cojo nuju xi cuiñújnyumuntuhun tsêhê xuta xi tjin rê me jyê vêhê.

¹⁷ Yêjê ni cjuatsehen ne, Nina ne, chja me ta hatuxa jyê hmí rê. Peru tjin cjuatsehen xi cuma cumanchataha.

¹⁸ Ngayaan ne, hyan ta yêjê ni xuta xi cjuaquixi xi quihndi rê Nina me ne, hatuxa tsajin hinchajñi me ngajñi rê cjuatsehen. Cuatjin ta, tsêhê xi Quihndi rê Nina ne, sahmi rê me cuidadu, hane xitsehen matitjun ne, cumaji mé sahmi cojo rê me.

¹⁹ Ngayaan ne, ha hyan ta tsêhê Nina ngayaan. Hane yêjê sa xuta xi yahnga ne, tsêhê xitsehen má titjun me.

²⁰ Ngayaan ne, hacuaha hyan ta ha canduva Quihndi rê Nina. Hacuaha casua naja me cjuatacun, cojo sa xi cuijnercun yo xi Nina xi hatuxa cjuaquixi. Tjin tangun cjuatacun naja cojo me xi hatuxa cjuaquixi ta, tsêhê xi tjin tangun cjuatacun naja cojo Jesucristu, Quihndi rê me. Me vêhê xi Nina xi hatuxa cjuaquixi, hacuaha me vêhê xi sua naja cjuahñu xatsë xi tsajin nu tsajin nixtin xi cjuê.

²¹ Ngayujun ni tsan ne, mijí camahani rê xi chjuhuncun nina xi hacuiin cjuaquixi.

Xujun má jo, xi catsihindu San Juan

Cjuaquixi cojo cjuahmutacun

¹ Ngahan, ngu xuta changá matitjun tséhë yungun ne, tsihindu nuju ngayun, ngu chjuun xi cavaxijin Nina. Hacuaha cojo yëjë ni quihndi nuju ne, tsingatju nuju ngayujun ni ngu nina naha ta, tséhë xi tjemu hmú cáacun nuju cojo nguñaja cjuaquixi. Peru hacuiin tu suva ni ngahan ta yëjë ni me xi vëë jain me cjuua xi hatuxa cjuaquixi ne, hacuaha tsihmucacun nuju me.

² Cuatjin nihmitacuin nuju, ngatsë rë cjuaquixi xi ha siu cahndë ngajñi rë cjuatacun naja. Hane cjuaquixi xi cuacun jan ne, tsajin nu tsajin nixtin xi cuetjuxin tsajan.

³ Nina nahmi naja cojo Jesucristu Quihndi rë me ne, hatuxa sua naja me cjuandaja cjuajeya cojo cjuayumatacun, cuatjin xi ma vanguen tjenguen cjuua xi cjuaquixi, hacuaha ma nihmutacun jain xingueen.

Cuanguennduju cojo cjuachacun rë Cristu

⁴ Tjemu ndaja camá rë xahasen naha ta, tséhë xi cavécutaha ngu jo quihndi nuju xi hatuxa hinchajñi me ngajñi rë cjuaquixi, sacuahatjin Nina Nahmi naja cavitexa naja me.

⁵ Quihndë ne, nguehe cuichjá cojo nuju tsan ta meje rë xi ngayejen ni ne, nihmutacun xingueen. Hane cjuua vihi xi tichjá cojo nuju ne, hacuiin ngu cjuua xatsë xi sehe cavitexa naja Nina ta cjuua vihi ne, hacui xi tacun hisca hya xi sehe cavetseen camacjain naja cjuua rë Nina.

⁶ Hane sa xi nihña jain yëjë ni cjuua xi cavitexa naja Nina ne, ngajan matsejen xi tjin jain naja cjuahmutacun. Hane cjuua xi cavitexa Nina ne, hacui vihi: meje rë xi nihmutacun xingueen. Hacuaha hacui cjuua vëhë xi camachaya nuju hisca hya xi sehe cavetsuhun camacjain nuju cjuua rë Nina.

Cjuua xi tanguin cojo cjuua rë Nina ne, má cjuua ndacha

⁷ Cuatjin chjá cojo nuju ta, tséhë xi ngasunhdë vihi ne, tjemu tjin xuta ndacha xi macjaan rë me xi Jesucristu ne, camá jain me ngu xuta ngasunhdë vihi. Xuta ndacha jan ne, hacui me xi vindacha, hacuaha hacui me xi má condra rë Cristu.

⁸ Tjin nuju cuidadu, sehe ngajan xi hacuiin nichayun cjuandaja xi canihñi ngajñi nuju. Cahndë rë vëhë ne, sacú nuju yëjë ni cjuatjo xi sua nuju Nina.

⁹ Yëjë ni xuta xi vatjutaha me tséhë cjuua xi cavicuya Cristu ne, tsajin tjin tangun cjuatacun rë me cojo Nina. Peru yëjë ni xuta xi vetaharcu me suvá ni cjuua xi cavicuya Cristu jan ne, me vëhë ne, tjin tangun cjuatacun rë me cojo Nina Nahmi naja cojo Quihndi rë me.

¹⁰ Hya xi cjuuehe ngu me xi cuichja xi vicuya me cjuua rë Nina, peru sa xi cuicuyaain me cjuua xi cavicuya Cristu ne, xi catuun cahndë cuisehen me cuejña me ndya nuju. Hisca ngu nina cachjayunnguun tséhë me ta,

¹¹ sa xi cuatjin tuhun rë me nina ne, sacuaha xi ma tangun yun cojo cjuatsehen xi sahmi me.

Cjuua xi vijnetaha

¹² Tjemu cjin sa cjuavisiajmi xi meje cuichjá cojo nuju ngayujun ni. Peru tsihinduun sa nuju sacuahatjin xcun ngu xujun vihi ta, tséhë xi hatuxa vejñá xi cjuë tjëngë nuju, sehe cuinújan xcun cojo xcun, sehe ngajan xi tjemu ndaja cuma rë xahasen naja.

¹³ Na tichjun, xi hacuaha cavaxijin Nina na ne, tsingatju quihndi rë na ngu nina tsujun.

Xujun ma jyan, xi catsihindu San Juan

Juan sua suva me nina rē me

¹ Ngahan, ngu xuta changá matitjun tséhē yungun ne, tsihindu ri ngaye Gayo, ta ngaye ne, tjemu vinga ná ngaye, tjemu hmú cáacun ri cojo nguñajaja cjuaquixi.

² Catisecoo ri Nina, tsan, xi cuma cuihin xcun cojo yējē ni cjuandaja, hacuaha xi ndajiyihi cjuahñu riji, sacuahatjin xi ha ndajiyihi xahasen riji.

³ Tjemu ndaja camá rē xahasen naha ta, tséhē xi jima ngu ndiya xi cafehe ngu ngu xingueen ne, tjemu ndaja cachja me tsiji. Ha tuxa chja me ta ngaye ne, nguñajatacuin hmi tjengui ndiya rē cjuaquixi.

⁴ Tjemu ndaja má camahani rē xahasen naha, hya xi machaya ná xi yējē ni xingueen xi sacuaha quihndi naha ne, cjuí tjengui me ndiya rē cjuaquixi.

Conseju xi cuma rē xinguen xi chja me cjuá rē Nina

⁵ Tjemu ndaja tinihñi, tsan, xi cuatjin tivisecue rē jingu sa xingueen, hisca cojo sa xingueen xi hyiin yo jan ta, tséhē xi cjin nandya nduva me.

⁶ Hane ngujo me xi cuacun vèhē ne, sehe cavuya cafehe nga me gueuehe. Hane hya xi cama tangun ngayin yungun ne, cachja me cojo niji ngayijin ni xi tjemu tjin ri cjuahmutacun. Quihndé ne, tu jani hya ni xi cuatju nga me nandya riji ne, tjemu ndatjin xi cuisecue rē me, cojo sa xi tsajin mé xi sahmi chaja rē me xi cuetju me cjue me ndiya ta, tséhē xi cuatjin chuya rē Nina xi nihña.

⁷ Cuatjin meje rē xi nihña ta, tséhē xi xuta xi cuacun jan ne, cavetju quiji me ngu nangui xi cuichja me cjuá rē Jesucristu. Hane hisca ngu hñú ngu tē ne, faain me tséhē xuta xi macjaain rē Nina.

⁸ Vèhē xi gayaan ne, meje rē xi cuatjin cuisecoon rē me xi cuacun jan ta, tséhē xi cuatjin ne, hacuaha cuisecoon rē cjuá xi cjuaquixi.

Diótrefes ne, choho chja cha tséhē Juan

⁹ Ha catsihindu ngu xujun xi tsingátju rē xuta xi ma tangun ngajan yungun. Peru cha Diótrefes, xi tjemu meje sahmi tjun cha ngajñi rē me ne, handasa hacuaha xingueen cha, peru faharcuaain cha cjuá xi nújin.

¹⁰ Vèhē xi hya xi cjuéhē ndyá ne, cuichjájyē cojo nuju ngayujun ni yējē ni xcusun xi sahmi cha jan. Cuichjá quixé hacutjin choho chja cha tsijin. Hane manguaaincacun cha cojo xi choho chja ni cha ta hacuaha tsitjungui cha ngu ngu xingueen xi nduva jingu sa nandya. Hane hya xi yahnga me xi meje sahmi me cjuandaja cojo xingueen xi cuacun nduva jan ne, mijí sua cha cahndé, hacuaha hisca mijí rē cha xi cuisehen nga me yungun.

¹¹ Xi canihñii cjuatsehen xi tisahmi yahnga xuta, tsan, ta tu tjin tisahmi xuta xi tisahmi cjuandaja ne, cuatjin meje rē xi nihñi. Xuta xi sahmi cjuandaja ne, tséhē Nina me. Peru xuta xi sahmi cjuatsehen ne, hacuiin amigu rē Nina me.

¹² Yējē ni xuta ne, ndaja chja me tséhē cha Demetrio. Hacuaha suvá tsejen xi sahmi jain cha sacuaha tjin vitexa Nina. Hisca ngayin ne, ndaja nújin tséhē cha. Hane ngaye ne, ha hye ta xi nújin ne, ha tuxa cjuaquixi.

Cjuá xi vijnetaha

¹³ Tjemu tjin vasen sa xi meje cuichjá cojo ri, peru mijí cuichjá cojo ri sacuaha tjin xcun ngu xujun vihi.

¹⁴ Cahndé rē vèhē ne, tu tjenhñu ni ne, vejñá xi cjué tjēngē ri, sehe cuisiajme xcun cojo xcun.

¹⁵ Quihndé ne, tsingátju ngu nina tsiji, hacuaha yējē ni amigu riji ne, tsingátju me ngu nina tsiji. Nihñi favor ne, yējē ni amigu niji xi siutaha ndyá ne, tehe rē me ngu nina niji jima ngu jima ngu me.

Carta tsëhë San Judas

Judas ne, tichja me nina cojo yëjë ni xuta xi cavaxijin Nina

¹ Ngahan Judas, xi mosu hndixahan rë Jesucristu, hacuaha xi hntsä cha Jacobo ne, tsihindu xujun vihi xi chutayun ngayujun ni xi cavaxijin nuju Nina Nahmi naja, tsëhë xi tjercu hmucacun me ngayun. Hane ngayujun ni xi camacjain nuju Jesucristu ne, Nina tisahmi cuidadu nuju me.

² Yëjë ni cjuandaja cojo cjuajeya cojo cjuahmutacun tsëhë Nina ne, catamacjín sa ngajñi nuju.

Xuta xi vicuya cjuandacha

³ Ngayujun ni tsan ne, casahme xati cacun xi tsihindu nuju tsëhë cjuandaja rë Nina xi cuaxëtje naja. Peru quihndë ne, hacuaha sahmi ngujyë xi tsihindu nuju, cojo sa xi cuichjá cojo nuju xi cuinújuntjun ngatsë rë cjuachacun xi ha casua Nina गयाan xi macjain naja me.

⁴ Tsëhë xi tjin xuta xi cavindacha xi caxinchajñi me ngajñi nuju. Peru hatsëë nixtin ne, camahindu xcun xujun rë Nina tsëhë castigu xi cuatju me cuma. Hatuxa xuta tsehen me, xi handasa tsejen sacuaha xi tjin rë me cjuandaja rë Nina naja ne, peru vatjutaha me yëjë ni cjuatsehen xi sahmi me, hacuaha tsitjungui me ngu ni Nai naja Jesucristu.

⁵ Quihndë ne, handasa ha hyun cjuua vihi ne, cüya cuichjá cojo nuju hacutjin casahmi Nai naja. Ngu ne, xuta nangui Israel ne, handasa cavaxëtje Nai naja me tsëhë nangui Egipto ne, peru cama ngascan ne, ngajñi rë xuta nangui Israel jan ne, hacuaha casahmi me castigu xuta xi camacjaain rë tsëhë me.

⁶ Ma jo ne, ángel xi caviyijin hiscan xi cachja Nai naja xi cuiyuju ta tu cavetjuxin tsëhë cahndë rë ne, cavinchahñu me hiscan jñu, hisca xi cuechutaha nixtin xi cuichja Nai naja me castigu cuatju ángel jan cuma nu cjui nu nduva.

⁷ Hane xi ma jyan ne, xuta nandya xi hmí rë Sodoma cojo xuta nandya Gomorra cojo sa xuta xi siu tahndë rë jan ne, hacuanitjin ni cahndiin me tsëhë Nina. Tjercu casahmi me cjuatsehen xi tjin chjuunnahñu rë me. Hisca cavatjutaha sa me cjuatsehen ta ngajñi xihin ni me ne, casahmi me cjuatsehen sacuaha xi chjuunnahñu rë me xicjin me. Vëhë xi suvá sa cahndë rë nandya xi cuacun vëhë ne, siu cuaha xi ninguitsjen tsëhë castigu xi cavatju camá, xi café catí cojo ndihi rë Nina.

⁸ Hacuanitjin ni tisahmi xuta tsehen xi hinchajñi ngajñi nuju jan ta, ngajñi rë cjuatacun rë me ne, tichja cojo rë me xi catisahmi me cjuatsehen jan, xi sahmi me cjuua xi vitexa Nai naja, hacuaha xi choho catichja me tsëhë ángel xi siu cojo Nina.

⁹ Peru suvá ángel matitjun xi hmí Miguel ne, hya xi ticjanya cojo xitsehen matitjun yojo rë Moisés ne, cavetjiincacun xi choho cuichja cojo xitsehen jan ta tu cuinitjin cachja: “Nina catichjataha me ngaye.”

¹⁰ Peru xuta tsehen xi cuacun vë ne, choho chja me tsëhë yëjë ni xcusun xi vijniircu me. Hane hitsë sa chu me xi cuma rë chu ta, handasa vëe me xi hmí rë cjuatsehen ne, hatuxa sahmi me. Hane cjuatsehen xi sahmi me jan ne, vëhë xi tsinguetsun rë cjuatacun rë me.

¹¹ Jemu choho cuatju me cuma, tsëhë xi fi me ndiya tsehen sacuatjin quiji xutachanga naja Caín, sahmi me cjuatsehen ngatsë rë tujún xi jercu meje rë me sacuatjin casahmi cha Balaam, hacuaha cueya me sacuatjin cahme cha Coré, ngatsë rë xi meje cjuahaxin cha xutaxa rë.

¹² Xuta tsehen xi cuacun jan ne, ngu cjuasava me hora xi tichinutangun tsëhë cjuahmutacun xi tjin nuju cojo xingun ta, tsëhë xi hisca jinë hisca hvi me cojo nguñaja ni cjuasua, peru fahacuendaan me yo xi cajinë yo xi cajinií ta tu tsëhë suvá ni me fahacuenda me. Sacuaha yufí xi cavaain ta cavatjucjin xi cavaha rë tjo quiji ne, hacuaha cuatjin machjiriin me. Sacuaha ya xi machjiriin xi vaquín tú rë nixtin rë ne, tjune ni rë hisca tyjama rë sehe xi ne, hacuaha cuatjin machjiriin me.

¹³ Machjiriin me sacuaha tsindyu rë ndachacun xi hisca xu jima xcun xi cjan rë ne, hacuaha cuanitjin ni hisca xu jima cjuasava ngajñi rë me. Machjiriin me sacuaha machjiriin niñú xi siutaha ngahnga xi vejñaaí cahndë rë ne, hacuaha cuatjin machjiriin me. Hane castigu xi cuatju me cumá ne, xi tsajin nu tsajin nixtin xi cuma ndaya me tsëhë hiscan xi tjercu tu jñu camahani.

¹⁴ Hane ngu xutachanga nijí xi hmí rë Enoc, xi quihndindaicjin rë Adán ne, hya xi cachja me ngu cjuua xi caveya Nina cjuatacun rë me xi cuma ne, hacuaha cachja me tsëhë xuta tsehen xi cuacun vë, cuitjin cachja me: “Cahvë Nai naja xi nduva me ngajñi rë ángel rë me xi tjercu tu cjín camahani.

¹⁵ Nduva me xi cjuahachuva me ngayejen ni, sehe cuichja me mé castigu xi cuatju yějě ni xuta tsehen tsěhě yějě ni cjuatsehen xi casahmi me, hacuaha tsěhě yějě ni cjuaxi choho cachja xuta tsehen xi cuacun jan tsěhě Nina.”

¹⁶ Xuta tsehen jan ne, hatuxa choho chja me tsěhě yějě ni, hacuaha sahmi me tu cutjin xi macacun me. Sahmi yehe suvá me yojo rě me, hacuaha chja me cjuahaxi cojo xuta, tsěhě xi meje rě me xi sahmi yehe xuta me.

Conseju xi sua Judas xuta xi macjain rě Nina

¹⁷ Peru ngayujun ni tsan ne, ninguitsjun cjuaxi ha cachja apóstol tsěhě Nai naja Jesucristu,

¹⁸ xi cachja me cuitjin: “Hya xi ha jima tiña cuya Nai naja ne, hya tjin xuta xi cuejnucěě me tsěhě yějě ni cjuandaja rě Nina, hacuaha sahmi me yějě ni cjuatsehen xi cuetju tsěhě xahasen rě me.”

¹⁹ Xuta tsehen xi hinchajñi ngajñi nuju jan ne, vatěcja me ngajñi rě yějě ni ngu cjuandaja xi cuma. Tsingatahacacun ni me xi sině xi cuihi me, hane Hasen rě Nina ne, tsajin camahani rě me.

²⁰ Peru ngayujun ni tsan ne, sacuaha cjuaxi rě Nina xi ha camacjain nuju ne, nihñu ngujoyě xi catamacjain sa nuju. Tinújunyumu ha tu cutjin xi visescoo nuju Hasen rě Nina.

²¹ Nihñu cuidadu xi hacuiin nichayun cjuahmutacun rě Nina. Hacuaha tinechunyun rě nixtin xi Nai naja Jesucristu ne, cojo cjuandaja rě me ne, sua naja me cjuahñu naja xi tsajin nu tsajin nixtin xi cueyan.

²² Xuta xi jo má cacun me tsěhě cjuandaja rě Nina ne, nújun cojo rě me ne, cojo sa xi hacuiin jo cuma cacun me.

²³ Naxuntjun me sacuaha ngu xuta xi naxentjen me xi ha ndiya cueti me. Hane yahnga me ne, tjin nuju cjuayumatacun cojo rě me, peru cojo cuidadu, xi satiin nuju jyě rě me.

Tsinguijnetaha Judas cjuaxi

²⁴⁻²⁵ Ngu ni Nina xi vaxětje naja ngatsě rě Nai naja Jesucristu ne, me vėhě xi cuma sahmi cuidadu me ngayun xi tsajin xtundiya yun ngajñi rě cjuatsehen, hacuaha cuiyuju me ngayun xcun me xi cun tyjahi tyjahi xahasen nuju ne, cojo yějě ni cjuasua. Me vėhě xi tjin rě me yějě ni ngu cjuandaja, hacuaha jyě me, hacuaha ma vitexa me, hacuaha ma sahmi me, hisca xi chaja sa xi cumandaja ngasunhdě, hisca quihndě, hacuaha hisca xi cuatju xi cjuě ngasunhdě. Cuatjin jain.

Apocalipsis, cjuua xi sua cumachaya naja

Cjuua tsëhë Jesucristu xi cafehecani chini rë Juan

¹ Cjuua vihi ne, cjuua tsëhë Jesucristu xi casua Nina cojo sa xi tsingacun Jesucristu xuta ladu rë me xcusun xi hatuxa sahmí nguýjé xi cuatjú. Cjuua jan ne, ngu ángel cafehecani ná, ngahan xi hmí ná Juan, ngu mosu hndixahan rë me.

² Hane ngahan ne, tsinguixë ta cjuaquixi yëjë xcusun xi cahvë hya, xcusun tsëhë cjuua rë Nina cojo tsëhë cjuaquixi xi chja Jesucristu.

³ Jemu ndaja tsëhë me xi cuichjasun me cjuua rë xujun vihi, hacuaha jemu ndaja tsëhë me xi cuihndë me cuincha me xahasen rë me cjuua xi camahindu xcun xujun vihi, tsëhë xi ha camá tiña nixtin xi cuma chihin cjuua rë.

Cjuua xi catsihindu Juan xi cafahatsja yatu yungun xi tjin ngajan Asia

⁴ Ngahan Juan ne, tsihindú cjuua vihi xi cjuahatsja yatu yungun xi tjin ngajan nangui Asia. Chjuhunnntsun cjuandaja cjuajeya tsëhë Nina, me xi hacuí, hacuí ni me xi cavejña me hatsëë, hacuaha hacuí ni me xi cuejña cuaha, hane cojo tsëhë Hasen rë me xi siu xcun me xi hacuí sacuaaha yatu hasen.

⁵ Hacuaaha cojo tsëhë Jesucristu, me xi má testigu cjuaquixi, me xi tjun tjun cavuya cjuahñu tsëhë ngajñi rë nima, me xi hacuaaha matitjun tsëhë yëjë ni xuta xi matitjun tsëhë ngasunhndë, hane me xi hmucacun naja hacuaaha cavaxëtje naja tsëhë jyë naja hya xi cavanga jni rë me xi cahme me.

⁶ Hacuaaha Jesucristu ne, casahmi me xi ngayaan ne, satë naja xi cuitexan ne, hacuaaha cuma yaan sacuaaha nahmi xi chjahancuendan Nina, Nina xi hacuaaha má me nahmi rë me. Me vëhë ne, catimá jyë hnga me hacuaaha catimá titjun me yëjë ni nu, yëjë ni nixtin. Cuatjin jain.

⁷ ¡Nutsujun, ta cuinduva me cojo yufí! Hacuaaha yëjë ni tuxcun ne, scuëë rë me. Hisca cojo me xi cahndiin tsëhë me ne, scuëë rë me. Hane yëjë xuta tsëhë jimangu tjë rë xuta ngasunhndë ne, cuatju me cjuandusin ngatsë rë me. ¡Cuatjin cumá! ¡Cuatjin jain!

⁸ Cuitjin chja Nina: “Ngahan sacuaaha letra xi vetsihin cojo A ne, vijnetaha cojo zeta. Hacuí ni ngahan xi ntsacu vetsihin. Ngahan xi tejjña, hane ngahan xi vijnetaha. Cavéjña hatsëë, hacuaaha cuejña cuaha. Yëjë ni má sahme.”

Juan ne, cavutsejen me xi jyë hnga Jesucristu

⁹ Ngahan Juan ne, xingun má ngahan, tangun satë naja cjuañihi, tangun nechan ngahma gobiernu hacuaaha tangun caa naja ngatsë rë xi mantugacun cojo Jesús. Ngahan cavitejñataha ngu nandya xi hmí rë Patmos xi vetjucaa tsëhë ndachacun. Ngajan tejjñataha ngatsë rë xi cachjá cjuua rë Nina cojo tsëhë cjuaquixi xi chja Jesús.

¹⁰ Hya xi camá ne, nixtin xi chjaharcun Nina ne, Hasen rë Nina ne, cavisehentë cjuatacun naha. Hora vëhë ni ne, tsëhë taha ngaxtun ne, cahndë ngu xta xi jemu hñu camahani nuhya rë, nuhya rë sacuaaha xta rë tyjo

¹¹ hane cuitjin cachja:

—Ngahan sacuaaha letra xi vetsihin cojo A ne, vijnetaha cojo zeta. Hacuí ni ngahan xi ntsacu vetsihin ne, hacuí ni ngahan xi vijnetaha. Chjehe ngu xtë xujun ne, nihndi xcusun xi tichutsijin hane sehe ningatjin catahatsja xuta yungun xi siu yatu nandya Asia xi cuicun vi: Efeso, cojo Esmirna, cojo Pérgamo, cojo Tiatira, cojo Sardis, cojo Filadelfia cojo Laodicea. —Cuitjin cachja xta jan.

¹² Hya xi camá ne, cavuya xi scutséjen yo xi tichja cojo ná, peru xi tu cavuya ne, xi cahvë ni ne, yatu candeleru xi camá tsëhë oro.

¹³ Hane vasencia rë candeleru jan ne, jiyajñi ngu xihin xi tsejen sacuaaha Quihndi rë Xuta Jain. Yaja me ngu tsjian tjin të ni xi vechu hisca ntsacu me, hane tjihñucja hiscan ndanisin rë me cojo ngu pañu nduju camá cojo nachjun tsëhë oro.

¹⁴ Hane rcu cojo tsjarcu me ne, tyava tsejen sacuaaha tsejen tyava tsja rë chu tsánga o sacuaaha tsejen hñchan xi vixu. Hane tuxcun me ne, tsejen sacuaaha ndihí xi ña vitjen.

¹⁵ Ntsacu me ne, seti sacuaaha quicha sine xi catsicjë ndihí xutsë rë; hane xta rë ne, nuhya rë sacuaaha xta rë nandan xi tjemu hñu vanga.

¹⁶ Tsja xi ladu quixi ne, vahangui me yatu niñú. Hane tsëhë hntsua me ne, vetju ngu espada yuju xi vatë taha xcun cojo taha ngaxtun. Hane xcun ne, tsejen sacuaaha tsuhi hya xi sua hasen cojo yëjë ni ngahñu rë.

¹⁷ Ngajan xi ngahan ne, xi cahvë xcusun rë me ne, caticja taha ntsacu me sacuaaha xi cahme ngahan. Ngajan xi cavisane me tsja me ladu quixi xcun yojo naha, sehe cachja me cojo ná cuitjin:

—Xi carcuin. Ngahan xi ntsacu vetsihin ne, hacui ni ngahan xi vijnetaha.

¹⁸ Ngahan, quicun ngahan. Cavéya, peru quihndé tacunntsa llavi tséhé cjuaveya cojo tséhé Hades, cahndé hiscan siu nima.

¹⁹ Hindé ngaye ne, nihindi xcusun xi cahye vi cojo xcusun xi tijima quihndé cojo xcusun xi sehe cumá.

²⁰ Sacuaha yatu niñú xi cahye hntsa ladu quixi naha cojo yatu candeleru xi camá tséhé oro jan ne, cuitjin vijne cjuatacun hma jan: yatu niñú jan ne, hacui ángel xi sua cumachaya rê xuta rê yatu yungun jan cjua rê Nina, hane yatu candeleru jan ne, hacui yatu yungun jan.

2

Cjua xi cjuahatsja yungun ngajan nandya Efeso

¹ Hindé nihindi cjua vi xi cjuahatsja ángel rê yungun ngajan nandya Efeso. Cuitjin nihindi: “Cjua vihi ne, cjua rê cha xi vahangui yatu niñú jan tsja ladu quixi cha hacuaha tsujihiya cha vasencja rê yatu candeleru jan xi camá tséhé oro:

² Ha ndaja hvé tséhé xa nuju sacuaha cjuandaja xi nihñu, jemu chja tivatjun peru ticaa nuju titsangun nduju cojo. Hvé xi tuun rê xuta tsehen cahndé ta, nichuvun cjuatacun rê xuta xi vindacha me sacuaha xi má me apóstol. Hane camachaya nuju xi tu vindacha ni me.

³ Hacuaha titsangun nduju hacuaha ticaa nuju cojo cjuacjintacun xi tivatjun ngatsé rê xi veyunnangun ñihi naha, hacuaha machuvaain cjuatacun nuju ngajñi rê cjuacjintacun jan.

⁴ Peru cojo yějé sa ne, tjin ná vihi condra nuju ta, hacuain jemu nihmutacún ná sacuaha xi canihmutacún ná hya xi titjun camangutacún cojo ná.

⁵ Véhé xi ninguitsjun hacutjin cavatjun hya xi tjin nuju cjuahmutacun véhé, hane nindeyun cjuatacun nuju ne, cuyun nihñu nga xcusun sacuaha xi canihñu titjun. Cuatjin nihñu ta, sa tsajin ne, cuinduvá tjéngé nuju ne, cuaxéxen candeleru xi saté nuju tséhé cahndé rê.

⁶ Peru hacuaha tjin sa nuju ngu xcusun xi ndaja tsujun ta, ndaja tsujun tséhé xi choho hyun xcusun xi sahmi xuta xi tjengui me cjuachacun tséhé Nicolás, ta cjuachacun jan ne, hacuaha cojo ngahan ne, choho hvé.

⁷ Yo ngayun xi tjin nuju cjuasua xi cuinuhyun cjua xi chja Hasen rê Nina cojo yungun jan ne, ndaja tetuhunrcun. Cuitjin chja: Yo xi scaa rê cjue xcun tséhé cjuatsehen ne, suá rê cahndé xi siné tuhaxi xi sua cjuahñu xi vaqui rê ya xi secun cahndé ndajiyi xi tséhé Nina.”

Cjua xi cjuahatsja yungun ngajan nandya Esmirna

⁸ Hindé nihindi cjua vi xi cjuahatsja ángel rê yungun ngajan nandya Esmirna. Cuitjin nihindi: “Cjua vihi ne, cjua rê cha xi matitjun hacuaha matjengui. Cjua rê cha xi cahme jan hane hacuaha cavuya nga cjuahñu. Hacui cjua vihi:

⁹ Ha hvé cjuacjintacun xi tivatjun cojo cjuayuma nuju. Peru ngajñi rê véhé ne, ¡china ngayun! Hacuaha hvé cjua chjataha rê xuta vé xi chja me xi xuta tjé rê Israel, o sa xuta rê Nina, má me, peru quixiin ta, xuta ladu rê Satanás má me.

¹⁰ Xi carcuun tséhé xcusun xi cúatjun cuatjin. Naain ne, tsitsehen cha xuta cojo sa xi scandiya me yahnga ngayun ndavaya sehe chjahachuva nuju. Hacuaha tsujihiya tjengui nuju xuta jan cojo cjuañihi xcun té nixtin ni. Peru tangunnduju cojo cjuatacun nuju handasa xi cueyun, hane ngahan ne, suá nuju corona rê cjuahñu.

¹¹ Yo ngayun xi tjin nuju cjuasua xi cuinuhyun cjua xi chja Hasen rê Nina cojo yungun jan ne, ndaja tetuhunrcun. Cuitjin chja: Yo me xi scaa rê cjue xcun ne, tsajin mé choho cuatju me tséhé cjuaveya xi majo.”

Cjua xi cjuahatsja yungun ngajan nandya Pérgamo

¹² Quihndé nihindi cjua vi xi cuahatsja ángel rê yungun ngajan nandya Pérgamo. Cuitjin nihindi: “Cjua vihi ne, cjua rê cha xi tjin rê quicha yuju, xi vaté taha xcun cojo taha ngaxtun. Cuitjin chja cha:

¹³ Ha hvé cahndé jani hisca nechuntuhun, ta cahndé véhé ne, cahndé hñu xi vitexa Satanás. Peru cojo yějé sa ne, ndaja mangutacún cojo ná. Handasa hya xi catsiquehen me Antipas, me xi catsinguixi cjuaquixi naha ngajan cahndé hñu xi vitexa Satanás ne, hisca hya ne, hacuain cavitijayun ndiya rê xuta xi macjain rê me ngahan.

¹⁴ Peru hacuain yějé tsujun ndaja ta, tjin ná ngu jo xcusun condra nuju ta nijyuntacún tséhé ngu jo me ngajñi nuju xi tjengui me cjuachacun rê cha Balaam. Cha véhé catsingacun cha Balac chuva rê hacutjin tsitsehen cha xuta nangui Israel nixtin hatséé. Hane casahmi me jyé xi cajiné me yojo tséhé cjuatjo rê nina ndyojo, hacuaha xi casahmi me cjuatsehen xi saté rê cjuachacun jan.

¹⁵ Hane hacuanitjin ngayun, ta ngajñi nuju siu me xi hacuaha tjengui rë cjuachacun jan, cjuachacun rë cha Nicolás.

¹⁶ ¡Nindeyun cjuatacun nuju! ta, sa tsajin ne, ha nduvá tjëngë nuju, hane sahme si cojo rë me xi cuacun vë cojo quicha rë cjuaxi vetju ntsuva.

¹⁷ Yo ngayun xi tjin nuju cjuasua xi cuinuhyun cjuaxi chja Hasen rë Nina cojo yungun jan ne, ndaja tetuhunrcun. Cuitjin chja: Yo xi scaa rë cjue xcun ne, suá rë comida cjuarcun xi hmí rë maná xi jiyahma, hacuaha suá rë ngu ndyojo lihndi tyava hiscan camahindu ngu ñihi xatsë, ngu ñihi xi tsajin yo vëë rë, ta suva me xi cjuahatsja rë ne, suva ni me vëë me.”

Cjuaxi cjuahatsja yungun ngajan nandya Tiatira

¹⁸ Hacuaha nihndi cjuaxi vihi xi cjuahatsja ángel rë yungun ngajan nandya Tiatira. Cuitjin fi cjuaxi: “Vihi cjuaxi rë Quihndi rë Nina Jain, me vëhé ne, tuxcun me, sacuaha ndihi tsejen, hane ntsacu me sacuaha quicha sine xi catsicjé ndihi xutsë rë:

¹⁹ Ha machaya ná tsëhé xa sacuaha cjuandaja xi nihñu, sacuaha cjuahmutacun nuju, cojo xi mangutacún, hvë xa xi tinihñu cojo sa xi ndaja cjuecani nuju. Cjuandaja xi nihñu quihndé ne, quisun sa xi cuma rë xi canihñu ntsacu cavetsihin.

²⁰ Peru cojo yëjë sa ne, tjin ná vihi condra nuju ta, nijyuntacún tsëhé na chjuun Jezabel vë, na xi chja suva na xi profeta má na. Na vëhé ne, cojo cjuachacun rë na ne, tsinguetsun na hacuaha tsitsehen na xuta ladu naha cojo sa xi sahmi me cjuatsehen ngajñi xicjin ni me, hacuaha siné me yojo rë chu xi cahme sacuaha ngu cjuatjo rë nina ndyojo.

²¹ Na vëhé ne, casuá ran cahndé xi tsindeya na cjuatacun ran, peru mijí choho cuma ran tsëhé xcusun tsehen rë xi sahmi na cojo xicjin na.

²² Vëhé xi tsijaña rë na xcun ngu cahndé tsëhé cjuahmu, hane me xi sahmi cjuatsehen cojo na ne, suá rë me ngu cjuañihi jyë, sa tsajin choho cuma rë me hane cuindeyaain cjuatacun rë me tsëhé xcusun chocun rë na xi ctsitsehen rë me xi casahmi me cjuatsehen jan.

²³ Hane me xi má sacuaha quihndi tjë rë na ne, cjué tsiquéhen me, cojo sa xi cuatjin ne, cumachaya rë yëjë sa xuta yungun naha xi ngahan ne, ndaja tsichúva cjuatacun cojo xahasen nuju, hane suá nuju jima ngu yun tucu saté nuju tsëhé xcusun xi canihñu.

²⁴ Peru yahnga ngayun xuta Tiatira xi hacuain cojo ngayun cachjuhunntsun cjuachacun jan ne, ngayun hyuun mé xi vijne cjuaxi cahntsua nungun tsëhé Satanás. Ngayun ne, ndastu mé sa cuichjá xi nihñu ta,

²⁵ Xi sahmi nguyjé ne, xi cuangunndujun tuhunhñu mé xi tjin nuju tsëhé Nina hisca hya xi nduvá ngahan.

²⁶ Yo xi scaa rë xi cjue xcun, hacuaha sahmi chihin me cjuandaja naha hisca xi cuijnetaha ne, suá rë me ngahñu xi sahmi me gobiernu rë nanguicjín.

²⁷ Hane me vëhé ne, cuitexa rë me xuta nanguicjín jan cojo ngahñu xi tjin rë me, sacuaha cojo ngu cuarta xi camá tsëhé quicha, hane sacuaha cuma xuva rë ngu tji xi nihndé camá ne, cuatjin cumá cojo xuta cjin jan. Sacuaha ngahan ne, cafahántsa xa jan tsëhé nahmi naha, cuanitjin suáxa rë me xi sahmi me gobiernu.

²⁸ Hane suá rë me hasen rë niñú seti xi vetjucaa nguitajñu.

²⁹ Yo ngayun xi tjin nuju cjuasua xi cuinuhyun cjuaxi chja Hasen rë Nina cojo yungun jan ne, ndaja tetuhunrcun.”

3

Cjuaxi cjuahatsja yungun ngajan Sardis

¹ Cjuaxi vihi nihndi cojo sa xi cjuahatsja ángel tsëhé yungun ngajan nandya Sardis. Cuitjin fi cjuaxi: “Cjuaxi vihi xi cachja me xi tsuvangui rë yatu hasen rë Nina cojo yatu niñú: Hvë xa nuju. Tjin cjuaxi nuju xi quicun yun, peru quixiin ta hvë ta cahme yun.

² ¡Catasca nuju! Mé tsujun xi siu quicun handasa ndiaya cueya ne, tuhun rë ngahñu ta, xi má rë Nina naha ne, xa xi nihñu ne, hacuain tsejen sacuaha xi ha camá chihin xa jan.

³ Tetuhunrcun nguyjé ni cjuaxi ha cachjuhunntsun tsëhé Nina, tangunndujun cojo, hane nindeyun xcusun nuju. Cuatjin nihñu ta, sa xi cuascaain rë cjuatacun nuju ne, sehe cjué tjëngë nuju sacuaha cjue tjengui rë xuta ngu cha chëjë, ta hyuun hora xi cuinduva tjëngë nuju.

⁴ Peru cojo yëjë sa ne, tjin ngajñi nuju ngu jo xuta ngajan Sardis xi cjëé tsinguetsun me tsjian rë me cojo cjuatsehen. Me xi cuacun vë ne, cojo ná tsujyihya me; hane cojo ngahan ne, cuaja me tsjian tyava tyahi, tsëhé xi cuatjin ndatjin vechu chuva rë xi casahmi me.

⁵ Me xi scaa rë cjue xcun ne, cojo me nicaja rë me tsjian tyava, sacuaha me xi cuacun vë. Hacuaha tsajin nixtin xi scuñu ñihi rë me tsëhé libru xi yaha ñihi rë xuta xi sacu rë cjuahñu ta, hisca cueyanangé ñihi rë me xcun Nahmi naha cojo xcun ángel rë me.

⁶ Yo ngayun xi tjin nuju cjuasua xi cuinuhyun cjuaxi chja Hasen rë Nina cojo yungun jan ne, ndaja tetuhunrcun.”

Cjua xi cjuahatsja xuta rë yungun ngajan nandya Filadelfia

⁷ Cjua vihi nihndi cojo sa xi cjuahatsja ángel tsêhë yungun ngajan nandya Filadelfia. Cuitjin fi cjua: “Cjua vihi ne, cjua rë me xi ndastu mé cjuatsehen tjin rë, hacuaha quixi me. Me vëhë ne, tacuntsja me llavi xi casatë rë nima David, me xi cavitexa. Hane cahndë xi vuxaha me jan ne, tsajin yo xi cuma cuechja. Hane sa xi vechja me ne, tsajin yo cuma scuxaha.”

⁸ Cuatjin fi cjua: “Hvë xa nuju. Casuá nuju cahndë xi tixaha tingotjo xi cumá nuju, hane tsajin yo cuma cuechja xi cumá nuju. Hacuaha hvë ta, chuva má ngahñu nuju, peru handasa cuatjin ne, cavetjun cjua naha hacuaha cjëë cjuahmu ñihi naha.

⁹ Tuhun cjuasua ta, chutsujun mé cumá rë xuta jan xi vihndë me tsêhë Satanás. Xuta jan ne, chja me xi tjë rë Israel má me, peru hacuiin xuta naha me ta, xuta ndacha me. Sahme xi xuta jan ne, cuinduva me cuiticjacun me ntsacun, hane scuëë me ta ngahan ne, meje ná ngayun.

¹⁰ Cavetjun cjuajeya xahasen nuju sacuaha xi ngahan catsingácun nuju. Ngatsë rë vëhë ne, ngahan ne, hacuaha cuetjo nuju cojo sa xi satiin nuju cjuacjintacun tsêhë hora xi chjahachuva rë xuta. Hora vëhë ne, ha tacun xati xi nduva xcun jinguyë ni ngasunhndë, hane hya chjahachuva rë jinguyëjë ni me.

¹¹ Ngutjen ni cjuëhë. Tangunndujun cojo cjua xi ha camachaya nuju tsêhë, cojo sa xi tsajin yo cjue cojo corona xi satë nuju.

¹² Yo xi scaa rë cjue xcun tsêhë cjuatsehen, ngahan ne, sahme xi cumá me sacuaha xihndë xi secun vasencia rë yungun xi vaniji hai rë yungun rë Nina. Hane quihndë cuetjuxiin me. Setaha rë me ñihi rë Nina naha cojo ñihi rë nandya rë Nina, Jerusalén xatsë. Nandya jan ne, sahmi Nina xi nduvajne tsêhë ngahnga. Hacuaha hisca setaha rë me ñihi xatsë naha.

¹³ Yo ngayun xi tjin nuju cjuasua xi cuinuhyun cjua xi chja Hasen rë Nina cojo yungun jan ne, ndaja tetuhunrcun.”

Cjua xi cjuahatsja yungun ngajan Laodicea

¹⁴ Cjua vihi nihndi cojo sa xi cjuahatsja ángel tsêhë yungun ngajan nandya Laodicea: “Cjua vihi ne, cjua rë me xi cjuaquixindaja, cjua xi chja me ne, quixi hacuaha cuatjin jain. Ngatsë rë me vë jan ne, cavetjucaa yëjë xi casahmi Nina. Cuitjin fi cjua jan:

¹⁵ Ndaja machaya ná hacutjin nihñu xa nuju. Hacuuiin jemu ndaja peru hacuaha hacuiin jemu chojyihí, tu vasentjin siu. Xi má ná ne, hitsë sa ndaja sa xi hatuxa ndaja o sa xi hatuxa chojyihí.

¹⁶ Ngayun ne, ha maji sa tu ngu tsë vë ngayun, peru ngayun ne, jemu va xcusun nuju, vëhë xi cuaxëxin nuju sacuaha xi cuëhë natya cojo ntsuva.

¹⁷ Vihi cjua xi nújun: Ngayin ne, nchina ngayin. Jercu cavetjin tujún hane tsajin mé machaja ni. Cuatjin nújun. Peru machayin nuju tsêhë cjuaquixi ta, xi quixi ne, jemu chojyihí tsujun, cojo cjuatsehen nuju, yuma yun, rcá yun, hane hacuaha quixti ngayun.

¹⁸ Vinchajyë nuju xi chuhun tsahan. Tjin ná oro ndaja xi catsicjë ndihí xutsë rë, hane cojo vëhë cuma nchina jain yun. Tjin ná tsjian tyava xi cuma chujun cojo sa xi hacuiin tu yo ni scuëë cjuasava nuju xi quixti ngayun. Hacuaha tjin ná rqui xi cuincha tuxcun, hane cumatsejen jain nuju.

¹⁹ Tichjátaha nuju ta, hya xi tjin yo me xi ngahan meje ná me ne, chjátaha rë me hacuaha vicuya rë me. Tsêhë vëhë ne, catamachinitacun hane choho catama nuju, nindeyun xcusun nuju.

²⁰ Nguehe tejña xi tichjá cojo nuju. Tu yo ni xi cuihndë xta naha ne, sehe sua cahndë ne, ngahan ne, cuisehen ngajan, hacuaha sinë niñu cojo me, hane me vëhë ne, sinë me cojo ná ngahan.

²¹ Yo ngayun xi scaa nuju cuangun xcun tsêhë cjuatsehen, suá nuju cahndë xi cuinechun cojo ná cahndë hñu naha. Cuatjin cumá cojo nuju tangun ni sacuaha xi ngahan ta, hacuaha cacaa ná cëjë xcun, hane tejña cojo Nahmi naha cahndë hñu rë me.

²² Yo ngayun xi tjin nuju cjuasua xi cuinuhyun cjua xi chja Hasen rë Nina cojo yungun jan ne, ndaja tetuhunrcun.”

4*Cavëë Juan cahndë rrun ngajan ngahnga*

¹ Hya xi cavatju vihi ne, cahvë xi ngajan ngahnga ne, tsejen ngu tingotjo xi tixaha. Hane xta rë me xi cahndë xi cachja cojo ná titjun jan xi nuhya rë sacuaha nuhya rë ngu tyjo, xta vëhë cachja cojo ná cuitjin:

—Ndoventji nguehe sehe tsingácun ri xcusun xi sehe cumá.

² Hora vëhë ne, catsuva ná ngahñu rë Hasen rë Nina, ngajan cahvë xi ngajan ngahnga ne, tacun ngu cahndë rrun cojo ngu me xi tacun xcun.

³ Hane me xi tacun xcun jan ne, xcusun rë me ne, seti tsejen sacuaaha ndyojo seti xi hmí rë jaspe o cornalina. Hane ngu yejña sacuaaha ndyojo seti xi hmí rë esmeralda, vëhë vïndee rë cahndë rcun jan.

⁴ Tahndee rë cahndë rcun jan ne, siu sa can ñuju cahndë rcun, hane xcun jan ne, siu can ñuju xuta changá. Me vëhë ne, yaja me tsjin tyava hacuaaha hinchasun rcu me corona tsëhë oro.

⁵ Tsëhë cahndë rcun jan ne, vatë ndihichuhún hacuaaha tsingá chuhun. Hacuaaha xcun cahndë rcun jan ne, ti ndihi rë yatu lámpara xi hacui yatu Hasen rë Nina.

⁶ Hacuaaha nangui xcun cahndë rcun jan ne, tsejen sacuaaha ngu ndachacun tsëhë vidriu xi hasen sacuaaha hasen ndyojo tsin. Hane tsëhë tahndee rë cahndë rcun jan ne, chuva ngu yuju rë, siu ñuju xcusun xi quicun. Hane xcusun jan ne, yaja tuxcun jingujyë yojo rë, sa taha xcun, sa taha ngaxtun.

⁷ Ngu xi quicun jan ne, xcusun rë ne, sacuaaha chu xa tsejen. Xi majo ne, sacuaaha ndyaja, hane xi má jyan ne, sacuaaha xcun xuta jyihi xcun. Xi má ñuju ne, sacuaaha ngu chu jya xi tivitjen chu, cuatjin tsejen.

⁸ Jima ngu xi quicun jan ne, tjin jyun tyunga rë. Hane jingujyë ni tsëhë yaja tuxcun, taha xcun cojo taha ngaxtun. Hane xi quicun jan ne, sa nixtin, sa nixten, sejiin ta, chja cuitjin: Tyjahi, tyjahi, tyjahi camahani Nina xi jemu hñu cja.

Nina tacun me, cavejña me hatsëë, hacuaaha cuejña cuaha me.

Cuitjin chja.

⁹ Hane sahmi jyë hnga ñihi rë Nina hacuaaha sua nacuechji rëhë hacuaaha vaxëndaja rë Nina xi tacun xcun cahndë rcun jan, Nina xi tacun cuaha me yëjë nu, yëjë nixtin. Hane jimangu ndiya xi vaxëndaja rë Nina ne, hora hya ne,

¹⁰ can ñuju xuta changá xi siu jan, viticjxcun me xcun me xi tacun cahndë rcun jan, hane faharcun me me xi tacun nu cju ni nduva. Hacuaaha xuta changá jan ne, candisun me corona rë me xcun cahndë rcun jan, sehe chja me cuitjin:

¹¹ Ngayun Nai niji, ngayun Nina niji,

vechu chuva rë xi cuma jyë cuma hnga yun hacuaaha sacu nuju ngahñu cja.

Ngayun canihñu yëjë ni xcusun,

hane ngatsë rë cjuandaja nuju siu yëjë ni hacuaaha camá yëjë ni.

5

Xtë xujun cojo yatu sellu

¹ Sehe cahvë xi tsja ladu quixi me xi tacun xcun cahndë rcun jan, yaha me ngu xtë xujun xi camahindu xcun cojo ngaxtun, hacuaaha xujun jan ne, tine rë yatu sellu.

² Hane hya ne, cahvë ngu ángel xi jemu hñu cja, hane tisiquindë cojo yëjë ni ngahñu rë cja vihi:

—¿Yo ngayun xi vechu chuva rë xi cuicheyun sellu rë sehe nixingun xtë xujun vihi?

³ Hya xi camá ne, ndastu yo, sa xi siu ngahnga, sa xi siu nangui, o sa xi siu ngahma nangui, ndastu yo cavetjucacun xi tsixinga xtë rë xujun jan, o sa xi scutsejen mé xi chja.

⁴ Hane ngahan ne, cajihnda nguñajacacun, tsëhë xi casacuiin yo xi cuechu chuva rë xi tsixinga xtë rë xujun jan, sehe scutsejen mé xi chja.

⁵ Ngajan xi ngu xuta changá jan ne, cachja me cojo ná cuitjin:

—¡xi cachjihndiin sa! Chutsijin ta, me xi hmí rë Chu Xa tsëhë tjë rë cha Judá ne, me xi cavetjusehen tsëhë David xi cavitexa hatsëë ne, me vëhë caaca rë me quiji me xcun. Hane me vëhë cuma tsixinga me xtë rë xujun cojo yatu sellu rë.

Cristu, ta xuta matitjun má me, cafaha me xtë xujun

⁶ Xi cavutsejen, ngajan secun vasencja rë cahndë rcun jan cojo tahndee rë, ngajñi rë ñuju xi quicun jan cojo xuta changá jan, ngajan secunhñu ngu xihin sacuaaha Chu Tsánga, xi tsejen sacuaaha ngu chu xi cahme. Me xi sacuaaha tsánga jan ne, tjin yatu ndyaja rë cojo yatu tuxcun xi hacui yatu hasen rë Nina xi visehen jingujyë ni ngasunhndë.

⁷ Hane me xi sacuaaha tsánga jan ne, canduva me cafaha me xtë rë xujun tsëhë tsja quixi me xi tacun xcun cahndë rcun jan.

Xuta changá ne, faharcun me Jesucristu

⁸ Hane hora xi cafahatsja me xtë rë xujun jan ne, catsiñuju xcusun xi quicun jan cojo can ñuju xuta changá jan ne, caticjxcun me xcun Tsánga jan. Jimangu me ne, yaha me ngu arpa hacuaaha jimangu me hinchangui tsja me tyucu ndixuhi tsëhë oro xi quitsë rë cojo tyjungunsa. Hane tyjungunsa jan ne, hacui oración rë me xi nguñajacacun macjain rë me.

⁹ Hane me vëhë ne, tisë me ngu sun xatsë xi cuitjin fi cja rë:

Vechu chuva rë xi chjuhun xtë rë xujun vë, hane nuxuhun sellu rë;

tsëhë xi catsiquehen me yun,
hane cojo jni nuju xi cavanga ne, cachuhun xi cumá rë Nina
xuta tsëhë yëjë ni tjë, yëjë ni hne, yëjë ni nandya, cojo yëjë nación.

¹⁰ Hacuaha ngayun ne, canihñu xi xuta jan ne, cumá me xuta xi vitexa me,
hacuaha cumá me sacuaha nahmi xi cjuahancuenda rë Nina xi faharcun me,
hane cuitexa me nguehe xcun nangui.

Cjín ángel ne, faharcun rë Jesucristu

¹¹ Sehe cavutsejen jemu cjín camahani ángel xi cavindee rë cahndë hñu hiscan siu xcusun
xi quicun jan cojo xuta changá jan. Hane tjín xqui sacuaha tsëhë të mil ndiya xi të mil.
Hacuaha cahndë xta rë ángel cjín jan

¹² cachja hñu cuitjin:

Me xi má Tsánga xi catsiquehen xuta me ne,
vechu chuva rë xi cjuahatsja me ngahñu xi cuitexa me,
cojo cjuanchina, cojo cjuahasen,
hacuaha hñu cumá cjuá rë me, tjín rë me cjuandaja rë xuta, cuma jyë hnga me hane yëjë
ni me ne, tsinchacuntihin rë me.

Yëjë ngarca ni ne, faharcun rë Jesucristu

¹³ Sehe cahndë xi nguyëjë ni xi siu ngahnga cojo nguyëjë ni xi siu ngasunhdë cojo
nguyëjë ni xi siu nguilha nangui cojo ngajñi ndachacun, yëjë ngarca xi cuacun vë ne,
tichja cuitjin:

Cuitjin cumá tsëhë me xi tacun cahndë rcun hacuaha cumá tsëhë Tsánga jan:
¡Catama tsëhë me xi tsinchacuntihin rë me, xi chjaharcun rë me, xi cuma jyë hnga me, xi
tjin rë me ngahñu!

¡Cuatjin catama me tsëhë me nu cjui nu nduva!

¹⁴ Hane catsiñuju xcusun xi quicun jan ne, cachja cuitjin:

—¡Cuatjin jain!

Hane xuta changá jan ne, caticjxcun me sehe cafaharcun rë me.

6

Sellu tjín

¹ Cavutsejen ngahan hya xi Tsánga jan ne, cavuxaha me ngu sellu tsëhë yatu sellu jan.
Hane tsëhë catsiñuju xcusun xi quicun jan ne, cahndë ngu xta xi nuhya rë sacuaha xi
faneya. Cuitjin cachja:

—¡Ndo!ve!

² Hane cavutsejen xi cavetjutsejen ngu naxin tyava. Hane me xi quisun rë chu jan ne,
yaha me ngu yanchijnu, sehe casacu rë me ngu corona hane cavetju me sacuaha ngu cha
xi cjue sahmí si xi tjín ngucacun cha xi scaa rë cha xi cjue cha xcuni.

Sellu xi majo

³ Hane hya xi cavuxaha Tsánga jan sellu xi majo ne, cahndë ta, xcusun xi majo xi quicun
jan ne, cajindaya cuitjin:

—¡Ndo!ve!

⁴ Ngajan cavetjutsejen ngu nga naxin xi hani hñu xcusun ru. Hane me xi quisun rë chu
vë ne, ngu me xi casatë xa rë xi cjuahaxin me cjuajeya xi tjín nangui, cojo sa xi xuta ne,
tsiquehen xicjin me ngajñi rë me. Hane suva me vëhé ne, cafahatsja me ngu quicha jyë.

Sellu xi majyan

⁵ Hya xi cavuxaha me sellu xi majyan ne, cahndë xcusun xi quicun xi majyan jan, hane
cuitjin cachja:

—¡Ndo!ve!

Hane cavutsejen xi cavetjutsejen ngu naxin jma. Hane me xi quisun rë chu vë ne,
yahatsja me ngu nisu chuva.

⁶ Sehe cahndë sacuaha ngu xta xi vetju tsëhë ngajñi rë catsiñuju xcusun xi quicun jan xi
cachja cuitjin:

—Ngu ni kilu trigu sacu chjí rë mosu, o sa jyan kilu ni cebada sacu rë me; peru aceite cojo
xan rë uva ne, cumachajjin.

Sellu xi má ñuju

⁷ Hane xi cavuxaha me sellu xi má nuju ne, cahndë xcusun xi quicun xi má nuju jan, hane
cuitjin cachja:

—¡Ndo!ve!

⁸ Hane cavutsejen xi cavetjutsejen ngu naxin xi jemu va jyihi. Hane me xi quisun rë chu jan ne, Cjuaveya hmi rë me, hane tjengui tiña rë me, me xi hmi rë Hades, cahndë hiscan xi má hasen rë nima castigu. Hane me vëhë jan ne, tjin rë me cahndë xi tsëhë ngu tsëhë ñuju rquí xuta ngasunhndë xi cuma tsiquehen me ngu rquí vë cojo espada o cojo jindya o cojo chíhin o sa xi cojo chu cjan rë xi tjin xcun nangui.

Sellu xi má hñu

⁹ Hya xi catuxaha sellu xi má hñu ne, ngajan ngahma rë ngasunscun ne, cahvë hasen rë nima xi catsiquehen xuta ngatsë rë xi camacjain rë me cjua rë Nina cojo ngatsë rë cjuaquixi rë me xi casua me.

¹⁰ Me vëhë ne, cajindaya me cachja me cuitjin:

—Ngayun Nai rë yëjë ni, jemu tyjahi yun, quixi cjua nuju. ¿Janihya nihñu cuendun jyë rë xuta xi siu me xcun nangui, hane nihñu ngojo jni niji? —Cuatjin cachja me.

¹¹ Ngajan xi cafahatsja me jimangu me ngu tsjian tyava, hane cafaha me cjua xi cuejñajyuu me ngu jo nixtin sa. Vindeya sa rë hisca hya xi cumachihin xqui rë xuta ladu rë me cojo me xi hacuaha tangun cueya sahmi xuta sacuaaha cavatju me suva me.

Sellu xi má jyun

¹² Hacuaaha cavutsejen hya xi cavuxaha me sellu xi má jyun. Hya ne, jercu cjuachan cafani nangui. Tsuhi ne, camá jma. Jemu va jyihi camá, sacuaaha ngu tsjian jma. Hane sá xatsë ne, camá hani sacuaaha jni.

¹³ Hane niñú tsëhë ngahnga ne, cavixu xcun nangui sacuaaha vixu tu rë ya higo hya xi vanga tjo hñu.

¹⁴ Ngahnga ne, cafëya sacuaaha ngu xujun të xi catsijeyu, hane hisca tjin ngu naxi o ngu nangui xi hinchava sencia rë ndachacun ne, catjune rë cahndë rë.

¹⁵ Ngajan xi xuta xi vitexa me ngu nangui, cojo yahnga me xi cojo me vitexa me, cojo xuta nchina, cojo sindadu capitán, cojo xuta xi hñu cjua, cojo yëjë sa xuta, sa xuta xi caxteña o sa xuta xi ndaya tjin, nguyëjë ni me quiji cavangahma me cahntsua nguigo cojo ngajñi naxindya rë nguijña cha.

¹⁶ Sehe cafehýataha rë me nguijña cojo naxindya jan cuitjin:

—¡Catixusun niji cojo sa xi tinchunhmu niji! Cuatjin cuma cuinechinhmi tsëhë xcun me xi tacun cahndë rcun hane satiin niji cjuaxti rë Tsánga jan.

¹⁷ Cuatjin cumá ta cavechu nixtin xi jercu choho cumá ngatsë rë cjuaxti rë me, hane ¿há tjin yo scaa rë cojo?

7

Xuta xi macjain rë Nina

¹ Xi cavutsejen vihi ne, cahvë ñuju ángel xi hinchacun quixi catsiñuju yuju rë ngasunhndë. Hane ángel jan ne, casuaain cahndë xi cuanga catsiñuju tjo xi vanga ngasunhndë ta, hisca xi ngu tjo ne, cuangaain xcun nangui, o xcun ndachacun, o hisca rcu ngu ya.

² Sehe cahvë ngu ángel xi hacjahi. Hane camiji ángel jan hiscan xi vetjucaa tsuhi, hacuaaha yaha ángel sellu rë Nina quicun. Hane cajindayahñu ángel jan cojo catsiñuju vë ta tacuntsja ángel vë xi choho sahmi cojo nangui cojo ndachacun.

³ Cuitjin cachja me cojo:

—Ndastu mé dañu nihñu cojo nangui, cojo ndachacun, cojo ya. Ndastu mé nihñu hisca xi cajnetaha cavetaha sellu xten xuta xi cavatsë Nina naja.

⁴ Ngajan xi cahndë xi cachja me xqui rë me xi casetaha rë chuva cojo sellu jan: ngu cientu cojo yachan ñuju mil má me tsëhë yëjë xuta tjë rë Israel.

⁵ Tsëhë xuta tjë rë Judá ne, tejó mil má me xi yaha sellu; hacuaaha tejó mil má me tsëhë xuta tjë rë Rubén, tejó mil tsëhë xuta tjë rë Gad.

⁶ Tejó mil má me tsëhë xuta tjë rë Aser, tejó mil tsëhë xuta tjë rë Neftalí, hacuaaha tejó mil tsëhë xuta tjë rë Manasés.

⁷ Tsëhë xuta tjë rë Simeón ne, tejó mil má me xi yaha sellu; hacuaaha tejó mil má me tsëhë xuta tjë rë Leví, tejó mil tsëhë xuta tjë rë Isacar.

⁸ Tsëhë xuta tjë rë Zebulón ne, tejó mil má me xi yaha sellu; hacuaaha tejó mil má me tsëhë xuta tjë rë José, tejó mil tsëhë xuta tjë rë Benjamín.

Xutaxín xi hacuaaha camacjain rë me

⁹ Xi cavatju xcusun vihi ne, cavutsejen, hane cahvë xutacjín. Hisca tsajin yo cuma cuexqui rë me. Canduva me tsëhë ngajñi rë jimangu nación, jimangu tjë rë xuta, jimangu nandya cojo jimangu hne. Hane cafehe me hinchacun me xcun cahndë rcun cojo xcun Tsánga jan. Yaja me tsjian tyava hacuaaha yahatsja me jne.

¹⁰ Hane jindaya me cojo ngu xta hñu, tichja me cuitjin:

Xi cavetjuntjen ne, camá ngatsë rë Nina naja
xi tacun me cahndë rcun
cojo ngatsë rë Tsánga jan.
Cuatjin cachja me.

¹¹Ngajan xi yějë ni ángel ne, hinchacun quixi tahndee rë cahndë rcun jan hacuaha cavindee
rë xuta changá jan cojo catsiñuju xcusun xi quicun jan. Hane caticjaxcun ángel xcun cahndë
rcun hane cafaharcun rë Nina,

¹²tichja cuitjin:

¡Cuitjin jain!

Nina ne, yějë ni tsinchacuntihin me. Jyë hnga me.

Tjin rë me cjuahasen. Taan nacuechji rë me.

Xuta ne, vaxëndaja me. Vechu chuva rë xi cjuahatsja me ngahñu xi cuitexa me. Hacuaha
hñu cjuá rë me.

Cuanitjin cje me yějë nu yějë nixtin.

¡Cuatjin jain!

¹³Hya xi camá ne, ngu xuta changá jan, cafnenguise me ngahan cuitjin:

—Me xi cuicun xi yaja tsjian tyava ne, ¿yo má me? hane ¿hisca jani canduva me?

¹⁴Ngajan xi cafayangüë cuitjin:

—Tatá, xcusun vëhë ne, ngayun hyun, hacuiin ngahan.

Sehe cachja me cojo ná cuitjin:

—Me vihi cacaa rë me cjuañihi cjuacjintacun jyë. Cavane me tsjian rë me, camá tyava
cojo jni rë Tsánga.

¹⁵Vëhë xi tjin rë me cahndë xcun cahndë rcun rë Nina, hane fahacuenda me nixtin
nixten cahntsua yungun rë me. Hane Nina xi tacun xcun cahndë rcun ne, ngu tangun ni
cuejnándaja me cojo xuta jan.

¹⁶Hindë tsajin nu tsajin nixtin cuma vojo rë me. Cuma xindaain rë me, cuacaain rë me
tsuhi; hacuaha tsijendaain rë me cojo hnde rë,

¹⁷ta cahndë rë vëhë ne, Tsánga xi tacun cavasencja rë cahndë rcun ne, cuahacuenda rë
me, hane cuincha ndiya rë me xcun nandá xi sua cjuahñu. Hane Nina ne, tsixiya me yějë
ndatuxcun xuta jan.

8

Sellu xi má yatu

¹Hane xi cavuxaha me xi sacuaha Tsánga jan sellu xi má yatu ne, ngahnga ne, cavejña
jyuu camahani sacuaha chuva rë vasen hora.

²Cuatjin camá. Sehe cahvë xi yatu ángel vë xi siucahndë xcun Nina ne, cafahatsja yatu
tyjo.

³Sehe canduva sa ngu ángel xi yaha ngu tyucu ndixuhi tsëhë oro, hane casecunquixi
cojo tiña ngasuncun. Ngajan cafahatsja me cjin tyjungunsa cojo sa xi cuaca me xcun
ngasuncun tsëhë oro jan xi tacun xcun Nina. Hane hnde rë ne, camatangun cojo oración
rë yějë me xi tyjahi cjuatacun rë me cojo sa xi cuma chihin cjuá.

⁴Hane nihndi rë tyjungunsa xi yahatsja ángel jan ne, casecjan cojo oración rë me xi tyjahi
cjuatacun rë me, hane camiji tangun hiscan tacun Nina.

⁵Ngajan xi ángel jan ne, cafaha tyucu ndixuhi jan, catsinguitsë rë cojo ndihi tsëhë ngasuncun
jan hane catsingatjen rë xcun ngasunhndë. Hane hora vëhë cafaneya cjuachan
cavatë hacuaha cafani nangui.

Yatu tyjo xi tsijane ángel

⁶Hya xi camá ne, yatu ángel xi yaha yatu tyjo jan ne, caviyujucacun xi tsijane tyjo rë.

⁷Ángel xi tjun jan ne, catsijane tyjo rë. Hane jercu cavaha tsi ndyojo xcun nangui.
Hacuaha cavixu ndihi xi tecjan cojo jni. Cojo vëhë ne, tsëhë yějë ni ya xi tjin ne, tsëhë chuva
jyan ne, ngu cati. Hisca cojo jingujyë nguijña xi xcuen ne, café cati.

⁸Sehe catsijane ángel xi majo jan tyjo rë. Hane hora vëhë ne, camatsejen sacuaha
ngu nguijñacha jyë xi yaha rë ndihi xi cjanenguiya ngajñi ndachacun. Hane tsëhë yějë
ndachacun ne, tsëhë chuva jyan cahndë, ngu ni cavuya jni.

⁹Ngajan xi tsëhë yějë chu xi híncha nandá jan, tsëhë chuva jyan chu ne, ngu chu cahme
chu; hacuaha tsëhë chuva jyan barcu xi hínhasun ne, ngu café cati.

¹⁰Sehe catsijane ángel xi majyan jan tyjo rë. Hane hora vëhë ne, canenguiya tsëhë
ngahnga ngu niñú jyë xi jercu ndaja seti sacuaha seti ngu ndihi jyë. Hane niñú jan ne,
casatë rë ndajyë cojo hiscan vetju nandá. Hane tsëhë yějë nandan jan ne, ngu tsëhë chuva
jyan cahndë casatë rë.

¹¹ Niñú jan ne, yaha ñihi rë xca sa xi hmí rë Ajenjo, ta cavuya sa nandá hiscan cjanenguiya niñú. Hane jemu cjin xuta cahme me xi cahvi me nandá sa jan.

¹² Sehe catsijane ángel xi ma ñuju tyjo rë, hane choho casahmi cojo tsuhi cojo sá ta jemu camachuva hasen rë. Hacua ha chuya rë jyan niñú ne, ngu ni café ngahñu rë cahvo. Ngajan xi tséhë ngu cuaha nixtin o tséhë ngu cuaha nixten ne, ngu tséhë chuya jyan cahndé ne, camajñu hane casacuiin hasen rë.

¹³ Hya xi camá ne, ngajan vasencja rë ngahnga tivitjen ngu chu jya. Hane cuitjin sahmi sen chu cajindaya chu cojo ngu xta hñu:

—Cojo cjuatsehen nuju, ngayun xuta xi nechun ngasunhndé ta, tséhë xi vangui sa jyan sa ángel xi chaja sa tsijane tyjo rë.

9

¹ Hya xi camá ne, catsijane ángel xi má hñu jan tyjo xi yaha, hane cahvë ngu niñú xi cjanengui tséhë ngahnga xcun nangui. Hane cafahatsja niñú jan llavi tséhë ngojo rë nduchin.

² Sehe cavuxaha nduchin ne, hane jemu camiji nihndi rë sacua ha nihndi rë ngu hornu jyë. Hisca tsuhi cojo jingujyë ni tjo ne, tsejen jñu ngatsé rë nihndi xi vetju tséhë nduchin jan.

³ Hane tséhë ngajñi rë nihndi jan ne, cavixu chu nchahva xcun nangui. Hane chu jan ne, tsavi cojo chu sacua ha tsavi cojo chu naya xi siu ngasunhndé.

⁴ Hane cafaha chu cja xi tsajin mé sahmi chu cojo nguijña o cojo xca o sa cojo ya ta, suva xi saté chu xuta xi siutaain xten me sellu rë Nina.

⁵ Casacuiin rë chu cahndé xi tsiquehen chu xuta jan ta, cuenda jemu cuiyujhmu me cahntsua hñu sa. Hane cjuahmu xi cuiyuju me cojo ne, jineya sacua ha jineya hiscan cjuaha chu naya.

⁶ Nixtin hya ne, xuta jan ne, tsimeje me cjuaveya, peru sacuiin cjuaveya xi cuma rë me. Xuta jan ne, cjuahyacacun me cjuaveya, peru sacuiin.

⁷ Chu nchahva jan ne, tjin chjine chu sacua ha naxin xi tjin chjine chu xi cjue chu si. Hinchasun rcu chu ngu xcusun sacua ha ngu corona tséhë oro, hane xcun chu ne, tsejen sacua ha xcusun rë xcun xuta.

⁸ Tsa rë chu ne, sacua ha tsarcu yachjin, hane nehñu chu ne, sacua ha nehñu xa cjan rë.

⁹ Tixté cun ru cojo ngu xcusun sacua ha chinga quicha, hane xi nuhya rë xi fane tyjunga ru ne, hñu nuhya rë sacua ha cjin camahani carreta xi tijuvé naxin xi cuetsihin si.

¹⁰ Ndetsihin chu yaha quicha rë chu naya. Hane cojo quicha jan ne, tjin ru cahndé xi sua chu cjuañihi xuta xcun xi hñu sa jan.

¹¹ Hane sacua ha rey rë chu ne, má ángel rë nduchin jan. Ángel jan ne, Abedón hmí rë sa xi hne hebreo o Apollyon sa xi hne griego. Catsijo cja vé ne, vijne Ngu xi Tsiqueya rë.

¹² Véhë má cjuañihi xi tjun cuma. Jo sa má xi ha meje cuatju.

¹³ Hya xi camá ne, catsijane ángel xi má jyun tyjo rë. Ngajan xi canuhya rë ngu xta xi cavetju tséhë tjejen rë ngasuncun xi tacun xcun Nina, hiscan xi jyihí sacua ha ndyaja ru.

¹⁴ Xta jan ne, cachja cojo ángel xi má jyun xi catsijane tyjo jan. Cuitjin cachja:

—Nismi catsiñuju ángel xi tjihñu tjejen rë ndajyé jyë xi hmí rë Eufrates.

¹⁵ Hane camandaya catsiñuju ángel jan. Ángel jan ne, caviyujya hisca xi cuechu nu, cuechu sa, hane cuechu nixtin xi cuma meje rë xi tsiquehen rë xuta. Chuya jyan chuya jyan xuta ne, ngu ngu me cueya me.

¹⁶ Hane xqui rë sindadu xi vitexa ángel jan ne, jo cientu millón má xi hinchasun naxin. Hane ngahan suva cahndé xqui rë.

¹⁷ Naxin cojo cha xi hinchasun rë chu xi cahvë ngajñi nijña naha ne, cuitjin cun. Cha xi hinchasun rë chu ne, yaja cha chinga quicha xcusun hani rë ndihí, xcusun rë susé hñu hacua ha xcusun sine. Hane rcu chu naxin jan ne, sacua ha rcu chu xa cjan rë cun. Hane tséhë hntsua chu ne, tivetju ndihí tivetju nihndi cojo azufre.

¹⁸ Hane ngatsé rë jyan cjuañihi jan xi vetju tséhë hntsua chu matsejen ne, ngatsé rë ndihí, cojo nihndi cojo azufre ne, ngu cahndé tséhë chuya jyan cahndé xuta cahme me.

¹⁹ Jemu tsavi cojo hntsua chu, peru hacua ha tsavi cojo ndetsihin chu. Ndetsihin chu ne, sacua ha chu yé cun ta, tjin rcu. Hane rcu véhë ne, má sahmi chu dañu cojo.

²⁰ Peru handasa cuatjin camá, xuta xi cacaa rë me ta cahmii me cojo cjuacjintacun véhë ne, tsajin camacjincacun me tséhë cjuatsehen xi casahmi me ta, cafaharcun cuaha me xitsehen cojo nina xi camá tséhë oro, tséhë plata, tséhë quicha sine, tséhë ndoyojo, cojo tséhë ya. Cafaharcun cuaha me nina jan xi maji vutsejen, maji hndé, maji tsujylhiya.

²¹ Hacua ha tsajin camacjincacun me tséhë xi catsiquehen xicjin me, o tséhë xcusun xi sahmi me ngatsé rë xi ma rë me cja surqui, o tséhë cjuatsehen xi sahmi ngajñi rë me sa

chjuun cojo chjuun o sa xihin cojo xihin, o sa tsêhê cjuachêjê rê me. Catsindeyaain me xcusun rê me.

10

Ángel xi yaha xtê lihndi xujun

¹ Hya xi camá ne, ngajan cahvê ngu ángel xi hñu cjuua, nduvajne tsêhê ngahnga tixtêcun rê yufí. Hacuaha ngu yejña cavindee rê rcu ángel jan. Xcun ne, seti sacuaaha tsuhi; hane tyuhmi rê ne, tsejen sacuaaha ngu ndihi hndê xi vitjen.

² Hane yahatsja ngu xtê lihndi xujun xi cavixinga. Hacuaha cavisane ntsacu quixi xcun ndachacun hane xi scun ne, xcun nangui quixí.

³ Ángel jan ne, cajindaya cojo ngu xta hñu, hane nuhya rê sacuaaha xi tsichan ngu chu xa. Hacuaha hora xi cajindaya ne, cachja xta rê yatu chuhun vatê.

⁴ Hora xi cachja yatu chuhun jan ne, cavêjñacácun xi tsihindú cjuua jan peru casahmee ta, cahndê ngu xta tsêhê ngahnga xi cachja cojo ná cuitjin:

—Caveni nihindi cjuua rê yatu chuhun vê ta, cuiyujhma cjuua vê.

⁵ Hya xi camá ne, ángel xi cahvê xi secun xcun ndachacun cojo xcun nangui quixí jan ne, catsiquijin tsja quixi ngahnga.

⁶ Hane casua cjuaquixi rê hisca caveyanangui rê Nina xi tacun yêjê nu yêjê nixtin, me xi hacuaha catsicha rê ngahnga cojo yêjê ni xi tjin rê, cojo nangui cojo yêjê xi tjin rê, cojo ndachacun cojo yêjê xi tjin rê. Cuitjin cachja xi casua cjuaquixi rê:

—Vindeyaain sa rê ta,

⁷ ha ndiya jiya nixtin xi suacuenda ángel xi má yatu. Hya tsijane tyjo rê ne, hane cumachihin cjuua xi jiyahma rê Nina, cjuua xi casua me camachaya rê profeta xi sahmi xa rê me.

⁸ Hya xi camá ne, ngajan cahndê nga xta xi cachja tsêhê ngahnga cojo ná cuitjin:

—Tihin chjehe xujun lihndi xi tjin tê jan tsêhê tsja ángel xi secun xcun ndachacun cojo xcun nangui quixí. —Cuatjin cachja xta cojo ná.

⁹ Vêhê xi cêjêjtêngê ángel hane cafehya rê xi catisua ná xujun lihndi jan. Hane cachja cojo ná cuitjin:

—Juhun, chjehe xini cjuua rê cojo sa xi titehercui. Cjuua jan ne, sahmi sa rê cahntsue, peru ntsove ne, sahmi haxi rê.

¹⁰ Sehe cafaha xujun lihndi jan tsêhê tsja ángel, hane cajínê. Hane ntsuva ne, camá haxi rê sacuaaha xi cajínê tsjen, peru xi café cajínê ne, cahntsua canangui naha ne, camahmu.

¹¹ Sehe cavuya cachja nga cojo ná cuitjin:

—Tjin xi cuinoje ngu ndiya nga ngatsê rê Nina. Cuinoje tsêhê xutacjín, xuta xi hacjahi hacjahi naciôn rê me, xuta xi hacjahi hne chja me, hacuaha cojo xuta xi hñu cjuua me ngatsê rê xi vitexa me.

11

Jo testigu xi cahme ne, cavuya nga cjuahñu rê

¹ Hya xi camá cajínê ne, casua ná ngu rquí ya naxu xi machjirêhê sacuaaha ngu ya chuva. Sehe cachja ángel jan cojo ná cuitjin:

—Tihin chjehe chuva rê yungun xi matitjun rê Nina cojo tsêhê ngasunscun. Hacuaha texquí me xi faharcun ngajan.

² Xi nichove yungun xi matitjun ne, hacuiin cojo cahndê xi má ndatsen rê nichove. Xi canichuviin vê. Cahndê vêhê ne, satêtsja xutaxín xi macjaain rê me Nina. Me xi cuacun vê ne, tsinguetsun rê vê, hacuaha tsinguetsun rê nandya rê Nina xcun xi yachan jo sá cojo xcusun tsehn xi cún me.

³ Xcun nixtin vêhê ne, tsingátju jo testigu naha, hane me xi cuacun vê ne, cuichja me xcusun xi sehe cumá. Ngu mil cojo jo cientu cojo jyanchan nixtin jan ne, cuichja me cjuua naha, hacuaha cuaja me tsjian rê cjuachoho.

⁴ Jo me vêhê ne, hacui jo ya olivu xi tjin cjuua tsêhê, hacuaha hacui me xi jo candeleru xi siu xcun Nina, me xi vitexa ngasunhndê.

⁵ Sa tjin ngu xuta xi meje sahmi me dañu me ne, cuetju ndihi tsêhê hntsua me hane tsicjêra rê xi chohovêê rê me. Chuva vêhê cueya tu yo ni xi meje xi choho sahmi cojo rê me.

⁶ Jo me vêhê ne, siutsja me ngahñu xi cuechja me ngahnga sehe cuaaain tsi nixtin xi cuehya me. Hacuaha satê rê me ngahñu xi sahmi me xi nandá ne cuya jni o xi cuanguihmu rê me nangui cojo yêjê xcusun cjuacjintacun. Cuatjin cumá tu cutjin cjín ndiya cuma meje sahmi me.

⁷ Ndatjin, peru hya xi café casua me cjuaquixi rë me ne, ngu me sacuaaha ngu chu chojyih xi miji tsêhë nduchin ne, sahmi chu si cojo rë me, hane scaa ru cjue chu xcun hane tsiquehen chu me.

⁸ Hane nima jan ne, hacuixin xinchaniji ta cuiyuju ndiyatë rë ciudad jyë. Ciudad jyë jan ne, sa xi chjahanchuvan ne, cuma cuinújan xi hmí rë Sodoma cojo Egipto. Ngajan ni ne, cahme Nai naja xcun cru, hane ngajan cuiyuju nima.

⁹ Xcun xi jyan nixtin vasen ne, jemu cjuehe xuta. Cjuehe me tsêhë yëjë ni nandya, tsêhë yëjë ni tjë, tsêhë yëjë ni hne cojo tsêhë yëjë ni nación. Cjuehe me scutsejen me nima, hane tsingatiin me xi xinchaniji nima.

¹⁰ Hane xuta xi siu ngajan ne, jercu ndama rë me ngatsë rë cjuaveya jan. Hisca cuiyuju me suhi hane tsingatju me cuatjo ngajñi xicjin me. Cuatjin sahmi me ta tjin rë me cjuasua xi café jo profeta jan xi jercu casua me cjuañihi.

¹¹ Peru xi café jyan nixtin vasen jan ne, xta xi sua Nina xi tsêhë cjuahñu ne, cavisehen nga rë nima. Hane caxinchacun quixi me. Ngajan xi ngu chircun jyë cavisehen rë xuta xi cavutsejen rë me.

¹² Hya xi camá ne, me xi cavuya xta rë ne, cahndë me ngu xta hñu xi cachja tsêhë ngahnga cuitjin:

—Nduvun nuju nguehe.

Ngajan xi quijiniji me ngahnga ngajñi ngu yufi. Hane cavëë xuta xi chohovëë rë me ta quijiniji me.

¹³ Ha hora vëhë ni ne, jercu cjuachan cafani nangui hane tsêhë chuva rë të rquí tsêhë ciudad jan ne, cavixujne ngu. Hane ngatsë rë me vëhë ne, yatu mil xuta cahme. Ngajan xi xuta xi cavangui me ne, jercu catsacjun me camá. Sehe casahmi jyë casahmi hnga me Nina xi tacun ngahnga.

¹⁴ Cojo vëhë cajnetaha cjuacjintacun xi majo. Peru ha cjuehe xi ma jyan.

Xcusun xi camá hya xi cafane tyjo xi má yatu

¹⁵ Hya xi camá ne, catsijane ángel xi má yatu tyjo rë, sehe canuhya rë tsêhë ngahnga xta hñu xi cachja cuitjin:

Jingujyë rë nandya xi vitexa xuta ngasunhndë xi matitjun ne, cavisehen gobiernu rë Nina naja cojo Cristu, me xi catsingatju me.

Hane me vëhë sahmi me gobiernu yëjë nu yëjë nixtin.

¹⁶ Ngajan xi catsiyëjë can ñuju xuta changá xi siu me xcun cahndë rcun rë me ngajan xcun Nina ne, caticjan xcun me, hane cafaharcun me Nina.

¹⁷ Hane cuitjin cachja me:

Tihin nacuechji nuju, Tatá Nina. Ngayun jercu hñu camahani ngayun.

Hacui ni yun hya, hacui ni yun quihndë, hane hacui ni yun yëjë nixtin.

Hindë ticujun ngahñu jyë nuju xi satë nuju

hane ha tivetsuhun nihñu gobiernu.

¹⁸ Xuta ne, choho hvë me yun,

peru cavechu nixtin xi macjan nuju cojo cjuahngatacun rë me.

Cafehe hora xi nihñu cuendun tsêhë nima.

Tuhun chji rë me xi casahmi xa nuju sacuaaha profeta,

sacuaaha xuta nuju, sacuaaha xutaxin xi faharcun me ñihi nuju.

Tuhun rë yëjë ni me, sa yehe sa langa me.

Hane me xi tsicjëya rë cojo xcusun rë ne, tuhun rë me xi cjueya me.

¹⁹ Ngajan xi cachjahaxin rë tsjian rë tingotjo rë yungun rë Nina ngajan ngahnga, hane cahntsua yungun jan ne, camatsejen caxa ximinchacun xi yaha contrato xi casahmi Nina cojo xuta rë me. Cavatë ndihichuhún, cafaneya, catsinga chuhun, cafani nangui hacuaaha cavaha ngu tsi ndyojo xi jercu hñu camahani. Cuatjin camá.

12

Scaanya yë xitsehen cojo quihndi xi catsingatju Nina

¹ Hya xi camá ne, camatsejen cjuarcun xi sahmi sen ngajan ngahnga. Camatsejen ngu chjuun xi tixtëcun ran tsuhi. Hane sá ne, tacun ngahma rë ntsacu na. Hane ngu corona xi camá tsêhë tejó niñú ne, vëhë quitaha xten na.

² Hane chjuun jan ne, meje tsin quihndi ran. Jercu jindaya na ngatsë rë cjuahmu cojo cjuachoho tsêhë hacutjin tivatju ran.

³ Hane camatsejen nga ngu sen ngajan ngahnga ta, camatsejen ngu yë xi jercu jyih chu; hani xcusun ru. Chu jan ne, yatu má rcu chu, të má ndyaja ru. Hane jima ngu rcu chu hinchá sun ngu corona.

⁴ Cojo ndetsihin chu ne cajavějne chu ngu cahndé tséhé jyan cahndé ré niñú ré ngahnga, hane cacandi chu nangui. Hane yé jan ne, cafaña vasen chu xcun chjuun xi ha hindéya tsin quihndi ran cojo sa xi tsinguijne jingu chu quihndi ré na hora xi tsin.

⁵ Hya xi camá ne, na vèhé ne, catsin ré na ngu quihndi xihin. Hane quihndi xihin jan ne, yaha bastón xi cuitexa me cojo yéjé ni nacióñ cojo ngahñu cjua xi tjin ré me. Hane quihndi ran jan ne, cachjaha ré xcun Nina, ngajan xcun cahndé rcun ré me.

⁶ Hane chjuun jan ne, cavanga na quiji na ngu xín. Ngu cahndé xi Nina tjin chjine ré me xi cumá ran. Hane ngajan sacu xi siné na xcun ngu mil cojo jo cientu cojo jyanchan nixtin.

⁷ Hya xi camá ne, cavetsihin ngu si ngajan ngahnga. Miguel cojo yahnga ángel ladu ré me ne, casahmi me si cojo yé xitsehan jan hacuaha cojo ángel ladu ré xitsehan.

⁸ Hane cacaaín ré yé jan cojo ángel ru, hacuaha catsichaja chu cahndé ru ngajan ngahnga.

⁹ Vèhé xi caningatjen ru xcun ngasunhndé. Yé jan ne, jemu changá chu. Xitsehan xi matitjun o Satanás hmí ru. Chu ndacha chu, vindacha ru xuta ngasunhndé. Hane caningatjexin ru cojo ángel ru hiscan ngasunhndé.

¹⁰ Hya xi camá ne, cahndé ngu xta xi jemu hñu cachja ngajan ngahnga cuitjin:

—Quihndé cavechu nixtin xi Nina cuaxétje me xuta, cumatsejen ngahñu ré me cojo gobiernu ré me. Hacuaha tsejen xi hñu cjua ré Cristu, me xi catsingatju me ta, cama catsingatjexin me chu xi vinchajyé xingueen. Nixtin nixten cavinchajyé ré me xcun Nina naja, peru hindé tsajin.

¹¹ Hane xingueen jan ne, cacaa ré quiji me xcun ngatsé ré jni ré Tsánga jan cojo ngatsé ré cjuaquixi ré me xi casua me tséhé Nina ta, hacuain machuvacacun me xi cjue xcun me cojo Nina handasa cjueya me.

¹² Hane ngatsé ré vèhé ne, jcatama sua ré ngahnga cojo me xi siu xcun! Peru jay tséhé nangui cojo ndachacun! ta, tséhé xi canduva tjengui ré xitsehan xi matitjun. Hacuaha jemu quitsé ré cjuaxti tséhé xi vèhé xi nixtin ré ne, meje cuijnetaha. —Cuatjin cachja xta jan.

¹³ Hya xi camachaya ru xi caningatjen ru nangui ne, cavetsihin cavanga cojo chu chjuun xi catsi ran quihndi xihin jan.

¹⁴ Peru chjuun jan ne, cafahatsja na jo tyjunga ré chu jya xi jercu jyihí cojo sa xi cuma cuitjen na tséhé chu yé hiscan cahndé xi tjin chjine xi cuma ran ngajan ngu xín. Hane ngajan sacu xi siné na xcun ngu chan cojo jo chan cojo vasen chan, hane cuechiintaain chu yé na.

¹⁵ Ngajan xi chu yé jan ne, cavaxé chu tséhé hntsua chu nandá sacuaaha ngu ndajyé cojo sa xi cuechutaha ré chjuun jan ne, cjue tyjava na cojo ngahñu ré ndajyé.

¹⁶ Peru nangui ne, cavisecoo ré chjuun jan, hane caseya tsjuhun ne, cavingui ré ndajyé xi cavetju ré yé jan.

¹⁷ Vèhé xi yé jan ne, jercu camaxti ru cojo chjuun jan hane sehe quiji casahmi chu si cojo tjé ré na xi cavangui. Casahmi chu si cojo xuta ran xi vetjo cjua xi cavitexa Nina hacuaha sua me cjuaquixi ré Jesús.

13

Yé xitsehan ne, casua chu ngahñu xi cjuahatsja chu chojyihí

¹ Hya xi camá ne, cavejña chu yé jan tjeheñ ndachacun, hane cahvé xi ngu chu chojyihí ne, tivetju chu tséhé ndachacun. Té má ndyaja ru hacuaha yatu má rcu chu. Hane té corona seya xcun ndyaja ru. Hane jima ngu rcu chu ne, yaja ngu ñihí xi tsitjungui ré Nina.

² Chu chojyihí xi cahvé vè ne, sacuaaha ngu xa hindu jyé cuatjin jyihí chu, peru ntsacu chu cojo tsja chu ne, sacuaaha ntsacu cojo tsja chu oso; hane hntsua chu ne, sacuaaha hntsua chu xa sine cjan ré. Hane yé jan ne, casua chu vè ngahñu ru cojo cahndé rcun ré chu, hacuaha casua xa ré chu.

³ Hane ngu rcu chu jan ne, casacuhmu ré hane tsejen xi tsajin rqui ré, ta cueya. Peru cojo yéjé sa ne, camandaja. Hane jingujyé ni xuta ngasunhndé ne, jercu quijircun ré me xi camandaja. Hane cojo cjuasua tjengui me chu.

⁴ Hane xuta ne, caticjan xcun me cafaharcu me chu yé jan ta, tséhé xi casua yé cahndé xi vitexa chu. Hacuaha cafaharcun me chu chojyihí jan. Cuitjin cachja me tséhé chu:

—Ndistu yo xi cuechu xi cumá sacuaaha chu vi. Ndistu yo cuma scaanya cojo chu. —Cuatjin cachja xuta tséhé chu.

⁵ Chu jan ne, casetaha ngu hntsua chu xi jemu cojo cjuaxta chja chu hacuaha tsitjungui ru Nina. Hane casacu ru cahndé xi cuitexa chu xcun xi yachan jo sá.

⁶ Hane cavetsihin xi choho cachja chu tséhé Nina, canchati chu tséhé ñihí ré cojo tséhé cahndé hiscan viyuju Nina, hane tséhé yéjé sa me xi siu me ngahnga.

⁷ Hane cafahaxa chu xi sahmi si chu cojo xuta xi tyjahi cjuatacun rë me cojo me xi ndaja cjuinduju me cojo Nina. Hane caa ru cjue chu xcun. Hacuaha cafaha xa chu xi cuitexa chu xuta rë yëjë ni tjë, yëjë nandya, yëjë hne cojo yëjë nangui.

⁸ Hane jinguyëjë me xi viyuju me ngasunhndë ne, cafarharcun me chu. Yëjë ni me xi tsajin ñihi rë me xcun xujun rë Tsánga rë Nina xi hisca ntsacu cavetsihin ngasunhndë ne, cavejña xi cueya. Tsajin ñihi rë me jan ta, tsajin rë me ngahñu xatsë. Hane me vëhë cafarharcun me chu.

⁹ Yo ngayun xi tjin nuju cjuasua xi cuinuhyun cju vihi, ndaja tetuhuncun.

¹⁰ Me xi satë rë xi cuma me presu, cuatjin cumá. Me xi satë rë me xi cueya me cojo quicha, cuetjucaa jain. Jinguyëjë rë vëhë ne, mameje rë xi xuta xi macjain rë me Nina ne, cjuecani rë xi cumacjain sa rë me.

¹¹ Ngaxtun vëhë ne, cahvë nga ngu chu chojyihí, hane tivetju chu tsëhë nangui. Chu chojyihí xi majo ne, tjin jo ndyaja ru sacuaa tjin chu tsánga, peru chja chu sacuaa ngu yë jyë.

¹² Hane hacuaa cojo chu vëhë casatë rë chu ngahñu xi casatë rë chu xicjin cojo ñihi ru. Hane casahmi chu vë xi yëjë ni xuta xi siu ngasunhndë ne, cjuaharcun me chu chojyihí xi tjun jan, chu xi handasa cueya chu xi casacuhmu rë ne, camandaja.

¹³ Hane cama casahmi chu vë cjuarcun yehe cojo seña. Casahmi chu xi cuixu ndihí tsëhë ngahnga, hane xuta ngasunhndë ne, cavutsejen me cjuarcun.

¹⁴ Cuatjin cavindacha chu vë xuta ngasunhndë cojo cjuarcun xi cama casahmi chu ngatsë rë chu xi tjun. Hane cavitexa chu xi xuta ne, cuaxëtaha me ngu xcusun rë chu tjun jan xi casacuhmu rë cojo quicha peru cojo yëjë sa ne, quicun chu. Hane cuatjin casahmi me.

¹⁵ Hane chu xi majo jan ne, casacu ru cahndë xi sua chu xta rë xcusun jan cojo sa xi cuma cuichja xcusun jan, hacuaa cuma sahmi xcusun jan xi cueya tu cutjin cjín me xi tsingatiin xi cjuarcun xcusun jan.

¹⁶ Hane xcusun jan ne, casahmi ngu jyë xi yëjë ni xuta ne, setaha ngu sellu tsja ladu quixi o sa xten me. Cuatjin casetaha rë xuta, sa quihndi, sa changá me, sa nchina, sa yuma me, sa xuta ndaya tjin o sa xi mosu hndixahan; yëjë ni me casetaha rë me.

¹⁷ Hane chuva vëhë ne, sacuiin cahndë xteña hacuaa sacuiin cahndë cuatsë sa xi casetaain rë me sellu jan cojo ñihi rë chu chojyihí jan o cojo xqui rë letra rë ñihi ru.

¹⁸ Cjuatacun vihi ne, tjin mé vijne, peru meje rë xi cuacjantaha me cjuatacun rë me ta cuitjin fi cju: Catitsichuva me xqui rë chu jan ta, hatuxa xqui rë ngu xuta xihin. Hane xqui rë jan ne, jyan cientu cojo jyanchan jyun má.

14

Ngu cientu cojo yachan ñuju mil me xi cavatsë Nina

¹ Hya xi camá ne, cavutsejen nga, hane ngajan secun Tsánga jan, secun quixi xcun naxi xi hmí rë Sion. Hacuaha siu cojo me ngu cientu cojo yachan ñuju mil xuta xi casetaha xten me ñihi rë Tsánga jan cojo ñihi rë Nahmi rë me.

² Hacuaha canuhya rë ngu xta tsëhë ngahnga xi nuhya rë sacuaa fane jemu cjín nandan xi vanga o sacuaa xi jemu hñu faneya. Hacuaha nuhya rë sacuaa xi tsijane cha chjine arpa rë cha.

³ Hane xuta jan ne, tisë me ngu sun xatsë xcun cahndë rcun rë Nina hacuaa xcun ñuju xcusun xi quicun cojo can ñuju xuta changá xi viyuju me ngajan. Hacuuiin yëjë me xi tjin rë me cahndë xi cuma rë me sun jan ta, suvá ngu cientu cojo yachan ñuju mil me xi cuacun jan xi cachaha rë me tsëhë ngasunhndë, me vëhë cuma rë me.

⁴ Me xi cuacun vë ne, catsinguetsiin me cjuatacun rë me cojo yachjin, ta caviyuju suva me. Me xi cuacun vë ne, tjengui me Tsánga tu jani xi cjuí. Me xi cuacun vë ne, hacuaa me xi cachjahaxin rë tsëhë ngajñi rë yahnga xuta xi cuma me sacuaa ngu cuatjo xi cumá rë Nina cojo Tsánga.

⁵ Me xi cuacun vë ne, hisca xi ngu cjuandesu cavetjiin tsëhë hntsua me; ta tsajin xi cún rë me.

Jyan ángel xi cachja hacutjin cumá cojo xuta xi faharcun rë chu chojyihí

⁶ Sehe cahvë ngu ángel xi hacjahi xi vitjen vasencja rë ngahnga. Ángel vëhë ne, cjuecani rë cjuandajyihí rë Nina xi machuvaain ngahñu rë. Hane sua rë xuta ngasunhndë tsëhë yëjë ni nación, o tjë, o hne, o nandya xi cumachaya rë me cjuajan.

⁷ Hane cachja cojo xta hñu cuitjin:

—Chjuhuncun rë Nina hacuaa nihñu jyë nihñu hnga me ta, tsëhë xi ha cavechu hora xi sahmicuenda me yëjë ni. Chjuhuncun me xi casahmi ngahnga cojo nangui cojo ndachacun cojo nanda yufa.

⁸ Sehe tjengui rë me ngu ángel xi majo, hane cachja cuitjin:

—Camá café ngahñu cjuar rë gobiernu xi vitexa rë nandya Babilonia. Xuta rë nandya jan ne, catsitsehen yahnga xuta tsêhë xi sacuaaha catsichihî rë me cojo xan xi hacui cjuatsehen xi sahmi ngu xihin cojo chjuun xi hacuiin tsêhë.

⁹ Sehe tjengui rë me ngu ángel xi majyan, hane cachja hñu cuitjin:

—Yo xi cjuaharcun rë chu chojyihî o sa xi cjuaharcun rë xcusun ru, hane setaha sellu ru xten o sa tsja me ne,

¹⁰ xuta jan ne, tjin rë me xi cuihingui me xan xi hacui cjuacjan rë Nina, hane tsajin mé xi tsinguijne rë ngahñu rë cjuacjan jan. Xuta jan ne, cuatju me cjuahmu tsêhë ndihî tsêhë azufre xi seti, cuatjin cuatju me xcun ángel cojo Tsánga.

¹¹ Hane nihndî rë ndihî rë cjuahmu rë me ne, cuiji yêjê nu yêjê nixtin. Sa nixtin sa nixten ne, sacuiin rë me cahndê cjuahajenda me tsêhë. Cuatjin cumá cojo me xi faharcun ru cojo xcusun ru. Cuatjin cumá cojo me xi siutaha rë sellu ru.

¹² Jinguyêjê rë xi vatju vêhê ne, mameje rë xi xuta xi macjain rë me Nina ne, cjuecani rë xi cuetjo me cjuar xi cavitexa Nina hacuaaha cumacjain sa rë me.

¹³ Hya xi camá ne, cahndê ngu xta tsêhë ngahnga xi cachja cojo ná cuitjin:

—Nihndî cjuar vihi: “Xuta xi ha cueya me quihndê cojo nixtin xi sehe nduva ne, jercu ndaja tsêhë me sa xi tjengui me ndiya rë Nina.”

Hasen rë Nina ne, chja tsêhë me cuitjin:

—Juun, cjuahajenda me tsêhë xi tsijenda rë me ta, tsêhë xi cumatsejen chji rë xa xi casahmi me. —Cuatjin chja Hasen rë Nina.

Ángel ne, fanga me xuta ngasunhdê xi satê rë me cjuacjan rë Nina

¹⁴ Hya xi camá ne, cavutsejen ngu yufî tyava, hane xcun yufî ne, tacun ngu xi tsejen sacuaaha quihndî rë xuta. Quisun rcu me ngu corona tsêhë oro hane yahatsja me quicha yuju ta cuatê me xitjê.

¹⁵ Ngajan xi cavetju nga ngu ángel tsêhë ndava Nina hane hñu cajindaya cojo ángel xi tacun xcun yufî jan. Cuitjin cachja:

—Chjuhun quicha nuju nangun ta, ha cavechu nixtin xi xtî ta, tsêhë xi camá quichji cosecha tsêhë ngasunhdê.

¹⁶ Hya xi camá ne, me xi tacun xcun yufî jan ne, cavaja me nangui cojo quicha rë me, hane tjê rë ngasunhdê ne, camá cachaya rë.

¹⁷ Hya xi camá ne, hacuaaha cavetju ngu ángel xi cavetju tsêhë ndava Nina xi tacun ngahnga ne, hacuaaha yaha ngu quicha yuju.

¹⁸ Hane cavetju ngu ángel xi majo. Ángel vë ne, tacuntsja rë ndihî. Hane ángel vë ne, hñu cajindaya cojo ángel xi yaha quicha yuju. Hane cuitjin cachja cojo:

—Chehe quicha yuju rijî ne, tiche yêjê hne rë uva tsêhë xcun ngasunhdê ta tsêhë xi uva rë ne, jemu quichji.

¹⁹ Hya xi camá ne, ángel jan ne, catsingatju quicha rë xcun nangui ne, cavatê rë uva xi hacui xuta tsehen. Hane cavincha rë cahndê hiscan xinune rë cojo sa xi cumatsyuhun ne cuetju nandá rë sacuaaha satê rë matsyuhun cjuacjan rë Nina.

²⁰ Camatsyuhun hiscan xin hitsê tsêhë nandya, hane jemu cavetju jni hiscan camatsyuhun uva jan. Xi camiji jni ne, cavechutaha rë hiscan frenu rë chu naxin hacuaaha cavanga ngu chuva rë jyan cientu cojo can kilómetro.

15

Yatu ángel xi siutsja cjuacjintacun

¹ Hya xi camá ne, cahvê ngajan ngahnga ngu nga sen cjuarcun xi jemu fircun naja. Cahvê yatu ángel cojo yatu cjuacjintacun. Hane cojo cjuacjintacun jan ne, cuijnetaha cjuañihî xi cumá ta, sejuu cjuacjan rë Nina.

² Hacuaaha cahvê sacuaaha ngu ndachacun hasen sacuaaha hasen ndyojo tsin, hane tsejen sacuaaha tecjan cojo ndihî. Hane ngajan hinchacun xuta xi cacaa rë me quiji xcun tsêhë chu chojyihî cojo xcusun ru cojo xqui rë ñihî ru. Secun me cojo arpa xi cafahatsja me tsêhë Nina.

³ Me vêhê ne, sê me sun xi tsêhë Moisés, me xi casahmi xa rë Nina hane hacuaaha tsêhë Tsánga. Cuitjin fi cjuar rë:

Jemu má nihñu xa, jemu fircun nijî tsêhë.

Nai nijî ngayun. Ngayun, tsajin mé xi majî nihñu.

Quixi nújun, hacuaaha chichihîn ndiya nuju.

Ngayun vitexun jinguyêjê ni naciôn.

⁴ ¿Yo xi tsacjuiin nuju, tatá? Tsajin yo.

Yêjê ni me sahmi jyê sahmi hnga me yun ta tsêhë xi ngu ni ngayun xi tyahi cjuatacun nuju.

Vêhê xi yêjê ni naciôn cuinduva cuiticja xcun nuju tsêhê xi cumatsejen ndaja xa cjuaquixi nuju.

⁵ Hya xi camá xi cavatju vihi ne, cavutsejen nga ngahnga ne, hane tixaha hiscan cahndê rcun rê ndihya tsjian rê Nina hiscan híncha acuerdu xi camá cojo Nina.

⁶ Hane tsêhê ngajan ne, cavetju yatu ángel xi cuacun jan xi siutsja me xa rê yatu cjuacjintacun xi cumá. Ángel jan ne, yaja tsjian rê nachjun ndaja xi ndaja tyjahi. Hacuaha tjihñucja ndanisin rê cojo cinturón tsêhê oro.

⁷ Ngajan xi ngu xi quicun jan xi ñuju má ne, casua rê yatu ángel xi cuacun jan ngu ngu tyucu rê oro xi ndaja teya. Hane tyucu jan ne, quítsê rê cojo cjuacjan rê Nina, Nina xi tacun cuaha me yêjê nu yêjê nixtin.

⁸ Hane ndihya tsjian rê Nina jan ne, catsê rê cojo nihndi xi nduva tsêhê cjuahasen rê Nina xi seti cojo ngahñu rê me. Cuatjin camá xi tsajin yo ma visehen ngajan hisca xi cuijnetaha nixtin rê cjuañihi xi yahatsja yatu ángel jan.

Tyucu xi híncha cjuacjan rê Nina

16

¹ Hya xi camá ne, cahndê ngu xta hñu xi vetju tsêhê ndava Nina hane cachja xta jan cojo yatu ángel jan cuitjin:

—Tangun titejnu tyucu jan cojo sa xi cjuacjan rê Nina ne, satê rê ngasunhndê.

² Cojo vêhê ne, quiji ángel xi tjun jan ne, cavitsingaxten rê tyucu rê xcun nangui. Hane yêjê xuta xi yaha me sellu rê chu hacuaha faharcun me xcusun ru ne, casetaha rê me ngu xcusun chíhin vetju xi jemu cjan rê.

³ Sehe ángel xi majo ne, cavitsingaxten tyucu rê xcun ndachacun. Hane ndachacun ne, cavuya jni sacuaha jni rê ngu nima. Ngajan cafê cahme xi híncha rê ndachacun.

⁴ Sehe ángel xi majjan ne, cavitsingaxten tyucu rê cojo sa xi casatê rê nandan ndajyê cojo hiscan xi vetjun nandá. Hane nandan jan ne, hacuaha cavuya jni.

⁵ Ngajan xi cahndê xi cachja ángel xi tacuntsja nandan jan cuitjin:

—Quixi yun chuva vihi. Ngayun nechun cuaha, hacuaha cavinechun.

⁶ Quixi yun chuva vihi ta catsinguitsojo me jni rê xuta nuju cojo profeta xi chja cju nuju. Hane canicuyun chuva rê ta hacuaha cavanga jni rê me.

⁷ Hacuaha canuhya rê xi ngasuncun rê yungun ne, cafayangui cuitjin:

—Juun, cuatjin camameje rê. Tatá, Nina yun, hane tu mé ni ne, ma nuju. Jemu quixi cju xi vitexun.

⁸ Hya xi camá ne, ángel xi má ñuju ne, cavitsingaxten rê tyucu rê xcun tsuhi. Ngajan casacu rê ngahñu xi jemu cuaca rê xuta cojo ndavá rê.

⁹ Hane xuta ngasunhndê ne, cati me cojo ndavá hñu. Peru cahndê xi sahmi jyê sahmi hnga me Nina ne, canchati me tsêhê ñihi rê Nina, me xi vitexa me xcun yêjê cjuacjintacun vihi.

¹⁰ Hya xi camá ne, ángel xi má hñu ne, cavitsingaxten rê tyucu rê xcun cahndê rcu rê chu jan. Hane ngajan camá xi naciôn xi sahmi chu gobiernu tsêhê ne, jemu jñu camahani camá jingujyê ni. Hane xuta ne, cajinêne me neje me tsêhê xi jercu má rê me.

¹¹ Hane nchati me tsêhê Nina rê ngahnga ngatsê rê cjuahmu rê me cojo tsêhê nindu xi vetju yojo rê me. Nchati me tsêhê Nina cahndê rê xi choho camá rê me tsêhê cjuatsehen rê me.

¹² Hya xi camá ne, ángel xi má jyun ne, cavitsingaxten rê tyucu rê xcun ndajyê jyê xi hmí rê Eufrates. Ngajan xi nandan jan ne, caxiya hane camandaja ndiya rê cojo sa xi ma vatjucja rey xi nduva ladu vetjucaa tsuhi.

¹³ Sehe cahvê jyan hasen tsehen xi cun sacuaha licuen, cavetju tsêhê hntsua chu yê jyê jan, tsêhê hntsua chu tjun cojo tsêhê hntsua chu ndacha.

¹⁴ Hane hasen jan ne, hacui hasen tsehen xi ma sahmi seña cjuarcun hacuaha hacui xi sahmi tangun rey, xuta matitjun rê jingujyê ni ngasunhndê cojo sa xi xuta jan ne, sahmi si condra rê Nina xi ma sahmi me yêjê ni hya xi cuetjucaa nixtin rê Nina.

¹⁵ Tetuhunrcun cju rê Nina xi chja cuitjin: “Tjin chjine yun ta, tu ñahñu ni nduvá sacuaha nduva ngu chêjê. Jercu ndaja tsêhê yo xi tacun quicun, sacuaha ngu me xi tacun chjine tsjian rê me xi cuaja me cojo sa xi tsajin yo sacutsejentê cjuasava rê me.” Cuatjin chja cju jan.

¹⁶ Hane casahmi xi cama tangun rey jan ngajan ngu cahndê xi hne hebreo ne, hmí rê Armagedón.

¹⁷ Hya xi camá ne, ángel xi má yatu ne, cavitejnu tsêhê tyucu rê ngajñi tjo. Ngajan xi hiscan ndava Nina, hiscan cahndê rcun rê me, canuhya rê ngu xta hñu xi chja cuitjin:

—¡Ha camá cajnetaha!

¹⁸ Ngajan xi sehe cavetsihin cavatë ndihi chuhun, cafaneya, catsinga chuhun, cojo xi jemu hñu cafani nangui. Hisca cjëë cjuani nangui cuatjin jinguyëjë rë xi caviyuju xuta xcun ngasunhndë ta, jercu cjuachan camahani cafani nangui.

¹⁹ Hane ciudad jyë ne, jyan rquí caseya tsuhun. Hacuaha yahnga nandya rë ngasunhndë ne, cavixujne. Hane Nina ne, catsinguitsen me cjuatsehen rë nandya Babilonia jyë hane casahmi me xi hacuaha cuma rë nandya jan castigu tsëhë cjuacjan rë Nina xi hincha tyucu.

²⁰ Hacuaha nangui xi vetju vasencja ndachacun cojo naxi ne, hya cafëya.

²¹ Hane tsëhë ngahnga ne, tsi ndyojo yehe cavixusun rë xuta jan. Hane chuva ngu tsi ndyojo vë ne, sacuaaha yachan kilu hai. Hane xuta ne, canchati me choho cachja me tsëhë Nina ngatsë rë cjuacjintacun tsëhë tsi ndyojo jan ta, cjuacjintacun jan ne, jemu chircun camahani.

17

Hacutjin cjuë na xi viteña yojo rë

¹ Hya xi camá ne, ngu tsëhë yatu ángel jan xi yaha tyucu ne, canduva tjengui ná ne, cachja cuitjin:

—Ndove ne, tsingáacun ri castigu rë na xi viteña yojo rë, na xi tacun na xcun jemu cjin nandá.

² Cojo na vëhë ne, rey tsëhë nangui ne, casahmi me cjuatsehen; hane xuta ngasunhndë ne, catsichihí rë me cojo xan xi hacui cjuatsehen ran. —Cuatjin cachja ángel cojo ná.

³ Ngajan xi ángel ne, quijicojo ná ngajñi nguiña ngu cahndë xín. Hane ngajan cahvë ngu chjuun xi quisun na ngu chu chojyihí xi hani xi yatu rcu chu cojo të ndyaja ru. Hane chu jan ne, yaha ñihi xi tsitjungui rë Nina.

⁴ Chjuun jan ne, yaja na tsjian chacun xi moradu cojo hani. Hacuaha tsjian vëhë hisca seti jyihí cojo oro cojo ndyojo ndacun hane cojo tu seti xi cavaqui rë. Hane yahatsja na ngu tyucu tsëhë oro xi quitsë rë cojo xcusun tsehen cojo xi chocun rë cjuatsehen rë na.

⁵ Hane xten na ne, camahindu cjuá vihi: “Ngu cjuá xi meje rë cjuatacun: Babilonia, nangui xi matitjun. Nangui xi hacui na xi viteña yojo rë cojo yahnga xuta xi sahmi me cjuatsehen ne, fayanguí xuta xcusun rë na.” Cuatjin camahindu.

⁶ Hane camachaya ná ta na vëhë ne, chilhi na ta cahvi na jni rë nima xi cahme me ngatsë rë xi macjain rë me Nina cojo jni rë nima xi casua cjuaquixi rë Jesús.

Hane hya xi cahvë na ne, ngahan ne, jercu quijircu camahani ná.

⁷ Ngajan xi cachja ángel cojo ná:

—¿Mé má fircun ri? Ngahan ne, suacuenda ri cjuatacunhma tsëhë chjuun jan cojo tsëhë chu chojyihí xi quisun na, chu xi tjin yatu rcu chu cojo të ndyaja ru.

⁸ Chu chojyihí jan ne, quicun chu hatsëë, peru quihndë tsajin chu. Hane xi cuinduvaniji chu tsëhë nduchin ne, jiya ndiya chu xi cjuëya chu. Hane xuta xi viyuju me ngasunhndë ne, me xi casetaain ñihi rë xcun xujun, xujun xi hisca ntsacu cavetsihin ngasunhndë, hincha ñihi rë me xi satë rë me cjuahñu xatsë xi sua Nina ne, me vëhë cjuercun rë me. Cjuercun rë me hya xi scuëë me chu ta quicun chu hatsëë, tsajin chu quihndë, peru cuya cuejña nga chu.

⁹ Mameje rë cjuatacun ta chja nuhya rë, peru yatu rcu chu ne, nuhya rë xi má yatu ndetjun hiscan quisun na o sa nandya hiscan vitexa na jan. Hacuaha nuhya rë xi má yatu me xi vitexa ngajan.

¹⁰ Hñu me vëhë ne, ha cajnetaha nixtin xi cavitexa me. Ngu nga me ne, tivitexa me. Hane ngu sa me jan ne, hya xi cuitexa me, sahmi nguyë xi hacuiin cjin nixtin scaa rë me.

¹¹ Hane chu chojyihí xi quicun chu hatsëë, peru quihndë tsajin chu, cojo chu vëhë cuma jyin me xi cuitexa me ngajan. Chu jan ne, ma jyin, peru hacuiin xín cuinduva chu ta, tsëhë ngajñi rë me xi yatu jan ne, ngajan cuinduva chu hane cjuí hiscan cjuëya cha.

¹² Hane të ndyaja ru xi cahye ne, hacui të xuta xi cjëë cjuahatsja me xa xi cuitexa me. Hane me vëhë ne, sacu rë me cahndë xi cuitexa me tangun cojo chu, peru ngu hora ni cjuecani rë nixtin rë me.

¹³ Hane me vëhë ne, cama sacuaaha ngu ni cjuatacun rë me. Hane sahmi tangun me ngahñu rë me cojo gobiernu rë me sehe sua me xi cjuahatsja chu chojyihí.

¹⁴ Hane hya xi sahmi me si cojo Tsánga jan, scaa rë xi cjue xcun Tsánga cojo xuta xicjin. Hane xuta xicjin Tsánga ne, hacui me xi cavuxijin Nina, me xi ndaja finduju xi tjengui rë ta, Tsánga jan ne, Nai rë yëjë ni nai má me. Hacuaha vitexa me xuta xi vitexa. —Cuatjin cachja ángel cojo ná tsëhë na vëhë.

¹⁵ Cachja sa ángel cojo ná cuitjin:

—Sacuaaha nandá xi cahye hiscan xi tacun na xi viteña yojo rë na, nuhya rë xi má xuta tsëhë yëjë ni tjë, yëjë nandya, xuta cjin, xuta xi chja yëjë hne.

¹⁶ Hane me xi sacuaha të ndyaja ru ne, cuya xi choho scuëë me na xi viteña yojo rë, tsismi me na, hacuaha cueña cuatjin na. Hane xi caveña suva na ne, sehe sinë chu yojo ran sehe cuaca ran cojo ndihi.

¹⁷ Të me jan ne, cojo ngu ni cjuatacun meje sua me xa rë me cojo ngahñu cjuarë me xi cjuahatsja chu chojyihni jan. Xi cuatjin casahmi me ne, camá hacuatjin cavincha Nina xahasen rë me xi cumá hisca nixtin xi cuma chihin hacutjin caveñaacun Nina xi cumá.

¹⁸ Hane sacuaha chjuun xi cahye jan ne, nuhya rë xi má ciudad rcun xi satë rë xi cumatitjun tsëhë yëjë ni xuta xi vitexa xuta ngasunhndë.

18

Cjanengui nandya Babilonia

¹ Hya xi cavatju vihi ne, cahvë nga ngu ángel xi nduvajne tsëhë ngahnga xi jemu tjin rë ngahñu cjuarë. Hane nangui ne, casahasen rë cojo hasen rë ngahñu jan.

² Hane ángel jan ne, cojo ngu xta hñu cajindaya cuitjin:

—¡Cjanengui! ¡Cafë ngahñu rë Babilonia jyë! Quihndë suva machji rë tsëhë xitsehen. Ngajan tsujyihniya hasen tsehen, ngajan vangui yëjë chu nisë xi jinë chu ngu xcusun chocun, chu xi chohovëë xuta chu.

³ Cuatjin camá rë ta tsëhë xi xuta ngasunhndë ne, cavincha sca rë me cojo xan rë cjuatsehen ran. Cojo na vëhë ne, me xi vitexa me ne, casahmi me cjuatsehen. Hacuanitjin tsëhë xuta xi sahmi me negocio ta, camanchina me ngatsë rë cjuatsehen ran. —Cuatjin cachja ángel.

⁴ Sehe cahndë nga ngu xta tsëhë ngahnga xi cachja cuitjin:

—Ngayun xi xuta naha ne, tetjun tsëhë nandya vihi. Tangunxun cojo sa xi cuajiin yun cuatjuxcun jyë rë, hane satiin nuju cjuañihni xi satë rë xuta vëhë.

⁵ Jyë rë na xi hacui nandya vëhë ne, casexohnga rë hisca cavechu ngahnga. Hane Nina ne, cjuaha cuenda me tsëhë cjuatsehen ran.

⁶ Nicuyun tsëhë na chuva xi casahmi na. Jo cuatjin vechutaha castigu xi cumá ran. Tiseccun rë copa ran jo cuatjin sa sehe hitsë sa cumá cjan xi cuma rë copa xi cavincha na tsëhë xuta.

⁷ Ngojo rë cjuaxta rë na xi jercu sahmi na mé xi fehya cjuatacun tsehen rë na ne, ndaja tuhan ran cjuañihni cjuachoho. Cuatjin cumá ran ta, cuitjin catsingatahacacun na cachja na: “Tejña cahndë rcun ta matitjun ngahan. Hacuian cahan ngahan, satiin ná cjuachoho.” Cuatjin tsingatahacacun na.

⁸ Vëhë xi xcun ngu ni nixtin, cuechutaha ran yëjë ni, ta cuechutaha ran cjuachoho, cuechutaha ran jindyá. Hacuaha tsicjéya ran ndihi. Cuatjin cumá ta, tsëhë xi Nina, me xi sahmi cuenda rë jyë ran ne, ma sahmi me yëjë ni.

⁹ Ngajan xi xuta xi rcun xi casahmi cjuatsehen ngajan hacuaha casua cjuasua xahasen rë ngajan ne, scuëë me nihndi rë, hane squihnda me hacuaha cuiyuju va me.

¹⁰ Hane cjuercun rë me ngatsë rë chirrcun xi tivatju ngajan, sehe squindaya me cuichja me cuitjin:

—¡Ay! Jercu choho cavatju ciudad ndajyihni, ciudad rcun. Tu ñahñu ni ne casatë rë yëjë ni cjuacjintacun xi cuma castigu rë.

¹¹ Hacuaha xuta xi sahmi me negocio ne, squihnda me hacuaha choho cumá rë me tsëhë xi quihndë ne, tsajin yo cuatsë chaha xi viteña me,

¹² chaha xi camá tsëhë oro, tsëhë quicha tyava, cojo ndyojo ndacun, cojo tu seti, cojo tsjian ndacun sa lino sa seda, sa xcusun hani sa moradu. Chaha rë ya xi ndaja jne, chaha xi camá tsëhë nehñu elefante, o tsëhë ya xi hnga chji rë o tsëhë quicha sine, quicha hinda o tsëhë ndyojo seti.

¹³ Tsajin yo cuatsë rë chaha rë canela cojo yahnga xcusun xi sahmi xi ndaja chinë comida o sa tyjungunsa, sa balsamo xi hmí rë muro, sa vinu, sa aceite, sa ndyaja, sa chu tsánga, sa naxin o sa carreta, sa mosu cachaha rë xi hacui cjuahñu rë xuta. Tsajin yo cuatsë tsëhë me.

¹⁴ Cuitjin chja tsëhë nandya jan:

—Xcusun ndacun xi jercu cafehya xahasen rijni ne, quijixin tsijin. Yëjë ni cjuanchina rijni xi ndajyihni ne, caféya, hane tsajin nu tsajin nixtin cuya sacu ri.

¹⁵ Ngajan xi me xi caviteña ngajan hane cojo vëhë cama nchina me ne, cjuercun rë me ngatsë rë chirrcun xi tivatju ngajan, xinchacun me cjin tsëhë, hane squihnda me hacuaha choho cumá rë me.

¹⁶ Cuitjin cuichja me tsëhë:

—¡Jemu va jyihni nandya! Camá ngu nandya jyë, jemu ndacun tsjian catsicaja rë xuta rë. Tsjian ndaja xcusun hani moradu. Tsjian xi cavaqui rë nachjun oro cojo ndyojo ndacun cojo tu seti.

17 Peru xcun xi ngu hora ne, café cavetsunya cjuanchina vē.

Hane yějē me xi mattijun xi vitexa tsēhē barcu cojo xuta xi hinchā me cahntsua, cojo cha xi sahmi xa xcun barcu o sa xuta xi sahmi negocio cojo, cumamijí sahmi tiña me tsēhē.

18 Squindayava me hya xi scuēē me nihndi rē xi seti hane cuichja me cuitjin:

—Hatuxa tsajin sa ngu ciudad xi cuantijin ndajyihī sacuaaha camá ciudad jyē vi.

19 Hane cuitejnu me scuan rcu me ta jemu choho má rē me hacuaha squihndava me cuichja me cuitjin:

—¡Cojo cjuatsehen rē xuta nandya vi! Ngatsē rē cjuanchina rē me ne, tu yo ni me xi tjin rē ngu barcu rē chaha ne, cama nchina me. Peru ngu ñahñu ne, cavetsunya.

20 Catamasua nuju tsēhē na, ngahnga. Catamasua nuju ngayun xi tyjahī cjuatacun nuju, ngayun xi má apóstol cojo ngayun xi má profeta. Catamasua nuju ta hindē casahmi Nina castigu na, casahmi cuenda me tsēhē na chuva xi casahmi na cojo nuju.

21 Ngajan xi ngu ángel xi jercu tjin rē ngahñu ne, cafaha me ngu ndoyojo jyē chuva rē natsi rē molinu, hane catsingatjeya rē ngajñi ndachacun. Sehe cachja cuitjin:

—Chuva ngahñu vihi, cuantijin ngahñu xi cjuinengui cojo nandya jyē xi hmí rē Babilonia. Hane tsajin nixtin xi cuya cumá.

22 Tsajin nixtin xi cuinuhya rē xi tsijane cha chjine arpa ngajan, o sa ngu sun, o sa fane chiruvi o sa fane tyjo. Hisca ngu cha chjine tsēhē tu mé ni xcusun ne, cuyaaín sahmi xa ngajan. Hacuaha cuyaaín nuhya rē ndoyojo rē molinu xi sahmi scuan rē pan.

23 Ndihi rē ngu lámpara ne, cuyaaín tsejen hasen rē ngajan. Tsajin nu tsajin nixtin xi ngajan cuma cjuavixan. Cuatjin cumá cojo ta, xuta xi casahmi me negocio ngajan ne, jemu hñu cjua rē me cojo yějē ni xuta ngasunhndē. Hane cavincha sca me xuta ne, cavindacha me cojo xcusun rē me.

24 Hacuaha ngajan cavanga jni rē profeta cojo tsēhē xuta xi tyjahī cjuatacun rē me xcun Nina cojo jni rē yějē ni xicjin me xi camá catsiquehen me nguehe ngasunhndē.

19

Xutacjín xi cuaxēndaja me Nina

1 Hya xi camá cavatju vihi ne, cahndē sacuaaha xta rē xutacjín ngajan ngahnga xi chja cuitjin:

¡Catama jyē, catama hnga Nina! Nina ne, vaxētje me xuta, tjin rē me hasen ndajyihī xi seti, hacuaha ma sahmi me yějē ni.

2 Jemu quixi cjua xi vitexa me ta, casahmi me xujun jyē rē na xi caviteña yojo rē, na xi hñu cjua na.

Na vēhē ne, catsinguetsun na cjuatacun rē ngayējē ni cojo cjuatsehen rē na.

Hane Nina ne, casahmingojo me cojo rē na jni rē xuta xi sahmi xa rē me. Jni rē me xi casahmi na xi cavanga.

3 Sehe cavuya cachja me cuitjin:

—¡Catama jyē, catama hnga Nina! ta, nihndi ran ne, miji nchunchujun ni, nu nu ni.

4 Ngajan xi can ñuju xuta changá cojo catsiñuju xcusun xi quicun ne, caviticja xcun Nina xi cjuaharcun rē me xi tacun me cahndē rcun. Cuitjin cachja me:

—¡Cuatjin jain! ¡Nihñu jyē nihñu hnga Nina!

5 Sehe cavetju tsēhē cahndē rcun ngu xta xi chja cuitjin:

Nihñu jyē nihñu hnga Nina, ngayun xi nihñu xa rē me.

Nihñu jyē hnga me sa quihndi sa changá yun.

6 Hya xi camá ne, cahndē sacuaaha xi tisē xutacjín. Nuhyā rē sacuaaha fane nandan xi jemu hñu vanga o sacuaaha faneya xi tsinga chuhun. Hane cjua rē ne cuitjin chja:

¡Catamajyē catamahnga Nina naja ta, ha cavetsihin sahmi me gobiernu hane ma sahmi me yějē ni!

7 Catamasua naja. Tahan cjuasua xahasen naja. Nihña jyē hnga me tsēhē xi cavechu cjuavixan rē Tsánga.

Chjuun rē ne, ha catsindaja na yojo ran.

8 Casacu rē na cahndē. Hane cuaja na tsjian ndaja xi seti, xi tyjahi.

Tsjian jan ne, hacui xcusun ndaja xi sahmi xuta xi tyjahi cjuatacun rē me xcun Nina.

Cuatjin cachja xutacjín jan.

Sinēsuhī me tsēhē cjuavixan rē Tsánga

9 Hya xi camá ne, cachja ángel cojo ná cuitjin:

—Nihndi cjua vi: “Jercu ndaja tsēhē me xi camachaya rē xi nduva me sinēsuhī me tsēhē cjuavixan rē Tsánga.”

Hane cachja sa ángel cuitjin:

—Cjua xi cachjá ne, cjuaquixi jain rē Nina.

¹⁰ Hane ngahan ne, caticjåtaha ntsacu ángel xi cjuahárcun rë. Peru cachja cojo ná cuitjin: —¡Xicanihñii! ta, tangun ni chjí naja, ta xa naha ne, tangun cojo xa xi nihñu cojo xingun xi sua cumachaya rë cjuaquixi rë Jesús ne, hacui xa xi vitexa Nina. Nina ne, me vëhë chjuhuncun me.

Hacuaha cjuaquixi rë Jesús ne, vëhë sacuaha cacun rë cjua xi cachja profeta.

Me xi quisun rë naxin tyava

¹¹ Sehe cahvë xi tixaha ngahnga, hane ngajan ne, cahvë ngu chu naxi tyava. Hane me xi quisun rë chu ne, chja tsëhë me ta, sahmi chihin me cjua rë me hacuaha quixi me. Jemu quixi cjua me hya xi tsichuva me xuta cojo sa xi hya xi sahmi me si.

¹² Tuxcun me ne, sacuaha ndihi xi ña vitjen. Rcu me ne, jercu hinchasun corona. Hane camahindu ngu ñihi rë me xi tsajin yo vëë rë, peru suva me vëë me.

¹³ Yaja me ngu tsjian xi tjintë ni ne, xi caseyaquinda cojo jni. Hane sacuaha ñihi rë me ne, Cjua rë Nina hmí rë me.

¹⁴ Hane tjengui rë me sindadu cjín tsëhë ngahnga. Sindadu jan ne, cuaja me tsjian ndaja xi tyava, xi tyahi. Hane hacuanitjin hinchasun me naxin tyava.

¹⁵ Hane suva me ne, tsëhë hntsua me ne, vetju ngu quicha yuju xi cuanguihmu rë xutacjín. Hane hacuiin yuma cumá rë me xuta ta, cuitexa rë me cojo yaxti rë quicha. Hane sune me cahndë hisca nune rë uva cojo sa xi cuaxë me xan rë cjuacjan rë Nina, me xi ma sahmi yëjë ni.

¹⁶ Hacuaha xcun tsjian rë me cojo tyjuhmi rë me ne, camahindu ñihi vi: “Me xi matitjun tsëhë ngayëjë ni xi matitjun. Me xi matitjun tsëhë ngayëjë ni xi vitexa.”

¹⁷ Hane cahvë xi ngu ángel ne, secun xcun tsuhi. Hane jindayahñu tsëhë nisë xi jemu hnga vitjen chu. Cuitjin cachja cojo chu:

—Nduvun. Catamatangun yun tsëhë suhi jyë rë Nina.

¹⁸ Ngajan xinu yojo rë xuta xi camatitjun, cojo yojo rë capitán rë sindadu cojo yojo rë xuta xi hñu cjua, cojo yojo rë chu naxin cojo yojo rë xuta xi caxinchasun rë chu. Xinu yojo rë xuta, sa ndaya tjin me o sa xi caxteña me, sa langa me, sa changá me, xinu yojo rë me. —Cuatjin cachja me cojo chu nisë jan.

¹⁹ Hane cahvë chu chojyihí jan cojo xuta xi vitexa me cojo sindadu cjín rë, hane camatangun cojo sa xi sahmi si cojo me xi hinchasun chu naxin tyava jan.

²⁰ Hane ngajñi si vëhë ne, cachjaha rë chu chojyihí jan camá presu chu. Hacuanitjin ne camá presu chu xi casahmi cjuarcun ngatsë rë chu chojyihí cojo sa xi cavindacha chu xuta sehe setaha sellu rë chu xten me hacuaha faharcun me xcusun ru. Sehe cacandiya quicu me catsijo chu ngajñi ndachacun xi ti cojo azufre.

²¹ Hane xicjin chu xi cavangui ne, catsiquehen me cojo quicha xi vetju tsëhë hntsua me xi miji rë naxin. Sehe yëjë ni nisë ne, cajinësua chu hisca xi cavechu rë xahasen ru cojo yojo rë xi cuicun vi.

20

Ngu mil nu xi seyahñu xitsehen

¹ Sehe cahvë ngu ángel xi nduvajne tsëhë ngahnga, hane yahatsja ángel vë llavi tsëhë nduchin hacuaha yahatsja ngu cadena jyë.

² Hane cafaha rë yë jyë jan. Chu vëhë ne, hisca hatsëë tacun chu. Chu vëhë ne, hacui naain o sa Satanás. Hane xi cafaha rë chu ne, catsihñu rë chu cojo cadena xcun xi ngu mil nu.

³ Hacuaha catsingatjenya ru cahntsua nduchin. Sehe casehjähñu tingotjo rë cojo llavi hane casetaha xcun ngu sellu. Cuatjin camá cojo sa xi sacuiin sa cahndë cuindacha ru xutacjín hisca xi cuijnetaha ngu mil nu. Hane xi cuatju vëhë ne, cumandaya nga chu ngu jo nixtin.

⁴ Hya xi camá ne, cahvë cahndë rcun hane xcun silla jan ne, siu me xi casatë rë xa xi cuitexa me. Hacuaha cahvë hasen rë me xi catisun rë rcu ngatsë rë cjuaquixi rë me xi casua me tsëhë Jesús hacuaha ngatsë rë cjua rë Nina. Me vëhë ne, cafaharcuaain rë me chu chojyihí cojo xcusun ru, hacuaha casetaain rë me sellu rë chu sa xten me o sa tsja me. Hane cahvë xi cavuya nga cjuahñu rë me sehe cojo Cristu casahmi me gobiernu xcun ngu mil nu.

⁵ (Yahnga nima ne, cuyaain cjuahñu hisca xi cjuë mil nu jan.) Matsejen ta vëhë nixtin xi tjun cuya cjuahñu rë nima.

⁶ Jercu ndaja tsëhë me hacuaha tyahi cjuatacun rë me xi cojo me satë rë me xi tjun cuya me cjuahñu. Cjuaveya xi majo ne, satiin rë me ta, tsajin mé ma sahmi cojo me. Cumá me sacuaha nahmi xcun Nina cojo Cristu hane sahmi me gobiernu cojo me xcun ngu mil nu.

⁷ Hane xi cuijnetaha mil nu jan ne, cumandaya nga Satanás tsëhë ndavaya hiscan caveya me.

⁸ Sehe cuya cuindacha xutacjín rë jinguyjé ni ngasunhndë, cuindacha me xuta rë Gog cojo xuta rë Magog, cojo sa xi sahmitangun rë tsêhë si. Hane xqui rë me xi cumatangun me ne, cuechu sacuaaha tsumi tjeheh rë ndajjé.

⁹ Hane xi camatangun me condra jan ne, cjue me jinguyjé ni xcun nangui. Hane ngajñi si ne, cuiyujuhndee rë me cahndë xi siu sindadu cjin rë Nina cojo nandya xi tsihmucacun me. Peru ndihi ne, cuijne tsêhë ngahnga hane cjue cueti xuta condra jan.

¹⁰ Hane Naain xi cavindacha rë ne, ningatjenya rë ngajñi laguna tsêhë azufre xi seti. Hane ha cuanitjin ne catundiya chu chojyihî jan cojo chu xi cavindacha. Hane ngajan ne, cuatju chu cjuañihî nixtin nixten, nu cjuî, nu nduva.

Camacuenda tsêhë nima xcun cahndë rcun tyava

¹¹ Hya xi camá ne, cahvë nga cahndë rcun tyava xi matitjun cojo me xi tacun xcun. Hane ngatsë rë cavatjucun me, cafëya nangui cojo ngahnga, hane casacuiin cahndë xi cuma rë.

¹² Hacuaha cahvë nima. Sa changá, sa quihndi, hinchacun yëjé ni nima xcun cahndë rcun jan. Hya xi camá ne, ngu jo libru ne catuxaha. Hacuaha catuxaha ngu libru xi hacjahi. Hane libru vëhë ne, libru rë cjuahñu. Sehe camacuenda tsêhë, sacuaaha xcusun xi casahmi nima, hacutjin xi camahindu xcun libru tjun.

¹³ Ndachacun ne, casua nima xi tjintsja. Cjuaveya cojo tsjun ne, hacuaaha casua nima xi tjintsja. Hane jima ngu nima ne, camacuenda tsêhë hacutjin xcusun xi casahmi me.

¹⁴ Hya xi camá ne, tsajin sa cjuaveya, tsajin Hades, cahndë xi viyuju nima ta, catundiya ngajñi laguna xi seti cojo ndihi. Hane ndihi vëhë ne, hacui cjuaveya majo.

¹⁵ Ngajan xi nima xi casetaain ñihî rë me xcun libru tsêhë cjuahñu ne, cavixuya ngajñi laguna tsêhë ndihi jan.

21

Ngahnga cojo ngasunhndë ne, camá xatsë

¹ Xi cavatju vëhë ne, cahvë ngu ngahnga xatsë cojo ngu ngasunhndë xatsë ta, tsêhë xi ngahnga xi tjun cojo nangui xi tjun ne, cafëya. Hane sacuaaha ndachacun ne, tsajin.

² Hane ngahan, Juan, cahvë nandya xi catsinchacun Nina xi hmí rë Jerusalén xatsë. Canduvajne tsêhë Nina ngajan ngahnga. Jemu ndaja tsejen nandya vë ta, tsejen sacuaaha ngu na xi cuixan xi canicaja rë na tsjian ndajyihî tsêhë xi nduva cha xi tuixan cojo rë na.

³ Sehe cahndë ngu xta hñu xi cachja tsêhë cahndë rcun. Cuitjin cachja:

—Ha quihndë cjue cuiyuju tangun Nina cojo xuta. Hane xuta jan ne, cumá xuta rë me, hane suva me ne, cumá me Nina rë me.

⁴ Hane Nina ne, tsixiya me yëjé ndatuxcun me. Quihndë tsajin sa cjuaveya. Tsajin sa cjuachoho. Tsajin mé má squihnda me. Tsajin cjuahmu. Cuatjin cumá ta, tsêhë xi xcusun changá ne, ha cavatju.

⁵ Hane me xi tacun xcun cahndë rcun ne, cachja me cuitjin:

—¡Tisahme xatsë yëjé ni xcusun!

Hane cachja me cojo ná cuitjin:

—Nihindi cjuva vihi ta, hacui cjuaquixindaja hane macjain naja tsêhë.

⁶ Hane cachja sa cojo ná cuitjin:

—Ha camachihin. Sacuaaha letra xi vetsihin cojo letra A ne, vijnetaha cojo zeta. Hacui ni ngahan xi ntsacu vetsihin ne, hacui ni ngahan xi vijnetaha. Me xi xinda rë xahasen rë me ne, tu cuatjo ni suá cuihi me tsêhë nandá xi sua cjuahñu xatsë.

⁷ Me xi scaa rë cjue xcun ne, sacu rë me cjuatjo rë Nina. Hane cumá ngahan Nina rë me, hacuaaha cumá me quihndi naha.

⁸ Peru yo xi tsacjun, yo xi macjaain rë, yo xi hngacacun, cha tsiquehen, me xi sahmi cjuatsehen ngajñi xihin o sa ngajñi chjuun, o xi sahmi surqui, o xi faharcun nina ndacha, o xi chjaain me cjuaquixi ne, yëjé ni me vëhë ne, sacu rë me cahndë ngajñi laguna tsêhë ndihi xi ti cojo azufre. Hane vëhë ne, hacui cjuaveya xi majo.

Hacutjin jyihî ciudad xatsë xi hmí Jerusalén

⁹ Hane ngu ángel tsêhë yatu jan xi yahatsja tyucu tã xi quitsë rë cojo yatu cjuacjintacun xi vijnetaha jan ne, canduvatjengui ná ne, cachja cojo ná cuitjin:

—Ndove ta, tsingácun ri na xuta vixan, na xi camá chjuun rë Tsánga.

¹⁰ Hane ángel jan ne, quijicojo ná ngajñi nijña naha hiscan ngu ndetjun naxi hnga. Sehe catsingacun ná nandya xi catsinchacun Nina, nandya xi hmí rë Jerusalén ta tinduvajne tsêhë Nina ngajan ngahnga.

¹¹ Hane ña tsejen xi seti cojo hasen tsêhë ngahñu rë Nina, hisca sua hasen rë sacuaaha ngu ndyojo seti xi yufa sacuaaha ndyojo tsin.

¹² Hane cavindee rë ngu xondyojo teya hacuaha hnga. Tejó má tingotjo rë, hane jimangu tingotjo jan ne, ngajan siu ngu ángel. Hacuaha ngajan camahindu ñihi rë tejó tjë rë xuta nangui Israel.

¹³ Xondyojo jan ne, tjin jyan tingotjo jimangu ladu. Jyan má ladu vetjucaa tsuhi. Jyan má ladu ngatihin. Jyan má ladu canangui. Hacuaha jyan má ladu vetje tsuhi.

¹⁴ Xondyojo rë ne, tacun xcun tejó xihndë naña. Hane xihndë naña ne, yaha ñihi rë tejó apóstol rë Tsánga xi camahindu xcun.

¹⁵ Ángel xi chja cojo ná ne, yaha ngu ya naxu tséhë oro xi machjiréhë sacuaha ya chuva xi cjuahachuva rë nandya cojo xondyojo cojo tingotjo rë.

¹⁶ Nandya jan ne, cuadradu jyihí. Jimangu tjeheh rë ne, jo mil jo cientu kilómetro má xi nduju. Hane hacuanitjin ne má xi hnga.

¹⁷ Hane catsichuva xondyojo rë. Véhë tjin rë ngu cientu cojo yachan ñuju nda sacuaha chuva rë xuta ta véhë casahmixa ángel cojo.

¹⁸ Sacuaha xondyojo rë ne, camá cojo ndyojo seti xi hmí rë jaspe, hane nandya ne, suva oro camá hane seti sacuaha ndyojo tsin.

¹⁹ Xihndë naña rë xondyojo rë nandya ne, camá cojo ndyojo seti rë yějë ni xcusun xi sacuaha xcusun rë yejña. Xihndë naña rë xi tjun ne, camá tséhë jaspe. Xi majo ne, tséhë zafiro. Xi majyan ne, tséhë ágata, má ñuju ne, tséhë esmeralda,

²⁰ má hñu ne, tséhë ónice, má jyun ne, tséhë cornalina, má yatu ne, tséhë crisólito, má jyin ne, tséhë berilo, má ñaja ne, tséhë topacio, má tē ne tséhë cirsopraso, má tengu ne, tséhë jacinto, hane má tejó ne, tséhë amatista.

²¹ Sacuaha tejó tingotjo jan ne, camá tséhë tu seti xi hmí perla. Hane jimangu tingotjo camá tséhë ngu perla. Hane ndiyatë rë nandya jan, tséhë suva oro camá peru sacuaha ndyojo seti xi ña hasen tsejen.

²² Ngajan ciudad véhë ne, cahveen ngu yungun. Mamijí rë ta tséhë xi ngajan cuiyuju Nina, Nai naja xi ma sahmi me yějë ni, cojo Tsánga xi hacui me sacuaha yungun.

²³ Cuanitjin ne, mamijí rë tsuhi cojo sá xi sua hasen rë ta, tséhë xi hasen rë ngahñu rë Nina ne, sua hasen rë ngajan, hane Tsánga ne, má ndihi rë.

²⁴ Yějë xutacjin ne, tsujyihya me cojo ndihi vë xi cjue me cojo ngasunhndë rë me, hane xuta matitjun rë me ne, ngajan cjue cani me ngahñu rë xa xi vitexa me cojo xi cuaxëndaja me.

²⁵ Ngajan hisca xi ngu nixtin ne, sechjaain tingotjo rë, tséhë xi ngajan ne, tsajin nixtin cuma nguixun.

²⁶ Hane xutacjin tséhë ngasunhndë ne, cjue cani me ngahñu cjuá rë me cojo cjuanchina rë me.

²⁷ Hatuxa tsajin cahndë xi cuma rë tu mé ni xi hacuiin tyjahi xcun Nina. Tsajin yo xi sahmi cjuatsehen, tsajin yo xi cuichja ndesu. Suva ni me xi casetaha ñihi rë xcun libru rë Tsánga, libru xi yaha ñihi rë me xi sacu rë cjuahñu xatsë ne, me véhë sacu rë me cahndë.

22

¹ Sehe ángel ne, catsingacun ná ndajyë xi hacui nandá xi sua cjuahñu. Nandá véhë ne, nandá yufa xi hasen sacuaha ndyojo tsin. Hane nandá véhë ne, vetju tséhë cahndë rcun rë Nina cojo Tsánga,

² hane vanga taha ndiyatë cavasen nandya. Xingu xingu ladu tséhë ndajyë ne, secun ya tséhë cjuahñu. Ya véhë ne, tejó ndiya xi ngu nu tjin chan tséhë tu rë ta, chuva sá sua tu rë. Hane xca rë ya ne, machjiréhë xi tsirqui rë xutacjin jan.

³ Ngajan ne, tsajin mé xi chohovëé Nina tséhë. Ngajan nandya vë tacun cahndë rcun xi tséhë Nina cojo Tsánga. Hane ngajan ne, me xi tacun xi xa rë me ne, cjuahacuenda rë me.

⁴ Scuëë me xcun Nina, hane ñihi rë Nina ne, setaha xten me.

⁵ Mamijí rë ndihi, sa ndihi rë lámpara o sa tséhë tsuhi ta, Nina Nai naja ne, sua rë me hasen rë me. Hacuaha guabunru xi sahmi me ne, cjuecani rë yějë nu, yějë nixtin.

Camatiña nixtin xi cuya Jesucristu

⁶ Hya xi camá ne, cachja ángel jan cojo ná cuitjin:

—Cjua vihi ne, cumacjain nuju tséhë ta, quixi jain. Nina, Nai naja ne, catsingatju me ángel rë me xi sua cumachaya rë hasen rë xuta xi chja cjuá rë me tséhë xcusun xi xatí cumá.

⁷ Chja cjuá ta:

—Tuhuncuendun xi ngutjen cuinduvá. Jercu ndaja tséhë xuta xi vetjondaja me sah-michihin me cjuá rë libru vihi xi chja tséhë xcusun xi sehe cumá.

⁸ Juan hmí ná. Cahndë, hacuaha cahvë xcusun vihi. Hane hya xi camá cahndë cahvë ne, caticjxcun taha ntsacu ángel jan xi catsingacun ná xcusun vihi ta, cjuaharcun ángel jan.

⁹ Peru cachja ángel cuitjin:

—¡Xicanihñi! ta, tangun ni chjí naja, ta xa naha ne, tangun cojo xa xi nihñu cojo xingun xi má profeta cojo yahnga xingun xi vetjo me cjaa rë libru vihi. Nina ne, me vëhë chjuhuncun me.

¹⁰ Hacuaha cachja me cuitjin:

—Xicavisiini sellu cjaa xi sehe cumachihin xi hinchu libru vihi, ta nixtin rë ne, ha meje cuechu.

¹¹ Cuejña xi xuta xi choho sahmi me ne, catjinduju xi choho sahmi me, hane xuta tsehen ne, catjinduju me cojo cjuatsehen rë me, hacuanitjin ni xuta xi quixi me ne, catjinduju me cojo ndiya rë cjuaquixi, hane xuta xi tyjahi cjuatacun rë me, catjinduju me cojo ndiya rë cjuatacun tyjahi.

¹² Chja me cuitjin:

—Tuhuncuendun xi ngutjen cúa. Hane xi cúa ne, nduva cojo chjí nuju. Suá rë jimangu me chuva rë hacutjin xi casahmi me.

¹³ Ngahan ne, sacuaaha letra xi vetsihin cojo letra A ne, vijnetaha cojo zeta. Hacu ni ngahan xi ntsacu vetsihin ne, hacui ni ngahan xi vijnetaha. Tejña hisca ntsacu cavetsihin yëjë ni, hane tejña cuaha hya xi cjuë. Matitjun, matjengui ngahan.

¹⁴ Jemu ndaja tsëhë xuta xi catsityjahi me tsjian rë me cojo sa xi sacu rë me cahndë xi sinë me tsëhë ya rë cjuahñu xatsë. Xi cuatjin ne, cuma cuisehen me taha tingotjo rë nandya jan.

¹⁵ Peru xuta tsehen cuiyuju me ndatsen cojo xuta xi sahmi cjuasurqui, o xi sahmi cjuatsehen ngajñi xihin o sa ngajñi chjuun, o xi tsiqehen, o xi faharcun nina ndyojo o me xi tsihmucacun cjuandacha. Yëjë ni me vëhë cuiyuju me ndatsen nandya.

¹⁶ —Ngahan, Jesús ne, catsingátju ángel naha xi tsinguixi xcun ngayun xuta yungun cjuaquixi vihi. Ngahan ne, tjë rë David má ngahan. Quihndindaicjin rë David má ngahan. Niñú seti tsëhë nguitajñu má ngahan. —Cuatjin chja Jesús.

¹⁷ Ngajan xi Hasen rë Nina cojo na xi cuixan cojo Tsánga ne, cjuayangui me cuitjin:

—Nduvun.

Hacuaha me xi cuihndë cjaa vëhë ne, cuichja me cuinitjin ni:

—Nduvun.

Sa xi xinda nuju ne, nduvun. Sa xi cjueyatacun ne, siuhun tu cuatjo ni nandá rë cjuahñu.

¹⁸ Suá cumachaya nuju ngayun xi visiñuju cjaa rë xujun vihi xi sehe cumachihin ta, sa xi tjin yo xi cuesuntaha sa cjaa cojo cjaa xi camahindu nguehe, Nina ne, cuesúntaha me cjuañihi xi camahindu xcun xujun vi.

¹⁹ Hacuanitjin ne, sa xi tjin yo xi cjuahataha rë cjaa vihi xi sehe cumachihin, Nina ne, cjuahaxin me cahndë xi cumá rë me xcun xujun rë cjuahñu cojo tsëhë nandya xi catsinchacun Nina cojo tsëhë xcusun ndaja xi camahindu xcun libru vihi.

²⁰ Hane me xi sua cjuaquixi xi cuicun vi ne, chja me cuitjin:

—Hatuxa nduva xati.

Cuatjin chja me. Cuatjin ndatjin. Nduvun, Tatá Jesús.

²¹ Quihndë ne, catisaté nuju cjuandaja rë Nai naja, Jesucristu. Cuatjin jain cumá.